


Chyoiyúng  
chyumlaiká:  
dangshikaq asik; Zaiwa



New Testament in Zaiwa

Chyoiyúng chyumlaiká: dangshikaq asik; Zaiwa  
New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 4 Mar 2019 from source files dated 29 Nov 2017  
23f9fc55-a8a4-59ef-9513-707ec336b0ee

## Contents

Mahte . . . . .	1
Markuq . . . . .	52
Lukaq . . . . .	84
Yohan . . . . .	138
Lagyo . . . . .	179
Romaq . . . . .	226
1 Korinhtuq . . . . .	248
2 Korinhtuq . . . . .	269
Galatiq . . . . .	283
Ehpesu . . . . .	291
Hpilipi . . . . .	298
Kolose . . . . .	303
1 Htesaloni . . . . .	308
2 Htesaloni . . . . .	313
1 Timohti . . . . .	316
2 Timohti . . . . .	322
Tituq . . . . .	326
Hpilemon . . . . .	329
Hebre . . . . .	331
Yakuq . . . . .	347
1 Petruq . . . . .	353
2 Petruq . . . . .	359
1 Yohan . . . . .	363
2 Yohan . . . . .	369
3 Yohan . . . . .	370
Yude . . . . .	371
Shing-rán . . . . .	373

**MAHTE**  
**é Gabú Danglù Laiká**  
 (The Gospel of Matthew)

*Yesuq É Byùxik Shap Kyô É Hkyô*

*Luk 3:23-38*

<sup>1</sup> Abraham é awut ashín, Dawiq é yhangzo yhangshu, \* Yesuq Hkrisduq é byùxik labaù gi, a-ô mâ é eq rajung za nghut lhê.

<sup>2</sup> Abraham gi, Isak lé hkû;

Isak gi, Yakup lé hkû;

Yakup gi, Yudaq eq yhanggu yhangmâng pé lé hku é nghut lhê;

<sup>3</sup> Yudaq gi, Hparet eq Zera lé hkû, haú nhik é yhângnu gi, Tamar nghut ri.

Hparet gi, Hesrun lé hkû;

Hesrun gi, Ram lé hkû;

<sup>4</sup> Ram gi, Aminada lé hkû;

Aminada gi, Nashon lé hkû;

Nashon gi, Salamun lé hkû;

<sup>5</sup> Salamun gi, Buaq lé hkû;

Buaq é yhângnu gi, Rahap nghut ri.

Buaq gi, Obet lé hkû;

Obet é yhângnu gi, Ruhtaq nghut ri.

Obet gi, Yese lé hkû;

<sup>6</sup> Yese gi, Hkohkâm Dawiq lé hkû;

Dawiq gi, Sholumon lé hkû; Sholumon é yhângnu gi, Uriaq yhangmyi dut wú sù nghut ri.

<sup>7</sup> Sholumon gi, Rehoboam lé hkû;

Rehoboam gi, Abiyaq lé hkû;

Abiyaq gi, Asa lé hkû;

<sup>8</sup> Asa gi, Yehoshaphat lé hkû;

Yehoshaphat gi, Yoram lé hkû;

Yoram gi, Uzi-aq lé hkû;

<sup>9</sup> Uzi-aq gi, Yohtam lé hkû;

Yohtam gi, Ahaza lé hkû;

Ahaza gi, Hezekiaq lé hkû;

<sup>10</sup> Hezekiaq gi, Manase lé hkû;

Manase gi, Amon lé hkû;

Amon gi, Yosiaq lé hkû;

<sup>11</sup> Yosiaq gi, Babelon má shúm dut huí é hkûn, Yehkoniasq eq yhanggu yhangmâng pé lé hku é nghut ri.

<sup>12</sup> Babelon má shúm dut huí é htâng má,

Yehkoniasq gi, Shalahtila lé hkû;

Shalahtila gi, Zerubabelaq lé hkû;

<sup>13</sup> Zerubabelaq gi, Abiut lé hkû;

Abiut gi, Eliakim lé hkû;

Eliakim gi, Azor lé hkû;

<sup>14</sup> Azor gi, Zaduk lé hkû;

Zaduk gi, Ahkim lé hkû;

Ahkim gi, Eliut lé hkû;

---

\* 1:1 Awut ashín eq yhangzo yhangshu gâ é lé, Chyúmdang ra-am má, "yhangzo" ga le bo tô lhê.

<sup>15</sup> Eliut gi, Eliaza lé hkû;  
 Eliaza gi, Mahtan lé hkû;  
 Mahtan gi, Yakup lé hkû;

<sup>16</sup> Yakup gi, Mariq é yhanglâng Yosep lé hku é nghut ri;  
 Mariq gi, Hkrisduq gâ é Yesuq lé hku é sù nghut ri.

<sup>17</sup> Haû mù, Abraham é pyat mai Dawiq é pyat jé shoq gi, byùxik raxe myi xik; Dawiq pyat mai Babelon má shúm dut huí é hkûn jé shoq gi, byùxik raxe myi xik; shúm dut huí é hkûn mai Hkrisduq† é pyat jé shoq gi, byùxik raxe myi xik nghut ri.

### *Yesuq Hku Lé Lo É Hkyô*

*Luk 2:1-7*

<sup>18</sup> Yesuq Hkrisduq hku lé lo é hkyô gi, a-ô mâ é eq rajung za nghut ri: Yesuq é yhangnu Mariq gi, Yosep èq dúng tô é sù nghut ri; nghut kôlhang, yhangnhik a zùm shi má, yhang gi, Chyoiyúng Woi-nyí mai zogúng dut bê nghut ri. <sup>19</sup> Yhâng é yhumsíng hpó Yosep gi, dingmán sù nghut luí, yhang lé byu pé hí má hoq a kâm lhoq hpu nau é yanmai, tsik za lhoq kâng pyám râ dâ ri.

<sup>20</sup> Nghut kôlhang, yhang haû su myit nyi é hkûn, yhupmoq má, haû Yhumsing é maumang lagyo gi, yhang lé, lé htoq shit luí, "Dawiq é yhangzo yhangshu Yosep ê, haû náng é yhumsíng myhí Mariq lé hâng yù râ hkyô lé, hkâ-myit chiq; haí mù gâ le, yhang wun tô é zoshâng gùng gi, Chyoiyúng Woi-nyí dông lo é nghut lhê. <sup>21</sup> Yhang gi, yuqzo rayuq hkû râ nghut luí, nàng gi, zoshâng haú lé, Yesuq nghû myìng myhíng byi ra râ nghut lhê; hkâsu mù gâ le, Yhang gi, Yhâng é byu pé lé, yhangmoq é yubak mara mai hkyi yù râ sù nghut lhê." ga taí ri.

<sup>22</sup> Shí hkyô banshoq gi, Garai Gasâng èq, haû myiqhtoi dông taí é dang lé lhoq dik é nghut ri. <sup>23</sup> Myiqhtoi dang haû gi, "Haû zomyi gyíng gi, zogúng dut luí, yuqzo rayuq hkû râ nghut lhê; Yhâng é myìng lé gi, Emanuelaq ga kó râ nghut lhê."☆ gâ ri. Hau é lichyúm gi, "Garai Gasang gi, nga-nhúng eq rahá nghut nyi lhê." gâ é nghut lhê.

<sup>24</sup> Yosep gi, yhup bûn lo é hkûn, haû Yhumsing é maumang lagyo taí é eq rajung za, Mariq lé, yhangmyi dông yhûm má shuí yù bê nghut ri. <sup>25</sup> Nghut kôlhang, yhang gi, yuqzo haû hku é hkûn jé shoq, Mariq eq gungsho a zùm nghut ri. Yuqzo haú lé, yhang gi, Yesuq ga myhíng byí ri.

## 2

### *Buihtoq Hkyam Mâ É Hpaqchyí Bò Bang*

<sup>1</sup> Herut hkohkâm up nyi é u lé, Yuda mau mâ é Betlehem wà má Yesuq lé hku é nghut ri. Hau htâng, buihtoq hkyam mâ é hpaqchyí bò bang gi, Yerusalem wà mó má jé lé kômù, <sup>2</sup> "Haû hku lé lô bê Yudaq byu pé é Hkohkâm gi, hkâmá nghut lhê lhú? Yhâng é kyí lé, buihtoq hkyam má ngamoq myàng luí, Yhang lé noq râ matú jé lé é nghut lhê." ga luí, myí akô nghut ri.

<sup>3</sup> Herut hkohkâm gi, haú hkyô lé wó gyo jáng myit myô nyi ri; hau htoq agó, Yerusalem wà mó mâ é lhunglhang bang le, myit myô bum akô nghut ri. <sup>4</sup> Haû mù luí, yhang gi, byu pé é hkyangjong agyi pé eq tarâ sará pé banshoq lé, ji tsíng yù mù, haû Hkrisduq hkâmá hku lé lô râ nghut é hkyô lé myí ri. <sup>5</sup> Haú hkûn, yhangmoq gi, "Yuda mau Betlehem wà má nghut lhê. Hkâsu mù gâ le, shí hkyô eq séng luí, haû myiqhtoi kâ tô é má,

<sup>6</sup> 'Yudaq mau mâ é Betlehem wà ê, nàng gi, Yudaq mau mâ é wà pé má, je tiq sù a nghut; hkâsu mù gâ le, ngá é Israelaq byu pé lé upzúng râ Zau gi, náng chyáng mai htoq lô râ nghut lhê.'☆  
 ga bo tô ri." ga tû taí akô.

<sup>7</sup> Hau htâng, Herut gi, haû hpaqchyí bò bang lé haq ji yù mù, kyí lé htoq shit é ahkyíng lé, yhangmoq chyáng mai hkyak wó myí sê yù bê nghut ri. <sup>8</sup> Haû mù, yhang

† 1:17 Grik dong Hkrisduq gâ é gi, xù but hui Sù gâ é lichyúm nghut mù, Hebre dong Mesaia gâ é eq rajung za nghut lhê. ☆ 1:23 Esai 7:14 ☆ 2:6 Mihka 5:2

gi, "Nungmoq, zoshâng haú lé rago ê ho wú keq. Ngò le, Yhang lé ê wó noq râ matú, Yhang lé nungmoq ê myâng eq yhang, ngo lé lo shit kyo keq." ga taí luí, haú bang lé Betlehem wà shut nhang kat bê nghut ri.

<sup>9</sup> Yhangmoq gi, haú hkohkam é dang lé gyô yu é htâng má, htoq e ló bekô nghut ri. Haú buihotoq hkyam má yhangmoq myang é kyî gi, haú zonú nyi é ahtoq ang ang má ló nô é jé shoq, yhangmoq é hí má e ló byî ri. <sup>10</sup> Yhangmoq gi, kyî haú lé myàng jáng, gyai yhang gabú bum akô nghut ri. <sup>11</sup> Yhangmoq gi, haú yhûm má wang e ló kô é hkûn, zonú eq yhângnu Mariq lé myàng kômù, hkyihput htuoq luí, haú zonú lé noqkuq akô; hau htâng, yhangmoq é sutdek pé lé le hpóng luí, hîng, namngón jung loban eq mura\* pé lé yù mù, Yhang lé chyunghuq byî akô nghut ri. <sup>12</sup> Yhangmoq gi, Herut chyáng a dum taú ló râ matú, yhupmoq má, yhangmoq lé sidiq byî é hui kômù, hkyô gó hkat dông yhangmoq é mau shut taú ló bekô nghut ri.

#### *Egutuq Ming Shut Hfang E É Hkyô*

<sup>13</sup> Yhangmoq ló byuq é htâng má, haú Yhumsing é maumang lagyo rayuq gi, Yosep lé yhupmoq má htoq shit mù, "Toq aq! Haú zoshâng eq yhângnu lé, Egutuq ming shut shuí hfang é aq. Ngò, nang lé dum ji yu é ahkyíng jé shoq, haú má nyi nyi keq. Haí mù gâ le, Herut gi, zoshâng haú lé sat râ matú, ho nyi bê nghut ri." ga taí ri.

<sup>14</sup> Haú mù, yhang gi, toq luí, myín lé yhang, zôshang me lé shuí chûng mù, Egutuq ming shut e ló bê nghut ri. <sup>15</sup> Yhangmoq gi, Herut shi é jé shoq, haú má nyi nyi akô. Haú gi, "Ngá zo lé, ngò, Egutuq ming mai wut htoq yû bê nghut lhê."☆ ga, haú Yhumsing éq myiqhtoi dông taí é dang lé lhoq dik é ru nghut lhê.

<sup>16</sup> Herut gi, yhang lé, hpaqchyî bò bâng eq mhaú pyâm tô é lé sé jáng, nhikmo-yo bê nghut ri; haú mù, yhang gi, haú hpaqchyî bò bâng chyáng mai wó sê yu é ahkyíng lé sôn wú mù, Betlehem wà eq hau é awui ayâm mâ é wà pé má nyi é, í zân mai a-ô mâ é yuqzo pé banshoq lé, sat pyám nhang ri. <sup>17</sup> Haú gi, "Ramaq gâ é jowò má, yón kuq é eq ngau garû é htê lé wó gyô ri; Rahkelaq gi, yhang zô pé a nyi byuq lo kô é yanmai, ngau nyi é eq nhik a wó tîng dut ri."☆ ga luí, <sup>18</sup> myiqhtoi Yeremiaq dông taí tô é dang lé lhoq dik é nghut ri.

#### *Nazaret Wà Má Dum Taú Lo É Hkyô*

<sup>19</sup> Herut shi byuq é htâng, Egutuq ming má, haú Yhumsing é maumang lagyo gi, Yosep chyáng yhupmoq dông lé htoq shit mù, <sup>20</sup> "Toq aq, haú zôshang me lé shuí chûng mù, Israelaq ming má taú ló aq; hkâsu mù gâ le, haú zoshâng lé sat naú bang shi byuq bekô nghut ri." ga taí ri.

<sup>21</sup> Haú mù, Yosep gi, zôshang me lé shuí chûng mù, Israelaq ming shut taú ló bê nghut ri. <sup>22</sup> Nghut kôlhâng, yhang gi, Yuda mau má, Arhkela-uq, yhângwa Herut é hkó má xoq up nyi é hkyô lé wó gyo jáng, haú má a wám ló lo nghut ri. Yhupmoq má sidiq byî é huí é eq rajung za, yhang gi, Galile mau shut e ló mù, <sup>23</sup> Nazaret gâ é wà má ló nyi nyi bê nghut ri. Haú mù, "Yhang lé, Nazaret wà byù ga râ nghut lhê." ga luí, haú myiqhtoi pé dông taí tô é dang lé lhoq dik é nghut ri.

### 3

#### *Wui-myhup Sará Yohan Shui Hen É Hkyô*

*Mrk 1:1-8; Luk 3:1-18; Yhn 1:19-28*

<sup>1</sup> Haú yoq má, Wui-myhup Sará Yohan htoq lô mù, Yuda mau mâ é yoso má hko kyô é gi, <sup>2</sup> "Myit lhîng keq; hkâsu mù gâ le, mauhkûng mingdán gi, chyâng lò bê\* nghut ri." gâ ri. <sup>3</sup> Haú yuq gi, "Haú yoso má, byù rayuq garû taí é htê gi,

\* 2:11 Mura gi, chi wó kut jung xû nghut lhê. ☆ 2:15 Hos 11:1 ☆ 2:17 Yer 31:15 \* 3:2 Mauhkûng mingdán gi, chyâng lò bê gâ é lichyúm gi, Garai up râ ahkyíng chyâng lò bê gâ é nghut lhê.

'Haù Yhumsing é matú, hkyô hen to keq; Yhâng é matú, hkyô lhoq nyhang to keq.' gâ ri.<sup>✠</sup>

ga myiqhtoi Esai-aq taì tô é sù yuq nghut ri.

<sup>4</sup>Yohan gi, gola-uq shomaú èq saì é mebu wut mù, yhâng é hpyidum má gi, shokuq hpyihit hit ri. Yhâng é zoshuq gi, dinggám eq yosô byo-î pé nghut ri. <sup>5</sup>Yerusalem wà mó mâ é bang, Yuda mau banshoq mâ é bang eq Yodan làng awui ayàm lhunglhang má é bang gi, yhâng chyáng htoq e bum akô. <sup>6</sup>Yhangmoq gi, yhumsing é mara lé yín yû kôluì, yhâng chyáng mai Yodan làng má wui-myhup hkâm yu bum akô nghut ri.

<sup>7</sup>Nghut kôlhang, yhang gi, yhang wui-myhup hkâm byî é jang má, Hparishe pé eq Saduke pé myo myo lé lo nyì kô é lé myàng jáng, yhangmoq lé taì é gi, "Duq htân lhangmuì amyû pé ê, jé lô râ yubak dam mai wó hpang lut kó sháng gaq ga, nungmoq lé ó yuq taì pûn é lhuì? <sup>8</sup>Myit lhîng hkyô eq gingdán é ashi pé zui keq. <sup>9</sup>'Ngamoq gi, Abraham é yhangzo yhangshû pé nghut lhê.' nghû luì, yhumsing é i-myt unghkaù má hkâlum to kó. Hkâsu mù gâ le, ngò, nungmoq lé taì kyo kôlé, Garai Gasang gi, luqgok shí pé mai, Abraham é matú yhangzô pé wó hpan htoq kat lhê. <sup>10</sup>Ahkuì lhang, Garai Gasang gi, Yhâng é wazung lé haù sikkâm wang pé má tô to bê nghut ri; haù mù, ge é ashi a zui é agàm hkangmó lé gi, htug lhêng pyám mù, myi má dú kat pyám râ nghut lhê.

<sup>11</sup>Ngò gi, nungmoq myit lhîng kó sháng gaq nghû, wui èq za wui-myhup hkâm byî lhê. Nghut kôlhang, ngá htoq má wum-o a-tsam je bo é sù rayuq, ngá htâng má jé lé lô shirà nghut luì, ngò gi, Yhâng é hkyî-tsung chûng byi râ lhang a gingdán; Yhang gi, Chyoiyúng Woi-nyí má le, myi má le, nungmoq lé wui-myhup hkâm byi râ nghut lhê. <sup>12</sup>Yhang gi, loq má byò chung to mù, guq chyarâng mâ é guq bùm lé hik sân pyám luì, já é guq cham lé gi, guqchyî má tsîng kat to mù, guqsôm lé kúm gi, hkâ-nhám le shi byuq a sê é myî èq nyhê hkyô pyám râ nghut lhê." gâ ri.

### *Yesuq, Wui-myhup Hkâm Yu É Hkyô*

*Mrk 1:9-11; Luk 3:21-22*

<sup>13</sup>Haù hkûn, Yesuq gi, Yohan chyáng wui-myhup hkâm yù râ ga, Galile mau mai Yodan làng má jé lé lo ri. <sup>14</sup>Nghut kôlhang, Yohan gi, "Ngò sheq Náng chyáng wui-myhup hkâm yù râ sù ru nghut lhê nhîng! Nàng sheq ngá chyáng lé lo lhê lhuì?" ga luì, lhom taì hkûn ri.

<sup>15</sup>Haù hkûn, Yesuq gi, "Dingmán hkyô banshoq lé, nga-nhúng lhoq dik râ é yanmai, Ngo lé wui-myhup hkâm byi laq." ga tû taì ri. Haù mù, Yohan le, gyo byi bê nghut ri.

<sup>16</sup>Yesuq gi, wui-myhup hkâm yù eq yhang, wui mai htoq lo ri. Haù hkûn, mauhkûng bóng lô mù, Garai Gasâng é Woi-nyí gi, hpûngkyui gunghkyâng sù é dông mai, Yhâng ahtoq má lé gyó nô tô é lé, Yhang myang kat ri. <sup>17</sup>Haù hkûn, "Shí yuq gi, Ngò chyitdap é Ngá zo nghut lhê; Yhâng é ahtoq má Ngò gabú myit ngón nyi lhê." ga mauhkûng mai danghtê htoq lo ri.

## 4

### *Yesuq, Gunglaú Huì É Hkyô*

*Mrk 1:12-13; Luk 4:1-13*

<sup>1</sup>Hau htâng má, Chyoiyúng Woi-nyí gi, Yesuq lé, nat Tsadán èq gunglaú é hui nhâng râ matú, yoso shut shuì ê ri. <sup>2</sup>Yesuq gi, zoshuq gám é myi xê nyí myi xê myìn jé jáng, zòmüt hui bê nghut ri. <sup>3</sup>Haù hkûn, gunglaú sù gi, Yhâng chyáng lé mù, "Nàng, Garai Gasâng é Yhangzo nghut le gi, luqgok shí pé lé muk dut nhâng aq." ga taì ri.

<sup>4</sup>Haù jáng, Yesuq gi, "Byù gi, muk èq za asak duì râ a nghut; Garai Gasâng é nhut mai htoq lo é mungdang hkangmó èq sheq asak duì râ nghut lhê.<sup>✠</sup> ga luì, Chyúmdang má kâ tô ri." ga yhang lé tû taì ri.

<sup>5</sup> Haú hkûn, nat Tsadán gi, Yesuq lé, chyoiyúng myuq\* má shuí ê mù, noqkuq yhum je myhang é shúhtâng htoq má yap nhang to luí, <sup>6</sup> "Nàng, Garai Gasâng é Yhangzo nghut le gi, byam gyó kat wú aq. Hkâsu mù gâ le,

'Náng é matú, Garai Gasang gi, Yhâng é maumang lagyô pé lé taí to râ nghut mù,

luqgok má Náng é hkyî a ló htung shoq,

yhangmoq é loq èq Nang lé lhom bún yû kó râ nghut lhê.<sup>✠</sup>

ga luí, Chyúmdang má kê tô ri." ga taí ri.

<sup>7</sup> Nghut kôhlang, Yesuq gi, "'Haú Yhumsîng, nungmoq é Garai Gasang lé, wó chyam wú râ a nghut.<sup>✠</sup> ga luí le, Chyúmdang má kê tô ri." ga, yhang lé tû taí ri.

<sup>8</sup> Nat Tsadán gi, Yesuq lé, gyai yhang myhang é bùm htoq má shuí doq ló mù, mingkan má joq é mingdán pé banshoq eq haú pê é hkikhkâm hkyô lé tûn shit ri. <sup>9</sup> Hau htâng, yhang gi, "Nàng hkyihput htuq mù, ngo lé noq é nghut jáng, shí pé banshoq, Nang lé ngò byi râ." ga, Yesuq lé taí ri.

<sup>10</sup> Haú hkûn, Yesuq gi, "Tsadán nàng, ló byuq aq! Hkâsu mù gâ le, 'Haú Yhumsîng náng é Garai Gasang lé za, nàng noqkuq dojaú ra râ nghut lhê.<sup>✠</sup> ga luí, Chyúmdang má kê tô ri." ga, yhang lé taí ri.

<sup>11</sup> Haú mù, nat Tsadán gi, ló byuq bê nghut luí, maumang lagyô pé gi, Yesuq lé, lé dojaú nyi akô nghut ri.

#### *Yesuq Mungdang Hko Hi Ló É Hkyô*

*Mrk 1:14-15; Luk 4:14-15*

<sup>12</sup> Yesuq gi, Wui-myhup Sará Yohan htóng gyó é hkyô lé wó gyo jáng, Galile mau shut dum taú ló bê nghut ri. <sup>13</sup> Yhang gi, Nazaret wà mai htoq ló mù, Zebulun eq Nahtali mau mâ é nhông yàm má joq é Kaperna-um wà má ló nyi nyi ri. <sup>14</sup> Haú gi, myiqhtoi Esai-aq laiká má,

<sup>15</sup> "Zebulun mau eq Nahtali mau, wuimau mâ é hkyô, Yodan làng yàm, tûngbaù pé nyi é Galile mau ê,

<sup>16</sup> mauchut hkaú má nyi nyi é bang, maubó mó lé myàng bê nghut ri;

shí wup hkaú má nyi to bâng é matú, maubó lô bê nghut ri."<sup>✠</sup>

ga kê tô é dang lé lhoq dik râ matú nghut ri.

<sup>17</sup> Haú hkûn mai, Yesuq gi, "Myit lhíng keq! Mauhkûng mingdán gi, chyâng lò bê nghut ri." ga, mungdang hko hi e ló bê nghut ri.

#### *Yesuq É Chángzo Hí Dut Bang*

<sup>18</sup> Yesuq gi, Galile nhông yàm má hkyô sô wún é hkûn, Petruq gâ é Simun eq yhanggu Andre nhiktâng lé myang ri. Yhangnhik tâng gi, ngozo kóng zo su nhik nghut mù luí, nhông má gùn dú nyi akô nghut ri. <sup>19</sup> Haú mù, Yhang gi, haú nhiktâng lé, "Ngá htâng cháng keq; Ngò, nungnhik lé, byù lé châng kóng su nhik dut nhâng râ nghut lhê." ga taí ri. <sup>20</sup> Haú hkûn, yhangnhik gi, radá dâm, gùn pé lé tô pyâm to luí, Yhang htâng cháng bekô nghut ri.

<sup>21</sup> Yesuq gi, jowò haú mai xoq sô e ló le, Zebedi é yhangzo, Yakuq eq yhanggu Yohan nhiktâng lé myang ri. Yhangnhik gi, yhangnhik é yhângwa Zebedi eq rahá, lhaí hkaú má gùn hpo nyi akô. Yhangnhik lé, Yesuq wut kat jáng, <sup>22</sup> yhangnhik gi, radá dâm, yhangnhik é yhângwa eq lhaí haú lé, tô pyâm to kôluí Yesuq htâng cháng bekô nghut ri.

#### *Nò Bang Lé, Yesuq Lhoq Gê Byî É Hkyô*

*Luk 6:17-19*

<sup>23</sup> Yesuq gi, Galile mau ramau gón má htoq ê mù, tarajong pé má, mhoqshit luí, mauhkûng mingdán eq sêng é gabú danglù lé, hko kyo uchyang, byu pê chyáng mâ é nõhpyo ajung jung hui bang eq noli nojàng amyû myû dap bang lé, lhoq gê byî wún ri.

<sup>24</sup> Yesuq eq sêng é hkyô ludang gi, Suriq ramau gón má byo myín ló mù, byu pé gi, awáng

\* 4:5 chyoiyúng myuq gi, Yerusalem lé gâ lhê. ✠ 4:6 Hkya-on 91:11-12 ✠ 4:7 Tarâ Pun 6:16 ✠ 4:10 Tarâ Pun 6:13 ✠ 4:16 Esai 9:1-2



nòhpyo ajung jung huí é bang, hkê-nhô jamjaû nyi é bang, nat gang wang júng é bang, mhûngtuq tuq é bang, gùngjum shi é bang lé, shuî lé lô kôluî, Yhang gi, haú bang lé lhoq gê byî ri. <sup>25</sup> Galile mau, Dekapoli,† Yerusalem, Yuda mau eq, Yodan làng tû tap mâ é byù moq mó gi, Yesuq htâng châng bum akô nghut ri.

## 5

*Hkungsô Wó É Tarâ**Luk 6:20-23*

<sup>1</sup> Yesuq gi, byù moq mó lé myàng jáng, bùm má doq lô luî, lô zung tô ri. Haú hkûn, Yhâng é chángzô pé gi, Yhâng chyáng lé lô kôjáng, <sup>2</sup> Yhang nhut hkum hpóng luî, yhangmoq lé mhoqshit é gi:

<sup>3</sup> "Woi-nyí má, asho awui dut é bang gi, hkungsô wó nyi ri; hkâsu mù gà le, mauhkûng mingdán gi, yhangmoq é mingdán nghut nyi ri.

<sup>4</sup> Myit iyon huí é bang gi, hkungsô wó nyi ri; hkâsu mù gà le, yhangmoq gi, nhik lhoq tîng é hui kó râ nghut lhê.

<sup>5</sup> I-myt nú-nhâm é bang gi, hkungsô wó nyi ri; hkâsu mù gà le, yhangmoq gi, mingkan lé wó sîng kó râ nghut lhê.

<sup>6</sup> Dingmán hkyô lé mut shit nyi é bang gi, hkungsô wó nyi ri; hkâsu mù gà le, yhangmoq gi, nhik dik shoq myàng zo kó râ nghut lhê.

<sup>7</sup> Shogyo nhikmyin myit bo é bang gi, hkungsô wó nyi ri; hkâsu mù gà le, yhangmoq gi, shogyo nhikmyîn yu é hui kó râ nghut lhê.

<sup>8</sup> Myit sansêng é bang gi, hkungsô wó nyi ri; hkâsu mù gà le, yhangmoq gi, Garai Gasang lé myàng kó râ nghut lhê.

<sup>9</sup> Nguingón hkyô sô xoq byî é bang gi, hkungsô wó nyi ri; hkâsu mù gà le, yhangmoq gi, Garai Gasâng é yhangzô pé gà é hui kó râ nghut lhê.

<sup>10</sup> Dingmán hkyo é yanmai zing-ri huí é bang gi, hkungsô wó nyi ri; hkâsu mù gà le, mauhkûng mingdán gi, yhangmoq é nghut nyi ri.

<sup>11</sup> Ngá é yanmai, byu pê èq, nungmoq lé rhoi é, zing-rî é, a teng a mán é dông agê ashop é dang amyû myû taí tso kô é hkûn, nungmoq hkungsô wó nyi ri. <sup>12</sup> Nguingón gabú nyí keq, hkâsu mù gà le, nungmoq é matú kô é chyunghuq gi, mauhkûng mingdán má joq tô ri. Nungmoq é hí lhê é myiqhtoí pé lé le, yhangmoq gi, haú dông zing-rî laí lo wú bekô nghut ri.

*Xo Eq Maubó**Mrk 9:50; Luk 14:34-35*

<sup>13</sup> Nungmoq gi, myidàm htoq mâ é xo nghut nyi lhê. Nghut kôlhang, xo gi, mán kân byuq jáng, haú lé hai èq dum wó lhoq ngam yù râ lhu? Shinggan shut dú pyám mù, byu pê èq nâng pyeq pyâm é mai lai luî, hai akyû le bò râ a nghut lo.

<sup>14</sup> Nungmoq gi, mingkân é maubó nghut akô; bùm htoq mâ é myuq lé gi, wó nghop to râ a nghut. <sup>15</sup> Myibung lé tap mù, mûng èq nghop tô é ó a kut wú kó; haú su kut râ malaî, yhúmhaû má lúng tô é bang yuq hkangmó myoq wó myâng râ matú, tsungjang má kúm tsung to râ nghut lhê. <sup>16</sup> Haú eq rajung za, byu pé gi, nungmoq é ge é muzó pé lé byu-myàng luî, mauhkûng htoq mâ é nungmoq é Îwa lé hkya-on kó sháng gaq, nungmoq é maubó lé yhangmoq é hí má duq nhang to keq.

*Tarâ Lhoq Dik É Hkyô*

<sup>17</sup> Ngò gi, myiqhtoí pê é dang eq jep é tarâ lé lhoq hpyoq pyám râ matú, jé lé é nghut nhô hkâ-ngâm kó; haú pé lé lhoq dik râ matú sheq jé lé é ru nghut lhê. <sup>18</sup> Ngò, nungmoq lé teng za taí kôlé, mauhkûng eq myigùng byuq byuq le lhang, haú pé a ban lhoq dik dik gi, jep é tarâ mâ é tiq dik é dangjí eq myihkyet zo ralhum lhang byuq byuq râ a nghut. <sup>19</sup> Jep é tarâ shí pé mâ é tiq dik é dang rahkun lé lu lai luî, góbang lé le, haú su kut râ matú mhoq byî é sù ó yuq nghut kôle, mauhkûng mingdán má tiq dik sù gà é hui râ nghut lhê;

† 4:25 Dekapoli gà é gi, Grik dông myuq raxê lé gà lhê.

nghut kôlhang, jep é tarâ shí pé lé châng kut luí, mhoq byi sù kúm gi, mauhkúng mingdán má, hkik sù gâ é hui râ nghut lhê. <sup>20</sup> Ngò, nungmoq lé taí kôlé, nungmoq dingmán é hkyô má, haû Hparishe pé eq tarâ sará pé dingmán é htoq je a gyaú le gi, mauhkúng mingdán má, nungmoq wó wâng kó râ a nghut.

#### *Byù Hkâsat*

<sup>21</sup> 'Byù hkâsat, <sup>☆</sup> sat é sù gi, jéyáng é hui râ nghut lhê' ga, hí hpyang lhê é bang lé taí tô é dang, nungmoq wó gyô wú bê nghut lhê. <sup>22</sup> Nghut kôlhang, Ngò, nungmoq lé taí kôlé, gumang rayuq yuq lé nhikjum yô é sù gi, jéyáng é hui râ nghut lhê. Hau htoq agó, gumang hpó lé, 'Byù gang' <sup>\*</sup> ga taí é sù gi, Yudaq byìn tú wapdoq má jéyáng é hui râ nghut lhê; 'Byù bam ê' ga wut é sù gi, ngaraî myi eq gingdán nyi ri.

<sup>23</sup> Haû mù, hkungga gyap má, nàng hkungga nhông râ dâ é hkûn, náng é gumang rayuq yuq, nang lé mara hun é hkyô rajung jung joq é lé, myit bûn kat é nghut jáng, <sup>24</sup> náng é hkungga lé, haû hkungga gyap hí má tô pyâm to mù, náng é gumang hpó haû yuq eq hí nguingón hkyô lô yû luí sheq, hkungga lé nhông byi aq.

<sup>25</sup> Nang lé yui tsuq sù gi, nang lé tarâ rûng má dé e lô é hkûn, hkyô má ru nghut nyi ashî u lé, yhang eq nguingón hkyô hí hân yù aq. Haû a nghut jáng, haû yuq gi, nang lé, tarâ agyi chyáng ê ap pyâm mù, haû tarâ agyi gi, nang lé htóng hkyô pyâm râ matú, htóng suwún hpô é loq má ap pyâm râ nghut lhê. <sup>26</sup> Ngò, nang lé teng za taí lé, yuichyîn haû a ban xap xap gi, htóng haû mai nàng wó htoq lô râ a nghut.

#### *Su-myi Sulàng Lú É Hkyô Eq Séng Luí Mhoqshit É Dang*

<sup>27</sup> 'Su-myi sulàng hkâlú' <sup>☆</sup> gâ é dang lé, nungmoq wó gyo wú bê nghut lhê. <sup>28</sup> Nghut kôle, Ngò, nungmoq lé taí kôlé, myiwe rayuq lé shut nau é myit èq wú é sù gi, yhang é myit hkaû má, myiwe haû yuq eq su-myi sulàng lú hkyô kut é sù nghut bê. <sup>29</sup> Haû mù, náng é loqyo myoq èq, nang lé mara kut shut nhang é nghut le gi, haû lé lap choq yû mù, dú pyâm aq. Hkâsu mù gâ le, náng é ragùngdu gón ngaraî ming gyó râ htoq má, náng é gungsho rajung jung za htên byuq é nghut le gi, náng é matú je ge ri. <sup>30</sup> Haû eq rajung za, náng é loqyo loq èq, nang lé mara kut shut nhang é nghut le gi, haû lé hpyit yû mù, dú pyâm aq. Hkâsu mù gâ le, náng é ragùngdu gón ngaraî ming gyó râ htoq má, náng é gungsho rajung jung za htên byuq é nghut le gi, náng é matú je ge ri.

#### *Myi Làng Gâng É Hkyô Eq Séng Luí Mhoqshit É Hkyô*

*Mht 19:9; Mrk 10:11-12; Luk 16:18*

<sup>31</sup> 'Yhumsing é yhangmyi lé kâng é sù gi, lhoq kang laiká byi râ dut lhê.' <sup>☆</sup> gâ é dang joq lhê. <sup>32</sup> Nghut kôlhang, Ngò, nungmoq lé taí kôlé, myiwe dông mai làng shut é a nghut é za, yhumsing é yhangmyi lé kâng é sù gi, myiwe haû lé sulàng lú sù dut nhâng bê nghut ri; hau htoq agó, yhumsing yhanglâng eq gang bê myiwe lé hâng yu é sù le, su-myi lú é sù dut bê nghut ri.

#### *Danggidiq*

<sup>33</sup> Hau htoq agó, 'Danggidiq a zùng hkâmû; Yhumsing lé byî tô é danggidiq eq rajung za cháng aq.' ga luí, hí hpyang lhê é bang lé, taí tô é dang lé nungmoq wó gyô wú bê nghut lhê. <sup>34</sup> Nghut kôlhang, Ngò, nungmoq lé taí kôlé, hai èq le hkâdakâm kó: mauhkúng lé lang luí le, hkâdakâm kó; hkâsu mù gâ le, haû gi, Garaî Gasâng é zùng tanghkuq nghut lhê; <sup>35</sup> myigùng lé lang luí le, hkâdakâm kó; hkâsu mù gâ le, haû gi, Garaî é hkyî nang jang nghut lhê; Yerusalem lé lang luí le, hkâdakâm kó; hkâsu mù gâ le, haû gi, Hkohkâm mó é myuq nghut lhê. <sup>36</sup> Hau htoq agó, yhumsing é ulhûm èq le, hkâdakâm kó; hkâsu mù gâ le, xâm rahkat lé lháng hpyû shoq noq shoq, nàng wó kut é a nghut. <sup>37</sup> Náng é dang lé, 'nghut lhê' lé gi, 'nghut lhê' nghû, 'a nghut é' lé gi, 'a nghut' nghû, taí aq; haû mai lai é gi, haû agè ashop su chyáng mâ é nghut ri.

<sup>☆</sup> 5:21 Htoq Lô 20:13    <sup>\*</sup> 5:22 Byù gang gâ é lé, Grik dông "Raka" gâ lhê.    <sup>☆</sup> 5:27 Htoq Lô 20:14    <sup>☆</sup> 5:31 Tarâ Pun 24:1

*Lató Hpuq É Hkyô**Luk 6:29-30*

<sup>38</sup> 'Myoqjí matú myoqjí xap, zui matú zui xap<sup>☆</sup> gâ é dang lé, nungmoq wó gyô wú bê nghut lhê. <sup>39</sup> Nghut kôlhang, Ngò, nungmoq lé taí kôlé, agè ashop kut é sù lé lató hkâhpuq. Náng é loqyo bowâm má pyuq byi sù lé, loqpaî hkyam le hkâm byi shi aq. <sup>40</sup> Byù rayuq yuq, nang lé mara tsuq mù, náng é buzo lé yu pyám byî é nghut jáng, bumó lé le, hkyut byi shi aq. <sup>41</sup> Byù rayuq yuq, nang lé zik mù, radéng é nhâng jáng, yhang eq rahá í déng châng é byi aq. <sup>42</sup> Nang lé dung sù lé, byi aq; náng chyáng mai chyí naù sù lé le, nunghtáng hkâlhik pyám.

*Gyè Lé Chyitdap Râ É Hkyô**Luk 6:27-28, 32-36*

<sup>43</sup> 'Náng é chyangnâm mâ é bang lé gi, chyitdap mù, náng é gyè lé gi, a jú kut aq<sup>☆</sup> gâ é dang lé, nungmoq wó gyô wú bê nghut lhê. <sup>44</sup> Nghut kôlhang, Ngò, nungmoq lé taí kôlé, nungmoq gi, mauhkûng htoq mâ é nungmoq é Íwâ é yhangzô pé wó dut kó sháng gaq, nungmoq é gye pé lé chyitdap mù, nungmoq lé zing-ri bâng é matú kyûdung byi keq; <sup>45</sup> hkâsu mù gâ le, Yhang gi, agè ashop bâng é ahtoq má le, gè bâng é ahtoq má le, bui tsô byi nhâng mù, dingmán bâng é ahtoq má le, a dingmán bâng é ahtoq má le, mau wô byi nhâng Sù nghut ri. <sup>46</sup> Nungmoq lé chyitdap é bang lé za chyitdap kô le gi, nungmoq é matú hai chyunghuq wó kó râ lú? Kang guq bang lháng, haù su kut lhê a nghut kó lú? <sup>47</sup> Hau htoq agó, nungmoq é gumang wuì lé za shi-kyám kô le gi, nungmoq kut é muzó gi, góbâng htoq má haì wá laklaí râ lú? Tungbaù pé lháng haù su kut lhê a nghut kó lú? <sup>48</sup> Haù mù, mauhkûng htoq mâ é nungmoq é Íwa gumjup é su, nungmoq le gumjup nyi keq.

## 6

*Alu Byî É Hkyô*

<sup>1</sup> Nungmoq dingmán é hkyô lé, byu pé myàng sháng gaq nghû, byu pé hí má a kut shit loshoq, sidiq nyi keq. Haù su kut é nghut jáng, mauhkûng htoq mâ é nungmoq é Íwâ chyáng mai, chyunghuq wó yû kó râ a nghut.

<sup>2</sup> Haù mù, haù gegùn labyoq kut bang gi, byu pé èq shigyaú é hui sháng gaq ga, tarajong pé hká, hkyô pé hká kut é su, nàng gi, alu byî é hkûn, tut htê su hkâlhoq htoq. Ngò, nungmoq lé teng za taí kôlé, haù bang gi, yhangmoq é chyunghuq lé hkúm shoq wó yû bekô nghut lhê. <sup>3</sup> Ra châ to bang lé nàng alu byî é hkûn, náng é loqyo loq kut é hkyô lé, loqpaî loq lé lháng hkâsé nhâng. <sup>4</sup> Haù hkûn, nàng alu byî é lé, ó a châng sé râ nghut lhê. Haù jáng sheq, ó a sé loshoq kut é hkyô lé myang é sù, náng é Íwa gi, nang lé chyunghuq shigyaú râ nghut lhê.

*Kyûdung É Hkyô**Luk 11:2-4*

<sup>5</sup> Nungmoq kyûdung le, gegùn labyoq kut bang su hkâkut kó; hkâsu mù gâ le, yhangmoq gi, byu pé byu-myàng shoq ga, tarajong pé eq hkyô kang pé má yap mù, kyûdung râ ô nau akô. Ngò, nungmoq lé teng za taí kôlé, haù bang gi, yhangmoq é chyunghuq lé wó yû bekô nghut ri. <sup>6</sup> Nghut kôlhang, nàng kyûdung le, náng é gok hkaù má wang ló mù, hkum myhî pyám luì, a byu-myang é náng é Íwâ chyáng dung aq. Haù jáng, ó a byu-myang é lé myàng sù, náng é Íwa gi, nang lé jeju dum tau byi râ nghut lhê. <sup>7</sup> Haù mù, kyûdung le, tungbaù pé su kut luì, dang puq hkâhtau kó; hkâsu mù gâ le, yhangmoq gi, dang hîng chín luì dung jáng sheq, gyo byi nhô ngam akô nghut ri. <sup>8</sup> Haù bang su hkâkut kó; hkâsu mù gâ le, nungmoq é Íwa gi, nungmoq râ é hkyô lé, nungmoq a dung shi mai sê to Sù nghut lhê.

<sup>9</sup> Haù mù, nungmoq kyûdung le,

'Mauhkûng htoq tsáng myhâng mâ é ngamoq é Âwa ê,  
Náng é mying gi, chyoyúng nyí sháng gaq,

<sup>10</sup> Náng é mingdán jé lô sháng gaq,

Nàng ô nau é hkyô, mauhkûng htoq má dik é su, myigùng htoq má le dik sháng gaq ô.

<sup>11</sup> Ngamoq nyí wuî râ é zoshuq lé, ngamoq lé hkû-nyí byi laq.

<sup>12</sup> Ngamoq lé shut é bâng é mara lé ngamoq hkyut pyám byî é su,  
ngamoq é mara lé le hkyut pyám byi laq.

<sup>13</sup> Ngamoq lé, agúng alaú hkyô má a wàng nhang é za,  
agè ashop jang mai hkyi yù laq ô.

(Hkâsu mù gà le, kô dik é up sîng hkyô, a-tsam eq hpungwup shing kang gi, pyat dedu  
ahtum abyuq Náng chyáng ru joq nyi ri ô! Amen.)<sup>\*</sup>

ngû dung keq. <sup>14</sup> Supê èq, nungmoq lé kut shut é mara lé, nungmoq hkyut pyám byî é  
nghut le gi, mauhkûng htoq mâ é nungmoq é Îwa le, nungmoq lé mara hkyut pyám byi  
râ nghut lhê. <sup>15</sup> Nghut kôlhang, haú bâng é mara lé, nungmoq a hkyut pyám byî é nghut  
le gi, nungmoq é Îwa le, nungmoq é mara lé hkyut pyám byi râ a nghut.

### *Zoshuq Gám É Hkyô*

<sup>16</sup> Nungmoq gi, zoshuq gám é hkûn, gegùn labyoq kut bang su myoqdong hkâlhoq  
nyhui kó; hkâsu mù gà le, haú bang gi, yhangmoq zoshuq gám é hkyô lé, tûn shit râ  
matú myoqdong lhoq nyhuî shit akô nghut ri. Ngò, nungmoq lé teng za taí kôlé, haú  
bang gi, yhangmoq é chyunghuq wó yû bekô nghut ri. <sup>17</sup> Nungmoq kúm gi, zoshuq gám  
é hkûn, nungmoq zoshuq gám é hkyô lé, byu pê hí má de de a dut é za, nungmoq a byu-  
myang é Îwa za myàng sháng gaq, myoq chí pyám luî, u xû but keq; <sup>18</sup> haú jáng sheq, ó a  
sé loshoq kut é hkyô lé myang é Sû, nungmoq é Îwa gi, nungmoq lé chyunghuq shigyaú  
râ nghut lhê.

### *Mauhkûng Htoq Mâ É Sutzè*

*Luk 12:33-34*

<sup>19</sup> Jàngkon, jogyik èq wó lhoq htên pyâm é eq hkaú su èq le wó wang hkaú yu pyám byî  
é myigùng htoq má, nungmoq é matú, sutzè lé hkâhkong to kó. <sup>20</sup> Jàngkon, jogyik èq le  
a wó lhoq htên pyâm é eq, hkaú su èq le a wó wang hkaú yu pyám byî é mauhkûng htoq  
má sheq, nungmoq é matú sutzè hkong to keq. <sup>21</sup> Hkâsu mù gà le, náng é sutzè joq jang  
má, náng é i-myt le jé nyi râ nghut lhê.

<sup>22</sup> Myojí gi, gungdû é myibung nghut nyi ri. Náng é myojí ge é nghut le gi, náng é  
gungdu gón má maubó bying mui to râ nghut lhê. <sup>23</sup> Nghut kôlhang, náng é myojí a ge  
é nghut le gi, náng é gungdu gón gi, mauchut tuq dut nyi râ nghut lhê. Náng chyáng bo  
é maubó gi, mauchut byuq é nghut jáng, mauchut haú gi, hkâ-í yhang htû râ lhâ!

<sup>24</sup> Ó yuq nghut kôle, yhumsing í yuq lé wó dojaú râ a nghut. Hkâsu mù gà le, yhang  
gi, rayuq lé a jú kut mù, rayuq lé gi, chyitdap râ nghut lhê; haú a nghut jáng, rayuq lé  
lhumzui mù, rayuq lé gi, hpau a tap kut râ nghut lhê. Nungmoq gi, Garai Gasang lé le,  
ngunzè lé le, radá dâm wó dojaú kó râ a nghut.

### *Hkâ-myt Chiq Kó*

*Luk 12:22-31*

<sup>25</sup> Haú mù luî, Ngò, nungmoq lé taí kôlé, nungmoq é asak matú haí zo haí shuq râ eq  
nungmoq é gungdû matú haí wut haí tsang râ lé, hkâ-myt chiq kó. Asak gi, zoshuq htoq  
má, gungdu gi, mebû htoq má, je ahkyak lhê a nghut kó lhú? <sup>26</sup> Maulat mâ é nghoqzô pé  
lé wú wú keq; yhangmoq gi, kyô hkyô kyô shu a kut é htoq agó, chyî pé má le haí a tsing  
kat to kô é nghut le lhang, mauhkûng htoq mâ é nungmoq é Îwa gi, yhangmoq lé, byi tso  
byi huq nyi lhê. Nungmoq gi, nghoq haú pé htoq má je riyhang hpau nyi lhê a nghut  
kó lhú? <sup>27</sup> Nungmoq má, ó yuq wá, myit chiq é èq, yhumsing é asak lé radúng kô wó jat  
yù kó râ lhú?

<sup>\*</sup> 6:13 Chyúmlaika ra-am má, shí túm a bo é nghut lhê.

<sup>28</sup> Haû nghut le nhîng, haî mù, mebû matú myit chiq akô lúhú? Myigùng má yuq tô é htutbó ban pé hkâsu kut kô lo é lé, myit wú keq. Haû pé gi, mù le a zui, hkyîng le a duì kó nghut ri. <sup>29</sup> Nghut kôlhang, Ngò, nungmoq lé táí kyo kôlé, hkohkâm Sholumon hpung kô dik u lé wut é mebu lhang, ban haû rabó lé a hkyit nghut ri. <sup>30</sup> Lumjîng myit tiq é bang ê, hkû-nyí joq mù, napmá myihkyóm má dú kat pyám hui râ nghut é yosô mhan pé lé za lhang, Garai Gasang haû su kut hut é nghut le gi, nungmoq lé je riyhang hut râ a nghut kó lúhú? <sup>31</sup> Haû mù, 'Haî zo râ lhi?' 'Haî shuq râ lhi?' 'Haî wut râ lhi?' nghû hkâ-myit chiq myhîng kó. <sup>32</sup> Tungbaù pé kúm gi, haû pé banshoq lé châng hkat ho nyi akô; nghut kôlhang, mauhkûng htoq mâ é nungmoq é Îwa gi, haû pé lé nungmoq râ é hkyô, sé byí nyi lhê. <sup>33</sup> Nghut kôlhang, Yhâng é mingdán eq dîngmán hkyô lé hí hô keq, haû jáng, haû pé banshoq, nungmoq lé puq byi râ nghut lhê. <sup>34</sup> Haû mù, napmá lhê é matú hkâ-myit chiq kó; hkâsu mù gâ le, napmá gi, yhâng é yhang myit chiq râ nghut lhê. Hkû-nyí é wúîhke hkyô gi, hkû-nyí é matú gé bê nghut ri.

## 7

*A Jéyáng Râ Hkyô**Luk 6:37-38, 41-42*

<sup>1</sup> Nungmoq jéyáng é a hui kó sháng gaq, ó lé le, hkâjéyáng kó. <sup>2</sup> Hkâsu mù gâ le, nungmoq jéyáng é su, nungmoq le, jéyáng é hui kó râ nghut é htoq agó, nungmoq lik byí é bung èq, nungmoq lé dum lik byi râ nghut lhê.

<sup>3</sup> Yhumsing myoq hkaû má lúng tô é siktúm lé lhang a myit wú é nhîng, haî mù luî, nunggu nungmâng é myoqwàng lé myang lhê lúhú? <sup>4</sup> Yhumsing é myoq má siktúm lhûng to luî nhîng, 'Náng myoq má lúng tô é myoqwàng lé, ngò choq pyám byi lé.' nghû luî, náng é gumang hpó lé hkâsu wó táí râ lúhú? <sup>5</sup> Gegùn labyoq kut sù ê, náng é myoq má lúng tô é siktúm lé hí choq pyám aq. Haû jáng sheq, nunggu nungmâng é myoq má wang tô é myoqwàng choq pyám byi râ matú, nàng san za myàng râ nghut lhê.

<sup>6</sup> Hkuí pé lé, yunglhô é zê hkâbyi kó; waq pê hí má, nungmoq é palhé wuizo lé hkâdú byi kó. Haû su kut jáng, haû bang gi, zè haû pé lé nàng pyeq pyám mù, nungmoq lé dum taù ngat lò râ nghut lhê.

*Dung Keq, Hô Keq, Hkum Má Kok Keq**Luk 11:9-13*

<sup>7</sup> Dung keq, haû jáng, nungmoq lé byi râ nghut lhê; hô keq, haû jáng, nungmoq myàng kó râ nghut lhê; hkum má kok keq, haû jáng, nungmoq lé hpóng byi râ nghut lhê. <sup>8</sup> Hkâsu mù gâ le, ó yuq nghut kôle, dung sù wó râ; hô sù myàng râ; hkum kok sù lé gi, hpóng byi râ nghut lhê.

<sup>9</sup> Nungmoq má, ó yuq wá, yhumsing yhangzo muk dúng le, luqgok byi kó râ lúhú? <sup>10</sup> Ngozo dúng le, lhangmuì\* byi kó râ lúhú? <sup>11</sup> Agè ashop é bang nungmoq lhang gi, nungmoq é zo wuî lé, ge é chyunghuq dat byi kô le nhîng, mauhkûng htoq tsáng myhâng mâ é nungmoq é Îwa gi, Yhang lé dúng é bang lé, je riyhang ge é chyunghuq byi râ nghut lhê! <sup>12</sup> Haû mù, hai hkyô má nghut kôlhang, nungmoq gi, yhumsîng ô nau é dông supé lé kut nhâng nau é su, yhangmoq lé le kut byi keq. Haî mù gâ le, haû gi, jep é tarâ eq myiqhtoî pê é dang lo jup tô é nghut ri.

*Chyap É Hkúmdong Eq Lam É Hkúmdong**Luk 13:24*

<sup>13</sup> Chyap é hkúmdong mai wàng keq. Hkâsu mù gâ le, lam é hkúmdong eq hkyô mó gi, htên byoq hkyô shut shuî e é nghut mù luî, haû dông wàng bang gi, myô akô nghut ri. <sup>14</sup> Chyap é hkúmdong eq hkyô zo kúm gi, asak hkyô shut shuî e é nghut mù luî, haû lé myang ho é bang gi, shaû akô nghut ri.

\* 7:10 Garai Gasang gi, lhangmuì a zo râ matú, Yudaq byu pé lé hkunmó hkyô tô é nghut lhê.

*Agàm Eq Ashi**Luk 6:43-45*

<sup>15</sup> Nungmoq chyáng jé lé lo é myiqhtoi pyoq pé lé, sidiq nyi keq; yhangmoq gi, sau-kuq wut mù, nungmoq chyáng jé lé kôlhang, myaq zo myaq shuq nau é wamhkuí pé nghut akô. <sup>16</sup> Yhangmoq é muzó jizó lé wú mù, nungmoq gi, yhangmoq lé wú sé kó râ nghut lhê. Zubyp mai tsibiyiq shi, zugâm mai maihpáng-shi wó yu wú akô lhú? <sup>17</sup> Ge é agàm gi, ge é ashí zui mù, a ge é agàm gi, a ge é ashí za dat zui ri. <sup>18</sup> Ge é agàm gi, a ge é ashí a wó zui, a ge é agàm le, ge é ashí a wó zui nghut ri. <sup>19</sup> Ge é ashí a zuí é shigâm hkangmó lé gi, htuoq pyám mù, myi má dú kat pyám râ nghut lhê. <sup>20</sup> Haú mù, yhangmoq é muzó jizó lé wú mù, nungmoq gi, yhangmoq lé wú sé kó râ nghut lhê.

<sup>21</sup> Ngo lé, 'Yhumsîng ê, Yhumsîng ê,' ga, wut é bang yuq hkangmó gi, mauhkûng mingdán má myang wàng kó râ a nghut; haú mauhkûng htoq mâ é Ngá Wa ô nau é dông kut sù za sheq, myang wàng râ nghut lhê. <sup>22</sup> Haú buinyi má, byù myo myo gi, 'Yhumsîng ê, Yhumsîng ê, Náng é myîng mai, ngamoq gi, myiqhtoi le htoi bê; nat gang lé hkat htoq bê; laklaí kumlhá ajung jung lé, kut bê a nghut lhú?' ga luí, Ngo lé myi kó râ nghut lhê. <sup>23</sup> Haú hkûn, Ngò gi, 'Nungmoq lé, Ngò hkâ-nhám le a sé; agè ashop hkyô kut é bang nungmoq, Ngá chyáng mai gâng ló byuq keq.' nghû, yhangmoq lé san za tû taí kat râ nghut lhê.

*Hpaqchyî Bò Sû Eq Ngok Sû**Luk 6:47-49*

<sup>24</sup> Haú mù, Ngá é dang shí pé lé wó gyô yù luí, châng kut é sù gi, hpaqchyî bò mù, lunghtân htoq má, yhûm saí é sù eq wuí nyi ri. <sup>25</sup> Mau wô, wuí je, laidun lò mù, yhûm haú lé lo htung kôlhang, yhûm haú gi, a htên byoq byuq râ nghut lhê; hkâsu mù gâ le, yhûm haú gi, lunghtân htoq má tsuq tô é yanmai nghut ri. <sup>26</sup> Nghut kôlhang, Ngá é dang lé, wó gyô yù mù, a cháng sù gi, semuî-jàng má, yhûm saí é byù ngok eq wuí nyi râ nghut lhê. <sup>27</sup> Mau wô, wuí je, laidun wò yup dut lò mù, yhûm haú lé lo htung jáng, yù whuí a mù loshoq htên byoq byuq râ nghut lhê." gâ ri.

<sup>28</sup> Yesuq mungdang ban taí é hkûn, shiwa byu pé gi, Yhang mhoqshit é hkyô lé maúhong bum akô; <sup>29</sup> hkâsu mù gâ le, Yhang gi, yhangmoq é tarâ sará pé eq a pung é za, ahkáng ayá wó sù rayuq su, mhoqshit é yanmai nghut ri.

## 8

*Manggâm Dap É Byù Rayuq**Mrk 1:40-45; Luk 5:12-16*

<sup>1</sup> Yesuq gi, bùm htoq mai gyó lo é hkûn, byù moq mó gi, Yhâng htâng châng bum akô nghut ri. <sup>2</sup> Haú hkûn, manggâm dap é byù rayuq gi, Yhâng é hí má, lé mù, hkyihput htuoq luí, "Yhumsîng ê, Nàng dóng é nghut le gi, ngo lé Nàng wó lhoq sân-yúng byi râ nghut lhê." ga taí ri.

<sup>3</sup> Yesuq gi, loq lhâm kat mù, haú yuq lé ê záng luí, "Ngò dóng lhê, sân-yúng aq hkoi." ga taí kat ri. Haú hkûn jáng, haú yuq é manggâm gi, ge byuq bê nghut ri. <sup>4</sup> Haú hkûn, Yesuq gi, "Nàng, shí hkyô ó lé le hkâtaí kyo. Nghut kôlhang, náng é gungdu lé, hkyangiong hpô chyáng ló tân shit mù, yhangmoq é matú saksé dut sháng gaq, Mosheq taí tô é eq rajung za, hkungga ló nhông byi aq." ga haú yuq lé taí kat ri.

*Gyezau Hpô É Lumjîng Myit**Luk 7:1-10; Yhn 4:43-54*

<sup>5</sup> Yesuq, Kaperna-um wà má wang e ló le, Romaq gyezau hpó rayuq gi, Yhâng chyáng lé jé mù, <sup>6</sup> "Yhumsîng ê, ngá é dui-nhâng zoshâng gi, gùngjum shi é htoq agó, yhûm má gyaí no jamjaú leq tô ri." ga garúm lé dung ri.

<sup>7</sup> Haú hkûn, Yesuq gi, yhang lé, "Ngò, lé lhoq gê byi râ." ga taí kat ri.

<sup>8</sup> Gyezau hpô haú, Yhang lé dum tû taí é gi, "Yhumsîng ê, Nàng, ngá é laishîn-htâng má, lé nang râ lháng ngò má a gingdán. Nàng, dang rahkun za taí kat laq; haú hkûn, ngá é dui-nhâng zoshâng ge ló râ nghut lhê. <sup>9</sup> Hkâsu mù gâ le, ngò le ahkáng ayá wó é zau

rayuq é a-ô mâ é zau nghut lhê; ngá é a-ô má le gyezô pé nyi lhê; rayuq lé, 'Ê aq!' nghu le, yhang e ló lhê; góyuq lé, 'Lò aq!' nghu le, yhang lo lhê; ngá jùn lé le, 'Shî kut aq!' nghu le, yhang kut lhê." gâ ri.

<sup>10</sup> Yesuq gi, dang haú lé wó gyo jáng, maú byuq luí, Yhâng htâng cháng bang lé, "Ngò, nungmoq lé teng za táí kôlé, Israelaq amyû má lháng, shî í lumjín é sù lé, Ngò, rayuq lé le a myàng wú é nghut lhê. <sup>11</sup> Ngò, nungmoq lé táí kôlé, buihtôq buiwàng hkyam mâ é byu pé myo myo gi, mauhkûng mingdán má, Abraham, Isak, Yakup pé eq rahá, zoshuq poí mó má myang zùng kó râ nghut lhê. <sup>12</sup> Nghut kôlhang, mingdán haú má wàng âng é bang kúm gi, shinggan mauchut hkaú shut dú pyâm é hui luí, haú jowò má ngaubyi ngau nhap eq zui kyik kyik shoq hpuzô nyi bùm bekô râ nghut lhê." ga taí ri.

<sup>13</sup> Hau htâng, Yesuq gi, gyezau lé, "Ló aq hkoí! Nàng lumjín é eq rajung za, dut râ nghut lhê." ga taí ri. Haú-u má yhang, haú dui-nhâng zoshâng gi, ge byuq bê nghut ri.

*Byù Myo Myo Lé Lhoq Gê Byî É Hkyô*

*Mrk 1:29-34; Luk 4:38-41*

<sup>14</sup> Yesuq gi, Petruq é yhûm má jé wang e é hkûn, Petruq é yhâng-aumó gyai yhang no leq tô é lé, ê myang ri. <sup>15</sup> Yesuq gi, yhâng é loq má ê záng kat é hkûn, Petruq yhâng-aumó gí, nõhpýo ge byuq mù, toq luí, Yhang lé wó gaí tso gaí huq bê nghut ri.

<sup>16</sup> Myinhâng mauchut lô jáng, nat gang wang júng nyi é bang myo myo lé, Yhâng chyáng shuí lé lo akô. Yhang gi, agè ashop é nat gâng pé lé dang èq hkat htoq pyám mù, nõhpýo huí é bang banshoq lé lhoq gê byî ri. <sup>17</sup> Haú gi,

"Yhang gi, nga-nhûng é nolì nojàng lé yu pyám byi mù, nga-nhûng é nolì nojàng lé, wùn waq pyám byi bê nghut ri."☆

ga, myiqhtoi Esai-aq taí tô é dang lhoq dik râ matú nghut ri.

*Yesuq Htâng Cháng Râ Bang*

*Luk 9:57-62*

<sup>18</sup> Yesuq gi, Yhâng é lhínghkyuq má byù moq mó zup míng nyi é lé myàng jáng, Yhâng é chángzô pé lé, nõng hé hpoq shut gú dap ê sháng gâ ri. <sup>19</sup> Haú hkûn, tarâ sará rayuq gi, lé lô mù, "Sarâ ê, ngò gi, Nàng hká e le hká cháng râ nghut lhê." ga Yhang lé lé taí ri.

<sup>20</sup> Haú jáng, Yesuq gi, "Wamhkuí pé gi, hkyûng wó akô; nghoq pé le, nghoqsut wó akô. Nghut kôlhang, haú Byu Yhangzo gi, u nghê jowò lháng a wó nghut ri." ga lhom taí kat ri.

<sup>21</sup> Haú hkûn, chángzo rayuq gi, "Yhumsîng ê, ngá wa lé ló yhûm pyám râ ahkáng hí byi shilaq." ga taí kat ri.

<sup>22</sup> Nghut kôlhang, Yesuq gi, "Shî bê bang gi, shî bê bang yhangchang yhûm lhum kó sháng gaq, nàng gi, Ngá htâng cháng aq." ga dum taú taí ri.

*Laidun Lhoq Zîm É Hkyô*

*Mrk 4:35-41; Luk 8:22-25*

<sup>23</sup> Hau htâng, Yesuq lhaí hkaú má wàng mù, Yhâng é chángzô pé le, Yhâng htâng châng wàng bekô nghut ri. <sup>24</sup> Haú hkûn, nõng má byodan-htik laidun mó lò mù, wuìlhêng pé gi, lhaí má bat ùm lò bê nghut ri. Nghut kôlhang, Yesuq gi, yhup myhî tô ri. <sup>25</sup> Chángzô pé gi, Yhâng chyáng jé ê mù, Yhang lé nhaú pun luí, "Yhumsîng ê, hkyi yù laq ô! Nga-nhúng myup ló nyi ri." ga taí akô.

<sup>26</sup> Yhang gi, "Lumjín myit shaú é bang ê! Haí mù, haú-í gyuq bum akô lhú?" ga taí kat ri. Hau htâng, Yhang gi, toq luí, laidun eq wuìlhêng pé lé tân kat jáng, banshoq zîm byuq bê nghut ri.

<sup>27</sup> Byù haú bang gi, maúhong byuq kômù, "Shí yuq gi, hkasú é byù lhà? Làì eq wuìlhêng pé lháng gi, Yhâng é dang lé gyo byî ri myhi-nhung!" ga luí, rayuq eq rayuq myî lhûm bum akô nghut ri.

*Nat Wang Júng Su Nhik Lé, Lhoq Gê Byî É Hkyô*

*Mrk 5:1-20; Luk 8:26-39*

☆ 8:17 Esai 53:4

<sup>28</sup> Yesuq gi, Gadara byu pê é mau hpoq má jé dap ló jáng, nat gang wang júng é byù í yuq gi, lupdùng mai htoq lé lo kômù, Yhang lé lé huí akô. Haú nhik gi, haú hkyô mai ó lhang a wám lai loshoq wuí é su nhik nghut akô. <sup>29</sup> Yhangnhik gi, Yesuq lé, "Garaí Yhangzo ê, Nàng, ngamoq eq haí sêng lhê lú? Ahkýng a jé shimá, ngamoq lé zing-ri râ matú jé lé lo é nghut lhê lú?" ga taí garú akô.

<sup>30</sup> Haú mai a lúm wê é jowò má, waq rajùm mó gi, myì dù but zô nyi bum akô nghut ri. <sup>31</sup> Nat gâng pé gi, Yesuq lé, "Nàng, ngamoq lé hkat htoq râ nghut jáng, hê waq pê chyáng wàng nhâng laq." ga dúng akô.

<sup>32</sup> Yesuq gi, "Htoq ló keq!" ga taí kat ri. Haú mù, yhangmoq gi, htoq ló luí, waq pê chyáng wàng mù, waq haú jùm gi, gampyoq mai nhông hkaú shut din yán wang ló kôluí, wuí hkaú má myup shi byuq bekô nghut ri. <sup>33</sup> Waq zúng bang gi, myuq hkaú shut hphang din wang ló kômù, dut lai lo é hkyô banshoq lé le, nat gang wang júng huí su nhik hkâsu dut é hkyô lé le, ló taí kyo akô nghut ri. <sup>34</sup> Haú mù, rawa bang gi, Yesuq lé hui râ matú htoq lé lo bùm kômù, Yhang lé myàng jáng, yhangmoq é mau mai htoq ló byuq râ matú, chôm dúng tôngbán akô nghut ri.

## 9

### *Gungjum Shí Sû Lé Lhoq Gê Byí É Hkyô*

*Mrk 2:1-12; Luk 5:17-26*

<sup>1</sup> Yesuq gi, lhai má wàng mù, yhumsing é wà shut jî dap ló bê nghut ri. <sup>2</sup> Byù ra-am gi, gùngjum shí sù rayuq lé, taphkang mai Yhâng chyáng waq lé lo akô. Yesuq gi, yhangmoq é lumjìng myit lé byu-myàng jáng, haú gùngjum shí sù lé, "Ngá zo ê, nhik hkâ-ngê; náng é yubak mara lé hkyut pyám byi bê." ga taí ri.

<sup>3</sup> Haú hkûn, tarâ sará pé ra-am gi, yhangmoq é i-myit hkaú má, "Byù shí yuq gi, Garai Gasang lé rhoí dang taí nyi ri." ga myit nyi bum akô nghut ri.

<sup>4</sup> Yesuq gi, yhangmoq myit nyi é hkyô lé sé mù, "Nungmoq é i-myit hkaú má, haú su agè ashop é dông haí mù myit nyi akô lú? <sup>5</sup> 'Náng é yubak mara lé hkyut pyám byi bê.' nghû taí râ eq 'Toq luí, hkyô so aq.' nghû taí râ má, hká hkun je taí lui lhê lú? <sup>6</sup> Nghut kôlhang, haú Byu Yhangzo gi, mingkan htoq má, mara hkyut byi râ ahkáng wó Sû nghut é lé, nungmoq lé sé nhâng nau lhê." ga taí luí, haú gùngjum shí sù lé, "Toq aq, náng é taphkang yu chûng luí, yhûm taú ló aq hkoi." ga taí kat ri. <sup>7</sup> Haú mù, haú yuq gi, toq mù, yhûm shut ló byuq bê nghut ri. <sup>8</sup> Byù hpûng mó gi, haú hkyô lé myàng kôjáng, gyuq maú kômù, byu pé lé haú su é ahkáng ayá byi tô é Garai Gasang lé hkya-on kungton bum akô nghut ri.

### *Mahte lé shuí yu é hkyô*

*Mrk 2:13-17; Luk 5:27-32*

<sup>9</sup> Yesuq gi, haú jowò mai sô e ló é hkûn, kang guq zúm má zung tô é Mahte ga sù lé myàng mù, "Ngá htâng cháng aq." ga taí jáng, haú yuq gi, toq luí, Yhâng htâng cháng bê nghut ri.

<sup>10</sup> Yesuq gi, Mahte é yhûm má myinzang zô nyi é hkûn, kang guq bang myo myo eq yubak dap bang myo myo lé jé kômù, Yhang eq Yhâng é chángzô pé eq rahá zo shuq bum akô. <sup>11</sup> Haú lé, Hparishe pé myàng kôjáng, Yhâng é chángzô pé lé, "Nungmoq é sará gi, haí mù luí, kang guq bang eq yubak dap bang eq rahá zo shuq nyi lhê lú?" ga myí akô.

<sup>12</sup> Yesuq gi, haú su ga kô é lé wó gyo jáng, "Wángzán bang gi, chi sará a ra kó; nõhpyo hui bang za sheq ru râ lhê. <sup>13</sup> 'Ngò ô nau é gi, hkungga nhông hkyô a nghut, shogyo nhikmyin hkyô sheq ru nghut lhê.'<sup>☆</sup> gâ é lichyúm lé mhoq yú keq. Hkâsu mù gâ le, Ngò gi, dingmán bang lé wut yù râ matú jé lé é a nghut, yubak dap bang lé ji yù râ matú sheq jé lé é ru nghut lhê." ga tû taí kat ri.

### *Zoshuq Gám É Eq Sêng É Hkyô*

*Mrk 2:18-22; Luk 5:33-39*

<sup>☆</sup> 9:13 Hos 6:6



<sup>14</sup> Hau htâng, Wui-myhup Sará Yohan é chángzô pé gi, Yesuq chyáng jé lé kômù, "Ngamoq eq Hparishe pé gi, zoshuq gám gám kut lhê; nghut kôle, Náng é chángzô pé gi, haí mù a gám kô é lhú?" ga luí, lé myí akô.

<sup>15</sup> Haú mù, Yesuq tû taí é gi, "Bíng pé gi, lusik eq rahá nghut nyi to ashí hkûn, hkâsu ge yón kó râ lhú? Lusik lé, yhangmoq chyáng mai shuí yu pyâm é hkyíng jé râ nghut lhê; haú hkûn kúm gi, yhangmoq zoshuq gám kó râ nghut lhê.

<sup>16</sup> Ó yuq le, mebu xau má pán sik èq a lhaq hpo wú kó; hkâsu mù gâ le, pán sik kun byuq jáng, mebu xau le je lhoq cheq pyám râ nghut lhê. <sup>17</sup> Tsibiyiq wing asik lé le, shokuq htûng axau má ó a kat wú kó. Kat é nghut jáng, tsibiyiq wing asik soq htân luí, htûng buq goq byuq mù, tsibiyiq wing le yui shun byuq, htûng le htên byuq, dut râ nghut lhê. Haú mù, tsibiyiq wing asik lé, shokuq htûng sik má kat jáng sheq, haú í jûng é a hten râ nghut lhê." gâ ri.

*Shí Bê Myiwe Zo Eq No É Myiwe Myhí*

*Mrk 5:21-43; Luk 8:40-56*

<sup>18</sup> Yesuq haú su ga taí nyi é hkûn, suwún rayuq jé lé lô mù, Yhâng é hí má hkyihput htuq luí, "Ngá zo byizo gi, ahkuí za shi byuq bê. Nghut kôlhang, Náng lé mù, yhâng é ahtoq má loq lé ke byi laq, haú jáng, yhang, asak dum dui lò râ nghut lhê." ga taí ri.

<sup>19</sup> Yesuq gi, toq mù, Yhâng é chángzô pé eq rahá, haú yuq htâng châng e ló akô.

<sup>20</sup> Haú hkûn, raxe í zân yhang, suí yui nyi é myiwe myhí rayuq gi, Yhâng é nunghtáng má huí lé mù, Yhâng é bushi htâng má ê záng kat ri. <sup>21</sup> Myiwe myhí haú gi, yhang gûng yhang, "Ngò, Yhâng é buhtâng má ê wó záng jáng gi, ge byuq râ nghut lhê." ga, wó myit é yanmai nghut ri.

<sup>22</sup> Yesuq gi, lhing wú kat luí, yhang lé myàng jáng, "Ngá zo ê, nhik hkâ-ngê, náng é lumjíng myit gi, nang lé lhoq gê byi bê nghut ri." ga taí ri. Haú hkûn jáng yhang, myiwe myhí haú gi, ge byuq bê nghut ri.

<sup>23</sup> Yesuq gi, suwún hpô é yhûm má jé wang ló é hkûn, sampyí mut bang eq garu garín dut nyi é bang lé, ê myâng mù, <sup>24</sup> yhangmoq lé, "Hui keq. Myiwe zo gi, shi byuq é a nghut, yhup myhí tô é sheq ru nghut lhê." ga taí jáng, yhangmoq gi, Yhang lé wuizui kut pyám byí akô. <sup>25</sup> Yesuq gi, byù hpûng lé, shinggan shut htoq ló nhâng mù, Yhang wang ê luí, myiwe zo haú lé loq èq zú kat jáng, myiwe zo haú gi, dum dui toq lo ri. <sup>26</sup> Haú hkyo é danglù gi, ramau gón yhang jam ló byuq bê nghut ri.

*Myoqjit Í Yuq Eq Nhut Jit Sû Rayuq Lé, Lhoq Gê Byí É Hkyô*

<sup>27</sup> Yesuq gi, haú jowò mai xoq e ló nyi le, Yhâng é htâng má, myoqjit í yuq gi, châng dìn uchyang, "Dawiq é Yhangzo ê, ngá-nhik lé shogyô yù laq ô!" ga wut taí akô.

<sup>28</sup> Yesuq gi, yhúmhaú má jé wang ló é hkûn, myoqjit su nhik châng wang lò kômù, haú nhik lé, "Ngò wó kut byí é lé, nungnhik lumjíng akô luq?" ga myí ri.

Haú hkûn, yhangnhik gi, "Lumjíng lhê ô, Yhumsíng ê." ga tû taí akô.

<sup>29</sup> Hau htâng, Yhang gi, haú nhik é myoqjí má ê záng htung luí, "Nungnhik lumjíng é eq rajung za dut sháng gaq." ga taí ri. <sup>30</sup> Haú mù, yhangnhik gi, myoq wó myâng bekô nghut ri. Yesuq gi, "Shí hkyô, ó lé le hkâsé nhâng kó." ga, yhangnhik lé htân htân sidiq byí ri. <sup>31</sup> Nghut kôlhang, yhangnhik gi, haú hkyô lé, haú mau ramau gón yhang taí pyo ló bekô nghut ri.

<sup>32</sup> Haú nhik htoq ló nyí kô é hkûn, nat gang wang júng luí, dang a wó nyô sù rayuq lé, Yesuq chyáng shuí lé lo akô. <sup>33</sup> Nat gang lé hkat htoq pyâm é hkûn, nhutjit sù haú gi, dang wó nyô bê nghut ri. Byù hpûng mó gi, haú lé wú maú byuq kômù, "Shí su dut é hkyô lé, Israelaq amyû má radàm lháng a myang wú." ga taí bum akô.

<sup>34</sup> Nghut kôlhang, Hparishe pé kúm gi, "Nat gâng pê é zaú é wum-o a-tsam èq za, nat gâng pé lé hkat htoq pyâm é nghut ri." ga taí bum akô nghut ri.

*Mû Zui Byù Shaú Ri*

<sup>35</sup> Yesuq gi, myuq pé eq wà pé banshoq má wàng luî, haú pé mâ é tarajong pé má mhooqshit é eq, mauhkûng mingdán hkyô eq sêng é gabú danglù lé hko kyo uchyang, nõhpyo ajung jung eq noli nojàng hui bang yuq hkangmó lé, lhoq gê byî wún ri. <sup>36</sup> Yesuq gi, byù moq mó lé myàng jáng, wú shogyô nyi ri. Hkâsu mù gà le, yhangmoq gi, sau zúng sù a nyi é sau pé su, awui ahke dut é eq byo myín bûm kô é yanmai nghut ri. <sup>37</sup> Haú mù, Yhang gi, Yhâng é chángzô pé lé, "Kyôshû yù râ myo shoq joq kôlhang, mù zui râ byù gi, shaú nyi ri. <sup>38</sup> Haú mù, haú kyô Yhumsîng lé, Yhâng é kyô yô má, kyô shu byù myo myo nhâng byi râ matú, dung keq." ga tâi ri.

## 10

*Raxe Í Yuq Lé Nhang Htoq Kat É Hkyô*

*Mrk 3:13-19; 6:7-13; 9:41; 13:9-13; Luk 6:12-16; 9:1-6; 12:2-9, 51-53; 14:26-27; 21:12-17*

<sup>1</sup> Yesuq gi, Yhâng é chángzo raxe í yuq lé wut yù mù, agè ashop é nat pé lé wó hkat htoq râ eq, noli nojàng eq nõhpyo ajung jung lé wó lhoq gê râ ahko ahkáng yhangmoq lé byî ri.

<sup>2</sup> Haú lagyo raxe í yuq é myìng gi, (Petruq ga sù) Simun eq yhanggu Andre; Zebedi é yhangzô nhiktang Yakuq eq yhanggu Yohan; <sup>3</sup> Hpilip eq Barhtolume; Htomaq eq kang guq sù Mahte; Alhpe é yhangzo Yakuq, Htade, <sup>4</sup> Zelutuq\* dut é Simun eq, Yesuq lé ap pyám râ sù, Yudaq Iskarut pé nghut akô.

<sup>5</sup> Yesuq gi, haú bang raxe í yuq lé dangsâng mù, nhang htoq kat ri. Yhang sang kat é dang gi, "Tûngbàu pè chyáng le hkâ-ê kó; Samariq wà rawà má le hkâwâng kó. <sup>6</sup> Haú byuq byuq é sau pé su nghut nyi é Israelaq byu pè chyáng sheq ê keq. <sup>7</sup> Nungmoq gi, ê mù, 'Mauhkûng mingdán gi, chyâng lò bê nghut ri.' nghu é danglù lé hko kyo keq. <sup>8</sup> Nò bang lé lhoq gê byi, shî bê bang lé lhoq dui toq, manggâm dap bang lé lhoq san lhoq yúng byi, nat gâng pé lé hkat htoq pyám, kut keq. Laí laí wó é lé, laí laí byi keq. <sup>9</sup> Nungmoq é hpyihit má, hîng, ngùn eq gyi pé hkâkat chûng kó; <sup>10</sup> hkyowui é matú, etap, mebu htaí, hkyî-tsung eq dumbáng pé hkâyú chûng kó; hkâsu mù gà le, mù zui sù gi, zoshuq wó gíng lhê.

<sup>11</sup> Hká wâ hká dum má jé wang ló le le, haú mâ é gingdán é byù lé hô mù, haú mai htoq ló é hkûn jé shoq, haú yuq é yhûm má za nyi nyi keq. <sup>12</sup> Haú yhûm má wang é hkûn, shichyên yù keq. <sup>13</sup> Haú yhûm gi, gingdán é nghut jáng, nungmoq shimân byî é hkyô, yhangmoq chyáng joq nyi sháng gaq; a gingdán é nghut jáng, nungmoq chyáng dum taú lò sháng gaq. <sup>14</sup> Nungmoq lé a lhom hap yu é eq nungmoq é dang lé a lhom gyo byi kô é nghut jáng, haú yhûm haú wâ mai htoq ló é hkûn, nungmoq é hkyiwa má dap é hpuilhaú lé ko hkyô pyâm to keq. <sup>15</sup> Ngò, nungmoq lé teng za taí kôlé, tarâ jéyang é buinyi má, haú wâ gi, Sodom eq Gomoraq myuq htoq má je hpuzo râ nghut lhê. <sup>16</sup> Wamhkuí hpúng má nhang hâng kat é sau pé lé su, Ngò, nungmoq lé nhang kat é nghut lhê. Haú mù, lhangmui su hpaqchyî bò luî, hpûngkyui su nú-nhâm nyi keq.

<sup>17</sup> Byu pé lé sidiq keq; hkâsu mù gà le, yhangmoq gi, nungmoq lé, tarâ rûng pé má ê ap pyám kó râ nghut é htoq agó, yhangmoq é tarajong pé má, nungmoq lé nhuq bat kó râ nghut lhê. <sup>18</sup> Nungmoq gi, Ngá é yanmai, mauzau wui eq hkohkam pè é hí má shuî jé é hui luî, yhangmoq é hí má le, tûngbàu pè é hí má le, saksé myang hkám kó râ nghut lhê. <sup>19</sup> Nghut kôlhang, nungmoq lé ap pyám kô é hkûn, nungmoq hkâsu taí râ eq haí taí râ lé, hkâ-myit chiq kó. Haú hkûn taí râ dang, nungmoq wó kó râ nghut lhê. <sup>20</sup> Hkâsu mù gà le, haú gi, nungmoq é dang a nghut, nungmoq é Yhângwâ é Woi-nyí sheq, nungmoq dông taí râ ru nghut lhê.

<sup>21</sup> Nhiktâng gi, nhiktâng yhangchang, îwa gi, yhangzo lé, shî shoq ap pyâm lhum kó râ nghut lhê; zo wui gi, mó wui lé gumlau toq mù, sat pyám nhâng kó râ nghut lhê. <sup>22</sup> Byù lhunglhâng bang gi, Ngá é yanmai, nungmoq lé a nguì kut kó râ nghut lhê; nghut

\* 10:4 Zelutuq gà é lichyúm gi, yhumsîng zui saí é hkyô má gyai yhang myit lòm shirong é sù lé ga lhê. Haú u lé, Israelaq byu pé gi, mingdán luthkyô wó râ matú shikut nyi é hpúng bang lé, Zelutuq gà lhê.

kôlhang, jihtûm jé shoq wó hkam jân nyi é sù gi, hkyi yu é hui râ nghut lhê. <sup>23</sup> Rawò má zing-ri é hui jáng, rawò shut hpang ê keq. Ngò, nungmoq lé teng za taí kôlé, Israelaq byu pê é myuq pé má, nungmoq a ban wang ngap shimá, haû Byu Yhangzo jé râ nghut lhê.

<sup>24</sup> Jongzo gi, sará htoq, dui-nhâng zoshâng gi, yhumsing htoq, gyaú râ a nghut. <sup>25</sup> Jongzo gi, yhâng é sará su, dui-nhâng zoshâng gi, yhâng é yhumsing su, wó dut jáng gé bê. Yhumsing hpó lé lhang Bezebulaq<sup>†</sup> ga kô le gi, Yhâng é yhumbyù wui lé gi, je riyhang nghû kó râ a nghut lhú?

<sup>26</sup> Haû mù, yhangmoq lé hkâgyuq kó. A byông htoq loshoq wó zaú nghop tô é haî le a joq râ nghut lhê; a sé loshoq wó haq tô é le, haî a joq râ nghut lhê. <sup>27</sup> Ngò, nungmoq lé mauchut hkaû má taí é hkyô lé, myoq myàng maubó má taí kyo keq; Ngò, nungmoq lé dangsoq soq kyo é hkyô lé, yhumhkûng htoq mai taí pyô keq. <sup>28</sup> Gungdu lé za wó sat pyám mù, woi-nyí lé a wó sat bang lé, hkâgyuq kó. Woi-nyí lé le, gungdu lé le, ngaraî ming má wó lhoq htên é Sù lé sheq, gyuq nyi keq. <sup>29</sup> Johkýáng í du lé, gyi htingchap rachap èq wó ùng pyám lhê a nghut kó lhú? Nghut kôlhang, haû radu lhang, nungmoq é Íwá é myit èq a nghut jáng, myigùng má wó byit gyó râ a nghut. <sup>30</sup> Nungmoq é ulhum mâ é xâm banshoq lé lhang, nghap to gù nghut lhê. <sup>31</sup> Haû mù, hkâgyuq kó; nungmoq gi, haû johkýáng myo myô htoq má lhang gù je bo é bang nghut lhê.

<sup>32</sup> Byu pê hí má, Ngo lé lhom yín yu é sù ó yuq lé nghut kôle, mauhkûng htoq mâ é Ngá Wá é hí má, Ngò lhom yín yû râ nghut lhê. <sup>33</sup> Byu pê é hí má, Ngo le he-ngik pyám é sù ó yuq lé nghut kôle, mauhkûng htoq mâ é Ngá Wá é hí má, Ngò he-ngik pyám râ nghut lhê.

<sup>34</sup> Ngo lé, haû myidàm htoq má simsaq hkyô byi râ matú lé lo é sù su hkâ-ngâm kó. Ngò gi, simsaq hkyô byi râ matú lé lo é a nghut, shâm byi râ matú sheq lé lo é ru nghut lhê.<sup>‡</sup> <sup>35</sup> Hkâsu mù gâ le, 'Yuzo gi, yhangwa eq, byizo gi, yhangnu eq, dumó gi, yhangmhoí eq, byoq lhum kó râ nghut lhê.

<sup>36</sup> Yhumsing é yhumbyù wui gi, yhumsing é gyè taû dut râ nghut lhê.<sup>✠</sup> gâ tô é matú sheq, Ngò jé lé é ru nghut lhê.

<sup>37</sup> Ngo lé chyt é htoq yhumsing é ênu îwa lé je chyt é sù ó yuq nghut kôle, Ngá é chángzo kut râ gingdán sù a nghut; Ngo lé chyt é htoq yhumsing é zo wui lé je chyt é sù ó yuq nghut kôle, Ngá é chángzo kut râ gingdán sù a nghut; <sup>38</sup> Yhumsing é tapzîng lé a waq é za, Ngá htâng châng é sù ó yuq nghut kôle, Ngá é chángzo kut râ gingdán sù a nghut. <sup>39</sup> Yhumsing é asak lé ha bûn é sù ó yuq nghut kôle, asak sum râ nghut lhê; Ngá é yanmai, yhumsing é asak sùm pyám é sù ó yuq nghut kôle, asak wó râ nghut lhê.

<sup>40</sup> Nungmoq lé hap yù sù gi, Ngo lé hap yu é sù nghut bê; Ngo lé hap yù sù gi, haû Ngo lé nhang kat Sù lé hap yu é sù nghut bê. <sup>41</sup> Myiqhtoi rayuq lé, myiqhtoi dông lhom hap yu é sù ó yuq nghut kôle, myiqhtoi rayuq é chyunghuq lé wó yû râ nghut lhê; dingmán sù rayuq lé, dingmán sù dông lhom hap yu é sù ó yuq nghut kôle, dingmán sù rayuq é chyunghuq lé wó yû râ nghut lhê. <sup>42</sup> Shî, tiq bang mâ é rayuq yuq lé, Ngá é chángzo nghut é yanmai, uchyam ragóm byi huq é sù gi, Ngò, nungmoq lé teng za taí kôlé, yhâng é chyunghuq lé hkyak myang hkam yù râ za nghut lhê." gâ ri.

## 11

*Yesuq Eq Wui-myhup Sará Yohan*

*Luk 7:18-35*

<sup>1</sup> Yesuq gi, Yhâng é chángzo raxe í yuq lé dang ban pying é htâng má, Galile mau mâ é wà pé má mhoqshit râ matú eq hko kyo râ matú, haû jowò mai htoq e ló bê nghut ri.

<sup>†</sup> 10:25 Bezebulaq gâ é gi, Tsadán é myíng rajà nghut lhê. <sup>‡</sup> 10:34 Yesuq gi, simsaq hkyô byi sù nghut lhê. Nghut kôlhang, Yhang é yanmai, byu pé mabyoq htoq râ nghut é hkyô lé sé mù, haû su ga taí é nghut lhê. <sup>✠</sup> 10:36 Mihka 7:6

<sup>2</sup> Wui-myhup Sará Yohan gi, Hkrisduq kut nyi é hkyô lé, htóng hkaû má wó gyo jáng,  
<sup>3</sup> "Nàng gi, haû jé lé lô râ Sû nghut lhê lú? Haû a nghut jáng, ngamoq gi, góyuq lé láng ra shirâ lú?" ga, yhâng é chángzô pé lé myi nhang kat ri.

<sup>4</sup> Yesuq tâi é gi, "Nungmoq wó gyo wó myang é hkyô, Yohan lé lô tâi kyo keq;  
<sup>5</sup> myoqjit bang, myoq wó myâng bekô; hkyî hten bang le, wó so bekô; manggâm dap bang le, lhoq gê byî é hui bekô; nojit bang le, wó gyo bekô; shî bê bang le, lhoq dui toq é hui bekô; myùng bâng é matú, gabú danglù hko kyô nyi bê nghut lhê. <sup>6</sup> Ngá é yanmai, Ngo lé lum shut é hkyô a bò sù gi, hkungsô wó nyi ri." ga tâi ri.

<sup>7</sup> Yohan é chángzô pé taû lô kô é u lé, Yohan eq séng luî, byù moq mó lé Yesuq tâi é gi; "Nungmoq gi, haî lé hpuq wú râ matú, haû yoso shut e akô lú? Laî eq hik nhûn é jamgâm lé wú râ matú nghut akô lú? <sup>8</sup> Haû a nghut jáng, haî lé wú râ matú e akô lú? Nú-nhâm é mebu wut sù lé wú râ matú e akô lú? A nghut. Nú-nhâm é mebu wut bang gi, hkohkâm-wâng pé má sheq rû nyi lhê. <sup>9</sup> Haû nghut lé gi, haî lé wú râ matú ê kô é lú? Myiqhtoi rayuq lé lú? Haû kúm nghut ri; Ngò, nungmoq lé taí kôlé, Yohan gi, myiqhtoi htoq lháng gyaú sù nghut lhê. <sup>10</sup> Haú yuq é hkyô lé, Chyúmdang má kê tô é gi, 'Wú aq, Náng é hkyô lajang láng râ matú, Ngá é lagyo lé, Náng é hí má Ngò nhang kat râ nghut lhê.'<sup>☆</sup>

gâ ri. <sup>11</sup> Ngò, nungmoq lé teng za taí kôlé, myiwe wuî mai hku kat é bang má, Wui-myhup Sará Yohan htoq je kô é rayuq lháng a htoq wú shi; nghut kôlhang, Garai Gasâng é mauhkûng mingdán má je tiq dik sù gi, Yohan htoq je kô lhê. <sup>12</sup> Wui-myhup Sará Yohan é buinyî mai ahkuî jé shoq, mauhkûng mingdán gi, lú chyîn wang nyi é hui mù, sarhé pé gi, haú lé wó yû bekô nghut ri. <sup>13</sup> Hkâsù mù gâ le, Yohan é ahkyíng jé shoq, haû myiqhtoi pé banshoq eq tarâ gi, haú hkyô eq séng luî, myiqhtoi htoî to gù nghut lhê. <sup>14</sup> Nungmoq hap yù nau é nghut jáng, Yohan gi, haû jé lé lô râ ga sù Eliyaq nghut lhê.<sup>☆</sup> <sup>15</sup> Gyô yù râ nohkyap dap sù gi, gyô yù sháng gaq.

<sup>16</sup> Shí ipyat lhê é byu pé lé, Ngò, hai eq taí kê wú râ lú? <sup>17</sup> Yhangmoq gi, 'Nungmoq é matú, ngamoq sampyí mut byi kôlhang, nungmoq gi, a gó kó; ngamoq, ngaù hkyangsâng kôlhang, nungmoq gi, a ngaù kó.' ga luî, gài pé má zùng mù, góbang lé wut tâi lhum nyi é zoshâng wuî eq wuî akô. <sup>18</sup> Hkâsù mù gâ le, Yohan gi, jé lé mù, a zo a shuq kut jáng le, yhangmoq gi, yhang lé, 'Yhang gi, nat gang dap sù nghut ri.' ga tâi akô. <sup>19</sup> Haû Byu Yhangzo jé lé luî, zo mù shuq mù kut jáng le, 'Shí yuq gi, zo myoq shuq myoq noq sù eq, kang guq bang eq yubak dap bâng é buinùm hpó nghut ri.' ga dum tâi akô. Nghut kôlhang, hpaqchyî byéng-yá gi, yhâng é muzò eq saksé tân shit nyi ri." gâ ri.

### *Myit A Lhîng É Wà Mó Pê Hkyô*

*Luk 10:13-15*

<sup>20</sup> Hau htâng, Yesuq gi, laklaí kumlhá pé je myo kut shit bê nghut kôlhang, myit a lhîng é myuq pé lé tân é gi, <sup>21</sup> "Kurazin và mó ê! Nàng dingnyé wó ri! Bet-saida và mó ê! Nàng dingnyé wó ri! Nungmoq chyáng lé kut shit é laklaí kumlhá pé lé, Turuq myuq eq Sidun myuq má kut shit é ru nghut le gi, yhangmoq, noq noq mai myit lhîng mù, jimê tû wut lhê, myiwap kyaq gyûn lhê kut bekô râ nghut lhê. <sup>22</sup> Ngò, nungmoq lé taí kôlé, tarâ jéyáng é buinyî má, nungmoq gi, Turuq myuq eq Sidun myuq htoq má je hpuzò kô râ nghut lhê. <sup>23</sup> Dum mù, Kaperna-um và nàng ê, nàng gi, mauhkûng jé shoq waq toq é hui râ lú? A nghut, mosumhkung má sheq gyó râ nghut lhê. Náng chyáng kut shit é laklaí kumlhá lé, haû Sodom và má kut shit é ru nghut le gi, myuq haû hkû-nyí jé shoq joq nyi râ nghut lhê. <sup>24</sup> Ngò, nungmoq lé taí kôlé, tarâ jéyáng é buinyî má, Sodom và hpuzò é gi, náng htoq shau râ nghut lhê." gâ ri.

### *Ngú Nyî Bâng É Matú Bánno Jang*

*Luk 10:21-22*

<sup>25</sup> Haú u lé, Yesuq taí é gi, "Mauhkûng eq myigung é Yhumsîng, Âwa ê, Nàng gi, haú pé lé, hpaqchyî byéng-yá bò bang eq myit hpaqchyî sé bâng é hí má nghop to luí, zoshâng wùi lé tân shit bê nghut é yanmai, Ngò, Nang lé hkya-on lhê ô. <sup>26</sup> Nghut bê, Âwa ê, haú gi, Nàng ô nau é hkyô nghut ri.

<sup>27</sup> Ngá Wa gi, lhunglhang lé Ngá é loq má ap byî to bê. Haú Zo lé, Âwa mai lai luí ó le a sé; Âwa lé le, haú Zo eq haú Zo mai sé nhâng râ matú hkyin yu é bang mai lai luí ó a sé.

<sup>28</sup> Ngú é eq wòlai wun é lhunglhang bang ê, Ngá chyáng lé keq; Ngò, nungmoq lé bánno nhâng râ nghut lhê. <sup>29</sup> Ngò gi, myit nú-nhâm é eq myit lhoq nyhum é sù nghut é yanmai, Ngá é kandang lé waq keq; Ngá chyáng mai mhoq yû keq; haú hkûn, nungmoq é asak woi-nyí bánno kó râ nghut lhê. <sup>30</sup> Haí mù gâ le, Ngá é kandang gi, waq lui é htoq agó, Ngá é wò le sôm lhê." gâ ri.

## 12

### *Bánno Buinyi É Yhumsîng*

*Mrk 2:23-28; 3:1-6; Luk 6:1-5, 6-11*

<sup>1</sup> Haú yoq lhê é Bánno buinyi ra-nyí má, Yesuq gi, Yhâng é chángzô pé eq rahá yò hkaú mai sô lai ló nyi ri. Yhâng é chángzô pé gi, zòmut é yanmai, kyôshi ratsuí langshap yû mù, zô akô nghut ri. <sup>2</sup> Hparishe pé gi, haú lé myàng kôjáng, "Wú aq! Náng é chángzô pé gi, Bánno buinyi má a ge kut jung lé kut nyi akô." ga taí kat akô.

<sup>3</sup> Haú hkûn, Yesuq tû taí é gi, "Dawiq lhang gi, yhâng htâng châng é bang eq rahá zòmut huí é hkûn hkâsu kut é hkyô lé, nungmoq a nghap wú kó lú? <sup>4</sup> Dawiq gi, Garai Gasâng é yhúmhkaú má wang ê mù, hkyangjông pé mai lai luí, ó le a ge zô é, kyâng tô é muk lé, yhang eq yhâng htâng châng é bang yù zo kô é a nghut kó lú? <sup>5</sup> Hau htoq agó, Bánno buinyi má, hkyangjông pé gi, noqkuq yhúmhkaú má Bánno buinyi é tarâ lé shut kôlhang mara a wó é lé, haú tarâ laiká má nungmoq a nghap wú kó lú? <sup>6</sup> Ngò, nungmoq lé taí kôlé, haú noqkuq yhâm htoq je ko sù gi, shí má nghut nyi lhê. <sup>7</sup> Ngò ô nau é gi, hkungga nhông hkyô a nghut, shogyo nhikmyin hkyô sheq ru nghut lhê<sup>☆</sup> gâ é lichyúm lé nungmoq sé kô é ru nghut le gi, mara a bò bang lé mara hûn kó râ a nghut. <sup>8</sup> Hkâsu mù gâ le, haú Byu Yhangzo gi, haú Bánno buinyi é Yhumsîng nghut lhê." gâ ri.

<sup>9</sup> Hau htâng, Yhang gi, haú jowò mai e ló mù, yhangmoq é tarajong má wang e ló ri. <sup>10</sup> Loq rahkyam ajum shi byuq é byù rayuq le, haú má nyi tô ri. Yhangmoq gi, Yesuq lé, "Bánno buinyi má, nòhpyo lhoq gê byi le, tarâ wang lhê lú?" ga myi é đông, Yhang lé mara hûn râ hkyô ho akô nghut ri.

<sup>11</sup> Haú hkûn, Yesuq gi, "Nungmoq chyáng mâ é ó yuq wá, yhumsing é sau radu, Bánno buinyi má dong gyó tô le, a xe htoq yu é nyi kó râ lú? <sup>12</sup> Byù gi, saú htoq má hpaudap dik é nghut lhê! Haú mù, Bánno buinyi má ge é hkyô kut le, tarâ wang lhê." ga yhangmoq lé tû taí ri.

<sup>13</sup> Hau htâng, Yhang gi, haú loq jum shí sù lé, "Náng é loq nyhang kat aq." ga taí kat jáng, haú yuq gi, loq nyhang kat jáng, loq haú gi, a no é loq su ge byuq bê nghut ri.

<sup>14</sup> Hparishe pé kúm gi, htoq ló kômù, Yesuq lé hkâsu kut wó sat pyám râ hkyô lé, chôm hpyê lhùm bum akô nghut ri.

### *Garai Hkyin Tô É Dui-nhâng Zoshâng*

<sup>15</sup> Yesuq gi, haú hkyô lé sé jáng, haú jowò mai htoq ló bê nghut ri. Byù myo myo le, Yhâng htâng châng bùm kômù, Yhang gi, nòhpyo hui bang banshoq lé lhoq gê byi luí,

<sup>16</sup> Yhang ó yuq nghut é hkyô lé, a taí byông htoq râ matú, yhangmoq lé taí hkûm tô ri.

<sup>17</sup> Haú gi, myiqttoi Esai-aq é nhut đông mai taí tô é dang lé lhoq dik râ matú nghut ri. Dang haú pé gi,

<sup>18</sup> "Shí yuq gi, Ngò chyt, Ngò myit nguì luí, hkyin tô é Ngá é dui-nhâng zoshâng nghut lhê;

Ngò gi, Ngá é Woi-nyí, Yhang lé kat byi râ nghut mù,

☆ 12:7 Hos 6:6

Yhang gi, tarâ dingmán é hkyô lé byù myû banshoq pé má taí kyo râ nghut lhê.

<sup>19</sup> Yhang gi, haí a hpuq tù é htoq agó, a garu râ nghut lhê; Yhâng é htê lé, hkyô mó pé má wó gyo râ a nghut.

<sup>20</sup> Yhang gi, tarâ dingmán é hkyô lhoq ung é hkûn jé shoq,

nâng chap pyám bê jàm gàm lé le, lhoq hkyui râ a nghut, myihkau za htoq nyí bê myi lé le, lhoq sat pyám râ a nghut.

<sup>21</sup> Byù myû chângjup gi, Yhâng é myìng má myit myoqbyù kó râ nghut lhê."☆  
gâ ri.

### *Yesuq Eq Bezebulaq*

*Mrk 3:20-30; Luk 11:14-23; 12:10; 6:43-45*

<sup>22</sup> Hau htâng, agè ashop é nat gang wang júng luí, myoqjit nhutjit é byù rayuq lé, Yesuq chyáng shuí lé lô kôjáng, Yesuq gi, haú yuq lé lhom lhoq gê byí ri; haú mù, haú yuq gi, dang le wó nyô, myoq le wó myâng dut bê nghut ri. <sup>23</sup> Byù hpûng mó gi, haú lé wú maú byuq kômù, "Shí yuq, Dawiq é Yhangzo za gi, nghut lhê laq?" ga taí bum akô.

<sup>24</sup> Nghut kôlhang, Hparishe pé gi, haú lé wó gyo kôjáng, "Shí yuq gi, nat gâng pé é zau Bezebulaq\* é wum-o a-tsam èq za nat gâng pé lé wó hkat htoq é nghut ri." ga taí bum akô nghut ri.

<sup>25</sup> Yhangmoq myit nyi é hkyô lé Yesuq sé mù, yhangmoq lé taí é gi, "Hká mingdán nghut kôle, ahkaú má byoq gâng lhûm nyi kô é nghut jáng, htên byoq byuq râ za nghut lhê; haú eq rajung za, myuq ralhum nghut nghut, yhumhtu ralhum nghut nghut, yhangchang byoq lhûm nyi kô é nghut jáng, haú gi, wó gîng nyi râ a nghut. <sup>26</sup> Tsadán gi, Tsadán lé hkat htoq pyâm é nghut jáng, yhumsing gùng yhumsîng lhoq hpýoq nyí gù bê nghut ri. Haú su nghut jáng, yhâng é mingdán gi, hkâsu kut wó gîng to râ lú? <sup>27</sup> Haú mù luí, Ngò gi, Bezebulaq é wum-o a-tsam èq za nat gâng pé lé hkat htoq é nghut jáng, nungmoq é byu pé gi, ó yuq é wum-o a-tsam èq hkat htoq pyám kô é nghut lhê lú? Haú su nghut jáng, haú bang gi, nungmoq lé tarâ jéyáng bang dut kó râ nghut lhê. <sup>28</sup> Nghut kôlhang, Ngò gi, Garai Gasâng é Woi-nyí èq nat gâng pé lé hkat htoq pyâm é nghut jáng, Garai Gasâng é mingdán gi, nungmoq chyáng jé bê nghut ri.

<sup>29</sup> Ó yuq nghut kôle, wum-o bò sù lé hí tuí zing pyâm é a nghut le gi, yhâng é yhûm má lú wâng mù, yhâng é sutzè lé hkâsu wó lú yû râ lú? Haú yuq lé hí tuí zing pyám jáng sheq, yhâng é sutzè lé wó lú yû râ nghut lhê.

<sup>30</sup> Ngá hkyam shut a dap sù gi, Ngo lé gyè kut sù nghut lhê; Ngò eq rahá a shûm tsing sù gi, lhoq pyo pyâm é sù nghut nyi ri. <sup>31</sup> Haú mù, Ngò, nungmoq lé taí kôlé, byu pé é yubak mara hkanmó eq Garai Gasang lé rhoi dang taí pyâm é lhunglhang gi, mara hkyut byí é wó hui râ nghut lhê. Nghut kôlhang, haú Chyoiyúng Woi-nyí lé rhoi dang taí pyâm é gi, mara hkyut byí é hui râ a nghut. <sup>32</sup> Haú Byu Yhangzo lé dang dông shut é sù gi, mara hkyut byí é wó hui râ nghut lhê; nghut kôlhang, haú Chyoiyúng Woi-nyí lé dang taí shut é sù gi, shí ipyat má le, htang pyat má le, mara hkyut byí é hui râ a nghut.

<sup>33</sup> Ashi lé wú luí, agàm lé sé râ nghut é yanmai, agàm lé lhoq gê jáng, ashi le gè râ nghut lhê; agàm lé a lhoq gê jáng, ashi le gè râ a nghut; <sup>34</sup> Duq htân lhangmuí amyû ê, nungmoq gi, agè ashop é bang nghut to kôluí nhîng, dang gè hkâsu wó taí kó râ lú? Hkâsu mù gâ le, i-myt unghkaú má byíng mui tô é lé za, nhut mai taí htoq lo é nghut lhê. <sup>35</sup> Ge é sù gi, yhumsing é i-myt unghkaú mâ é sutdò mai ge é zè pé lé lhoq htoq shit lhê. Agè ashop é sù gi, yhumsing é i-myt unghkaú mâ é agè ashop é sutdò mai, agè ashop é zè pé lé lhoq htoq shit lhê. <sup>36</sup> Ngò, nungmoq lé taí kôlé, byù gi, yhumsîng taí kat é akyû a bo é dang pé é matú, tarâ jéyáng é buinyi má taí sân kyo ra kó râ nghut lhê. <sup>37</sup> Hkâsu mù gâ le, yhumsîng mara lut râ le, ó le ó taí é dang pé mai; mara byí é hui râ le, ó le ó taí é dang pé mai, nghut râ nghut lhê." gâ ri.

☆ 12:21 Esai 42:1-4 \* 12:24 Bezebulaq gâ é gi, Tsadán é myìng rajà nghut lhê.

*Limik Kumlhá Lé Dung Kô É Hkyô**Mrk 8:11-12; Luk 11:29-32; 11:24-26*

<sup>38</sup> Hau htâng má, Hparishe pé eq tarâ sará pé ra-am gi, "Sará ê, ngamoq gi, Nàng, limik kumlhá kut shit râ lé myàng nau ri." ga Yhang lé dúng akô.

<sup>39</sup> Haû mù, Yhang tû taí é gi, "Agè ashop é eq lhum a zuí é ipyat shî gi, limik kumlhá dung nyi ri myhi-nhung! Myiqhtoi Yonaq é kumlhá mai lai luí, gotû haí le tûn shit râ a nghut. <sup>40</sup> Hkâsu mù gâ le, Yonaq gi, ngo mó é wamdau hkaû má sum nyí sum myîn lúng é su, haû Byu Yhangzo le, myigùng káng má sum nyí sum myîn lúng râ nghut lhê. <sup>41</sup> Ninewe wà byù wuì gi, Yonaq mungdang hko kyô é hkûn myit lhîng kô é nghut mù, tarâ jéyáng é buinyì má, ipyat shí mâ é bang eq rahá toq lò luí, ipyat shí mâ é bang lé mara hûn kó râ nghut lhê; haû Yonaq htoq ko sù gi, ahkuí shí má jé nyì to bê. <sup>42</sup> Maupyî mâ é hkohkâm myhí gi, maumyî ló htâng é mai lé lô mù, Sholumon é hpaqchyî dang lé, lé gyô yù bê nghut mù, haû tarâ jéyáng é buinyì má, ipyat shí mâ é bang eq rahá toq lò luí, ipyat shí mâ é bang lé mara hûn râ nghut lhê; haû Sholumon htoq ko sù gi, ahkuí shí má jé nyì to bê.

<sup>43</sup> Haû agè ashop é nat gi, byù rayuq chyáng mai htoq lô mù, kyuq huí é jowò pé má sô yông e lô luí, no râ jowò hkat ho wú le, a myang hô nghut ri. <sup>44</sup> Haú hkûn, yhang gi, 'Ngò nyi lai lo é yhûm má dum taû lô wú râ.' ga taí ri. Yhang dum taû jé lô wú le, yhûm haú lé, ó le a sing yu hpyuq é htoq agó, san za rago dut to láng é lé lô myang ri. <sup>45</sup> Haû jáng, yhang gi, dum taû ê mù, yhâng htoq je wuì é nat nyhit nat lé shuí lò luí, haú má lo wang nyi to bekô. Haû mù, haú yuq é nyì yap sâmlai gi, hí lhê htoq má je wuì lò bê nghut ri; agè ashop é ipyat shî le, haû eq rajung za dut râ nghut lhê." gâ ri.

*Yesuq É Yhângnu Eq Yhanggu Pé**Mrk 3:31-35; Luk 8:19-21*

<sup>46</sup> Yesuq, shiwa byu pé lé dang rû nyo nyi ashî hkûn, yhângnu eq yhanggu pé gi, Yhang lé nyò nau kômù, shinggan má lé yap tô akô nghut ri. <sup>47</sup> Haû mù, Yesuq lé, "Nàng nu eq nunggu pé gi, Nang lé nyò nau mù, shinggan má láng yap bum akô." ga taí kyô akô.

<sup>48</sup> Haú hkûn, Yhang gi, "Ô pé gi, Ngá nu eq Ngá gu pé nghut akô lhú?" ga tû taí kat ri. <sup>49</sup> Hau htâng, Yhang gi, Yhâng é chángzô pé lé loq tun luí, "Wú keq, shí bang gi, Ngá nu eq Ngá é gumang wuì nghut bê. <sup>50</sup> Hkâsu mù gâ le, mauhkûng htoq mâ é Ngá Wa ô nau é hkyô châng é sù ó yuq nghut kôle, Ngá gu Ngá mang, Ngá gu Ngá nhá, Ngá nu chyat nghut bê." ga xoq taí ri.

## 13

*Kyôshi Sân É Dangtú**Mrk 4:1-20; Luk 8:4-15*

<sup>1</sup> Haú nyí má yhang, Yesuq gi, yhúmhkaû mai htoq lô mù, wuì nhông yàm má ê zung tô ri. <sup>2</sup> Byù hpûng mó gi, Yhâng é lhînghkyuq má zup zîng lé bûm kô é yanmai, Yhang gi, lhaí hkaû má doq zùng tô ri. Shiwa byu pé kúm gi, gin-gau htoq má yap tô bum akô. <sup>3</sup> Hau htâng, Yhang gi, haú bang lé, dangtú pé dông myo myo taí é má, "Kyô hkyó sù rayuq gi, kyôshi san râ ga htoq e lô ri. <sup>4</sup> Yhang, kyôshi sân kat é hkûn, ra-am gi, hkyô má gyó ang mù, nghoq pê èq lé hte zô pyám ri. <sup>5</sup> Ra-am gi, myi-tse a htu é luqgok yò pé má gyó ang mù, myi-tse a htu é yanmai, lui za yuq htoq lô kôle, <sup>6</sup> amyit a wó chin hing é nghut mù, bui htoq lô jáng, lhap kyuq pyám bê nghut ri. <sup>7</sup> Dum ra-am gi, zugyóm hkaû má gyó ang luí, zubyap haú pé kô lò mù, wup pyâm ri. <sup>8</sup> Ra-am dum nghut jáng, myìhpún bo é jang má gyó ang luí, ashi zuí lo é gi, sân kat é htoq rashô tú, hkyuq xê tú, sum xê tú, myô jat lo é nghut ri. <sup>9</sup> Gyô yù râ nohkyap dap sù gi, gyô yù sháng gaq." ga le taí ri.

<sup>10</sup> Haú hkûn, chángzô pé gi, Yhâng chyáng lé mù, "Nàng gi, haí mù, shí bang lé, dangtú dông taí lhê lhú?" ga myî akô.

<sup>11</sup> Haû jáng, Yhang tû taí é gi, "Mauhkûng mingdán eq sêng é sê gyo wuì é hkyô pé lé sê gyo râ ahko ahkáng, nungmoq lé byí to bê, nghut kôlhang, yhangmoq lé gi, a byi shî é nghut lhê. <sup>12</sup> Wó to sù lé gi, yhang agùn agó wó râ matú, jat byi shirâ nghut lhê. A wó su

chyáng mai kúm gi, yhang wó tô é lé lhang yu pyám byi shirâ nghut lhê. <sup>13</sup> Yhangmoq gi, wú to kôlhang, a myàng kó; gyô nyi kôlhang, a wó gyo, a sê gyo kó nghut é yanmai, yhangmoq lé Ngò dangtú dông taí râ é nghut lhê. <sup>14</sup> Haú gi, 'Nungmoq gi, wó gyô tô nyi kôlhang, sê gyo kó râ a nghut; myang tô nyi kôlhang, wú sé kó râ a nghut.

<sup>15</sup> Hkâsu mù gâ le, byù shí bang gi, myit nhikshi jit byuq bê; yhangmoq é nohkyap gi, a wó gyo kó, myoqjí le chûm byuq bekô nghut ri.

Haú su a nghut le gi, yhangmoq, myoq myàng no gyo mù, i-myt bun bóng luí, lhang lò kômù,

Ngò, yhangmoq lé yâ gè byi berâ nghut lhê. <sup>16</sup>☆

gâ é, Esai-aq é myiqhtoi dang lé lhoq dik é nghut ri. <sup>16</sup> Nghut kôlhang, nungmoq é myoq gi, wó myâng mù, nungmoq é nohkyap gi, wó gyô é yanmai, nungmoq gi, hkungsô wó nyi ri. <sup>17</sup> Hkâsu mù gâ le, Ngò, nungmoq lé teng za taí kôlé, nungmoq wó myâng, wó gyô é pé lé, myiqhtoí pé eq dingmán bang myo myo gi, myàng nau gyo nau kôlhang, a wó myâng, a wó gyo kó nghut ri.

<sup>18</sup> Ahkuí, kyôshi san sù eq sêng é dangtú é lichyúm lé rago gyô wú keq; <sup>19</sup> Hkyô má gyó âng é kyôshi gi, mauhkûng mingdán eq sêng é danglù lé wó gyo kôlhang, a sê gyô é yanmai, haú agè ashop sù lé lô mù, yhang é i-myt hkaú má san kat tô é kyôshi lé, lé yu pyám byí é hui sù lé gá nau é nghut lhê. <sup>20</sup> Luqgok yò pé má gyó âng é kyôshi gi, mungdang lé wó gyo jáng, radá dâm gabú myit eq hap yù kôlhang, <sup>21</sup> amyit a wó chîn é yanmai, razup zo za yuq mù, mungdang é yanmai, wúihkê é eq zing-rí é hui kôjáng, hân hân htak ló byuq é sù lé gá nau é nghut lhê. <sup>22</sup> Zugyóm má gyó âng é kyôshi gi, haú mungdang lé wó gyô yù kôlhang, shí ipyat lhê é myit wui myit hke hkyô pé eq hkyô shuí nghoq jung ngùn hîng zêhkoq eq hup pyâm é yanmai, ashi a wó zuí é sù lé gá nau é nghut lhê. <sup>23</sup> Nghut kôlhang, myìhpún bo é jang má gyó âng é kyôshi kúm gi, mungdang lé wó gyo mù, sê gyô yu é sù lé gá nau é nghut lhê. Haú yuq ashi zuí é gi, san kat é htoq rashô tú, hkyuq xê tú, sum xê tú, myô jat lo é nghut ri.

#### *Myoqgàm Dangtú*

<sup>24</sup> Yesuq, yhangmoq lé dangtú dông xoq taí kyô é gi, "Mauhkûng mingdán gi, ge é kyôshi lé, yò má san kat sù rayuq eq du ri. <sup>25</sup> Byu pé yhup myhî tô bum é u lé, yhang é gyè gi, lé jé mù, guq gàm gyoro má, myoqshi lé sân to hkó luí, taú ló byuq bê nghut ri.

<sup>26</sup> Guq gàm yuq lò mù, guq nhâm htoq lo é hkûn, myoqgàm le bo yuq htoq lo ri.

<sup>27</sup> Yhumsîng hpô é dui-nhâng zoshâng wui gi, yhang chyáng lé jé mù, 'Yhumsîng ê, ge é kyôshi lé za yò má sân tô é a nghut lhuí? Myoqgàm pé gi, hkâmai htoq lo é lhuí?' ga myi kôjáng, <sup>28</sup> haú yhumsîng hpó gi, 'Gumlau gye eq kut é nghut ri.' ga tú taí ri.

Haú jáng, dui-nhâng zoshâng wui gi, 'Ngamoq, myoq haú pé lé ê nut pyám râ lé, nàng ô nau ri lhuí?' ga myí akô.

<sup>29</sup> Haú hkûn, yhang gi, 'Hká nut pyám kó; hkâsu mù gâ le, nungmoq, myoq haú pé lé nut é hkûn, guq gàm pé lé le bo záng nut pyám kó râ nghut lhê. <sup>30</sup> Kyôshu yoq jé shoq rahá yuq to kó sháng gaq; haú hkûn, myoqgàm pé lé hí hkyin tsîng yù mù, nyhê hkyô pyám râ matú hkyom dîng to luí, guq lé kúm gi, shú yù mù, ngá é chyí má tsing kat to râ matú, kyô shu bang lé ngò taí râ nghut lhê.' ga tú taí ri." gâ ri.

#### *Angshi Cham Eq Múnchi Dangtú*

*Mrk 4:30-34; Luk 13:18-21*

<sup>31</sup> Hau htâng, Yesuq gi, yhangmoq lé gotú dangtú ralhú dum xoq taí é gi; "Mauhkûng mingdán gi, byù rayuq eq, yhang hkyâm má hô tô é angshi cham eq wui ri. <sup>32</sup> Angshi cham haú gi, kyômyui jí banshoq htoq má je tiq é nghut kôle, yuq kô lò jáng, hkyâm má hô é mhan-haq hpoqnoq gàm banshoq htoq má je kô é agàm dut lò mù, akoq pé má, maulat nghoq zô pé lé wó zung nô bum lhê." gâ ri.

☆ 13:15 Esai 6:9-10



<sup>33</sup> Yhang, gotú dangtú dum xoq taí é gi, "Mauhkûng mingdán gi, myiwe rayuq eq sungso múm sum bûng má yu nyhó luí, haú pé banshoq lé wó lhoq dau nhang é múnchi eq wuí ri." gâ ri.

<sup>34</sup> Yesuq gi, byù moq mó lé, haú pé banshoq dangtú dông mai chyat taí ri; yhangmoq lé, dangtú a bo é haí lháng a taí wú nghut ri. <sup>35</sup> Haú gi, "Ngá nhut lé hpóng mù, dangtú dông mai taí râ; mingkan lé sâng-hi hpan é mai zaú tô é hkyô pé lé taí sân kyo râ nghut lhê."☆  
ga, myiqhtoi dông taí tô é dang lo dik é nghut ri.

#### *Myoqgàm Dangtú Lé Taí Sân Kyô É Hkyô*

<sup>36</sup> Hau htâng má, Yesuq gi, byù moq mó mai htoq ló mù, yhúmhaú má wang ló ri. Haú hkûn, Yhâng é chángzô pé gi, Yhâng chyáng lé lô kômù, "Yò mâ é myoqgàm dangtú eq sêng é hkyô lé taí sân kyo laq." ga taí akô.

<sup>37</sup> Haú jáng, Yhang tû taí é gi, "Ge é kyôshi san sù gi, haú Byu Yhangzo nghut ri. <sup>38</sup> Yò gi, mingkan nghut ri; ge é kyôshi gi, mauhkûng mingdán é yhangzô pé nghut akô. Myoqgàm pé kúm gi, haú Tsadán é yhangzô pé nghut akô; <sup>39</sup> haú lé châng hkat sân é gumlau gyè gi, nat Tsadán nghut ri. Kyôshu yoq gi, mingkan htûm é ahkyíng nghut ri; kyô shu bang gi, maumang lagyô pé nghut akô.

<sup>40</sup> Haú myoqgàm pé lé, nut yù mù, myi má nyhê pyâm é su, haú mingkan htûm é ahkyíng má dut râ nghut lhê. <sup>41</sup> Haú Byu Yhangzo gi, Yhâng é maumang lagyô pé lé nhâng râ nghut lhê; haú mù, haú bang gi, hkyô lhoq nghoq nhang é bang banshoq eq agè ashop hkyô kut é bang lhunglháng lé, Yhâng é mingdán mai hkyin she htoq yù mù, <sup>42</sup> gyúng nyi é myibung hkyûng hkaú má dú kat pyám kó râ nghut lhê; hau má, ngaubyi ngaù nhap eq zuì kyik kyik shoq hpuzô nyi kó râ nghut lhê. <sup>43</sup> Haú hkûn, dingmán bang gi, yhangmoq Yhângwâ é mingdán má bù su duqbó nyi kó râ nghut lhê. Nohkyap dap sù gi, gyô yù sháng gaq.

#### *Haq Tô É Sutzè Dangtú*

<sup>44</sup> Mauhkûng mingdán gi, yò má haq tô é sutzè eq wuí ri. Sutzè haú lé myang é sù gi, haú lé saí haq to mù, gabú myit eq taù ló luí, yhang wó é banshoq lé ùng pyám mù, yò haú lé wui yu ri.

<sup>45</sup> Dum, mauhkûng mingdán gi, réng é palhé lé châng ho wún é hpugá hpó eq wuí ri. <sup>46</sup> Yhang gi, gyai hpaù é palhé lé myàng jáng, yhang wó é banshoq lé ló ùng pyám mù, haú lé wui yu ri.

#### *Gùn Lé Dangtú Yu É Hkyô*

<sup>47</sup> Mauhkûng mingdán gi, nhông má, ngozo ajà jà lé wó dú nghop yu é gùn eq le wuí ri. <sup>48</sup> Gùn haú má ngozo byíng jáng, ngo kóng bang gi, wui yàm má she htoq yù mù, zung to luí, ge é pé lé gi, ngo-pyap má guq kat yù luí, a ge é pé lé gi, dú pyâm akô. <sup>49</sup> Haú eq rajung za, mingkan htûm é ahkyíng má le, maumang lagyô pé gi, gyó lé lô mù, agè ashop é bang lé, dingmán bâng chyáng mai gam htoq yù luí, <sup>50</sup> ngaubyi ngaù nhap eq zuì kyik kyik shoq hpuzô nyi râ nghut é, gyúng nyi é myibung hkyûng hkaú má dú kat pyám kó râ nghut lhê.

<sup>51</sup> Shí hkyô banshoq lé nungmoq sê gyo bekô lhú?" gâ ri.

Haú hkûn, yhangmoq gi, "Sê gyo bê." ga tû taí akô nghut ri.

<sup>52</sup> Hau htâng, Yesuq gi, yhangmoq lé, "Mauhkûng mingdán eq séng luí mhoq yù bê é tarâ sará ó nghut kôle, yhang mhoq é hkyô gi, yhumsing é sut-púnglhúng hkaú mai zè sik zè xau lé yu htoq é yhumsing hpó rayuq eq wuí ri." ga dum taí ri.

#### *Myiqhtoi, Myoqdong A Wó Dut É Jang*

*Mrk 6:1-6; Luk 4:16-30*

<sup>53</sup> Yesuq gi, dangtú haú pé lé ban taí jáng, haú jowò mai htoq e ló bê nghut ri. <sup>54</sup> Yhang gi, Yhâng é yhummau má jé ló jáng, byu pé lé, yhangmoq é tarajong má mhoqshit ri;

☆ 13:35 Hkya-on 78:2

haú hkûn, yhangmoq gi, gyô maú byuq kôluí, "Byù shí yuq gi, hpaqchyí byéng-yá shí eq hpungwup a-tsam mó shí pé lé, hkâmai wó yu é nghut lhê làhà? <sup>55</sup> Yhang gi, laksîma hpô é yhangzo a nghut lhú? Yhângnû é myìng gi, Mariq gà lhê a nghut lhú? Yhanggû pé gi, Yakuq, Yosep, Simun eq Yudaq gà é bang a nghut kó lhú? <sup>56</sup> Yhâng nhammó pé le, nganhúng eq rahá nghut nyi lhê a nghut kó lhú? Haú su nghut le nhîng, haú pé banshoq lé, Yhang hkâmai wó yu é nghut lhê làhà?" ga myî bùm kômù, <sup>57</sup> Yesuq lé myit a ngón dut bùm bekô nghut ri.

Yesuq kúm gi, yhangmoq lé, "Myiqhtoi rayuq gi, yhumsing é yhummau eq yhumsing é yhûm má za, myoqdong a lhaq wó wú é nghut lhê." ga tû taí kat ri.

<sup>58</sup> Yhangmoq lumjîng myit a bò kô é yanmai, Yesuq gi, haú má, laklaí kumlhá myo myo a kut shit lo nghut ri.

## 14

### *Wui-myhup Sará Yohan Shi Byuq É Hkyô*

*Mrk 6:14-29; Luk 9:7-9*

<sup>1</sup> Haú hkûn, mauzau Herut gi, Yesuq eq sêng é ludang lé wó gyo jáng, <sup>2</sup> yhâng a-ô mâ é bang lé, "Shí yuq gi, Wui-myhup Sará Yohan nghut ri-nhung; Yhang gi, shi é mai dum dui toq lo é nghut mù, hpungwup a-tsam haú pé lé wó kut é nghut ri." ga taí ri.

<sup>3</sup> Herut haú su gà é gi, yhanggu Hpilip é yhangmyi Herudiaq é yanmai, Yohan lé chyup tuí yù mù, htóng hkyô pyâm é yanmai nghut ri. <sup>4</sup> Hkâsu mù gà le, Yohan gi, yhang lé, "Nàng, myiwe haú lé hâng yu é gi, tarâ a wang é nghut lhê." ga taí byî nyi é yanmai nghut ri. <sup>5</sup> Herut gi, Yohan lé sat pyám naú kôlhang, mingbyû wui lé gyuq é yanmai, a wám sat nghut ri; haí mù gà le, yhangmoq gi, Yohan lé myiqhtoi tsuq nyî kô é yanmai nghut ri.

<sup>6</sup> Nghut kôlhang, Herut é hkû ladu hkyúm buinyî má, Herudiaq é yhangzo byizo gi, yhangmoq é hí má gó shit é lé, Herut gi, gyai yhang wú myit nguì mù, <sup>7</sup> byizo haú lé, yhang haí dung le haí byi râ ga dakam é danggidiq byî ri. <sup>8</sup> Byizo haú gi, yhângnu hpaqchyí byî é lé gyô yù mù, "Shî, bó má, Wui-myhup Sará Yohan é ulhum lé, kat byi laq." ga, Herut lé dúng ri. <sup>9</sup> Mauzau hpó gi, myit a ngón dut byuq kôlhang, yhang dakam tô é danggidiq é yanmai le, bíng pé é myoqdong lé tê nau é yanmai le, yhang dúng é lé, byi râ matú, <sup>10</sup> htóng hkaú má lúng tô é Yohan é ulhum lé hpyit râ hkunmó hkyô kat bê nghut ri. <sup>11</sup> Yohan é ulhum lé bó má kat luí, myiwe zo haú lé byi jáng, myiwe zo haú gi, haú lé yhângnû chyáng yu ló byî ri. <sup>12</sup> Haú mù, Yohan é chángzô pé gi, yhâng é mâng lé lé yû luí, myhup pyám bekô nghut ri. Hau htâng, yhangmoq gi, Yesuq lé ló taí kyô akô nghut ri.

### *Byù Ngo Hkyîng Lé Byi Tsô É Hkyô*

*Mrk 6:30-44; Luk 9:10-17; Yhn 6:1-14*

<sup>13</sup> Yesuq gi, haú hkyô lé wó gyo jáng, haú mai lhaí ji mù, tsím tsâm é jowò shut Yhang baú e ló ri. Haú lé, byu pé wó gyô bùm kôjáng, wà mó pé mai htoq lé lô kômù, hkyî hkyô Yhâng htâng châng e ló akô nghut ri. <sup>14</sup> Yesuq gi, lhaí mai gyó dap ló é hkûn, byù moq mó nyi to lánng é lé myàng jáng, yhangmoq lé wú shogyo luí, nò bang lé lhoq gê byî ri.

<sup>15</sup> Myinhâng jé lô jáng, haú chángzô pé gi, Yhâng chyáng lé kômù, "Shí má gi, tsím tsâm é jowò nghut é htoq agó, bui le gyum ló bê nghut mù, shiwa byu pé gi, wà pé shut ló luí, yhangmoq é matú zôjung ló wó wuî kó sháng gaq, yhangmoq lé nhang kat aq hkoi." ga taí akô.

<sup>16</sup> Haú hkûn, Yesuq gi, "Yhangmoq ló a ra. Nungmoq, yhangmoq lé rajung jung byi tso keq." ga tû taí kat ri.

<sup>17</sup> Haú su ga jáng, yhangmoq gi, "Muk ngo long eq ngozo í du za ru wó lhê." ga dum tû taí akô.

<sup>18</sup> Haú jáng, Yesuq gi, "Yu lò keq." ga tû taí mù, <sup>19</sup> shiwa byu pé lé, wàhu yò má zùng nhang ri. Hau htâng, Yhang gi, haú muk ngo long eq ngozo í du lé yù mù, mauhkûng shut tu wú to luí, jeju ban hkya-on jáng, muk lé hpê gàm mù, chángzô pé lé byî ri. Haú chángzô pé gi, shiwa byu pé lé gàm byî akô nghut ri. <sup>20</sup> Yhangmoq banshoq bang zô gyî

bùm kô é htâng má, haù chángzô pé gi, zô myhit tô é pé lé, raxe í mung byíng shoq wó guq tsíng yu ashî kô nghut ri. <sup>21</sup> Haù má zô é bang gi, myiwe wuì eq zoshâng wuì lé a nghap lhôm é za, yuqgè baú ngo hkyíng kô bo ri.

*Yesuq, Wuì Htoq Má Sô É Hkyô*

*Mrk 6:45-56; Yhn 6:15-21*

<sup>22</sup> Yesuq gi, haù shiwa byu pé lé byo ló nhang nyi é hkûn jáng, chángzô pé lé lhaì má wang ji nhâng mù, tû tap shut dap ló lángh nhâng ri. <sup>23</sup> Shiwa byu pé lé nhang pyâm é htâng má, Yhang gi, kyûdung râ ga, Yhang baú bùm shut doq e ló ri. Myinhâng chutshúm zó jé shoq, Yhang baú haù má nyi nyi ri. <sup>24</sup> Haù u lé, lhaì gi, gin-gau mai tsómra wê é jowò má jé é hkûn, laì tau mut é yanmai, wuìheng èq gyai yhang lo bat nhùn é hui zô ri.

<sup>25</sup> Htang napsûn maubó zó sum hkyíng eq hkyuq hkyíng gyoro má, Yesuq gi, nhông htoq má so mù, yhangmoq chyáng lé lo ri. <sup>26</sup> Haù mù, chángzô pé gi, Yesuq nhông htoq má sô nyi é lé myàng kôjáng, gyuq dàn kômù, "Sobyô ô!" ga gyuq nán é èq taì garû akô nghut ri.

<sup>27</sup> Haù jáng yhang, Yesuq gi, yhangmoq lé, "Hkâgyuq kó! Ngò ru nghut lhê; myit wum lhoq kíng keq." ga nyo kat ri.

<sup>28</sup> Haù hkûn, Petruq gi, "Yhumsîng ê, Nàng yhang ru nghut le gi, ngo lé, wuì htoq mai sô lé lô nhâng laq." ga taì kat ri.

<sup>29</sup> Haù jáng, Yesuq gi, "Lé lô aq." ga tû taì kat ri.

Haù mù, Petruq gi, lhaì mai gyó mù, wuì htoq mai Yesuq chyáng sô e ló ri. <sup>30</sup> Nghut kôlhang, yhang gi, laidun htan é lé myang kat jáng, wú gyuq luì, wuì má nop ló nyí mù, "Yhumsîng ê, ngo lé hkyi yù laq." ga wut garû kat ri.

<sup>31</sup> Yesuq gi, radá dâm yhâng é loq lhâm kat luì, Petruq lé lêng zing to mù, "Lumjíng myit shau sù ê, nàng haì mù úng-âng lhê lú?" ga taì ri.

<sup>32</sup> Yhangnhik, lhaì má wàng kôjáng, laidun le zím byuq bê nghut ri. <sup>33</sup> Hau htâng, haù lhaì má lúng tô é bang gi, Yhang lé paì gop mù, "Nàng gi, gè gè yhang, Garai Gasâng é Yhangzo nghut bê." ga taì akô nghut ri.

<sup>34</sup> Yhangmoq gi, gû dap ló kômù, Genesarat mau má jé wang ló bekô nghut ri. <sup>35</sup> Haù mau mâ é bang gi, Yesuq lé wú sé kôjáng, awui ayàm mâ é bang banshoq lé kyô kat akô. Haù mù, byu pé gi, nòhpyo hui bang lhunglhang lé, shuí lé lô kômù, <sup>36</sup> nòhpyo hui bang lé, Yhâng é bushi htâng má za lhang záng nhâng râ matú dúng tôngbán akô; Yhang lé záng é lhunglhang bang gi, lhoq gè byí é huì bekô nghut ri.

## 15

*Sansêng É Hkyô Eq A Sansêng É Hkyô*

*Mrk 7:1-23*

<sup>1</sup> Hau htâng má, Hparishe pé eq tarâ sará pé ra-am gi, Yerusalem wà mó mai Yesuq chyáng jé lé lô kômù, <sup>2</sup> "Náng é chángzô pé gi, haì mù luì, îchýí îwa pê é htungli lé a cháng kut akô lú? Yhangmoq gi, loq hí a chí é zang zô akô nghut ri." ga, lé taì akô.

<sup>3</sup> Haù jáng, Yesuq tû taì é gi, "Nungmoq gi, haì mù, nungmoq é htunglî é yanmai, Garai Gasâng é hkunmó lé a cháng kô é lú? <sup>4</sup> Hkâsu mù gâ le, Garai Gasang gi, 'Nungmoq é înu îwa lé, hkungga keq.'<sup>✠</sup> ga le, 'Înu îwa lé, nhîng é sù ó yuq nghut kôle, sat pyâm é hui râ lhê.'<sup>✠</sup> ga le, taì tô é nghut lhê. <sup>5</sup> Nghut kôlhang, nungmoq taì é gi, 'byù rayuq yuq, yhumsîng é yhângnu yhângwa lé byi âng é zè lé, Garai Gasang lé byi râ chyunghuq nghut lhê ga taì é nghut jáng, <sup>6</sup> haù yuq gi, yhângwa lé hkungga nó a ra.' gâ akô nghut ri. Haù dông mai, nungmoq gi, nungmoq é htunglî é yanmai, Garai Gasâng é mungdang lé he-ngik pyâm akô nghut ri. <sup>7</sup> Gegùn labyoq kut bang ê! Nungmoq eq séng luì, myiqhtoi Esai-aq htô tô é dang gi, têng ri. <sup>8</sup> Myiqhtoi dang haù gi, 'Byù shí bang gi, nhut htoq mai za Ngo lé hkunggâ akô;

✠ 15:4 Htoq Lô 20:12 ✠ 15:4 Htoq Lô 21:17

yhangmoq é myit nhiklhum gi, Ngò eq wê gâng nyi akô.

<sup>9</sup> Yhangmoq, Ngo lé noqkuq nyi kô é gi, akôm má za nghut nyi ri;

hkâsu mù gâ le, yhangmoq é mhoqshit hkyô pé gi, byù dông mai mhoqshit é hkyô pé za nghut nyi ri.<sup>☆</sup>

gâ é nghut lhê." gâ ri.

<sup>10</sup> Hau htâng, Yesuq gi, shiwa byu pé lé, Yhâng chyáng wut yù luí, "Gyô yù mù, sé lo keq. <sup>11</sup> Nhut má wang lo é hái jung le, byù lé a sanséng dut nhang é a nghut, nhut mai htoq lo é pé sheq, byù lé a sanséng dut nhang é ru nghut lhê." ga taí ri.

<sup>12</sup> Haú hkûn, haú chángzô pé gi, Yhâng chyáng lé lô kôluí, "Hparishe pé gi, shí hkyô lé wó gyo mù, nhik-yô nyi bùm kô é lé, Nàng sê lhê lú?" ga myi kôjáng,

<sup>13</sup> Yhang gi, "Mauhkûng htoq tsáng myhâng mâ é Ngá Wa a hô tô é agàm hkanmó gi, apûn eq roq nut pyâm é hui râ nghut lhê. <sup>14</sup> Yhangmoq é yanmai, myit hkâ-myo kó; yhangmoq gi, myoqjit bang nghut kôle, myoqjit é bang lé hkyô-u she é bang nghut akô. Myoqjit yhangchang hkyô-u she lhûm é nghut le gi, í yuq é yhang donghkong má byit gyó kó râ za nghut lhê." ga tû taí ri.

<sup>15</sup> Haú hkûn, Petruq gi, "Ngamoq lé, dangtú hau é lichyúm taí sân kyo laq." ga taí jáng,

<sup>16</sup> Yesuq gi, "Nungmoq, ahkuí le haú-í yhang go nyi ashi kô luq? <sup>17</sup> Nhut má wang lo é hái jung le, wamdau hkaú má jé wang ló mù, gungdu mai dum htoq ló é nghut lhê. <sup>18</sup> Nghut kôlháng, nhut mai htoq lo é gi, myit nhiklhum mai htoq lo é nghut mù, byù lé a sanséng dut nhang ri. <sup>19</sup> Hkâsu mù gâ le, myit nhiklhum mai htoq lo é gi, agè ashop é dông myit é hkyô pé, byù sat é hkyô, su-myi sulàng lú hkyô, ashop é dông gungsho zùm yap é hkyô, hkaú é hkyô, a tengmán é saksé hkâm é hkyô, lumù gansang é hkyô pé nghut ri. <sup>20</sup> Haú pé gi, byù lé a sanséng dut nhang é hkyô pé nghut ri; loq a chí e za zo shuq é gi, byù lé a sanséng a dut nhang é nghut lhê." ga taí ri.

#### *Hkanan Myiwe Myhí Rayuq É Lumjáng Myit*

##### *Mrk 7:24-30*

<sup>21</sup> Hau htâng, Yesuq gi, haú mai Turuq eq Sidun mau shut htoq e ló bê nghut ri. <sup>22</sup> Haú hkûn, haú mau má nyi é Hkanan myiwe myhí rayuq gi, Yhâng chyáng lé jé mù, "Dawiq é Yhangzo, Yhumsîng ê, ngo lé shogyô yù laq ô! Ngá byizo gi, nat gang wang júng mù, gyai yhang nò gyîn nyi ri." ga taí garú ri.

<sup>23</sup> Nghut kôlháng, Yesuq gi, dang rahkun le a tû taí nghut ri. Haú mù, Yhâng é chángzô pé gi, Yhâng chyáng lé jé kômù, "Myiwe myhí haú lé ló nhang pyám aq; haí mù gâ le, yhang gi, nga-nhûng é htâng má châng garú nyi ri." ga taí akô.

<sup>24</sup> Yesuq gi, "Byuq byuq é sau pé su nghut nyi é Israelaq byu pê chyáng sheq, Ngo lé nhang kat é ru nghut lhê." ga taí ri.

<sup>25</sup> Haú hkûn, myiwe myhí haú gi, Yhâng é hí má lé mù hkyihput htuaq luí, "Yhumsîng ê, ngo lé garúm yù laq ô!" ga taí ri.

<sup>26</sup> Yesuq gi, "Zô wui chyáng mâ é zoshuq lé yù mù, hkuí pé lé byi tsô é jung a nghut." ga tû taí jáng, <sup>27</sup> myiwe myhí haú gi, "Yhumsîng ê, haú kúm nghut ri; nghut kôlháng, hkuí pé lháng, yhumsîng hpô é zohpoq mai gyó é zang cham zang htâng lé, zô akô mhaí." ga dum taí ri.

<sup>28</sup> Haú mù, Yesuq gi, "Myiwe zo ê, náng é lumjáng myit gi, kô nyi ri! Nàng dúng é hkyô lé gyo byi bê nghut lhê." ga tû taí ri. Haú hkûn jáng, myiwe myhí hau é byizo le ge byuq bê nghut ri.

#### *Byù Myi Hkyîng Lé Byi Tsô É Hkyô*

##### *Mrk 8:1-10*

<sup>29</sup> Yesuq gi, haú mai htoq ló luí, Galile nhông yàm má ê jé mù, bùm shut doq ló luí, ló zung nyi ri. <sup>30</sup> Haú hkûn, byù moq mó gi, hkyî hten bang, myoqjit bang, gung-yùn bang, nhut jit bang eq nò bang gotú myo myo lé shuí lé lô kômù, Yhâng é hkyî wang má lé nyhi to kô é nghut luí, Yhang gi, haú bang lé lhoq gê byî ri. <sup>31</sup> Haú shiwa byu pé gi, nhut jit

☆ 15:9 Esai 29:13

bang dang wó nyò kô é lé le, gung-yùn bang ge byuq é le le, hkyî hten bang hkyô wó sô é lé le, myoqjit bang myoq wó myang é lé le, myàng kôjáng, wú maú kômù, Israelaq é Garai Gasang lé hkya-ôn bum akô nghut ri.

<sup>32</sup> Yesuq gi, Yhâng é chángzô pé lé wut yù mù, "Ngò, shí bang lé wú shogyô ri; yhangmoq gi, Ngò eq rahá nghut nyi é sum nyí bò bê, haí le a myàng zo kó nghut ri. Yhangmoq, hkyolat má mut yut ló yut kó abe, yhangmoq zòmút to gû lé, Ngò a nhang kat naù." ga taí ri.

<sup>33</sup> Haú hkûn, Yhâng é chángzô pé gi, "Isû é yoso má nhîng, byù shî myhò bang lé luq shoq byi tso râ zoshuq gi, hkarâ é wó râ l hú?" ga myî akô.

<sup>34</sup> Yhang gi, "Nungmoq, muk hkâ-myhó long wó akô l hú?" ga tau myi jáng, yhangmoq gi, "Muk nyhit long eq ngo-nú zo ratsuí wó lhê." ga tú taí akô.

<sup>35</sup> Haú mù, Yhang gi, byù hpûng lé, myigùng htoq má zùng nhang ri. <sup>36</sup> Hau htâng, Yhang gi, haú muk nyhit long eq ngozo lé yù mù, jeju ban hkya-on jáng, myhik hpé luí, haú chángzô pé lé byi jáng, yhangmoq gi, byù hpûng lé gàm byî akô nghut ri.

<sup>37</sup> Yhangmoq lhunglhang bang zô gyî bùm kô é htâng má, haú chángzô pé gi, amyit ahtâng lé nyhit mung byíng shoq wó guq tsíng yu ashí kô nghut ri. <sup>38</sup> Haú hkûn zô é bang má, myiwe wuì eq zoshâng wuì lé a nghap lhôm é za, yuqgè wuì baú myi hkyîng yuq bo ri. <sup>39</sup> Yesuq gi, byù hpûng lé ló nhang pyâm é htâng má, lhaí má wang ji mù, Magadan mau shut dap e ló bê nghut ri.

## 16

### *Kumlhá Dung Kô É Hkyô*

*Mrk 8:11-13; Luk 12:54-56*

<sup>1</sup> Hparishe pé eq Saduke pé gi, Yesuq chyáng lé jé kômù, Yhang lé chyam wú é dông, mauhkûng mã é kumlhá kut shit râ matú, dúng akô.

<sup>2</sup> Haú mù, Yhang gi, yhangmoq lé, "Nungmoq gi, myinhtâng jé jáng, 'Mau hpong râ nghut lhê, hkâsu mù gâ le, mauhkûng ne ri.' ga le, <sup>3</sup> napkyó lé nghut jáng, 'Hkû-nyí laidun lò râ nghut lhê, hkâsu mù gâ le, mauhkûng nè mù, noq ri.' ga le, lhaq taí akô. Nungmoq gi, mauhkung é isâm lé wú mù sê gam hkoq yù kô é nghut kôlhang, shí ipyat lhê é kumlhá lé gi, a sê gam hkoq yù kó nghut ri. <sup>4</sup> Agè ashop é eq lhum a zuí é ipyat shí gi, limik kumlhá lé ho nyi akô; nghut kôlhang, Yonaq é kumlhá mai lai luí, gotú haí le tûn shit râ a nghut." ga taí ri. Hau htâng, Yesuq gi, yhangmoq chyáng mai htoq ló bê nghut ri.

### *Hparishe Pé Eq Saduke Pé É Múnchi*

*Mrk 8:14-21*

<sup>5</sup> Yhangmoq, nhông hé hpoq shut gû dap ló kô é hkûn, haú chángzô pé gi, muk yu chûng râ lé tô-myhî pyâm akô. <sup>6</sup> Haú hkûn, Yesuq gi, "Hparishe pé eq Saduke pé é múnchi lé, sidiq luí, koi pyâm nyi keq." ga, yhangmoq lé taí kat ri.

<sup>7</sup> Yhangmoq gi, "Nga-nhúng, muk a yu chung é yanmai, haú su ga taí é nghut ri." ga luí, taí lhum bum akô nghut ri.

<sup>8</sup> Yhangmoq haú su taí lhûm nyi kô é lé Yesuq sé jáng, yhangmoq lé, "Lumjíng myit shaú é bang ê, muk a bo é hkyô lé, haí mù taí lhûm nyi akô l hú? <sup>9</sup> Ahkuí jé shoq, nungmoq gi, a sê gyo shi kó l hú? Muk ngo lông èq byù ngo hkyîng lé byi tsô é htâng, nungmoq hkâ-myhó mung wó dum guq tsíng yù kô é lé le, <sup>10</sup> muk nyhit lông èq byu myi hkyîng lé byi tsô é htâng, nungmoq hkâ-myhó mung wó dum guq tsíng yù kô é lé le, nungmoq a myit bun kó l hú? <sup>11</sup> Ngò gi, muk eq séng luí taí é a nghut é lé, nungmoq, hkâsu mù a sê gyo kô é l hú? Hparishe pé eq Saduke pé é múnchi lé koi pyám keq nghû taí é ru nghut lhê." ga taí ri. <sup>12</sup> Haú hkûn sheq, Yhang taí é gi, muk má chung é múnchi lé koi pyám râ matú taí é a nghut e za, Hparishe pé eq Saduke pé é mhoqshit hkyô lé koi pyám râ matú taí é ru nghut é lé, yhangmoq sê gyô akô nghut ri.

### *Yesuq Lé, Petruq Yín Yu É Hkyô*

*Mrk 8:27-30; Luk 9:18-21*

<sup>13</sup> Yesuq gi, Kesare-Hpilipi wà mó nâm mâ é mau má jé é hkûn, Yhâng é chángzô pé lé, "Haú Byu Yhangzo gi, ó yuq nghut lhê ga, byu pé taí akô lhú?" ga myî ri.

<sup>14</sup> Haú hkûn, yhangmoq gi, "Ra-am gi, Wui-myhup Sará Yohan ga, góbang gi, Eliyaq ga, dum ra-am gi, Yeremiaq, a nghut jáng, gotû myiqhtoi rayuq yuq nghut ri ga, taí akô." ga tû taí kôjáng, <sup>15</sup> Yhang gi, "Haú jáng, nungmoq gi, Ngo lé ó yuq nghut lhê nghu akô lhú?" ga, yhangmoq lé xoq myî ri.

<sup>16</sup> Haú hkûn, Simun Petruq gi, "Nàng gi, rû dui nyi é Garai Gasâng é Yhangzo, Hkrisduq nghut ri." ga tû taí ri.

<sup>17</sup> Haú mù, Yesuq tû taí é gi, "Yonaq é yhangzo Simun ê, nàng gi, hkungsô wó nyi ri; hkâsu mù gâ le, nang lé haú hkyô tûn shit é gi, byù mai a nghut, mauhkûng htoq má nyi é Ngá é Îwa mai tûn shit é ru nghut lhê. <sup>18</sup> Ngò, nang lé taí lé, nàng gi, Petruq\* nghut luí, luqgok shî má, Ngò, Ngá é noqkuq hpúng lé xuq to râ nghut mù, haú moming hkúmdong pé gi, hpúng haú lé wó ûng râ a nghut. <sup>19</sup> Mauhkûng mingdán é zoqshi pé lé, Ngò, nang lé ap byi râ nghut lhê; myigùng htoq má, nàng tuí to má tuí to lé, mauhkûng htoq má le, tuí to râ nghut lhê; myigùng htoq má, nàng lhoq lhut má lhoq lhut lé, mauhkûng htoq má le, lhoq lhut byi râ nghut lhê." gâ ri. <sup>20</sup> Hau htâng, Yhang Hkrisduq nghut é hkyô lé, ó lé le a taí kyo râ matú, Yhâng é chángzô pé lé taí hkûn kat ri.

*Yesuq Gi, Yhang Shî Râ Lé Hí Te Taí É Hkyô*

*Mrk 8:31—9:1; Luk 9:22-27*

<sup>21</sup> Yesuq gi, Yhang Yerusalem wà mó má ló mù, suwún wuî, hkyangjong agyi pé eq tarâ sará pê é loq má, zing-rî é myo myo hui zo luí, sat pyâm é hui ra râ nghut kôle, sum nyí nghú râ buinyi má, lhoq toq yu é hui râ nghut é hkyô lé, haú hkûn mai, Yhâng é chángzô pé lé taí kyo hi ló bê nghut ri.

<sup>22</sup> Haú mù, Petruq gi, Yhang lé rahkyam shut shuí htoq yû mù, "Yhumsîng ê, haú hkyô Náng chyáng hkâ-nhám le a dut sháng gaq." ga Yhang lé tân ri.

<sup>23</sup> Yesuq gi, lhing wú kat mù, Petruq lé, "Tsadán nàng, Ngá chyáng mai hpâng aq! Nàng gi, Garai Gasang eq sêng é hkyô lé a myit e za, byù eq sêng é hkyô lé za myit é sù nghut mù, Ngá é matú myit leqbat jowò nghut ri." ga taí ri.

<sup>24</sup> Hau htâng, Yhang gi, Yhâng é chángzô pé lé, "Ngá htâng cháng naú sù ó yuq nghut kôle, yhumsing gùng yhumsîng he-ngik pyâm mù, yhumsing é tapzîng lé waq chûng luí, cháng ra râ nghut lhê. <sup>25</sup> Hkâsu mù gâ le, yhumsing é asak lé hkyi yù naú sù ó yuq nghut kôle, asak sum râ nghut lhê; nghut kôlhang, Ngá é yanmai, yhumsing é asak sùm pyâm é sù kúm gi, asak wó yû râ nghut lhê. <sup>26</sup> Byù gi, mingkan gón lé wó sing to kôlhang, yhumsing é asak woi-nyí sùm byuq é nghut le gi, yhang é matú, hai akyû bò râ lhú? Byù gi, yhumsing é asak woi-nyí lé, hai èq wó htaí yù râ lhú? <sup>27</sup> Haú Byu Yhangzo gi, Yhâng Wâ é hpungwup shingkang bo é èq, Yhâng Wâ é maumang lagyô pé eq rahá jé lé lô râ nghut lhê; haú hkûn, Yhang gi, yuq hkangmó lé, yhumsîng kut lai bê eq rajung za akyû byi râ nghut lhê. <sup>28</sup> Ngò, nungmoq lé teng za taí kôlé, ahkuí shí má yap to bang ra-am gi, haú Byu Yhangzo, Yhâng é mingdán eq jé lé lo é lé, a myang é za shî kó râ a nghut." ga taí ri.

17

*Yesuq, Isâm Htaí Lo É Hkyô*

*Mrk 9:2-13; Luk 9:28-36*

<sup>1</sup> Hkyuq nyí laí htâng má, Yesuq gi, Petruq lé le, Yakuq eq yhanggu Yohan nhiktâng lé le, shuí chûng mù, yhangmoq baú myhang é bùm ralhum má doq ló akô. <sup>2</sup> Haú má, yhangmoq é myoq hí tê má, Yesuq é ihpyô isâm htaí byuq mù, Yhâng é myoqdong gi, bui su duqbó tô é eq, Yhâng é mebu gi, maubó su hpyu zan tô ri. <sup>3</sup> Haú hkûn jáng, Mosheq eq Eliyaq gi, yhangmoq é hí má htoq shit mù, Yesuq eq dáng nyo lhûm nyi akô.

\* 16:18 Grik đông Petruq gâ é gi, luqgok lé gâ é nghut lhê.

<sup>4</sup> Haû mù, Petruq gi, Yesuq lé, "Yhumsîng ê, shí jowò má nga-nhúng nyi le ge ri. Nàng ô nau é nghut le gi, Náng é matú ralhú, Mosheq é matú ralhú, Eliyaq é matú ralhú kut, ngò zúm sùm lhum sai bá." ga taí ri.

<sup>5</sup> Petruq dang ru taí nyi ashí le, duqbó é mhut gi, yhangmoq lé htup zíng lô mù, mhut hkaû mai htoq lo é htê gi, "Shí yuq gi, Ngò chyitdap é Ngá Zo nghut lhê; Yhang má Ngò myit dik nyi lhê. Yhâng é dang gyo keq." gâ ri.

<sup>6</sup> Haû su gâ é htê lé, chángzô pé wó gyo kôjáng, yhangmoq gi, gyuq nán mù, myigùng má gop bùm bekô nghut ri. <sup>7</sup> Nghut kôlhang, Yesuq gi, yhangmoq chyáng jé lé lô mù, yhangmoq lé loq èq záng kat luí, "Toq keq, hkâgyuq kó." ga taí ri. <sup>8</sup> Yhangmoq tu wú kat kô le, Yesuq mai lai luí, ó lé le a myàng lo kó nghut ri.

<sup>9</sup> Bùm mai taû gyó lô kô é hkûn, Yesuq gi, "Ahkuí nungmoq myang é hkyô lé, haû Byu Yhangzo shi é mai lhoq dui toq yu é a hui hui gi, ó lé le hkâtaí kyo kó." ga, yhangmoq lé taí hkûm tô ri.

<sup>10</sup> Haû jáng, chángzô pé gi, "Eliyaq hí lé ra râ nghut lhê ga, tarâ sará pé haí mù taí kô é lhú?" ga, Yesuq lé myí akô.

<sup>11</sup> Haû hkûn, Yesuq gi, "Eliyaq hí lé luí, lhunglhang lé hen lajáng to râ gâ é gi, têng lhê. <sup>12</sup> Nghut kôlhang, Ngò, nungmoq lé taí kôlé, Eliyaq gi, jé lé bê nghut lhê; nghut kôle, yhangmoq gi, yhang lé a lhom wú sé kômù, yhangmoq ô nau é dông banshoq kut bekô nghut ri. Haû eq rajung za, haû Byu Yhangzo le, yhangmoq é loq má hpuzo râ nghut lhê." ga tû taí ri. <sup>13</sup> Haû hkûn sheq, Yhang taí nyi é gi, Wui-myhup Sará Yohan eq sêng é hkyô nghut é lé, haû chángzô pé sê gyô akô nghut ri.

#### *Nat Wang Júng Sû Lé Lhoq Gê Byí É Hkyô*

*Mrk 9:14-32; Luk 9:37-45*

<sup>14</sup> Yhangmoq, byù moq mó pé chyáng dum taû jé lô kô é hkûn, byù rayuq gi, Yesuq chyáng lé jé mù, hkyihput htuq luí, <sup>15</sup> "Yhumsîng ê, ngá é yuqzo lé shogyô yù laq; yhang gi, mhúngtuq tuq luí, gyai yhang jamjaû nyi ri. Myihkyóm má le, wuì má le, anum num lêng wàng wàng dut nyi ri. <sup>16</sup> Yhang lé, Náng é chángzô pé chyáng shuí ê kôlhang, yhangmoq a wó lhoq gê byi kó nghut ri." ga taí ri.

<sup>17</sup> Haû mù, Yesuq gi, "Lumjíng myit a bo é eq agè ashop é amyú pé ê, Ngò gi, hkâ-myháng jé shoq nungmoq eq rahá nyi mù, wó jân nyi râ lhú? Yuqgè zo haú lé, Ngá chyáng shuí lé lô keq." ga tû taí kat ri. <sup>18</sup> Yesuq gi, nat gang lé tân kat jáng, nat gang haû gi, yuqgè zo haú yuq chyáng mai htoq ló byuq bê nghut mù, haû hkûn jáng, yuqgè zo haû gi, ge byuq bê nghut ri.

<sup>19</sup> Hau htâng, chángzô pé gi, ó a nyi é u má, Yesuq chyáng lé lô kômù, "Ngamoq gi, haí mù, nat haú lé a wó hkat htoq é lhú?" ga, lé myi kôjáng, <sup>20</sup> Yhang gi, "Nungmoq é lumjíng myit shaû é yanmai nghut ri. Ngò, nungmoq lé teng za taí kôlé, nungmoq é lumjíng myit angshi cham í za hkâlhang bò kô é nghut le gi, bùm shí lé, 'Hé shut htot ló aq.' ga taí le, htot râ nghut lhê. Nungmoq a wó kut é haí lhang joq râ a nghut. <sup>21</sup> Shí jung gi, kyûdung é eq zoshuq gám é dông za a nghut jáng, a htoq ló é nghut lhê.\*" ga dum tû taí ri.

<sup>22</sup> Yhangmoq, Galile mau má rahá zup nyi kô é hkûn, Yesuq gi, yhangmoq lé, "Haû Byu Yhangzo gi, byu pé é loq má ap pyâm é hui zo râ nghut lhê. <sup>23</sup> Haû bang gi, Yhang lé sat pyám kó râ nghut lhê; nghut kôlhang, Yhang gi, shi é htâng sum nyí nghû râ nyí má lhoq dui toq é hui râ nghut lhê." ga taí ri. Haû mù, haû chángzô pé gi, gyai yhang gyô yón nyí bekô nghut ri.

#### *Noqkuq Yhûm Hkansê Kat É Hkyô*

<sup>24</sup> Yesuq eq Yhâng é chángzô pé gi, Kaperna-um wà má jé kô é hkûn, noqkuq yhûm hkansê hkyuî bang gi, Petruq chyáng lé jé kômù, "Nungmoq é sará gi, noqkuq yhûm hkansê a kat lhú?" ga myí akô.

<sup>25</sup> Petruq gi, "Kat lhê." ga tû taí ri.

\* 17:21 Chyúmbun shí gi, chyúmding myo myo má a bo é nghut lhê.

Hau htàng, Petruq yhúmhaâu má wang ló le, Yesuq hí lhom taí é gi, "Simun ê, mingkan hkohkam pé gi, kang eq hkansê pé lé, ô pê chyáng mai guq yu akô lhú? Yhumsing byu pê chyáng mai lhú? Haû a nghut jáng, góbâng chyáng mai lhú? Nàng, hkâsu wó myit lê lhú?" gâ ri.

<sup>26</sup> Haû mù, Petruq gi, "Góbâng chyáng mai nghut ri." ga tû taí jáng, Yesuq gi, "Haû su nghut le gi, yhumsing byu pé gi, lut akô nghut ri. <sup>27</sup> Nghut kôlhang, yhangmoq é i-myt a ngón a dut kó sháng gaq, nhông má ê mù, ngo-nhe ê hkyó aq. Sâng-hi wó nhê yu é ngozô é nhut lé lêng há kat jáng, ngùn htingchap rachap lé myàng râ nghut lê. Haû lé yù mù, Ngá é matú eq náng é matú, yhangmoq lé ló byi aq." ga tâ ri.

## 18

### *Kô Dik Sû Gi, Ó Yuq Nghut Lê Lhú?*

*Mrk 9:33-37, 42-48; Luk 9:46-48; 17:1-2*

<sup>1</sup> Haû hkûn, haû chángzô pé gi, Yesuq chyáng lé jé kômù, "Mauhkûng mingdán má, kô dik sû gi, ó yuq nghut lê lhú?" ga myi akô.

<sup>2</sup> Yesuq gi, zoshâng zo rayuq lé wut yù mù, yhangmoq é gung gûng má shap to luí, <sup>3</sup> taí é gi, "Ngò, nungmoq lé teng za taí kôlé, nungmoq gi, myit htaí lhik luí, zoshâng zo wuî su dut kô é za a nghut jáng, mauhkûng mingdán má hkâ-nhám le wó wâng kó râ a nghut. <sup>4</sup> Haû mù, zoshâng zo shí yuq su, yhumsing é i-myt wó lhoq nyhum é sù ó yuq nghut kôle, mauhkûng mingdán má, kô dik sû nghut ri.

<sup>5</sup> Shí sù é zoshâng lé, Ngá é myìng mai hap yu é sù ó yuq nghut kôle, Ngo lé hap yu é sù nghut bê. <sup>6</sup> Nghut kôlhang, Ngo lé lumjìng é zoshâng wuî mà é rayuq yuq lé, mara kut shut nhang é sù gi, yhâng é lingzing má luqluí long mó tû hut byi luí, nik é wuimau má, dú hkyô pyâm é huí é nghut le gi, yhâng é matú je gè râ nghut lê.

<sup>7</sup> Haû mingkan gi, byu pé lé mara kut shut nhâng jang joq é yanmai, dingnyé wó ri. Haû mara kut shut nhâng hkyô gi, htoq lugù bê; nghut kôlhang, haû lé lhoq htoq sù gi, dingnyé wó ri. <sup>8</sup> Náng é loq èq, a nghut jáng, náng é hkyi èq, nang lé mara kut shut nhang é nghut le gi, haû lé hpyit dú pyám aq. Ahtum abyuq é myi má, hkyi hkúm loq hkúm gù dú hkyô pyâm é huí râ htoq má, hkyi loq a hkûm é za, asak wó yu é nghut le gi, náng é matú je ge ri. <sup>9</sup> Náng é myoqjí èq, nang lé mara kut shut nhang é nghut le gi, haû lé lap choq yù mù, dú pyám aq; myoqjí í jí dap gù ngaraî myi má dú hkyô pyâm é huí râ htoq má, myoq rají eq za, asak wó yu é nghut le gi, náng é matú je ge ri.

### *Byuq Byuq É Sau*

*Luk 15:3-7*

<sup>10</sup> Shí sù é zoshâng zo wuî mà é rayuq lé lhang a wú tiq râ matú, sidiq nyi keq. Hkâsu mù gâ le, Ngò, nungmoq lé taí kôlé, mauhkûng mà é yhangmoq é maumang lagyô pé gi, mauhkûng htoq mà é Ngá Wâ é myoqdong lé, hkâ-nhám le myang nyi akô. <sup>11</sup> (Hkâsu mù gâ le, haû Byu Yhangzo gi, byuq byuq bê bang lé hkyi yù râ matú, jé lé é nghut lê.)\*

<sup>12</sup> Byù rayuq gi, sau rashô du wó é nghu sháng, sau haû gû mà é radu byuq byuq é nghut jáng, haû gaú xe gaú du lé, bùm pé má nyhi pyâm to luí, byuq byuq é sau lé a châng ho é nyi râ lhú? Haû lé, nungmoq hkâsu wó myit ngam akô lhú? <sup>13</sup> Ngò, nungmoq lé teng za taí kôlé, yhang gi, haû byuq byuq é sau haû lé myang ho é hkûn, a lám byuq é sau gaú xe gaú dû é matú gabú é htoq má, haû dû matú je riyhang gabú ri. <sup>14</sup> Haû eq rajung za, mauhkûng htoq mà é nungmoq é Îwa gi, shí tiq bang mà é rayuq htên byoq byuq râ lé lhang, ô nau é a nghut.

### *Mara Kut Shut É Gumang Hpó Lé Hkâsu Kut Râ Hkyô*

<sup>15</sup> Náng é gumang hpó, nang lé mara kut shut é nghut jáng, yhâng chyáng ê mù, nungnhik baú za nghut é hkûn, yhâng é mara lé tûn shit aq. Yhang, náng é dang lé gyô é nghut jáng, nang gi, gumang rayuq dum wó bê nghut ri. <sup>16</sup> Nghut kôlhang, yhang,

\* 18:11 Bun zo shí gi, chýúmding myo myo má a bo é nghut lê.



náng é dang lé a gyô é nghut jáng, 'Mara hun é hkyô hkangmó lé, saksé í yuq sum yuq lòm jáng, wó lhoq teng sháng gaq.'<sup>☆</sup> gâ tô é eq rajung za, nàng, gotû byù ra-í yuq lé shuí chûng aq. <sup>17</sup> Yhang gi, haú bâng é dang lé le a lhom yu é nghut jáng, haú hkyô lé, noqkuq hpúng má shit kyo aq; hpûng é dang lé le a gyô é nghut jáng, yhang lé, a lumjínng é byù rayuq dông le, kang guq sù rayuq dông le sôn pyám aq.

<sup>18</sup> Ngò, nungmoq lé teng za taí kôlé, myigùng htoq má, nungmoq tuí to má tuí to lé, mauhkûng htoq má le, tuí to râ nghut lhê; myigùng htoq má, nungmoq lhoq lhut má lhoq lhut lé, mauhkûng htoq má le, lhoq lhut byi râ nghut lhê.

<sup>19</sup> Ngò, nungmoq lé dum taí kôlé, myigùng htoq má, nungmoq mâ é í yuq myit hui luí, haí lé dung kôlhang, mauhkûng htoq mâ é Ngá Wa gi, haú nhik lé gyo byi râ nghut lhê.

<sup>20</sup> Hkâsu mù gâ le, Ngá myîng lé lang luí, í yuq sum yuq zup zîng é jang hkâmá nghut kôlhang, haú bâng é gyoro má Ngò nyi lhê." gâ ri.

### *Shogyo Nhikmyin A Sê É Jùn Hpô É Dangtú*

<sup>21</sup> Haú hkûn, Petruq gi, Yesuq chyáng huí ê mù, "Yhumsîng ê, ngá é gumang, ngo lé mara kut shut é nghut le, yhang lé hkâ-myhó dâm mara hkyut byi ra râ l hú? Nyhit dâm jé shoq hkyut byi ra râ l hí?" ga myî ri.

<sup>22</sup> Haú jáng, Yesuq tû taí é gi, "Ngò, nang lé taí lé, nyhit dâm za a nghut, nyhit xe nyhit tú dâm hkyut byi râ lhê.

<sup>23</sup> Mauhkûng mingdán gi, yhumsîng é dui-nhâng zoshâng wui é jihpán lé jep nau é hkohkâm rayuq eq du ri. <sup>24</sup> Yhang gi, jihpán lé jep hi ló é u lé, yhâng chyáng ngùn wan myo myo chyîn dap to sù lé shuí lé lo akô. <sup>25</sup> Haú yhumsîng hpó gi, haú yuq chyîn a wó xap é yanmai, chyîn wó yû râ matú, yhang lé le, yhangmyi lé le, yhangzo banshoq eq yhang wó é zèhkoq banshoq lé le, ûng pyám râ hkunmó hkyô kat ri.

<sup>26</sup> Haú mù, dui-nhâng zoshâng haú yuq gi, yhâng é hí má hkyihput htuq luí, 'Ngo lé myit hîng byi shi laq; banshoq lé, ngò xap râ.' ga dúng tôngbán ri. <sup>27</sup> Haú dui-nhâng zôshang é yhumsîng hpó gi, haú yuq lé wú shogyo luí, chyîn banshoq lhut pyám byi mù, nhang kat ri.

<sup>28</sup> Nghut kôlhang, dui-nhâng zoshâng haú gi, htoq ló mù, yhang lé, denari<sup>†</sup> rashô chyîn dap tô é dui-nhâng zoshâng luzúm rayuq lé myàng jáng, haú yuq é lingzing má gyaq myhik zing to mù, 'Ngo lé dap tô é chyîn hân xap aq!' ga taí ri.

<sup>29</sup> Haú hkûn, yhâng é luzúm dui-nhâng zoshâng haú gi, yhâng é hí má hkyihput htuq luí, 'Ngo lé myit hîng byi shi laq; ngò xap râ.' ga dúng tôngbán ri.

<sup>30</sup> Nghut kôlhang, yhang gi, a gyo byî e za, yhâng é chyîn dum wó xap é hkûn jé shoq, haú yuq lé htóng hkyô pyám nhâng ri. <sup>31</sup> Gotû dui-nhâng zoshâng wui gi, haú hkyô lé myàng kôjáng, i-myt wú nô kôluí, yhangmoq é yhumsîng hpó lé, haú hkyô banshoq ló taí kyô akô.

<sup>32</sup> Haú mù, haú yhumsîng hpó gi, dui-nhâng zoshâng haú lé wut hâng yù mù, 'Agè ashop é dui-nhâng zoshâng ê, nàng, ngo lé dúng tôngbán é yanmai, nàng, ngo lé dap é chyîn banshoq lé, ngò lhut pyám byi bê nghut lhê mhaí. <sup>33</sup> Haú su é nhîng, ngò, nang lé shogyô yu é su, náng é luzúm dui-nhâng zoshâng lé, nàng ge shogyô yu lhê a nghut l hú?' ga taí luí, <sup>34</sup> yhang gi, nhikjum yo mù, yhâng é chyîn ban xap é hkûn jé shoq, jamjau hui zo râ matú, yhang lé, htóng suwún pê chyáng ap byî pyám bê nghut ri.

<sup>35</sup> Nungmoq é gumang wui lé, nungmoq é myit mai mara a wó hkyut byi kô é nghut jáng, mauhkûng htoq tsáng myhâng mâ é Ngá Wa le, nungmoq lé haú dông kut râ nghut lhê." gâ ri.

<sup>1</sup> Yesuq gi, mhoqshit é dang haú pé lé ban taí jáng, Galile mau mai htoq ló mù, Yodan làng tũ tap mã é Yuda mau mã é jé ri. <sup>2</sup> Byù moq mó gi, Yhâng htâng cháng kô é nghut mù, Yhang gi, haú bang mã é nòhpyo hui bang lé, haú mã lhoq gê byí ri.

<sup>3</sup> Haú hkũn, Hparishe pé ra-am gi, Yhâng chyáng lé jé kômù, Yhang lé chyam wú é dông, "Byù rayuq gi, hai hkyô mai nghut nghut, yhumsing é yhangmyi lé lhoq kang pyâm le, tarâ wang lhê lú?" ga myí akô.

<sup>4</sup> Haú jáng, Yhang tũ taí é gi, "A-nham sâng-hi lé, Hpân Sũ, 'byu hpan é hkũn, yuqgè eq myiwe lé hpan é nghut lhê.'<sup>☆</sup> <sup>5</sup> 'Hau é yanmai, yuqgè gi, yhumsing é ìnu îwâ chyáng mai htoq luí, yhangmyi eq rahá rading ralhum za kut nyí mù, yhangnhik gi, gungsho ralhum za dut byuq kó râ nghut lhê.'<sup>☆</sup> ga kê tô é lé, nungmoq a nghap wú kó lú? <sup>6</sup> Haú mù luí, yhangnhik gi, í yuq a nghut lô e za, rayuq za dut bê nghut ri. Haú mù luí, Garai Gasang lhoq tsũm tô é lé, byù gi, a lhoq kang sháng gaq." gâ ri.

<sup>7</sup> Haú hkũn, yhangmoq gi, "Haú lé nhĩng, yuqgè rayuq gi, lhoq kang laiká za ká byi mù, yhangmyi lé wó nhang pyâm lhê ga, haí mù, Mosheq, hkunmó hkyô tô lhê lú?" ga, Yhang lé dum taũ myí akô.

<sup>8</sup> Haú mù, Yesuq gi, "A-nham sâng-hi mai gi, haú dông a nghut. Nghut kôlhang, nungmoq é myit nhiklhum htân kô é yanmai, nungmoq é yhangmyí pé lé lhoq kang râ ahkáng, Mosheq byí tô é ru nghut lhê. <sup>9</sup> Ngò, nungmoq lé taí kôlé, sulàng lú é za a nghut jáng, yhumsing é yhangmyi lé kang pyám mù, myiwe gotũ dum hâng yu é sũ ó yuq nghut kôle, su-myi lú é sũ dut bê." ga, yhangmoq lé dum tũ taí ri.

<sup>10</sup> Haú hkũn, haú chángzô pé gi, "Myi làng hkyô mã haú dông ru nghut le gi, a yu le lhang je ge nyo ri." ga taí akô.

<sup>11</sup> Haú mù, Yesuq gi, "Yuq hkanmó gi, dang haú lé wó hap yu é a nghut, wó hkâm rà jeju wó é bang za sheq, wó hap yu é nghut lhê. <sup>12</sup> Byù ra-am gi, ìnu unghkau mai yhang, yuqgè a jé gũ hku lé lo é bang nghut akô; ra-am gi, góbâng eq kut é yanmai, yuqgè a jé dut byuq akô; ra-am nghut jáng, mauhkũng mingdán é matú, yuqgè a jé râ dông kut yu pyâm akô nghut ri. Shí hkyô lé wó hap yù sũ gi, hap yù sháng gaq." ga dum taũ ri.

#### *Zoshâng Wui Eq Yesuq*

*Mrk 10:13-16; Luk 18:15-17*

<sup>13</sup> Hau htâng, Yesuq mai zoshâng wui htoq mã loq ke mù, shimân byi sháng gaq ga, zoshâng wui lé Yhâng chyáng shuĩ lé lo akô. Haú chángzô pé kúm gi, haú shuĩ lé lô bang lé lhom tân hkũm akô nghut ri.

<sup>14</sup> Nghut kôlhang, Yesuq gi, "Haú zoshâng wui lé, Ngá chyáng lé nhâng keq; yhangmoq lé hkâhkũm zing to kó; hkâsu mù gâ le, mauhkũng mingdán gi, haú sũ é bâng é mingdán ru nghut lhê." ga taí kat ri. <sup>15</sup> Yhang gi, zoshâng wui htoq mã loq ke shimân byi mù, haú jowò mai htoq ló bê nghut ri.

#### *Sùt Wó É Zorâm Rayuq É Hkyô*

*Mrk 10:17-31; Luk 18:18-30*

<sup>16</sup> Byù rayuq gi, Yesuq chyáng lé jé mù, "Sarâ ê, ahtum abyuq é asak wó yũ râ matú, ge é muzó haí kut ra râ lú?" ga myí ri.

<sup>17</sup> Haú jáng, Yesuq gi, "Ge é hkyô eq séng luí, haí mù Ngo lé myí lhê lú? Ge é Sũ gi, rayuq za nyi lhê. Nang, asak dui é mã wàng nau é nghut le gi, jep é tarâ pé lé cháng aq." ga tũ taí ri.

<sup>18</sup> Haú yuq gi, "Hká gũ lé lú?" ga dum myi jáng, Yesuq gi, "'Byù hkâsat, su-myi hkâlú, hkâhkau, a teng a mán é saksé hkâhkám, <sup>19</sup> nángnu nángwa lé hkungga aq,'<sup>☆</sup> ga le, 'náng gũng lé nang chyitdap e su, náng é chyangnâm mã é bang lé le chyitdap aq.'<sup>☆</sup> ga le bo tô ri." ga taí kat ri.

<sup>20</sup> Haú hkũn, zorâm hpó haú gi, "Haú pé banshoq lé, ngò cháng bê nghut lhê; haí kut râ ashí lú?" ga dum taũ myí ri.

<sup>21</sup> Yesuq gi, "Nàng, gumjup sù dut nau le gi, ló mù, nàng wó é sutzè pé lé ùng pyám luê, myùng bang lé byî pyám aq; haû jáng, nàng, mauhkûng htoq má sutzè wó râ nghut lhê; haû mù, Ngá htâng lé cháng aq." ga tû taî ri.

<sup>22</sup> Zorâm hpó haû gi, sutzè gyai wó sù nghut é yanmai, dang haû lé wó gyo jáng, gyai yhang myit a ngón é èq ló byuq bê nghut ri.

<sup>23</sup> Hau htâng, Yesuq gi, Yhâng é chángzô pé lé, "Ngò, nungmoq lé teng za taî kôlé, sutzè wó bang gi, mauhkûng mingdán wó wâng râ gyai yhang wuî ri. <sup>24</sup> Hau htoq agó, Ngò, nungmoq lé taî kôlé, sutzè wó sù rayuq, Garai Gasâng é mingdán má wó wâng râ htoq, gola-uq radu âpno mai wó wang lai râ gi, je lui râ nghut lhê." ga taî ri.

<sup>25</sup> Haû chángzô pé gi, haû su gâ é lé wó gyo kôjáng, haû ru nghut le gi, ó yuq za hkyi yu é hui râ nghut lhê lú?" ga Yhang lé myî akô nghut ri.

<sup>26</sup> Haû hkûn, Yesuq gi, yhangmoq lé wú kat mù, "Haû hkyô lé byù mai gi, wó kut râ a nghut; nghut kôlhang, Garai Gasang gi, lhunglhang lé wó kut é Sù nghut lhê." ga taî ri.

<sup>27</sup> Haû hkûn, Petruq gi, Yhang lé, "Ngamoq gi, wó é gû lhunglhang lé tô pyâm to luê, Náng htâng cháng bê nghut lhê. Ngamoq, haî wá wó râ nghut lhê lú?" ga myî kat ri.

<sup>28</sup> Haû mù, Yesuq tû taî é gi, "Ngò, nungmoq lé teng za taî kôlé, lhunglhang lé asik dum saî dut nhang é má, haû Byu Yhangzo gi, Yhâng é hpungwup bo é hkohkâm-tanghkuq má zùng tô é hkûn, Ngá htâng châng é bang nungmoq le, hkohkâm-tanghkuq raxe í lhûm htoq má zùng tô kômù, Israelaq amyû raxe í hú lé jéyáng kó râ nghut lhê. <sup>29</sup> Ngá é yanmai, yhumsing é yhûm, nhiktâng wuî, înu îwa, zo dù wuî eq yò pé rajung jung lé tô pyâm tô é sù ó yuq nghut kôle, rashô tú akyû myo jat shoq wó râ nghut é htoq agó, ahtum abyuq é asak le, wó yû râ nghut lhê. <sup>30</sup> Nghut kôlhang, hí nghut nyi é bang myo myo gi, htâng gyó byuq kó râ nghut mù, htâng gyó nyî bang yuq gi, hí bekô râ nghut lhê.

## 20

### *Tsibiyiq Hkyâm Mû Zui Bang Lé Dangtú Yu É Hkyô*

<sup>1</sup> Hkâsu mù gâ le, mauhkûng mingdán gi, yhumsing é tsibiyiq hkyâm má mû zui nhang râ langchyang ê lûng râ ga, napsûn noq le htoq e ló é hkyâm yhumsing eq du ri. <sup>2</sup> Yhang gi, ra-nyí é matú denari rachap byi râ đông, haû bang eq myit huî yù mù, yhangmoq lé, yhâng é tsibiyiq hkyâm má nhang hâng kat ri.

<sup>3</sup> Napkyó gau hkyíng\* kô má, yhang gi, htoq e ló le, hai mû le a kut é za, gai má yap tô é bang ra-am lé ê myang ri. <sup>4</sup> Haû mù, yhang gi, haû bang lé, 'Nungmoq le, ngá é hkyâm má mû ê zui keq; byi âng é ahpau, ngò, nungmoq lé byi râ nghut lhê.' ga taî jáng, yhangmoq gi, e ló bekô nghut ri.

<sup>5</sup> Hau htâng, yhang gi, raxe í hkyíng má le, myinhâng sum hkyíng kô má le, dum htoq ê mù, haû eq rajung za langchyang pé ê lung kat ri. <sup>6</sup> Myinhâng ngo hkyíng kô má, yhang dum htoq e ló wú le, góbang ra-am le yap tô bum é lé, ê myàng mù, haû bang lé, 'Nungmoq gi, haî le a kut é za, ra-nyí buî haî mù shî má yap tô bum akô lú?' ga myi jáng, <sup>7</sup> haû bang gi, 'Ngamoq lé, ó yuq èq le a lûng kô é yanmai nghut lhê.' ga tû taî akô.

Haû hkûn, yhang gi, 'Nungmoq le, ngá é hkyâm má mû ê zui keq.' ga taî ri.

<sup>8</sup> Myinhâng jé jáng, tsibiyiq hkyâm yhumsing gi, yhâng é mû shuî u sù lé, 'Haû langchyang pé lé ji yù mù, je htâng má lung yu é bang mai hí luî, sâng-hi lung yu é bang jé shoq, mû zui hpau byi aq.' ga taî ri.

<sup>9</sup> Myinhâng ngo hkyíng má mû wàng bang le, denari rachap chap wó yu bum akô.

<sup>10</sup> Haû mù, je hí má mû wàng bang gi, yhangmoq je myo wó nhô ngam akô. Nghut kôlhang, yhangmoq le, rayuq denari rachap chap za wó akô nghut ri. <sup>11</sup> Yhangmoq gi, haû myhó za wó yu bùm kô é yanmai, haû hkyâm yhumsing lé, <sup>12</sup> 'Shí bang gi, je htâng má mû lé wâng mù, nayí rahkum za mû zui kôlhang, nàng gi, ra-nyí buigyùm chap buî htân yò má mû zui é bang ngamoq eq rajung za byî ri.' ga mara hûn dang taî akô.

\* 20:3 Chyúmdang ra-am má, sum hkyíng ga chung tô é gi, Yudaq byu pé é ahkyíng nghut lhê. Yudaq byu pé é ahkyíng gi, napkyó hkyuq hkyíng mai nghap hí lhê.

<sup>13</sup> Nghut kôlhang, haû hkyâm yhumsîng gi, haû bang mâ é rayuq lé, 'Buinùm hpó ê, ngò, nang lé a tarâ é dông kut é a nghut. Denari rachap byi râ nghû, nàng eq ngò myit huí to bê a nghut lú? <sup>14</sup> Nàng wó âng é lé yu chûng mù, ló aq. Je htâng má mù lé wang é sủ lé le, nang lé byi é myhó, ngò byi nau ri. <sup>15</sup> Ngá é ngùn lé, ngò kut nau é su a ge kut lú? Ngò, ge é kut le, nàng manôn ri lú?' ga taí ri.

<sup>16</sup> Haû mù luí, htâng gyó nyi bang gi, hí bekô râ nghut mù, hí nghut nyi bang gi, htâng gyó byuq kó râ nghut lhê." gâ ri.

*Yesuq Gi, Yhang Shí Râ Hkyô Lé Dum Taí Ri*

*Mrk 10:32-34; Luk 18:31-34*

<sup>17</sup> Ahkuí, Yesuq gi, Yerusalem wà mó shut doq ló nyi é u lé, haû chángzo raxe í yuq lé, gotû kut wut yù mù, <sup>18</sup> "Nga-nhúng gi, Yerusalem wà mó shut doq ló nyi lhê; haû Byu Yhangzo gi, hkyangjong agyi pé eq tarâ sará pê é loq má ap byi pyâm é hui râ nghut lhê; haû bang gi, Yhang lé, shi râ mara byi kó râ nghut é htoq agó, <sup>19</sup> jóng pyâm é, nhuq bat é eq tapzîng má jén sat pyâm é hui râ matú, haû tûngbau pê é loq má ap pyám kó râ nghut lhê. Nghut kôlhang, Yhang gi, sum nyi nghû râ buinyi má, lhoq dui toq é dum hui râ nghut lhê." ga taí ri.

*Zô Nhik Matú Ínu Èq Dung Byi É Hkyô*

*Mrk 10:35-45*

<sup>20</sup> Hau htâng má, Zebedi é yhangzô nhiktang é yhângnu gi, yhangzô nhik eq rahá jé lé lô kômù, rajung dung râ matú, Yesuq é hí má hkyihput htuq nyi ri.

<sup>21</sup> Haû mù, Yesuq gi, "Nàng, haí ô nau ri lú?" ga yhang lé myi jáng, yhang gi, "Náng é mingdán má, shi ngá zô nhiktang lé, Náng é loqyò hkyam má rayuq, loqpaí hkyam má rayuq kut, zùng râ ahkáng byi laq." ga taí ri.

<sup>22</sup> Haû hkún, Yesuq gi, "Nungnhik haí dúng nyi é lé, nungnhik a sé kó nghut ri. Ngò shuq râ góm† lé, nungnhik wó shuq kó râ lú?" ga myi jáng, yhangnhik tâng gi, "Wó shuq lhê." ga tũ taí akô nghut ri.

<sup>23</sup> Haû mù, Yesuq gi, yhangnhik lé, "Ngò shuq râ góm lé, nungnhik shuq ra kó râ za nghut lhê. Nghut kôlhang, Ngá é loqyò, loqpaí hkyam má zùng râ ahkáng lé gi, Ngò byi jung a nghut. Jowò haû pé gi, Ngá Wa hen to byi bâng é matú za ru nghut lhê." ga taí ri.

<sup>24</sup> Gotû chángzo raxê yuq gi, haû hkyô lé wó gyo kôjáng, haû nhiktang lé nhik-yô akô nghut ri. <sup>25</sup> Haû mù, Yesuq gi, yhangmoq banshoq bang lé wut tsîng yù luí, "Tûngbau pé lé uphkan é ga bang gi, tûngbau pé lé up zô nyi kô é hkyô lé le, haû eq rajung za, yhangmoq é ming up suwún wuí le, yhumsîng é ahkáng ayá lé chûng mù, up zô nyi kô é hkyô lé le, nungmoq sê lhê. <sup>26</sup> Nungmoq chyáng gi, haû su a dut kó sháng gaq; haû Byu Yhangzo lháng gi, dojaú é lé hkam yù râ matú jé lé é a nghut é za, dojaú râ matú eq byù myo myô é matú, shihtaí gunglik hkungga dông, Yhâng é asak lé byi pyám râ matú sheq, jé lé é ru nghut é su, <sup>27</sup> nungmoq má, byù mó dut naù sủ ó yuq nghut kôle, nungmoq é dui-nhâng zoshâng dut ra râ nghut lhê. <sup>28</sup> Hau htoq agó, nungmoq má ushuq dut naù sủ ó yuq nghut kôle, nungmoq é jùn dut ra râ nghut lhê." ga taí ri.

*Myoqjit Í Yuq Myoq Dum Myang É Hkyô*

*Mrk 10:46-52; Luk 18:35-43*

<sup>29</sup> Yesuq eq Yhâng é chángzô pé gi, Yerihko myuq mai htoq ló nyi kô é hkún, byù moq mó gi, yhangmoq é htâng má châng e ló bum akô. <sup>30</sup> Haû hkyô yàm má zung tô é myoqjit í yuq gi, Yesuq laí ló nyi é hkyô lé wó gyo kôjáng, "Dawiq é Yhangzo, Yhumsîng ê, ngá-nhik lé shogyô yù laq ô!" ga, wut garû kat akô nghut ri.

<sup>31</sup> Byù moq mó gi, yhangnhik zîm byuq râ matú tân hkúm kôlhang, yhangnhik gi, "Dawiq é Yhangzo, Yhumsîng ê, ngá-nhik lé shogyô yù laq ô!" ga, je riyhang htê mó èq wut garû kat akô nghut ri.

† 20:22 Góm gâ é gi, Yesuq, jamjau hui râ hkyô eq shi râ hkyô lé, taí nau é nghut lhê.

<sup>32</sup> Haû mù, Yesuq gi, yap kat mù, "Ngò, nungnhik lé haî kut byi râ ô nau akô lúhú?" ga, yhangnhik lé wut myî kat ri.

<sup>33</sup> Haú hkûn, yhangnhik gi, "Yhumsîng ê, ngá-nhik myoq myàng nau ri." ga tû taî akô.

<sup>34</sup> Yesuq gi, yhangnhik lé wú shogyo luî, yhangnhik é myoqjí má ê záng byî ri. Haú hkûn jáng, yhangnhik gi, myoq wó myàng kômù, Yhâng htâng cháng bekô nghut ri.

## 21

*Yesuq, Yerusalem Wà Mó Má Wang E Ló É Hkyô*

*Mrk 11:1-11; Luk 19:28-38; Yhn 12:12-19*

<sup>1</sup> Yesuq eq Yhâng é chángzô pé gi, Yerusalem wà mó eq chyâng lo nyî kô é hkûn, Tsanlun Bùm mâ é Bethpage wà má jé ló kôjáng, Yesuq gi, chángzo í yuq lé, <sup>2</sup> "Nungnhik, hí mâ é wà má ê keq; wà haú má, logúng zîng radu lé, logúng zo eq rahá tuî to lánng é lé, ê myàng kó râ nghut lhê; haú lé hpyi yù mù, Ngá chyáng she lò keq. <sup>3</sup> Byù rayuq yuq, nungnhik lé rajung jung gâ lò jáng, 'Shî í du lé, haú Yhumsîng chûng râ ri.' gâ nghû tû taî keq; haú jáng, yhang, radá dâm nhâng byi râ nghut lhê." ga Yesuq taî luî, nhang kat ri.

<sup>4</sup> Haû gi, myiqhtoi dang lhoq dik râ matú dut lo é nghut ri. <sup>5</sup> Myiqhtoi dang haû gi, "Zi-un byizo\* lé, shî su nghû keq; 'Wú aq, náng é hkohkâm gi, nú-nhâm é myit eq logúng htoq má ji mù, nghut bê, logúng zo htoq má ji mù, náng chyáng lé lô bê nghut ri.'"☆

gâ ri.

<sup>6</sup> Haû chángzô nhik gi, e ló mù, Yesuq taî kat é eq rajung za ê kut bekô nghut ri.

<sup>7</sup> Yhangnhik gi, logúng me lé she lò mù, yhangnhik é buhîng pé lé, haú logúng mê é htoq má ke byi kôjáng, Yesuq gi, doq jî ri. <sup>8</sup> Byù moq mó mâ é myo myo gi, yhangmoq é buhîng lé, hkyô má hkyut hkang byî akô; ra-am gi, mhandíng pé lé zân hkyô yù mù, hkyô má hkang byî akô nghut ri. <sup>9</sup> Yhâng é hí má htâng má châng sô nyi bum é bang gi, "Dawiq é Yhangzo gi, hosana† nghut nyî sháng gaq ô!"

"Haú Yhumsîng é myîng mai jé lé lô Sû gi, hkungsô wó nyî sháng gaq ô!"☆

"Htoq tsáng myhâng má, hosana nghut nyî sháng gaq ô!"

ga luî, taî garû bum akô nghut ri.

<sup>10</sup> Yesuq, Yerusalem wà mó má wang ló é hkûn, rawà gón é bang gi, gabyông lo bùm kômù, "Shí yuq gi, ó wá nghut lhê làh?" ga luî, myi lhùm bum akô.

<sup>11</sup> Haú hkûn, byù moq mó gi, "Shí yuq gi, Galile mau, Nazaret wà byù Yesuq gâ é myiqhtoi nghut lhê." ga taî akô nghut ri.

*Yesuq, Noqkuq Yhûm Lé Lhoq Sansêng Pyâm É Hkyô*

*Mrk 11:15-19; Luk 19:45-48; Yhn 2:13-22*

<sup>12</sup> Yesuq gi, noqkuq yhûm má wang ê mù, haú mâ é zè ung zè wuî kut nyi é bang banshoq lé, hkat htoq pyám luî, ngùn htaí zo bâng é siboî pé eq hpûngkyui ung zo bâng é tanghkuq pé lé, tu mhuaq pyám byî ri. <sup>13</sup> Haú hkûn, Yhang gi, "Ngá yhûm gi, kyûdung yhûm ga râ nghut lhê.'☆ ga kâ to kôlhang, nungmoq gi, jowò shî lé 'damaq hkyûng'☆ kut nyi akô." ga, yhangmoq lé taî ri.

<sup>14</sup> Yesuq, noqkuq yhûm má nyi tô é hkûn, myoqjit bang eq hkyî hten bang Yhâng chyáng lé lô kômù, Yhang gi, haú bang lé lhom lhoq gê byî ri. <sup>15</sup> Nghut kôlhang, hkyangjong agyi pé eq tarâ sará pé gi, Yhang kut é mauhpo muzó pé lé le, "Dawiq é Yhangzo gi, hosana nghut sháng gaq." ga, noqkuq yhûm má zoshâng wuî garû nyi bùm kô é lé le, myàng kôjáng, wú nhik-yô bum akô nghut ri.

<sup>16</sup> Haû mù, yhangmoq gi, "Zoshâng shí bang haî taî nyi kô é lé, Nàng wó gyô lhê lúhú?" ga, Yesuq lé myi kôjáng, Yhang gi, "Wó gyô ri. Nungmoq gi,

\* 21:5 Zi-un byizo gâ é lychým gi, Yerusalem byu pé gâ é nghut lhê. ☆ 21:5 Zhk 9:9 † 21:9 Hebre dang má, hosana gâ é gi, "ahkuî hkyi yù laq" gâ é nghut lhê. Nghut kôlhang, bun zo 9 má gi, hkyá-on dang dông chung é nghut lhê. ☆ 21:9 Hkyá-on 118:26 ☆ 21:13 Esai 56:7 ☆ 21:13 Yer 7:11

'Zoshâng wuì eq nyheqnú pê é nhut mai hkya-on kungtôn râ matú, nàng lajâng to bê nghut ri.'<sup>☆</sup>

ga kê tô é lé, Chyúmdang má a nghap wú kó lú?" ga yhangmoq lé taí ri.

<sup>17</sup> Hau htâng má, Yhang gi, haú bang lé nyhi to luí, wà hkaú mai htoq ló mù, Behtani wà má ê jé luí, haú myîn, haú má bíng yu ri.

*Maihpáng Gâm Nyhuí Kyuq Shi Byuq É Hkyô*

*Mrk 11:12-14, 20-24*

<sup>18</sup> Yhang gi, htang napkyó noq le, Yerusalem wà mó shut dum taú ló é hkûn, hkyô má zòmút hui bê nghut ri. <sup>19</sup> Haú mù, Yhang gi, hkyô yàm má yuq tô é maihpáng gâm lé myang kat mù, chyâng e wú le, ahaq mai lai luí, haí lé le a myàng nghut ri. Haú mù, Yhang gi, shigâm haú lé, "Nàng má, hkâ-nhám le ashi a zui sháng gaq." ga taí kat ri. Haú hkûn jáng, agàm haú gi, nyhuí kyuq shi ló byuq bê nghut ri.

<sup>20</sup> Haú chángzô pé gi, haú lé myàng kôjáng, maú byuq kômù, "Maihpáng gâm shí gi, haí mù haú-í hân nyhuí kyuq shi ló lhê lhà?" ga myî akô.

<sup>21</sup> Yesuq gi, "Ngò, nungmoq lé teng za taí kôlé, nungmoq, úng-âng é myit a bo é za, lumjúng kô é nghut le gi, maihpáng gâm má Ngò kut é muzó lé, nungmoq wó kut kó râ nghut é htoq agó, bùm shí lé, 'Htot mù, wuimau má ló gyó wâng aq.' ga taí jáng, taí é eq rajung za dut râ nghut lhê. <sup>22</sup> Nungmoq, lumjúng myit eq dung kô é nghut jáng, haí dúng le le wó yú kó râ nghut lhê." ga tû taí ri.

*Yesuq É Ahkáng Ayá Lé Myî Chyam É Hkyô*

*Mrk 11:27-33; Luk 20:1-8*

<sup>23</sup> Yesuq gi, noqkuq yhûm wàng hkaú má wang ê mù, mhoqshit nyi é hkûn, hkyangjong agyi pé eq mingbyu é suwún wuì gi, Yhâng chyáng lé jé kômù, "Hai ahko ahkâng eq, Nàng, shí pé lé kut nyi lhê lú? Ahko ahkáng shí, Nang lé ó yuq byî é lú?" ga myî akô.

<sup>24</sup> Haú hkûn, Yesuq gi, "Ngò le, nungmoq lé rajung myî wú kôlé, nungmoq wó tû taí kô é nghut jáng, hai ahko ahkâng eq, Ngò, shí pé kut é hkyô lé taí kyo râ nghut lhê. <sup>25</sup> Yohan byî é baptisma gi, ó yuq é ahko ahkáng mai nghut lhê lú? Mauhkûng mai lú? A nghut jáng, byu chyáng mai lú?" ga taú myî kat ri.

Haú hkûn, yhangmoq, chôm hpyê lhum kô é gi, "'Mauhkûng mai nghut lhê.' nghú, nga-nhúng taí jáng le, 'Haú nghut le nhîng, haí mù, yhang lé a lumjúng kô é lú?' ga râ nghut; <sup>26</sup> 'Byu chyáng mai nghut lhê.' nghú jáng le, yhangmoq lhunglhâng bang gi, Yohan lé, myiqhtoi rayuq ga lumjúng bùm kô é nghut lhê yanmai, haú bang lé, nga-nhúng gyuq râ lhê nghut." gâ akô.

<sup>27</sup> Haú mù, yhangmoq gi, Yesuq lé, "Ngamoq a sé." ga tû taí akô.

Haú hkûn, Yesuq gi, "Haú jáng, Ngò le, hai ahko ahkâng eq shí pé kut é hkyô lé, nungmoq lé a taí kyo." ga, yhangmoq lé taí ri.

*Yuqzô Nhiktâng Lé Dangtú Yu É Hkyô*

<sup>28</sup> Yesuq xoq taí é gi, "Nungmoq hkâsu wó myit akô lú? Byù rayuq gi, yuqzô í yuq wó ri. Yhang gi, ko sù yuq chyáng ê mù, 'Ngá zo ê, nàng, hkû-nyí tsibiyiq hkyâm má mù ê zui aq.' ga taí jáng, <sup>29</sup> yuqzô haú gi, 'Ngò a kâm ê.' ga tû taí ri; nghut kôlhâng, htâng má, yhang gi, myit dum lhîng mù, ê bê nghut ri.

<sup>30</sup> Hau htâng, yhângwa gi, yhang zo tiq sù yuq chyáng ê mù, rajung za ga ê dum taí jáng, yuqzô haú gi, 'Ê râ, âwa!' ga yín yú kôlhâng, a ê kut ri.

<sup>31</sup> Haú nhiktâng mâ é hká yuq sheq, yhângwa ô nau é hkyô lé kut sù nghut ri lú?" gâ ri.

Haú hkûn, yhangmoq gi, "Ko sù nghut ri." ga tû taí akô.

Haú mù, Yesuq gi, yhangmoq lé, "Ngò, nungmoq lé teng za taí kôlé, kang guq bang eq shiwa myhî pé gi, Garai Gasâng é mingdán má, nungmoq a wàng shimá, wang ló nyi bùm kó râ nghut lhê. <sup>32</sup> Hkâsu mù gâ le, Yohan gi, nungmoq chyáng lé jé mù, dingmán hkyô lé tûn shit kôlhâng, nungmoq gi, yhang lé a júng kut akô nghut ri; nghut kôlhâng, haú

<sup>☆</sup> 21:16 Hkya-on 8:2

kang guq bang eq shiwa myhî pé gi, yhang dang lé jing akô nghut ri. Nungmoq gi, haú hkyô lé myang é nghut kôlhang, myit a lhang kô é htoq agó, yhang lé a lumjing shi kó nghut ri.

*Tsibiyiq Hkyâm Saí Bang Lé Dangtú Yu É Hkyô*

*Mrk 12:1-12; Luk 20:9-19*

<sup>33</sup> Gotú dangtú lé gyô wú shi keq; hkyâm yhumsing rayuq gi, tsibiyiq hkyâm ralhüm saí to mù, lhanghkyuq kyâm to luí, tsibiyiq wing pyik htoq râ dongkong dû to mù, machya ralhüm saí tô ri. Hau htang, yhang gi, hkyâm haú lé, hkyâm saí zo bang chyáng ngho byi to mù, gó ming shut e ló byuq bê nghut ri. <sup>34</sup> Kyôshu yoq jé jáng, yhang gi, yhang eq sêng é tsibiyiq shi ê yû râ matú, yhang é dui-nhang zoshang wui lé, haú hkyâm saí zo bang chyáng nhang kat ri.

<sup>35</sup> Haú hkyâm saí zo bang gi, dui-nhang zoshang wui lé, lhom chyup yû kômù, rayuq lé gi, lhom nhuq bat, rayuq lé gi, lhom sat pyám, rayuq lé gi, luqgok eq lhom dú sat pyám, kut akô nghut ri. <sup>36</sup> Hau htang má, yhang gi, hí dam lhê htoq je myo shoq gotú dui-nhang zoshang wui lé dum nhang kat le le, haú hkyâm saí zo bang gi, hí lhê bang lé su lhom dum kut akô nghut ri. <sup>37</sup> Ló htang má, yhang gi, 'Ngá zo lé gi, yhangmoq lhom hkungga kó râ nghut lhê.' ga, yhang zo lé, haú bang chyáng nhang kat ri.

<sup>38</sup> Nghut kôlhang, haú hkyâm saí zo bang gi, yhang zo lé myàng kôjáng, 'Shí yuq gi, silí wunlí sing yû râ sù nghut lhê; lé keq, yhang lé sat pyám mù, yhang é silí wunlí lé yu pyám byi sháng.' ga, rayuq eq rayuq taí lhum bum akô nghut ri. <sup>39</sup> Haú mù, yhangmoq gi, yhang lé, chyup yû luí, hkyâm shinggan shut dú htoq kômù, sat pyám bekô nghut ri.

<sup>40</sup> Haú mù luí, tsibiyiq hkyâm yhumsing lé jé é hkûn lé, haú hkyâm saí zo bang lé hkâsu kut nhô ngam akô lhú?" ga Yesuq myi ri.

<sup>41</sup> Haú hkûn, haú hkyangjong agyi pé eq suwún wui gi, "Haú agè ashop bang lé gi, agè ashop é đông sat pyám râ nghut lhê. Haú tsibiyiq hkyâm lé gi, kyô shu yoq má, yhang é gambùm lé byi râ bang lé, htot ngho byi pyám râ nghut lhê." ga, tû taí akô nghut ri.

<sup>42</sup> Haú jáng, Yesuq dum taí é gi, "Chyúmdang má, 'Yhüm saí bang eq hkyin htoq pyám é luqgok gi, htungchyün mâ é ahkyak dik é luqgok dut bê.

Shí hkyô gi, haú Yhumsing kut é nghut luí, nga-nhung é myoq hí má mauhpo dut bê nghut ri.'<sup>☆</sup>

ga bo tô é lé, nungmoq a nghap wú kó lhú?

<sup>43</sup> Haú mù, Ngò, nungmoq lé taí kôlé, Garai Gasang é mingdán lé, nungmoq chyáng mai yû mù, hau é ashi wó zui râ byuhú lé byi pyám râ nghut lhê. <sup>44</sup> Luqgok haú má gyó záng é sù gi, gyú gyop byuq râ nghut lhê. Luqgok hau eq gyó nhê záng é sù le, nhê pyeq pyâm é hui râ nghut lhê." gâ ri.

<sup>45</sup> Hkyangjong agyi pé eq Hparishe pé gi, haú Yesuq taí é dangtú pé lé wó gyo kôjáng, yhangmoq lé taí nyi é hkyô lé, sê gyô akô nghut ri. <sup>46</sup> Haú mù, yhangmoq gi, Yhang lé chyup yû râ hkyô ho nyi akô; nghut kôlhang, byu pé gi, Yhang lé, myiqhtoi rayuq ga myit lum to kô é yanmai, yhangmoq gi, haú bang lé gyuq akô nghut ri.

## 22

*Myiháng Poí Dangtú Pé*

*Luk 14:15-24*

<sup>1</sup> Yesuq, dangtú pé đông yhangmoq lé dum taí é gi, <sup>2</sup> "Mauhkung mingdán gi, yhumsing yhangzô é matú myiháng poí hen lajáng to byi é hkohkâm rayuq eq du ri. <sup>3</sup> Hkohkâm hpó haú gi, yhang ji tô é bang, haú poí má lé lô râ matú, yhang é dui-nhang zoshang wui lé é tsing taí nhang ri; nghut kôlhang, haú bang gi, a lé kut akô nghut ri.

<sup>4</sup> Hau htang má, yhang gi, gotú dui-nhang zoshang wui lé, 'Ngò haí le hen to bê; ngá é no eq xu-myum é gau-nyháú pé lé sat mù, jung hkangmó rì rì nghut to bê. Myiháng poí má lé lò keq hkoi nghu, haú ji tô é bang lé ê taí keq.' ga pying luí, nhang kat ri.

<sup>☆</sup> 21:42 Hkya-on 118:22-23

<sup>5</sup> Nghut kôlhang, haû ji to huê é bang gi, dang haú lé haî su a gyô ngàm kômù, rayuq gi, yohtung shut, rayuq gi, hpugá dinggá hkyô shut ê byuq bekô nghut ri. <sup>6</sup> Ra-am dum nghut jáng, yhâng é dui-nhâng zoshâng wuì lé lhom chyup yû kômù, nhuq bat luî, sat pyám byî akô nghut ri. <sup>7</sup> Haû mù, hkohkâm gi, nhikjum yo luî, yhâng é gyezô pé lé, haû byù sat bang lé sat pyám nhâng mù, yhangmoq é myuq lé nyhê hkyô pyám nhang ri.

<sup>8</sup> Hau htâng má, yhang gi, yhâng é dui-nhâng zoshâng wuì lé, 'Myiháng poî gi, rì rì nghut to bê; nghut kôlhang, haû ji to huê é bang gi, lé râ a gingdán kó nghut ri. <sup>9</sup> Haû mù, hkyô kang pé má ê luî, myang é yuq hkangmó lé, poî má lé râ matú ê jî keq.' ga taî ri. <sup>10</sup> Haû jáng, dui-nhâng zoshâng haú bang gi, hkyô kang pé má htoq ê luî, myang é byù gè byù gang lhunglhang lé ji tsing yù kô é nghut mù, myiháng poî gi, bíng pé zung byíng bùm bê nghut ri.

<sup>11</sup> Nghut kôlhang, bíng haú bang lé, hkohkâm hpó, lé wang wú é hkûn, myiháng poî wàng hking a wut tô é byù rayuq lé, yhang byu-myang ri. <sup>12</sup> Haû mù, yhang gi, haú yuq lé, 'Buinùm hpó ê, nàng gi, myiháng poî wàng hking le a wut é nhîng, shí má hkâsu kut wang lo é lhu?' ga myi jáng, haú yuq gi, haî le a dat tû taí lo nghut ri.

<sup>13</sup> Haú hkûn, hkohkâm hpó gi, yhâng é dui-nhâng zoshâng wuì lé, 'Yhâng é hkyô loq má tui luî, haû ngaubyi ngaù nhap eq zùi kyik kyik shoq hpuzô nyì râ nghut é shinggan mauchut hkaû má, dú htoq pyám keq.' gâ ri.

<sup>14</sup> Hkâsu mù gâ le, byù myo myo gi, ji yu é hui kôlhang, hkyin yù huê é bang gi, shaû ri." gâ ri.

#### *Kehtaq Lé Kang Kat Byî É Hkyô*

*Mrk 12:13-17; Luk 20:20-26*

<sup>15</sup> Hau htâng má, Hparishe pé gi, htoq ló kômù, Yhâng é dang pé má mara chyup râ hpaqchyî dâ akô nghut ri. <sup>16</sup> Yhangmoq gi, Herut é byu pé eq rahá, yhangmoq é chángzô pé lé, Yesuq chyáng nhang kat akô. Haú bang gi, Yesuq chyáng lé jé kômù, "Sarâ ê, Nàng gi, tengmán sù nghut é eq, Garai Gasâng é hkyô lé, tengmán é đông mhòqshit é sù nghut é lé le, Nàng gi, ó haî ga râ lé le haî su a ngàm sù nghut é yanmai, ó yuq é myoqdong lé le a tê byi sù nghut é hkyô lé le, ngamoq sê lhê. <sup>17</sup> Haû mù, hkoséng Kehtaq lé kang kat byî le gi, ge lhê lhu? A gè lhu? Nàng, hkâsu wó myit é hkyô taî kyô wú aq." ga taî akô nghut ri.

<sup>18</sup> Yesuq kúm gi, yhangmoq é agè ashop hkyô lé sé byi mù, "Gegùn labyoq kut bang ê, nungmoq gi, haî mù, Ngo lé lé chyam wú akô lhu? <sup>19</sup> Kang kat râ ngùn htingchap rachap, Ngo lé byî wú keq." ga taî kat ri. Haú hkûn, yhangmoq gi, denari rachap yù byî akô. <sup>20</sup> Haû mù, Yhang gi, yhangmoq lé, "Shí má, ó yuq é alhò eq masat laiká dap tô ri lhu?" ga myi jáng, <sup>21</sup> yhangmoq gi, "Kehtaq é nghut ri." ga tû taî akô. Haû mù, Yhang gi, yhangmoq lé, "Kehtaq é lé gi, Kehtaq lé byi keq; Garai Gasâng é lé gi, Garai Gasang lé byi keq." ga taî kat ri.

<sup>22</sup> Haû su gâ é lé, wó gyo kôjáng, haú bang gi, maú byuq kômù, Yhâng chyáng mai htoq ló byuq bekô nghut ri.

#### *Saduke Pé, Yesuq Lé Myî Chyam É Hkyô*

*Mrk 12:18-27; Luk 20:27-40*

<sup>23</sup> Haú nyí má yhang, haû dum dui toq hkyô a joq gâ é Saduke pé gi, Yesuq chyáng lé jé kômù, dangmyi lé myî akô. <sup>24</sup> Yhangmoq myi kô é gi, "Sarâ ê, 'Myiwe wó é byù rayuq gi, zo dù a dap é za shi byuq é nghut jáng, yhanggu gi, yhangmâng é awut ashín xoq byi râ matú, yhâng rhat lé chui gon ra râ nghut lhê.' ga, nga-nhúng lé, Mosheq taî tô é nghut lhê. <sup>25</sup> Hí hpyang lé, ngamoq chyáng, gumang nhiktâng wuì nyhit yuq nyi akô. Lagám yuq gi, myiwe yù luî, zo dù a dap é za yhangmyi lé shi lhuî pyâm to bê nghut ri. <sup>26</sup> Haû eq rajung za, Lanong, Lalaq mai Lahkâ jé shoq, chuimó haú lé gon luî, ó le zo dù a dap é za shi ló byuq bùm bekô nghut ri. <sup>27</sup> Ló htáng má, myiwe myhí haû le châng shi ló byuq bê nghut ri. <sup>28</sup> Haû mù luî, haû dum dui toq é buinyi má, myiwe myhí haû gi, haú nhiktâng wuì nyhit yuq mâ é hká yuq é yhangmyi nghut râ lhu? Hkâsu mù gâ le, yhang gi, haú nhiktâng wuì banshoq bâng é yhangmyi dut wú bê sù nghut ri." gâ akô.



<sup>29</sup> Haú hkûn, Yesuq gi, yhangmoq lé, "Nungmoq gi, Chyúmdang eq Garai Gasâng é wum-o a-tsam lé a sé kô é yanmai, hkyô nghoq akô nghut ri. <sup>30</sup> Haú dum dui toq é buinyi má gi, myi byi myi yú hkyô joq lo râ a nghut; yhangmoq gi, mauhkûng htoq mâ é maumang lagyô pé su dut byuq kó râ nghut lhê. <sup>31</sup> Shi é mai dum dui toq bang eq séng luí, <sup>32</sup> Garai Gasang gi, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.'<sup>☆</sup> ga, nungmoq lé taí tô é lé, nungmoq a nghap wú kó lúhú? Yhang gi, shi to bâng é Garai Gasang a nghut; dui nyi bâng é Garai Gasang sheq ru nghut lhê." ga taí ri.

<sup>33</sup> Byù moq mó gi, dang haú wó gyo kôjáng, Yhang mhoqshit é hkyô lé maú byuq bum akô nghut ri.

### *Ahkyak Dik É Jep É Tarâ*

*Mrk 12:28-34; Luk 10:25-28*

<sup>34</sup> Saduke pé lé, Yesuq lhoq zîm pyâm é hkyô lé, Hparishe pé wó gyo kôjáng, yhangmoq gi, Yesuq chyáng zup zîng lé bum akô. <sup>35</sup> Yhangmoq má bo é tarâ sará rayuq gi, Yesuq lé chyam wú é dông, <sup>36</sup> "Sará ê, jep é tarâ má, hká lhum gi, je ahkyak dik lhê lúhú?" ga myi ri.

<sup>37</sup> Haú mù, Yesuq gi, "Haú Yhumsîng náng é Garai Gasang lé, náng é myit nhiklhum banshoq, náng é asak woi-nyí lhum gón, nàng myit é hkyô banshoq eq, chyitdap râ lhê.'<sup>☆</sup> gâ é nghut lhê. <sup>38</sup> Tarâ haú gi, je hí lhum eq je ahkyak dik é lhum nghut lhê. <sup>39</sup> Hau htang lhum le haú eq du é nghut mù, 'Náng gûng lé nàng chyitdap é su, náng é chyangnâm mâ é bang lé le chyitdap aq.'<sup>☆</sup> gâ é nghut lhê. <sup>40</sup> Tarâ haú í lhum gi, jep é tarâ banshoq eq myiqhtoi laiká banshoq é dangchyûng nghut lhê." ga, yhang lé taí kat ri.

### *Hkrisduq Gi, Ô Yuq É Yhangzo?*

*Mrk 12:35-37; Luk 20:41-44*

<sup>41</sup> Hparishe pé zup zîng to kô é hkûn, Yesuq gi, yhangmoq lé, <sup>42</sup> "Nungmoq gi, Hkrisduq eq séng luí hkâsu myit ngam akô lúhú? Yhang gi, ó yuq é yhangzo nghut lhê lúhú?" ga myi jáng, yhangmoq gi, "Dawiq é yhangzo nghut ri." ga tú taí akô.

<sup>43</sup> Haú mù, Yhang gi, yhangmoq lé, "Haú hkûn, Dawiq gi, Woi-nyí dông mai, Yhang lé, 'Yhumsîng' ga, haí mù wut lhê lúhú? Hkâsu mù gâ le, Dawiq taí é gi,

<sup>44</sup> 'Haú Yhumsîng Garai gi, ngá é Yhumsîng lé, "Ngò, náng é gumlau gye pé lé, náng é hkyiwa ô má tô pyâm é hkyíng jé shoq,

Ngá é loqyo hkyam shut zung nyi shi aq." ga taí ri.'<sup>☆</sup>

gâ ri. <sup>45</sup> Haú mù, Dawiq yhang lháng, Hkrisduq lé, 'Yhumsîng' gâ é nghut le gi, yhangzo za hkâsu ge nghut râ lúhú?" ga taí ri. <sup>46</sup> Haú mù, ó yuq le, dang rahkun lháng a wó tú taí lo kô é nghut mù luí, haú nyí mai, ó yuq lháng Yhang lé dangmyi a wám myi lo kó nghut ri.

## 23

### *Tarâ Sará Pé Eq Hparishe Pé Lé Sidiq Râ Hkyô*

*Mrk 12:38-40; Luk 11:37-52; 20:45-47*

<sup>1</sup> Hau htâng, Yesuq gi, byù moq mó eq Yhâng é chángzô pé lé taí é má, <sup>2</sup> "Tarâ sará pé eq Hparishe pé gi, Mosheq é tanghkuq má zung akô. <sup>3</sup> Haú mù, yhangmoq mhoqshit é hkyô chângjup lé, nungmoq châng kut ra kó râ nghut lhê. Nghut kôlháng, yhangmoq kut é dông gi, hkâkut kó; hkâsu mù gâ le, yhangmoq gi, yhangmoq taí é dông a kut kó nghut ri. <sup>4</sup> Yhangmoq gi, byu pé é goqsân má wôlai ke byi kôlháng, yhangmoq yhang gi, wô haú pé lé bo waq râ matú, loqnyhui lháng a kâm lhoq tuí kó nghut ri.

<sup>5</sup> Yhangmoq kut é hkyô lhunglháng gi, byu pé myàng râ matú za kut shit é nghut akô; haú chyúmbun bo é showuî-htûng pé lé lhoq kô yù kômù, buhîng pé mâ é banbyaú pé lé lhoq hing yu akô nghut ri; <sup>6</sup> yhangmoq gi, poí pé mâ é réng é jowò pé eq tarajong pé mâ é ahkyak dik é zùng jang pé má, myang zùng râ lé ô nau nyi akô; <sup>7</sup> yhangmoq gi, gài pé

má lhom shi-kyâm yù kó râ eq, byu pé mai, yhangmoq lé, 'Rabai'\* ga lhom wut kó râ lé ô nau nyi bum akô.

<sup>8</sup> Nungmoq kúm gi, 'Rabai' ga wut râ lé hkâ-ô nau kó; hkâsu mù gà le, nungmoq gi, sará rayuq za wó lhê nghut é htoq agó, nungmoq banshoq bang gi, gumang chyat ru nghut lhê. <sup>9</sup> Haû mù, myidàm htoq má, ó yuq lé le, 'âwa' hkâ-nghû kó; hkâsu mù gà le, mauhkûng htoq mâ é Îwa rayuq za, nungmoq é Îwa nghut lhê. <sup>10</sup> Hau htoq agó, 'sará' ga wut râ lé, hkâ-ô nau kó; hkâsu mù gà le, Hkrisduq za, nungmoq é Sará nghut lhê. <sup>11</sup> Nungmoq mâ é je gyaú sù gi, nungmoq é dui-nhâng zoshâng dut râ nghut lhê. <sup>12</sup> Hkâsu mù gà le, yhumsing gùng lé waq toq sù ó yuq nghut kôle, lhoq nyhum pyâm é hui râ nghut lhê, yhumsing gùng lé lhoq nyhûm sù kúm gi, waq toq é hui râ nghut lhê.

<sup>13</sup> Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, byu pé hí má, mauhkûng mingdán hkyô lé xaû tô akô; nungmoq yhang le a wàng kó, wàng nau nyi bang lé le a wàng nhâng kó nghut ri. <sup>14</sup> (Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, chuimó pé é yhûm-yò pé lé hpyoq zo hpyoq shuq é eq kyû hîng hîng dúng shit mhaû é bang nghut akô; haû mù, dam byî é je myo hui zo kó râ nghut lhê.)†

<sup>15</sup> Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, byu rayuq lé nungmoq é noqkuq htûng má wó lhoq lhik yû râ matú, myî hkyô, wuî hkyô, châng jón wún kômù, wó lhoq lhik yu é sù lé gi, nungmoq su ngaraî byù í tú shuî dut akô nghut ri.

<sup>16</sup> Hkyô-u she é myoqjit pé ê, nungmoq gi, dingnyé wó ri. Nungmoq gi, 'Noqkuq yhûm lé lang luî dakam é sù gi, haî a ra; noqkuq yhûm mâ é hîng lé lang mù dakam é sù kúm gi, cháng ra bê.' ga lhaq taî akô. <sup>17</sup> Myoqjit é byù nâ pé ê! Haû hîng eq hîng lé lhoq yúnglhô é noqkuq yhûm gi, hká lhum je ahkyak lhê lhu? <sup>18</sup> Hau htoq agó, nungmoq gi, 'Haû hkungga gyap lé lang luî dakam é sù gi, haî a ra, nghut kôlhang, haû hkungga zè lé lang mù dakam é sù gi, cháng ra bê.' ga le, lhaq taî akô nghut ri. <sup>19</sup> Myoqjit pé ê! Haû hkungga zè eq hkungga zè lé lhoq yúnglhô é hkungga gyap gi, hká lhum je ahkyak lhê lhu? <sup>20</sup> Haû mù, haû hkungga gyap lé lang luî dakam é sù gi, haû hkungga gyap eq hau é ahtoq má ke tô é zè banshoq lé lang luî dakam é sù dut bê nghut ri. <sup>21</sup> Noqkuq yhûm lé lang luî dakam é sù gi, haû noqkuq yhûm eq haú má nyi é Sù lé lang luî dakam é sù dut bê nghut ri. <sup>22</sup> Hau htoq agó, mauhkûng lé lang luî dakam é sù gi, Garai Gasâng é tanghkuq eq haú má zung é Sù lé lang luî dakam é sù dut bê nghut ri.

<sup>23</sup> Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, xunmân nghut é gau-tsáng shingtón, bantsaí, hpakkyí pé mâ é xê gambùm ragambùm lé gi, byî nyi kômù, je ahkyak é tarâ nghut é, tarâ rap-rá hkyô, shogyo nhikmyin hkyô eq lhumzui hkyô pé lé gi, lhaî pyâm tô akô nghut ri. Hî lhum lé kut é su, htang lhum lé le kut râ lhê. <sup>24</sup> Hkyô-u she é myoqjit pé ê! Nungmoq, pyup lé gi, jân pyám kômù, gola-uq lé gi, myui pyâm akô nghut ri.

<sup>25</sup> Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, zo hkoq shuq góm pé lé ahtoq shut za chî yúng mù, ahte má gi, lú zo lú shuq é eq yhumsing maiwáng zat é myit byíng zan tô ri. <sup>26</sup> Hparishe myoqjit pé ê! Zo hkoq shuq góm é ahte lé hí chí yúng pyám keq, haû jáng, ahtoq le sân-yúng râ nghut lhê.

<sup>27</sup> Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, but hpyu tô é lup pé eq du akô; haú pé gi, ahtoq má wú yúng kôlhang, ahkaû má gi, mâng bup showui pé eq achayut é chângjup byíng tô é nghut ri. <sup>28</sup> Haû eq rajung za, nungmoq gi, byu pé hí má, ahtoq pyâm dingmán é su kut shit kôlhang, ahkaû má gi, gegùn labyoq kut é eq agè ashop é hkyô pé byíng zan tô ri.

\* 23:7 Aramaik dang dông rabai gà é gi, sará gà é lichyúm nghut lhê. † 23:14 Chyúmding ra-am má gi, bun zo 14 shí a bo é nghut lhê.

<sup>29</sup> Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, myiqhtoî pé é lup lé luqtsuq tsuq kômù, dingmán bâng é lup pé lé mhón byi kôluî, <sup>30</sup> 'Ngamoq gi, ngamoq é îchýí îwa pé é ipyat má nyi âng é ru nghut le gi, haû myiqhtoî pé é sui lhoq shun é bang má, ngamoq bo lòm râ a nghut.' ga lhaq taî akô. <sup>31</sup> Haû su mù, nungmoq gi, haû myiqhtoî pé lé sat pyám bâng é awut ashín pé nghut é hkyô lé, nungmoq gùng nungmoq saksé hkam yu nyi akô nghut ri. <sup>32</sup> Haû mù, nungmoq é îchýí îwa pé hi tô é muzó lé, banshoq châng kut pán keq!

<sup>33</sup> Lhangmuì pé ê, duq htân lhangmuì amyû pé ê! Ngarâi mîng é dam byi hkyô mai, hkâsu wó h pang lut kó râ l hú? <sup>34</sup> Hau é yanmai, myiqhtoî pé, hpaqchyî bò bang eq chyúm sará pé lé, Ngò, nungmoq chyáng nhang kat râ nghut lhê. Haú bang mâ é ra-am lé gi, nungmoq lhom sat pyám mù, tapzîng má jén pyám kó râ nghut lhê; ra-am lé gi, nungmoq é tarajong pé má, nhuq bat kômù, ra-myuq htâng ra-myuq châng hkat zing-rî wún kó râ nghut lhê. <sup>35</sup> Hau é yanmai, haû dingmán sù Abelaq é sui mai hí luî, noqkuq yhûm eq hkungga gyap gyoro má nungmoq sat pyâm é, Berehkiq é yhangzo Zahkariq é sui jé shoq, myidàm htoq má shun pyâm é dingmán bang banshoq é sui gi, nungmoq é ahtoq má jé lô râ nghut lhê. <sup>36</sup> Ngò, nungmoq lé teng za taí kôlé, shí hkyô banshoq gi, ipyat shí é ahtoq má jé râ nghut lhê.

<sup>37</sup> Yerusalem ê, Yerusalem ê, myiqhtoî pé lé sat pyám pyám kut mù, náng chyáng nhang kat é bang lé luqgok èq dú sat sat kut é myuq nàng ê, woqzìng gi, yhangzô pé lé, yhâng é dùng hkaû má tsîng lhûng yu é su, nungzô pé lé, Ngò, hkâ-myhó dâm shuí tsîng yù nàù kôlhang, nàng a dóng nghut ri. <sup>38</sup> Wú keq, nungmoq é yhûm gi, nungmoq é matú chamchyuiyui dut pyâm to berâ nghut lhê. <sup>39</sup> Hkâsu mù gà le, Ngò, nungmoq lé taí kôlé, 'Yhumsing é myîng mai jé lé lo é Sù gi, hkungsô wó nyi sháng gaq.'<sup>✠</sup> ga, nungmoq a taí taí gi, Ngo lé wó myâng kó râ a nghut lo." gà ri.

## 24

### Ló Htâng Buinyì Má Dut Lò Râ Hkyô

*Mrk 13:1-31; Luk 21:5-33*

<sup>1</sup> Yesuq gi, noqkuq yhûm mai htoq e ló é u lé, Yhâng é chángzô pé gi, Yhâng é nàm má huì lé lô kômù, haû noqkuq yhum é loqmú pé lé tûn shit akô. <sup>2</sup> Haú hkûn, Yesuq gi, yhangmoq lé, "Haú pé banshoq lé, nungmoq myang lhê a nghut kó l hú? Ngò, nungmoq lé teng za taí kôlé, luqgok haú pé gi, rachâm htoq racham l háng a kê lhum loshoq, hpyoq hpyi pyâm é hui râ nghut lhê." ga taí ri.

<sup>3</sup> Yesuq gi, Tsanlun Bùm má zung tô é hkûn, haû chángzô pé gi, yhangmoq baú Yhâng chyáng lé jé kômù, "Haú hkyô pé gi, hkâ-nhám dut lò râ l hú? Nàng gyó lé râ hkûn eq ló htâng buinyì má, hkasû é kumlhá htoq lô râ nghut lhê l hú? Ngamoq lé taí kyô wú laq." ga, Yhang lé myî akô.

<sup>4</sup> Haú hkûn, Yesuq, yhangmoq lé tû taí é gi, "Nungmoq lé, ó yuq èq le a wó shuí nghoq sháng gaq, sidiq nyi keq. <sup>5</sup> Hkâsu mù gà le, 'Ngò gi, haû Hkrisduq nghut lhê.' ga, Ngá myîng lé lãng é byù myo myo pô htoq lô mù, byù myo myo lé hkyô shuí nghoq kó râ nghut lhê. <sup>6</sup> Nungmoq gi, majan dut nyi é hkyô eq majan eq sêng é danglám pé lé, wó gyo kó râ nghut lhê; nghut kôlhang, hkâgyuq dàn kó. Haú hkyô pé gi, dut lò râ za nghut lhê; nghut kôlhang, ló htâng é buinyì gi, a nghut shi. <sup>7</sup> Byù ra-myû eq ra-myû, mingdán rallum eq rallum majan zân lhûm lò kó râ nghut lhê. Jowò myo myo má, mutmó gyó é pé eq layàng nún é pé dut lò râ nghut lhê. <sup>8</sup> Haú pé gi, wuîhke jamjau hkyo é apûn awang za ru nghut ashî.<sup>✠</sup>

<sup>9</sup> Haú hkûn, nungmoq gi, zing-rî é eq sat pyâm é hui zo râ matú, ap pyâm é hui kó râ nghut lhê. Byù myû lhunglhang bang gi, Ngá é yanmai, nungmoq lé a ngui kut kó râ nghut lhê. <sup>10</sup> Haú u lé, byù myo myo gi, lumjîng myit lé tô pyám kômù, rayuq eq rayuq a ngui lhum dut é htoq agó, rayuq eq rayuq ap pyâm lhum kó râ nghut lhê. <sup>11</sup> Hau htoq

agó, myiqhtoi pyoq pé myo myo pô htoq lô kômù, byù myo myo lé hkyô shuí ngoq kó rã nghut lhê. <sup>12</sup> Agè ashop é hkyô myô jat lo é yanmai, byù myo myô é chyitdap myit gi, kân lô byuq rã nghut lhê; <sup>13</sup> nghut kôlhang, jihâm jé shoq wó hkam jân nyi é sù gi, hkyi yu é hui rã nghut lhê. <sup>14</sup> Byù myô banshoq má saksé dut rã matú, haú mingdán eq sêng é gabú danglù lé, mingkan gón má hko kyo rã nghut lhê. Hau htâng má sheq, lô htum buinyi jé rã nghut lhê.

<sup>15</sup> Haú mù luí, myiqhtoi Danielaq dông mai taí tô é eq rajung za, 'haú lhoq hten lhoq hpyoq é achag achyut hkyô'☆ gi, chyoiyúng jowò má shap tô é lé, nungmoq myàng kó rã nghut lhê. (Chyúmlaika nghap sù gi, sê gyo sháng gaq). <sup>16</sup> Haú hkún, Yuda mau má nyi é bang gi, bùm pé shut hfang doq lô kó sháng gaq. <sup>17</sup> Yhumhkúng htoq má nyi tô é sù gi, yhumhkaú má é zè haí lé le, a lô gyó wang yù lo sháng gaq. <sup>18</sup> Yò má nyi tô é sù gi, yhâng é buhâng lé a lô taú yu nyi lo sháng gaq. <sup>19</sup> Haú buinyi pé má, zogúng dut é myiwe eq náu huq ashí nghut é ìnu wuì gi, gyai yhang wuìhke jamjau kó rã nghut lhê. <sup>20</sup> Haú nungmoq hpàng rã buinyi gi, gyoqmyò, \* a nghut jáng, Bánno buinyi má a ang rã matú, kyúdüng nyi keq. <sup>21</sup> Hkâsu mù gâ le, mingkan lé joq é hkún mai ahkuí jé shoq, hkâ-nhám le a dut wú shí é wuìhke jamjau mó gi, haú buinyi pé má dut lò rã nghut lhê; haú sù é hkyô gi, htàngnùng má hkâ-nhám le dum dut lo rã a nghut. <sup>22</sup> Buinyi haú pé lé lhoq shaú pyâm é za a nghut le gi, ó yuq le asak wó lut rã a nghut; nghut kôlhang, Garai Gasang eq hkyin yù hui bâng é matú gi, buinyi haú pé lé, lhoq shaú pyám byi rã nghut lhê. <sup>23</sup> Haú ahkýing má, byù rayuq yuq mai, nungmoq lé, 'Wú keq, shí má Hkrisduq nyi ri.' ga, haú a nghut jáng, 'Wú keq, Yhang hê má nyi ri.' ga taí jáng, nungmoq hkâjúng kó. <sup>24</sup> Hkâsu mù gâ le, Hkrisduq pyoq pé eq myiqhtoi pyoq pé pô htoq lô mù, wó dut é nghut jáng, hkyin yù hui bang lé lhang, wó lhoq ngoq shoq ga, kumlhá mó pé eq laklaí kumlhá pé lé kut shit kó rã nghut lhê. <sup>25</sup> Gyo keq, shí hkyô a dut shimá, Ngò, nungmoq lé taí kyô nyi gù nghut lhê.

<sup>26</sup> Haú mù, rayuq yuq eq, nungmoq lé, 'Yhang gi, yoso má nyi ri.' gâ jáng le, hkâ-ê kó; 'Yhang gi, shí gok hkaú má lúng tô ri.' ga jáng le, hkâjúng kó. <sup>27</sup> Hkâsu mù gâ le, bui htoq hkyam má lhap hpyat é gi, bui wang hkyam má lhang jé shoq duqbó é su, haú Byu Yhangzo jé lé é hkún le, dut rã nghut lhê. <sup>28</sup> Màng leq é jang má, langdâ pé, lé zing bùm rã nghut lhê.

<sup>29</sup> Buinyi haú pé má é wuìhke jamjau lai eq yhang, 'Bui gi, noq byuq mù, lhamó gi, a tsò dut byuq rã nghut lhê; kyí pé gi, mauhkúng mai byit gyó lo bùm mù, mauhkúng má é wum-o a-tsam pé gi, lhoq nhún é huí bùm kó rã nghut lhê.'☆

<sup>30</sup> Haú hkún, haú Byu Yhangzô é kumlhá gi, mauhkúng má htoq shit lô rã nghut mù, myidàm htoq má é byù myô lhunglhang gi, yón ngau bùm kó rã nghut lhê. Haú Byu Yhangzo gi, mauhkúng mai, mhut ji mù, hpungwup a-tsam mó eq le, hpungwup shingkang eq le, gyó lé lo é lé, yhangmoq byu-myàng kó rã nghut lhê. <sup>31</sup> Hau htâng má, Yhang gi, Yhâng é maumang lagyô pé lé, tut htê mó eq nhang kat luí, yhangmoq gi, maumyí chyún myi chyún eq mauhkúng rahkyam mai, gó hkyam htum shoq má é, Yhang hkyin yu tô é bang lé shuí tsing yù kó rã nghut lhê.

<sup>32</sup> Maihpáng gâm lé wú mù, mhoq yú keq; agàm mai a-nyuq nyún lô mù, ahaq htut lô jáng, bui nyé nám chyâng lò bê lé, nungmoq sê lhê. <sup>33</sup> Haú eq rajung za, shí hkyô banshoq† lé, nungmoq myàng kôjáng, Yhang gi, chyáng bê nghut mù, hkúmdong má lhang nghut nyí bê hkyô lé, nungmoq sé lo keq. <sup>34</sup> Ngò, nungmoq lé teng za taí kôlé, shí pyat má é byu pé a ban shi byuq shimá, haú hkyô pé‡ banshoq dut byuq rã nghut lhê. <sup>35</sup> Mauhkúng eq myigùng gi, a joq lo dut byuq rã nghut lhê; nghut kôlhang, Ngá é dang gi, ru joq nyí rã nghut lhê.

☆ 24:15 Dan 9:27; 11:31; 12:11 \* 24:20 Israelaq mau má gi, gyoqmyò lé hkyô htoq le gyai wuìhke é ahkýing nghut lhê. ☆ 24:29 Esai 13:10; 34:4 † 24:33 Shí hkyô banshoq gâ é gi, Yesuq jé lé rã hí má dut rã hkyô pé lé taí é nghut lhê. ‡ 24:34 Haú hkyô pé gâ é gi, Yerusalem noqkuq yhúm htên byoq rã lé taí é nghut lhê.

*Haù Buinyi Eq Ahkyíng Lé, Ó Le A Sé**Mrk 13:32-37; Luk 17:26-30, 34-36; 12:35-48*

<sup>36</sup> Buinyi eq ahkyíng haù lé gi, ó yuq le a sé; mauhkûng htoq mâ é maumang lagyô pé lháng a sé; haù Zo le a sé; haù Íwa za ru sê lhê. <sup>37</sup> Noaq é tsîn pyat má dut é su, haù Byu Yhangzo lé lo é hkûn le, dut râ nghut lhê. <sup>38</sup> Hkâsu mù gà le, dowuî a dítng shî é buinyi pé má, byu pé gi, Noaq, wuî-sanghpo mó hkaù má wang é hkûn jé shoq, zo zo shuq shuq, myi byi myi yû, kut nyi bum akô nghut ri; <sup>39</sup> yhangmoq gi, dowuî dítng lô mù, yhangmoq banshoq lé ûm sat pyâm é hkûn jé shoq, haù dut lò râ lé, a sé kó dut bùm é su, haù Byu Yhangzo lé lo é hkûn le, dut râ nghut lhê. <sup>40</sup> Haù hkûn, yò má rahá nyi tô é byu í yuq mâ é rayuq gi, shuî yu é hui mù, rayuq gi, myit gyó to râ nghut lhê. <sup>41</sup> Luqluí chôm láng nyi é myiwe í yuq mâ é rayuq gi, shuî yu é hui mù, rayuq gi, myit gyó pyâm to râ nghut lhê.

<sup>42</sup> Haù su mù, haù nungmoq é Yhumsîng gi, hká nyi jé lé lô râ lé, nungmoq a sê kô é yanmai, sidiq machya nyi keq. <sup>43</sup> Myín hká u má hkau sù jé lé lô râ lé, yhumsîng sê é ru nghut le gi, yhang é yhûm má a wó hput wâng nhâng loshoq, yhang machya nyi râ nghut é lé, nungmoq sê gyô nyi keq. <sup>44</sup> Haù mù, nungmoq le rì rì nghut nyi keq; hkâsu mù gà le, haù Byu Yhangzo gi, a bûn nùng má jé lé lô râ nghut lhê.

<sup>45</sup> Yhumsîng hpô é dui-nhâng zoshâng wuî lé, uphkâng râ eq ahkyíng jé jáng zoshuq gàm byi râ matú, yhumsîng hpô eq mù nhang tô é, lhumzui luî, hpaqchyî bo é dui-nhâng zoshâng gi, ó yuq nghut râ lhu? <sup>46</sup> Yhumsîng hpô dum taù lo é hkûn, haù su kut nyi láng é dui-nhâng zoshâng gi, hkungsô wó nyi ri. <sup>47</sup> Ngò, nungmoq lé teng za taí kôlé, yhumsîng hpô haù gi, yhang é sutzè banshoq, dui-nhâng zoshâng haù yuq lé ap to râ nghut lhê. <sup>48</sup> Nghut kôlhang, laqma mù, dui-nhâng zoshâng haù yuq gi, agè ashop sù nghut luî, 'Ngá é yhumsîng hpô jé lô râ gyai myáng ashî.' ga, yhang é i-myt unghkaù má myit yù mù, <sup>49</sup> gotù dui-nhâng zoshâng luzúm wuî lé nhuq bat é htoq agó, î shuq wut bang eq rahá zo zo shuq shuq kut nyi é nghut le gi, <sup>50</sup> dui-nhâng zoshâng hau é yhumsîng hpô gi, yhang a myitngam tô é buinyi eq yhang a sê tô é ahkyíng má jé lô mù, <sup>51</sup> yhang lé jap pyám luî, gegùn labyoq kut bang hkâm zô é, ngaubyi ngaù nhap eq zuì kyik kyik shoq hpuzô nyi râ jowò má hkyô pyám râ nghut lhê.

## 25

*Zomyi Raxê Yuq Lé Dangtú Yu É Hkyô*

<sup>1</sup> Haù hkûn, mauhkûng mingdán gi, myibung yu chûng mù, lusik lé te yù râ ga, htoq e ló é zomyi raxê yuq eq pûng râ nghut lhê. <sup>2</sup> Haù bang má, ngo yuq gi, nhik a gyíng kó; ngo yuq gi, nhik gyíng akô nghut ri. <sup>3</sup> Haù nhik a gyíng é bang gi, myibung yu chûng kôlhang, xû a yu chûng kó nghut ri. <sup>4</sup> Nghut kôlhang, haù nhik gyíng é bang kúm gi, yhangmoq é myibung lé le, xû bo é bòng lé le yu chung akô nghut ri. <sup>5</sup> Lusik jé lé lô râ myáng nyi é yanmai, yhangmoq banshoq bang gi, yhup mui lò kômù, yhup myhî byuq bekô nghut ri.

<sup>6</sup> Myín gunggàm jé jáng, 'Lusik jé bê ô! Yhang lé te yù râ matú, htoq lé lô keq hkoi ô!' ga, garû é htê htoq lo ri.

<sup>7</sup> Haù hkûn, zomyi haù bang banshoq gi, toq lô mù, yhangmoq é myibung lé hen lajâng akô nghut ri. <sup>8</sup> Haù nhik a gyíng bang gi, 'Ngamoq lé, xû ratsuí byi kó laq; hkâsu mù gà le, ngamoq é myibung shi ló nyi ri.' ga, haù nhik gyíng bâng chyáng dúng akô.

<sup>9</sup> Haù hkûn, haù nhik gyíng bang gi, 'Nungmoq eq ngamoq é matú ga jáng, luq râ a nghut. Haù mù, nungmoq é matú, xû ung bâng chyáng ê wui yù keq.' ga tû taí kat akô.

<sup>10</sup> Yhangmoq, xû wuî e ló kô é hkûn, lusik gi, jé lé lô mù, haù rì rì hen tô é zomyi wui gi, yhang eq rahá myiháng poî má wang ló bekô. Hkum le myhî byuq bê nghut ri.

<sup>11</sup> Hau htâng má, hau htâng gyó tô é zomyi wuî gi, tau jé lô kômù, 'Yhumsîng ê! Yhumsîng ê! Ngamoq lé, hkum hpóng byi laq ô!' ga taí akô.

<sup>12</sup> Nghut kôlhang, haù lusik gi, 'Ngò, nungmoq lé teng za taí kôlé, nungmoq lé ngò a sé.' ga tû taí kat ri.

<sup>13</sup> Haû mù luî, haû Byu Yhangzo jé lé râ buinyì eq ahkyíng lé, nungmoq a sé kô é yanmai, sidiq machya nyì keq.

*Dui-nhâng Zoshâng Sum Yuq Lé, Dangtú Yu É Hkyô*

*Luk 19:11-27*

<sup>14</sup> Mauhkûng mingdán gi, byù rayuq byìn we htoq râ hen nyi é nghut mù, yhâng é dui-nhâng zoshâng wuì lé wut yù luî, yhâng é sutzè lé ap byî to sù eq pung ashî nghut ri. <sup>15</sup> Yhang gi, yhangmoq é a-tsam má cháng luî, rayuq lé gi, ngùn ngo jói, rayuq lé gi, í jói, htâng rayuq lé gi, rajoí kut byî to mù, byìn we shut htoq ló byuq bê nghut ri. <sup>16</sup> Ngùn ngo jói wó yù sù gi, haú hkûn jáng htoq ló mù, hpugá gá luî, ngùn ngo jói wó myat yù bê nghut ri. <sup>17</sup> Haû eq rajung za, ngùn í jói wó yù sù le, í jói wó myat yù bê nghut ri. <sup>18</sup> Nghut kôlhâng, rajoí za wó yù sù gi, htoq e ló mù, myigùng má du luî, yhâng yhumsîng hpô é ngùn lé haq myhup tô ri.

<sup>19</sup> Hau htâng tsómra myáng jáng, dui-nhâng zoshâng haú bâng é yhumsîng hpó gi, dum taû jé lô mù, yhangmoq é ngùn chyârâng lé, lo jep ri. <sup>20</sup> Ngùn ngo jói wó yù sù gi, amyat ngo jói lé le yu lé lô mù, 'Yhumsîng ê, nàng, ngo lé, ngùn ngo jói ap tô é nghut lhê. Wú aq, amyat ngo jói wó ho jat yù bê.' ga taî ri.

<sup>21</sup> Haú hkûn, haû yhumsîng hpó gi, 'Arâ! Nghut bê. Nàng gi, kyet é eq lumgíng é dui-nhâng zoshâng nghut ri! Tiq é mù má lháng wó lum é sù nghut é yanmai, ngò, nang lé, kô é mù lé le ap byi râ nghut lhê. Náng yhumsîng hpô é gabú hkyô má bo wang lòm aq hkoi!' ga tû taî ri.

<sup>22</sup> Haû eq rajung za, í jói wó yù sù le, lé lô mù, 'Yhumsîng ê, nàng, ngo lé ngùn í jói ap tô é nghut lhê. Wú aq, amyat í jói wó ho jat yù bê.' ga, lé taî ri.

<sup>23</sup> Haú hkûn, haû yhumsîng hpó gi, 'Arâ! Nghut bê. Nàng gi, kyet é eq lumgíng é dui-nhâng zoshâng nghut ri! Tiq é mù má lháng wó lum é sù nghut é yanmai, ngò, nang lé, kô é mù lé le ap byi râ nghut lhê. Náng yhumsîng hpô é gabú hkyô má bo wang lòm aq hkoi!' ga tû taî ri.

<sup>24</sup> Hau htâng, rajoí wó yù sù le, lé lô mù, 'Yhumsîng ê, nàng gi, byù wui nghut mù, yhumsîng a hô tô é jang mâ é shù yù nau é htoq agó, yhumsîng, kyôshi a sân hkyô tô é jang mâ é tsíng yù nau sù nghut é lé, ngò sê lhê. <sup>25</sup> Haû mù, ngò gi, gyuq luî, htoq ê mù, náng é ngùn lé, myigùng má ê haq myhup tô é nghut lhê. Wú aq, shî gi, nàng é ngùn nghut lhê.' ga taî ri.

<sup>26</sup> Haû mù, yhumsîng hpó gi, yhang lé, 'Agè ashop é eq lagôn é dui-nhâng zoshâng ê! Ngò gi, yhumsîng a hô tô é jang mâ é shù yù nau é eq, yhumsîng, kyôshi a sân hkyô tô é jang mâ é tsíng yù nau sù nghut é lé, nàng sê to gù nghut le nhîng, <sup>27</sup> ngá é ngùn lé, ngò dum taû jé lô jáng, aráng eq amyat wó yù shoq, ngùn hpún kat jang má, haî mù a kat tô é lhú?

<sup>28</sup> Haû mù, haû ngùn rajoí lé, náng chyáng mai yù luî, raxê jói wó to sù lé, byî pyám nhâng râ nghut lhê. <sup>29</sup> Hkâsu mù gâ le, wó sù ó yuq lé nghut kôle, yhang agùn agó wó râ matú, jat byi râ nghut lhê. A wó su chyáng mai kúm gi, yhang wó tô é lé lháng yu pyám byi shirâ nghut lhê. <sup>30</sup> Haû mù, haû akyû a bo é dui-nhâng zoshâng lé gi, ngaubyi ngàu nhap eq zuì kyik kyik shoq hpuzô nyì râ jowò nghut é, shinggan mauchut hkaû má dú htoq pyám keq.' gâ ri.

*Sau Eq Bainám*

<sup>31</sup> Haû Byu Yhangzo gi, Yhâng é hpungwup shingkang mai, maumang lagyo lhungl-hâng bang eq rahá jé lé lo é hkûn, Yhâng é hpungwup shingkang bo é hkohkâm-tanghkuq htoq má zùng râ nghut lhê. <sup>32</sup> Haú hkûn, byù myû chângjup gi, Yhâng é hí má zîng lé lo bùm kó râ nghut mù, Yhang gi, sau zúng sù mai, sau eq bainám lé gotû tû kut gam hkoq é su, byu pé lé gam hkoq pyám râ nghut lhê. <sup>33</sup> Yhang gi, sau pé lé, loqyo hkyam shut, bainám pé lé, loqpaî hkyam shut kut, nyhi to râ nghut lhê.

<sup>34</sup> Hau htâng má, haû Hkohkâm gi, Yhâng é loqyo hkyam shut mâ é bang lé, 'Ngá Wâ chyáng mâ é shimân jeju hkam yu é hui bang ê, lé keq; mingkan lé hpan é hkûn mai,

nungmoq é matú ga hen lajâng tô é muì mingdán má wang ló keq. <sup>35</sup> Hkâsu mù gâ le, Ngò zòmút é u lé, nungmoq, Ngo lé byi tso kô é nghut lhê; Ngò wuìshit é u lé, nungmoq, Ngo lé byi huq kô é nghut lhê; Ngò bíng kut wún é u lé, nungmoq, Ngo lé lhom hkulum yù kô é nghut lhê; <sup>36</sup> Ngò gùngchín dut é u lé, nungmoq, Ngo lé byi hut kô é nghut lhê; Ngò nòhpyo huì é u lé, nungmoq, Ngo lé wú gon kô é nghut lhê; Ngò htóng lúng é u lé, nungmoq, Ngo lé lé kum kô é nghut lhê.' ga taí râ nghut lhê.

<sup>37</sup> Haú hkûn, haú dingmán bang gi, Yhang lé, 'Yhumsîng ê, Nàng zòmút huì é lé, ngamoq, hkâ-nhám myàng luì, byi tsô wú é lú? Nàng wuìshit é lé, ngamoq, hkâ-nhám myàng luì, byi huq wú é lú? <sup>38</sup> Nàng bíng kut wún é lé, ngamoq, hkâ-nhám myàng luì, lhom hkulum wú é lú? Nàng gùngchín dut é hkûn, ngamoq, hkâ-nhám byi hut wú é lú? <sup>39</sup> Nàng nòhpyo huì é lé le, htóng lúng é lé le, ngamoq, hkâ-nhám myàng luì, lé gon lé kum wú é lú?' ga myi kó râ nghut lhê.

<sup>40</sup> Haú hkûn, haú hkohkâm gi, 'Ngò, nungmoq lé teng za taí kôlé, shî, Ngá gumang wuì mâ é je tiq sù lé, nungmoq kut byî é hkyô haì le, Ngo lé kut byî é nghut bê.' ga tû taí râ nghut lhê.

<sup>41</sup> Hau htâng má, Yhang gi, Yhâng é loqpaì hkyam shut mâ é bang lé, 'Dingnyé wó é bang ê, Ngá chyáng mai gâng ló mù, nat Tsadán eq yhâng é maumâng pê é matú hen tô é, ahtum abyuq é myi má wang ló keq. <sup>42</sup> Hkâsu mù gâ le, Ngò zòmút é u lé, nungmoq, Ngo lé a byi tso kó; Ngò wuìshit é u lé, nungmoq, Ngo lé a byi huq kó; <sup>43</sup> Ngò bíng kut wún é u lé, nungmoq, Ngo lé a lhom hkulum yù kó; Ngò gùngchín dut é u lé, nungmoq, Ngo lé, mebu a byi hut kó; Ngò nòhpyo huì é eq htóng lúng é u lé, nungmoq, Ngo lé a gon kó nghut ri.' ga taí râ nghut lhê.

<sup>44</sup> Haú hkûn, yhangmoq gi, 'Yhumsîng ê, nàng zòmút wuìshit é, bíng kut wún é, gùngchín dut é, nòhpyo huì é eq htóng lúng é lé, ngamoq, hkâ-nhám myàng luì, a wú gon kut wú é lú?' ga taù myi kó râ nghut lhê.

<sup>45</sup> Haú hkûn, Yhang gi, 'Ngò, nungmoq lé teng za taí kôlé, shí bang mâ é je tiq sù lé, nungmoq, a kut byî é hkyô haì le, Ngo lé a kut byî é nghut bê.' ga, yhangmoq lé tû taí râ nghut lhê.

<sup>46</sup> Haú mù luì, haú bang gi, ahtum abyuq mara dam byî é má wang ló kó râ nghut lhê; haú dingmán bang kúm gi, ahtum abyuq é asak má wang ló kó râ nghut lhê." ga Yesuq taí ri.

## 26

### *Yesuq Lé, Sat Râ Da Kô É Hkyô*

*Mrk 14:1-2; Luk 22:1-2; Yhn 11:45-53*

<sup>1</sup> Yesuq gi, haú hkyô pé lé ban taí é htâng má, Yhâng é chángzô pé lé, <sup>2</sup> "Nungmoq sê tô é eq rajung za, í nyí laì é htâng má, Lhoqlhai Poì jé râ nghut mù, haú Byu Yhangzo gi, tapzîng má jén sat é hui râ matú, ap pyâm é hui râ nghut lhê." ga taí ri.

<sup>3</sup> Haú u lé, hkyangjong agyi pé eq suwún wuì gi, Kayahpaq gâ é hkyangjong mó rayuq é yhumwàng má zup zîng to kômù, <sup>4</sup> Yesuq lé haq chyup yû râ eq sat pyám râ hkyô lé, hpyê lhûm bum akô nghut ri. <sup>5</sup> Nghut kôlhang, yhangmoq gi, "Byu pé gabyông lò kó abe, poì gyoro má gi, a kut shi sháng." ga, taí lhûm akô nghut ri.

### *Yesuq, Xû Hut Gyun Huì É Hkyô*

*Mrk 14:3-9; Yhn 12:1-8*

<sup>6</sup> Yesuq gi, Behtani wà má nyi é manggâm dap wú sù Simûn é yhûm má nyi tô é hkûn, <sup>7</sup> myiwe myhí rayuq gi, gyai hpaù é namngón xû bo é luq hpyû bông yu lé lô mù, Yesuq zo shuq nyi é hkûn, namngón xû haú lé, Yhâng é ulhum má hut gyun byî ri.

<sup>8</sup> Haú hkyô lé, haú chángzô pé myàng kôjáng, wú nhik-yo kômù, "Haì mù luì, haú lé aha agó kut pyâm lhê lú? <sup>9</sup> Xû haú lé, ahpau myo myô èq ûng pyám mù, myùng bang lé byî le ge lhê mhaì!" ga taí kat akô.

<sup>10</sup> Yesuq gi, haú hkyô lé sé luì, "Haì mù, myiwe zo haú lé, i-myt lhoq myô nyi akô lú? Yhang gi, Ngá é ahtoq má ge é hkyô kut bê nghut ri. <sup>11</sup> Haú myùng bang gi, nungmoq

eq rahá hkâ-nhám le nyi râ nghut lhê; nghut kôlhang, Ngò gi, nungmoq eq rahá ayang nyi nyi râ sù a nghut. <sup>12</sup> Yhang, Ngá gûng má namngón xù hut gyûn é gi, Ngá gûng lé yhum râ matú, hen lajâng é hkyô nghut ri. <sup>13</sup> Ngò, nungmoq lé teng za taí kôlé, haû gabú danglù lé, mingkan gón hko kyô é jowò hkanmó má, yhang lé myit bún é dông, yhang kut é hkyô shî lé, taí kyo bekô râ nghut lhê." ga taí kyo ri.

*Yesuq Lé, Yudaq Êq Ung Zô Pyâm É Hkyô*

*Mrk 14:10-11; Luk 22:3-6*

<sup>14</sup> Hau htâng, haû chángzo raxe í yuq má bo é Yudaq Iskarut ga sù gi, hkyangjong agyi pê chyáng ê mù, <sup>15</sup> "Ngò, Yesuq lé nungmoq é loq má ap byî é nghut jáng, nungmoq, ngo lé haî byi kó râ lhú?" ga myî ri. Haû mù, yhangmoq gi, yhang lé ngùn denggá sum xê chap nghap byî akô. <sup>16</sup> Haú hkûn mai, Yudaq gi, Yesuq lé ap pyám râ hkyô ho nyi bê nghut ri.

*Yhumsing É Myinzang*

*Mrk 14:12-26; Luk 22:7-23; Yhn 13:21-30*

<sup>17</sup> Múnchi a kat é Muk Zo Poî sâng-hi nyí má, haû chángzô pé gi, Yesuq chyáng lé lô kômù, "Nàng zo râ Lhoqlhai Poî zoshuq lé, ngamoq hkâmá món to râ lhú?" ga myî akô.

<sup>18</sup> Haû mù, Yhang gi, "Myuq hkaû shut wang ló mù, byù rayuq chyáng ê luî, haú yuq lé, 'Ngá é ahkyíng chyáng bê; Ngá é chángzô pé eq rahá, Ngò, náng é yhùm má Lhoqlhai Poî kut râ nghut lhê.' gâ Sará taí ri nghû, ê taí keq." ga pying kat ri. <sup>19</sup> Haû mù, haû chángzô pé gi, Yesuq pying kat é eq rajung za ê taí kômù, Lhoqlhai Poî lé món to bekô nghut ri.

<sup>20</sup> Myinhâng jé lô jáng, Yesuq gi, haû chángzo raxe í yuq eq rahá, zohpoq má zung tô ri. <sup>21</sup> Yhangmoq zô nyi bùm kô é u lé, Yesuq gi, "Ngò, nungmoq lé teng za taí kôlé, nungmoq mâ é rayuq sù gi, Ngo lé ap pyám râ nghut lhê." ga taí ri.

<sup>22</sup> Haú hkûn, yhangmoq gi, gyai gyô yón kômù, rayuq htâng rayuq, "Yhumsing ê, ngò a nghut hkaî?" ga, Yhang lé chòm myî akô.

<sup>23</sup> Haú hkûn, Yesuq gi, "Ngò eq rahá, hkoq shí má loq lap bê sù gi, Ngo lé ap pyám râ sù nghut lhê. <sup>24</sup> Haú Byu Yhangzo gi, Yhang eq séng luî kâ tô é eq rajung za, shî râ za nghut lhê. Nghut kôlhang, haû Byu Yhangzo lé ap pyâm é sù gi, dingnyé wó ri; haú yuq gi, a hku lé le lháng, je ge ri." ga dum taí kat ri.

<sup>25</sup> Hau htâng, Yhang lé ap pyám râ sù, Yudaq gi, "Rabai ê, ngò a nghut hkaî?" ga myi jáng, Yesuq gi, "Nàng nghut ri." ga tû taí kat ri.

<sup>26</sup> Yhangmoq zô nyi kô é u lé, Yesuq gi, muk lé yù mù, jeju hkya-on luî, muk lé myhik hpé mù, "Shî gi, Ngá é gungsho nghut lhê; yù mù zo keq." ga taí uchyang, Yhâng é chángzô pé lé gàm byî ri.

<sup>27</sup> Hau htâng, Yhang gi, góm lé le, yù mù, jeju hkya-on luî, yhangmoq lé byi mù, taí é gi, "Nungmoq banshoq bang, shuq keq. <sup>28</sup> Shî gi, yubak mara hkyut pyám byi râ, byù myo myô é matú htoq pyâm é, dangshikaq eq séng é Ngá sui nghut lhê. <sup>29</sup> Ngò, nungmoq lé taí kôlé, ahkuî mai gi, Ngò, Ngá Wá é mingdán má, nungmoq eq rahá tsibiyiq wing asik lé shuq é buinyi a jé jé, tsibiyiq wing lé dum shuq râ a nghut lo." ga taí ri.

<sup>30</sup> Yhangmoq gi, hkya-on mahkôn ralhùm ban hkôn jáng, Tsanlun Bùm shut htoq e ló bekô nghut ri.

*Petruq He-ngik Râ Lé, Te Taí É Hkyô*

*Mrk 14:27-31; Luk 22:31-34; Yhn 13:36-38*

<sup>31</sup> Hau htâng má, Yesuq gi, yhangmoq lé, "Nungmoq lhunglhâng bang gi, hkû-myîn yhang jáng, Ngá é yanmai, myit lingbat kó râ nghut lhê; hkâsu mù gâ le, 'Haû sau zúng sù lé, Ngò bat sat pyám mù, sau hpúng mâ é sau pé gi, lhoq pyo pyâm é hui kó râ nghut lhê.'<sup>☆</sup>

ga kâ tô ri. <sup>32</sup> Nghut kôlhang, Ngò gi, lhoq dui toq é huî htâng má, Galile mau shut, nungmoq é hí má e ló lánng râ nghut lhê." gâ ri.

☆ 26:31 Zhk 13:7



<sup>33</sup> Haú hkûn, Petruq gi, "Náng é yanmai, góbang banshoq myit lingbat kôlhang, ngò gi, hkâ-nhám le myit lingbat râ a nghut." ga tû taí ri.

<sup>34</sup> Yesuq gi, "Ngò, nang lé teng za taí lé, hkû-myîn yhang jáng, woq a tûn shimá, nàng, Ngo lé sum dâm he-ngik pyám râ nghut lhê." ga tû taí ri.

<sup>35</sup> Nghut kôlhang, Petruq gi, "Ngò, Nàng eq rahá shî râ dut kôlhang, Nang lé ngò he-ngik pyám râ a nghut." ga saí taí ri. Haú chángzô pé góbang banshoq le, haú su ga châng taí bum akô nghut ri.

*Get-samane Gâ É Jowò Má Kyûdûng É Hkyô*

*Mrk 14:32-42; Luk 22:39-46*

<sup>36</sup> Hau htâng má, Yesuq gi, Yhâng é chángzô pé eq rahá Get-samane gâ é jowò má é kômù, yhangmoq lé, "Ngò, hé má é mù, kyûdûng nyi é u lé, nungmoq shí má zùng lánq keq." ga taí ri. <sup>37</sup> Yesuq gi, Petruq eq Zebedi yhangzô nhik lé shuí chûng ri. Yhang gi, myit gyai a ngón é eq myit wui nhik hkyik dut lò bê nghut ri. <sup>38</sup> Hau htâng, Yhang gi, yhangmoq lé, "Ngò gi, shî râ í yhang myit yón nyi ri; nungmoq gi, Ngò su machyâ luí, shî má lánq nyí keq." ga taí ri.

<sup>39</sup> Yesuq gi, haú mai ratsuí zo sô ê mù, myigùng má ngóm gop to luí, "Áwa ê, wó dut é nghut le gi, góm\* shí lé, Ngá chyáng mai lhaí pyám byi laq. Nghut kôlhang, Ngò ô nau é dông a nghut, Nàng ô nau é dông sheq nghut sháng gaq." ga kyûdûng ri.

<sup>40</sup> Hau htâng, Yhang gi, Yhâng é chángzô pê chyáng dum taú lo le, yhangmoq yhup myhî to kô é lé lo myàng ri. Haú mù, Yhang gi, Petruq lé, "Nungmoq gi, hkyíng hkum rahkum za lánq, Ngò eq rahá a wó machya nyi kó lú? <sup>41</sup> Gunglaú é a hui sháng gaq, machyâ luí, kyûdûng nyi keq. Haú woi-nyí gi, kâm nyi kôlhang, gungsho gi, wum nyhôm nyi ri." ga taí ri.

<sup>42</sup> Yhang gi, radàm dum ê mù, "Áwa ê, góm shí lé, Ngò a shuq é a wó lai râ nghut jáng gi, Nàng ô nau é dông nghut sháng gaq hkoi." ga kyû dum dûng ri.

<sup>43</sup> Yhang dum taú lo le, yhangmoq gi, myoqkuq lai kô é yanmai, yhup myhî to lánq kô é lé, lo dum myàng ri. <sup>44</sup> Haú mù, Yhang gi, yhangmoq lé tô pyâm to mù, sum dâm nghû râ dâm dum ê luí, hí lé dûng é dang lé roq é dum dûng ri.

<sup>45</sup> Haú mù, Yhang gi, haú chángzô pê chyáng dum taú jé lô mù, yhangmoq lé, "Nungmoq gi, ahkuí jé shoq yhup ngón nyi ashî kó lú? Wú keq! Haú ahkyíng gi, jé bê nghut luí, haú Byu Yhangzo gi, yubak dap bâng é loq má ap pyâm é hui râ nghut bê.

<sup>46</sup> Toq keq! Ló losháng hkoi! Ngo lé ap pyám râ sù gi, jé lé bê nghut ri." ga taí ri.

*Yesuq, Chyup Yû Huí É Hkyô*

*Mrk 14:43-50; Luk 22:47-53; Yhn 18:3-12*

<sup>47</sup> Yesuq, dâng nyo nyi ashî u lé, haú chángzo raxe í yuq má bo é Yudaq gi, jé lé lo ri; haú hkyangjong agyi pé eq mingbyu é suwún wui chyáng mai nhang kat é bang nghut é, shâm eq dumbáng pé chung tô é byù moq mó le, yhang eq rahá nghut akô. <sup>48</sup> Yesuq lé ap pyám râ sù gi, haú bang lé, "Ngò, bopuq puq é sù gi, haú yuq nghut bê; Yhang lé chyup yû keq." ga kumlhá byî tô ri. <sup>49</sup> Yudaq gi, Yesuq chyáng hkyê za ê mù, "Rabai ê, wángzán nyi lhê lú?" ga taí luí, Yhang lé bopuq puq byî ri.

<sup>50</sup> Haú hkûn, Yesuq gi, "Buinùm hpó ê, nàng kut râ muzó lé kut aq hkoi." ga tû taí kat ri.

Hau htâng, yhangmoq gi, hí shut huí ê luí, Yesuq lé chôm zuí zìng mù, chyup yû bekô nghut ri. <sup>51</sup> Haú mù, Yesuq eq rahá nyi bang mâ é rayuq gi, shâm she htoq yû mù, hkyangjong mó é dui-nhâng zôshang é nohkyap lé pyoq hkyô kat byi bê nghut ri.

<sup>52</sup> Haú jáng, Yesuq gi, haú yuq lé, "Náng é shâm lé, xâng pyám aq; hkâsu mù gâ le, shâm shê sù gi, ó yuq nghut kôle, sham èq shî râ nghut lhê. <sup>53</sup> Ngò gi, Ngá Wa lé dung jáng, Yhang gi, radá dâm, maumang lagyo dap pé raxe í dap htoq myo shoq nhang kat byi râ nghut é lé, nungmoq a sé kó lú? <sup>54</sup> Nghut kôlhang, haú su nghut é nghut jáng, shí hkyô

\* 26:39 Góm gâ é gi, Yesuq, jamjau hui râ hkyô eq shî râ hkyô lé, taí nau é nghut lhê.

dut lò rã nghut lhê ga Chyúmdang pé má bò tô é hkyô gi, hkâsu wó dik lò rã lú?" ga taí kat ri.

<sup>55</sup> Hau htâng, Yhang gi, byù moq lé, "Nungmoq gi, damyaq rayuq lé chyup é su, Ngo lé chyup rã matú, shâm eq dumbáng pé chùng mù, lé lo akô lú? Ngò gi, nyí wuî, noqkuq yhûm má zùng mù, mhoqshit nyí kôlhang, nungmoq, Ngo lé a chyup yû kô é nghut lhê.

<sup>56</sup> Nghut kôlhang, shí su dut é hkyô pé banshoq gi, haû myiqhtoí pé kê tô é hkyô pé lo dik rã matú dut é nghut ri." ga taí ri. Haú hkûn, haû chángzô pé banshoq gi, Yesuq lé tô pyâm to kôluî, h pang byo byuq bekô nghut ri.

*Yudaq Byìn Tú Wapdoq Má Jep Huî É Hkyô*

*Mrk 14:53-65; Luk 22:54-55, 63-71; Yhn 18:13-14, 19-24*

<sup>57</sup> Yesuq lé chyup yu é bang gi, haû tarã sarã pé eq suwún wuî zup zing nyi é jang, hkyangjong mó Kayahpaq é yhûm má, Yhang lé shuî e akô. <sup>58</sup> Petruq gi, hkyangjong mó é yhumwàng hkaû má châng jé wâng shoq, we we mai Yesuq htâng châng tô ri. Yhang gi, hkâsu dut lò rã lé myàng naù luí, wâng hkaû má wang ê mù, zúng bang eq rahá zung tô ri.

<sup>59</sup> Haû hkyangjong agyi pé eq Yudaq byìn tú wapdoq mã é góbang gi, Yesuq lé sat pyám nhâng rã matú, a têng é saksé ho nyi akô. <sup>60</sup> A têng é saksé myo myo htoq lô kôlhang, wó sat rã î é saksé a myàng kó nghut ri.

Ló htáng má, byù í yuq gi, lé lô kô mù, <sup>61</sup> "Shí yuq gi, 'Ngò gi, haû Garai Gasâng é noqkuq yhûm lé lhoq hten pyám mù, sum nyí gyoro má dum wó sãi lhê,' ga taí sù nghut ri." ga taí akô.

<sup>62</sup> Haú hkûn, haû hkyangjong mó gi, toq yap mù, "Nàng, haí le a tũ taí luq? Shí bang, Nang lé mara hun nyi é saksé gi, hká đông nghut lhê lú?" ga, Yesuq lé myí ri. <sup>63</sup> Nghut kôlhang, Yesuq gi, jít le a ga nyi tô ri.

Haú mù, hkyangjong mó gi, Yhang lé, "Haû rũ dui nyi é Garai Gasâng é mying lé lang luí, ngò, Nang lé myí wú lé: Nàng gi, Garai Gasâng é Yhangzo, Hkrisduq nghut lhê luq, ngamoq lé taí kyô wú aq." ga taí jáng, <sup>64</sup> Yesuq gi, "Nàng taí é eq rajung za nghut lhê. Ngò, nungmoq banshoq lé taí kôlé, nungmoq gi, ahkuî mai htâng hpyang má, haû Byu Yhangzo gi, a-tsam bo dik Su é loqyo hkyam má zung tô é lé le, mhuthtui ji mù, mauhkung mai lé lo é lé le, nungmoq myàng kó rã nghut lhê." ga taí ri.

<sup>65</sup> Haú hkûn, hkyangjong mó gi, yhang é bu lé lãng cheq pyám mù, "Yhang gi, Garai Gasang lé rhoí dang taí bê nghut ri! Nga-nhúng, hai saksé rã ashí lú? Yhang, Garai Gasang lé rhoí dang taí é lé, nungmoq, ahkuî wó gyo bekô nghut lhê. <sup>66</sup> Nungmoq hkâsu wó myít akô lú?" ga myi jáng, yhangmoq gi, "Yhang gi, shí gíng sũ nghut lhê." ga tũ taí akô nghut ri.

<sup>67</sup> Hau htâng má, yhangmoq gi, Yesuq é myoqdong mã sôkan byé gyun luí, loqtsup èq htui byí akô nghut ri. Góbang gi, Yhang lé bo-pyuq pyuq byi luí, <sup>68</sup> "Hkrisduq Nàng, Nàng lé bat sũ ó yuq nghut é lé, myiqhtoí htoí wú aq." ga taí akô.

*Yesuq Lé, Petruq He-ngik Pyâm É Hkyô*

*Mrk 14:66-72; Luk 22:56-62; Yhn 18:15-18, 25-27*

<sup>69</sup> Petruq gi, wâng hkaû mã nyi tô é u lé, dui-nhâng zoshâng myhí rayuq gi, yhang chyáng lé jé mù, "Nàng le, haû Galile byù Yesuq eq rahá nyi sũ nghut ri." ga taí ri.

<sup>70</sup> Nghut kôlhang, Petruq gi, haú bang banshoq é hí mã yhang, "Nàng haí taí nyi é lé, ngò a sé." ga he kat ri.

<sup>71</sup> Hau htâng, yhang gi, wâng hkúmdong shut htoq e ló le, haú jowò mã, dui-nhâng zoshâng myhí góyuq le, yhang lé myàng mù, "Shí yuq gi, Nazaret wã byù Yesuq eq rahá nyi sũ nghut ri." ga, haú mã é bang lé taí kat ri.

<sup>72</sup> Haú hkûn, yhang gi, "Byù haú yuq lé, ngò a sé!" ga dakam é đông he pyâm ri.

<sup>73</sup> Hau htâng razup zo mã, haú jowò mã yap to bang gi, Petruq chyáng huî ê kô mù, "Nàng le, haú bang mã bò sũ yhang nghut ri; náng é danghtê lé sê gyô ri." ga taí akô.

<sup>74</sup> Haú hkûn, yhang gi, yhanggùng yhang nhing luí, "Haú yuq lé, ngò a sé." ga dakâm dang taí ri.

Haú-u yhang, woq tân bê nghut ri. <sup>75</sup> Haú mù, Petruq gi, "Woq a tân shi má, nàng, Ngo lé sum dâm he pyám rà nghut lhê." ga, Yesuq, yhang lé taí é dang lé, myit bûn kat mù, shinggan shut htoq ê luí, gyai yhang ê ngau ri.

## 27

*Yudaq Juíshi É Hkyô*

*Mrk 15:1; Luk 23:1-2; Yhn 18:28-32*

<sup>1</sup> Napsûn noq le, hkyangjong agyi pé banshoq bang eq mingbyu é suwún wuî gi, Yesuq lé sat pyám nhâng rà matú chôm myit hpyit yû bekô nghut ri. <sup>2</sup> Haú mù, yhangmoq gi, Yhang lé tuí yû luí, shuí htoq ê kômù, mauzau Pilat chyáng ê ap byî akô nghut ri.

<sup>3</sup> Yesuq lé ap pyâm é sù Yudaq gi, Yesuq lé jéyáng doqđân é hkyô lé myang sé jáng, nungngham wó mù, haú ngùn sum xê chap lé, hkyangjong agyi pé eq suwún wui chyáng ló dum taú byî ri. <sup>4</sup> Haú mù, yhang gi, "Mara a bò Su é sui lé, ngò ap pyám bê nghut é yanmai, ngò mara wó bê." ga taí jáng, yhangmoq gi, "Haú hkyô, ngamoq eq haí sêng lhê lú? Haú gi, nàng eq sheq ru sêng lhê." ga lhom taí kat akô nghut ri.

<sup>5</sup> Haú mù, Yudaq gi, ngùn haú lé, noqkuq yhúmhaú má dú pyâm to luí, htoq ló mù, yhang gûng yhang ê juíshi byuq bê nghut ri.

<sup>6</sup> Haú hkyangjong agyi pé gi, ngùn chap haú pé kui yû luí, "Shí gi, sui hpau ngùn nghut lhê yanmai, alu sidek má a ge kat." ga taí akô. <sup>7</sup> Haú mù, yhangmoq gi, tûngbaù pê é lupdùng kut rà matú, au saí zo su é maumyí lé, ngùn hau èq wui hpyit yû rà dông, chôm myit hpyit to bekô nghut ri. <sup>8</sup> Hau é yanmai, ahkuí jé shoq, haú jowò lé, sui myigùng ga myhîng tô akô nghut ri. <sup>9</sup> Haú gi, "Haú Israelaq byu pé mai, Yhang lé gù hpyit tô é ngùn sum xê chap lé, yhangmoq yû mù, haú Yhumsîng Garai, ngo lé pying tô é eq rajung za, <sup>10</sup> haú au saí zo su é maumyí lé, yhangmoq wui yû bekô nghut ri." ga myiqhtoi Yeremiaq taí tô é dang lo dik é nghut ri.

*Yesuq Lé, Pilat Myî Jep Wú É Hkyô*

*Mrk 15:2-15; Luk 23:3-5, 13-26; Yhn 18:33—19:16*

<sup>11</sup> Haú u lé, Yesuq gi, mauzau hpô é hí má yap tô é nghut mù, haú mauzau hpó gi, Yhang lé, "Nàng gi, Yudaq byu pê é hkohkâm nghut lhê lú?" ga myi jáng, Yesuq gi, "Nàng taí é eq rajung za nghut lhê." ga tû taí ri.

<sup>12</sup> Haú hkyangjong agyi pé eq suwún wuî gi, Yhang lé, mara hûn kôjáng, Yhang gi, haí le a tû taí nghut ri. <sup>13</sup> Haú hkûn, Pilat gi, Yhang lé, "Yhangmoq, Nang lé mara hûn saksé haú-í hkâm nyi kô é lé, Nàng a wó gyo lú?" ga saí myî ri. <sup>14</sup> Nghut kôlhang, Yesuq gi, dang rahkun lháng a tû taí é yanmai, haú mauzau hpó gi, gyai maú byuq bê nghut ri.

<sup>15</sup> Haú Lhoqlhai Poí u lé, mingbyû wui ô nau é má cháng luí, haú mauzau hpó gi, htóng byû rayuq yuq lé nhâng byî é htûng joq ri. <sup>16</sup> Haú u lé, a gè myîng htoq é htóng byû, Barabaq ga sù rayuq nyi ri. <sup>17</sup> Haú mù, byû moq mó zup zîng lò kô é hkûn, Pilat gi, yhangmoq lé, "Nungmoq é matú, hká yuq lé lhut byi nhâng nau akô lú? Barabaq luq? Haú a nghut jáng, Hkrisduq gâ é Yesuq lé luq?" ga myî ri. <sup>18</sup> Yhang haú su ga myî é gi, yhangmoq, Yesuq lé manôn kôluí, yhâng chyáng lé ap byi kô é hkyô lé sê é yanmai nghut ri.

<sup>19</sup> Pilat gi, tarâ jéyáng tingnyâng htoq má zung tô ashî hkûn, yhangmyi gi, "Haú mara a bò Sù lé, haí le hkâkut; hkâsu mù gâ le, hkû-nyî za lháng, yhupmoq má, haú yuq é yanmai, ngò tsómra hpuzô pyám bê nghut lhê." ga, yhâng chyáng dang pying kat ri.

<sup>20</sup> Nghut kôlhang, haú hkyangjong agyi pé eq suwún wuî gi, Barabaq lé dúng htoq yû rà eq Yesuq lé sat pyám nhâng rà matú, shiwa byu pé lé wum byi bekô nghut ri.

<sup>21</sup> Haú mauzau hpó gi, "Shí í yuq mâ é hká yuq lé, nhâng byi nhâng nau akô lú?" ga myi jáng, yhangmoq gi, "Barabaq!" ga tû taí akô nghut ri.

<sup>22</sup> Haú mù, Pilat gi, "Haú jáng gi, Hkrisduq gâ é Yesuq lé, ngò hkâsu kut rà lú?" ga dum myî kat jáng, yhangmoq banshoq bang gi, "Yhang lé tapzîng má jén sat pyám aq!" ga dum tû taí akô nghut ri.

<sup>23</sup> Nghut kôlhang, yhang gi, "Haî mù luî lhu? Yhang gi, hai mara kut shut bê lhu?" ga dum myi jáng, yhangmoq gi, htê mó èq, "Yhang lé tapzîng má jén sat pyám aq!" ga je riyhang garû lo bum akô nghut ri.

<sup>24</sup> Pilat gi, hká dông le a dat kut lô é eq byu pé gabyông lò kó râ nghut é hkyô lé myàng luî, uchyam yù mù, shiwa byu pé hí má loq chi luî, taî é gi, "Shí yuq é sui gi, ngò eq haî a séng; nungmoq eq za ru sêng lhê." gâ ri.

<sup>25</sup> Haû shiwa byù lhunglhang bang gi, "Yhâng é sui gi, ngamoq eq ngamoq é yhangzo yhangshù pé htoq má joq nyi sháng gaq." ga, dum tû taî kat akô nghut ri.

<sup>26</sup> Haû hkûn, Pilat gi, Barabaq lé nhâng byi bê nghut ri. Yesuq lé kúm gi, nhuq bat nhâng mù, tapzîng má jén sat pyám râ matú ap byî kat bê nghut ri.

#### *Yesuq Lé, Gyezô Pé Rhoi É Hkyô*

*Mrk 15:16-21; Yhn 19:2-3*

<sup>27</sup> Hau htâng, mauzau hpô é gyezô pé gi, Yesuq lé, mauzau hpô é yhumwàng mó hkaû má shuí wang ló kômù, Yhâng é lhîngkyuq má, gyedap gón lé ji tsîng tô akô.

<sup>28</sup> Yhangmoq gi, Yesuq é mebu hkyut pyám byi kôluî, zam zam ne é buhîng hut byi kômù,

<sup>29</sup> zujanmaú ralhum saî yù kôluî, Yhâng é ulhum má tsung byî akô nghut ri. Yhangmoq gi, jàm-yang rahkat lé, Yhâng é loqyo loq má kat byi kômù, Yhâng é hí má hkyihput htuq kôluî, "Yudaq byu pé é hkohkâm hpó ê! Chyung hîng xê hîng nyi sháng gaq ô!" ga, jihpoi dang taî akô. <sup>30</sup> Yhangmoq gi, Yhang lé sôkan byé gyun luî, Yhâng é loq mai jàm-yang lú yù mù, Yhâng é ulhum má dum bat bat kut akô nghut ri. <sup>31</sup> Yhangmoq gi, Yhang lé rhoi jihkyoi ban kut yù kôjáng, Yhang wut tô é buhîng lé hkyut yù kômù, Yhâng é mebu lé dum hut byi luî, tapzîng má jén sat pyám râ matú, Yhang lé shuí htoq e ló bekô nghut ri.

#### *Yesuq Lé Jén Pyâm É Hkyô*

*Mrk 15:22-32; Luk 23:27-43; Yhn 19:17-27*

<sup>32</sup> Yhangmoq htoq e ló nyi le, Kuruni myuq byû nghut é Simun ga sù lé myàng kômù, yhang lé, zik luî tapzîng waq nhang akô nghut ri. <sup>33</sup> Yhangmoq gi, Golgahta gâ é jowò má jé e ló bekô nghut ri. Golgahta gâ é lichyúm gi, ugyap joq é jowò lé gâ é nghut lhê. <sup>34</sup> Haû má jé jáng, yhangmoq gi, Yesuq lé, hkô jung eq nyhò tô é tsibiyiq wing lé byi huq akô; nghut kôlhang, Yhang gi, haû lé chyam wú mù, a shuq byi kut pyâm ri. <sup>35</sup> Yhangmoq gi, Yesuq lé tapzîng má jén tap tô é htâng, Yhâng é mebu lé lháng, hkyîn shosé shé é dông gam yu pyâm byî akô. <sup>36</sup> Hau htâng, yhangmoq gi, haû jowò má zung to mù, Yhang lé zúng nyi akô nghut ri. <sup>37</sup> Yhâng é u htoq má, "SHÍ YUQ GI, YUDAQ BYU PÊ É HKOHKÂM, YESUQ NGHUT LHÊ." ga, Yhang lé mara hun é laiká kâ tap tô akô. <sup>38</sup> Haû hkûn, Yhang eq rahá, damyaq í yuq lé le, Yhâng é loqpaî hkyam shut rayuq, loqyo hkyam shut rayuq kut, tapzîng htoq má jén tap tô akô nghut ri. <sup>39</sup> Hkyô sô laí ló é bang gi, nyhap é dông u-ngut ngut mù, taí kô é gi, <sup>40</sup> "Noqkuq yhûm lé hpoyoq pyám luî, sum nyí gyoro má dum wó saî lhê ga Sû ê! Nàng, Garai Gasâng é Yhangzo nghut le gi, Náng gûng nàng hkyi yù luî, tapzîng mai gyó lo wú aq mhaî!" ga akô nghut ri.

<sup>41</sup> Haû eq rajung za, hkyangjong agyi pé, tarâ sará pé eq suwún wuî le, Yhang lé rhoi jihkyoi kut mù, taí kô é gi, <sup>42</sup> "Shí yuq gi, góbang lé hkyi yù sù nghut kôlhang, Yhânggùng yhang gi, a wó hkyi yù nghut ri myhi-nhung! Yhang gi, Israellaq byu pé é hkohkâm nghut lhê lhà! Ngamoq wó lumjîng râ matú, Yhang, tapzîng mai gyó lo wú sháng gaq. <sup>43</sup> Yhang gi, Garai Gasang lé lumhkaû sù nghut lhê mù, Garai ô nau é sù nghut le gi, ahkuî Yhang lé hkyi yù sháng gaq; hkâsu mù gâ le, Yhang gi, 'Ngò, Garai Gasâng é Yhangzo nghut lhê.' ga taí ri." ga bum akô nghut ri. <sup>44</sup> Haû eq rajung za, Yhang eq rahá tapzîng má jén to huî é damyaq í yuq le, Yhang lé rhoi dang taî akô nghut ri.

#### *Yesuq Soqkâng Byit É Hkyô*

*Mrk 15:33-41; Luk 23:44-49; Yhn 19:28-30*

<sup>45</sup> Nyí-káng raxe í hkyíng mai myinhtâng sum hkyíng jé shoq, ramau gón mauchut tuq dut byuq bê nghut ri. <sup>46</sup> Myinhtâng sum hkyíng kô má, Yesuq gi, "Eloi, Eloi, lama

sabakhtani?" ga, htê mó èq garû kat ri. Hau é lichyúm gi, "Ngá Garai ê, Ngá Garai ê, Nàng, haí mù, Ngo lé tô pyâm tô lhê lhu?" gâ é nghut ri.✠

<sup>47</sup> Haú nâm má yap tô é bang ra-am gi, haú lé wó gyo kôjáng, "Yhang gi, myiqhtoi Eliyaq lé wut nyi ri." ga taí akô.

<sup>48</sup> Haú hkûn jáng, yhangmoq mâ é rayuq gi, din e ló mù, wuìmaù lé ê yu ri. Yhang gi, haú lé tsibiyiq wing chyîn má jum yù luí, jàm-yang má tuí tap mù, Yesuq shuq râ matú yhun byî ri. <sup>49</sup> Góbang gi, "Yhang lé, Eliyaq, lé hkyi yu lhê laq, nga-nhung chôm lánq wú sháng." ga taí akô nghut ri.

<sup>50</sup> Haú hkûn, Yesuq gi, htê mó èq dum garû kat luí, Yhâng é soqkâng byit bê nghut ri.

<sup>51</sup> Haú u lé, haú noqkuq yhûm mâ é pán-gyang gi, ahtoq mai a-ô í hkyam byáng goq byuq bê nghut ri. Myigùng le nún lô mù, luqgok pé le goq byuq bê nghut ri. <sup>52</sup> Lup pé gi, bóng lô mù, shi byuq bê é chyoiyúng bang myo myo gi, lhoq dui é hui akô. <sup>53</sup> Haú bang gi, Yesuq dum dui toq é htâng, lup mai htoq lô kômù, chyoiyúng myuq\* má wang ê luí, byù myo myô hí má htoq shit akô nghut ri.

<sup>54</sup> Shô up gyezau hpó eq, yhang eq rahá Yesuq lé zúng nyi é bang gi, layàng nún é eq dut lo é hkyô banshoq lé myàng kôjáng, gyuq dàn kômù, "Yhang gi, gè gè yhang, Garai Gasâng é Yhangzo nghut ri-nhung!" ga taí akô nghut ri.

<sup>55</sup> Myiwe wui myo myo le, we we mai wú nyi bum akô. Haú bang gi, Yesuq râ é má garúm râ matú, Galile mau mai Yhang htâng châng lé é bang nghut akô. <sup>56</sup> Haú bang má, Magadalaq wà mâ é Mariq, Yakuq eq Yose nhiktâng é yhângnu Mariq eq Zebedi é yhangzô nhiktang é yhângnú pé le bo akô nghut ri.

#### *Yesuq Lé, Myhup Pyâm É Hkyô*

*Mrk 15:42-47; Luk 23:50-56; Yhn 19:38-42*

<sup>57</sup> Myinhâng jé lô jáng, Yesuq é chángzo dut bê nghut é, sùt wó sù, Aramahti myuq byù Yosep ga sù lé lo ri. <sup>58</sup> Yhang gi, Pilat chyáng ê mù, Yesuq é gungsôm lé ê dung jáng, Pilat gi, yhang lé byi râ matú hkunmó hkyô kat bê nghut ri. <sup>59</sup> Yosep gi, gungsôm lé yù mù, pán yúng èq htup yup luí, <sup>60</sup> luqgok lé kyûng tô é, yhâng é lup sik hkaù má ê kat tô ri. Hau htâng, yhang gi, luphukum má, luqlông èq lhêng chí pyâm to luí, ló byuq bê nghut ri. <sup>61</sup> Magadalaq wà mâ é Mariq eq goyuq Mariq gi, lup hí má zung tô akô nghut ri.

#### *Lup Zúng É Hkyô*

<sup>62</sup> Haú Hên Lajang Buinyi laí é htâng nyí lé, hkyangjong agyi pé eq Hparishe pé gi, Pilat chyáng ê mù, <sup>63</sup> "Yhumsîng ê, Yhang, asak dui nyi ashî hkûn, 'Sum nyí nghû râ buinyi má, Ngò dum dui toq lô râ.' ga, haú byù mhaú taí é dang lé, ngamoq bûn nyi lhê. <sup>64</sup> Haú mù, haú sum nyí nghû râ buinyi jé shoq, lup lé rago za zúng nhang to aq. Haú a nghut jáng, Yhâng é chángzô pé, mâng lé lé hkaù yu ló mù, Yhang shi é mai dum dui toq lô bê ga, byu pé lé taí kó râ nghut lhê. Shî, ló htâng dàm mhaú é hkyô gi, sâng-hi dàm htoq je wui râ nghut lhê." ga, lé taí akô nghut ri.

<sup>65</sup> Haú hkûn, Pilat gi, "Nungmoq sê é dông, lup lé haí a dut loshoq, gyezô pé lé zúng nhang to keq." ga tû taí kat ri. <sup>66</sup> Haú mù, yhangmoq gi, ê luí, lup lé gau shoq ga, luqgok má dizik htung mù, lup zúng byû nyhi to bekô nghut ri.

## 28

#### *Dum Dui Toq Lo É Hkyô*

*Mrk 16:1-8; Luk 24:1-12; Yhn 20:1-10*

<sup>1</sup> Bánno buinyi lai jáng, rabat é sâng-hi nyí maubó zó má, Magadalaq wà mâ é Mariq eq goyuq Mariq gi, lup má é wú râ ga, e ló akô.

<sup>2</sup> Haú hkûn, layàng mó nún lo ri; hkâsu mù gâ le, Yhumsîng Garaí é maumang lagyo rayuq gi, mauhkûng mai gyó lé lô mù, lup má é luí, haú luqlong lé tu lheng mù, hau ahtoq má zung tô ri. <sup>3</sup> Yhâng é isâm gi, lhap su duqbó mù, Yhâng é mebu gi, gyo su hpyu zan tô

✠ 27:46 Hkya-on 22:1 \* 27:53 Chyoiyúng myuq gâ é gi, Yerusalem wà mó lé gâ é nghut lhê.

ri. <sup>4</sup> Zúng nyi é bang gi, yhang lé lûm wú gyuoq kômù, pyik pyik nán luí, shí gùng su dut bùm bekô nghut ri.

<sup>5</sup> Haù maumang lagyo gi, myiwe haù nhik lé, "Hkâgyuoq kó! Haù tapzîng má jén sat huí é Yesuq lé, nungnhik ho nyi kô é lé, ngò sê lhê. <sup>6</sup> Yhang gi, shí má a nyi lo; Yhang taí tô é eq rajung za, lhoq dui toq é hui bê nghut ri. Yhang lé lheq é jowò lé, lé wú keq. <sup>7</sup> Haù mù, hân taù ló luí, Yhâng é chángzô pé lé, 'Yhang, shi é mai lhoq dui toq é hui bê nghut ri; nungmoq é hí má, Galile mau shut ló lánng berâ. Nungmoq, Yhang lé, haù má ló myàng kó râ nghut lhê.' nghû ló taí kyo keq. Nungnhik lé, ngò taí é lé matsîng chûng keq." ga taí kat ri.

<sup>8</sup> Haù mù luí, myiwe myhí haù nhik gi, gyuoq kôlhang, gyai gabú é myit èq lup mai hân taù ló mù, Yhâng é chángzô pé lé ló taí kyo râ matú, din ló bê nghut ri. <sup>9</sup> Haù hkûn, Yesuq gi, radá dâm yhangnhik lé lhom tê mù, "Wángzán nyí kó sháng gaq." ga taí ri. Haù mù, yhangnhik gi, huí ê luí, Yhâng é hkyí má po zing to mù, Yhang lé noqkuq akô. <sup>10</sup> Haù hkûn, Yesuq gi, yhangnhik lé, "Hkâgyuoq kó. Ngá é gumang wui lé, Galile mau shut e ló keq nghû ló taí kyo keq; haù má, yhangmoq, Ngo lé myàng kó râ nghut lhê." ga taí kat ri.

### *Zúng Nyi É Gyezô Pé Taí É Danglù*

<sup>11</sup> Myiwe haù nhik hkyô má ru nghut nyi ashî le, lup zúng é gyezô pé ra-am gi, myuoq hkaù má wang ló mù, dut lai lo é hkyô banshoq lé, haù hkyangjong agyi pé lé ló taí kyo akô nghut ri. <sup>12</sup> Haù hkyangjong agyi pé gi, suwún wui eq huí lhum luí, hpyê lhum é htâng má, haù gyezô pé lé, ngùn myo myo tsup byi mù, <sup>13</sup> "'Myín lé, ngamoq yhup myhî tô é hkûn, Yhâng é chángzô pé lé lô mù, mâng lé, lé hkaù yu ló bekô nghut ri.' nghû taí keq. <sup>14</sup> Shí hkyô lé, haù mauzau hpó wó gyô é nghut jáng, yhang myit ngón shoq, ngamoq taí râ nghut lhê; haù hkûn, nungmoq gi, hai manghkáng a htoq râ nghut lhê." ga taí kat ri. <sup>15</sup> Haù mù, gyezô pé gi, ngùn haù pé lé yù luí, yhangmoq lé taí kat é eq rajung za kut bekô nghut ri. Haù su mù, haù hkyô gi, Yudaq byu pé má taí pyo myhîn ló bê nghut mù, ahkuí jé shoq taí nyi bum akô nghut ri.

### *Chángzô Pé Kut Râ Sasana Muzó*

*Mrk 16:14-18; Luk 24:36-49; Yhn 20:19-23; Lagyo 1:6-8*

<sup>16</sup> Hau htâng má, haù chángzo raxe rayuoq gi, yhangmoq lé, Yesuq ê nhang tô é Galile mau mâ é bùm shut e ló bekô nghut ri. <sup>17</sup> Yhangmoq gi, Yesuq lé myàng kôjáng, noqkuq akô; nghut kôlhang, ra-am gi, a dê jíng kó nghut ri. <sup>18</sup> Hau htâng, Yesuq gi, yhangmoq chyáng lé lô mù, "Mauhkûng eq myigùng htoq mâ é ahkáng ayá banshoq, Ngo lé byí to bê nghut lhê. <sup>19</sup> Haù mù, nungmoq gi, htoq ê luí, byù myû chângjup lé, Ngá é chángzô pé dut nhâng mù, haù Íwa, Yhangzo, Chyoiyúng Woi-nyí é myìng lang luí, wui-myhup hkám byi mù, <sup>20</sup> nungmoq lé, Ngò hkunmó hkyô tô é lhunglhang lé châng kut râ matú, yhangmoq lé mhoqshit keq. Ngò gi, mingkan pyat htâm é hkûn jé shoq lhang, nungmoq eq rahá ru nghut nyí râ nghut lhê." ga pying tô ri.

## MARKUQ é Gabú Danglù Laiká (The Gospel of Mark)

*Yesuq É Matú Hkyô Htong Byî É Hkyô*

*Mht 3:1-12; Luk 3:1-18; Yhn 1:19-28*

<sup>1</sup> Haû Garai Gasâng é Yhangzo, Yesuq Hkrisduq eq sêng é gabú danglù hi é hkyô gi, <sup>2</sup> haû myiqhtoi Esai-aq laiká má:

"Náng é hkyô lajang láng râ matú, Ngá é lagyo lé, Náng é hí má Ngò nhang kat râ nghut lhê." ☆

ga luî le,

<sup>3</sup> "Haû yoso má, byù rayuq garû taî é htê gi,

'Haû Yhumsing é matú, hkyô hen to keq; Yhâng é matú hkyô lhoq nyhang to keq.'" ☆

ga luî le, kê tô é eq rajung za nghut lhê. <sup>4</sup> Haû mù, Wui-myhup Sará Yohan gi, yoso hkaû má jé lé luî, wui-myhup hkâm byî nyi é eq, yubak mara hkyut pyám byî é hui râ matú myit lhîng mù, wui-myhup hkâm yù râ hkyô lé, hko kyô nyi ri. <sup>5</sup> Haû hkûn, Yuda mau jowò hkangmó mâ é bang eq Yerusalem wà mó mâ é banshoq bang gi, yhâng chyáng htoq e bum akô. Yhangmoq gi, yhumsing é mara lé yín yû kôluî, yhâng chyáng mai Yodan làng má wui-myhup hkâm yu bum akô nghut ri. <sup>6</sup> Yohan gi, gola-uq shomaú èq saî é mebu wut mù, yhâng é hpyidum má gi shokuq hpyihit hit ri; yhang gi, dinggám eq yosô byo-î pé lé zo sù nghut ri. <sup>7</sup> Yhang taî kyô é dang gi, "Ngá htoq má wum-o a-tsam je bo é sù rayuq, ngá htâng má jé lé râ nghut lhê; ngò gi, yhâng é hkyî-tsung tui lé hpyî râ lháng a gingdán é nghut lhê. <sup>8</sup> Ngò gi, nungmoq lé, wui èq za wui-myhup wó hkâm byi lhê; nghut kôlhang, Yhang gi, Chyoiyúng Woi-nyí má nungmoq lé wui-myhup hkâm byi râ nghut lhê." gâ ri.

*Yesuq, Wui-myhup Hkâm Yu É Hkyô Eq Gungláú Huî É Hkyô*

*Mht 3:13-17; 4:1-11; Luk 3:21-22; 4:1-13*

<sup>9</sup> Haû yoq má, Yesuq gi, Galile mau Nazaret wà mai lé jé mù, Yohan chyáng Yodan làng má wui-myhup hkâm yu ri. <sup>10</sup> Yesuq gi, wuî mai htoq lo é u lé, mauhkûng bóng lo é lé le, Woi-nyí gi, hpûngkyui gunghkyâng sù é dông mai, Yhang ahtoq má gyó lé lo é lé le, Yhang myang kat ri. <sup>11</sup> Haû hkûn, "Nàng gi, Ngò chyitdap é Ngá zo nghut lhê; Náng é ahtoq má Ngò gabú myit ngón nyi lhê." ga mauhkûng mai danghtê htoq lo ri.

<sup>12</sup> Haû hkûn jáng, Woi-nyí gi, Yhang lé yoso shut wang e ló nhang ri. <sup>13</sup> Haû mù, Yhang gi, yoso má myi xê nyí nyi luî, Tsadán èq gungláú é huî ri; tân jung yosô zè pé le, Yhang eq rahá nghut nyi ri; maumang lagyo pé gi, Yhang lé, lé dojaú nyi akô nghut ri.

*Sâng-hi Lhê É Chángzô Pé*

*Mht 4:12-22; Luk 4:14-15; 5:1-11*

<sup>14</sup> Yohan htóng gyó é htâng má, Yesuq gi, Galile mau má ló jé mù, <sup>15</sup> "Ahkyíng gi, jé bê; Garai Gasâng é mingdán gi, chyâng lò bê nghut ri; myit lhîng mù, haû gabú danglù lé lumjíng keq hkoi." ga luî, Garai Gasâng é gabú danglù lé hkô kyo wún ri.

<sup>16</sup> Yesuq gi, Galile nhông yàm mai sô lái ló le, Simun eq yhanggu Andre nhiktâng, nhông má gùn dú nyí kô é lé, myang ri; haû nhik gi, ngozo kóng zo su nhik nghut akô.

<sup>17</sup> Haû mù, Yesuq gi, haû nhiktâng lé, "Ngá htâng cháng keq; Ngò, nungnhik lé, byù lé châng kóng su nhik dut nhâng râ nghut lhê." ga taî ri. <sup>18</sup> Haû hkûn, yhangnhik gi, radá dâm, gùn pé lé tô pyâm to luî, Yhang htâng cháng bekô nghut ri.

<sup>19</sup> Yesuq gi, radun zo dum sô e ló é hkûn, Zebedi é yhangzo, Yakuq eq yhanggu Yohan nhiktâng, lhaî hkaû má gùn hpo nyi kô é lé, myang ri. <sup>20</sup> Haû hkûn, Yhang gi, radá dâm,

yhangnhik tâng lé wut kat jáng, yhangnhik tâng gi, yhangnhik é yhangwa Zebedi eq langchyâng pé lé, lhaî hkaû má nyhi pyâm to kôluî, Yhang htâng cháng bekô nghut ri.

*Nat Lé, Yesuq Hkat Htoq Pyâm É Hkyô*

*Luk 4:31-37*

<sup>21</sup> Yhangmoq gi, Kaperna-um wà má e akô; Bánno buinyî nyí jé jáng, Yesuq gi, tarajong má wang ê mù, mhoqshit hi lô bê nghut ri. <sup>22</sup> Shiwa byu pé kúm gi, Yhang mhoqshit é hkyô lé mauhong bum akô; hkâsu mù gâ le, Yhang gi, tarâ sará pé eq a pung é za, ahkáng ayá wó sù rayuq su, yhangmoq lé mhoqshit é yanmai nghut ri. <sup>23</sup> Haú u lé, agè ashop é nat wang júng é byù rayuq tarajong má bo lom nyî luî, wut garû kat é gi, <sup>24</sup> "Nazaret wà byù Yesuq ê, ngamoq gi, Nàng eq haî sêng lhê lhu? Ngamoq lé lhoq hten râ matú, Nàng jé lé é nghut lhê lhu? Nàng gi, Garai Gasâng é Chyoiyúng Sû nghut é lé, ngò sê lhê." gâ ri.

<sup>25</sup> Haú hkûn, Yesuq gi, "Hkâjop, yhang chyáng mai htoq lô aq." ga yhang lé tân kat ri. <sup>26</sup> Haú hkûn, agè ashop é nat haú gi, byù haú yuq lé wum kat langhtân nhâng luî, htê mó eq garu uchyang htoq lô byuq bê nghut ri.

<sup>27</sup> Shiwa byù banshoq bang gi, gyai yhang maú byuq kômù, rayuq eq rayuq, "Shí yuq é dang gi, hkasû é dang wá nghut lhê lhu? Ahko ahkáng bo é đông mhoqshit é hkyô asik nghut ri-nhung! Yhang gi, agè ashop é nat pé lé hkunmó hkyó jáng, haú bang lháng gyo byî akô nghut ri." ga luî, taî lhâm bum akô nghut ri. <sup>28</sup> Yesuq eq sêng é ludang gi, Galile mau jam shoq, yang é đông byo myín lô bê nghut ri.

*Byù Myo Myo Lé, Yesuq Lhoq Gê Byî É Hkyô*

*Mht 8:14-17; Luk 4:38-41*

<sup>29</sup> Yhangmoq gi, tarajong mai htoq luî, haú hkûn jáng, Yakuq eq Yohan nhik le mù, Simun eq Andre nhiktâng é yhâm má wang e lô bekô nghut ri. <sup>30</sup> Simûn é yhang-aumó gi, gyai yhang nò leq tô é nghut mù luî, yhangmoq gi, Yesuq lé haú yuq no é hkyô lhom taî kyô akô nghut ri. <sup>31</sup> Haú mù luî, Yesuq gi, yhang chyáng huî ê mù, yhang é loq má zui luî tu tsung ri; haú hkûn jáng, nò ge byuq luî, yhang gi, yhangmoq lé gaí tso gaí huq bê nghut ri.

<sup>32</sup> Haú nyí buiwang é htâng má, byu pé gi, no é bang eq nat gang wang júng nyi é bang banshoq lé, Yesuq chyáng shuí lé lo bum akô nghut ri. <sup>33</sup> Rawa bang, hkúmdong nàm má lé zup zing tô akô. <sup>34</sup> Haú mù, Yesuq gi, awáng nòhpyo ajung jung huî é bang myo myo lé lhoq gê byî ri; nat gang myo myo lé le, hkat htoq pyâm ri; nghut kôlháng, Yhang ó nghut é lé nat gang haú bang sé kô é yanmai, nat gang haú bang lé dang a taí nhâng nghut ri.

<sup>35</sup> Yesuq gi, htang napkyó mau lháng a bó shimá, toq mù, gaú é jowò ralhum má htoq ê luî, kyû ê dúng ri. <sup>36</sup> Simun eq yhang é luzúm wuî kúm gi, Yhang lé châng hô kômù, <sup>37</sup> Yhang lé myang hô kôjáng, "Yuq hkangmó gi, Nang lé châng hkat ho nyi akô." ga luî, taî kyô akô nghut ri.

<sup>38</sup> Haú hkûn, Yesuq gi, yhangmoq lé, "Awui ayàm mâ é wà pé má le, ngò, mungdang wó hkô râ matú ê sháng, hau é matú ngò lé é ru nghut lhê." ga tû taî ri. <sup>39</sup> Haú mù luî, Yhang gi, Galile mau ramau gón, tarajong pé má mungdang hkat hko wún é htoq agó, nat gâng pé lé le hkat htoq pyám byî wún ri.

*Manggâm Dap Sû Lé, Yesuq Lhoq Gê Byî É Hkyô*

*Mht 8:1-4; Luk 5:12-16*

<sup>40</sup> Manggâm dap é byù rayuq gi, Yesuq chyáng lé mù, hkyihput htuq luî, "Nàng dóng é nghut le gi, ngò lé Nàng wó lhoq sân-yúng byi râ nghut lhê." ga dung wut ri.

<sup>41</sup> Haú hkûn, Yesuq gi, yhang lé wú shogyo luî, loq lhâm kat mù, haú yuq lé é záng luî, "Ngò dóng lhê, sân-yúng aq hkoi." ga taî ri. <sup>42</sup> Haú hkûn jáng, manggâm ana byuq byuq luî, yhang gi, gè bê nghut ri.

<sup>43-44</sup> Yesuq gi, "Nàng, shí hkyô ó lé le hkâtaî kyo. Nghut kôlháng, náng é gungdu lé, hkyangjong hpô chyáng lô tân shit mù, nàng sân-yúng bê hkyô lé yhangmoq é matú saksé dut sháng gaq, Mosheq tarâ tô tô é eq rajung za, hkungga lô nhông byi aq." ga, yhang lé gyai yhang sidiq byi mù, radá dâm nhang kat bê nghut ri. <sup>45</sup> Nghut kôlháng,



haú yuq gi, htoq ló mù, haú hkyô lé je taí pyo myhîn ló bê nghut ri. Hau é yanmai, Yesuq gi, wà hkaú má de de a ge wang ló lo mù, shinggan mâ é chamchuyiui dut é jowò má za nyi nyi ri. Nghut kôlhang, byu pé gi, jowò hkangmó mai Yhâng chyáng ru zîng lé nyi bum ashî kó nghut ri.

## 2

### *Gùngjum Shî Sû Lé, Yesuq Lhoq Gê Byî É Hkyô*

*Mht 9:1-8; Luk 5:17-26*

<sup>1</sup> Buinyî hkâ-myháng a myáng má, Yesuq gi, Kaperna-um wà má dum wang lò jáng, Yhang yhûm dum taú jé lô bê gâ é hkyô lé, byu pé wó gyô bum akô nghut ri. <sup>2</sup> Haú mù, byù myo myo zîng lé lô kôluî, yhúmhkaú má jowò a joq lô é htoq agó, hkumtot má lhang a joq lo nghut ri; Yesuq gi, yhangmoq lé mungdang hko kyô nyi ri. <sup>3</sup> Haú hkûn, byù myi yuq gi, gùngjum shî sù rayuq lé chôm dang waq luî, Yhâng chyáng lé lo akô. <sup>4</sup> Yhangmoq gi, byù lûm myô chyîn chyap to mù, byù haú yuq lé Yesuq chyáng a wó shuí jé ê kô é yanmai, Yesuq é u htoq mâ é yhumhkûng lé dong htông yù luî, gùngjum shî sù lé taphkang eq roq hkyô kat akô nghut ri. <sup>5</sup> Yesuq gi, yhangmoq é lumjîng myit lé byu-myàng jáng, gùngjum shî sù lé, "Ngá zo ê, náng é yubak mara lé hkyut pyám byi bê." ga taí ri.

<sup>6</sup> Haú hkûn, tarâ sará pé ra-am gi, haú má zung to kôluî, yhangmoq é i-myt unghkaú má, <sup>7</sup> "Byù shí yuq gi, haí mù luî haú su gâ lhê laq? Yhang gi, Garai Gasang lé rhoi dang taí nyi ri; Garai Gasang mai lai luî, ó yuq wá mara wó hkyut byi râ lhu?" ga luî, myit sôn wú nyi bum akô nghut ri.

<sup>8</sup> Yesuq gi, yhangmoq é unghkaú má myit wú nyî kô é hkyô lé, radá dâm Yhang é myit mai sé mù, "Nungmoq é i-myt hkaú má, haí mù haú su nghû myit sôn wú nyi bum akô lhu? <sup>9</sup> Haú gùngjum shî sù lé, 'Náng é yubak mara lé hkyut pyám byi bê.' nghû taí é dang eq, 'Toq aq, náng é taphkang lé yù mù, hkyô so aq.' nghû taí râ má, hká hkun je taí lui lhê lhu? <sup>10</sup> Nghut kôlhang, haú Byu Yhangzo\* gi, mingkan htoq má, mara hkyut byi râ ahkáng wó Sù nghut é lé, nungmoq lé sé nhâng nau lhê." ga, yhangmoq lé taí kat ri. <sup>11</sup> Hau htâng, Yhang gi, haú gùngjum shî sù lé, "Ngò, nang lé taí bá, toq aq, náng é taphkang lé yu chûng luî, yhûm taú ló aq hkoi." ga taí ri. <sup>12</sup> Haú yuq gi, toq mù, yhâng é taphkang lé yu chûng luî, yhangmoq banshoq bang wú tsuq tô é myoq hí mai sô htoq ló byuq bê nghut ri. Hau é yanmai, yuq hkangmó gi, mauhong bùm kômù, "Isû é hkyô gi, hkâ-nhám lhang a myàng wú shi." ga, Garai Gasang lé hkya-on kungton bum akô nghut ri.

### *Lewiq (Mahte) Lé Wut Yu É Hkyô*

*Mht 9:9-13; Luk 5:27-32*

<sup>13</sup> Yesuq gi, nhông yàm má radàm dum htoq e ri. Haú hkûn, byù moq mó gi, Yhâng chyáng jé lé lo bùm kômù, Yhang gi, haú bang lé lhom mhoqshit nyi ri. <sup>14</sup> Yhang gi, sô yông ló nyi é hkûn, kang guq zúm má zung tô é, Alhpe yhangzo Lewiq lé myang kat luî, "Ngá htâng cháng aq." ga taí ri. Haú hkûn, Lewiq gi, toq luî, Yhang htâng cháng bê nghut ri.

<sup>15</sup> Yesuq gi, Lewiq é yhûm má myinzang ê zô nyi é hkûn, kang guq bang myo myo eq yubak dap bang le, Yhang eq Yhâng é chángzô pé eq rahá zo shuq bum akô. Hkâsu mù gâ le, Yhang htâng châng é bang gi, ajùm ayò nghut é yanmai nghut ri. <sup>16</sup> Tarâ sará nghut é Hparishe pé ra-am gi, yubak dap bang eq kang guq zo bang le mù rahá, Yesuq zang zô nyi é lé myàng kôjáng, Yhâng é chángzô pé lé, "Yhang gi, haí mù luî, kang guq bang eq yubak dap bang eq rahá zo shuq nyi lhê lhu?" ga myî bum akô nghut ri.

<sup>17</sup> Haú su ga myi kô é lé Yesuq wó gyo jáng, Yhang gi, yhangmoq lé, "Wángzán bang gi, chi sará a ra kó, nòhpyo hui bang za sheq ru râ lhê. Haú eq rajung za, Ngò gi, dingmán bang lé wut yù râ matú jé lé é a nghut, yubak dap bang lé ji yù râ matú sheq jé lé é ru nghut lhê." ga taí kat ri.

\* 2:10 Byu Yhangzo gâ é gi, Yesuq Yhânggùng yhang lé le taí é nghut lhê, Mesaia lé le taí é nghut lhê.

*Zoshuq Gám É Eq Sêng É Hkyô**Mht 9:14-17; Luk 5:33-39*

<sup>18</sup> Yohan é chángzô pé eq Hparishe pé gi, zoshuq gám nyi akô nghut ri. Haû mù, ra-am gi, Yesuq chyáng jé lé kômù, "Wui-myhup Sará Yohan é chángzô pé eq Hparishe pé é chángzô pé gi, zoshuq gám akô; nghut kôlhang, náng é chángzô pé gi, haû mù a gám kô é lhu?" ga luí, myí akô nghut ri.

<sup>19</sup> Haû hkûn, Yesuq tâi é gi, "Bíng pé gi, lusik eq rahá nghut nyi tô ashî hkûn, zoshuq hkâsu wó gám râ lhu? Yhangmoq gi, lusik eq rahá nghut nyi é u lé, zoshuq gám kó râ a nghut. <sup>20</sup> Nghut kôlhang, lusik lé yhangmoq chyáng mai shuí yu pyâm é hkyíng jé râ nghut lhê; haû buinyi pé má kúm gi, yhangmoq, zoshuq gám kó râ nghut lhê.

<sup>21</sup> Ó yuq le, mebu xau má pán sik èq a lhaq hpo wú kó; haû su kut é nghut jáng, pán sik gi, kun byuq mù, mebu xau le je lhoq cheq pyám râ nghut lhê. <sup>22</sup> Haû eq rajung za, tsibiyiq wing asik lé le, shokuq htûng axau má ó a kat wú kó. Kat é nghut jáng, tsibiyiq wing asik gi, htûng lé lhoq buq goq nhâng luí, tsibiyiq wing eq shokuq htûng htên byuq râ nghut lhê. Haû mù, tsibiyiq wing asik gi, shokuq htûng sik má za ge kat é nghut lhê.

*Bánno Buinyi É Yhumsîng**Mht 12:1-14; Luk 6:1-11*

<sup>23</sup> Bánno buinyi ra-nyí má, Yesuq gi, Yhâng é chángzô pé eq rahá yò hkaû mai sô lai ló é hkûn, Yhâng é chángzô pé gi, kyôshi ratsuí langshap yu akô nghut ri. <sup>24</sup> Haû mù, Hparishe pé gi, Yesuq lé, "Wú aq, Bánno buinyi má a ge kut jung lé, haû mù, náng é chángzô pé kut nyi akô lhu?" ga tâi akô.

<sup>25</sup> Haû hkûn, Yesuq gi, yhangmoq lé, "Dawiq lháng gi, yhâng htâng châng é bang eq rahá zòmut hui luí, zoshuq râ tô é hkûn, hkâsu kut é hkyô lé, nungmoq hkâ-nhám le a nghap wú kó lhu? <sup>26</sup> Abiahta, hkyangjong mó kut nyi é u lé, Dawiq gi, Garai Gasâng é yhúmhkaû má wang ê mù, hkyangjong pé mai lai luí, ó le a ge zô é, kyâng tô é muk lé yu zo mù, yhang htâng châng é bang lé le ratsuí tsuí byi tso é nghut lhê." ga tâi ri.

<sup>27</sup> Hau htâng, Yhang gi, yhangmoq lé, "Bánno buinyi gi, byù é matú kut tô é nghut lhê; byù gi, Bánno buinyi é matú a nghut. <sup>28</sup> Haû mù, haû Byu Yhangzo gi, haû Bánno buinyi é Yhumsîng lháng nghut lhê." ga xoq tâi ri.

## 3

<sup>1</sup> Yesuq gi, tarajong má radàm dum wang e le, loq raloq ajum shi byuq é byù rayuq nyi to lág ri. <sup>2</sup> Haû hkûn, haû má nyi tô é bang ra-am gi, Bánno buinyi má, Yesuq mai haû yuq lé lhoq gê byi râ lhu ga, mara hûn râ matú gyám wú nyi akô nghut ri. <sup>3</sup> Yesuq gi, haû loq jum shî sù lé, "Banshoq bâng é hí má, toq yap shit aq." ga tâi kat ri.

<sup>4</sup> Hau htâng, Yhang gi, haû má nyi tô é bang lé, "Bánno buinyi má, ge é muzó kut râ, a ge é muzó kut râ, byù asak hkyî râ eq byù sat râ hkyô pé má, hká lhum kut le sheq tarâ wang lhê lhu?" ga myí kat jáng, yhangmoq kúm gi, jit le a ga kó nghut ri.

<sup>5</sup> Haû mù, Yhang gi, nhik-yô nau é myit èq haû bang lé lhîng wú mù, yhangmoq myit htan é hkyô lé, wú yón luí, haû loq jum shî sù lé, "Náng é loq nyhang kat aq." ga tâi kat jáng, haû yuq gi, loq nyhang kat luí, yhâng é loq gi, shoq za ge byuq bê nghut ri. <sup>6</sup> Hau htâng má, Hparishe pé gi, htoq ló kômù, Yesuq lé hkâsu kut wó sat pyám râ hkyô lé, Herut é byu pé eq chôm hpyê lhûm bum akô nghut ri.

*Byù Ajùm Ayò, Yesuq Htâng Cháng Kô É Hkyô*

<sup>7</sup> Yesuq gi, Yhâng é chángzô pé eq rahá, nhông shut dum e ló le, Galile mau mâ é byù ajùm ayò gi, Yhang htâng châng e ló bum akô nghut ri. <sup>8</sup> Hau htoq agó, Yuda mau mâ é bang, Yerusalem wà mó mâ é bang, Idumia mau mâ é bang, Yodan làng hé hpoq mâ é bang, Turuq myuq eq Sidun myuq awui ayàm jé shoq mâ é bang, ajùm ayò gi, Yhang kut nyi é hkyô banshoq lé wó gyo kôjáng, Yhâng chyáng jé lé bum akô nghut ri. <sup>9-10</sup> Yesuq gi, byù myo myo lé lhoq gê byí é yanmai, nõhpyo hui to bang gi, Yhang lé wó záng shoq ga, chyîn chyap wang ló bum akô. Byù lûm myo luí, Yesuq gi, Yhang lé a nhê pyet pyám

sháng gaq ga, Yhâng é chángzô pé lé lhaî ralhumm hen to nhang ri. <sup>11</sup> Agè ashop é nat pé gi, Yhang lé myàng hkgangmó, Yhâng é hí má lêng ngop to luî, "Nàng gi, Garai Gasâng é Yhangzo nghut ri." ga luî, taî garû akô. <sup>12</sup> Nghut kôlhang, Yesuq gi, Yhang ó yuq nghut é hkyô lé a taî byông htoq râ matú, tân hkúm kat ri.

*Lagyo Kut Râ Byù Raxe Í Yuq Hkyin Yu É Hkyô*

*Mht 10:1-4; Luk 6:12-16*

<sup>13</sup> Yesuq gi, bùm shut doq ló mù, Yhang ô nau é bang lé ji kat luî, haú bang gi, Yhâng chyáng jé lé lo bum akô nghut ri. <sup>14</sup> Haú hkûn, Yesuq gi, byù raxe í yuq lé hkyin yù luî, lagyo ayá byî ri; haú bang gi, Yhang eq rahá nyî râ matú le, mungdang hkô râ matú Yhang nhang htoq kat râ eq, <sup>15</sup> nat gâng pé lé hkat htoq râ ahko ahkáng wó râ matú le, nghut akô nghut ri. <sup>16</sup> Haú raxe í yuq gi, Simun (Yesuq mai Petruq ga myìng myhíng byi sù); <sup>17</sup> Zebedi é yhangzô nhiktâng Yakuq eq yhanggu Yohan (Yháng nhiktâng lé Yesuq mai Buanerga ga myìng myhíng byi ri; hau é lichyúm gi, maugum zô nhik gâ é nghut lhê.); <sup>18</sup> Andre, Hpilip, Barhtolume, Mahte, Htomaq, Alhpe é yhangzo Yakuq, Htade, Zelutuq\* dut é Simun eq, <sup>19</sup> Yhang lé ap pyám râ sù, Yudaq Iskarut pé nghut akô.

*Yesuq Eq Bezebulaq*

*Mht 12:22-32; Luk 11:14-23; 12:10*

<sup>20</sup> Hau htâng, Yesuq gi, yhûm má wang ló le, byù ajùm ayò dum zîng lé lô kômù, Yhang eq Yhang é chángzô pé gi, zang zo hkyíng lháng a wó kó nghut ri. <sup>21</sup> Yhâng é yhumbyù wuî gi, haú hkyô lé wó gyo kôjáng, "Yhang, myit a gyíng lo nghut ri." ga luî, Yhang lé hung shuî yù râ matú, e akô nghut ri.

<sup>22</sup> Yerusalem wà mó mai gyó lé lo é tarâ sará pé gi, "Shí yuq gi, Bezebulaq gâ é nat gâng pé é zau lúng sù nghut ri-nhung! Yhang gi, nat zaú é wum-o a-tsam eq za, nat gâng pé lé hkat htoq pyâm é nghut ri." ga taî bum akô nghut ri.

<sup>23</sup> Haú mù luî, Yesuq, yhangmoq lé wut yù mù, dangtú dong taî é gi, "Tsadán gi, Tsadán lé hkâsu kut wó hkat htoq râ lú? <sup>24</sup> Mingdán ralhumm gi, ahkaú má byoq gâng lhûm nyî kô é nghut jáng, mingdán haú wó gîng nyî râ a nghut. <sup>25</sup> Yhumhtu ralhumm má le, ikun byù yhangchang byoq gâng lhûm nyî é nghut le gi, yhumhtu haú wó gîng nyî râ a nghut. <sup>26</sup> Haú eq rajung za, Tsadán le, yhânggùng yhang lhoq hpyoq luî, gam hkoq nyi é nghut le gi, yhang wó nyi nyî râ a nghut, htûm byuq râ za nghut lhê. <sup>27</sup> Ó yuq nghut kôle, wum-o bò sù lé hí tui zing pyâm é a nghut le gi, yhâng é yhûm má lú wâng mù, yhâng é sutzè lé wó lú yù râ a nghut: Haú yuq lé hí tuî zing pyám jáng sheq, yhâng é sutzè lé wó lú yù râ nghut lhê. <sup>28</sup> Ngò, nungmoq lé teng za taî kôlé, byu pé kut shut é mara banshoq eq rhoî dang taî pyâm é pé lé gi, mara wó hkyut pyám byî lhê. <sup>29</sup> Nghut kôlhang, haú Chyoiyúng Woi-nyí lé rhoî dang taî pyâm é sù gi, hkâ-nhám le, mara hkyut byî é wó hui râ a nghut; haú yuq gi, ahtum abyuq yubak wó sù nghut nyi ri." gâ ri.

<sup>30</sup> Yhang haú su ga taî é gi, yhangmoq mai, "Yhang gi, agè ashop é nat wó sù nghut ri." ga kô é yanmai nghut ri.

*Yesuq É Yhângnu Eq Yhanggu Pé*

*Mht 12:46-50; Luk 8:19-21*

<sup>31</sup> Hau htâng, Yesuq é yhângnu eq yhanggu pé gi, jé lé mù, yhûm hkun má yap to kôluî, Yesuq htoq lô râ matú, byù rayuq lé wang taî nhang akô nghut ri. <sup>32</sup> Byù ajùm ayò gi, Yhâng é lhîngkyuq má zung tô akô; haú bang gi, Yhang lé, "Wú aq, náng nu eq nunggu pé gi, nang lé hui naú luî, shinggan má lág bum akô." ga taî kyô akô nghut ri.

<sup>33</sup> Haú hkûn, Yhang gi, "Ô pé gi, Ngá nu eq Ngá gu pé nghut akô lú?" ga myi kat ri.

<sup>34</sup> Hau htâng, Yhang gi, Yhâng é lhîngkyuq má zung hkyuq tô é bang lé wú mù, taî é gi, "Shí bang gi, Ngá nu eq Ngá é gumang wuî nghut bê! <sup>35</sup> Garai Gasang ô nau é hkyô châng é sù ó yuq nghut kôle, Ngá gu, Ngá mang, Ngá nhá, Ngá nu chyat nghut bê." gâ ri.

\* 3:18 Zelutuq gâ é lichyúm gi, yhumsîng zui saî é hkyô má gyai yhang myit lòm shirong é sù lé gâ lhê. Haú u lé, Israelaq byu pé gi, mingdán luthkyô wó râ matú shikut nyi é hpúng bang lé, Zelutuq gâ lhê.

## 4

*Kyôshi Sân É Dangtú**Mht 13:1-23; Luk 8:4-15*

<sup>1</sup> Yesuq gi, nhông yàm má radàm dum mhoqshit hi ló bê nghut ri. Haú hkûn, Yhang é lhinghkyuq má byù moq mó lûm yán zîng lé lo bùm kô é yanmai, Yhang gi, nhông hkaû mâ é lhai má wang zung tô ri; haú u lé, byù moq mó gi, nhông yàm gin-gau htoq má nyi míng bum akô nghut ri. <sup>2</sup> Yhang gi, haú bang lé, dangtú pé dông myo myo mhoqshit byî nyi ri; Yhang mhoqshit é má, <sup>3</sup> "Gyo wú keq! Kyô hkyó sù rayuq gi, kyôshi san râ gâ htoq e ló ri. <sup>4</sup> Yhang, kyôshi sân kat é hkûn, ra-am gi, hkyô má gyó ang mù, nghoq pê èq lé hte zô pyám ri. <sup>5</sup> Ra-am gi, myi-tse a htu é luqgok yò pé má gyó ang mù, myi-tse a htu é yanmai, lui za yuq htoq ló kôle, <sup>6</sup> amyit a wó chîn hing é nghut mù, bui htoq lô jáng, lhap kyuy pyám bê nghut ri. <sup>7</sup> Dum ra-am gi, zugyóm hkaû má gyó ang lui, zubyap haú pé kô lò mù, wup pyâm é yanmai, ashi a wó zui nghut ri. <sup>8</sup> Nghut kôlhang, ra-am gi, myìhpún bo é jang má gyó âng é yanmai, yuq kô lò mù, ashi sum xê tú, hkyuq xê tú, rashô tú lhang, zui myô lo é nghut ri." gâ ri.

<sup>9</sup> Hau htâng, Yesuq dum taí é gi, "Gyo yù râ nohkyap dap sù gi, gyô yù sháng gaq." gâ ri.

<sup>10</sup> Yhang baú za nghut nyi é hkûn, haú lagyo raxe í yuq eq Yhang nàm má nyi tô é bang gi, dangtú haú eq sêng é hkyô lé, lé myí akô. <sup>11</sup> Haú hkûn, Yhang, yhangmoq lé taí kyô é gi, "Garai Gasâng é mingdán eq sêng é sê gyo wuí é hkyô lé sé gyo râ ahko ahkáng, nungmoq lé byî to lugù nghut bê. Nghut kôlhang, góbâng é matú gi, jung hkangmó lé dangtú dông chyat taí é nghut lhê. <sup>12</sup> Haú mù lui,

'Yhangmoq gi, myang nyi kôlhang, a wú sé kó, gyô nyi kôlhang, a sê gyo kó; sé wú sê gyo kô é ru nghut le gi, lhing taú lò mù, mara hkyut pyám byî é hui kó râ nghut lhê!'<sup>☆</sup>  
gâ ri." ga tô ri.

<sup>13</sup> Hau htâng, Yhang, yhangmoq lé dum xoq taí é gi, "Nungmoq, dangtú shî lé a sê gyo kô é nghut le gi, gotú dangtú pé lé hkâsu kut ung sê gyo kó râ lú? <sup>14</sup> Yò mù zui sù san kat é kyôshi gi, mungdang nghut lhê. <sup>15</sup> Byù ra-am gi, hkyô má gyó âng é kyôshi eq wuí akô; yhangmoq gi, mungdang lé wó gyô yu é hkûn yhang, Tsadán gi, lé mù, yhangmoq chyáng mâ é mungdang lé lé yù pyám byî ri. <sup>16</sup> Ra-am gi, luqgok yò pé má gyó âng é kyôshi eq wuí akô; yhangmoq gi, mungdang lé wó gyo jáng, radá dâm gabú myit èq hap yù akô. <sup>17</sup> Nghut kôlhang, yhangmoq gi, amyit a wó chîn é yanmai, razup zo za yuq kômù, mungdang é yanmai, wuìhke é eq zing-rî é pé hui kôjáng, hân hân htak ló byuq kó râ nghut lhê. <sup>18</sup> Dum ra-am nghut jáng, zugyóm hkaû má gyó âng é kyôshi eq wuí akô; yhangmoq gi, mungdang lé wó gyô yù kôlhang, <sup>19</sup> shí ipyat lhê é myit wui myit hke hkyô, hkyô shuí nghoq jung ngùn hing zèhkoq eq gotú zè pé lé ô nau é hkyô pé, yhangmoq chyáng wang lò jáng, haú mungdang lé hup pyâm é yanmai, ashi a wó zui dut kó râ nghut lhê. <sup>20</sup> Ra-am kúm gi, myìhpún bo é jang má gyó âng é kyôshi eq wuí akô; yhangmoq gi, haú mungdang lé gyô yù mù, lhom yù lui, sân kat é htoq sum xê tú, hkyuq xê tú, rashô tú lhang myo shoq ashi zui lò kó râ nghut lhê." gâ ri.

*Myibung Htûn É Hkyô**Luk 8:16-18*

<sup>21</sup> Yesuq, yhangmoq lé xoq taí é gi, "Nungmoq gi, myibung lé yù mù, tsungjang má a tsung e za, mûng èq nghop tô é, a nghut jáng, yhupchong ô má tsung tô é, ó yuq wá kut wú akô lú? <sup>22</sup> Hkâsu mù gâ le, haq tô é zè hái jung le htoq ze lò râ eq, zaú tô é pé hái jung le byông htoq lô râ nghut lhê. <sup>23</sup> Gyô yù râ nohkyap dap sù ó yuq nghut kôle, gyô yù sháng gaq." gâ ri.

<sup>24</sup> Hau htoq agó, Yhang dum taí é gi, "Nungmoq gi, wó gyô yu é hkyô lé rago myit wú keq; nungmoq lik byî é bung èq, nungmoq lé dum lik byi râ nghut lhê; hau htoq lhang

<sup>☆</sup> 4:12 Esai 6:9-10

myo shoq wó kó râ nghut lhê. <sup>25</sup> Hkâsu mù gâ le, wó to sù lé gi, jat byi shirâ, a wó su chyáng mai kúm gi, yhang wó tô é lé lháng yu pyám byi shirâ nghut lhê." gâ ri.

*Kyôshi Yuq Kô Lo É Dangtú*

<sup>26</sup> Hau htâng, Yhang dum xoq taí é gi, "Garai Gasâng é mingdán gi, byù rayuq mai, myigùng má sên kat é kyôshi eq wuí ri. <sup>27</sup> Byù haú yuq gi, myín lé yhup tô é nghut nghut, nyí lé toq lo é nghut nghut, kyôshi gi, zuí htoq lô mù, yuq kô lo nyi ri; nghut kôlháng, yhang gi, hkâsu kut yuq lo nyi é hkyô lé a sé nghut ri. <sup>28</sup> Myigùng gi, yhang baú yhang, kyôshi lé, sâng-hi má abum bum nhâng, hau htâng má a-nhâm htoq nhâng mù luí, ashi zui shoq kut é nghut lhê. <sup>29</sup> Kyôshi myhíng jáng, kyô shu yoq jé bê nghut é yanmai, yhang gi, zaiyik èq yâm yù râ nghut lhê." gâ ri.

*Angshi Cham Lé Dangtú Yu É Hkyô*

*Mht 13:31-32; Luk 13:18-19*

<sup>30</sup> Yesuq dum xoq taí é gi, "Garai Gasâng é mingdán lé, hai èq lhoq whuí wú râ lhú? Haí jung dangtú yù mù, shit wú râ lhú? <sup>31</sup> Garai Gasâng é mingdán gi, angshi cham eq wuí ri. Angshi cham haú gi, myigùng má hô é kyômyui jí pé má je tiq é nghut lhê. <sup>32</sup> Nghut kôlháng, ho mù, yuq kô lô jáng, xun hkyâm má hô é mhan-haq hpoqnoq gàm banshoq htoq má je kô é agàm dut lò mù, akoq kô lò luí, hau é buishûm hkaú má, maulat nghoq zô pé lé wó zung nô nyi é nghut lhê." gâ ri.

<sup>33</sup> Haú sù é dangtú myo myo dông mai, Yesuq gi, yhangmoq wó sê gyô é myhó, mungdang hko kyô nyi ri. <sup>34</sup> Yhang gi, yhangmoq lé, dangtú a bo é haí lháng a taí wú nghut ri; nghut kôlháng, Yhang eq chángzô pé baú nghut nyi é hkûn kúm gi, jung hkgangmó é lichyúm lé taí sên kyô ri.

*Laidun Mó Lé, Yesuq Lhoq Zîm Pyâm É Hkyô*

*Mht 8:23-27; Luk 8:22-25*

<sup>35</sup> Haú nyí, myinhtâng lé, Yesuq gi, Yhâng é chángzô pé lé, "Nga-nhúng nhông hé hpoq shut dap e ló sháng." ga taí ri. <sup>36</sup> Haú hkûn, chángzô pé gi, byù moq mó lé nyhi pyâm to luí, Yhang zung tô é lhaí mai yhang, Yhang lé shuí gû dap ló bekô; gotû lhaí pé le, yhangmoq eq rahá bo gû dap ló akô nghut ri. <sup>37</sup> Haú u lé, laidun mó jé lô mù, wuìlhêng hta toq lô luí, lhaí má lo bat hâng é yanmai, wui byíng lô bê nghut ri. <sup>38</sup> Haú hkûn, Yesuq gi, lhaí htâng má uhkuq hkuq mù yhup myhî tô ri; haú chángzô pé gi, Yhang lé nhaú pun luí "Sarâ ê, nga-nhúng myup shi ló râ dut é lé, nàng a chiq byi lhú?" ga taí akô nghut ri.

<sup>39</sup> Yesuq gi, toq mù, laidun lé tan luí, wuìlhêng lé, "Zim aq." ga taí kat jáng, haú laidun num ló byuq luí, banshoq zîm byuq bê nghut ri.

<sup>40</sup> Hau htâng, Yhang gi, Yhâng é chángzô pé lé, "Haí mù, haú-í gyuq bum akô lhú? Nungmoq gi, lumjíng myit a bò shi kó lhú?" ga taí ri.

<sup>41</sup> Yhangmoq gi, gyai yhang gyuq dan bùm kômù, "Shí yuq gi, hkasú é byù nghut lhê là? Làì eq wuìlhêng pé lháng gi, Yhâng é dang lé gyo byi ri-nhung!" ga luí, rayuq eq rayuq myí lhùm bum akô nghut ri.

5

*Nat Gang Hkat Htoq Pyâm É Hkyô*

*Mht 8:28-34; Luk 8:26-39*

<sup>1</sup> Yhangmoq gi, nhông hé hpoq mâ é Gerase byu pé é mau má jé dap e ló akô. <sup>2</sup> Yesuq lhaí mai htoq ló é hkûn, agè ashop é nat wang júng é byù rayuq gi, lupdùng mai htoq lé lô mù, Yhang lé lhom huí ri. <sup>3</sup> Haú yuq gi, lupdùng má za nyi é sù nghut ri; yhang lé, ó yuq èq le, shamtoq-tuí èq lháng a wó tuí zing wú kó nghut ri. <sup>4</sup> Hkâsu mù gâ le, adàm dàm, yhâng é loq eq hkyî má shamtoq-tuí èq tuí tô wú kôlháng, yhang gi, loq mâ é shamtoq-tuí pé lé lêng hpyit pyám pyám kut mù, hkyî mâ é shamtoq kyum lé lhoq hkyop pyám pyám kut ri. Yhang lé, ó yuq èq le a wó hkuq yù kó nghut ri. <sup>5</sup> Yhang gi, nyí myín aga lupdùng eq bùm pé má puk garu uchyang, yhumsing gùng lé luqgok èq dùn cheq wún ri.

<sup>6</sup> Yhang gi, Yesuq lé, we mai myang kat jáng, din e ló mù, Yhâng é hí má hkyihput htuoq ngop luí, <sup>7</sup> htê mó èq, "Myhang htâng é Garaí Yhangzo Yesuq ê! Nàng gi, ngò eq haí sêng lè lú? Nàng gi, ngo lé a zing-ri rã matú, Garaí Gasâng hí má danggidiq byi laq." ga taí garú ri. <sup>8</sup> Haí mù gã le, Yesuq gi, yhang lé, "Agè ashop é nat nàng è, byù shí yuq chyáng mai htoq ló aq." ga taí kat é yanmai nghut ri.

<sup>9</sup> Hau htâng, Yesuq gi, "Náng myîng haí gã lè?" ga, yhang lé myi jáng, yhang gi, "Ngamoq gi, myo myo nghut é yanmai, Legio gã lè." ga tũ taí ri. <sup>10</sup> Hau htâng, yhang gi, haú jowò mai yhangmoq lé a kôn pyám rã matú, Yesuq lé dum dung dung kut nyi ri.

<sup>11</sup> Haú u lé, waq rajùm mó gi, bùm yàm má dũ but zô nyi bum akô nghut ri. <sup>12</sup> Haú mù luí, nat gâng pé gi, "Ngamoq lé, waq pè chyáng nhang kat luí, yhangmoq chyáng wàng nhâng laq." ga luí, Yesuq lé dung akô. <sup>13</sup> Haú hkũn, Yesuq gi, yhangmoq lé ahkáng byí kat jáng, haú agè ashop é nat pé gi, haú yuq chyáng mai htoq ló kôluí, waq pè chyáng wang ló byuq bekô nghut ri. Haú mù, haú í hkyîng kô bo é waq hpúng gi, gampyoq mai nhông hkaú shut rut din yán wang ló kôluí, myup shi byuq bekô nghut ri.

<sup>14</sup> Waq zúng bang gi, hfang din wang ló kômù, myuq hkaú mã é bang eq awui ayàm mã é bang lé, haú hkyô ló shit kyo kô é yanmai, byù haú bang gi, dut laí lò bê hkyô lé, è htoq wú akô nghut ri. <sup>15</sup> Yhangmoq gi, Yesuq chyáng jé lé kô é hkũn, nat gang myo myo wang júng wú é sũ, mebu wut luí, byù gè rayuq su zung to lánng é lé myàng kômù, gyuq dan bùm bekô nghut ri. <sup>16</sup> Haú hkyô lé myang é bang gi, nat gâng pé wang júng sũ eq waq pè chyáng hkãsu dut é hkyô, góbang lé taí kyo akô nghut ri. <sup>17</sup> Hau htâng, byu pé gi, Yesuq lé yhangmoq é mau mai htoq ló byuq rã matú, chôm dũng tôngbán akô nghut ri.

<sup>18</sup> Yesuq lhaí hkaú mã wang ló é u lé, haú nat gâng pé wang júng laí lò bê sũ gi, Yesuq htâng cháng rã matú, Yesuq lé dung tôngbán ri. <sup>19</sup> Nghut kôlhang, Yesuq gi, yhang lé ahkáng a byi e za, "Nàng, yhũm shut sheq ló mù, haú Yhumsîng, nang lé hkã-í kut byi bê hkyô eq hkãsu kut shogyo nhikmyin yu é hkyô lé, náng é yhumbyù buinùm ji-myi wui lé ló taí kyo aq." ga taí kat ri. <sup>20</sup> Haú mù, byù haú yuq gi, ló luí, yhang lé Yesuq hkã-í kut byi bê hkyô lé, Dekapoli\* mau bang lé ló taí kyô ri. Haú hkũn, wó gyô é bang banshoq gi, mauhong bum akô nghut ri.

*Shi Byuq Bê Myiwe Zo Eq No É Myiwe Myhi Rayuq É Hkyô*

*Mht 9:18-26; Luk 8:40-56*

<sup>21</sup> Yesuq gi, lhaí ji mù, nhông he hpoq shut dum dap jé ló mù, Yhang, nhông yàm mã nyi tô é u lé, byù ajùm ayò gi, Yhâng é lhîngkhyuq mã lé zîng bum akô nghut ri; <sup>22</sup> haú hkũn, Ya-iruoq gã é, tarajong mã up bang mã é rayuq gi, haú mã lé luí, Yesuq lé myang kat jáng, Yhâng é hkyî wang mã paí gop to mù, <sup>23</sup> "Ngá zo byizo gi, kâng byit ló nyi ri; yhang ge lò mù asak dum duì shi sháng gaq, nàng lé mù, yhâng é ahtoq mã loq lé ke byi laq." ga, wum kat dũng tôngbán nyi ri. <sup>24</sup> Haú mù, Yesuq gi, haú yuq htâng cháng e ló ri; byù ajùm ayò le, Yhâng é awui ayàm mã châng chyîn chyap wún bum akô.

<sup>25</sup> Haú hkũn, raxe í zãn suí yui nyi é myiwe myhí rayuq le haú hpúng mã bo tô ri. <sup>26</sup> Yhang gi, chi sará myo myô pè chyáng yhang wó é ngunzè banshoq lhoq pán mù, nò hkãm luí yã wú kôlhang, ge é hkyô a joq é htoq agó, je lháng wuîhke lò ri. <sup>27</sup> Yhang gi, Yesuq é hkyô lé wó gyo jáng, byù hpúng mai Yesuq é nunghtáng mã huí lé mù, Yhâng é bu mã è záng kat ri. <sup>28</sup> Haí mù luí gã le, yhang gi, "Ngò, Yhang é bu mã za lháng è wó záng é nghut le gi, ge byuq rã nghut lè." ga wó myit é yanmai, haú su kut é nghut ri. <sup>29</sup> Haú hkũn jáng, yhâng chyáng suí yui é kãn byuq luí, yhang gi, hpuzô nyi é mai wó lut bê hkyô lé, yhânggùng mã sê gyô kat bê nghut ri.

<sup>30</sup> Yesuq gi, Yhâng é gùng mai hpungwup a-tsam htoq ló é lé, radá dãm châng sê kat luí, byù moq mó shut lhing wú mù, "Ngá é bu mã ó yuq záng bê lú?" ga myi kat ri.

<sup>31</sup> Haú hkũn, Yhâng é chángzô pé gi, "Náng é lhîngkhyuq mã byù ajùm ayò chyîn chyap nyi é lé, myang to luí nhîng, 'Ngo lé, ó yuq záng bê lú?' nghũ myi lè lú?" ga tũ taí kat akô.

\* 5:20 Dekapoli gã é gi, Grik dõng myuq raxê lé gã lè.

<sup>32</sup> Nghut kôlhang, Yesuq gi, Yhang lé lé záng sù lé myàng râ matú, ho lhing wú nyi ashî nghut ri. <sup>33</sup> Haú hkûn, myiwe myhí haú gi, yhâng chyáng hkâsu dut lai lò bê hkyô lé sê é yanmai, Yesuq é hí má lé mù, gyuq nán é èq Yhang é hkyî wang má ngóm gop to luí, yhâng chyáng dut lai lò bê hkyô banshoq lé tai kyô ri. <sup>34</sup> Haú mù, Yesuq gi, myiwe myhí haú lé, "Byizo ê, náng é lumjínng myit gi, náng lé lhoq gê byi bê nghut ri; náng é nõhpyo ge byuq bê nghut ri; ngón za ló aq hkoi!" ga tai ri.

<sup>35</sup> Yesuq gi, dang ru tai nyi ashî hkûn, tarajong má up sù Ya-iruoq é yhûm mai byù ra-am jé lé mù, "Nang é byizo gi, shi byuq bê; haí mù luí, haú sará lé lhoq hkyik nyi lhê thú?" ga luí, lé tai kat akô.

<sup>36</sup> Yesuq gi, haú bang tai é dang lé gyô lhai pyám mù, "Hkâgyuq, za lumjínng aq." ga, haú tarajong má up sù lé tai kat ri.

<sup>37</sup> Hau htâng, Yhang gi, Petruq, Yakuq eq Yakuq é yhanggu Yohan pé mai lai luí, ó yuq lé le, Yhang htâng a cháng nhâng nghut ri. <sup>38</sup> Yhangmoq, haú tarajong má up sù é yhûm má jé lé kô é hkûn, Yesuq gi, byu pé garu garín ga yón ngau gabyông nyi bum é lé, myàng ri. <sup>39</sup> Yhang gi, yhúmhaú shut wang ló mù, haú bang lé, "Haí mù, yón ngau gabyông nyi bum akô thú? Haú zoshâng gi, shi byuq é a nghut, yhup myhí tô é sheq ru nghut lhê." ga tai ri. <sup>40</sup> Nghut kôlhang, yhangmoq gi, Yhang lé wuizui kut pyám byí akô.

Yhang kúm gi, haú bang banshoq lé hkat htoq pyám mù, zoshâng é yhângnu yhângwa nhik eq Yhâng é chángzô pé lé za shui luí, zoshâng lé lheq tô é gok má wang e akô nghut ri. <sup>41</sup> Yesuq gi, myiwe zo hau é loq má zui to mù, "Talihta ku-mi" (haú é lichyúm gi, "Myiwe zo ê, ngò, nang lé tai bá, toq aq." gâ é nghut lhê.) ga tai ri. <sup>42</sup> Myiwe zo haú gi, haú hkûn jáng, toq luí, sô wún ri (yhang gi, asak raxe í zân bò bê sù nghut ri.). Yhangmoq gi, haú sù dut é hkyô lé gyai yhang maú byuq bùm bekô nghut ri. <sup>43</sup> Yhang gi, haú hkyô ó lé le a sé nhâng râ matú, yhangmoq lé tai hkúm kat luí, myiwe zo haú lé, zô jung byi tso râ matú le, yhangmoq lé tai ri.

## 6

### *Yhumsing Wà Má Myoqdong A Wó É Hkyô*

*Mht 13:53-58; Luk 4:16-30*

<sup>1</sup> Yesuq gi, haú jowò mai htoq e ló mù, Yhâng é yhum mau shut tai ló ri; Yhâng é chángzô pé le, Yhang eq rahá bo châng ló akô nghut ri. <sup>2</sup> Bánno buinyi jé jáng, Yhang gi, tarajong má mhoqshit hi ló ri; wó gyô é bang myo myo gi, gyô maú byuq kôluí, "Byù shí yuq gi, haú pé lé hkâmá mhoq yu é lhà? Yhang wó yu é hpaqchyí byéng-yá gi, hkasú é wá nghut mù luí, laklai kumlhá lé lháng kut lhê laq? <sup>3</sup> Shí yuq gi, Mariq é yhangzo, laksîma hpó nghut lhê, a nghut thú? Yhang gi, Yakuq, Yose, Yudaq, Simun pé é yhangmang nghut lhê, a nghut thú? Yhâng nhammó pé le, nga-nhúng eq rahá nghut nyi lhê, a nghut kó thú?" ga luí, Yhang lé myit a ngón dut bùm bekô nghut ri.

<sup>4</sup> Yesuq, yhangmoq lé tai é gi, "Myiqhtoi rayuq gi, yhumsing é yhum mau, yhâng é buinùm ji-myi wuè eq yhumsing é yhûm má za, myoqdong a lhaq wó wú é nghut lhê." gâ ri. <sup>5</sup> Yhang gi, nõ byù ra-am lé loq ke byi mù, lhoq gê byí é mai lai luí, gotú laklai kumlhá haí le, haú má a wó kut shit nghut ri. <sup>6</sup> Haú mù, Yesuq gi, yhangmoq lumjínng myit a bò kô é hkyô lé, maú nyi ri. Hau htâng, Yhang gi, Nazaret wà mai htoq ló mù, rawà htâng rawà má châng mhoqshit wún ri.

### *Lagyo Raxe Í Yuq Lé Nhang Htoq Kat É Hkyô*

*Mht 10:5-15; Luk 9:1-6*

<sup>7</sup> Yesuq gi, haú lagyo raxe í yuq lé wut yù mù, agè ashop é nat pé lé ùng râ a-tsam byi luí, í yuq yuq kut nhang htoq kat ri.

<sup>8</sup> Yhang, yhangmoq lé châng pying kat é dang gi, "Hkyowui é matú má, dumbáng mai lai luí, zoshuq le, etap le, ngùn le, gotú haí le, hkâyü chûng kó; <sup>9</sup> hkyî-tsung kúm gi, tsûng chûng keq; nghut kôlhang, bu í dung hkâwut chûng kó. <sup>10</sup> Hká má nghut kôlhang, rayhûm yhûm má nungmoq wang bíng kô é nghut le gi, haú wâ mai dum htoq ló é buinyi jé shoq, haú yhûm má za nyi nyi keq. <sup>11</sup> Jowò rawò wò mâ é bang, nungmoq lé a lhom

hap yù, a lhom gyo byi kô é nghut jáng, nungmoq lé yhangmoq a lhom hap yu é saksé dut sháng gaq, nungmoq é hkyiwa má dap é hpuilhau lé ko hkyô pyâm to mù, haú jowò mai htoq ló keq." gâ ri.

<sup>12</sup> Haú mù, yhangmoq gi, htoq e ló luí, myit lhîng râ é hkyô, byu pé lé hkô kyô akô.

<sup>13</sup> Hau htoq agó, yhangmoq gi, nat gâng pé myo myo lé hkat htoq pyám byi mù, no é bang myo myo lé le xû but byi luí, lhoq ge byi akô nghut ri.

*Yohan, Ulhum Hpyit Huí é Hkyô*

*Mht 4:1-12; Luk 9:7-9*

<sup>14</sup> Yesuq é myîng hû lo é yanmai, Herut hkohkâm gi, Yesuq é hkyô lé wó gyo bê nghut ri. Byù ra-am gi, "Shí yuq gi, haú shi byuq bê Wui-myhup Sará Yohan dum dui toq lo é nghut lhê abe, hau é yanmai, yhang gi, hpungwup a-tsam haú pé lé wó kut é nghut ri." ga luí, taí bum akô nghut ri.

<sup>15</sup> Ra-am gi, "Yhang gi, Eliyaq nghut ri." ga taí akô nghut ri.

Dum, ra-am taí kô é gi, "Yhang gi, hí hpyang lhê é myiqhtoí pé su, myiqhtoi rayuq nghut ri." gâ ri.

<sup>16</sup> Herut kúm gi, haú lé wó gyo jáng, "Ngò, ulhum hpyit pyám byi é Yohan gi, shi é mai dum dui toq bu-nhung!" ga taí ri.

<sup>17</sup> Herut gi, yhanggu Hpilip é yhangmyi Herudiaq lé hâng yu pyâm é hkyô é yanmai, Yohan lé chyup tuí yù nhâng mù, htóng hkyô pyám nhang wú é sù nghut lhê. <sup>18</sup> Hkâsu mù gâ le, Yohan gi, Herut lé, "Nàng, nunggu é yhangmyi lé hâng yu é gi, tarâ a wang é nghut lhê." ga luí, taí byi nyi é yanmai nghut ri. <sup>19</sup> Haú mù, Herudiaq gi, Yohan lé gyai a jú dut byuq luí, sat pyám naú kôlhâng, a wó sat dut nyi ri. <sup>20</sup> Haí mù gâ le, Herut gi, Yohan, dîngmán chyoyúng é sù nghut é lé sé mù luí, yhang lé gyuq hkungga mù, yhang lé búng nyi é yanmai nghut ri. Yhang gi, Yohan é dang pé lé wó gyo jáng, gyô nhúng nhâng byuq kôlhâng, yhang taí é dang pé lé ru gyô nau nyi ashî nghut ri.

<sup>21</sup> Nghut kôlhâng, Herut gi, yhâng é hkú ladu hkyúm buinyi má, byù mó pé, gyezau pé, Galile mau suwún wui pé lé, ji yù mù zoshuq poí mó kut é yanmai, haú nyí gi, Herudiaq é matú, buinyi gè dut bê nghut ri. <sup>22</sup> Herudiaq é yhangzo byizo gi, wang lé lô mù, gó shit é hkûn, Herut eq yhâng é bíng pé gi, myit ngón bum akô nghut ri.

Haú mù, hkohkâm gi, myiwe zo haú lé, "Nàng ô nau é haí nghut kôle, dung aq, ngò nàng lé byi râ nghut lhê." ga, dakam é danggidiq byi ri. <sup>23</sup> Hau htoq agó, yhang gi, myiwe zo haú lé, "Nàng dung é haí nghut kôle, ngò byi râ; ngá é mingdán rawuí gû lháng, byi râ nghut lhê." ga, dakam é danggidiq byi ri.

<sup>24</sup> Haú hkûn, myiwe zo haú gi, htoq ló mù, yhâng nu lé, "Haí dîng le gè râ laq?" ga myi jáng, yhângnu gi, "Wui-myhup Sará Yohan é ulhum dung aq." ga tû taí kat ri.

<sup>25</sup> Myiwe zo haú gi, radá dâm hân hân wang ló mù, hkohkâm lé, "Ahkuí yhang, Wui-myhup Sará Yohan é ulhum lé, bó má kat mù byi laq." ga, dîng tôngbán ri.

<sup>26</sup> Haú su ga jáng, hkohkâm gi, myit gyai yhang a ngón dut byuq kôlhâng, yhang dakam tô é danggidiq é yanmai le, bíng pé é myoqdong lé tê nau é yanmai le, myiwe zo haú taí é dang lé a kâm he pyám lo nghut ri. <sup>27</sup> Haú mù, hkohkâm gi, zúng é gyezo rayuq lé, Yohan é ulhum ê hpyit lô râ matú, radá dâm hkunmó hkyó mù nhang kat ri. Haú mù, haú yuq gi, htóng hkaú má ê luí, Yohan é ulhum lé, ê hpyit mù, <sup>28</sup> bó má kat luí, myiwe zo haú lé lo byi ri; myiwe zo haú gi, ulhum haú lé, yhângnu chyáng yu ló byi ri. <sup>29</sup> Yohan é chángzô pé gi, haú hkyô lé wó gyo kôjáng, yhâng é mâng lé lé yû luí, lup má ló myhup pyám bekô nghut ri.

*Byù Ngo Hkyîng Lé Byi Tsô É Hkyô*

*Mht 14:13-21; Luk 9:10-17; Yhn 6:1-14*

<sup>30</sup> Lagyo pé gi, Yesuq chyáng dum jé zîng lò kômù, yhangmoq kut lai lo é hkyô pé eq mhoshit bê hkyô pé banshoq, Yhang lé taí kyô akô nghut ri. <sup>31</sup> Hau htâng, byù myo myo gi, yhangmoq chyáng htoq htoq wàng wàng kut nyí kô é yanmai, yhangmoq gi, zang zo



ahkyíng lhang a wó kó nghut ri. Haù mù, Yesuq gi, chángzô pé lé, "Nga-nhúng, tsím tsâm é jowò ralhúm má ê mù, ê nô yù sháng." ga taí ri.

<sup>32</sup> Haù mù, yhangmoq gi, yhangmoq baú lhaí racham má ji mù, tsím tsâm é jowò shut e ló akô nghut ri. <sup>33</sup> Nghut kôlhang, yhangmoq e ló é lé châng myang é bang myo myo gi, yhangmoq lé wú sé kôluí, wà hkangmó mai hkyî hkyô châng din é kômù, yhangmoq é hí má jé to lánng akô nghut ri. <sup>34</sup> Yesuq gi, lhaí mai gyó dap ló é hkún, byù moq mó nyi to lánng lé myàng jáng, yhangmoq gi, zúng sù a nyi é sau pé su dut kô é yanmai, yhangmoq lé wú shogyo luí, myo myo mhoqshit byi hi ló bê nghut ri.

<sup>35</sup> Bui gyum ló yâm jé jáng, Yhang é chángzô pé gi, lé lô kômù, Yhang lé, "Shí má gi, tsím tsâm é jowò nghut é htoq agó, bui le gyum ló bê; <sup>36</sup> yhangmoq gi, awui ayàm má é yhúm pé eq wà pé má, zoshuq ló ho wui zo kó sháng gaq, yhangmoq lé ló nhâng aq hkoi." ga taí akô nghut ri.

<sup>37</sup> Haú hkún, Yhang gi, "Nungmoq, yhangmoq lé rajung jung byi tso keq." ga tû taí jáng, yhangmoq gi, "Shí myhó é bang zo râ matú, ngamoq gi, ê luí, denari\* í sho eq muk é wui byi ra râ luq?" ga dum taú myí akô nghut ri.

<sup>38</sup> Nghut kôlhang, Yhang gi, "Nungmoq chyáng muk hkâ-myhó wó akô? Ê wú wú keq." ga myí ri. Haù mù, yhangmoq gi, myang hô jáng, "Muk ngo long eq ngozo í du wó lhê." ga, dum tû taí akô nghut ri.

<sup>39</sup> Hau htâng, Yesuq gi, banshoq bang lé ahpúng hpúng kut wàhu yò má zùng nhâng râ matú, Yhâng é chángzô pé lé taí kat ri. <sup>40</sup> Haù mù, shiwa byu pé gi, rashô shô kut le, ngo xê xê kut le, ahpúng hpúng zung tô bùm bekô nghut ri. <sup>41</sup> Yesuq gi, haù muk ngo long eq ngozo í du lé yù mù, mauhkûng shut tu wú to luí, jeju ban hkya-on jáng, muk lé hpê gam ri. Hau htâng, Yhang gi, byu pé hí má châng hkat to byi râ matú, Yhâng é chángzô pé lé byi ri. Ngozo í du lé le, Yhang yù mù, banshoq bang lé gàm byi ri. <sup>42</sup> Yhangmoq banshoq bang gi, zô gyí bùm bekô nghut ri. <sup>43</sup> Hau htâng, haù chángzô pé gi, zô myhit tô é muk eq ngozo lé, raxe í mung byíng shoq wó guq tsíng yu ashí kó nghut ri. <sup>44</sup> Haú hkún, zô é bang gi, yuqgè wui baú lhang, byù du ngo hkyíng nghut ri.

*Yesuq, Wui Htoq Má Sô É Hkyô*

*Mht 14:22-33; Yhn 6:15-21*

<sup>45</sup> Yesuq gi, haù shiwa byu pé lé byo ló nhang nyi é hkún jáng, Yhâng é chángzô pé lé lhaí má wang ji nhâng mù, tû tap má é Bet-saida wà mó shut dap ló lánng nhang ri.

<sup>46</sup> Yhangmoq lé shi-kyâm kat é htâng, Yhang gi, kyûdung râ ga, Yhang baú bùm shut doq e ló bê nghut ri.

<sup>47</sup> Buigyum htâng, lhaí gi, nhông gùng má jé tô é u lé, Yesuq gi, Yhang baú za myi htoq má nyi tô ashí nghut ri. <sup>48</sup> Lài tau mut é yanmai, haù chángzô pé gi, lhaí lhu wuihkê nyi kô é lé, Yesuq myang ri. Napsûn maubó zó sum hkyíng eq hkyuq hkyíng gyoro má, Yesuq gi, nhông htoq má so mù, yhangmoq shut e ló luí, yhangmoq é nàm mai laí ló râ dâ ri.

<sup>49</sup> Nghut kôlhang, yhangmoq gi, Yhang, nhông htoq má sô nyi é lé myang kôjáng, sobyô su ngàm kômù, kyek garû bum akô nghut ri. <sup>50</sup> Hkâsu mù gâ le, yhangmoq banshoq bang gi, Yhang lé myàng kôluí, gyuq dàn kô é yanmai nghut ri.

Nghut kôlhang, Yhang, radá dâm yhangmoq lé dâng nyo kat é gi, "Hkâgyuq kó. Ngò ru nghut lhê; zim za nyi keq." gâ ri. <sup>51</sup> Hau htâng, Yhang gi, lhaí htoq má yhangmoq eq rahá é doq ji jáng, lài gi, zim byuq bê nghut ri; haù mù, yhangmoq gi, gyai yhang mauhong byuq bùm bekô nghut ri. <sup>52</sup> Hkâsu mù gâ lé, yhangmoq gi, muk gam é laklaí kumlhá eq séng luí a sê gyo kô é htoq agó, myitbun a bóng kô é yanmai nghut ri.

<sup>53</sup> Yhangmoq gi, gû dap ló kômù, Genesarat mau má jé wang lò jáng, lhaí lé haú má ló shap tô akô nghut ri. <sup>54</sup> Yhangmoq lhaí mai gyó é hkún jáng, byu pé gi, Yesuq lé lhom wú sê akô nghut ri. <sup>55</sup> Haù mù, yhangmoq gi, haú mau ramau gón má din jón mù, nô bang lé taphkang mai waq luí, Yesuq nyi rí gâ é jowò hkangmó má, shuí lé lo bum akô nghut ri. <sup>56</sup> Yesuq jé é wà hkangmó, myuq hkangmó, awui ayàm má é wà hkangmó pé má,

\* 6:37 Denari rachap gi, byù rayuq é ra-nyí lhê é zuihpau eq wui ri.

yhangmoq gi, nò byù lé gai pé má lé lheq to kôluí, Yhâng é bushi htâng má za lhang, haú bang lé byi záng nhâng râ matú, Yhang lé dúng tôngbán akô. Yhang lé záng é lhunglhang bang gi, lhoq gê byî é huí akô nghut ri.

## 7

*A Sanséng Dut Nhang É Hkyô Pé**Mht 15:1-20*

<sup>1</sup> Haú Hparishe pé eq tarâ sará pé ra-am gi, Yerusalem wà mó mai jé lé lô kômù, Yesuq é nàm má lé zup zîng bum akô. <sup>2</sup> Haú hkûn, Yhâng é chángzô pé ra-am gi, htungli dông a chí pyâm é, a sanséng é loq èq zo shuq nyî kô é lé, yhangmoq myang akô nghut ri. <sup>3</sup> (Hparishe pé eq Yudaq byù banshoq bang gi, yhangmoq é îchýí îwâ pê é htungli lé châng é bang nghut lhê mù luí, loq hí a chí é gi, haí le a zô wú kó nghut ri. <sup>4</sup> Yhangmoq gi, gai pé mai taú lò jáng le, gùng hí a chí pyâm é, zojung a zo kó nghut é htoq agó, góm pé, hkoq pé, gyi chòkon pé lé chí é htungli gotû pé lé le, châng akô nghut ri.)

<sup>5</sup> Haú mù, Hparishe pé eq tarâ sará pé gi, Yesuq lé, "Náng é chángzô pé gi, haí mù luí, îchýí îwa pê é htungli lé a châng e za, a sanséng é loq èq zo shuq nyi akô lhu?" ga myî akô.

<sup>6</sup> Haú hkûn, Yesuq gi, yhangmoq lé, "Gegùn labyoq kut bang ê, nungmoq eq séng luí myiqhtoi Esai-aq htoî tô é dang má, 'Byù shí bang gi, nhut htoq mai za Ngo lé hkunggâ akô; yhangmoq é myit nhiklhum gi, Ngò eq wê gâng nyi akô.

<sup>7</sup> Yhangmoq gi, akôm má za, Ngo lé noqkuq nyi akô; hkâsu mù gâ le, yhangmoq é mhoqshit hkyô pé gi, byù dông mai mhoqshit é hkyô pé za nghut nyi ri. <sup>8</sup> Nungmoq gi, Garai Gasang tô tô é hkunmó lé tô pyâm luí, byu é htungli lé za, myhik zing tô akô nghut ri." ga luí tû taí ri.

<sup>9</sup> Hau htâng, Yhang xoq taí é gi, "Nungmoq gi, yhumsing é htungli lé za cháng râ matú, Garai Gasâng é hkunmó lé he-ngik pyâm é má, hpaqchyî gyaí bo akô nghut ri. <sup>10</sup> Hkâsu mù gâ le, Mosheq gi, 'Nungmoq é înu îwa lé, hkungga keq. <sup>11</sup> Nghut kôlhang, nungmoq taí é gi, byù rayuq yuq, yhumsing é yhângnu yhângwa lé byi âng é zè lé, Korban za (Garai Gasang lé byi râ chyunghuq) nghut lhê gá nhang akô. <sup>12</sup> Haú mù, haú yuq lé, yhângnu yhângwâ é matú, haí a kut byi nhâng lô é dông dut bê nghut ri. <sup>13</sup> Haú dông mai, nungmoq gi, nungmoq chung gyó lo é htungli é yanmai, Garai Gasâng é mungdang lé he-ngik pyâm akô; haú sù é hkyô myo myo lé le, nungmoq kut akô nghut ri." gâ ri.

<sup>14</sup> Yesuq gi, shiwa byu pé lé Yhâng chyáng dum wut yù mù, taí é gi, "Nungmoq banshoq bang, ngò taí é lé gyô yù mù, sé lo keq; <sup>15</sup> Shinggan mai wang lo é haí jung le, byù lé a sanséng dut nhang é a nghut, nghut kôlhang, byu é unghkaû mai htoq ló é zè kúm gi, byù lé a sanséng dut nhang lhê." gâ ri. <sup>16</sup> (Gyo râ nohkyap dap é sù gi, gyô yù sháng gaq.)" ga taí ri.\*

<sup>17</sup> Yhang gi, byù moq mó mai htoq ló mù, yhúmhkaû má jé wang ló é hkûn, Yhâng é chángzô pé gi, dangtú haú eq séng luí, Yhang lé lhom myî akô nghut ri. <sup>18</sup> Haú mù, Yhang gi, yhangmoq lé, "Nungmoq gi, haú-í yhang go akô luq? Shinggan mai wang lo é haí jung le, byù lé a sanséng nhâng wó dut râ a nghut é hkyô lé, a sé kó lhu? <sup>19</sup> Hkâsu mù gâ lé, haú gi, byu é myit nhiklhum hkaû má wang ló é a nghut e za, wamdau hkaû má sheq wang ló é nghut mù, shinggan shut dum lhoq htoq pyâm é nghut lhê." ga taí ri. (Yhang isu ga taí é gi, zoshuq lhunglhang sanséng lhê gá nau é dông nghut ri.)

<sup>20</sup> Hau htoq agó, Yhang xoq taí é gi, "Byù mai htoq ló é haí jung le, byù lé a sanséng nhâng wó dut é nghut lhê. <sup>21</sup> Hkâsu mù gâ lé, ahkaû mai htoq ló é gi, byu pê é myit mai htoq ló é nghut mù, agè ashop é dông myit é hkyô pé, ashop é dông gungsho zùm yap é hkyô, hkaû é hkyô, byù sat é hkyô, su-myi sulàng lú hkyô, <sup>22</sup> myoqnoq é hkyô, agè ashop é

☆ 7:7 Esai 29:13 ☆ 7:10 Htoq Ló 20:12 ☆ 7:10 Htoq Ló 21:17 \* 7:16 Bun zo shí gi, Chyúmlaika ra-am má bo lhê, ra-am má a bò.

hkyô, mhaú zô é hkyô, achag achyut zùm yap lhùm é hkyô, manon é hkyô, lumù gansang é hkyô, gumrong é hkyô eq ngha é hkyô pé htoq lò é nghut lhê; <sup>23</sup> Agè ashop é hkyô shí pé banshoq gi, byu é unghkaú mai htoq lo é nghut mù, byù lé a sanséng dut nhang ri." gâ ri.

*Tungbaù Myiwe Myhí Rayuq É Lumjín Myit*

*Mht 15:21-28*

<sup>24</sup> Yesuq gi, haú jowò mai htoq lò mù, Turuq eq Sidun maukyo shut e lò luí, yhùm ralhùm má wang ê ri; Yhang nyi é hkyô lé, ó yuq lé lé a sé nhâng naù kôlhang, a wó zau to nghut ri. <sup>25</sup> Haú mù, agè ashop é nat wang júng tô é myiwe zo rayuq é yhângnu gi, Yhang nyi tô é hkyô lé wó gyô é hkùn jáng, Yhâng chyáng jé lé mù, Yhâng é hkyô wang má lé paí gop to luí, <sup>26</sup> yhang zô chyáng mai nat gang lé hkat htoq pyám byi râ matú, Yhang lé dúng tôngbán ri. Myiwe haú gi, Suru-Hpiniki mau mâ é Grik byuhú nghut ri.

<sup>27</sup> Yesuq gi, "Zo wuít† hí zô gyi kó sháng gaq; haí mù gâ le, zô wui chyáng mâ é zoshuq lé yù mù, hkuí pé‡ lé byi tsô é jung a nghut." ga yhang lé taí kyô ri.

<sup>28</sup> Haú hkùn, yhang gi, "Yhumsîng ê! Haú kúm nghut ri; nghut kôlhang, siboí ô mâ é hkui lhang, zô wui é zô myhit shuq htâng lé, ge zo lhê a nghut lhu?" ga dum tû taí ri.

<sup>29</sup> Haú mù, Yesuq gi, yhang lé, "Nàng tû taí é dang hau é yanmai, lò lo aq hkoi; haú nat gang gi, nung zô chyáng mai htoq lò byuq bê nghut ri." ga taí kat ri.

<sup>30</sup> Myiwe myhí haú gi, yhùm má dum taú jé lo é hkùn, yhang zo chong htoq má leq to lánng é lé le, nat gang htoq byuq bê nghut é lé le, lo myang ri.

*Nojit É Eq Dang A Hkyang É Sû Lé Lhoq Gê Byí É Hkyô*

<sup>31</sup> Yesuq gi, Turuq mau mai dum htoq lò mù, Sidun mai sô laí lò luí, Dekapoli mau hkaú dông laí byit mù, Galile nhông shut gyó jé lò ri. <sup>32</sup> Haú hkùn, byù ra-am gi, nojit é eq dang a hkyang é byù rayuq lé, Yhâng chyáng shuí lé lô kômù, haú yuq é ahtoq má loq ke byi râ matú, Yhang lé dúng tôngbán akô nghut ri.

<sup>33</sup> Yesuq gi, haú yuq lé baú za byù hpúng mai shuí htoq yù mù, yhâng é nohkyûng má loqnyhui htaú háng byi luí, sôkan byé tik yù mù, haú yuq é shô má htau byí ri. <sup>34</sup> Hau htâng, Yhang gi, mauhkûng shut tu wú mù, soq mó shê luí, "Ehpahta!" (Lichyúm gi, "Bóng aq hkoi!") ga luí, haú yuq lé taí kat ri. <sup>35</sup> Haú hkùn, haú yuq é nohkyap le bóng byuq luí, shô le nyhôm byuq mù, balang hkyâng hkyâng dang wó nyô bê nghut ri.

<sup>36</sup> Yesuq gi, haú hkyô ó lé le a taí kyo râ matú, yhangmoq lé hkúm kôlhang, yhangmoq gi, je hkúm le, je taí pyo akô nghut ri. <sup>37</sup> Byu pé gi, gyai yhang mauhong byuq bùm kôluí, "Yhang gi, haí lé le, ge é dông chyat kut ri; nojit sù lé, wó gyo shoq, dang a hkyâng sù lé, wó nyô shoq, kut byi bê nghut ri." ga luí, taí bum akô nghut ri.

8

*Byù Myi Hkyûng Lé Byi Tsô É Hkyô*

*Mht 15:32-39*

<sup>1</sup> Haú yoq má, gotú byù moq mó gi, lé zîng bum akô; haú bang zoshuq langhpyut to kô é yanmai, Yesuq gi, Yhâng é chángzô pé lé wut yù mù, <sup>2</sup> "Ngò, shí bang lé wú shogyo ri; yhangmoq gi, Ngò eq rahá nghut nyi é sum nyí bò bê, haí le a myàng zo kó nghut ri. <sup>3</sup> Yhangmoq chyáng mâ é ra-am gi, mau we mai lé é bang nghut é yanmai, yhangmoq lé, zòmút gû yhùm shut nhang kat é nghut le gi, hkyolat má mutyut yut é lò hui kó râ nghut lhê." ga taí ri.

<sup>4</sup> Haú hkùn, Yhâng é chángzô pé gi, Yhang lé, "Ísu é yoso má nhîng, shí myhò bang lé luq shoq byi tso râ zoshuq gi, hkâmá ê yù râ lhu?" ga taí akô.

<sup>5</sup> Yesuq gi, "Nungmoq, muk hkâ-myhó long wó akô lhu?" ga taú myi jáng, yhangmoq gi, "Nyhit long." ga, dum tû taí akô nghut ri.

† 7:27 Zo wuít gâ é gi, Yudaq byu pé lé gâ é nghut lhê. ‡ 7:27 Hkuí pé gâ é gi, tungbaù pé lé gâ é nghut lhê.

<sup>6</sup> Haû mù, Yhang gi, byù hpûng lé myigùng htoq má zùng nhang to luî, muk haû nyhit long lé yù mù, jeju ban hkya-on jáng, myhik hpé luî, haû bang lé gàm byi râ matú, Yhâng é chángzô pé lé byî kat ri; haû mù, yhangmoq gi, haû bang lé gàm byî akô nghut ri. <sup>7</sup> Yhangmoq gi, ngo-nú zo ratsuí le wó akô nghut ri; haû mù, Yhang gi, ngozo haû pê é matú jeju hkya-on luî, chángzô pé lé dum gàm byí nhang ri. <sup>8</sup> Yuq hkangmó zô gyî bùm kô é htâng má, haû chángzô pé gi, amyit ahtâng lé nyhit mung byíng shoq wó guq tsíng yu ashî kó nghut ri. <sup>9</sup> Zô é bang gi, byù myi hkyîng kô nghut ri; Yesuq gi, haû bang lé, nhang kat luî, <sup>10</sup> Yhâng é chángzô pé eq rahá, lhaî má wang ji mù, Dalamanuhta mau má ê jé akô nghut ri.

<sup>11</sup> Hparishe pé gi, lé mù, Yesuq eq dang htíng htíng lhûm akô; hau htoq agó, yhangmoq gi, mauhkûng mâ é kumhá lé dúng é dông, Yhang lé chyam wú akô nghut ri. <sup>12</sup> Yesuq gi, myit nò-kying kying luî, yhangmoq lé taí é gi, "Haî mù luî, shí ipyat lhê é byu pé gi, limik kumhá dúng akô lhú? Ngò teng za taí kôlé, shí ipyat mâ é bang lé, hai kumhá le tân shit râ a nghut." gâ ri. <sup>13</sup> Hau htâng, Yhang gi, yhangmoq lé pyâm to mù, lhaî má dum taû wang ló luî, tú tap shut gû dap e ló bê nghut ri.

#### *Hparishe Pé Eq Herut É Múnchi*

##### *Mht 16:5-12*

<sup>14</sup> Haû chángzô pé gi, muk yu chûng râ lé tô-myhî pyám kôluî, lhaî hkaû má muk ralong za ru wó akô nghut ri. <sup>15</sup> Yesuq gi, yhangmoq lé, "Nungmoq gi, Hparishe pé eq Herut é múnchi\* lé, sidiq luî, koi pyâm nyi keq." ga taí ri.

<sup>16</sup> Haû hkûn, yhangmoq gi, "Nga-nhûng chyáng muk a bo é yanmai, haû su ga taí é nghut ri." ga luî, rayuq eq rayuq taí lhûm bum akô nghut ri.

<sup>17</sup> Haû su ga taí lhûm nyi kô é lé Yesuq sé jáng, yhangmoq lé, "Nungmoq gi, muk a bo é hkyô lé, haî mù taí lhûm nyi akô lhú? Ahkuî jé shoq, nungmoq gi, a byu-myàng, a sê gyo shi kó lhú? Nungmoq é myit nhiklhum gi, ru htan nyi ashî kó lhú? <sup>18</sup> Myoq dap to kôluî nhîng, a myàng kó lhú? Nohkyap dap to kôluî nhîng, a wó gyo kó lhú? <sup>19</sup> Ngò, muk ngo long lé myhik hpé mù, byù ngo hkyîng lé byi tsô é hkûn, zô myhit shuq htâng lé, nungmoq hkâ-myhó mung wó guq tsíng yu é lé, bun ashî kó lhú?" ga myi jáng, yhangmoq gi, "Raxe í mung." ga tú taí akô.

<sup>20</sup> Dum, Yesuq gi, "Ngò, muk nyhit long lé myhik hpé mù, byù myi hkyîng lé byi tsô é hkûn, zô myhit tô é ajap azo lé, nungmoq hkâ-myhó mung wó guq tsíng yù kô é lhú?" ga myi jáng, yhangmoq gi, "Nyhit mung." ga dum tú taí akô.

<sup>21</sup> Haû hkûn, Yesuq gi, "Haû nghut le nhîng, ahkuî le, a sê gyo shi kó lhú?" ga, yhangmoq lé myî ri.

#### *Myoqjit Sû Rayuq Lé Lhoq Gê Byî É Hkyô*

<sup>22</sup> Yhangmoq gi, Bet-saida wà mó má jé lò kô é hkûn, byù ra-am gi, myoqjit é byù rayuq lé, Yesuq chyáng shuî lé lô mù, haû yuq lé záng byi râ matú, dúng tóngbán akô. <sup>23</sup> Yesuq gi, myoqjit sû haû yuq é loq lé zui mù, wà shinggan shut shuî htoq ló luî, yhâng é myoq má sôkan byé tik byi mù, loq ke byi luî, "Nàng, rajung jung lé myang ri lhú?" ga myî kat ri.

<sup>24</sup> Haû jáng, yhang gi, tu wú kat luî, "Byu pé gi, sikgâm su dut luî, hkyô sô wún é lé, ngò myang ri." ga taí ri.

<sup>25</sup> Hau htâng, Yesuq gi, haû yuq é myoq má Yhâng é loq dum ke byî ri; haû hkûn, haû yuq é myoq gi, bóng lô mù, ge byuq luî, haî lé le san za myàng bê nghut ri. <sup>26</sup> Yesuq gi, haû yuq lé, "Wà hkaû má hkâwang ló lo." ga taí luî, yhâng é yhûm shut ló nhang kat bê nghut ri.

#### *Hkrisduq Ga, Petruq Yín Yu É Hkyô*

##### *Mht 16:13-20; Luk 9:18-21*

\* 8:15 Shî má taí é múnchi gi, Hparishe pé eq Herut é mhoqshit hkyô lé, lhoq pyo é lé gâ lhê.

<sup>27</sup> Yesuq eq Yhâng é chángzô pé gi, Kesare-Hpilipi wà mó awui ayàm mâ é wà pé shut e ló é hkûn, hkyô má, Yesuq gi, chángzô pé lé, "Byu pé gi, ngo lé ó yuq nghut lhê ga, taí akô lhú?" ga myí ri.

<sup>28</sup> Haú hkûn, yhangmoq gi, "Ra-am gi, Wui-myhup Sará Yohan ga, góbang gi, Eliyaq ga, dum ra-am gi, myiqhtoi rayuq yuq nghut ri ga taí akô." ga, Yhang lé tû taí akô.

<sup>29</sup> Yesuq gi, "Nungmoq gi, ngo lé ó yuq nghut lhê nghu akô lhú?" ga, yhangmoq lé xoq myi jáng, Petruq gi, "Nàng gi, Hkrisduq† nghut ri." ga tû taí ri.

<sup>30</sup> Yesuq gi, haú hkyô ó lé le a taí kyo râ matú, yhangmoq lé taí hkúm ri.

*Byu Yhangzo Gi, Sat Pyâm É Hui Luí, Dum Dui Toq Râ Hkyô*

*Mht 16:21-28; Luk 9:22-27*

<sup>31</sup> Hau htâng, Yhang gi, yhangmoq lé mhoqshit é má, "Haú Byu Yhangzo gi, zing-rî é myo myo hui zo luí, suwún wuít, hkyangjong agyi pé, tarâ sará pê èq he-ngik pyâm é hui mù, sat pyâm é hui ra râ nghut lhê; nghut kôlhang, sum nyí nghû râ buinyí má, dum dui toq râ nghut lhê." gâ ri. <sup>32</sup> Yesuq gi, haú hkyô lé san za dut shoq taí nyi é yanmai, Petruq gi, Yhang lé rahkyam shut shuí htoq yû mù, Yhang lé tân ri.

<sup>33</sup> Nghut kôlhang, Yesuq gi, Yhâng é chángzô pé lé lhing wú kat mù, Petruq lé, "Tsadán nàng, Ngá chyáng mai hpâng aq! Nàng gi, Garai Gasang eq sêng é hkyô lé a myit e za, byù eq sêng é hkyô lé za myit é sù nghut ri." ga tân kat ri.

<sup>34</sup> Hau htâng, Yhang gi, byù moq mó eq Yhâng é chángzô pé lé wut yù mù, taí é gi, "Ngá htâng cháng naú sù ó yuq nghut kôle, yhumsing gùng yhumsing he-ngik pyám mù, yhumsing é tapzìng lé waq chùng luí, cháng ra râ nghut lhê. <sup>35</sup> Hkâsu mù gâ le, yhumsing é asak lé hkyi yù naú sù ó yuq nghut kôle, asak sum râ nghut lhê; nghut kôlhang, Ngá é yanmai le, haú gabú danglù é yanmai le, yhumsing é asak sùm pyâm é sù kúm gi, asak hkyi yu é hui râ nghut lhê. <sup>36</sup> Byù gi, mingkan gón lé wó sing to kôlhang, yhumsing é asak woi-nyí sùm byuq é nghut le gi, yhâng é matú, hai akyû bò râ lhú? <sup>37</sup> Byù gi, yhumsing é asak woi-nyí lé, hai èq wó htaí yù râ lhú? <sup>38</sup> Yubak mara myô é eq su-myi sulàng shut é ipyat shí má, Ngò eq Ngá é dang lé hoq pyâm é sù ó yuq lé le, haú Byu Yhangzo gi, Yhâng Wâ é hpungwup shingkang bo é èq, haú chyoyúng maumang lagyô pé eq rahá jé lé é hkûn, hoq pyám râ nghut lhê."☆ gâ ri.

## 9

<sup>1</sup> Hau htâng, Yesuq gi, yhangmoq lé, "Ngò, nungmoq lé teng za taí kôlé, shí má yap tô é bang ra-am gi, Garai Gasâng é mingdán, hpungwup a-tsâm èq jé lé lo é lé, a myang é za shí kó râ a nghut." ga taí ri.

*Yesuq É Ihpyô Isâm Htaí Lo É Hkyô*

*Mht 17:1-13; Luk 9:28-36*

<sup>2</sup> Hkyuq nyí laí htâng má, Yesuq gi, Petruq lé le, Yakuq eq Yohan lé le, shuí chùng mù, yhangmoq baú myhang é bùm ralhùm má doq ló akô; haú hkûn, yhangmoq é myoq hí tê má, Yesuq é ihpyô isâm htaí lo ri. <sup>3</sup> Hau htoq agó, Yhâng é mebu gi, wik wik duq hpyu zan lo ri; myidàm htoq má, ó yuq le haú-í hpyû shoq a wó xaú hpyu wú é nghut lhê. <sup>4</sup> Eliyaq eq Mosheq gi, yhangmoq é hí má htoq shit mù, Yesuq eq dâng nyo lhùm nyi akô.

<sup>5</sup> Haú mù, Petruq gi, Yesuq lé, "Rabai ê, shí jowò má nga-nhúng nyi le ge ri; haú mù, Náng é matú ralhùm, Mosheq é matú ralhùm, Eliyaq é matú ralhùm kut, ngamoq lé, zúm sùm lhum saí nhâng laq." ga taí ri. <sup>6</sup> Hkâsu mù gâ le, yhangmoq gi, gyai yhang gyuq dan bùm kô é yanmai, Petruq gi, haí taí râ le a sé mù, haú su gâ é nghut ri.

<sup>7</sup> Hau htâng, mhut htoq lô luí, yhangmoq lé htup zìng lô mù, mhut hkaú mai htoq lo é htê gi, "Shí yuq gi, Ngò chyitdap é Ngá Zo nghut lhê; Yhâng é dang gyo keq." gâ ri.

<sup>8</sup> Haú hkûn jáng, chángzô pé gi, lnhnghkyuq má wú kat le, Yesuq za yhangmoq eq rahá nghut nyi é mai lai luí, ó lé le, a myàng lo kó nghut ri.

† 8:29 Grik dong Hkrisduq gâ é gi, xù but hui Sù gâ é lichyùm nghut mù, Hebre dong "Mesaia" gâ é eq rajung za nghut lhê. ☆ 8:38 Yer 3:8; Ezk 23:37; Hos 2:2-10

<sup>9</sup> Yhangmoq, bùm mai taû gyó lô kô é hkûn, Yesuq gi, haû Byu Yhangzo shi é mai a dum dui toq toq gi, yhangmoq myang é hkyô lé, ó lé le a taî kyo râ matú taî hkûm tô ri. <sup>10</sup> Chángzô pé gi, dang haú lé myit má kat to kôluí, "Shi é mai dum dui toq râ." gâ é lichyúm lé, rayuq eq rayuq myî lhûm bum akô nghut ri.

<sup>11</sup> Hau htâng, yhangmoq gi, "Eliyaq hí lé ra râ nghut lhê ga, tarâ sará pé haî mù taî kô é lhú?" ga, Yesuq lé myî akô.

<sup>12</sup> Haú hkûn, Yesuq gi, "Eliyaq hí jé lé é gi, teng bê nghut luí, lhunglháng lé dum lajâng tô é nghut ri. Nghut kôlhang, haû Byu Yhangzo gi, myo myo hpuzo luí, he-ngik pyâm é hui ra nghut lhê ga le, Chyúmdang má kê to ashî, a nghut kó lhú? <sup>13</sup> Ngò, nungmoq lé taî kôlé, Eliyaq gi, jé lé bê nghut mù, yhang eq séng luí Chyúmdang má kê tô é eq rajung za, yhangmoq gi, ô nau é dông banshoq kut bekô nghut ri." ga tû taî ri.

*Nat Dap É Yuqgè Zo Rayuq Lé Lhoq Gê Byî É Hkyô*

*Mht 17:14-20, 22-23; Luk 9:37-45*

<sup>14</sup> Yhangmoq gi, chángzô pé chyáng dum taû jé lô kô é hkûn, haú bâng é lhîngkhuyu má byu moq mó zîng lé é lé le, tarâ sará pé, haú bang eq dang htíng htíng lhûm nyi kô é lé le, myang akô. <sup>15</sup> Haú má nyi tô é lhunglhâng bang gi, Yesuq lé myang kat é eq, maú byuq kôluí, din ê mù, ê shi-kyâm akô nghut ri.

<sup>16</sup> Haú hkûn, Yesuq gi, yhangmoq lé, "Nungmoq gi, yhangmoq eq haî lé dang htíng htíng lhûm nyi akô lhú?" ga myî ri.

<sup>17</sup> Byù hpúng hkaû mâ é rayuq tû taî kat é gi, "Sarâ ê! Nhut jit nhang é nat wang júng tô é ngâ é yuqzo lé, Náng chyáng shuí lé lo lhê. <sup>18</sup> Nat haû gi, yhâng chyáng wàng hkangmó, yhang lé myi htoq má lhoq leqbat nhang ri; haû mù, yhang gi, nhut mai guttsû htoq lhê, zui kyik kyik lhê, langhtan lo lhê, dut ri; hau é yanmai, nat haú lé hkat htoq pyám byi râ matú, Náng é chángzô pé lé dúng wú kôlhang, yhangmoq a wó dut kó nghut ri." gâ ri.

<sup>19</sup> Haú hkûn, Yesuq gi, "Lumjínng myit a bo é amyû pé ê, Ngò gi, hkâ-myháng jé shoq nungmoq eq rahá nyi mù, wó jân nyi râ lhú? Yuqgè zo haû lé, Ngá chyáng shuí lé lô keq." ga taî kat ri.

<sup>20</sup> Haû mù, yhangmoq gi, yuqgè zo haû lé shuí lé lo akô; nat haû gi, Yesuq lé myang kat é eq yhang, yuqgè zo haû lé langhtân nhang ri; yuqgè zo haû gi, myigùng má lêng leq luí goleng leng mù, nhut mai tsû-myup htoq nyi ri.

<sup>21</sup> Haú hkûn, Yesuq gi, yhângwa lé, "Yhang, isu dut é hkâ-myháng myáng bê lhú?" ga myi jáng, yhâng wa gi, "Zoshâng hkûn mai nghut bê. <sup>22</sup> Nat haû gi, yhang lé lhoq sat pyám naû mù, myi má le, wui má le, anum num lêng wàng nhang wú bê nghut lhê; nghut kôlhang, Nàng, rajung jung wó kut byî é nghut le gi, ngá hpe lé shogyo yù laq, garúm yù laq." ga tû taî ri.

<sup>23</sup> Yesuq gi, "Nàng, wó kut byî é nghut le gi, 'nghû, haî mù taî lhê lhú? Lumjínng myit bò su é matú gi, haî le wó dut lhê." ga, yhang lé taî ri.

<sup>24</sup> Haû zôshang é yhângwa gi, radá dâm, "Ngò lumjínng lhê; nghut kôlhang, ngá é lumjínng myit gi, shaû ashî nghut é yanmai garúm yù laq." ga taî garú ri.

<sup>25</sup> Yesuq gi, byù hpúng din zîng lé lô kô é lé, myàng jáng, haû agè ashop é nat lé, "Nojit, nhutjit nhang é nat ê! Ngò, nang lé hkunmó hkyô lhê, yhâng chyáng mai htoq ló aq; hkâ-nhám le, yhâng chyáng hkâdum wàng lo." ga tân kat ri.

<sup>26</sup> Haú hkûn, nat haû gi, garu mù, zoshâng haû lé wum kat langhtân nhâng luí, htoq ló byuq bê. Zoshâng haû gi, shî mâng gùng su dut byuq é yanmai, byù myo myo gi, "Yhang shî bê nghut ri." ga taî akô. <sup>27</sup> Nghut kôlhang, Yesuq gi, zôshang é loq má zui luí, tu toq kat ri; haû mù, zoshâng gi, yap to bê nghut ri.

<sup>28</sup> Yesuq, yhúmhkaû má wang ló é htâng, Yhâng é chángzô pé gi, "Ngamoq gi, haî mù, nat haû lé a wó hkat htoq é lhú?" ga, tsik za Yhang lé myî akô.

<sup>29</sup> Yesuq gi, "Haú jung nat lé gi, kyúdùng é dông za a nghut jáng, wó hkat htoq râ a nghut." ga, yhangmoq lé tû taî ri.

<sup>30</sup> Yhangmoq gi, haú jowò mai htoq ló mù, Galile mau mai lai ló akô; nghut kôlhang, Yesuq gi, ó lé le a sé nhâng naù nghut ri. <sup>31</sup> Haú mù gà le, Yhang gi, "Haú Byu Yhangzo gi, byu pè é loq má ap pyâm é hui râ nghut lhê; haú bang gi, Yhang lé sat pyám kó râ nghut lhê; nghut kôlhang, Yhang gi, shi é htâng sum nyí nghû râ nyí má, dum dui toq râ nghut lhê." ga, Yhâng é chángzô pé lé mhoqshit byí nyi é yanmai nghut ri. <sup>32</sup> Yhâng é chángzô pé gi, dang haú lé a sê gyo kôlhang, Yhâng chyáng a wám myi kó nghut ri.

*Kô Dik Sû Gi, Ó Yuq Nghut Lhê Lhú?*

*Mht 18:1-5; Luk 9:46-48*

<sup>33</sup> Yhangmoq gi, Kaperna-um wà má jé e akô nghut ri. Yesuq gi, yhúmhkaú má nyi tô é hkûn, chángzô pé lé, "Hkyô má, nungmoq, hai hkyô lé dang chyin chyin lhum kô é lhú?" ga myí ri. <sup>34</sup> Nghut kôlhang, yhangmoq gi, zim za nyi tô akô; hkâsu mù gà le, ko dik sû gi, ó yuq nghut lhê nghû é hkyô lé, hkyolat má, yhangmoq dang chyin chyin lhum kô é yanmai nghut ri.

<sup>35</sup> Yesuq gi, zùng mù, haú chángzo raxe í yuq lé, wut yù luí, "Kô dik naú sû ó yuq nghut kôle, tiq dik sû eq banshoq bâng é dui-nhâng zoshâng dut ra râ nghut lhê." ga taí ri.

<sup>36</sup> Hau htâng, Yhang gi, zoshâng rayuq lé shuí yù mù, yhangmoq é gung gûng má shap to luí, dum bún yù mù, yhangmoq lé taí é gi, <sup>37</sup> "Shí sû é zoshâng lé, Ngá é myìng mai hap yu é sû ó yuq nghut kôle, Ngo lé hap yu é sû nghut bê; Ngo lé hap yu é sû ó yuq nghut kôle, Ngo lé za hap yu é a nghut, Ngo lé nhang kat é Sû lé hap yu é le nghut lhê." gà ri.

*Nga-nhúng Lé Gyè A Kut É Sû Gi, Nga-nhùng É Hkyam Shut Nghut Lhê Gà É Hkyô*

*Luk 9:49-50*

<sup>38</sup> Haú hkûn, Yohan gi, "Sarà ê! Náng é myìng lang luí, nat gâng pé lé hkat pyám byí wún é byù rayuq lé, ngamoq myang ri. Yhang gi, nga-nhùng chyáng a lòm sû nghut é yanmai, yhang lé ngamoq hkûm pyâm é nghut lhê." ga taí ri.

<sup>39</sup> Yesuq kúm gi, "Yhang lé hkâhkúm kó; Ngá myìng lé lang luí, laklai kumlhá kut é sû gi, razup za má, Ngò eq séng luí, a ge é hkyô pé lé taí râ a nghut; <sup>40</sup> Hkâsu mù gà le, nga-nhúng lé gyè a kut é sû gi, nga-nhùng é hkyam shut nghut lhê. <sup>41</sup> Ngò, nungmoq lé teng za taí kôlé, nungmoq gi, Hkrisduq eq sêng é bang nghut lhê gà é yanmai, ngá é myìng lé lang luí, nungmoq lé, uchyam ragóm byi huq é sû ó yuq nghut kôle, zuihpau lé hkyak myang hkam yù râ za nghut lhê.

*Mara Shut Nhang É Hkyô*

*Mht 18:6-9; Luk 17:1-2*

<sup>42</sup> Ngo lé lumjìng é zoshâng wuì mà é rayuq lé, mara kut shut nhang é sû gi, yhâng é lingzing má luqluí long mó tuí hut byi luí, wuimau má ê dú hkyó pyâm é huí é nghut lé gi, yhang é matú je gè râ nghut lhê. <sup>43</sup> Náng é loq èq, nang lé mara kut shut nhang é nghut le gi, haú lé hpyit dú pyám aq; loq í loq dap luí, hkâ-nhám le, myiduoq a dat shum é ngaraí ming wàng râ htoq má, loq raloq eq za ahtum abyuoq é asak wó râ shut wàng le gi, náng é matú je ge ri. <sup>44</sup> (Haú ngaraí ming gi, 'yhangmoq lé hkê nyi é luq le a shí, myiduoq le a shúm' é jowò nghut lhê.)\* <sup>45</sup> Náng é hkyi èq, nang lé mara kut shut nhang é nghut le gi, haú lé hpyit dú pyám aq; hkyí í hkyí dap luí, hkâ-nhám le, myiduoq a dat shum é ngaraí ming má dú hkyô pyâm é hui râ htoq má, hkyí rahkyí za dap luí, ahtum abyuoq é asak wó râ shut wang le gi, náng é matú je ge ri. <sup>46</sup> (Haú ngaraí ming gi, 'yhangmoq lé hkê nyi é luq le a shí, myiduoq le a shúm' é jowò nghut lhê.) <sup>47</sup> Náng é myoqjí èq, nang lé mara kut shut nhang é nghut le gi, haú lé lap choq pyám aq; myoqjí í jí dap gû, ngaraí ming má dú hkyó pyâm é hui râ htoq má, myoq rájí eq za, Garai Gasâng é mingdán má wang le gi, náng é matú je ge ri.

<sup>48</sup> (Haú ngaraí ming gi, 'yhangmoq lé hkê nyi é luq le a shí, myiduoq lé a shúm' é jowò nghut lhê.)<sup>☆</sup>

\* 9:44 Bun zo 44, 46, gi, Chyúmlaika myo myo má a bo é nghut lhê. ☆ 9:48 Esai 66:24

<sup>49</sup> Hkâsu mù gâ le, hkungga sho lé xo kat luí lhoq sansêng é su, myi gi, yuq hkanmó lé lhoq sanséng râ nghut lhê.✠

<sup>50</sup> Xo gi, ge lhê. Nghut kôlhang, xomân kân byuq jáng gi, hkâsu kut dum wó lhoq ngam yù râ lú? Nungmoq gi, xo su ngam nyi mù, rayuq eq rayuq nguingón nyi keq." ga taí ri.

## 10

*Myi, Làng Gâng É Hkyô*

*Mht 19:1-12; Luk 16:18*

<sup>1</sup> Hau htâng má, Yesuq gi, Kaperna-um mai htoq ló mù, Yuda mau mâ é maukyo má é jé luí, Yodan làng tû tap má dap ló bê nghut ri; byù myo myo gi, Yhâng chyáng dum zîng lé lô kôluí, Yesuq gi, Yhang lhaq kut nyi é eq rajung za, haú bang lé mhoqshit byi ri.

<sup>2</sup> Hparishe pé ra-am gi, lé jé kômù, "Byù rayuq, yhumsing é yhangmyi lé lhoq kâng pyâm le, tarâ wang lhê lú?" ga myi é dong, Yhang lé chyam wú akô.

<sup>3</sup> Yesuq gi, "Mosheq gi, nungmoq lé, hkâsu ga hkunmó hkyó tô é lú?" ga taú myi ri.

<sup>4</sup> Haú hkûn, yhangmoq gi, "Yuqgè rayuq gi, lhoq kang laiká ká mù, yhangmyi lé wó nhang pyâm lhê ga, Mosheq, ahkáng byi tô ri." ga tû taí akô.

<sup>5</sup> Yesuq dum tû taí é gi, "Nungmoq é myit nhikhum htân kô é yanmai, Mosheq gi, tarâ haú lé kâ tô é nghut lhê. <sup>6</sup> Nghut kôlhang, mau htoq xâng hkun lé, Garai Gasang gi, 'yuqgè eq myiwe lé hpan é nghut lhê'.✠ <sup>7</sup> 'Hau é yanmai, yuqgè gi, yhumsing înu îwâ chyáng mai htoq luí, yhangmyi eq rahá rading ralhum za kut nyi mù, <sup>8</sup> yhangnhik gi, gungsho ralhum za dut byuq kó râ nghut lhê.'✠ Haú mù luí, yhangnhik gi, í yuq a nghut lo é za, rayuq za dut bê nghut ri. <sup>9</sup> Haú mù luí, Garai Gasang lhoq tsûm tô é lé, byù gi, a lhoq kang sháng gaq." gâ ri.

<sup>10</sup> Yhumhkaú má, yhangmoq nyi tô é hkûn lé, chángzô pé gi, haú hkyô eq séng luí, Yhang lé dum saí myi akô. <sup>11</sup> Haú hkûn, Yhang gi, "Yhumsing é yhangmyi lé kâng pyám mù, myiwe gotú dum hâng yu é sù ó yuq nghut kôle, su-myi lú é sù dut bê nghut mù, yhangmyi lé shut é sù nghut bê. <sup>12</sup> Myiwe rayuq le, yhumsing é yhanglâng lé kâng pyám mù, yuqgè góyuq eq dum hâng é nghut le gi, sulàng lú é hkyô lé kut bê nghut ri." ga tû taí ri.

*Zoshâng Wuí Eq Yesuq É Hkyô*

*Mht 19:13-15; Luk 18:15-17*

<sup>13</sup> Byu pé gi, zoshâng wuí lé Yesuq záng byi sháng gaq ga, Yesuq chyáng shuí lé lo akô; nghut kôlhang, chángzô pé gi, yhangmoq lé lhom tân hkûm akô nghut ri. <sup>14</sup> Haú lé Yesuq myàng jáng, Yhang gi, wú nhik-yo naú luí, "Haú zoshâng wuí lé, Ngá chyáng lé nhâng keq; yhangmoq lé hkâhkûm zing to kó; hkâsu mù gâ le, Garai Gasâng é mingdán gi, haú su é bâng é mingdán ru nghut lhê. <sup>15</sup> Ngò, nungmoq lé teng za taí kôlé, ó yuq nghut kôle, Garai Gasâng é mingdán lé, zoshâng su kut a lhom hap yu é nghut le gi, mingdán haú má wó wâng râ a nghut." ga yhangmoq lé taí ri. <sup>16</sup> Hau htâng, Yesuq gi, zoshâng wuí lé bún yú mù, yhangmoq ahtoq má loq ke luí, shimân byi ri.

*Sùt Wó É Zorâm Rayuq É Hkyô*

*Mht 19:16-30; Luk 18:18-30*

<sup>17</sup> Yesuq gi, hkyô dum so xoq e ló é hkûn, byù rayuq gi, din lé lô mù, Yhâng é hí má hkyihput htuq luí, "Ge é Sará ê, ahtum abyuq é asak wó yú râ matú, ngò haí kut ra râ lú?" ga myi ri.

<sup>18</sup> Haú mù, Yesuq gi, "Haí mù, Ngo lé ge é Sará nghu lhê lú? Garai Gasang mai lai luí, ge é ó yuq le a nyi. <sup>19</sup> Jep e tarâ má, 'Byù hkâsat, su-myi sulàng hkâlú, hkâhkau, a teng a mán é saksé hkâhkám, hkâmô zo, nángnu nángwa lé hkungga aq!'✠ ga bo tô é lé, nàng sê lhê." ga tû taí ri.

<sup>20</sup> Haú hkûn, haú yuq gi, "Sará ê, haú pé banshoq lé, ngò, zoshâng hkûn mai cháng bê nghut lhê." ga taí ri.



<sup>21</sup> Yesuq gi, haú yuq lé wú tsuq to mù, yhang lé chyitdap luí, taí é gi, "Nàng kut rà rajung rà tô ashî; ló mù, nàng wó miwó lé ùng pyám luí, myùng bang lé byí pyám aq; haú jáng, nàng, mauhkúng htoq má sutzè wó rà nghut lhê; haú mù, Ngá htàng lé cháng aq." gâ ri.

<sup>22</sup> Haú yuq gi, dang haú lé wó gyo jáng, sutzè gyai wó sù nghut é yanmai, myoqdong shum byuq mù, gyai yhang myit a ngón é èq ló byuq bê nghut ri.

<sup>23</sup> Yesuq gi, lhinghkyuq byu wú mù, Yhâng é chángzô pé lé, "Sutzè wó bang gi, Garai Gasâng é mingdán má wàng rà matú, haú-í yhang wuí ri-nhung!" ga taí ri.

<sup>24</sup> Chángzô pé gi, Yhang taí é dâng é yanmai, mauhong bum akô nghut ri. Nghut kôlhang, Yesuq dum xoq taí é gi, "Zo wuí ê, Garai Gasâng é mingdán má wàng rà matú, haú-í yhang wuí ri-nhung! <sup>25</sup> Sutzè wó sù rayuq, Garai Gasâng é mingdán má wó wàng rà htoq, gola-uq radu âpno mai wó wang lai rà gi, je lui rà nghut lhê." gâ taí ri.

<sup>26</sup> Haú hkûn, chángzô pé gi, je riyhang maú byuq kômù, rayuq eq rayuq, "Haú su ru nghut le gi, ó yuq za hkyi yu é hui rà nghut lhê lú?" ga, taí lhùm bum akô nghut ri.

<sup>27</sup> Haú hkûn, Yesuq gi, yhangmoq lé wú kat mù, "Haú hkyô lé, byù mai gi, wó kut rà a nghut; nghut kôlhang, Garai Gasang gi, wó dut lhê; hkâsu mù gâ le, Garai Gasang gi, lhunglhang lé wó kut é Sù nghut lhê." ga taí ri.

<sup>28</sup> Haú hkûn, Petruq gi, Yhang lé, "Ngamoq gi, wó é gû lhunglhang lé tô pyâm to luí, Náng htàng cháng bê nghut lhê." ga taí ri.

<sup>29</sup> Haú mù, Yesuq tû taí é gi, "Ngò, nungmoq lé teng za taí kôlé, Ngá é yanmai le, gabú danglu é yanmai le, yhumsing é yhùm, gumang gu-nhá, înu îwa, zo dù wuì eq yò pé lé tô pyâm tô é sù ó yuq nghut kôle, <sup>30</sup> shí pyat lhê é yhùm pé, gumang gu-nhá wuí, înu pé, zo dù wuì eq yò pé lé, rashô tú wó hkam yù luí, zing-rí é hkyô pé lé le hui kó rà nghut é htoq agó, htang pyat má le, ahtum abyuq é asak wó yù rà nghut lhê. <sup>31</sup> Nghut kôlhang, hí nghut nyi é bang myo myo gi, htàng gyó byuq kó rà nghut mù, htàng gyó nyi bang yuq gi, hí bekô rà nghut lhê." gâ ri.

*Yesuq, Yhang Shî Râ Hkyô Lé Dum Taí É Hkyô*

*Mht 20:17-19; Luk 18:31-34*

<sup>32</sup> Yhangmoq gi, Yerusalem và mó shut doq ló nyi kô é u lé, Yesuq gi, yhangmoq é hí má sô tô ri; haú hkûn, htàng má sô é bang gi, gyuq nyi bùm kô é u lé, haú chángzô pé gi, maú byuq bum akô nghut ri; Yesuq gi, haú chángzo raxe í yuq lé gotû kut dum wut yù mù, Yhâng chyáng dut lò rà hkyô, yhangmoq lé taí kyô é gi, <sup>33</sup> "Wú keq, nga-nhúng gi, Yerusalem và mó shut doq ló nyi lhê; haú Byu Yhangzo gi, hkyangjong agyi pé eq tarâ sará pê é loq má ap byí pyâm é hui rà nghut lhê; haú bang gi, Yhang lé, shî rà mara byi luí, tûngbau pê é loq má ap byí pyám kó rà nghut lhê. <sup>34</sup> Haú bang gi, Yhang lé, wuizui kut pyâm é, sôkan byé gyûn é, nhuq bat é kut yù mù, sat pyám kó rà nghut lhê. Hau htàng sum nyí má, Yhang dum dui toq lô rà nghut lhê." gâ ri.

*Yakuq eq Yohan nhik dung é hkyô*

*Mht 20:20-28*

<sup>35</sup> Hau htàng má, Zebedi é yhangzo Yakuq eq Yohan nhik gi, Yesuq chyáng lé kômù, "Sarâ ê, ngá-nhik dúng é gû banshoq, Nàng kut byi rà lé, ngá-nhik ô nau ri." ga taí akô.

<sup>36</sup> Haú hkûn, Yhang gi, "Ngò, nungnhik lé haí kut byi rà ô naú akô lú?" ga myí ri.

<sup>37</sup> Yhangnhik gi, "Náng é hpungwup shing kang hkaú má, ngá-nhik tâng lé, Náng é loqyò hkyam má rayuq, loqpaí hkyam má rayuq kut, zùng nhâng laq." ga tû taí akô.

<sup>38</sup> Nghut kôlhang, Yesuq gi, "Nungnhik haí dúng nyi é lé, nungnhik a sé kó nghut ri. Ngò shuq rà góm\* lé, nungnhik wó shuq kó rà lú? Ngò hkam yù rà baptisma lé, nungnhik wó hkam yù kó rà lú?" ga yhangnhik lé tû taí ri.

<sup>39</sup> Haú hkûn, yhangnhik gi, "Nga-nhik wó dut lhê." ga tû taí kôjáng, Yesuq gi, "Ngò shuq rà góm lé, nungnhik shuq kó rà nghut lhê; ngò hkam yù rà baptisma lé le, nungnhik hkam yù kó rà nghut lhê. <sup>40</sup> Nghut kôlhang, Ngá é loqyò, loqpaí hkyam má zùng rà ahkáng lé

\* 10:38 Góm eq baptisma gâ é gi, jamjau hui rà eq shî rà lé, taí nau é nghut lhê.

gi, Ngò byî jung a nghut. Jowò haú pé gi, hen to byî é hui bâng matú za nghut lhê." ga yhangnhik lé taí ri.

<sup>41</sup> Haú su gâ é hkyô lé, haú gotû chángzo raxê yuq wó gyo kôjáng, yhangmoq gi, Yakuq eq Yohan nhik lé nhik-yô akô nghut ri. <sup>42</sup> Yesuq gi, yhangmoq banshoq bang lé wut tsîng yù luí, "Tûngbaù pé lé uphkanq é ga bang gi, tûngbaù pé lé up zô nyî kô é hkyô lé le, haú eq rajung za, yhangmoq é ming up suwún wuí le, yhumsing é ahkáng ayá lé chûng mù, up zô nyî kô é hkyô lé le, nungmoq sê lhê. <sup>43</sup> Nghut kôlháng, nungmoq chyáng gi, haú su a dut kó sháng gaq, nungmoq má, byù mó dut naù sù ó yuq nghut kôle, nungmoq é dui-nhâng zoshâng dut ra râ nghut lhê. <sup>44</sup> Hau htoq agó, nungmoq má ushuq dut naù sù ó yuq nghut kôle, banshoq bâng é jùn dut ra râ nghut lhê. <sup>45</sup> Hkâsu mù gâ le, haú Byu Yhangzo lháng gi, dojaú é lé hkam yù râ matú jé lé é a nghut e za, dojaú râ matú eq byù myo myô é matú, shíhtaí gunglik hkungga dông, Yhâng é asak lé byi pyám râ matú sheq, jé lé é ru nghut lhê." ga, yhangmoq lé taí ri.

*Myoqjit Sù Barateme, Myoq Dum Myang É Hkyô*

*Mht 20:29-34; Luk 18:35-43*

<sup>46</sup> Hau htâng, yhangmoq gi, Yeriho wà má jé ló akô nghut ri. Yesuq eq Yhâng é chángzô pé gi, byù moq mó eq rahá, wà mai htoq ló nyî kô é hkûn, Barateme (Teme é yhangzo) gâ é myoqjit sù rayuq gi, hkyô yàm má dung zô zung tô ri. <sup>47</sup> Yhang gi, Nazaret wà byù Yesuq laí ló é lé wó gyo jáng, "Dawiq é Yhangzo Yesuq ê, ngo lé shogyo yù laq ô!" ga garû kat ri.

<sup>48</sup> Haú mù, byù myo myo gi, zim za nyî râ matú yhang lé tân hkûm akô; nghut kôlháng, yhang gi, "Dawiq é Yhangzo ê, ngo lé shogyo yù laq ô!" ga, je riyhang garû kat ri.

<sup>49</sup> Haú mù luí, Yesuq gi, yap nô kat mù, "Yhang lé ji kat keq." ga taí jáng, yhangmoq gi, "Myit ngón aq hkoi; Yhang, nàng lé ji nyi ri; toq aq." ga myoqjit sù haú lé taí akô. <sup>50</sup> Haú hkûn, haú yuq gi, yhâng é buhîng lé hkyut pyám mù, byam chyù luí, Yesuq chyáng lé jé ri.

<sup>51</sup> Yesuq gi, yhang lé, "Ngò, nang lé haí kut byi râ ô nau ri lhú?" ga myi jáng, yhang gi, "Sarâ ê, ngò myoq myàng nau ri." ga tû taí ri.

<sup>52</sup> Yesuq gi, "Ló aq hkoi, náng é lumjîng myit gi, nàng lé lhoq gê byi bê nghut ri." ga taí kat é hkûn jáng, yhang gi, myoq wó myâng mù, Yesuq e ló é hkyô shut cháng e ló bê nghut ri.

## 11

*Yesuq, Yerusalem Wà Mó Má Wang Ló É Hkyô*

*Mht 21:1-11; Luk 19:28-40; Yhn 12:12-19*

<sup>1</sup> Yesuq eq Yhâng é chángzô pé gi, Yerusalem wà mó eq chyâng lo nyî kô é hkûn, Tsanlun Bùm mâ é Bethpage wà eq Behtani wà má jé ló kôjáng, Yesuq gi, Yhâng é chángzo í yuq lé, <sup>2</sup> "Nungnhik, hí mâ é wà má ê keq; wà haú má wang é hkûn jáng, ó le a jî wú shí é logúng zo tuí to lánq é lé, ê myâng kó râ nghut lhê; haú lé hpyi yù mù, Ngá chyáng she lò keq. <sup>3</sup> Byù rayuq yuq mai, 'Haí mù, haú su kut nyi akô lhú?' ga nungnhik lé lhom myi jáng, 'Shí du lé, haú Yhumsîng râ ri ga, razup má dum taù dé byi râ nghut lhê.' nghû tû taí keq." ga pyîng luí, nhang kat ri.

<sup>4</sup> Haú nhik gi, e ló mù, hkyô mó yâm mâ é hkumdong nàm má tuí tô é logúng zo radu lé, ê myâng kôluí, haú lé tuí hpyi nyi akô. <sup>5</sup> Haú hkûn, haú má yap tô é bang ra-am gi, "Haí mù, logúng tuí hpyi nyi akô lhú?" ga myî akô. <sup>6</sup> Haú jáng, yhangnhik gi, Yesuq pying kat é eq rajung za taí kyo kôjáng, yhangmoq gi, she ló râ ahkáng byî kat akô nghut ri. <sup>7</sup> Yhangnhik, logúng zo haú lé Yesuq chyáng she jé lo é hkûn, logúng hau é gùng htoq má, yhangmoq é buhîng pé buí jáng, hau é ahtoq má, Yesuq doq jî ri. <sup>8</sup> Byù myo myo gi, yhangmoq é buhîng pé lé, hkyô má hkyut hkang byî akô; ra-am gi, yò pé má zân yu é mhandíng lé hkang byî akô nghut ri. <sup>9</sup> Hí má so bang eq htâng má châng é bang gi,

"Hosana!\*

Haù Yhumsîng é myîng mai jé lé lô Sû gi, hkungsô wó nyî sháng gaq ô!

<sup>10</sup> Jé lé lô râ nghut é, nga-nhûng é îwa Dawiq é mingdán gi, hkungsô wó nyî sháng gaq ô!

Htoq tsáng myhâng má hosana nghut sháng gaq ô!"<sup>☆</sup>

ga luî, taî garû bum akô nghut ri.

<sup>11</sup> Yesuq gi, Yerusalem wà mó má jé mù, noqkuq yhûm má wang ê luî, lêngghkyuq mâ é jung hkangmó lé wú ri; nghut kôlhang, bui gyum lô bê nghut é yanmai, Yhâng é chángzo raxe í yuq eq rahá, Behtani wà shut htoq e lô bekô nghut ri.

*Maihpáng Gâm Ashi A Zui Râ Matú Taî É Hkyô*

*Mht 21:18-19*

<sup>12</sup> Hau htang nyî, yhangmoq, Behtani wà mai htoq lô kô é hkûn, Yesuq gi, zo mut bê nghut ri. <sup>13</sup> Yhang gi, ahaq wúm é maihpáng gâm ragàm lé, we we mai byu-myang kat jáng, agàm haú má ashî zui lâhê laq ga ê jé wú le, ahaq mai lai luî, haî le a myàng nghut ri. Haî mù gâ le, maihpáng-shi zui yâm a nghut é yanmai nghut ri. <sup>14</sup> Haù mù, Yesuq gi, shigâm haù lé, "Ahkuî mai gi, náng chyáng mâ é ashî, ó yuq le a myàng zo lo kó sháng gaq." ga taî ri. Yhâng é chángzô pé gi, haù su ga taî é dang lé wó gyô yu akô nghut ri.

*Yesuq, Noqkuq Yhûm Lé Lhoq Sansêng Pyâm É Hkyô*

*Mht 21:12-17; Luk 19:45-48; Yhn 2:13-22*

<sup>15</sup> Yhangmoq, Yerusalem wà mó má jé é hkûn, Yesuq gi, noqkuq yhûm má wang ê mù, haù mâ é zè ung zè wuî kut nyi é bang lé, hkat htoq pyám luî, ngùn htaî zo bâng é siboî pé eq hpûngkyui ung zo bâng é tanghkuq pé lé tu mhuq pyám byî ri. <sup>16</sup> Hau htoq agô, Yhang gi, ó yuq lé nghut kôle, ung zè lé noqkuq yhûm mai a waq lai nhâng kut pyâm ri.

<sup>17</sup> Yesuq, yhangmoq lé mhoqshit é gi,

"Ngá yhûm gi, byù myû lhunglhang bâng é matú, kyûdung yhûm ga râ nghut lhê."<sup>☆</sup> ga kâ tô é a nghut kó lhu? Nghut kôlhang, nungmoq gi, 'domyaq hkyûng' kut pyám bekô nghut ri." gâ ri.<sup>☆</sup>

<sup>18</sup> Hkyangjong agyi pé eq tarâ sará pé gi, haù lé wó gyo kômù, Yhang lé hkâsu kut wó sat pyám râ hkyô ho nyi akô; nghut kôlhang, shiwa byu pé gi, Yhang mhoqshit é hkyô má, myit zìng zuq bùm kô é yanmai, yhangmoq gi, Yhang lé gyuq bum akô nghut ri.

<sup>19</sup> Myinhtâng jé jáng, Yesuq eq Yhâng é chángzô pé gi, wà hkaù mai htoq lô bekô nghut ri.

*Maihpáng Gâm Nyhuî Shi Byuq É Hkyô*

*Mht 21:20-22*

<sup>20</sup> Htang napkyó, yhangmoq sô lai lô le, maihpáng gâm gi, amyit mai yhang nyhuî kyuq shi byuq é lé myang akô. <sup>21</sup> Petruq gi, myit bûn kat luî, "Rabai ê, wú aq! Nàng nhîng pyâm é maihpáng gâm gi, nyhuî shi byuq bê nghut ri." ga luî, Yesuq lé taî ri.

<sup>22</sup> Haù hkûn, Yesuq gi, "Garai Gasang lé lumjîng keq. <sup>23</sup> Ngò, nungmoq lé teng za taî kôlé, ó yuq nghut kôle, i-myt má úng-âng é hkyô a bo é za, yhumsîng taî é hkyô gi, dut lò râ nghut lhê ga lumjîng kô é nghut le gi, bùm shî lé, 'Htot mù, wuimau má lô gyó wâng aq.' ga taî le lhang, haù hkyô dut byi râ nghut lhê. <sup>24</sup> Haù mù luî, Ngò, nungmoq lé taî kôlé, nungmoq haî dúng le le wó yû râ nghut lhê nghû lumjîng kô é nghut le gi, wó yû kó râ za nghut lhê. <sup>25</sup> Mauhkûng htoq mâ é nungmoq é Îwa gi, nungmoq é mara lé hkyut pyám byi sháng gaq, nungmoq gi, kyûdung yap tô é hkûn lé, rayuq yuq, nungmoq lé shut é mara bo é nghut jáng, mara hkyut pyám byi keq; <sup>26</sup> (Nghut kôlhang, nungmoq mai mara a hkyut pyám byi é nghut le gi, mauhkûng htoq mâ é nungmoq é Îwa le, nungmoq é mara lé hkyut pyám byi râ a nghut.)" ga tû taî ri.<sup>†</sup>

\* 11:9 Hebre dang má, hosana gâ é gi, "ahkuî hkyi yù laq" gâ é nghut lhê. Nghut kôlhang, bun zo 9, 10 má gi, hkyá-on dang dông chung é nghut lhê. ☆ 11:10 Hkyá-on 118:25-26 ☆ 11:17 Esai 56:7 ☆ 11:17 Yer 7:11 † 11:26 Bun zo shî gi, Chyúmlaika ra-am má za bo lhê.

*Yesuq É Ahko Ahkáng Lé Myî Chyam É Hkyô*

*Mht 21:23-27; Luk 20:1-8*

<sup>27</sup> Yhangmoq, Yerusalem wà mó má dum jé mù, Yesuq gi, noqkuq yhûm wàng hkaû má sô yông wún é u lé, hkyangjong agyi pé, tarâ sará pé eq suwún wuí gi, Yhâng chyáng lé jé kômù, <sup>28</sup> "Hai ahko ahkâng èq, Nàng, shí pé lé kut nyi lhê lú? Haû su kut râ ahko ahkáng, Nang lé ó yuq byî é lú?" ga myî akô.

<sup>29</sup> Haû jáng, Yesuq gi, "Ngò le, nungmoq lé rajung myî wú kôlé, tû taî wú keq; haû hkûn, hai ahko ahkâng èq, Ngò, shí pé kut é hkyô lé taî kyo râ nghut lhê. <sup>30</sup> Yohan byî é baptisma gi, mauhkûng mai lú? A nghut jáng, byu chyáng mai lú? Taî wú keq!" ga taû myî kat ri.

<sup>31</sup> Haû hkûn, yhangmoq chôm hpyê lhum kô é gi, "'Mauhkûng mai nghut lhê' nghû nga-nhúng taî jáng le, 'Haû nghut le nhîng, haî mù, yhang lé a lumjîng kô é lú?' ga râ nghut; <sup>32</sup> 'Byu chyáng mai nghut lhê.' nghû jáng le..." gâ ri. (Yohan gi, myiqhtoi rayuq gè gè nghut lhê ga, lhunglhâng bang lumjîng bûm kô é yanmai, yhangmoq gi, haû byu pé lé gyuq bum akô nghut ri.)

<sup>33</sup> Haû mù, yhangmoq gi, Yesuq lé, "Ngamoq a sé." ga tû taî akô.

Haû hkûn, Yesuq gi, "Haû jáng, Ngò le, hai ahko ahkâng èq shí pé kut é hkyô lé, nungmoq lé a taî kyo." ga, yhangmoq lé taî ri.

## 12

*Tsibiyiq Hkyâm Saí Bang Lé Dangtú Yu É Hkyô*

*Mht 21:33-46; Luk 20:9-19*

<sup>1</sup> Hau htâng, Yesuq, dangtú dông yhangmoq lé taî é gi, "Byù rayuq gi, tsibiyiq hkyâm rahkyam saí to mù, lhîngkhyuq kyâm to luî, tsibiyiq wing pyik htoq râ dongkong dû to mù, machya ralhum saí tô ri. Hau htâng, yhang gi, hkyâm haû lé, hkyâm saí zo bâng chyáng ngho byî to mù, gó ming shut e ló byuq bê nghut ri. <sup>2</sup> Kyôshu yoq jé jáng, yhang gi, yhang yù âng é tsibiyiq shi ê yû râ matú, dui-nhâng zoshâng rayuq lé, hkyâm saí zo bâng chyáng nhang kat ri. <sup>3</sup> Nghut kôlhâng, haû bang gi, haû yuq lé lhom chyup bat luî, loq kôm taû nhang kat akô. <sup>4</sup> Haû mù, yhang gi, gotû dui-nhâng zoshâng rayuq lé, yhangmoq chyáng dum nhang kat ri; yhangmoq gi, haû yuq lé le, ulhum má lhom bat cheq byi kôluî, hoq lhoq hpû kat akô nghut ri. <sup>5</sup> Hau htâng, rayuq lé dum nhang kat jáng, haû yuq lé gi, lhom sat pyâm akô; Yhang gi, góbang myo myo lé le, yhangmoq chyáng nhang kat ashî nghut ri; yhangmoq kúm gi, ra-am lé lhom bat, ra-am lé lhom sat pyám, kut akô nghut ri.

<sup>6</sup> Ló htáng má, yhang gi, yhang chyitdap é zo lé nhang kat râ za ru nghut alô; haû mù, yhang gi, 'Ngá zo lé gi, yhangmoq lhom hkungga kó râ nghut lhê.' ga, yhangzo lé nhang kat ri.

<sup>7</sup> Nghut kôlhâng, haû bang gi, 'Shí yuq gi, silí wunlí sing yù râ sù nghut lhê; lé keq, yhang lé sat pyám sháng, haû jáng sheq, silí wunlí pé lé nga-nhúng wó yû râ nghut lhê.' ga rayuq eq rayuq taî lhûm bum akô. <sup>8</sup> Haû mù, yhang lé chyup yû luî, sat pyám mù, hkyâm shinggan shut dú htoq pyâm akô nghut ri.

<sup>9</sup> Haû jáng, tsibiyiq hkyâm yhumsîng gi, yhangmoq lé hkâsu kut râ lú? Yhang gi, ê mù, haû hkyâm saí zo bang lé sat pyám luî, hkyâm haû lé, góbang lé htot ngho byî pyám râ nghut lhê. <sup>10</sup> Chyúmdang má, 'Yhûm saí bâng èq hkyin htoq pyâm é luqgok gi, htungchyûn mâ é ahkyak dik é luqgok dut bê.

<sup>11</sup> Shí hkyô gi, haû Yhumsîng kut é nghut luî, nga-nhûng é myoq hí má mauhpo dut bê nghut ri.' ga bò tô é lé, nungmoq a nghap wú kó lú?"<sup>☆</sup> gâ ri.

<sup>☆</sup> 12:11 Hkya-on 118:22-23

<sup>12</sup> Hau htâng, yhangmoq gi, dangtú haû, yhangmoq lé lhoq ang luí taí é hkyô lé, sé kô é yanmai, Yhang lé chyup yû râ matú hkyô ho nyi akô. Nghut kôlhang, yhangmoq gi, byù moq mó lé gyuq kô é yanmai, Yhang lé nyhi pyâm to luí, htoq ló byuq bekô nghut ri.

*Kehta\** *Lé Kang Kat Byî É Hkyô*

*Mht 22:15-22; Luk 20:20-26*

<sup>13</sup> Hau htâng má, yhangmoq gi, Yesuq é dang má mara hô luí Yhang lé chyup yû râ matú, Hparishe pé ra-am eq Herut é byu pé ra-am lé, Yesuq chyáng nhang kat akô. <sup>14</sup> Haú bang gi, Yhâng chyáng lé jé kômù, "Sarâ ê, Nàng gi, tengmán sù nghut é lé, ngamoq sê lhê. Nàng gi, ó haí ga râ lé le haí su a ngàm sù nghut é yanmai, ó yuq é myoqdong lé le a tê byî é za, Garai Gasâng é hkyô lé, tengmán é dông mhoqshit é sù nghut ri. Haú mù, Kehtaq lé kang kat byî le gi, ge lhê lú? <sup>15</sup> Ngamoq kat ra râ lú? A kat ra râ lú?" ga Yhang lé taí akô.

Yesuq kúm gi, yhangmoq, gegùn labyoq kut nyî kô é lé sé mù, "Nungmoq gi, haí mù, Ngo lé lé chyam wú akô lú? Denari ngùn rachap yu lé keq, ngò wú wú bá." ga taí kat ri. <sup>16</sup> Haú hkûn, yhangmoq yu jé lô jáng, Yhang gi, "Shí má, ó yuq é alhô eq masat laiká dap tô ri lú?" ga myî ri.

Yhangmoq gi, "Kehtaq é nghut ri." ga tû taí akô.

<sup>17</sup> Haú mù, Yesuq gi, yhangmoq lé, "Kehtaq é lé gi, Kehtaq lé byi keq; Garai Gasâng é lé gi, Garai Gasang lé byi keq." ga taí jáng, yhangmoq gi, maú byuq bùm bekô nghut ri.

*Saduke Pé, Yesuq Lé Myî Chyam É Hkyô*

*Mht 22:23-33; Luk 20:27-40*

<sup>18</sup> Haú dum dui toq hkyô a joq gâ é Saduke pé gi, Yesuq chyáng lé jé kômù, dangmyi lé myî akô. <sup>19</sup> Yhangmoq myi kô é gi, "Sarâ ê, myiwe wó é byù rayuq gi, zo dù a dap é za shi byuq é nghut jáng, yhanggu gi, yhangmang é awut ashín xoq byi râ matú, yhâng rhat lé chui gon ra râ nghut lhê ga, nga-nhúng lé, Mosheq kê to byî ri. <sup>20</sup> Hí hpyang lé, gumang nhiktâng wuì nyhit yuq nyi akô. Lagám yuq gi, myiwe yù luí, zo dù a dap é za shi ló byuq bê nghut ri. <sup>21</sup> Lanong yuq gi, yhangmang mó é chui lé gon mù, zo dù a dap é za shi ló byuq bê. Lalaq yuq le, haú eq rajung za dut byuq bê nghut ri. <sup>22</sup> Haú nhiktâng wuì nyhit yuq gi, zo dù a dap é chyat shi ló byuq bùm bekô nghut ri. Htâng má, myiwe myhí haú le châng shi ló byuq bê nghut ri. <sup>23</sup> Haú mù luí, haú dum dui toq é buinyi má, myiwe myhí haú gi, hká yuq é yhangmyi nghut râ lú? Hkâsu mù gâ le, yhang gi, haú nyhit yuq é yhangmyi dut wú bê sù nghut ri." gâ akô.

<sup>24</sup> Yesuq gi, yhangmoq lé, "Nungmoq hkyô nghoq é gi, Chyúmdang eq Garai Gasâng é wum-o a-tsam lé, a sé kô é yanmai nghut lhê, a nghut kó lú? <sup>25</sup> Haú shi byuq bê bang dum dui toq é hkûn gi, myi byi myi yû hkyô joq lo râ a nghut; yhangmoq gi, mauhkûng htoq mâ é maumang lagyô pé su dut byuq kó râ nghut lhê. <sup>26</sup> Shi é mai dum lhoq dui toq é hkyô eq séng luí, Mosheq kê tô é laiká má lhang, haú nyé duq nyi é mhanpúng mai, Garai Gasang gi, yhang lé, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.'<sup>☆</sup> ga kê tô é lé, nungmoq a nghap wú kó lú? <sup>27</sup> Garai Gasang gi, shi bê bâng é Garai Gasang a nghut, dui nyi bâng é Garai Gasang sheq ru nghut lhê. Nungmoq gi, shut dik bekô nghut ri." ga taí ri.

*Ahkyak Dik É Jep É Tarâ*

*Mht 22:34-40; Luk 10:25-28*

<sup>28</sup> Tarâ sarâ rayuq gi, lé lô mù, yhangmoq taí htîng lhum nyi kô é lé, lé wó gyô ri. Yhang gi, haú bang lé, Yesuq rago tû taí nyi é lé myàng jáng, Yesuq lé, "Jep é tarâ banshoq má, hká lhum gi, ahkyak dik lhê lú?" ga myî ri.

<sup>29</sup> Haú jáng, Yesuq gi, "Ahkyak dik é jep é tarâ gi, 'Israelaq byu pé ê, gyo wú keq! Nga-nhông é Yhumsîng Garai Gasang za, Garai Gasang nghut lhê. <sup>30</sup> Haú Yhumsîng náng é Garai Gasang lé, náng é myit nhiklhum banshoq, náng é asak woi-nyí lhum gón, nàng

\* 12:12 Kehtaq gâ é gi, "hkoséng" gâ é nghut lhê. ☆ 12:26 Htoq Ló 3:6

myit é hkyô banshoq, náng é wum-o banshoq èq, chyitdap râ lhê.<sup>1☆</sup> gâ é nghut lhê.  
<sup>31</sup> Hau htang lhum gi, 'Náng gûng lé nàng chyitdap é su, náng é chyangnâm mâ é bang lé le chyitdap aq.<sup>☆</sup> gâ é nghut lhê. Shí í lhum htoq kô é tarâ gotû a joq lo." ga yhangmoq lé tâ ri.

<sup>32</sup> Haú hkûn, tarâ sará haú yuq gi, "Gyo naú bê, Sará ê! Garai Gasang rayuq za nghut lhê, gotû a nyi lo ga nàng tâi é gi, têng ri. <sup>33</sup> Garai Gasang lé, náng é myit nhiklhum banshoq èq le, náng é sê gyo é nyan banshoq èq le, náng é wum-o banshoq èq le, chyitdap râ lhê gâ é eq, náng gûng lé nàng chyitdap é su, náng é chyangnâm mâ é bang lé le chyitdap râ lhê gâ é gi, myi nyhé hkungga eq gotû hkungga pé banshoq htoq má, je ahkyak lhê." ga tâ ri.

<sup>34</sup> Yesuq gi, yhang hpaqchyî bo é dông tâi nyi é lé myàng jáng, "Nàng gi, Garai Gasang é mingdán eq a we lo nghut ri." ga yhang lé tâi kat ri. Haú hkûn mai gi, ó yuq le, Yhang lé dangmyi a wám myi lo kó nghut ri.

### *Hkrisduq Gi, Ó Yuq É Yhangzo?*

*Mht 22:41-46; Luk 20:41-44*

<sup>35</sup> Yesuq, noqkuq yhûm má mhoqshit nyi é hkûn lé tâi é dang gi, "Haî mù, haú tarâ sará pé gi, Hkrisduq lé, Dawiq é yhangzo za nghut lhê gâ akô lhu? <sup>36</sup> Dawiq gi, Chyoiyúng Woi-nyí èq taí nhang é má,

'Haú Yhumsîng Garai gi, ngá é Yhumsîng lé, "Ngò, náng é gumlau gye pé lé, náng é hkyiwa ô má tô pyâm é hkyíng jé shoq, Ngá é loqyo hkyam shut zung nyi shi aq." ga tâi ri.<sup>☆</sup>

gâ ri. <sup>37</sup> Haú mù, Dawiq yhang lhang, Hkrisduq lé, Yhumsîng gâ é nghut le gi, yhangzo za hkâsu ge nghut râ lhu?" gâ ri.

Byù hpûng mó gi, Yhâng é dang lé, gabú myit èq gyô nyi bum akô nghut ri.

<sup>38</sup> Yesuq gi, mhoqshit uchyang tâi é má, "Tarâ sará pé lé sidiq nyi keq. Yhangmoq gi, réng é buhîng wut chûng mù, sô yông wún luî, gai pé má lhom shi-kyâm yù râ lé le, <sup>39</sup> tarajong pé mâ é ahkyak dik é zùng jang pé eq poí pé mâ é réng é zùng jowò pé má myang zùng râ lé le, ô nau nyi bum akô. <sup>40</sup> Yhangmoq gi, chuimó pé é yhûm-yò pé lé hpýoq zo hpýoq shuq kôluî, kyû hîng hîng dîng shit mhaú é bang nghut akô. Haú su é bang gi, dam byî é je riyhang hui zo kó râ nghut lhê." gâ ri.

### *Chuimó Myhí Kat É Alu Ngùn*

*Luk 21:1-4*

<sup>41</sup> Yesuq gi, alu sidek nàm má zung to mù, noqkuq yhûm mâ é alu sidek haú má, byù moq mó ngùn kat nyi é lé wú nyi ri. Sùt wó bang myo myo gi, ngùn ga-myhó myhó kat bum akô. <sup>42</sup> Haú hkûn, myung é chuimó myhí rayuq gi, lé mù, gyi htingchap ngùn zo í chap lé kat ri.

<sup>43</sup> Yesuq gi, Yhâng é chángzô pé lé wut yù mù, "Ngò, nungmoq lé teng za taí kôlé, shí myung é chuimó myhí gi, góbang banshoq htoq má je myo kat bê nghut ri. <sup>44</sup> Haú góbang banshoq gi, yhumsîng agùn agó wó é mâ é lé, lé kat akô; yhang kúm gi, myùng sù nghut kôle, yhâng é asak lé baú râ ngùn banshoq lé, kat bê nghut ri." ga tâi ri.

## 13

### *Ló Htâng Buinyì Má Dut Lò Râ Hkyô*

*Mht 24:1-21, 29-35; Luk 21:5-33*

<sup>1</sup> Yesuq, noqkuq yhûm mai htoq ló é hkûn, Yhâng é chángzo rayuq gi, "Sará ê, wú aq; hkâ-í ko é luqgok pé! Hkâ-í hkik é yhûm pé!" ga Yhang lé tâi kat ri.

<sup>2</sup> Haú hkûn, Yesuq gi, "Nàng, yhûm mó shí pé lé myàng lhê a nghut lhu? Luqgok shí pé gi, rachâm htoq racham lhang a kê lhum loshoq, hpýoq hpýi pyâm é hui râ nghut lhê." gâ tâi ri.

<sup>3</sup> Yesuq gi, Tsanlun Bùm má, noqkuq yhûm shut hû mù zung tô é hkûn, Petruq, Yakuq, Yohan eq Andre pé gi, Yhâng chyáng lé jé kômù, <sup>4</sup> "Haú hkyô pé gi, hkâ-nhám dut lò râ lú? Haú dut lò râ hkûn, hkasû é kumlhá htoq lô râ nghut lhê lú? Ngamoq lé taí kyô wú laq." ga Yhang lé baú myí akô nghut ri.

<sup>5</sup> Haú mù, Yesuq gi, yhangmoq lé, "Nungmoq lé, ó yuq èq le a wó shuí nghoq sháng gaq, sidiq nyí keq. <sup>6</sup> Hkâsu mù gâ le, 'Ngò gi, haú yuq\* nghut lhê.' ga, Ngá myíng lé lêng é byù myo myo pô htoq lô mù, byù myo myo lé shuí nghoq kó râ nghut lhê. <sup>7</sup> Nungmoq gi, majan dut nyí é hkyô eq majan eq sêng é danglám pé lé, wó gyo kôjáng, hkâgyuq dàn kó. Haú hkyô pé gi, dut lò râ za nghut lhê; nghut kôlhang, ló htâng é buinyí gi, a nghut shi. <sup>8</sup> Byù ra-myû eq ra-myû, mingdán ralhum eq ralhum majan zân lhûm lò kó râ nghut lhê. Jowò myo myo má, layàng nún é, mutmó gyó é pé dut lò râ nghut lhê. Haú pé gi, wúhke jamjau hkyo é apûn awang za ru nghut ashî.

<sup>9</sup> Nungmoq gùng nungmoq sidiq nyí keq. Hkâsu mù gâ le, yhangmoq gi, nungmoq lé, tarâ rûng pé má é ap pyám kó râ nghut é htoq agó, tarajong pé má nungmoq lé nhuq bat kó râ nghut lhê. Haú htoq agó, nungmoq gi, Ngá myíng é yanmai, mauzau wuì eq hkohkam pé é hí má, saksé dông yap ra kó râ nghut lhê. <sup>10</sup> Haú gabú danglù gi, amyû banshoq lé hí hko kyo ra râ nghut lhê. <sup>11</sup> Nungmoq gi, chyup yu é hui luí, jep hui é hkûn, haí taí râ lé, hkâ-myit chiq kó. Ahkyíng jé jáng, nang lé myit htoq lô nhang é dong za taí aq; hkâsu mù gâ le, dang haú pé gi, nungmoq taí é a nghut, haú Chyoiyúng Woi-nyí èq taí nhang é ru nghut lhê.

<sup>12</sup> Nhiktâng gi, nhiktâng yhangchang, îwa gi, yhangzo lé, shî shoq ap pyâm lhum kó râ nghut lhê; zo wuì gi, mó wuì lé gumlau toq mù, sat pyám nhâng kó râ nghut lhê. <sup>13</sup> Byù lhunglhang bang gi, Ngá é yanmai, nungmoq lé a nguì kut kó râ nghut lhê; nghut kôlhang, jihâm jé shoq wó hkam jân nyí é sù gi, hkyi yu é hui râ nghut lhê.

<sup>14</sup> 'Haú lhoq hten lhoq hpyoq é achâq achyut hkyô<sup>☆</sup> gi, yhang a nyí âng é jowò má yap tô é lé, nungmoq myàng kôjáng (laiká nghap é sù gi, sê gyo sháng gaq), Yuda mau má nyí é bang gi, bùm pé shut hfang doq ló kó sháng gaq. <sup>15</sup> Yhumhkûng htoq má nyí tô é sù gi, yhúmhkaú má é zè haí lé le, a ló gyó wang yù lo sháng gaq. <sup>16</sup> Yò má nyí tô é sù gi, yhâng é buhîng lé a ló taú yu nyí lo sháng gaq. <sup>17</sup> Haú buinyí pé má, zogùng dut é myiwe wuì eq naú huq ashî nghut é înu wuì gi, hkâ-í yhang wúhke bekó nghut ri myhi-nhung. <sup>18</sup> Haú hkyô gi, gyoqmyò má a dut sháng gaq, kyûdûng nyí keq. <sup>19</sup> Hkâsu mù gâ le, Garai Gasang, mingkan lé hpan tô é hkûn mai ahkuí jé shoq, hkâ-nhám le a dut wú shî é wúhke jamjau mó gi, haú buinyí pé má dut lò râ nghut lhê; haú su é hkyô gi, htàngnùng má hkâ-nhám le dum dut lo râ a nghut. <sup>20</sup> Buinyí haú pé lé, haú Yhumsîng Garai mai a lhoq shaú é nghut le gi, ó yuq le asak wó lut râ a nghut. Nghut kôlhang, Yhang hkyin yù bê nghut é, hkyin yù hui bâng é matú gi, buinyí haú pé lé, Yhang lhoq shaú pyám byi bê nghut ri. <sup>21</sup> Haú ahkyíng má, byù rayuq yuq mai, nungmoq lé, 'Wú keq, shî má Hkrisduq nyí ri.' ga le, 'Wú keq, Yhang hê má nyí ri.' ga le, taí jáng, nungmoq hkâjîng kó. <sup>22</sup> Hkâsu mù gâ le, Hkrisduq apyoq pé eq myiqhitoi pyoq pé pô htoq lô mù, wó dut é nghut jáng, hkyin yù hui bang lé lhang, wó lhoq nghoq shoq ga, kumlhá pé eq laklaí kumlhá pé lé kut shit kó râ nghut lhê. <sup>23</sup> Haú mù, nungmoq sidiq nyí keq; ahkyíng a jé shi mai, ngò, nungmoq lé, jung hkangmó taí kyô nyí gù nghut lhê.

<sup>24</sup> Buinyí haú pé má, wúhke jamjau haú pé laí é htâng, 'Buì gi, noq byuq mù, lhamó gi, a tsô dut byuq râ nghut lhê;

<sup>25</sup> kyí pé gi, mauhkûng mai byit gyó lo bùm mù, mauhkûng má é wum-o a-tsam pé gi, lhoq nhûn é huí bùm kó râ nghut lhê.<sup>☆</sup>

<sup>26</sup> Haú hkûn, haú Byu Yhangzo gi, mhut ji mù, hpungwup a-tsam mó eq le, hpungwup shingkang eq le, gyó lé lo é lé, byu pé byu-myàng kó râ nghut lhê. <sup>27</sup> Haú htâng má, Yhang gi, Yhâng é maumang lagyô pé lé nhang kat mù, maumyí chyûn hkangmó eq myigùng

\* 13:6 Haú yuq gâ é gi, Hkrisduq lé gâ é nghut lhê. ☆ 13:14 Dan 9:27; 11:31; 12:11 ☆ 13:25 Esai 13:10; 34:4

htum shoq, mauhkûng htáng shoq mai, Yhang hkyin yu tô é bang lé shuí tsîng yù nhâng râ nghut lhê.

<sup>28</sup> Maihpáng gâm lé wú mù, mhoq yû keq; agàm mai a-nyuq nyún lô mù, ahaq htut lô jáng, bui nyé nám chyâng lò bê lé, nungmoq sê lhê. <sup>29</sup> Haû eq rajung za, shí hkyô pé dut nyi é lé, nungmoq myàng kôjáng, Yhang gi, chyáng bê nghut mù, hkúmdong má lháng nghut nyí bê hkyô lé, nungmoq sé lo keq. <sup>30</sup> Ngò, nungmoq lé teng za taí kôlé, shí pyat mâ é byu pé a ban shi byuq shimá, haû hkyô pé banshoq dut byuq râ nghut lhê. <sup>31</sup> Mauhkûng eq myigùng gi, a joq lo dut byuq râ nghut lhê; nghut kôlhang, Ngá é dang gi, ru joq nyí râ nghut lhê.

*Haû Buinyì Eq Ahkyíng Lé, Ó Le A Sé*

*Mht 24:36-44*

<sup>32</sup> Buinyì eq ahkyíng haû lé gi, ó yuq le a sé; mauhkûng htoq mâ é maumang lagyô pé lháng a sé; haû Zo le a sé; haû Íwa za ru sê lhê. <sup>33</sup> Haû mù, nungmoq gi, ahkyíng haû hkâ-nhám jé râ lé, a sé kô é yanmai, sidiq nyi keq! Machya nyi keq! <sup>34</sup> Haû gi, byù rayuq, yhâng é dui-nhâng zoshâng wui lé, ó le ó eq sêng é mù lé gàm byî to mù, hkum zúng sù lé le, machya nyi râ matú pying to luí, yhâng yhûm lé, haû dui-nhâng zoshâng wui chyáng ap pyâm to mù, byìn we shut htoq ló byuq é sù eq pung ri.

<sup>35</sup> Haû mù, haû Yhumsîng hpó gi, myinhâng laq, myín gunggàm laq, woqtûn hkun laq, maubó zó laq, hkâ-nhám jé lô râ lé nungmoq a sê kô é yanmai, sidiq machya nyi keq. <sup>36</sup> Haû a nghut jáng, Yhang, dàn loq tung tau jé lo é hkûn, nungmoq yhup myhî tô é lé, lo myang pyám râ nghut lhê. <sup>37</sup> Ngò, nungmoq lé, 'sidiq machya nyi keq,' nghû taí é eq rajung za, yuq hkangmó lé le, taí é nghut lhê." ga taí ri.

## 14

*Yesuq, Xû But Byi Huí É Hkyô*

*Mht 26:1-16; Luk 22:1-6; Yhn 11:45-53; 12:1-8*

<sup>1</sup> Ahkuí, haû Lhoqlhai Poí eq múnchi a kat é Muk Zo Poí jé râ í nyí za ru ra alô hkûn, hkyangjong agyi pé eq tarâ sará pé gi, Yesuq lé hkâsu kut wó haq chyup yû mù, sat pyám râ matú, hkyô ho nyi akô nghut ri. <sup>2</sup> Nghut kôlhang, yhangmoq gi, "Byu pé gabyông lô kó abe, poí gyoro má gi, a kut shi sháng." ga taí akô.

<sup>3</sup> Yesuq gi, Behtani wà má nyi é manggâm dap wú sù Simûn é yhûm, siboî má nghe zung tô é hkûn, myiwe myhí rayuq gi, nardu amyit mai za saî yu é, gyai hpaû é namngón xû bo é alabasta (luq hpyû) bòng yu lé lô mù, bòng haû lé lêng hkyui luí, namngón xû haû lé Yesuq é ulhum má hut gyun byî ri.

<sup>4</sup> Haû má nyi tô é bang ra-am gi, wú nhik-yô é myit èq, rayuq eq rayuq taí lhum kô é gi, "Haî mù, namngón xû lé aha agó kut pyâm lhê laq? <sup>5</sup> Haû namngón xû lé, denari\* sùm sho èq ung luí, myùng bang lé byî le ge lhê mhai!" gâ akô. Yhangmoq gi, myiwe myhí hau lé le, gyai chòm tân akô.

<sup>6</sup> Nghut kôlhang, Yesuq gi, yhangmoq lé, "Myiwe zo haû lé, hkâtân nyi kó; haî mù, yhang lé i-myt lhoq myo nhang nyi akô lhú? Yhang gi, Ngá é ahtoq má ge é hkyô kut bê nghut ri. <sup>7</sup> Haû myùng bang gi, nungmoq eq rahá hkâ-nhám le nyi râ nghut lhê mù, nungmoq garúm nau é hkûn, yhangmoq lé wó garúm lhê. Nghut kôlhang, ngò gi, shî má nungmoq eq rahá ayang nyi nyi râ sù a nghut. <sup>8</sup> Yhang gi, yhang wó dut é í kut bê nghut ri. Yhang, Ngá gûng má, namngón xû hut gyûn é gi, Ngá gûng lé yhum râ matú, hí hen lajâng tô é ru nghut lhê. <sup>9</sup> Ngò, nungmoq lé teng za taí kôlé, haû gabú danglù lé mingkan gón hko kyô é jowò hkangmó má, yhang lé myit bûn é dông, yhang kut é hkyô shî lé, taí kyo bekô râ nghut lhê." ga taí kyo ri.

<sup>10</sup> Hau htâng, haû chángzo raxe í yuq má bo é Yudaq Iskarut gi, Yesuq lé ap pyám râ ga, hkyangjong agyi pé chyáng e ri. <sup>11</sup> Haû bang gi, haû hkyô lé lhom wó gyo kôjáng, gyô

\* 14:5 Denari rachap gi, byù rayuq é ra-nyí lhê é zuihpau eq wuí ri.



gabú luî, yhang lé ngùn byi râ ga, danggidiq byî akô. Haû mù, yhang gi, Yesuq lé ap pyám râ hkyô ho nyî bê nghut ri.

*Yhumsing É Myinzang*

*Mht 26:17-30; Luk 22:7-23; Yhn 13:21-30*

<sup>12</sup> Haû htôngli joq é eq rajung za, Lhoqlhai Poî hkungga sauzo jaú byî é, múnchi a kat é Muk Zo Poî sâng-hi nyí má, Yesuq é chángzô pé gi, Yesuq lé, "Nàng zo râ Lhoqlhai Poî lé, ngamoq hkâmá ê món to râ lhu?" ga myí akô.

<sup>13</sup> Haû mù, Yhang gi, chángzo í yuq lé, "Nungnhik, myuq hkaû shut wang ló keq, wuì yambú waq é byù rayuq lhom hui râ nghut lhê; haú hkûn, nungnhik gi, yhâng htâng cháng keq. <sup>14</sup> Haú yuq, wang ló é yhûm mâ é yhumsîng lé, 'Ngò, Ngá é chángzô pé eq rahá, Lhoqlhai Poî lé zo râ bîng wap hkâmá nghut lhê lhu ga, Sará myí nhang kat ri.' nghû taí keq. <sup>15</sup> Haú hkûn, hen to gû nghut é, ahtoq mâ é wap mó lé lhom tûn shit râ nghut lhê. Wap haú má, nga-nhûng é matú ê hen to keq." ga taí luî, nhang kat ri.

<sup>16</sup> Chángzo haú nhik gi, htoq e ló mù, myuq hkaû má wang e ló le, Yesuq taí kat é eq roq za é myâng kômù luî, Lhoqlhai Poî lé, món to bekô nghut ri.

<sup>17</sup> Myinhâng jé lô jáng, Yesuq gi, haû chángzo raxe í yuq eq rahá, haú má lé jé bekô nghut ri. <sup>18</sup> Yhangmoq gi, siboí má nghê mù, zô nyi bùm kô é u lé, Yesuq gi, "Ngò, nungmoq lé teng za taí kôlé, Ngò eq rahá zô nyi é bang nungmoq mâ é rayuq sù gi, Ngo lé ap pyám râ nghut lhê." ga taí ri.

<sup>19</sup> Haú hkûn, yhangmoq gi, gyô yón kômù, rayuq htâng rayuq, "Ngò, a nghut hkaí?" ga Yhang lé myí akô.

<sup>20</sup> Haú hkûn, Yhang gi, "Haú yuq gi, haû raxe í yuq mâ é rayuq nghut lhê. Ngò eq rahá, hkoq shí má muk jùmzo sù nghut lhê. <sup>21</sup> Haû Byu Yhangzo gi, Yhang eq séng luî kâ tô é eq rajung za, shî râ za nghut lhê. Nghut kôlhang, haû Byu Yhangzo lé ap pyâm é sù gi, dingnyé wó ri; haú yuq gi, a hku lé le lhang, je ge ri.

<sup>22</sup> Yhangmoq zo nyi kô é u lé, Yesuq gi, muk lé yù mù, jeju hkya-on luî, muk lé myhik hpé mù, "Shî gi, Ngá é gungsho nghut lhê; yù mù zo keq." ga taí uchyang, Yhâng é chángzô pé lé gàm byî ri.

<sup>23</sup> Hau htâng, Yhang gi, góm lé le, yù mù, jeju hkya-on luî, yhangmoq lé byî ri; yhangmoq banshoq bang gi, haú lé yù shuq akô nghut ri.

<sup>24</sup> Yesuq gi, yhangmoq lé, "Shî gi, byù myo myô é matú htoq pyâm é, dangshikaq eq séng é Ngá sui nghut lhê. <sup>25</sup> Ngò, nungmoq lé teng za taí kôlé, Ngò, Garai Gasâng é mingdán má, tsibiyiq wing asik lé shuq é buinyi a jé jé, tsibiyiq wing lé dum shuq râ a nghut lo." ga taí ri.

<sup>26</sup> Yhangmoq gi, hkya-on mahkôn ralhûm ban hkôn jáng, Tsanlun Bùm shut htoq e ló bekô nghut ri.

*Petruq He-ngik Râ Hkyô Lé, Te Taí É Hkyô*

*Mht 26:31-35; Luk 22:31-34; Yhn 13:36-38*

<sup>27</sup> Yesuq gi, yhangmoq lé, "Nungmoq lhunglhang bang gi, myit lingbat kó râ nghut lhê; hkâsu mù gâ le,

'Haû sau zúng sù lé, Ngò bat sat pyám mù, sau pé gi, lhoq pyo pyâm é hui kó râ nghut lhê.'<sup>☆</sup>

ga kâ tô ri. <sup>28</sup> Nghut kôlhang, Ngò gi, lhoq dui toq é huî htâng má, Galile mau shut, nungmoq é hí má e ló lánng râ nghut lhê." ga taí ri.

<sup>29</sup> Haú hkûn, Petruq gi, "Góbang banshoq myit lingbat kôlhang, ngò gi, myit lingbat râ a nghut." ga taí kat ri.

<sup>30</sup> Haû mù, Yesuq gi, "Ngò, nàng lé teng za taí lé, hkû-nyí, hkû-myîn yhang jáng, woq í dâm a tûn shimá, nàng, Ngo lé sum dâm he-ngik pyám râ nghut lhê." ga tû taí ri.

☆ 14:27 Zhk 13:7

<sup>31</sup> Nghut kôlhang, Petruq gi, "Ngò, Nàng eq rahá shî râ dut kôlhang, Nang lé ngò he-ngik pyám râ a nghut." ga zuq zuq taí ri. Góbang banshoq le, haú su ga châng taí bum akô nghut ri.

*Get-samane Gâ é Jowò Má Kyûdûng É Hkyô*

*Mht 26:36-46; Luk 22:39-46*

<sup>32</sup> Yhangmoq gi, Get-samane gâ é jowò má jé ló kômù, Yesuq gi, Yhâng é chángzô pé lé, "Ngò, kyû ê dũng nyi é u lé, shî má zũng lánq keq." ga taí ri. <sup>33</sup> Yesuq gi, Yhang eq rahá Petruq, Yakuq, Yohan pé lé, shuí chũng ri. Haú hkũn, Yhang gi, myit gyai a ngón é eq myit wuĩhke é hui mù, <sup>34</sup> yhangmoq lé, "Ngò gi, shî râ í yhang myit yón nyi ri; nungmoq gi, machyâ luĩ, shí má lánq nyĩ keq." ga taí ri.

<sup>35</sup> Yesuq gi, haú mai ratsuí zo sô ê mù, myigũng má gop byên to luĩ, ahkyĩng haú lé ge lhoq lhaĩ pyám byĩ le gi, Yhâng chyáng mai lhoq lhaĩ pyám byi râ matú, <sup>36</sup> "Aba,† Áwa ê, Nàng gi, haĩ le wó dut é Sũ nghut lhê. Góm‡ shí lé, Ngá chyáng mai yu pyám byi laq. Nghut kôlhang, Ngò ô nau é dũng a nghut, Nàng ô nau é dũng sheq nghut sháng gaq." ga kyûdũng ri.

<sup>37</sup> Hau htâng, Yhang gi, Yhâng é chángzô pê chyáng dum taũ lo le, yhangmoq yhup myhĩ to kô é lé lo myang ri. Haú mù, Yhang gi, Petruq lé, "Simun, nàng yhup ngón nyi lhê lhu? Razup za lháng a wó machya nyi lhu? <sup>38</sup> Gunglaú é a hui sháng gaq, machyâ luĩ, kyûdũng nyi keq. Haú woi-nyĩ gi, kãm nyi kôlhang, gungsho gi, wum nyhôm nyi ri." ga taí ri.

<sup>39</sup> Yesuq gi, radàm dum ê mù, hí lé dũng é dang lé za, ê dung ri. <sup>40</sup> Yhang dum taũ lo le, yhangmoq gi, myoqkuq lai kô é yanmai, yhup myhĩ to lánq kô é lé, lo dum myang ri. Yhangmoq gi, Yhang lé haĩ taĩ râ a sé dut byuq akô nghut ri.

<sup>41</sup> Yesuq gi, sum dãm nghũ râ lhĩng má, yhangmoq chyáng dum taũ jé lô mù, yhangmoq lé, "Nungmoq gi, ahkuĩ jé shoq yhup ngón nyi ashĩ kó lhu? Gé bê! Haú ahkyĩng gi, jé bê nghut luĩ, haú Byu Yhangzo gi, yubak dap bãng é loq má ap pyám é hui râ nghut bê.

<sup>42</sup> Toq keq! Ló losháng hkoĩ! Ngo lé ap pyám râ sũ gi, jé lé lô bê nghut ri." ga taí ri.

*Yesuq, Chyup Yũ Huĩ É Hkyô*

*Mht 26:47-56; Luk 22:47-53; Yhn 18:3-12*

<sup>43</sup> Yesuq, dãng nyo nyi ashĩ u lé, haú chángzo raxe í yuq má bo é Yudaq gi, haú hkyangjong agyi pé, tarâ sará pé eq suwũn wui chyáng mai nhang kat é bang nghut é, shãm eq dumbáng pé chung tô é byũ moq mó eq rahá jé lé lo ri.

<sup>44</sup> Yesuq lé ap pyám râ sũ gi, yhangmoq lé, "Ngò bopuq puq é sũ gi, haú yuq nghut bê; Yhang lé chyup yũ mù, zũng shuí ló keq." ga kumlhá byĩ to bê nghut ri. <sup>45</sup> Yudaq gi, Yesuq chyáng hkyê za ê mù, "Rabai ê." ga taĩ luĩ, Yhang lé bopuq puq byĩ ri. <sup>46</sup> Haú hkũn, yhangmoq gi, Yesuq lé chôm zũ zĩng mù, chyup yũ bekô nghut ri. <sup>47</sup> Haú mù, nãm má yap tô é byũ rayuq gi, yhâng é shãm lé she htoq yũ mù, hkyangjong mó é dui-nhâng zôshang é nohkyap lé pyoq hkyô kat byi bê nghut ri.

<sup>48</sup> Yesuq gi, yhangmoq lé, "Nungmoq gi, damyaq rayuq lé chyup é su, Ngo lé chyup râ matú, shãm eq dumbáng pé chũng mù, lé lo akô lhu? <sup>49</sup> Ngò gi, nyĩ wuĩ, nungmoq eq rahá nyi luĩ, noqkuq yhũm má mhoqshit byĩ nyi kôlhang, nungmoq, Ngo lé a chyup yũ kô é nghut lhê. Nghut kôlhang, Chyũmdang pé gi, dik ra râ nghut lhê." ga taí ri. <sup>50</sup> Haú hkũn, haú chángzô pé gi, Yesuq lé tô pyám to kôluĩ, hpang byo byuq bekô nghut ri.

<sup>51</sup> Buhĩng za wut é zorâm rayuq gi, Yesuq htâng cháng wũn ri. Yhangmoq gi, haú yuq lé, wó kyaq zui kô é hkũn, <sup>52</sup> yhang gi, buhĩng lé hkyut hkyô pyám to mù, gũngchĩn hpang ló byuq bê nghut ri.

*Yudaq Byĩn Tú Wapdoq Má Jéyáng Huĩ É Hkyô*

*Mht 26:57-68; Luk 22:54-55, 63-71; Yhn 18:13-14, 19-24*

† 14:36 Aba gâ é gi, Aramaik dang dũng "Áwa" gâ é lichyũm nghut lhê. ‡ 14:36 Góm gâ é gi, Yesuq, jamjau hui râ hkyô eq shĩ râ hkyô lé, taĩ nau é nghut lhê.

<sup>53</sup> Yhangmoq gi, Yesuq lé, hkyangjong mó chyáng shuí e akô; haû hkyangjong agyi pé lhunglhang bang, suwún wuî eq tarâ sará pé le, lé zup zîng bum akô. <sup>54</sup> Petruq gi, hkyangjong mó é yhumwàng hkaû má châng jé wâng shoq, we we mai Yesuq htâng châng tô ri. Yhang gi, haú má, zúng bang eq rahá, myihkyóm yâm má gyoq gang zung tô ri.

<sup>55</sup> Haû hkyangjong agyi pé eq Yudaq byìn tú wapdoq gón gi, Yesuq lé sat râ saksé hô kôlhang, haî le a myàng kó nghut ri. <sup>56</sup> Byù myo myo gi, a têng é saksé hkám kôlhang, yhangmoq é dang gi, a tsûng lhum kó nghut ri.

<sup>57</sup> Hau htâng, ra-am gi, toq yap mù, a têng é saksé hkám kô é gi, <sup>58</sup> "Yhang gi, 'Byu loq èq saî é noqkuq yhûm shí lé, Ngò hpyoq hpyi pyám mù, sum nyí gyoro má, byu loq èq a saî é, gotû ralhûm dum saî râ nghut lhê.' ga taî é lé, ngamoq wó gyô ri." ga akô. <sup>59</sup> Nghut kôlhang, yhangmoq é saksé gi, a tsûng lhum kó nghut ri.

<sup>60</sup> Hau htâng má, hkyangjong mó gi, yhangmoq é hí má toq yap mù, "Nàng, haî le a tû taî luq? Shí bang, Nang lé mara hun nyi é saksé gi, hká dông nghut lhê lhú?" ga luî, Yesuq lé myî ri. <sup>61</sup> Nghut kôlhang, Yesuq gi, jit le a ga nyi tô ri.

Haû mù, hkyangjong mó gi, Yesuq lé, "Nàng gi, hkungsô wó Su é yhangzo, Hkrisduq nghut lhê lhú?" ga dum myî ri.

<sup>62</sup> Haú hkûn, Yesuq gi, "Nghut lhê; haû ngò Byu Yhangzo gi, a-tsam bo dik Su é loqyo hkyam<sup>§</sup> má zung tô é lé le, mhuthtui ji mù, mauhkûng mai lé lo é\* lé le, nungmoq myàng kó râ nghut lhê." ga taî ri.

<sup>63</sup> Haú hkûn, hkyangjong mó gi, yhang é bu lé lhang cheq pyám mù, "Nga-nhúng, hai saksé râ ashî lhú? <sup>64</sup> Yhang, Garai Gasang lé rhoî dang taî é lé nungmoq wó gyo bê nghut lhê. Nungmoq hkâsu wó myit akô lhú?" ga myî ri; yhangmoq banshoq bang gi, shí gíng sù nghut ri ga, chôm myit huî akô. <sup>65</sup> Haû mù, ra-am gi, Yhang lé sôkan byé gyun é eq, myoq má nghop pyám byi luî, loqtsup èq htui byî lhê kut mù, "Nang lé ó yuq htui é, myiqhtoî htoî wú aq." ga taî akô. Haû zúng bang gi, Yhang lé shuí yù mù, nhuq bat akô nghut ri.

#### *Yesuq Lé, Petruq He-ngik Pyâm É Hkyô*

*Mht 26:69-75; Luk 22:56-62; Yhn 18:1-18, 25-27*

<sup>66</sup> Petruq gi, wàng hkaû má nyi tô é u lé, haû hkyangjong mó é dui-nhâng zoshâng myhí rayuq jé lé lo ri. <sup>67</sup> Haú yuq gi, Petruq gyoq gang nyi é lé myàng jáng, yhang lé rago wú mù, "Nàng le, Nazaret wà byù Yesuq eq rahá nyi sù nghut ri." ga taî ri.

<sup>68</sup> Nghut kôlhang, yhang gi, "Nàng taî é hkyô lé, ngò, sé le a sé, gyo le a sê gyo." ga he pyám luî, wâng hkúmdong shut htoq e ló bê nghut ri.†

<sup>69</sup> Dui-nhâng zoshâng myhí haû gi, Petruq lé, haú má dum myàng jáng, awui ayàm má yap tô é bang lé, "Shí yuq le, haû hpúng má lom é sù rayuq nghut ri." ga dum taî ri.

<sup>70</sup> Petruq gi, radàm dum he pyâm ri; hau htâng razup zo má, haû nàm má yap tô é bang gi, Petruq lé, "Nàng gi, Galile byù rayuq nghut é yanmai, haú hpúng mâ é byù rayuq hkyak nghut lhê." ga taî akô.

<sup>71</sup> Haú hkûn, yhang gi, yhanggùng yhang nhing luî, "Haû nungmoq taî é byù lé, ngò a sé." ga dakam ri.

<sup>72</sup> Haú u yhang, woq radàm dum tun kat bê nghut ri. Haû mù, Petruq gi, "Woq í dâm a tûn shimá, nàng, Ngo lé sum dâm he-ngik pyám râ nghut lhê." ga, Yesuq, yhang lé taî é dang lé, myit bûn kat mù, wum kat ngau ri.

## 15

#### *Pilat Hí Má Yesuq Jé Nyi É Hkyô*

*Mht 27:1-2, 11-26; Luk 23:1-5, 13-25; Yhn 18:28-19:16*

§ 14:62 Loqyò hkyam gâ é gi, ahko ahkáng wó é jowò lé gâ é nghut lhê. \* 14:62 Mhuthtui ji mù, mauhkûng mai lé lo é gâ é gi, Danielaq 7:14 má bò lhê. † 14:68 Chyúmding ra-am má Haú hkûn jáng, woq tûn bê nghut ri gâ é le bo ri.

<sup>1</sup> Haû napkyó noq za má, hkyangjong agyi pé gi, suwún wuî, tarâ sará pé, Yudaq byin tú wapdoq gón bang eq rahá kut, chôm bóng yû kômù, Yesuq lé tuí yû luí, shuí htoq é kômù, mauzau Pilat chyáng é ap byî akô nghut ri.

<sup>2</sup> Pilat gi, Yesuq lé, "Nàng gi, Yudaq byu pé é hkohkâm nghut lhê lhú?" ga myi jáng, Yesuq gi, "Nàng taí é eq rajung za nghut lhê." ga, tû taí ri.

<sup>3</sup> Haû hkyangjong agyi pé gi, Yhang lé mara gyai myo shoq chôm hun akô. <sup>4</sup> Haû mù, Pilat gi, Yesuq lé, "Wú aq, yhangmoq, nàng lé mara haû myhó hun nyi le, nàng, haí le a tû taí lhú?" ga myî ri.

<sup>5</sup> Nghut kôlhang, Yesuq gi, haí le a tû taí kut jáng, Pilat gi, maú byuq bê nghut ri.

<sup>6</sup> Haû Lhoqlhai Poí u lé, mingbyû wuî dúng é htóng byû rayuq yuq lé, mauzau mai lhaq lhoq htoq byi byi kut é htông joq ri. <sup>7</sup> Haú hkûn, Barabaq gâ é byù rayuq gi, gumlau gabyông é hkûn, byù sat é gumlau bang eq rahá, htóng gyó tô ri. <sup>8</sup> Byù hpûng mó gi, doq lé lô mù, mauzau Pilat lé, yhang lhaq kut é eq rajung za, yhangmoq lé kut byi râ matú, dúng akô.

<sup>9</sup> Haû mù, yhang gi, "Yudaq byu pé é hkohkâm lé nhang htoq kat byi râ lé, nungmoq ô nau akô lhú?" ga myî ri. <sup>10</sup> Pilat, haû su ga myî é gi, haû hkyangjong agyi pé, Yesuq lé manôn kôluí, yhang chyáng lé ap byi kô é hkyô lé sê é yanmai nghut ri. <sup>11</sup> Nghut kôlhang, haû hkyangjong agyi pé gi, Barabaq lé sheq nhâng byi râ matú, Pilat chyáng dung kó sháng gaq ga, haû byù moq mó lé i-myit lhoq toq byî akô.

<sup>12</sup> Pilat gi, "Haû jáng, nungmoq mai Yudaq byu pé é hkohkâm ga sù yuq lé, ngò hkâsu kut râ lhú?" ga yhangmoq lé myî ri.

<sup>13</sup> Haú hkûn, yhangmoq gi, "Yhang lé tapzîng má jén sat pyám aq." ga chôm garu akô.

<sup>14</sup> Haû jáng, Pilat gi, "Haí mù luí lhú? Yhang haí kut shut bê lhú?" ga dum myi jáng, yhangmoq gi, htê mó èq, "Yhang lé tapzîng má jén sat pyám aq." ga je riyhang garû lo bum akô nghut ri.

<sup>15</sup> Pilat gi, haû byù moq mó lé nhik dik nhâng nau é yanmai, Barabaq lé gi, nhang kat byi mù, Yesuq lé gi, nhuq bat nhâng mù, tapzîng má jén sat pyám râ matú, ap byî kat bê nghut ri.

#### *Gyezô Pé Gi, Yesuq Lé Rhoi É Hkyô*

*Mht 27:27-30; Yhn 19:2-3*

<sup>16</sup> Gyezô pé gi, Yesuq lé, Pretori yhumwàng (mauzau hpô é yhumwàng) mó hkaû má shuí wang ló kômù, gyedap gón lé ji tsîng yu akô. <sup>17</sup> Hau htâng, yhangmoq gi, Yesuq lé buhîng nè radung hut byi mù, zujanmaú saí yù kôluí, Yhâng é ulhum má tsung byî akô. <sup>18</sup> Hau htâng, yhangmoq gi, "Yudaq byu pé é hkohkâm hpó ê! Chyung hîng xê hing nyi sháng gaq ô!" ga wut garû akô. <sup>19</sup> Hau htoq agó, yhangmoq gi, Yhâng é ulhum má dumbáng eq adàm dàm bat kômù, sôkan byé gyun luí, Yhâng hí má hkyihput htuq mù, paí mhaû akô nghut ri. <sup>20</sup> Yhangmoq gi, Yhang lé rhoi jihkyoi ban kut yû kôjáng, Yhang wut tô é buhîng nè lé hkyut yû kômù, Yhâng é mebu lé dum hut byi luí, tapzîng má jén sat pyám râ matú, Yhang lé shuí htoq e ló bekô nghut ri.

#### *Yesuq Lé Jén Pyâm É Hkyô*

*Mht 27:31-44; Luk 23:27-43; Yhn 19:17-27*

<sup>21</sup> Alesander eq Ruhpu nhiktang é yhângwa, Kuruni myuq byû nghut é Simun ga sù gi, yosô wà mai lò mù, haú jowò mai lai ló ri. Haû hkûn, gyezô pé gi, yhang lé, tapzîng waq nhang akô nghut ri. <sup>22</sup> Yhangmoq gi, Yesuq lé, Golgahta gâ é jowò má shuí e akô (Golgahta gâ é gi, ugyap joq é jowò lé gâ é nghut ri). <sup>23</sup> Hau htâng, yhangmoq gi, Yhang lé, mura\* eq nyhò tô é tsibiyiq wing huq akô; nghut kôlhang, Yhang gi, a lhom shuq byi nghut ri. <sup>24</sup> Hau htâng má, yhangmoq gi, Yhang lé tapzîng má jén tap to kôluí, Yhâng é mebu pé lé, hkyîn shosé shê mù, âng é đông gam yu pyám byî akô nghut ri.

<sup>25</sup> Yhangmoq, Yesuq lé tapzîng má jén tap pyâm é hkûn gi, napkyó gau hkyíng nghut bê nghut ri. <sup>26</sup> Hau htoq agó, Yhang lé mara hun é đông kê tap to kô é gi, "YUDAQ BYU

\* 15:23 Mura gi, chi wó kut jung xû nghut lhê.

PÊ É HKOHKÂM" gâ ri. <sup>27</sup> Yhangmoq gi, damyaq í yuq lé le, Yhâng é loqyo hkyam shut rayuq, loqpaî hkyam shut rayuq kut, tapzîng htoq má jén tap tô akô nghut ri. <sup>28</sup> (Haû gi, "Yhang gi, yubak dap bâng chyáng nghap lhôm é hui bê nghut ri."☆ gâ é Chyúmdang lé lhoq dik é nghut ri.)† <sup>29</sup> Hkyô sô lái ló é bang gi, nyhap é đông u-ngut nut mù, taí kô é gi, "Noqkuq yhôm lé hpyoq pyâm luí, sum nyí gyoro má dum wó saí lhê ga Sû ê! <sup>30</sup> Náng gùng náng hkyi yù luí, tapzîng mai gyó lò wú aq mhaî!" ga akô nghut ri.

<sup>31</sup> Haû eq rajung za, hkyangjong agyi pé eq tarâ sará pé le, yhangmoq hkaû má, "Shí yuq gi, góbang lé hkyi yù sù nghut kôlhang, Yhânggùng yhang gi, a wó hkyi yù nghut ri myhi-nhung! <sup>32</sup> Nga-nhúng wó myâng mù, lumjîng râ matú, shî, Israelaq byu pê é hkohkâm, Hkrisduq gi, tapzîng mai gyó lo wú sháng gaq." ga, Yhang lé rhoî dang taí akô. Yhang eq rahá tapzîng má jén tap to huí é su nhik le, Yhang lé rhoî dang taí akô nghut ri.

### *Yesuq, Shi É Hkyô*

*Mht 27:45-56; Luk 23:44-49; Yhn 19:28-30*

<sup>33</sup> Nyí-káng raxe í hkyíng mai myinhâng sum hkyíng jé shoq, ramau gón mauchut tuq dut byuq bê nghut ri. <sup>34</sup> Myinhâng sum hkyíng jé é hkûn, Yesuq gi, "Eloi, Eloi, lama sabakhtani."☆ ga, htê mó èq garû kat ri. Haû é lichyúm gi, "Ngá Garai ê, Ngá Garai ê, Náng, haí mù, Ngo lé tô pyâm tô lhê lú?" gâ é nghut ri.

<sup>35</sup> Haû nâm má yap tô é bang ra-am gi, haû lé wó gyo kôjáng, "Gyô wú keq. Yhang gi, myiqhtoi Eliyaq lé wut nyi ri." ga, taí akô.

<sup>36</sup> Haû hkûn, byù rayuq gi, ðin e ló mù, wuimaù lé tsibiyiq wing chyín má jum yù luí, jàm-yang má tuí tap mù, Yesuq shuq sháng ga yhun byi luí, "Eliyaq gi, lé lô mù, Yhang lé lé lhoq hkyô yù abe, nga-nhúng chôm láng wú sháng." ga taí ri.

<sup>37</sup> Yesuq gi, htê mó èq garû kat luí, kâng byit byuq bê nghut ri.

<sup>38</sup> Noqkuq yhôm mâ é pán-gyang gi, ahtoq mai a-ô í hkyam byáng dut byuq bê nghut ri. <sup>39</sup> Yesuq é hí má yap tô é shô up gyezau hpó gi, Yesuq é garu htê lé wó gyo mù, Yhang hkâsu kut shi é lé myàng jáng, "Shí yuq gi, gè gè yhang, Garai Gasâng é Yhangzo nghut ri-nhung!" ga taí ri.

<sup>40</sup> Myiwe wuì ra-am gi, we we mai wú nyi bum akô. Haû bang má, Magadalaq wà mâ é Mariq, Yakuq tiq sù yuq eq Yose nhiktang é yhângnu Mariq eq Salome pé le bo akô nghut ri. <sup>41</sup> Haû bang sum yuq gi, Galile mau má, Yesuq htâng cháng mù, Yhâng râ é hkyô pé lé châng kut byí é bang nghut akô. Yesuq eq rahá, Yerusalem wà mó má doq lé lo é myiwe wuì, góbang myo myo le haû má nyi tô bum akô nghut ri.

### *Yesuq Lé, Myhup Pyâm É Hkyô*

*Mht 27:57-61; Luk 23:50-56; Yhn 19:38-42*

<sup>42</sup> Haû nyí gi, Hên Lajang Buinyì (Bánno buinyi é hí nyí) nghut ri. Haû mù, myinhâng jé lô jáng, <sup>43</sup> Yudaq uphkâng hpúng má bo é, aróng wó é, Garai Gasâng é mingdán lé láng nyi é sù, Aramahti wà byù Yosep gi, myit wum lhoq kîng yù mù, Pilat chyáng wàng luí, Yesuq é gungsôm lé ê ðùng ri. <sup>44</sup> Pilat gi, Yesuq shî bê gâ é hkyô lé wó gyo jáng, maú byuq ri; haû mù, yhang gi, shô up gyezau lé wut yù mù, Yesuq shî teng bê lú ga myí ri. <sup>45</sup> Shî teng bê hkyô lé, shô up gyezau chyáng mai wó sê yù jáng, Pilat gi, Yesuq é gungsôm lé yù râ ahkáng, Yosep lé byi kat ri. <sup>46</sup> Haû mù, Yosep gi, pán yúng lé wui yù luí, gungsôm lé yu hkyó mù, htup yup luí, luqgok lé kyûng tô é lup hkaû má ê kat tô ri. Hau htâng, yhang gi, luphkum má, luqlông èq lhêng chí pyâm tô ri. <sup>47</sup> Magadalaq wà mâ é Mariq eq Yose é yhângnu Mariq gi, Yesuq lé, hkâmá lheq tô é lé, ê myang akô nghut ri.

## 16

### *Dum Dui Toq Lo É Hkyô*

*Mht 28:1-8; Luk 24:1-12; Yhn 20:1-10*

☆ 15:28 Esai 53:12 † 15:28 Bun zo shî gi, chyúmding axau ra-am pé má za bo é nghut lhê. ☆ 15:34 Hkya-on 22:1

<sup>1</sup> Bánno buinyì lai jáng, Magadalaq wà mà é Mariq, Yakuq é yhângnu Mariq eq Salome pé gi, Yesuq é gùng má, ê but byi râ matú namngón jung ê wui akô. <sup>2</sup> Bánno buinyì htang napkyó bui htoq lo é hkûn yang, yangmoq gi, lup shut e ló akô. <sup>3</sup> Yangmoq gi, "Luphkum mà é luqgok lé, ó yuq chyûn lhêng pyám byi râ lú?" ga, rayuq eq rayuq taí lhum akô.

<sup>4</sup> Nghut kôlhang, yangmoq tu wú kat kô é hkûn, luqlong haû gi, lhoq lhêng to lánng é lé, myàng akô nghut ri; luqlong haû gi, gyai kô é nghut lhê. <sup>5</sup> Yangmoq gi, lup hkaû má wang ê kô é hkûn, hpyu é buhîng wut é zorâm rayuq, loqyo hkyam má zung tô é lé, myàng kôjáng, gyuq dan bum akô.

<sup>6</sup> Haû hkûn, haû yuq gi, "Hkâgyuq dàn kó! Nungmoq gi, haû tapzîng má jén sat huí é, Nazaret wà byù Yesuq lé ho akô, a nghut lú? Yang dui toq ló bê! Yang gi, shí má a nyì lo. Yang lé, lheq tô é jowò lé wú wú keq. <sup>7</sup> Ahkuí, nungmoq gi, ló mù, 'Yesuq gi, nungmoq hí má, Galile mau shut so lánng râ nghut lhê. Nungmoq lé, Yang taí tô é eq rajung za, nungmoq gi, Yang lé haû má ló myàng kó râ nghut lhê.' nghû, Yhâng é chángzô pé eq Petruq lé ló taí kyo keq." ga lhom taí kat ri.

<sup>8</sup> Haû mù, myiwe myhí haû bang gi, byòdàn gyuq nán é eq, lup mai hpanng htoq ló akô; yangmoq gi, lûm gyuq byuq kô é yanmai, ó yuq lé lé, haí le a taí kó nghut ri.

(Bun zo 9 mai 20 jé shoq gi, chyúmding axau ra-am pé má a bo é nghut lhê.)

#### *Yesuq Htoq Shit É Hkyô*

*Mht 28:9-10, 16-20; Luk 24:13-53; Yhn 20:11-23; Lagyo 1:6-11*

<sup>9</sup> Yesuq gi, Bánno buinyì htang napsûn lé, Yang dui toq é htâng, Yang mai nat gang nyhit du hkat htoq pyám byi bê sù, Magadalaq wà mà é Mariq lé hí htoq shit ri. <sup>10</sup> Mariq haû gi, ló mù, haû Yesuq eq nyi lai lò bê bang, yón ngau nyì kô é hkûn, haû hkyô lé ló taí kyô ri. <sup>11</sup> Yangmoq gi, Yesuq dum dui bê gâ é hkyô lé le, Yang lé, Mariq myang é gâ é hkyô lé le, wó gyo kôlhang, a jíng kó nghut ri.

<sup>12</sup> Hau htâng má, Yesuq gi, yosò wà shut htoq e ló nyi é chángzo í yuq lé, gotû gunghkyâng dong htoq shit ri. <sup>13</sup> Haû nhik gi, taû lò mù, gotû chángzô pé lé haû hkyô lò shit kyo akô; nghut kôlhang, yangmoq gi, haû lé le a jíng byi kó nghut ri.

<sup>14</sup> Hau htâng má, Yesuq gi, haû chángzo raxe rayuq baú za zang zô nyì kô é hkûn, yangmoq chyáng lé htoq shit ri. Yangmoq chyáng lumjíng myit a bò kô é yanmai le, Yang dui toq é htâng má, Yang lé myang é bang taí kyo kô é dang lé, a jíng é za myit htan to kô é yanmai le, Yang gi, yangmoq lé tân ri.

<sup>15</sup> Hau htoq agó, Yesuq gi, yangmoq lé, "Mingkan jàm shoq htoq ê mù, waxâng zo wuì lhunglhang lé, haû gabú danglù hko kyo keq. <sup>16</sup> Lumjíng mù, wui-myhup hkâm yu é sù ó yuq nghut kôle, hkyi yu é hui râ nghut lhê. Nghut kôlhang, a lumjíng é sù ó yuq nghut kôle, mara byí é hui râ nghut lhê. <sup>17</sup> Lumjíng é bang wó kut shit râ kumlhá pé gi, Ngá é myìng lé lang luí, nat gâng pé lé wó hkat htoq kó râ eq laklai é myíng pé lé dat nyò kó râ nghut lhê; <sup>18</sup> yangmoq gi, lhangmuí pé lé le, wó kui zui kó râ nghut lhê; muí shi jung duq lé, shuq kôlhang, haí dut kó râ a nghut. Nò bâng é htoq má, yangmoq é loq ke byi jáng, nò bang ge byuq kó râ nghut lhê." ga taí ri.

<sup>19</sup> Haû Yhumsîng Yesuq gi, yangmoq lé dang ban taí é htâng má, mauhkûng shut shuí toq yu é hui luí, Garai Gasâng é loqyo hkyam má zung to bê nghut ri. <sup>20</sup> Hau htâng, haû chángzô pé gi, htoq ê mù, jowò hkanngmó má mungdang ê hko kyô akô nghut ri; haû Yhumsîng gi, yangmoq eq rahá nghut nyí mù luí, Yhâng é mungdang têng é hkyô lé tân shit râ matú, yangmoq lé, kumlhá pé wó kut é a-tsam byí é nghut ri. Amen.

## LUKAQ é Gabú Danglù Laiká (The Gospel of Luke)

<sup>1</sup> Aróng wó dik é sù Htohpiluq ê, ngamoq chyáng dut lai lò bê hkyô pé lé, sâng-hi mai yhumsing myoq eq yhang, myang é bang eq, mungdang wùn waq é bang mai shap kyô gyó lô mù luí, <sup>2</sup> byù myo myo gi, shikut luí kê to bekô nghut ri. <sup>3-4</sup> Ngò le haú pé banshoq lé awang mai ahyo hpyot jihkúm nuquq ho myí yù luí, nàng wó sê yu to bê hkyô pé gi, je lhoq gîng é dut sháng gaq nghû, náng é matú banshoq tok za kê kat byi râ lé, ngò wó myit ri.

### *Wui-myhup Sará Yohan Hku Lé Lô Râ Gà É Hkyô*

<sup>5</sup> Yuda mau má Herut hkohkâm up é u lé, Abiyaq hkyangjong hpúng má Zahkariq ga sù hkyangjong rayuq nyi ri. Yhang myi gi, Arun amyû mâ é, Elizabet ga sù nghut ri. <sup>6</sup> Haú nhik gi, Yhumsîng Garaí é jep é tarâ eq htûngtarâ banshoq lé, rago za cháng mù, Garaí Gasâng é hí má dîngmán é su nhik nghut akô. <sup>7</sup> Nghut kôlhang, Elizabet gi, baùdung dung sù nghut é yanmai, yháng nhâm gi, zo dù a dap kó. Yhangnhik gi, asak ipyat le ko bekô nghut ri.

<sup>8</sup> Ahkuí, Zahkariq gi, dum lhing hkyuq lo é hkyangjong mù lé, yhâng é hpúng eq rahá, Garaí Gasâng é hí má lé zui le, <sup>9</sup> haú Yhumsing é noquq yhûm ahkaú má namngón hkungga ê wang nyhé râ matú, hká yuq nghut râ lé hkyangjông pê é htûngli eq rajung za byù hkyîn shosé she wú é hkûn, yhâng chyáng âng ri. <sup>10</sup> Haú mù yhang namngón hkungga lé nyhé é u lé, shiwa byù banshoq gi, yhumpán má, kyûdung nyi akô.

<sup>11</sup> Haú hkûn, Yhumsîng Garaí é maumang lagyo gi, namngón jung nyhé é hkungga gyap é loqyo hkyam má, Zahkariq lé, lé yap shit ri. <sup>12</sup> Zahkariq gi, maumang lagyo haú lé myàng jáng, dan gyuq nyi ri. <sup>13</sup> Nghut kôlhang, maumang lagyo gi, "Zahkariq ê, hkâgyuq, náng é kyûdung dang lé Garaí Gasang gyo byi bê. Haú mù luí, náng é yhumsîng myhí Elizabet gi, náng é matú yuqzo rayuq bau byi berâ nghut lhê; nàng gi, yhang lé Yohan nghû myhíng byi ra râ nghut lhê. <sup>14</sup> Yhang gi, náng é matú gabú hpo eq nguingón é hkyô dut berâ nghut lhê. Yhang lé baú lo é yanmai, byù myo myo le gabú lo bùm berâ nghut lhê. <sup>15</sup> Hkâsu mù gà le, yhang gi, haú Yhumsîng Garaí é hí má ahko ahkáng wó mù luí, byù mó dut râ sù nghut lhê. Yhang gi, tsibiyiq wing eq îhpe lé ge shuq râ sù a nghut; yhâng nû é unghkaú mai yhang, Chyoiyung Woi-nyí eq byíng nyí râ sù nghut lhê. <sup>16</sup> Yhang gi, Israelaq yhangzo yhangshû pé myo myo lé, Yhumsîng yhangmoq é Garaí Gasâng chyáng lhing lò nhâng râ sù nghut lhê. <sup>17</sup> Îwâ pê é myit nhiklum lé gi, zô wui shut, nyo é a gyo bang lé gi, dîngmán bâng é hpaqchyí hkyô shut lhing lò nhâng luí, haú Yhumsîng jé lé râ matú hen tô é byù myû dut nhâng râ matú, Yohan gi, Eliyaq é woi-nyí wum-o wó é eq, Yhumsing é hí má e ló râ nghut lhê." ga luí, yhang lé taí ri.

<sup>18</sup> Haú hkûn, Zahkariq gi, "Haú hkyô lé ngò hkâsu kut wó sé râ l hú? Ngò le mang byuq bê, ngá é yhumsîng myhí le asak ipyat ko bê." ga luí, maumang lagyo lé tû taí ri.

<sup>19</sup> Maumang lagyo haú gi, "Ngò gi, Garaí Gasang eq rahá nyi é sù Gabrielaq nghut lhê. Nang lé gabú danglù shî taí kyo aq ga luí, Yhang, ngo lé nhang kat é nghut lhê. <sup>20</sup> Ahkyíng jé jáng, ngá dang gi, gè gè dut lò râ nghut lhê. Dang shí pé lé nàng a lumjîng é yanmai, mù haú dut lo é buinyí jé shoq, nàng gi, nhut jit byuq râ nghut lhê." ga luí, yhang lé tû taí ri.

<sup>21</sup> Haú u, shiwa byu pé gi, Zahkariq noquq yhûm ahkaú má haú-í myáng shoq lúng byuq é hkyô lé láng maú nyi akô. <sup>22</sup> Zahkariq dum htoq lo le, dang a wó nyo byuq mù shiwa byu pé lé loq lik za lik shit nyi ri. Haú mù luí, yhangmoq gi, noquq yhûm ahkaú má yhang myoqwup shing-rán rajung jung myàng ang bê lé, wú sê yu akô nghut ri.

<sup>23</sup> Ahkuí, Zahkariq gi, hkyangjong jong âng é buinyí ngap jáng, yhûm shut dum taú ló byuq bê. <sup>24</sup> Hau htâng má, yhâng é yhumsîng myhí Elizabet gi, zogûng dut lò mù luí, hká

le a htoq e za lhamó ngo hkyap yhúmhaû má lúng byuq ri. <sup>25</sup> Haú hkûn, yhang gi, "Byu pê hí má ngò hui zô é hoq hpu hkyô lé, Garai Gasang gi, myàng byi luí, shí su dut nhang é dông mai huí sêng pyám byí é buinyì má, Yhang ge é hkyô lé, ngo lé tân shit bê nghut ri." ga taí ri.

#### *Yesuq Hku Lé Lô Berâ Gâ É Hkyô*

<sup>26</sup> Ahkuí, Elizabet zogûng dut é lhamó hkyuq hkyap jé jáng, Garai Gasang gi, maumang lagyo Gabrielaq lé Galile mau, Nazaret wà má nyi é, zomyi gyíng rayuq chyáng nhang kat ri. <sup>27</sup> Zomyi hau é myíng gi, Mariq gâ ri; yhang gi, Dawiq amyû mâ é Yosep gá su èq dúng tô é zomyi nghut ri. <sup>28</sup> Maumang haû gi, Mariq chyáng jé jáng, "Mariq ê, nguínón nyí sháng gaq; Nàng, hkungsô wó nyi ri; Haû Yhumsîng Garai gi, nàng eq rahá nyi nyi ri ò!" ga taí ri.

<sup>29</sup> Mariq gi, dang haû lé gyo sing nán mù, shí su gâ é dang gi, haí jung gá naû é nghut lhê lú ga luí, myit maú nyi ri. <sup>30</sup> Haú hkûn, haû maumang lagyo gi, "Mariq ê, hkâgyuq, nàng gi, Garai Gasâng é hí má myoqdong wó bê nghut ri. <sup>31</sup> Wú aq, nàng zogûng dut lò mù luí, yuqzo rayuq bau râ nghut lhê. Yhâng é myíng lé gi, 'Yesuq' nghu luí, nàng myhíng byi ra râ nghut lhê. <sup>32</sup> Yhang gi, hpung bô sù dut râ nghut mù, Myhang htáng htúm Su é Yhangzo gâ é hui râ nghut lhê. Yhumsîng Garai Gasang gi, yhang lé, yhâng é îchyí îwa Dawiq é hkohkâm tanghkuq lé, byi râ nghut mù luí, <sup>33</sup> Yhang gi, Yakup yhûm\* lé hkâ-nhám le ru-up nyi râ nghut lhê. Yhâng é mingdán le htum nghu é joq râ a nghut." ga luí, yhang lé taí ri.

<sup>34</sup> Haú hkûn, Mariq gi, "Ngò gi, zomyi gyíng ru nghut ashí, haû gi, hkâsu wó dut râ lú?" ga luí, maumang lagyo lé tú taí ri.

<sup>35</sup> Haû maumang lagyo gi, "Chyoiyúng Woi-nyí náng é ahtoq má jé lé mù, Myhang htáng htúm Su é wum-o a-tsam gi, nàng lé shum gum to byi luí, haû baû lò râ Chyoiyúng sù le gi, Garai Gasâng é Yhangzo ga kó râ nghut lhê. <sup>36</sup> Hau htoq agó, wú aq, náng é amyû suisho baùdung myhí Elizabet lháng, mang bê le yuqgè zo wun to bê. Ahkuí, zogûng dut é lhamó hkyuq hkyap wàng bê nghut ri. <sup>37</sup> Hkâsu mù gâ le, Garai Gasang a wó kut é haí le a joq." ga luí, yhang lé tú taí ri.

<sup>38</sup> Haú hkûn, Mariq gi, "Yhumsîng é jùnmyhí ngò nghut nyi lhê; náng é dang eq rajung za ngá chyáng dut lò sháng gaq." ga tú taí ri. Hau htâng, maumang lagyo gi, yhâng chyáng mai ló byuq bê.

#### *Elizabet Lé Mariq Ê Huí É Hkyô*

<sup>39</sup> Hau htâng hkâ-í a myáng má, Mariq gi, Yuda mau bum mau mâ é wà rawà shut hân hân e ló luí, <sup>40</sup> Zahkariq é yhûm má wàng mù, Elizabet eq huí nyo lhûm ri. <sup>41</sup> Mariq é danghtê lé Elizabet wó gyo jáng, yhâng é unghkaû mâ é zoshâng gi, byam chyû lo ri. <sup>42</sup> Elizabet le, Chyoiyúng Woi-nyí byíng to mù luí, Mariq lé htê mó èq taí é gi, "Myiwe banshoq má, nàng gi, hkungsô wó dik sù nghut ri. Náng é unghkaû mâ é zoshâng le hkungsô wó nyi ri ô! <sup>43</sup> Ngá Yhumsîng é yhângnu ngá chyáng jé lé é jeju gi, hai é yanmai nghut bê lú? <sup>44</sup> Wú aq, náng danghtê lé wó gyo kat jáng, ngá unghkaû mâ é zoshâng gi, gabú luí byam chyû nyi ri. <sup>45</sup> Haû Yhumsîng taí é dang gi, gè gè dik lò râ nghut lhê ga luí, lumjínng é myiwe gi, hkungsô wó nyi ri." gâ ri.

#### *Mariq É Hkya-on Dang*

<sup>46</sup> Haú hkûn, Mariq gi,  
"Ngá é i-myt mai haû Yhumsîng lé hkya-on nyi lhê,

<sup>47</sup> ngá é woi-nyí le, Garai Gasang ngá é hkyi yù Sù má gabú nyi lhê.

<sup>48</sup> Ngò Yhâng é jùnmyhí myit nyhum nyi é lé, Yhang myàng byi bê nghut ri.

Wú aq, ahkuí mai ipyat dedu má, ngo lé gi, hkungsô wó nyí sù, gâ nyi bekô râ nghut lhê.

<sup>49</sup> hkâsu mù gâ le, Wum-o Bo Dik é Garai Gasang gi, ngo lé mauho mó kut byi bê nghut ri,

\* 1:33 Yakup yhûm nghu e gi, Israelaq amyû lé gâ lhê.



Yhâng é myìng gi, chyoyúng nyi ri ô.

<sup>50</sup> Yhang lé gyuq hoq nyí bâng é ahtoq má, Yhang shogyo nhikmyîn é hkyô gi, pyat bán hkangmó jé shoq hkâ-nhám le joq nyi râ nghut lhê.

<sup>51</sup> Yhâng é wum-o bo é loq èq mauhpo mù mó pé lé tân shit bê.

Yhumsîng myit é hkyô má nghutbûn nyi é bang lé, Yhang lhoq pyo pyám bê.

<sup>52</sup> Zaugun suwún wuî lé gi, zau zûng tanghkuq mai lhoq hkyô pyám mù, i-myt nyhûm bang lé gi, lhoq myhâng bê nghut ri.

<sup>53</sup> Zòmút hui bang lé gi, ge é zoshuq gyi shoq byi tso mù, sutzè wó bang lé gi, akôm nhang kat bê nghut ri.

<sup>54-55</sup> Nga-nhûng é îchyí îwâ pé lé taî tô é dang eq rajung za, Abraham eq yhangzo yhangshu pé lé,

hkâ-nhám le shogyo nhikmyîn nyi râ gâ e lé myit bûn nyi é yanmai,

Yhâng é dui-nhâng zoshâng Israelaq byu pé lé hku baú nyi ri."

ga luî, taî ri.

<sup>56</sup> Mariq gi, Elizabet chyáng lhamó sum hkyap kô nyi mù luî, yhûm shut dum taû lò byuq bê.

#### *Wui-myhup Sará Yohan Baú É Hkyô*

<sup>57</sup> Hau htâng, Elizabet gi, zoshâng bau râ buinyi jé mù, yuqgè zo bau bê. <sup>58</sup> Yhang lé haû-í kô é jeju Yhumsîng tân shit é hkyô lé, yhâng é yhumkyo buinùm wui eq mung moq gumang wui wó gyo kojáng, yhang eq rahá gabú nyi akô.

<sup>59</sup> Ahkuî shit nyí jé jáng, yhangmoq gi, zoshâng haû lé ahyo-kuq hpyit byi râ matú lé kôluî, yhâng wâ é myìng eq rajung za, Zahkariq ga myhíng byi râ dâ akô. <sup>60</sup> Nghut kôlhâng, yhâng nu gi, "A nghut, Yohan nghû sheq myhíng râ nghut lhê." ga tû taî ri.

<sup>61</sup> Yhangmoq gi, "Náng é amyû suisho má le, haû su gâ é myìng rayuq le a bo wú shi." ga luî, yhang lé taî akô.

<sup>62</sup> Haú hkûn, zoshâng haû lé hkâsu nghû myhíng nau lhê laq ga, yhâng wa lé loq lik lik shit mù myí akô. <sup>63</sup> Zahkariq gi, kê jung longpá dúng yù mù, "Yhâng é myìng gi, Yohan nghut lhê." ga kê shit ri. Haû mù, lhunglhâng bang gi, maú byuq bum akô. <sup>64</sup> Haú hkûn jáng, Zahkariq gi, nhut hkum bóng lô mù, dang wó nyô lui, Garai Gasang lé hkya-ôn nyi ri.

<sup>65</sup> Haû su dut é hkyô lé, wó gyô é awui ayàm lhîngghyûq mâ é lhunglhâng bang gi, gyuq maú byuq bùm kômù, Yuda mau bum mau ramau gón taî pyo ló bum akô. <sup>66</sup> Wó gyô é lhunglhâng bang gi, haú hkyô lé yhumsîng é i-myt unghkaú má kat to mù, "Zoshâng shî gi, hkâsu dut lò râ sù nghut lhê lhu?" ga myit wú nyi akô. Haî mù gâ le, haû Yhumsîng é loq gi, yhang eq rahá nghut nyi é yanmai nghut ri.

#### *Zahkariq É Myiqhtoi Dang*

<sup>67</sup> Haú hkûn, zôshang é yhângwa Zahkariq gi, Chyoyúng Woi-nyí byíng lô mù, myiqhtoi dang dong taî é gi,

<sup>68</sup> "Haû Yhumsîng, Israelaq é Garai Gasang lé hkya-on sháng ô!

Haî mù gâ le, Yhang gi, Yhâng é amyû lé, lé kûm wú mù luî, lé hkyi yù bê nghut ri.

<sup>69</sup> Garai Gasang gi, Yhâng é dui-nhâng zoshâng, Dawiq é amyû mai nga-nhûng é matú wum-o bo é hkyi yu é hkyuî† lé, yuq htoq lô nhâng bê.

<sup>70</sup> Shí hkyô gi, a-nham pyat mai yhâng é chyoyúng myiqhtoî pê é nhut mai taî tô é eq rajung za nghut ri.

<sup>71</sup> Haû hkyuî gi, nga-nhúng lé nga-nhûng é gye pê chyáng mai le, a nguî a nau bang banshoq é loq mai le, hkyi yù râ nghut lhê.

<sup>72</sup> Îwa Garai gi, nga-nhûng é îchyí îwa pé lé shogyo nhikmyin hkyô lé tân shit râ matú, Yhang byî tô é chyoyúng dangshikaq lé a tô-myhí nghut ri.

<sup>73</sup> Haû gi, nga-nhûng é chyiké Abraham lé byi tô é danggidiq nghut lhê.

† 1:69 Hkyi yu é hkyuî gi, Yhumsîng Yesuq lé taî é nghut ri.

- 74-75 Nga-nhúng lé gye pê loq mai hkyi yù râ eq, nga-nhúng asak dui tô é buinyi banshoq má,  
Yhâng é hí má a gyuq a kyum é za, chyoyúng é eq dingmán é hkyô mai,  
Yhang lé wó dojaú nyi nhâng râ matú, Yhang jé lé é nghut lhê.
- 76 Ngá zo ê, nàng gi, Yhumsing é hí má, e ló mù luí, Yhâng é hkyô lé hen lajang byi râ sù  
nghut é yanmai,  
nang lé Myhang htáng htúm Su é myiqhtoi ga kó râ nghut lhê.
- 77 Nàng gi, Garai Gasâng é byu pé lé, yhangmoq é yubak mara hkyut pyám byi é dong,  
hkyi yu é hui râ hkyô lé tái kyo râ sù nghut lhê.
- 78 Haí mù gâ le, Garai Gasâng é shogyo nhikmyin é yanmai, napsûn bui<sup>‡</sup> gi, mauhkûng  
mai nga-nhúng chyáng htoq lé lô râ nghut lhê.
- 79 Yhang gi, mauchut hkaû<sup>§</sup> eq shî wup hkaû má lúng to bang lé builoq su duqbó byi râ  
eq,  
nga-nhúng lé nguingón simsaq é hkyô shut shuî e ló râ sù nghut lhê." ga ri.
- <sup>80</sup> Zoshâng haû gi, kô lò mù, woi-nyí wum-o bo lò luí, Israelaq byu pê chyáng htoq shit  
lo é buinyi jé shoq, yoso pé má nyi nyi ri.

## 2

*Betlehem Wà Mó Má Yesuq Hku Lo É Hkyô**Mht 1:18-25*

- <sup>1</sup> Buinyi haú pé má, Romaq hkoséng ming banshoq mâ é byù lhunglhâng bang gi,  
myìng jihpán kat râ matú, hkoséng Kehtaq Augustuq chyáng mai mungdang htoq ri.
- <sup>2</sup> Jihpán haû lé sâng-hi dàm guq hi é gi, Kuireni ga sù Suriq mau má mauzau kut nyi é  
hkûn nghut ri. <sup>3</sup> Haú hkûn, byù du jup gi, myìng jihpán kat râ matú, ó le ô é wà shut lò  
bum akô.
- <sup>4</sup> Haû mù, Yosep le Dawiq é awut ashín nghut é yanmai, Galile mau Nazaret wà mai,  
Yuda mau mâ é Betlehem gâ é Dawiq é wà shut, <sup>5</sup> yhang dúng tô é myiwe Mariq eq rahá  
myìng kat lhóm râ matú jé doq lò akô; Mariq kúm gi, gungloq lai to bê nghut ri. <sup>6</sup> Haû  
Betlehem má nyi tô ashî le, Mariq gi, zo hkû râ buinyi jé mù, zomún yuqzo lé bau bê.
- <sup>7</sup> Yhang gi, zoshâng haû lé panchoq eq htup mù no tso langhkang má lheq tô ri; haí mù  
gâ le, bíng yhúm má yhangmoq nyi râ jowò a joq lo é yanmai nghut ri.

*Sau Zúng Bang Yesuq Chyáng Jé Lé É Hkyô*

- <sup>8</sup> Ahkuí, haú ginwáng mâ é sau zúng zo bang gi, sau zúng jang má yhangmoq é sau  
hpúng lé, myín lé zúng nyi akô. <sup>9</sup> Haú hkûn, Yhumsing é maumang lagyo gi, yhangmoq  
é hí má lé htoq yap shit to mù, Yhumsing é hpungwup shingkang gi, awui ayàm má  
duqbang lò luí, yhangmoq gyai gyuq bum akô. <sup>10</sup> Maumang lagyo gi, "Hkâgyuq kó, byù  
lhunglhâng bâng é matú, gyai yhang gabú é danglù, ngò nungmoq chyáng wun lé lo lhê.
- <sup>11</sup> Hkû-nyí lhê buinyi má, Hkrisduq\* nghu é Yhumsing nghut é hkyi yù Sù gi, Dawiq é wà  
má nungmoq é matú hku to bê. <sup>12</sup> Nungmoq é matú kumlhá gi, zoshâng nyheqnú rayuq  
panchoq eq htup mù, no tso langhkang má lheq to lánng ra nghut lhê." ga luí, yhangmoq  
lé tái ri.
- <sup>13</sup> Haú hkûn jáng yhang, mauhkûng bang rajùm rayò htoq lò mù, maumang lagyo haû  
eq rahá Garai Gasang lé hkya-ôn é dang gi,
- <sup>14</sup> "Htoq tsáng myhâng má, Garai Gasang gi, hpungwup shingkang bo nyi sháng gaq ô!  
Myigùng htoq má le, Yhang ô nau é byu pé má, nguingón é gi, hkâ-nhám le joq nyi sháng  
gaq ô!"

- <sup>15</sup> Maumang lagyo pé, yhangmoq chyáng mai, mauhkûng shut dum lò byuq jáng,  
sau zúng bang gi, "Sà! Betlehem wà mó má jé shoq yhang, nga-nhúng ê mù, ahkuí za

<sup>‡</sup> 1:78 Napsûn bui gâ é gi, Yesuq lé tái é nghut lhê. <sup>§</sup> 1:79 Mauchut hkaû gâ é gi, Garai lé a sé mù woi-nyí má shi  
tô é bang lé gâ lhê. \* 2:11 Grik dong Hkrisduq gâ é gi, xû but hui Sù gâ é lichyúm nghut mù, Hebre dong "Mesaia"  
gâ é eq rajung za nghut lhê.

Yhumsing nga-nhung lé lé shit kyô lai lô bê hkyô lé ê gôn wú sháng." ga lui, rayuq eq rayuq tai lhum akô.

<sup>16</sup> Hau htang, yangmoq gi, han han ê lui, Mariq eq Yosep lé le, no tso langhkanq má lheq tô é zoshang nyheqnu lé le, ê myang akô. <sup>17</sup> Zoshang hau lé, yangmoq myang kojang, zoshang hau eq séng lui yangmoq lé, lé tai kyô é dang lé, tai pyô kat bekô. <sup>18</sup> Wô gyô é bang banshoq gi, hau sau zung bang tai kyô é dang lé, mau byuq bum akô. <sup>19</sup> Mariq kum gi, dut lo é hkyô pé eq wô gyô é dang banshoq lé unghkau má matsing yu mù lui, nik nik myit wú nyi ri. <sup>20</sup> Sau zung bang gi, yangmoq lé maumang lagyo tai kyô kat é dang eq rajung za, wô gyô yu, wô myang yu é hkyô pé banshoq é yanmai, Garai Gasang lé hkyá-on kungton uchyang dum tai lô bekô nghut ri.

*Yesuq Lé, Noqkuq Yhum Má Shui E É Hkyô*

<sup>21</sup> Zoshang hau, shit nyi jé mù ahyo-kuq hpyit byi ra buinyi má, yang unghkau má a lung shi mai maumang lagyo myhing tô é mying eq rajung za, yang lé, "Yesuq" ga lui, myhing byi akô.

<sup>22</sup> Mosheq é tarâ eq rajung za, yangmoq é lhoq san lhoq séng é buinyi bying jang, Yhumsing é tarâ má, "Zomun yuqzo hkanqmo gi, hau Yhumsing é hi má choyiung sú wô nghu ra matú, Yhumsing chyang ê ap byi ra lhê." <sup>23</sup> "Hpungkyui razum, hau a nghut jang, nghoqmyhu zo í du," <sup>24</sup> hkanqga byi ra lhê ga ka tô é eq rajung za, <sup>24</sup> Mariq eq Yosep gi, zoshang hau lé shui mù Yerusalem wa mó shut ê akô.

<sup>25</sup> Hau hkun, Simeon ga é mangzo rayuq, Yerusalem wa mó má nyi ri. Hau yuq gi, dingman é eq tarâ chang sú nghut mù, Israelaq lé nhik lhoq ting ra ahking lé lang nyi sú nghut ri; hau Choyiung Woi-nyi le, yang é ahtoq má nyi nyi ri. <sup>26</sup> Yang gi, hau Yhumsing Hkrisduq lé a myang é za, shi ra a nghut, ga Choyiung Woi-nyi eq tun shit tô é hui sú nghut lhê. <sup>27</sup> Yang gi, Choyiung Woi-nyi eq shui mù, noqkuq yhumhkaú má é jé nyi tô é hkun lé, Mariq eq Yosep gi, zoshang Yesuq lé htung tarâ eq rajung za kut byi ra matú, noqkuq yhumhkaú má shui wang lô kojang, <sup>28</sup> Simeon gi, zoshang lé loq eq lhom bun yu mù, Garai Gasang lé hkyá-on é dang gi,

<sup>29</sup> "Yhumsing ê, nang é danggidig gi, dik bê nghut ri; hkun-nyi nang é jun ngò gi, nuingon é eq wô shi lô berâ nghut lhê.

<sup>30</sup> Hai mù ga le, byu lhunglhâng bang é matú, nang lajang tô é hkyi yu hkyô lé, nga myoq eq yang wô myang bê.

<sup>31</sup> Hau gi, byu myu changjup wô myang ra matú, nang lajang to byi é nghut mù,

<sup>32</sup> tungbau pé lé, tengman hkyô má bui su duqbó mù hpông shit ra matú le, nang é amyû Israelaq é hpungwup shingkang matú le nghut nyi ri."

ga ri.

<sup>33</sup> Yhangnu eq yhangwa nhik gi, zoshang Yesuq é hkyô lé Simeon tai é yanmai, mau byuq akô. <sup>34</sup> Simeon gi, yangmoq lé shimân byi mù, Yhang nu Mariq lé, "Wú aq, zoshang shi gi, Israelaq ming ma é byu myo myô é matú lingbat jowò eq myo myô é matú kô lò myhang lò ra hkyô le, byu myo myo tai he pyam ra kumha matú le, hkyin tô é hui sú nghut ri. <sup>35</sup> Hau mù, byu myo myô é unghkaú má, myit mi-myit lé lhoq htoq shit ra nghut lhê. Nang é myit nhiklum má, sham chun eq htau kyang kat é su ga é lé, nang hui zo ra nghut lhê." ga tai ri.

<sup>36</sup> Ashe amyû ma é Hpanuelaq é yangzo, Annaq ga é myiqtoi myhi rayuq nyi ri; yang gi, ipyat gyai ko bê. Yang gi, zomyi pyat mai, yanglang eq nyhit zan za nyi lui, shit xe myi zan jé shoq chuimó mó nyi to sú nghut ri. <sup>37</sup> Myiwe hau gi, noqkuq yhum mai a htoq é za, nyi myin a ga noqkuq dojaú nyi mù, zoshuq gam lui kyudung nyi ri. <sup>38</sup> Simeon dang ban tai jang, Annaq gi, hui lé lô mù, Garai Gasang jeju lé hkyá-on lui, Yerusalem wa mó lé Garai Gasang hkyi yu ra ga é lé, myit lum to bang lhunglhâng lé, zoshang hau é hkyô tai kyô ri.

<sup>39</sup> Yosep eq Mariq gi, kut râ pé lé haû Yhumsing é tarâ joq é dông ban kut jáng, Galile mau mâ é yhangmoq wà Nazaret shut dum taû lô bekô. <sup>40</sup> Zoshâng haû gi, kô lò mù, wum-o bò lo é eq, hpaqchyî byéng-yá le byíng nyi ri. Garai Gasâng jeju le, Yhâng é ahtoq má joq nyi ri.

*Noqkuq Yhúmhaû Má Zoshâng Yesuq Jé Nyi É Hkyô*

<sup>41</sup> Yhângnu yhângwâ nhik gi, Lhoqlhai Poî jé hkgangmó, zàn wui Yerusalem wà mó má é ê kut akô. <sup>42</sup> Yesuq raxe í zân jé jáng, poî haû, é bo lòm ra htungli joq é eq rajung za, yhangme wui yhanghpe wui doq lô akô. <sup>43</sup> Haû poî buinyi lai luî, dum taû lo é hkûn, zoshâng Yesuq gi, Yerusalem wà mó má nyi gyó tô ri; nghut kôlhang, yhângnu yhângwâ nhik gi, a sé kó. <sup>44</sup> Yesuq lé rahá lo é luzúm wui chyáng bò râ su ngàm kômù luî, Yosep eq Mariq gi, ra-nyí buigyùm chap sô lô bê htâng má, mung moq wui eq, sê lhûm é buinùm ji-myi wui chyáng Yhang lé châng ho akô. <sup>45</sup> Yhangnhik gi, Yesuq lé a myàng kôjáng, Yhang lé châng hô uchyang, Yerusalem wà mó má dum taû jé e lô bekô. <sup>46</sup> Ahkuî, sum nyí nghû râ nyí sheq, noqkuq yhúmhaû má, tarâ sará pê é gung gûng má zùng to mù, yhangmoq é dang lé gyo yù luî, dum taû myi myi kut nyi é lé, yhangnhik é myàng akô. <sup>47</sup> Yhâng é dang wó gyô é bang banshoq gi, Yhâng é u-nuq nyau é hkyô lé le, Yhang tâ taî é dang lé le, maú nyi akô. <sup>48</sup> Yhang lé myàng jáng, yhangnhik maú byuq kômù luî, yhângnu gi, "Ngá zo ê, haî mù luî ngá-nhik lé isu kut lhê lú? Wú aq, náng wa eq ngá-nhik gi, myit myo myit chiq é èq, nàng lé jaq châng ho pyám bê." ga luî, Yhang lé tâ ri.

<sup>49</sup> Yhang gi, "Haî mù luî, ngo lé châng ho akô lú? mauhkûng mâ é ngá Wâ é yhûm má ngò nyi râ lhê le gi, nungnhik a sé kó lú?" ga luî, yhangnhik lé tâ taî ri. <sup>50</sup> Nghut kôlhang, yhangnhik gi, Yesuq taî é dang lichyùm lé, a sê gyo kó.

<sup>51</sup> Yesuq kúm gi, yhangnhik eq rahá Nazaret wà shut taû jé gyó lô luî, yhangnhik nyo é dang lé gyo mù nyi tô ri. Yhângnu Mariq gi, dut lai lò bê hkyô pé banshoq lé, yhâng é myit nhiklum má matsîng tô ri. <sup>52</sup> Yesuq gi, hpaqchyî byéng-yá kûng zet lo é eq, gunghkyâng kô myhang lò mù, Garai Gasâng é hí má le, byu hí má le, myoqdong wó lo nyi ri.

### 3

*Wui-myhup Sará Yohan Mhoqshit É Hkyô*

*Mht 3:1-12; Mrk 1:1-8; Yhn 1:19-28*

<sup>1</sup> Romaq hkoséng Kehtaq Tiberuq gi, hkó zung é raxe ngo zân nghut é hkûn, Yuda mau má Pontu Pilat gi, mauzau ayá má; Galile mau má, Herut gi, mauzau ayá má; Ituri eq Trakuni mau má, Herut yhanggu Hpilip gi, mauzau ayá má; Abili mau má, Lusanu gi, mauzau ayá má; <sup>2</sup> Anna eq Kayahpaq gi, hkyangjong mó mù má, kut nyi akô. Haû hkûn, Garai Gasâng é mungdang gi, yoso má nyi tô é, Zahkariq é yhangzo Yohan chyáng jé lé ri. <sup>3</sup> Haû mù, yhang gi, Yodan làng yàm jowò hkgangmó má, sô jón wún luî, yubak mara hkyut pyám byî é hui râ matú myit lhîng mù, wui-myhup hkâm\* yù râ hkyô lé, hko kyô nyi ri. <sup>4</sup> Haû gi, myiqhitoi Esai-aq laiká má,

"Haû yoso má, byù rayuq garû taî é htê gi,

'Haû Yhumsing é matú, hkyô hen to keq, Yhâng é matú hkyô lhoq nyhang to keq;

<sup>5</sup> wuihkung langhkop hkgangmó lé lhoq pyíng ra râ nghut lhê;

bùm eq wingkáng hkgangmó lé hpyit pyám ra râ nghut lhê;

agoí aguq é hkyô hkat hkgangmó lé lhoq nyhâng ra râ nghut lhê;

ahkung ahkop dut é hkyô hkat hkgangmó lé lhoq rhá ra râ nghut lhê.

<sup>6</sup> Haû hkûn, byù banshoq gi, Garai Gasâng é hkyi yù hkyô lé myàng râ nghut lhê."<sup>†</sup>☆  
ga luî, kâ tô é eq rajung za nghut ri.

<sup>7</sup> Shiwa byù rajùm rayò gi, Yohan é loq má wui-myhup hkâm yù râ ga luî htoq lé lô kôjáng, Yohan taî é gi, "Duq htan é lhangmuì amyû pé† ê, jé lô râ yubak dam mai wó

\* 3:3 Wui-myhup hkâm gà é gi, baptisma lé gà é nghut lhê. ☆ 3:6 Esai 40:3-5 † 3:7 Lhangmuì amyû pé gà é gi, Lukaq 3:7-10 má bo é Hparishe eq S Duke pé lé taî é nghut ri.

hpang lut kó sháng gaq ga, nungmoq lé ó yuq taí pùn é l hú? <sup>8</sup> Myit lhîng hkyô eq gingdán é ashi zui keq. 'Nga-nhúng gi, Abraham é yhangzo yhangshû pé nghut lhê.'<sup>‡</sup> nghû luí, yhumsing é i-myt unghkaû má hkâtaí kó. Hkâsu mù gâ le, ngò, nungmoq lé taí kyo kôlé, Garai Gasang gi, luqgok shí pé mai, Abraham é matú yhangzô pé wó hpan htoq kat lhê. <sup>9</sup> Ahkuí lháng, Garai Gasang gi, Yhâng é wazung lé haû sîgâm wang pé má tô to bê nghut ri; haû mù, ge é ashi a zui é agàm hkangmó lé gi, htuq lhêng pyám mù, myi má dú kat pyám râ nghut lhê." gâ ri.<sup>§</sup>

<sup>10</sup> Haú hkûn, shiwa byu pé gi, "Haû nghut le gi, ngamoq hkâsu kut le gè râ l hú?" ga luí, yhang lé myí akô.

<sup>11</sup> Yhang gi, "Bu í dung wó sù gi, bu a wó sù lé, gàm byi sháng gaq; zo shuq wó sù le, a wó sù lé, gàm byi sháng gaq." ga luí, yhangmoq lé tû taí kat ri.

<sup>12</sup> Kang guq bang le, wui-myhup hkâm yù râ ga lé lô mù, "Sarâ ê, ngamoq gi, hkâsu kut le ge râ l hú?" ga luí, yhang lé myí akô.

<sup>13</sup> Yhang gi, "Nungmoq hkyui yù râ masat tô é htoq lai shoq hkâyû kó." ga luí, yhangmoq lé taí ri.

<sup>14</sup> Gyezô pé ra-am le, "Ngamoq gi, hkâsu kut le gè râ l hú?" ga luí, yhang lé lé myí akô.

Yohan gi, "Ó lé le hkâkyuq zo ko; a tara é dông mara le hkâhûn kó; nungmoq wó e aphaû èq gé bûn nyi keq." ga luí, yhangmoq lé taí ri.

<sup>15</sup> Shiwa byu pé kúm gi, Hkrisduq lé myit láng nyi tô é bang nghut é yanmai, Yohan lé haú yuq nghut lhê laq ga yhumsing é i-myt unghkaû má myit wú nyi bum akô. <sup>16</sup> Haú hkûn, banshoq bang lé Yohan taí é gi, "Ngò gi, nungmoq lé, wui èq za wui-myhup hkâm byi lhê; nghut kôlhang, ngá htoq má wum-o a-tsam je bo é sù rayuq jé lé lô râ nghut lhê. Ngò gi, yhâng é hkyî-tsung tui lé hpyî râ lháng a gingdán; Yhang gi, Chyoiyúng Woi-nyí má le, myi má le, nungmoq lé wui-myhup hkâm byi râ nghut lhê. <sup>17</sup> Yhang gi, loq má byò chung to mù, guq chyârâng mâ é guq bùm lé hik sân pyám luí, já é guq cham lé gi, guqchyí má tsing kat to mù, guqsôm lé kúm gi, hkâ-nhám le shi byuq a sê é myí èq nyhê hkyô pyám râ nghut lhê." gâ ri.\* <sup>18</sup> Haû mù, Yohan gi, byù haú bang lé gotû dang myo myo èq lhoq pun lhoq kying mù, gabú danglù lé hko kyô nyi ri.

<sup>19</sup> Nghut kôlhang, hkâ-myháng a myáng má mauzau Herut gi, yhanggû é yhangmyi Herudiaq lé lú yu é hkyô eq, yhang kut shut é gotû a ge é mù banshoq é yanmai, Yohan gi, yhang lé tân mhoqshit bê nghut ri. <sup>20</sup> Mara haú pê htoq agó, Herut dum kut jat yu é mara gi, Yohan lé htóng má lhûng kat é nghut ri.

*Yesuq, Wui-myhup Hkâm Yu É Hkyô*

*Mht 3:13-17; Mrk 1:9-11*

<sup>21</sup> Yohan lé htóng má a lhûng kat shimá, byù myo myo gi, wui-myhup hkâm yu nyi kô é hkûn, Yesuq le Yohan chyáng wui-myhup hkâm yù mù, kyûdûng nyi le, mauhkûng bóng lô mù, <sup>22</sup> haú Chyoiyúng Woi-nyí gi, hpûngkyui gunghkyâng sù é dông mai Yhâng ahtoq má lé gyó nô ri. Haú hkûn, "Nàng gi, Ngò chyitdap é Ngá zo nghut lhê; Nàng é ahtoq má Ngò gabú myit ngón nyi lhê." ga mauhkûng mai danghtê htoq lo ri.

*Yesuq É Byù Xik Shap Kyô É Hkyô*

*Mht 1:1-17*

<sup>23</sup> Yesuq gi, Yhang mù zuí hi é hkûn, asak sum xê zàn kô nghut bê; Yhang lé byù hkyam dông gôn wú jáng, Yhang gi, Yosep é yhangzo nghut ri; Yosep gi, Heli é yhangzo, Heli gi, Mahtat é yhangzo, <sup>24</sup> Mahtat gi, Lewiq é yhangzo, Lewiq gi, Melahki é yhangzo, Melahki gi, Yannai é yhangzo, Yannai gi, Yosep é yhangzo, <sup>25</sup> Yosep gi, Matahtiaq é yhangzo, Matahtiaq gi, Amo é yhangzo, Amo gi, Nahum é yhangzo, Nahum gi, Esali é yhangzo, Esali gi, Nagai é yhangzo, <sup>26</sup> Nagai gi, Maat é yhangzo, Maat gi, Matahtiaq é yhangzo,

‡ 3:8 Nga-nhúng gi, Abraham é yhangzo yhangshû pé nghut lhê gâ é gi, Abraham é yhangzo yhangshu nghut é yanmai, Garai Gasang jéyáng é lé a hui râ ga, myit yu é hkyô nghut ri. § 3:9 Bun zo shí lhûm é lichyúm gi, myit a lhîng bang lé, Garai Gasang jéyáng é buinyí jé râ nghut lhê ga naú é nghut ri. \* 3:17 Haú eq rajung za, Hkrisduq gi, a ge é byu pé eq ge é byu pé lé gam hkoq pyám râ nghut lhê.

Matahtiaq gi, Semai é yhangzo, Semai gi, Yosek é yhangzo, Yosek gi, Yodaq é yhangzo, <sup>27</sup>Yodaq gi, Yohan é yhangzo, Yoanan gi, Resa é yhangzo, Resa gi, Zerubabelaq é yhangzo, Zerubabelaq gi, Shalahtila é yhangzo, Shalahtila gi, Neri é yhangzo, <sup>28</sup>Neri gi, Melahki é yhangzo, Melahki gi, Adi é yhangzo, Adi gi, Kusam é yhangzo, Kusam gi, Elamadam é yhangzo, Elamadam gi, Era é yhangzo, <sup>29</sup>Era gi, Yoshuq é yhangzo, Yoshuq gi, Elieze é yhangzo, Elieze gi, Yorim é yhangzo, Yorim gi, Mahtat é yhangzo, Mahtat gi, Lewiq é yhangzo, <sup>30</sup>Lewiq gi, Simeon é yhangzo, Simeon gi, Yudaq é yhangzo, Yudaq gi, Yosep é yhangzo, Yosep gi, Yonam é yhangzo, Yonam gi, Eliakim é yhangzo, <sup>31</sup>Eliakim gi, Mela é yhangzo, Mela gi, Menaq é yhangzo, Menaq gi, Matahta é yhangzo, Matahta gi, Nahtan é yhangzo, Nahtan gi, Dawiq é yhangzo, <sup>32</sup>Dawiq gi, Yese é yhangzo, Yese gi, Obet é yhangzo, Obet gi, Bua é yhangzo, Bua gi, Salamun é yhangzo, Salamun gi, Nashon é yhangzo, <sup>33</sup>Nashon gi, Aminada é yhangzo, Aminada gi, Arni é yhangzo, Arni gi, Hesrun é yhangzo, Hesrun gi, Hparet é yhangzo, Hparet gi, Yudaq é yhangzo, <sup>34</sup>Yudaq gi, Yakup é yhangzo, Yakup gi, Isak é yhangzo, Isak gi, Abraham é yhangzo, Abraham gi, Htara é yhangzo, Htara gi, Nahura é yhangzo, <sup>35</sup>Nahura gi, Seruk é yhangzo, Seruk gi, Re-u é yhangzo, Re-u gi, Hpelek é yhangzo, Hpelek gi, Ebera é yhangzo, Ebera gi, Shela é yhangzo, <sup>36</sup>Shela gi, Kainan é yhangzo, Kainan gi, Arhpaza é yhangzo, Arhpaza gi, Shem é yhangzo, Shem gi, Noaq é yhangzo, Noaq gi, Lamek é yhangzo, <sup>37</sup>Lamek gi, Mehtusela é yhangzo, Mehtusela gi, Enuq é yhangzo, Enuq gi, Yaret é yhangzo, Yaret gi, Mahelela é yhangzo, Mahelela gi, Kainan é yhangzo, <sup>38</sup>Kainan gi, Enu é yhangzo, Enu gi, Shet é yhangzo, Shet gi, Adam é yhangzo, Adam gi, Garai Gasâng é yhangzo nghut ri.

## 4

*Yesuq Lé Tsadán Gunlaú É Hkyô**Mht 4:1-11; Mrk 1:12-13*

<sup>1</sup> Yesuq gi, Chyoiyúng Woi-nyí èq byíng mù, Yodan làng mai dum taú lo é hkûn, Chyoiyúng Woi-nyí gi, Yhang lé yoso shut shuí e ri. <sup>2</sup> Haú má, Yesuq gi, buinyí myi xê nyí jé shoq, nat Tsadán èq gunlaú é huí ri. Buinyí haú gyoro má, Yesuq gi, haí le a zô é yanmai, zòmüt hui bê nghut ri.

<sup>3</sup> Haú mù luí, nat Tsadán gi, "Nàng, Garai Gasâng é Yhangzo nghut le gi, luqgok shí lé muk dut nhâng aq." ga luí, Yhang lé taí ri.

<sup>4</sup> Haú hkûn, Yesuq gi, "'Byù gi, muk èq za asak duì râ a nghut.' ga luí, Chyúmdang má kâ tô ri." <sup>✠</sup> ga yhang lé tû taí ri.

<sup>5</sup> Hau htâng, nat Tsadán gi, Yesuq lé, gyai yhang myhang é bùm htoq má shuí doq ló mù, mingkan má joq é mingdán pé banshoq lé razup má za tân shit luí, <sup>6</sup> "Shí ahkáng ayá banshoq eq haú mingdán é hkikhkâm hkyô banshoq, ngò nang lé wó byí lhê; hkâsu mù gâ le, haú pé banshoq gi, ngo lé ap byí to bê nghut mù, ngò byí nau é sù ó yuq lé nghut kôlhâng, byi râ nghut lhê. <sup>7</sup> Haú mù, Nàng, ngo lé noq é nghut jáng, shí pé banshoq Náng é dut râ nghut lhê." ga, Yesuq lé taí ri.

<sup>8</sup> Haú hkûn, Yesuq gi, "'Haú Yhumsîng náng é Garai Gasang lé za, nàng noqkuq dojaú ra râ nghut lhê.' <sup>✠</sup> ga luí, Chyúmdang má kâ tô ri." ga luí, yhang lé tû taí ri.

<sup>9</sup> Nat Tsadán gi, Yesuq lé Yerusalem wà mó má shuí è mù, noqkuq yhum je myhang é shúhtâng htoq má yap nhang to luí, "Nàng, Garai Gasâng é Yhangzo nghut le gi, shí mai byam gyó kat wú aq. <sup>10</sup> Hkâsu mù gâ le,

'Nang lé upzúng byí nyí râ matú, Garai Gasang gi, Yhâng é maumang lagyô pé lé taí to râ nghut mù,

<sup>11</sup> luqgok má náng é hkyí a ló htung shoq, yhangmoq é loq èq Nang lé lhom bún yú kó râ nghut lhê.' <sup>✠</sup>

ga luî, Chyúmdang má kê tô ri." ga taî ri. <sup>12</sup> Nghut kôlhang, Yesuq gi, "'Haû Yhumsîng, nungmoq é Garai Gasang lé, wó chyam wú râ a nghut." <sup>☆</sup> ga luî, Chyúmdang má bo tô ri." ga, yhang lé tâ taî ri.

<sup>13</sup> Nat Tsadán gi, gunglaú é hkyô pé banshoq ban kut jáng, ahko ahkáng láng wú uchyang yhang chyáng mai byam gâng nyi byuq ri.

*Yesuq Lé Nazaret Wà Bang He-ngik Pyâm É Hkyô*

*Mht 4:12-17; 13:53-58; Mrk 1:14-15; 6:1-6*

<sup>14</sup> Yesuq kúm gi, Chyoiyúng Woi-nyí wum-o byíng é èq Galile mau shut dum taû lo ri. Haû mau jowò hkanmó má, Yhâng é hkyô lé tâ pyo ló bùm bekô. <sup>15</sup> Yhangmoq é tarajong pé má, Yesuq mhoqshit byi mù, lhunghâng bang gi, Yhang lé tâ hkya-ôn nyi bum akô.

<sup>16</sup> Hau htâng má, Yhang nyi kô lo é Nazaret wà má dum taû jé ló bê; Yhang gi, hkâ-nhám le kut nyi é eq rajung za, Bánno buinyí\* lé tarajong má wang ê mù, laiká nghap râ ga toq yap é hkûn, <sup>17</sup> Yhang lé myiqhtoi Esai-aq chyúmding byi kôjáng, Yhang chyúmding haû lé hpông kat le,

<sup>18</sup> "Yhumsîng é Woi-nyí gi, ngá é ahtoq má nyi nyi ri;

hkâsu mù gâ le, asho awuí é bang lé gabú danglù hkô kyo râ matú, Yhang ngo lé hkyin yù bê.

Htóng lúng bang lé lhoq htoq râ hkyô eq, myoqjit bang lé myoq dum myàng nhâng râ hkyô hkô kyo râ matú le,

zik zo huí é bang lé nhang kat nhâng râ eq,

<sup>19</sup> Yhumsîng, Yhâng é byu pé lé hkyi yù râ ahkýing zanwut lé hkô kyo râ matú le, Yhang, ngo lé nhang kat bê nghut ri." <sup>☆</sup>

ga luî, kê tô é jowò lé myang záng mù nghap ri.

<sup>20</sup> Hau htâng, Yesuq gi, chyúmding haû lé ding mù, shuí-u sù lé tau byí pyám luî, dum zung tô ri; tarajong mâ é byù lhunghâng bang gi, Yesuq lé chôm wú tô é hkûn, <sup>21</sup> Yesuq gi, "Nungmoq é nohkyap má, ahkuí wó gyô é Chyúmdang shí gi, hkû-nyí yhang lo dik bê." ga luî, yhangmoq lé tâ hi kat ri.

<sup>22</sup> Lhunghâng bang gi, Yhang ge é hkyô lé saksé hkám byi kômù, Yhâng é nhut mai htoq é jeju bo é dang lé le, maú kôluí, "Shí yuq gi, Yosep é yhangzo a nghut lúhú?" ga taî bum akô.

<sup>23</sup> Haû mù luí, Yesuq gi, "Nungmoq gè gè yhang, 'Chi sará ê, yhumsing gùng lé lhoq ge yù aq.' <sup>†</sup> gâ é sanghkyang èq le, 'Nàng, Kaperna-um wà má kut shit wú é hkyô ngamoq wó gyo bê, haû eq rajung za, nàng, náng é yhum mau má le, kut shit wú aq.' ga luí le, ngo lé taí kó râ nghut lhê." ga taî ri.

<sup>24</sup> Yhang dum xoq taí é gi, "Ngò, nungmoq lé teng za taí kôlé, myiqhtoi ó yuq le yhumsing é yhum mau má myoqdong wó wú é a nghut. <sup>25</sup> Ngò, nungmoq lé teng za taí kôlé, Eliyaq é pyat lé, Israelaq ming má chuimó myo myo nyi bum akô. <sup>26</sup> Nghut kôlhang, haû ming má sùm zan eq lhamó hkyuq hkyap yhang, mau a wò dut byuq mù, mutmó gyó tô é hkûn, Garai Gasang gi, yhangmoq mâ é rayuq chyáng le, Eliyaq lé a nhang kat é za, Sidun mau Zarephta wà mâ é, chuimó myhí rayuq chyáng sheq nhang kat byí é nghut lhê. <sup>27</sup> Myiqhtoi Elisha é pyat má le, Israelaq ming má, manggâm dap é byù myo myo nyi kôlhang, yhangmoq chyáng mâ é rayuq le wó sân-yúng yù kô é a nghut; Suriq byù Naman ga sù tûngbaù hpó za sheq wó sân-yúng é nghut lhê." ga taî ri.

<sup>28</sup> Tarajong hkaû mâ é lhunghâng bang gi, haû hkyô lé wó gyo kôjáng, gyai yhang nhik-yo nau bùm kômù, <sup>29</sup> toq yap luí, Yhang lé wà mai hkat htoq mù, yhangmoq é wà xuq tô é bùm gùng htoq mâ é gampyoq má, ê chyûn hpyit hkyô pyám râ ga shuí e ló akô.

<sup>30</sup> Nghut kôlhang, Yesuq kúm gi, byù hpûng haû mai so hkoq htoq ló byuq bê nghut ri.

<sup>☆</sup> 4:12 Tarâ Pun 6:16 \* 4:16 Bánno buinyí gâ é gi, Yudaq byu pé nòmu é buinyí lé gâ lhê. Ahkui lhê é dòng ga jáng, Bánno buinyí gi, bat htoq hkyuq nyí lé âng ri. <sup>☆</sup> 4:19 Esai 61:1-2 <sup>†</sup> 4:23 Chi sará ê, yhumsing gùng lé lhoq ge yù aq gâ é sanghkyang gi, "Mesaia nghut le gi, mauhpo mù wó tûn shit râ nghut lhê." gâ é nghut lhê.

*Agè Ashop É Nat Lé Yesuq Hkat Htoq É Hkyô**Mrk 1:21-28*

<sup>31</sup> Hau htâng, Yesuq gi, Galile mau mâ é Kaperna-um wà má jé ê mù, Bánno buinyì má byu pé lé mhoqshit hi lô bê nghut ri. <sup>32</sup> Yhangmoq gi, Yhang mhoqshit é hkyô lé mauhong nyi akô; hkâsu mù gâ le, Yhang gi, ahko ahkáng bo é dang dông taí nyi é yanmai nghut ri.

<sup>33</sup> Yesuq, tarajong hkaû má mhoqshit byî nyi é hkûn, nat gang wang júng é byù rayuq htê mó o mó èq taí é gi, <sup>34</sup> "Ê, Nazaret wà byù Yesuq ê, ngamoq gi, Nàng eq haí sêng lhê lhú? Ngamoq lé lhoq hten râ matú, Nàng jé lé é nghut lhê lhú? Nàng gi, Garai Gasâng é Chyoiyúng Sû nghut é lé, ngò sê lhê." gâ ri.

<sup>35</sup> Haú hkûn, Yesuq gi, "Hkâjop, yhâng chyáng mai htoq ló aq." ga yhang lé tân kat jáng, nat gi, haú yuq le yhangmoq é gung gûng má lhoq lheq to mù, a nò nhang é za, yhâng chyáng mai htoq ló byuq ri.

<sup>36</sup> Haú mù luí, shiwa byù banshoq bang gi, gyai yhang maú byuq kômù, rayuq eq rayuq, "Shí yuq é dang gi, hkasû é dang wá nghut lhê lhú? Yhang gi, ahkáng ayá èq le, wum-o bo é èq le, agè ashop é nat pé lé hkunmó hkyó jáng, haú bang htoq ló byuq akô." ga taí lhûm bum akô. <sup>37</sup> Haú hkûn, haú mau mâ é awui ayàm jowò hkangmó má jàm shoq, Yhâng é hkyô lé taí pyo hû lô bûm bekô nghut ri.

*Yesuq Nòhpyo Lhoq Gê Byî É Hkyô**Mht 8:14-17; Mrk 1:29-34*

<sup>38</sup> Yesuq gi, haú tarajong mai toq ló mù, Simun é yhûm má wang ló ri. Simun é yhâng-aumó gi, alí gyai nyé no nyi é nghut mù luí, lhoq gê byí râ matú, Yesuq lé garúm dung byî akô. <sup>39</sup> Yesuq gi, Simun é yhâng-aumó nàm má yap to mù, nòhpyo haú lé tân kat jáng, Simun é yhâng-aumó gi, ge ló byuq bê; haú hkûn jáng, yhang gi, toq mù, yhangmoq lé gaí tso gaí huq bê nghut ri.

<sup>40</sup> Bui wang ló jáng, nòhpyo hui bang eq awáng nòhpyo ajung jung dap é bang lhunglhang lé, Yesuq chyáng shuí lé lô kômù, yhangmoq rayuq htâng rayuq é ahtoq má Yesuq gi, loq ke byi luí, lhoq gê byî ri. <sup>41</sup> Nat gâng pé gi, Yesuq lé, "Nàng gi, Garai Gasâng é Yhangzo nghut ri." ga luí, wut taí mù byù myo myô chyáng mai htoq ló byuq akô; Yesuq gi, Hkrisduq nghut é hkyô lé, yhangmoq sé kô é yanmai, yhangmoq lé dang a wó taí loshoq, Yesuq tân pyâm ri.

<sup>42</sup> Maubó lô jáng, Yesuq gi, htoq ló mù, gaú é jowò yoso hkaû má é nyi tô ri; shiwa byu pé kúm gi, Yhang lé hkat hô kômù, myang hô kôjáng, yhangmoq chyáng mai a ló byuq râ matú châng hkûm wú akô. <sup>43</sup> Nghut kôlhang, Yesuq gi, "Garai Gasâng é mingdán é gabú danglù lé, gó wâ pé má le ngò hko kyo râ râ ashî, haú é matú, Garai Gasang gi, ngo lé nhang kat bê nghut lhê." ga luí, yhangmoq lé taí ri. <sup>44</sup> Haú mù, Yesuq gi, Yuda mau mâ é tarajong pé má, hko kyô wún nyi ri.

## 5

*Sâng-hi Ji Yù Huí É Chángzô Pé**Mht 4:18-22; Mrk 1:16-20*

<sup>1</sup> Radàm má lé, Yesuq gi, Genesarat nhông yàm má yap tô le, Garai Gasâng é mungdang gyo râ ga, shiwa byu pé, Yhâng chyáng chyîn chyap wang lé lô kô é hkûn, <sup>2</sup> nhông gin-gau yàm má lhaí razúm joq tô é lé, Yhang myang kat ri. Ngogûn dú bang kúm gi, lhaí mai htoq mù, yhangmoq é gùn pé lé chí nyi akô. <sup>3</sup> Yesuq gi, Simûn é lhaí má wàng mù gin-gau mai rachyit lhoq kang nhâng luí, haú lhaí htoq má zung to mù, shiwa byu pé lé mhoqshit taí kyô nyi ri.

<sup>4</sup> Dang ban taí jáng, Yesuq gi, Simun lé, "Wuì nik é shut hui luí, ngozo wó kông yù râ matú, nungmoq é gùn pé lé dú hkyô kat keq." ga taí ri.

<sup>5</sup> Simun gi, "Yhumsîng ê, ngamoq amàn ra-myin mau shikut wú kôlhang, haí le a wó; nghut kôlhang, náng dang é yanmai, ngò gùn dú hkyô kat râ nghut lhê." ga tû taí ri.



<sup>6</sup> Gùn pé lé hkyô kat kôjáng, yhangmoq gi, ngozo gyai myo shoq lé wó kông yù kômù, gùn lhang jeq ló râ su dut é yanmai, <sup>7</sup> lhaí gó lhum mâ é luzúm wuî lé, lé garúm yû râ matú loq lik lik kat kôjáng, haú bang lé lô mù, haú lhaí í lhum aluq myup ló shoq ngozo lé kat pyíng bekô.

<sup>8</sup> Simun Petruq gi, haú lé myàng jáng, Yesuq é hkyî wang má hkyihput htuq mù, "Yhumsîng ê, ngá chyáng mai ló byuq aq, haí mù gâ le, ngò gi, yubak dap é byù nghut nyi lhê." ga taí ri. <sup>9</sup> Haí mù luî gâ le, Simun le, yhang eq nyi tô é lhunghâng bang le, haú su ngozo wó yu é yanmai, maú nyi bùm kômù nghut ri. <sup>10</sup> Simûn é luzúm nhik, Zebedi é yhangzo Yakuq eq Yohan le, haú su chôm maú byuq akô.

Hau htâng, Yesuq gi, "Hkâgyuq, ahkuí mai nàng gi, byù lé châng kóng sù dut râ nghut lhê." ga luí, Simun lé taí ri. <sup>11</sup> Yhangmoq gi, wuiyàm má jé jáng, lhaí pé eq yhangmoq é zè banshoq lé tô pyâm to luí, Yesuq htâng cháng bekô nghut ri.

### *Manggâm Dap Bang Lé Yesuq Lhoq Gê Byî É Hkyô*

*Mht 8:1-4; Mrk 1:40-45*

<sup>12</sup> Radàm lé, Yesuq gi, wà rawà má nyi tô lé, ragùngdù é manggâm dap é byù rayuq lé lo ri; haú yuq gi, Yesuq lé myàng jáng, hkyihput htuq luí, "Yhumsîng ê, Nàng dóng é nghut le gi, ngo lé Nàng wó lhoq sân-yúng byi râ nghut lhê." ga dúng wut ri.

<sup>13</sup> Yesuq gi, loq lhâm kat mù, haú yuq lé é záng luí, "Ngò dóng lhê, sân-yúng aq hkoi." ga taí ri; haú hkûn jáng, haú yuq é manggâm gi, ge byuq bê nghut ri.

<sup>14</sup> Yesuq gi, "Nàng, shí hkyô ó lé le hkâtaí kyo. Nghut kôlhang, náng é gungdu lé, hkyangjong hpô chyáng ló tân shit mù, nàng sân-yúng bê hkyô lé yhangmoq é matú saksé dut sháng gaq, Mosheq tarâ tô tô é eq rajung za, hkungga ló nhông byi aq." ga, yhang lé taí hkûm kat ri.

<sup>15</sup> Nghut kôlhang, Yesuq é hkyô gi, je riyhang taí pyo hû jam ló mù luí, shiwa byù rajùm rayò gi, Yhâng é dang gyo râ matú le, yhangmoq é nòhpyo lhoq gê byí nhâng râ matú le, lé zup míng tô akô. <sup>16</sup> Yesuq kúm gi, Yhang baú tsik za yoso shut htoq ê mù, kyû ê dung dung kut ri.

### *Gùngjum Shî Sû Lé, Yesuq Lhoq Gê Byî É Hkyô*

*Mht 9:1-8; Mrk 2:1-12*

<sup>17</sup> Ra-nyí lé, Yesuq mhoqshit nyi é hkûn, Hparishe pé eq tarâ sará pé le, Yesuq nâm má zung tô akô; haú bang gi, Galile mau wà hkyap hkangmó mâ é bang eq Yuda mau, Yerusalem wà mó mâ é bang nghut akô. Yhumsîng Garaí é wum-o a-tsam le nòhpyo lhoq gê râ matú Yesuq eq rahá nghut nyi ri. <sup>18</sup> Haú hkûn, byù ra-am gi, gùngjum shî sù rayuq lé taphkang mai waq lé lô kômù, haú yuq lé, yhúmhaú má nyi tô é Yesuq é hí má, wó lhez byi shoq ga hkyô ho nyi akô. <sup>19</sup> Byù lûm myô chyîn chyap to mù, haú nò sù lé hká dông le a wó shuí wàng kôluí, haú yhumhkûng htoq shut waq doq ló mù, haú yuq lé taphkang eq roq, shiwa hpong gung gûng, Yesuq é hí ang ang má hkyô hang kat akô.

<sup>20</sup> Yesuq gi, yhangmoq é lumjîng myit lé byu myàng jáng, "Byù nàng ê! Náng é yubak mara lé hkyut pyám byi bê." ga taí ri.

<sup>21</sup> Haú hkûn, Hparishe pé eq tarâ sará pé gi, "Shî su ga luí, Garaí Gasang lé rhoi dang taí é sù gi, ó yuq wá nghut lhê lú? Garaí Gasang za a nghut jáng, yubak mara wó hkyut pyám byi sù gi, ó yuq wá nghut lhê lú?" ga luí, myit són wuî nyi bum akô.

<sup>22</sup> Yesuq gi, yhangmoq myit són wuî nyi é hkyô lé sé mù, "Nungmoq é i-myt hkaú má, haí mù shí pé lé myit són wuî nyi akô lú? <sup>23</sup> 'Náng é yubak mara lé hkyut pyám byi bê.' nghû taí râ eq, 'Toq luí, hkyô so aq.' nghû taí râ má, hká hkun je taí lui lhê lú? <sup>24</sup> Nghut kôlhang, haú Byu Yhangzo\* gi, mingkan htoq má, mara hkyut byi râ ahkáng wó Sù nghut é lé, nungmoq lé sé nhâng nau lhê." ga mù, haú gùngjum shî sù lé, "Ngò, nàng lé taí bá, toq aq, náng é taphkang yu chûng luí, yhûm taú ló aq hkoi." ga taí ri. <sup>25</sup> Haú hkûn jáng, yhang gi, yhangmoq é hí má toq yap mù, yhâng é taphkang waq chûng luí, yhâng é yhûm

\* 5:24 Byu Yhangzo gâ é gi, Yesuq Yhânggùng yhang lé le taí e nghut lhê, Mesaia lé le taí é nghut lhê.

shut Garai Gasang lé hkya-on kungtôn uchyang ló byuq bê. <sup>26</sup> Byù banshoq bang gi, gyai maú byuq kômù luí, Garai Gasang lé hkya-on kungton akô nghut ri. Yhangmoq gyai gyuq maú dik é èq le, "Hkû-nyí, nga-nhúng, mauhpo amû pé lé myàng bê." ga taí nyi akô.

*Yesuq Gi, Lewiq É Yhûm Má Yubak Dap Bang Eq Rahá Zo Shuq É Hkyô*

*Mht 9:9-13; Mrk 2:13-17*

<sup>27</sup> Hau htâng má, Yesuq sô e ló le, Lewiq gâ é kang guq sù rayuq yhâng é kang guq zúm má zung tô é lé ê myàng mù, haú yuq lé, "Ngá htâng cháng aq." ga taí ri. <sup>28</sup> Lewiq gi, haú má é zè banshoq lé tô pyâm to mù, toq luí, Yhâng htâng cháng bê nghut ri.

<sup>29</sup> Hau htâng, Lewiq gi, yhâng é yhûm má Yesuq é matú zoshuq poí mó kut byí ri; poí haú má kang guq bang myo myo eq byù góbang le, yhangmoq eq rahá za zô zung nyi bum akô. <sup>30</sup> Haú mù luí, Hparishe pé eq yhangmoq hpúng má é tarâ sará pé kúm gi, "Nungmoq gi, haí mù luí kang guq bang eq yubak dap bang eq rahá zo shuq nyi akô lhú?" ga, Yhâng é chángzô pé lé mara hûn dang taí akô.

<sup>31</sup> Yesuq gi, yhangmoq lé, "Wángzán bang chi sará a ra kó, nõhpyo hui bang za sheq ru râ lhê. <sup>32</sup> Ngò gi, dingmán bang lé wut yù râ matú jé lé é a nghut, yubak dap bang myit lhing râ matú sheq jé lé é ru nghut lhê." ga tû taí ri.

*Zoshuq Gám Hkyô Eq Séng Luí, Yesuq Taí É Hkyô*

*Mht 9:14-17; Mrk 2:18-22*

<sup>33</sup> Dum, yhangmoq gi, "Yohan é chángzô pé gi, zoshuq gám mù kyûdung dung kut akô; Hparishe pé é chángzô pé le, haú su kut akô; nghut kôlhang, náng é chángzô pé gi, haí mù zô nyi shuq nyi akô lhú?" ga Yesuq lé taí akô.

<sup>34</sup> Yesuq, yhangmoq lé tû taí é gi, "Bíng pé gi, lusik eq rahá nghut nyi to ashî hkûn, yhangmoq lé zo shuq wó gám nhâng râ lhú? <sup>35</sup> Nghut kôlhang, lusik† lé yhangmoq chyáng mai shuí yu pyâm é hkyíng jé râ nghut lhê; haú buinyi pé má kúm gi, yhangmoq, zoshuq gám kó râ nghut lhê." gâ ri.

<sup>36</sup> Dangtú dông mai le, Yesuq, yhangmoq lé taí é gi, "Mebu sik má é lãng cheq yû mù, mebu xau má hpo é gi, ó a kut wú kó; haú su kut é nghut jáng, mebu sik lé le lãng cheq pyâm é dut mù, pán jap sik le mebu xau eq du lhum râ a nghut. <sup>37</sup> Tsibiyiq wing asik lé le, shokuq htûng axau má ó a kat wú kó. Kat é nghut jáng, tsibiyiq wing asik gi, htûng lé lhoq buq goq nhâng mù, tsibiyiq wing le yui shun byuq, htûng le htên byuq, dut râ nghut lhê. <sup>38</sup> Haú su a dut shoq gi, tsibiyiq wing asik lé, shokuq htûng asik má kat ra râ nghut lhê. <sup>39</sup> Tsibiyiq wing axau shuq nyí bê sù gi, asik lé a shuq naú nghut râ; hkâsu mù gâ le, 'Axau sheq je nghâm ri.' ga taí rá." gâ ri.

## 6

*Bánno Buinyi Má, Yesuq É Chángzô Pé Kyôshi Shap Zô É Hkyô*

*Mht 12:1-8; Mrk 2:23-28*

<sup>1</sup> Bánno buinyi ra-nyí má, Yesuq gi, Yhâng é chángzô pé eq yò hkaú mai sô lai ló é hkûn, Yhâng é chángzô pé gi, kyôshi ratsuí langshap yû mù, loq èq nè hpuy zô akô. <sup>2</sup> Haú mù luí, Hparishe pé ra-am gi, "Bánno buinyi má a ge kut jung lé, nungmoq gi, haí mù luí haú su kut akô lhú?" ga taí akô.

<sup>3</sup> Yesuq gi, yhangmoq lé, "Dawiq lháng gi, yhâng htâng châng é bang eq rahá zòmut huí é hkûn, hkâsu kut é hkyô lé, nungmoq a nghap wú kó lhú? <sup>4</sup> Dawiq gi, Garai Gasâng é yhûm\* hkaú má wang ê mù, hkyangjông pé mai lai luí, ó le a ge zô é, kyâng tô é muk lé yù zo mù, yhâng htâng châng é bang lé le, byi tsô é a nghut kó lhú?" ga tû taí ri. <sup>5</sup> Hau htâng, Yhang gi, "Haú Byu Yhangzo gi, haú Bánno buinyi é Yhumsing nghut lhê." ga yhangmoq lé taí ri.

*Loq Jum Shí Sù Lé Yesuq Lhoq Gê Byí É Hkyô*

*Mht 12:9-14; Mrk 3:1-6*

† 5:35 Lusik gâ é gi, Yesuq lé taí nau é nghut lhê. \* 6:4 Garai Gasâng é yhûm nghu é gi, Yerusalem và mó má joq é saksé zúm lé gâ é nghut lhê.

<sup>6</sup> Gotû Bánno buinyi má le, Yesuq gi, tarajong má wàng mù mhoqshit nyi é hkûn, loqyo loq ajum shi byuq é byù rayuq haú má nyi tô ri. <sup>7</sup> Haú hkûn, tarâ sará pé eq Hparishe pé gi, Bánno buinyi má nõhpyo lhoq gê byi râ lhú ga luí, Yhang lé mara wó hûn shoq ga gyám wú nyi akô. <sup>8</sup> Yesuq kúm gi, yhangmoq é i-myt lé sé sù nghut luí, loq jum shí sù lé, "Toq mù, banshoq bâng é hí má, yap shit aq." ga taí kat ri. Haú yuq le, toq mù yap tô ri.

<sup>9</sup> Haú hkûn, Yesuq gi, "Ngò nungmoq lé myî wú kôlé, Bánno buinyi má, ge é muzó kut râ, a ge é muzó kut râ, byù asak hkyî râ eq lhoq hten râ pé má hká lhum kut le sheq tarâ wang lhê lhú?" ga luí, yhangmoq lé taí ri.

<sup>10</sup> Hau htàng má, yhangmoq banshoq lé lhing wú mù, haú loq jum shí sù lé "Náng é loq nyhang kat aq." ga taí kat é hkûn lé, yhang le loq nyhang kat luí, yhang é loq gi, shoq za ge byuq bê nghut ri. <sup>11</sup> Nghut kôlhang, yhangmoq gi, myoq chum nhô chik yhang nhik-yo naú kômù luí, "Yesuq lé hkâsu wá kut pyám râ lhú?" ga luí, rayuq eq rayuq taí lhûm nyi akô.

*Raxe Í Yuq Lé Lagyo Ga Myhîng Yu É Hkyô*

*Mht 10:1-4; Mrk 3:13-19*

<sup>12</sup> Haú yoq ra-nyí má, Yesuq gi, kyûdung râ ga bùm shut htoq e ló luí, ra-myin mau Garai Gasang lé kyûdung nyi ri. <sup>13</sup> Maubó jáng Yhâng é chángzô pé lé wut yù mù, yhangmoq chyáng mâ é raxe í yuq lé hkyin yù luí, lagyô pé ga myhîng to byî ri. <sup>14</sup> Haú bang gi, Yesuq eq Petruq ga myîng myhîng byî é Simun eq, yhanggu Andre, Yakuq eq Yohan, Hpilip eq Barhtolume, <sup>15</sup> Mahte eq Htomaq, Alhpe é yhangzo Yakuq eq Zelutuq† dut é Simun, <sup>16</sup> Yakuq é yhangzo Yudaq eq, Yesuq lé ap pyám râ sù Yudaq Iskarut pé nghut akô.

*Hkungsô Wó É Hkyô Eq Dingnyé Wó É Hkyô*

*Mht 4:23-25; 5:1-12*

<sup>17</sup> Yesuq gi, yhangmoq eq rahá gyó ló mù, janggyú má yap tô é hkûn; Yhâng é chángzo moq mó le mù, Yuda mau banshoq mâ é bang, Yerusalem wá mó mâ é bang, wuîshuq lung-aû ayám mâ é Turuq myuq eq Sidun myuq mâ é bang, rajùm rayò gi, <sup>18</sup> Yhâng é dang gyô yù râ eq yhangmoq é nõhpyo lhoq gê nhâng râ matú, rahá za zup míng tô akô. Agè ashop é nat èq zing-ri huí é bang le ge byuq akô. <sup>19</sup> Yhâng é gùng mai htoq é wum-ô èq byù banshoq lé lhoq gê byî nyi é yanmai shiwa byu pé le Yhang lé wó záng shoq ga, ho nyi akô.

<sup>20</sup> Haú hkûn, Yesuq gi, Yhâng é chángzô pé lé wú kat luí taí é gi, "Myùng bang nungmoq gi, hkungsô wó nyi ri, hkâsu mù gâ le, Garai Gasâng é mingdán‡ gi, nungmoq é mingdán nghut nyi ri.

<sup>21</sup> Ahkuí, zòmut wuîshit huí nyi é bang nungmoq gi, hkungsô wó nyi ri, hkâsu mù gâ le, nungmoq nhik dik shoq myàng zo kó râ nghut lhê.

Ahkuí, ngau nyi bang nungmoq gi, hkungsô wó nyi ri, hkâsu mù gâ le, nungmoq myang wuî kó râ nghut lhê.

<sup>22</sup> Haú Byu Yhangzô é yanmai nungmoq lé su èq a nguì é, lhoq hpyoq lhoq kâng é, hoq hpu nhang é,

agè ashop nghut é dong jihpoi gamhkui huí é hkûn, nungmoq gi, hkungsô wó nyi ri.

<sup>23</sup> Haú hkûn lé, gabú byam chyû nyi keq, hkâsu mù gâ le, wú keq, nungmoq é matú kô é chyunghuq gi, mauhkûng mingdán má joq tô ri. Ngò, nungmoq lé taí lhê, hkâsu mù gâ le, yhangmoq é îchyí îwa pé le myiqhtoî pé§ lé haú su kut wú bekô."

<sup>24</sup> Nghut kôlhang, sùt wó bang nungmoq gi, dingnyé wó râ, hkâsu mù gâ le, nungmoq gi, yhumsing gùng má nhik shí nhik dik é hkyô lé huí yù bekô.

† 6:15 Zelutuq gâ é lychyúm gi, yhumsing zui saí é hkyô má gyai yhang myit lòm shirong é sù lé ga lhê. Haú u lé, Israelaq byu pé gi, mingdán luthkyô wó râ matú shikut nyi é hpúng bang lé, Zelutuq gâ lhê. ‡ 6:20 Garai Gasâng é mingdán gâ é gi, Garai Gasang up é lé gâ lhê. § 6:23 Myiqhtoî pé le zing-ri huí é yanmai, yhangmoq chyunghuq wó nyi akô. Haú eq rajung za, jamjau huí é bang nga-nhúng le chyunghuq wó râ nghut lhê.

- <sup>25</sup> Ahkuî, gyi gyi dau dau myàng zo myàng shuq nyi é bang nungmoq gi, dingnyé wó râ, hkâsu mù gâ le, nungmoq zòmút wuîshit é hui kó râ nghut lhê.  
Ahkuî, wui nyi é bang nungmoq gi, dingnyé wó râ, hkâsu mù gâ le, iyon yôn é eq ngaubyi ngau-nhap htoq é hui kó râ nghut lhê.
- <sup>26</sup> Byù banshoq bang, nungmoq lé ge é byù ga kôjáng, nungmoq gi, dingnyé wó râ, hkâsu mù gâ le, yhangmoq é îchyí îwâ pé le, myiqhtoi pyoq pé\* lé, haû su ga taî wú bekô.

*Gye Pé Lé Chyitdap Râ Hkyô*

*Mht 5:38-48; 7:12*

<sup>27</sup> Hau htoq agó, ngá dang gyô nyi bang nungmoq lé ngò taî kôlé, nungmoq é gye pé lé chyitdap nyi keq; nungmoq lé a naù a wôm é bang lé ge é hkyô kut keq; <sup>28</sup> nungmoq lé nhîng é bang lé, shimân byi keq; nungmoq lé rhoi é bang lé kyûdung byi keq. <sup>29</sup> Nang lé bo-pyuq rahkyam shut pyuq byi sù lé, rahkyam dum hkâm byi shi aq; náng bumó hkyut yu é sù lé, buzo le dum hkyut byi shi aq; <sup>30</sup> nang lé rajung jung dîng é sù lé le, byî pyám aq; náng zè yu pyám byî é su chyáng mai le, hkâdîng yù lo. <sup>31</sup> Nungmoq ô nau é dîng supé lé kut nhâng nau é su, yhangmoq lé le kut byi keq.

<sup>32</sup> Nungmoq lé chyitdap é bang lé za chyitdap kô le gi, nungmoq é matú hai akyû bò kó râ lhú? Yubak dap bang le, yhumsîng lé chyitdap é bang lé gi, chyitdap nyi akô. <sup>33</sup> Nungmoq lé ge é dîng kut nyi é bang lé za, ge é dîng kut nyî kô le gi, nungmoq é matú hai akyû bò kó râ lhú? Yubak dap bang le haû su kut nyi akô. <sup>34</sup> Supé lé zè chyî byî le, dum wó tau byi râ su dut é bang lé za, chyî byî le gi, nungmoq é matú hai akyû bò kó râ lhú? Yubak dap bang lháng chyî byî é myhó dum wó yû shoq, yubak dap é bang lé chyî byî akô. <sup>35</sup> Nghut kôlhang, nungmoq gi, nungmoq é gye pé lé chyitdap mù, ge é dîng kut byî nyî keq. Dum wó taû yù râ lé myoq a byu é za, chyî ngho byi keq; haû su kut jáng, nungmoq wó é chyunghuq ko râ eq, Myhang htáng htúm Su é yhangzô pé dut râ nghut lhê; hkâsu mù gâ le, Yhang gi, jeju a dat bun bang eq agè ashop é bang lé ge é kut nyi ri. <sup>36</sup> Nungmoq é Îwa Garai Gasang shogyo nhikmyin sê é su, nungmoq le shogyo nhikmyîn nyî keq.

*A Jéyáng Râ Hkyô*

*Mht 7:1-5*

<sup>37</sup> A jéyáng é za nyî keq; haû jáng, nungmoq le jéyáng é a hui kó râ nghut lhê. A doqdân é za nyî keq; haû jáng, nungmoq le doqdân é a hui kó râ nghut lhê. Mara hkyut byi keq; haû jáng, nungmoq le mara hkyut byî é hui kó râ nghut lhê. <sup>38</sup> Byi keq, haû jáng, nungmoq le dum byî é hui kó râ nghut lhê. Mán é bûng mai byíng mui shûn shoq nhûn chyîng, dîng chyîng kat mù, nungmoq é tanghkoí hkaû má lik kat byî é hui kó râ. Hkâsu mù gâ le, nungmoq lik byî é bung èq, nungmoq lé dum lik byi râ nghut lhê." gâ ri.

<sup>39</sup> Hau htoq agó, Yhang dangtú ralhum dîng yhangmoq lé dum taî é gi, "Myoqjit sù gi, myoqjit sù lé hkyô wó tûn shit lhê lhú? Yhangnhik í yuq é donghkong má byit gyó kó râ nghut lhê, a nghut kó lhú? <sup>40</sup> Jongzo gi, sará htoq gyaú râ a nghut; nghut kôlhang, gúm shoq mhoq yû bê sù ó nghut kôlhang, yhumsîng é sará su dut râ nghut lhê.

<sup>41</sup> Yhumsîng myoq hkaû má lúng tô é siktúm† lé lháng a myit wú é nhîng, haî mù luî, nunggu nungmâng é myoqwàng‡ lé myang lhê lhú? <sup>42</sup> Yhumsîng é myoq má lúng tô é siktúm lé lháng a myàng sù nhîng, 'Gumang hpó ê, náng myoq má lúng tô é myoqwàng lé, ngò choq pyám byi lé.' nghû luî, náng é gumang hpó lé hkâsu wó taî râ lhú? Gegùn labyoq kut sù ê, náng é myoq má lúng tô é siktúm lé hí choq pyám aq. Haû jáng sheq, nunggu nungmang é myoq má wang tô é myoqwàng lé choq pyám byi râ matú, náng san za myàng râ nghut lhê.

\* 6:26 Myiqhtoi pyoq pé gi, Garai Gasang jéyáng é hui râ. † 6:41 Siktúm nghu e gi, yubak mara kô é lé taî lhê.

‡ 6:41 Myoqwàng nghu e gi, yubak mara atiq azo lé taî é nghut lhê.

*Agàm Eq Ashi**Mht 7:17-20; 12:34-35*

<sup>43</sup> A ge é ashi zuí é, ge é shigâm hkâmá le a joq. Ge é ashi zuí é, a ge é shigâm le a joq. <sup>44</sup> Haú mù luí, shigâm hkangmó lé, zuí é ashi lé wú mù wó sê hkyin yu lhê. Dangké, zubyap mai maihpáng-shi ó le a myang hpyoq yù wú, zugyóm mai le tsibiyiq shi a wó hpyoq yu wú. <sup>45</sup> Ge é sù gi, yhumsing é i-mytit unghkaû mâ é sutdò mai ge é zè pé lé lhoq htoq shit lhê. Agè ashop é sù gi, yhumsing é i-mytit unghkaû mâ é agè ashop é sutdò mai, agè ashop é zè pé lé lhoq htoq shit lhê. Haí mù gâ le, yhâng é i-mytit unghkaû má byíng mui tô é lé za, yhâng é nhut mai taí htoq lo é nghut lhê.

*Luqhtân Htoq Má Yhûm Saí Sû Eq Myì Chîn Dum Má Yhûm Saí Su É Hkyô**Mht 7:24-27*

<sup>46</sup> Ngò taí é eq rajung za lháng a wó châng kut kô é nhîng, haí mù luí, nungmoq Ngo lé 'Yhumsîng ê, Yhumsîng ê.' nghu nyi akô lúh? <sup>47</sup> Ngá chyang lé mù, ngá dang gyô yù luí, châng kut é sù ó nghut kôle, hkasû é sù eq wuí é lé ngò nungmoq lé shit kyo kôle. <sup>48</sup> Haú yuq gi, wahpang yhûm saí le, nik nik du luí a dui é lunghtân htoq má apûn awang hi é sù eq wuí lhê. Wuí jê lò luí wuibaù pê èq yhûm haú lé lo gùn kôlhang, ging ging tíng tíng saí to bê nghut luí, haú lé a wó gun nhún. <sup>49</sup> Ngá dang gyô yù mù, a cháng sù gi, apûn awang a saí é za myì chîn dum má wahpang yhûm saí sù eq wuí nyi ri. Wuibaù pê èq yhûm haú lé lo gun kat é eq, haú hkûn jáng, lêng gyop byuq ri. Yhûm haú byoq hten byuq é gi, yù wuhú a bò loshoq dut byuq râ nghut lhê." gâ ri.

## 7

*Romaq Gyezau Rayuq É Lumjîng Myit**Mht 8:5-13; Yhn 4:43-54*

<sup>1</sup> Yesuq gi, shiwa byu pé lé ban mhooqshit é htâng má, Kaperna-um wà shut wang ló ri. <sup>2</sup> Haú hkûn, Romaq gyezau rayuq é chyitdap dui-nhâng zoshâng gi, shî-nò no nyi ri. <sup>3</sup> Haú u lé, gyezau hpó gi, Yesuq é hkyô lé wó gyo jáng, yhâng é dui-nhâng zoshâng lé lhoq gê byi râ matú, Yesuq lé ê ji lò keq ga, Yudaq suwún wuí lé nhang kat ri. <sup>4</sup> Haú bang gi, Yesuq chyang jé ê kô é hkûn, "Yhang gi, nàng shí hkyô kut byi râ matú gingdán é sù, yhang nghut nyi ri; <sup>5</sup> hkâsu mù gâ le, yhang gi, nga-nhûng amyû lé chyitdap é eq, ngamoq matú tarajong le kut byi sù nghut ri." ga luí, Yhang lé zuq zuq dîng wut nyi akô. <sup>6</sup> Haú mù luí, Yesuq gi, yhangmoq eq rahá za e ló ri.

Haú yhûm eq hká hé a wê é má jé jáng, Romaq gyezau hpó, yhâng é luzúm wuí lé taí nhang kat é gi, "Yhumsîng Yesuq ê, nàng gûng lé hkâlhoq hkyik lo. Nàng, ngá é laishîn-htâng má, lé nang râ lháng ngò má a gingdán. <sup>7</sup> Haú mù, ngò, nàng chyang jé lé râ matú gingdán é sù a nghut; Nàng, dang rahkun za taí kat laq, haú hkûn, ngá é dui-nhâng zoshâng ge ló râ nghut lhê. <sup>8</sup> Hkâsu mù gâ le, ngò le ahkáng ayá wó é zau rayuq é a-ô mâ é zau nghut lhê; ngá é a-ô má le gyezô pé nyi lhê, rayuq lé 'Ê aq!' nghu le, yhang e ló lhê; góyuq lé, 'Lò aq!' nghu le, yhang lò lhê; ngá jûn lé le, 'Shî kut aq!' nghu le, yhang kut lhê." gâ ri.

<sup>9</sup> Yesuq gi, dang haú lé wó gyo jáng, haú yuq é hkyô lé maú byuq luí, Yhang htâng châng é shiwa byu pé lé lhing wú mù, "Ngò, nungmoq lé taí kôlé, Israelaq amyû má lháng, shí í lumjîng é sù lé, Ngò a myang wú." ga taí ri. <sup>10</sup> Nhang kat é bang yhûm má dum taú jé jáng, no nyi é dui-nhâng zoshâng gi, ge to lánng é lé ló myang akô.

*Shî Sû Lé Dum Lhoq Tui É Hkyô*

<sup>11</sup> Hau htâng hkâ-myháng a myáng má, Yesuq gi, Yhâng é chángzô pé eq, shiwa byù moq mó le mù rahá za Na-in gâ é wà shut e ló akô. <sup>12</sup> Haú wà wàng hkum má jé lo é hkûn lé, chuimó myhî é yuqzo te gi, shî mù, yhâng é mâng lé waq htoq lé lo akô. Wà byù myo myo le, chuimó myhî haú eq rahá châng lé lo akô. <sup>13</sup> Yhumsîng gi, haú chuimó myhî lé myàng jáng, yhang lé wú shogyo luí, "Hkâ-ngaû." ga taí ri.

<sup>14</sup> Yesuq gi, gung shut huí ê mù, loq eq ê záng kat ri. Haú hkûn, waq tô é bang le jâng yap to byî akô. Yhang gi, "Zorâm ê, ngò, nang lé taí lhê, toq aq." ga taí ri. <sup>15</sup> Haú hkûn, shí bê sù gi, toq zûng mù dang taí lo ri. Yesuq gi, zorâm haú lé yhangnú chyáng dum ap byî ri.

<sup>16</sup> Byù lhunglhâng bang gyuq maú bùm kôluí, Garai Gasang lé hkya-ôn é dang gi, "Myiqhtoi mó, nga-nhûng chyáng lé pô htoq bê nghut ri. Garai Gasang gi, Yhâng é amyû lé garúm râ ga lé kûm wú nyi ri." ga taí nyi akô. <sup>17</sup> Haú Yesuq é hkyô eq sêng é ludang lé, Yuda mau eq haú mau awui ayàm jowò hkangmó má taí pyo myhîn ló bum akô.

*Yesuq Eq Wui-myhup Sará Yohan É Hkyô*

*Mht 11:1-19*

<sup>18</sup> Haú hkûn, wui-myhup sará Yohan é chángzô pé gi, haú hkyô banshoq yhang lé lo taí kyô akô. <sup>19</sup> Haú mù luí, Yohan gi, yhâng é chángzo í yuq lé ji yù mù, haú Yhumsing chyáng nhang kat luí, "Nàng gi, haú jé lé lô râ Sû nghut lhê lú? Haú a nghut jáng, ngamoq, góyuq lé láng ra shirâ lú?" ga, myí nhang kat ri.

<sup>20</sup> Haú nhik gi, Yesuq chyáng jé jáng, "'Nàng gi, haú jé lé lô râ sù nghut lhê lú? Haú a nghut jáng, ngamoq góyuq lé myoqbyu láng nyí ra shirâ lú?' ga luí, Wui-myhup Sará Yohan gi, ngá-nhik lé náng chyáng myí nhang kat ri." ga taí akô.

<sup>21</sup> Haú u yhang, Yesuq gi, nò zo hpyo zo, noli nojàng huí é bang eq agè ashop é nat dap jun dap é byù myo myo lé, lhoq gê byî ri. Myoqjit bang myo myo lé le, myoq dum myàng nhang ri. <sup>22</sup> Haú hkûn, Yesuq gi, yhangnhik lé, "Myàng mi-myàng, wó gyo má wó gyo, Yohan lé ló taí kyo keq; myoqjit bang, myoq wó myâng bekô; hkyî hten bang le, wó so bekô; manggâm dap bang le, lhoq gê byî é hui bekô; nojit bang le, wó gyo bekô; shí bê bang le, lhoq dui toq é hui bekô; myùng bâng é matú, gabú danglù hko kyô nyi bê nghut lhê. <sup>23</sup> Ngá é yanmai, Ngo lé lum shut é hkyô a bò sù gi, hkungsô wó nyi ri." ga taí ri.

<sup>24</sup> Yohan é chángzô nhik ló byuq é htâng má, Yesuq gi, Yohan eq séng luí, byù moq mó lé taí é gi, "Nungmoq gi, haí lé hpuq wú râ matú, haú yoso shut e akô lú? Lai eq hik nhûn é jamgàm lé wú râ matú nghut akô lú? <sup>25</sup> Haú a nghut jáng, haí lé wú râ matú e akô lú? Nú-nhâm é mebu wut sù lé wú râ matú e akô lú? A nghut! Wú keq, gyai hpaú é mebu wut luí agùn agó wó bang gi, hkohkâm-wâng pé má sheq ru nyi lhê. <sup>26</sup> Haú nghut le gi, haí lé wú râ matú ê kô é lú? Myiqhtoi rayuq lé lú? Haú kúm nghut ri. Ngò, nungmoq lé taí kôlé, Yohan gi, myiqhtoi htoq lhang gyaú sù nghut lhê. <sup>27</sup> Haú yuq é hkyô lé, Chyúmdang má kâ tô é gi, 'Wú aq, Náng é hkyô lajang láng râ matú, Ngá é lagyo lé, Náng é hí má Ngò nhang kat râ nghut lhê.'<sup>✠</sup>

gâ ri. <sup>28</sup> Ngò, nungmoq lé taí kôlé, miyiwè wuì mai hku kat é bang má, Yohan htoq je kô é rayuq lhang a nyi, nghut kôlhang, Garai Gasâng é mingdán má je tiq dik sù gi, Yohan htoq je kô lhê." gâ ri.

<sup>29</sup> Míngbyû lhunglhâng bang eq kang guq bang gi, dang haú pé lé wó gyo kôjáng, Yohan byî é baptisma lé hkâm yù kô é nghut mù luí, Garai Gasâng é dingmán é hkyô lé sê gyô yu akô. <sup>30</sup> Hparishe pé eq tarâ sará pé kúm gi, Yohan byî é baptisma a hkam yù kômù luí, Garai Gasang hen lajang é hkyô lé yhumsing gung é matú he-ngik pyâm akô.

<sup>31</sup> Yesuq dum taí é gi, "Haú mù luí, byù myû shí lé, Ngò, hai eq taí kê wú râ lú? Yhangmoq hai eq wuí akô lú? <sup>32</sup> Yhangmoq gi, 'Nungmoq é matú, ngamoq sampyí mut byi kôlhang, nungmoq gi, a gó kó, ngamoq ngaù hkyangsâng kôlhang, nungmoq gi, a ngaù kó.' ga luí, gai pé má zùng uchyang rayuq eq rayuq wut taí lhûm nyi é zoshâng wuì eq wuí akô. <sup>33</sup> Hkâsu mù gâ le, Wui-myhup Sará Yohan jé lé luí, muk a zo, tsibiyiq a shuq é nyi le le, 'Yhang gi, nat gang dap sù nghut ri.' ga luí, nungmoq taí akô. <sup>34</sup> Haú Byu Yhangzo jé lé luí, zo mù shuq mù kut jáng le, 'Shí yuq gi, zo myoq shuq myoq noq sù eq, kang guq bang eq yubak dap bâng é buinùm hpó nghut ri.' ga dum taí akô. <sup>35</sup> Nghut kôlhang,

✠ 7:27 Mal 3:1

hpaqchyî byéng-yá é yhangzô pé gi, hpaqchyî byéng-yá tengmán é hkyô lé saksé hkám byî nyi akô.\* gâ ri.

*Yubak Dap É Myiwe Rayuq, Yesuq Lé Xû But Byî É Hkyô*

<sup>36</sup> Hparishe rayuq gi, Yesuq lé yhang chyáng zang zo râ matú ji kat ri. Haû mù, Yesuq gi, haû Hparishe é yhûm má wàng luî zo râ matú zung tô ri. <sup>37</sup> Haû hkûn, wú keq, haû wâ mâ é yubak dap é myiwe rayuq gi, Yesuq haû Hparishe é yhûm má zô zung tô é lé sé jáng, gyai hpau dap é namngón xû bo é luq hpyû bông yu lé luî, <sup>38</sup> Yesuq é nunghtáng hkyî wàng má ngau yap to mù, Yhang é hkyî má ngaubyî èq záng lhoq teq byi jáng, úxam èq but sut pyám byî ri. Dum nghut jáng, nghut èq puq luî mura lé but byî ri.

<sup>39</sup> Yesuq lé ji é Hparishe wá gi, haû lé myàng jáng, "Shí yuq myiqhtoi nghut le gi, Yhang lé záng htûng é sù, ó yuq nghut é eq hkâsû é yubak dap é myiwe nghut é lé, Yhang sé râ nghut lhê." ga luî, yhang é unghkaû má myit nyi ri.

<sup>40</sup> Yesuq gi, "Simun ê, Ngò, nang lé taí râ rajung joq ri." ga taí ri.

Simun le, "Sarâ ê, taí aq." ga taí kat ri.

<sup>41</sup> Haû hkûn, Yesuq gi, "Ngùn chyî zo sù rayuq chyáng, chyîn dap é byù í yuq nyi ri. Rayuq gi, denari† ngo shô chap, rayuq gi, ngo xê chap dap ri. <sup>42</sup> Haû nhik gi, chyîn xap râ ngùn a wó kôluî, chyîn yhumsîng gi, yhangnhik lé xap a ra lò gâ pyâm ri. Haû mù luî, haû nhik mâ é hká yuq gi, yhang lé je chyitdap râ lhú?" ga myî ri.

<sup>43</sup> Simun gi, "Je myo lhoq lhut hui sù, nghut râ su ngam ri." ga tû taí ri.

Yesuq gi, "Nàng myit e đông jô ri." ga taí ri.

<sup>44</sup> Haû hkûn, Yesuq, myiwe zo haû lé lhing wú luî, Simun lé, "Nàng myiwe zo shî lé myang lhê lhú? Ngò, nàng é yhûm má wang le, hkyî chi râ uchyam, nàng a byi, yhang kúm gi, ngaubyî èq ngá hkyî lé tik byi luî, yhang é xam èq sut pyám byi bê. <sup>45</sup> Nàng gi, ngo lé nhut èq a puq nghut ri; yhang kúm gi, ngò yhúmhaû má wang é mai ngá hkyî má a no loshoq puq nyi râ. <sup>46</sup> Nàng gi, ngá ulhum má xû a but byî wú, yhang kúm gi, ngá é hkyî má nàm ngón é mura but byi bê nghut ri. <sup>47</sup> Haû su mù, ngò, nàng lé taí lé, haû myiwe gi, je chyitdap luî, yhang wó é yubak myo myo lé hkyut pyám byî é hui bê. Shau za mara hkyut pyám byî é hui sù gi, shau za chyitdap sù nghut ri." ga taí ri.

<sup>48</sup> Yesuq gi, myiwe haû lé le, "Ngò, nàng é yubak mara hkyut pyám byi bê." ga taí ri.

<sup>49</sup> Rahá zung tô é bang gi, "Yubak mara lháng wó hkyut pyám byi sù, shí yuq gi, ó wá nghut lhê lhú?" ga luî, myit nyi bum akô.

<sup>50</sup> Yesuq gi, "Nàng é lumjîng myit èq nang lé hkyi yù bê, ngón za ló aq hkoi." ga luî, myiwe haû lé taí kat ri.

## 8

*Yesuq Htâng Châng É Myiwe Wui*

<sup>1</sup> Hau htâng hkâ-myháng a myáng má, Yesuq gi, Garai Gasâng é mingdán hkyô eq sêng é gabú danglù lé taí kyo uchyang, Yhang é lagyo raxe í yuq eq rahá za, rawa htâng rawà jé e ló ri. <sup>2</sup> Hau htoq agó, nat gang dap é mai le, nòhpyo mai le Yesuq èq lhoq ge yu é myiwe wui, nat nyhit nat lhoq htoq pyám byi huî é, Magadalaq wà mâ é Mariq le, <sup>3</sup> Herut é ikun zum sù Kuza é yhumsîng myhí Yoanaq le, Susannaq le, gotû myiwe wui myo myo le, Yesuq eq rahá nghut akô. Haû bang gi, yhumsîng wó du é í Yesuq eq lagyo pé lé byi zo byi huq nyi akô.

*Kyôshi Sân É Hkyô*

*Mht 13:1-23; Mrk 4:1-20*

<sup>4</sup> Wà hking wà mó mâ é bang gi, Yesuq chyáng zup zîng lé lo bùm kômù shiwa byù moq mó zup míng tô é hkûn, Yesuq dangtú đông taí kyô é gi, <sup>5</sup> "Kyô hkyó sù rayuq gi, kyôshi san râ ga htoq e ló ri. Yhang, kyôshi sân kat é hkûn, ra-am gi, hkyô má gyó ang mù, byu

\* 7:35 Nghut kôlhang, Garai Gasâng é hpaqchyî byéng-yá lé lhom hap yu é banshoq bang gi, Garai Gasâng é hpaqchyî byéng-yá haû, tengmán ri ga saksé hkám nyi akô. † 7:41 Denari rachap gi, ra-nyî lhê é byù rayuq é zuihpau eq wú ri.

èq záng nâng pyeq pyâm lhê, maulat nghoq pê èq hte zo pyâm lhê dut ri. <sup>6</sup> Ra-am gi, luqgok yò má gyó ang mù, yuq htoq lo é hkûn, myigùng a teq é yanmai nyhuí shi byuq akô. <sup>7</sup> Ra-am gi, zogyóm hkaû má gyó ang luí, zubyap eq rahá yuq htoq lô mù, wup pyâm é hui bê nghut ri. <sup>8</sup> Nghut kôlhang, ra-am gi, myìhpún bo é jang má gyó ang mù, yuq kô lò jáng, rashô tú myô jat lo ri." ga taí ri.

Yhang haû su ga taí nyi é hkûn, "Gyô yù râ nohkyap dap sù gi, gyô yù sháng gaq!" ga le, htê mó èq taí kat ri.

<sup>9</sup> Haû hkûn, Yhâng é chángzô pé gi, dangtú shî hai lichyúm nghut lhê lhú ga, Yhang lé myí akô. <sup>10</sup> Yhang gi, "Garai Gasâng é mingdán eq sêng é sê gyo wuí é hkyô pé lé sê gyo râ ahko ahkáng, nungmoq lé byí to bê. Nghut kôlhang, góbâng matú gi, 'Wú to kôlhang, a myàng kó sháng,

gyô nyi kôlhang, a sê gyo kó sháng.'<sup>☆</sup> nghû, ngò dangtú dông taí lhê.

<sup>11</sup> Ahkui lhê é dangtú shi é lichyúm gi, îsu nghut ri: kyôshi gi, Garai Gasâng é mungdang nghut nyi lhê. <sup>12</sup> Hkyô má gyó âng é kyôshi gi, haí eq wuí lhê lhú gâ le, haû mungdang lé byu pé wó gyô é htâng má, lumjíng é má le, hkyi yu é má le, a jé kó sháng gaq ga luí, yhangmoq é i-myt hkaû mai nat Tsadán èq mungdang haû lé, lé yu pyâm é hui bang eq wuí lhê. <sup>13</sup> Luqgok yò pé má gyó âng é kyôshi gi, haí eq wuí lhê lhú gâ le, haû mungdang lé wó gyo jáng, gabú myit èq hap yù kôlhang, amyit a wó chín mù, rayoq rabun za lumjíng luí, gunglaú huí é nyí má, dum htak ló byuq é bang eq wuí lhê. <sup>14</sup> Zogyóm má gyó âng é kyôshi gi, haí eq wuí lhê lhú gâ le, haû mungdang lé gyô yù luí, yhumsing é asak dui e ló é hkyô má, shí ipyat lhê é myit wui myit hke hkyô, ngùn zè sutgan eq mingkan ngón hkyô má myup byuq luí, mo é ashi a zuí é bang eq wuí lhê. <sup>15</sup> Hpún bo é myigùng má gyó é kyôshi kúm gi, haí eq wuí lhê lhú gâ le, haû mungdang lé lhumzui luí ge é i-myt èq ban gyô yù mù, ging tíng shoq zuí zìng luí, wó jân é i-myt èq ashi zuí é bang eq wuí lhê.

### *Myibung Htùn É Hkyô*

*Mrk 4:21-25*

<sup>16</sup> Myibung lé tap mù, aû èq nghop tô é le, yhupchong ô má tô tô é le, ó a kut wú kó. Nghut kôlhang, wang lé lô bang myoq wó myâng râ matú kúm gi, tsungjang má tsung to to chyat kut akô. <sup>17</sup> Hkâsu mù gâ le, a htoqzê loshoq haq tô é zè haí le a joq, a sé a byông htoq loshoq wó zaú tô é zè le haí a joq nghut ri. <sup>18</sup> Haû mù luí, nungmoq hkâsu wó gyô yu é hkyô lé sidiq nyi keq, haí mù gâ le, wó to sù lé gi, jat byi shirâ, a wó su chyáng mai kúm gi, yhang wó to bûn é mâ é lé lhang, yu pyám byi shirâ nghut lhê." ga taí ri.

### *Yesuq É Yhângnu Eq Yhanggu Pé*

*Mht 12:46-50; Mrk 3:31-35*

<sup>19</sup> Haû hkûn, Yesuq é yhângnu eq yhanggu pé gi, Yhâng chyáng lé lô kô le, shiwa byu pé lûm chyûn chyap to kômù, Yhâng chyáng a wó wang ê kó nghut ri. <sup>20</sup> Haû hkûn, Yhang lé, "Náng nu eq nunggu pé gi, nang lé hui naû luí, shinggan má lánng yap bum akô." ga taí kyo akô.

<sup>21</sup> Yesuq gi, yhangmoq lé, "Garai Gasâng é mungdang lé gyô yù luí, châng é bang gi, Ngá nu eq Ngá gû pé nghut akô." ga luí, yhangmoq lé tú taí kat ri.

### *Laidun Mó Lé Yesuq Lhoq Zîm É Hkyô*

*Mht 8:23-27; Mrk 4:35-41*

<sup>22</sup> Ra-nyí lé, Yesuq gi, Yhâng é chángzô pé lé, "Nga-nhúng nhông he hpoq shut dap e ló sháng." ga taí luí, lhaí má wàng mù gû dap e ló akô. <sup>23</sup> Yhangmoq gû dap e ló é hkûn lé, Yesuq gi, yhup myhî tô ri. Haû u lé, nhông haû má laidun mó lò luí, lhaí má wui byíng lô mù, yhangmoq myup shî râ su dut lò nyi bekô nghut ri.

<sup>24</sup> Haû mù, yhangmoq gi, Yesuq chyáng huí ê luí, Yhang lé nhaû pun mù, "Yhumsîng ê, Yhumsîng ê, nga-nhúng myup ló nyi ri." ga taí akô.

<sup>☆</sup> 8:10 Esai 6:9



Haú hkûn, Yhang toq luí, laidun eq wuìlhêng pé lé tân kat jáng, haú pé gi, zim za dut ló byuq bê. <sup>25</sup> Haú mù, Yesuq gi, "Nungmoq é lumjínng myit gi, hkâmá nghut akô lhú?" ga luí, yhangmoq lé myí ri.

Yhangmoq kúm gi, gyuq maú byuq bùm kôluí, "Shí yuq gi, hkasú é byù nghut lhê lhà? Yhang hkunmó hkyó jáng, laì eq wuìlhêng pé lháng gyo byi ri-nhung!" ga luí, rayuq eq rayuq myí lhùm bum akô nghut ri.

*Nat Lé Hkat Htoq Byí É Hkyô*

*Mht 8:28-34; Mrk 5:1-20*

<sup>26</sup> Hau htâng, yhangmoq gi, Galile mau tú tap mâ é Gerase byu pé é mau má jé dap e ló bekô. <sup>27</sup> Yesuq kong shut doq ló le, haú wâ mâ é nat gang dap é sù rayuq gi, Yhang lé hui ri. Haú yuq gi, yhùm má le a nyi é za, mebu a dap é, lupdùng má myáng myáng nyi nyi sù nghut ri. <sup>28</sup> Haú yuq gi, Yesuq lé myàng jáng, wut garu luí, yhâng é hkyí wang má paí gop to mù, "Myhang htâng é Garaí Yhangzo Yesuq ê, Nàng gi, ngò eq haí séng lhê lhú? Ngo lé a zing-ri râ matú, ngò nang lé dúng nyi lhê." ga luí, htê mó èq taí garú nyi ri. <sup>29</sup> Hkâsu mù gà le, Yesuq gi, agè ashop é nat lé haú yuq gùng mai htoq ló râ matú, tân pyâm é yanmai nghut ri. Byù haú yuq lé nat gâng èq adàm dàm wang júng hkanngmó, loq eq hkyí má toqjâng tuí èq tuí shung, kyum xâng tô é eq, zúng tô é nghut kôlháng, lãng hpyit pyám pyám kut é htoq ago, nat gâng èq yhang lé yoso hkaú shut lãngmháp yù yù kut nyi ri.

<sup>30</sup> Yesuq gi, yhang lé, "Náng myíng haí gà lhê?" ga myí kat é hkûn, yhang gi, "Legio\* gà lhê." ga tú taí ri. Haí mù gà le, yhâng chyáng nat gang myo myo wang lúng tô é yanmai nghut ri. <sup>31</sup> Nat jùm gi, yhangmoq lé nik dik htùm é Lasang-dong shut a kôn kat râ matú, Yesuq lé chòm dúng nyi bum akô.

<sup>32</sup> Haú u lé, waq rajùm mó gi, bùm yàm má dû but zô nyi bum akô nghut ri. Haú mù, yhangmoq gi, waq pé chyáng wàng nhâng laq ga, Yesuq lé ahkáng dum dung dung kut kojáng, Yesuq gi, yhangmoq lé ahkáng byi kat ri. <sup>33</sup> Haú mù luí, nat gang jùm gi, byù haú yuq chyáng mai htoq ló kôluí, waq pé chyáng wàng byuq bekô nghut ri. Haú hkûn, waq haú jùm gi, gampyoq mai nhông hkaú shut rut din yán wang ló kôluí, myup shi byuq bekô nghut ri.

<sup>34</sup> Waq zúng bang gi, haú su dut é lé myàng jáng, hpanng din ló kômù, myuq hkaú mâ é bang eq awui ayàm mâ é bang lé ló taí kyô akô nghut ri. <sup>35</sup> Haú mù, wó gyô é bang gi, haú hkyô lé wú râ matú htoq lé lo akô. Yhangmoq gi, Yesuq chyáng jé lé kô é hkûn, nat gang htoq byuq hui sù, Yesuq é hkyí wang má mebu wut to luí, byù gè rayuq su zúng to lánng é lé myàng kômù, gyuq dan bùm bekô nghut ri. <sup>36</sup> Nat dap sù lé hkâsu kut luí lhoq ge yu é hkyô lé myang é bang gi, góbang lé taí kyô akô nghut ri. <sup>37</sup> Haú hkûn, Gerase byu pé é mau mâ é lhunglhâng bang gi, gyuq dan dik kôluí, Yesuq lé yhangmoq é mau mai htoq ló byuq râ matú, chòm dúng tôngbán akô. Haú mù luí, Yesuq gi, taú ló byuq râ matú lhai má wàng bê nghut ri.

<sup>38</sup> Nat htoq byuq huí é sù gi, Yesuq htâng cháng râ matú, Yesuq lé dúng tôngbán ri. <sup>39</sup> Nghut kôlháng, Yesuq gi, "Nàng, yhùm shut sheq ló mù, Garaí Gasang, nang lé hkâ-í kut byi bê hkyô lé, ló taí kyo aq." ga luí, yhang lé ló nhâng bê nghut ri. Haú hkûn, yhang htoq ló mù, Yesuq yhang lé hkâ-í kut byi bê hkyô lé, haú wà rawà bang lé ló taí kyô ri.

*Ya-iruaq É Yhangzo Byizô É Hkyô Eq, Yesuq É Bu Lé Lé Záng É Myiwe Rayuq É Hkyô*

*Mht 9:18-26; Mrk 5:21-43*

<sup>40</sup> Ahkuí, Galile byu pé gi, Yesuq dum taú lò râ lé lánng nyí kô é nghut mù, Yhang dum taú gû dap lo é hkûn gabú myit eq lhom te yu akô. <sup>41</sup> Haú hkûn, Ya-iruaq gà é tarajong má up sù rayuq gi, jé lé lô mù, Yesuq é hkyí wang má hkyihput htuq luí, yhâng yhùm má lé râ matú ji nyi ri. <sup>42</sup> Hkâsu mù gà le, raxe í zân bò bê é, yhangzo byizo te gi, shi ló nyi é yanmai nghut ri.

\* 8:30 Legio gà é lichyúm gi, gyezo 4000 eq 6000 gyoro bo é gyedap lé taí ri.

Haû mù, Yesuq cháng e ló le, shiwa byu pé gi, Yhang lé záng htông lo bum akô. <sup>43</sup> Haû u lé, raxe í zân sui yú lú ngunzè lhungháng ban pyám shoq chi sará pê chyáng yâ wú kôlhang, hká yuq le a wó yâ gè byi é† myiwe myhí rayuq le haû hkaû má bo tô ri. <sup>44</sup> Myiwe haû gi, Yesuq é nunghtáng má huí lé mù, Yhâng é bushi htâng má ê záng kat eq, suí yui é ana gi, ge byuq bê nghut ri.

<sup>45</sup> Haû hkûn, Yesuq gi, "Ngo lé, ó yuq záng bê lú?" ga lú myi jáng, lhunghâng bang gi, a sé ga he nyi bùm kô é hkûn lé, Petruq gi, "Yhumsîng ê, shiwa byu pé gi, náng é lhîngkhyuq mai náng chyáng chyîn chyap wang lo bùm kô é yanmai, nang lé záng bekô râ nghut lhê?" ga tái ri.

<sup>46</sup> Yesuq gi, "Byù rayuq ngo lé lé záng mù, ngá chyáng mâ é hpungwup a-tsam htoq ló lé, ngò châng sé kat ri." ga tái ri.

<sup>47</sup> Haû jáng, myiwe myhí haû gi, yhang a wó haq zaú to lô é hkyô lé sé jáng, req req nán lé lô mù, Yesuq é hkyî wang má ngóm gop kat lú, haû mù Yhang lé záng é hkyô eq, hká dông ge ló byuq é hkyô pé lé, shiwa byù banshoq bâng é hí má Yesuq lé tái kyô nyi ri. <sup>48</sup> Yesuq gi, "Ngá zo ê, náng é lumjîng myit gi, nang lé lhoq gè byi bê nghut ri, ngón za ló aq hko!" ga lú, myiwe haû lé tái kat ri.

<sup>49</sup> Yesuq gi, dang ru tái nyi ashî hkûn, tarajong má up sù Ya-iruiq é yhûm mai byù rayuq jé lé lô lú, "Nung zo gi, shi byuq bê, haû sará lé hkâlhoq hkyik nyî lo." ga lú, Ya-iruiq lé tái kyô ri.

<sup>50</sup> Yesuq gi, dang haû lé wó gyo jáng, "Hkâgyuq, za lumjîng aq, haû jáng, yhang ge byuq râ nghut lhê." ga lú, Ya-iruiq lé tái ri.

<sup>51</sup> Yesuq gi, Ya-iruiq é yhûm má jé é hkûn lé, Petruq, Yohan, Yakuq, eq haû myiwe zô é yhângnu eq yhângwa mai lai lú, yhûm haû má, ó lé le a wàng nhâng kut ri. <sup>52</sup> Haû u lé, lhunghâng bang zoshâng hau é yanmai, ngaubyi ngau-nhap èq yón nyi akô. Yesuq kúm gi, "Hkâ-ngaû kó, yhang shi byuq é a nghut, yhup myhî tô é sheq ru nghut lhê." ga lú, yhangmoq lé tái ri.

<sup>53</sup> Zoshâng gi, shi byuq bê lé yhangmoq sé kôlú, yhangmoq gi, Yesuq lé wuizui kut pyám byî akô. <sup>54</sup> Yhang kúm gi, myiwe zo hau é loq má zuí to mù, "Zoshâng ê, toq aq." ga tái kat ri. <sup>55</sup> Haû mù lú, yhâng woi-nyí dum taù wàng mù, haû hkûn jáng toq yap ri. Haû jáng, Yesuq gi, zoshâng haû lé zôjung byi keq, ga yhangmoq lé tái kat ri. <sup>56</sup> Haû myiwe zô é yhângnu eq yhângwa nhik gi, gyai maú byuq akô. Nghut kôlhang, Yesuq gi, haû dut é hkyô ó lé le a tái kyo râ matú, yhangnhik lé tái hkûm tô ri.

## 9

### *Lagyo Raxe Í Yuq Lé Nhang Htoq Kat É Hkyô*

*Mht 10:5-15; Mrk 6:7-13*

<sup>1</sup> Yesuq gi, haû lagyo raxe í yuq lé wut yù mù, nat gang banshoq lé wó hkat htoq pyám râ matú eq, noli nojàng wó lhoq gè râ matú, yhangmoq lé wum-o a-tsam eq ahko ahkáng byî ri. <sup>2</sup> Hau htâng má, Garai Gasâng é mingdán hkyô hko kyo râ eq, nõhpyo lhoq gè byi râ matú nhang htoq kat ri. <sup>3</sup> Yesuq gi, yhangmoq lé, "Hkyowui é matú, dumbáng, etap, zoshuq, ngùn eq, bu htaí lhang hkâwûn hkâchûng kó. <sup>4</sup> Nungmoq hká yhûm má wàng kôlhang, haû wâ mai dum htoq ló é buinyi jé shoq, haû yhûm má za nyi nyi keq. <sup>5</sup> Nungmoq lé a lhom hap yu é bang lé gi, yhangmoq é wâ mai htoq ló é hkûn, nungmoq lé a lhom hap yu é saksé dut sháng gaq, nungmoq é hkyiwa má dap é hpuilhaû lé yhangmoq é myoq hí má ko hkyô pyâm to keq." ga tái kat ri. <sup>6</sup> Haû mù, yhangmoq gi, htoq e ló lú, wâ hkang wâ mó má haû gabú danglù hko kyo uchyang, hká jé hkâmá nõhpyo lhoq gè byî wún akô.

### *Herut Maú Úng-âng É Hkyô*

*Mht 14:1-12; Mrk 6:14-29*

† 8:43 Ngunzè lhungháng ban pyám shoq chi sará pê chyáng yâ wú kôlhang, hká yuq le a wó yâ gè byi gá é, Chyúmdang ra-am má gi, bo lhê; ra-am má gi, a bò.

<sup>7</sup> Haû su dut é hkyô banshoq lé, mauzau Herut wó gyô yù luî myit wuî nyi ri. Hkâsu mù gê le, ra-am gi, Yohan shi é mai dum dui toq lô bê ga, <sup>8</sup> ra-am gi, Eliyaq dum pô htoq lo ri ga, haû mai, ra-am gi, hí hpyang lhê é myiqhtoi rayuq yuq dum dui toq lô bê ga luî, taî bùm kô é yanmai nghut ri. <sup>9</sup> Herut gi, "Yohan é ulhum lé, ngò hpyit pyâm nhâng bê, nghut kôlhang, shî í wá taî byông bùm kô é gi, ó wá nghut lhê lhu?" ga luî, Yesuq lé myàng shoq ga ho nyi ri.

*Byù Ngo Hkyîng Lé Yesuq Zoshuq Byi Tsô É Hkyô*

*Mht 14:13-21; Mrk 6:30-44; Yhn 6:1-14*

<sup>10</sup> Lagyô pé dum taû lo é hkûn, yhangmoq kut lai lo é hkyô pé, Yesuq lé taî kyô akô. Haû hkûn, Yesuq gi, yhangmoq lé shuí chûng mù, Bet-saida gê é wà mó shut tsik za e ló byuq ri. <sup>11</sup> Shiwa byu pé gi, haû hkyô lé châng sé kômù, Yhâng htâng châng e ló akô. Yesuq le yhangmoq lé lhom hap yù mù, Garai Gasâng é mingdán hkyô lé taî kyo luî, nõhpyo gè naù bang lé, lhoq gê byî ri.

<sup>12</sup> Buigyùm zó má, lagyo raxe í yuq gi, Yhâng chyáng huî ê mù, "Haû shiwa byu pé lé, awui ayâm mâ é yhûm pé eq wà pé má ló mù, zoshuq hô zo luî ló yhup kó sháng gaq, ló nhâng aq. Hkâsu mù gê le, ahkuî nga-nhúng gi, yoso má nghut nyi ri." ga luî, Yhang lé taî akô.

<sup>13</sup> Haû hkûn, Yesuq gi, "Nungmoq, yhangmoq lé rajung jung byi tso keq." ga tû taî ri. Yhangmoq gi, "Shî myhô bang lé tso râ zoshuq a ê wui le gi, ngamoq chyáng muk-yo muk ngo long eq ngozo í du mai lai luî, haî le a wó nghut ri." ga taî akô. (Hkâsu mù gê le, yuqgè wuî baú lhang ngo hkyîng kô nghut ri.)

<sup>14</sup> Nghut kôlhang, Yesuq gi, "Shî bang lé rahpúng má ngo xê xê kô kut luî, zùng nhang to keq." ga luî, Yhâng e chángzô pé lé taî ri. <sup>15</sup> Yhangmoq lé Yesuq taî é eq rajung za, banshoq bang lé zùng nhang to bekô. <sup>16</sup> Haû hkûn, Yesuq gi, haû muk ngo long eq ngozo í du lé yù mù, mauhkûng shut tu wú to luî, jeju ban hkya-on jáng, haû lé ajap jap hpé luî, shiwa byu pé lé, châng to byi râ matú, Yhâng é chángzô pé lé byi kat ri. <sup>17</sup> Haû hkûn, yhangmoq banshoq bang zô gyî bùm kô é htâng má, haû chángzô pé gi, zô myhit tô é pé lé, raxe í mung byíng shoq wó guq tsíng yu ashî kô nghut ri.

*Yesuq Gi, Hkrisduq Nghut Lhê Ga Petruq Taî É Hkyô*

*Mht 16:13-28; Mrk 8:27—9:1*

<sup>18</sup> Radàm lé, Yesuq gi, Yhang baú kyûdûng nyi é hkûn, chángzô pé le, Yhang eq rahá nghut akô. Hau htâng, Yhang gi, yhangmoq lé, "Shiwa byu pé gi, ngo lé ó yuq nghut lhê ga, taî akô lhu?" ga myî ri.

<sup>19</sup> "Ra-am gi, Wui-myhup Sará Yohan ga; góbang gi, Eliyaq ga; dum ra-am gi, hí hpyang lhê é myiqhtoi rayuq yuq dum dui toq lô é nghut ri ga, taî akô." ga luî, yhangmoq tû taî akô.

<sup>20</sup> Dum, Yhang gi, yhangmoq lé, "Nghut kôlhang, nungmoq gi, ngo lé ó yuq nghut lhê nghu akô lhu?" ga myî ri.

Haû hkûn, Petruq gi, "Nàng gi, Garai Gasang nhâng byî é Hkrisduq nghut ri." ga tû taî ri.

<sup>21</sup> Shî hkyô ó lé le a taî kyo sháng gaq ga, Yesuq, yhangmoq lé taî hkûm pyâm ri. <sup>22</sup> Haû mù, Yhang gi, "Haû Byu Yhangzo gi, zing-rî é myo myo hui zo luî, suwún wuî, hkyangjong agyi pé, tarâ sará pê èq he-ngik pyâm é hui mù, sat pyâm é hui ra râ nghut lhê, hau htâng sum nyí nghu râ buinyì má, lhoq toq yu é hui râ nghut lhê." ga taî ri.

<sup>23</sup> Hau htâng, banshoq bang lé Yhang dum xoq taî é gi, "Ngá htâng cháng naù sù ó yuq nghut kôle, yhumsing gùng yhumsîng he-ngik pyâm mù, nyí wuî yhumsing é tapzîng lé waq chûng\* luî, cháng ra râ nghut lhê. <sup>24</sup> Hkâsu mù gê le, yhumsing é asak lé hkyi yù naù sù ó yuq nghut kôle, asak sum râ nghut lhê; nghut kôlhang, Ngá é yanmai, yhumsing é asak sum pyâm é sù kúm gi, asak hkyi yu é hui râ nghut lhê. <sup>25</sup> Byù gi, mingkan gón lé wó sing to kôlhang, yhumsing é asak woi-nyí sùm byuq é nghut le gi, yhang é matú, haî

\* 9:23 Tapzîng lé waq chûng nghu é gi, Yesuq é yanmai jamjau huî é lé taî é nghut lhê.

akyû bò râ lhu? <sup>26</sup> Ngò eq Ngá é dang lé, lhom hap yù râ lé hoq é sù ó yuq lé le, haû Byu Yhangzo gi, yhumshing é hpungwup shingkang eq, Yhâng Wâ é hpungwup shingkang, haû chyoyúng maumang lagyô pê é hpungwup shingkang eq jé lé é hkûn, hoq pyám râ nghut lhê. <sup>27</sup> Ngò, nungmoq lé teng za taí kôlé, shi má yap tô é bang ra-am gi, Garai Gasâng é mingdán lé a myang é za shí kó râ a nghut." gâ ri.

*Mosheq Eq Eliyaq Yesuq Lé Hui Nyo É Hkyô*

*Mht 17:1-8; Mrk 9:2-8*

<sup>28</sup> Dang haû taí é htâng, shit nyí kô nghut jáng, Yhang gi, kyûdung râ ga Petruq, Yohan, Yakuq pé lé shuí chûng mù, bùm shut doq ló ri. <sup>29</sup> Kyû dúng nyí le, Yesuq é myoqdong gi, ihpyô isâm htaí lò mù, Yhâng é mebu gi, lhap su duq bang lo ri. <sup>30</sup> Haû hkûn, wú keq, Mosheq eq Eliyaq gi, hpungwup shingkang eq htoq lé lô luí, Yesuq eq dáng nyo lhûm nyi akô. <sup>31</sup> Yhangmoq gi, Garai Gasang myit tô é hkyô Yerusalem wà mó má Yesuq shí hkâm é dông mai dik lò râ nghut é hkyô lé taí lhûm nyi akô. <sup>32</sup> Petruq eq yhâng luzúm nhik gi, yhup mui nyi akô; nghut kôlhang, yhangmoq bûn lo é hkûn lé, Yesuq é hpungwup shingkang lé le, Yhang eq rahá yap to su nhik lé le, myang kat akô. <sup>33</sup> Haû nhik Yesuq chyáng mai gâng ló nyi é hkûn, Petruq gi, Yesuq lé, "Yhumshing ê, shí jowò má nga-nhúng nyi le ge ri, haû mù, Nàng é matú ralhûm, Mosheq é matú ralhûm, Eliyaq é matú ralhûm kut, ngamoq lé, zúm sùm lhum saí nhâng laq." ga taí kat kôlhang, yhang haí taí nyi é lé, yhang a sé.

<sup>34</sup> Petruq dang taí nyi ashí hkûn lé, mhut jé mù, yhangmoq lé htup zing lo nyi ri. Mhut haû htup lo nyi é yanmai, yhangmoq gi, gyuq byuq akô. <sup>35</sup> Haû mhut hkaû mai htoq lo é htê gi, "Shí yuq gi, Ngá zo nghut lhê; Ngò hkyin yu é Sù le nghut lhê; Yhâng é dang gyo keq." gâ ri. <sup>36</sup> Dang htê haû zim jáng, Yesuq yhang baú nyi tô é lé, yhangmoq myang akô. Yhangmoq myang é hkyô lé, buinyi haû bun haû yoq má, ó lé le a taí kyô é zim za nyi byuq akô.

*Nat Gang Dap É Yuqgè Zo Rayuq Lé Lhoq Gê Byí É Hkyô*

*Mht 17:14-18; Mrk 9:14-27*

<sup>37</sup> Hau htâng nyí, yhangmoq bùm haû mai gyó ló kô le, byù moq mó gi, Yesuq lé lhom te yu akô. <sup>38</sup> Haû hkûn, byù hpúng haû mâ é byù rayuq wut garû htoq ló é gi, <sup>39</sup> "Sarâ ê, wú aq, ngá é zo te yuqzo gi, nat wang júng mù dàn so dàn loq garû lo lhê, guttsû gi, agut gut dut shoq langhtân nhang lo lhê kut mù, nat gi, yhang lé gyai myáng shoq zing-rí yù yù kut nyi ri. <sup>40</sup> Nat haû lé hkat pyám byi kó laq nghû luí, Náng é chángzô pé lé ngò dúng wú kôlhang, yhangmoq a wó hkat pyám byi kó. Haû mù, ngá zo lé lhoq gê byi râ matú, ngò gi, nang lé gyai myit lum é eq dúng kat lhê." gâ ri.

<sup>41</sup> Haû mù luí, Yesuq gi, "Lumjínng myit a bo é eq agè ashop é amyû pé ê, Ngò gi, hkâm-yháng jé shoq nungmoq eq rahá nyi mù, wó jân nyi râ lhu? Nung zo lé, shí shut shuí lé lô aq." ga tû taí ri.

<sup>42</sup> Zoshâng haû, lé lo nyi le lhang, nat gang gi, yhang lé lhoq lhêng to mù langhtân nhang ashí. Yesuq kúm gi, haû agè ashop é nat lé tân kat luí, zoshâng haû lé lhoq gê byi mù, yhâng wa lé dum ap byí ri. <sup>43</sup> Nyí mi-nyí gi, Garai Gasâng é kô dik é hpungwup a-tsam lé maú hong nyi bum akô.

Lhunglhâng bang gi, Yesuq kut é muzó haû lé maú nyi bùm kô le, Yesuq gi, <sup>44</sup> "Haû Byu Yhangzo gi, byu pé é loq má ap pyâm é hui zo râ nghut lhê. Dang shí hkun lé nungmoq é no má rago gyô wun to keq." ga luí, chángzô pé lé taí ri. <sup>45</sup> Yhangmoq kúm gi, dang haû lé a sê gyo kó, hkâsu mù ga le, haû gi, yhangmoq é matú a sê gyo sháng gaq ga luí, nghop tô ashí yanmai nghut ri. Dang hau é lichyúm lé, Yesuq chyáng yhangmoq a wám myi kó nghut ri.

*Ó Yuq Gi, Kô Dik Sù Nghut Râ Lhu?*

*Mht 18:1-5; Mrk 9:33-40*

<sup>46</sup> Hau htâng, lagyô pé gi, hká yuq sheq, kô dik sù nghut lhê lhu ga, rayuq eq rayuq taí myíng myô lhûm nyi akô. <sup>47</sup> Yesuq kúm gi, yhangmoq é unghkaû má myit nyi é hkyô lé

sé byi luí, zoshâng rayuq lé shuí yù mù, Yhâng nàm má shap to luí, <sup>48</sup> "Shí zoshâng lé Ngá é myìng mai hap sù ó yuq nghut kôle, Ngo lé hap yu é sù nghut bê; Ngo lé hap yù sù ó yuq nghut kôle, haú Ngo lé nhang kat é Sù lé hap yu é le nghut lhê. Haú mù luí, nungmoq banshoq má, je tiq sù gi, je ko sù nghut lhê." ga luí, yhangmoq lé taí ri.

<sup>49</sup> Haú hkûn, Yohan gi, "Yhumsîng ê, Náng é myìng láng luí, nat gâng pé lé hkat pyám byî wún é byù rayuq lé, ngamoq myang ri. Yhang gi, ngamoq chyáng a lòm sù nghut é yanmai, yhang lé ngamoq hkûm pyám é nghut lhê." ga taí ri.

<sup>50</sup> Yesuq kúm gi, "Yhang lé hkâhkúm kó, nungmoq é gyè hkyam shut a nyì sù gi, nungmoq é hkyam shut nyì sù nghut lhê." ga luí, yhang lé taí ri.

### *Samariq Wà Bang Yesuq Lé A Lhom Hap Yu É Hkyô*

<sup>51</sup> Ahkuí, Yesuq gi, Yhang lé mauhkûng shut shuí toq yù râ buinyì chyâng lò bê nghut mù, Yerusalem wà mó shut ê râ lé myit hpyit to luí, Yhâng é hí má lagyo nhang kat ri.

<sup>52</sup> Lagyo haú bang gi, Yhâng matú râ é hkyô lajang láng râ ga, Samariq wà rawà má wang ló akô. <sup>53</sup> Nghut kôlhang, Yesuq gi, Yerusalem wà mó shut laí e ló é sù nghut é yanmai, haú wà bang gi, Yhang lé a lhom hap yù kó. <sup>54</sup> Haú hkûn, lagyo Yakúq eq Yohan nhik gi, haú lé myàng jáng, "Yhumsîng ê, yhangmoq lé lhoq htên pyám râ matú, ngá-nhik mauhkûng mai myi wut hkyô le, a gè lhu?" ga luí, Yesuq lé myí akô. <sup>55</sup> Yhang kúm gi, lhing wú luí yhangnhik lé, tân pyám ri, <sup>56</sup> haú mù luí, yhangmoq gi, gó wà shut e ló byuq akô.

### *Yesuq É Htâng, Hkâsu Kut Cháng Râ Hkyô*

#### *Mht 8:19-22*

<sup>57</sup> Yhangmoq haú hkyô má e ló kô le, byù rayuq gi, "Nàng hká e le hká ngò cháng râ." ga luí, Yesuq lé taí ri.

<sup>58</sup> Yesuq gi, haú yuq lé, "Wamhkuí pé gi, hkyûng wó akô, nghoq pé le, nghoqsut wó akô. Nghut kôlhang, haú Byu Yhangzo gi, ulhum to jang lhang a wó é nghut ri." ga taí pyám ri.

<sup>59</sup> Dum rayuq lé, "Ngá htâng cháng aq." ga taí jáng, haú yuq gi, "Yhumsîng ê, ngá wa lé, ló yhûm pyám râ ahkáng hí byi shi laq." ga taí ri.

<sup>60</sup> Yesuq gi, yhang lé, "Shí bê bang† gi, shí bê bang yhangchang yhûm lhum kó sháng gaq; nghut kôlhang, nàng gi, Garai Gasâng é mingdán hkyô lé, ê hko kyo aq." ga taí ri.

<sup>61</sup> Byù rayuq dum, Yhang lé, "Yhumsîng ê, ngò le náng htâng cháng râ, nghut kôlhang, ngá yhumbyù lé hí hkyang ló shit to râ ahkáng byi shi laq." ga taí ri.

<sup>62</sup> Yesuq gi, "Yò hpuq li zui mù htâng shut lhing wú sù ó yuq nghut kôlhang, Garai Gasâng é mingdán eq a gingdán." ga luí, yhang lé taí ri.

## 10

### *Yesuq, Chángzô Pé Nyhit Xê Yuq Lé, Nhang Htoq Kat É Hkyô*

<sup>1</sup> Hau htâng má, Yhumsîng gi, gotû chángzô pé nyhit xê yuq\* lé hkyin yù mù, Yhang e ló râ wà eq jowò hkangmó shut í yuq razúm zúm kut luí, Yhâng é hí má ê nhang kat ri.

<sup>2</sup> Yesuq gi, yhangmoq lé, "Kyô† shú yù râ myo shoq joq kôlhang, mù zui râ byù gi, shaú nyi ri. Haú mù, haú kyô Yhumsîng lé, Yhâng é kyô yò má, kyô shu byù‡ myo myo nhâng byi râ matú, dung keq. <sup>3</sup> Nungmoq e ló keq! Wamhkui hpúng má nhang hâng kat é sau zô pé lé su, Ngò, nungmoq lé nhang kat é nghut lhê. <sup>4</sup> Ngùn htung eq, etap, hkyî-tsung pé hkâyü chûng kó, hkyô má ó lé le hkâshichyên kûn nyi kó.

<sup>5</sup> Nungmoq gi, hká yhûm má wàng e ló kô le, 'Shi yhûm nguingón nyi sháng gaq.' nghu luí, hí taí keq. <sup>6</sup> Haú yhûm má nguingón hkyô eq gingdán sù nyi é nghut le gi, nguingón hkyô haú gi, haú yuq é ahtoq má joq to râ nghut lhê. Haú a nghut jáng, nguingón hkyô

† 9:60 Shí bê bang gâ é gi, woi-nyí má shi to bang lé gâ lhê. \* 10:1 Chyúmdang ra-am má gi, chángzo nyhit xê í yuq ga le kê tô ri. † 10:2 Kyô nghu é gi, Yesuq lé lumjîng nàu kôlhang taí kyo râ bang a nyi luí láng tô é bang nghut ri. ‡ 10:2 Kyô shu byù nghu é gi, Yesuq é hkyô gabú danglù lé taí kyo bang nghut ri.

haû gi, nungmoq chyáng dum taû lo byuq râ nghut lhê. <sup>7</sup> Haû yhûm má nyi to mù, yhangmoq haî byî le haî zo haî shuq keq; hkâsu mù gâ le, mù zui sù gi, zuihpau wó yû gíng lhê; haû mù, nungmoq rayhum htâng rayhûm hkâhtot nyi wún kó.

<sup>8</sup> Nungmoq hká wà má wang ló kôlhang, yhangmoq lhom hap yù kô é nghut le gi, nungmoq é hí má yhangmoq htung to byî é zoshuq lé, zo keq, shuq keq. <sup>9</sup> Haû mâ é nò bang lé lhoq gê byi mù, 'Garai Gasâng é mingdán gi, nungmoq eq chyâng lò bê nghut ri.' nghû luî, yhangmoq lé taî kyo keq. <sup>10</sup> Nghut kôlhang, nungmoq hká wà má wang ló kô le, yhangmoq a lhom hap yu é nghut le gi, haû wâ mâ é hkyô mó má htoq ê mù, <sup>11</sup> 'Ngamoq é hkyî má dap tô é nungmoq wà mâ é hpuilhaû lhang, nungmoq lé hkyang pû tsô nyi râ matú ngamoq ko hkyô pyâm to byi bê. Nghut kôlhang, Garai Gasâng é mingdán gi, chyâng lò bê hkyô lé, sé to keq.' nghû luî taî keq. <sup>12</sup> Ngò, nungmoq lé taî kôlé, haû buinyi<sup>§</sup> lé, haû wâ gi, Sodom wà htoq má je hpuzo râ nghut lhê.

<sup>13</sup> Kurazin wà mó ê! Nàng dingnyé wó ri! Bet-saida wà mó ê! Nàng dingnyé wó ri! Nungmoq chyáng lé kut shit é laklaí kumlhá pé lé, Turuq myuq eq Sidun myuq má kut shit é ru nghut le gi, yhangmoq, noq noq mai myit lhîng mù, jimê tû wut lhê, myiwap kyaq gyûn lhê kut zung ngûng to bekô râ nghut lhê. <sup>14</sup> Haû mù, tarâ jéyáng é nyí jé jáng, nungnhik gi, Turuq myuq eq Sidun myuq htoq má je hpuzo\* kó râ nghut lhê. <sup>15</sup> Dum mù, Kaperna-um wà nàng ê, nàng gi, mauhkûng jé shoq waq toq é hui râ lhu? A nghut, mosumhkung má sheq gyó râ nghut lhê." ga taî ri.

<sup>16</sup> Hau htâng má, chángzô pé lé dum xoq taî é gi, "Nungmoq é dang gyo sù gi, ngá é dang gyo sù le nghut bê; nungmoq lé he-ngik é sù gi, ngo lé le he-ngik é sù nghut bê; ngo lé he-ngik é sù gi, ngo lé nhang kat sù lé le, he-ngik é sù nghut bê." gâ ri.

#### *Nyhit Xê Yuq Dum Taû Jé Lo É Hkyô*

<sup>17</sup> Hau htâng, haû chángzo nyhit xê yuq gi, gabú myit èq dum taû lò mù, "Yhumsîng ê, náng é myîng lé lang jáng, nat gâng pé lhang ngamoq é dang lé gyô bum akô." ga taî akô.

<sup>18</sup> Haû su ga taî kôjáng, Yesuq tû taî é gi, "Tsadán gi, mauhkûng htoq mai lhap hpyat é su byit gyó lo é lé ngò myang kat bê. <sup>19</sup> Wú keq! Ngò gi, nungmoq lé, lhangmuì eq gogok pé lé wó nang râ eq gumlau gyè pé é wum-o a-tsam banshoq lé wó ûng râ ahko ahkáng lé byi bê nghut mù luî, hai èq le nungmoq lé wó lhoq hten râ a nghut lo. <sup>20</sup> Nghut kôlhang, nat pé nungmoq é dang gyô é lé za hkâgabú nyî kó, mauhkûng htoq mâ é asak jihpán laiká buk má nungmoq é myîng bo to bê lé sheq gabú nyî keq." ga taî ri.

<sup>21</sup> Haû u lé, Yesuq gi, Chyoiyúng Woi-nyí má gabú é myit byíng lô mù, "Mauhkûng eq myigung é Yhumsîng, Âwa ê, Nàng gi, haû pé lé, hpaqchyî byéng-yá bò bang eq myit hpaqchyî sé bâng é hí mai haq nghop to luî, zoshâng wuì lé tûn shit bê nghut é yanmai, Ngò, Nang lé hkya-ôn lhê ô. Nghut bê, Âwa ê, haû gi, Nàng ô nau é hkyô nghut ri.

<sup>22</sup> Ngá Wa gi, lhunglhang lé Ngá é loq má ap byi to bê. Garai Gasang Yhangzo ó nghut é gi, Âwa Garai Gasang mai lai luî ó le a sé; Âwa ó nghut é lé le, haû Zo eq haû Zo mai sé nhâng râ matú hkyin yu é bang mai lai luî, ó a sé." ga taî ri.

<sup>23</sup> Hau htâng má, Yhâng é chángzô pé shut lhing wú luî, yhangmoq lé baú za haq taî kat é gi, "Nungmoq byu-myàng é hkyô pé lé, myang é myoq pé gi, hkungsô wó nyi ri. <sup>24</sup> Hkâsu mù gâ le, Ngò, nungmoq lé taî kôlé, nungmoq wó myâng, wó gyô é pé lé, myiqhtoî pé eq hkohkam pé myo myo gi, myàng nau gyo nau kôlhang, a wó myâng, a wó gyo kó nghut ri." ga taî ri.

#### *Gè É Samariq Byù*

<sup>25</sup> Haû hkûn, wú keq, tarâ sará rayuq gi, toq luî, Yesuq lé, "Sarâ ê, ahtum abyuq é asak lé wó yû shoq, ngò hkâsu kut râ râ lhê lhu?" ga luî, Yhang lé myî chyam wú ri.

<sup>§</sup> 10:12 Haû buinyi gâ é gi, Garai Gasâng tarâ jéyáng é buinyi lé gâ lhê. \* 10:14 Nungnhik je hpuzô é hkyô gi, mauhpo kumlhá myo myo myang é nghut kôlhang, myit a lhîng kô é yanmai nghut ri.

<sup>26</sup> Yesuq gi, "Mosheq é tarâ má hkâsu ga kê tô ri lhu? Nang haû lé hkâsu nghap yu nyi lhê lhu?" ga luî, yhang lé myî ri.

<sup>27</sup> Haû yuq gi, "Haû Yhumsîng nâng é Garai Gasang lé, nâng é myit nhiklhum banshoq, nâng é asak woi-nyí lhum gón, nâng é wum-o banshoq, nâng myit é hkyô banshoq èq, chyitdap râ lhê;<sup>☆</sup> 'nâng gûng lé nang chyitdap é su, nâng é chyangnâm mâ é bang lé le chyitdap aq.<sup>☆</sup>" ga tâ ri.

<sup>28</sup> Yesuq gi, "Nang tâ ri é dang jô ri; haû su yhang kut aq, haû jâng nang gi, asak dui râ nghut lhê." ga yhang lé tâ ri.

<sup>29</sup> Nghut kôlhang, haû yuq gi, yhang gungdu dingmán é lé, tân shit naû luî, "Ngá é chyangnâm mâ é sù gi, ó yuq nghut lhê lhu?" ga luî, Yesuq lé myî ri.

<sup>30</sup> Yesuq tâ ri é gi, "Byù rayuq gi, Yerusalem wà mó mai Yeriho wà shut gyó lô le, damyaq eq htung huî ri. Damyaq haû bang gi, yhang é mebu pé lé hkyut shang pyám byi kôluî, rayúm gyut shoq bat nha mù, aluq shoí shí jâng sheq tô pyâm to kôluî lô byuq bekô. <sup>31</sup> Haû u lé, hkyangjong rayuq gi, haû hkyô mai lai âng lô le, haû damyaq hui sù lé myàng jâng, koi lai lô byuq ri. <sup>32</sup> Haû eq rajung za, Lewiq rayuq le, haû mai lai lô é hkûn, haû yuq lé myàng jâng, koi lai lô byuq ri. <sup>33</sup> Nghut kôlhang, Samariq byù rayuq le, haû mai lai lô é hkûn, haû yuq leq tô é lé myàng jâng, wú shogyo luî yhang chyáng huî è mù, <sup>34</sup> yhang é dâm má, xû eq tsibiyiq wing shoq gyun luî, rago za htup byi mù, yhang é logúng má, haû yuq lé bún ke luî, bing-yhûm ralhûm má jé shoq shuî lô mù, gôn lajang byî ri. <sup>35</sup> Htang nyí lé, yhang gi, haû bing-yhûm yhumsîng lé ngùn Denari í chap shê byi mù, tâ é gi, 'Shí yuq lé wú lajang byi laq, yhang gùng má nang myo chung zâng é banshoq lé ngò dum tâ lô jâng, lo xap râ.' gâ ri." gâ ri.

<sup>36</sup> Hau htang, tarâ sará lé, "Nang gi, byù haû bang sum yuq má damyaq huî sù é chyangnâm mâ é dông nghut sù gi, hká yuq nghut râ su ngam ri lhu?" ga luî, Yesuq myî ri.

<sup>37</sup> Haû tarâ sará gi, "Haû yuq lé shogyo sù nghut ri." ga tâ ri.

Yesuq gi, "Nang le haû dông lô kut aq." ga luî, yhang lé tâ kat ri.

#### *Mariq Eq Mahtaq Nhik Chyáng Yesuq Ê Jé É Hkyô*

<sup>38</sup> Ahkuî, Yesuq eq Yhang é chángzô pé hkyô xoq sô e lô kô le, wà rawà má jé wang lô é hkûn, Mahtaq gâ é myiwe rayuq gi, Yesuq lé yhang yhûm má lhom te yu ri. <sup>39</sup> Mahtaq gi, Mariq gâ é yhanggu myiwe zo rayuq wó ri. Mariq haû gi, Yhumsîng Yesuq é hkyô wang má zung to mù, Yhang mhoqshit é dang lé gyô nyi ri. <sup>40</sup> Mahtaq kúm gi, saí tso saí huq é amû myo luî, gyin bún nyi ri. Haû mù luî, yhang huî è mù, "Yhumsîng è, ngá gu gi, saí tso saí huq é amû má, ngo lé baú za rap kut tô é lé, nang a bo myàng byi lhu? Ngo lé, lé garúm sháng gaq, yhang lé tá byi laq." ga luî, Yesuq lé tâ ri.

<sup>41</sup> Haû hkûn, Yhumsîng gi, "Mahtaq, Mahtaq, nang gi, muzó lé za ma nyi mù, myit myo myit chiq é huî nyi ri. <sup>42</sup> Nghut kôlhang, je ahkyak é hkyô gi, rahkat za nghut lhê. Mariq kúm gi, haû je ge é hkyô lé hkyin yù bê nghut ri. Haû lé yhang chyáng mai wó yu pyám byi râ a nghut." ga luî, yhang lé tâ ri.

## 11

#### *Yesuq Mhoqshit É Kyûdung Dang*

##### *Mht 6:9-13; 7:7-11*

<sup>1</sup> Ra-nyí lé, Yesuq gi, jowò rawò má kyûdung nyi ri. Yhang kyû ban dung jâng, Yhang é chángzo rayuq gi, "Yhumsîng è, Yohan gi, yhang é chángzô pé lé kyûdung râ hkyô mhoq byi é su, ngamoq lé le mhoq byi laq." ga Yhang lé tâ ri.

<sup>2</sup> Haû hkûn, Yhang gi, "Nungmoq kyûdung le, 'Mauhking htoq tsáng myhâng mâ é ngamoq é Áwa è, Nang é mying gi, chyoiyung nyi sháng gaq. Nang é mingdán jé lô sháng gaq.

☆ 10:27 Tarâ Pun 6:5 ☆ 10:27 Nhung 19:18

<sup>3</sup> Ngamoq nyí wuî râ é zoshuq lé, ngamoq lé nyí wuî byi laq.

<sup>4</sup> Ngamoq lé shut é byù banshoq bâng é mara lé, ngamoq hkyut pyám byî é yanmai, ngamoq é mara lé le hkyut pyám byi laq.

Ngamoq lé, agúng alaú hkyô má hkâwâng nhâng.<sup>1</sup> nghû keq." ga luí, yhangmoq lé mhoqshit ri.

<sup>5</sup> Yesuq yhangmoq lé dum taí é gi, "Dangké, nungmoq chyáng mâ é rayuq sù gi, buinùm wó é nghû sháng, yhang gi, gunggàm yoq má haú yuq chyáng ê luí, 'Buinùm hpó ê, ngo lé muk sùm long byam chyi byî kat laq, <sup>6</sup> haí mù gà le, ngá buinùm rayuq byìn we mai ngá chyáng jé nyi tô ri. Ngò gi, yhang lé byi tso râ haí le a joq byam dut tô ri.' ga taí é hkûn, <sup>7</sup> yhúmhaú shut mâ é sù gi, 'Ngo lé, hkâlê lhoq hkyik lo, hkum le myhî pyám bê, ngá zoshâng wuî le ngò eq rahá yhupjang má yhup to bekô. Ngò, nang lé haí le a wó toq yû byi lo.' ga tu kat ri. <sup>8</sup> Ngò, nungmoq lé taí kôlé, buinùm nghut é yanmai za gi, muk a kâm toq byi lo kôlhang, zuq zuq dúng nyi é yanmai, haú yuq lé, yhang ra châ é banshoq toq yû byi râ nghut lhê.

<sup>9</sup> Haú mù, ngò, nungmoq lé dum taí kôlé, dung keq, haú jáng, nungmoq lé byi râ nghut lhê; hô keq, haú jáng, nungmoq myàng kó râ nghut lhê; hkum má kok keq, haú jáng, nungmoq lé hpóng byi râ nghut lhê. <sup>10</sup> Hkâsu mù gà le, ó yuq nghut kôle, dung sù wó râ; hô sù myàng râ; hkum kok sù lé gi, hpóng byi râ nghut lhê.

<sup>11</sup> Nungmoq îwâ pé má, ó yuq wá, yhumsing yhangzo muk dúng le, luqgok byi kó râ lhú? Ngozo dúng le, lhangmuì byi kó râ lhú? <sup>12</sup> Woq-ú dúng le, gogok byi kó râ lhú? <sup>13</sup> Agè ashop é bang nungmoq lháng gi, nungmoq é zo wuî lé, ge é chyunghuq dat byi kô le nhîng, mauhkûng htoq tsáng myhâng mâ é nungmoq é îwa gi, Yhang lé dúng é bang lé, je riyhang haú Chyoiyúng Woi-nyí byi râ nghut lhê." ga taí ri.

*Mara Hûn É Dang Lé Yesuq Tô Taí É Hkyô*

*Mht 12:22-30, 43-45; Mrk 3:20-27*

<sup>14</sup> Radàm lé, Yesuq gi, byù rayuq lé dang a wó nyô shoq kut tô é nat gang lé, haú yuq chyáng mai hkat htoq pyâm ri. Nat haú htoq ló byuq é htâng má, dang a wó nyô sù gi, dang wó nyo nyi é yanmai, byù moq mó gi, chòm maú byuq bum akô. <sup>15</sup> Nghut kôlhang, yhangmoq chyáng mâ é ra-am gi, "Yhang gi, nat gâng pé é zau Bezebulaq é wum-o a-tsâm èq za, nat gâng pé lé wó hkat pyâm é nghut ri." ga taí bum akô nghut ri. <sup>16</sup> Ra-am le, Yhang lé, mauhkûng mâ é kumlhá tân shit wú laq ga dúng chyam wú akô.\*

<sup>17</sup> Yesuq kúm yhangmoq myit nyi é hkyô lé sé mù taí é gi, "Ikun byoq é mingdán hká lhum nghut kôle, hten byuq râ za nghut lhê; haú eq rajung za, ikun byù yhangchang rayuq eq rayuq byoq lhùm é yhùm htu gi, byoq gâng lhum râ za nghut lhê. <sup>18</sup> Nat pé le yhangmoq yhangchang byoq gâng lhùm nyi kô é nghut le gi, Tsadán é mingdán gi, hkâsu kut wó gîng to râ lhú? Ngò isu nghu taí é gi, nungmoq ngo lé Bezebulaq é wum-o a-tsâm èq za, nat gâng pé lé hkat pyâm ri ga kô é yanmai nghut lhê. <sup>19</sup> Ngò gi, Bezebulaq é wum-ô èq za, nat gâng pé lé hkat htoq é nghut jáng, nungmoq é chángzô pé gi, ó yuq é wum-o a-tsâm èq za, nat gâng pé lé hkat pyám kô é nghut lhê lhú? Haú mù luí, yhangmoq gi, nungmoq lé jéyáng é bang dut bekô râ nghut lhê. <sup>20</sup> Nghut kôlhang, Ngò gi, Garai Gasâng é wum-ô èq nat gâng pé lé hkat htoq pyâm é nghut jáng, Garai Gasâng é mingdán† gi, nungmoq chyáng jé bê nghut ri.

<sup>21</sup> Wum-o bo é sù rayuq gi, yhâng é yhùm lé, shâm, lhâm chûng luí zúng tô é nghut jáng, yhâng é sutzè pé gi, rago za wó joq to râ nghut lhê. <sup>22</sup> Nghut kôlhang, yhâng htoq wum je bo é sù lé luí, haú yuq lé, lé zân ung pyâm é nghut le gi, yhang lum tô é shâm, lhâm lé, hkyom yu pyám byi luí, yhâng é sutzè pé lé, gam yu pyám byi râ nghut lhê.‡

\* 11:16 Byu pé gi, Yesuq lé Garai Gasang nhang kat é hkyô lé saksé myàng nàu luí, mauhpo kumlhá dúng nyi akô.

† 11:20 Garai Gasâng é mingdán gà é gi, byù htoq má le, nat htoq má le, Garai Gasâng yhang uphkan é lé gà é nghut lhê. ‡ 11:22 Haú eq rajung za, Yesuq gi, Tsadán lé zân ûng bê nghut é yanmai, agè ashop é nat pé lé byu pé chyáng mai, wó hkat pyám bê nghut ri.



<sup>23</sup> Ngá hkyam shut a dap sù gi, Ngo lé gyè kut sù nghut lhê. Ngò eq rahá a shuí tsing sù gi, lhoq pyo pyâm é sù nghut nyi ri.

<sup>24</sup> Haù agè ashop é nat gi, byù rayuq chyáng mai htoq lò mù, kyuq hué é jowò pé má sô yông e lò luí, no rà jowò hkat ho wú le, a myang hô nghut ri. Haù hkûn, yhang gi, 'Ngò nyi laí lo é yhûm má dum taù lò wú rà.' ga taí ri. <sup>25</sup> Yhang dum taù jé lò wú le, yhûm haù gi, shum pyám mù san za rago dut to lánq é lé lò myang ri. <sup>26</sup> Haù jáng, yhang gi, dum taù é mù, yhâng htoq je wuí é nat nyhit nat lé shuí lò luí, haù má lo wàng nyi to bekò. Haù mù, haù yuq é nyi yap sâmlai gi, hí lhê htoq má je wuí lò bê nghut ri." ga taí ri.

<sup>27</sup> Haù su ga, Yesuq taí nyi é hkûn, haù shiwa hpong mâ é, myiwe zo rayuq htê mó o mó èq Yhang lé taí é gi, "Nang lé wun é ùng wam eq nàng shuq é nauwang gi, hkungsô wó nyi ri ô!" gâ ri.

<sup>28</sup> Yesuq gi, "Garai Gasâng é mungdang gyô yù luí châng kut é bang gi, je riyhang hkungsô wó kó rà nghut lhê." ga taí ri.

*Mauhpo Kumhá Lé Dung Kô É Hkyô*

*Mht 12:38-42; Mrk 8:12*

<sup>29</sup> Shiwa byu pé jat myô zup zîng lo é hkûn lé, Yesuq taí é gi, "Shí ipyat lhê é byu pé gi, agè ashop é bang nghut akò. Yhangmoq gi, limik kumlhá dúng nyi bùm kôlháng, Yonaq é kumlhá mai lai luí, gotû haí le tún shit rà a nghut. <sup>30</sup> Yonaq gi, Ninewe wà byù pé hí má kumlhá<sup>§</sup> dut é su, haù Byu Yhangzo gi, shí pyat lhê é byu pé hí má, kumlhá dut rà nghut lhê. <sup>31</sup> Maupyí mâ é hkohkâm myhí gi, maumyí lò htâng é mai lé lò mù, Sholumon é hpaqchyí dang lé, lé gyô yù bê nghut mù, haù tarâ jéyáng é buinyí má, shí ipyat mâ é byu pé eq rahá toq lò luí, yhangmoq lé mara hûn rà nghut lhê. Wú keq, Sholumon htoq ko sù gi, ahkuí shí má jé nyi to bê. <sup>32</sup> Ninewe wà byu pé gi, Yonaq, mungdang hko kyô é hkûn myit lhîng kô é nghut mù, tarâ jéyáng é buinyí má, shí ipyat eq rahá toq lò luí, yhangmoq lé mara hûn kó rà nghut lhê. Wú keq, Yonaq htoq ko sù gi, ahkuí shí má jé nyi to bê.

*Myibung Su Duqbó Râ Hkyô*

*Mht 5:15; 6:22-23*

<sup>33</sup> Myibung lé tuq mù go pyâm é jowò má tô tô é le, mûng eq nghop tô é le, ó a kut wú kó. Nghut kôlháng, wang lé lô bang myoq wó myâng rà matú kúm gi, tsungjang má tsung to to chyat kut akò. <sup>34</sup> Náng é myoq gi, náng gungdû é myibung\* nghut nyi ri. Náng é myoqjí ge é nghut le gi, náng é gungdu gón má maubó byíng mui to rà nghut lhê. Nghut kôlháng, náng myoq a ge é nghut le gi, náng é gungdu gón gi, mauchut tuq dut nyi rà nghut lhê. <sup>35</sup> Haù mù, náng chyáng bo é maubó gi, mauchut byuq é, a chut byuq é lé wú nyí aq. Náng lumjîng é hkyô eq nàng myit é hkyô gi, mauchut tuq a dut sháng gaq, sidiq nyi aq. <sup>36</sup> Náng é ragùngdu gón má duqbó é nghut le gi, rawò má le mauchut é jowò a joq é za, myibung nang lé duqbó byí nyi é su, náng gungdu gón má duqbó nyí rà nghut lhê." ga taí ri.

*Hparishe Pé Eq Tarâ Sará Pé Lé, Yesuq Mara Hun É Hkyô*

*Mht 23:1-36; Mrk 12:38-40; Luk 20:45-47*

<sup>37</sup> Yesuq haù su ga ban taí é htâng má, Hparishe rayuq gi, yhang eq zang rahá zo rà matú, Yesuq lé ji ri. Haù mù, Yesuq gi, haù yhûm má wang ê mù zang zo rà ga siboí nàm má zung tô ri. <sup>38</sup> Nghut kôlháng, Hparishe wá gi, zang zo rà hí má Yesuq loq a chí é lé, myàng luí maú nyi ri.†

<sup>39</sup> Haù mù luí, Yhumsîng Yesuq yhang lé taí é gi, "Nungmoq Hparishe pé gi, góm eq zanghkoq lé ahtoq shut za chí yúng nyí kômù, nungmoq é unghkaù má gi, lú zo lú shuq é eq agè ashop é hkyô pé byíng zan tô ri. <sup>40</sup> Byù bâm pé ê, ahte‡ lé le, ahtoq§ lé le, saí sù

§ 11:30 Kumlhá gi, Yonaq, ngozò wamdaù má sum nyí lúng é su, Yesuq le, shí bê mai sum nyí nghû rà nyí má, dum dui toq lò rà hkyô lé taí nau é nghut ri. \* 11:34 Myibung gâ é gi, tengmán é mungdang lé wó sê yu é a-tsam lé, taí é nghut ri. † 11:38 Yudaq htûng tarâ má gi, zang a zo shi má loq chi rà lhê. ‡ 11:40 Ahte gâ é gi, i-myyit unghkaù lé taí ri. § 11:40 Ahtoq gâ é gi, gungdu lé taí ri.

gi, Garai Gasang rayuq za nghut é lé, a sé kó l hú? <sup>41</sup> Nghut kôlhang, ahte má bo é zè pé lé, ra châ é bang lé byî pyám keq; haú hkûn, nungmoq é matú banshoq gi, sân-yúng lô râ nghut lhê.

<sup>42</sup> Hparishe pé ê, nungmoq gi, dingnyé wó ri, hkâsu mù gâ le, nungmoq gi, gau-tsáng, shingtón pé eq zangxun mhan-haq ajù jù mâ é, xê gambùm ragambùm lé gi, Garai Gasang lé byi nyî kômù, tarâ dingmán é hkyô eq Garai Gasang chyitdap é hkyô lé gi, lhaî pyâm tô akô. Xê gambùm ragambùm byî é lé le cháng luî, tarâ dingmán é hkyô eq Garai Gasang lé chyitdap é hkyô lé le, kut nyî râ lhê.

<sup>43</sup> Hparishe pé ê, nungmoq gi, dingnyé wó ri, hkâsu mù gâ le, tarajong pé mâ é ahkyak dik é zùng jang pé lé le, gài pé má hkunggâ é èq shichyên é dang lé le, nungmoq ô nau nyi bum akô.

<sup>44</sup> Nungmoq gi, dingnyé wó ri, hkâsu mù gâ le, nungmoq gi, ahkô a dong lo mù, byu pé a sé luî, ahtoq mai sô lai é lupdùng eq du akô." ga taî ri.

<sup>45</sup> Haú hkûn, tarâ sará rayuq gi, "Sarâ ê, nàng haú su gâ é gi, ngamoq lé le rhoi lhôm nyi é nghut bê." ga Yhang lé tú taî ri.

<sup>46</sup> Haú su ga jáng, Yesuq gi, "Nungmoq tarâ sará pé le, dingnyé wó ri. Hkâsu mù gâ le, nungmoq gi, byu pé lé, wùn waq râ wuî é noqkuq htúng tarâ wòlai lé wùn nhâng luî, yhumsîng yhang gi, wò haú lé loqnyhuî èq l háng, a bo záng wú kó nghut ri.

<sup>47</sup> Nungmoq gi, dingnyé wó ri, hkâsu mù gâ le, nungmoq gi, nungmoq é îchyí îwâ pé sat pyâm é myiqhtoî pé é lup lé luptsuq tsuq akô. <sup>48</sup> Haú mù luî, nungmoq gi, nungmoq é îchyí îwa pé é muzó lé, myit bo huî é bang nghut nyi akô. Hkâsu mù gâ le, yhangmoq gi, myiqhtoî pé lé sat pyám mù, nungmoq gi, lup haú pé lé luptsuq tsuq akô. <sup>49</sup> Haú mù luî, Garai Gasang, Yhâng é hpaqchyî byéng-yá mai taî é gi, 'Myiqhtoî pé eq lagyô pé lé, ngò yhangmoq chyáng nhang kat râ nghut lhê; haú bang mâ é ra-am lé gi, yhangmoq lhom sat pyám mù, ra-am lé gi, zing-ri kó râ nghut lhê.' gâ ri. <sup>50</sup> Haú su mù luî, mau htoq xâng hkûn lhê é, Abelaq é sui mai, hkungga gyap eq noqkuq yhûm gyoro má sat pyám huî é Zahkariq é sui jé shoq, shun pyâm é myiqhtoî pé é sui banshoq bâng é manglat gi, shí pyat mâ é byu pé lé hûn râ nghut lhê. <sup>51</sup> Ngò, nungmoq lé taí kôlé, manglat haú pé lé gi, shí pyat mâ é byu pé lé, gè gè yhang hûn râ nghut lhê.

<sup>52</sup> Tarâ sará pé ê, nungmoq gi, dingnyé wó ri, hkâsu mù gâ le, nungmoq gi, byu pé Garai Gasang lé sé ra zoqshi lé yu pyám byi kômù, yhumsîng yhang le a sé, sé naú bang lé le, hkûm zing tô akô nghut ri." ga taî ri.

<sup>53-54</sup> Yesuq haú mai htoq lô é hkûn, tarâ sará pé eq Hparishe pé gi, Yhang lé gyè kut mù, Yhâng é dang má mara wó myâng shoq ga, wuî é dangmyi myo myo myi luî, gyám wú nyi akô nghut ri.

## 12

### *Gegùn Labyoq Kut É Bang Lé Sidiq Râ Hkyô*

*Mht 10:28-33; 12:32; 10:19-20*

<sup>1</sup> Haú u, byù hkyîng mun zup zîng lò mù, rayuq eq rayuq l háng záng nâng lhum shoq dut nyi é hkûn, Yesuq, Yhâng é chángzô pé lé taî hi é gi, "Gegùn labyoq kut é Hparishe pé é múnchi lé koi sidiq pyám keq. <sup>2</sup> A byông htoq loshoq wó zaú nghop tô é, haî le a joq râ nghut lhê; a sé loshoq wó haq tô é le, haî a joq râ nghut lhê. <sup>3</sup> Haú mù luî, nungmoq, mauchut hkaú má haq taî é dang banshoq lé, myoq myàng maubó má wó gyô bùm kó râ nghut lhê. Gok hkaú má, dangsoq soq é lé le, yhumhkûng htoq mai taî pyo bùm bekô râ nghut lhê.

<sup>4</sup> Ngá buinùm wuî ê, Ngò, nungmoq lé taí kôlé, gungdu lé za wó sat pyám mù, woi-nyí lé haî le a wó kut é bang lé, hkâgyuq kó. <sup>5</sup> Nghut kôlhang, nungmoq ó lé za gyuq râ é lé gi, Ngò, nungmoq lé taî kyo kôlé, gungdu lé sat pyâm é htâng má, woi-nyí lé ngaraî ming shut wó hkyô kat pyâm é a-tsam wó sù lé kúm gi, gyuq keq. Nghut bê, Ngò, nungmoq lé taí kôlé, haú yuq lé za, gyuq nyî keq. <sup>6</sup> Johkyáng ngo du lé, gyi htingchap í chap èq wó ùng pyâm lhê a nghut kó l hú? Haú johkyáng radu lé l háng, Garai Gasang gi, tô-myhî pyâm é

a nghut. <sup>7</sup> Garai Gasang gi, nungmoq é ulhum mâ é xâm banshoq lé lháng, nghap to gù nghut lhê. Haù mù, hkâgyuq kó; nungmoq gi, haù johkyáng myo myô htoq má lháng gù je bo é bang nghut lhê.

<sup>8</sup> Ngò, nungmoq lé taí kôlé, byu pê hí má Ngo lé lhom yín yu é sù ó yuq nghut kôlé, Garai Gasâng é maumang lagyô pê é hí má, haù Byu Yhangzo gi, haù yuq lé lhom yín yù râ nghut lhê. <sup>9</sup> Nghut kôlháng, byu pê é hí má Ngo lé he-ngik pyâm é sù lé chyaú gi, Garai Gasâng é maumang lagyô pê é hí má, he-ngik pyám râ nghut lhê. <sup>10</sup> Haù Byu Yhangzo lé dang dông shut é sù gi, mara hkyut byî é wó hui ra nghut lhê; nghut kôlháng, haù Chyoiyúng Woi-nyí lé rhoi dang taí pyâm é sù gi, mara hkyut byî é hui râ a nghut.

<sup>11</sup> Byu pé nungmoq lé jéyáng râ matú tarajong pé má le, agyì suwún wuì eq ahkáng ayá wó bâng é hí má le, shuí e ló kô é hkûn, hkâsu kut râ lé le, hkâsu nghu tú taí râ lé le, hkâ-myit chiq kó. <sup>12</sup> Hkâsu mù gâ le, haù u lé yhang, Chyoiyúng Woi-nyí gi, nungmoq hkâsu taí râ hkyô lé mhoqshit byi râ nghut lhê." ga taí ri.

#### *Hpaqchyî A Bo É Sahtê Hpó Lé Dangtú Yu É Hkyô*

<sup>13</sup> Haù hkûn, shiwa hpúng hkaù mai, byù rayuq gi, "Sarâ ê, ngá-nhik tâng wó é muizè pé lé chôm gam lhum râ matú, ngá mang lé bo taí byi laq." ga luí, Yesuq lé taí ri.

<sup>14</sup> Yesuq gi, "Byù nàng ê, nungnhik tang ahtoq má tarâ agyì kut luí, ikun zè gàm byi râ gi, ngo lé ó hkyin tô é l hú?" ga luí, yhang lé tú taí ri. <sup>15</sup> Yesuq yhangmoq lé taí é gi, "Myoqnoq é hkyô banshoq mai, nungmoq é i-myit lé hkûm zìng luí, koi sidiq nyì keq. Hkâsu mù gâ le, byu é asak gi, agùn agó é sutzè má bo é a nghut." gâ ri.

<sup>16</sup> Dangtú ralhum dông mai le, yhangmoq lé Yesuq taí é gi, "Sahtê rayuq gi, yhâng é yò pé má guqzo muilhum gyaí já ri. <sup>17</sup> Haù mù luí, yhâng é unghkaù má myit é gi, 'Ngò hkâsu kut wú râ lhi? Ngá é guqzo muilhum pé lé kat to rà jowò a wó lo dut to bê.' gâ ri.

<sup>18</sup> Dum nghut jáng, yhang gi, 'Ngò îsu kut wú râ abe, ngá é chyî xau pé lé hpoyq pyám luí, je kô é chyî pé lé saí râ nghut lhê. Chyî haù pé má ngá é guqzo muilhum pé eq sutzè banshoq lé, tsìng kat to luí, <sup>19</sup> ngá é i-myit lé îsu nghu taí râ, "I-myit ê, zanwut myáng myáng é matú, zè gè myo myo ngò tsìng to bê. I-myit nàng zim za kut nyì aq hkoi. Zo mù, shuq mù, ngón ngón nyì aq." ga' gâ ri.

<sup>20</sup> Nghut kôlháng, Garai Gasang gi, 'Byù gò ê, náng é asak lé, hkû-myîn yhang, wup yu pyám byî é nghut jáng, nàng tsing hkong tô é zè pé gi, ó yuq é matú dut râ l hú?' ga luí, yhang lé taí ri.

<sup>21</sup> Haù eq rajung za, yhumsing é matú sutzè hkong to mù luí, Garai Gasâng é hí má myung nyì sù gi, haù yuq su nghut râ nghut lhê." gâ ri.

#### *Myit A Chiq É Za Garai Lé Lumjìng Râ Hkyô*

*Mht 6:25-34, 19-21*

<sup>22</sup> Yesuq, Yhâng é chángzô pé lé dum taí é gi, "Haù mù luí, Ngò, nungmoq lé taí kôlé, nungmoq é asak matú haì zo haì shuq râ eq nungmoq é gungdú matú haì wut haì tsang râ lé, hkâ-myit chiq kó. <sup>23</sup> Asak gi, zoshuq htoq má, gungdu gi, mebù htoq má, je ahkyak lhê. <sup>24</sup> Nghonoq pê é hkyô lé myit wú keq; yhangmoq gi, kyô hkyó kyô shu a kut kó; guqchyî eq sutdek lé a wó kó, nghut kôlháng, Garai Gasang gi, yhangmoq lé, byi tso byi huq nyi lhê. Nungmoq gi, nghoq haù pê htoq má je riyhang hpaudap nyi lhê a nghut kó l hú? <sup>25</sup> Nungmoq má, ó yuq wá, myit chiq é èq, yhumsing é asak lé radúng kô wó jat yù kó râ l hú? <sup>26</sup> Haù su mù luí, tiq dik é hkyô lé lháng, nungmoq a wó kut kô é nhìng, haì mù luí gotù hkyô pé lé, myit myô nyi akò l hú?

<sup>27</sup> Htutbó ban\* pé hkâsu kut kô lo é lé, myit wú keq. Haù pé gi, mù le a zui, hkyîng le a duì kó nghut ri. Nghut kôlháng, Ngò, nungmoq lé taí kyo kôlé, Hkòhkâm Sholumon hpúng kô dik u lé wut é mebu lháng, ban haù rabó lé a hkyit nghut ri. <sup>28</sup> Lumjìng myit tiq é bang ê, hkû-nyí joq mù, napmá myihkyóm má dú kat pyám hui râ nghut é yosò mhan pé lé za lháng, Garai Gasang haù su kut hut é nghut le gi, nungmoq lé, je riyhang hut râ a nghut kó l hú? <sup>29</sup> Nungmoq gi, haì zo haì shuq râ lé hkâho nyì kó; haù eq séng

\* 12:27 Htutbó ban gi, yúng dik é yosò ban nghut lhê.

luí lé hkâ-myt chiq nyî kó. <sup>30</sup> Hkâsu mù gâ le, Garai Gasang lé a sé bang gi, haú hkyô banshoq lé châng hkat ho nyi akô; nghut kôlhang, nungmoq é Îwa Garai Gasang gi, haú pé lé nungmoq râ é hkyô, sé byî nyi lhê. <sup>31</sup> Nungmoq kúm gi, Yhâng é mingdán lé ho nyi keq, haú jáng, haú pé, nungmoq lé puq byi râ nghut lhê.

<sup>32</sup> Sau hpúng zô pé ê, hkâgyuq ko, hkâsu mù gâ le, nungmoq é Îwa Garai Gasang gi, Yhâng é mingdán nungmoq lé byi nau nyi ri. <sup>33</sup> Nungmoq wó é zè pé lé ûng pyám luí, myùng bang lé byi keq, yhumsing é matú a dat xau a dat wôm é ngunhtung saí luí, hkau sù lé a jé, manot eq le a wó zô é sutzè lé mauhkûng htoq má hkong to keq. <sup>34</sup> Hkâsu mù gâ le, náng é sutzè joq jang má, náng é i-myt le jé nyi râ nghut lhê.

*Yesuq Dum Jé Lé Lô Râ Hkyíng Lé Machya Nyî Râ Hkyô*

*Mht 24:45-51*

<sup>35</sup> Nungmoq gi, hpyihit hit luí, (mû zui râ matú rì rì kut to keq); nungmoq é myibung lé tuq to mù, <sup>36</sup> myiháng poí mai dum taú lò luí, hkúm lo kok é, yhumsing hpó lé radá dâm hkum lhom wó hpông hâng yù shoq, láng tô é dui-nhâng zoshâng wuì su kut nyi keq. <sup>37</sup> Haú yhumsing jé lo le, machya nyi láng é dui-nhâng zoshâng wuì gi, hkungsô wó nyi râ. Hkâsu mù gâ le, ngò, nungmoq lé teng za taí kôlé, haú yhumsing hpó gi, yhangmoq lé yuq zung to nhâng luí, yhang gi, dui-nhâng zoshâng su hpyihit hit mù, saí tso saí huq râ nghut lhê. <sup>38</sup> Gunggàm yoq lé nghut kôlhang, woq tân hkûn lé nghut kôlhang, haú su kut machya nyi é lé, yhumsing hpó lo myang é nghut le gi, dui-nhâng zoshâng haú bang hkungsô wó nyi ri. <sup>39</sup> Yhumsing hpó rayuq, hká u má hkau sù lé lô râ lé, sê tô é ru nghut le gi, yhang machya nyi luí, yhâng yhûm lé a wó hput htong nhâng râ nghut é lé, bûn sê nyi keq. <sup>40</sup> Haú mù, nungmoq le rì rì nghut nyi keq; hkâsu mù gâ le, haú Byu Yhangzo gi, a bûn nùng má jé lé lô râ nghut lhê." gâ ri.

<sup>41</sup> Haú hkûn, Petruq gi, "Yhumsing ê, dangtú shî gi, ngamoq lé za, taí é nghut lhê lú? Haú a nghut jáng, lunglhang bang lé taí é dông nghut lhê lú?" ga myî ri.

<sup>42</sup> Haú jáng, Yesuq gi, "Lumging é eq hpaqchyî bo é sùt zum sù gi, hká yuq nghut lhê lú? Haú yuq gi, yhâng yhumsing é dui-nhâng zoshâng wuì lé ahkyíng jé jáng zoshuq gàm byi râ matú, yhumsing hpô eq hkyin to sù dut râ nghut lhê. <sup>43</sup> Yhumsing hpó dum taú lo é hkûn, haú su kut nyi láng é dui-nhâng zoshâng gi, hkungsô wó nyi ri. <sup>44</sup> Ngò, nungmoq lé teng za taí kôlé, yhumsing hpó haú gi, yhâng é sutzè banshoq, dui-nhâng zoshâng haú lé ap to râ nghut lhê. <sup>45</sup> Nghut kôlhang, dui-nhâng zoshâng haú gi, yhâng é i-myt unghkaú má, 'Ngá é yhumsing hpó jé lô râ gyai myáng ashî.' ga myit pyám mù, dui-nhâng zoshâng luzúm wuì myiwe, yuqgè lé nhuq bat é eq, zo yê shuq yê î shuq wut nyi é nghut jáng, <sup>46</sup> dui-nhâng zoshâng hau é yhumsing hpó gi, yhang a myitbyu tô é buinyi eq yhang a sé tô é ahkyíng má jé lô mù, yhang lé jap pyám luí a lumjing bang eq rahá nyhi pyám râ nghut lhê.

<sup>47</sup> Yhumsing hpô é i-myt lé sê to kôlhang, yhang ô nau é dông a cháng, rì rì le a hen tô é dui-nhâng zoshâng gi, yhâng yhumsing eq nhuq bat é lé, myo myo hui zo râ nghut lhê. <sup>48</sup> Nghut kôlhang, a sé mù kut shut sù kúm gi, shau za bat é hui râ nghut lhê. Haú eq rajung za, Garai Gasang gi, myo shoq wó yù su chyáng mai, myo shoq dúng yù râ nghut lhê. Myo myo ap byî tô é hui su chyáng mai, je myo shoq dum dúng yù râ nghut lhê.

*Nguingón Nhâng Râ A Nghut, Lhoq Kang Nhâng Râ Ru Nghut Lhê*

*Mht 10:34-36*

<sup>49</sup> Ngò jé lé é gi, myigùng htoq má, myi nyé nhâng râ matú nghut lhê. Myi haú dap to láng é nghut le gi, ngò ô nau é hkyô jup byíng bê. <sup>50</sup> Nghut kôlhang, ngò hkam yù râ é baptisma† rajung joq ashî, haú a hkam yù yù gi, ngò gyai yhang hkâm zo wuì nyi ri.

<sup>51</sup> Ngò jé lé é gi, myidàm htoq má simsaq hkyô byi râ matú nghut nhô ngam akô lú? Haú dông a nghut, Ngò, nungmoq lé taí kôlé, byu pé lé lhoq pyô lhoq kang râ matú sheq ru nghut lhê. <sup>52</sup> Haú su mù, ahkuí mai rayhûm za mâ é byù ngo yuq gi, rayuq eq rayuq

† 12:50 Shî mâ é baptisma gi, Yesuq, ajung jung hpuzo mù shî hkâm é hkyô lé taí é nghut lhê.

yhangmoq yhangchang byoq gâng lhum mù, sum yuq rahú, í yuq rahú, í yuq rahú, sum yuq rahú dut lo bùm bekô râ nghut lhê. <sup>53</sup> Yhângwa gi, yhâng é yuqzo eq, yuqzo gi, yhângwa eq, yhângnu gi, yhâng é byizo eq, byizo gi, yhângnu eq, yhangmhoí gi, yhâng dumó eq, yhâng dumó gi, yhangmhoí eq kut, ngá é yanmai, rayuq eq rayuq byoq gâng lhum bùm bekô râ nghut lhê." ga taí ri.

*Dut Lò Râ Hkyo É Kumlhá Lé Sê Gam Hkoq Râ Lhê*

*Mht 16:2-3; 5:25-26*

<sup>54</sup> Hau htâng shiwa byu pé lé, Yhang taí é gi, "Nungmoq gi, buiwàng hkyam shut mhut htup é lé myàng jáng, 'Maú wo lò berâ.' ga radá dâm lhaq taí taí mu akô, haú eq rajung za le, dut lò lò mu ri. <sup>55</sup> Dum nghut jáng, maupyí shut mâ é lài lo le, 'Bui htân berâ.' ga lhaq taí taí mu akô, haú eq rajung za le dut lò lò mu ri. <sup>56</sup> Gegùn labyoq kut bang ê, nungmoq gi, myigùng eq mauhkung é kumlhá lé, sê gam hkoq yu nyi akô. Haú su nghut kô le nhîng, haí mù luí, shí ipyat mâ é kumlhá lé gi, a sê gam hkoq dut tô akô lhú?

<sup>57</sup> Haú eq rajung za, haí mù haú dingmán é hkyô lé yhumsîng yhang yhang a wó doqdân yù kô é lhú? <sup>58</sup> Dangké, nang lé yui tsuq sù eq rahá, tarâ agyì wá chyáng e ló le, hkyô má yhang eq ngón shoq byìn hpyé huí yù aq. Haú a nghut jáng, yui yhumsîng gi, nang lé tarâ agyì chyáng ê dé pyám luí, tarâ agyì gi, htóng hkyó su chyáng, nang lé ap pyám luí, yhang gi, nang lé htóng má lhûng pyám râ nghut lhê. <sup>59</sup> Ngò, nang lé taí lé, yuichyîn haú a ban xap xap gi, htóng haú mai nàng wó htoq ló râ a nghut." ga taí ri.

## 13

*Myit A Lhîng Jáng Shi Hten Byuq Râ*

<sup>1</sup> Haú hkûn, haú má nyi é byù ra-am gi, mauzau Pilat èq Galile byù ra-am lé sat mù yhangmoq é sui eq yhangmoq nóng jaú é hkungga lé nyhò pyâm é hkyô, Yesuq lé lé taí kyô akô. <sup>2</sup> Yesuq gi, "Galile byù haú bang haú su kut hui zo kô é yanmai, yhangmoq gi, gotû Galile byu pé banshoq htoq má, yubak je myô akô nghû, nungmoq myit ngam akô lhú? <sup>3</sup> Haú su a nghut! Ngò, nungmoq lé taí kôlé, nungmoq le, myit a lhîng kô é nghut le gi, banshoq bang haú eq rajung za shi hten byuq kó râ nghut lhê. <sup>4</sup> Haú htoq agó, Siloam wà mâ é machya gyop gyó luí, nhê sat huí é byù raxe shit yuq gi, Yerusalem wà mó mâ é byù banshoq bang htoq má mara je kô akô nghû, nungmoq myit ngam nyi akô lhú? <sup>5</sup> Haú su a nghut! Ngò, nungmoq lé taí kôlé, nungmoq le, myit a lhîng kô é nghut le gi, banshoq bang haú eq rajung za shi hten byuq kó râ nghut lhê." ga taí ri.

<sup>6</sup> Yesuq dangtú dông dum taí é gi, "Byù rayuq gi, yhâng é tsibiyiq hkyâm má, maihpáng gâm ragàm hô tô ri. Yhang agàm haú má, ashi ê ho wú le, zui tô é a myàng nghut ri. <sup>7</sup> Haú hkûn, yhang gi, 'Wú aq, ngò sum zân tup maihpáng gâm haú má ashi ê ho wú le, a myàng nghut ri; haú lé htuq pyám aq. Haí mù, maumyî aha agó kut yuq nhang tô lhê lhú?' ga luí, tsibiyiq hkyâm zúng sù lé taí ri.

<sup>8</sup> Hkyâm zúng sù gi, 'Yhumsîng ê, hkûzân za gi, yuq tô wú shi sháng gaq, shigâm hau é lhînghkyuq má ngò du lhîng to mù, myìhpún kat luí bóm byi wú shirâ. <sup>9</sup> Htang zàn má ashi zui é nghut le gi, yuq to sháng gaq, ashi a zui é nghut le kúm gi, htuq pyám râ nghut lhê.' ga luí, hkyâm yhumsîng lé tû taí ri." gâ ri.

*Bánno Buinyì Má Gùng Loq Hten Sù Lé, Lhoq Gê Byí É Hkyô*

<sup>10</sup> Bánno buinyì lé, Yesuq gi, tarajong ralhûm má, mhoqshit nyi ri. <sup>11</sup> Haú hkûn, haú má raxe shit zân tup nat dap luí, gùng loq lhoq hten huí é myiwe rayuq le nyi tô ri. Yhang gi, dàngngóm luí, gungdu ratsuí lhang a wó lhoq nyhâng lô é sù nghut ri. <sup>12</sup> Yesuq gi, myiwe haú lé myàng jáng, yhâng chyáng wut yù mù, "Myiwe myhí ê, nàng, nòhpyo mai gè berâ." ga luí, <sup>13</sup> yhâng é ahtoq má loq ke byí ri. Haú hkûn jáng, myiwe haú gi, nyàng za dum wó yap luí, Garai Gasang lé hkya-ôn nyi ri.

<sup>14</sup> Haú mù, Bánno buinyì lé, Yesuq nòhpyo lhoq gê byí é yanmai, tarajong má up sù gi, wú nhik-yo luí, "Mù wó zui é buinyì hkyuq nyí joq tô le, buinyì haú pé má, lé wó lhoq ge yù lhê. Haú mù, Bánno buinyì má gi, hkâkut kó." ga luí, shiwa byu pé lé taí kat ri.

<sup>15</sup> Haú hkûn, Yhumsîng Yesuq gi, "Gegùn labyoq kut bang ê, nungmoq yuq hkingmó gi, Bánno buinyì lé, yhumsing é no, logúng pé lé, hkup mai hpông htoq yû mù uchyam byi huq huq kut akô a nghut lhú? <sup>16</sup> Haú nghut le gi, raxe shit zân gón Tsadán èq tuí to huí é, Abraham é yhangzo yhangshu myiwe zo shí lé, Bánno buinyì má Tsadán loq mai, hkyut byi a gíng râ lhú?" ga tû taí ri.

<sup>17</sup> Haú su ga taí jáng, Yhang eq i-myt shai lhum é bang banshoq gi, hoq hpû byuq bum akô. Shiwa byù banshoq bang kúm gi, Yhang kut é mauhpo amû banshoq é yanmai, gabú nyi bum bekô nghut ri.

### *Angshi Cham Eq Munchi Dangké*

*Mht 13:31-33; Mrk 4:30-32*

<sup>18</sup> Haú hkûn, Yesuq taí é gi, "Garai Gasâng é mingdán gi, haí eq wuí lhê lhú? Ngò hai eq taí kê wú râ lhú? <sup>19</sup> Haú gi, byù rayuq mai, yhâng é hkyâm má hô tô é angshi cham eq wuí ri. Angshi cham haú gi, yuq kô lò mù agàm mó dut lò jáng, hau é akoq pé má, maulat nghoq zô pé wó zung nô yu akô." gâ ri.

<sup>20</sup> Yhang dum xoq taí é gi, "Garai Gasâng é mingdán lé, ngò hai eq taí kê wú râ lhú? <sup>21</sup> Haú gi, myiwe zo rayuq èq sungso mún sum bûng má yu nyhó luí, haú pé banshoq lé wó lhoq daú nhang é múnchi eq wuí ri." gâ ri.

### *Chyap É Hkúmdong*

*Mht 7:13-14, 21-23*

<sup>22</sup> Hau htâng, Yesuq gi, Yerusalem wà mó shut lai e ló uchyang, rawà bàn rawà má wàng mù, mhoqshit byí ri. <sup>23</sup> Haú hkûn, byù rayuq gi, "Yhumsîng ê, hkyi yu é hui râ bang gi, shau za nghut râ lhú?" ga luí, Yesuq lé myí ri.

<sup>24</sup> Yesuq gi, "Chyap é hkúmdong mai, Garai Gasâng é mingdán má wó wâng shoq shikut keq. Hkâsu mù gâ le, ngò, nungmoq lé taí kôlé, byù myo myo gi, wó wâng shoq ga shikut wú kó râ. Nghut kôlháng, a wó wâng kó râ nghut lhê. <sup>25</sup> Yhumsîng hpó,\* hkum toq myhí pyâm é htâng má sheq, nungmoq gi, hkúmdong hí má yap to mù, hkum lé kok uchyang, 'Yhumsîng ê, ngamoq lé hkum hpóng byi laq ô!' ga luí, wut dung jáng, haú yuq gi, 'Nungmoq ó nghut é lé le, hkarâ é bang nghut é lé le, ngò a sé.' ga tû taí râ nghut lhê.

<sup>26</sup> Haú jáng, nungmoq gi, 'Ngamoq gi, nàng eq rahá zo wú shuq wú bê bang nghut lhê; ngamoq é wà hkyô pé má le, nàng mhoqshit byí wú bê nghut lhê.' ga taí bekô râ.

<sup>27</sup> Nghut kôlháng, yhumsîng hpó kúm gi, 'Nungmoq ó nghut é lé le, hkarâ é bang nghut é lé le, ngò a sé. Age ashop dông kut é bang banshoq ê, ngá chyáng mai gâng ló byuq keq.' ga tû taí kat râ nghut lhê.

<sup>28</sup> Garai Gasâng é mingdán má, Abraham, Isak, Yakup pé eq myiqhtoí pé banshoq bang nyi to kô é lé, nungmoq wó myâng kôlháng, nungmoq gi, shinggan shut hkat pyâm é hui luí, haú jowò má ngaubyi ngàu nhap eq zui kyik kyik shoq hpuzô nyi bùm bekô râ nghut lhê. <sup>29</sup> Hau hkûn, buihtoq, buiwàng, maupyí, mautsûng mâ é mingdán myo myo mai byu pé lé luí, Garai Gasâng é mingdán zoshuq poí má myang zùng kó râ nghut lhê. <sup>30</sup> Haú hkûn, ahkuí htâng gyó nyí bang gi, hí bekô râ; ahkuí hî to bang gi, htâng gyó bekô râ." ga luí, yhangmoq lé taí ri.

### *Yerusalem Wà Mó Eq Séng Luí, Yesuq Taí É Hkyô*

<sup>31</sup> Haú u lé, Hparishe pé ra-am gi, Yesuq chyáng lé luí, "Shí jowò mai htoq ló byuq aq. Hkâsu mù gâ le, Herut gi, nang lé sat râ hen nyi ri." ga luí, Yhang lé taí akô.

<sup>32</sup> Haú jáng, Yesuq gi, "'Hkû-nyí, napmá,† ngò nat gang hkat pyám luí, nò zo hpýo zo lhoq gê byi râ nghut lhê; sum nyí nghû râ buinyì‡ má sheq, ngá mù bàn râ nghut lhê.' nghû luí, agè ashop é wamhkuí haú lé ló taí kyo keq. <sup>33</sup> Haí wá dut kôlháng, hkû-nyí,

\* 13:25 Yhumsîng hpó gi, Garai nghut lhê. Yhûm gi, Garai é mingdán lé taí é nghut lhê. † 13:32 Hkû-nyí, napmá gâ é gi, Yesuq mingkan htoq má mù zui râ ahkýng lé taí é nghut lhê. ‡ 13:32 Sum nyí nghû râ buinyì gâ é gi, Yesuq mingkan htoq má mù ban zui é buinyì lé taí é nghut lhê.

napmá, sânghe nyí, ngò gi, e ló râ dut ashî. Hkâsu mù gâ le, myiqhtoî pé gi, Yerusalem wà mó mai lai luí gotû jowò má a shi wú kó nghut ri.

<sup>34</sup> Yerusalem ê, Yerusalem ê, myiqhtoî pé lé sat pyám pyám kut mù, náng chyáng nhang kat é bang lé, luqgok èq dú sat sat kut é myuq nàng ê, woqzìng gi, yhangzô pé lé, yhâng é dùng hkaû má tsìng lhùng yu é su, nungzô pé lé, Ngò hkâ-myhó dâm shuî tsìng yù nàù kôlhang, nàng a dóng nghut ri. <sup>35</sup> Wú keq, nungmoq é yhùm gi, nungmoq é matú chamchyuyiui dut pyâm to berâ nghut lhê; Ngò, nungmoq lé taí kôlé; 'Yhumsìng é myìng mai jé lé lo é Sù gi, hkungsô wó nyì sháng gaq.'<sup>☆</sup> nghû, nungmoq a taí taí gi, Ngo lé wó myâng kó râ a nghut lo." ga luí, yhangmoq lé taí ri.

## 14

### *Hparishe Rayuq É Yhùm Má Yesuq Jé Nyi É Hkyô*

<sup>1</sup> Bánno buinyì ra-nyí má, Yesuq gi, zang zo râ ga Hparishe suwún rayuq é yhùm má, ê wang nyi tô le, haú mâ é bang gi, Yhang lé gyui gyui chòm wú nyi bum akò. <sup>2</sup> Haú u lé, wuì wam ana dut sù rayuq gi, Yesuq é hí má jé nyi tô ri. <sup>3</sup> Haú mù, Yesuq gi, "Bánno buinyì má nòhpyo lé lhoq gê byî é gi, tarâ wang lhê lhú, a wang é lhú?" ga luí, tarâ sará pé eq Hparishe pé lé myî kat ri. <sup>4</sup> Nghut kôlhang, yhangmoq gi, zim za dut byuq akò. Haú hkûn, Yesuq gi, nòhpyo hui sù lé, zú to mù, lhoq gê byi luí, nhang kat ri.

<sup>5</sup> Hau htâng, Yesuq gi, yhangmoq lé, "Nungmoq chyáng mâ é rayuq yuq gi, yhumsing é yhangzo rayuq yuq, haú a nghut jáng, no myang radu du, Bánno buinyì má, wuìhtung má byit gyó le, haú hkûn jáng, a xe htoq yu é za, wó nyí kó râ nghut lhê lhú?" ga myî kat ri. <sup>6</sup> Yhangmoq kúm gi, dang haú hkun lé, haí le a wó tû taí kó nghut ri.

<sup>7</sup> Haú hkûn, Yesuq gi, ji tô é bang jé réng é zùng jowò pé hkyin yu nyì kô é lé myàng jáng, yhangmoq lé dangtú dông taí é gi, <sup>8</sup> "Byù rayuq yuq nang lé, myiháng poî má ji é nghut jáng, je réng é jowò má hkâ-ê zùng. Hkâsu mù gâ le, náng htoq je aróng wó sù lé le, ji to shirâ abe. <sup>9</sup> Ji tô é nghut jáng gi, nungnhik lé ji tô é yhumsìng hpó lé lô mù, 'Shí yuq lé jowò hui byi aq.' ga luí, náng lé lé taí jáng, nàng hoq hpu luí, hkyî htâng shut huí zùng ra râ nghut lhê. <sup>10</sup> Haú mù luí, supé nang lé ji le, hkyî htâng má ê zùng aq; haú hkûn, nang lé jì sù lé mù luí, 'Buinùm hpó ê, shí je réng é jowò má huí doq zùng aq.' ga luí, nang lé taí jáng, nàng eq rahá zung tô é bíng lhunglhâng bâng é hí má, nàng gi, myoqdong wó râ nghut lhê. <sup>11</sup> Hkâsu mù gâ le, yhumsing gùng lé waq toq é sù ó yuq nghut kôle, lhoq nyhum pyâm é hui râ nghut lhê; yhumsing gùng lé, lhoq nyhum é sù kúm gi, waq toq é hui râ nghut lhê." ga taí ri.

<sup>12</sup> Hau htâng, Yesuq yhang lé ji é yhumsìng hpó lé taí é gi, "Napzang, a nghut jáng, myinxùn lé nàng byi tso nau le gi, náng é buinùm wuì, âgu âmâng pé, mungmoq wuì, sùt wó é yhumkyo chang pé lé hkâjî tso. Haú bang lé jì tsô é nghut jáng gi, yhangmoq nang lé dum jì tsô é èq, jeju dum tau kó râ nghut lhê. <sup>13</sup> Nghut kôlhang, nàng poî kut mù, byi tso byi huq nau é nghut le gi, myùng bang, hkyî gyui loq hten bang eq myoqjit é bang lé, jì tso aq. <sup>14</sup> Haú su kut jáng, nàng hkungsô wó nyí râ nghut lhê. Yhangmoq nang lé jeju a wó tau kôlhang, dingmán bang dum dui toq lo é buinyì má, hau é akyû lé, nàng wó hkam yù râ nghut lhê." gâ ri.

### *Zoshuq Poî Mó Lé Dangtú Yu É Hkyô*

#### *Mht 22:1-10*

<sup>15</sup> Yesuq eq rahá zô zung tô é byù rayuq gi, dang haú wó gyo jáng, "Garai Gasâng é mingdán mâ é zoshuq poî má wó zo râ sù gi, hkungsô wó nyí sù nghut râ." ga luí, Yesuq lé taí ri.

<sup>16</sup> Yesuq haú yuq lé tû taí é gi, "Byù rayuq gi, myinzang byi tso râ ga, zoshuq poî mó rallhum hen to mù, byù myo myo lé ji tô ri. <sup>17</sup> Zang byi tso râ yàm jé jáng, yhâng é dui-nhâng zoshâng lé, ji tô é bâng chyáng 'Lé keq hkoi, zoshuq jin to bê.' ga ê châng wut nhang ri.

<sup>☆</sup> 13:35 Hkya-on 118:26

<sup>18</sup> Nghut kôlhang, haú bang banshoq gi, zoshuq poí má a ê râ dông chyat he pyâm akô. Rayuq sù gi, 'Ngò yohtung rahkyang wui tô lhê; haú lé ê wú râ dut ri. Haú mù, ngo lé ahkáng byi shi laq.' ga yhang lé taí ri.

<sup>19</sup> Dum rayuq le, 'Ngò, nohtó ngo zúm wui tô lhê; haú pé lé duì nhang chyam wú râ dut ri; ngo lé ahkáng byi shi laq.' ga taí wô ho ri.

<sup>20</sup> Dum rayuq le, 'Ngò myiwe hâng tô é a myáng shi mù, a wó lé.' ga taí wô ho ri.

<sup>21</sup> Haú jáng, dui-nhâng zoshâng taú lò mù, yhâng é yhumsing lé haú hkyô banshoq lò taí kyô ri. Haú hkûn, yhumsing hpó gi, nhikmó gyô yo mù, 'Wà mà é hkyô mó hkyô zo hkat hkangmó má hân hân ê mù luí, myùng bang, hkyí gyui loq hten bang eq myoqjit bang lé, ê ji lò aq.' ga luí, yhâng é dui-nhâng zoshâng lé nhang kat ri.

<sup>22</sup> Hau htâng má, dui-nhâng zoshâng gi, 'Yhumsing ê, nàng nhang é eq rajung za ban kut bê; nghut kôlhang, zùng râ jowò gi, mân tô ashí.' ga taí ri.

<sup>23</sup> Haú su ga jáng, yhumsing hpó gi, 'Ngá yhûm byíng râ matú, wà yàm hkyô pé eq hkyâm yàm hkyô pé má htoq ê mù, myang é bang lé a wó le wó shoq ê tsing shuí lò aq.

<sup>24</sup> Nang lé ngò taí lé, hí lé ji to huí é bang rayuq lhang, ngá é zoshuq poí lé wó chyim wú râ a nghut.' ga luí, yhâng é dui-nhâng zoshâng lé taí ri." gâ ri.

### *Yesuq É Chángzo Wó Dut Râ Matú*

*Mht 10:37-38; 5:13; Mrk 9:50*

<sup>25</sup> Byù hpûng mó Yesuq eq rahá e ló kô é hkûn, Yesuq gi, haú bang lé lhing wú luí, <sup>26</sup> "Ngá chyáng lé sù ó yuq nghut kôle, yhumsing é înu, îwa, yhangmyi, yhangzo eq, yhanggu, yhangmang, yhâng nhammó pé lé le, haú htoq agó, yhumsing é asak lé le, ngo lé chyitdap é htoq má je chyitdap sù gi, ngá é chángzo a wó dut. <sup>27</sup> Yhumsing é tapzîng lé a waq é za, Ngá htâng châng é sù ó yuq nghut kôle, Ngá é chángzo a wó dut.

<sup>28</sup> Dangké, nungmoq chyáng mà é byù rayuq yuq, tsehtung yhûm ralhum saí nau le, yhang gi, yhûm haú ban saí râ matú, ngùn hkâ-myhó bàn râ eq yhang wó tô é ngùn luq a luq é lé, zùng mù luí, hí a sôn wú é byù nyi kó râ lhuí? <sup>29</sup> Laq má mù, apûn awang gi, saí hi to mù luí, a wó lhoq pân é nghut jáng, <sup>30</sup> myàng é bang banshoq èq, 'Shí yuq gi, apûn awang gi, saí hi to mù luí, banshoq a wó saí pân lo nghut ri.' ga luí, yhang lé jóng pyám bekô râ nghut lhê.

<sup>31</sup> Dangké, hkohkâm rayuq gi, gyè zan râ hen le, gyezo í mun eq lé sù hkohkâm lé, gyezo ramûn eq za lhom wó zân ûng râ, a wó zân ûng râ lé, zùng mù luí, hí a myit wú é nyi râ lhuí? <sup>32</sup> A ûng râ dut le gi, gyè pé we we má nyi tô ashí hkûn lé, lagyo suwún pé lé nhang kat luí, simsaq râ matú htingram pyám ra râ nghut lhê. <sup>33</sup> Haú eq rajung za, nungmoq chyáng mà é ó yuq nghut kôlhang, yhumsing wó é zè banshoq lé, a pyâm to sù gi, ngá é chángzo wó dut râ a nghut.

<sup>34</sup> Xo gi, gè lhê. Nghut kôlhang, xomân kân byuq jáng gi, haú lé hai èq dum wó lhoq ngam yù râ lhuí? <sup>35</sup> Haú gi, myigung matú le, myihpún kut râ matú le, akyû a bò lo. Haú mù luí, shinggan shut kúm gi, dú pyám sê akô.

Gyo râ nohkyap dap sù gi, gyô yù sháng gaq." ga taí ri.

## 15

### *Byuq Byuq É Sau*

*Mht 18:12-14*

<sup>1</sup> Ra-nyí lé, Yesuq é dang gyo kó râ ga, kang guq bang eq yubak dap bang gi, Yhâng chyáng lé zîng bum akô. <sup>2</sup> Haú hkûn, Hparishe pé eq tarâ sará pé gi, "Shí yuq gi, yubak dap bang lé lhom hap yù mù, yhangmoq eq rahá za, zo shuq nyi ri." ga taí put nyi bum akô.

<sup>3</sup> Haú mù, Yesuq yhangmoq lé dangtú dông taí é gi, <sup>4</sup> "Nungmoq má, sau rashô du wó luí radu byuq byuq é nghut le, gaú xe gaú du lé yoso mhan yô má nyhi pyâm to mù, byuq byuq é sau haú lé, myàng shoq a châng ho yu é, ó yuq wá nyi kó râ lhuí? <sup>5</sup> Byuq byuq é sau haú lé myang hô jáng, gyaí gau é i-myt èq goqsân htoq má bún kê chûng mù, <sup>6</sup> yhûm má jé jáng, yhâng é buinùm ji-myi wui eq, yhumkyo chang pé lé ji yù mù, 'Ngá é byuq



byuq é sau lé, ngò dum myang ho yù bê, ngò eq rahá chòm gabú sháng.' ga taí râ nghut lhê. <sup>7</sup> Haû eq rajung za, Ngò, nungmoq lé taí kôlé, myit lhîng a râ é dingmán bang gaú xe gau yuq lé gabú é htoq, myit lhîng é yubak dap sù rayuq é yanmai, mauhkûng htoq má, je riyhang gabú jowò dut râ nghut lhê.

### *Byuq Byuq É Ngùn Chap*

<sup>8</sup> Dum nghut jáng, dangtú ralhûm gi, myiwe rayuq, ngùn raxê chap wó é má, rachap byuq byuq é nghut le, yhang gi, myibung tap mù rayhum ê shum luí, myang yù shoq rago za, ho wú râ a nghut lhú? <sup>9</sup> Haû lé ho myàng jáng le, yhâng é buinùm ji-myi wuì eq yhumkyo chang pé lé ji yù mù, 'Byuq byuq é ngá ngùn chap lé dum myang ho yù bê, ngò eq rahá chòm gabú sháng.' ga taí râ nghut lhê. <sup>10</sup> Haû eq rajung za, Ngò, nungmoq lé taí kôlé, myit lhîng é yubak dap sù rayuq é yanmai, Garai Gasâng é maumang lagyô pé hí má, gabú jowò dut râ nghut lhê." gâ ri.

### *Byuq Byuq É Yuqzo*

<sup>11</sup> Yesuq xoq taí é gi, "Byù rayuq gi, yuqzo í yuq wó ri. <sup>12</sup> Haû nhik mâ é tiq sù yuq gi, yhâng wa lé, 'Áwa ê, ngò wó gíng é sutzè, ngo lé gàm byi laq.' ga dung jáng, yhâng wa le yhangnhik tâng lé sutzè gàm byi kat ri.

<sup>13</sup> Hau htâng hkâ-myháng a myáng má, yhangzo tiq sù yuq gi, sutzè banshoq hkyom yu chûng mù, mau we shut ê luí, haú jowò má, mingkan ngón hkyô châng é má yhang wó é ngunzè banshoq lé langsâ pyám bê. <sup>14</sup> Haû su kut ngunzè wó mi-wó lé ban langsâ pyâm é htâng má, haú mau má mutmó gyo é yanmai, yhang gi, asho awui dut lo nyi bê nghut ri. <sup>15</sup> Haû mù, haú mau mâ é byù rayuq chyáng, langchyáng ê kut le, haú yuq gi, yhang lé waq rém jang shut nhang kat mù, waq lé lhom zúng nhang ri. <sup>16</sup> Haú hkûn, yhang gi, waq jùm zô é shigyang cham pé lé lháng, zo naû shoq dut kôlhang, ó yuq le a byi zo kó nghut ri.

<sup>17</sup> Haû mù, yhang myit bûn lo é gi, 'Ngá wâ chyáng nyi é langchyâng pé gi, agùn agó myàng zô nyi kó râ nghut lhê. Nghut kôlhang, ngò gi, shí jowò má, zo mut wuìshit é eq shi ló râ dut bê. <sup>18</sup> Ahkuí, ngò toq mù, ngá wâ chyáng taû ló luí, "Áwa ê, ngò gi, Garai Gasang lé le, nang lé le, shut bê. <sup>19</sup> Ahkuí mai ngò gi, nung zo nghû râ a gíng lo, hau é yanmai, náng é langchyáng rayuq dông za ngo lé nyi nhâng laq." nghû luí, ló taí râ.' gâ ri. <sup>20</sup> Hau htâng, yhang toq luí, yhâng wâ chyáng ló le, yhang we we má ru nghut ashî hkûn mai, yhâng wa gi, yhang lé lhom myàng jáng, wú shogyo luí, din ê mù, yhangzô é lingzing má ê po pyik dap to luí, bopuq puq byi ri.

<sup>21</sup> Haú hkûn, yhangzo gi, 'Áwa ê, ngò gi, Garai Gasang lé le, nang lé le, shut bê. Ahkuí mai, ngò gi, nung zo nghû râ a gíng lo.' ga luí, yhâng wa lé dúng tôngbán ri.

<sup>22</sup> Yhângwa kúm gi, yhâng é langchyâng pé lé, 'Réng dik é mebu hân hân yu lé mù, yhang lé hut byi keq; yhâng é loq má, loqchyop chyop byi keq; hkyî má le hkyî-tsung tsung byi keq. <sup>23</sup> Tsô myum tô é nojûng zo le yu sat keq. Haû mù, nga-nhúng gi, zoshuq poí kut mù chòm ngón sháng. <sup>24</sup> Haû mù gâ le, ngá zo shí yuq gi, shi byuq é mai, ahkuí dum duì bê; byuq byuq é mai le, ahkuí dum myàng bê.' ga taí ri. Haû mù, yhangmoq gi, ngón ngón zo shuq ló bekô.

<sup>25</sup> Haú u lé, yhangzo ko sù yuq kúm gi, yò má nyi tô ri. Yhang gi, yò mai yhûm shut jé lo nyi é hkûn, zìng út bat luí gó nyi é htê lé lò wó gyô ri. <sup>26</sup> Haû mù, langchyáng rayuq lé wut yù luí, haú hkyô lé yhang myí wú le, <sup>27</sup> langchyáng haû gi, 'Nung gu dum taû jé lô bê. Haû mù, náng wa gi, nung gu wáng wáng zán zán dum taû jé lo é lé lhom myàng luí, tsô myum tô é nojûng zo lé sat bê nghut ri.' ga taí kyô ri.

<sup>28</sup> Dang haû lé wó gyo jáng, yhang gi, gyô nhik-yo luí, yhúmhkaû shut a wàng lo kut ri. Haû mù, yhâng wa htoq ê luí, yhang lé ê chyúq ri. <sup>29</sup> Yhangzo kúm gi, 'Wú aq, ngò, shî-myháng shîlo náng é jùn dông kut luí, hkâ-nhám le náng dang lé a lu laí wú. Nghut kôlhang, ngò ngá é luzúm wuì eq ngón kún râ matú, bainám zo radu lháng radàm le nàng a byi wú shí. <sup>30</sup> Shiwa myhî pé eq zum yap wún luí, náng é sutzè lé lhoq pân pyâm é sù

nung zo haû dum taû jé lô jáng kúm gi, tsô myum tô é nojûng zo lé, yhâng é matú nàng sat byi bu-nhung!' ga luî, yhâng wa lé tâ ri.

<sup>31</sup> Yhângwa gi, 'Ngá zo ê, nàng gi, hkâ-nhám le ngò eq rahá yhang nyi nyi lhê mù, ngá é sutzè joq mijoq banshoq gi, náng é chyat nghut lhê. <sup>32</sup> Nghut kôlhang, shî nung gu gi, shi byuq é mai ahkuî dum duì bê; byuq byuq é mai le, dum myàng bê. Haû mù, gabú hpo nghut bê.' ga luî, yhang lé tâ ri." gâ ri.

## 16

### *Hpaqchyî Ge Dâ É Sùt Zum Sû*

<sup>1</sup> Yesuq, Yhâng é chángzô pé lé taî é gi, "Sahtê rayuq chyáng sùt zum sû rayuq nyi ri. Haú yuq gi, yhâng yhumsing é sutzè pé lé jai hpyuq pyám ri ga, yhâng yhumsing é hí má, yhang lé mara lé hun akô. <sup>2</sup> Haú hkûn, sahtê hpó gi, yhang lé wut yù mù, 'Nàng é hkyô lé ngò wó gyo bê. Haû gi, hkâsu lhú? Nàng sùt zûm é eq séng luî kut tô é jihpán laiká lé lò shit wú aq. Hkâsu mù gâ le, ahkuî mai nàng gi, sùt zum sû wó kut lo râ a nghut lo.' ga tâ ri.

<sup>3</sup> Haû jáng, sùt zum sû gi, 'Ahkuî, ngò hkâsu kut lo râ lhú? Ngá é yhumsing gi, ngo lé sùt zum ayá mai lhoq hkyô pyám bê. Myì du myì hkop zo râ le ngò wum a bò; dung zo dung shuq râ le ngò hoq ri. <sup>4</sup> Ngo lé sùt zûm é ayá mai hkyô pyám htàng má, supé ngo lé yhangmoq é yhûm má lhom hap yù râ matú, hkâsu kut râ hkyô lé ngò sé bê.' ga wó myit rot jáng, <sup>5</sup> yhang gi, yhâng yhumsing hpó lé chyín dap tô é bang rayuq htàng rayuq lé wut yù mù, sâng-hî yuq lé, 'Ngá yhumsing hpô chyáng nàng chyín hkâ-myhó dap tô lhê lhú?' ga myi jáng, <sup>6</sup> haú yuq gi, 'Xû rashô pûng dap lhê.' ga tâ ri.

Haû jáng, sùt zum sû gi, 'Náng é jihpán yù luî, hân zùng mù, ngo xê pûng kut kê to aq.' ga yhang lé tâ ri.

<sup>7</sup> Dum rayuq lé, 'Nàng hkâ-myhó dap tô lhê lhú?' ga myi jáng, haú yuq gi, 'Sungsô rashô bûng dap lhê.' ga tâ ri. Sutzum sû gi, haú yuq lé, 'Náng é jihpán má shit xê bûng kut kê to aq.' ga tâ ri.

<sup>8</sup> Haû a dingmán é sùt zum sû lé, yhumsing hpó gi, hpaqchyî ge da sû nghut ri ga hkya-ôn ri. Ngò shî lé taî é gi, mingkan zo wuî gi, yhangmoq é mingkan eq sêng é hkyô pé má, maubó gung é yhangzo pê\* htoq hpaqchyî je bò kê é yanmai nghut lhê. <sup>9</sup> Haû mù luî, Ngò nungmoq lé taî kyo kôle, a tara é sutzè pê eq buinùm ho nyi keq, haû mù, sutzè haû htûm byuq jáng, nungmoq lé, ahtum abyuq joq tô é yhûm má, lhom hap yu é hui kó râ nghut lhê.

<sup>10</sup> Tiq é mù má wó lum é sû ó yuq nghut kôlhang, mù mó má le wó lûm râ nghut lhê. Tiq é mù má lhum a zuî é sû ó yuq nghut kôlhang, mù mó má le lhumzui râ a nghut.

<sup>11</sup> Haû mù, mingkan sutzè má lhang nungmoq lé a wó lûm kê é nghut le gi, haû tengmán é sutzè lé, nungmoq chyáng ó yuq wá kê ap byi râ lhú? <sup>12</sup> Supé é sutzè má, nungmoq lé a wó lûm kê é nghut le gi, nungmoq sîng âng é sutzè lé, nungmoq chyáng ó yuq wá kê ap byi râ lhú?

<sup>13</sup> Dui-nhâng zoshâng ó yuq nghut kôlhang, yhumsing í yuq lé wó dojaú râ a nghut. Hkâsu mù gâ le, yhang gi, rayuq lé a jú kut mù, rayuq lé, chyitdap râ nghut lhê; haû a nghut jáng, rayuq lé gi, lhumzui mù, rayuq lé gi, hpau a tap kut râ nghut lhê. Nungmoq gi, Garai Gasang lé le, ngunzè lé le, radá dâm wó dojaú kó râ a nghut." ga tâ ri.

<sup>14</sup> Ngùn myoqnoq é Hparishe pé gi, dang haû banshoq lé wó gyo kôjáng, Yesuq lé wuizui kut pyám byî akô. <sup>15</sup> Haû mù luî, Yesuq gi, yhangmoq lé, "Nungmoq gi, byu pê hí má yhumsing gûng lé yhumsing dingmán bang su kut shit mhaû é bang nghut akô; nghut kôlhang, Garai Gasang gi, nungmoq é i-myit unghkaû lé sé sû nghut lhê. Byù é hí má hpaudap é pé gi, Garai Gasang é hí má achayut é nghut nyi ri.

\* 16:8 Maubó gung é yhangzô pé nghu é gi, Garai Gasang é yhangzô pé lé taî é nghut lhê.

<sup>16</sup> Jep é tarâ† eq myiqhtoî pê é dang, ahko ahkáng wó tô é ahkýing gi, wui-myhup sará Yohan jé lé é buinyi jé shoq nghut bê. Haú hkýing mai gi, Garai Gasâng é mingdán hkyô gabú danglù lé, hko kyô nyi mù, yuq du jup gi, haú hkyô má htung chying wang ló bum akô. <sup>17</sup> Jep é tarâ mâ é tiq dik é dangjí eq myihkyet zo ralhú lé wó lhoq hten râ htoq, mauhkung eq myigùng hten râ gi, je lui râ nghut lhê.

<sup>18</sup> Dangké, yhumsing é yhangmyi lé kâng pyám mù, myiwe gotû dum hâng yu é sù ó yuq nghut kôle, su-myi lú é sù nghut bê; yhumsing é yhanglâng eq gang bê myiwe lé hâng yu é sù le, su-myi lú é sù dut bê nghut ri." ga taî ri.

#### *Sahtê Hpó Eq Lazaruq*

<sup>19</sup> Yesuq dum xoq taî é gi, "Radàm lé, sahtê rayuq gi, nè é eq nú-nhâm é mebu wut mù lui, nyí nyí bui bui zo ngón shuq ngón nyi ri. <sup>20</sup> Yhâng é hkúmdong má gi, ragùngdú é jeq byi tô é Lazaruq gâ é dung zo sù rayuq lé, lé nyhi tô akô. <sup>21</sup> Haú yuq gi, sahtê wá é siboi mai gyó é agyó ahtâng lé, wú zô nau nyi ri. Hkui pé le yhâng é dàm pé má, lé yoq byi nyi akô.

<sup>22</sup> Htâng má, haú dung zo sù shi byuq jáng, maumang lagyô pé gi, mauhkung má nyi é Abraham é tanghkoí má yhang lé shuí ló byi akô. Sahtê wá le shi byuq lui, yhúm pyám bekô nghut ri. <sup>23</sup> Sahtê wá gi, ngaraî ming má dik shoq hpuzô nyi mù lui, tu wú kat le, we we má Abraham lé le, yhâng é tanghkoí mâ é Lazaruq lé le, myàng kat ri. <sup>24</sup> Haú mù, yhang gi, 'Áwa Abraham ê, ngo lé shogyo yù laq ô. Ngò gi, shi myi htum má achyí aku nyé é hui zô nyi ri. Haú mù, Lazaruq gi, yhâng é loqnyhui û èq wui má tik yù mù, ngá é shô má wui ra-poq zo hkâlhang lé tik cham byi sháng gaq, yhang lé ngá chyáng nhang kat byi laq ô!' ga lui, dúng wut nyi ri.

<sup>25</sup> Haú hkún, Abraham gi, 'Ngá zo ê, asak dui tô é u lé, nàng nyi ngón yuqyo tô é hkún, Lazaruq gi, asho awui dut é lé, bün nyi aq. Ahkuí, yhang kúm gi, shi má lo nyi byán to bê; nàng chyaú gi, jamjau hui zô nyi bê. <sup>26</sup> Haú mai gotû gi, shi mai nungmoq chyáng dap lé naú bang a wó dap shoq le, haú mai ngamoq chyáng ó a wó dap lé râ matú le, ngamoq eq nungmoq é gyoro má, nik dik é langhkung mó èq kyo pyám to bê nghut ri.' ga tû taî ri.

<sup>27</sup> Sahtê wá gi, 'Áwa ê, haú nghut le gi, ngò, nang lé dúng nau ri. Ngá gû pé ngo yuq nyi ashî; yhangmoq le ísu hpuzô é jowò má a jé sháng gaq, <sup>28</sup> yhangmoq myit lhing shoq ló taî pun râ matú, Lazaruq lé ngá wá yhúm shut nhang kat byi laq ô!' ga lui, dúng wut ngau nyi ri.

<sup>29</sup> Abraham gi, 'Yhangmoq chyáng, Mosheq eq myiqhtoî pé nyi lhê; haú bang dang lé gyô yù kó sháng gaq.' ga taî ri.

<sup>30</sup> Sahtê wá gi, 'Áwa Abraham ê, haú su a nghut. Shi byuq é bang mâ é rayuq yuq yhangmoq chyáng dum taú lo é nghut le kúm gi, yhangmoq myit lhing kó râ nghut lhê.' ga taî ri.

<sup>31</sup> Abraham gi, 'Mosheq eq myiqhtoî pê é dang lé yhangmoq a gyo kô é nghut le gi, shi byuq é bang mâ é rayuq yuq dum dui toq ló mù, ló taî kyo kôhang, kâm gyo kó râ a nghut.' ga lui, yhang lé tû taî ri." gâ ri.

## 17

#### *Mara Hkyut É Hkyô Eq Lumjng Myit*

*Mht 18:6-7, 21-22; Mrk 9:42*

<sup>1</sup> Yesuq, Yhâng chángzô pé lé taî é gi, "Byu pé lé mara kut shut nhang é hkyô gi, joq htoq lô râ za nghut lhê. Nghut kôhang, mara kut shut nhang é hkyô lé lhoq htoq é sù gi, dingnyé wó râ. <sup>2</sup> Zoshâng shí bang mâ é rayuq lé, mara kut shut nhang é sù gi, yhâng é lingzing má luqluí long mó tuí hut byi lui, wuimau má ê dú hkyô pyám é huí é nghut le gi, yhang é matú je gè râ nghut lhê. <sup>3</sup> Nungmoq gi, yhumsing gùng yhumsing sidiq keq.

Nunggu nungmang nàng lé mara kut shut é nghut le gi, yhang lé tan lui, mhoqshit aq; yhang myit lhing é nghut le gi, yhang lé mara hkyut pyám byi aq. <sup>4</sup> Ra-nyí má za, yhang

† 16:16 Jep é tarâ gâ é gi, Garai Gasang, Mosheq mai nga-nhúng lé byi tô é tarâ lé gâ lhê.

nang lé nyhit dàm shut mù, 'Ngò myit lîng bê.' ga luî, nang lé nyhit dàm dum tôngbán le, tôngbán hkgámó, nàng, yhâng é mara lé hkyut pyám byi aq." gâ ri.

<sup>5</sup> Haú hkûn, lăgyô pé gi, "Ngamoq é lumjîng myit lé lhoq ko byi laq." ga Yhumsîng lé dîng akô.

<sup>6</sup> Haú jâng, Yhumsîng gi, "Nungmoq é lumjîng myit angshi cham í za hkâlhang bò kô é nghut le gi, shî hangwâ gâm lé, 'Sikgâm ê, amyit eq roq bún luî, wuîshuq lung-aú má, ê yuq to aq ô.' gâ le, nungmoq é dang lé siggâm haú gyo byi râ nghut lhê.

<sup>7</sup> Dangké, nungmoq mâ é rayuq yuq chyáng, yò hpuq é, a nghut jâng, sau zúng é dui-nhâng zoshâng rayuq nyi é nghut le, dui-nhâng zoshâng haú yohtung pá mai jé lo é hkûn, yhang lé, 'Hân zúng mù zang zo aq.' ga luî, ó yuq wá taí kó râ lú? <sup>8</sup> Haú dui-nhâng zoshâng lé sheq, 'Ngò zo râ myinzang lajang aq. Ngò bàn zo shoq hpyidum má hpyihit hit mù, xun zang wú nyi aq. Ngò bàn zo jâng sheq nàng wó zo râ nghut lhê.' ga luî, taí râ a nghut kó lú? <sup>9</sup> Taí mitaí banshoq lé, dui-nhâng zoshâng ban zui saí byi é nghut kôlhang, yhang lé jeju bûn é dang ó yuq wá taí wú akô lú? <sup>10</sup> Haú eq rajung za, nungmoq gi, taí mitaí ban kut jâng sheq, 'Nga-nhúng gi, jeju bun a gíng é dui-nhâng zoshâng pé nghut nyi lhê; kut râ é mù lé za lhoq pân é bang nghut lhê.' nghû taí keq." ga taí ri.

#### *Manggâm Dap Bang Raxê Yuq Lé, Yesuq Lhoq Gê Byi É Hkyô*

<sup>11</sup> Ahkuî, Yesuq gi, Yerusalem wà mó shut e ló nyi le, Samariq mau eq Galile mau gyoro mai lai e ló ri. <sup>12</sup> Yhang, wà rawà shut wang ló é hkûn, manggâm dap é byù raxê yuq eq huí ri. Haú bang gi, we mai yap to mù, Yesuq lé, <sup>13</sup> "Yesuq, Zau ê, ngamoq lé shogyô yù laq ô." ga luî, wut garû bum akô.

<sup>14</sup> Yesuq gi, yhangmoq lé myàng jâng, "Nungmoq é gungdu lé, hkyangjông pê chyáng ló tûn shit keq." ga yhangmoq lé taí ri. Yhangmoq gi, hkyô má ru sô nyi ashî le lhang, sân-yúng ló byuq bekô.

<sup>15</sup> Yhangmoq chyáng mâ é rayuq gi, yhumsing gungdu ge byuq é lé myàng jâng, Yesuq chyáng dum taú ê mù, htê mó èq Garai Gasang lé hkya-ôn é eq, <sup>16</sup> Yesuq é hkyî wang má paî gop to luî, Yhang lé jeju hkya-ôn nyi ri. Haú yuq gi, Samariq byù nghut ri.

<sup>17</sup> Haú mù, Yesuq gi, "Sân-yúng byuq é gi, raxê yuq a nghut lú? Gau yuq gi, hká ló byuq bekô? <sup>18</sup> Shî tûngbau rayuq mai lai luî, dum taú lé mù Garai Gasang lé hkya-ôn é byù, rayuq le a nyi ló kó lú?" ga taí ri. <sup>19</sup> Hau htâng, Yesuq gi, haú yuq lé, "Toq mù ló aq, náng é lumjîng myit gi, nang lé lhoq sân-yúng byi bê nghut ri." ga taí ri.

#### *Garai Gasâng É Mingdán Jé Lô Râ Hkyô*

*Mht 24:23-28, 37-41*

<sup>20</sup> Radàm lé, Hparishe pé gi, Garai Gasâng é mingdán hkâ-nhám jé râ hkyô, Yesuq lé myi akô. Haú jâng, Yesuq gi, "Garai Gasâng é mingdán jé lé râ gi, myoq èq wú luî myàng râ a nghut. <sup>21</sup> Garai Gasâng é mingdán gi, nungmoq yuq jup é ahkaú má nghut nyi é yanmai, 'Wú keq, shí má joq ri, mhó má joq ri.' ga luî le, byu pé gi, wó taí kó râ a nghut." ga luî, yhangmoq lé tû taí ri.

<sup>22</sup> Chángzô pé lé le Yesuq taí é gi, "Haú Byu Yhangzô é buinyi ra-nyí lé, nungmoq myàng nau dik é ahkyíng jé râ. Nghut kôlhang, nungmoq gi, Byu Yhangzo lé wó myàng kó râ a nghut. <sup>23</sup> Haú buinyi má, byu pé gi, nungmoq lé, 'Yhang shí má nyi ri.' haú a nghut jâng, 'Yhang hê má nyi ri.' ga taí kó râ nghut lhê. Nghut kôlhang, hkâ-ê; hkâcháng kó. <sup>24</sup> Hkâsu mù gâ le, maumyî rahkyam má hpyat é maulhap gi, maumyî gó hkyam jé shoq duqbó é su, haú Byu Yhangzo dum jé lé é buinyi má le dut râ nghut lhê. <sup>25</sup> Nghut kôlhang, haú su a dut htoq shimá, Yhang gi, zing-rî é myo myo lé le, ipyat shi mâ é byu pé èq he-ngik pyâm é lé le, hui shirâ nghut lhê.

<sup>26</sup> Noaq é tsîn pyat má dut é su, haú Byu Yhangzo jé lé é buinyi má le dut râ nghut lhê. <sup>27</sup> Byu pé gi, Noaq, wuî-sanghpo mó hkaú má wang é hkûn jé shoq, zo zo shuq shuq, myi byi myi yù, myiháng kut luî, nyi nyi bum akô. Haú hkûn, dowuî dîng lô mù, yhangmoq banshoq lé lo lhoq htên pyám bê nghut ri.

<sup>28</sup> Haû eq rajung za, Lot é pyat má le, byu pé gi, zo mù, shuq mù, ung zo wuì zo, ho zo ho shuq, yhûm kut luí nyi nyi akô. <sup>29</sup> Nghut kôlhang, Sodom wà mai Lot htoq lô é buinyi má, mauhkûng mai, myi eq hang gi, mau su wò gyó lô luí, lunglhang lé lhoq htên pyám bê nghut ri.

<sup>30</sup> Haû Byu Yhangzo, lé htoq shit é buinyi má le, haû eq rajung za dut râ nghut lhê. <sup>31</sup> Haú buinyi má, yhumhkûng\* htoq má nyi tô é sù gi, yhúmkaû mâ é zè lé, a ló gyó wang yù lo sháng gaq. Yò má nyi tô é sù gi, haû eq rajung za, yhûm shut a taù ló lo sháng gaq. <sup>32</sup> Lot é yhangmyi† lé bûn nyi keq. <sup>33</sup> Yhumsing é asak duì hkyô hô sù ó yuq nghut kôle, asak sum râ nghut lhê; asak sum pyâm é sù kúm gi, asak wó duì râ nghut lhê. <sup>34</sup> Ngò, nungmoq lé taí kyo kôlé, haú myîn lé, yhupjang ralhum má byù í yuq nyi to kô le, rayuq gi, shuí yu é hui mù, rayuq gi, myit gyó to râ nghut lhê. <sup>35</sup> Myiwe í yuq luí má rahá za chòm luí nyi tô le; rayuq gi, shuí yu é hui mù, rayuq gi, myit gyó pyâm to râ nghut lhê. <sup>36</sup> Yohtung má byù í yuq nyi to le, rayuq gi, shuí yu é hui luí, rayuq gi, myit gyó pyâm to berâ nghut lhê." gâ ri.

<sup>37</sup> Haú hkûn, chángzô pé gi, "Yhumsing Yesuq ê, haû gi, hká gyo má dut râ lú?" ga luí, Yesuq lé myi kôjáng, Yhang gi, "Màng leq é jang má, langdâ pé, lé zîng bùm râ nghut lhê." ga luí, yhangmoq lé tâ ri.

## 18

### *Chuimó Myhí Eq Tarâ Agyi É Hkyô Lé Dangtú Yù É Hkyô*

<sup>1</sup> Yesuq, Yhâng é chángzô pé lé, myit wum a gyú é za, hkâ-nhám le kyûdung nyi râ hkyô lé, dangtú dông mhoqshit é gi, <sup>2</sup> "Wà rawà má, Garai Gasang lé le a gyuq hoq, byù lé le haí su a ngàm é tarâ agyi rayuq nyi ri. <sup>3</sup> Haú wâ má chuimó myhí rayuq le nyi ri. Yhang gi, haû tarâ agyi wá chyáng ê luí, 'Ngò eq amû htoq sù lé, yhâng é mara eq rajung za, jéyáng byi laq.' ga luí, ê dum taí taí kut nyi ri.

<sup>4</sup> Nghut kôlhang, tarâ agyi wá gi, ahkýing rayoq zo jé shoq tarâ a jéyáng byí é tô ri. Hau htâng má, yhang gi, 'Ngò, Garai Gasang lé le a gyuq a hoq, byù lé le haí su a ngàm, <sup>5</sup> nghut kôlhang, chuimó myhí shí yuq é amû lé, ngò a jéyáng a doqdan byí é nghut le gi, yhang dum lé lé kut mù, ngo lé myit hpêbù nhâng râ dut ri. Haû mù, ngò yhâng é amû lé jéyáng byi râ.' ga, yhâng é unghkaû má myit yu ri." gâ ri.

<sup>6</sup> Haû mù luí, Yhumsing Yesuq gi, "A ding a mán é tarâ agyi wá taí é dang mai mhoq yù keq. <sup>7</sup> Garai Gasang gi, Yhang lé nyí myín wut dung nyi é, Yhang hkyin yu to bê bang lé, tarâ é dông a kut byí é gi, myáng myáng nyi to râ lú? <sup>8</sup> Ngò, nungmoq lé taí kôlé, Garai Gasang gi, yhangmoq lé hân yhang tengmán é dông jéyáng byi berâ nghut lhê. Nghut kôlhang, haû Byu Yhangzo jé lé é buinyi má, lumjín hkyô lé gi, mingkan htoq má myang wú shirâ lú?" ga tâ ri.

### *Hparishe Eq Kang Guq Sù Kyûdung É Hkyô*

<sup>9</sup> Yhumsing gùng lé dingmán bun luí, byù góbang lé wú tiq é bang ra-am lé, Yesuq dangtú dông taí é gi, <sup>10</sup> "Byù í yuq kyûdung kó râ ga, noqkuq yhûm má doq e akô. Rayuq gi, Hparishe, rayuq gi, kang guq sù nghut ri. <sup>11</sup> Hparishe hpó gi, yap to luí, 'Garai Gasang ê, ngò gi, byù góbang su lú zo lú shuq é hkyô le a kut, agè ashop é hkyô le a cháng, su-myi le a lú é htoq agó, shí kang guq sù su le, a nghut é yanmai, ngò nàng lé jeju bûn lhê ô! <sup>12</sup> Ngò gi, rabat má zoshuq í dâm gám nyi lhê; ngò wó yu é gú má é xê gambùm ragambùm le kat nyi lhê.' ga luí, yhang baú yhang gotú kut dung nyi ri.

<sup>13</sup> Kang guq sù kúm gi, we we má yap to mù, mauhkûng shut lhang a wám tu wú é za, wànggàng bat luí, 'Garai Gasang ê, shí yubak dap sù ngo lé, shogyô yù laq ô!' ga dung ri.

<sup>14</sup> Ngò, nungmoq lé taí kôlé, kang guq sù kúm gi, Garai Gasang é hí má mara hkyut san byí é lé wó yù luí, yhûm shut dum taù ló bê; nghut kôlhang, Hparishe wá gi, a wó nghut

\* 17:31 Yudaq byu pé é yhumhkûng gi, rá é nghut lhê mù, nyi kún jang kut akô. † 17:32 Lot é yhangmyi gi, Sodom wà shut dum taù lhing wú é yanmai, Garai Gasang lhoq hten pyâm é hui sù nghut lhê.

ri. Hkâsu mù gâ le, yhumsing gùng lé waq toq sù ó yuq nghut kôle, lhoq nyhum pyâm é hui râ nghut lhê; yhumsing gùng lé lhoq nyhum é sù kúm gi, waq toq é hui râ nghut lhê." ga tái ri.

*Zoshâng Wuì Lé Yesuq Shimân Byî É Hkyô*

*Mht 19:13-15; Mrk 10:13-16*

<sup>15</sup> Byu pé gi, zonú wuì lé Yesuq záng htung byi sháng gaq ga, Yhâng chyáng shuì lé lo bum akô. Chángzô pé gi, haù lé myàng jáng, lhom tân hkùm akô nghut ri. <sup>16</sup> Nghut kôlhang, Yesuq gi, zoshâng wuì lé, wut yù luì, "Haù zoshâng wuì lé, Ngá chyáng lé nhâng keq; yhangmoq lé hkâhkùm zing to kó; hkâsu mù gâ le, Garai Gasâng é mingdán gi, haù sù é bâng é mingdán ru nghut lhê. <sup>17</sup> Ngò, nungmoq lé teng za tái kôlé, Garai Gasâng é mingdán lé, zoshâng su kut a lhom hap yu é nghut le gi, mingdán haù má gè gè yhang wó wâng râ a nghut." ga tái ri.

*Ayá Wó É Sahtê Hpó*

*Mht 19:16-30; Mrk 10:17-31*

<sup>18</sup> Ayá wó é byù rayuq le, Yesuq lé, "Ge é Sará ê, ahtum abyuq é asak wó yù râ matú, ngò haì kut ra râ lú?" ga myî ri.

<sup>19</sup> Yesuq gi, "Haì mù, Ngo lé ge é Sará nghu lhê lú? Garai Gasang mai lai luì, ge é ó yuq le a nyì. <sup>20</sup> Jep é tarâ má, 'Su-myi sulàng hkâlú, byù hkâsat, hkâhkau, a teng a mán é saksé hkâhkám, nángnu nángwa lé hkungga aq.'<sup>✠</sup> gâ é dang pé lé, nàng sé gû bê." ga luì, yhang lé tû tái ri.

<sup>21</sup> Haù yuq gi, "Haù pé banshoq lé, ngò, zoshâng hkùn mai cháng bê nghut lhê." ga tái ri.

<sup>22</sup> Yesuq gi, dang haù lé wó gyo jáng, "Nàng kut râ rajung râ tô ashî; nàng wó miwó lé ùng pyám luì, myùng bang lé byî pyám aq; haù jáng, nàng, mauhkung htoq má sutzè wó râ nghut lhê; haù mù, Ngá htâng lé cháng aq." ga luì, yhang lé tái ri.

<sup>23</sup> Haù yuq gi, dang haù lé wó gyo jáng, sutzè gyai wó sù nghut é yanmai, gyai yhang myit a ngón dut byuq ri. <sup>24</sup> Yesuq gi, haù yuq lé wú luì, "Sutzè wó bang gi, Garai Gasâng é mingdán má wàng râ matú, haù-í yhang wuì ri-nhung! <sup>25</sup> Sutzè wó sù rayuq, Garai Gasâng é mingdán má wó wâng râ htoq, gola-uq radu âpno mai wó wang lai râ gi, je lui râ nghut lhê." ga tái ri.

<sup>26</sup> Dang haù lé wó gyô é bang gi, "Haù su ru nghut le gi, ó yuq za hkyi yu é hui râ nghut lhê lú?" ga myî bum akô nghut ri.

<sup>27</sup> Haù hkùn, Yesuq gi, "Byù a wó kut é hkyô lé, Garai Gasang gi, wó kut lhê." ga tái kyô ri.

<sup>28</sup> Haù hkùn, Petruq gi, Yesuq lé, "Wú aq, ngamoq gi, wó miwó tô pyâm to luì, Náng htâng cháng bê nghut lhê." ga tái jáng,

<sup>29</sup> Yesuq gi, "Ngò, nungmoq lé teng za tái kôlé, Garai Gasâng é mingdán é yanmai, yhumsing é yhùm, yhumsing é yhangmyi, yhumsing é âgu âmang, yhumsing é înu îwa, yhumsing é yhangzô pé lé, pyâm to sù ó yuq nghut kôle, <sup>30</sup> shí pyat má, akyû myo myo wó hkam yù râ htoq agó, htang pyat má le, ahtum abyuq é asak a wó yu é gi, a nyì râ nghut lhê." ga luì, yhangmoq lé tái ri.

*Yesuq, Yhang Shî Hkám Râ Lé Dum Tái É Hkyô*

*Mht 20:29-34; Mrk 10:46-52*

<sup>31</sup> Yesuq gi, Yhâng é lagyô pé raxe í yuq lé gotû kut wut yù mù, "Gyô wú keq, nga-nhung gi, Yerusalem wà mó shut doq ló nyi é nghut lhê. Haù má jé jáng, haù Byu Yhangzo eq séng luì, myiqhtoì pé kê tô é banshoq gi, dik lò berâ nghut lhê. <sup>32</sup> Hkâsu mù gâ le, Byu Yhangzo gi, tungbàu pé é loq má ap pyâm é hui luì, haù bâng èq Yhang lé, wuìzùi kut pyâm é, rhoì rip e, sôkan byé gyûn é, nhuq bat é kut yù mù, sat pyám kó râ nghut lhê.

<sup>33</sup> Hau htâng sum nyí nghu râ buinyì má, Yhang gi, dum dui toq lô râ nghut lhê." ga luì, yhangmoq lé tái ri.

✠ 18:20 Htoq Lô 20:12-16

<sup>34</sup> Lagyo pé gi, dang haú pé rahkun lé lháng a sê gyo kó; dang hau é lichyúm gi, yhangmoq é hí má zaú nghop tô é nghut é yanmai, Yhang haí taí nyi é hkyô pé lé yhangmoq a sé kó nghut ri.

*Dung Zo É Myoqjit Sû Lé, Yesuq, Myoq Dum Myàng Nhang É Hkyô*

<sup>35</sup> Ahkuî, Yesuq Yerihko wà nàm má jé lo nyi le, myoqjit é byù rayuq gi, hkyô yàm má zùng mù, dung zô nyi ri. <sup>36</sup> Yhang gi, byù rajùm rayò sô lai ló é htê lé wó gyo jáng, haú haí dut nyi é hkyô lé, myi kat ri. <sup>37</sup> Haú hkûn, yhangmoq gi, "Nazaret wà byù Yesuq lai ló ri." ga luî, yhang lé taí kyo akô.

<sup>38</sup> Haú su gâ é lé wó gyo jáng, yhang gi, "Dawiq é Yhangzo Yesuq ê, ngo lé shogyo yù laq ô!" ga wut dúng kat ri.

<sup>39</sup> Hí má lai ló é bang gi, zim za nyi râ matú yhang lé tân hkûm akô; nghut kôlhang, yhang gi, "Dawiq é Yhangzo ê, ngo lé shogyo yù laq ô!" ga, je riyhang htê mó o mó èq wut dúng kat ri.

<sup>40</sup> Haú mù, Yesuq gi, yap kat mù, byù haú yuq lé Yhâng chyáng shuí lé lô nhang kat ri. Myoqjit sù Yhâng nàm má jé lé jáng, Yesuq gi, <sup>41</sup> "Ngò, nàng lé haí kut byi râ ô nau ri lhú?" ga, yhang lé myi kat ri.

Haú yuq gi, "Yhumsîng ê, ngò myoq myàng nau ri." ga tû taí ri.

<sup>42</sup> Hau hkûn, Yesuq gi, "Náng myoq myàng sháng gaq! Náng é lumjîng myit gi, nang lé lhoq gê byi bê nghut ri." ga, yhang lé taí ri. <sup>43</sup> Haú yuq gi, haú hkûn jáng, yhang myoq wó myàng mù, Garai Gasang lé hkya-on uchyang Yesuq htâng cháng bê. Lhunglhang bang haú lé myàng kôjáng, Garai Gasang lé hkya-ôn nyi bum akô.

## 19

*Yesuq Eq Zake*

<sup>1</sup> Yesuq gi, Yerihko wà má wàng mù, sô lai ló nyi ri. <sup>2</sup> Haú hkûn, haú wâ má, Zake gâ é kang guq agyì rayuq nyi ri; haú yuq gi, sutzè wó sù nghut ri. <sup>3</sup> Yhang gi, Yesuq hká yuq nghut é lé myàng nau kôlhang, nyhûm sù nghut é htoq agó, byù rajùm rayò chyîn chyap tô é yanmai, a wó myàng nghut ri. <sup>4</sup> Haú mù, yhang gi, Yesuq lé wó myàng shoq ga, Yesuq lai ló râ hkyô hí shut din ê mù, hkohúm gâm htoq má ê doq zung tô ri.

<sup>5</sup> Yesuq gi, haú jowò má jé jáng, tu wú kat luî, "Zake ê, hân gyó lô aq; hkû-nyí ngò náng yhûm má bíng râ nghut lhê." ga taí ri. <sup>6</sup> Haú jáng, Zake gi, hân hân gyó lô mù, gabú dik é èq Yesuq lé lhom hkulum yu ri.

<sup>7</sup> Haú má nyi bang banshoq gi, haú lé myàng jáng, "Yhang gi, yubak dap sù rayuq chyáng bíng kut râ ga wang e ló bê." ga luî, mara hûn dang taí nyi bum akô.

<sup>8</sup> Zake kúm gi, toq yap mù, "Yhumsîng Yesuq ê, ngò wó é sutzè rawuí gû myùng bang lé gàm byi pyám râ; ngò záng mop zô pyâm é byù rayuq yuq nyi le gi, myi tú dum tau byi râ." ga Yhumsîng Yesuq lé taí ri.

<sup>9</sup> Haú hkûn, Yesuq gi, "Shí yuq le, Abraham é yhangzo\* rayuq nghut é yanmai, hkû-nyí shí yhûm má hkyi yù hkyô jé bê, <sup>10</sup> hkâsu mù gâ le, haú Byu Yhangzo gi, byuq byuq bê bang lé, hkat hô mù hkyi yù râ matú, jé lé sù nghut lhê." ga luî, Zake lé taí ri.

*Hkohkam É Dui-nhang Zoshâng Raxê Yuq*

*Mht 25:14-30*

<sup>11</sup> Haú hkyô lé, yhangmoq gyô nyi bùm kô é hkûn, Yesuq gi, Yerusalem wà mó má jé râ chyâng lò bê nghut é yanmai le, Garai Gasâng é mingdán gi, radá dâm htoq shit lô berâ ga, byu pé myit ngam tô bùm kô é yanmai le, dangtú ralhûm dông dum taí jat é gi, <sup>12</sup> "Aróng wó sù byù rayuq gi, hkohkâm ayá ê hkam yù luî, dum taú lò râ ga, wê é ming shut ê râ matú hen nyi ri. <sup>13</sup> Haú mù, yhang gi, Yhâng é dui-nhang zoshâng raxê yuq lé wut yù mù, rayuq lé ngùn rajoí joí ap byi luî, 'Ngò dum taú jé lô shoq, shi èq hpugá gá nyí láng keq.' ga luî, yhangmoq lé pying tô ri.

\* 19:9 Abraham é yhangzo nghû é lichyúm gi, Abraham su Garai Gasang lé lumjîng é sù lé gâ lhê.

<sup>14</sup> Yhâng é mingbyû wuì kúm gi, yhang lé a ngui bum é nghut mù luí, yhang e ló é htâng má, 'Shí yuq ngamoq ahtoq má up nyì râ lé, ngamoq a ô naù.' ga luí, ê taí râ matú lagyo châng nhang kat akô.

<sup>15</sup> Nghut kôlhang, yhang kúm gi, hkohkâm ayá wó hkam yù luí, dum taû jé lô jáng, yhang ngùn ap byî tô é dui-nhâng zoshâng wuì lé, hpugá gá luí, amyat hkâ-myhó wó ho jat bê hkyô lé sé naù luí, yhangmoq lé wut nhang kat ri.

<sup>16</sup> Haú hkûn, sâng-hî yuq gi, lé mù luí, 'Yhumsîng ê, ngò, náng é ngùn rajoí mai, amyat raxê joí wó ho jat yù bê.' ga taí ri.

<sup>17</sup> Haú hkûn, yhumsîng hpó gi, 'Arâ! Nghut bê, kyet é dui-nhâng zoshâng ê, nàng gi, je tiq é mù má lhang wó lum é sù nghut é yanmai, wà raxê lé upzo lo aq hkoi.' ga luí, yhang lé taí ri.

<sup>18</sup> Htang yuq le, lé mù luí, 'Yhumsîng ê, ngò, náng é ngùn rajoí mai, amyat ngo joí wó ho jat yù bê.' gâ ri.

<sup>19</sup> Yhumsîng gi, haú yuq lé, 'Nàng gi, wà ngo wâ lé up lo aq hkoi.' ga taí ri.

<sup>20</sup> Dum rayuq le, lé mù luí, 'Yhumsîng ê, náng é ngùn rajoí lé a byuq shoq, ngò panchoq èq htup tô lhê; wú aq, shî nghut lhê. <sup>21</sup> Nàng gi, yhumsîng yhang a tô tô é zè pé lé yù nau é eq, yhumsîng yhang a hô tô é yò mai yâm yù nau é sù, byù wui nghut é yanmai, nang lé ngò gyuq ri.' ga taí ri.

<sup>22</sup> Haú hkûn, yhumsîng gi, 'Agè ashop é dui-nhâng zoshâng ê, náng nhut mâ é dang eq rajung za, ngò, nang lé jéyáng râ nghut lhê. Ngò gi, yhumsîng yhang a tô tô é zè pé lé yù nau é eq, yhumsîng yhang a hô tô é yò mai yâm yù nau é sù, byù wui nghut é hkyô lé, nàng sê to gù nghut le nhîng, <sup>23</sup> ngá ngûn lé, ngò dum taû jé lô jáng, aráng eq amyat wó yù shoq, ngùn hpún kat jang má, haí mù a kat tô é lú?' ga yhang lé taí ri.

<sup>24</sup> Hau htâng, yhumsîng hpó gi, ayàm má yap tô é bang lé, 'Haù ngùn rajoí lé yhang chyáng mai taù yù luí, raxê joí wó sù lé jat byi keq.' ga taí ri.

<sup>25</sup> Haú bang gi, 'Yhumsîng ê, yhang gi, raxê joí wó to bê lé nhîng.' ga akô.

<sup>26</sup> Haù jáng, yhang gi, 'Ngò, nungmoq lé taí kôlé, wó sù† ó yuq le, jat byî é hui shirâ nghut lhê; a wó su chyáng mai kúm gi, yhang wó tô é lé lhang, yu pyám byi shirâ nghut lhê. <sup>27</sup> Ahkuí, yhangmoq ahtoq má ngò hkohkâm kut râ lé a ô nau é, ngá é gyè pé lé, shí má shuì lé mù, ngá hí má sat pyám keq.' ga hkûnmó hkyô kat ri." gâ ri.

*Yesuq Logúng Ji Mù, Yerusalem Wà Mó Shut Wang E Ló É Hkyô*

*Mht 21:1-11; Mrk 11:1-11; Yhn 12:12-19*

<sup>28</sup> Yesuq gi, shí hkyô pé lé ban taí jáng, hí má so luí, Yerusalem wà mó shut doq ló nyi ri. <sup>29</sup> Yesuq gi, Yhâng é chángzô pé eq Tsanlun Bùm mâ é Bethpage wà eq Behtani wà má jé ló kojáng, Yhâng é chángzo í yuq lé, <sup>30</sup> "Nungnhik, hí mâ é wà má ê keq; wà haú má wang é hkûn jáng, ó le a jî wú shî é logúng zo tuí tô lánng é lé, ê myâng kó râ nghut lhê; haù lé hpyi yù mù, Ngá chyáng she lò keq. <sup>31</sup> Byù rayuq yuq mai, 'Haù haí mù hpyi nyi akô?' ga nungnhik lé myi kôjáng, 'Shí du lé, haù Yhumsîng râ ri gâ.' nghû tû taí keq." ga pyîng luí, nhang kat ri.

<sup>32</sup> Nhang kat é sù nhik ê jé lé, Yesuq taí kat é dông yhang, dut to lánng é lé ê myang akô.

<sup>33</sup> Yhangnhik logúng zo haù lé hpyi nyi kô é hkûn, yhumsîng wuì gi, "Haù logúng zo lé, haí mù hpyi nyi akô lú?" ga luí, yhangnhik lé myî akô.

<sup>34</sup> Haù jáng, yhangnhik gi, "Shí du lé haù Yhumsîng râ ri gâ." ga taí akô.

<sup>35</sup> Yhangnhik gi, haù logúng zo lé Yesuq chyáng she lò mù, yhangmoq é buhîng pé lé logúng ahtoq má buí luí, Yesuq lé doq ji nhang akô. <sup>36</sup> Haù su kut, Yhang ji e ló nyi le, byu pé gi, yhangmoq é buhîng pé lé hkyô má hkang byî akô.

<sup>37</sup> Ahkuí, Tsanlun Bùm hkêgyó gyó ló é jowò eq chyáng lo é mai gi, chángzô pé banshoq bang, yhangmoq myang é laklaí kumlhá pé é yanmai, gabú myit mai htê mó o mó èq Garai Gasang lé hkya-on kô é dang gi,

† 19:26 Wó sù nghu é gi, yhumsîng a-tsam lé rago dat chûng sù lé taí é nghut lhê.



<sup>38</sup> "Haù Yhumsing é myìng mai jé lé lo é hkohkâm gi, hkungsô wó nyî sháng gaq ô!<sup>✠</sup>  
 Mauhkûng htoq má, nguìngón nyî sháng gaq ô!  
 Htoq tsáng myhâng má, Garai Gasang gi, hpungwup shingkang bo nyî sháng gaq ô!"  
 gâ akô.

<sup>39</sup> Haù mù luí, haù byù hpûng hkaù má bo é Hparishe pé ra-am gi, "Sarâ ê, náng é chángzô pé lé tân pyám aq." ga luí, Yesuq lé taí akô.

<sup>40</sup> Haù hkûn, Yesuq gi, "Ngò, nungmoq lé taí kôlé, shí bang zim za nyî kó é nghut le gi, luqgok pé garú lô râ nghut lhê." ga tù taí ri.

<sup>41</sup> Ahkuí, Yesuq, Yerusalem wà mó eq chyâng lò luí, wà mó haù lé myàng jáng, haù wà mó é matú ngaù mù, taí é gi, <sup>42</sup> "Wà nàng è! Hkû-nyî lhê é buinyì má, nguìngón é hkyô lé nàng bûn sé tô é nghut le gi, gè râ wá! Ahkuí kúm gi, haù hkyô lé nghop to bê nghut mù luí, nàng a sé lo nghut ri. <sup>43</sup> Hkâsu mù gâ le, náng chyáng Garai Gasang lé kûm jé é hkûn, nàng a bun a sé wú kat é yanmai, náng é gyè pé gi, awui ayàm má gyewap xuq mù, náng é lhîng hkyuq mai nang lé lom tô é buinyì jé lô râ nghut lhê. <sup>44</sup> Haù hkûn, nang lé lhoq htên pyám luí, nung zo pé lé le, haù ahkaù má yhang dún nhê pyet sat pyám bekô râ; nàng gi, luqgok racham htoq má racham lháng a kê lhum loshoq, dut byuq râ nghut lhê." gâ ri.

*Yesuq, Noqkuq Yhûm Lé Sêng Pyâm É Hkyô*

*Mht 21:12-17; Mrk 11:15-19; Yhn 2:13-22*

<sup>45</sup> Ahkuí, Yesuq gi, Yerusalem noqkuq yhûm má wàng mù, ung zo ung shuq é bang lé, "Ngá yhûm gi, kyûdung yhûm dut râ nghut lhê."<sup>✠</sup> ga kê to kôlhang, <sup>46</sup> nungmoq gi, jowò shí lé 'damaq hkyûng'<sup>✠</sup> kut akô." ga taí uchyang, hkat htoq pyâm ri.

<sup>47</sup> Yhang gi, nyî wuí noqkuq yhûm má mhoqshit nyi ri. Hkyangjong agyì pé, tarâ sarâ pé eq, byu pé é suwún wuí kúm gi, Yhang lé wó sat pyám râ hkyô ho nyi akô. <sup>48</sup> Nghut kôlhang, byù banshoq bang gi, Yhâng mhoqshit é dang lé gyo nau nyi kô é yanmai, wó sat râ hkyô lé, a myang hô kó nghut ri.

## 20

*Yesuq É Ahko Ahkáng Lé Myî Chyam Wú É Hkyô*

*Mht 21:23-27; Mrk 11:27-33*

<sup>1</sup> Ra-nyí lé, Yesuq gi, noqkuq yhûm wàng hkaù má, byu pé lé mhoqshit nyi é eq, gabú danglù hko kyô nyi é hkûn, hkyangjong agyi pé gi, tarâ sarâ pé, suwún wuí eq rahá kut, Yhâng chyáng lé jé kômù, <sup>2</sup> "Hai ahko ahkâng èq Nàng shí pé lé kut nyi lhê lhú? Ahko ahkáng shí, Nang lé ó yuq byî é lhú? Ngamoq lé taí kyô wú aq." ga Yhang lé myî akô.

<sup>3</sup> Haù hkûn, Yhang gi, "Ngò le, nungmoq lé rajung myî wú kôlé; <sup>4</sup> Yohan byî é baptisma gi, mauhkûng mai lhú? A nghut jáng, byu chyáng mai lhú? Ngo lé taí kyô wú keq?" ga yhangmoq lé myî ri.

<sup>5</sup> Haù hkûn, yhangmoq chòm hpyê lhum kô é gi, "'Mauhkûng mai nghut lhê.', nghû nga-nhúng taí jáng le, 'Haí mù, yhang lé a lumjîng kô é lhú?' ga râ nghut; <sup>6</sup> 'Byu chyáng mai nghut lhê.' nghû jáng le, shiwa byù banshoq gi, Yohan lé, myiqhtoi rayuq ga lumjîng to kô é yanmai, yhangmoq, nga-nhúng lé luqgok èq dú sat kó râ nghut." ga akô.

<sup>7</sup> Haù mù, yhangmoq gi, "Hkâmai nghut é lé, ngamoq a sé." ga tù taí akô.

<sup>8</sup> Yesuq gi, "Haù jáng, Ngò le, hai ahko ahkâng èq shí pé kut é hkyô lé, nungmoq lé a taí kyo." ga, yhangmoq lé taí ri.

*Tsibiyiq Hkyâm Yhumsîng Eq Hkyâm Saí Zo Bang*

*Mht 21:3-46; Mrk 12:1-12*

<sup>9</sup> Byu pé lé, Yesuq dangtú dông xoq taí kyô é gi, "Byù rayuq gi, tsibiyiq hkyâm ralhum saí to mù, hkyâm saí zo bâng chyáng ngho byî to luí, gó ming shut myáng myáng è nyi byuq ri. <sup>10</sup> Kyôshu yoq jé jáng, yhang gi, hkyâm saí zo bâng èq, hkyâm mâ é tsibiyiq shi pé lé lhom byî kat sháng gaq ga, dui-nhâng zoshâng rayuq lé yhangmoq chyáng nhang kat

ri. Nghut kôlhang, hkyâm saí zo bang gi, haú yuq lé lhom bat mù, loq kôm taú nhang kat akô. <sup>11</sup> Gotú dui-nhâng zoshâng rayuq lé, yhangmoq chyáng dum nhang kat ri. Nghut kôlhang, yhangmoq gi, haú yuq lé le, lhom bat mù, hoq lhoq hpu luí, loq kôm dum taú nhang kat akô. <sup>12</sup> Sum yuq nghû râ dui-nhâng zoshâng lé dum nhang kat ri. Yhangmoq gi, haú yuq lé le bat cheq luí, hkyâm mai hkat htoq kat akô.

<sup>13</sup> Haú hkûn, tsibiyiq hkyâm yhumsîng gi, 'Ngò hkâsu kut wú râ l hú? Ngò chyitdap é ngá zo lé, nhang kat wú râ nghut ri. Yhang lé kúm gi, yhangmoq lhom hkungga kó abe.' ga taí ri.

<sup>14</sup> Hkyâm saí zo bang gi, yhumsîng hpô é yhangzo lé myàng kôjáng, 'Shí yuq gi, silí wunlí sing yù râ sù nghut lhê; nga-nhúng, silí wunlí haú pé wó yú shoq, yhang lé sat pyám sháng.' ga rayuq eq rayuq taí l hûm bum akô. <sup>15</sup> Haú mù, yhang lé hkyâm shinggan shut dú htoq kômù, sat pyâm akô.

Haú su kut kôjáng, tsibiyiq hkyâm yhumsîng gi, yhangmoq lé hkâsu kut râ l hú? <sup>16</sup> Yhang gi, ê mù, haú hkyâm saí zo bang lé sat pyám luí, hkyâm haú lé góbang lé htot ngho byí pyám râ nghut lhê." gâ ri.

Dang haú lé wó gyo bang gi, "Haú su gi, hkâ-nhám le a dut sháng gaq ô!" gâ akô.

<sup>17</sup> Hau htâng, Yesuq gi, yhangmoq lé byu wú luí, "Haú jáng gi, 'Yhûm saí bâng eq hkyin htoq pyâm é luqgok gi, htungchyûn mâ é ahkyak dik é luqgok dut bê.'<sup>✠</sup>

ga Chyúmdang má kê tô é gi, haí gá nau é nghut lhê l hú? <sup>18</sup> Luqgok\* haú má gyó záng é sù ó yuq nghut kôle, gyuí gyop byuq râ nghut lhê. Luqgok hau eq gyó nhê záng é sù le, nhê pyeq pyâm é hui râ nghut lhê." ga taí ri.

<sup>19</sup> Tarâ sará pé eq hkyangjong agyi pé gi, dangtú shí gi, yhangmoq lé lhoq ang luí taí é hkyô lé, sé kê é yanmai, haú hkûn jáng l háng Yhang lé chyup yú râ matú hkyô ho nyi akô. Nghut kôlhang, byu pé lé gyuq mù a chyup shi kó nghut ri.

#### *Kang Kat É Hkyô Eq Séng Luí Myi É Dang*

*Mht 22:15-22; Mrk 12:13-17*

<sup>20</sup> Haú mù, yhangmoq gi, Yesuq é dang má mara wó chyup yú shoq ga, gegùn labyoq kut bang lé jowú nhang nyi akô. Haú gi, ahkáng ayá wó é mauzaú chyáng Yhang lé wó ap pyám râ matú nghut ri. <sup>21</sup> Haú jowú bang gi, "Sará ê, nàng gi, dít dít mán mán taí mhoqshit é eq, byu é myoqdong lé a tê byí é za, Garai Gasâng é hkyô lé, tengmán é dông mhoqshit é sù nghut é lé, ngamoq sê lhê. <sup>22</sup> Hkoséng Kehtaq lé, ngamoq kang kat râ gi, tarâ wang lhê l hú? A wang é l hú?" ga luí, Yhang lé myí wú akô.

<sup>23</sup> Nghut kôlhang, Yesuq gi, haú bâng é myit goí é hkyô lé sé mù luí, yhangmoq lé, <sup>24</sup> "Ngo lé, ngùn rachap tân shit wú keq. Ó yuq é alhô eq masat laiká dap tô ri l hú?" ga myi jáng, <sup>25</sup> yhangmoq gi, "Kehtaq é nghut ri." ga akô.

Haú hkûn, Yesuq gi, "Haú nghut jang, Kehtaq é lé gi, Kehtaq lé byi keq; Garai Gasâng é lé gi, Garai Gasang lé byi keq." ga yhangmoq lé taí ri.

<sup>26</sup> Yhangmoq gi, byu pé hí má, Yhâng é dang má mara a wó ho myang é eq, Yhang tú taí é dâng é yanmai, maú hong byuq kôluí, zim byuq akô.

#### *Dum Dui Toq Lô Râ Hkyô Eq Séng Luí Myi É Dang*

*Mht 22:23-33; Mrk 12:18-27*

<sup>27</sup> Haú hkûn, haú dum dui toq hkyô a joq gâ é Saduke pé ra-am gi, Yesuq chyáng lé jé kômù, <sup>28</sup> "Sará ê, myiwe wó é byù rayuq gi, zo dù a dap é za shi byuq é nghut jáng, yhanggu gi, yhangmâng é awut ashín xoq byi râ matú, yhâng rhat lé chui gon ra rà nghut lhê ga, nga-nhúng lé, Mosheq kê to byí ri. <sup>29</sup> Hí hpyang lé, gumang nhiktâng wui nyhit yuq nyi akô. Lagám yuq gi, myiwe yù luí, zo dù a dap é za shi ló byuq bê nghut ri. <sup>30</sup> Lanong yuq le, yhangmang mó é chui lé gon mù, zo dù a dap é za shi ló byuq bê. <sup>31</sup> Hau htâng, Lalaq yuq mai Lahkâ yuq jé shoq, chuimó haú lé rayuq htâng rayuq dum gon gon kut kôlhang, zo dù a dap é chyat shi ló byuq bùm bekô nghut ri. <sup>32</sup> Ló htáng má, myiwe

✠ 20:17 Hkyâ-on 118:22 \* 20:18 Luqgok nghu é gi, Yesuq lé taí ri.

myhí haû le châng shi ló byuq bê nghut ri. <sup>33</sup> Haû mù luí, haû dum dui toq é buinyì má, myiwe myhí haû gi, haû nhiktâng wui mà é hká yuq é yhangmyi nghut râ lúhú? Hkâsu mù gâ le, yhang gi, haû nyhit yuq é yhangmyi dut wú bê sù nghut ri." ga luí, Yhang lé myí wú akô.

<sup>34</sup> Haû hkûn, Yesuq gi, "Shí mingkan htoq mà é byu pé gi, ikun kut é eq myi byi myi yû kut nyi bum akô. <sup>35</sup> Shi é mai dum dui toq râ eq, haû pyat má nyì râ gíng bâng é matú gi, ikun kut é eq myi byi myi yû hkyô joq lo râ a nghut. <sup>36</sup> Haû bang gi, maumang lagyô pé su dut byuq luí, a dat shí lo kê râ nghut lhê. Yhangmoq gi, dum dui toq lô su é yhangzô pé† nghut é yanmai, Garai Gasâng é yhangzô pé nghut bekô. <sup>37</sup> Haû nyé duq nyi é mhanpúng eq séng luí, Mosheq eq kê tô é má lháng, Yhumsîng gi, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.†☆ ga bo tô é yanmai, shi é bang dum dui toq lô râ hkyô lé tûn shit to bê nghut ri. <sup>38</sup> Garai Gasang gi, shi bê bâng é Garai Gasang a nghut, dui nyi bâng é Garai Gasang ru nghut nyi lhê; hkâsu mù gâ le, lhunglhâng bang gi, Garai Gasâng é hí má dui nyi é bang chyat nghut akô." ga yhangmoq lé tû taí ri.

<sup>39</sup> Haû hkûn, tarâ sará pé ra-am gi, "Sarâ ê, nàng taí é jô ri." ga akô. <sup>40</sup> Haû mù, yhangmoq gi, Yhang lé haí le a wám myí jat lo kó nghut ri.

### *Hkrisduq Gi, Ó Yuq É Yhangzo?*

*Mht 22:41-46; Mrk 12:35-37*

<sup>41</sup> Hau htâng, Yesuq gi, yhangmoq lé, "Byu pé gi, Hkrisduq lé, Dawiq é yhangzo nghut lhê, ga hkâsu mù taí akô lúhú? <sup>42-43</sup> Dawiq yhang yhang lháng gi, Hkya-on Kungtôn Laiká má,

'Haû Yhumsîng Garai gi, ngá é Yhumsîng lé, "Ngò, náng é gyè pé lé, náng é hkyî nang tanghkuq kut pyám byî é hkyíng jé shoq, Ngá é loqyo hkyam‡ shut zung nyì shi aq." gâ ri.†☆

ga kê tô ri. <sup>44</sup> Haû mù, Dawiq yhang lháng, Hkrisduq lé, Yhumsîng gâ é nghut le gi, Hkrisduq gi, yhangzo za hkâsu ge nghut râ lúhú?" ga taí ri.

### *Tarâ Sará Pé Lé Sidiq Râ Hkyô*

*Mht 23:1-36; Mrk 12:38-40; Luk 11:37-54*

<sup>45</sup> Byù banshoq gyô nyi é u lé, Yesuq, Yhâng é chángzô pé lé taí é gi, <sup>46</sup> "Tarâ sará pé lé sidiq nyì keq. Yhangmoq gi, réng é buhîng wut chûng mù, sô yông wún luí, gai pé má hkunggâ é èq shichyen râ lé le, tarajong pé mà é ahkyak dik é zùng jang pé eq poí pé mà é je réng é zùng jowò pé má myang zùng râ lé le, ô nau nyi bum akô. <sup>47</sup> Yhangmoq gi, chuimó pê é yhûm-yò pé lé hpyoq zo hpyoq shuq kôluí, kyû hîng hîng dîng shit mhaû é bang nghut akô. Haû sù é bang gi, je riyhang htan é dông dam byî é hui zo kó râ nghut lhê." gâ ri.

## 21

### *Chuimó Myhí Kat É Alu*

*Mrk 12:41-44*

<sup>1</sup> Yesuq tu wú kat é hkûn lé, noqkuq yhûm mà é alu sidek má, wó bang alu kat nyi bùm kê é lé myang ri. <sup>2</sup> Dum nghut jáng, gyi htingchap ngùn zo í chap za kat é, myung é chuimó myhí rayuq lé le myang ri. <sup>3</sup> Haû mù, Yhang gi, "Ngò, nungmoq lé teng za taí kôlé, shí myung é chuimó myhí gi, góbang banshoq htoq má je myo kat bê nghut ri. <sup>4</sup> Hkâsu mù gâ le, haû góbang banshoq gi, yhumsîng agùn agó wó é mà é lé, lé kat akô; yhang kúm gi, myùng sù nghut kôle, yhâng asak lé baú ra ngùn lhunglháng lé kat bê nghut ri." ga taí ri.

### *Ló Htûm Buinyì Má Dut Lò Râ Hkyô*

*Mht 24:1-21, 29-35; Mrk 13:1-19, 24-31*

† 20:36 Dum dui toq lô su é yhangzô pé gâ é gi, Yesuq lé lumjîng luí, shi é htâng má dum dui toq lo é bang lé gâ lhê. ☆ 20:37 Htoq Lô 3:6 ‡ 20:42-43 Loqyo hkyam ngu é gi, ahko ahkáng wó é jowò nghut lhê. ☆ 20:42-43 Hkya-on 110:1

<sup>5</sup> Noqkuq yhûm lé, yúng é luqgok pê èq le, alu chyunghuq pê èq le, mhôn tô ri ga, chángzô pé ra-am hkya-ôn bùm kôjáng, Yesuq gi, <sup>6</sup> "Nungmoq myang nyi é shí pé gi, luqgok rachâm htoq racham lhang a kê lhum loshoq, hpoyoq hpyi pyâm é buinyi jé ra nghut lhê." ga taí ri.

<sup>7</sup> Haú su ga jáng, yhangmoq gi, "Sarâ ê, haú nghut le gi, haú hkyô pé gi, hkâ-nhám dut lô râ lhu? Haú dut râ chyâng lò jáng, hkâsú é kumlhá htoq lô râ nghut lhê lhu?" ga, Yhang lé myi akô.

<sup>8</sup> Haú hkûn, Yhang gi, "Nungmoq gi, hkyô shuê nghoq é a hui kó sháng gaq, sidiq nyi keq. Hkâsu mù gâ le, 'Ngò gi, Mesaia nghut lhê.' ga le, 'Ahkyíng chyâng lò bê.' ga le, Ngá myíng lé lhang é byù myo myo pô htoq lô kó râ nghut lhê. Nghut kôlhang, nungmoq gi, yhangmoq htáng hkâcháng kó. <sup>9</sup> Majan htoq é eq, gumlau toq é hkyô lé, wó gyo kôjáng, hkâgyuq hkâ-kyûm kó, haú hkyô pé hí dut lò râ nghut lhê. Nghut kôlhang, lô htáng é buinyi gi, haú hkûn jáng dut râ a nghut shi." ga taí ri.

<sup>10</sup> Hau htâng, Yhang, yhangmoq lé dum taí é gi, "Ra-myû eq ra-myû, mingdán ralhumm eq ralhumm majan zân lhûm lò kó râ nghut lhê. <sup>11</sup> Jowò myo myo má, layáng mó nún lo é, nolì nojàng myô lo é eq mutmó gyó lo é pé, dut lò râ nghut lhê; gyuq chiq jung pé eq kumlhá mó le, mauhkûng htoq mai htoq shit lô râ nghut lhê.

<sup>12</sup> Nghut kôlhang, haú hkyô banshoq a dut shimá, Ngá myíng é yanmai, byu pé gi, nungmoq lé chyup yû luí, zing-rî yù mù, tarajong pé eq htóng pé má ap pyám kó râ nghut lhê, hau htoq agó, nungmoq gi, hkohkam pé eq zau pê chyáng ê ap byí é le, hui kó râ nghut lhê. <sup>13</sup> Haú su é pé mai, nungmoq gi, ngò eq séng luí, saksé wó hkám râ hkyô htoq lô berâ nghut lhê. <sup>14</sup> Nghut kôlhang, hkâsu nghû lhom tû taí râ hkyô lé, hí mai a myit wû nyi râ lé, nungmoq myit hpyit to keq. <sup>15</sup> Hkâsu mù gâ le, nungmoq é gye pé lhunglhang bang, haí le a wó lhom tû taí loshoq, ngò, nungmoq lé dang eq hpaqchyí byi râ nghut lhê. <sup>16</sup> Nghut kôlhang, nungmoq gi, înu îwâ pé, âgu âmâng pé, mungmoq eq buinùm ji-myi wui èq lhang, ap pyâm é hui kó râ nghut lhê. Yhangmoq gi, nungmoq chyáng mâ é ra-am lé lhang, sat pyám kó râ nghut lhê. <sup>17</sup> Byù lhunglhang bang gi, Ngá é yanmai, nungmoq lé a nguì kut kó râ nghut lhê. <sup>18</sup> Nghut kôlhang, nungmoq é xâm rahkat lhang wó htên byuq râ a nghut.\* <sup>19</sup> Nungmoq gi, wó jân é hkyô mai, asak lé wó yû kô râ nghut lhê.

<sup>20</sup> Yerusalem và mó lé gyè hpúng mó èq lóm tô é lé, nungmoq myàng jáng, và mó haú htên byuq râ ahkyíng chyâng lò bê lé, bûn sê nyi keq. <sup>21</sup> Haú hkûn lé, Yuda mau má nyi é bang gi, bùm pé shut hpang doq ló kó sháng gaq; haú và hkaú má nyi é bang le, hpang htoq kó sháng gaq; và tiq và zo pé má nyi é bang le, và hkaú shut a wàng kó sháng gaq. <sup>22</sup> Hkâsu mù gâ le, Chyúmdang má kê to má kê to banshoq dik lò râ matú, buinyi haú pé gi, mara dam byí é buinyi pé dut râ nghut lhê. <sup>23</sup> Haú buinyi pé má, zogûng dut é myiwe wui eq náu huq ashî nghut é înu wui gi, gyai yhang wuîhke kô râ nghut lhê; hkâsu mù gâ le, shí mîng ahtoq má wuîhke mó eq, shí amyû ahtoq má Garai Gasang nhikmó-yô é jé lô râ nghut lhê. <sup>24</sup> Yhangmoq gi, shâm lhâm èq sat pyám hui lhê eq, ming hkang ming mó má chyup shuê ló é le hui kó râ nghut lhê. Tûngbaù pé lé byí tô é buinyi ahkyíng htáng shoq, Yerusalem và mó gi, tûngbaù pê èq nâng zik tô é hui râ nghut lhê.

<sup>25</sup> Haú hkûn, bui, kyí, lhamó pé má, kumlhá htoq shit râ nghut lhê. Wuishuq lung-aú mâ é wuîlhêng pê é myíng é htê mó é yanmai, myigùng htoq má, byù myû chângjup gi, hkâsu kut râ a sé loshoq maú é eq myit wui myit hkê é hui bekô râ nghut lhê. <sup>26</sup> Byu pé gi, mingkan htoq má dut lò râ é hkyô pé lé, a jé shi mai myit gyuq kô é yanmai, moq byuq ló bûm kó râ nghut lhê; hkâsu mù gâ le, mauhkûng mâ é wum-o a-tsam pé gi, lhoq nhûn é huí bùm kô râ nghut lhê. <sup>27</sup> Haú hkûn, haú Byu Yhangzo gi, mhut ji mù, hpungwup a-tsam mó eq le, hpungwup shingkang mó eq le, gyó lé lo é lé, yhangmoq byu-myàng kó râ nghut lhê. <sup>28</sup> Haú hkyô pé dut hi lò jáng, ulhum tû mù wú kat keq, hkâsu mù gâ le, nungmoq lé hkyi yù râ buinyi gi, chyâng lò bê nghut ri." gâ ri.

\* 21:18 Shí má gi, asak woi-nyí a shí râ hkyô lé taí é nghut lhê.

<sup>29</sup> Yhang, yhangmoq lé dangtú dông xoq tái é gi, "Maihpáng gâm eq sikhâm banshoq lé wú wú keq. <sup>30</sup> Sikbu nyún lo é lé myàng jáng, bui nyé nám chyâng lò bê ga luí, nungmoq yhang dat wú sê akô. <sup>31</sup> Haú eq rajung za, haú hkyô pé dut nyi é lé, nungmoq myàng kôjáng, Garai Gasâng é mingdán gi, chyáng bê nghut é hkyô lé, nungmoq sé lo keq.

<sup>32</sup> Ngò, nungmoq lé teng za tái kôlé, shí pyat mâ é byu pé a ban shi byuq shimá, haú hkyô pé banshoq dut byuq râ nghut lhê. <sup>33</sup> Mauhkúng eq myigùng gi, a joq lo dut byuq râ nghut lhê; nghut kôlhang, Ngá é dang gi, ru joq nyi râ nghut lhê.

<sup>34</sup> "Nghut kôlhang, zo myo shuq myô é, î shuq wut é, mingkan htoq mâ é myit wui myit hkê é pé eq, nungmoq é i-myit wò lai nyi luí, haú ngò jé lé é buinyi gi, lhai bik lo é su, nungmoq ahtoq má byodàn tung a jé lò sháng gaq, sidiq nyi keq. <sup>35</sup> Hkâsu mù gà le, buinyi haú gi, mingkan htoq má nyi é byù banshoq bâng é ahtoq má, haú su jé lô râ nghut lhê. <sup>36</sup> Haú mù luí, haú dut lò râ hkyô banshoq mai, nungmoq wó lut lai mù, haú Byu Yhangzô é hí má, wó yap gîng é bang dut sháng gaq, hkâ-nhám le kyúdung luí, ahkyíng hkangmó má machya nyi keq." gà ri.

<sup>37</sup> Yesuq gi, nyi wuî noqkuq yhûm má mhoqshit nyi luí, myìn wuî Tsanlun Bùm gà é bùm shut htoq ê mù, ê nyi to to kut ri. <sup>38</sup> Byù banshoq bang gi, Yhang mhoqshit é dang gyo râ ga, napsûn noq noq mai noqkuq yhûm má jé lé bum akô nghut ri.

## 22

### *Yesuq Lé, Yudaq Êq Ung Zô É Hkyô*

*Mht 26:1-5,14,16; Mrk 14:1-2, 10-11; Yhn 11:45-53*

<sup>1</sup> Ahkuí, Lhoqlhai Poí gà é Azuma (múnchi a kat é Muk Zo Poí) jé râ chyâng lò bê. <sup>2</sup> Haú mù, hkyangjong agyi pé eq tarâ sará pé gi, Yesuq lé hkâsu kut wó sat pyám râ hkyô, ho nyi akô; hkâsu mù gà le, yhangmoq gi, mingbyû wuî lé gyuq bùm kô é yanmai nghut ri. <sup>3</sup> Haú hkûn, lagyo raxe í yuq má bo é Iskarut gà é Yudaq chyáng Tsadán wàng mù luí, <sup>4</sup> yhang gi, htoq ê mù Yesuq lé hkâsu kut ap pyám râ hkyô lé hkyangjong agyi pé, noqkuq yhûm zúng é gyezau pé eq, ê hpyê ri. <sup>5</sup> Haú mù, yhangmoq gi, gyô nguî luí, Yudaq lé ngùn byi râ hkyô myit hui bekô. <sup>6</sup> Yudaq le hap yù luí, byù hpúng má a nghut é hkûn, Yesuq lé ap pyám râ hkyô ho nyi bê nghut ri.

### *Lhoqlhai Poí Lé Món É Hkyô*

*Mht 26:17-30; Mrk 14:12-26; Yhn 13:21-30*

<sup>7</sup> Ahkuí, haú Lhoqlhai Poí mâ é sauzo shigu hkungga sat nhông byi râ é Azuma buinyi jé bê. <sup>8</sup> Haú hkûn, Yesuq gi, Petruq eq Yohan lé, "Nga-nhúng zo râ matú Lhoqlhai Poí é món lánng keq." ga luí, nhang kat ri.

<sup>9</sup> Haú nhik gi, "Hkâmá ê món to nhâng nau ri lú?" ga luí, Yhang lé myi akô.

<sup>10</sup> Haú hkûn, Yesuq gi, "Nungnhik, myuq hkaú shut wang e ló le wuî yambú waq é byù rayuq lhom hui râ nghut lhê; haú yuq chyáng châng ló luí, yhang wang ló é yhûm má châng wàng mù, <sup>11</sup> yhumsîng lé, 'Ngò Ngá é chángzô pé eq rahá, Lhoqlhai Poí zo râ bîng wap hkâmá nghut lhê lú ga, Sará myi nhang kat ri.' nghû tái keq. <sup>12</sup> Haú hkûn, hen tô é ahtoq mâ é wap mó lé, nungnhik lé lhom tân shit râ nghut lhê; wap haú má ê món to keq." ga tái kat ri.

<sup>13</sup> Haú chángzo nhik htoq e ló le, Yesuq tái kat é eq roq za ê myâng kômù, Lhoqlhai Poí lé món to bekô nghut ri.

### *Yhumsing É Myinzang*

<sup>14</sup> Ahkuí, ahkyíng jé jáng, Yesuq eq Yhâng é chángzô pé rahá za zohpoq má zung tô akô. <sup>15</sup> Haú hkûn, Yesuq gi, "Ngò wuîhke jamjau hpuzô é a hui shi má, Lhoqlhai Poí shi lé nungmoq eq rahá zo râ lé, Ngò gyai ô nau nyi lhê. <sup>16</sup> Hkâsu mù gà le, ngò, nungmoq lé tái kôlé, Garai Gasâng é mingdán má poí shi a ló dik dik gi, ngò haú lé dum zo râ a nghut ló." ga luí, yhangmoq lé tái ri.

<sup>17</sup> Hau htâng, Yesuq gi, góm lé yù mù jeju ban hkya-on jáng, "Góm shî lé yù luí, nungmoq yhangchang gàm shuq lhum keq. <sup>18</sup> Ngò, nungmoq lé taí kôlé, ahkuí mai gi, Ngò, Garai Gasâng é mingdán a jé jé tsybyiq wing lé dum shuq râ a nghut lo." ga taí ri.

<sup>19</sup> Hau htâng, Yhang gi, muk lé yù mù, jeju hkya-on luí, muk lé myhik hpé mù, yhangmoq lé byi uchyang, "Shî gi, nungmoq é matú byî pyâm é, Ngá é gungdu nghut lhê; Ngo lé bûn nyî râ matú, shî su kut nyî keq." ga taí ri.

<sup>20</sup> Haû eq rajung za, myinzang ban zo jáng, góm lé le yù mù, "Góm shî gi, nungmoq é matú htoq pyâm é, Ngá é sui má xuq tô é dangshikaq asik nghut lhê. <sup>21</sup> Nghut kôlhang, wú keq, Ngo lé ap pyám râ sù gi, zang bó shî má ngò eq rahá nyi tô ri. <sup>22</sup> Haû Byu Yhangzo gi, hkyin to huí é eq rajung za shî râ nghut lhê; nghut kôlhang, Yhang lé ap pyâm é sù gi, dingnyé wó ri." ga taí ri. <sup>23</sup> Haû su ga jáng, lagyô pé gi, yhangmoq má shí hkyô kut râ sù gi, hká yuq nghut râ lhu ga, rayuq eq rayuq myí lhum bum akô.

<sup>24</sup> Haû htoq agó, yhangmoq mâ é hká yuq sheq je kô lhê lhu ga le, rayuq eq rayuq taí htîng lhûm bum akô. <sup>25</sup> Haû mù luí, Yesuq gi, "Tûngbau pé é hkohkam pé gi, yhangmoq byù myû pé é ahtoq má up zô nyî kô é nghut luí, byu pé gi, ahkáng ayá wó é bang lé jeju yhumsing pé ga luí, taí hkungga nyi bum akô. <sup>26</sup> Nungmoq kúm gi, haû su hkâkut kó. Nungmoq má je ko sù gi, asak je tiq é sù su, up é sù le, dui-nhâng zoshâng su nghut nyî sháng gaq. <sup>27</sup> Hká yuq sheq je kô lhê lhu? Zô zung nyî sù lhu? Haû a nghut jáng, saí tsó é sù lhu? Zô zung nyi é sù sheq nghut ri. Nghut kôlhang, ngò gi, nungmoq mâ é saí tso sù su za nghut nyi lhê. <sup>28</sup> Nungmoq kúm gi, Ngò jamjau huí nyi le, Ngò eq rahá nyi nyi é bang nghut nyi akô. <sup>29</sup> Haû su mù, Ngá wa gi, Ngo lé, mingdán ap byî é su, Ngò le, nungmoq lé mingdán ap byi râ nghut lhê. <sup>30</sup> Haû mù, Ngá é mingdán mâ é, Ngá é zangbó má, nungmoq wó zo kó râ nghut lhê; nungmoq le hkohkâm-tanghkuq má zung to mù, Israelaq amyû raxe í hú lé jéyáng kó râ nghut lhê.

*Yesuq Lé, Petruq (Simun) He-ngik Pyâm Râ Hkyô*

*Mht 26:31-35; Mrk 14:27-31; Yhn 13:36-38*

<sup>31</sup> Simun, Simun ê, wú aq, sungsô cham lé shaí é su, nungmoq lé wó shaí shoq ga, Tsadán wá gi, ahkáng dung bê. <sup>32</sup> Nghut kôlhang, náng é lumjîng myit a hten sháng gaq nghû, Ngò, náng é matú kyûdung byi bê; nàng dum lhing bûn lò jáng, nung gu nung mâng pé lé wum-o lhoq ging byi aq." ga taí ri.

<sup>33</sup> Haû hkûn, Simun gi, "Yhumsîng ê, htóng wâng kôlhang, shî kôlhang, ngò gi, nàng eq rahá cháng râ matú myit hpyit to bê." ga tú taí ri.

<sup>34</sup> Yesuq gi, "Petruq ê, nang lé Ngò taí lé, hkû-nyí\* lháng woq a tûn shi má, nàng, Ngo lé a sé ga luí sum dâm he-ngik pyâm râ nghut lhê." ga taí ri.

<sup>35</sup> Hau htâng, Yesuq, yhangmoq lé taí é gi, "Ngò, nungmoq lé ngunhtûng, jihtûng, hkyî-tsung a wùn a chûng nhang é za, nhang kat é nghut hkûn, nungmoq chyáng haí ra akô lhu?" ga myi jáng, yhangmoq gi, "Haí le a ra lo." ga taí akô.

<sup>36</sup> Haû hkûn, Yhang gi, "Ahkuí kúm gi, ngunhtûng wó sù gi, yù wun sháng gaq, jihtûng wó sù le, yù wùn sháng gaq, shâm a wó sù gi, bumó ung luí wui sháng gaq. <sup>37</sup> Hkâsu mù gâ le, Ngò, nungmoq lé taí kôlé, Ngò eq séng luí Chyúmdang má kâ tô é gi, dut lò berâ nghut lhê; 'Haû yuq gi, yubak mara wó bang má nghap lhôm to bê.'<sup>☆</sup> ga kâ tô é dang gi, Ngá chyáng dik lò râ nghut lhê." ga luí, yhangmoq lé taí ri.

<sup>38</sup> Haû mù, lagyô pé gi, "Yhumsîng ê, wú aq, shí má shâm í hkyam joq tô ri." ga taí kôjáng, Yesuq gi, "Gé bê." ga luí, yhangmoq lé taí ri.

*Tsanlun Bùm Má Yesuq Kyûdung É Hkyô*

*Mht 26:36-46; Mrk 14:32-42*

<sup>39</sup> Ahkuí, Yesuq gi, htoq luí, gó hkun é eq rajung za, Tsanlun Bùm shut htoq e ló bê nghut ri; Yhâng é chángzô pé le Yhang htâng châng e ló akô. <sup>40</sup> Haû jowò má jé jáng, Yhang gi, "Nungmoq, gunglaú é a hui sháng gaq, kyûdung nyi keq." ga luí, yhangmoq lé

\* 22:34 Yudaq byu pé é ra-nyí gi, myinhâng búi wang é mai, htang nyí búi wang é jé shoq nghut lhê. Shî mâ é hkû-nyí gi, nga-nhûng é matú myín âng ri. ☆ 22:37 Esai 53:12

taí to mù, <sup>41</sup> chángzô pé nyi é mai luqgok radú we kô gâng e ló luí, hkyihput htuq mù, <sup>42</sup> "Áwa ê, Náng ô nau é nghut le gi, góm† shí lé Ngá chyáng mai lhaí pyám byi laq. Nghut kôlhang, Ngò ô nau é dông a nghut, Náng ô é dông sheq nghut sháng gaq." ga kyûdûng ri. <sup>43</sup> Haú hkûn, mauhkûng mai maumang lagyo rayuq htoq lé luí, Yhang lé i-myt nhik lé taí tîng ri. <sup>44</sup> I-myt hkaú má dik shoq hkâm zo wuî é yanmai, Yhang je riyhang kyûdung wum kat nyi ri; Yhâng é buibù le, sui hkyí sui pat su myigùng má yui gyó ri.

<sup>45</sup> Haú mù, kyû ban dung jáng, Yhang toq luí, chángzô pê chyáng ló wú le, yhangmoq gi, myit yón mù luí, yhup myhí to kô é lé ló myâng mù, <sup>46</sup> "Haí mù yhup nyi akô lúhú? Toq keq! Gunglaú é a hui sháng gaq, kyûdûng nyi keq." ga luí, yhangmoq lé taí ri.

### *Yesuq Lé Chyup É Hkyô*

*Mht 26:47-56; Mrk 14:43-50; Yhn 18:3-11*

<sup>47</sup> Haú su ga, ru taí nyi ashí le, wú keq, haú chángzo raxe í yuq má bo é Yudaq gi, hkyô hí mù byù rajùm rayò lé shuí lé lô luí, yhang gi, Yesuq lé bopuq puq râ ga huí lé lo ri.

<sup>48</sup> Haú mù luí, Yesuq gi, "Yudaq ê, nàng gi, haú Byu Yhangzo lé bopuq puq é èq gyè pê chyáng ap pyâm lhè lúhú?" ga luí, yhang lé lhom myí ri.

<sup>49</sup> Haú hkûn, Yesuq htàng cháng bang gi, haí dut lò rà lé bûn sé kô é yanmai, "Yhumsîng ê, ngamoq gi, sham èq zân le, gè rà lúhú?" ga myí akô. <sup>50</sup> Yhangmoq chyáng mâ é rayuq gi, hkyangjong mó é dui-nhâng zoshâng lé zân kat luí, yhâng é loqyo nohkyap byit byuq bê nghut ri.

<sup>51</sup> Yesuq kúm gi, "Gé bê. Yhangmoq ô nau é su nghut kó sháng gaq." ga tû taí mù, haú yuq é nohkyap lé è záng luí lhoq gê byí ri.

<sup>52</sup> Yesuq gi, Yhang lé chyup râ ga jé lé é hkyangjong agyi pé, noqkuq yhûm zúng é zau pé eq agyi suwún wuî lé, "Nungmoq gi, damyaq rayuq lé chyup é su, shâm, dumbáng eq kut luí, lé lo akô lúhú? <sup>53</sup> Ngò gi, nyí wuî, noqkuq yhûm má nungmoq eq rahá nyi kôlhang, nungmoq Ngo lé chyup yû râ ga a hen wú kó; ahkuí gi, mauchut èq up‡ nyi bê yanmai, nungmoq é ahkyíng nghut nyi ri." ga taí ri.

### *Yesuq Lé, Petruq Èq He-ngik Pyâm É Hkyô*

*Mht 26:57-58, 67-75; Mrk 14:53-54, 66-72; Yhn 18:12-18, 25-27*

<sup>54</sup> Haú hkûn, yhangmoq gi, Yhang lé chyup yû mù she ló luí, hkyangjong mó é yhûm shut shuí wang ló akô. Petruq le we we mai châng tô ri. <sup>55</sup> Ahkuí, yhangmoq gi, wàng hkaú má myi mut yû luí zung tô bum é hkûn, Petruq le yhangmoq é ahkaú má bo tô ri.

<sup>56</sup> Langchyáng myhí rayuq gi, myihkyom yâm má Petruq zung tô é lé, myang kat mù, yhang lé rago wú tsuq to luí, "Shí yuq le Yesuq eq rahá nyi sù nghut ri." ga taí ri.

<sup>57</sup> Haú hkûn, Petruq gi, "Myiwe myhí ê, nàng taí é sù lé, ngò a sé." ga he pyâm ri.

<sup>58</sup> Hau htàng hkâ-myháng a myáng má, byù rayuq gi, yhang lé dum myàng luí, "Nàng le yhangmoq chyáng bo nyi sù nghut ri." ga taí kat jáng, Petruq gi, "Byù hpó ê, ngò a nghut." ga tû taí ri.

<sup>59</sup> Hkyíng hkum rahkum kô myáng jáng, rayuq le, "Gè gè yhang, shí yuq gi, Yhang eq rahá nyi wún sù nghut ri; haí mù gâ le, yhang gi, Galile byù le nghut ri." ga zuq zuq taí ri.

<sup>60</sup> Petruq gi, "Byù hpó ê, nàng taí nyi é hkyô lé, ngò a sé." ga tû taí ri. Haú su ga ru taí nyi ashí le, woq tân bê nghut ri. <sup>61</sup> Haú hkûn, Yesuq gi, lhîng luí, Petruq lé wú kat ri. Haú mù, Petruq gi, "Hkû-nyí lháng, woq a tân shi má, nàng Ngo lé sum dâm he pyám râ nghut lhè." ga luí, Yhumsîng yhang lé taí é dang lé bûn kat ri. <sup>62</sup> Haú mù, yhang gi, shinggan shut htoq ê luí, gyai yhang ê ngau nyi ri.

### *Gyezô Pé Yesuq Lé Rhoi É Hkyô*

<sup>63</sup> Yesuq lé zúng nyi é bang gi, Yhang lé rhoi luí nghap myíng nghap htê mu nyi akô. <sup>64</sup> Yhangmoq gi, Yhâng é myoqdong nghop pyám byi luí, "Nang lé bat sù gi, ó yuq nghut

† 22:42 góm gâ é gi, Yesuq jamjau hui râ hkyô eq shí râ hkyô lé, taí nau é nghut lhè. ‡ 22:53 Mauchut èq up gâ é gi, Tsadán èq up é lé gâ ri.

ri lhu? Myiqhtoi htoî wú aq." ga myî akô. <sup>65</sup> Yhangmoq gi, Yhang lé nyhap é dang ajung jung dông taî rhoi nyi akô.

*Suwún Wui É Hí Má Yesuq Jé Nyi É Hkyô*

*Mht 26:59-66; Mrk 14:55-64; Yhn 18:19-24*

<sup>66</sup> Napkyô myoqmyàng jáng, mingbyû wui é suwún hpúng bang eq rahá, hkyangjong agyi pé, tarâ sará pé, zup hpong kut nyi é má, Yesuq lé shuí ê mù, <sup>67</sup> "Nàng Hkrisduq nghut é têng le gi, ngamoq lé taî kyo laq." gâ akô.

Yesuq gi, "Ngò gi, Hkrisduq nghut lhê nghû taî kôlhang, nungmoq jing kó râ a nghut. <sup>68</sup> Ngò, nungmoq lé myi kôlhang, nungmoq gi, tû taî kó râ a nghut. <sup>69</sup> Nghut kôlhang, ahkuî mai haû Byu Yhangzo gi, a-tsam bo dik é Garai Gasâng é loqyò hkyam má wó zung nyi berâ nghut lhê." ga luî, yhangmoq lé taî ri.

<sup>70</sup> Haû hkûn, yhangmoq banshoq bang gi, "Haû nghut le gi, Nàng, Garai Gasâng é Yhangzo nghut lhê lhu?" ga myî akô.

Yesuq gi, "Nungmoq taî é eq rajung za Ngò nghut lhê." ga luî, yhangmoq lé tû taî ri.

<sup>71</sup> Haû hkûn, yhangmoq gi, "Nga-nhúng hai jung saksé wá râ nyi ashî lhu? Yhâng é nhut mai yhang, taî htoq kat é dang lé, nga-nhúng wó gyo bê nghut lhê." ga akô.

## 23

*Yesuq Lé Mara Hun É Hkyô*

*Mht 27:1-2, 11-14; Mrk 15:1-5; Yhn 18:28-38*

<sup>1</sup> Haû hkûn, zup zîng tô é bang banshoq gi, htoq mù, Yesuq lé mauzau Pilat chyáng shuí wang ê luî, <sup>2</sup> "Shí yuq gi, mingbyû wui lé hkyô shuí nghoq é eq, hkoséng Kehtaq chyáng kang kat râ hkyô lé le hkûm to luî, Yhânggùng yhang gi, haû Hkrisduq nghû é hkohkâm nghut lhê ga luî, taî nyi é lé ngamoq myang ri." ga luî, Yhang lé mara hun akô.

<sup>3</sup> Haû hkûn, Pilat gi, Yesuq lé, "Nàng gi, Yudaq byu pê é hkohkâm nghut lhê lhu?" ga myi jáng, Yesuq gi, "Nàng taî é eq rajung za nghut lhê." ga tû taî ri.

<sup>4</sup> Pilat gi, "Shí yuq lé hûn râ mara ngò a myàng." ga luî, hkyangjong agyi pé eq shiwa byu pé lé taî ri.

<sup>5</sup> Nghut kôlhang, haû bang gi, "Shí yuq gi, Yuda mau gón má yhang mhoqshit é dông mai, mingbyû wui é i-myt lé shuí gabyông ri. Haû gi, Galile mau mai ahkuî shî má jé shoq nghut bê nghut ri." ga zuq zuq taî bum akô.

<sup>6</sup> Pilat gi, haû su ga kô é lé wó gyo jáng, Yesuq Galile byù nghut é, a nghut é hkyô lé myî wú ri. <sup>7</sup> Yesuq gi, Herut up é mau mâ é byù nghut é lé Pilat sé jáng, haû u lé Yerusalem wà mó má nyi tô é Herut chyáng, ê dé kat nhang ri.

<sup>8</sup> Herut gi, Yesuq lé myàng jáng, gyai yhang gabú pyâm ri. Hkâsu mù gâ le, Yhâng é hkyô lé wó gyô wú mù, Yhang laklaí kumlhá ralhum lhum kut shit râ lé, wó myàng shoq ga, myit myoqbyu nyi é nghut luî, Yhang lé myàng nau é gyai yhang myáng bê nghut ri. <sup>9</sup> Haû mù, yhang gi, Yesuq lé dangmyi myo myô èq myî wú kôlhang, Yesuq gi, dang rahkun lhang a tû taî byi nghut ri. <sup>10</sup> Hkyangjong agyi pé eq tarâ sará pé gi, yap to mù, Yhang lé mara gyai yhang chôm hun akô. <sup>11</sup> Herut eq yhâng é gyezô pé gi, Yesuq lé rhoî jihkyoî kut mù, atam é dông taî hpoî kô luî, réng é mebu hut byi mù, Pilat chyáng dum taû dé nhang kat akô. <sup>12</sup> Haû nyi jáng, hí hpyang gyè dut lhûm é Herut eq Pilat gi, buinùm dut byuq bekô nghut ri.

*Yesuq Lé Sat Râ Matú Doqdân É Hkyô*

*Mht 27:15-26; Mrk 15:6-15; Yhn 18:39—19:16*

<sup>13</sup> Haû hkûn, Pilat gi, hkyangjong agyi pé eq zau suwún wui, mingbyû wui lé wut tsîng to mù, <sup>14</sup> "Shí yuq gi, mingbyû wui lé hkyô shuí nghoq ri ga, Yhang lé nungmoq ngá chyáng shuí lé lô bekô. Ahkuî, wú keq, nungmoq é hí má, Yhang lé ngò myî wú le, Yhang má nungmoq hun é mara lé ngò a myàng nghut ri. <sup>15</sup> Hau htoq agó, Herut le, hai mara le a myàng mù, shí yuq lé nga-nhúng chyáng dum dé kat byi bê nghut ri; haû mù luî, wú



keq, shí yuq gi, shí gíng é mara haí le a kut shut nghut ri. <sup>16</sup> Haú mù, ngò, Yhang lé dam byi luí, nhang pyám rã." ga luí, yhangmoq lé taí ri.

<sup>17</sup> Nghut kôlhãng, Lhoqlhai Poí hkãngmó má, Pilat gi, mingbyú wuì lé htongbyú rayuq yuq nhang kat byi byi kut é yanmai, <sup>18</sup> yhangmoq banshoq bang gi, "Shí yuq lé gi, yu pyám aq; Barabaq lé kúm gi, nhang kat byi laq." ga luí, chôm wut garu bum akô. <sup>19</sup> Barabaq gi, wã htum má gumlau kut é eq byù sat é yanmai, htóng gyó nyí sù nghut ri.

<sup>20</sup> Pilat gi, Yesuq lé nhang pyám nau é nghut mù luí, yhangmoq lé dum puq taí ri. <sup>21</sup> Nghut kôlhãng, yhangmoq gi, "Yhang lé tapzîng má jén tap pyám aq, jén tap pyám aq!" ga luí, wut taí garú nyi bum akô.

<sup>22</sup> Haú mù luí, sum dãm nghũ rã hkũn, Pilat dum taí é gi, "Haí mù luí lhu? Yhang gi, hai mara kut shut bê lhu? Yhang má shí gíng é mara lé ngò a myàng, haú mù, ngò, Yhang lé bat, nhuq, mhoqshit luí, nhang pyám rã." ga luí, yhangmoq lé taí ri.

<sup>23</sup> Yhangmoq gi, Yesuq lé tapzîng má wó jén sat pyám shoq ga, zuq zuq htê mó o mó èq dũng wut nyi akô nghut é yanmai, wó taí ung yù bekô nghut ri. <sup>24</sup> Haú mù luí, Pilat gi, yhangmoq dũng é eq rajung za myit hpyit doqdan byí ri. <sup>25</sup> Haú su mù, yhang gi, yhangmoq dũng é eq rajung za, wã htum má gumlau kut é eq byù sat é mai, htóng gyó nyí sù lé nhang kat byi luí; Yesuq lé gi, yhangmoq ô nau é dõng ap byi kat bê nghut ri.

#### *Yesuq Lé Tapzîng Htoq Má Jén Tap É Hkyô*

*Mht 27:31-44; Mrk 15:21-32; Yhn 19:17-27*

<sup>26</sup> Yhangmoq gi, Yesuq lé shuí htoq ló kô é hkũn, yosô wã mai lo é, Kuruni myuq byú nghut é Simun ga sù lé, chyup yù mù, tapzîng waq nhãng luí, Yesuq htãng má chãng nhang akô. <sup>27</sup> Byù rajum rayò gi, Yhang htãng má chãng e ló bum akô. Yhang é yanmai ngaubyi ngàu nhap eq iyon yôn é myiwe zo wuì le haú má bo tô ri. <sup>28</sup> Yesuq gi, yhangmoq shut lhîng wú luí, "Yerusalem byizo wuì ê, Ngá é yanmai hkã-ngau nyi kó, nungmoq gi, yhumsing gũng eq yhumsing é zo dù wuì é matú sheq ngau nyi keq. <sup>29</sup> Hkãsu mù gã le, 'Zogũng a dut wú é eq nau a huq wú é baũdung myhí pé gi, hkungsô wó nyi ri.' ga luí, taí é buinyi gi, jé lô rã nghut lhê. <sup>30</sup> Haú buinyi má, byu pé gi, bùm pé lé, 'Ngamoq ahtoq má byoq nhé aq!' ga luí le, kong pé lé,

'Ngamoq ahtoq má nghop aq!'

ga luí le, wut taí bùm bekô rã nghut lhê. <sup>31</sup> Byu pé gi, sikhãm jũm tô ashí le isu kut kô é nghut le gi, mản jãng gi, hkãsu wã dut lò rã lhu?" ga taí ri.

<sup>32</sup> Haú hkũn, damyaq í yuq lé le, sat pyám rã ga, Yesuq eq rahá shuí htoq ló akô. <sup>33</sup> Ahkuí, Ugyap nghu é kong má jé jãng, Yesuq lé tapzîng htoq má jén tap tô é hkũn, damyaq í yuq lé le, loqpai loqyò shut kut luí tapzîng má jén tap tô akô. <sup>34</sup> Haú hkũn, Yesuq gi, "Áwa ê, yhangmoq lé mara hkyut pyám byi laq; hkãsu mù gã le, yhangmoq kut é hkyô lé yhangmoq a sé kó nghut ri." ga taí ri. Gyezô pé gi, Yhãng é mebu pé lé lhãng, hkyín shosé she é dõng gam yu pyám byí akô.

<sup>35</sup> Mingbyú wuì gi, yap to mù tu wú nyi akô. Zau suwún wuì Yhang lé nyhap é gi, "Yhang gi, byù góbang lé hkyi yu é sù nghut ri. Yhang gi, Garai Gasang hkyín yu é sù Hkrisduq nghut le gi; Yhãnggũng yhang le hkyi yu wú shãng gaq." ga akô.

<sup>36</sup> Gyezô pé le, huí ê mù, rhoí nyaú nyaú akô. Yhangmoq gi, chyín wing lé yhun byi kôluí, <sup>37</sup> "Nàng gi, Yudaq byu pé é hkohkãm nghut é nghut le gi, Nãng gũng yhang nãng, hkyi yu wú aq." ga Yhang lé taí akô.

<sup>38</sup> Yhãng é ulhum ahtoq má le, (Grik dõng le, Latin dõng le, Hebre dõng le) "SHÍ YUQ GI, YUDAQ BYU PÊ É HKOHKÂM." gã é laiká kã tap tô akô.

<sup>39</sup> Tapzîng htoq má bat tap lhãng to huí é damyaq rayuq gi, "Nàng gi, Hkrisduq nghut lhê, a nghut lhu? Haú Nãng gũng nãng le, ngã-nhik lé le, hkyi yù aq." ga luí, Yhang lé rhoí ri.

<sup>40</sup> Damaq góyuq sù kúm gi, "Nàng le shí yuq eq rajung za jén tô é hui luí nhîng, Garai Gasang lé a gyuq lúhú? <sup>41</sup> Nga-nhik gi, yhumsîng kut shut é mara eq rajung za, jéyáng hui zo gíng é sù nhik nghut lhê; shí yuq kúm gi, hai mara lé kut shut wú sù a nghut." ga luí, haú yuq lé tân kat ri.

<sup>42</sup> Hau htâng, yhang Yesuq lé taí é gi, "Yesuq ê, Nàng, Náng é mingdán má jé ló jáng, ngo lé myit bun laq ô." gâ ri.

<sup>43</sup> Haú hkûn, Yesuq gi, "Ngò, nang lé teng za taí lé, hkû-nyí yhang nàng Ngò eq rahá hparadisu\* má nyi râ nghut lhê." ga luí, yhang lé tâ taí kat ri.

### *Yesuq Soqkang Byit É Hkyô*

*Mht 27:45-56; Mrk 15:33-41; Yhn 19:28-30*

<sup>44</sup> Haú ahkyíng gi, nyí káng raxe í hkyíng nghut luí, myinhtâng sum hkyíng jé shoq ramau gón mauchut tuq dut byuq bê nghut ri;† <sup>45</sup> hkâsu mù gâ le, builoq shum byuq é yanmai nghut ri. Noqkuq yhûm mâ é pán-gyang le, í hkyam byáng dut byuq bê nghut ri.

<sup>46</sup> Haú hkûn, Yesuq gi, "Áwa ê, Ngò, Ngá é woi-nyí náng é loq má ap byî lhê." ga htê mó èq garû kat ri. Haú su ga ban taí eq, Yhang kâng byit bê nghut ri.

<sup>47</sup> Shô up gyezau hpó gi, haú su dut é lé myàng jáng, "Shí yuq gi, gè gè yhang, dingmán sù nghut ri." ga luí, Garai Gasang lé hkya-on kungton ri. <sup>48</sup> Haú hkyô lé wú râ ga, lé zîng tô é byù lhunglhang bang le, haú su dut é hkyô pé lé myàng kôjáng, myit yón kôluí, wànggàng bat mù, dum taú ló byuq bekô. <sup>49</sup> Nghut kôlhang, Yhang lé sê é bang eq Galile mau mai Yhang htâng châng é myiwe wuì gi, we we má yap to mù, haú hkyô pé lé byu wú nyi akô.

### *Yesuq É Màng Lé Lup Hkaú Má Kat É Hkyô*

*Mht 27:57-61; Mrk 15:42-47; Yhn 19:38-42*

<sup>50</sup> Haú hkûn, Yuda mau Aramahti gâ é myuq má, Yosep gâ é sù rayuq nyi ri. Haú yuq gi, nhik bo é sù eq dingmán é sù nghut é htoq agó, Garai Gasang é mingdán jé râ hkyô lé myit myoqbyu to sù le, nghut mù luí, <sup>51</sup> yhang gi, Yudaq uphkâng hpúng mâ é rayuq nghut kôlhang, hpýé lhûm é hkyô má le, zui saí é hkyô má le, myit a bo huí lom é sù nghut ri. <sup>52</sup> Yhang gi, Pilat chyáng wàng luí, Yesuq é gungsôm lé dîng yu ri. <sup>53</sup> Haú mù, gungsôm haú lé tapzîng mai hkyut hkyô yù luí, pán yúng èq htup yup mù, ó lé lhang a kat wú shí é, luqgok lé kyûng tô é luqgok lup hkaú má kat tô ri. <sup>54</sup> Haú nyí gi, Hên Lajang Buinyi nghut luí, Bánno buinyi jé râ za nghut bê.

<sup>55</sup> Galile mau mai Yesuq eq rahá htoq lé lo é myiwe zo wuì le, Yosep htâng má châng ê luí, lup haú lé le, Yesuq é gungsôm lé le, hkâsu kut tô tô é lé, ê myang akô. <sup>56</sup> Hau htâng, yhangmoq gi, yhûm shut taú lò mù, Yesuq é gùng sôm lé but byi râ matú, namngón é jung eq mura xù lé hen tô akô. Bánno buinyi má kúm gi, tarâ joq é eq rajung za, yhangmoq yuban bân nyi bum akô nghut ri.

## 24

### *Yesuq, Dum Dui Toq É Hkyô*

*Mht 28:1-10; Mrk 16:1-8; Yhn 20:1-10*

<sup>1</sup> Bánno buinyi htang napsûn noq le, myiwe wuì gi, yhangmoq hen tô é namngón jung pé lé yu chûng mù, lup shut e ló akô. <sup>2</sup> Yhangmoq gi, lup mâ é luqhkum lêng bóng to lánng é lé, ê myâng kômù, <sup>3</sup> wang e wú kô le, haú Yhumsîng Yesuq é gungsôm lé, a myàng lo kó nghut ri. <sup>4</sup> Yhangmoq maú úng-âng nyi bùm kô é hkûn, radá dâm maulhap su duqbó é mebu wut é byù í yuq, yhangmoq é nàm má yap tô akô. <sup>5</sup> Haú mù, myiwe haú bang gi, gyuq dan bum kôluí, myigùng shut myoqdong ngóm gop tô bum é u lé, haú nhik gi, "Nungmoq gi, duì sù lé, shi to bâng chyáng haí mù ho nyi akô lúhú? <sup>6</sup> Yesuq gi, shí má a nyi lo; Yhang dui toq lo bê! Yhang gi, nungmoq eq rahá Galile mau má nyi tô ashî hkûn lé,

\* 23:43 Hparadisu nghu é gi, mauhkûng mingdán lé taí ri. † 23:44 Nga-nhûng é nyí káng raxe í hkyíng gi, Yudaq byù pè é napkýó hkyuq hkyíng nghut lhê; yhangmoq é gau hkyíng gi, nga-nhûng é myinhtâng sum hkyíng nghut bê.

<sup>7</sup> 'Haù Byu Yhangzo gi, yubak dap bâng é loq má ap pyâm é hui luî, tapzîng má jén sat to hui é htâng, sum nyí nghû é buinyì má lhoq dui toq yu é hui râ nghut lhê.' ga nungmoq lé taí tô é dang lé myit bun keq." ga luî, yhangmoq lé taí ri. <sup>8</sup> Haù hkûn, yhangmoq gi, Yesuq é dang lé bûn kat bekô nghut ri.

<sup>9</sup> Yhangmoq gi, lup mai dum taù lò mù, lagyo raxe rayuq eq gotû lhunglhâng bang lé, haù hkyô banshoq lo taí kyô akô. <sup>10</sup> Lagyo pé lé lo taí kyo bang gi, Magadalaq wà mâ é Mariq, Yoanaq, Yakuq é yhângnu Mariq eq, yhangmoq eq rahá nyi é myiwe góbang le nghut akô. <sup>11</sup> Lagyô pé kúm gi, yhangmoq é dang lé dangsôm su ngam pyám kôluî, a jîng byi kó nghut ri. <sup>12</sup> Nghut kôlhâng, Petruq gi, toq luî lup má din jé ê mù ngóm wú kat le, màng htup é pán leq tô é lé za myàng mù luî, haù su dut é hkyô lé maú é èq, yhûm shut dum taù lò byuq bê nghut ri.

### *Chángzo Í Yuq Lé Yesuq Htoq Shit É Hkyô*

*Mrk 16:12-13*

<sup>13</sup> Haù ra-nyí má za, Yesuq é chángzô pé mâ é í yuq gi, Yerusalem wà mó mai nyhit déng kô wê é Ema-u gâ é wà shut e ló akô. <sup>14</sup> Yhangnhik gi, dut laí ló é hkyô pé banshoq lé, rayuq eq rayuq taí lhûm nyi akô. <sup>15</sup> Yhangnhik gi, haù hkyô pé lé rayuq eq rayuq taí hpyê lhûm e ló kô le, Yesuq gi, yhangnhik chyáng jé lé lò mù, yhangnhik eq rahá sô nyi ri. <sup>16</sup> Nghut kôlhâng, yhangnhik gi, myoq hpuq hpuq pyám byí é hui kômù, Yhang lé a sê wú byuq kó nghut ri.

<sup>17</sup> Hau hkûn, Yesuq gi, yhangnhik lé, "Nungnhik hkyô so uchyang taí lhûm lé lo é gi, haí jung wá nghut akô lhú?" ga myi kat jáng, yhangnhik gi, myoqdong shûm kut luî, hkyîng yap tô akô. <sup>18</sup> Yhangnhik mâ é Hklupa gâ é sù gi, "Nàng gi, Yerusalem wà mó má lé bíng nyí luî nhîng, shí gyoro lé haù wà má dut lo é hkyô pé lé, a sê é bíng gi, Nàng baú za wá nghut lhê lhú?" ga myi kat ri.

<sup>19</sup> Yhang gi, "Haí jung lhú?" ga dum myí é hkûn lé, yhangnhik gi, "Nazaret wà byù Yesuq é hkyô nghut lhê; haù yuq gi, Garai Gasâng é hí má le, byù lhunglhâng bâng é hí má le, nhut shô hpaqchyí a-tsam eq hkyí loq a-tsam má wum-o bo é sù myiqhtoi nghut ri. <sup>20</sup> Nghut kôlhâng, hkyangjong agyi pé eq ngamoq é zau suwún wui èq haù yuq lé sat pyám rà matú ap byí pyám kômù, yhangmoq gi, Yhang lé tapzîng má jén sat pyám bekô nghut ri. <sup>21</sup> Ngamoq kúm gi, haù yuq lé, Israelaq byù myû lé hkyi yù râ sù nghut lhê nghû luî, myit myoqbyu nyi bum lhê. Nghut kôlhâng, haù su dut laí ló é gi, hkû-nyí sum nyí lhang bò bê. <sup>22</sup> Hau htoq agó, hkû-nap noq le, lup má ê wú é, ngamoq hpúng mâ é myiwe wui ra-am gi, ngamoq lé, lo lhoq maú akô. <sup>23</sup> Yhangmoq gi, Yesuq é gungsôm lé a myàng jáng dum taù lò mù, 'Haù Yhumsîng dui nyi ri.' ga luî, taí kyô é maumang lagyo htoq shit é shîng-rán lé, myang é hkyô lé lo taí kyô akô. <sup>24</sup> Haù mù, ngamoq é luzúm wui ra-am gi, lup má ê wú kô le, myiwe wui taí é eq rajung za, dut to lánng é lé ê myàng akô. Nghut kôlhâng, haù yuq lé gi, yhangmoq a myàng kó gâ." ga luî, Yhang lé taí kyô akô.

<sup>25</sup> Haù hkûn, Yhang gi, "Myiqhtoi pé taí é dang banshoq lé lumjîng râ matú, hpaqchyí a bo é eq ngha é sù nhik ê, <sup>26</sup> Hkrisduq gi, haù su é wuihke jamjau hkâm zô yu é htâng má sheq, Yhâng é hpungwup shîngkang má wó wang nyi to râ, a nghut kó lhú?" ga luî, yhangnhik lé myí ri. <sup>27</sup> Yhang gi, yhangnhik lé, Mosheq kê tô é eq myiqhtoi pé banshoq bang kê tô é Chyúmdang pé mai, Yhang má âng é dang banshoq é lichyúm lé, taí hpông kyô ri.

<sup>28</sup> Ahkuî, yhangmoq, haù nhik e ló é wà má chyâng lò kôjáng, Yesuq gi, laí ló râ su kut ri. <sup>29</sup> Haù hkûn, yhangnhik gi, "Nga-nhik eq rahá wang bíng sháng; hkâsu mù gâ le, buigyùm bê mù, mau le chut lô bê nghut ri." ga luî, Yhang lé wum kat chôm lung nyi akô. Haù mù luî, Yesuq gi, yhangnhik eq rahá wang bíng bê nghut ri.

<sup>30</sup> Yesuq gi, zang zo râ ga, yhangnhik eq rahá zung tô é hkûn, muk lé yù luî, jeju hkya-on mù, myhik hpé luî, yhangnhik lé gàm byí ri. <sup>31</sup> Haù hkûn, yhangnhik é myoq bóng lô luî, Yesuq nghut é lé bûn sé kat bekô. Yesuq kúm gi, yhangnhik chyáng mai byuq byuq bê nghut ri. <sup>32</sup> Haù mù, yhangnhik gi, "Yhang gi, hkyô má ngá-nhik eq dang nyo lhûm é

eq Chyúmdang é lichyúm taí hpóng shit é hkûn, ngá-nhik gi, i-myt unghkaû má, achyí aku dut bê a nghut lúhú?" ga luí, yhangnhik yhangchang taí lhûm akô.

<sup>33</sup> Yhangnhik gi, toq mù, radá dâm Yerusalem wà mó shut dum taû ló kô le, lagyo raxe rayuq eq, yhangmoq eq rahá nyi é bang zup míng to kô é lé ló myang akô. <sup>34</sup> Haú bang gi, "Haú Yhumsíng gi, teng za yhang dum dui toq ló bê; Simun lé lháng htoq shit bê nghut ri." ga taí lhûm nyi bum akô. <sup>35</sup> Haú hkûn, yhangnhik gi, hkyô má dut laí ló é hkyô pé eq, muk hpê é hkûn má Yesuq lé bûn sé kat é hkyô lé, taí kyô akô nghut ri.

*Chángzô Pé Lé Yesuq Htoq Shit É Hkyô*

*Mht 28:16-20; Mrk 16:14-18; Yhn 20:19-23; Lagyo 1:6-8*

<sup>36</sup> Yhangmoq haú hkyô lé chôm taí nyi tô bum ashí le, Yesuq gi, Yhang gûng yhang, yhangmoq é agùng má yap to luí, "Nungmoq nguínón yuqyo nyi sháng gaq." ga luí, yhangmoq lé taí ri.

<sup>37</sup> Yhangmoq kúm gi, gyuq dan byuq bùm kômù, sobyô lé myàng bê ga myit yu pyâm bum akô. <sup>38</sup> Haú mù luí, Yhang gi, "Nungmoq gi, haí mù dan nyi bum akô lúhú? Haí mù nungmoq é i-myt unghkaû má úng-âng nyi bum akô lúhú? <sup>39</sup> Ngá é loq eq Ngá é hkyí lé wú wú keq. Ngò yhang nghut nyi lhê. Ngo lé sop wú keq. Sobyô nghû é gi, ngo lé nungmoq myang é su, sho eq showui showang bo é a nghut." ga luí, yhangmoq lé taí kyô ri.

<sup>40</sup> Yhang gi, haú su ga taí mù, Yhâng é hkyí loq lé tûn shit ri. <sup>41</sup> Yhangmoq gi, gabú é eq maú nyi bùm kômù, a wó jíng shi dut tô é hkûn lé, Yesuq gi, "Nungmoq shí má zôhpo rajung jung wó akô lúhú?" ga luí, yhangmoq lé myi kat ri. <sup>42</sup> Haú hkûn, yhangmoq gi, nyhín nyhoq tô é ngozo rahtung lé, byí akô. <sup>43</sup> Yhang gi, haú lé yù mù, yhangmoq é hí má zô shit ri.

<sup>44</sup> Hau htâng, Yhang, yhangmoq lé taí é gi, "Mosheq é tarâ eq, myiqhtoi laiká pé má le, Hkya-on Kungtôn Laiká pé má le, Ngò èq séng luí kâ to má kâ to banshoq gi, dik râ chyat nghut lhê nghû luí, nungmoq eq rahá nyi to ashí hkûn lé, Ngò, nungmoq lé taí kyô tô é pé gi, shí nghut bê." ga taí ri.

<sup>45</sup> Hau htâng, Yhang gi, Chyúmdang pé lé sê gyo shoq ga, yhangmoq é i-myt hkum hpóng byí ri. <sup>46</sup> Haú mù, Yhang gi, "Hkrisduq gi, wúhke jamjau hui zo mù, sum nyí nghû râ buinyi má, shi é mai dum dui toq lô râ hkyô lé le, <sup>47</sup> Yerusalem wà mó mai hí luí, byù myû chângjup lé, Yhâng é myìng lé lang luí yubak mara hkyut pyám byi râ hkyô eq myit lhîng râ hkyô lé le, hko kyo râ hkyô lé, kâ to bê nghut ri. <sup>48</sup> Nungmoq gi, shí pé é saksé pé nghut nyi akô. <sup>49</sup> Ngá Wa byí tô é danggidíq\* lé, Ngò, nungmoq é ahtoq má nhang kat râ nghut lhê; nungmoq kúm gi, htoq tsáng myhâng má é wum-o a-tsam wó yu é buinyi jé shoq, Yerusalem wà mó má láng nyí keq." ga luí, yhangmoq lé taí ri.

*Yesuq Mauhkûng Shut Shuî Toq Yu Huí É Hkyô*

*Mrk 16:19-20; Lagyo 1:9-11*

<sup>50</sup> Hau htâng, Yhang gi, yhangmoq lé Behtani wà yàm shut shuî htoq ê mù, Yhâng é loq tu toq luí, shimân byí ri. <sup>51</sup> Haú su kut shimân byí nyi ashí le, Yhang gi, yhangmoq chyáng mai gâng ló byuq luí, mauhkûng shut shuî toq yu é hui bê nghut ri. <sup>52</sup> Yhangmoq kúm gi, Yhang lé noqkuq kômù luí, gyai gabú é myit èq Yerusalem wà mó shut dum taû ló akô. <sup>53</sup> Yhangmoq gi, noqkuq yhûm má nyi to mù, Garai Gasang lé hkya-on kungton nyi bum akô nghut ri.

\* 24:49 Ngá Wâ byi tô é danggidíq nghu é gi, Chyoyíung é Woi-nyí lé taí ri.

## YOHAN é Gabú Danglù Laiká (The Gospel of John)

### *Haù Mungdang, Xângzo Byù Gùng Lé Dut É Hkyô*

<sup>1</sup> A-nham sâng-hi má, Mungdang joq ri; Mungdang haù gi, Garai Gasang eq rahá nghut luí, haù Mungdang yhang Garai Gasang nghut ri. <sup>2</sup> Yhang gi, a-nham sâng-hi má, Garai Gasang eq rahá nghut nyi ri.

<sup>3</sup> Nyì mi-nyì, joq mijoq gi, Yhang đông mai hpan tô é chyat nghut lhê; Yhang đông mai a hpan é gi, haì lhang a joq nghut ri. <sup>4</sup> Asak chýungxe gi, Yhang má nghut lhê mù, asak haù gi, byu pê é matú maubó nghut ri. <sup>5</sup> Haù maubó gi, mauchut má duqbó byì nyì kôlhang, mauchut gi, haù lé a hap yù nghut ri. <sup>6</sup> Garai Gasang mai nhang kat é, Yohan gà é byù rayuq jé lé ri.

<sup>7</sup> Yhang gi, maubó haù eq sêng é hkyô lé, saksé hkám byi luí, yhang é yanmai byù lhunglhang bang wó lumjínng kó sháng gaq ga, saksé rayuq đông jé lé é sù nghut ri. <sup>8</sup> Yhang gi, haù maubó a nghut; maubó haù lé saksé hkám byi râ matú za sheq jé lé é ru nghut lhê. <sup>9</sup> Byù yuq jup lé duqbó byi é, maubó akying haù gi, mingkan htoq má jé nyi to bê.

<sup>10</sup> Yhang gi, mingkan htoq má nyi to bê nghut ri; mingkan lé gi, Yhang đông mai hpan tô é nghut kôlhang, mingkan haù gi, Yhang lé a wú sé nghut ri. <sup>11</sup> Yhang gi, yhumsîng mau má jé lé kôlhang, Yhâng é amyû pé gi, Yhang lé a lhom hap yù kó nghut ri. <sup>12</sup> Nghut kôlhang, Yhang gi, Yhang lé lhom hap yù luí, Yhâng é myìng lé lumjínng é bang lhunglhang lé, Garai Gasâng é yhangzô pé dut râ ahkáng byi bê nghut ri. <sup>13</sup> Haù bang gi, sui sho đông hku kat é le a nghut, byù ô nau é đông hku kat é le a nghut, gungsho ô nau é đông hku kat é le a nghut e za, Garai Gasang chyáng mai hku kat é bang ru nghut lhê.

<sup>14</sup> Haù Mungdang gi, xângzo byù gùng lé dut luí, ngamoq chyáng nyi wú bê nghut lhê. Ngamoq gi, haù jeju eq tengmán hkyô byíng tô é, Yhang é hpungwup shingkang lé myang wú bê nghut lhê; haù gi, haù Íwâ é zote rayuq đông, Yhang wó yu é hpungwup shingkang nghut ri.

<sup>15</sup> Wui-myhup Sará Yohan gi, Yhang eq sêng é hkyô lé saksé hkám é hkûn, garû taì é gi, "'Ngá é htâng má jé lé é Sù gi, ngá é hí mai nyi to bê sù nghut é yanmai, ngá htoq je gyaú sù nghut ri.' nghû, ngò taì é sù gi, shí yuq nghut bê." gâ ri. <sup>16</sup> Yhâng é gumjup é jeju ahkaù mai, nga-nhúng banshoq bang gi, shimân jeju lé ralhûm htoq ralhûm myang yu nyì bê nghut lhê. <sup>17</sup> Hkâsu mù gâ lé, haù jep é tarâ gi, Mosheq é loq đông mai byì é nghut lhê; jeju eq tengmán hkyô kúm gi, Yesuq Hkrisduq é yanmai lé joq é nghut lhê. <sup>18</sup> Garai Gasang lé, ó yuq èq le a myang wú wú é nghut lhê; nghut kôlhang, haù Íwâ é tanghkoí má lúng tô é, Yhang Zo zote gi, Garai Gasâng é gùng lé lhoq htoq shit bê nghut ri.

### *Wui-myhup Sará Yohan Hko Kyô É Hkyô*

*Mht 3:1-12; Mrk 1:1-8; Luk 3:15-17*

<sup>19</sup> Yerusalem và mó mâ é Yudaq byu pé gi, hkyangiông pé eq Lewiq byu pé lé, Yohan ó yuq nghut é hkyô myí nhang kat kô é hkûn, Yohan saksé hkám é gi, a-ô mâ é hkyô pé nghut ri. <sup>20</sup> Yhang gi, a hê a zaú tô e za, "Ngò gi, Hkrisduq\* a nghut." ga lhom taì kyô ri.

<sup>21</sup> Haù hkûn, yhangmoq gi, "Haù nghut jáng, nàng gi, ó yuq nghut lhê lú? Nàng gi, Eliyaq lú?" ga myi kôjáng, yhang gi, "A nghut." ga taì ri; "Nàng gi, haù Myiqhtoi nghut lhê lú?" ga dum myi kôjáng, yhang gi, "A nghut." ga tû taì ri.

\* 1:20 Grik dong Hkrisduq gâ é gi, xû but hui Sù gâ é lichyúm nghut mù, Hebre dong "Mesaia" gâ é eq rajung za nghut lhê.

<sup>22</sup> Haû mù, yhangmoq gi, "Ngamoq lé nhang kat bâng chyáng ló wó taî kyo râ matú, nàng gi, ó yuq nghut lhê lú? Náng gûng lé nàng hkâsu nghû lhê lú? Taî kyô wú laq." ga dum myî akô.

<sup>23</sup> Haú hkûn, Yohan gi, myiqhtoi Esai-aq é dang eq rajung za, "Ngò gi, haû yoso má, 'Yhumsing é matú hkyô lhoq nyhang to keq.' gâ é htê lé, garû taî é sù nghut lhê."✠ ga tû taî ri.

<sup>24</sup> Hparishe pé mai nhang kat é bang ra-am gi, yhang lé, <sup>25</sup> "Nàng gi, haû Hkrisduq le a nghut, Eliyaq le a nghut, Myiqhtoi le a nghut é nhîng, haî mù luî, wui-myhup hkám byi nyi lhê lú?" ga dangmyi myî akô.

<sup>26</sup> Haú hkûn, Yohan tû taî é gi, "Ngò gi, wui èq za wui-myhup hkám byi lhê; nghut kôlhang, nungmoq a sê é sù rayuq nungmoq chyáng yap tô ri. <sup>27</sup> Yhang gi, ngá htâng má lé é sù yuq nghut bê; ngò gi, Yhâng é hkyî-tsung tui lé hpyî râ lhang a gingdán é nghut ri." gâ ri.

<sup>28</sup> Shí pé banshoq gi, Yohan wui-myhup hkám byi nyi é, Yodan làng hé hpoq mâ é Behtani và má dut é hkyô pé chyat nghut ri.

#### *Yesuq Gi, Garai Gasâng É Sauzo Nghut É Hkyô*

<sup>29</sup> Hau htang nyí, Yohan gi, yhâng chyáng Yesuq lé lo nyi é lé myàng luî, taî é gi, "Mingkan byu pê é yubak mara lé yu pyám byî é Garai Gasâng é Sauzo lé, wú keq! <sup>30</sup> Shí yuq gi, 'Ngá é htâng má jé lé é Sù gi, ngá é hí má nyi bê sù nghut é yanmai, ngá htoq je gyaú Sù nghut ri.' nghû, ngò taî é sù yhang nghut bê. <sup>31</sup> Ngò gi, Yhang ó yuq nghut é lé a sê é nghut lhê, nghut kôlhang, Yhang lé, Israelaq byu pé wó sé kó sháng gaq nghû, ngò lé jé mù, wui èq wui-myhup hkám byi nyi é nghut lhê." gâ ri.

<sup>32</sup> Hau htâng, Yohan saksé hkâm é gi, "Haû Woi-nyí gi, mauhkûng mai hpûngkyui gunghkyâng sù é đông mai gyó lé mù, Yhâng chyáng lé nô tô é lé, ngò myàng ri. <sup>33</sup> Ngò gi, Yhang ó yuq nghut é lé a sê é nghut kôlhang, wui èq wui-myhup hkám byi râ matú, ngo lé nhang kat é Sù, ngo lé taî kyô é gi, 'Haû Woi-nyí gyó lé lô mù, ó yuq chyáng lé nô tô é lé, nàng myàng jáng, haú yuq gi, haû Chyoiyúng Woi-nyí má wui-myhup hkám byi râ sù nghut lhê.' gâ ri. <sup>34</sup> Haû eq rajung za ngò myàng bê nghut luî, shí yuq gi, Garai Gasâng é Yhangzo nghut lhê nghû, ngò saksé hkâm lhê." gâ ri.

#### *Sâng-hi Lhê É Chángzô Pé*

<sup>35</sup> Hau htang nyí, Yohan gi, yhâng é chángzô í yuq eq rahá, haú má dum nyi tô akô. <sup>36</sup> Haú hkûn, yhang gi, Yesuq laí ló nyi é lé myang kat jáng, "Hê, Garai Gasâng é sauzo lé, wú keq!" ga taî kat ri.

<sup>37</sup> Chángzô haû í yuq gi, yhang haû su gâ é lé wó gyo kôjáng, Yesuq é htâng cháng bekô nghut ri. <sup>38</sup> Yesuq gi, lhing wú kat le, yhangnhik châng tô é lé myàng luî, "Nungnhik haî o akô lú?" ga myi jáng, yhangnhik gi, "Rabai ê, Nàng hkâmá nyi lhê lú?" ga taú myi kat akô nghut ri. (Rabai gâ é gi, Sará gâ é lichyúm nghut lhê.)

<sup>39</sup> Haú hkûn, Yhang gi, "Lé keq, haû jáng, nungnhik myàng kó râ nghut lhê." ga tû taî ri.

(Haú-u gi, raxê hkyíng† kô nghut ri.) Haû mù luî, yhangnhik gi, châng ê mù, Yhang hkâmá nyi é lé, ê myàng kôluî, haú nyí buigyùm shoq, Yhang eq rahá ê nyi nyi akô nghut ri.

<sup>40</sup> Yohan taî é dang lé wó gyo luî, Yesuq htâng châng é su nhik mâ é rayuq gi, Simun Petruq é yhanggu Andre nghut ri. <sup>41</sup> Andre gi, yhangmang Simun lé hí myàng luî, "Nga-nhik gi, Mesaia lé myàng bê." ga yhang lé taí kyô ri. (Mesaia gâ é lichyúm gi, Hkrisduq gâ é nghut lhê.) <sup>42</sup> Hau htâng, yhang gi, yhangmang lé Yesuq chyáng shuí e ri.

Yesuq gi, Simun lé lhom myàng jáng, "Nàng gi, Yohan é yhangzo Simun nghut ri; Kehpa‡ gâ é myìng lé, nàng wó yû râ nghut lhê." ga taî ri. (Kehpa gâ é lichyúm gi, Petruq gâ é nghut lhê.)

✠ 1:23 Esai 40:3 † 1:39 Raxê hkyíng gi, myíntâng myi hkyíng záng ri. ‡ 1:42 Aramaik dang đông Kehpa gâ é eq Grik dang đông "Petruq" gâ é lichyúm gi, luqgok gâ é nghut lhê.

*Hpilip Eq Nahtanelaq Lé Hkyin Yu É Hkyô*

<sup>43</sup> Hau htang nyí, Yesuq gi, Galile mau shut ê râ matú, myit hpyit yû bê nghut ri. Yhang gi, Hpilip lé myàng jáng, "Ngá htâng cháng aq." ga tâi ri.

<sup>44</sup> Hpilip gi, Andre eq Petruq nhik nyi é Bet-saida và mó mâ é byù nghut ri. <sup>45</sup> Yhang gi, Nahtanelaq lé myàng jáng, "Mosheq mai tarâ laiká má kê tô é eq myiqhtoî pé mai le lhoq ang luí kê tô é sù, Yosep é yhangzo, Nazaret và byù Yesuq lé, ngamoq myàng bê." ga yhang lé tâi kyô ri.

<sup>46</sup> Haú hkûn, Nahtanelaq gi, "Nazaret và ô! Haú mai, ge é jung haí wa wó htoq lhê lhú?" ga myi jáng, Hpilip gi, "Ru lé wú aq." ga yhang lé tâi ri.

<sup>47</sup> Yesuq gi, Yhâng chyáng Nahtanelaq lé lo nyi é lé myàng jáng, yhang lé lhoq ang luí, "Wú keq, shí yuq gi, mhaú é myit a bo é sù, Israellaq byù akying rayuq nghut ri." ga tâi ri.

<sup>48</sup> Haú hkûn, Nahtanelaq gi, "Nàng, ngo lé hkâsu kut sê é lhú?" ga myi jáng, Yesuq gi, "Nang lé, Hpilip eq a wut yù shimá, nàng, maihpáng gâm ô má ru nyi tô ashí hkûn, Ngò, nang lé myàng bê nghut lhê." ga tâi ri.

<sup>49</sup> Haú mù, Nahtanelaq gi, "Rabai ê, Nàng gi, Garai Gasâng é Yhangzo nghut ri; Nàng gi, Israellaq byu pé é Hkohkâm le nghut ri." ga tâi ri.

<sup>50</sup> Haú hkûn, Yesuq gi, "Ngò, nang lé, maihpáng gâm ô má myang é nghû tâi kyô é yanmai, nàng lumjínghê a nghut lhú? Hau htoq je kê é muzó pé lé, nàng myàng râ nghut lhê." ga tâi ri. <sup>51</sup> Hau htâng, Yesuq xoq tâi é gi, "Ngò, nungmoq lé teng za tái kôlé, mauhkûng bóng lô luí, haú Byu Yhangzô ahtoq má, Garai Gasâng é maumang lagyô pé doq lô gyó lô kut nyí kê é lé, nungmoq myàng kó râ nghut lhê." gâ ri.

## 2

*Wuì Lé Tsibiyiq Wing Dut Nhang É Hkyô*

<sup>1</sup> Hau htâng, í nyí nghû râ nyí má, Galile mau mâ é Hkanaq và mó má, myiháng poí ralhum joq ri. Haú má Yesuq é yhângnu le, bo lom ri. <sup>2</sup> Yesuq eq Yhâng é chángzô pé lé le, myiháng poí haú má ji akô nghut ri. <sup>3</sup> Tsibiyiq wing jaú tûm to kê é hkûn, Yesuq é yhângnu gi, "Yhangmoq, tsibiyiq wing a wó lo kó nghut ri." ga, Yesuq lé tâi ri.

<sup>4</sup> Haú hkûn, Yesuq gi, "Ânu ê,\* haú, nàng gi, Ngò eq haí sêng lhê lhú? Ngá é ahkyíng a jé shi é nghut lhê." ga tâi ri.

<sup>5</sup> Nghut kôlhang, Yhâng nu gi, haú dui-nhâng zoshâng wuì lé, "Yhang haí tâi le, haí kut keq." ga tâi ri.

<sup>6</sup> Haú nàm má, í sum xê galan kê wang é luqgok wúng hkyuq cham joq tô ri; haú gi, Yudaq byu pé mai, lhoq san lhoq yúng hkíng é matú, chung é jung wúng nghut ri.

<sup>7</sup> Yesuq gi, haú dui-nhâng zoshâng wuì lé, "Wúng haú pé má wuì lhoq pyíng keq." ga tâi ri; haú mù, yhangmoq gi, wúng haú pé má byíng shoq shoq lhoq pyíng bekô nghut ri.

<sup>8</sup> Hau htâng, Yhang gi, yhangmoq lé, "Ahkuí, ratsuí hkû yù mù, poî-up lé yu lô byi keq." ga tái jáng, yhangmoq gi, yu lô byí akô nghut ri.

<sup>9</sup> Poî-up hpó gi, wuì mai dut é tsibiyiq wing haú lé, shuq chyam wú ri; wuì hkam é dui-nhâng zoshâng wuì gi, tsibiyiq wing haú hkâmai lo é hkyô lé sê to kôlhang, yhang gi, a sé nghut ri. Haú mù, yhang gi, lusik lé, ji yù luí, <sup>10</sup> "Yuq hkangmó gi, tsibiyiq wing mún lé hí jaú mù, bíng pé shuq gyí bùm jáng sheq, tsibiyiq wing apyâng lé ru yu htoq lhê; nghut kôlhang, nàng gi, nghâm é tsibiyiq wing lé, ahkuí jé shoq wó hkong tô ri-nhung!" ga tâi ri.

<sup>11</sup> Galile mau mâ é Hkanaq và mó má, Yesuq tûn shit é limik kumlhá gi, Yhang kut é limik kumlhá pé mâ é sâng-hi dàm nghut ri. Yhang gi, Yhâng é hpungwup shing kang lé, haú đông lhoq htoq shit é nghut mù luí, Yhâng é chángzô pé gi, Yhang lé lumjínghê bum akô nghut ri.

*Noqkuq Yhâm Lé Lhoq Sansêng Pyâm É Hkyô*

*Mht 21:12-13; Mrk 11:15-17; Luk 19:45-46*

\* 2:4 Ânu ê gâ é lé, Grik đông gi, "Myiwe myhí ê" ga bo tô é nghut lhê.

<sup>12</sup> Hau htâng má, Yesuq gi, Yhâng nu, Yhâng gu yuqzo pé eq Yhâng é chángzô pé le mù, Kaperna-um wà má gyó ló ri; yhangmoq gi, haú má buinyi myi ngò nyí nyi akô nghut ri.

<sup>13</sup> Yudaq byu pé é Lhoqlhai Poî jé râ nghut é hkûn, Yesuq gi, Yerusalem wà mó má doq ló ri. <sup>14</sup> Haú hkûn, noqkuq yhûm wàng má, nojûng, sau, hpûngkyui pé lé ûng nyi é bang lé le, siboî má ngùn htaí zô zung nyi é bang lé le, Yhang ló myàng ri. <sup>15</sup> Haú mù, Yhang gi, tui lé, nhuq râ wase saî yù mù, banshoq bang lé le, sau eq nojûng lé le, haú noqkuq yhûm wàng mai hkat htoq luí, ngùn htaí zo bâng é ngùn htingchap lé gi, tû hut pyám byi mù, yhangmoq é siboî lé gi, tu mhuq pyám byî ri; <sup>16</sup> haú hpûngkyui ung zô é bang lé le, "Zè shi pé lé yu htoq ló keq! Ngá Wâ é yhûm lé, hpugá jowò hkâkut kó!" ga luí nhik-yô ri.

<sup>17</sup> Haú mù, Yhâng é chángzô pé gi, "Ngò, Náng é yhûm lé chyitdap kâng tuí é hkyô gi, Ngo lé myi su nyhê jôm pyám râ nghut lhê." <sup>✠</sup> ga kâ tô é lé, myit bûn kat akô nghut ri.

<sup>18</sup> Yudaq byu pé gi, Yhang lé, "Nàng, shí pé kut râ ahko ahkáng wó é hkyô lé saksé tûn shit râ matú, ngamoq lé, haí jung limik kumlhá wó tûn shit râ lú?" ga chôm myí akô nghut ri.

<sup>19</sup> Haú hkûn, Yesuq gi, "Noqkuq yhûm shí lé nungmoq hpyoq pyám keq, sum nyí gyoro má, Ngò, haú lé dum tu shap râ nghut lhê." ga, yhangmoq lé tû taí ri.

<sup>20</sup> Haú Yudaq byu pé gi, "Noqkuq yhûm shí lé, myi xe hkyuq zân tup saî é ru nghut lhê; sum nyí gyoro má za, Nàng wó tu shap râ lú?" ga tu myí akô nghut ri. <sup>21</sup> Nghut kôlhang, Yesuq taí é noqkuq yhûm gi, Yhâng é gùng lé lhoq ang luí taí é nghut ri. <sup>22</sup> Haú mù, Yhang, shi é mai lhoq dui toq huí é hkûn sheq, Yhâng é chángzô pé gi, Yhang haú su ga taí é dang lé myit bun kômù, Chyúmdang lé le, Yesuq taí é dang pé lé le, lumjîng akô nghut ri.

<sup>23</sup> Haú Lhoqlhai Poî nghut é u lé, Yerusalem wà mó má Yesuq nyi nyi é hkûn, byù myo myo gi, Yhang kut shit é limik kumlhá pé lé myàng kômù, Yhang lé lumjîng bum akô nghut ri. <sup>24</sup> Nghut kôlhang, Yesuq gi, byù lhunglhang bâng é myit lé sê é yanmai, yhangmoq chyáng, Yhânggùng lé a ap to nghut ri. <sup>25</sup> Yhang gi, byu é i-myt unghkaú má haí lúng tô é lé sê é yanmai, byù yhangchang saksé hkám byî é a ra nghut ri.

### 3

#### *Nikodimu Lé, Yesuq Mhoqshit É Hkyô*

<sup>1</sup> Nikodimu gâ é Hparishe rayuq nyi ri; yhang gi, Yudaq byu pé é byìn tú wapdoq má bo é sù nghut ri. <sup>2</sup> Yhang gi, myín lé, Yesuq chyáng lé mù, "Rabai ê, Nàng gi, Garai Gasâng chyáng mai lé é sará rayuq nghut é lé, ngamoq sê lhê. Hkâsu mù gâ le, Nàng kut shit é limik kumlhá pé gi, Garai Gasang a lom é nghut jáng, ó yuq le wó kut râ a nghut." ga taí ri.

<sup>3</sup> Haú hkûn, Yesuq gi, yhang lé, "Ngò, nàng lé teng za taí kyo lé, ó yuq nghut kôle, dum hku é hui sù za a nghut le gi, Garai Gasâng é mingdán lé wó myâng râ a nghut." ga tû taí ri.

<sup>4</sup> Haú jáng, Nikodimu gi, "Ipyat kó bê é byù gi, dum hkû é hkâsu kut wó hui râ lú? Ínû é unghkaú má dum wàng mù, dum hku é hui râ gi, gè gè yhang wó dut râ a nghut!" ga taí ri.

<sup>5</sup> Haú hkûn, Yesuq gi, "Ngò, nàng lé teng za taí kyo lé, ó yuq nghut kôle, wui eq Woi-nyí mai hku kat é hui sù za a nghut le gi, Garai Gasâng é mingdán má wó wâng râ a nghut.

<sup>6</sup> Gungsho mai hku kat é gi, gungsho nghut ri; Woi-nyí mai hku kat é kúm gi, woi-nyí nghut ri. <sup>7</sup> 'Nungmoq gi, dum hku é hui râ lhê' nghû Ngò taí é dang lé, nàng hkâmaú nyí.

<sup>8</sup> Haú, laí gi, yhang nau é shut ló lhê. Laí lò htê lé nàng wó gyo kôlhang, laí hkâmai lo é eq, hká shut ló é lé, nàng sé râ a nghut; haú Woi-nyí mai hku kat huí é sù, ó yuq nghut kôle, haú eq rajung za nghut lhê." ga tû taí ri.

<sup>9</sup> Haú hkûn, Nikodimu gi, "Haú gi, hkâsu wó dut râ lú?" ga myí ri.

<sup>10</sup> Yesuq tû taí é gi, "Nàng gi, Israellaq byu pé é sará rayuq nghut to luí nhîng, haú hkyô pé lé a sê gyo lú? <sup>11</sup> Ngò, nang lé teng za taí kyo lé, ngamoq gi, ngamoq sê é hkyô lé

✠ 2:17 Hkya-on 69:9



taí mù, ngamoq myang wú bê lé saksé hkâm lhê; nghut kôlhang, nungmoq gi, ngamoq é saksé lé a hap yù kó nghut ri. <sup>12</sup> Ngò gi, nungmoq lé, mingkan eq sêng é hkyô lé taí kyô le lhang, a lumjínng kô é nghut le gi, mauhkúng mingdán eq sêng é hkyô lé taí kyô é nghut le gi, hkâsu kut wó lumjínng kó rà lhu? <sup>13</sup> Mauhkúng mingdán mai gyó lo é sù, haù Byu Yhangzo mai lai luí, mauhkúng mingdán má ó yuq lhang wó doq ló wú é a nghut. <sup>14</sup> Mosheq gi, yoso má lhangmuí lé tu shap tô é su, haù Byu Yhangzo le tu shap tô é hui ra rà nghut lhê. <sup>15</sup> Haù mù, haù Byu Yhangzo lé lumjínng é yuq hkangmó gi, ahtum abyuq é asak wó yù rà nghut lhê.

<sup>16</sup> Hkâsu mù gâ le, Garai Gasang gi, mingkan lé gyai yhang chyitdap é yanmai, Yhang Zo lé lumjínng é sù ó yuq nghut kôle, htên byoq é a huí e za, ahtum abyuq é asak wó yù sháng gaq ga, rayuq za é Yhâng é Zote lé byí pyám bê nghut ri. <sup>17</sup> Hkâsu mù gâ le, Garai Gasang gi, mingkan lé mara byi rà matú, Yhang Zo lé mingkan htoq má nhang kat é a nghut é za, Yhang é yanmai mingkan hkyi yu é hui rà matú sheq nhang kat é ru nghut lhê. <sup>18</sup> Yhang lé lumjínng é sù gi, mara byí é hui rà a nghut; nghut kôlhang, Yhang lé a lumjínng é sù kúm gi, Garai Gasang é Yhangzo zote lé a lumjínng é sù nghut é yanmai, mara byí é huí to gù bê nghut ri. <sup>19</sup> Maubó gi, mingkan htoq má lé jé to bê; nghut kôlhang, byu pé kut é hkyô gi, agè ashop hkyô nghut é yanmai, yhangmoq gi, maubó lé chyit rà malaí, mauchut lé chyit akô nghut ri; haù gi, mara byí é hui rà hkyô yhang nghut ri. <sup>20</sup> Agè ashop hkyô kut é sù ó yuq nghut kôle, maubó lé a nguì nghut ri; haù yuq gi, yhang kut é hkyô lhoq byông htoq kat rà lé gyuq é yanmai, haù maubó shut lé lô rà a nghut. <sup>21</sup> Nghut kôlhang, haù tengmán hkyô dòng asak dui é sù ó yuq le, yhumsîng kut é hkyô gi, Garai Gasang lom é hkyô lé, san za byu-myàng sháng gaq ga, haù maubó shut lé lo ri." gâ ri.

*Yesuq Eq Séng Luí, Wui-myhup Sará Yohan Saksé Hkâm É Hkyô*

<sup>22</sup> Hau htâng má, Yesuq gi, Yhâng é chángzô pé eq rahá, Yuda mau shut wang ló mù, haù má rayoq zo nyì luí, wui-myhup hkâm byí ri. <sup>23</sup> Haù u lé, Yohan gi, Salim nàm mâ é E-nun gâ é jowò má, wui gyai myo joq é yanmai, wui-myhup hkám byí nyi ri; byu pé gi, abyit alan lé lò kômù, wui-myhup lé hkâm yu nyi bum akô nghut ri. <sup>24</sup> (Haù gi, Yohan lé htóng a lhoq hkyó shí é hkun lhê é hkyô nghut ri.) <sup>25</sup> Haù hkún, Yohan é chángzô pé ram eq Yudaq byù rayuq gi, lhoq san lhoq yúng hking eq séng luí, dang htíng htíng lhúm bum akô nghut ri. <sup>26</sup> Hau htâng, yhangmoq gi, Yohan chyáng lé luí, "Rabai ê, Yodan làng hé hpoq shut nàng eq rahá nyì luí, nàng eq saksé hkám byí é Sù gi, ahkuí, wui-myhup hkám byí nyi é nghut mù, yuq hkangmó gi, Yhâng chyáng e bum akô nghut ri mhaí." ga, yhang lé taí akô.

<sup>27</sup> Haù eq séng luí, Yohan tû taí é gi, "Byù rayuq gi, mauhkúng mai byí é za a nghut jáng, haí le wó hap yù rà a nghut. <sup>28</sup> 'Ngò gi, Hkrisduq a nghut, Yhang é hí má nhang kat huí é sù za nghut lhê.' nghû, ngò taí é lé, nungmoq yhang saksé nghut bum akô. <sup>29</sup> Myisik wó é sù gi, lusik nghut ri. Lusik lé, lánng yap tô é luzúm hpó gi, lusik é htê lé wó gyô é yanmai, gyai yhang gabú nyi ri. Haù sù é gabú hkyô gi, ngá é gabú hkyô nghut mù, ngò má byíng jup nyi bê nghut ri. <sup>30</sup> Yhang gi, kô jat lò ra rà nghut lhê; ngò gi, yom ló ra rà nghut lhê.

<sup>31</sup> Ahtoq mai lé é Sù gi, lhunglhâng é ahtoq má nghut ri; myigùng htoq mâ é sù kúm gi, myigùng htoq eq sêng é nghut luí, myigùng htoq eq sêng é dòng za taí ri; mauhkúng mai lé é Sù gi, lhunglhâng é ahtoq má nghut ri. <sup>32</sup> Yhang gi, wó myàng wó gyô é hkyô lé, saksé hkám kôlhang, Yhang hkâm é saksé lé, ó yuq le a hap yù kó nghut ri. <sup>33</sup> Yhâng é saksé lé hap yu é sù kúm gi, haù Garai Gasang gi, tengmán sù nghut ri ga, saksé shit é sù nghut bê. <sup>34</sup> Garai Gasang eq nhang kat é hui Sù gi, Garai Gasang é mungdang lé taí ri; hkâsu mù gâ le, Garai Gasang gi, haù Woi-nyí lé, laké a kat e za byí é yanmai nghut ri. <sup>35</sup> Haù Îwa gi, Zo lé chyitdap luí, jung hkangmó lé Yhâng é loq má ap byi bê nghut ri. <sup>36</sup> Haù Zo lé lumjínng é sù ó yuq nghut kôle, ahtum abyuq é asak wó lhê; nghut kôlhang, haù Zo lé he-ngik pyám é sù ó yuq nghut kôle, asak haù lé myàng rà a nghut; hkâsu mù gâ le, Garai Gasang é nhikmo-yo hkyô gi, yhâng chyáng ru joq nyi ri." gâ ri.

## 4

*Yesuq Eq Samariq Myhí Huí É Hkyô*

<sup>1</sup> Yesuq gi, Yohan htoq má, chángzo je lhoq myô é eq wui-myhup hkám byí nyi ri gâ é hkyô lé, haú Hparishe pé wó gyô akô nghut ri. <sup>2</sup> (Nghut kôlhang, gè gè ga jáng, Yesuq gi, Yhang wui-myhup hkám byí é a nghut, Yhâng é chángzô pé sheq ru nghut akô.) <sup>3</sup> Haú hkyô lé, Yesuq sé jáng, Yhang gi, Yuda mau mai htoq mù, Galile mau shut dum taú ló bê nghut ri.

<sup>4</sup> Ahkuí, Yesuq gi, Samariq mau mai sô laí ló râ dut bê nghut ri. <sup>5</sup> Haú mù, Yhang gi, Yakup mai yhang zo Yosep lé byí é maumyí rajap eq chyâng lhûm é, Suhka ga myhîng é, Samariq mau mâ é wà mó rallhum má lo jé ri. <sup>6</sup> Haú má, Yakup é wuhtung le joq to luí, Yesuq gi, hkyô sô núg é yanmai, wuhtung hau é nàm má zung gyó tô ri. Haú u gi, nyí-káng raxe í hkyíng\* nghut bê nghut ri.

<sup>7</sup> Haú hkûn, Samariq myiwe myhí rayuq wuì lé hkam ri; Yesuq gi, yhang lé, "Ngo lé wuì byi shuq laq." ga taí ri. <sup>8</sup> (Haú u gi, Yhâng é chángzô pé, zoshuq wuì râ matú wà hkaú shut e byuq kô é ahkyíng nghut ri.)

<sup>9</sup> Haú Samariq myiwe myhí gi, Yhang lé, "Nàng gi, Yudaq byù rayuq nghut to luí nhîng, ngò Samariq myiwe myhí chyáng, haí mù shuq wuì dîng lhê lú?" ga taí ri. (Hkâsu mù gâ le, Yudaq byu pé gi, Samariq byu pé eq a zùm yap kó nghut ri.)

<sup>10</sup> Haú hkûn, Yesuq gi, yhang lé, "Nàng gi, haú Garai Gasâng é chyunghuq lé le, nang lé wuì dung sù ó yuq nghut é lé le, sê é nghut le gi, noq mai Yhang lé dîng tîngbán luí, Yhang gi, nang lé asak-wuì byi berâ nghut lhê." ga tû taí ri.

<sup>11</sup> Myiwe myhí haú gi, "Yhumsîng ê, Nàng gi, wuì hkâm râ zè haí le a wó, wuhtung le nik ri; haú asak-wuì lé, Nàng hkâmâ é wó yû râ lú?" <sup>12</sup> Ngamoq é îwa Yakup gi, ngamoq lé wuhtung shí byí to bê nghut lhê; yhang yhang le, yhang zo pé le, yhang rém é dusak pé le, wuhtung shí mâ é wuì shuq bekô nghut ri; Nàng gi, Yakup htoq je kô lhê lú?" ga Yhang lé taí ri.

<sup>13</sup> Yesuq gi, "Wuì shí lé shuq é sù ó yuq le, wuìshit é dum hui râ nghut lhê. <sup>14</sup> Nghut kôlhang, Ngò byí é wuì lé shuq é sù ó yuq nghut kôle, wuìshit é hkâ-nhám a hui lo râ nghut lhê. Ngò byí é wuì haú gi, haú yuq má, ahtum abyuq é asak matú wuìbúm dut râ nghut lhê." ga yhang lé tû taí ri.

<sup>15</sup> Myiwe myhí haú gi, Yhang lé, "Yhumsîng ê, ngò gi, wuì le a shit lo, shí má wuì hkâm le a lé ra lo sháng gaq, wuì haú ngo lé byi laq." ga taí ri.

<sup>16</sup> Haú hkûn, Yesuq gi, "Ló mù, nung làng lé ló wut lò aq." ga, yhang lé taí ri.

<sup>17</sup> Yhang gi, "Ngò, làng a wó." ga taí jáng, Yesuq gi, yhang lé, "Nàng, làng a wó gâ é gi, têng ri. <sup>18</sup> Hkâsu mù gâ le, nàng gi, yuqgè ngo yuq wó wú bê sù nghut ri; nàng, ahkuí wó tô é yuqgè le nung làng a nghut. Nàng gi, têng é dang taí bê nghut ri." ga taí ri.

<sup>19</sup> Haú hkûn, myiwe myhí haú gi, "Yhumsîng ê, Nàng gi, myiqhtoi rayuq nghut é hkyô lé, ngò wú sé bê. <sup>20</sup> Ngamoq é îchyí îwâ pé gi, bùm shí má noqkuq kô é nghut lhê; nghut kôlhang, nungmoq Yudaq byu pé gi, Yerusalem wà mó za noqkuq jowò nghut lhê ga taí akô nghut ri." ga taí ri.

<sup>21</sup> Haú hkûn, Yesuq taí é gi, "Myiwe myhí ê, Ngo lé jîng aq; bùm shí má le a nghut, Yerusalem wà mó má le a nghut e za, haú îwa lé noqkuq râ ahkyíng, jé lò nyi bê nghut ri. <sup>22</sup> Nungmoq Samariq byu pé gi, yhumsîng lháng a sê é lé, noqkuq akô; ngamoq kúm gi, ngamoq sê é lé noqkuq lhê; hkâsu mù gâ le, hkyi yù hkyô gi, Yudaq amyû mai lo é nghut lhê.† <sup>23</sup> Nghut kôlhang, haú têng é dîng noqkuq é bang gi, woi-nyí mai le, tengmán hkyô mai le, haú îwa lé noqkuq râ ahkyíng gi, jé lo nyi bê nghut luí, ahkuí lháng jé to bê nghut ri; hkâsu mù gâ le, haú îwa gi, haú su kut noqkuq é bang lé ô nau ri. <sup>24</sup> Garai Gasang gi,

\* 4:6 Nyí-káng raxe í hkyíng gi, Yudaq byu pé é hkyuq hkyíng nghut ri. † 4:22 Bun zo shí má, Yesuq taí nau é gi, hkyi yù hkyô lé, Garai Gasang gi, Yudaq byu pé dîng danggidiq byi to é nghut é lé taí nau é nghut ri.

woi-nyí nghut lhê; haû mù, Yhang lé noqkuq é bang gi, woi-nyí mai le, tengmán hkyô mai le, noqkuq ra râ nghut lhê." ga taí ri.

<sup>25</sup> Myiwe myhí haû gi, "Hkrisduq gâ é Mesaia jé lé râ nghut é lé gi, ngò sê lhê. Yhang jé lé jáng, nga-nhúng lé banshoq taí sân kyo râ nghut lhê." ga taí ri.

<sup>26</sup> Hau htâng, Yesuq gi, "Nàng eq dang nyo nyi é sù ngò gi, haú yuq nghut lhê." ga taí ri.

#### *Haû Chángzô Pé Dum Taû Jé Lo É Hkûn Lhê Hkyô*

<sup>27</sup> Haú u lé, Yhâng é chángzô pé gi, dum taû jé lo bum akô; yhangmoq gi, Yesuq, myiwe rayuq eq dáng nyo nyi é lé lo myàng luí, maú byuq bum akô. Nghut kôlhang, "Nàng, haí ô ri lhú?" ga le, "Haí mù Yhang eq dáng nyo nyi lhê lhú?" ga le, Yhang lé ó yuq a myi kó nghut ri.

<sup>28</sup> Hau htâng, myiwe myhí haû gi, yhâng é wuì yambú lé tô pyâm to luí, wà shut taû wang ló mù, wà byù wuì lé ló taí kyô é gi, <sup>29</sup> "Ngò kut lai lò bê hkyô pé lhunglhang lé, taí kyô é byù rayuq lé, lé wú keq! Yhang gi, Hkrisduq nghut lhê abe?" gâ ri. <sup>30</sup> Haû mù, yhangmoq gi, wà mai htoq lé luí, Yesuq chyáng lé lo bum akô nghut ri.

<sup>31</sup> Haú u lé, Yhâng é chángzô pé gi, Yhang lé, "Rabai ê, zoshuq zo aq." ga chôm taí akô.

<sup>32</sup> Haú hkûn, Yhang gi, yhangmoq lé, "Nungmoq a sê é jung zoshuq zo râ Ngò wó lhê." ga tû taí ri.

<sup>33</sup> Haû mù, Yhâng é chángzô pé gi, "Yhang lé, rayuq yuq eq zoshuq lé dé byí é abe?" ga, rayuq eq rayuq taí lhùm bum akô.

<sup>34</sup> Haú hkûn, Yesuq taí é gi, "Ngo lé nhang kat Sù ô nau é hkyô lé kut râ eq Yhâng é muzó jizó lé lhoq pán râ hkyô gi, Ngá é zoshuq nghut bê. <sup>35</sup> 'Kyôshu yoq jé râ gi, lhamó myi hkyap râ ashí.' ga, nungmoq lhaq taí lhê a nghut kó lhú? Ngò, nungmoq lé taí kôlé, nungmoq é myoq hpóng luí, haû yò pé má wú kat wú keq! Kyôshi gi, myhíng luí, kyô shu yoq gi, jé to bê nghut ri. <sup>36</sup> Haû kyô hkyô sù eq kyô shu sù gi, rahá wó gabú kó sháng gaq ga, ahkuí lhang, haû kyô shu sù gi, yhâng é zuihpau lé myang yù luí, ahtum abyuq é asak é matú, kyôshi shú tsíng to bê nghut ri. <sup>37</sup> Haû su mù, 'Rayuq gi, sân hkyó, góyuq gi, shú yù.' gâ é sanghkyang gi, têng ri. <sup>38</sup> Nungmoq a zui saí tô é jang má é shú yù râ matú, nungmoq lé Ngò nhang kat bê nghut lhê. Góbang gi, haú má wum kat zui saí to bê nghut mù, nungmoq gi, haú bang zui saí é akyû lé shu yù bekô nghut ri." gâ ri.

#### *Samariq Byù Myo Myo Lumjínng Kô É Hkyô*

<sup>39</sup> "Yhang gi, ngò kut lai lò bê hkyô lhunglhang lé, taí kyô ri." ga luí, myiwe myhí haû saksé hkâm é yanmai, haú wâ má é Samariq byù myo myo gi, Yesuq lé lumjínng bùm bekô nghut ri. <sup>40</sup> Haû mù, Samariq byu pé gi, Yesuq chyáng lé jé kômù, yhangmoq eq nyi râ matú, Yhang lé lung kô é yanmai, Yhang gi, í nyí bo nyi bê nghut ri. <sup>41</sup> Yhâng é dang pé é yanmai, byù myo myo gi, lumjínng bang dut jat lò bekô nghut ri.

<sup>42</sup> Yhangmoq gi, myiwe myhí haû lé, "Ahkuí, ngamoq lumjínng é gi, nàng taí é dang yanmai za a nghut lo; ngamoq yhang wó gyo bê nghut é htoq agó, shí yuq gi, gè gè yhang, mingkan é hkyi yù Sù nghut é lé, ngamoq sé bê nghut é yanmai nghut lhê." ga chôm taí akô nghut ri.

#### *Mingsuwún Hpó É Yhangzo Lé Lhoq Gê Byí É Hkyô*

##### *Mht 8:5-13; Luk 7:1-10*

<sup>43</sup> Í nyí lai jáng, Yesuq gi, haû mai Galile mau shut htoq e ló bê nghut ri. <sup>44</sup> "Myiqhtoi gi, yhumsing é mau má myoqdong a wó wú é nghut lhê." ga, Yesuq yhang saksé hkâm é nghut lhê. <sup>45</sup> Yesuq gi, Galile mau má jé é hkûn, Galile byu pé gi, Yhang lé lhom hkulum yu akô; yhangmoq gi, Yerusalem wà mó má, Lhoqlhai Poí ê lòm kô é nghut é yanmai, poí u lé, Yesuq kut é hkyô lhunglhang lé, myàng kô é bang nghut ri.

<sup>46</sup> Yesuq gi, Yhang mai haû wuì lé tsibiyiq wing dut nhang é, Galile mau má é Hkanaq wà mó má, ê dum kùm ri. Haû ming suwún rayuq é yhangzo yuqzo gi, Kaperna-um wà má no nyi ri. <sup>47</sup> Yesuq gi, Yuda mau mai Galile mau má jé lé bê gâ é hkyô lé, ming suwún

haù wó gyo jáng, yhang gi, Yesuq chyáng ê mù, shî-nò no nyi é yhangzo lé, lé lhoq gê byi râ matú, Yhang lé dúng tôngbán ri.

<sup>48</sup> Haù hkûn, Yesuq gi, yhang lé, "Byù nungmoq gi, limik kumlhá pé eq mauhpo muzó pé lé za a myàng kô é nghut le gi, hkâ-nhám lé lumjínng kó râ a nghut." ga taí ri.

<sup>49</sup> Mingsuwún haù gi, "Yhumsîng ê, ngá zo a shî shimá gyó lé laq." ga taí ri.

<sup>50</sup> Haù hkûn, Yesuq gi, "Nàng wó ló bê; nung zo byùn râ nghut lhê." ga tũ taí ri.

Suwún haù gi, Yesuq taí é dang haù lé gyô jínng luí, tau ló bê nghut ri. <sup>51</sup> Yhang gi, hkyô má ru nghut nyi ashî hkûn, yhâng é dui-nhâng zoshâng wuì gi, yhang lé lé hui luí, zoshâng haù gè byuq é hkyô, lé taí kyô akô nghut ri. <sup>52</sup> Yhang gi, yhang zo hkâ-nhám gè byuq é ahkyínng lé myi wú é hkûn, yhangmoq gi, "A-nyí nap nyí hkyuí rahkyínng má, gùng nyé é chàm ló byuq bê nghut ri." ga taí kyô akô.

<sup>53</sup> Haù hkûn, ahkyínng haù gi, "Nung zo byùn râ nghut lhê." ga, yhang lé, Yesuq taí é ahkyínng nghut é lé, haù yhângwa bûn sé bê nghut ri. Haù mù, yhang eq yhâng yhumbyu banshoq bang gi, lumjínng bekô nghut ri.

<sup>54</sup> Haù gi, Yesuq, Yuda mau mai Galile mau má lé jé é htâng, í dâm nghû râ dá kut shit é limik kumlhá nghut ri.

## 5

### *Wuìhtum Yàm Má, Nòhpyo Lhoq Gê Byí É Hkyô*

<sup>1</sup> Hau htâng a myáng má, Yudaq byu pé é poí ralhum joq é yanmai, Yesuq gi, Yerusalem và mó má doq ló ri. <sup>2</sup> Ahkuí, haù Yerusalem và mó é Sau Hkúmdong nàm má, Hebre myínng dông gi, Betzahta ga myhîng é wuìhtum ralhum joq ri; hau é lhîngkyuq má, jiropp ngo lhum joq tô ri. <sup>3</sup> Jirop haù pé má, myoqjit bang, hkyî hten bang, gùngjum shî bang ajùm ayò leq tô bum akô. (Haù bang gi, wuì dui nún râ lé lánng tô é bang nghut akô. <sup>4</sup> Hkâsu mù gâ le, haù Yhumsîng é maumang lagyo gyó lé lé kut mù, wuì lé, lé lhu nhún jáng, wuìhtum haù má hí wó wang é sũ gi, haí jung ana wa dap to kôlhang, ge byuq é huí é yanmai nghut ri.)\* <sup>5</sup> Súm xe shit zân tup no nyi é byù rayuq le, haù má bo tô ri. <sup>6</sup> Yesuq gi, haù yuq no leq tô é lé myàng mù, haù su no nyi é gyai myáng bê nghut é hkyô lé sé jáng, yhang lé, "Nàng, gè nau ri lhu?" ga myí ri.

<sup>7</sup> Nò sũ haù yuq gi, "Yhumsîng ê, wuì dui nún lo é hkûn, wuìhtum má wàng râ matú, ngo lé garúm râ byù ó a nyi; ngò wàng râ nghû jáng, góyuq hí, ngá hí má wàng wàng dut ri." ga tũ taí ri.

<sup>8</sup> Hau htâng, Yesuq gi, yhang lé, "Toq aq! Náng é taphkang yu chûng luí, sô ló aq." ga taí ri. <sup>9</sup> Haù yuq gi, radá dâm nò ge byuq bê nghut luí, yhâng é taphkang yù mù, sô ló bê nghut ri.

Haù nyí gi, Bánno buinyì nghut ri. <sup>10</sup> Haù mù, Yudaq byu pé gi, haù nò ge byuq é hui sũ lé, "Hkû-nyí gi, Bánno buinyì nyí nghut é yanmai, nàng, taphkang waq é gi, tarâ lu lai bê nghut ri." ga taí akô.

<sup>11</sup> Nghut kôlhang, yhang tũ taí é gi, "Haù ngo lé lhoq gê byi sũ gi, ngo lé, 'Náng é taphkang yu chûng mù, sô ló aq.' ga taí é nghut lhê." gâ ri.

<sup>12</sup> Haù mù, yhangmoq gi, "'Náng é taphkang yu chûng mù sô ló aq.' ga, nang lé taí é sũ gi, ó yuq wá nghut ri lhu?" ga myí akô.

<sup>13</sup> Nghut kôlhang, haù ó yuq nghut é lé, nò ge byuq é hui sũ gi, a châng sê kat nghut ri; hkâsu mù gâ le, Yesuq gi, haù má é byù moq mó má wang nyó ló byuq é yanmai nghut ri.

<sup>14</sup> Htâng má, Yesuq gi, haù yuq lé noqkuq yhûm má myàng jáng, "Wú aq, nàng wángzán bê nghut ri; hí lhê htoq má je wuìhke é hkyô a hui zo sháng gaq, mara hkâkut shut lo." ga luí, yhang lé taí ri. <sup>15</sup> Haù yuq gi, htoq ló mù, yhang lé lhoq gê byí é sũ gi, Yesuq nghut ri ga, Yudaq byu pé lé taí kyô ri.

### *Asak Wó Yũ Râ Hkyô*

\* 5:4 Bun zo 3 lhum mâ é ahtang túm eq bun zo 4 lhum gi, chyúmding myo myo má a bo é nghut lhê.

<sup>16</sup> Haû mù, Yudaq byu pé gi, Bánno buinyì nyí má, Yesuq, haû hkyô kut é yanmai, Yhang lé gunjang lo akô nghut ri. <sup>17</sup> Haû hkûn, Yesuq gi, yhangmoq lé, "Ngá Wa gi, hkûnyí jé shoq, hkâ-nhám le mù zû nyi é nghut mù, Ngò le mù zû nyi lhê." ga taí ri. <sup>18</sup> Haû mù luí, Yesuq gi, Bánno buinyì lé lhoq htên é htoq agó, Garai Gasang lé lhang, Yhâng Wa ga wut é đông, yhumsing gùng lé, Garai Gasang eq lhoq whuí é yanmai, Yudaq byu pé gi, Yhang lé sat pyám rã matú, je riyhang shikut lo akô nghut ri.

<sup>19</sup> Yesuq, yhangmoq lé tù taí é gi, "Ngò, nungmoq lé teng za taí kôlé, haû Zo gi, yhumsing é myit đông haí le a wó kut; Yhâng Wa kut é hkyô lé myang é gù za wó kut é nghut lhê; hkâsu mù gâ le, haû Íwa kut é hkyô lé za, haû Zo châng kut é yanmai nghut lhê. <sup>20</sup> Hkâsu mù gâ le, haû Íwa gi, Zo lé chyitdap é nghut luí, Yhang kut é hkyô lhunglhang, haû Zo lé tân shit ri; nungmoq maú hông shoq, shí pé htoq je ko é hkyô pé lé lhang, haû Zo lé tân shit shirã nghut lhê. <sup>21</sup> Haû Íwa gi, shí bê bang lé lhoq dui toq mù, yhangmoq lé asak byí é eq rajung za, haû Zo le, Yhang byí nau é bang lé, asak byi rã nghut lhê. <sup>22</sup> Hau htoq agó, haû Íwa lé hkunggã é eq rajung za, haû Zo lé le, lhunglhang bang hkungga kó sháng gaq ga, haû Íwa gi, ó yuq lé le a jéyáng e za, jéyáng é hkyô lhunglhang, haû Zo lé lum to bê nghut ri. <sup>23</sup> Haû Zo lé a hkunggã é sũ gi, haû Yhang lé nhang kat é sũ Íwa lé le, a hkunggã é sũ nghut ri.

<sup>24</sup> Ngò, nungmoq lé teng za taí kôlé, Ngá dang lé gyo luí, Ngo lé nhang kat é Sũ lé lumjín é sũ, ó yuq nghut kôle, mara byí é a hui e za, ahtum abyuq é asak wó é nghut lhê; haû yuq gi, shi é mai lut luí, asak ùi bê sũ nghut ri. <sup>25</sup> Ngò, nungmoq lé teng za taí kôlé, haû Garai Gasang é Yhangzô é htê lé, shi byuq bê bang wó gyo rã ahkyín gi, jé lo nyi bê nghut ri; ahkuí lhang jé to bê nghut ri. Htê haû lé gyô é bang gi, asak ùi kó rã nghut lhê. <sup>26</sup> Hkâsu mù gâ le, Garai Gasang gi, Yhânggùng má yhang, asak bo é eq rajung za, Yhang Zo lé le, Yhânggùng má yhang, asak bò nhang é yanmai nghut ri. <sup>27</sup> Hau htoq agó, Yhang gi, haû Byu Yhangzo nghut é yanmai, Garai Gasang gi, tarã jéyáng rã ahko ahkáng, Yhang lé byi bê nghut ri.

<sup>28</sup> Shí hkyô lé hkâ-maú hong nyi kó: lup pé má lúng tô é bang banshoq gi, Yhâng é htê lé wó gyo kôluí, htoq ló rã ahkyín jé lò rã nghut lhê. <sup>29</sup> Ge é hkyô kut é bang gi, asak ùi rã matú, ùi toq kó rã nghut lhê; agè ashop hkyô kut é bang gi, mara byí é hui zo rã matú, ùi toq kó rã nghut lhê. <sup>30</sup> Ngò gi, Ngá myit đông mai haí le a wó kut é nghut lhê; Ngò wó gyô yu é eq rajung za sheq, jéyáng é nghut luí, Ngò jéyáng é hkyô gi, tengmán lhê; hkâsu mù gâ le, Ngò gi, Ngò ô nau é đông châng é a nghut e za, Ngo lé nhang kat é Sũ ô nau é đông châng é sheq ru nghut lhê.

#### *Yesuq Eq Séng Luí, Saksé Hkâm É Hkyô*

<sup>31</sup> Ngá gùng lé ngò saksé hkâm é nghut jáng, ngò za saksé hkâm é hkyô gi, teng rã a nghut. <sup>32</sup> Ngá é hkyô lé saksé hkâm byí é Sũ (Ngá Wa) góyuq nyi lhê; Ngò eq séng luí, haû yuq hkâm é saksé gi, têng é hkyô lé, Ngò sê lhê.

<sup>33</sup> Nungmoq gi, Yohan<sup>†</sup> chyáng byù nhang kat wú bekô nghut ri; yhang gi, haû tengmán hkyô lé saksé hkâm byi bê nghut lhê. <sup>34</sup> Ngò gi, xângzo byu pé mai saksé hkâm byi rã lé, ra luí a nghut, nghut kôlhang, nungmoq hkyi yu é wó hui rã matú sheq, haû su nghu taí é ru nghut lhê. <sup>35</sup> Yohan gi, ùq nyi é myibung su ùqbó byí é nghut mù luí, nungmoq gi, haû ùqbó é hkaû má, rayoq zo ngón nau nyi akô nghut ri.

<sup>36</sup> Nghut kôlhang, Ngò wó é saksé gi, Yohan byí é saksé htoq je kô lhê; hkâsu mù gâ le, ahkuí Ngò zui saí nyi é muzó gi, Ngò lhoq pán rã matú, haû Íwa, Ngo lé ap byí tô é nghut luí, haû Íwa, Ngo lé nhang kat é hkyô lé, saksé hkâm byi nyi ri. <sup>37</sup> Hau htoq agó, haû Ngo lé nhang kat é sũ Íwa le, Ngò eq séng luí saksé hkâm byi ri; nungmoq gi, Yhâng é htê lé le, a wó gyô wú kó; Yhâng é gunghkyâng lé le, a myang wú kó; <sup>38</sup> haû Yhâng é mungdang le, nungmoq chyáng a bò kó nghut ri; hkâsu mù gâ le, nungmoq gi, Yhang nhang kat é Sũ lé a lumjín kô é yanmai nghut ri. <sup>39</sup> Nungmoq gi, haû Chyúmdang mai ahtum abyuq é

<sup>†</sup> 5:33 Yohan shí yuq gi, Wui-myhup Sará Yohan nghut lhê.

asak wó yû râ nghut lhê ga myit yù kô é yanmai, haû Chyúmdang má ho wú akô nghut ri; nghut kôlhang, Chyúmdang haû gi, Ngò eq séng luí saksé hkám byî ri; <sup>40</sup> nghut kôlhang, asak wó yû râ matú, nungmoq gi, Ngá chyáng a kâm lé kó nghut ri.

<sup>41</sup> Ngò gi, byu eq hkya-ôn é lé a lhom yu é nghut lhê. <sup>42</sup> Nghut kôlhang, nungmoq lé gi, Ngò sê lhê; nungmoq é i-myit hkaû má, Garai Gasang lé chyitdap é myit a bò kó nghut ri. <sup>43</sup> Ngò gi, Ngá Wá é mying mai jé lé é sù nghut kôlhang, nungmoq gi, Ngo lé a lhom hap yù kó; yhang mying yhang lang é byù, gotû rayuq jé lé é ru nghut le gi, haú yuq lé, nungmoq lhom hap yù kó râ nghut lhê. <sup>44</sup> Nungmoq gi, rayuq eq rayuq hkya-ôn lhum é lé za hap yù luí, rayuq za nghut é Garai Gasang chyáng mai lo é hkya-ôn hkyô lé gi, a hô kô é bang nhing, hkâsu kut wó lumjing kó râ lú?

<sup>45</sup> Nghut kôlhang, haû Íwâ é hí má, Ngò, nungmoq lé mara hûn nhô hkâ-ngâm kó; nungmoq lé mara hun é sù gi, haû nungmoq mai myit myoqbyu tô é Mosheq ru nghut lhê. <sup>46</sup> Mosheq lé nungmoq gè gè yhang lumjing kô é ru nghut le gi, Ngo lé le lumjing kó râ nghut lhê; hkâsu mù gâ le, Mosheq gi, Ngá é hkyô lé kê tô é sù nghut ri. <sup>47</sup> Nghut kôlhang, nungmoq gi, yhang kê tô é pé lé lhang a lumjing kô é nhing, Ngá dang lé, hkâsu kut wó lumjing kó râ lú?" gâ ri.

## 6

*Byù Ngo Hkying Lé Zoshuq Byi Tsô É Hkyô*

*Mht 14:13-21; Mrk 6:30-44; Luk 9:10-17*

<sup>1</sup> Hau htang a myang má, Yesuq gi, Tiberi nhong le gâ é, Galile nhong he hpoq shut gû dap ló bê nghut ri. <sup>2</sup> Haú hkûn, byù ajùm ayò gi, haû nò bang htoq má, Yhang kut shit é limik kumlhá pé lé myang kô é yanmai, Yhang htang châng e ló bum akô nghut ri. <sup>3</sup> Yesuq gi, bùm shut doq ló mù, Yhang é chángzô pé eq rahá zung tô ri. <sup>4</sup> Yudaq byu pé é Lhoqlhai Poí gi, chyâng lo nyi bê nghut ri.

<sup>5</sup> Yesuq gi, tu wú kat le, byù ajùm ayò Yhang shut lé lo bùm kô é lé byu-myang kat luí, Hpilip lé, "Shí bang zo râ muk, nga-nhung, hkâmá ê wó wuî râ lú?" ga taí ri. <sup>6</sup> Yesuq, haû su ga taí é gi, yhang lé chyam wú râ matú za nghut ri; hkâsu mù gâ le, hkâsu kut râ hkyô gi, Yhang é myit má bo to gù bê nghut ri.

<sup>7</sup> Hpilip gi, Yhang lé, "Denari\* í sho eq muk wui le lhang, rayuq ratsuí tsuí ngap râ a nghut." ga tû taí ri.

<sup>8</sup> Haú hkûn, Yhang é chángzo nghut é, Simun Petruq é yhanggu Andre gi, Yhang lé, <sup>9</sup> "Muk-yo muk ngo long eq ngozo í du wó é yuqgè zo rayuq, shî má nyi ri; nghut kôlhang, byù shí myhô bang lé luq shoq, hkâsu kut wó gâm byi râ lú?" ga taí htoq kat ri.

<sup>10</sup> Yesuq gi, "Haû shiwa byu pé lé, zùng nhâng keq." ga taí ri. Jowò haû gi, mhán htu é jang nghut mù, yuqgè wuî baú lhang, ngo hkying kô zung tô bùm bekô nghut ri; <sup>11</sup> hau htang, Yesuq gi, muk long pé lé yù mù, jeju hkya-on luí, zung tô é bang lé, yhangmoq o é myhó tsing gâm byî ri. Haû eq rajung za, ngozo lé le haû su kut ri.

<sup>12</sup> Yhangmoq banshoq bang zô gyî bùm kô é htang má Yhang gi, Yhang é chángzô pé lé, "Myit gyó tô é ajap azo pé lé châng guq tsing yù keq. Haí le a langsâ pyám sháng gaq." ga taí ri. <sup>13</sup> Haû mù, yhangmoq gi, zô myhit tô é muk-yo muk ngo long mâ é ajap azo pé lé châng guq tsing le, raxe í mung bying shoq wó guq tsing yu akô nghut ri.

<sup>14</sup> Haû shiwa byu pé gi, Yesuq kut é limik kumlhá lé myang kô é hkûn, "Shí yuq gi, mingkan htoq má jé lé lô râ gâ é, Myiqhtoi yhang nghut ri-nhung!" ga taí bum akô.

<sup>15</sup> Yesuq gi, yhangmoq lé mù, Yhang lé khokâm zik kut nhâng kó râ dâ é hkyô lé, sê é yanmai, Yhang baú tsik za bùm shut dum haq doq ló bê nghut ri.

*Yesuq, Wuî Htoq Má Sô É Hkyô*

*Mht 14:22-27; Mrk 6:45-52*

<sup>16</sup> Buigyum htang, Yhang é chángzô pé gi, haû nhong shut gyó ló mù, <sup>17</sup> lhaí má wang ji luí, nhong hé hpoq mâ é Kaperna-um wà shut gû e ló akô; haú hkûn, mauchut bê nghut

\* 6:7 Denari rachap gi, byù rayuq é ra-nyí é zuìhpau eq wuî é nghut lhê.

kôlhang, Yesuq gi, yhangmoq chyáng a jé gyó lo shi nghut ri. <sup>18</sup> Haú u lé, laidun htan lo é yanmai, wuìlhêng toq lô bê nghut ri. <sup>19</sup> Yhangmoq gi, sum myi déng kô lhaî kôn e lô kô é hkûn, Yesuq gi, nhông htoq má so luî, haú lhaî shut chyâng lé lo nyi é lé myàng kômù, gyuq dan bùm bekô nghut ri. <sup>20</sup> Nghut kôlhang, Yesuq gi, "Hkâgyuq kó, Ngò ru nghut lhê." ga yhangmoq lé taí ri. <sup>21</sup> Haú mù, yhangmoq gi, Yesuq lé gabú myit èq lhaî hkaú má shuî hâng yù nau akô. Haú hkûn, lhaî haú gi, radá dâm yhangmoq jé nau é jang wuiyàm má jé bê nghut ri.

<sup>22</sup> Nhông hé hpoq má nyi tô é byù moq mó gi, haú má lhaî racham za joq lai lo é hkyô eq, lhaî haú má Yesuq a bo doq jí e za, chángzô pé baú ji htoq lô kô é hkyô lé, hau htang nyí, bûn sê kat akô nghut ri. <sup>23</sup> Haú hkûn, haú Yhumsîng, jeju hkya-ôn é htâng, byu pé muk zô é jowò nàm má, Tiberi myuq mâ é lhaî pé jé lé bum ri. <sup>24</sup> Haú byù moq mó gi, Yesuq eq Yhâng é chángzô pé, haú má a nyi lo kô é hkyô lé sé kô é yanmai, Yesuq lé châng hô râ matú lhaî haú pé má wang ji mù, Kaperna-um wà shut e lô akô nghut ri.

### *Yesuq, Asak Muk Nghut É Hkyô*

<sup>25</sup> Yhangmoq gi, nhông hé hpoq má Yesuq lé myàng kôjáng, "Rabai ê, Nàng gi, shî má hkâ-nhám jé lé é lhu?" ga, Yhang lé myî akô.

<sup>26</sup> Haú hkûn, Yesuq gi, "Ngò, nungmoq lé teng za taí kôlé, nungmoq gi, limik kumlhá pé lé myàng kô é yanmai, Ngo lé hô kô é a nghut, muk gyi shoq myàng zo kô é yanmai sheq, hô kô é ru nghut lhê. <sup>27</sup> Htên byuq sê é zoshuq é matú, hkâshikut kó; haú Byu Yhangzo byi râ nghut é ahtum abyuq é asak é matú, ru gîng nyi é zoshuq wó yù râ lé sheq shikut nyi keq. Yhâng chyáng gi, haú Îwa Garai Gasang mai Yhâng é saksé dizik tap to bê nghut lhê." ga tû taí ri.

<sup>28</sup> Haú mù, yhangmoq gi, "Garai Gasang ô nau é muzó pé zui saí râ matú, ngamoq haí kut ra râ lhu?" ga Yhang lé myî akô.

<sup>29</sup> Haú hkûn, Yesuq gi, "Garai Gasang nhang kat é Sû lé, lumjîng é gi, Garai Gasang ô nau é muzó nghut bê." ga tû taí ri.

<sup>30</sup> Haú mù luî, yhangmoq gi, Yhang lé, "Ngamoq myoq èq wó myâng luî, Nàng lé lumjîng râ matú, Nàng, haí jung limik kumlhá kut shit râ lhu? Nàng, haí jung kut shit râ lhu? <sup>31</sup> Haú Chyúmdang má, 'Yhang gi, yhangmoq zo râ matú, mauhkûng mai muk byî ri.'<sup>☆</sup> ga kê tô é eq rajung za, ngamoq é îchyî îwa pé gi, haú yoso hkaú má mannaq muk zo bekô nghut lhê." ga taí akô.

<sup>32</sup> Haú hkûn, Yesuq gi, yhangmoq lé, "Ngò, nungmoq lé teng za taí kôlé, nungmoq lé mauhkûng mai muk byî é Sû gi, Mosheq a nghut, haú Ngá Wa sheq, nungmoq lé mauhkûng mai tengmán é muk byî é Sû ru nghut lhê. <sup>33</sup> Hkâsu mù gâ le, Garai Gasang byî é muk gi, mauhkûng mai gyó lé luî, haú mingkan lé asak byî é Sû nghut lhê." ga taí ri.

<sup>34</sup> Yhangmoq gi, "Yhumsîng ê, ahkuî mai, ngamoq lé muk haú hkâ-nhám le byî nyi laq." ga chòm taí bum akô.

<sup>35</sup> Haú mù, Yesuq taí kyô é gi, "Ngò gi, asak muk nghut lhê. Ngá chyáng lé é sù gi, hkâ-nhám le zòmut é hui râ a nghut; Ngo lé lumjîng é sù le, hkâ-nhám le wuìshit é hui râ a nghut. <sup>36</sup> Nghut kôlhang, Ngò, nungmoq lé taí wú bê eq rajung za, nungmoq gi, Ngo lé myang wú é nghut kôlhang, a lumjîng shi kó nghut ri. <sup>37</sup> Haú Îwa mai Ngo lé ap byî tô é byù lhunglhang bang gi, Ngá chyáng lé kó râ nghut luî, Ngá chyáng lé é sù ó yuq lé le, Ngò gi, hkâ-nhám lé hkat htoq pyám râ a nghut. <sup>38</sup> Hkâsu mù gâ le, Ngò, mauhkûng mai gyó lé é gi, Ngò ô nau é hkyô lé kut râ matú a nghut e za, Ngo lé nhang kat Sû ô nau é hkyô lé kut râ matú ru nghut lhê. <sup>39</sup> Haú Ngo lé nhang kat Sû ô nau é hkyô gi, Yhang mai Ngo lé ap byî tô é bang mâ é rayuq lé lhang, Ngò, a lhoq hpyuq pyâm e za, jiltâm buinyi má yhangmoq lé dum lhoq dui toq yù râ matú ru nghut lhê. <sup>40</sup> Hkâsu mù gâ le, Ngá Wa ô nau é hkyô gi, haú Zo lé wú mù, Yhang lé lumjîng é sù yuq hkangmó, ahtum abyuq é

☆ 6:31 Htoq Lô 16:4

asak lé wó yû râ matú nghut lhê; Ngò le, jìhtùm buinyì má háu bang lé lhoq dui toq râ nghut lhê." gâ ri.

<sup>41</sup> Haû mù, "Ngò gi, mauhkûng mai gyó lé é muk nghut lhê." ga, Yesuq taí é yanmai, Yhang eq séng luí, Yudaq byu pé taí put kô é gi, <sup>42</sup> "Shí yuq gi, Yosep é yhangzo Yesuq a nghut lhi? Yhâng nu Yhâng wa lé, nga-nhúng sê lhê a nghut kó lhú? Haû sù é nhíng, ahkuí, 'Ngò gi, mauhkûng mai gyó lé é nghut lhê.' ga, Yhang hkâsu kut wó taí lhê lhú?" gâ bum akô.

<sup>43</sup> Haû hkûn, Yesuq gi, "Nungmoq ahkaû má hkâtaí put nyì kó. <sup>44</sup> Haû Ngo lé nhang kat é sù Íwa mai shuí jé é sù za a nghut jáng, ó yuq le Ngá chyáng wó jé lé râ a nghut; jé lé é sù lé gi, jìhtùm buinyì má, Ngò lhoq dui toq râ nghut lhê. <sup>45</sup> Myiqhtoi laiká pé má, 'Yhangmoq lunglhang bang gi, Garai Gasâng èq mhoq byí é hui kó râ nghut lhê.'<sup>☆</sup> ga kâ tô é eq rajung za, háu Íwa chyáng mai gyo yù, mhoq yu é bang yuq hkangmó gi, Ngá chyáng lé kó râ nghut lhê. <sup>46</sup> Haû gi, rayuq yuq mai, háu Íwa lé myang wú bê nghû nau é a nghut; Garai Gasâng chyáng mâ é Sù za sheq, háu Íwa lé myang wú é Sù nghut lhê. <sup>47</sup> Ngò, nungmoq lé teng za taí kôlé, lumjíng é sù gi, ahtum abyuq é asak wó lhê. <sup>48</sup> Ngò gi, asak muk nghut lhê. <sup>49</sup> Nungmoq é íchýí íwâ pé gi, háu yoso hkaû má mannaq muk zo bekô nghut lhê; nghut kôle, shi byuq bekô nghut ri. <sup>50</sup> Nghut kôlhang, shí gi, mauhkûng mai gyó lé lo é muk nghut lhê; háu lé zô é sù gi, a shí lo râ nghut lhê. <sup>51</sup> Ngò gi, mauhkûng mai gyó lé lo é, háu asak dui é muk nghut lhê; rayuq yuq, muk shí lé zô é nghut le gi, ahtum abyuq dui nyì râ nghut lhê; muk shí gi, mingkan zô wui é asak matú, Ngò byi râ nghut é Ngá gungsho nghut lhê." ga tû taí ri.

<sup>52</sup> Haû mù, háu Yudaq byu pé gi, "Byù shí yuq gi, nga-nhúng lé, Yhâng é gungsho hkâsu kut wó byi tso râ lhú?" ga, yhangmoq yhangchang dang htíng htíng lhum bum akô.

<sup>53</sup> Haû hkûn, Yesuq gi, yhangmoq lé, "Ngò, nungmoq lé teng za taí kôlé, háu Byu Yhangzô é gungsho lé zô é eq Yhâng é sui lé shuq e za a nghut le gi, nungmoq asak wó kó râ a nghut. <sup>54</sup> Ngá é gungsho lé zô é eq Ngá é sui lé shuq é sù, ó yuq nghut kôle, ahtum abyuq é asak wó é nghut lhê; Ngò gi, jìhtùm buinyì má, háu yuq lé lhoq dui toq yû râ nghut lhê. <sup>55</sup> Hkâsu mù gâ le, Ngá é gungsho gi, zojung yhang nghut lhê; Ngá é sui gi, shuqjung yhang nghut lhê. <sup>56</sup> Ngá é gungsho lé zô é eq Ngá é sui shuq é sù, ó yuq nghut kôle, Ngò má nghut nyí luí, Ngò le háu yuq má nghut nyí bê nghut lhê. <sup>57</sup> Haû rû dui nyi é Íwa gi, Ngo lé nhang kat luí, Ngò gi, háu Íwâ é yanmai, dui nyi é eq rajung za, Ngá é gungsho lé zô é sù gi, Ngá é yanmai, dui nyi râ nghut lhê. <sup>58</sup> Shí gi, mauhkûng mai gyó lé lo é muk nghut lhê. Nungmoq é íchýí íwâ pé gi, mannaq muk zo kôle, shi byuq bekô nghut ri; nghut kôlhang, muk shí lé zô é sù gi, ahtum abyuq dui nyi râ nghut lhê." ga taí ri. <sup>59</sup> Dang háu pé gi, Yesuq, Kaperna-um wâ mâ é tarajong má mhoqshit nyi é u lé, taí é dang nghut ri.

#### *Chángzô Pé Myo Myo, Yesuq Lé Kâng Pyâm To Kô É Hkyô*

<sup>60</sup> Yhâng é chángzô pé myo myo gi, háu lé wó gyo kôjáng, "Dang shí gi, gyai wui ri. Ó yuq wá wó cháng râ lhú?" ga taí bum akô.

<sup>61</sup> Yesuq gi, háu eq séng luí, Yhâng é chángzô pé taí put nyi bùm kô é lé Yhâng é myit má sé luí, yhangmoq lé, "Dang shi é yanmai, nungmoq myit htên bum akô lhú? <sup>62</sup> Haû Byu Yhangzo gi, Yhang nyi laí lò bê jowò shut taû doq ló é lé, nungmoq myàng kô é nghut le gi, hkâsu nghû kó râ lhú? <sup>63</sup> Haû Woi-nyí gi, asak byí lhê; gungsho kúm gi, haí le a wó dut nghut ri. Nungmoq lé, Ngò taí é dang pé gi, Woi-nyí le nghut lhê, asak le nghut lhê. <sup>64</sup> Nghut kôle, nungmoq chyáng mâ é ra-am gi, a lumjíng kó nghut ri." ga taí ri. Hkâsu mù gâ le, ô pé gi, a lumjíng kó râ eq, ó yuq gi, Yhang lé ap pyám râ nghut é hkyô lé, Yesuq gi, sâng-hi mai sê to gù bê nghut ri. <sup>65</sup> Yhang xoq taí é gi, "Haû su mù, háu Íwâ èq ahkáng byí é sù za a nghut le gi, ó yuq le Ngá chyáng wó lé râ a nghut nghû, Ngò, nungmoq lé taí kyo wú bê nghut lhê." gâ ri.

<sup>☆</sup> 6:45 Esai 54:13



<sup>66</sup> Haú dàm mai, Yhâng é chángzô pé myo myo gi, Yhâng htâng a cháng lo kô e za, taú ló byuq bùm bekô nghut ri.

<sup>67</sup> Haú su mù, Yesuq gi, haú chángzo raxe í yuq lé, "Nungmoq le, ló byuq nau akô, a nghut lhú?" ga myí ri.

<sup>68</sup> Haú hkûn, Simun Petruq gi, "Yhumsîng ê, Nàng gi, ahtum abyuq é asak mungdang wó Sû nghut to bê lé nhîng, ngamoq gi, ó yuq chyáng ê shirâ lhú? <sup>69</sup> Nàng gi, Garai Gasâng é Chyoiyúng Sû nghut é lé, ngamoq, lumjîng lhê, sê nyi lhê." ga, Yhang lé tû taí ri.

<sup>70</sup> Haú hkûn, Yesuq gi, "Nungmoq raxe í yuq lé, Ngò hkyin yù bê a nghut kó lhú? Nghut kôle, nungmoq mâ é rayuq gi, nat nghut ri." ga tû taí ri. <sup>71</sup> (Yhang gi, haú Simun Iskarut é yhangzo, Yudaq lé taí nau é nghut ri; haú yuq gi, chángzo raxe í yuq má bò sù nghut kôle, htâng má, Yhang lé ap pyám râ sù nghut ri.)

## 7

### *Yesuq Eq Yhâng É Gumang Wuì*

<sup>1</sup> Hau htâng má, Yesuq gi, Yhang lé sat râ matú, Yudaq byu pé ho nyi bùm kô é yanmai, Yuda mau má a kâm sô wún mù, Galile mau má sô lhing wún ri. <sup>2</sup> Nghut kôlhang, haú Yudaq byu pé é Saksé Zúm Poì chyâng lo nyi é hkûn, <sup>3</sup> Yesuq é yhanggu yuqzô pé gi, Yhang lé, "Náng é chángzô pé gi, Nàng kut é laklaí kumlhá pé lé myàng kó sháng gaq, Nàng, shî mai htoq ló luí, Yuda mau shut e ló aq. <sup>4</sup> Myîng hu nau é sù gi, hkaú zaú luí haí le a kut wú é nghut lhê. Nàng gi, haú pé lé kut nyi bê nghut é yanmai, mingkan lé, Náng gûng tûn shit aq." ga taí akô. <sup>5</sup> Hkâsu mù gà le, yhanggu sîng yuqzô pé lhang, Yhang lé a lumjîng kó nghut ri.

<sup>6</sup> Haú mù luí, Yesuq gi, yhangmoq lé, "Ngá é ahkyíng gi, a jé shi nghut ri; nungmoq é ahkyíng kúm gi, hká hkûn le joq nyi ri. <sup>7</sup> Haú mingkan gi, nungmoq lé a jú a wó kut kó nghut ri; nghut kôlhang, Ngo lé gi, a jú kó; haí mù gà le, yhang kut é hkyô gi, agè ashop é nghut é lé, Ngò, saksé tûn shit é yanmai nghut ri. <sup>8</sup> Nungmoq gi, poì haú shut doq ló keq. Ngò kúm gi, Ngá é ahkyíng a jé shi nghut é yanmai, poì haú shut a doq ló shirâ nghut lhê." ga taí ri. <sup>9</sup> Haú su ga taí luí, Yhang gi, Galile mau má nyi gyó to bê nghut ri.

<sup>10</sup> Nghut kôlhang, Yhang gu pé, haú poì shut doq ló byuq é htâng má, Yhang gi, de de a nghut é dông, tsik za châng doq ló bê nghut ri. <sup>11</sup> Yudaq byu pé gi, haú poì má, Yhang lé châng hô kômù, "Haú yuq gi, hkâmá nghut lhê lhú?" ga, myi wún akô nghut ri.

<sup>12</sup> Haú byù hpûng hkaú má, Yhang eq séng luí taí lhûm bùm kô é má, ra-am gi, "Yhang gi, byù gè nghut ri." ga taí kôjáng, ra-am gi, "A nghut, Yhang gi, byu pé lé hkyô shuí nghoq sù nghut ri." ga tû taí akô. <sup>13</sup> Nghut kôlhang, haú Yudaq suwún wuí lé gyuq kô é yanmai, ó yuq le, Yhang eq séng é hkyô lé de de a wám taí kó nghut ri.

### *Haú Poì Má, Yesuq Mhoqshit É Hkyô*

<sup>14</sup> Haú poì rawuí nghut ló é hkûn, Yesuq gi, noqkuq yhûm má doq ê luí, mhoqshit hi ló bê nghut ri. <sup>15</sup> Haú hkûn, Yudaq byu pé gi, gyô maú byuq kômù, "Shí yuq gi, mhoq yu é hkyô le a joq wú é wá, haú-í hkâsu mù sê lhê laq?" ga myi bum akô.

<sup>16</sup> Haú mù, Yesuq tû taí é gi, "Ngò mhoqshit é dang gi, Ngá é dang a nghut; Ngo lé nhang kat Su é dang ru nghut lhê. <sup>17</sup> Rayuq yuq, Garai Gasang ô nau é hkyô lé châng kut nau é nghut jáng, Ngò mhoqshit é dang gi, Garai Gasâng chyáng mâ é nghut a nghut é eq, Ngá é myit dông taí é dang nghut a nghut é lé, yhang sê gàm hkoq yû râ nghut lhê. <sup>18</sup> Yhumsîng é myit dông taí é sù gi, yhumsîng é matú aróng hô sù nghut ri; nghut kôlhang, yhumsîng lé nhang kat su é matú, aróng ho é sù gi, tengmán é byû nghut ri; yhang má, a tengmán é hkyô haí le a bò nghut ri. <sup>19</sup> Mosheq gi, nungmoq lé jep é tarâ byî to bê, a nghut kó lhú? Nghut kôlhang, nungmoq ó yuq le, jep é tarâ haú lé a cháng kó nghut ri. Haí mù luí, Ngo lé sat nau nyi akô lhú?" gâ ri.

<sup>20</sup> Haú hkûn, haú byù hpûng gi, "Nàng gi, nat gang wang to sù nghut ri-nhung! Nang lé, ó yuq wá sat nau nyi ri lhú?" ga tû taí akô.

<sup>21</sup> Yesuq gi, yhangmoq lé, "Ngò, laklaí kumlhá ralhum kut jáng, nungmoq banshoq bang gi, maú byuq bum akô. <sup>22</sup> Nghut kôlhang, nungmoq gi, ahpyo-kuq hpyit byî é hkyô lé, Mosheq byî é nghut lhê ga luí, Bánno buinyì má, zoshâng lé ahpyo-kuq hpyit byî akô (gè gè ga jáng, ahpyo-kuq hpyit é hkyô gi, Mosheq chyáng mai lo é a nghut e za, îchyí îwâ pê chyáng mai lo é ru nghut lhê.). <sup>23</sup> Haû, Mosheq é jep é tarâ lé a lhoq htên pyám sháng gaq nghû, Bánno buinyì má, zoshâng lé ahpyo-kuq hpyit byî é nghut le gi, haî mù luí, Bánno buinyì má, byù rayuq é gùng gón lé, Ngò lhoq gê byî é yanmai, Ngo lé nhikjum yô akô lhú? <sup>24</sup> Byù du lé wú luí hkâjéyáng kó; tengmán é đông sheq jéyáng keq." ga taî ri.

*Yesuq Gi, Hkrisduq Nghut Lhê Lhú?*

<sup>25</sup> Haû mù luí, Yerusalem wà mó mâ é byu pé ra-am gi, "Haû yhangmoq sat pyám nau nyi é sù gi, shí yuq a nghut lhi? <sup>26</sup> Yhang gi, shî má de de dáng nyo nyi le, yhangmoq gi, Yhang lé, haî le a ga kó myhi-nhung! Yhang gi, Hkrisduq nghut lhê ga, haû ahkáng ayá wó bang gi, gè gè yhang, sê akô abe? <sup>27</sup> Haû Hkrisduq jé lé é hkûn gi, Yhang hkâmai lé lo é lé, ó yuq lhang sé râ a nghut." ga taî bum akô. Nghut kôlhang, shí yuq gi, hkâmâ é sù nghut é lé, nga-nhung sê lhê;

<sup>28</sup> Haû mù, Yesuq gi, noqkuq yhûm wàng má mhoqshit uchyang, htê mó èq taî kat é gi, "Nungmoq gi, Ngo lé sê é htoq agó, Ngò, hkâmai lé é sù nghut é lé le, sê akô nghut ri. Ngò gi, Ngá myit đông shî má lé nyi tô é sù a nghut kôlhang, Ngo lé nhang kat é Sù gi, tengmán lhê; nungmoq gi, Yhang lé a sé kôlhang, <sup>29</sup> Ngò gi, Yhang lé sê lhê; hkâsu mù gâ le, Ngò gi, Yhâng chyáng mai lé é sù eq Yhang mai nhang kat é sù nghut lhê." gâ ri.

<sup>30</sup> Haû mù, yhangmoq gi, Yhang lé chyup râ dâ akô; nghut kôlhang, Yhâng é ahkyíng a jé shi é yanmai, Yhang lé chyup râ matú, ó yuq le loq a jé kó nghut ri. <sup>31</sup> Nghut kôlhang, byù hpûng hkaû mâ é bang myo myo gi, Yhang lé lumjíng bûm kôluí, "Haû Hkrisduq jé lé é hkûn, Yhang gi, shí yuq htoq má, limik kumlhá pé je wó kut shit râ lhú?" ga taî bum akô nghut ri.

<sup>32</sup> Haû Hparishe pé gi, haû byù hpûng hkaû má, Yesuq eq sêng é hkyô lé, haû su ga dangsoq soq lhûm nyi kô é hkyô lé wó gyô yu akô. Haû mù, haû hkyangjong agyi pé eq Hparishe pé gi, Yhang lé è chyup râ matú, noqkuq yhûm zúng é bang lé nhang kat akô.

<sup>33</sup> Haú hkûn, Yesuq gi, "Ngò gi, nungmoq eq rahá rayoq zo za nyi râ nghut lhê; hau htâng, Ngo lé nhang kat Su chyáng taû ló râ nghut lhê. <sup>34</sup> Haú hkûn, nungmoq gi, Ngo lé hô kôlhang, myang hô kó râ a nghut; Ngò nyi é jang má, nungmoq wó jé kó râ a nghut." ga taî ri.

<sup>35</sup> Hau é yanmai, Yudaq byu pé, rayuq eq rayuq taî lhum kô é gi, "Shí yuq gi, Yhang lé nga-nhung a myang hô loshoq, hká shut e byuq râ dâ lhê lhú? Yhang gi, Grik byu pé má nyi byo myín tô é nga-nhung é byu pé nyi é jowò má è mù, Grik byu pé lé, è mhoqshit râ dâ lhê lhú? <sup>36</sup> 'Nungmoq gi, Ngo lé hô kôlhang, myang hô kó râ a nghut.' gâ é eq, 'Ngò nyi é jang má, nungmoq wó jé kó râ a nghut.' gâ é, Yhang taî é dang gi, haî jung wá gâ naú é nghut lhê lhú?" gâ akô.

<sup>37</sup> Haû lô htâng é eq je ahkyak é Poî buinyì má, Yesuq toq yap luí, htê mó èq taî é gi, "Wuì shit sù gi, Ngá chyáng lé mù, shuq sháng gaq. <sup>38</sup> Ngo lé lumjíng é sù ó yuq nghut kôle, haû Chyúmdang má taî tô é eq rajung za, 'Yhâng chyáng mai asak uchyâm é wuìlang yui htoq lô râ nghut lhê.'" gâ ri. <sup>39</sup> Yhang haû su gâ é gi, Yhang lé lumjíng é bang myang hap yù râ nghut é, haû Woi-nyí lé taî é nghut ri. Haú hkûn jé shoq, haû Woi-nyí lé a byi kat shi nghut ri. Hkâsu mù gâ le, Yesuq gi, hpungwup shing kang dan hû é a hui nhâng shi é yanmai nghut ri.

<sup>40</sup> Yhâng é dang pé lé wó gyo kôjáng, ra-am gi, "Shí yuq gi, gè gè yhang, Myiqhtoi haû nghut ri." ga taî akô.

<sup>41</sup> Ra-am gi, "Shí yuq gi, Hkrisduq nghut ri." ga taî akô. Góbang nghut jáng, "Hkrisduq wá Galile mau mai htoq lé râ nghut lhê lhú? <sup>42</sup> Haû Chyúmdang má, Hkrisduq gi, Dawiq é awut ashín mâ é nghut luí, Dawiq nyi laî lo é Betlehem wà mai htoq ló râ nghut lhê gâ é, a nghut lhú?" ga myî bum akô nghut ri. <sup>43</sup> Haû mù luí, Yesuq é yanmai, shiwa byu pé

gi, gàm hkoq lò byuq bekô nghut ri. <sup>44</sup> Ra-am gi, Yhang lé chyup yù nau bùm kôlhang, Yhang lé loq a záng kô nghut ri.

*Yudaq Byu Pé Lé Shuê U É Bang A Lumjóng Kô É Hkyô*

<sup>45</sup> Hau htâng má, haû noqkuq yhûm zúng bang gi, haû hkyangjong agyi pé eq Hparishe pê chyáng taû lô kô é hkûn, haû bang gi, yhangmoq lé, "Nungmoq, haû mù luî, Yhang lé a shuê lo kô é lhu?" ga lhom myî akô.

<sup>46</sup> Haû hkûn, haû noqkuq yhûm zúng bang gi, "Shí yuq su ga taî é byù gi, ó le a nyî wú é nghut lhê." ga taî kyô akô.

<sup>47</sup> Haû mù, haû Hparishe pé gi, "Nungmoq lé le, Yhang èq mhoq hpyoq yù bekô lhu?"

<sup>48</sup> Haû zaû wui chyáng le, Hparishe pê chyáng le, Yhang lé lumjóng é byù bò akô lhu? <sup>49</sup> A bò! Nghut kôlhang, haû jep é tarâ lé a sê é byù moq mó shî gi, nhîng pyâm é hui bekô nghut ri." ga nhik-yô é đông tû taî kat akô nghut ri.

<sup>50</sup> Nghut kôlhang, yhangmoq hpúng má bo é, hí hkûn Yesuq chyáng e wú bê sù nghut é, Nikodimu gi, <sup>51</sup> "Nga-nhúng é tarâ gi, byù rayuq lé, yhang é dang hí a gyô wú é eq, yhang haû kut é lé a sê e za, mara byi lhê lhu?" ga, yhangmoq lé myî ri.

<sup>52</sup> Haû hkûn, yhangmoq gi, "Nàng le, Galile mau byù nghut lhê lhu? Galile mau mai myiqhtoi rayuq lhang a htoq é hkyô lé, nàng gon wú aq, haû jáng sé râ nghut lhê." ga tû taî akô.

<sup>53</sup> Hau htâng, yuq hkgangmó gi, ó le ô yhûm shut taû lô byuq bùm bekô nghut ri.\*

## 8

*Yesuq Lé, Lé Myî Chyam Wú Kô É Hkyô*

<sup>1</sup> Yesuq kúm gi, Tsanlun Bùm shut e lô bê nghut ri. <sup>2</sup> Htang napkyô napsûn noq le, Yesuq gi, noqkuq yhûm wàng hkaû má dum ê luî, byu pé lhunglhang gi, Yhang é lêngkyuq má lé zîng bum akô; haû mù, Yhang gi, zung to luî, yhangmoq lé mhoqshit ri. <sup>3</sup> Haû hkûn, haû tarâ sará pé eq Hparishe pé gi, sulàng shut nyi é má myang chyup yu é su-myi rayuq lé shuê lé lô kômù, gung gûng má shap to kôluî, <sup>4</sup> Yesuq lé, "Sarâ ê, myiwe myhí shî lé, sulàng shut nyi é má myang chyup yu é nghut lhê. <sup>5</sup> Haû Mosheq é tarâ má gi, shî su é myiwe lé, luqgok èq dú sat pyám keq ga, nga-nhúng lé hkunmó hkyô tô ri. Ahkuî, Nàng gi, hkâsu nghû râ lhu?" ga myî akô. <sup>6</sup> Yhangmoq haû su ga myî é hkyô gi, Yhang lé mara wó hûn shoq ga, chyam wú râ matú nghut ri.

Nghut kôlhang, Yesuq gi, ngóm mù, myigùng má loqnyhuî èq htaû kê nyi ri. <sup>7</sup> Yhang lé, yhangmoq ru jang myî nyî kô é hkûn, Yhang gi, yap nyhang kat mù, yhangmoq lé, "Nungmoq mâ é mara a wó é sù hí, myiwe myhí shí yuq lé luqgok èq dú sháng gaq." ga taî ri. <sup>8</sup> Hau htâng, Yhang gi, dum ngóm luî, myigùng má kê nyi ri.

<sup>9</sup> Yhangmoq gi, haû su gâ é lé wó gyo kôjáng, je mang bang mai hí luî, rayuq htâng rayuq lô byuq bekô nghut luî, Yesuq baú za myit gyó tô é eq, myiwe myhí haû jâng yap nân tô ri. <sup>10</sup> Yesuq gi, yap nyhang kat luî, yhang lé, "Myiwe myhí ê, yhangmoq hká lô bekô lhu? Ó yuq èq le, nàng lé mara a byi kô lhu?" ga myî ri.

<sup>11</sup> Yhang gi, "Yhumsîng ê, ó yuq le mara a byi kô nghut ri." ga tû taî ri.

Haû hkûn, Yesuq gi, "Ngò le, nàng lé mara a byi, lô aq hkoi, ahkuî mai mara hkâdum kut shut lo." ga taî kat ri.

*Yesuq, Mingkân É Maubó*

<sup>12</sup> Yesuq gi, shiwa byu pé lé dum nyo é hkûn, "Ngò gi, mingkân é maubó nghut lhê; Ngá htâng châng é sù ó yuq nghut kôle, mauchut hkaû má hkâ-nhám le so râ a nghut, asak maubó lé wó râ nghut lhê." ga taî ri.

<sup>13</sup> Haû mù, haû Hparishe pé gi, "Wú aq, Nàng gûng Nàng saksé hkâm yu é nghut ri; Nàng é saksé gi, teng râ a nghut." ga taî akô.

\* 7:53 Yohan Laiká 7:53 mai 8:11 jé shoq gi, chyúmding axau myo myo má a bo é nghut lhê.

<sup>14</sup> Haú hkûn, Yesuq gi, "Ngá gûng Ngò saksé hkám kôlhang, Ngá é saksé gi, têng lhê; hkâsu mù gâ le, Ngò gi, Ngò hkâmai lé lo é eq Ngò hká shut e ló é lé, sê lhê. Nghut kôlhang, nungmoq gi, Ngò hkâmai lé lo é lé le, Ngò hká shut e ló é lé le, a sé kó nghut ri.

<sup>15</sup> Nungmoq gi, byù hkyam dông za jéyáng akô; Ngò gi, ó yuq lé le a jéyáng é nghut lhê.

<sup>16</sup> Nghut kôlhang, Ngò jéyáng é nghut jáng, Ngò jéyáng é hkyô gi, jô lhê; hkâsu mù gâ le, Ngò gi, Ngò baú a nghut, haú Ngo lé nhang kat é sù Íwa eq rahá nghut nyi lhê. <sup>17</sup> Haú nungmoq é tarâ má yhang le, í yuq mai hkâm é saksé gi, têng lhê ga kâ tô ri. <sup>18</sup> Ngò gi, Ngá é matú saksé hkâm yù sù nghut lhê; hau htoq agó, haú Ngo lé nhang kat é sù Íwa le, Ngá é matú saksé hkám byí é nghut lhê." ga tû taí ri.

<sup>19</sup> Haú mù, yhangmoq gi, Yhang lé, "Náng Wa gi, hkâmá lú?" ga myi kôjáng, Yhang gi, "Nungmoq gi, Ngo lé le, Ngá Wa lé le, a sé kó nghut ri; nungmoq, Ngo lé sé kô é nghut le gi, Ngá Wa lé le, sé kó râ nghut lhê." ga tû taí ri. <sup>20</sup> Dang haú pé gi, haú noqkuq yhûm wàng hkaú mâ é alu kat jang nàm má, Yhang mhoqshit nyi é u lé taí é dang nghut ri. Nghut kôlhang, Yhang lé, ó yuq le a chyup kó; hkâsu mù gâ le, Yhâng é ahkyíng a jé shi é yanmai nghut ri.

<sup>21</sup> Haú mù luí, Yesuq gi, yhangmoq lé, "Ngò gi, ló byuq râ nghut lhê, haú hkûn, nungmoq Ngo lé hô kó râ, yhumsing é mara má le shí kó râ nghut lhê. Ngò ló é jang má, nungmoq wó jé kó râ a nghut." ga, radàm dum puq taí ri.

<sup>22</sup> Hau é yanmai, haú Yudaq byu pé gi, "Ngò ló é jang má, nungmoq wó jé kó râ a nghut." gâ é gi, Yhânggùng yhang sat shí râ gâ é nghut lhê lú?" ga myi bum akô.

<sup>23</sup> Nghut kôlhang, Yesuq xoq taí é gi, "Nungmoq gi, a-ô mai lo é bang nghut akô; Ngò gi, ahtoq mai lé é sù nghut lhê. Nungmoq gi, mingkan shí eq sêng é bang nghut akô; Ngò kúm gi, mingkan shí eq sêng é sù a nghut. <sup>24</sup> Haú mù, nungmoq gi, yhumsing é mara má shí kó râ nghut lhê nghû, Ngò taí é nghut lhê. Ngò gi, haú Yuq nghut lhê nghû taí é lé, nungmoq a lumjíng kô é nghut jáng, nungmoq gi, gè gè yhang, yhumsing é mara má shí kó râ nghut lhê." gâ ri.

<sup>25</sup> Haú hkûn, yhangmoq gi, "Nàng, ó yuq nghut lhê?" ga myi kôjáng, Yesuq gi, "Ngò ó yuq nghut é lé, Ngò, hkâ-nhám le taí nyi bê nghut lhê. <sup>26</sup> Ngò gi, nungmoq eq séng luí, taí râ hkyô eq jéyáng râ hkyô, myo myo joq lhê. Nghut kôlhang, Ngo lé nhang kat é Sù gi, tengmán é Sù nghut lhê mù, Yhâng chyáng mai wó gyô yu é gû lé, Ngò, mingkan lé taí kyô lhê." ga tû taí ri.

<sup>27</sup> Yesuq gi, yhangmoq lé, Yhâng Wa eq séng é hkyô taí kyô nyi é lé, yhangmoq gi, a sê gyo kó nghut ri. <sup>28</sup> Haú mù luí, Yesuq gi, "Haú Byu Yhangzo lé nungmoq tu shap\* kat é hkûn sheq, Ngò gi, haú Yuq nghut é hkyô lé le, yhumsing myit dông haí le a kut e za, haú Íwa mhoq byí é dông za taí é hkyô lé le, nungmoq sé kó râ nghut lhê. <sup>29</sup> Haú Ngo lé nhang kat é Sù gi, Ngò eq rahá nghut nyi lhê; Ngò gi, hkâ-nhám le, Yhang lé myit ngón nhang é hkyô chyat kut é yanmai, Yhang gi, Ngo lé baú za a tô pyâm to nghut ri." ga taí ri. <sup>30</sup> Yhang, haú su taí nyi é u lé lhang, byù myo myo gi, Yhang lé lumjíng bûm bekô nghut ri.

#### *Abraham É Awut Ashín Pê Hkyô*

<sup>31</sup> Haú mù, Yesuq gi, Yhang lé lumjíng é Yudaq byu pé lé, "Ngò mhoqshit é hkyô lé châng kut nyi bekô nghut jáng, nungmoq gi, gè gè yhang, Ngá é chángzô pé nghut bekô.

<sup>32</sup> Nungmoq gi, haú tengmán hkyô lé sé kó râ nghut luí, haú tengmán hkyô gi, nungmoq lé lhoq lhut kat râ nghut lhê." ga taí ri.

<sup>33</sup> Haú hkûn, yhangmoq gi, "Ngamoq gi, Abraham é awut ashín pé nghut luí, ó yuq é jùn le hkâ-nhám a dut wú é nghut lhê. Haú mù, 'nungmoq lé lhoq lhut kat râ' nghû Nàng hkâsu kut wó taí lhê lú?" ga tû taí akô.

<sup>34</sup> Yesuq dum tû taí é gi, "Ngò, nungmoq lé teng za taí kôlé, mara kut shut é sù gi, marâ é jùn nghut lhê. <sup>35</sup> Jùn gi, yhûm ikun eq hkâ-nhám le séng nyi râ a nghut; zo kúm

\* 8:28 Tu shap gâ é lichyúm gi, tapzîng htoq má jén sat pyám râ gâ é nghut lhê.

gi, ikun eq ahtum abyuq sêng lhê. <sup>36</sup> Haû mù luî, haû Zo gi, nungmoq lé lhoq lhut kat é nghut jáng, nungmoq gi, gè gè yhang, lut berâ nghut lhê. <sup>37</sup> Nungmoq gi, Abraham é awut ashín pé nghut é lé, Ngò sê lhê. Nghut kôlhang, nungmoq gi, Ngá é dang lé a lhom yù kô é yanmai, Ngo lé sat rà dà akô nghut ri. <sup>38</sup> Ngò gi, Ngá Wâ chyáng mai myang yu é eq rajung za, nungmoq lé taí kyô nyi lhê; nungmoq le, nungmoq é îwa chyáng mai wó gyô yu é eq rajung za kut nyi akô nghut ri." gâ ri.

<sup>39</sup> Haû hkûn, yhangmoq gi, "Ngamoq é îwa gi, Abraham nghut lhê." ga tû taí kôjáng, Yesuq gi, "Nungmoq, Abraham é yhangzô pé nghut é nghut le gi, Abraham kut é su kut kó rà nghut lhê. <sup>40</sup> Nghut kôlhang, nungmoq gi, haû Garai Gasâng chyáng mai wó gyô yu é tengmán hkyô lé taí kyo sù nghut é Ngo lé, sat pyám nau akô nghut ri. Haû sù é hkyô gi, Abraham a kut é nghut lhê. <sup>41</sup> Nungmoq gi, nungmoq é îwa kut é muzó lé yhang, kut nyi akô." ga taí ri.

Haû hkûn, yhangmoq gi, "Ngamoq gi, dezo amyû a nghut; ngamoq gi, îwa rayuq za wó lhê; haû gi, Garai Gasang nghut lhê." ga taí he akô nghut ri.

### *Zô Wui É A-kyang Gi, Mó Ó Nghut É Hkyô Shit*

<sup>42</sup> Yesuq gi, yhangmoq lé, "Garai Gasang gi, nungmoq é îwa nghut é nghut jáng, nungmoq gi, Ngo lé chyitdap kó rà nghut lhê; hkâsu mù gâ le, Ngò gi, Garai Gasâng chyáng mai lé jé luî, ahkuî, shî má nyi tô é nghut lhê. Ngò gi, Ngá myit dông lé lo é a nghut, Yhang sheq Ngo lé nhang kat é ru nghut lhê. <sup>43</sup> Nungmoq gi, haû mù Ngá é dang lé a sê gyo kô é lhu gâ le, Ngò taí é dang lé, nungmoq a wó lhom yù kô é yanmai nghut ri. <sup>44</sup> Nungmoq gi, haû nungmoq é îwa nghut é nat Tsadán eq sêng é bang nghut luî, nungmoq é îwa ô nau é hkyô lé kut nau bum akô. Yhang gi, a-nham sâng-hi mai byù sat sù nghut ri. Yhang má tengmán hkyô a bo é yanmai, yhang gi, haû tengmán hkyô má a yap gîng nyi nghut ri. Yhang gi, mhaû é hkûn, yhang é myit má bo é dông taí ri; hkâsu mù gâ le, Yhang gi, byù mhaû nghut luî, mhaû hkyô pé é îwa nghut ri. <sup>45</sup> Haû su mù, Ngò, nungmoq lé, haû tengmán hkyô taí kyô é yanmai, nungmoq gi, Ngo lé a lumjîng kó nghut ri. <sup>46</sup> Nungmoq mâ é ó yuq wá, Ngo lé mara bo lhê nghû saksé wó tûn shit akô lhu? Ngò gi, haû tengmán hkyô lé taí nyi é nghut le nhîng, nungmoq, Ngo lé haû mù a lumjîng kô é lhu? <sup>47</sup> Garai Gasang eq sêng é sù gi, Garai Gasang taí é dang lé gyô lhê. Nungmoq a gyo kô é gi, nungmoq, Garai Gasang eq a séng kô é yanmai nghut ri." ga taí ri.

### *Yesuq Eq Abraham*

<sup>48</sup> Haû hkûn, haû Yudaq byu pé gi, Yhang lé, "Nàng gi, Samariq byù nghut é htoq agó, nat gang wang júng to sù nghut lhê nghû, ngamoq taí é dang gi, jô lhê a nghut lhu?" ga myî akô.

<sup>49</sup> Yesuq gi, "Ngò gi, nat gang wang júng é hui sù a nghut; Ngò gi, Ngá Wa lé sheq hkunggâ é ru nghut lhê; nungmoq kúm gi, Ngo lé taí hpoî nyi akô nghut ri. <sup>50</sup> Ngò gi, Ngá é matú aróng ho nyi é a nghut; nghut kôlhang, hô byi Sù rayuq nyi lhê, haû yuq jéyáng sháng gaq. <sup>51</sup> Ngò, nungmoq lé teng za taí kôlé, Ngá dang lé châng é sù gi, hkâ-nhám le, shî rà a nghut." ga taí ri.

<sup>52</sup> Hau é yanmai, haû Yudaq byu pé gi, "Nàng gi, nat gang wang júng to sù nghut é lé, ahkuî, ngamoq sé bê! Abraham gi, shi byuq bê; haû myiqhtoî pé le, shi byuq bekô nghut ri; nghut kôlhang, Nàng gi, 'Ngá dang lé châng é sù gi, hkâ-nhám le, shî rà a nghut.' ga taí ri. <sup>53</sup> Nàng gi, ngamoq é îwa Abraham htoq hkik lhê lhu? Yhang gi, shi byuq bê; haû myiqhtoî pé le, shi byuq bekô nghut ri. Náng gûng nàng ó yuq su ngàm lhê lhu?" ga taí akô.

<sup>54</sup> Yesuq gi, "Ngá gûng Ngò lhoq gyaú yu é nghut jáng, Ngá é aróng gi, hai hpaudap é a nghut; nghut kôlhang, haû nungmoq é Garai Gasang nghut lhê ga nungmoq taí é sù, Ngá Wa gi, Ngo lé lhoq gyaú é sù ru nghut lhê. <sup>55</sup> Nungmoq gi, Yhang lé a sé kó nghut ri; nghut kôlhang, Ngò gi, sê lhê. Yhang lé a sé nghû Ngò taí é ru nghut le gi, Ngò le nungmoq su byù mhaû dut rà nghut lhê; nghut kôlhang, Ngò gi, Yhang lé sé luî, Yhang é

dang gyo sù nghut lhê. <sup>56</sup> Nungmoq é îwa Abraham gi, Ngo lé râ buinyì lé myoqbyu gabú nyi é nghut luí, myàng mù, gabú bê nghut ri." ga tû taí ri.

<sup>57</sup> Haú hkûn, haú Yudaq byu pé gi, Yhang lé, "Nàng gi, asak ngo xê zàn lhang a nghut shí é nhîng, Abraham lé myàng wú é nghut lhê lhú?" ga taí akô.

<sup>58</sup> Yesuq gi, "Ngò, nungmoq lé teng za taí kôlé, Abraham lhang a hkû shi má, Ngò nyi gù bê nghut lhê." <sup>59</sup> Haú mù luí, yhangmoq gi, Yesuq lé, dú râ ga luqgok kui yu akô; nghut kôlhang, Yesuq gi, haú noqkuq yhûm mai haq htoq ló byuq bê nghut ri.

## 9

### *Myojit Sù Lé Lhoq Gê Byî É Hkyô*

<sup>1</sup> Yesuq gi, sô yông ló nyi é u lé, hku lé é mai myojit to gû nghut é byù rayuq lé myang ri. <sup>2</sup> Haú hkûn, Yhâng é chángzô pé gi, Yhang lé, "Rabai ê, shí yuq, myojit gû hku lé é gi, ó yuq kut shut é yubak é yanmai nghut lhê lhú? Yhang kut shut é lhú? A nghut jáng, yhâng nu yhâng wa kut shut é lhú?" ga myî akô.

<sup>3</sup> Yesuq tû taí é gi, "Haú gi, yhang kut shut é yanmai le a nghut, yhâng nu yhâng wa kut shut é yanmai le a nghut; haú Garai Gasâng é muzó lé, yhang má wó lhoq htoq shit râ matú, haú dut é ru nghut lhê. <sup>4</sup> Nga-nhúng gi, haú Ngo lé nhang kat Su é muzó lé, nyí nghut tô ashí hkûn, zui saí nyi ra râ dut lhê; myín jé jáng gi, ó yuq le, mù wó zui saí râ a nghut. <sup>5</sup> Ngò gi, mingkan htoq má nyi tô é u lé, mingkân é maubó nghut lhê." gâ ri.

<sup>6</sup> Yhang gi, haú su ga taí luí, myigùng má sôkan byé hkyó mù, tse-nyhaq saí yù luí, haú yuq é myojí má but byî ri. <sup>7</sup> Hau htâng, haú yuq lé, "Haú Siloam wuhtum má ê chí pyám aq." ga taí ri. (Siloam gâ é gi, nhang é gâ é lichyúm nghut lhê.). Haú mù, haú yuq gi, ê chí mù, myoq myàng luí, yhûm shut ló bê nghut ri.

<sup>8</sup> Haú yhâng é yhumkyo bang eq yhang dung zô wún é lé myang wú é bang gi, "Shí yuq gi, haú zung to mù, dung zo zo lhaq kut é sù, a nghut kó lhú?" ga myî bum akô. <sup>9</sup> Ra-am gi, "Haú yuq nghut lhê." gâ bum akô.

Góbang gi, "A nghut, haú yuq su dut e za ru nghut lhê." ga taí akô.

Nghut kôlhang, yhang gi, "Ngò, haú yuq yhang nghut lhê." ga taí ri.

<sup>10</sup> Haú hkûn, yhangmoq gi, "Haú nghut le gi, náng myoq hkâsu kut wó myang é lhú?" ga myî akô.

<sup>11</sup> Yhang gi, "Haú Yesuq gâ é byù rayuq, tse-nyhaq ratsuí saí yù luí, ngá é myojí má but byi mù, 'Siloam wuhtum má ê chí pyám aq.' ga ngo lé taí ri; haú mù, ngò ê chí pyám é htâng má, ngá myoq wó myang é nghut lhê." ga tû taí ri.

<sup>12</sup> Haú hkûn, yhangmoq gi, "Byù haú yuq gi, hkâmá nyi ri lhú?" ga, yhang lé myî akô.

Yhang gi, "Ngò a sé." ga taí ri.

### *Myoq Dum Myang Byuq É Hkyô Lé, Hparishe Pé Gôn Wú É Hkyô*

<sup>13</sup> Yhangmoq gi, haú myojit wú bê sù lé, Hparishe pê chyáng shuí lé akô. <sup>14</sup> Yesuq, tse-nyhaq saí yù mù, haú yuq é myoq lé lhoq myâng byî é buinyì gi, Bánno buinyì nghut ri. <sup>15</sup> Haú mù, yhang, myoq hkâsu kut wó myang é hkyô lé, haú Hparishe pé le dum myî akô. Haú jáng, yhang gi, "Haú yuq gi, ngá é myojí má tse-nyhaq but byi mù, ngò gi, ê chí pyám jáng, ngá myoq myàng bê nghut lhê." ga tû taí ri.

<sup>16</sup> Haú Hparishe pé ra-am gi, "Shí yuq gi, Bánno buinyi é tarâ lé a châng é sù nghut é yanmai, Garai Gasâng chyáng mai lé é sù a nghut." ga taí akô.

Nghut kôlhang, ra-am gi, "Yubak dap sù rayuq gi, haú su é limik kumlhá pé lé, hkâsu wó kut htoq râ lhú?" ga myî akô. Haú mù, yhangmoq gi, myit a huí lhûm bùm lò kó nghut ri.

<sup>17</sup> Haú mù, yhangmoq gi, haú myojit wú sù shut lhîng mù, "Nang lé myoq lhoq myâng byî é sù gi, hkâsù é byù nghut lhê nghû, nàng taí râ lhú?" ga dum myi kôjáng, "Yhang gi, myiqhtoí rayuq nghut ri." ga, yhang tû taí ri.

☆ 8:58 Htoq Ló 3:14 † 8:58 Bun zo shí má, Yesuq gi, Yhânggùng yhang Garai Gasang nghut lhê gâ nyi nghut ri.

<sup>18</sup> Haú Yudaq byu pé gi, haú yuq myoqjit wú é hkyô lé le, ahkuí myoq dum myàng bê nghut é hkyô lé le, haú yhang nu eq yhang wa lé, ê ji lò nhang é hkûn jé shoq, a lumjínng kó nghut ri. <sup>19</sup> Haú mù, Yhangmoq gi, haú yhang nu eq yhang wa lé, "Shí yuq gi, nungnhik é yhangzo nghut lhê lú? Hku lé é hkûn mai, myoqjit gù nghut lhê lú? Yhang, ahkuí, hkâsu kut wó myang é lú?" ga myí akô.

<sup>20</sup> Haú hkûn, yhang nu eq yhang wâ nhik gi, "Yhang gi, ngá-nhik é yhangzo nghut é lé le, hku lé é hkûn mai myoqjit gù nghut é lé le, ngá-nhik sê lhê. <sup>21</sup> Nghut kôlhang, yhang, ahkuí hkâsu kut wó myang é hkyô lé le, yhang é myoq lé ó yuq èq lhoq myàng byí é hkyô lé le, ngá-nhik a sé. Yhang, asak wáng bê, yhang lé myí wú keq, yhanggùng yhang dat taí kyo râ nghut lhê." ga tû taí akô. <sup>22</sup> Haú yhang nu eq yhang wâ nhik gi, Yudaq byu pé lé gyuq kô é yanmai, haú su ga taí kô é nghut ri; hkâsu mù gâ le, Yesuq gi, haú Hkrisduq nghut lhê ga yín yu é sù, ó yuq lé nghut kôle, haú tarajong mai lhoq htoq pyám râ nghut lhê ga, haú Yudaq suwún wú chôm myit hpyit to bekô nghut é yanmai nghut ri. <sup>23</sup> Hau é yanmai, yhang nu eq yhang wâ nhik gi, "Yhang, asak wáng bê, yhang lé myí wú keq." ga taí kô é nghut ri.

<sup>24</sup> Haú Hparishe pé gi, myoqjit wú bê sù haú yuq lé dum ji yù mù, "Garai Gasang lé za hkya-on waq toq aq! Haú yuq gi, yubak dap sù rayuq nghut é lé ngamoq sê lhê." ga taí akô.

<sup>25</sup> Haú hkûn, yhang tû taí é gi, "Yhang gi, yubak dap sù rayuq nghut lhê luq, a nghut é luq, ngò a sé. Ngò gi, hí lé myoqjit sù nghut kôle, ahkuí wó myàng bê nghut é lé za, ngò ru sê lhê." gâ ri.

<sup>26</sup> Hau htâng, yhangmoq gi, "Yhang, nang lé haí kut byí ri lú? Náng é myoq lé, yhang, hkâsu kut lhoq myàng byí ri lú?" ga, yhang lé myí akô.

<sup>27</sup> Haú hkûn, yhang gi, "Ahkuí za, ngò, nungmoq lé taí kyo bê le, nungmoq sheq a gyo kôluí nhîng! Nungmoq gi, haí mù dum gyô nau akô lú? Nungmoq le, Yhang é chángzô pé dut nau akô lú?" ga tû myí ri.

<sup>28</sup> Haú mù, yhangmoq gi, yhang lé gyaí rhoí é dông mai, "Nàng gi, haú yuq é chángzo nghut ri-nhung! Ngamoq kúm gi, Mosheq é chángzô pé ru nghut lhê! <sup>29</sup> Garai Gasang gi, Mosheq lé dâng nyo é hkyô lé, ngamoq sê lhê; nghut kôlhang, haú yuq eq séng luí, Yhang gi, hkâmai lé é sù nghut é lé lhang, ngamoq a sé." ga taí akô.

<sup>30</sup> Haú hkûn, haú yuq gi, "Yhang, ngo lé myoq wó lhoq myang byi kôlhang, Yhang gi, hkâmai lé é sù nghut é lé, nungmoq a sé kô é gi, mauhpo yhang nghut bê! <sup>31</sup> Garai Gasang gi, yubak dap bâng é dang lé a gyo byí é hkyô lé, nga-nhúng sê lhê. Garai Gasang gi, Yhang lé noqkuq luí, Yhang ô nau é hkyô lé, kut é sù é dang lé kúm gyo byí lhê. <sup>32</sup> Hku lé é hkûn mai myoqjit gù nghut é byù lé, ó yuq èq myoq lhoq myàng byí é gâ é hkyô lé, mingkan lé joq é hkûn mai, ó yuq le a wó gyô wú é nghut lhê. <sup>33</sup> Haú yuq gi, Garai Gasang chyáng mai lé é sù za a nghut le gi, haí le wó kut râ a nghut." ga tû taí ri.

<sup>34</sup> Haú su ga jáng, yhangmoq gi, "Nàng gi, yubak htui má hku lé é sù nghut to luí nhîng, ngamoq lé wám mhoqshit lhê lú?" ga tû taí kôluí, yhang lé hkat htoq pyâm akô nghut ri.

### *Woi-nyí Má Myoqjit É Hkyô*

<sup>35</sup> Yesuq gi, haú yuq lé yhangmoq hkat htoq pyâm é hkyô lé wó gyo luí, yhang lé myàng hui jáng, "Nàng gi, haú Byu Yhangzo lé lumjínng lhê lú?" ga myí ri.

<sup>36</sup> Haú hkûn, haú yuq gi, "Yhumsîng ê, haú gi, ó yuq nghut lhê lú? Yhang lé, ngò wó lumjínng sháng gaq, taí kyo laq." ga myí ri.

<sup>37</sup> Yesuq gi, "Nàng, haú yuq lé myàng wú bê nghut lhê; ahkuí, nàng eq dâng nyo nyi é sù gi, haú yuq yhang nghut lhê." ga taí ri.

<sup>38</sup> Haú mù, haú yuq gi, "Yhumsîng ê, ngò lumjínng lhê!" ga taí luí, Yhang lé noqkuq ri.

<sup>39</sup> Haú hkûn, Yesuq gi, "Haú myoqjit bang myoq myàng kó râ hkyô eq myoq myàng bang myoqjit kó râ hkyô lé, tarâ jéyáng râ matú, mingkan shí má Ngò jé lé é nghut lhê." ga taí ri.

<sup>40</sup> Yhang eq rahá nghut nyi é Hparishe pé ra-am gi, Yhang haû su ga taí é lé wó gyo kôjáng, "Hkâsu htà? Ngamoq gi, myoqjit bang dut bê lú?" ga myí akô.

<sup>41</sup> Haú hkûn, Yesuq gi, "Nungmoq, myoqjit é bang ru nghut le gi, yubak mara a bò kó râ nghut lhê; nghut kôlhang, ahkuí, nungmoq gi, myoq myàng bang nghut lhê ga kô é yanmai, nungmoq má yubak mara bo ashí kó nghut ri.

## 10

### *Sau Zúng Sû Eq Sau Hpúng*

<sup>1</sup> Ngò, nungmoq lé teng za taí kôlé, haû sau hkup má, hkúmdong mai a wang e za, gó hkyô dong doq lut wang é sù gi, hkau sù eq damyaq nghut ri. <sup>2</sup> Haû hkúmdong mai wang é sù kúm gi, sau zúng sù nghut ri. <sup>3</sup> Haû hkum zúng sù gi, yhang lé hkum hpóng byí é htoq agó, haû sau pé gi, yhâng é htê lé gyo byí akô. Yhang gi, yhâng é sau pé lé, myìng lang luí wut yù mù, yhangmoq lé shuí htoq htoq kut nyi ri. <sup>4</sup> Yhâng é sau pé banshoq lé hpông htoq yù mù, yhang gi, hí má sô ri; sau pé gi, yhâng é htê lé sê gyo kô é yanmai, yhâng é htâng má châng akô nghut ri. <sup>5</sup> Nghut kôlhang, yhangmoq gi, byù bíng é htâng má, hkâ-nhám lhang cháng kó râ a nghut e za, yhâng chyáng mai kúm hpang byuq kó râ nghut lhê; hkâsu mù gâ le, haû byù bíng é htê lé, yhangmoq a sê gyo kô é yanmai nghut ri." ga taí ri. <sup>6</sup> Yesuq gi, dangtú haû lé yù mù, yhangmoq lé taí kyô ri; nghut kôlhang, yhangmoq gi, Yhang haí taí kyô nyi é lé, a sê gyo kó nghut ri.

<sup>7</sup> Haû mù, Yesuq dum taí é gi, "Ngò, nungmoq lé teng za taí kôlé, Ngò gi, haû sau pé wang é hkúmdong nghut lhê. <sup>8</sup> Ngá é hí má lé é lhunglhâng bang gi, hkau bang eq damyaq pé nghut akô; haû sau pé kúm gi, yhangmoq é dang lé a lhom gyo byi kó nghut ri. <sup>9</sup> Ngò gi, hkúmdong nghut lhê; Ngò mai wang é sù ó yuq nghut kôlé, hkyi yu é hui râ nghut lhê. Haú yuq gi, htoq htoq wàng wàng wó kut râ eq mhan-yô myang hô râ nghut lhê. <sup>10</sup> Haû hkau sù gi, hkau râ, sat râ eq lhoq htên pyám râ matú, lé e za nghut lhê. Ngo lé é gi, yhangmoq, asak wó yù râ eq byíngjup é asak lé wó yù râ matú sheq nghut lhê.

<sup>11</sup> Ngò gi, ge é sau zúng sù nghut lhê; haû ge é sau zúng sù gi, sau pé é matú, yhumsing é asak lé ap byi pyâm é nghut lhê. <sup>12</sup> Haû langchyáng kut sù gi, sau pé lé sing é sau zúng sù a nghut; haû mù, yhang gi, haû wamhkui lé lo é lé myàng jáng, saû pé lé pyâm to mù hpang ló byuq râ nghut lhê; haú hkûn, wamhkui gi, sau hpúng lé é htim luí, lhoq pyo pyám râ nghut lhê. <sup>13</sup> Yhang gi, langchyáng hpó nghut luí, haû sau pé é matú haí le a myit chiq byí é yanmai, hpang é nghut ri.

<sup>14</sup> Ngò gi, haû ge é sau zúng sù nghut lhê; haû Íwa gi, Ngo lé sê é nghut luí, Ngò le, haû Íwa lé sê é eq rajung za, <sup>15</sup> Ngá é sau pé lé, Ngò sê lhê; Ngá é sau pé le, Ngo lé sê akô nghut ri; Ngò gi, haû sau pé é matú, yhumsing é asak lé ap byí pyâm é nghut lhê. <sup>16</sup> Ngò gi, sau hkup shí mâ é a nghut é gotú sau pé wó ashí; sau haú pé lé le, Ngò, shuí yù ra râ nghut lhê; sau haú pé le, Ngá é htê lé gyo kó râ nghut lhê; haú hkûn, sau hpúng rahpúng za dut luí, sau zúng sù le rayuq za, nghut râ nghut lhê. <sup>17</sup> Ngò gi, Ngá é asak lé dum wó taú yù sháng gaq nghú, yhumsing é asak lé ap byí pyâm é yanmai, Ngá Wa gi, Ngo lé chyitdap é nghut lhê. <sup>18</sup> Ngá é asak lé, ó yuq èq le wó yu pyâm é a nghut, Ngá é myit dong byi pyâm é ru nghut lhê. Ngò gi, yhumsing asak lé ap byi pyám râ ahko ahkáng eq haû lé dum taú yù râ ahko ahkáng wó sù nghut lhê. Haû gi, Ngá Wâ chyáng mai Ngò wó yu é hkunmó nghut lhê." gâ ri.

<sup>19</sup> Dang haú pé é yanmai, haû Yudaq byu pé gi, myit a huí lhum dum dut byuq bekô nghut ri. <sup>20</sup> Haú mâ é bang myo myo gi, "Yhang gi, nat gang wang júng to luí, nâ byuq bê nghut ri. Yhâng é dang lé, haí mù gyô nyi akô lú?" ga taí bum akô.

<sup>21</sup> Nghut kôlhang, góbang gi, "Dang shi pé gi, nat gang wang júng tô é byù taí é dang a nghut. Nat gang gi, myoqjit sù lé, myoq wó lhoq myâng nhâng râ lú?" ga taí bum akô nghut ri.

### *Yudaq Byu Pé A Lumjng Kô É Hkyô*



<sup>22</sup> Yerusalem và mó má, Ap Nóng Poi\* jé bê nghut ri. Haû gi, gyoqmyò nám nghut ri. <sup>23</sup> Haû hkûn, Yesuq gi, haû noqkuq yhûm wàng mâ é, Sholumon é Jirop má sô yông wún ri. <sup>24</sup> Haû u lé, haû Yudaq byu pé gi, Yhâng é lhîngkhyuq má lé zîng bùm kômù, "Nàng gi, ngamoq lé hkâ-myháng jé shoq úng-áng nhang nyi râ l hú? Nàng, Hkrisduq nghut le gi, ngamoq lé san za taí kyô pyám laq." ga taí akô.

<sup>25</sup> Yesuq gi, "Ngò, nungmoq lé taí kyo bê nghut lhê; nghut kôlhang, nungmoq a lumjîng kó nghut ri. Ngá Wâ é myîng mai, Ngò kut é laklaí kumlhá haû pé gi, Ngá é matú saksé hkám byî nyi ri. <sup>26</sup> Nghut kôlhang, nungmoq gi, Ngá é sau a nghut kô é yanmai, a lumjîng kó nghut ri. <sup>27</sup> Ngá é sau pé gi, Ngá é htê lé dat gyô akô; Ngò gi, yhangmoq lé sê lhê; yhangmoq le, Ngá htâng châng akô nghut ri. <sup>28</sup> Ngò gi, yhangmoq lé, ahtum abyuq é asak byî é nghut mù, yhangmoq gi, hkâ-nhám le htên byoq kó râ a nghut; ó yuq èq le, yhangmoq lé, Ngá é loq mai wó lú yû râ a nghut. <sup>29</sup> Yhangmoq lé, Ngá é loq má ap byi tô é sù, haû Ngá Wa gi, lhunglhâng htoq má je gyaú Sù nghut lhê; ó yuq èq le, yhangmoq lé, Ngá Wâ é loq mai wó lú yû râ a nghut. <sup>30</sup> Ngò eq haû Îwa gi, rayuq za nghut lhê." ga tû taí ri.

<sup>31</sup> Haû hkûn, haû Yudaq byu pé gi, Yesuq lé, dú râ matú luqgok dum kui akô. <sup>32</sup> Nghut kôlhang, Yesuq gi, yhangmoq lé, "Haû Îwâ chyáng mâ é laklaí kumlhá mó pé myo myo, Ngò, nungmoq lé tûn shit bê nghut lhê. Nungmoq, Ngo lé dú râ gi, hká lhûm é yanmai nghut akô l hú?" ga myî ri.

<sup>33</sup> Haû Yudaq byu pé gi, "Ngamoq, Nang lé dú râ gi, haû pé hká lhûm é yanmai le a nghut; Nàng gi, byù rayuq nghut to luí, Garai Gasang nghut é đông taí whuí luí, Yhang lé rhoí dang taí é yanmai, dú râ nghû lhê." ga tû taí akô.

<sup>34</sup> Haû hkûn, Yesuq gi, yhangmoq lé, "Nungmoq gi, garaí pé nghut akô nghû, Ngò taí bê nghut lhê.† ga nungmoq é tarâ má kê to lhê a nghut kó l hú? <sup>35</sup> Chyúmdang haû lé gi, a ge lhoq hpyoq pyâm é nghut luí, haû Garai Gasâng é mungdang lé wó yu é bang lé, 'garaí pé' gâ é nghut le gi, <sup>36</sup> haû Îwa mai, Yhang é matú hkyin htoq yû luí, mingkan má nhang é Sù eq séng luí gi, hká đông nghû kó râ l hú? 'Ngò gi, Garai Gasâng é Yhangzo nghut lhê.' nghû taí é yanmai, Ngò gi, Garai Gasang lé taí hpoí ri nghû, nungmoq, haí mù Ngo lé mara hûn akô l hú? <sup>37</sup> Ngá Wâ é muzó pé lé, Ngò kut é a nghut jáng, Ngo lé hkâlumjîng kó. <sup>38</sup> Nghut kôlhang, Ngò, haû pé lé kut é nghut le gi, nungmoq, Ngo lé a lumjîng kôlhang, haû muzó pé lé lumjîng keq; haû hkûn, haû Îwa gi, Ngò má nghut nyi é hkyô lé le, Ngò gi, haû Îwa má nghut nyi é hkyô lé le, nungmoq wó sé luí, sê gyo kó râ nghut lhê." ga tû taí ri. <sup>39</sup> Yhangmoq gi, Yhang lé chyup râ dum hen akô; nghut kôlhang, Yhang gi, yhangmoq é loq mai wó lut ló bê nghut ri.

<sup>40</sup> Hau htâng, Yesuq gi, haû Yodan làng he hpoq mâ é, Yohan, wui-myhup hkám byî hi é jowò má ló jé ri. Haû má, Yhang nyi nyi é nghut luí, <sup>41</sup> byù myo myo gi, Yhâng chyáng lé jé bum akô. Yhangmoq gi, "Yohan gi, limik kumlhá a kut wú é nghut kôlhang, shí yuq eq séng luí, Yohan taí é hkyô lhunglháng gi, têng ri." ga taí bum akô. <sup>42</sup> Haû jowò má, byù myo myo gi, Yesuq lé lumjîng bùm bekô nghut ri.

## 11

### Lazaruq Shi Byuq É Hkyô

<sup>1</sup> Ahkuí, Lazaruq gâ é byù rayuq gi, no nyi ri. Yhang gi, haû Mariq eq yhângnhá Mahtaq nhik nyi é Behtani và mâ é sù nghut lhê. <sup>2</sup> Mariq haû gi, Yhumsîng lé namngón-xû hut gyun luí, hkyî má yhâng xam èq sùt byî é sù nghut ri; yhang gi, haû no nyi é Lazaruq é yhângnhá nghut ri. <sup>3</sup> Haû mù, haû yhângnhá nhik gi, "Yhumsîng ê, Nàng chyitdap é sù gi, no nyi ri." ga, Yesuq chyáng ê taí nhang akô.

<sup>4</sup> Yesuq gi, dang haû lé wó gyo jáng, "Nòhpyo haû gi, shî-nò a nghut. Haû Garai Gasâng é Yhangzo gi, hau é yanmai, hpungwup shingkang wó dan hû é hui sháng gaq ga, Garai Gasâng é hpungwup shingkâng é matú dut é ru nghut lhê. <sup>5</sup> Yesuq gi, Mahtaq eq yhanggu

\* 10:22 Ap Nóng Poi gâ é gi, Garai Gasâng é yhûm lé ap nóng lé gâ lhê. † 10:34 Hkya-on 82:6

Mariq lé le, Lazaruq lé le, chyitdap ri. <sup>6</sup> Haú su mù, Yhang gi, haú Lazaruq no nyi ri gâ é lé, wó gyô é hkûn, haú Yhang nyi é jowò má, í nyí nyi tô ashî nghut ri.

<sup>7</sup> Hau htâng, Yhang gi, Yhâng é chángzô pé lé, "Nga-nhúng gi, Yuda mau shut dum taú ló sháng." ga taí ri.

<sup>8</sup> Haú hkûn, yhangmoq gi, "Rabai ê, hkû-yoq za, haú Yudaq byu pé, Nang lé luqgok eq dú sat râ da kô é nghut le nhîng, ahkuî, haú shut dum taú ló râ lúhú?" ga Yhang lé myî akô.

<sup>9</sup> Yesuq gi, "Nyí gi, hkyíng hkum raxe í hkum bo lhê a nghut kó lúhú?" Nyí má hkyô sô é sù gi, mingkan shi é maubó é yanmai myoq myàng luí, lengbat râ a nghut. <sup>10</sup> Myín lé hkyô sô é sù kúm gi, maubó lé a wó é yanmai, lengbat lhê." ga tû taí ri.

<sup>11</sup> Haú su ga taí é htâng má, Yhang, yhangmoq lé xoq taí kyô é gi, "Nga-nhông é luzúm Lazaruq yhup myhî byuq bê nghut ri; nghut kôlhang, Ngò gi, yhang lé ê nhaú toq râ nghut lhê." gâ ri.

<sup>12</sup> Haú hkûn, Yhâng é chángzô pé gi, "Yhumsîng ê, yhang yhup myhî tô é nghut le gi, ge lò râ nghut lhê." gâ taí akô. <sup>13</sup> Yesuq gi, Lazaruq shi byuq bê hkyô lé taí é nghut ri; nghut kôlhang, Yhâng é chángzô pé gi, gè gè yhup myhî tô é lé taí é su ngam pyâm akô nghut ri.

<sup>14</sup> Haú mù luí, Yesuq, yhangmoq lé san za jáng taí kyô é gi, "Lazaruq gi, shi byuq bê nghut lhê. <sup>15</sup> Ngò haú má a nyi záng é gi, nungmoq wó lumjîng râ matú nghut luí, nungmoq é matú Ngò gabú byî ri; yhâng chyáng e ló sháng hkoi." gâ ri.

<sup>16</sup> Haú mù, haú Zozûm le gâ é Htomaq gi, gotû chángzô pé lé, "Nga-nhúng le, Yhang eq rahá shî sháng gaq, châng e ló sháng." ga taí ri.

#### *Haú î-nhâ Nhik Lé, Yesuq Nhik Tîng É Hkyô*

<sup>17</sup> Yesuq gi, jé e é hkûn, haú Lazaruq lé lup má kat pyâm é myi nyí nghut bê hkyô lé, lhom táí kyô akô. <sup>18</sup> Behtani wà gi, Yerusalem wà mó eq í déng kô za wê lhûm ri. <sup>19</sup> Haú mù, Yudaq byu pé myo myo gi, Mahtaq eq Mariq nhik é yhanggu shi byuq é yanmai, nhik tîng byi kó râ ga lé jé nyi bum akô nghut ri. <sup>20</sup> Mahtaq gi, Yesuq jé lé lo é hkyô lé wó gyo jáng, htoq ê mù, Yhang lé ê huí ri; nghut kôlhang, Mariq gi, yhûm má nyi tô ri.

<sup>21</sup> Mahtaq gi, Yesuq lé, "Yhumsîng ê, Nàng, shî má nyi tô é ru nghut le gi, ngá gu shi byuq râ a nghut. <sup>22</sup> Nghut kôlhang, ahkuí le, Garai Gasâng chyáng Nàng haí dung kôlhang, Yhang byi râ nghut é lé, ngò sê lhê." ga taí ri.

<sup>23</sup> Yesuq gi, yhang lé, "Nung gu, dum dui toq râ nghut lhê." ga taí ri.

<sup>24</sup> Haú hkûn, Mahtaq gi, "Haú jîhtûm buinyî má dum dui toq é hkûn, yhang le dum dui toq râ nghut é lé, ngò sê lhê." ga tû taí ri.

<sup>25</sup> Haú hkûn, Yesuq gi, yhang lé, "Ngò gi, dum dui toq hkyô eq asak nghut lhê. Ngo lé lumjîng é sù gi, shi byuq kôlhang, dum dui râ nghut lhê. <sup>26</sup> Asak dui nyi luí, Ngo lé lumjîng é sù ó yuq nghut kôle, hkâ-nhám le shi é hui râ a nghut. Nàng gi, dang shî lé lumjîng lhê lúhú?" ga taí ri.

<sup>27</sup> Haú hkûn, yhang gi, "Yhumsîng ê, ngò lumjîng lhê. Nàng gi, haú mingkan má jé lé lô râ nghut é, Garai Gasâng é Yhangzo, Hkrisduq† nghut é lé, ngò lumjîng lhê." ga, Yhang lé taí kyô ri.

<sup>28</sup> Yhang gi, haú su ga taí é htâng má, taú ló mù, yhanggu Mariq lé, tsik za wut yù luí, "Haú Sará jé tô ri; Yhang gi, nang lé myî nyi ri." ga taí kyô ri. <sup>29</sup> Mariq gi, haú lé wó gyo jáng, hân za toq mù, Yesuq chyáng ê bê nghut ri. <sup>30</sup> Haú u lé, Yesuq gi, haú wâ hkaú má a wang ló shî e za, Mahtaq eq huí é jowò má ru nyi tô ashî nghut ri. <sup>31</sup> Haú yhúm hkaú má, Mariq lé nhik tîng nyi é Yudaq byu pé gi, yhang hân za toq luí, htoq ló é lé myàng kôjáng, yhang, lup má ê ngaú râ dâ lhê abe ga, myit yù kômù, yhang htâng châng e ló bum akô nghut ri.

\* 11:9 Nyí gi, hkyíng hkum raxe í hkum bo lhê a nghut kó lúhú? gâ é gi, ahkyíng a jé shimá, muzó nô é gi, a ge é nghut lhê gâ é nghut ri. † 11:27 Hkrisduq lé Mesaia le gâ lhê.

<sup>32</sup> Mariq gi, Yesuq nyi tô é jang má jé mù, Yhang lé myàng jáng, Yhâng é hkyî wang má ngóm gop to luî, "Yhumsîng ê, Nàng, shî má nyi tô é ru nghut le gi, ngá gu shi byuq râ a nghut." ga taî ri.

<sup>33</sup> Yesuq gi, Mariq ngaù nyi é lé le, haù yhang eq rahá lé lo é Yudaq byu pé ngaù nyi kô é lé le, myàng jáng, Yhâng é myit má gyai yhang hkâm zo wuî é eq myit wui myit hke dut nyi ri. <sup>34</sup> Haù mù, Yhang gi, "Yhang lé, hkâmá tô tô akô lhú?" ga myi jáng, yhangmoq gi, "Yhumsîng ê, lé wú wú aq." ga tâ taî akô.

<sup>35</sup> Yesuq gi, ngaù bê nghut ri.

<sup>36</sup> Haù mù, haù Yudaq byu pé gi, "Wú keq, Yhang gi, Lazaruq lé, haù-í yhang chyit ri-nhung!" ga taî akô.

<sup>37</sup> Nghut kôlhang, ra-am gi, "Haù myoqjit sù lé, myoq wó lhoq myâng byî é Sù gi, shí yuq lé le, a shî lo shoq a wó kut é lhú?" ga taí bum akô nghut ri.

#### *Lazaruq Lé Lhoq Dui Toq É Hkyô*

<sup>38</sup> Yesuq gi, Yhâng é myit má radàm dum gyai yhang hkâm zo wuî é eq, lup má lé jé ri. Lup haù gi, luqhkýung dong nghut luî, luqgok rachâm èq chí tô akô. <sup>39</sup> Haù mù, Yhang gi, "Luqgok haù lé yu pyám keq." ga taî ri.

Haù hkûn, haù shi byuq su é yhângnhá Mahtaq gi, "Yhumsîng ê, yhang lé, haù má tô tô é myi nyí lhang nghut bê yanmai, ahkuî gi, bup nàm berâ nghut lhê." ga taî ri.

<sup>40</sup> Haù mù, Yesuq gi, "Nàng, lumjîng é nghut le gi, haù Garai Gasâng é hpungwup shing kang lé, wó myâng râ nghut lhê nghû, Ngò, nang lé taî kyô wú bê a nghut lhú?" ga taî ri.

<sup>41</sup> Haù mù luî, yhangmoq gi, luqgok haù lé yu pyâm akô. Hau htâng, Yesuq gi, mauhkûng shut tu wú luî, "Áwa ê, Nàng, Ngá é dang lé gyo byî é yanmai, Ngò, Nang lé jeju hkya-ôn lhê. <sup>42</sup> Nàng gi, hkâ-nhám le, Ngá é dang lé gyo byî nyi é lé, Ngò sê lhê; nghut kôlhang, Nàng, Ngo lé nhang kat é hkyô lé, shî má yap tô é bang lumjîng kó sháng gaq nghû, yhangmoq é matú, Ngò, isu nghû taî é nghut lhê." ga taî ri.

<sup>43</sup> Yhang gi, haù su ga taí luî, "Lazaruq ê, htoq lô aq." ga htê mó èq wut kat ri. <sup>44</sup> Haù hkûn, haù shi byuq bê sù gi, yhâng é loq hkyî pé má pân èq htup yup to gû eq, yhâng é myoqdong má hpajet èq htup to gû htoq lo ri.

Haù mù, Yesuq gi, yhangmoq lé, "Yhang lé hpyi pyám byi mù, nhang kat keq." ga taî ri.

#### *Yesuq Lé Sat Pyám Râ Haq Dâ É Hkyô*

*Mht 26:1-5; Mrk 14:1-2; Luk 22:1-2*

<sup>45</sup> Haù mù luî, Mariq chyáng lé kûn é Yudaq byu pé myo myo gi, Yesuq kut é hkyô lé myàng jáng, Yesuq lé lumjîng bùm bekô nghut ri. <sup>46</sup> Nghut kôlhang, yhangmoq chyáng mâ é ra-am gi, haù Hparishe pê chyáng ló mù, Yesuq kut é hkyô lé, ló taî kyô akô. <sup>47</sup> Haù mù, haù hkyangjong agyi pé eq Hparishe pé gi, Yudaq byìn tú wapdoq<sup>‡</sup> zuphpong lé ji tsîng to mù, "Byù shí yuq gi, limik kumlhá myo myo kut shit nyi ri. Nga-nhung, hkâsu kut le gè râ lhú? <sup>48</sup> Nga-nhung, Yhang lé haù su ru kut nyî nhang é nghut jáng, yuq hkangmó gi, Yhang lé lumjîng kó râ nghut lhê; haù hkûn, Romaq byu pé gi, jé lé mù, nga-nhung é jowò eq nga-nhung é byuhú lé, lé lhoq htên pyám kó râ nghut lhê." ga taî akô nghut ri.

<sup>49</sup> Haù hkûn, yhangmoq chyáng mâ é, haù zân má hkyangjong mó nghut nyi é sù, Kayahpaq gi, yhangmoq lé, "Nungmoq gi, haù lhang a sé kó nghut ri-nhung! <sup>50</sup> Haù byuhú gón htên byoq byuq râ htoq má, byuhú hau é matú, byù rayuq shî hkâm byi le gi, nungmoq é matú je gè râ hkyô lé, nungmoq, a myit jé kó nghut ri." ga taí kat ri.

<sup>51</sup> Yhang haù su ga taí é gi, yhumsing myit đông a nghut e za, haù zân má, yhang gi, hkyangjong mó nghut é eq rajung za, haù Yudaq byuhú é matú, Yesuq shî hkâm byi râ nghut é hkyô lé le, <sup>52</sup> byuhú hau é matú baù a nghut e za, haù byo myín tô é, Garai Gasâng é yhangzô pé lé, shuî tsîng yù mù, rading rallhum za dut nhâng râ matú, shî hkâm byi râ

<sup>‡</sup> 11:47 Yudaq byìn tú wapdoq lé Grik đông gi, San-hedrin gà lhê.

nghut é hkyô lé le, myiqhtoi dang taí é ru nghut lhê. <sup>53</sup> Haú nyí mai, yhangmoq gi, Yesuq lé sat râ matú chôm da bekô nghut ri.

<sup>54</sup> Hau é yanmai, Yesuq gi, Yudaq byu pê gyoro má, de de a sô shit wún e za, haú mai htoq luí, haú yoso eq chyâng lhúm é mau mâ é, Ehprim gâ é wà má ê mù, Yhâng é chángzô pé eq rahá nyi nyi ri.

<sup>55</sup> Haú Yudaq byu pê é Lhoqlhai Poí jé râ za nghut é hkûn, byù myo myo gi, Lhoqlhai Poí a jé shi má, lhoq san lhoq yúng hking dông yhumsing gùng lé lhoq sân-yúng yú râ matú, yosô wà pé mai, Yerusalem wà mó shut doq ló bum akô. <sup>56</sup> Haú mù, yhangmoq gi, Yesuq lé ho nyí kô é nghut luí, haú noqkuq yhúm wàng má yap to uchyang, rayuq eq rayuq, "Nungmoq, hkâsu wó myit akô lhú? Yhang gi, Poí má a lé lô râ gâ lhê lhà?" ga myí lhúm bum akô. <sup>57</sup> Nghut kôlhang, haú hkyangjong agyi pé eq Hparishe pé gi, Yesuq lé wó chyup yú râ matú, Yesuq hkâmá nyi é lé, sê é sù ó yuq nghut kôle, yhangmoq lé lo shit kyo râ lhê ga dangmó hkyó tô akô nghut ri.

## 12

*Yesuq, Namngón-xù But Byi Huí É Hkyô*

*Mht 26:6-13; Mrk 14:3-9*

<sup>1</sup> Haú Lhoqlhai Poí jé râ hkyuq nyí râ ashî hkûn, Yesuq gi, Yhâng èq shi é mai lhoq dui toq yu é sù, Lazaruq nyi é Behtani wà má ló jé ri. <sup>2</sup> Haú má, Yesuq lé hkunggâ é dông myinzang byi tsô akô; Mahtaq gi, zoshuq jaú ri; Lazaruq gi, haú Yesuq eq rahá siboí má zô zung nyi bang mâ é rayuq nghut ri. <sup>3</sup> Haú hkûn, Mariq gi, haú nardu amyit mai za saí yu é, gyai hpaú é namngón-xù raxe í rûng kô yu lé mù, Yesuq é hkyí má hut gyun byi luí, yhâng é uxam èq sùt byí ri. Haú mù, yhúm haú gi, namngón-xù shôm byíng to bê nghut ri.

<sup>4</sup> Nghut kôlhang, Yesuq lé ap pyám râ nghut é, Yhâng é chángzo rayuq nghut sù, Yudaq Iskarut gi, <sup>5</sup> "Haú myùng bang lé byí pyám râ matú, haú namngón-xù lé denari sum sho èq hái mù a ûng pyám é lhú?" ga taí ri. <sup>6</sup> Yhang haú su ga taí é gi, myùng bang lé chiq byí é yanmai taí é a nghut, yhang gi, ngùn htung chûng sù nghut luí, haú má kat tô é ngùn lé, yhumsing é matú lhaq yu chûng chûng kut é, hkau sù nghut é yanmai taí é nghut ri.

<sup>7</sup> Yesuq gi, "Nghut shang gaq; yhang gi, Ngo lé myhup yhum râ buinyi é matú, namngón-xù shí lé hkong to byí é nghut lhê. <sup>8</sup> Haú myùng bang gi, nungmoq eq rahá hkâ-nhám le nyi râ nghut lhê; nghut kôlhang, Ngò gi, nungmoq eq rahá ayang nyi nyi râ sù a nghut." ga tû taí ri.

<sup>9</sup> Haú u lé, Yudaq byu pé ajùm ayò gi, haú má Yesuq nyi é lé sé kôluí, lé lo akô; haú bang gi, Yesuq é yanmai za lé kô é a nghut, haú Yhâng èq shí bê mai lhoq dui toq yu é Lazaruq lé, lé myâng nau kô é yanmai le nghut ri. <sup>10</sup> Haú mù, haú hkyangjong agyi pé gi, Lazaruq lé le, sat pyám râ matú chôm hpyé lhúm akô. <sup>11</sup> Hkâsu mù gâ le, yhâng é yanmai, haú Yudaq byu pé myo myo gi, Yesuq chyáng lhing ló kômù, Yhang lé lumjíng bûm kô é yanmai nghut ri.

*Yesuq, Yerusalem Wà Mó Má Wang E Ló É Hkyô*

*Mht 21:1-11; Mrk 11:1-11; Luk 19:28-40*

<sup>12</sup> Hau htang nyí, haú Poí má lé jé é byù moq mó gi, Yerusalem wà mó shut Yesuq jé doq ló é hkyô lé, wó gyô bum akô. <sup>13</sup> Haú mù, yhangmoq gi, byùm-haq pé yu chûng mù, Yhang lé ê tê uchyang,

"Hosana!"\*

Haú Yhumsing é myìng mai jé lé lô Sù gi, hkungsô wó nyí sháng gaq ô!

Haú Israelaq byu pê é Hkohkâm gi, hkungsô wó nyí sháng gaq!"<sup>☆</sup>

ga, taí garû bum akô nghut ri. <sup>14</sup> Haú hkûn, Yesuq gi, logúng zo radu lé myàng luí, doq jí ri;

\* 12:13 Hebre dang má, hosana gâ é gi, "ahkuí hkyi yù aq" gâ é nghut lhê. Nghut kôlhang, bun zo shí má gi, hkyo-on dang dông chung é nghut lhê. ☆ 12:13 Hkyo-on 118:25-26

<sup>15</sup> haù gi, "Zi-un byizo<sup>†</sup> ê, hkâgyuq; wú keq, nungmoq é hkohkâm gi, logúng zo má ji mù lé lo nyi ri."<sup>☆</sup>

ga, kâ tô é eq rajung za nghut ri.

<sup>16</sup> Haù pé banshoq lé, Yhâng é chángzô pé gi, sâng-hi lé a sê gyo kó; nghut kôlhang, Yesuq gi, hpungwup shing kang dan hu huí é htâng má za sheq, haù pé gi, Yhang eq séng luí kâ tô é hkyô lé le, haù eq rajung za, Yhang lé, yhangmoq mai kut bê hkyô lé le, bûn sê kat akô nghut ri.

<sup>17</sup> Haù Yesuq gi, lup hkaù mâ é Lazaruq lé wut luí, shi é mai lhoq dui toq yu é hkûn, Yhang eq rahá nghut é shiwa hpúng gi, haù hkyô lé, saksé hkám byí nyi akô. <sup>18</sup> Haù mù, byù myo myo gi, Yesuq tân shit é limik kumlhá hau é hkyô lé, wó gyo kô é yanmai, Yhang lé hui râ matú htoq e akô. <sup>19</sup> Hau é yanmai, haù Hparishe pé gi, "Wú keq, nganhnúng, hkâsu yhang a ge kut lo nhung! Haù mingkan gón gi, Yhâng htâng châng bùm bekô." ga, rayuq eq rayuq taí lhûm bum akô nghut ri.

### *Yesuq, Yhang Shí Râ Hkyô Lé Te Taí É Hkyô*

<sup>20</sup> Haù hkûn, noqkuq râ matú Poí má doq ló é bang má, Grik pé ra-am le bo tô akô.

<sup>21</sup> Yhangmoq gi, Galile mau, Bet-saida wà mó mâ é Hpilip chyáng lé jé kômù, "Âhkaú ê, ngamoq gi, Yesuq lé myàng nau ri." ga, dung tôngbán akô. <sup>22</sup> Haù mù, Hpilip gi, Andre lé, ê taí kyô ri; Andre eq yháng nhik gi, Yesuq lé, ê taí kyô akô.

<sup>23</sup> Haù mù, Yesuq gi, "Haù Byu Yhangzo gi, hpungwup shing kang dan hù é hui râ matú, ahkyíng jé bê nghut ri. <sup>24</sup> Ngò, nungmoq lé teng za taí kôlé, sungsô racham gi, myigùng má gyó luí, shi byuq e za a nghut jáng, acham roq za dut nyi râ nghut lhê. Nghut kôlhang, shi byuq é nghut le gi, ashi myo myo lhoq htoq râ nghut lhê. <sup>25</sup> Haù yhumsing é asak lé chyitdap é sù gi, asak sùm byuq râ nghut lhê. Mingkan shí má, haù yhumsing é asak lé a jú é sù kúm gi, ahtum abyuq é asak matú, yhumsing é asak lé wó sing to râ nghut lhê. <sup>26</sup> Ngo lé dojaú é sù ó yuq nghut kôle, Ngá htâng cháng râ lhê; Ngò, hkâmá nyi le, Ngá é dui-nhâng zoshâng le nyi râ nghut lhê. Ngá Wa gi, haù Ngo lé dojaú é sù lé, shigyaú râ nghut lhê.

<sup>27</sup> Ahkuí, Ngò, myit wúhke nyi ri; Ngò hkâsu nghú taí râ lhi? 'Áwa ê, ahkyíng shí mai Ngo lé lhoq lhut yù laq.' nghú taí râ lú? Nghut kôle, Ngò gi, ahkyíng shi é matú za sheq jé lé é ru nghut lhê. <sup>28</sup> Áwa ê, Náng é myìng lé hpungwup shing kang dan hu nhâng aq hkoi!" ga taí ri.

Haù hkûn, "Ngò gi, Ngá é myìng lé hpungwup shing kang dan hu nhâng bê nghut luí, dum dan hu nhâng shirâ nghut lhê." gâ é htê, mauhkúng mai htoq lo ri. <sup>29</sup> Haù má nyi tô é byù moq mó gi, haù lé wó gyo kôjáng, "Maugum gum ri." gâ bum akô; ra-am gi, "Yhang lé, maumang lagyo rayuq nyo ri." ga taí bum akô nghut ri.

<sup>30</sup> Haù hkûn, Yesuq gi, "Danghtê shí gi, Ngá é matú a nghut, nungmoq é matú ru nghut lhê. <sup>31</sup> Ahkuí gi, mingkan shí lé jéyáng râ ahkyíng nghut bê; mingkan shi é zau gi, ahkuí hkat htoq pyâm é hui râ nghut lhê. <sup>32</sup> Nghut kôlhang, Ngò gi, myigùng mai tu shap kat é huí é hkûn, byù lhunglhang bang lé, Ngá chyáng shê yù râ nghut lhê." ga taí ri. <sup>33</sup> Yhang haù su ga taí é gi, Yhang hkâsu kut shí râ nghut é hkyô lé shit é nghut ri.

<sup>34</sup> Haù hkûn, haù byù moq mó gi, "Haù tarâ laiká má, Hkrisduq gi, ahtum abyuq dui nyi râ nghut lhê gâ é lé sheq, ngamoq wó gyô wú é ru nghut le nhîng, 'Haù Byu Yhangzo gi, tu shap é hui ra râ nghut lhê.' nghú, Nàng hkâsu kut wó taí lhê lú? Haù Byu Yhangzo gi, ó yuq nghut lhê lú?" ga, myí akô.

<sup>35</sup> Haù mù, Yesuq gi, yhangmoq lé, "Nungmoq chyáng, haù maubó joq nyi râ ahkyíng gi, a lûm myáng lo nghut ri. Mauchut gi, nungmoq chyáng a hkyit jé sháng gaq, nungmoq chyáng, haù maubó joq nyi ashí hkûn sô nyi keq; hkâsu mù gâ le, haù mauchut má sô nyi é sù gi, yhang hká shut e ló nyi é lé, a sé nghut ri. <sup>36</sup> Nungmoq gi, maubó é yhangzô pé

<sup>†</sup> 12:15 Hebre myíng đông Zi-un byizo gâ é gi, Yerusalem mâ é byu pé lé gâ é nghut lhê. <sup>☆</sup> 12:15 Zhk 9:9

wó dut kó sháng gaq, haû maubó joq nyi ashî hkûn, haû lé lumjîng keq." ga taî ri. Yesuq gi, dang haû ban taí jáng, yhangmoq chyáng mai htoq ló luî, haq byuq bê nghut ri.

*Yudaq Byu Pé, A Lumjîng Ru Dut Nyî Kô É Hkyô*

<sup>37</sup> Yesuq gi, yhangmoq é hí má, limik kumlhá haú pé banshoq kut shit kôlhang, yhangmoq gi, Yhang lé a lumjîng shi kó nghut ri. <sup>38</sup> Haû gi, "Yhumsîng ê, nga-nhûng é danglù lé, ó yuq wá lumjîng byî wú é lhú? Haû Yhumsîng é loq<sup>‡</sup> gi, ó yuq lé htoq shit wú é lhú?"<sup>☆</sup> ga, myiqhtoi Esai-aq taî tô é dang lo dik é nghut ri.

<sup>39</sup> Yhangmoq a wó lumjîng kô é hkyô gi, Esai-aq taî é dang má, <sup>40</sup> "Yhang gi, yhangmoq é myoqjí lé lhoq chit byi luî, yhangmoq é i-myyit lé lhoq htan to byi bê nghut ri; haû mù, yhangmoq gi, myoqjí èq a wó myâng, i-myyit èq a wó sê gyo, Ngò, yhangmoq lé yâ ge byi râ matú, a wó lhing taû lò kó dut râ nghut lhê."<sup>☆</sup> ga le bo tô é yanmai nghut lhê. <sup>41</sup> Esai-aq gi, Yesuq é hpungwup shingkang lé myang é yanmai, Yhang eq sêng é hkyô lé, haû su ga taí é nghut ri.

<sup>42</sup> Nghut kôlhang, haû uphkâng bang myo myo lhang gi, haû u má, Yesuq lé lumjîng bum akô. Nghut kôle, yhangmoq gi, Hparishe pé èq tarajong mai lhoq htoq pyâm é hui râ lé, gyuq kô é yanmai, yhangmoq lumjîng bê hkyô lé a yín yu bùm kó nghut ri. <sup>43</sup> Hkâsu mù gâ le, yhangmoq gi, Garai Gasâng chyáng mâ é aróng lé, ô nau é htoq má, byu pé chyáng mâ é aróng lé, je ô nau kô é yanmai nghut ri.

<sup>44</sup> Haû mù, Yesuq, htê mó èq taí é gi, "Ngo lé lumjîng é sù gi, Ngo lé baú lumjîng é a nghut; haû Ngo lé nhang kat é Sù lé le, lumjîng é nghut lhê. <sup>45</sup> Ngo lé myang é sù gi, haû Ngo lé nhang kat é Sù lé le myang é nghut lhê. <sup>46</sup> Ngò gi, Ngo lé lumjîng é sù ó yuq le, mauchut hkaû má a nyi sháng gaq nghû, maubó dông mingkan má lé jé é nghut lhê.

<sup>47</sup> Ngò gi, Ngá é dang lé wó gyo luî, a châng é sù ó yuq lé le, jéyáng râ a nghut; hkâsu mù gâ le, Ngò gi, mingkan lé jéyáng râ matú jé lé é a nghut; haû mingkan lé hkyi yù râ matú sheq, jé lé é ru nghut lhê. <sup>48</sup> Ngo lé he-ngik luî Ngá é dang lé a hap yu é sù lé, jéyáng râ Sù rayuq nyi lhê; Ngò taí é danghkun haû gi, haû jihtûm buinyi má, haú yuq lé mara byi râ nghut lhê. <sup>49</sup> Hkâsu mù gâ le, Ngò gi, Ngá é myit dông taí é a nghut; nghut kôlhang, Ngò haî taí râ eq hkâsu nghû taí râ lé gi, haû Ngo lé nhang kat é sù îwa mai, Ngo lé hkunmó hkyô to bê nghut lhê. <sup>50</sup> Haû Yhâng é hkunmó gi, ahtum abyuq é asak nghut é lé, Ngò sê lhê. Haû mù luî, Ngò, haî taí kôlé, haû îwa mai Ngo lé taí kyô é lé za, taí é nghut lhê." ga ri.

## 13

*Chángzô Pé É Hkyî Chi Byî É Hkyô*

<sup>1</sup> Haû Lhoqlhai Poî jé râ hí má za, Yesuq gi, Yhang, mingkan shî mai Yhâng Wâ chyáng htot ló râ ahkýng jé bê hkyô lé, sê ri. Yhang gi, mingkan má nyi é, Yhâng é byu pé lé chyitdap nyi é nghut luî, jihtûm jé shoq Yhâng é chyitdap myit lé shit râ nghut lhê.

<sup>2</sup> Myinzang zô nyi bùm kô é u lé, nat Tsadán gi, Simun é yhangzo Yudaq Iskarut chyáng, Yesuq lé ap pyám râ myit kat byî to gû nghut ri. <sup>3</sup> Yesuq gi, haû lunglhang lé îwa mai Yhâng é loq má ap byi to bê nghut é lé le, Yhang gi, Garai Gasâng chyáng mai lé é sù nghut luî, Garai Gasâng chyáng dum taû ló râ sù nghut é lé le, sê ri. <sup>4</sup> Haû mù, Yhang gi, zohpoq mai toq luî, Yhâng é bumó lé hkyut pyám mù, hpyidum má hpajet ralhûm èq hpyihit hit tô ri. <sup>5</sup> Hau htâng, Yhang gi, jirung má uchyam hut kat mù, Yhâng é chángzô pé é hkyî chi byi luî, haû Yhâng é hpyidum má hit tô é hpajet èq sut huí byî ri.

<sup>6</sup> Yhang gi, Simun Petruq chyáng jé jáng, Simun Petruq gi, "Yhumsîng ê, Nàng gi, ngá hkyî lé chi byi râ nghut lhê lhú?" ga myî ri.

<sup>‡</sup> 12:38 Yhumsîng é loq gâ é gi, Yhumsîng é hpungwup a-tsam lé gâ é nghut lhê. <sup>☆</sup> 12:38 Esai 53:1 <sup>☆</sup> 12:40 Esai 6:10

<sup>7</sup> Haú hkûn, Yesuq gi, "Ngò, haí kut nyi é hkyô lé, ahkuî, nàng sê gyo râ a nghut; nghut kôlhang, htàng má sê gyo râ nghut lhê." ga tû taí ri.

<sup>8</sup> Petruq gi, "Ngá hkyî lé, Nàng, hkâ-nhám le wó chi byi râ a nghut." ga taí jáng, Yesuq gi, "Nang lé, Ngò a chi byî é nghut jáng, nàng gi, Ngò eq séng râ a nghut." ga tû taí ri.

<sup>9</sup> Haú hkûn, Simun Petruq gi, "Yhumsîng ê, haú su nghut jáng gi, ngá é hkyî lé baú za a nghut, ngá é loq eq ulhum lé le chi byi laq!" ga tû taí ri.

<sup>10</sup> Yesuq gi, "Gùng chi bê sù gi, hkyî za chi jáng, ragùngdû é sanséng bê nghut ri. Nungmoq gi, sanséng bekô; nghut kôlhang, yuq hkangmó gi, sanséng é a nghut." ga tû taí ri. <sup>11</sup> Hkâsu mù gâ le, Yhang gi, Yhang lé ap pyám râ sù ó yuq nghut é lé, sê é yanmai, "Nungmoq gi, sanséng é bang chyat a nghut." ga taí é nghut ri.

<sup>12</sup> Yesuq gi, yhangmoq é hkyî lé ban chi byi jáng, Yhâng é bumó lé wut mù, Yhâng é jowò má ló dum zùng luí, yhangmoq lé myi é gi, "Nungmoq gi, ahkuî, ngò kut byî é hkyô lé, sê gyo akô lhú? <sup>13</sup> Nungmoq, Ngo lé, 'Sarâ' ga le, 'Yhumsîng' ga le, wut kô é gi, a shut; hkâsu mù gâ le, Ngò gi, haú yuq yhang nghut lhê. <sup>14</sup> Ngò, nungmoq é Sarâ eq Yhumsîng nghut sù lhang, nungmoq é hkyî lé chi byî é nghut le gi, nungmoq le, rayuq eq rayuq é hkyî lé chi byî lhum râ dut lhê. <sup>15</sup> Nungmoq gi, Ngò, nungmoq lé kut byî é su kut kó sháng gaq nghû, Ngò, nungmoq lé alik kut shit tô é nghut lhê. <sup>16</sup> Ngò, nungmoq lé teng za taí kôlé, dui-nhâng zoshâng gi, yhumsîng htoq je kô é a nghut; lagyo gi, nhang kat é sù htoq je kô é a nghut. <sup>17</sup> Ahkuî, nungmoq gi, haú pé lé sé bekô nghut luí, châng kut kô é nghut jáng, hkungsô wó kó râ nghut lhê.

#### *Yesuq Lé Ap Pyám Râ Lé, Te Taí É Hkyô*

<sup>18</sup> Ngò gi, nungmoq banshoq bang lé lhoq ang luí taí é a nghut; Ngò hkyin yu é bang lé gi, Ngò sê lhê. Nghut kôlhang, 'Haú ngá é muk lé bo zô é sù gi, ngo lé, yhâng é hkyihtáng la-nhik eq nâng htíng râ nghut lhê.'<sup>\*</sup> gâ é Chyúmdang lé, lhoq dik râ matú ru nghut lhê.

<sup>19</sup> Haú a dut htoq shimá, Ngò, nungmoq lé taí kyô nyi é gi, haú dut é hkûn, Ngò gi, haú Yuq\* nghut é lé, nungmoq wó lumjínng kó râ matú nghut lhê. <sup>20</sup> Ngò, nungmoq lé teng za taí kôlé, Ngò nhang kat é sù lé, lhom hap yu é sù ó yuq nghut kôle, Ngo lé hap yu é nghut bê; Ngo lé hap yu é sù ó yuq nghut kôle, haú Ngo lé nhang kat é Sù lé hap yu é nghut bê." gâ ri.

<sup>21</sup> Yesuq gi, haú su ga taí é htàng má, myit wuîhke nyi mù, saksé hkâm é gi, "Ngò, nungmoq lé teng za taí kôlé, nungmoq mâ é rayuq sù gi, Ngo lé ap pyám râ nghut lhê." gâ ri.

<sup>22</sup> Haú mù, Yhâng é chángzô pé gi, ó yuq lé taí záng nyi é hkyô lé, rago a sé kô é yanmai, rayuq eq rayuq wú tsuq lhûm bum akô nghut ri. <sup>23</sup> Haú Yesuq chyitdap é chángzo rayuq gi, Yesuq é tanghkoí nâm má leq nge zung tô ri. <sup>24</sup> Haú mù, Simun Petruq gi, chángzo haú yuq lé, loq lik kat mù, "Yhang, ó yuq lé lhoq ang luí, taí nyi é hkyô lé, myi wú aq." ga taí ri.

<sup>25</sup> Haú mù, chángzo haú gi, Yesuq é tanghkoí má saí leq nge zung mù, "Yhumsîng ê, haú gi, ó yuq nghut lhê lhú?" ga, Yhang lé myi ri.

<sup>26</sup> Yesuq gi, "Ngò, muk jap zo shî lé jum yù mù, byî é sù gi, haú yuq nghut lhê." ga tû taí luí, muk jap zo haú lé jum yù mù, Simun é yhangzo Yudaq Iskarut lé byî ri. <sup>27</sup> Yudaq gi, muk haú lé yù zo kat é eq, Tsadán gi, yhâng chyáng wàng bê nghut ri.

Haú mù, Yesuq gi, "Nàng kut râ é hkyô lé, hân kut aq hkoi." ga yhang lé taí kat ri. <sup>28</sup> Nghut kôlhang, yhang lé, Yesuq haú su ga haí mù taí é hkyô lé, zohpoq haú má nyi tô é bang gi, rayuq lhang a sê gyo kó nghut ri. <sup>29</sup> Haú Yudaq gi, ngùn zum sù nghut é yanmai, ra-am gi, haú Poî má râ é hkyô lé, ê wuî râ matú, Yesuq taí ri ga luí le, myùng bang lé rajung jung byí nhang ri ga luí le, myit yu bum akô nghut ri. <sup>30</sup> Yudaq gi, muk haú lé lhom yù eq, htoq ló byuq bê nghut ri. Haú u gi, mauchut bê nghut ri.

<sup>\*</sup> 13:18 Hkya-on 41:9    <sup>\*</sup> 13:19 Haú Yuq gâ é gi, Hkrisduq lé gâ é nghut lhê.

*Petruq He-ngik Pyám Râ Lé, Yesuq Te Tai É Hkyô**Mht 26:31-35; Mrk 14:27-31; Luk 22:31-34*

<sup>31</sup> Haú yuq htoq ló byuq jáng, Yesuq tai é gi, "Ahkuí, haú Byu Yhangzo gi, hpungwup shingkang dan hú é nghut luí, Garai Gasang gi, haú Byu Yhangzô é yanmai, hpungwup shingkang dan hu bê nghut ri. <sup>32</sup> Garai Gasang gi, haú Byu Yhangzô é yanmai, hpungwup shingkang dan hú é nghut jáng, Yhang le, Yhang má haú Zo lé hpungwup shingkang dan hu nhâng râ nghut lhê; radá dâm dan hu nhâng râ nghut lhê.

<sup>33</sup> Ngá zo pé ê, Ngò, nungmoq eq rahá nyi râ gi, razup za ru nghut alô. Nungmoq gi, Ngo lé hô kó râ nghut lhê; nghut kôlhang, 'Ngò ló é jang má, nungmoq wó jé kó râ a nghut.' nghû, haú Yudaq byu pé lé, Ngò tai é eq rajung za, ahkuí, nungmoq lé le, Ngò tai lhê.

<sup>34</sup> Ngò, nungmoq lé, hkunmó asik byi to kô lé, nungmoq yhangchang chyitdap lhum keq. Ngò, nungmoq lé chyitdap é su, nungmoq yhangchang chyitdap lhum râ dut lhê.

<sup>35</sup> Nungmoq yhangchang chyitdap lhum kô é nghut jáng, nungmoq gi, Ngá é chángzô pé nghut é hkyô lé, byù lunglhang bang sé kó râ nghut lhê." gâ ri.

<sup>36</sup> Haú hkûn, Simun Petruq gi, "Yhumsîng ê, Nàng, hká shut ló râ lú?" ga, Yhang lé myi jáng, Yhang gi, "Ngò ló é jang má, nungmoq, ahkuí a wó châng kó râ nghut lhê. Nghut kôlhang, htâng má gi, nungmoq châng ra kó râ nghut lhê." ga tû tai ri.

<sup>37</sup> Petruq gi, "Yhumsîng ê, haí mù luí, ahkuí ngò Náng htâng a wó châng é lú? Ngò gi, Náng é matú, shî hkám râ rì rì nghut lhê." ga tai ri.

<sup>38</sup> Haú mù, Yesuq tai é gi, "Nàng gi, gè gè yhang, Ngá é matú shî hkám râ lú? Ngò, nàng lé teng za tai lé, woq a tûn shimá, nàng, Ngo lé sum dâm he-ngik pyám râ nghut lhê.

## 14

*Yesuq, Yhâng É Chángzô Pé Lé Nhk Tîng É Hkyô*

<sup>1</sup> Nungmoq é i-myt nhiklhum lé, myit wui myit hkê hkâdut nhâng kó. Garai Gasang lé lùm keq; Ngo lé le lùm keq. <sup>2</sup> Ngá Wâ é yhûm má, nyi jowò myo myo joq lhê; a joq é ru nghut le gi, noq mai, Ngò, nungmoq lé tai kyo râ nghut lhê. Ngò, haú má ló é gi, nungmoq é nyi jowò ló hên láng râ matú ru nghut lhê. <sup>3</sup> Ngò gi, ló mù, nungmoq é matú nyi jowò ló hen é nghut jáng, Ngò nyi é jang má nungmoq le wó nyi shoq, Ngò eq rahá nyi râ matú, Ngò dum taú lé mù, nungmoq lé, lé shuí yù râ nghut lhê. <sup>4</sup> Ngò ló é jang má jé é hkyô lé, nungmoq sê lhê." gâ ri.

*Yesuq Za Hkyô*

<sup>5</sup> Haú hkûn, Htomaq gi, Yhang lé, "Yhumsîng ê, Nàng hká shut ló é lé lhang, ngamoq a sê le nhîng, hkyô haú lé, ngamoq hkâsu kut wó sé râ lú?" ga myí ri.

<sup>6</sup> Yesuq gi, "Ngò gi, hkyô nghut lhê; haú tengmán hkyô eq asak le nghut lhê. Ngò mai za a nghut jáng, ó yuq le, Íwâ chyáng wó jé é a nghut. <sup>7</sup> Nungmoq, gè gè yhang, Ngo lé sé kô é nghut le gi, Ngá Wa lé le, nungmoq sé kó râ nghut lhê. Ahkuí mai, nungmoq gi, Yhang lé sé kô é htoq agó, myàng le myang wú bekô nghut lhê." ga tû tai ri.

<sup>8</sup> Haú hkûn, Hpilip gi, "Yhumsîng ê, ngamoq lé, haú Íwa tûn shit laq, haú hkûn, ngamoq nhik shî râ nghut lhê." ga tai ri.

<sup>9</sup> Yesuq tû tai é gi, "Hpilip ê, Ngò, nungmoq eq shî myáng lhang nyi lò bê le nhîng, nàng, Ngo lé a sé lú? Ngo lé myang é sù gi, haú Íwa lé myàng bê nghut ri; haú nghut le nhîng, 'Ngamoq lé, haú Íwa tûn shit laq.' nghû, nàng hkâsu wó tai lhê lú? <sup>10</sup> Ngò gi, haú Íwa má nghut nyi luí, haú Íwa gi, Ngò má nghut nyi é hkyô lé, nàng a lumjîng lú? Ngò, nungmoq lé tai é dang haú pé gi, Ngá é myit mai tai é a nghut; haú Ngò má lúng nyi é Íwa sheq, Yhâng é mù zûi nyi é ru nghut lhê. <sup>11</sup> Ngò gi, haú Íwa má nghut nyi luí, haú Íwa gi, Ngò má nghut nyi lhê nghû é lé lumjîng keq; haú a nghut jáng, kut shit é limik kumlhá pé dông za lhang, lumjîng keq. <sup>12</sup> Ngò, nungmoq lé teng za tai kôlé, Ngo lé lumjîng é sù gi, Ngò kut é muzó lé kut râ nghut lhê. Ngò gi, haú Íwâ chyáng ló râ nghut é



yanmai, haú yuq gi, hau htoq je kô é muzó pé lé lhang kut rã nghut lhê. <sup>13</sup> Haú Yhangzô é yanmai, Îwã é hpungwup shingkang wó hû lô shoq, Ngá é mying lé lang luí, nungmoq haí jung dung kôlhang, Ngò gyo byi rã nghut lhê. <sup>14</sup> Nungmoq gi, Ngá é mying lé lang luí, haí dung kôlhang, Ngò gyo byi rã nghut lhê.

*Chyoiyúng Woi-nyí Byi Rã Danggidiq*

<sup>15</sup> Nungmoq gi, Ngo lé chyitdap kô é nghut jáng, Ngò hkyô tô é hkunmó pé lé, cháng kó rã nghut lhê. <sup>16</sup> Haú Îwa gi, nungmoq eq ahtum abyuq nyi nyi rã nghut é, hpaqchyí byi Sû gotû rayuq, nungmoq lé byi rã matú, Ngò gi, haú Îwa lé dung rã nghut lhê. <sup>17</sup> Haú yuq gi, tengmán é Woi-nyí nghut lhê. Haú mingkan gi, Woi-nyí haú lé a myàng a sê é yanmai, Yhang lé a wó hap yu é nghut lhê. Nghut kôlhang, Yhang gi, nungmoq eq rahá nyi nyi é nghut luí, nungmoq má nyi to rã Sû nghut é yanmai, nungmoq gi, Yhang lé sê akô. <sup>18</sup> Ngò gi, nungmoq lé, chuizô pé dông pyâm to rã a nghut; nungmoq chyáng Ngò dum jé lé rã nghut lhê. <sup>19</sup> Adê myáng má, haú mingkan gi, Ngo lé a myàng lo rã nghut lhê; nghut kôlhang, nungmoq gi, Ngo lé myàng kó rã nghut lhê. Hkâsu mù gâ le, Ngò gi, asak dui nyi é nghut mù, nungmoq le duí kó rã nghut lhê. <sup>20</sup> Ngò gi, Ngá Wã chyáng nghut nyi é lé le, nungmoq gi, Ngò má nghut nyi é lé le, Ngò gi, nungmoq má nghut nyi é lé le, haú buinyi má, nungmoq sé kó rã nghut lhê. <sup>21</sup> Ngá é hkunmó pé lé wó mù, châng kut é sù ó yuq nghut kôle, Ngo lé chyitdap é sù nghut ri. Ngo lé chyitdap é sù lé gi, Ngá Wa chyitdap rã nghut lhê; Ngò le, haú yuq lé chyitdap luí, Ngá gûng lé yhang, yhang lé shit rã nghut lhê." gâ ri.

<sup>22</sup> Hau htâng, (Yudaq Iskarut a nghut sù) Yudaq gi, "Yhumsîng ê, Nang gi, haú mingkan lé Nang gûng a shit e za, ngamoq lé shit rã nghut é gi, haí mù nghut lhê lú?" ga myî ri.

<sup>23</sup> Haú hkûn, Yesuq tû taí gi, "Rayuq yuq, Ngo lé chyitdap é nghut le gi, Ngá dang lé gyo rã nghut lhê. Ngá Wa le, haú yuq lé chyitdap rã nghut luí, Ngá hpe gi, haú yuq chyáng lé mù, yhang eq rahá nyi rã nghut lhê. <sup>24</sup> Ngo lé a chyitdap é sù gi, Ngá dang lé gyo rã a nghut. Nang wó gyô é dang shí pé gi, Ngá myit mai taí é a nghut; dang haú pé gi, Ngo lé nhang kat é Sû, haú Îwã é ru nghut lhê.

<sup>25</sup> Ngò gi, shí pé banshoq lé, nungmoq eq rahá nyi tô ashî u lé taí bê nghut lhê. <sup>26</sup> Nghut kôlhang, Ngá é mying dông, haú Îwa nhang kat rã nghut é, hpaqchyí byi Sû nghû é, haú Chyoiyúng Woi-nyí gi, nungmoq lé, jung hkanmó mhoq byi rã eq, Ngò, nungmoq lé taí kyo bê hkyô lhunglhang, nungmoq lé lhoq pun rã nghut lhê. <sup>27</sup> Ngò gi, nungmoq chyáng, nguingón hkyô tô to byi bê; Ngá é nguingón hkyô, Ngò, nungmoq lé byî é nghut lhê. Ngò gi, mingkan byî é dông, nungmoq lé byî é a nghut. Nungmoq é i-myt nhiklhum lé, myit wui myit hke é eq gyuq kyûm é hkâdut nhâng kó.

<sup>28</sup> 'Ngò gi, lô byuq luí, nungmoq chyáng dum taú lé rã nghut lhê.' nghû, Ngò taí é lé, nungmoq wó gyô yù bê nghut lhê. Nungmoq, Ngo lé chyitdap kô é nghut le gi, haú Îwã chyáng Ngò lô rã nghut é hkyô lé, nungmoq gabú kó rã nghut lhê; hkâsu mù gâ le, haú Îwa gi, Ngá htoq je ko Sû nghut lhê. <sup>29</sup> Haú dut é hkûn, nungmoq lumjîng kó sháng gaq nghû, ahkuí, haú a dut shimá, Ngò, nungmoq lé taí kyô é nghut lhê. <sup>30</sup> Ahkuí mai, Ngò gi, nungmoq lé, dang myo myo wó nyô rã a nghut lo; hkâsu mù gâ le, mingkan shi é zau gi, jé lé lo nyi bê nghut ri. Haú yuq gi, Ngo lé up rã ahkáng haí a wó é sù nghut ri. <sup>31</sup> Nghut kôlhang, haú Îwa lé Ngò chyitdap é hkyô, mingkan sé sháng gaq nghû, Ngò gi, Ngá Wa hkyô tô é hkunmó eq roq za kut nyi lhê.

Toq keq, e lô sháng hkoi.

## 15

*Tsibiyiq Nuî Eq Akoq Pê É Hkyô*

<sup>1</sup> Ngò gi, haú tsibiyiq nuî akyîng nghut lhê; Ngá Wa gi, tsibiyiq hkyâm yhumsîng nghut lhê. <sup>2</sup> Yhang gi, ashi a zûi é akoq hkanmó lé, Ngá chyáng mai kyik pyám luí, ashi zûi é akoq hkanmó lé kúm gi, ashi je myo zui sháng gaq ga, shang pyám byî ri. <sup>3</sup> Nungmoq gi, Ngò, nungmoq lé taí é mungdang hau é yanmai, sanséng gû nghut bekô nghut ri. <sup>4</sup> Ngò

má nyi nyi keq; Ngò le, nungmoq má nyi nyi râ nghut lhê. Akoq hkangmó gi, tsibiyiq nuí má nui nyi é za a nghut jáng, yhang baú ashi wó zuí é a nghut. Haú eq rajung za, nungmoq le, Ngò má nyi nyi e za a nghut jang, ashi wó zui kó râ a nghut.

<sup>5</sup> Ngò gi, tsibiyiq nuí nghut lhê; nungmoq gi, akoq pé nghut akô. Byù rayuq yuq, Ngò má nyi nyi é nghut luí, Ngò gi, yhang má nyi nyi é nghut jáng, haú yuq gi, ashi myo myo zui râ nghut lhê; hkâsu mù gâ le, Ngò mai gang jáng, nungmoq gi, haí le a wó kut kô é nghut lhê. <sup>6</sup> Ngò má a nyi nyi é sù gi, haú dú pyâm é hui luí, kyuq shi byuq é akoq eq wuí ri; haú sù é akoq pé gi, byu pê eq guq yù mù, myihkyóm má dú kat pyâm é hui luí, nyé gyó byuq râ nghut lhê. <sup>7</sup> Nungmoq gi, Ngò má nyi nyi luí, Ngá é dang pé gi, nungmoq má bo nyi é nghut le gi, nungmoq ô nau é haí nghut kôlhang, dung keq; haú hkûn, nungmoq lé byi râ nghut lhê. <sup>8</sup> Nungmoq gi, haú ashi ga-myhó zuí é dông, Ngá Wâ é hpungwup shingkang lé lhoq htoq shit é nghut luí, Ngá é chángzô pé nghut é hkyô lé tûn shit nyí bekô nghut ri.

<sup>9</sup> Haú Îwa gi, Ngo lé chyitdap é su, Ngò gi, nungmoq lé chyitdap é nghut lhê. Ahkuí, Ngá é chyitdap myit má gîng nyi keq. <sup>10</sup> Ngò gi, Ngá Wâ é hkunmó lé châng é nghut luí, Yhâng é chyitdap myit má gîng nyi é su, Ngá é hkunmó lé, nungmoq châng nyi kô é nghut jáng, nungmoq gi, Ngá é chyitdap myit má gîng nyi kó râ nghut lhê. <sup>11</sup> Nungmoq má Ngá é gabú hkyô joq nyi râ eq, nungmoq é gabú hkyô wó byíng jup râ matú, Ngò, nungmoq lé, dang shí pé taí é nghut lhê. <sup>12</sup> Ngò, nungmoq lé chyitdap é su, nungmoq yhangchang chyitdap lhum keq; haú gi, Ngá é hkunmó nghut lhê. <sup>13</sup> Haú yhumsing é luzúm wui é matú, yhumsing é asak ap byí pyâm é chyitdap myit htoq kô é, chyitdap myit gi, ó yuq chyáng le a bò nghut ri. <sup>14</sup> Ngò hkyô tô é hkunmó pé lé, nungmoq châng kut é nghut jáng, nungmoq gi, Ngá é luzúm wuí nghut bekô. <sup>15</sup> Ngò gi, Ngá Wâ chyáng mai Ngò wó gyô yu é hkyô lhunglhang, nungmoq lé sé nhâng bê nghut é yanmai, nungmoq lé, dui-nhâng zoshâng wui nghû, a wut lô e za, luzúm wuí nghû wut é nghut lhê; hkâsu mù gâ le, dui-nhâng zoshâng gi, yhâng yhumsîng hpô é muzó lé a châng sé nghut ri. <sup>16</sup> Nungmoq, Ngo lé hkyin yu é a nghut, Ngò sheq, nungmoq lé, htoq e ló mù, gîng nyi é ashi zui râ matú hkyin masat tô é ru nghut lhê. Haú hkûn sheq, Ngá é myìng lé lang mù, haú Îwâ chyáng nungmoq haí jung dung kôle, Yhang byi râ nghut lhê. <sup>17</sup> Nungmoq yhangchang chyitdap lhum keq; haú gi, Ngá é hkunmó nghut lhê.

#### *Haú Mingkan Gi, Chángzô Pé Lé A Jú É Hkyô*

<sup>18</sup> Haú mingkan, nungmoq lé a jú é nghut jáng, Ngo lé hí a jú kut bê nghut é lé, sé nyi keq. <sup>19</sup> Nungmoq gi, haú mingkan eq sêng é bang nghut é nghut jáng, haú mingkan gi, yhang eq sêng é bang nungmoq lé chyitdap râ nghut lhê. Nghut kôlhang, nungmoq lé gi, Ngò, haú mingkan mai hkyin htoq yù bê nghut luí, nungmoq gi, haú mingkan eq a séng lo kô é yanmai, mingkan gi, nungmoq lé a jú é nghut ri. <sup>20</sup> 'Dui-nhâng zoshâng gi, yhâng é yhumsing htoq je kô é a nghut.' nghû, Ngò, nungmoq lé taí é dang pé lé bûn nyi keq. Ngo lé lhang, yhangmoq zing-rî yù bekô nghut le gi, nungmoq lé le, zing-ri kó râ nghut lhê. Ngò mhoqshit é hkyô lé, yhangmoq cháng kô é nghut le gi, nungmoq mhoqshit é lé le, cháng kó râ nghut lhê. <sup>21</sup> Nghut kôlhang, yhangmoq gi, Ngá é myìng é yanmai, nungmoq lé haú su kut kó râ nghut lhê; hkâsu mù gâ le, haú Ngo lé nhang kat é Sù lé, yhangmoq a sé kôluí nghut ri. <sup>22</sup> Yhangmoq lé, Ngò a lé nyo wú é nghut le gi, yhangmoq mara bò kó râ a nghut; nghut kôlhang, ahkuí gi, yhangmoq mara wó taí hkyut râ a nghut lo. <sup>23</sup> Ngo lé a jú é sù gi, Ngá Wa lé le a jú é sù nghut ri. <sup>24</sup> Haú ó yuq lhang a wó kut é muzó lé, Ngò, yhangmoq chyáng a kut é nghut le gi, yhangmoq mara bò kó râ a nghut; ahkuí kúm gi, laklai kumlhá haú pé lé yhangmoq myang nyi kôlhang, Ngò eq Ngá Wa lé a jú kô é nghut ri. <sup>25</sup> Haú gi, 'Yhangmoq gi, jumgúyô má Ngo lé a jú kut akô nghut ri.'<sup>☆</sup> ga, yhangmoq é tarâ má kê tô é dang lé lhoq dik é nghut ri.

<sup>26</sup> Haú Îwâ chyáng mâ é, Ngò nhang kat râ nghut é, Îwa mai htoq lé lo é tengmán é Woi-nyí nghut é, haú hpaqchyí byi Sù jé lé é hkûn, Ngá é hkyô lé saksé hkâm byi râ nghut lhê.

☆ 15:25 Hkya-on 35:19; 69:4

<sup>27</sup> Nungmoq le, Ngò eq rahá sâng-hi mai nyì bekô nghut é yanmai, saksé hkám byi ra kó râ nghut lhê.

## 16

<sup>1</sup> Nungmoq gi, myit lingbat jowò a joq kó sháng gaq nghû, haú pé banshoq lé, Ngò, nungmoq lé taí kyo bê nghut lhê. <sup>2</sup> Yhangmoq gi, nungmoq lé, tarajong mai hkat htoq pyám kó râ nghut lhê; ó yuq nghut kôle, yhang mai nungmoq lé sat pyâm é hkûn, yhang gi, haú dông mai Garai Gasang lé dojaú nyi lhê ga myit yu é ahkyíng, gè gè yhang, jé rà nghut lhê. <sup>3</sup> Yhangmoq gi, haú Íwa lé le, Ngo lé le, a sé kô é yanmai, haú su kut kó râ nghut lhê. <sup>4</sup> Nghut kôlhang, nungmoq lé, Ngò sidiq byí é hkyô lé, ahkyíng jé jáng nungmoq bûn nyi kó sháng gaq nghû, Ngò haú hkyô taí kyô é nghut lhê. Ngò gi, nungmoq eq rahá nghut nyi é yanmai, haú hkyô lé, hí hkûn nungmoq lé a taí kyô é nghut lhê.

### *Chyoiyúng Woi-nyí é muzó*

<sup>5</sup> Nghut kôlhang, ahkuí, Ngò gi, Ngo lé nhang kat Su chyáng ló râ nghut lhê. Nghut kôlhang, nungmoq ó yuq le, 'Nàng, hká shut ló râ lú?' ga, Ngo lé a myi kó nghut ri. <sup>6</sup> Ngò, nungmoq lé, haú hkyô pé taí kyô é yanmai, nungmoq é i-myit unghkaú má iyon hkyô byíng to bekô nghut ri. <sup>7</sup> Nghut kôlhang, Ngò, nungmoq lé teng za taí kôlé, Ngò ló byuq é gi, nungmoq é matú je gè râ hkyô ru nghut lhê. Ngò ló byuq e za a nghut jáng, haú hpaqchyí byi Sû gi, nungmoq chyáng lé râ a nghut; Ngò ló jáng sheq, Yhang lé, Ngò, nungmoq chyáng nhang kat byi râ nghut lhê. <sup>8</sup> Yhang jé lé é hkûn, Yhang gi, haú mara wó é eq séng luí le, dingmán hkyô eq séng luí le, tará jéyáng hkyô eq séng luí le, haú mingkan lé tân shit râ nghut lhê. <sup>9</sup> Haú yubak mara wó é eq séng luí ga jang, byu pé gi, Ngo lé a lumjíng kô é yanmai nghut ri. <sup>10</sup> Haú dingmán hkyô eq séng luí ga jang, Ngò gi, haú Íwa chyáng ló râ nghut luí, nungmoq, Ngo lé a myàng lo kó râ nghut é yanmai nghut ri. <sup>11</sup> Haú tará jéyáng hkyô eq séng luí ga jang, mingkan shi é zau gi, mara byí é huí é nghut é yanmai nghut ri.

<sup>12</sup> Ngò gi, nungmoq lé taí râ hkyô myo myo wó ashî; nghut kôlhang, ahkuí, nungmoq wó hkâm kó râ a nghut. <sup>13</sup> Nghut kôlhang, haú tengmán é Woi-nyí jé lé é hkûn, Yhang gi, tengmán hkyô lhunglhang lé shuí sé râ nghut lhê. Yhang gi, Yhâng myit dông taí râ a nghut; Yhang, wó gyô yu é hkyô lé za taí luí, dut lò râ hkyô pé lé le, nungmoq chyáng taí pyô râ nghut lhê. <sup>14</sup> Yhang gi, Ngò wó é lé, yù mù, nungmoq lé taí kyô é eq sé nhang é dông, Ngá é hpungwup shingkang lé hú ló nhâng râ nghut lhê. <sup>15</sup> Haú Íwa wó é lhunglhang gi, Ngá é chyat nghut lhê. Hau é yanmai, haú Woi-nyí gi, Ngò wó é lé yù mù, nungmoq lé sé nhâng râ nghut lhê nghû, Ngò taí é nghut lhê.

<sup>16</sup> Adê myáng má, nungmoq gi, Ngo lé a myàng lo kó râ nghut lhê; hau htâng, dum adê myáng má, nungmoq gi, Ngo lé myàng kó râ nghut lhê." gâ ri.

### *Changzô Pé É Iyon Hkyô Gi, Gabú Hkyô Taú Dut Râ*

<sup>17</sup> Yhâng é chángzô pé ra-am gi, "'Adê myáng má, nungmoq gi, Ngo lé a myàng lo kó râ nghut lhê; hau htâng, dum adê myáng má, nungmoq gi, Ngo lé myàng kó râ nghut lhê.' gâ é eq 'Ngò gi, Íwa chyáng ló râ nghut é yanmai nghut lhê.' ga, Yhang taí é gi, haí jung gá nau é nghut lhê lú?" ga, rayuq eq rayuq myí lhûm bum akô. <sup>18</sup> Hau htoq agó, yhangmoq gi, "'Adê myáng má,' gâ é gi, Yhang haí jung gá nau lhê lú? Nga-nhúng gi, Yhang haí taí nau é lé a sê gyo." ga, taí lhûm bum akô nghut ri.

<sup>19</sup> Yesuq gi, yhangmoq myi nau kô é hkyô lé sê ri; haú mù, Yhang, yhangmoq lé taí é gi, "'Adê myáng má, nungmoq gi, Ngo lé a myàng lo kó râ nghut lhê; hau htâng, dum adê myáng má, nungmoq gi, Ngo lé myàng kó râ nghut lhê.' nghû, Ngò taí é lé, haí jung gá nau lhê laq nghû, rayuq eq rayuq myi lhûm nyi akô lú? <sup>20</sup> Ngò, nungmoq lé teng za taí kôlé, haú mingkan gi, gabú nyi é u lé, nungmoq gi, ngaù é eq iyon yón é hui kó râ nghut lhê. Nungmoq gi, iyon yón é hui kó râ nghut lhê; nghut kôlhang, nungmoq é iyon hkyô gi, gabú hkyô taú dut râ nghut lhê. <sup>21</sup> Myiwe gi, zoshâng hkû râ nghut jáng, zohkû-nò nò râ ahkyíng jé bê nghut é yanmai, myit chiq nyi ri; nghut kôlhang, zoshâng

lé wó hku htoq kat é hkûn gi, mingkan htoq má zoshâng rayuq wó hku to bê nghut luí, yhang gabú é yanmai, haû no hpu é hkyô lé a bun byuq lo nghut ri. <sup>22</sup> Haû eq rajung za, ahkuí gi, nungmoq iyon yôn é ahkyíng nghut ri; nghut kôlhâng, Ngò, nungmoq lé dum huí é hkûn, nungmoq gi, gabú kó râ nghut lhê; nungmoq é gabú hkyô haû lé, nungmoq chyáng mai ó yuq èq le wó yu pyám byi râ a nghut. <sup>23</sup> Haú buinyì má, nungmoq gi, Ngo lé, haí le a dung lo kó râ nghut lhê. Ngò, nungmoq lé teng za taí kôlé, nungmoq gi, Ngá myíng lang luí, Ngá Wâ chyáng haí dung kôle, Yhang byi râ nghut lhê. <sup>24</sup> Ahkuí jé shoq, nungmoq gi, Ngá myíng lé lang luí, haí le a dúng wú shi kó nghut ri. Dung keq, haú hkûn, nungmoq myang hap yù kó râ nghut luí, nungmoq é gabú hkyô gi, byíng jup lò râ nghut lhê.

<sup>25</sup> Ngò gi, nungmoq lé, dangtú dông haú pé taí kyo bê nghut lhê; nghut kôlhâng, Ngò gi, dangtú a chûng lô e za, haú Íwa eq sêng é hkyô, nungmoq lé san za taí kyô é ahkyíng jé râ nghut lhê. <sup>26</sup> Haú buinyì má, nungmoq gi, Ngá é myíng lé lang luí dung kó râ nghut lhê. Ngò gi, nungmoq é matú, haú Íwâ chyáng dung byi râ nghut taí nyi é a nghut. <sup>27</sup> Hkâsu mù gâ le, nungmoq gi, Ngo lé chytidap kô é eq, Ngò gi, Íwa Garai Gasâng chyáng mai jé lé é Sû nghut é lé, nungmoq lumjíng kô é yanmai, haú Íwa yhang, nungmoq lé chytidap é nghut lhê. <sup>28</sup> Ngò gi, haú Íwâ chyáng mai htoq lé mù, mingkan má lé jé wang é nghut lhê; ahkuí, Ngò gi, mingkan mai htoq mù, haú Íwâ chyáng dum taú ló râ nghut lhê." gâ ri.

<sup>29</sup> Haú hkûn, Yesuq é chángzô pé gi, "Ahkuí, Nàng gi, dangtú a chûng é dông, san za taí kyô nyi é nghut bê! <sup>30</sup> Nàng gi, lhunglhang lé sê é sù nghut é lé le, Nàng lé, ó yuq èq le dangmyi myi nó a râ é hkyô lé le, ahkuí, ngamoq wó sé bê. Hau é yanmai, Nàng gi, Garai Gasâng chyáng mai lé é sù nghut é lé, ngamoq lumjíng lhê." ga taí bum akô.

<sup>31</sup> Haú hkûn, Yesuq tû taí é gi, "Nungmoq, ahkuí lumjíng bekô lhú? <sup>32</sup> Nghut kôlhâng, nungmoq gi, lhoq pyo pyâm é hui luí, Ngo lé baú za tô pyâm to kômù, ó le ô yhûm shut ló byuq râ ahkyíng jé lo nyi bê nghut ri; ahkuí lhang jé to bê. Nghut kôlhâng, Ngò gi, Ngò baú za a nghut; hkâsu mù gâ le, Ngá Wa gi, Ngò eq rahá nghut nyi lhê.

<sup>33</sup> Nungmoq gi, Ngò má nguingón hkyô wó kó sháng gaq nghú, Ngò gi, haú hkyô pé lé taí kyô é nghut lhê. Nungmoq gi, mingkan shí má, wúhke hkyô hui kó râ nghut lhê; nghut kôlhâng, myit wum lhoq kíng keq. Ngò gi, mingkan lé ung pyám bê nghut lhê." gâ ri.

## 17

### *Yesuq Kyûdûng É Hkyô*

<sup>1</sup> Yesuq gi, haú su ga taí é htâng má, mauhkûng shut tu wú luí, kyûdûng é gi, "Áwa ê, ahkyíng jé bê nghut ri; haú Nung Zo gi, Nang lé hpungwup shingkang wó hu nhâng sháng gaq, Nung Zo lé hpungwup shingkang hû ló nhâng laq ô! <sup>2</sup> Hkâsu mù gâ le, Nàng mai Yhang lé ap byi tô é bang banshoq lé, Yhang, ahtum abyuq é asak wó byi sháng gaq ga, Nàng gi, byù lhunglhang bang lé up râ ahkáng, Yhang lé byi tô é yanmai nghut ri. <sup>3</sup> Nàng za tengmán é Garai Gasang nghut é eq Nàng nhang kat é sù Yesuq Hkrisduq lé, sê é gi, ahtum abyuq é asak nghut lhê. <sup>4</sup> Ngò gi, Nàng, Ngo lé wùn waq nhang é muzó lé lhoq pán é dông, myidàm htoq má, Náng é hpungwup shingkang lé lhoq htoq shit bê nghut lhê. <sup>5</sup> Áwa ê, haú mingkan lhang a joq shí mai, Ngò, Nàng eq rahá chôm wó é hpungwup shingkang èq, ahkuí, Náng é myoq hí má, Ngo lé hpungwup shingkang dan hu nhâng laq.

### *Chángzô pé matú, Yesuq kyûdung byi é hkyô*

<sup>6</sup> Mingkan mai, Nàng, Ngo lé hkyin htoq yû byi é bang lé, Ngò gi, Náng é myíng lhoq htoq shit bê nghut lhê. Yhangmoq gi, Náng é byu pé nghut bekô; Nàng gi, yhangmoq lé, Ngá é loq má ap byi bê nghut luí, yhangmoq gi, Náng é dang lé châng kut bekô nghut ri. <sup>7</sup> Nàng, Ngo lé byi é lhunglhang gi, Náng chyáng mâ é nghut é lé, ahkuí, yhangmoq sé bekô nghut ri. <sup>8</sup> Hkâsu mù gâ le, Nàng, Ngo lé byi kat é mungdang pé lé, Ngò, yhangmoq lé byi bê nghut luí, yhangmoq gi, haú pé lé hap yù bekô nghut ri; Ngò gi, Náng chyáng

mai lé é sù nghut é lé le, yhangmoq hkyak sê akô; Nàng, Ngo lé nhang kat é hkyô lé le, yhangmoq lumjìng bekô nghut ri. <sup>9</sup> Ngò gi, yhangmoq é matú kyûdung byî lhê. Ngò gi, haû mingkan byu pê é matú dung byi nyi é a nghut; Nàng, Ngo lé ap byi tô é bâng é matú sheq dung byî nyi é ru nghut lhê; hkâsu mù gâ le, yhangmoq gi, Náng é byu pé nghut akô. <sup>10</sup> Ngò wó é lhunglhang gi, Náng é chyat nghut mù, Nàng wó é lhunglhang le, Ngá é chyat nghut lhê. Haû mù, Ngò gi, yhangmoq má hpungwup shingkang hû é hui bê nghut lhê. <sup>11</sup> Ngò gi, Nàng chyáng lò râ nghut lhê mù, mingkan htoq má nyi nyi râ a nghut lo; nghut kôlhang, yhangmoq gi, mingkan htoq má nyi nyi shirâ nghut lhê; chyoyúng é Âwa ê! Ngá hpe gi, ragùng za nghut é su, yhangmoq le ragùng za wó dut nyi kó sháng gaq, Nàng, Ngo lé byi é, haû Náng myìng é a-tsam eq yhangmoq lé upzúng nyi aq. <sup>12</sup> Ngò gi, yhangmoq eq rahá nghut nyi é u lé, yhangmoq lé upzúng bê nghut luî, Nàng, Ngo lé byî é myìng hau eq, yhangmoq lé rago zúng bê nghut lhê. Haû Chyúmdang lhoq dik sháng gaq ga, haû bang mâ é htên byoq hui râ sù mai lai luî, ó yuq le a byuq byuq é nghut lhê.

<sup>13</sup> Ngò gi, ahkuî, Náng chyáng lò râ nghut bê; nghut kôlhang, Ngá é gabú hkyô gi, yhangmoq chyáng byíng jup sháng gaq nghû, Ngò gi, haû pé lé mingkan má taî é nghut lhê. <sup>14</sup> Ngò gi, yhangmoq lé, Náng é mungdang byi bê nghut lhê; haû mingkan gi, yhangmoq lé a jú nghut ri; hkâsu mù gâ le, Ngò gi, mingkan mâ é a nghut é su, yhangmoq le, mingkan mâ é a nghut kô é yanmai nghut ri. <sup>15</sup> Ngò kyûdung é gi, Nàng, yhangmoq lé mingkan mai shuî htoq yû râ matú dúng é a nghut, haû agè ashop su chyáng mai, yhangmoq lé upzúng yû râ matú sheq dúng é ru nghut lhê. <sup>16</sup> Ngò gi, mingkan mâ é a nghut é su, yhangmoq le, mingkan mâ é a nghut kó. <sup>17</sup> Yhangmoq lé, haû tengmán hkyo eq lhoq sân-yúng yû laq; Náng é mungdang gi, tengmán hkyô nghut ri. <sup>18</sup> Nàng, Ngo lé, mingkan má nhang hâng kat é su, Ngò le, yhangmoq lé, mingkan má nhang hâng kat é nghut lhê. <sup>19</sup> Yhangmoq lé, tengmán hkyô má wó lhoq sân-yúng yû kó sháng gaq nghû, Ngò gi, yhangmoq é matú, yhumsing gùng lé lhoq sân-yúng yu é nghut lhê.

### *Lumjìng Bang Lhunglhang É Matú, Yesuq Kyûdung Byî É Hkyô*

<sup>20</sup> Ngò gi, yhangmoq é matú baú za kyûdung byî é a nghut; Yhangmoq é danglu é yanmai, Ngo lé lumjìng kó râ bâng é matú le, Ngò kyûdung byî é nghut lhê. <sup>21</sup> Haû mù, yhangmoq banshoq bang gi, rading ralhum za dut nyi kó sháng gaq. Haû mingkan gi, Nàng, Ngo lé nhang kat é hkyô lé wó lumjìng sháng gaq; Âwa, Nàng gi, Ngò má nyi nyi mù, Ngò gi, Nàng má nyi nyi é su, yhangmoq le, ngá hpe má nyi nyi kó sháng gaq. <sup>22</sup> Ngá hpe gi, ragùng za nghut é su, yhangmoq le, rading ralhum za dut nyi kó sháng gaq nghû, Ngò gi, Nàng, Ngo lé byî é hpungwup shingkang lé, yhangmoq lé byi bê nghut lhê. <sup>23</sup> Nàng, Ngo lé nhang kat bê hkyô eq Nàng, Ngo lé chyitdap é su, yhangmoq lé chyitdap é hkyô lé, haû mingkan wó sé râ matú, yhangmoq gi, gumjup shoq rading ralhum za wó dut kó sháng gaq nghû, Ngò gi, yhangmoq má nyi nyi luî, Nàng gi, Ngò má nyi nyi é nghut lhê.

<sup>24</sup> Âwa ê, haû mingkan lhang a joq shi mai, Nàng, Ngo lé chyitdap luî byi tô é hpungwup shingkang haû lé, Nàng, Ngo lé byi tô é bang, wó myàng kó râ matú le, Ngò nyi é jang má, Ngò eq rahá wó nyi kó râ matú le, Ngò ô nau ri.

<sup>25</sup> Dingmán é Âwa ê, haû mingkan gi, Nang lé a sé kôlhang, Ngò gi, Nang lé sê lhê; Nàng, Ngo lé nhang kat é hkyô lé gi, yhangmoq sé akô nghut ri. <sup>26</sup> Nàng, Ngo lé chyitdap é chyitdap myit gi, yhangmoq má wó joq nyi râ matú le, Ngò gi, yhangmoq má wó nyi nyi râ matú le, yhangmoq lé, Ngò, Nang é hkyô sé nhâng bê nghut luî, xoq mù sé nhang nyi shirâ nghut lhê." gâ ri.

<sup>1</sup> Yesuq gi, haû su ga kyûdûng é htâng má, Yhâng é chángzô pé eq rahá, Kedron wuîhkung mai lai byit dap ló luî, haû hpoq má joq é hkyâm ralhûm má wang e akô nghut ri.

<sup>2</sup> Hkyâm haû gi, Yesuq eq Yhâng é chángzô pé lhaq hui hui kut é jowò nghut é yanmai, haû Yesuq lé ap pyám râ sù Yudaq le sê ri. <sup>3</sup> Haû mù, Yudaq gi, haû hkyangjong agyi pé eq Hparishe pê chyáng mai nhang kat é noqkuq yhûm zúng bang ra-am eq gyezo rajùm lé, haû jowò shut shuî wang lé lo ri. Haû bang gi, myihu, myibung eq shâm lhâm pé chung lé lo akô.

<sup>4</sup> Yesuq gi, Yhang má dut lò râ hkyô lhunglhang lé sé gû nghut mù, htoq ê luî, yhangmoq lé, "Nungmoq, ó yuq lé ho akô lú?" ga myî ri.

<sup>5</sup> Haû hkûn, yhangmoq gi, "Nazaret wà byù Yesuq lé ho lhê." ga tû taí kôjáng, Yesuq gi, "Ngò gi, haû yuq nghut lhê." ga taî ri. (Yesuq lé ap pyám sù Yudaq le, yhangmoq eq rahá yap tô ri.) <sup>6</sup> "Ngò gi, haû yuq nghut lhê." ga Yesuq taî kat é hkûn jáng, yhangmoq gi, nungzut zut mù, myigùng má lêng leq ló bum akô nghut ri.

<sup>7</sup> Yhang gi, "Nungmoq, ó yuq lé ho akô lú?" ga, yhangmoq lé dum myî kat jáng, yhangmoq gi, "Nazaret wà byù Yesuq lé ho lhê." ga taî akô.

<sup>8</sup> Haû hkûn, Yesuq gi, "Ngò gi, haû yuq nghut lhê nghû, nungmoq lé taî kyo bê nghut lhê; nungmoq, Ngo lé hô kô é nghut le gi, shí bang lé ló nhang pyám keq." ga tû taî ri.

<sup>9</sup> Haû gi, "Nàng, Ngo lé byî tô é bang rayuq le lhang, Ngò, a lhoq hpyuq pyám." ga, Yhang taî tô é dang dik râ matú nghut ri.

<sup>10</sup> Haû hkûn, Simun Petruq gi, shâm wun tô é nghut luî, shâm shê mù, haû hkyangjong mó é dui-nhâng zôshang é loqyo nohkyap lé zân hpyit kat byî ri. (Dui-nhâng zoshâng haû yuq é myìng gi, Malhku gà ri.)

<sup>11</sup> Haû mù, Yesuq gi, Petruq lé, "Náng é shâm lé, shambyâng má xâng pyám aq! Haû Îwa, Ngo lé byî é góm\* lé, Ngò a shuq é wó nyî râ lú?" ga taî kat ri.

*Yesuq Lé, Anna Chyáng Shuî E É Hkyô*

*Mht 26:57-58; Mrk 14:53-54; Luk 22:54*

<sup>12</sup> Haû htâng, gyezo haû jùm eq yhangmoq é gyezau hpó, Yudaq byu pê é mingsuwún wuî gi, Yesuq lé chyup yû mù, tuî akô nghut ri. <sup>13</sup> Yhangmoq gi, haû zân má é hkyangjong mó Kayahpaq é yhâng-tsa Anna chyáng hí, Yhang lé shuî ló akô nghut ri. <sup>14</sup> Kayahpaq gi, byu pê é matú rayuq shî hkám byî le je gè râ nghut lhê ga, haû Yudaq byu pé lé hpaqchyî byî é sù yuq nghut ri.

*Yesuq Lé, Petruq Sâng-hi Dam He-ngik Pyâm É Hkyô*

*Mht 26:69-70; Mrk 14:66-68; Luk 22:55-57*

<sup>15</sup> Simun Petruq eq gotû chángzo rayuq gi, Yesuq htâng châng e ló akô nghut ri. Gotû chángzo haû yuq gi, hkyangjong mó lé rago sê lhê nghut mù luî, hkyangjong mó é yhumwàng hkaû shut, Yesuq é htâng má châng wang ló ri. <sup>16</sup> Petruq kúm gi, hkúmdong shinggan má lánng yap tô ri. Haû hkyangjong mó lé rago sê é sù, gotû chángzo haû yuq gi, taû htoq ló mù, hkum zúng é myiwe myhí lé taí luî, Petruq lé shuî hâng yu ri.

<sup>17</sup> Haû hkûn, haû hkum zúng é myiwe myhí gi, Petruq lé, "Nàng gi, haû yuq é chángzô pé mâ é rayuq a nghut lú?" ga myi jáng, yhang gi, "Ngò a nghut." ga tû taî ri.

<sup>18</sup> Haû u lé, gyoq é yanmai, dui-nhâng zoshâng wuî eq noqkuq yhûm zúng bang gi, yhangmoq gyoq gâng râ matú myigyê èq mut tô é myihkyóm má, gyoq gang yap nyi bum akô. Petruq le, yhangmoq eq rahá gyoq gang yap tô ri.

*Yesuq Lé, Hkyangjong Mó Myî Choq Wú É Hkyô*

*Mht 26:59-66; Mrk 14:55-64; Luk 22:66-71*

<sup>19</sup> Haû u lé, haû hkyangjong mó gi, Yesuq lé, Yhâng é chángzô pê hkyô eq Yhâng mhoqshit é hkyô eq séng luî myî ri.

<sup>20</sup> Haû hkûn, Yesuq gi, "Haû mingkan htoq má, Ngò, de de taí bê nghut lhê. Ngò gi, haû Yudaq byu pé banshoq bang chôm zing é, tarajong pé má le, noqkuq yhûm má le, ayang

\* 18:11 Góm lé shuq gà é gi, jamjau hui râ eq shî hkám râ lé, taí nau é nghut lhê.

mhoqshit é nghut lhê. Ngò gi, haq zaú luí taí é hkyô haí le a joq. <sup>21</sup> Nàng, haí mù Ngo lé myi lhê lhú? Haú, Ngò taí é lé wó gyô é bang lé myi aq; Ngò haí taí é hkyô lé, yhangmoq gè gè sê akò nghut ri." ga tú taí ri.

<sup>22</sup> Yesuq haú su ga taí jáng, haú nàm má nyi tô é noqkuq yhâm zúng sù rayuq gi, Yhang lé pyuq kat luí, "Hkyangjong mó lé wá, Nàng, haú su nghû dang tú lhê lhú?" ga taí ri.

<sup>23</sup> Haú hkûn, Yesuq gi, "Ngò taí shut é nghut le gi, shut é hkyô lé saksé tûn shit aq. Nghut kôlhang, Ngò gi, têng é đông ru taí le nhîng, nàng, haí mù Ngo lé pyuq lhê lhú?" ga tú taí ri. <sup>24</sup> Hau htâng, Anna gi, Yhang lé tuí to gù, haú hkyangjong mó Kayahpaq chyáng dé kat nhang ri.

*Yesuq Lé, Petruq Xoq He-ngik Pyâm É Hkyô*

*Mht 26:71-75; Mrk 14:69-72; Luk 22:58-62*

<sup>25</sup> Haú Simun Petruq gyoq gang yap tô é hkûn, "Nàng gi, Yhâng é chángzô pé mâ é rayuq a nghut lhú?" ga, yhang lé myi kôjáng, yhang gi, "Ngò a nghut." ga, dum he pyâm ri.

<sup>26</sup> Haú Petruq eq nohkyap zân hpyit pyám byi é huí su é buinùm nghut é sù, haú hkyangjong mó é dui-nhâng zoshâng rayuq gi, yhang lé, "Haú hkyâm má, nàng, Yhang eq rahá nghut nyi é lé, ngò a myang é su ngam lhê lhú?" ga taí ri. <sup>27</sup> Haú hkûn, Petruq gi, xoq he pyám ri; haú u yhang, woq tûn bê nghut ri.

*Pilat É Myoq Hí Má, Yesuq Jé Nyi É Hkun Lhê Hkyô*

*Mht 27:1-2, 11-14; Mrk 15:1-5; Luk 23:1-5*

<sup>28</sup> Hau htâng, yhangmoq gi, Yesuq lé, Kayahpaq chyáng mai, haú mauzau hpô é yhûmwàng shut shuî e ló akò. Haú u gi, napsûn noq ashî nghut ri. Yhangmoq gi, agot a-û a dut e za, htûngli đông Lhoqlhai Poí lé wó zo râ matú, yhûmhkaú má a wàng kó nghut ri. <sup>29</sup> Haú mù luí, mauzau Pilat gi, yhangmoq chyáng htoq ê mù, "Shí yuq lé, nungmoq hai mara hûn nau akò lhú?" ga myi ri.

<sup>30</sup> Haú hkûn, yhangmoq gi, "Shí yuq, a ge é muzó kut é a nghut le gi, Yhang lé, náng é loq má ngamoq lé ap byi râ a nghut." ga tú taí akò.

<sup>31</sup> Pilat gi, "Yhang lé, nungmoq yhang shuî ló mù, nungmoq é tarâ đông ló jéyáng keq." ga taí jáng, haú Yudaq byu pé gi, "Nghut kôlhang, ngamoq gi, ó yuq lé sat râ ahkáng le a wó é nghut lhê." ga tú taí akò nghut ri. <sup>32</sup> Haú su dut é hkyô gi, Yesuq, Yhang hká đông shî râ ga taí é dang lé lhoq dik râ matú nghut lhê.

<sup>33</sup> Haú mù, Pilat gi, yhûmhkaú má taú wang ló mù, Yesuq lé wut yù luí, "Nàng gi, Yudaq byu pé é hkohkâm nghut lhê lhú?" ga myi ri.

<sup>34</sup> Haú hkûn, Yesuq gi, "Haú gi, náng é myit đông taí é nghut lhê lhú? A nghut jáng, góbang mai, nang lé, Ngá é hkyô taí kyo luí nghut lhê lhú?" ga taú myi ri.

<sup>35</sup> Pilat gi, "Ngò gi, Yudaq byù nghut lhê lhú? Haú Náng é byù myû eq Náng é hkyangjong agyi pé sheq, Nang lé, ngá loq má ap byi é ru nghut lhê. Nàng gi, haí kut é nghut lhê lhú?" ga dum myi ri.

<sup>36</sup> Haú hkûn, Yesuq gi, "Ngá é mingdán gi, mingkan shî eq a séng. Mingkan shî eq séng é ru nghut le gi, haú Yudaq byu pé, Ngo lé a wó chyup yu lo shoq, Ngá é dui-nhâng zoshâng wuì, Ngo lé chôm hung yù kó râ nghut lhê. Nghut kôlhang, Ngá é mingdán gi, mingkan shî eq a séng é ru nghut lhê." ga taí ri.

<sup>37</sup> Haú mù, Pilat gi, "Haú jáng, Nàng gi, hkohkâm nghut bê lhú?" ga myi jáng, Yesuq gi, "Ngo lé, hkohkâm nghut lhê ga, nàng taí nyi é jô ri. Gè gè ga jáng, Ngò gi, hau é yanmai hku lé lo é sù nghut lhê; haú tengmán hkyô lé saksé hkám râ matú, Ngò, mingkan htoq má jé lé é nghut lhê. Haú tengmán hkyô eq séng é sù ó yuq le, Ngá é dang lé gyô ri." ga tú taí ri.

<sup>38</sup> Haú hkûn, Pilat gi, "Tengmán hkyô gâ é gi, haí jung lhú?" ga myi ri. Yhang gi, haú su ga myi luí, haú Yudaq byu pé chyáng dum htoq ê mù, "Shí yuq chyáng mara hûn râ hkyô, ngò a myàng nghut ri. <sup>39</sup> Nghut kôlhang, haú Lhoqlhai Poí u lé, nungmoq é matú, ngò, htóng byù rayuq nhang htoq kat byi byi kut é htûng, nungmoq wó akò. Haú mù,

'Yudaq byu pê é hkohkâm' lé, nhang htoq kat byi râ lé, nungmoq ô nau akô lúhú?" ga myî ri.

<sup>40</sup> Haú hkûn, yhangmoq gi, "Haú yuq lé a nghut! Barabaq lé sheq nhâng byi aq." ga, garû kat akô. Barabaq gi, damyaq nghut ri.

## 19

*Yesuq Lé, Tapzîng Má Jén Sat Râ Matú Doqdân É Hkyô*

*Mht 27:15-31; Mrk 15:6-20; Luk 23:13-25*

<sup>1</sup> Haú mù luí, Yesuq lé lâng she yù mù, nhuq bat râ matú, Pilat hkunmó hkyô ri. <sup>2</sup> Haú gyezô pé gi, zujanmaú saí yù kôluí, Yesuq é ulhum má tsung byi kômù, Yhang lé, buhîng nè hut byî akô nghut ri. <sup>3</sup> Hau htâng, yhangmoq gi, Yhâng chyáng dum huí ê ê kut luí, "Yudaq byu pê é hkohkâm ê! Chyung hîng xê hing nyî sháng gaq ô!" ga taí kômù, Yhâng é myoqdong má pyuq byî akô nghut ri.

<sup>4</sup> Pilat gi, haú Yudaq byu pê chyáng radàm dum htoq ê mù, "Wú keq, shí yuq chyáng mara hûn râ hkyô, ngò a myang é lé nungmoq sé sháng nghû, Yhang lé, ngò nungmoq chyáng shuí htoq lé byî lhê." ga taí ri. <sup>5</sup> Yesuq gi, haú zumuq tsûng tô é eq bu nè hîng wut to mù htoq lé jáng, Pilat gi, yhangmoq lé, "Wú keq, Yhang, shí yuq nghut lhê." ga taí ri.

<sup>6</sup> Haú hkyangjong agyi pé eq yhangmoq é noqkuq yhûm zúng bang gi, Yhang lé myang kat kôjáng, "Yhang lé tapzîng má jén sat pyám aq! Yhang lé tapzîng má jén sat pyám aq!" ga garû bum akô.

Nghut kôlhang, Pilat gi, "Nungmoq shuí yù mù, tapzîng má jén sat keq. Ngò gi, Yhâng chyáng mara hûn râ hkyô a myàng." ga tû taí ri.

<sup>7</sup> Haú hkûn, haú Yudaq byu pé gi, "Ngamoq chyáng tarâ rahkat joq lhê; tarâ haú dông ga jang, Yhang gi, shí gíng bê nghut ri; hkâsu mù gà le, Yhang gi, Garai Gasâng é Yhangzo haú nghut lhê gà ri." ga xoq taí akô.

<sup>8</sup> Pilat gi, dang haú lé wó gyo jáng, je gyô gyuq luí, <sup>9</sup> yhúmhaú shut dum wang ló mù, Yesuq lé, "Nàng, hkâmâ é sù nghut lhê lúhú?" ga myî ri. Nghut kôlhang, Yesuq gi, dang rahkun lháng a tû taí byi nghut ri. <sup>10</sup> Haú hkûn, Pilat gi, "Nàng, ngo lé a tû taí kut lhê lúhú? Ngò gi, Nàng lé, wó lhoq lhut kat é eq tapzîng má wó jén sat pyâm é ahkáng wó sù nghut é lé, Nàng a sé lúhú?" ga myî ri.

<sup>11</sup> Yesuq gi, "Nàng lé, haú ahtoq mai ahkáng byî e za a nghut le gi, nàng, Ngo lé haí kut râ a-tsam le wó râ a nghut. Haú mù luí, Ngo lé, náng é loq má ap byî é sù gi, mara je bo é nghut lhê." ga tû taí ri.

<sup>12</sup> Haú hkûn mai, Pilat gi, Yesuq lé lhoq lhut kat byi nau nyî bê nghut ri. Nghut kôlhang, haú Yudaq byu pé gi, "Nàng, haú yuq lé nhang pyâm é nghut jáng, nàng gi, hkoséng Kehtaq é luzúm a nghut lo; yhumsing gùng lé, hkohkâm gà é sù gi, hkoséng Kehtaq eq shai lhûm é sù nghut lhê." ga, ru jâng garû nyî bum akô nghut ri.

<sup>13</sup> Haú lé wó gyo jáng, Pilat gi, Yesuq lé shuí htoq ê mù, Hebre myíng dông Gabahta gà é Luqgok hkâng myhang to jang nghu é jowò mâ é tarâ jéyáng tanghkuq má zung tô ri.

<sup>14</sup> Haú u gi, Lhoqlhai Poí é matú, Hên Lajâng é Buinyî nyí-káng raxe í hkyíng nghut ri.

Pilat gi, haú Yudaq byu pé lé, "Nungmoq é hkohkâm lé wú keq." ga taí ri.

<sup>15</sup> Nghut kôlhang, yhangmoq gi, "Yhang lé yu pyám aq! Yhang lé yu pyám aq! Yhang lé tapzîng má jén sat pyám aq!" ga garû bum akô.

Haú hkûn, Pilat gi, "Nungmoq é hkohkâm lé wá, ngò, tapzîng má jén sat pyám râ lúhú?" ga myi jáng, haú hkyangjong agyi pé gi, "Haú hkoséng Kehtaq mai lai luí, gotû hkohkâm ngamoq a wó." ga, tû taí akô nghut ri.

<sup>16</sup> Hau htâng má, Pilat gi, Yesuq lé tapzîng má jén sat pyám râ matú, yhangmoq é loq má ap byî kat bê nghut ri. Haú mù luí, yhangmoq gi, Yesuq lé shuí ló bekô nghut ri.

*Tapzîng Má Jén Pyâm É Hkyô*

*Mht 27:32-44; Mrk 15:21-32; Luk 23:26-43*

<sup>17</sup> Yesuq gi, yhumsing é tapzîng lé waq mù, Hebre myíng dông Golgahta gà é, Ugyap joq é Jowò gà é jang má htoq jé e ri. <sup>18</sup> Yhangmoq gi, haú má, Yesuq lé tapzîng htoq má



jén tap pyám akô; Yhang eq rahá, gotû í yuq lé le, rahkyam shut rayuq kut jén to kô é nghut luí, Yesuq gi, gyoro má nghut ri.

<sup>19</sup> Pilat le, masat laiká kâ yù luí, haú tapzîng htoq má tap tô ri. Haú má gi, "YUDAQ BYU PÊ É HKOHKÂM, NAZARET WÀ BYÙ YESUQ" gâ tô ri. <sup>20</sup> Yesuq lé jén tô é jowò gi, myuq eq chyâng lhûm é htoq agó, haú masat laiká gi, Hebre đông le, Latin đông le, Grik đông le, kâ tô é yanmai, haú Yudaq byu pé myo myo gi, masat laiká haú lé nghap bum akô nghut ri. <sup>21</sup> Haú Yudaq byu pé é hkyangjong agyi pé gi, Pilat lé, "'Yudaq byu pé é hkohkâm' nghû hkâkâ, 'Ngò gi, Yudaq byu pé é hkohkâm nghut lhê ga, Yhang taí ri.' nghû luí sheq kâ aq." ga taí akô.

<sup>22</sup> Haú hkûn, Pilat gi, "Ngò kâ é đông, ngò kâ to bê nghut lhê." ga tû taí ri.

<sup>23</sup> Haú gyezô pé gi, Yesuq lé tapzîng má jén tap pyâm é htâng má, Yhâng é mebu pé lé yù mù, myî hkyam gàm luí, rayuq rahkyam yu akô; haú ahte bu lé le, gàm râ dâ akô; nghut kôlhang, haú gi, hkyupshi a bo e za, awang mai ahpyo hpyot kut woq tô é nghut ri.

<sup>24</sup> Haú mù, yhangmoq gi, "Bu shî lé gi, a lîng cheq e za, ó yuq myang yù ang râ laq, hkyîn shosé she wú sháng." ga, rayuq eq rayuq taí lhum akô.

Haú gi,

"Yhangmoq, Ngá é mebu lé chôm gam yù kó râ; Ngá é ahtê bû é matú, hkyîn shosé shê kó râ nghut lhê."☆

gâ é Chyúmdang lé lhoq dik râ matú dut é nghut lhê. Haú mù, gyezô pé gi, haú su kut bekô nghut ri.

<sup>25</sup> Haú Yesuq é tapzîng nàm má gi, Yhângnu, Yhângnû é yhanggu byizo eq, Klopa é yhangmyi Mariq eq Magadalaq wà mâ é Mariq pé, yap tô bum akô. <sup>26</sup> Yesuq gi, Yhang nàm má, Yhang chyitdap é chángzo eq Yhâng nu yap tô é lé myang kat jáng, Yhâng nu lé, "Ânu ê\* nung zo lé wú aq." ga taí mù, <sup>27</sup> chángzo haú lé le, "Náng nu lé wú aq." ga taí ri. Haú hkûn mai, chángzo haú yuq gi, Yesuq é yhângnu lé, yhâng é yhûm shut shuî lô bê nghut ri.

#### *Yesuq Soqkâng Byit É Hkyô*

*Mht 27:45-56; Mrk 15:33-41; Luk 23:44-49*

<sup>28</sup> Hau htâng, Yesuq gi, ahkuí, muzó bàn bê nghut é lé sé luí, haú Chyúmdang lhoq dik râ matú, "Ngò, wuì shít ri." ga taí ri. <sup>29</sup> Haú má, tsibiyiq wing chyîn rayambú joq tô ri; haú mù, yhangmoq gi, wuìmaù lé tsibiyiq wing chyîn haú má jum yù luí, jàm-yang ahpyo má tuí tap mù, Yhâng é nhutwuí jé shoq yhun byî akô nghut ri. <sup>30</sup> Yesuq gi, tsibiyiq wing chyîn haú lé shuq yù mù, "Mû bàn bê." ga taí ri. Yhang, haú su ga taí eq yhang, ulhum nghuq lô mù, kâng byit bê nghut ri.

<sup>31</sup> Htang nyí gi, ahkyak é Bánno buinyì nghut luí, haú nyí gi, Hên Lajang Buinyì nghut ri. Haú mù, Yudaq byu pé gi, Bánno buinyì má, mâng pé lé tapzîng htoq má a joq to nhâng naù kô é yanmai, hkyí pé lé bat hkyuí pyám mù, mâng pé lé yù hkyô pyám nhâng râ matú, Pilat chyáng dúng tôngbán akô. <sup>32</sup> Haú mù luí, gyezô pé gi, lé mù, Yesuq eq jén hui su nhik mâ é, rayuq é hkyí lé hí bat hkyuí pyám mù, rayuq é hkyí lé dum bat hkyuí pyám akô nghut ri. <sup>33</sup> Nghut kôlhang, yhangmoq gi, Yesuq chyáng jé é hkûn, Yhang shi to lánng bê nghut é lé myàng kômù, Yhâng é hkyí lé a bat hkyui byi kó nghut ri. <sup>34</sup> Nghut kôlhang, gyezo rayuq gi, Yesuq é namcham má lham eq htaù kat byi jáng, radá dâm sui eq wuì yui htoq lo ri. <sup>35</sup> Haú lé myàng é sù gi, saksé hkám byî ri; yhâng saksé hkâm é hkyô gi, tengmán ri. Haú yhang taí kyô é hkyô gi, têng é lé, yhang sé mù, nungmoq le wó lumjîng kó sháng gaq ga, saksé hkám byî é nghut ri. <sup>36</sup> Haú hkyô pé dut é gi, "Yhâng é showui rahkat lhang a lhoq hkyui râ nghut lhê."☆ gâ é Chyúmdang haú lhoq dik râ matú nghut lhê. <sup>37</sup> Chyúmdang gotû ralhûm má le, "Yhangmoq eq htau htông é sù lé, yhangmoq tu wú kó râ nghut lhê."☆ gâ é bo tô ashî nghut ri.

☆ 19:24 Hkya-on 22:18 \* 19:26 Ânu ê, gâ é lé, Grik đông gi, "myiwe myhí ê" ga bo tô é nghut lhê. ☆ 19:36

Htoq Lô 12:46; Gyung So 9:12; Hkya-on 34:20 ☆ 19:37 Zhk 12:10

*Yesuq Lé, Myhup Yhum É Hkyô*

*Mht 27:57-61; Mrk 15:42-47; Luk 23:50-56*

<sup>38</sup> Hau htâng, Yesuq é chángzo dut nyi é Aramahti myuq byû Yosep gi, haû Yudaq byu pé lé gyuq é yanmai, tsik za Pilat chyáng Yesuq é gungsôm lé, lé dúng ri. Pilat èq ahkáng byî kat jáng, yhang gi, gungsôm haû lé, lé yu ló bê nghut ri. <sup>39</sup> Yhang gi, hí hkûn, myín lé, Yesuq lé è huí é sù, Nikodema eq rahá lé é nghut ri; Nikodema gi, mura eq achyo nyhô tô é namngón jung sum xê jói kô yu lé ri. <sup>40</sup> Yhangnhik gi, Yesuq é gungsôm lé yù mù, Yudaq byu pé é mâng yhum htûng eq rajung za, namngón jung eq rahá, pán yúng eq htup yup to byî akô. <sup>41</sup> Haû Yesuq lé tapzîng má jén sat pyâm é jowò nàm má, hkyâm ralhüm joq ri; ó yuq lé le a lheq wú shî é, lup sik ralhüm hkyâm hkaû má joq tô ri. <sup>42</sup> Haû nyí gi, Yudaq byu pé é Hên Lajang Buinyi nghut é yanmai le, lup haû le chyâng é yanmai le, yhangnhik gi, Yesuq lé, haû má è lheq tô akô nghut ri.

## 20

*Lup Akôm*

*Mht 28:1-10; Mrk 16:1-8; Luk 24:1-12*

<sup>1</sup> Bánno buinyi htâng, napsûn noq le mau a bó shimá, Magadalaq wà mâ é Mariq gi, haû lup má è jé le, lup hkum mâ é luqlong huí hpyuq to lánq é lé myang ri. <sup>2</sup> Haû mù, yhang gi, Simun Petruq eq Yesuq chyitdap é chángzo góyuq chyáng din jé ló mù, "Haû Yhumsîng lé, lup mai yu htoq ló byuq bekô; hkâmá è kat to kô é lé, ngamoq a sé." ga taî ri.

<sup>3</sup> Haû mù, Petruq eq chángzo haû gi, lup shut e ló akô. <sup>4</sup> Yhangnhik í yuq é din akô; nghut kôlhang, chángzo haû gi, Petruq htoq má wó dîn luí, lup má hí din jé e ri. <sup>5</sup> Haû mù, yhang gi, ahkaû shut ngóm wú kat é hkûn, haû pán yúng htui leq tô é lé myang ri; nghut kôlhang, yhang gi, a wang è nghut ri. <sup>6</sup> Hau htâng, Simun Petruq gi, châng jé luí, lup hkaû shut wang e ri; haû hkûn, yhang gi, haû má pán yúng htui joq tô é lé le, <sup>7</sup> haû Yesuq é ulhum má htup é panchoq lé le, myang ri. Panchoq haû gi, pán yúng htui eq rahá a nghut e za htui jup leq tô ri. <sup>8</sup> Haû lup má hí jé é chángzo le, ahkaû má wang è luí, myàng jáng, lumjîng bê nghut ri. <sup>9</sup> (Yesuq gi, shi é mai dum dui toq lô râ nghut lhê ga bo tô é Chyúmdang lé, yhangnhik gi, a sê gyo shi kó nghut ri.) <sup>10</sup> Hau htâng, haû chángzô nhik gi, yhûm taû ló bekô nghut ri.

*Magadalaq Wà Mâ É Mariq Lé, Yesuq Htoq Shit É Hkyô*

*Mrk 16:9-11*

<sup>11</sup> Nghut kôlhang, Mariq gi, lup shinggan má ngau yap tô ri. Yhang gi, ngaù uchyang lup hkaû má ngóm wú kat ri. <sup>12</sup> Haû hkûn, yhang gi, Yesuq é gungsôm lheq tô é jang má, hpyu é mebu wut é maumang lagyo í yuq hkyî htâng shut rayuq, umhtúng shut rayuq, zung to kô é lé, myang ri.

<sup>13</sup> Yhangnhik gi, "Myiwe myhí è, nàng, haî mù ngau nyi lhê lhú?" ga myi kôjáng, yhang gi, "Ngá é Yhumsîng lé yù ló hpyuq kôluí, Yhang lé hkâmá ló lheq to kô é lé, ngò a sê é yanmai nghut lhê." ga taî ri. <sup>14</sup> Haû su ga luí, yhang, lhing wú kat é hkûn, Yesuq yap tô é lé myàng kôlhang, Yesuq nghut é lé yhang a wú sé nghut ri.

<sup>15</sup> Yesuq gi, "Myiwe myhí è, nàng, haî mù ngau nyi lhê lhú? Nàng gi, ó yuq lé ho wún lhê lhú?" ga myi jáng, yhang gi, hkyâm saí zo sù su ngam pyám mù, "Sarà è, nàng, Yhang lé waq htot pyâm é nghut le gi, hkâmá è lheq tô é, ngo lé taî kyo laq, ngò, Yhang lé yu ló râ." ga taî ri.

<sup>16</sup> Haû hkûn, Yesuq gi, yhang lé, "Mariq è" ga wut kat ri.

Mariq gi, Yhâng shut lhîng mù, Hebre myíng dông, "Raboni!" ga wut kat ri. (Haû gi, "Sarà è" gâ é lichyúm nghut ri.)

<sup>17</sup> Yesuq gi, "Ngo lé hkâzáng shi; hkâsu mù gâ le, Ngò gi, haû Îwâ chyáng a taû doq ló shî é nghut lhê. Nàng gi, Ngá é gumang wui chyáng ló mù, yhangmoq lé, 'Ngò gi, Ngá Wa eq nungmoq é Yhângwa, Ngá é Garai Gasang eq nungmoq é Garai Gasang nghut su chyáng doq ló zó nghut lhê.' gâ ri nghû, ló taî kyo aq." ga, yhang lé taî kat ri.

<sup>18</sup> Magadalaq wà mà é Mariq gi, chángzô pè chyáng ló mù, "Yhumsîng lé, ngò myàng bê!" ga taí luí, yhang lé shit kat é pé lé, taí kyô ri.

*Yesuq, Yhâng É Chángzô Pé Lé Htoq Shit É Hkyô*

*Mht 28:16-20; Mrk 16:14-18; Luk 24:36-49*

<sup>19</sup> Haú nyí, Bánno buinyi htang myin lé, haú chángzô pé gi, Yudaq byu pé lé gyuq kô é yanmai, hkum tsing myhî pyám mù, zîng tô bum kô é u lé, Yesuq gi, lé jé mù, yhangmoq é agùng má yap to luí, "Nungmoq nguingón yuqyo nyi sháng gaq!" ga taí ri. <sup>20</sup> Yhang gi, haú su ga taí é htâng má, yhangmoq lé, Yhâng é loq pé eq namcham lé tân shit ri. Chángzô pé gi, haú Yhumsîng lé myàng kôjáng, gyai gabú bùm bekô nghut ri.

<sup>21</sup> Yesuq gi, "Nungmoq nguingón yuqyo nyi sháng gaq! Haú îwa gi, Ngo lé nhang kat é su, Ngò gi, ahkuí, nungmoq lé nhang kat é nghut lhê." ga dum taí ri. <sup>22</sup> Haú su ga taí mù, Yhang gi, yhangmoq é ahtoq má soq mut luí, "Haú Chyoiyúng Woi-nyí lé hap yù keq. <sup>23</sup> Ó yuq é mara pé lé nghut kôle, nungmoq hkyut byí é nghut jáng, mara haú pé gi, hkyut pyám byí é hui râ nghut lhê; nungmoq a hkyut byí é nghut jáng, mara haú pé gi, hkyut pyâm é hui râ a nghut." ga taí ri.

*Htomaq Lé, Yesuq Htoq Shit É Hkyô*

<sup>24</sup> Haú chángzo raxe í yuq má bo é, Zozûm le gâ é Htomaq gi, Yesuq lé jé é hkûn, haú chángzô pé eq rahá a nyi to nghut ri. <sup>25</sup> Haú mù luí, gotû chángzô pé gi, yhang lé, "Haú Yhumsîng lé, ngamoq myàng bê." ga taí kyô akô.

Nghut kôlhang, yhang gi, yhangmoq lé, "Ngò gi, Yhâng é loq pé mà é shamtoq zuhkô lé myàng mù, ngá é loqnyhuí èq jói wú é eq, Yhâng é namcham má, ngá é loq èq myang lap wú é za a nghut jáng, haú lé ngò lumjîng râ a nghut." ga taí ri.

<sup>26</sup> Rabat myáng jáng, chángzô pé gi, haú yhúmhkaú má dum nyi tô akô; Htomaq le, yhangmoq eq rahá nghut nyi ri. Haú hkum pé myhî to kôlhang, Yesuq gi, lé jé mù, yhangmoq é agùng má yap to luí, "Nungmoq nguingón yuqyo nyi sháng gaq!" ga taí ri. <sup>27</sup> Hau htâng, Yhang gi, Htomaq lé, "Náng é loqnyhui, shî má lé jói mù, Ngá é loq pé lé wú aq. Náng é loq lhâm kat mù, Ngá é namcham má lé lap wú aq. A lùm hkâkut, lumjîng nyi aq." ga taí ri.

<sup>28</sup> Haú hkûn, Htomaq gi, "Ngá é Yhumsîng, ngá é Garai Gasang ê!" ga Yhang lé taí ri.

<sup>29</sup> Yesuq gi, yhang lé, "Nàng gi, Ngo lé myang é yanmai, lumjîng é a nghut lhuí? A myàng kôlhang, lumjîng é bang gi, hkungsô wó nyi ri." ga taí ri.

<sup>30</sup> Laiká buk shî má a kê tô é limik kumlhá pé gotû myo myo lé le, Yesuq gi, Yhâng é chángzô pè hí má kut shit bê nghut ri. <sup>31</sup> Nghut kôlhang, Yesuq gi, Garai Gasang é Yhangzo Hkrisduq nghut é lé, nungmoq wó lumjîng râ matú eq, lumjîng é yanmai, nungmoq Yhâng é myìng má asak wó kó râ matú, shí hkyô pé lé kê tô é nghut lhê.

## 21

*Ngozo Wó Chyup Yu É Limik Kumlhá*

<sup>1</sup> Hau htâng má, Yesuq gi, Tiberi nhông yàm má, Yhâng é chángzô pé lé dum htoq shit ri. Yhang htoq shit é hkyô gi, a-ô mà é đông nghut ri. <sup>2</sup> Simun Petruq, Zozûm le gâ é Htomaq, Galile mau Hkanaq wà mó mà é Nahtanelaq, Zebedi é yhangzo nhik eq gotû chángzo í yuq pé gi, rahá nyi to bum akô. <sup>3</sup> Haú hkûn, Simun Petruq gi, yhangmoq lé, "Ngò gi, ngozo kóng ê râ." ga taí jáng, yhangmoq gi, "Ngamoq le châng lé râ." ga taí akô. Haú mù luí, yhangmoq gi, htoq ê mù, haú lhai má wàng bekô nghut ri; nghut kôlhang, haú myîn, radu lhang a wó kóng kó nghut ri.

<sup>4</sup> Htang napkyó maubó lo é hkûn, Yesuq gi, wuiyàm má yap tô ri; nghut kôlhang, haú chángzô pé gi, Yesuq nghut é lé a wú sé kó nghut ri.

<sup>5</sup> Yesuq gi, yhangmoq lé, "Luzúm wui ê, nungmoq, ngozo wó akô lhuí?" ga, wut myi kat jáng, yhangmoq gi, "A wó." ga tû taí akô.

<sup>6</sup> Haú hkûn, Yhang gi, "Nungmoq é gùn lé, haú lhai é loqyo hkyam shut dú hkyô kat keq; haú jáng, nungmoq wó kông yù kó râ nghut lhê." ga taí ri. Haú mù, yhangmoq gi,

gùn dú hkyô kat é hkûn, ngozo lûm myô é yanmai, haû gùn lé lhang a wó lhang yù lo kó nghut ri.

<sup>7</sup> Haû mù luí, haû Yesuq chyitdap é chángzo gi, Petruq lé, "Yhumsîng ru nghut ri." ga taí ri. Simun Petruq gi, "Yhumsîng ru nghut ri." gâ é lé wó gyo eq yhang, yhang gi, mebu hkyut pyâm tô é yanmai, buhîng mó lé, yhang é gùng má baíyup yù mù, wui hkaû má byam wang ló bê nghut ri. <sup>8</sup> Haû chángzo góbang gi, wuiyàm eq ngo xê làm kô za wê é yanmai, ngozo byíng tô é gùn lé, wuiyàm shut lhai mai she jé lo akô nghut ri. <sup>9</sup> Yhangmoq gi, wuiyàm má jé dap ló kô é hkûn, myigye gyúng é myihkyóm htoq má ngozo nyhîn tô é lé le, muk ratsuí joq tô é lé le, myang akô.

<sup>10</sup> Yesuq gi, yhangmoq lé, "Haû, ahkuí za nungmoq wó kông yu é ngozo, ra-am yù lé keq." ga taí ri.

<sup>11</sup> Haû mù, Simun Petruq gi, lhai má doq ji luí, kô é ngozo rasho ngó xe sîm du yhang bo é gùn lé, dùng yàm má she htoq tô ri. Ngozo haû myhó myo kôlhang, gùn gi, a jeq nghut ri. <sup>12</sup> Yesuq gi, yhangmoq lé, "Napzang lé zo keq." ga taí ri. Chángzô pé gi, Yhang, haû Yhumsîng nghut é lé sé kô é yanmai, ó yuq lhang, "Nàng, ó yuq nghut lhê?" ga, a wám myi kó nghut ri. <sup>13</sup> Yesuq gi, lé mù, muk lé ê yù luí, yhangmoq lé byî ri; ngozo lé le, haû su kut ri. <sup>14</sup> Yesuq gi, shi é mai lhoq dui toq yû huí é htâng, Yhang é chángzô pé lé htoq shit é má, shî gi, sum dâm nghû râ dâm nghut ri.

#### *Yesuq Eq Petruq*

<sup>15</sup> Yhangmoq bàn zô bùm kô é htâng má, Yesuq gi, Simun Petruq lé, "Yohan é yhangzo Simun ê, nàng gi, shí bang htoq má, Ngo lé teng za je chyitdap lhê lhu?" ga myi jáng, yhang gi, "Nghut lhê; Yhumsîng ê, ngò, Nàng lé chyitdap é hkyô lé, Nàng sê lhê." ga tú taí ri. Haû hkûn, Yesuq gi, "Ngá é sau zô pé lé, baú aq." ga, yhang lé taí ri.

<sup>16</sup> Hau htâng, Yesuq gi, "Yohan é yhangzo Simun ê, nàng gi, Ngo lé teng za chyitdap lhê lhu?" ga dum myi jáng, yhang gi, "Nghut lhê; Yhumsîng ê, ngò, Nàng lé chyitdap é hkyô lé, Nàng sê lhê." ga tú taí ri. Haû hkûn, Yesuq gi, "Ngá é sau pé lé, rém aq." ga taí ri.

<sup>17</sup> Dum radàm, Yesuq gi, yhang lé, "Yohan é yhangzo Simun ê, nàng gi, Ngo lé chytit lhê lhu?" ga myî ri.

Haû hkûn, Petruq gi, "Nàng gi, ngo lé chyitdap lhê lhu?" ga, yhang lé Yesuq eq sùm dam dâm taí é yanmai, yhang myit nô luí, "Yhumsîng ê, Nàng gi, lhunglhang lé sê lhê; ngò, Nàng lé chyitdap é hkyô lé, Nàng sê lhê." ga taí ri.

Haû hkûn, Yesuq gi, "Ngá é sau pé lé, baú aq. <sup>18</sup> Ngò, nàng lé teng za taí lé, nàng, zorâm nghut é hkûn gi, yhumsîng gùng yhumsîng hpyihit baíyup\* yù mù, ê nau é jowò hkgámó má wó ê é nghut lhê; nghut kôlhang, nàng mang jáng gi, loq í loq lham luí, nang lé góyuq eq hpyihit baíyup byi mù, nàng a ê nau é jowò shut shuî ê râ nghut lhê." ga taí ri. <sup>19</sup> (Yesuq haû su ga taí é gi, haû Petruq, hkâsu kut shi é dông mai, Garai Gasâng é hpungwup shinggang lé dan hu nhâng râ nghut é lé, taí nau é nghut ri.) Hau htâng, Yesuq gi, yhang lé, "Ngá htâng cháng aq." ga taí ri.

<sup>20</sup> Haû hkûn, Petruq gi, lîng wú kat le, haû Yesuq chyitdap é chángzo, yhangmoq htâng châng wún é lé myàng ri. Chángzo haû gi, hí hkûn, myinzang zô é u lé, Yesuq chyáng leq ngè mù, "Yhumsîng ê, Nàng lé ap pyám râ sù gi, ó yuq lhu?" ga, myi wú é sù nghut ri. <sup>21</sup> Petruq gi, haû yuq lé myàng jáng, Yesuq lé, "Yhumsîng ê, shí yuq gi, hkâsu dut râ lhu?" ga myî ri.

<sup>22</sup> Yesuq gi, "Ngò jé lé é hkûn jé shoq, Ngò, yhang lé dui nyî nhâng nau é nghut le gi, nàng eq haí sêng lhê lhu? Nàng gi, Ngá htâng cháng aq." ga tú taí ri. <sup>23</sup> Dang hau é yanmai, chángzo haû yuq a shî râ nghut lhê gâ é danglám gi, haû gumang wui chyáng byo myín to bê nghut ri. Nghut kôlhang, Yesuq gi, haû yuq a shî râ hkyô lé taí é a nghut, "Ngò jé lé é hkûn jé shoq, Ngò, yhang lé dui nyî nhâng nau é nghut le gi, nàng eq haí sêng lhê lhu?" ga, taí é ru nghut lhê.

\* 21:18 Hpyihit baíyup gâ é lichyúm gi, mebu wut luí ri ri kut tô é lé gâ lhê.

<sup>24</sup> Shí pé lé saksé hkám mù, shí pé lé kê tô é sù gi, chángzo haú yuq nghut lhê. Yhâng é saksé gi, têng é lé, ngamoq sê lhê.

<sup>25</sup> Yesuq gi, gotû muzó myo myo le kut ashî nghut ri. Muzó haú pé lhum jup lé, kê htoq yu é ru nghut le gi, kê tô é laiká buk haú pé gi, mingkan gón má lháng ngo râ a nghut nghû, ngò wó myit ri.

## LAGYO

### Laiká

#### (Acts)

#### *Yesuq, Mauhkûng Má Shuî Yù Huî É Hkyô*

<sup>1</sup> Htohpiluoq ê, Yesuq yhang hkyin yu tô é lagyô pé lé, Chyoiyúng Woi-nyí wum-o èq dang ban pying tô é htâng má, Garai Gasang yhang lé mauhkûng shut shuî yu é buinyì jé shoq, <sup>2</sup> Yhang kut shit é hkyô pé eq, mhoqshit é hkyô pé banshoq lé, hí lhê é laiká buk má ngò kê kat bê nghut lhê. <sup>3</sup> Yesuq gi, shî hkâm é htâng má, Yhang dui toq bê hkyô lé, lumging é saksé myo myô èq yhangmoq lé tân shit mù, buinyì myi xê nyí gyoro má yhangmoq chyáng lé htoq shit shit kut luî, Garai Gasâng é mingdán hkyô lé hko kyô ri. <sup>4</sup> Yhang, yhangmoq eq rahá zup tô é hkûn, hkunmó hkyô é gi, "Nungmoq gi, Yerusalem wà mó mai a htoq é za, ngá chyáng mai wó gyô yu é, ngá wâ ê danggidiq byî tô é chyunghuoq lé lánng nyî keq. <sup>5</sup> Hkâsu mù gâ le, Yohan gi, wui èq wui-myhup hkâm byî é nghut lhê; nghut kôlhang, nungmoq kúm gi, buinyì hkâ-myháng a myáng má, Chyoiyúng Woi-nyí mai baptisma wó hkam yu kó râ nghut lhê." gâ ri.

<sup>6</sup> Lagyô pé gi, Yhang eq rahá chôm zup ming tô é hkûn, Yhang lé, "Yhumsîng ê, nàng, haû Israelaq byu pé lé mingdán dum xuq byi râ gi, ahkuí yhang nghut bê lhú?" ga myí akô.

<sup>7</sup> Yesuq gi, "Áwa gi, Yhâng é ahkáng ayá èq kut to bê é ahkyíng yam-yoq pé lé, nungmoq sé nó a ra. <sup>8</sup> Nghut kôlhang, Chyoiyúng Woi-nyí nungmoq chyáng jé jáng, nungmoq gi, wum-o a-tsam wó yû mù luî, Yerusalem wà mó eq Yuda mau banshoq, Samariq mau eq maumyî htáng shoq, ngá é saksê pé dut kó râ nghut lhê." ga luî, yhangmoq lé taî ri.

<sup>9</sup> Dang haû ban taî é htâng má, yhangmoq wú nyi le, Yhang gi, mauhkûng shut shuî yu é hui mù, yhangmoq hí mai Yhang lé a myàng loshoq, mhut èq htup ló byuq bê nghut ri.

<sup>10</sup> Yesuq doq ló nyi é u lé, yhangmoq mauhkûng shut ru wú tsuq nyi bum ashî le, hpyu é mebu wut é byú í yuq gi, radá dâm yhangmoq nàm má htoq yap lò mù, <sup>11</sup> "Galile byu pé ê, haî mù luî mauhkûng shut wú tsuq nyi akô lhú? Nungmoq é hí mai mauhkûng shut shuî yu huî é, haû Yesuq mauhkûng shut doq ló é u lé, nungmoq myang kat é su, Yhang dum jé lé râ nghut lhê." ga taî akô.

#### *Yudaq É Jowò Má, Mahtiaq Lé Hkyin Kat É Hkyô*

<sup>12</sup> Hau htâng má, yhangmoq gi, Tsanlun Bùm mai, Yerusalem wà mó shut taû ló bekô.\* Haú gyoro gi, Bánno buinyì má ge sô é í za wê ri. <sup>13</sup> Yhangmoq jé ló kôjáng, yhangmoq nyi nyi kô é yhûm ahtoq pyâm mâ é wap shut doq ló akô; haú bang gi, Petruq, Yohan, Yakuq, Andre, Hpilip eq Htomaq, Barhtolume eq Mahte, Alhpe é yhangzo Yakuq, Zelutuq dut é Simun, góyuq Yakuq é yhangzo Yudaq pé nghut akô. <sup>14</sup> Yhangmoq lhunglhâng bang gi, myiwe wui le, Yesuq é yhângnu Mariq le, yhanggu pé le kut mù, i-myit rahkat za kyû chôm dung dung kut nyi akô.

<sup>15</sup> Buinyì haú yoq má, Petruq gi, lumjing é gumang gu-nhá† wui rasha í xê yuq kô zup zîng tô é gung gûng má, toq yap mù, <sup>16</sup> "Gumang gu-nhá wui ê, Yesuq lé chyup é bang lé hkyô shuî hí é sù Yudaq eq séng luî, hí hpyang Dawiq é nhut mai Chyoiyúng Woi-nyí taî tô é Chyúmdang gi, dik byuq bê nghut ri. <sup>17</sup> Yhang gi, nga-nhúng má nghap lhôm é hui mù, hpúng sará ayá wó bê sù nghut kôlhang shí hkyô dut bê nghut ri." ga taî ri.

<sup>18</sup> (Yudaq gi, yhang kut é agè ashop é muzó mai wó é ahpau èq myigùng ratóng wui yu é htâng, haú má yhang, a-nghop dông byit gyó mù wam buq goq luî, û banshoq buq myín byuq bê nghut ri. <sup>19</sup> Haú hkyô lé Yerusalem wà mó má nyi é lhunglhâng bang wó

\* 1:12 Tsanlun bùm eq Yerusalem gyoro gi, déng rawuí hkup kô we ri. † 1:15 Gumang gu-nhá gâ é lé, Grik má gi, gumang za gâ to lhê.

gyo kôjáng, myigùng haû lé yhangmoq é myíng dông, 'Akeladama' ga myhîng akô; haû gi, 'Sui myigùng', gâ é nghut ri.)

<sup>20</sup> Petruq xoq taî é gi, "Hkâsu mù gâ le, Hkya-on Kungtôn Laiká má, 'Yhâng é jowò chamchyuyi dut byuq sháng gaq; haû má ó le a nyì kó sháng gaq.'<sup>☆</sup> ga luí le, dum

'Yhang wó é ayá lé byù góyuq wó yu pyám byi sháng gaq.'<sup>☆</sup> ga luí le, bo tô ri. <sup>21-22</sup> Haû mù luí, Yohan baptisma byî hi é hkûn mai, Yesuq lé nga-nhúng chyáng mai shuî yu é buinyì jé shoq, Yhumsîng Yesuq nga-nhúng eq rahá htoq htoq wàng wàng kut nyi é buinyì banshoq pé má, nga-nhúng eq yhang zum nyi sù rayuq lé, hkyin kat râ dut ri. Haû yuq gi, Yesuq dum dui toq é hkyô lé nga-nhúng eq rahá saksé dut râ sù nghut lhê." gâ ri.

<sup>23</sup> Haû hkûn, yhangmoq gi, Yustu ga le myhîng é, Barsabaq gâ é Yosep eq Mahtiaq nhik lé hkyin tô akô. <sup>24-25</sup> Haû mù, yhangmoq kyûdung kô é gi, "Byù banshoq é i-myt lé sê é Yhumsîng ê, Yudaq Iskarut gi, yhang ló gíng é jowò shut ló râ ga, tô pyâm tô é yhâng é lagyo ayá é matú shí nhik mâ é nàng hkyin tô é sù lé tân shit laq ò." ga akô. <sup>26</sup> Hau htâng, yhangmoq, byù hkyîn shosé she le, Mahtiaq chyáng ang bê. Haû mai, Mahtiaq lé gi, haû lagyo raxe rayuq má jat kat bê nghut ri.

## 2

### *Chyoiyúng Woi-nyí Jé Gyó Lo É Hkyô*

<sup>1</sup> Penteko-ti\* buinyì jé jáng, lumjíng bang banshoq gi, jowò ralhú má za, chôm zup míng nyi tô akô. <sup>2</sup> Haû hkûn, laidun mó lo é su gâ é htê gi, byodàn ratung, mauhkûng mai mying htoq lô mù luí, yhangmoq zing tô é yhûm byíng shoq dut to bê nghut ri. <sup>3</sup> Myishâm su dut é le byò myín htoq lô mù, yhangmoq yuq jup é ahtoq má jé to bùm bê nghut ri. <sup>4</sup> Yhangmoq lhunglhâng bang gi, Chyoiyúng Woi-nyí byíng lo bùm kômù, Woi-nyí èq taí nhang é eq rajung za, laklaí dang dông nyo lo bum akô.

<sup>5</sup> Haû u lé, mauhkûng ô má joq é mingdán hkanmó mâ é, tarâ hkunggâ é Yudaq byu pé gi, Yerusalem wà mó má bíng nyi bum akô. <sup>6</sup> Haû mying é htê lé wó gyo kôjáng, byù rajùm rayò zîng lé lô kômù, ó le ô é myíng dông sê gyô yù kô é yanmai, maú úng-âng byuq bùm kôluí, <sup>7</sup> maú bùm uchyang taí kô é gi, "Wú keq, ahkuí dang taí nyi é byù shí bang lhunglhâng gi, Galile byu pé chyat a nghut kó lhú? <sup>8</sup> Haû nghut é wa, hkâsu mù nga-nhúng ó le ô é yhumsing mau mâ é myíng dông sê gyô yu lhê lhú? <sup>9</sup> Parhti, Medi, Elam mau mâ é bang eq Mesopotamiaq mau, Yuda eq Kapadokia mau, Pontuq eq Asia, <sup>10</sup> Hprugi eq Pamhpuli, Egutuq ming má nyi é bang eq Kuruni myuq nâm má nyi é Libya ming mâ é bang, Romaq myuq mai lé bíng nyi é Yudaq byu pé eq Yudaq noqkuq htung má lhing wang lò bang, <sup>11</sup> Kreti zinlóng eq Arabiq mau mâ é bang, nga-nhúng gi, yhangmoq hko kyô é Garai Gasâng é mauhpo muzó hkyô lé, yhumsing mau mâ é myíng dông yhang wó sê gyô yu ri-nhung." gâ ri. <sup>12</sup> Yhangmoq banshoq bang gi, maú úng-âng byuq kômù, "Shí gi, haí wá nghut lhê lhú?" ga le, rayuq eq rayuq myí lhûm bum akô.

<sup>13</sup> Nghut kôlhâng, byù ra-am gi, "Shí bang gi, î shuq wut é bang nghut akô." ga luí, taí jihpoi bum akô nghut ri.

### *Petruq Hko Kyô É Mungdang*

<sup>14</sup> Haû hkûn, Petruq gi, lagyo góbang raxe rayuq eq toq yap mù, htê mó èq byù haû bang lé taí é gi, "Yudaq byu pé eq Yerusalem wà mó má nyi nyi é lhunglhâng bang ê, rago gyô wú keq! Ngò, nungmoq lé, shí hkyô taí kyo kôlé. <sup>15</sup> Shí bang gi, nungmoq sùngam é dông, shuq wut é bang a nghut; hkâsu mù gâ le, ahkuí gi, napkyó gau hkyíng za ru nghut ashí. <sup>16</sup> Shí hkyô kúm gi, myiqhtoi Yoelaq taí tô é eq rajung za dut é nghut ri. <sup>17</sup> Yhang taí tô é gi,

<sup>☆</sup> 1:20 Hkya-on 69:25    <sup>☆</sup> 1:20 Hkya-on 109:8    \* 2:1 Penteko-ti gâ é gi, Lhoqlhai Poí laí é htâng ngo xê nyí jé é buinyì má, kut é poi lé gâ lhê.

'Garai Gasang îsu gâ ri: Ló htâng é buinyì pé má, Ngò Ngá é Woi-nyí lé byù lhunglhang bâng é ahtoq má hut gyun râ nghut lhê.

Haù mù, nungmoq é yuqzo byizô pé gi, myiqhtoi htoi kó râ; nungmoq é zorâm wuì gi, myoqwup shing-rán myàng kó râ; nungmoq é hpaù mâng pé gi, yhupmoq myàng kó râ nghut lhê.

<sup>18</sup> Buinyì haù pé má, Ngá é dui-nhâng zoshâng hpô pé eq dui-nhâng zoshâng myhî pê é ahtoq má lhang, Ngò Ngá é Woi-nyí lé hut gyun mù luì, yhangmoq gi, myiqhtoi htoi kó râ nghut lhê.

<sup>19</sup> Ngò gi, ahtoq mauhkûng htoq má mauhpo muzó pé lé, a-ô myigùng htoq má, kumlhá pé lé, sui eq, myi eq, myihkau dùm pê èq kut mù tân shit râ.

<sup>20</sup> Haù Yhumsing é kô hkikhkam é buinyì a jé shimá, buì gi, mauchut byuq, lhamó gi, sui dut byuq é hí dut râ nghut lhê.

<sup>21</sup> Haù hkûn, Yhumsing é myìng lé lhang é bang yuq hkgámó gi, hkyi yu é hui kó râ nghut lhê.<sup>✠</sup>

gâ ri.

<sup>22</sup> Israelaq byu pé ê, dang shî lé gyô yù keq, nungmoq sê é eq rajung za, Nazaret wà byù Yesuq nungmoq é hí má tân shit é, laklái kumlhá, mauhpo muzó eq kumlhá pé gi, Yhang lé Garai Gasang nhang kat é saksé dut bê nghut ri. <sup>23</sup> Shí yuq gi, Garai Gasang myit hpyit tô é hkyô eq, hí te sê é hpaqchyî dông, nungmoq chyáng ap pyâm é hui mù, nungmoq gi, agè ashop byu pé é loq èq, Yhang lé tapzîng htoq má jén sat pyám nhâng bekô nghut ri. <sup>24</sup> Nghut kôlhang, haù shî-nò hkyô gi, Yhang lé wó hkûm zing jung a nghut é yanmai, Garai Gasang gi, Yhang lé shî-nò jamjau mó mai, lhut pyám byi luì lhoq dui toq yù bê nghut ri. <sup>25</sup> Dawiq gi, shî yuq eq séng luì taì é má,

'Haù Yhumsing gi, ngá é myoq hí má hkâ-nhám le nyi nyi é lé ngò myàng bê.

Yhang ngá é loqyo hkyam má nyi nyi é yanmai, ngo lé wó lhoq nhún râ a nghut lo.

<sup>26</sup> Haù mù, ngá i-myit gi, nguìngón nyì luì, ngá nhut shô gabú hkya-ôn nyi ri; ngá é gungdu le myit myoqbyù jowò má nyi nyi râ nghut lhê.

<sup>27</sup> Hkâsu mù gâ le, nàng, ngá é woi-nyí lé mosumhkung má tô pyâm to râ a nghut.

Nàng, náng é Chyoiyúng Sù lé bup byuq é hui nhâng râ a nghut.

<sup>28</sup> Nàng, ngo lé asak dui é hkyô sé nhâng bê.

Náng é myoq hí má, nàng, ngo lé gabú hkyô lhoq pyíng byi râ nghut lhê.<sup>✠</sup>

gâ ri.

<sup>29</sup> Gumang wuì ê, nga-nhûng é îchyí îké Dawiq kâng byit mù, myhup pyám hui bê hkyô lé le, yhang é lup gi, hkû-nyí jé shoq nga-nhûng chyáng joq tô é lé le, ngò, nungmoq lé a gyuq a kyum wám taì lhê. <sup>30</sup> Dawiq gi, myiqhtoi rayuq nghut é yanmai, yhang é awut ashín mâ é rayuq lé, yhang é hkohkâm tanghkuq má zùng nhâng râ ga Garai Gasang byi tô é danggidiq lé sê to mù, <sup>31</sup> 'Hkrisduq† gi, mosumhkung má pyâm to a hui râ eq, Yhang é gungsho a bup byuq é za, dum dui toq ló râ nghut lhê.', gâ é hkyô lé te sê to luì taì tô ri. <sup>32</sup> Garai Gasang gi, haù Yesuq lé lhoq dui toq yù bê. Ngamoq banshoq bang gi, haù hkyo é saksé pé nghut nyi ri. <sup>33</sup> Haù mù, Garai Gasang gi, Yesuq lé Yhang é loqyo hkyam má lhoq toq to bê. Yesuq gi, Garai Gasang byi tô é danggidiq Chyoiyúng Woi-nyí lé hkam yù mù, hut hkyô kat bê nghut é yanmai, ahkuì nungmoq shî su wó myàng, wó gyo bekô nghut ri. <sup>34-35</sup> Hkâsu mù gâ le, Dawiq gi, mauhkûng htoq tsáng myhâng má a doq ló wú kôlhang, yhang gi,

'Haù Yhumsing Garai gi, ngá é Yhumsing lé,

"Ngò, náng é gye pé lé, náng é hkyî nang tanghkuq kut pyám byi é hkyíng jé shoq,

Ngá é loqyo hkyam shut zung nyi shi aq." gâ ri.<sup>✠</sup>

ga luì, taì ri.

✠ 2:21 Yol 2:28-32 ✠ 2:28 Hkya-on 16:8-11 † 2:31 Grik dong Hkrisduq gâ é gi, xù but hui Sù gâ é lichyúm nghut mù, Hebre dong Mesaia gâ é eq rajung za nghut lhê. ✠ 2:34-35 Hkya-on 110:1



<sup>36</sup> Hau é yanmai, Garai Gasang gi, nungmoq eq tapzîng má jén sat pyâm é haû Yesuq lé, Yhumsîng eq Hkrisduq dut nhang é hkyô, Israelaq byu pé lhunglhâng bang hkyak sê nyi kó sháng gaq ô." gâ ri.

### *Sâng-hi Lumjîng É Bang*

<sup>37</sup> Yhangmoq gi, haû lé wó gyô bùm kôjáng, yhangmoq é i-myt má záng kô é nghut mù luî, "Gumang wui ê, ngamoq hkâsu kut lo râ lhu?" ga luî, Petruq eq lagyo góbang lé myî akô.

<sup>38</sup> Petruq gi, "Nungmoq yuq hkanmó myit lhîng mù, Yesuq Hkrisduq é myîng mai wui-myhup hkâm yù keq; Haû jáng, nungmoq é yubak hkyut pyám byî é hui kó râ nghut lhê. Haû hkûn, Chyoiyúng Woi-nyí gâ é chyunghuq lé, nungmoq wó yù kó râ nghut lhê. <sup>39</sup> Hkâsu mù gâ le, danggidîq haû gi, nga-nhûng é Yhumsîng Garai Gasang ji yù râ bang banshoq nghut é, nungmoq eq nungmoq é yhangzo yhangshû pé eq le, mau we má nyi é lhunglhâng bang eq le, sêng lhê." ga luî, yhangmoq lé taî kyô ri.

<sup>40</sup> Yhang gi, dang gotû myo myô eq le saksé hkâm mù, "Shî agè ashop é amyû mai wó lut htoq lo keq ô!" ga luî, yhangmoq lé lhoq pun lhoq kyîng ri. <sup>41</sup> Dang haû lé guq yu é bang gi, wui-myhup hkâm yu bùm kôluî, haû nyí má byù sum hkyîng kô jat wàng lo bum bekô nghut ri.

### *Lumjîng Bang Zùm Yap É Hkyô*

<sup>42</sup> Haû bang gi, lagyô pé mhoqshit é hkyô, zùm yap é hkyô, muk hpê gam é hkyô<sup>‡</sup> eq akyû dúng é hkyô má, i-myt rahkat za chôm châng nyi akô. <sup>43</sup> Lagyo pé kut shit é mauhpo muzó eq limik kumlhá pé myo myô é yanmai, lhunglhâng bang gi, gyuq maú nyi bum akô nghut ri. <sup>44</sup> Lumjîng é lhunglhâng bang gi, rawò má za zup zîng to mù, azíng zè banshoq lé chôm chung nyi akô. <sup>45</sup> Yhangmoq gi, yhumsing é sutzè pé lé, ûng pyám mù, yuq hkanmó lé, yhang râ tô é eq rajung za gàm byî akô. <sup>46</sup> Yhangmoq gi, nyí wui myit rahkat zâ eq noqkuq yhûm wàng má nyi nyi akô. Yhumsing é yhûm pé má le muk hpê gam é hkûn, <sup>47</sup> Garai Gasang lé hkya-on kungtôn uchyang, gabú é eq myit huî é eq chôm zo chôm shuq nyi bum akô; byù banshoq bâng é hí má le myoqdong wó bum akô. Haû Yhumsîng gi, nyí wui yhangmoq chyáng hkyi yù hui bang jat lò nhang ri.

## 3

### *Hkyî Hten Sû Rayuq Lé, Petruq Lhoq Gê Byî É Hkyô*

<sup>1</sup> Ahkuî, Petruq eq Yohan gi, myinhtâng zó sum hkyîng lhê é kyûdung nám má, noqkuq yhûm shut doq e ló akô. <sup>2</sup> Haû hkûn, înu unghkaû mai hkyî hten lugù dut é byù rayuq lé, noqkuq yhûm má wang lé lô bâng chyáng mai dung zo sháng gaq ga, Yúnglho hkum ga myhîng é hkúmdong má nyí hkang nyí mó waq lé lô mù, lé nyhi to to kut akô. <sup>3</sup> Yhang gi, Petruq eq Yohan, noqkuq yhûm haû má wang e ló é lé, myàng luî, lhom dúng nyi ri. <sup>4</sup> Petruq eq Yohan kúm gi, yhang lé chôm wú tsuq to mù, "Nga-nhik lé tu wú aq." gâ akô. <sup>5</sup> Haû mù, yhang, yhangnhik chyáng mai rajung jung wó yù râ lé myit myoqbyù luî, yhangnhik lé rago za saî wú tô ri.

<sup>6</sup> Petruq kúm gi, "Ngùn, hîng gi, ngò a wó; nghut kôlhâng, ngò wó é nang lé byi lé: Nazaret wà byù Yesuq Hkrisduq é myîng mai toq sô ló aq." ga taî uchyang, <sup>7</sup> yhâng é loqyo loq má zui mù lêng toq kat ri; haû hkûn jáng, yhâng é hkyî kochang-chap pé wúm bo lò bê nghut ri. <sup>8</sup> Haû mù, yhang gi, radá dâm toq yap mù sô kat luî, so uchyang, byàm uchyang Garai Gasang lé hkya-on mù, yhangnhik eq rahá noqkuq yhûm má wang ló ri. <sup>9</sup> Yhang sô e ló nyi é eq Garai Gasang lé hkya-on kungton nyi é lé, lhunglhâng bang chôm myang akô. <sup>10</sup> Haû yuq gi, noqkuq yhûm é Yúnglho hkum gâ é hkúmdong má zung to mù, dung zo sù nghut é lé yhangmoq matsîng kô é nghut mù luî, yhâng chyáng dut lò bê hkyo é yanmai, maú hong byuq bum akô nghut ri.

<sup>‡</sup> 2:42 Muk hpê gam hkyô gâ é lé lichyúm í dông wó yu lhê - radông gi, rahá chôm zo chôm shuq é lé gâ lhê; radông gi, Poído chôm zô é lé gâ lhê.

*Petruq Hkô Kyô É Mungdang*

<sup>11</sup> Petruq eq Yohan chyáng haù dung zo sù byìn châng tô é hkùn, shiwa byu pé gi, wú maù uchyang, Sholumon jiroop shut, yhangmoq chyáng din yán wang lé lo bum akô. <sup>12</sup> Petruq haù lé myàng jáng, shiwa byu pé lé taí é gi, "Israelaq byu pé é, shí yuq é hkyô lé haí mù luí maù nyi akô lú? Nga-nhik é dingmán hkyô eq wum-o a-tsâm eq, shí yuq lé wó so nhang é su ngâm luí, ngá-nhik lé wú tsuq bum akô lú? Haù dông a nghut. <sup>13</sup> Abraham, Isak eq Yakup pê é Garai Gasang, nga-nhông é îchyí îwa pê é Garai Gasang gi, Yhâng é dui-nhâng zoshâng Yesuq lé hpungwup shingkang lhoq htoq byi é nghut ri; nungmoq kúm gi, Yhang lé sat hui shoq ga ap pyám kômù luí, Pilat zau hpó mai Yhang lé nhang pyám râ ga myit to bê lé, nungmoq gi, Yhâng é hí má yhang, Yhang lé he-ngik pyám akô nghut ri. <sup>14</sup> Haù chyoyúng dingmán é Sù lé nungmoq he-ngik pyám kômù, byù sat sù lé sheq dúng htoq yù kôluí, <sup>15</sup> Asak Yhumsing lé gi, sat pyám bekô. Garai Gasang kúm gi, haù yuq lé shi é mai lhoq dui toq yù bê nghut ri; ngá-nhik gi, haù hkyo é saksé nghut nyi lhê. <sup>16</sup> Yesuq é mying lé lumjóng é yanmai, haù lumjóng myit mai za, shí nungmoq myang é sê é sù lé wum-o lhoq pying byi bê nghut ri; nghut bê, Yesuq lé lumjóng é yanmai, shí yuq lé, nungmoq banshoq bâng é hí má, gumjup shoq lhoq ge to byi bê nghut ri.

<sup>17</sup> Ahkuí, gumang wui ê, nungmoq é uphkang bang kut é su, nungmoq le haù hkyô lé a sé mù kut pyám é hkyô lé ngò sê nyi lhê. <sup>18</sup> Nghut kôlhâng, haù hkyô gi, Garaí é Hkrisduq shî-nò jamjau hui râ nghut lhê ga luí, myiqhtoi banshoq bang lé hí hí mai taí nhang tô é Garai Gasang yhang, lhoq dik é nghut ri. <sup>19</sup> Hau é yanmai, haù Yhumsing chyáng mâ é nguingón é ahkying yàm yoq jé lô râ matú le, <sup>20</sup> nungmoq é matú hkyin tô é Hkrisduq nghut é Yesuq lé, Yhang nhang kat byi râ matú le, nungmoq é yubak mara hkyut pyám byi é hui râ matú le, nungmoq gi, myit lêng mù Garaí Gasang chyáng lhing lò keq. <sup>21</sup> Garaí Gasang gi, a-nham pyat mai, Yhâng é chyoyúng myiqhtoi pê é nhut mai, taí nhang to bê eq rajung za, nyi mi-nyì, joq mijoq lé asik dum sai é pyat jé shoq, Yesuq lé mauhkung htoq má nyi nhang to râ nghut lhê. <sup>22</sup> Hkâsu mù gâ le, Mosheq taí tô é le, 'Haù Yhumsing Garaí Gasang gi, nungmoq é yhanggu yhangmâng pê chyáng mai, nungmoq é matú ngò sù é myiqhtoi rayuq pô htoq lô nhâng râ nghut lhê; haù yuq taí mitaí nungmoq gyo ra râ nghut lhê. <sup>23</sup> Myiqhtoi hau é dang lé a gyo sù ó yuq nghut kôlhâng, yhumsing é byù myù mai chyung hpyit pyám é hui râ nghut lhê. <sup>☆</sup> gâ ri.

<sup>24</sup> Gè gè yhang, Samuelaq mai, yhâng é htâng má châng pô htoq lo é myiqhtoi pé banshoq bang hko kyô lo é má le, buinyì shí pé eq séng mù taí to bekô nghut ri. <sup>25</sup> Nungmoq gi, haù myiqhtoi pê é dang silí wunlí eq, Garaí Gasang mai, Abraham lé, 'Náng é awut ashin é yanmai, mingkan htoq mâ é byù myù chângjup hkungsô wó kó râ nghut lhê! <sup>☆</sup> gâ é eq rajung za, nungmoq é îchyí îwa pé eq tô tô é danggidid lé wó hkam yù râ bang nghut akô. <sup>26</sup> Garaí Gasang gi, nungmoq yuq hkingmó lé yhumsing agè ashop é hkyô mai wó lhing taù lò nhang é dông, shimân byi râ matú, Yhâng é dui-nhâng zoshâng lé pô htoq lô nhâng luí, nungmoq chyáng hí nhang kat byi bê nghut ri." gâ ri.

## 4

*Petruq Eq Yohan Nhik Chyup Huí É Hkyô*

<sup>1</sup> Hkyangjông pé, noqkuq yhùm zúng é suwún hpó eq Saduke pé gi, Petruq eq Yohan shiwa byu pé lé dâng nyo nyi é hkùn, htoq lé lô kômù, <sup>2</sup> yhangnhik, shiwa byu pé lé mhoqshit é eq, Yesuq é yanmai shi byuq bê bang Yesuq má dum dui toq lô râ gâ é hkyô lé taí nyi kô é yanmai, yhangmoq gyai yhang myit myô nyi bum akô. <sup>3</sup> Haù mù, yhangmoq gi, yhangnhik lé chyup yù luí, myinhtâng mauchut lô bê nghut é yanmai, htang napkyó jé shoq htóng má lhung tô akô. <sup>4</sup> Nghut kôlhâng, mungdang lé wó gyô yu é bang myo myo gi, lumjóng kômù luí, yuqgè ngo hkying kô jé shoq myô jat lò bekô nghut ri.

*Yudaq Byìn Tú Wapdoq Má, Yhangnhik Lé Myî Jep Wú É Hkyô*

<sup>5</sup> Htang nyí, yhangmoq é zau wuî, suwún wuî eq tarâ sará pé gi, Yerusalem wà mó má chôm huî zup akô. <sup>6</sup> Hkyangjong mó Anna, Kayahpaq, Yohan, Alesander pé eq hkyangjong mó é amyû pé banshoq le, haú má bo tô akô. <sup>7</sup> Haú mù, yhangmoq gi, Petruq eq Yohan lé gung gûng má nyhi to luí, "Nungnhik gi, haí a-tsam, ó yuq é myìng mai mù shí lé kut akô lhu?" ga myí akô.

<sup>8</sup> Haú hkûn, Petruq gi, Chyoiyúng Woi-nyí byíng tô é nghut mù luí, yhangmoq lé taí é gi, "Mingbyû wuî é zaugun suwún wuî ê, <sup>9</sup> hkyî hten sù shí yuq lé lhoq gê byí é jeju yanmai, yhang hkâsu kut lhoq ge yù huî é hkyô lé, hkû-nyí nungmoq ngá-nhik lé myí gôn wú naú kô é nghut le gi, <sup>10</sup> nungmoq lhunglhâng bang eq Israelaq byu pé banshoq lé sé nhâng kôlé, nungmoq eq tapzîng má jén sat pyám mù, Garai Gasâng eq shi é mai lhoq dui toq yu é, Nazaret wà byù Yesuq Hkrisduq é myìng mai, shí yuq gi, nungmoq é hí má îsu wáng wáng zán zán yap tô é nghut ri.

<sup>11</sup> 'Yhûm saí bang nungmoq hkyin htoq pyâm é luqgok gi, htungchyûn mâ é ahkyak dik é luqgok dut bê.<sup>☆</sup>

gâ é gi, Yesuq lé taí é dông nghut ri. <sup>12</sup> Hkyi yù hkyô gi, Yhang mai lai luí gotû a nyi lo, hkâsu mù gâ le, nga-nhúng hkyi yu é hui râ matú, mauhkûng a-ô má, Yhâng é myìng mai lai luí, xângzo byu pé lé byí tô é myìng gotû a joq lo é yanmai nghut ri." gâ ri.

<sup>13</sup> Yhangmoq kúm gi, Petruq eq Yohan nhik a gyuq a kyum taí é lé myàng kôjáng, yhangnhik, jong a doq wú é, mayû byù za nghut é hkyô lé sé to kô é yanmai, maú nyi bum akô; nghut kôlhang, hí hpyang Yesuq eq zum wún wú sù nhik nghut é lé, yhangmoq bûn kat akô nghut ri. <sup>14</sup> Hau htoq agó, lhoq gê byí é hui sù le, yhangnhik eq rahá yap tô é lé, yhangmoq myàng kô é nghut mù luí, taí râ hkyô haí le a joq lo kó nghut ri. <sup>15</sup> Haú mù, yhangnhik lé, haú Yudaq byin tú wapdoq\* mai lhoq htoq to mù, yhangmoq rayuq eq rayuq hpyê lhum kô é gi, <sup>16</sup> "Shí nhik lé hkâsu kut lé gè râ lhu? Yhangnhik kut shit e laklaí kumlhá gi, Yerusalem wà mó má nyi é lhunglhâng bâng é hí má de za dut bê nghut é yanmai, nga-nhúng haú lé a wó hê lo nghut ri. <sup>17</sup> Nghut kôlhang, mingbyû wuî má shí hkyô je riyhang a byo myín ló sháng gaq, ahkuí mai myìng haú lé lang mù ó lé le a taí kyo lo râ matú, yhangnhik lé kyuq hkúm pyám sháng." gâ bum akô.

<sup>18</sup> Haú mù, yhangnhik lé dum wut hâng yù luí, Yesuq é myìng lé lang mù, haí le hkâtaí, hkâ-mhoqshit kó ga chôm hkúm akô. <sup>19</sup> Petruq eq Yohan kúm gi, "Garai Gasâng é mungdang lé gyo râ htoq má, nungmoq é dang gyo le gi, Garai Gasâng é hí má gè râ, a gè râ lé, nungmoq yhang doqdân yù keq. <sup>20</sup> Nga-nhik kúm gi, myàng yù, wó gyô yù bê é hkyô pé lé, a taí é, a wó nyí nghut lhê." ga luí, yhangmoq lé dum tú taí akô.

<sup>21</sup> Haú hkûn, yhangmoq gi, dut laí lò bê hkyo é yanmai, shiwa byu pé Garai Gasang lé hkya-on kungton nyi bùm kôluí, yhangnhik lé dâm byi râ hkyô a myàng kó ê nghut mù luí, yhangnhik lé dum tân kyuq luí nhang pyám bekô nghut ri. <sup>22</sup> Hkâsu mù gâ le, haú laklaí kumlhá dông lhoq gê byi huí é sù gi, asak myi xê zàn chyân bê sù nghut é yanmai nghut ri.

### *Lumjîng Bâng É Kyûdung Dang*

<sup>23</sup> Yhangnhik gi, nhang kat pyâm é hui kôjáng, yhangnhik é luzúm wui chyáng taú ló kômù, hkyangjong agyi pé eq suwún wui eq yhangnhik lé hkyîm é dang banshoq lé, ló taí kyo akô nghut ri. <sup>24</sup> Haú hkyô lé wó gyo kôjáng, yhangmoq gi, myit rahkat zâ eq yhumsing é htê lhoq ko mù, Garai Gasang lé kyûdung kô é gi, "Mauhkûng eq myigùng, wuîshuq lung-aú eq, haú pé má, nyi mi-nyí lé hpan tô é, ahko ahkáng lhunglháng wó é Yhumsing ê, <sup>25</sup> Nàng, náng é dui-nhâng zoshâng, ngamoq é îchyí îkê Dawiq é nhut mai, Chyoiyúng Woi-nyí eq taí tô é gi,

'Haí mù luí, tûngbaù amyû pé gi, nhikjum yô akô? haí mù luí, byu pé gi, akôm dâ pyám akô lhu?

☆ 4:11 Hkya-on 118:22 \* 4:15 Yudaq byin tú wapdoq lé Grik dông gi, San-hedrin gâ lhê.

<sup>26</sup> Haû Yhumsîng eq Yhâng é Hkrisduq lé gumlau toq râ matú, mingkan hkohkâm pé gi, toq mù, zau suwún wuî eq rahá zup zîng bum akô.<sup>☆</sup> gâ ri. <sup>27</sup> Gè gè yhang, Herut eq Pontu Pilat nhik gi, tûngbaù pé eq Israelaq byu pé le mù, wà mó shî má chôm zîng to kôluî, nàng xû but byi é sù,<sup>†</sup> náng é Chyoiyúng dui-nhâng zoshâng Yesuq lé gumlau toq râ dâ nyi akô. <sup>28</sup> Náng é wum-o a-tsam eq nàng ô nau é dông dut râ matú, hí hkûn mai nàng myit hpyit doqdân tô é hkyô lé, yhangmoq gi, kut pyám bekô nghut ri. <sup>29</sup> Yhumsîng ê, ahkuî yhangmoq taî kyuaq nyi é dang lé myàng byi laq ô! Náng é dui-nhâng zoshâng wuî, a gyuaq a kyum é myit eq náng é dang lé taî râ matú wum-o byi laq! <sup>30</sup> Náng é wum-o bo é loq lham kat luî, nolî nojàng lé lhoq gè byi mù, náng é Chyoiyúng dui-nhâng zoshâng Yesuq é myìng mai, limik kumlhá eq mauhpo muzó pé lé kut shit laq ô!" gâ akô.

<sup>31</sup> Haû su, kyû ban dung kôjáng, yhangmoq zîng tô é jowò gi, dui nún lô mù, yhangmoq lhunglhang bang gi, Chyoiyúng Woi-nyí byíng lô luî, Garai Gasâng é mungdang lé a gyuaq a kyum é za taî bùm bekô nghut ri.

#### *Azîng Zê Lé Chôm Gam Chûng Kô É Hkyô*

<sup>32</sup> Haû lumjîng é lhunglhang bang gi, i-myt rahkat za nghut nyi akô; ó yuaq le, yhumsîng wó é zè lé ngá é a gâ é za, banshoq eq chôm gam chung nyi akô. <sup>33</sup> Lagyô pé le, haû Yhumsîng Yesuq dum dui toq é hkyô lé a-tsam mó eq saksé hkâm nyi kô é nghut mù luî, yhangmoq banshoq bâng é ahtoq má jeju myo myo joq nyi ri. <sup>34</sup> Yhangmoq chyáng a wó a lom é byù rayuaq le a nyi kó. Hkâsu mù gâ le, maumyî ratóng wó é, a nghut jáng, yhûm wó é bang ó yuaq nghut kôlhang, haú pé lé adàm dàm ûng pyám luî wó yu é ngùn le gi, <sup>35</sup> lagyô pê é hkyî wang má lé to byî akô. Haû mù luî, a wó a lòm sù ó yuaq lé le ra tô é eq rajung za gàm byî akô nghut ri.

<sup>36</sup> Haú hkûn, Barnaba ga luî lagyô pê eq myhîng byi é, Kupru ming mâ é Lewiq byù Yosep le, yhang wó é maumyî ratóng lé ung luî, wó yu é ngùn lé lagyô pê é hkyî wang má, lé to byî ri. <sup>37</sup> Barnaba gâ é dang lichyúm gi, myit wum byi su é yhangzo gâ é lichyúm nghut lhê.

## 5

#### *Anani Eq Sahpira Nhik É Hkyô*

<sup>1</sup> Nghut kôlhang, Anani ga sù gi, yhangmyi Sahpira eq rahá, yhâng nhâm wó é maumyî ratóng lé ûng pyám luî, <sup>2</sup> yhangmyi le bo sê é dông, ngùn haû ra-am lé gi, haq myhit yu to mù, ra-am lé za lagyô pê é hkyî wang má lé to byî akô.

<sup>3</sup> Haû mù luî, Petruq gi, "Anani ê, Chyoiyúng Woi-nyí lé mhaû pyám râ matú eq, maumyî hpau mâ é ra-am lé haq yu to râ matú, haî mù luî, náng é myit má Tsadán le byíng nhang tô lhê lú?" <sup>4</sup> Maumyî haû joq tô le, náng é zè nghut lhê a nghut lú? Wó ung é ngùn le náng é zè nghut ashî, a nghut lú? Haî mù luî, nàng haú dông dâ lhê lú? Byù lé mhaû é a nghut, Garai Gasang lé mhaû pyám bê nghut ri." ga taî ri.

<sup>5</sup> Anani gi, dang haû lé wó gyo jáng, lêng mù, shi byuaq bê nghut ri. Haú hkyô lé wó gyô é bang banshoq le, gyai yhang gyuaq bùm bekô nghut ri. <sup>6</sup> Haú hkûn, zorâm wuî gi, toq mù, yhâng é mâng lé htup luî, ê waq myhup pyâm akô. <sup>7</sup> Hau htâng, sum hkyíng kô myáng jáng, yhangmyi le, wang lé lo ri. Haû su dut é hkyô lé gi, yhang a sé nghut ri.

<sup>8</sup> Haú hkûn, Petruq gi, "Ngo lé taî kyô wú aq. Nungnhik ûng é maumyî hpau gi, shí gû za nghut lhê lú?" ga myi jáng, yhang gi, "Nghut lhê, haú gû za nghut bê." ga tû taî ri.

<sup>9</sup> Petruq gi, "Nungnhik gi, haû Yhumsîng é Woi-nyí lé îsu kut chyam wú râ matú, hkâsu mù chôm myit huî akô lú? Wú aq, náng é yhumsîng hpó lé ê myhup pyám bang gi, haû hkúmdong má jé bê; yhangmoq gi, nang lé le waq htoq pyám kó râ nghut lhê." ga taî ri.

<sup>10</sup> Radá dâm, yhang le lagyo hpô é hkyî wang má lêng shi byuaq bê. Zorâm wuî le wang lo wú le, myiwe haû shi to lág é lé myàng kôluî, waq ê mù, yhanglàng é nàm má, ê

☆ 4:26 Hkya-on 2:1-2 † 4:27 Xû but é hkyô gi, Yudaq byu pé htûng dông xû but byi jáng, rajung jung kut râ matú hkyin masat yu é hkyô nghut lhê. Xû but byi é sù gi, Grik dông Mesaia gâ é nghut lhê.

myhup pyám bekô. <sup>11</sup> Hau é yanmai, haú hkun lhê é hpúng byù banshoq bang eq, haú su dut é hkyô lé wó gyo má wó gyô é bang gi, gyai yhang gyuq bùm bekô nghut ri.

*Byù Myo Myo Lé, Lagyo Pé Lhoq Gê Byî É Hkyô*

<sup>12</sup> Ahkuî, lagyo pé gi, mingbyû wui é hí má limik kumlhá eq mauhpo muzó myo myo lé, kut shit nyi akô. Haú lumjínq bang gi, i-myt rahkat zâ èq, Sholumon jiroq má chôm hui hui kut bum akô. <sup>13</sup> Shiwa byu pé gi, yhangmoq lé hkunggâ nyi bùm kôlhang, yhangmoq lé a wám ê zum bùm kó. <sup>14</sup> Nghut kôlhang, haú Yhumsîng lé lumjínq é myiwe yuqgê wui gi, myo sheq myô jat lò kômù, yhangmoq chyáng je myô jat lò bê nghut ri. <sup>15</sup> Haú mù luî, byu pé gi, Petruq lai lo é hkûn, yhang é wupzo za lhang rayuq yuq é ahtoq má zang sháng gaq ga, nõhpyo huî é bang lé, wà mâ é hkyô yàm má waq htoq é mù, yhuphpú pé eq taphkang pé má lhez tô akô. <sup>16</sup> Hau htoq agó, Yerusalem awui ayàm mâ é wà pé mai le, byù ajùm ayò gi, no é bang eq agè ashop é nat wang zing-ri huî é bang lé shuî jé lé bum akô; haú bang lhunglhang gi, lhoq gê lhoq yô byî é huî bum akô nghut ri.

*Lagyo Pé Zing-ri Huî É Hkyô*

<sup>17</sup> Hkyangjong mó eq yhang é luzúm wuî, Saduke hpúng mâ é byu pé kúm gi, gyai yhang wú manon bùm kôluî, toq mù, <sup>18</sup> lagyo pé lé chyup yû luî, wà mâ é htóng má lhung tô akô. <sup>19</sup> Nghut kôlhang, haú myín lé, Yhumsîng é maumang lagyo rayuq gi, htóng hkum pé lé hpông pyám mù, yhangmoq lé shuî htoq yû uchyang, <sup>20</sup> "Nungmoq htoq ló mù, noqkuq yhûm má ê yap to luî, dui é asak hkyô sik eq sêng é danglù banshoq, shiwa byu pé lé taî kyo keq." ga taî ri.

<sup>21</sup> Napsûn myoqmyàng zó lé, yhangmoq gi, noqkuq yhûm má wàng mù yhangmoq wó gyô yu é eq rajung za, shiwa byu pé lé, mhoqshit hi ló akô.

Haú u lé, hkyangjong mó eq yhang é luzúm wuî gi, Israelaq byu pé é suwún wuî lhunglhang bang lé ji yù mù, Yudaq byin tú wapdoq chôm zung yù luî, lagyo pé lé é shuî yù râ matú htóng shut byù nhang kat akô. <sup>22</sup> Haú bang kúm gi, htong má jé é hkûn, lagyo pé lé a myàng kôjáng, dum taû lò mù lo taî kyo kô é gi, <sup>23</sup> "Htóng hkum le ging ging myhî to lánq ri, htóng zúng bang le hkum yâm má yap tô akô. Nghut kôlhang, hpông wú le, ahkaû má ó le a nyi to lo nghut ri." gâ ri. <sup>24</sup> Noqkuq yhûm zúng é zau hpó eq hkyangjong agyî wui gi, dang haú lé wó gyo kôjáng, "Shí hkyô haí dut lô râ lhu?" ga, gyai gyuq maú bum akô.

<sup>25</sup> Haú hkûn, byù rayuq wang lé lô mù, "Wú keq, nungmoq èq htóng má lhung tô é bang gi, noqkuq yhûm má yap to mù byu pé lé mhoqshit nyi bum akô." ga luî, yhangmoq lé taî kyô ri. <sup>26</sup> Haú mù luî, zau hpó haú gi, yhang é a-ô mâ é bang eq é mù, lagyo pé lé é shuî yu akô. Nghut kôlhang, shiwa byu pé luqgok èq dú lô kó râ lé gyuq kô é yanmai, htân htân a wám kut kó nghut ri.

<sup>27</sup> Lagyo pé lé shuî jé lô kôjáng, Yudaq byin tú wapdoq hí má yhangmoq lé nyhi tô akô. Haú hkûn, hkyangjong mó gi, <sup>28</sup> "Yesuq é mying lé lang luî a mhoqshit râ matú, nungmoq lé, htan é hkunmó hkyô to bê nghut lhê. Nghut kôle, nungmoq mhoqshit é hkyô gi, Yerusalem wà mó jàm shoq, nungmoq kut bekô nghut luî, Yesuq é sui lé, ngamoq é ahtoq má ke byi râ dâ nyi akô." ga luî, yhangmoq lé taî akô.

<sup>29</sup> Haú hkûn, Petruq eq gotû lagyo pé tû taî kô é gi, "Ngamoq gi, byù dang lé gyo ra htoq má Garai Gasâng é mungdang lé je luî gyo râ dut lhê. <sup>30</sup> Nga-nhung é îchyí îwâ pé é Garai Gasang gi, nungmoq èq tapzîng má lhang sat pyâm é Yesuq lé, shí e mai lhoq dui toq kat bê nghut ri. <sup>31</sup> Israelaq amyû lé, myit lhîng hkyô eq mara hkyut byi hkyô hpông byi râ matú, up é ahkáng wó Sû eq hkyi yù Sû kut nhâng râ ga, Garai Gasang gi, Yhang lé, Yhang é loqyo loq\* má waq toq to bê nghut ri. <sup>32</sup> Ngamoq le shí hkyo é saksé pé nghut nyi lhê; mungdang lé gyô yù luî châng é bang lé Garai Gasang byî tô é Choyiyung Woi-nyí le, shí pé é saksé nghut lhê." ga akô.

*Gamalelaq Hpaqchyî Byî É Hkyô*

\* 5:31 Garai é loqyo loq gâ é gi, hpautap hkungga gíng é jowò lé taí nau é nghut lhê.

<sup>33</sup> Yhangmoq gi, dang haû lé wó gyo kôjáng, lûm gyo nhik-yo naû kômù, lagyô pé lé sat pyám râ lhang myit akô. <sup>34</sup> Nghut kôlhang, mingbyû banshoq bâng é hí má aróng wó é tarâ sará Gamalelaq gâ é Hparishe rayuq, haû Yudaq byìn tú wapdoq má toq yap mù, lagyô pé lé razup zo lhoq htoq to nhâng luí, <sup>35</sup> yhang taí é gi, "Israelaq byu pé ê, shí bang lé hkâsu kut râ hkyô, rago za hí myit wú keq. <sup>36</sup> Hkâsu mù gâ le, hí hpyang Htudaq gâ é byù rayuq pô htoq lô mù, yhanggùng yhang byù mó rayuq yuq nghut lhê ga taí jáng, byù myi shô kô yhang chyáng châng wú bekô. Yhang sat pyám é hui luí, yhang htâng châng é lhunglhang bang le byo myín byuq kômù, haî le a wó kut dut byuq akô nghut ri. <sup>37</sup> Hau htâng, myìng jihpán guq yu é buinyì má, Yudaq gâ é Galile byù rayuq pô htoq mù, mingbyû wui lé yhang hkyam shut mhoq hpyoq yu ri. Yhang le sat pyám é hui mù, yhang htâng châng é lhunglhang bang le, byo myín byuq bekô nghut ri. <sup>38</sup> Ahkuí le, shí bang lé haî le hkâgon ko, yhangmoq kâm é đông nghut nyí kó sháng gaq; yhangmoq kut nyi é hkyô eq dâ nyi é hkyô pé gi, byù myit đông kut é nghut jáng, htên byoq byuq râ za nghut lhê. <sup>39</sup> Nghut kôlhang, Garai Gasâng chyáng mâ é nghut le gi, nungmoq wó lhoq hkyíng pyám kó râ a nghut. Garai Gasâng é gye sheq dut lò kó râ nghut lhê." gâ ri.

<sup>40</sup> Dang haû lé yhangmoq gyô htuk bum akô. Haû mù, lagyô pé lé wut yù mù luí, nhuq bat yù kômù, Yesuq é myìng lé lang luí mhoqshit é hkyô a ge kut râ nghut lhê ga taí kômù, nhang pyám akô nghut ri.

<sup>41</sup> Lagyô pé kúm gi, Yesuq é myìng é yanmai ru hpuzô é hkyô gi, gingdán nyi ri, ga myit yù kômù, Yudaq byìn tú wapdoq haû mai gabú myit èq htoq lô bekô. <sup>42</sup> Hau htâng, yhangmoq gi, nyí wui làng noqkuq yhûm má le, rayhûm htâng rayhûm má le, Yesuq gi, Hkrisduq nghut é hkyô gabú danglù lé mhoqshit hkô kyô nyi akô nghut ri.

## 6

### *Garúm Râ Byù Nyhit Yuq Lé Hkyin Yu É Hkyô*

<sup>1</sup> Ahkuí, chángzô pé myô jat lò nyi é buinyì pé má, Grik dang nyo é Yudaq byu pé gi, yhangmoq é chuimó myhî pé lé, nyí wui lhê é gàm tso gàm huq é hkyô má rago a wó kut kô é yanmai, Hebre myíng mu é Yudaq byu pé lé mara hûn dang taí bum akô. <sup>2</sup> Haû hkûn, lagyo raxe í yuq gi, chángzô pé lhunglhang bang lé wut yù mù, "Ngamoq, Îwa Garai Gasâng é mungdang hko kyô é muzó lé rap pyám to mù, zangbó amû lé za lajang nyi é nghut le gi, a htuk râ nghut lhê. <sup>3</sup> Haû mù luí, gumang wui ê, Chyoiyúng Woi-nyí byíng é eq hpaqchyí byéng-yá bo é nhik bo byù nyhit yuq lé nungmoq chyáng mâ é hkyin to keq. Haû bang lé muzó shí lhum hun to râ nghut lhê. <sup>4</sup> Ngamoq kúm gi, kyûdung é hkyô eq mungdang hkô é hkyô lé za, noqzuq tung kut nyí râ nghut lhê." ga taí akô.

<sup>5</sup> Dang haû lé shiwa byù lhunglhang bang gyô htuk kômù luí, lumjìng myit kô é, Chyoiyúng Woi-nyí byíng é Stehpan ga sù eq, Hpilip, Prokoru, Nikanora, Timun, Parmena, Yudaq noqkuq htung má lhing wang lò bê sù Antioku wà mó mâ é Nikolaq pé lé hkyin yù mù, <sup>6</sup> lagyô pê chyáng shuí lò akô; lagyô pé gi, kyûdung byi kômù, yhangmoq lé loq ke byí akô nghut ri.

<sup>7</sup> Garai Gasâng é mungdang gi, je myô jam lò luí, Yerusalem wà mó má chángzô pé gyai myô jat lawán lo é htoq agó, hkyangjông pé myo myo le, haû lumjìng hkyô má châng nyi bum akô.

### *Stehpan Chyup Yû Huí É Hkyô*

<sup>8</sup> Ahkuí, Stehpan gi, Garai Gasâng é jeju chyunghuq eq wum-o a-tsam byíng nyi é nghut mù, byu pé é hí má mauhpo muzó pé eq limik kumlhá mó pé tân shit ri. <sup>9</sup> Haû hkûn, luthkyô ga bâng é tarajong eq sêng é Kuruni, Alesander eq Kiliki, Asia mau mâ é bang ra-am gi, toq mù, Stehpan eq dang chyin chyin lhûm akô. <sup>10</sup> Nghut kôlhang, Stehpân é dang gi, Chyoiyúng Woi-nyí lom é hpaqchyí dang nghut é yanmai, yhangmoq a ûng kó nghut ri.

<sup>11</sup> Haû mù, yhangmoq gi, "Shí yuq, Mosheq eq Garai Gasang lé rhoi dang taí nyi é lé, ngamoq wó gyô ri." ga luí, mhaû taí nhâng râ byù haq lung tô akô.

<sup>12</sup> Haû mù, yhangmoq gi, mingbyû wuì eq nhik bô suwún wuì, tarâ sará pé lé, chun htau mù, Stehpan lé chyup yû nhâng luí, Yudaq byìn tú wapdoq má shuí nyhi tô akô.

<sup>13</sup> Mhaû é saksé byu pé lé le lhoq hâng kat luí, haú bang gi, "Shí yuq, shí chyoiyúng jowò\* eq jep é tarâ lé shut shai é dang ru taí nyi ri. <sup>14</sup> Nazaret wà byù Yesuq ga sù gi, jowò shí lé hpyoq pyám mù, nga-nhúng lé Mosheq èq byî tô é htunghking lé htaí pyám râ nghut lhê ga luí, yhang taí é dang lé ngamoq wó gyô é nghut lhê." ga taí akô.

<sup>15</sup> Haû Yudaq byìn tú wapdoq má zung to bang banshoq, yhang lé chôm wú tsuq nyí kô é hkûn, yhâng é myoqdong gi, maumang lagyô é myoqdong su dut é lé, yhangmoq myang akô nghut ri.

## 7

### *Stehpan Taí É Dang*

<sup>1</sup> Haú hkûn, hkyangjong mó gi, "Dang haú pé têng lhê lúhú?" ga luí, yhang lé myi jáng,

<sup>2</sup> Stehpan tû taí é gi, "Gumang wuì eq îwa wuì ê, gyô wú keq, nga-nhúng lhunghâng bâng é îchyí Abraham gi, Haran wà má a ló nyí shi lé, Mesopotamiaq mau má nyi tô ashí hkûn, hpungwup shingkang bo é Garai Gasang gi, yhâng chyáng lé htoq shit mù, <sup>3</sup> 'Náng é ming eq náng é amyû mai htoq ló luí, ngò tûn shit râ ming shut e ló aq.'<sup>✠</sup> ga luí, yhang lé taí ri.

<sup>4</sup> Haû mù, yhang gi, Hkaldea byu pé é mau mai htoq ló luí, Haran wà má ló nyi nyi ri. Yhâng wa shi byuq é htâng má, Garai Gasang gi, ahkuí, nungmoq nyi nyi é ming shí má yhang lé htot lô nhâng bê nghut ri. <sup>5</sup> Garai Gasang gi, shí ming má yhang lé silí wunlí nghû râ, hkyí rahkô nang î é myigùng lháng a byî é nghut kôlhâng, yhang, zodù lháng a wò shi mai, yhang lé le, yhâng é awut ashín pé lé le, maumyî shí byi râ ga danggidiq byî to bê nghut ri. <sup>6</sup> Hau htoq agó, shí hkyô lé Garai Gasang xoq taí é gi, 'Náng é awut ashín pé, tûngbaù ming má bíng nyí mù, haú ming bâng èq myi shô zàn jùn zô é eq zing-rî é lé hui kó râ. <sup>7</sup> Nghut kôlhâng, yhangmoq lé jùn zô é amyû lé le, ngò jéyáng râ nghut lhê.' gâ ri. 'Haú hkûn, yhangmoq gi, haú ming mai htoq lô mù, jowò shí má ngo lé noqkuq kó râ nghut lhê.'<sup>✠</sup> ga le, Garai Gasang taí ri. <sup>8</sup> Hau htâng, yhang lé ahpyo-kuq hpyit byi râ hkyô eq sêng é dangshikaq le, byî ri. Haû mù, Abraham gi, Isak lé hku é htâng shit nyí buinyi má ahpyo-kuq hpyit byî ri; Isak gi, Yakup lé hkû mù, Yakup gi, îchyí îwa achyûng raxe í yuq lé hku kat bê nghut ri.

<sup>9</sup> Haû îchyí îwâ pé gi, Yosep lé manôn kôluí, Egutuq ming shut jùn dông ûng kat akô. Nghut kôlhâng, Garai Gasang gi, yhang eq rahá nghut nyí mù luí, <sup>10</sup> wuîhke jamjau banshoq mai yhang lé lhoq lhut yû mù, Egutuq hkohkâm Hpara-uq é hí má le myoqdong wó, hpaqchyí byéng-yá le bò nhang é yanmai, hkohkâm haú gi, Egutuq ming eq, yhâng é hkohkâm-wâng banshoq lé up nhang ri.

<sup>11</sup> Haú u lé, Egutuq ming eq Hkanan ming banshoq má mutmó gyó lô mù, wuîhke jamjau mó hui bekô. Nga-nhúng é îchyí îwâ pé le zoshuq a myang hô zo lo dut byuq bekô nghut ri. <sup>12</sup> Ahkuí, Yakup gi, Egutuq ming má guqzo joq é hkyô lé wó gyo jáng, nga-nhúng é îchyí îwâ pé lé sâng-hî dâm ê nhang ri. <sup>13</sup> Htang dâm dum ê é hkûn, Yosep gi, yhanggu yhangmâng pé lé yhang ó nghut é hkyô taí kyô ri. Hpara-uq le Yosep é yhumbyù ikun hkyô lé sê yù byi bê nghut ri. <sup>14</sup> Hau htâng, Yosep gi, yhâng wa Yakup eq yhumbyù banshoq nyhit xe ngo yuq lé, yhâng chyáng pying yù bê nghut ri. <sup>15</sup> Yakup le Egutuq ming má jé gyó ló luí, yhang eq nga-nhúng é îchyí îwâ pé gi, banshoq haú ming má shí ló byuq bekô nghut ri. <sup>16</sup> Yhangmoq é mâng lé gi, Shehkem wà má yu taù ló mù, Shehkem wà mâ é Hamora é yhangzo yhangshu pé chyáng mai, Abraham èq ngùn byi mù wui hpyit tô é lupdùng má ló myhup tô akô nghut ri.

<sup>17</sup> Abraham lé Garai Gasang byî tô é danggidiq dik râ ahkyíng jé lo nyi é u lé, <sup>18</sup> nga-nhúng é amyû gi, Egutuq ming má Yosep lé a sê é hkohkâm pô htoq é pyat jé shoq, myoluq jebe lò bekô nghut ri. <sup>19</sup> Hkohkâm hpó haú gi, nga-nhúng é amyû htoq má a ge é hpaqchyí

\* 6:13 Shí chyoiyúng jowò gi, Yerusalem noqkuq yhûm lé gâ lhê. ✠ 7:3 Apûn 12:1 ✠ 7:7 Apûn 15:13-14

da luî, nyheqnú pé lé shi byuq sháng gaq ga, dú pyám nhang é đông mai nga-nhung é ichyí îwâ pé lé zing-ri bê nghut lhê.

<sup>20</sup> Haû u má, Mosheq lé hkû to bê. Yhang gi, Garai Gasâng é hí má gyai yúnglhô é sù nghut ri; yhang gi, yhangwâ é yhûm má lhamó sum hkyap baú tô é hui mù, <sup>21</sup> htot tô tô é hui jáng, yhang lé Hpara-uq é byizô èq xe yù mù, zosîng kut yû luî, hku kô ri. <sup>22</sup> Mosheq gi, Egutuq ming mâ é hpaqchyî byéng-yá banshoq lé mhoq yû luî, nhut shô a-tsam eq hkyî loq a-tsam gyai bò sù nghut ri.

<sup>23</sup> Yhang asak myi xê zàn jé lò jáng, yhang é gumang Israelaq byu pê chyáng ê kûm wú râ matú wó myit htoq kat ri. <sup>24</sup> Ê jé jáng, zing-ri hui nyi é sù rayuq lé ê myâng luî, haú yuq lé búng mù, zing-rî nyi é Egutuq byù lé, loqchoq hpuq é đông sat pyâm ri. <sup>25</sup> Mosheq gi, yhang é byu pé lé yhang é loq đông Garai Gasang hkyi yù hkyô byi nyi é lé, yhang é amyû pé sê gyo byi nhô ngâm kôlhâng, yhangmoq a sê gyo byi kó nghut ri. <sup>26</sup> Htang nyí lé, Israelaq byù yhangchang mabyoq htoq nyi é má, e ang mù, yhangnhik lé pyîn nau luî, 'Ahkaû nhik ê, gumang yhangchang sheq ru nghut lhê nhîng, haí mù rayuq eq rayuq byoq lhum nyi akô lhú?' ga taí ngón wú ri.

<sup>27</sup> Luzúm hpó lé zing-rî nyi sù yuq gi, 'Ngamoq é ahtoq má zau eq tarâ agyî kut râ matú, nàng lé ó yuq hkyin tô é lhú?' <sup>28</sup> A-nyi nap Egutuq byù lé sat pyâm é su, ngo lé le sat pyâm nau ri lhú?'<sup>☆</sup> ga luî, tâ taí uchyang yhang lé dîn chyûn pyâm ri. <sup>29</sup> Mosheq gi, dang hau é yanmai, hpâng luî Midian ming má ê nyi byuq ri. Haû má yuqzo í yuq é wó ri.

<sup>30</sup> Haû ming má myi xê zàn lai jáng, Sinaq Bùm yàm, yoso hkaû mâ é myi gyúng tô é mhanpúng mai, maumang lagyo rayuq gi, Mosheq lé htoq shit ri. <sup>31</sup> Mosheq gi, haû lé myàng jáng, hau é yanmai maú luî, wú wú râ ga huî e ló le, Yhumsîng é htê htoq lo é gi, <sup>32</sup> 'Ngò gi, nàng ichyí îwâ pê é Garai Gasang, Abraham, Isak, Yakup é Garai Gasang nghut nyi lhê.'<sup>☆</sup> ga ri. Mosheq kúm gi, gyuq nán luî, a wám tu wú nghut ri.

<sup>33</sup> Haû Yhumsîng gi, 'Nàng é hkyî-tsung hkyut pyám aq, nàng yap tô é jowò gi, chyoyúng é myigúng nghut lhê. <sup>34</sup> Egutuq ming má ngá é amyû pé zik zo huî nyi é hkyô lé, ngò gè gè yhang myàng bê; yhangmoq é ngaù nhik ngaù htê lé ngò wó gyo bê; yhangmoq lé hkyi yù râ matú ngò gyó lé é nghut lhê; ahkuî, lé aq, ngò, nang lé Egutuq ming shut nhang taû kat râ.'<sup>☆</sup> ga luî, yhang lé dum taí ri.

<sup>35</sup> Yhangmoq èq, 'Nang lé zau eq tarâ agyî kut râ matú, ó yuq hkyin tô é lhú?' ga luî he-ngik pyâm é Mosheq lé yhang, mhanpúng má htoq shit é maumang lagyo đông mai, Garai Gasang gi, yhangmoq é zau eq hkyi yù sù kut nhâng luî, taû nhang kat é nghut ri. <sup>36</sup> Haû Mosheq yhang, Egutuq ming má le, Nhões Nè má le, yoso hkaû pé má le, myi xê zàn gyoro má mauhpo muzó pé eq limik kumlhá pé tûn shit uchyang, yhang é byù myû pé lé Egutuq ming mai shuí htoq ló ri.

<sup>37</sup> Israelaq byu pé lé, 'Nung gu nung mâng pé mai, nungmoq é matú ngò eq du é myiqhtoi rayuq lé, Garai Gasang gi, pô htoq lô nhâng râ nghut lhê.'<sup>☆</sup> ga luî, tâ tô é sù le Mosheq yhang nghut ri. <sup>38</sup> Yoso hkaû má nghut nyi ashî hkûn lé, shiwa byù hpúng má, Sinaq Bùm má yhang lé dang taí é maumang lagyô eq le, nga-nhung é ichyí îwâ pé eq le rahá nghut sù gi, yhang yhang nghut nyi ri; nga-nhung lé ap byi râ asak dui é mungdang lé lom yu é sù le, yhang nghut nyi ri.

<sup>39</sup> Nghut kôlhâng, nga-nhung é ichyí îwâ pé kúm gi, yhang é dang lé a kâm gyo kômù, yhang lé he pyám luî, Egutuq ming shut taú nau é myit bo bum akô. <sup>40</sup> Haû mù, Arun lé, 'Egutuq ming mai nga-nhung lé shuí htoq lo é Mosheq gi, haí dut byuq bê hkyô lé, ngamoq a sé lo; haû mù, nga-nhung hí má so byi râ hparà lhô pé saí byi aq.'<sup>☆</sup> ga taí akô. <sup>41</sup> Haú buinyi pé má, yhangmoq gi, nojûng zo lhô saí mù, alhô haû lé hkungga nhông byi uchyang, yhangmoq é loq èq saí tô é muzó jizó má gabú nhik dik nyi akô. <sup>42</sup> Haû mù luî, myiqhtoí pê é laiká má kâ tô é gi,

☆ 7:28 Htoq Ló 2:14 ☆ 7:32 Htoq Ló 3:6 ☆ 7:34 Htoq Ló 3:5, 7-8,10 ☆ 7:37 Tarâ Pun 18:15 ☆ 7:40 Htoq Ló 32:1



'Israelaq byu pé ê, myi xê zàn tup yoso má chung é shigu eq hkungga gi, ngo lé nhông byî é nghut akô lhú?

<sup>43</sup> Nungmoq gi, nungmoq noq râ matú saí yu é alhò, Molak é zúm eq Rehpan hpara é kyî lé sheq, waq lhing wún ko é yanmai,

Babelon lai shoq ngò nungmoq lé lhoq lhâm pyám râ nghut lhê.<sup>✠</sup>

ga luî, bo tô é eq rajung za, Garai Gasang gi, yhangmoq chyáng mai myoqdong lhing pyám mù, mauhkûng htoq mâ é bui, kyî, lhamó pé lé noqkuq râ matú ap pyám bê nghut ri.

<sup>44</sup> Mosheq lé, nàng myang é azòng eq rajung za saí aq ga, Garai Gasang taî é dông saí tô é saksé zúm lé, haû yoso má nga-nhông é îchyí îwâ pé wó yû bekô nghut ri. <sup>45</sup> Haû mù, nga-nhông é îchyí îwâ pé gi, yhangmoq é myoq hí mai Garai Gasang èq hkat htoq pyám byî é byû myû pê é mau má, Yohuq eq rahá wang nyi ló kô é hkûn, saksé zúm haû lé yu wang ló akô. Haû gi, Dawiq é pyat jé shoq joq to bê nghut ri. <sup>46</sup> Dawiq kúm gi, Garai Gasang hí má myoqdong wó sù nghut mù luî, Yakup é Garai Gasang matú nyi jowò saí râ ahkáng dung kôlhàng, <sup>47</sup> Sholumon èq sheq saí bê nghut ri.

<sup>48</sup> Nghut kôlhàng, Myhang htáng htum Sû gi, byu é loq èq za saí é yhûm má nyi é a nghut, haû hkyô eq séng luî myiqhtoi wá taî tô é gi,

<sup>49</sup> 'Mauhkûng gi, ngá é zùng tanghkuq, myigùng gi, ngá é hkyî nang jang nghut nyi lhê; ngá é matú hkasû é yhûm saí byi shi kó râ lhú? Ngò nô yù râ jang gi, hkâmá nghut kó râ lhú?

<sup>50</sup> Haû banshoq lé ngá é loq èq baú saí tô é a nghut kó lhú? ga luî, haû Yhumsîng taî ri.<sup>✠</sup> gâ ri.

<sup>51</sup> I-myt htân mù, i-myt eq nohkyap má aphyo-kuq a hpyit é bang\* ê, nungmoq gi, nungmoq é îchyí îwâ pé su, Chyoiyúng Woi-nyí lé hkâ-nhám le lhom he-ngik pyâm nyi akô; <sup>52</sup> Nungmoq é îchyí îwâ pé èq a zing-rî wú é myiqhtoi, ó yuq wá nyi lhê lhú? Haû Dingmán Sû pô htoq râ hkyô lé hko kyô é bang lé, yhangmoq sat pyâm é chyat nghut akô; ahkuî, nungmoq le, haû Dingmán Sû lé ap pyâm é bang eq sat pyâm é bang nghut nyi akô. <sup>53</sup> Maumang lagyô èq shit kyo byî é tarâ lé nungmoq wó yû kôlhàng, haû lé a cháng kó nghut ri." gâ ri.

#### *Stehpan Lé Luqgok Èq Dú Sat É Hkyô*

<sup>54</sup> Haû hkyô lé yhangmoq wó gyo kôjáng, yhangmoq é nhiklhûm má lûm htaû záng kô é yanmai, Stehpan lé, zùi wang ngat kyáng shoq wú nhik-yô nyi akô. <sup>55</sup> Stehpan kúm gi, Chyoiyúng Woi-nyí byíng mù, mauhkûng shut tu wú kat le, Garai Gasang é hpungwup shingkang lé le, Garai Gasang é loqyo hkyam shut Yesuq yap tô é lé le, myang ri. <sup>56</sup> Haû mù, yhang gi, "Wú keq, mauhkûng hpông tô é lé le, Garai Gasang é loqyo hkyam shut haû Byu Yhangzo yap tô é lé le, ngò myàng ri." ga taî kat ri.

<sup>57</sup> Haû hkûn, yhangmoq gi, htê mó o mó garu uchyang, yhumsîng é nohkyap xaû pyám mù, radá dâm yhang lé chôm htim kômù, <sup>58</sup> yhang lé wà mai she htoq ló kôluî, luqgok èq chôm dú ló bekô nghut ri; saksé kut é bang gi, Sholuq gâ é zoram é hkyî wang má yhangmoq é buhîng pé lé hkyut bum tô akô.

<sup>59</sup> Luqgok èq dú nyi bùm kô é u lé, Stehpan gi, "Yhumsîng Yesuq ê, ngá é woi-nyí lé hap yù laq." ga kyûdûng ri. <sup>60</sup> Hau htâng, yhang gi, hkyihput htuq mù, "Yhumsîng ê, yhangmoq kut é mara haû lé hkyut pyám byi laq." ga luî, htê mó èq wut dúng ri; haû ban taí jáng, yhang kâng byit byuq bê nghut ri.

## 8

#### *Hpúng Byû Lé Sholuq Zing-rî É Hkyô*

<sup>1</sup> Sholuq gi, haû má nyi to mù, Stehpan lé sat pyâm é muzó má myit bo huî ri.

✠ 7:43 Amo 5:25-27 ✠ 7:50 Esai 66:1-2 \* 7:51 I-myt eq nohkyap má aphyo-kuq a hpyit é bang gâ é gi, Garaî dang lé a lûm a châng é bang lé gâ lhê.

Haú nyí mai, Yerusalem wà mó mâ é noqkuq hpúng gi, zing-ri mó huí lo é nghut mù luí, lagyô pé mai lai luí, lumjínng bang lhunglhang gi, Yuda mau eq Samariq mau jowò hkgámó má byo myín ló bekô. <sup>2</sup> Nghut kôlhang, tarâ hkunggâ é bang gi, Stehpan lé yhum pyâm é htâng má, yhang é yanmai iyon mó huí nyi akô nghut ri. <sup>3</sup> Sholuq kúm gi, rayhum htâng rayhúm wàng mù, myiwe yuqgè lé she hkyut htoq yú luí, htóng má lhúng tô é đông mai, noqkuq hpúng haú lé lhoq hpyoq ló nyi ri.

#### *Samariq Wà Má, Gabú Danglù Hkô Kyô É Hkyô*

<sup>4</sup> Byo htoq ló é bang kúm gi, jé é jowò hkgámó má mungdang lé hkô kyô ló akô. <sup>5</sup> Haú hkûn, Hpilip gi, Samariq mau mâ é myuq ra-myuq shut e ló mù, Hkrisduq é hkyô lé hkô kyô ri. <sup>6</sup> Byù ajùm ayò gi, Hpilip taí kyô é hkyô lé wó gyô é eq, yhang tûn shit é limik kumlhá lé myàng kôjáng, i-myt rahkat za eq yhang é dang chòm gyô nyi bum akô. <sup>7</sup> Nat wang júng é byù myo myô pê chyáng mai, agè ashop é nat pé wut garu uchyang htoq ló byuq bum akô; gùngjum shi é bang eq hkyô htên é bang myo myo le, ge ló byuq bum akô. <sup>8</sup> Haú mù luí, haú myuq má gabú hkyô gyai yhang wó bekô nghut ri.

#### *Myoqheq Sará Simun É Hkyô*

<sup>9</sup> Simun gâ é byù rayuq gi, hí lé haú myuq má myoqheq hpaqchyí kut shit mù, Samariq byu pé lé lhoq maú luí, yhang gùng lé yhang, laklaí sù nghut lhê gâ ri. <sup>10</sup> Byù tiq ko banshoq le, "Byù shí yuq gi, 'haú a-tsam mó' gâ é, Garaí chyáng mai hpungwup a-tsam wó yú sù nghut ri." ga luí, yhang é dang lé gyô bum akô. <sup>11</sup> Haú yuq gi, myáng myáng yhang é myoqheq hpaqchyí eq yhangmoq lé lhoq maú lo é yanmai, yhang dang lé chòm lum bum akô. <sup>12</sup> Nghut kôlhang, Hpilip hko kyô é Garaí Gasâng é mingdán hkyô eq, Yesuq Hkrisduq é myìng eq sêng é gabú danglù hkyô lé, lumjínng kôjáng, myiwe yuqgè wui-myhup hkâm yu bum akô. <sup>13</sup> Simun yhang yhang le lumjínng mù luí, wui-myhup hkâm yù mù, Hpilip htâng châng wún ri. Hpilip é kumlhá mó eq laklaí kumlhá pé lé myàng jáng, yhang gi, gyai maú byuq ri.

<sup>14</sup> Garaí Gasâng é mungdang lé Samariq byu pé, lhom hap yù bê hkyô lé, Yerusalem wà mó má nyi é lagyô pé wó gyô bùm kôjáng, yhangmoq gi, Petruq eq Yohan nhik lé haú má nhang kat akô. <sup>15</sup> Yhangnhik gi, lé jé jáng, byù haú bang Chyoiyúng Woi-nyí wó yú râ matú kyûdung byí akô. <sup>16</sup> Hkâsu mù gâ le, Chyoiyúng Woi-nyí gi, yhangmoq chyáng ó yuq é ahtoq má lé, a gyó lô shi; Yhumsîng Yesuq é myìng mai wui-myhup hkâm yu é za ru nghut bùm ashî. <sup>17</sup> Haú mù luí, lagyô nhik yhangmoq é ahtoq má loq ke byi jáng, yhangmoq gi, haú Chyoiyúng Woi-nyí lé wó hkâm yù bekô nghut ri.

<sup>18</sup> Lagyô nhik é loq ke kat jáng Chyoiyúng Woi-nyí wó hkâm yu é lé, Simun myàng jáng, yhang gi, yhangnhik lé ngùn ê byi wú mù, <sup>19</sup> "Hká yuq é ahtoq má nghut kôlhang, ngò loq ke byi jáng, haú yuq gi, Chyoiyúng Woi-nyí wó yú râ matú, haú su é a-tsam ngo lé le byi kó laq." ga dung ri.

<sup>20</sup> Petruq kúm gi, "Garaí Gasâng é chyunghuq lé ngun eq wó wui yù râ nghut lhê ga luí, myit é yanmai, náng é ngùn gi, nàng eq rahá htên byoq byuq sháng gaq. <sup>21</sup> Nàng gi, Garaí Gasâng é hí má myit a dínng sù nghut é yanmai, shí hkyô má nàng wó bo lhóm râ a nghut. <sup>22</sup> Haú mù luí, shî agè ashop é hkyô mai myit lhîng mù, Yhumsîng Garaí chyáng dúng tôngbán aq. Haú hkûn, náng é unghkaú má myit pyâm é hkyô lé, mara hkyut pyám byi abe. <sup>23</sup> Nàng gi, ladu lai shoq nhikhko zo mù, yubak marâ eq tû zing to huí é lé, ngò myàng ri." ga yhang lé taí ri.

<sup>24</sup> Haú hkûn, Simun gi, "Nungnhik taí é hkyô haí le ngá chyáng a jé sháng gaq, ngá é matú haú Yhumsîng chyáng kyûdung byi kó laq." ga tû taí ri.

<sup>25</sup> Yhangnhik kúm gi, haú Yhumsîng é mungdang lé saksé hkâm mù ban hko kyo jáng, Samariq byu pé é wà myo myo má, haú gabú danglù lé hko kyo uchyang, Yerusalem wà mó shut dum taú lò bekô nghut ri.

#### *Hpilip Eq U-nuk Nhik É Hkyô*

<sup>26</sup> Ahkuî, Yhumsîng é maumang lagyo gi, Hpilip lé, "Toq aq, Yerusalem wà mó mai Gaza shut ló é hkyô jé shoq, maupyî shut nyâng za e ló aq. Hkyô haû gi, yoso hkyô nghut lhê." ga taî ri. <sup>27</sup> Haú hkûn, yhang toq mù e ló ri. Haú u lé, Ehtiopi ming lé up é hkohkâm myhí Kandake é hí má ahko ahkáng mó wó mù, yhâng é sutzè banshoq lé zûm é, Ehtiopi byù u-nuk rayuq gi, noqkuq râ ga Yerusalem wà mó má ê mù, <sup>28</sup> dum taû lo é hkûn, yhâng é myanglhêng má zùng luî, myiqhtoi Esai-aq laiká lé nghap nyi ri. <sup>29</sup> Woi-nyí gi, Hpilip lé, "Myanglhêng shut chyâng e ló aq." ga taî ri.

<sup>30</sup> Haû mù, Hpilip gi, din ê mù, myiqhtoi Esai-aq laiká nghap nyi é lé wó gyo jáng, "Nàng nghap nyi é hkyô lé sê gyo ri lú?" ga luî, yhang lé myî ri.

<sup>31</sup> Haú yuq gi, "Mhoqshit sù yuq a nyi le, ngò hkâsu kut sê gyo râ lú?" ga tû taí mù, yhang eq rahá lo doq zùng aq ga Hpilip lé lung ri.

<sup>32</sup> Yhang nghap é Chyúmdang gi, "Sat râ sau lé su, Yhang lé she e ló bê nghut ri; sau zo gi, sau maú nyhám su é hí má zim za nyi tô é su, Yhang le nhut a hpông é za nyi tô ri.

<sup>33</sup> Yhânggùng lé lhoq shôm pyâm to huî é hkûn, Yhang lé a tara é đông doqdân pyám bekô; Yhâng é asak lé myigùng htoq mai yù pyám bekô nghut mù luî, Yhâng é awut ashín lé ó yuq wó gôn kyo râ lú?"<sup>☆</sup> ga ri.

<sup>34</sup> Haú hkûn, haû u-nuk wa gi, Hpilip lé, "Haû nghut le gi, ngo lé taî kyo laq! Myiqhtoi shí yuq gi, ó lé lhoq ang luî, taî é nghut lhê lú? Yhânggùng lé taî é nghut lhê lú? Haû a nghut jáng, góyuq é hkyô lé taî é nghut lhê lú?" ga myî ri. <sup>35</sup> Haú hkûn, Hpilip gi, Chyúmdang haû lé yù mù, Yesuq eq sêng é gabú danglù lé taî kyô ri.

<sup>36</sup> Haû su e ló kô le, wui joq é má jé jáng, haû u-nuk hpó gi, "Wú aq, shí má wui joq tô ri, wui-myhup hkâm yù râ matú ngo lé hkúm râ jang haî joq ashí lú?" ga taî ri. <sup>37</sup> Hpilip gi, "Náng i-myt banshoq eq, nàng lumjínng bê nghut le gi, hkâm yu le ge lhê." ga taî ri; yhang le, "Yesuq Hkrisduq gi, Garai Gasâng é Yhangzo nghut é lé, ngò lumjínng bê." ga tû taî ri.\* <sup>38</sup> Haú hkûn, yhâng é myanglhêng hkying nhâng mù, yhangnhik wui má gyó wâng luî, Hpilip gi, u-nuk hpó lé wui-myhup hkâm byî ri. <sup>39</sup> Wui hkaû mai htoq ló kô é hkûn, haû Yhumsing é Woi-nyí gi, Hpilip lé myhik za shuí ló byuq mù, u-nuk hpó le Hpilip lé dum a myàng lo; nghut kôlhang, yhang gi, e ló é hkyô shut gabú myit eq xoq sô e ló bê nghut ri. <sup>40</sup> Hpilip kúm gi, Azutu wà má lo htoq jé kat mù luî, Kesare wà mó jé shoq haú mau mâ é myuq pé wà pé hkanngó má gabú danglù hkô kyô wún ri.

## 9

### *Sholuq Lhik Wang Lo É Hkyô*

<sup>1</sup> Haú u lé, Sholuq kúm gi, Yhumsing é chángzô pé lé hkat kyuq nha râ eq sat pyám râ ga, nhikmó-yô nyi é nghut mù luî, hkyangjong mó chyáng ê mù, <sup>2</sup> Yhumsing é Hkyô lé lumjínng é myiwe yuqgè myàng mi-myàng lé chyup yù luî, Yerusalem wà mó shut wó she ló râ matú, Damaskuq myuq mâ é tarajong pé má byi râ laiká pé lé dúng chûng ri. <sup>3</sup> Yhang e ló le, Damaskuq myuq eq chyáng ló nyi é hkûn, yhâng é lhîngkyuq má mauhkûng mai dân loq tung duqbó htoq ló ri. <sup>4</sup> Yhang myigùng má lêng ngop tô é u lé, "Sholuq, Sholuq, nàng ngo lé haî mù zing-rî nyi lhê lú?" ga luî, yhang lé taî é htê wó gyô ri.

<sup>5</sup> Haú hkûn, yhang gi, "Yhumsing ê, nàng gi, ó yuq nghut lhê lú?" ga myi jáng, haû Yhumsing gi, "Nàng zing-rî nyi é Yesuq nghut lhê, <sup>6</sup> toq aq, myuq shut wang ló aq. Nàng zui saí râ hkyô lé lhom taî kyo râ nghut lhê." ga tû taî ri.

<sup>7</sup> Yhang eq rahá e ló é luzúm wuî gi, htê haû wó gyo kôlhang, ó yuq lé le a myàng kô é yanmai, maú hong yap tô bum akô. <sup>8</sup> Sholuq toq mù, myoq hpông kat wú le, haî lé le

<sup>☆</sup> 8:33 Esai 53:7-8 \* 8:37 Bun zo 37 shí lé Chyúmlaiká ra-am má gi, bo lhê; ra-am má gi, a bò.

a myàng dut byuq mù luî, yhangmoq gi, yhang lé loq mai shê mù Damaskuq myuq shut shuí wang lô akô. <sup>9</sup> Sholuq gi, sum nyí tup myoqjit byuq mù luî, a zo a shuq é nyi byuq ri.

<sup>10</sup> Damaskuq myuq má Anani gâ é chángzo rayuq nyi ri. Yhumsîng gi, yhang lé, "Anani ê." ga shing-rán dông wut ri.

Yhang gi, "Yhumsîng ê, shí má nyi lhê." ga tû taí ri.

<sup>11</sup> Haú Yhumsîng dum taí é gi, "Toq aq, Hkyô-Nyàng gâ é wà hkyô shut ê mù, Yudaq é yhâm má, Tarshu byù Sholuq lé ê hô aq, yhang gi, kyûdùng nyi ri. <sup>12</sup> Yhang gi, Anani ga sù wang lé lô mù, yhâng é myoq dum myàng sháng gaq ga, yhâng é ahtoq má loq ke byí é lé, shing-rán dông myàng bê nghut ri." gâ ri.

<sup>13</sup> Anani kúm gi, "Yhumsîng ê, shí yuq gi, Yerusalem wà mó má, náng é sân-yúng bang lé a ge é dông hkâ-myhó kut laí lo é hkyanglù lé ngò myo myo wó gyô wú bê; <sup>14</sup> Shí pé má le, náng é mying lé lêng é bang banshoq lé chyup râ ga, hkyangjong agyi pê chyáng mâ é ahko ahkáng wó yu to sù nghut ri." ga tû taí ri.

<sup>15</sup> Nghut kôlhang, Yhumsîng gi, "Ru ê aq, shí yuq gi, tûngbàu pé eq yhangmoq é hkohkam pê é hí má le, Israelaq byu pê é hí má le, ngá é mying lé wùn waq râ matú, ngò chûng râ nghû luí hkyin to sù nghut lhê; <sup>16</sup> Ngá mying é yanmai hkâ-í hpuzo ra hkyô lé, Ngò, yhang lé tûn shit râ nghut lhê." ga taí ri.

<sup>17</sup> Hau htâng, Anani gi, jé ê mù, yhâm haú má wàng luî, Sholuq é ahtoq má loq kê to mù, "Gumang Sholuq ê, náng myoq dum wó myàng mù, Chyoiyúng Woi-nyí byíng sháng gaq ga, nàng lé lo é hkyô má, nàng lé htoq shit é Yhumsîng Yesuq eq ngo lé nhang kat é nghut lhê." ga taí ri. <sup>18</sup> Haú hkûn jáng, Sholuq é myoq mai akyap sù é wuí gyó byuq mù, yhang myoq dum wó myâng bê. Haú hkûn, yhang gi, toq mù wui-myhup hkâm yù luí, <sup>19</sup> zoshuq lé zo mù, wum-o dum lhoq pyíng yù bê nghut ri.

#### *Sholuq, Damaskuq Myuq Má Mungdang Hko É Hkyô*

Hau htâng, yhang gi, Damaskuq myuq mâ é chángzô pé eq rahá rayoq zo zùm yap nyi uchyang, <sup>20</sup> Yesuq gi, Garai Gasâng é Yhangzo nghut é hkyô, haú hkûn jáng tarajong pé má hko kyô nyi bê nghut ri. <sup>21</sup> Sholuq é dang lé wó gyô é lhunglhang bang gi, maú byuq bùm kômù, "Shí yuq gi, Yerusalem wà mó má mying haú lêng é bang lé lhoq hten lhoq hpyoq sù nghut lhê, a nghut kó lú? Ahkuî, shí má le, haú su é bang lé chyup yù mù, hkyangjong agyi pê chyáng lô ap râ da luí jé lé é sù a nghut kó lú?" ga myi bum akô. <sup>22</sup> Sholuq kúm gi, a-tsam je bo lò mù, Damaskuq myuq má nyi é Yudaq byu pé lé taí hpyi kyo luí, Yesuq gi, Hkrisduq yhang nghut nyi é hkyô lé saksé tûn shit ri.

<sup>23</sup> Buinyí tsómra myáng é htâng má, Yudaq byu pé gi, yhang lé sat pyám râ matú haq dâ akô. <sup>24</sup> Nghut kôlhang, yhangmoq dâ é hkyô lé Sholuq sê pyâm ri. Yhangmoq gi, yhang lé wó sat pyám shoq ga, nyí lé myín lé myuq hkum pé má lhom nyi akô. <sup>25</sup> Sholuq é chángzô pé kúm gi, myín má yhang lé shuí yù mù, manghkoq má lúng nhâng luí, wà kyám xewâm mai lhoq nyhum hkyô kat akô nghut ri.

#### *Sholuq, Yerusalem Wà Mó Má Taú Jé Lo É Hkyô*

<sup>26</sup> Hau htâng, yhang gi, Yerusalem wà mó má jé lo é hkûn, chángzô pé eq zùm yap râ matú shikut wú kôlhang, yhang gi, chángzo dut bê hkyô lé a jíng kô é yanmai, lhunglhang bang gi, yhang lé gyuq bum akô. <sup>27</sup> Barnaba kúm gi, Sholuq lé lagyo pê chyáng shuí lò mù, Sholuq, hkyô má Yesuq eq hkâsu kut huí é hkyô lé le, Yesuq eq yhang lé taí é dang wó gyô é hkyô lé le, Damaskuq myuq má Yesuq é mying mai gyuq myit a bo é za hkâsu kut hko kyô é hkyô lé le, yhangmoq lé taí kyô ri. <sup>28</sup> Haú mù, Sholuq gi, yhangmoq eq rahá Yerusalem wà mó má htoq htoq wàng wàng kut nyí uchyang, Yhumsîng é mying mai a gyuq a kyum é za hko kyô nyi ri. <sup>29</sup> Grik dang nyo é Yudaq byu pé eq le, taí he lhâm nyi akô; nghut kôlhang, yhangmoq gi, yhang lé sat pyám râ dâ akô. <sup>30</sup> Haú hkyô lé, gumang wùi sé kôjáng, yhang lé Kesare wà mó má jé shoq dé mù, Tarshu myuq shut nhang kat akô nghut ri.

<sup>31</sup> Yuda mau, Galile mau eq Samariq mau jowò hkangmó mâ é noqkuq hpúng gi, haú yoq pé má, lhoq ging lhoq tîng é hkyô wó yù mù, nguínón nyi akô; haú Yhumsîng lé

gyuq hkunggâ é hkyô má le, Chyoiyúng Woi-nyí eq lhoq pun lhoq kyîng é hkyô pé má le châng nyí mù, myô jat lo bùm bekô nghut ri.

#### *Ainea Ge Byuq É Hkyô*

<sup>32</sup> Haú hkûn, Petruq gi, haú mau pé má hkat kûm wún uchyang, Ludaq wà mó má nyí é sân-yúng bâng chyáng ê jé ri. <sup>33</sup> Haú wà má, gùngjum shí luí shit zân tup yhupjang mai a wó toq é Ainea gâ é byù rayuq lé ê myang ri. <sup>34</sup> Haú mù, Petruq gi, "Ainea ê, Yesuq Hkrisduq, nang lé lhoq gê byi bê nghut ri, toq mù, náng é yhuphpú hen yù aq." ga luí, yhang lé tâi ri. Haú hkûn jáng, Ainea wó toq yap bê nghut ri. <sup>35</sup> Ludaq eq Sharon pá má nyí é lhunglhâng bang gi, haú yuq lé myàng mù luí, Yhumsîng Yesuq chyáng lhing wang lo bum akô.

#### *Dorka Ga Sû Dum Dui Lo É Hkyô*

<sup>36</sup> Ahkuí, Yopa myuq má Tabihta gâ é chángzo myiwe rayuq nyi ri; myîng haú lé Grik dang dông gi, Dorka\* gâ é nghut lhê. Myiwe haú gi, ge é muzó kut nyi é sù eq, asho awuî bang lé alu byî nyi é sù nghut ri. <sup>37</sup> Haú u lé, yhang gi, nõhpyo hui mù shi ló bê nghut ri. Yhâng mâng lé gi, chi mù luí ahtoq gok má jang tô akô. <sup>38</sup> Ludaq wà mó gi, Yopa myuq eq chyáng é yanmai, haú myuq má Petruq nyi é lé chángzô pé wó gyo kôjáng, yhangmoq gi, byù í yuq lé nhang kat mù, "Ngamoq chyáng myap lé lô aq." ga jì nhang kat akô.

<sup>39</sup> Haú hkûn, Petruq gi, toq mù, haú nhik htâng châng e ló ri. Yhang jé jáng, ahtoq pyâm gok má shuî hâng yu akô. Chuimó myhî pé lhunglhâng bang gi, yhâng nàm má yap mù ngàu uchyang, yhangmoq eq rahá nyi tô ashî hkûn Dorka hkyup é buhîng eq gotû mebu pé lé tûn shit nyi akô.

<sup>40</sup> Petruq kúm gi, lhunglhâng bang lé htoq ló nhâng mù, hkyihput htuaq luí, kyûdung mù, mâng shut lhing wú luí, "Tabihta ê, toq aq!" ga tâi ri, haú hkûn myiwe haú myoq hpóng lô mù, Petruq lé myàng jáng, toq zung ló ri. <sup>41</sup> Petruq gi, loq lhâm kat mù yhang lé lêng toq yù luí, lumjîng bang eq chuimó myhî pé lé wut yù mù, duì gû ap byî ri. <sup>42</sup> Haú hkyô lé, Yopa myuq mâ é bang banshoq wó gyô ló kômù luí, byù myo myo gi, haú Yhumsîng Yesuq lé lumjîng bum akô nghut ri. <sup>43</sup> Haú mù, Petruq gi, shokuq loqmú saí é Simun ga sù eq rahá, Yopa myuq má rayoq zo nyi nyi ri.

## 10

#### *Koneli É Shing-rán*

<sup>1</sup> Ahkuí, Kesare wà mó má gyezo rashô up é Koneli gâ é gyezau rayuq nyi ri. Yhang gi, Itali gyedap mâ é nghut lhê. <sup>2</sup> Yhang gi, tarâ hkungga myit bò luí, yhâng é yhumbyù banshoq bang eq rahá Garai Gasang lé gyuq hkunggâ nyi lhê eq, myûng bang lé alu myo myo byi uchyang, Garai Gasang lé hkâ-nhám le kyûdung nyi ri. <sup>3</sup> Ra-nyí lé, myinhtâng sum hkyíng kô má, Garai Gasâng é maumang lagyo rayuq gi, yhâng chyáng jé mù, "Koneli ê." ga luí, yhang lé wut é lé, shing-rán mai de de myang ri.

<sup>4</sup> Haú mù, haú yuq lé wú tsuq to mù, "Yhumsîng ê, hai hkyô nghut lhê lhú?" ga gyuq myit eq myî ri.

Maumang kúm gi, "Náng é kyûdung dang eq alu byî é hkyô gi, Garai Gasâng é hí má, hkungga masat dông hkyâng bê nghut ri. <sup>5</sup> Ahkuí, Yopa myuq shut byù nhang kat mù, Petruq gâ é sù Simun lé é shuî lò nhâng aq. <sup>6</sup> Yhang gi, wuimau yàm mâ é, shokuq hkyup zô é Simun yhûm má bíng nyi ri." ga tâi ri.

<sup>7</sup> Koneli gi, yhang eq dang tâi é maumang lagyo ló byuq jáng, dui-nhâng zoshâng í yuq eq, yhâng chyáng hkâ-nhám le châng nyi bang mâ é, tarâ hkunggâ é gyezo rayuq lé ji yù mù, <sup>8</sup> dut laí lo é hkyô banshoq, yhangmoq lé tâi kyo luí, Yopa myuq shut nhang kat ri.

#### *Petruq É Shing-rán*

<sup>9</sup> Htang nyí nyí-káng u lé, yhangmoq, Yopa myuq jé ló yâm má, Petruq gi, kyûdung rà ga, yhumhkûng shut doq ló ri. <sup>10</sup> Haú hkûn, yhang gi, zòmut luí rajung jung zô nau nyi

\* 9:36 Dorka gâ é lichyúm gi, "chochî" gâ é nghut lhê.

ri; nghut kôlhang, zoshuq ru gai nyi ashî le, yhang moq byuq lô mù myoqwup shing-rân myang é gi, <sup>11</sup> mauhkûng bóng lô mù, hpajóng mó sù é lé, myi chyûn má zui luî myigùng shut lhoq hkyô kat é azíng lé myang ri. <sup>12</sup> Haú hkaû má, myigùng htoq mâ é hkyî myi hkyî dap é jung dusak ahú hú eq dô yê é jung ahú hú, mau má dang é nghoq ahú hú, lúng tô ri. <sup>13</sup> "Petruq ê, toq mù, sat zo aq." gâ é danghtê le mying htoq lo ri.

<sup>14</sup> Petruq kúm gi, "Yhumsîng ê, haû gi, a wó dut, achaq achyut é eq a sansêng é zè lé, ngò hkâ-nhám le a zô wú." ga tû taî ri. <sup>☆</sup>

<sup>15</sup> Haú hkûn, "Garai Gasang lhoq san lhoq séng bê zè lé, a sansêng hkâ-nghû." ga luî, yhang lé dum taî kat ri.

<sup>16</sup> Haû su ga sum dâm taî é htâng má, zè haû lé radá dâm mauhkûng shut wup yu lô bê nghut ri.

<sup>17</sup> Ahkuî, Petruq gi, yhang myang é shing-rân lé haî wá nghut lhê lhú ga luî, myit maú nyi é hkûn, haû Koneli nhang kat é bang gi, Simun é yhûm lé myang hô kômù, hkumtot má yap to luî, <sup>18</sup> Petruq gâ é sù Simun, yhûm haú má nyi a nyi é lé, wut myî wú akô.

<sup>19</sup> Petruq gi, shing-rân haû lé ru myit wú nyi ashî le, Woi-nyí gi, "Wú aq, byù sum yuq nang lé ho nyi akô, toq mù gyó lô aq; <sup>20</sup> yhangmoq gi, ngò nhang kat é bang nghut é yanmai, myit haî a úng-âng é za, yhangmoq eq rahá bo lô aq." ga taî ri.

<sup>21</sup> Haû mù, Petruq gi, haû bâng chyáng gyó lô luî, "Nungmoq hô nyi é sù gi, ngò nghut lhê, haî ra luî lé kô é lhú?" ga myî ri.

<sup>22</sup> Yhangmoq taî é gi, "Dingmán é, Garai Gasang lé gyuq hkunggâ é, Yudaq amyû lhunglhang bâng é hí má myoqdong wó é, shô up gyezau Koneli gi, nang lé yhâng é yhûm má ji hâng yù mù, nàng taî é dang gyo yù râ matú, yhang lé choyiúng maumang lagyô eq taî shit kyô é hkyô lé wó yû luî, ngamoq lé nhang kat é nghut lhê." ga akô. <sup>23</sup> Haû mù luî, Petruq gi, yhangmoq lé wut hâng yù mù, bíng nhang ri. Hau htang nyi, yhang gi, toq mù, yhangmoq eq rahá bo lô ri; Yopa myuq mâ é gumang wuî ra-am le châng akô nghut ri.

#### *Koneli Lé Petruq Huî É Hkyô*

<sup>24</sup> Hau htang nyí, yhangmoq gi, Kesare wà mó shut wang lô akô. Koneli gi, yhâng é gumang wuî eq buinùm ji-myi wuî lé ji tsîng to mù, yhangmoq lé lánng nyi ri. <sup>25</sup> Petruq wang lô jáng, Koneli gi, te yù mù, yhâng é hkyî wang má paî gop noqkuq ri. <sup>26</sup> Petruq kúm gi, "Toq aq, ngò le byù ru nghut lhê." ga luî, taî uchyang yhang lé tu toq ri.

<sup>27</sup> Haû mù, Petruq gi, yhang eq dang nyô uchyang wang lô wú le, byù myo myo zup zîng tô bum é lé myang ri. <sup>28</sup> Haú hkûn, yhang gi, yhangmoq lé, "Yudaq byù rayuq gi, noqkuq htûng dông tûngbau rayuq eq a wó zùm yap é, htoq htoq wàng wàng a wó kut é hkyô lé, nungmoq sé lugù nghut akô. Nghut kôlhang, ó yuq lé le achaq achyut dut ri, a sansêng dut ri nghû a ge taî é hkyô lé gi, Garai Gasang, ngo lé tûn shit bê. <sup>29</sup> Hau é yanmai, nungmoq ngo lé ji kat é hkûn, ngò a he pyâm é za châng lé lo é nghut lhê. Haû mù luî, haî ra kô é yanmai, ngo lé ji akô nghû ngò myí nau ri." ga taî ri.

<sup>30</sup> Haú hkûn, Koneli gi, "Laî lò bê myi nyí nyí, myinhâng sum hkyíng má, ngá é yhûm má, ngò kyûdung nyi le, danso loq, duqbó é mebu wut é byù rayuq ngá é hí má yap htoq shit mù, <sup>31</sup> 'Koneli ê, Garai Gasang gi, náng é kyûdung danghtê lé le gyo byi bê; nàng alu byî é hkyô lé le, bun byi bê nghut ri. <sup>32</sup> Hau é yanmai, Yopa myuq shut byù nhang kat mù, Petruq gâ é Simun lé ji nhâng aq. Haú yuq gi, wuimau yàm mâ é shokuq hkyup zô é Simun yhûm má bíng nyi ri.' ga taî ri. <sup>33</sup> Haû mù luî, haú hkûn jáng ngò náng chyáng byù nhang kat bê nghut lhê. Ahkuî, nàng jé é gi, gyai gê bê nghut ri. Yhumsîng yhang nang lé taî nhang é gû banshoq gyô yù râ matú, ahkuî ngamoq lhunglhang bang Garai Gasang é hí má nghut nyi lhê." ga taî ri.

#### *Petruq Hko Kyô É Mungdang*

<sup>34</sup> Haú hkûn, Petruq dang-hi hpông é gi, "Garai Gasang, myoqdong a hkyin é hkyô lé, ahkuî ngò gè gè yhang sé bê. <sup>35</sup> Byù myû chângjup má, Yhang lé gyuq hkunggâ é

<sup>☆</sup> 10:14 Nhong 11 lé wú aq.

eq tengmán é muzó jizó saî é sù gi, Yhang é hí má myoqdong wó nyi ri. <sup>36</sup> Nyi mi-nyì, joq mijoq é Yhumsîng, Yesuq Hkrisduq é yanmai, nguingón hkyô eq sêng é gabú danglù lé hko kyo sháng gaq ga, Israelaq byu pê chyáng Garai Gasang hun kat é mungdang eq rajung za, <sup>37</sup> baptisma hkyô lé, Yohan hko é htâng, Galile mau mai Yuda mau banshoq má taî pyo ló é hkyô lé, nungmoq sé gù nghut nyi lhê. <sup>38</sup> Haû gi, Garai Gasâng eq Chyoiyúng Woi-nyí eq wum-o a-tsam byî to bê sù, Nazaret wà byù Yesuq é hkyô nghut nyi ri. Garai Gasang yhang eq rahá nghut nyi é yanmai, yhang gi, ge é muzó lé kut wún é eq, nat eq zing-ri huî é bang banshoq lé lhoq gê byî wún ri.

<sup>39</sup> Haû mù, Yudaq byu pê é ming má le, Yerusalem wà mó má le, yhang zui saî bê muzó banshoq é saksê pé gi, ngamoq nghut nyi lhê. Haú yuq lé yhang, yhangmoq sik zîng má jén sat pyám bekô nghut ri. <sup>40</sup> Garai Gasang kúm gi, sum nyí nghû râ buinyì má, haú yuq lé lhoq dui toq kat é nghut mù luî, byù banshoq é hí má a nghut e za, saksé kut râ matú Garai Gasang hkyin to gù nghut é bang ngamoq é hí má za htoq shit bê nghut ri. <sup>41</sup> Yhang shi é mai dum dui toq ló é htâng má, ngamoq yhang, Yhang eq rahá razo rashuq wó kut yu é nghut lhê. <sup>42</sup> Yhang gi, asak dui é bang eq shî bê bâng é tarâ agyì kut râ matú, Garai Gasâng eq Yhang lé hkyin tô é sù nghut é hkyô lé, byu pé lé hko kyo râ eq, saksé hkâm râ matú, ngamoq lé hkunmó hkyô to bê nghut ri. <sup>43</sup> 'Yhang lé lumjîng é bang yuq hkgamó gi, Yhâng é myîng é yanmai, yubak hkyut pyám byî é hui kó râ nghut lhê.' ga luî, taî é myiqhtoi banshoq gi, Yhâng é hkyô lé saksé hkâm byî é bang nghut nyi akô." ga taî ri.

#### *Chyoiyúng Woi-nyí Lé, Tungbaù Pé Wó Hap Yu É Hkyô*

<sup>44</sup> Petruq gi, haú hkyô lé ru taî nyi ashî le, dang haû wó gyô é banshoq bâng ahtoq má Chyoiyúng Woi-nyí gyó jé lo ri. <sup>45</sup> Tungbaù pê é htoq má lhang Chyoiyúng Woi-nyí gâ é chyunghuq lé hut hkyô kat é yanmai, Petruq eq rahá lé é, ahpyo-kuq hpyit bê é lumjîng bang Yudaq byu pé gi, maú bum akô. <sup>46</sup> Hkâsu mù gâ le, yhangmoq gi, laklai dang nyo é lé le, Garai Gasang lé hkya-on kô é lé le, wó gyô bùm kô é yanmai nghut ri.

<sup>47</sup> Haû mù, Petruq gi, "Ngamoq su Chyoiyúng Woi-nyí hkâm yù bê bang lé, baptisma a byi nhâng râ gi, wui lé ó yuq wó hkâm to râ lhu?" ga taî ri. <sup>48</sup> Hau htâng, yhang gi, yhangmoq lé Yesuq Hkrisduq é myîng lang luî wui-myhup hkâm yù râ matú pyîng tô ri. Haú hkûn, yhangmoq gi, Petruq lé buinyì ra-í nyí, nyi gyó shi aq ga chôm hkâm akô.

## 11

#### *Petruq, Yhang Kut É Muzó Lé Shit Kyô É Hkyô*

<sup>1</sup> Tungbaù pé le, Garai Gasâng é mungdang lhom yù bê gâ é hkyô lé, lagyo pé eq Yuda mau pé mâ é gumang wui wó gyô akô. <sup>2</sup> Haû mù, Petruq, Yerusalem wà mó má doq ló é hkûn, ahpyo-kuq hpyit hkyô lé myit zuq é lumjîng bang gi, <sup>3</sup> "Nàng gi, ahpyo-kuq a hpyit é bâng é yhûm má wàng mù, yhangmoq eq razo rashuq kut ri." ga luî, yhang lé mara lhom taî hun bum akô.

<sup>4</sup> Haú hkûn, Petruq gi, haû dut lò bê hkyô lé awang mai ahpyo hpyot, yhangmoq lé taî sân kyô hi kat é má, <sup>5</sup> "Ngò gi, Yopa myuq má kyûdûng nyi le, moq byuq ló mù shing-rán myang é gi, mauhkûng mai hpajóng mó sù é myi chyûn shut zui luî, ngá shut lhoq hkyô kat é zè gyó jé lo é lé, myang ri. <sup>6</sup> Haû lé rago za saî wú le, myigùng htoq má hkyî myi hkyî dap é jung dusak, yosô zè, dô yê é jung eq, maulat nghoqzô pé bo tô é lé, ngò myàng luî, myit wú nyi é hkûn, <sup>7</sup> 'Petruq ê, toq mù, sat zo aq.' gâ é danghtê lé, ngò wó gyô ri.

<sup>8</sup> Ngò kúm gi, 'Yhumsîng ê, haû gi, a wó dut, ahaq achyut é eq a sansêng é zè, ngá é nhut má hkâ-nhâm le a wang wú.' nghû taî kat é nghut lhê.

<sup>9</sup> Haú hkûn, 'Garai Gasang lhoq san lhoq yúng bê zè lé, a sanséng hkâ-nghû.' ga luî, mauhkûng mai dum taî kat ri. <sup>10</sup> Haû su ga sum dâm taî é htâng má, haú pé banshoq lé mauhkûng shut dum wup yu ló bê nghut ri.

<sup>11</sup> Haú hkûn jáng, Kesare wà mó mai, ngá chyáng nhang kat é byù sum yuq gi, ngò nyi é yhûm hkumtot má jé nyi tô akô. <sup>12</sup> Chyoiyúng Woi-nyí gi, ngo lé myit a úng-âng é za, yhangmoq htâng châng ê aq ga taî ri; shí gumang hkyuq yuq le ngò eq rahá é mù, Koneli

é yhûm má ngamoq wang é. <sup>13</sup> Haú hkûn, haú yuq gi, yhang é yhûm má maumang lagyo lé htoq shit é hkûn, yhang hkâsu myang é hkyô lé le; maumang lagyo èq yhang lé, 'Yopa myuq shut byù nhang kat mù, Petruq gâ é sù Simun lé ê jî nhâng aq; <sup>14</sup> nàng eq nàng yhumbyù lhunglhâng bang hkyi yù hui râ danglù, yhang, nàng chyáng wun lé lô byi râ nghut lhê.' ga taí é hkyô lé le, ngamoq lé taí kyô ri.

<sup>15</sup> Ngò dang taí hi lô nyi é u lé, Chyoiyúng Woi-nyí gi, sâng-hi lé ngamoq é ahtoq má gyó lé é su, yhangmoq ahtoq má le gyó lé bê nghut ri. <sup>16</sup> Haú hkûn sheq, ngò gi, 'Yohan gi, wui èq wui-myhup hkám byí ri; nungmoq kúm gi, Chyoiyúng Woi-nyí èq wui-myhup hkám byí é hui kó râ nghut lhê.' ga luí, Yhumsîng taí é dang lé bûn kat ri. <sup>17</sup> Haú mù luí, Yhumsîng Yesuq Hkrisduq lé lumjîng é hkûn, ngamoq lé Garai Gasâng jeju chyunghuq byí é su, Yhang, yhangmoq lé le byí é nghut le gi, ngò gi, hkasû é byù nghut luí, Garai Gasang lé wó lhom hkúm pyám râ lhú?" ga taí ri.

<sup>18</sup> Yhangmoq gi, haú hkyô lé wó gyo kêjáng, taí jang a joq lo kômù, "Ó! Nghut bê, Garai Gasang gi, tûngbaù pé lé le, asak duí râ matú myit lîng hkyô byi bu-nhung!" ga luí, Garai Gasang lé chòm hkyâ-ôn akò nghut ri.

### *Antioku Wà Mâ É Noqkuq Hpúng*

<sup>19</sup> Ahkuí, Stehpan lé sat pyám kê é htâng má, zing-ri hui kê é yanmai, byo myín lô é bang gi, Hpinisi mau, Kupru zinlóng eq Antioku wà mó jé shoq byo lô kômù, Yudaq byu pé lé baú za, mungdang haú hko kyô akò nghut ri. <sup>20</sup> Nghut kêlhang, yhangmoq mâ é Kupru byù eq Kuruni byù ra-am gi, Antioku wà mó má châng jé lô kômù, Yhumsîng Yesuq é gabú danglù lé, Grik pé lé le taí kyô bum akò. <sup>21</sup> Haú Yhumsîng é loq gi, yhangmoq eq rahá nghut nyí mù luí, byù myo myo gi, lumjîng mù, Yhumsîng chyáng lîng wang lo bùm bekò nghut ri.

<sup>22</sup> Haú bâng é hkyô lé, Yerusalem noqkuq hpúng é no má hkyang jé lô é nghut mù luí, yhangmoq gi, Barnaba lé Antioku wà mó jé shoq nhang kat akò. <sup>23</sup> Yhang jé é hkûn, Garai Gasâng jeju bo nyi é lé myàng jáng, yhang gi, gabú luí, yhangmoq é myit nhikhum banshoq èq haú Yhumsîng má lhumzui nyí râ matú, lhunglhâng bang lé myit wum byí ri. <sup>24</sup> Hkâsu mù gâ le, Barnaba gi, byù gè nghut mù, Chyoiyúng Woi-nyí le, lumjîng myit le byíng tô é sù nghut nyi ri. Haú mù, byù myo myo gi, haú Yhumsîng chyáng jat wang lo bùm bekò nghut ri.

<sup>25</sup> Hau htâng, Barnaba gi, Sholuq lé ê hô râ ga Tarshu myuq shut ê mù, yhang lé myàng jáng, Antioku wà mó má shuí lo ri. <sup>26</sup> Haú mù, yhangnhik gi, razàn gón noqkuq hpúng haú eq rahá zum nyí kê é nghut mù luí, byù myo myo lé wó mhoqshit akò. Chángzô pé gi, Hkristan gâ é myîng lé, Antioku wà mó má sâng-hi wó yù bekò nghut ri.

<sup>27</sup> Haú u lé, myiqhtoí pé ra-am gi, Yerusalem wà mó mai, Antioku wà mó má lé jé bum akò. <sup>28</sup> Haú bang mâ é Agabu gâ é sù gi, toq yap mù, Romaq mingkan tîng má mutmó gyó lô râ nghut é hkyô lé, Woi-nyí èq tûn shit é dông taí kyô ri; (Haú gi, hkohkâm Klodi é pyat má dut bê nghut lhê.) <sup>29</sup> Haú mù luí, chángzô pé gi, Yuda mau mâ é gumang wui lé, ó le ó wó dut é myhó garum kat râ ga, myit hpyit yu bum akò. <sup>30</sup> Haú eq rajung za kut kômù, yhangmoq gi, chyunghuq haú pé lé Barnaba eq Sholuq nhik é loq mai suwún wui pê chyáng hun kat bekò nghut ri.

## 12

### *Petruq, Htóng Mai Wó Lut Htoq Lo É Hkyô*

<sup>1</sup> Haú u lé, Herut hkohkâm gi, hpúng byù ra-am lé chyup yù mù, zing-ri râ ga ngantsâ nyi ri. <sup>2</sup> Haú mù, Yohan é yhangmang Yakuq lé sham èq sat pyám nhang ri. <sup>3</sup> Haú hkyô lé Yudaq byu pé wú gabú é lé myàng jáng, yhang gi, Petruq lé le, jâng chyup yu ri. Haú dut é gi, mún a kat é muk zo poí u lé nghut ri. <sup>4</sup> Herut gi, Lhoqlhai Poí lai jâng sheq, mingbyù wui hí má jéyáng râ ga myit tô é yanmai, yhang lé chyup yu é htâng má, htóng má lîng to mù, yhang lé zúng râ matú, gyè myi yuq yuq kut myi hpúng lé ap tô ri.



<sup>5</sup> Haû mù, Petruq gi, htóng má lúng tô ri; hpúng byû wui kúm gi, yhang é matú Garai Gasâng chyáng kyû gyai chôm dung byî nyi akô nghut ri.

<sup>6</sup> Petruq gi, Herut eq yhang lé jéyáng râ matú she htoq yû râ hî myìn lé, shamtoq-tui í hkat eq tuí é hui luí, gyezo í yuq é gyoro má yhup myhî tô ri; zúng é bang le htóng hkum má zúng nyi bum akô. <sup>7</sup> Haú hkûn, Yhumsing é maumang lagyo rayuq lé htoq shit mù, gok haú má duqbó lo ri. Maumang lagyo haû gi, Petruq é namcham má ê hpuk kat mù, "Myap toq wú aq." ga nhaû ri; haú hkûn, Petruq é loq mâ é toqjâng tui pé le gyut gyó lô bê nghut ri.

<sup>8</sup> Maumang dum taí é gi, "Hpyihit hit mù, hkyî-tsung tsung aq." gâ ri; Petruq le taí é eq rajung za kut ri. "Náng é bumó wut mù ngá htâng cháng aq." ga yhang lé maumang lagyo dum taí ri. <sup>9</sup> Haú hkûn, yhang gi, htóng mai yhâng htâng châng htoq lô ri; nghut kôlhang, maumang lagyo kut é muzó haû gi, gè gè nghut é lé, yhang a sé mù, shing-rán myang é nghut ri ga myit yu ri. <sup>10</sup> Ahkuî, yhangnhik gi, zúng tô é jowò í wô lai mù, wà má htoq é shamtoq hkum má jé jáng, hkum haû le yhang baú bóng lô mù, yhangnhik htoq luí, wà hkyô rahkat má sô lô le, maumang lagyo gi, haú hkûn jáng, yhâng chyáng mai gâng lô byuq bê nghut ri.

<sup>11</sup> Ahkuî, Petruq gi, dum bûn gyîng lò jáng, "Yhumsîng gi, Yhâng é maumang lagyo lé nhang kat mù, Herut é loq eq Yudaq byu pé myit myoqbyù tô é hkyô banshoq mai, ngo lé hkyi yù bê nghut é lé, ahkuî ngò gè gè sé bê." ga taí ri.

<sup>12</sup> Haú hkyô lé myit sê kat jáng, yhang gi, byù myo myo zing mù, kyûdûng nyi é jowò, Markuq gâ é Yohan é yhângnu Mariq é yhûm má jé lô ri. <sup>13</sup> Haú mù, yhang gi, yhûm wàng hkum lé lô bat é hkûn, Roda gâ é dui-nhâng zoshâng myiwe zo rayuq gi, gyô wú râ ga htoq lé lo ri. <sup>14</sup> Yhang gi, Petruq é htê nghut é lé sê gyô kat jáng, lûm gabú luí hkum a hpóng byi shî é za, yhúmhkaû shut din wang lô mù, "Petruq gi, hkum mhó lut má lo yap tô ri." ga lô taí kyô ri.

<sup>15</sup> Yhangmoq kúm gi, "Nàng na bê nghut ri." ga yhang lé taí akô. Yhang gi, gè gè nghut ri ga ru taí nyi ri. Dum, yhangmoq gi, "Yhâng é maumang lagyo nghut âng ri." ga taí akô.

<sup>16</sup> Nghut kôlhang, Petruq gi, hkum ru bat nyî mù, yhangmoq hpông kat é hkûn, yhang lé myàng kôjáng, chôm maú byuq bum akô. <sup>17</sup> Yhang gi, yhangmoq lé zim za nyi keq ga loq lik shit mù, yhang lé Yhumsing eq htóng mai hkâsu kut shuí htoq yu é hkyô lé taí kyo luí, "Shí hkyô lé Yakuq eq gumang wui lé taí kyô kat keq." ga taí ri. Hau htâng, yhang htoq lô luí, jowò gó shut e lô bê nghut ri.

<sup>18</sup> Ahkuî, maubó jáng, gyezô pé gi, Petruq haî dut byuq é hkyô lé a sé kô é yanmai, gyai maú gabyông bum akô. <sup>19</sup> Herut kúm gi, Petruq lé ho wú le a myàng jáng, zúng é bang lé myî gôn wú mù, yhangmoq lé sat pyám râ matú hkunmó hkyô ri.

#### *Herut Hkohkâm Shi Byuq É Hkyô*

Hau htâng, yhang gi, Yuda mau mai Kesare wà mó má gyó lô mù lô nyi nyi ri. <sup>20</sup> Haú gyoro má, Herut hkohkâm gi, Turuq eq Sidun byu pé lé gyai nhik-yô nyi ri. Haú mù luí, yhangmoq gi, myit rahkat zâ eq yhâng chyáng ê mù, Blastu gâ é, hkohkâm wa lum tô é suwún hpó lé é lûm hkaû mù, simsaq hkyô é dúng akô. Hkâsu mù gâ le, yhangmoq é zoshuq wó râ matú gi, Herut é ming lé lûm hkaû nyi kô é yanmai nghut ri.

<sup>21</sup> Haú hkûn, ding lhûm tô é buinyi má, Herut gi, hkohkâm hking wut chûng mù, hkohkâm tanghkuq má zùng luí, yhangmoq lé hkohkâm mungdang byî ri. <sup>22</sup> Haú jáng, mingbyû wui gi, "Htê shî gi, waxâng byu é htê a nghut, garai wá é htê sheq nghut ri." ga garú bum akô. <sup>23</sup> Radá dâm, Herut gi, Garai Gasâng é hpungwup shingkanng lé a tê byî é yanmai, Yhumsing é maumang lagyo gi, yhang lé dâm byi luí, yhang gi, luq eq hkê é hui mù, shi byuq bê nghut ri.

<sup>24</sup> Haú Garai Gasâng é mungdang gi, sê é bang myô jat lò mù, je riyhang byo myín lô bê nghut ri.

<sup>25</sup> Barnaba eq Sholuq nhik gi, Yerusalem wà mó má yhangnhik saî tûm nyi é muzó ban saí jáng, Markuq gâ é Yohan lé shuí chûng mù, Antioku wà mó shut taû lô bekô nghut ri.

## 13

*Barnaba Eq Sholuq, Hkyin Nhang Kat Huî É Hkyô*

<sup>1</sup> Ahkuî, Antioku wà mó mâ é noqkuq hpúng má, myiqhtoî pé eq sará pé le lom nyi akô. Haú bang gi, Barnaba, Niger\* gâ é Simeon, Kuruni byù Luki, (Herut zau hpó eq zum kô lò sù) Manaen eq Sholuq pé nghut akô. <sup>2</sup> Yhangmoq gi, zoshuq gám luî Yhumsîng lé noqkuq dojaú nyi é hkûn, Chyoiyúng Woi-nyí gi, "Ngá é mù wùn waq râ matú ji tô é Barnaba eq Sholuq nhik lé, hkyin to keq." ga taí ri. <sup>3</sup> Haú mù luî, yhangmoq gi, zoshuq gám luî kyûdung mù, yhangnhik ahtoq má loq ke byi kô é htâng, yhangnhik lé nhang htoq kat akô nghut ri.

*Kupru Zinlóng Má Dut É Hkyô*

<sup>4</sup> Haú mù, yhangnhik gi, Chyoiyúng Woi-nyí eq nhang kat é eq rajung za, Seluki wà shut gyó ló mù, haú mâ é lhaî ji luî, Kupru zinlóng má jé ló luî, <sup>5</sup> Salami wà mó má nyi nyi é hkûn, Yudaq byu pê é tarajong pé má, Garai Gasâng é mungdang hko kyô akô. Markuq gâ é Yohan le yhangnhik lé htuqluq htuqbang kut nyi ri.

<sup>6</sup> Yhangmoq gi, haú zinlóng mai laî byit e ló mù Pahpu wà mó jé ló kô é hkûn, myiqhtoî pyoq nghut sù Bara-Yesuq gâ é Yudaq byù myoqheq sará rayuq eq htông hui akô. <sup>7</sup> Haú yuq gi, Sergi Poluq gâ é, myit hpaqchyî kûng é ginwáng zau hpó é byù rayuq nghut lhê. Minggyî hpó haú gi, Garai Gasâng é mungdang gyô yù naù mù, Barnaba eq Sholuq nhik lé ji yu ri. <sup>8</sup> Haú hkûn, myoqheq sará gâ é lichyúm dông myhîng é Eluma le gâ é Bara-Yesuq kúm gi, ginwáng zau hpó lé haú lumjîng hkyô má a jau ló nhâng nau é nghut mù luî, yhangnhik lé lhom he tang pyâm ri. <sup>9</sup> Haú hkûn, Poluq le gâ é Sholuq gi, Chyoiyúng Woi-nyí byíng mù, yhang lé wú tsuq to luî, <sup>10</sup> "Myit goí é hkyô eq hpuq lô lhik é hkyô banshoq byíng tô é, nat é yhangzo nghut sù, tengmán hkyô hkangmó é gyè hpó ê, Yhumsîng é tengmán hkyô lé a lhoq hpyoq é a wó nyí lhú? <sup>11</sup> Ahkuî, wú aq, Yhumsîng é loq gi, náng chyáng jé mù, nàng gi, rayoq zo builoq a wó myang é za, myoqjit byuq râ nghut lhê." ga taí ri.

Haú hkûn jáng, yhâng é myoq gi, myhî-myhà ga luî mauchut tuq dut lò byuq ri; haú mù, yhang lé shê râ byù ho sop lhîng wún ri. <sup>12</sup> Haú hkyô lé ginwáng zau hpó myàng jáng, Yhumsîng eq sêng é mhoqshit é hkyô lé wú maú luî lumjîng bê nghut ri.

*Antioku Wà Mó Má Dut É Hkyô*

<sup>13</sup> Hau htâng, Poluq eq yhâng luzúm wuî gi, Pahpu wà mó mai lhaî ji mù, Pamhpuli mau mâ é Perga wà má jé ló akô. Markuq gâ é Yohan kúm gi, yhangmoq eq gang luî, Yerusalem wà mó shut taú lú byuq bê nghut ri. <sup>14</sup> Dum, yhangmoq gi, Perga mai toq e ló le, Pesidi ginwáng mâ é Antioku wà mó má jé ló akô. Bánno buinyî má, yhangmoq gi, tarajong má wang zung tô akô. <sup>15</sup> Haú hkûn, Mosheq é tarâ laiká eq myiqhtoî laiká pé lé ban nghap jáng, tarajong má up bang gi, "Gumang wuî ê, mingbyû wuî lé myit wum byi dang joq kô é nghut le gi, ahkuî taí lo keq." ga luî, yhangmoq chyáng taí nhang kat ri.

<sup>16</sup> Haú hkûn, Poluq gi, toq yap mù, zîm byuq kó sháng gaq ga loq tú luî, "Israelaq byu pé eq Garai Gasang lé gyuq hkunggâ é byu pé ê, chôm gyô yù keq. <sup>17</sup> Israelaq byu pê é Garai Gasang gi, ngamoq é îchyí îkê pé lé hkyin yù bê nghut mù luî, Egotuq ming má byùbîng dut nyi to ashî hkûn, yhangmoq lé kô myhâng nhâng mù, hpungwup a-tsam bo é loq eq haú mau mai shuí htoq ló ri. <sup>18</sup> Dum, myi xê zàn kô, yoso pé má yhangmoq é a-kyang lé jân pyám byi mù, <sup>19</sup> Hkanan ming mâ é byuhú nyhit hú lé lhoq htên pyám luî, haú bâng é mingdán mâ é silí wunlí yhangmoq lé gám byî ri. Haú gi, myi shô ngo xê zàn kô myáng ri.

<sup>20</sup> Hau htâng má, Garai Gasang gi, myiqhtoî Samuelaq é pyat jé shoq tarâ agyî pé lé to byî ri. <sup>21</sup> Hau htâng má, yhangmoq mai hkohkâm dung kômù, Garai Gasang gi, yhangmoq lé, Ben-yamyin amyû mâ é, Kisha é yhangzo Sholuq lé byi luî, yhang gi, myi xê zàn up bê nghut ri. <sup>22</sup> Hau htâng, Sholuq lé lhoq hkyô pyám mù, Dawiq lé, yhangmoq é hkohkâm

\* 13:1 Grik dong Niger gâ é gi, byù noq gâ é nghut lhê.

kut nhang ri. Dawiq é hkyô lé Yhang saksé hkâm é gi, 'Ngò nhik dik é Yese é yhangzo Dawiq lé myàng bê; yhang gi, ngò kut nhang é hkyô banshoq lé kut râ nghut lhê.' gâ ri.

<sup>23</sup> Garai Gasang gi, Yhâng é danggidiq joq é eq rajung za, Israelaq byu pê é matú, haú yuq é awut ashín mai, hkyi yù Sû Yesuq lé, pô htoq nhâng bê nghut ri. <sup>24</sup> Yesuq a jé lé shimá, Yohan gi, Israelaq byu pé banshoq lé myit lhing hkyô eq sêng é baptisma hkyô lé hko kyo bê nghut ri. <sup>25</sup> Dum Yohan gi, yhang zuí é muzó ban ló é u lé, 'Ngo lé ó nghut é su ngâm tô akô lú? Ngò gi, haú yuq a nghut, wú keq, ngá é htâng má rayuq jé râ nghut lhê, haú yuq é hkyi-tsung tui hpyi râ lhang ngò a gíng.' ga taí ri.

<sup>26</sup> Abraham é yhangzo yhangshû pé eq Garai Gasang lé gyuq hkunggâ é tûngbaù, gumang wui ê, shi hkyi yù hkyô mungdang lé, nga-nhúng chyáng byi kat bê nghut ri.

<sup>27</sup> Yerusalem wà mó mâ é bang eq, yhangmoq é zau suwún wui gi, Yhang hkyi yù sù nghut é lé le, Bánno buinyi hkangmó nghap é myiqhtoí pê é dang lé le, a sê gyo kô é yanmai, Yesuq lé sat râ doqdân é hkûn, myiqhtoí pê é dang lé lhoq dik pyám bekô nghut ri. <sup>28</sup> Yhâng chyáng shi gíng é mara a myàng kôlhang, Yhang lé sat pyám nhâng râ matú, Pilat chyáng dúng akô. <sup>29</sup> Yhangmoq gi, yhang eq séng luí, kê to má kê to ban lhoq dik kôjáng, Yhang lé tapzîng mai yu hkyô mù, lup má kat tô akô nghut ri. <sup>30</sup> Garai Gasang kúm gi, Yhang lé shi é mai lhoq dui toq yú bê nghut lhê. <sup>31</sup> Yhang gi, Galile mau mai Yerusalem wà mó jé shoq, hí lé Yhâng htâng châng é bâng chyáng buinyi tsómra myáng shoq htoq shit shit kut ri. Haú bang gi, ahkuí, nga-nhúng Israelaq byu pê é hí má, Yhâng é saksé dut bekô nghut ri.

<sup>32</sup> Haú mù, í dam lhê é Hkya-on Kungtôn Laiká má,

'Nàng gi, Ngá Zo nghut ri. Hkû-nyí, Ngò gi, Náng Wa dut bê nghut lhê.'<sup>☆</sup>

ga luí, kê tô é eq rajung za, <sup>33</sup> Garai Gasang gi, íchýí îwâ pé lé byi tô é danggidiq lé, Yesuq lé lhoq dui toq byí é dông, yhangmoq é yhangzo yhangshu ngamoq é matú, lhoq dik byí é gabú danglù lé, nungmoq chyáng ngamoq wun lé byi bê. <sup>34</sup> Hau htoq agó, Yhang htên byoq é hkâ-nhám a hui shoq, shi é mai lhoq dui toq yú râ hkyô eq séng luí, Garai Gasang taí é gi,

'Dawiq lé byi tô é danggidiq eq rajung za, chyoiyúng é eq lungíng é jeju lé, ngò nungmoq lé byi râ nghut lhê.'<sup>☆</sup>

gâ ri. <sup>35</sup> Hkya-on Kungtôn Laiká gó wô má le,

'Náng é Chyoiyúng Sû lé, Nàng htên byoq nhâng nàu râ a nghut.'<sup>☆</sup>

ga taí tô ri.

<sup>36</sup> Ahkuí, Dawiq gi, yhâng é pyat banshoq má Garai Gasang ô nau é dông ban wùn waq jáng, shi byuq luí, íchýí îwâ pé eq rahá myhup pyám hui mù, htên byoq byuq é hui bê nghut ri. <sup>37</sup> Garai Gasang lhoq dui toq yu é sù kúm gi, htên byoq huí é a nghut.

<sup>38</sup> Haú nghut é yanmai, gumang wui ê, haú yuq mai yubak wó hkyut pyám byí é hkyô lé, nungmoq lé hko kyô nyi é nghut é le, sê nyi keq. <sup>39</sup> Hau htoq agó, Mosheq é tarâ èq mara hkyut san byí é a hui kôlhang, haú yuq lé lumjíng é bang gi, hkyô lhumjup má mara hkyut san byí é hui râ nghut lhê. <sup>40</sup> Hau é yanmai,

'Wú keq, jihpoí é bang ê, maú mù luí htum byuq keq;

nungmoq é buinyi pé má ngò rajung jung kut htoq râ nghut lhê;

<sup>41</sup> haú hkyô lé, rayuq yuq, nungmoq lé hkaí kyo kôlhang, jíng kó râ a nghut.'<sup>☆</sup>

ga luí, myiqhtoí pé taí é dang, nungmoq má a ang sháng gaq, sidiq nyi keq." ga hko kyô nyi ri.

<sup>42</sup> Ahkuí, Poluq eq Barnaba nhik tarajong mai htoq ló le, htâng lhê é Bánno buinyi má le, haú pé lé dum hkaí kyo râ matú yhangmoq chôm dúng akô. <sup>43</sup> Chôm byo htoq ló kô é hkûn, Yudaq byu pé eq Yudaq noqkuq htung má lhing wang lo é tarâ hkunggâ é byù myo myo gi, yhangnhik é htâng má châng bùm kô é nghut mù luí, Garai Gasang jeju má gíng nyi râ matú, yhangnhik gi, yhangmoq lé lhoq pun lhoq kyíng akô nghut ri.

### *Tûngbaù Pê Chyáng Lhing Lo É Hkyô*

<sup>44</sup> Hau htang lhê é Bánno buinyì má, Garai Gasâng é mungdang gyô yù râ matú, rawa bang aluq shoí banshoq, lé zup zîng to bum akô. <sup>45</sup> Yudaq byu pé kúm gi, byù moq mó haù lé myàng jáng, manon myit baú byíng bûm kômù luí, Poluq taí é dang lé taí htîng é eq nhîng pyâm akô.

<sup>46</sup> Poluq eq Barnaba le gyuq myit a bo é dông taí é gi, "Garai Gasâng é mungdang lé, nungmoq lé hí taí kyo râ dut é yanmai, ngá-nhik taí bê nghut lhê. Nghut kôlhang, nungmoq gi, haù lé lhom he-ngik pyám kômù, ahtum abyuq é asak eq gingdán é dông yhumsing gùng lé a myit yù kô é yanmai, wú keq, ahkuí, ngá-nhik gi, tûngbaù pê shut lhing ló berâ nghut lhê. <sup>47</sup> Hkâsu mù gâ le, haù Yhumsîng gi, 'Hkyi yù hkyô lé maumyî htum shoq wó chûng jé râ matú, Ngò, nàng lé tûngbaù pê é maubó dut nhâng bê.'<sup>✠</sup>

ga luí, ngamoq lé hkunmó hkyó kat bê." gâ ri.

<sup>48</sup> Tûngbaù pé gi, dang haù lé wó gyo kôjáng, gabú é eq Yhumsing é mungdang lé hkya-on kungtôn nyi bum akô. Ahtum abyuq é asak lé wó râ matú hkyin to huí é lhunglhang bang le, lumjîng bum akô nghut ri.

<sup>49</sup> Yhumsîng é mungdang gi, haù ming gón jam lò bê nghut ri. <sup>50</sup> Yudaq byu pé kúm gi, Poluq eq Barnaba nhik lé zîng-ri râ matú, aróng wó é myiwe wuì mâ é tarâ hkungga bang eq, haù wâ mâ é suwún wuì lé, nhik lhoq yo kôluí, yhangnhik lé maukyo mai chôm hkat htoq pyâm akô. <sup>51</sup> Yhangnhik gi, yhangmoq lé a nau é hkyô tûn shit é dông, yhumsing é hkyi mâ é hpuilhaù lé yhangmoq chyáng ko hkyô pyâm to kômù, Ikoni wâ mó shut ló byuq bekô nghut ri. <sup>52</sup> Chángzô pé kúm gi, gabú é htoq agó, Chyoiyúng Woi-nyí byíng nyi bum akô nghut ri.

## 14

### *Poluq Eq Barnaba Nhik, Ikoni Wà Mó Má Ló Jé É Hkûn Lhê Hkyô*

<sup>1</sup> Ahkuí, Ikoni wâ mó má nghut nyi é hkûn, Poluq eq Barnaba nhik gi, Yudaq byu pé é tarajong má rahá wàng mù, Yudaq byù eq tûngbaù pé ajùm ayò lumjîng bùm kó shoq, wum kat hko kyô akô. <sup>2</sup> Nghut kôlhang, a lumjîng é Yudaq byu pé gi, lumjîng é gumang wuì lé a ngui râ dông tûngbaù pé lé mhoq hpyoq yù mù, shuí gumlaù akô. <sup>3</sup> Haù mù luí, yhangnhik gi, tsómra myang shoq haù má nyi mù, haù Yhumsing é matú gyuq myit a bo é za hko kyô akô; Yhang Yhumsîng le yhangnhik é loq mai limik kumlhá eq mauhpo muzó dut nhâng é dông, Yhâng é jeju mungdang lé saksé hkám byi nyi ri. <sup>4</sup> Haù wâ mâ é bang kúm gi, myit byo ló bûm kô é nghut mù luí, Yudaq byu pé chyáng ra-am, lagyô pê chyáng ra-am, lom byuq ló akô. <sup>5</sup> Ahkuí, tûngbaù pé le, Yudaq byù eq yhangmoq é uphkâng bang le, yhangnhik lé rhoí mù luqgok èq dú sat râ ga htîm lo bum akô. <sup>6</sup> Nghut kôlhang, yhangnhik gi, haù hkyô lé bûn sê kat kôjáng, Lukaoni ginwáng mâ é Lustra eq Derbe wâ mó eq, hau é awui ayàm wâ tiq wâ zo pé shut hpanq e ló akô. <sup>7</sup> Haù pé má le, gabú danglù xoq hko kyô wún akô nghut ri.

### *Lustra Wà Mó Má Ló Jé É Hkûn Lhê Hkyô*

<sup>8</sup> Ahkuí, Lustra wâ mó má, înu unghkaù mai hkyi hten mù luí, hkâ-nhám le hkyô a wó sô wú é sù rayuq zung tô ri. <sup>9</sup> Yhang le Poluq taí é dang lé gyô nyi ri. Poluq gi, haù yuq lé wú tsuq kat é hkûn, wó lhoq gê byi hui râ nghut lhê gâ é lumjîng myit yhâng chyáng bo tô é lé, myàng byi ri. <sup>10</sup> Haù mù, Poluq gi, "Toq yap aq!" ga luí, htê mó èq yhang lé taí kat jáng, yhang gi, byam toq kat mù, wó so bê nghut ri.

<sup>11</sup> Haù mù, Poluq kut é muzó lé shiwa byu pé myàng kôjáng, yhangmoq gi, Lukaoni dang dông, "Nat hparà pé gi, byù gùng dông kut luí ngamoq chyáng gyó lô bekô nghut ri." ga luí, wut garu bum akô. <sup>12</sup> Hau htâng, Poluq gi, dang myô taí sù nghut é yanmai, yhang lé Herme ga, Barnaba lé gi, Zeu ga myhíng byi akô. <sup>13</sup> Haù wâ yàm mâ é Zeu hparà noqkuq yhûm hkyangjong hpó gi, wâ hkum má nohtó pé eq ban hkóng pé yu lé mù, shiwa byu pé eq rahá yhangnhik lé hkungga nhông byi râ hen akô.

✠ 13:47 Esai 49:6

<sup>14</sup> Nghut kôlhang, lagyo nhik Barnaba eq Poluq gi, haû lé wó gyo kôjáng, yhumsing é mebu lêng cheq pyám kôluí, shiwa hpong gung gûng shut din wang é kômù, garû taí kô é gi, <sup>15</sup> "Hkaû pé ê, haí mù haû su kut lo akô lú? Nga-nhik le nungmoq eq rajung za, xângzo byù za nghut lhê, akyû a bo é hkyô shí pé lé tô pyâm to mù, mauhkûng eq myigûng, wuîshuq lung-aû eq haú pé má nyi mi-nyì, joq mijoq lé hpan to sù, rû dui nyi é Garai Gasâng chyáng lhing wang lò kó sháng gaq nghû luí sheq, nungmoq lé gabú danglù hko kyô é nghut lhê. <sup>16</sup> Garai Gasang gi, byù myû chângjup lé hí hpyang lhê é pyat bán má ó le ó kâm é đông kut nhâng bê nghut ri. <sup>17</sup> Nghut kôlhang, Yhang gi, mauhkûng mai mau wô nhâng luí, kyôshi zuí nhang é ahkyíng yam-yoq byi mù, nungmoq lé zoshuq agùn agó byí é eq, nungmoq lé i-myt ngón nhang nyi é đông, Yhang ge é hkyô lé tân shit mù, Yhang nyi é hkyô lé saksé hkâm nyi ri." ga akô. <sup>18</sup> Haû su ga taí kô le lhang, yhangnhik lé shiwa byu pé mai hkungga nhông byi râ hkyô lé, yhangnhik gi, gyai wuihke luí sheq wó hkûm pyâm akô nghut ri.

<sup>19</sup> Hau htâng, Antioku và mó eq Ikoni và mó pé mâ é Yudaq byu pé ra-am lé jé kômù, shiwa byu pé lé shuí-u luí, Poluq lé luqgok eq chôm dú kômù, yhang lé shi byuq bê su ngàm kô é yanmai, và shinggan shut shê hkyut htoq pyâm akô. <sup>20</sup> Nghut kôlhang, Poluq gi, yhang é lhinghkyuq má chângzô pé yap tô kô é hkûn, toq mù và shut tau wang ló ri. Hau htang nyí, yhang gi, Barnaba eq rahá Derbe và mó shut e ló bekô nghut ri.

#### *Antioku Và Mó Má Taû Jé Lô É Hkyô*

<sup>21</sup> Haú wâ má yhangnhik eq gabú danglù hkô kyo kô é yanmai, byù myo myo gi, chângzô pé dut lo akô. Hau htâng, yhangnhik gi, Lustra, Ikoni, Antioku và mó hkyô dum taû ló kômù, <sup>22</sup> chângzô pé lé myit lhoq ging byi uchyang, haû lumjínng hkyô má ru gîng nyi râ matú myit wum byí akô. "Nga-nhúng gi, Garai Gasâng é mingdán má wàng râ matú, wuîhke jamjau myo myo hui ra râ nghut lhê." ga le, mhoqshit akô. <sup>23</sup> Yhangnhik gi, noqkuq hpúng hkangmó má, hpúng suwún kut râ bang lé hkyin yù mù, zoshuq gám luí kyúdung mù, yhangmoq lumjínng nyi é Yhumsing Garai chyáng ap byi tô akô. <sup>24</sup> Hau htâng, yhangnhik gi, Pesidi ginwáng mai laí byit ló mù, Pamhpuli ginwáng má jé ló akô nghut ri. <sup>25</sup> Haú ginwáng mâ é Perga và mó má mungdang hko kyo luí, Atali và mó shut laí gyó ló akô nghut ri.

<sup>26</sup> Haû mai, lhaí ji mù, ahkuí yhangnhik wùn waq laí ló bê muzó é matú, Garai Gasâng jeju má ap luí yhangnhik lé nhang kat é Antioku và mó má dum jé lò bekô nghut ri. <sup>27</sup> Jé lo é hkûn, yhangnhik gi, hpúng byû wuî lé wut tsing yù mù, yhangnhik đông mai Garai Gasang kut é hkyô banshoq lé le, tungbaù pé lé haû lumjínng hkyô hkum hpóng byí é hkyô lé le, shit kyô akô. <sup>28</sup> Haû mù, yhangnhik gi, haú wâ má chângzô pé eq tsómra myang shoq nyi nyi akô nghut ri.

## 15

#### *Ahpyo-kuq Hpyit Hkyô Eq Sêng É Manghkáng*

<sup>1</sup> Ahkuí, Yuda mau mâ é byù ra-am gi, Antioku và mó má lé jé mù, gumang wuî lé, "Nungmoq gi, Mosheq é htungtarâ eq rajung za, ahpyo-kuq a hpyit é nghut jáng, hkyi yu é hui râ a nghut." ga luí, mhoqshit bum akô. <sup>2</sup> Hau é yanmai, myit a huí lhùm é hkyô htoq lô mù, Poluq eq Barnaba nhik gi, haú bang eq gyai yhang myíng myô lhùm akô; haû mù luí, gumang wuî gi, Yerusalem và mó má nyi é lagyô pé eq suwún wui chyáng, haú hkyô lé ló hpyê lhùm râ matú, Poluq, Barnaba nhik eq rahá, yhangmoq chyáng mâ é ra-am lé, nhang kat râ ga hkyin tô akô. <sup>3</sup> Haû mù, hpúng byû wuî yhangmoq lé dé kat kôjáng, yhangmoq gi, Hpinisi mau eq Samariq mau gyoro mai sô laí ló uchyang, tungbaù pé lhing wang lò bê hkyô lé taí kyô akô. Haú mâ é gumang wuî lé gyai yhang gabú nhang akô nghut ri. <sup>4</sup> Yhangmoq, Yerusalem và mó má jé kô é hkûn, hpúng byû wuî, lagyô pé eq suwún wuî gi, yhangmoq lé lhom hkûlum yù kô é nghut mù luí, yhangmoq gi, yhangmoq đông mai Garai Gasang kut é hkyô lhunglhang lé, haú bang lé shit kyô akô.

<sup>5</sup> Haú hkûn, Hparishe hpúng mâ é lumjúng bang ra-am gi, toq mù luí, "Túngbaù pé lé, ahpyo-kuq hpyit nhâng râ eq, Mosheq é tarâ dông cháng nhâng râ gi, ra yhang râ lhê." ga taí bum akô nghut ri.

*Yerusalem Wà Mó Má Kut É Byìn Tú Wap Hpong*

<sup>6</sup> Ahkuí, lagyô pé eq hpúng suwún wuí gi, shí hkyô lé chôm myit wú râ ga, zup tô bum akô. <sup>7</sup> Shí hkyô lé gyai yhang dang rhâng lhúm bùm kô é htâng má, Petruq gi, toq mù luí, "Gumang wuí ê, Garai Gasang gi, ngá nhut mai taí é, haú gabú danglù lé, túngbaù pé gyô yù mù lumjúng kó sháng gaq ga, hí hkûn nungmoq chyáng mai ngo lé hkyin yù bê hkyô lé, nungmoq sé lugù nghut bê. <sup>8</sup> Haú mù, myit nhiklhúm lé sé byi sù Garai Gasang gi, nga-nhúng lé byí é eq rajung za, yhangmoq lé le Chyoiyúng Woi-nyí byí é dông, yhangmoq lé hap yù bê hkyô lé saksé tûn shit bê nghut ri. <sup>9</sup> Garai Gasang gi, yhangmoq lumjúng luí, yhangmoq é myit nhiklhúm lé lhoq san lhoq yúng byi bê nghut é yanmai, nga-nhúng eq yhangmoq é gyoro má gamhkuí é hkyô a joq nhâng lo nghut ri. <sup>10</sup> Haú nghut le gi, îchyí îwâ pê èq le, nga-nhúng èq le a ung é wòlai lé, haú chángzô pê é lingzing má ke byí é dông mai, haí mù, ahkuí Garai Gasang lé chyam wú nyi akô lú? <sup>11</sup> Nghut kôlháng, ngamoq gi, yhangmoq eq rajung za, Yhumsîng Yesuq é jeju mai za hkyi yu é huí é hkyô lé lumjúng é bang nghut lhê." ga luí, yhangmoq lé taí ri.

<sup>12</sup> Haú hkûn, zup míng tô é bang lhunglhang gi, zim za kut luí, Barnaba eq Poluq nhik mai, túngbaù pê chyáng, Garai Gasang eq yhangnhik é loq dông limik kumlhá pé eq mauhpo muzó pé kut shit é hkyô, taí kyô nyi é lé chôm gyô nyi akô. <sup>13</sup> Yhangnhik dang ban taí kôjáng, Yakuq gi, "Gumang wuí ê, ngá dang lé gyô wú keq. <sup>14</sup> Garai Gasang gi, túngbaù pê chyáng mai Yhâng mying é matú byù ra-myú hkyin yù râ ga, yhangmoq lé sâng-hi mai hkâsu kut lé kûm nyi é hkyô lé, Simun taí kyo bê nghut ri. <sup>15-16</sup> Shí hkyô gi, 'Hau é htâng má gi, ngò dum taù lò mù luí, lêng gyop byuq bê Dawiq é yhúm\* lé dum saí râ nghut lhê.

Haú byoq htên tô é pé lé saí saí mù, haú lé dum lhoq toq râ nghut lhê.

<sup>17</sup> Haú hkûn sheq, ngá mying mai ji yu é túngbaù pé eq, myit gyo tô é byù lhunglhang bang gi, Yhumsîng Garai lé hô kó râ nghut lhê ga,

<sup>18</sup> a-nham mau htoq xâng hkun mai, shí hkyô pé lé sé nhang é Yhumsîng Garai taí ri. <sup>18</sup> ga myiqhtôí pé kê tô é dang eq rajung za nghut ri.

<sup>19</sup> Haú mù luí, ngò taí nau é gi, túngbaù pê chyáng mai Garai Gasang shut lhing lo é bang lé, gotú haí le a lhoq wuí é za, <sup>20</sup> hparà lhô pé lé kyáng byí é a sansêng é zoshuq pé lé le, ashop é dông gungsho zùm yap é hkyô lé le, lingzing mai myhik sat é dusak sho lé le, sui lé zô é hkyô lé le, koi pyám râ matú za, yhangmoq lé, nga-nhúng laiká mai wó shit kat lhê. <sup>21</sup> Hkâsu mù gâ le, gó hkûn mai yhang, Mosheq é tarâ lé wà hkangmó má hko kyô ló kômù, Bánno buinyi hkangmó tarajong pé má nghap kyo kyo kut bùm kô é nghut lhê." ga taí ri.

*Lumjúng É Túngbaù Pê Chyáng Hun Kat É Laiká*

<sup>22</sup> Haú hkûn, lagyô pé, suwún wuí eq, hpúng byù wuí lhunglhang bang gi, Poluq, Barnaba nhik eq rahá Antioku wà mó shut nhang kat râ byù lé, yhangmoq chyáng mai hkyin yù râ matú chôm myit hpyit akô. Haú eq rajung za, yhangmoq gi, gumang wuí chyáng mâ é nhik bô suwún nhik Barsabaq gâ é Yudaq eq Sila lé hkyin yu akô nghut ri.

<sup>23</sup> Yhangnhik é loq má, hun kat kô é laiká gi,

"Antioku wà mó, Suriq mau eq Kiliki mau pé má nyi é, túngbaù gumang wuí ê, nungmoq é gumang wuí nghut é, ngamoq lagyô pé eq suwún wuí gi, nguingón dang shit kyô kat lhê.

<sup>24</sup> Ngamoq nhang kat é le a nghut bang ra-am gi, ngamoq chyáng mai htoq lô mù, nungmoq lé dang èq lhoq byok pyám luí, nungmoq é myit lé lhoq nhúng byí nyi é hkyô lé, ngamoq wó gyo bê. <sup>25</sup> Haú mù, ngamoq lhunglhang bang gi, byù ra-am lé hkyin yu

\* 15:15-16 Dawiq é yhúm gâ é gi, Dawiq eq yhang é awut ashîn pé up é hkyô lé gâ é nghut lhê. ☆ 15:18 Amo 9:11-12

mù, <sup>26</sup> nga-nhông é Yhumsîng Yesuq Hkrisduq é matú, yhumsing asak lé lhang a hà é nga-nhông chyitdap é Barnaba, Poluq nhik eq rahá, nungmoq chyáng nhang kat rà matú chòm myit hui bê. <sup>27</sup> Haù mù luí, ngamoq gi, Yudaq eq Sila lé nhang kat lhê; yhangnhik gi, laiká má bo é eq rajung za, yhangnhik é nhut mai yhang taí kyo kó rà nghut lhê. <sup>28</sup> Nungmoq é matú gi, hparà lho pé lé tîng byî é zoshuq eq sui, lingzing mai myhik sat é dusak sho eq ashop é đông gungsho zùm yap é hkyô pé lé, koi pyám rà hkyô mai lai luí, gotú wòwùn hùn rà hkyô a joq nghu luí, Chyoiyúng Woi-nyí le, ngamoq le, myit huí to bê. <sup>29</sup> Nungmoq haù pé lé koi pyám nyí kôjáng gi, gè rà nghut lhê.

Nguóngón wángzán nyí kó sháng gaq ô!" ga kê tô ri.

<sup>30</sup> Yhangmoq lé nhang kat kôjáng, yhangmoq gi, Antioku wà mó má gyó jé lô kômù, hpúng byú wui lé ji tsîng to kôluí, haù hùn kat é laiká lé ap byî akô nghut ri. <sup>31</sup> Hpúng byú wui gi, laiká haù lé ban nghap kôjáng, wum-o byî é danglù hau é yanmai, gabú nyí bum akô. <sup>32</sup> Yudaq eq Sila gi, myiqhtoí nhik le nghut kômù luí, gumang wui lé mungdang myo myô èq lhoq pun lhoq kying kômù, wum-o lhoq gîng to byî akô. <sup>33</sup> Rayoq zo haù má nyí nyí kô é htâng má, gumang wui gi, yhangmoq lé nhang kat é bâng chyáng, ngui ngui ngón ngón dum tau ló nhâng bekô nghut ri. <sup>34</sup> (Sila kúm gi, yhang ô nau é đông nyí gyó tô ri.)† <sup>35</sup> Poluq eq Barnaba kúm gi, Antioku wà mó má nyí gyó to kômù, Yhumsîng Yesuq é mungdang lé, góbang myo myo eq, mhoq kyo hko kyô akô nghut ri.

#### *Poluq Eq Barnaba Nhik Gâng Lhum É Hkyô*

<sup>36</sup> Hau htâng, buinyí tsómra myáng jáng, Poluq gi, Barnaba lé, "Yhumsing é mungdang hko kyô lai lo wú bê, wà hkyap hkangmó mâ é gumang wui chyáng taú lò luí, yhangmoq hkâsu dut nyí é hkyô lé, ló dum kúm wú lo goq." ga taí ri. <sup>37</sup> Barnaba gi, Markuq gâ é Yohan lé le shuí chûng nau ri. <sup>38</sup> Nghut kôlhang, Poluq gi, haù yuq lé a kâm shuí chûng nau nghut ri; hkâsu mù gâ le, yhang gi, Pamhpuli mau má yhangnhik lé tô pyám to mù, yhangnhik eq rahá muzó a kâm xoq zui nau é sù nghut é yanmai nghut ri. <sup>39</sup> Hau é yanmai, yhangnhik gi, gyai yhang taí shai lhum kômù, rayuq eq rayuq gâng lhum bekô nghut ri. Barnaba gi, Markuq lé shuí chûng luí, lhai ji mù Kupru zinlóng shut e ló byuq bê nghut ri. <sup>40</sup> Poluq kúm gi, Sila lé hkyin yù mù, gumang wui èq yhang lé Yhumsîng Garaí é jeju má ap kat kô é htâng má, yhangnhik gi, htoq e ló byuq bekô. <sup>41</sup> Haù mù, Poluq gi, Suriq mau eq Kiliki mau mai sô lai ló uchyang, haù mâ é noqkuq hpûng pé lé wum-o lhoq gîng byî wún bê nghut ri.

## 16

#### *Poluq Eq Sila Nhik Chyáng Timohti Châng É Hkyô*

<sup>1</sup> Poluq gi, Derbe wà mó má jé é htâng, Lustra wà mó má dum jé ri. Haù wà má, Timohti gâ é chángzo rayuq nyí ri. Yhâng nu gi, Yesuq lé lumjîng é Yudaq myiwe myhí nghut ri; yhâng wa kúm gi, Grik amyû nghut ri. <sup>2</sup> Timohti gi, Lustra wà mó eq lkoni wà mó má nyí é gumang wui èq hkyô-ôn é hui sù nghut ri. <sup>3</sup> Poluq gi, hkyowuì má yhang lé shuí chûng nau mù luí, ahpyo-kuq hpyit byî ri. Hkâsu mù gâ le, yhâng wa gi, Grik nghut é hkyô lé haù mâ é Yudaq byu pé lhunglhang bang sé kômù, haù bang lé myit tê byî é yanmai nghut ri. <sup>4</sup> Haù mù, yhangmoq gi, rawa htâng rawà mai lai ló uchyang, Yerusalem wà mó mâ é lagyô pé eq hpúng suwún wui, chòm myit hpyit tô é hkyô lé, cháng kó sháng gaq ga, yhangmoq lé taí kyô akô. <sup>5</sup> Haù mù luí, hpúng byú wui gi, lumjîng hkyô má wum-o bo lò kômù, ra-nyí èq ra-nyí byù du myô jat lo nyí ri.

#### *Makedoni Byù Rayuq Lé, Poluq Shing-rán Myang É Hkyô*

<sup>6</sup> Ahkuí, yhangmoq gi, Asia mau má mungdang ê hko kyo rà hkyô lé Chyoiyúng Woi-nyí èq yhangmoq lé hkâm pyám é yanmai, Hprugi mau eq Galatiq mau đông sô lai lò mù, <sup>7</sup> Musi mau kyo má jé ló kôjáng, Bihtuni mau shut wang ló rà dâ akô; nghut kôlhang,

† 15:34 Bun zo shí lhum gi, Grik Chyúmlaiká myo myo má a bò nghut lhê.

Yesuq é Woi-nyí gi, yhangmoq lé ahkáng a byi nghut ri. <sup>8</sup> Haû mù, yhangmoq gi, Musi mau mai sô laí ló luí, Troa myuq má gyó jé ló akô. <sup>9</sup> Haû má, myín lé, Poluq gi, Makedoni byù rayuq lé yap to mù, "Makedoni mau shut dap lé luí, ngamoq lé le garúm yû laq." ga luí, yhang lé dung wut nyi é shing-rán myang ri. <sup>10</sup> Shing-rán haû lé Poluq myang é eq, Makedoni byu pé lé gabú danglù hko kyo râ matú, ngamoq lé Garai Gasang wut yù bê nghut ri nghû myit yù luí, haû hkûn yhang, ngamoq gi, Makedoni mau shut dap ê râ matú rì rì kut ló bê nghut lhê.

#### *Ludia Gâ É Myiwe Myhí Hpúng Byû Dut Lo É Hkyô*

<sup>11</sup> Haû mù luí, ngamoq gi, Troa myuq mai Samohtake zinlóng ang ang shut lhaí ji é mù luí, htang nyí gi, Neapoli wà má jé bê nghut lhê. <sup>12</sup> Haû mai lai jáng, Makedoni mau má, Romaq byu pé xuq tô é, haû ginwáng mâ é ahkyak wà mó nghut é, Hpilipi myuq má ngamoq jé mù, haû má rayoq zo nyi nyi é nghut lhê.

<sup>13</sup> Bánno buinyì jé jáng, ngamoq gi, kyûdung jowò joq nhô ngam mù, wà hkum shinggan mâ é, wuilàng yàm shut htoq ê luí, haû má zîng to lánng é myiwe wuì lé, zung gyó mù nyo hi é nghut lhê. <sup>14</sup> Haû dang gyo nyi é bang má, Garai Gasang lé noqkuq é, Htuatira myuq byû, pán nê ung zo sù Ludia gâ é myiwe myhí rayuq bo ri; Yhumsîng Garai gi, Poluq tái kyô é hkyô lé rago gyô yù sháng gaq ga, yhang lé myit hkum hpóng byî ri. <sup>15</sup> Yhang gi, yhang eq yhâng yhumbyù wuì wui-myhup ban hkâm yù kôjáng, "Nungmoq gi, ngo lé haû Yhumsîng Yesuq má lumjîng bê sù nghut é dông, myit yù byi kô é nghut jáng, ngá yhûm má lé bíng keq." ga luí, ngamoq lé zuq zuq ji yu ri.

#### *Poluq Eq Sila Nhik Htóng Lúng É Hkyô*

<sup>16</sup> Ra-nyí lé, ngamoq gi, haû kyûdung é jowò shut e ló nyi le, nat wang júng luí gumhpân hpan é jùnmyhí rayuq ngamoq lé lhom huí ri. Haû yuq gi, gumhpân hpan é dông yhâng yhumsîng wuì lé ngunzè gyai yhang hô byí é sù nghut lhê. <sup>17</sup> Myiwe haû gi, Poluq eq ngamoq htâng má châng to mù, "Shí bang gi, nungmoq lé hkyi yù hkyô tái kyô wún é, Myhang Htâng é Garai Gasâng é dui-nhâng zoshâng wuì nghut bum akô ô!" ga wut garú ri. <sup>18</sup> Buinyì myo myo haû su chyat châng garú wún é yanmai, Poluq gi, gyai yhang myit hpêbu byuq mù, lhing wú kat luí, nat haû lé, "Yesuq Hkrisduq é myîng lang luí ngò nang lé hkunmó hkyô kat lhê, yhâng chyáng mai htoq ló byuq aq." ga luí, nat haû lé, nhik-yô kat ri. Haû hkûn jáng, nat haû gi, yhâng chyáng mai htoq ló byuq bê nghut ri.

<sup>19</sup> Ahkuí, myiwe hau é yhumsîng wuì gi, ngunzè myàng zo râ myoqbyù jowò a joq lo é hkyô lé sé kôjáng, Poluq eq Sila nhik lé chyup yû mù, gai mâ é suwún wuì chyáng she hkyut e akô. <sup>20</sup> Dum, yhangmoq gi, yhangnhik lé tarâ agyì pé chyáng shuít ê mù, "Shí nhik gi, Yudaq byù nghut mù luí, ngamoq Romaq byu pé mai a ge châng é htunghking lé mhòqshit byî nyi é dông, <sup>21</sup> nga-nhûng é myuq lé gunjâng nyi akô nghut ri." ga tái akô.

<sup>22</sup> Haû mù luí, shiwa byu pé gi, yhangnhik lé chôm htîm akô. Tarâ agyì pé gi, yhangnhik é mebu lé lánng hkyut pyám luí, wumchûm hkat èq bat râ matú, hkunmó hkyô kat akô. <sup>23</sup> Yhangmoq gi, yhangnhik lé gyai yhang nhuq bat yu é htâng, htong má lhûng kat mù, rago za wú zúng râ matú htóng suwún lé hkunmó hkyô tô akô. <sup>24</sup> Htóng suwún hpó gi, haû sù é hkunmó lé wó jáng, yhangnhik lé hkyí kyum hut luí, htóng mâ é, je ahtê gok má lhûng tô ri.

#### *Htóng Suwún Hpó Hkyi Yù Huí É Hkyô*

<sup>25</sup> Nghut kôlhang, gunggàm yoq lé, Poluq eq Sila nhik gi, kyûdung luí, Garai Gasang lé mahkôn hkya-ôn nyi kô é hkûn, htóng byû góbang gi, yhangnhik é htê lé chôm gyô nyi bum akô. <sup>26</sup> Haû hkûn, byodàn ratung layàng mó nún lô mù htóng yhûm gón le nún lô luí, hkum pé banshoq le radá dâm bóng hâ lo bum ri; dum nghut jáng, yuq hkangmó mâ é toqjâng tui pé le gyut gyó byuq bê nghut ri. <sup>27</sup> Htóng suwún hpó gi, yhup bûn lò mù, htóng hkum pé bóng hâ tô bum é lé myang kat jáng, htóng byu pé ban hpanng byuq bùm bekô râ nghut lhê ga myit yù luí, shâm shê mù, yhânggùng yhang sat shî râ dâ ri.



<sup>28</sup> Nghut kôlhang, Poluq gi, "Ê, náng gûng yhang nàng haû su hkâkut, ngamoq banshoq shî má nyi tô lhê." ga luî, htê mó eq wut garu taî kat ri.

<sup>29</sup> Haû hkûn, yhang gi, duq é myibung lé dúng yù mù, ahkaû shut din wang lô luî, Poluq eq Sila nhik é hí má gyuq nán é eq ngóm gop tô ri. <sup>30</sup> Hau htâng, yhang gi, yhangnhik lé shuí htoq yû luî, "Sarâ nhik ê, ngò hkyi yu é hui râ matú, haî kut ra râ lhú?" ga myi kat ri.

<sup>31</sup> Haû hkûn, yhangnhik gi, "Yhumsîng Yesuq lé lumjîng jáng, nàng eq náng yhumbyù lhunglhang bang hkyi yu é hui râ nghut lhê." ga taî akô. <sup>32</sup> Hau htâng, yhangnhik gi, haû htóng suwún hpó eq yhang yhumbyù lhunglhang lé, Yhumsing é mungdang hko kyô akô. <sup>33</sup> Haû myîn haû u lé yhang, htóng suwún hpó gi, yhangnhik lé shuí ê mù, yhangnhik é dâm pé lé tsing chí pyám byi luî, haû htâng, yhang eq yhang yhumbyù banshoq bang wui-myhup hkâm yù bekô nghut ri. <sup>34</sup> Hau htâng, yhang gi, yhangnhik lé, yhang é yhúmhaû má shuí wang lô mù, zoshuq hkang byî ri. Yhang eq yhang yhumbyù banshoq bang gi, Garai Gasang lé wó lumjîng bekô nghut é yanmai, gyai gabú nyi bum akô nghut ri.

#### *Haq Nhang Pyám Râ Lé A Đông É Hkyô*

<sup>35</sup> Ahkuî, maubó jáng, tarâ agyî wuî gi, "Haû nhik lé nhang pyám aq." ga, htóng suwún hpô chyáng pyata pé lé taî nhang kat akô. <sup>36</sup> Haû hkûn, htóng suwún hpó gi, "Nungnhik lé nhang pyám aq ga, tarâ agyî wuî mai byù nhang kat ri; haû mù, ahkuî, nungnhik gi, ngón za htoq lô lo keq." ga luî, Poluq lé taî ri.

<sup>37</sup> Poluq kúm gi, "Nga-nhik gi, Romaq mingdán byû sheq ru nghut le wa, myî gôn wú é hkyô le a bo é, byu pê hí má ngá-nhik lé nhuq bat mù, htóng má hkyô kat kôluî nhîng, ahkuî tsik za haq nhang pyám râ dâ akô nhung lhi? A wó dut, yhangmoq yhang sheq lé shuí htoq yû kó sháng gaq." ga luî, yhangmoq lé tû taî kat ri.

<sup>38</sup> Pyata pé gi, tarâ agyî wuî lé dang haû pé lô taî kyo kôjáng, tarâ agyî wuî gi, Poluq eq Sila nhik Romaq mingdán byù nghut é hkyô lé wó gyo kôjáng, gyô gyuq kôluî, <sup>39</sup> yhangmoq yhang, yhangnhik chyáng lé mù, tôngbán luî, shuí htoq yû mù, wà haû mai htoq lô byuq râ matú chôm dúng akô. <sup>40</sup> Haû mù, Poluq eq Sila nhik gi, htóng mai htoq lô é htâng, Ludia é yhûm má wang lô akô; haû má, gumang wuî eq le hui kômù, yhangmoq lé wum-o byi luî, htoq lô bekô nghut ri.

## 17

#### *Htesaloni Wà Mó Má Mungdang Hko Kyô É Hkyô*

<sup>1</sup> Hau htâng, yhangmoq gi, Amhpipli wà mó eq Apolon wà mó mai sô laî lô mù, Htesaloni wà mó má jé akô. Haû wâ má gi, Yudaq byu pê é tarajong ralhûm joq ri.

<sup>2</sup> Poluq gi, yhang lhaq kut nyi é eq rajung za, tarajong má wàng luî, Bánno buinyî sum nyí yhang, Chyúmdang má bo é eq séng mù, yhangmoq eq chôm mîng lhum uchyang,

<sup>3</sup> Hkrisduq wuîhke jamjau hui mù, shî bê mai dum dui toq lô râ hkyô lé taî hkoq san kyo luî, "Nungmoq lé, ngò hko kyô nyi é haû Yesuq gi, Hkrisduq nghut lhê." ga taî ri. <sup>4</sup> Yudaq byu pé mâ é ra-am gi, gyô jîng kômù, Poluq eq Sila nhik chyáng lé xoq yu akô; haû eq rajung za, Garai Gasang lé hkunggâ é Grik pé myo myo eq, ahkyak é myiwe wuî tsómra myo shoq le, gyô jîng kômù, lé xoq yu akô.

<sup>5</sup> Nghut kôlhang, a gyô jîng é Yudaq byu pé gi, manôn kôluî, gai mâ é byùgang jùm ra-am lé lung yù mù, byù moq mó tsîng yù luî, rawa é shuí gabyong kômù, shiwa byu pê é hí má Poluq eq Sila nhik lé wó shuí htoq shit shoq ga, Yason é yhûm má htîm e lô akô. <sup>6</sup> Nghut kôlhang, yhangnhik lé a myàng kôjáng, yhangmoq gi, Yason eq gumang wuî ra-am lé, yhangmoq é wà suwún wui chyáng lêng she ê kômù, "Mingkan gón lé atau ahû kut é byù shí nhik, ahkuî shî má jé jáng, Yason gi, yhang é yhûm má lhom hkûlum yu ri.

<sup>7</sup> Yhangmoq lhunglhang bang gi, Yesuq gâ é hkohkâm góyuq nyi lhê ga kôluî, hkoséng Kehtaq é tarâ lé lhoq shai é đông kut é bang nghut akô." ga taî garû bum akô. <sup>8</sup> Shiwa byu pé eq wà suwún wuî gi, dang haû lé wó gyo kôjáng, myit wui myit hke dut nyi bum akô. <sup>9</sup> Hau htâng, yhangmoq gi, manghkáng a lhoq htoq râ matú Yason eq góbang lé danggidiq zè byi nhâng mù, nhang pyám bekô nghut ri.

*Beria Wà Mó Bang, Mungdang Lé Lhom Yu É Hkyô*

<sup>10</sup> Haú myîn jáng yhang, gumang wuì gi, Poluq eq Sila nhik lé Beria wà mó shut nhang kat akô; yhangnhik gi, haú wà má jé jáng, Yudaq byu pé é tarajong má wang ló akô nghut ri. <sup>11</sup> Haú Beria wà mó byu pé gi, Htesaloni wà mó byu pé htoq má je riyhang nhik bo bum akô; haú mù, danglù haú lé gyai ô nau é myit eq hap yù mù, danglù shî teng a têng é hkyô lé wó sé shoq ga, nyí wuì Chyúmdang lé chôm nghap wú nyi akô nghut ri. <sup>12</sup> Haú mù luí, Yudaq byu pé myo myo gi, lumjínq bum akô, haú eq rajung za, aróng wó é Grik myiwe wuì eq yuqgè wuì myo myo le, lumjínq bùm bekô nghut ri.

<sup>13</sup> Poluq gi, Beria wà mó má le, Garai Gasâng é mungdang hko kyô nyi é hkyô lé, Htesaloni wà mó má é Yudaq byu pé sé kôjáng, yhangmoq gi, haú má lé kômù, wà byù wuì lé mhoq hpyoq luí, gabyông lò nhang akô. <sup>14</sup> Haú hkûn, gumang wuì gi, Poluq lé wuimau yàm jé shoq, radá dâm dé kat akô; nghut kôlhang, Sila eq Timohti nhik gi, Beria wà mó má nyi gyó tô akô nghut ri. <sup>15</sup> Poluq lé châng dé é bang gi, Ahten myuq jé shoq lé dé to kômù, Sila eq Timohti nhik lé hân hân châng ló râ matú pying kat é dang lé wun chûng mù, dum taú lò bekô nghut ri.

*Poluq, Ahten Myuq Má Nyi É U Lhê Hkyô*

<sup>16</sup> Ahkuí, Poluq gi, Ahten myuq má haú nhik lé lánq nyi tô é u lé, haú wà má rawa é hparà lhô baú dut tô é lé myàng mù luí, yhâng i-myt gyai yhang a ngón dut byuq ri. <sup>17</sup> Hau é yanmai, yhang gi, tarajong pé má Yudaq byu pé eq Garai Gasang lé gyuq hkunggâ é Grik pé eq le, gài pé má hui mihui bang eq le, nyí wuì taí sâh kyô lhûm nyi akô nghut ri. <sup>18</sup> Haú mù luí, Epikuri hpaqchyî eq Sto-i hpaqchyî\* lé sê é, myit wú hpaqchyî bo é bang ra-am gi, yhang eq dang chyin chyin lhûm akô; haú hkûn, yhang gi, Yesuq é hkyô eq dum dui toq hkyo é gabú danglù lé hko kyô é yanmai, ra-am gi, "Byù pyok shí yuq gi, haí wá taí nyi lhê lhú?" ga; ra-am gi, "Góming hparà pé é hkyô lé taí kyo sù nghut sam ri." ga, taí bum akô nghut ri. <sup>19</sup> Hau htâng, yhangmoq gi, Aripagu gâ é byìn tú wap shut Poluq lé shuí doq ló mù, "Nang mhoqshit é hkyô asik, ngamoq lé sé nhang le a gè lhú? <sup>20</sup> Nang eq taí é maú nhô za gâ é hkyô lé ngamoq wó gyô ri; haú é dang kyîng lé ngamoq sé nau ri." ga taí bum akô. <sup>21</sup> (Ahten byu pé eq haú má nyi é góming byu pé lhunglhang bang gi, dang sik lù sik haú lé taí kún gyô kún mù, yhangmoq é ahkyíng lé lhoq pán nyi bum akô nghut ri.)

*Poluq, Aripagu Zuphpong Má Mungdang Hko É Hkyô*

<sup>22</sup> Haú u lé, Poluq gi, Aripagu zuphpong má toq yap mù, "Ahten byu pé ê, nungmoq gi, hkyô hkat hkanmó má hparà lhô pé lé gyai yhang dat gyuq hkungga kô é lé, ngò myang ri. <sup>23</sup> Hkâsu mù gâ le, ngò sô lhing wún mù nungmoq jaú é ze pé lé rago wú wú lé, 'A sê é Garaí matú.', ga luí, kâ tô é hkungga gyap ralhum lé myang záng ri; haú nungmoq a sê é za jaú nyi é Garaí hkyô lé, ngò, nungmoq lé hkaí kyo kôlé.

<sup>24</sup> Myidàm htoq eq haú má joq mijoq lé hpan tô é Garai Gasang gi, mauhkûng eq myigùng é Yhumsîng le nghut lhê mù luí, byu loq eq saí é noqkuq yhûm má nyi râ a nghut. <sup>25</sup> Yhang gi, byù lhunglhang bang lé asak, soq, ra mira gumjup shoq byî to sù nghut nyi é yanmai, rajung jung râ é sù lé su, byu loq eq dojaú râ sù a nghut. <sup>26</sup> Yhang gi, gunchyung rayuq mai za byuhú chângjup myô lò nhâng mù, myidàm htoq jàm shoq má nyi nhâng luí, yhangmoq é matú hí hí mai ahkyíng yam-yoq eq nyi râ jowò masat to byi bê nghut ri. <sup>27</sup> Yhang gi, nga-nhúng yuq hkanmó eq a we to kôle, byu pé yhang lé châng hô mù, myang hô kó sháng gaq ga shí hkyô lé kut é nghut ri. <sup>28</sup> Hkâsu mù gâ le, nungmoq é jihkyang kat bang, 'Nga-nhúng le yhâng é awut ashîn pé nghut nyi lhê.' ga taí tô bum é eq rajung za, nga-nhúng gi, Yhang é yanmai wó nyî, wó dui é eq îsu wó dut é nghut lhê.

\* 17:18 Epikuri hpaqchyî gi, htang pyat a joq, ahkuí ngón yû râ za ahkyak gâ é nghut lhê. Sto-i hpaqchyî gi, haí wá dut kôlhang i-myt zim za kut mù, htang pyat matú chiq a ra gâ é nghut lhê.

<sup>29</sup> Haû mù, nga-nhúng gi, Garai Gasâng é yhangzô pé nghut nyi é yanmai, Garaî gùng gi, byu é hpaqchyî loq èq kyûng kê tô é hîng, ngùn, luqgok pé eq pûng lê nghû luî hkâm-yit yù kó. <sup>30</sup> Laî lò bê haû myoq a bóng shi é pyat lé, Garai Gasang gi, haî le a ga lhaî pyâm to kôlhang, ahkuî gi, jowò hkangmó mâ é byù lhunglhang bang lé, myit lhung keq ga hkunmó hkyô to bê nghut ri. <sup>31</sup> Hkâsu mù gâ le, Yhang hkyin to sù mai mingkan gón lé tara é đông jéyáng râ buinyî ra-nyí masat to bê nghut ri. Shí hkyô lé, byù lhunglhang bâng é hí má wó lum é saksé dut sháng gaq ga, Yhang haú yuq lé shi é mai lhoq dui toq yù bê nghut ri." ga taî ri.

<sup>32</sup> Shí é mai dum dui toq lo é hkyô lé wó gyô bùm kôjáng, ra-am gi, taî hpoî pyám byî akô; ra-am kúm gi, "Nàng shí hkyô taî é lé ngamoq dum gyô wú nau ashí." ga taî akô. <sup>33</sup> Hau htâng, Poluq gi, haû zuphpong mai htoq ló byuq bê nghut ri. <sup>34</sup> Nghut kôlhang, byù ra-am gi, Poluq é htâng cháng kômù, lumjínng bang dut bekô nghut ri. Haú bang má, Aripagu zuphpong má bo é Dionisi ga sù le bo ri. Hau htoq agó, Damari gâ é myiwe rayuq eq gotû byu pé le, bo bum akô nghut ri.

## 18

### *Poluq, Korinhtuq Myuq Má Nyi É U Lê Hkyô*

<sup>1</sup> Hau htâng má, Poluq gi, Ahten myuq mai htoq luî, Korinhtuq myuq má jé lo ri. <sup>2</sup> Haû má, yhang gi, Romaq myuq mai Yudaq byù lhunglhang bang htoq ló byuq râ dut lê ga, hkohkâm Klodi èq hkunmó hkyô é yanmai, a myáng shi lé Itali ming mai yhangmyi Priskila eq htoq jé lo é, Pontuq mau byù nghut é, Akula gâ é Yudaq byù rayuq lé hui luî, yhangnhik chyáng ê ri. <sup>3</sup> Yhangmoq gi, jonghpang saí zo bang chyat nghut kô é yanmai, muzó pûng kôluî, Poluq gi, yhangnhik eq rahá nyi nyi mù, muzó chôm saî akô. <sup>4</sup> Bánno buinyî hkangmó, Poluq gi, tarajong má Yudaq byù eq, Grik pé lé, taî sân kyo luî, lhoq pun lhoq kyîng yu ri.

<sup>5</sup> Ahkuî, Sila eq Timohti nhik Makedoni mau mai châng jé jáng, Poluq gi, mungdang hkô hkyô má za wum kat luî, haû Yesuq gi, Hkrisduq yhang nghut lê ga, Yudaq byu pé lé saksé hkâm kyô ri. <sup>6</sup> Nghut kôlhang, Yudaq byu pé gi, lhom he-ngik pyám kômù, yhang lé rhoî dang taî pyâm akô; haû mù, Poluq gi, yhâng mebu ko shit é đông yhangmoq lé a nau é hkyô tûn shit uchyang, "Nungmoq é sui mara gi, nungmoq é ulhum má jé sháng gaq, ngò eq haî a séng lo; ahkuî mai, ngò gi, tûngbaù pê chyáng e ló berâ nghut lê." ga luî, yhangmoq lé taî ri.

<sup>7</sup> Hau htâng, yhang gi, tarajong mai htoq luî, jong haû eq yhep nghut é, Garai Gasang lé noqkuq é Titu Yustu ga su é yhûm má wang ló ri. <sup>8</sup> Krispu gâ é tarajong má up sù gi, yhâng yhumbyù lhunglhang bang eq rahá, Yhumsing lé lumjínng akô. Korinhtuq myuq byu pé myo myo le, Poluq é dang lé gyô yù mù, lumjínng luî, wui-myhup hkâm yu bum akô nghut ri.

<sup>9</sup> Ra-myìn lé, shing-rán ralhûm má Yhumsîng mai Poluq lé taî é gi, "Hkâgyuq, taí aq, zim za hkâm-nyî. <sup>10</sup> Ngò nàng eq rahá nghut nyi lê, nàng lé ó yuq èq le haî wó kut râ a nghut, hkâsu mù gâ le, myuq shí má, ngá é byù myo myo nyi bum lê." gâ ri. <sup>11</sup> Haû mù luî, Poluq gi, Garai Gasâng é mungdang mhoqshit uchyang, razàn eq lhamó hkyuq hkyap yhang, haû myuq má nyi nyi ri.

<sup>12</sup> Galio ga sù, Ahkaia mau mâ é ginwáng zau kut nyi é u lé, Yudaq byu pé gi, myit rahkat zâ èq Poluq lé chôm chyup yù kôluî, tarâ hpyit wap má she háng kômù, <sup>13</sup> "Byù shí yuq gi, jep é tarâ eq shai lhum é đông, Garai Gasang lé noqkuq râ matú, byu pé lé mhoq hpyoq wún ri." ga mara hûn akô.

<sup>14</sup> Haú hkûn, Poluq tû taí râ dâ lò jáng, Galio gi, Yudaq byu pé lé, "Yudaq byu pé ê, muzó shí gi, tarâ lu laî é muzó, haû a nghut jáng, agè ashop é muzó mai, dut lo é nghut le gi, nungmoq lé ngò gyo byi râ hkyô joq lê. <sup>15</sup> Nghut kôlhang, muzó shí gi, nungmoq é tarâ eq séng luî, dang eq séng luî, myìng eq séng luî, taî lhum kô é hkyô nghut é yanmai, nungmoq yhang ru ló hpyit lhum keq. Haû sù é muzó má, ngò gi, tarâ agyì kut byi râ a nghut." ga taí mù, <sup>16</sup> tarâ hpyit wap mai yhangmoq lé hkat htoq pyám nhang ri. <sup>17</sup> Haú

hkûn, yhangmoq lhunglhâng bang gi, tarajong má up sù Sositeni lé chyup yû mù, tarâ hpyit wap hí má chôm bat akô. Galio kúm gi, haû hkyô lé hai gùn a kut byi nghut ri.

*Poluq, Antioku Wà Mó Má Dum Taû Jé É hkyô*

<sup>18</sup> Poluq gi, Korinhtuq myuq má buinyi tsómra myáng shoq lumjínq bang eq nyi nyi ri. Hau htâng, yhang gi, haû bang lé shi-kyâm to luí, Priskila eq Akula nhik lé byinzùm kut mù, lhaî ji luí Suriq mau shut e ló akô. Hau hí má, yhang gi, danggidiq tô tô é yanmai, Kenhkrea wà má xâm nyhâm pyâm ri.\* <sup>19</sup> Yhangmoq Ehpesu myuq má jé kô é hkûn, Poluq gi, Priskila eq Akula nhik lé nyhi pyâm to luí, yhang baú tarajong má wàng mù, Yudaq byu pé lé taí sân kyo byi ri. <sup>20</sup> Haû mâ é bang gi, yhangmoq eq rahá rayoq zo nyi shi râ dông yhang lé dung kô é nghut kôlhâng, yhang gi, a nhô lo nghut ri. <sup>21</sup> Haû mù, yhang gi, Ehpesu myuq mai lhaî ji mù htoq ló uchyang, "Garai Gasang ô nau é hkyô nghut le gi, ngò nungmoq chyáng dum jé lé râ nghut lhê." ga, yhangmoq lé danggidiq byi tô ri. <sup>22</sup> Ahkuí, Poluq gi, Kesare wà mó má ló jé dap jáng, Yerusalem wà mó shut doq ló mù, noqkuq hpúng lé ló huí tô é htâng, Antioku wà mó má dum gyó ló ri.

<sup>23</sup> Yhang gi, haû wà má rayoq zo nyi é htâng, htoq ló mù, Galatiq mau eq Hprugi mau mai sô lai ló uchyang, rawa htâng rawa mâ é chángzô pé lé wum-o lhoq ging byi ri.

*Apolo Zui Saî É Muzó*

<sup>24</sup> Ahkuí, Alesandru myuq byù nghut é sù, Apolo gâ é Yudaq byù rayuq gi, Ehpesu myuq má jé lé ri. Yhang gi, hpaqchyí bò sù nghut é htoq agó, Chyúmdang le gyai kúng é sù nghut ri. <sup>25</sup> Yhang gi, Yohan é baptesma hkyô lé za sé sù nghut kôlhâng, Yhumsing é hkyô lé mhoq yû bê nghut luí, Yesuq é hkyô pé lé mhoq yu to bê eq rajung za wum zuq tung ga luí, hkyak hkyak mhoqshit byi ri. <sup>26</sup> Ahkuí, yhang gi, gyuq kyúm myit a bo é za tarajong má taí hi ló ri. Haû hkûn, Priskila eq Akula nhik gi, haû lé wó gyo kôjáng, yhang lé ji yù mù, Garai Gasâng é mungdang hkyô lé azó tung taí sân kyo byi akô nghut ri.

<sup>27</sup> Apolo gi, Ahkaia mau shut dap e ló nau é hkûn, gumang wui gi, yhang lé wum saî byi mù, yhang lé lhom hkûlum yù râ matú, chángzô pê chyáng laiká ká byi kat akô; yhang gi, jé jáng, Garai Gasâng jeju mai lumjínq bê bang lé, gyai yhang wó garúm sù dut bê nghut ri. <sup>28</sup> Hkâsu mù gâ le, yhang mai, Yesuq gi, Hkrisduq yhang nghut nyi ri ga luí Chyúmdang má tûn shit uchyang, byu pê hí má Yudaq byu pé lé, wum kat wó taí ung pyâm é yanmai nghut ri.

## 19

*Poluq, Ehpesu Myuq Má Nyi U Lhê Hkyô*

<sup>1</sup> Ahkuí, Apolo gi, Korinhtuq myuq má nyi tô é hkûn, Poluq gi, mau káng mai sô lai ló mù, Ehpesu myuq má jé ri. Haû má, yhang gi, chángzô pé ra-am eq hui luí, <sup>2</sup> yhangmoq lé, "Nungmoq gi, lumjínq é hkûn, Chyoiyúng Woi-nyí lé, wó yû bekô lhú?" ga myi ri.

Haû hkûn, yhangmoq gi, "Chyoiyúng Woi-nyí nyi lhê gâ é lháng, ngamoq a wó gyô wú." ga tû taí akô.

<sup>3</sup> Haû mù, Poluq gi, "Haû nghut jáng, nungmoq gi, haî jung baptesma hkam yù kô é lhú?" ga luí, yhangmoq lé myi jáng, yhangmoq gi, "Yohan é baptesma hkam yu é nghut lhê." ga tû taí akô.

<sup>4</sup> Haû hkûn, Poluq gi, "Yohan é baptesma nghu é gi, myit lhîng mù wui-myhup hkâm yu é hkyô lé gâ lhê. Yohan gi, yhang é htâng má jé lé râ sù, haû Yesuq lé sheq lumjínq râ lhê ga shiwa byu pé lé taí ri." ga taí ri. <sup>5</sup> Yhangmoq gi, dang haû lé wó gyo kôjáng, Yesuq é myîng lang luí baptesma byi é lé, hkam yu bum akô. <sup>6</sup> Poluq gi, yhangmoq é htoq má loq ke byi jáng, haû Chyoiyúng Woi-nyí gi, yhangmoq htoq má jé lé mù, yhangmoq gi, laklaí dang nyo lo é htoq agó myiqhtoi le htoî lo bum akô. <sup>7</sup> Haû bang lhunglháng gi, yuqgè raxe í yuq kó nghut ri.

\* 18:18 Xâm nyhâm pyâm é gi, Yudaq htûng dông rajung jung kut râ matú danggidiq to luí, haû lé ban kut jáng, yhumsing xâm lé nyhâm pyâm é nghut lhê.

<sup>8</sup> Hau htâng, Poluq gi, tarajong má wàng luí, gyuq kyûm myit a bo é za lhamó sum hkyap Garai Gasâng é mingdán hkyô lé taí sên kyo mù, lhoq pun lhoq kyîng yu ri. <sup>9</sup> Nghut kôlhang, ra-am gi, myit htan lo bùm kôluí a kâm lumjîng kô é htoq agó, haú Yhumsing é Hkyô lé byu pê hí má lhoq hpoí pyám byi kôjáng, Poluq gi, yhangmoq chyáng mai htoq luí, chángzô pé lé shuí chûng mù, Turanu gá su é hpaqchyî mhoq jong má, nyí wuí taí sên kyô lhûm nyi akô. <sup>10</sup> Haú su kut í zân yhang mhoqshit nyi é yanmai, Asia mau gón mâ é Yudaq byu pé eq Grik pé lhunglhâng bang gi, Yhumsing é mungdang lé wó gyô yu bum akô nghut ri.

#### *Skewa É Yhangzo Nyhit Yuq É Hkyô*

<sup>11</sup> Garai Gasang gi, Poluq é loq dông laklaí kumlhá kut ri. <sup>12</sup> Haú mù, Poluq chyáng mâ é hpajet eq hpyihit rajung jung lé, nò bâng chyáng yu ló mù, ló záng byi jáng lháng, yhangmoq é nòhpyo ge ló byuq é eq, agè ashop é nat pé lé yhangmoq chyáng mai htoq ló byuq bum akô.

<sup>13</sup> Haú u lé, nat hkat htoq wun é Yudaq byu pé ra-am gi, agè ashop é nat pé lé, "Poluq hko taí é Yesuq é myîng mai, ngò, nungmoq lé hkat htoq lhê." ga, agè ashop é nat wang júng to bâng é ahtoq má, Yhumsing Yesuq é myîng lé lang luí, hkat chyam wú akô.

<sup>14</sup> Skewa gâ é, Yudaq hkyangjong agyî rayuq é yuqzo nyhit yuq le haú su kut wun akô.

<sup>15</sup> Ra-nyí lé, agè ashop é nat gi, yhangmoq lé, "Yesuq lé ngò sê lhê; Poluq é hkyô lé le ngò sê lhê; nghut kôlhang, nungmoq gi, ó pé nghut akô?" ga tû taí mù, <sup>16</sup> agè ashop é nat haú wang júng é byù gi, yhangmoq htoq má byam doq jî to luí, nhuq bat yû mù yhangmoq lé ung pyâm ri. Yhangmoq gi, yhûm haú mai gùngchîn sui nê yang yang hpanq htoq ló bekô nghut ri.

<sup>17</sup> Haú hkyô lé, Ehpesu myuq má nyi é Yudaq byu pé eq Grik pé sé kôjáng, yhangmoq lhunglhâng bang gi, chôm gyô gyuq bum akô. Yhumsing Yesuq é myîng gi, hkyá-on lhoq toq é hui bê nghut ri. <sup>18</sup> Lumjîng bê bang myo myo gi, lé mù, yhumsing kut shut é agè ashop hkyô lé, myo myô hí má yín yu akô. <sup>19</sup> Myoqheq hpaqchyî kut zô é bang le, yhangmoq é laiká lé yu lé kôluí, shiwa byu pê hí má nyhê hkyô pyâm akô. Mausau haú pê é ahpau lé sôn wú le, ngùn chap ngo mun záng ri. <sup>20</sup> Haú dông mai, haú Yhumsing é mungdang gi, ko lam lò mù, wum-o a-tsam je bo lò bê nghut ri.

#### *Ehpesu Myuq Má Gabyông É Hkyô*

<sup>21</sup> Shí pé ban dut lai htâng má, Poluq gi, Makedoni mau eq Ahkaia mau dông sô lai ló mù, Yerusalem wà mó má ló jé râ ga myit hpyit yû luí, "Haú má ló jé tô é htâng má, ngò, Romaq myuq má le, jé wú râ dut ashî." ga taí ri. <sup>22</sup> Haú mù, yhang lé htuqbang garúm é Timohti eq Erastu nhik lé hí Makedoni mau shut nhang kat luí, yhang gi, Asia mau má rayoq rabun zo nyi gyó tô ri.

<sup>23</sup> Haú yoq lé, haú Yhumsing é Hkyô yanmai gyai yhang gabyông lo bum akô. <sup>24</sup> Demetri gâ é ngùn bat zo sù rayuq gi, Artemi hpara é ngùn yhûm zòng zo saí luí, mù saí luzúm wuí lé wó sùt nhang nyi ri. <sup>25</sup> Yhang gi, yhâng é ngùn bat zo luzúm wuí eq haú jung amû kut é góbang lé le ji tsîng to mù, taí é gi, "Luzúm wuí ê, muzó shí lhûm é yanmai, nga-nhúng nyi ngón yuqyo nyi é hkyô lé, nungmoq sê lhê. <sup>26</sup> Nghut kôle, ahkuí gi, Ehpesu myuq má za le a nghut lo, Asia mau lháng aluq jàm shoq, byu loq eq saí é zè lé, garaí pé a nghut ga, shí Poluq ga sù mai byù myo myo lé mhoq hpyoq yû mù, hkyô shuí lhoq nghoq nyi é hkyô lé, nungmoq wó myâng, wó gyô nyi akô. <sup>27</sup> Haú mù luí, nga-nhúng é muzó shí gi, hpoí byuq râ lé chiq râ é za a nghut, hparà myhí mó Artemi é noqkuq yhûm gi, haí a dut byuq luí, Asia mau gón eq mingkan gón mai noq é hparà myhí é shingkanq hpoí byuq râ lé le myit chiq râ dut bê." gâ ri.

<sup>28</sup> Yhangmoq gi, dang haú lé wó gyô bùm kôjáng, nhik mó gyô yo kôluí, "Ehpesu myuq byu pê é Artemi gi, kô nyi sháng gaq ô!" ga chôm garû bum akô. <sup>29</sup> Hkâ-myháng a nghut má, rawa bang gabyông lò bekô. Shiwa byu pé gi, Poluq é byinzùm Makedoni byù Ge-u eq Aristakuq nhik lé chyup she yû mù, yhangmoq é poí wàng mó shut radá dâm chyîn chyap wang ló bum akô. <sup>30</sup> Poluq gi, moq hpúng hau hí má htoq shit naú kôlhang, chángzô pé

gi, yhang lé a wàng nhâng kó nghut ri. <sup>31</sup> Poluq é luzúm wuî nghut é, haú mau mâ é suwún wuî ra-am lháng, yhang lé poi wàng hkaú má a ê râ matú, hkúm pyám nhang akô nghut ri.

<sup>32</sup> Zîng tô é bang gi, hai hû háng le a sé lo dut byuq kômù luî, ra-am rajung ga garû bum akô. Myo mi-myo gi, haî mù luî yhangmoq haú má nyi tô é lé lháng a sê bùm kó nghut ri. <sup>33</sup> Yudaq byu pé gi, Alesander lé hí má chôm chyûn htoq kat kôluî, shiwa hpong mai ra-am gi, yhang hká dông taí râ hkyô lé mhoq byi kat akô. Alesander le shiwa hpong lé taí san kyo naú luî, zim byuq râ matú loq tu ri. <sup>34</sup> Nghut kôlhang, Alesander, Yudaq byu nghut é lé sé kôjáng, yhangmoq lhunglhâng bang gi, rahtê za kut kôluî, "Ehpesu myuq byu pé é Artemi gi, kô nyi sháng gaq ô!" ga hkyíng hkum í hkum kô garû bum akô.

<sup>35</sup> Haú, myuq chyare hpó gi, shiwa moq mó lé lhoq zim luî taí é gi, "Ehpesu myuq byu pé ê, Ehpesu myuq shî gi, Artemi myhí mó é noqkuq yhûm eq mauhkûng mai byit gyó lo é yhâng é alhô lé, wú zúng nyi é wà nghut é hkyô lé, mingkan má a sê é ó yuq wa nyi lhê lú? <sup>36</sup> Haú mù luî, shí hkyô pé gi, wó he pyâm jung a nghut é yanmai, zim za nyi le ge lhê, hân so hân dùn hkâkut ko. <sup>37</sup> Shí nhik gi, noqkuq yhûm lé hpýoq zo su nhik le a nghut, nga-nhûng é hparà myhí lé lhoq hpoi su nhik le a nghut kô é le nhîng, nungmoq shuí lé bekô nghut ri. <sup>38</sup> Demetri eq yhâng é ngùn bat zo luzúm wuî gi, rayuq yuq é ahtoq má mara hûn râ hkyô joq kô é nghut jáng, tarâ rûng pé hpông tô lhê. Tarâ agyì pé nyi lhê. Haú má yhangmoq ê kó sháng gaq. <sup>39</sup> Nungmoq taí nau é gó hkyô rajung jung joq é nghut le kúm gi, tarâ wang zuphpong mó má chôm taí pyám râ nghut lhê. <sup>40</sup> Hkû-nyí gabyông é mù shí má, mù htoq wang a bo é yanmai, nga-nhúng lé mara hûn râ chiq râ ri. Shí su kut chôm míng é hkyô lé, hai é yanmai nghut lhê nghû, nga-nhúng a wó taí kyo nghut ri." gâ ri. <sup>41</sup> Shí pé ban taí é htâng má, yhang gi, shiwa moq mó lé lhoq pyo kat bê nghut ri.

## 20

### *Makedoni Mau Éq Grik Mau Dông Laí Ló É U Lhê Hkyô*

<sup>1</sup> Haú gabyông é hkyô zîm byuq é htâng má, Poluq gi, chángzô pé lé ji yù luî, yhangmoq lé wum byi dang taí to mù, shi-kyâm to luî, Makedoni mau shut htoq e ló bê nghut ri. <sup>2</sup> Yhang gi, haú mau mai sô laí ló uchyang, byu pé lé wum byí é dang myo myo taí luî, Grik mau má ló jé bê. <sup>3</sup> Yhang haú má lhamó sum hkyap nyi yù mù, lhaî ji luî Suriq mau shut ê râ hen nyi é hkûn, Yudaq byu pé gi, yhang lé gyám nyí kô é yanmai, yhang gi, Makedoni mau dông tau lò râ lé myit hpyit bê nghut ri. <sup>4</sup> Yhang eq rabyìn za châng é bang gi, Beria wà mó mâ é Purû yhangzo Sopata, Htesaloni wà mó mâ é Aristakuq eq Sekundu nhik, Derbe wà mó mâ é Ge-u, Timohti, Asia mau mâ é Tuhkiku eq Trohpimu nhik pé nghut akô. <sup>5</sup> Yhangmoq gi, hí so láng luî, ngá-nhik lé Troa myuq má ló láng nyi akô. <sup>6</sup> Nghut kôlhang, ngá-nhik gi, Azuma Poi\* laí é htâng má, Hpilipi wà mó mai lhaî ji ló le, ngo nyí nghû jáng, Troa myuq má yhangmoq lé hui luî, haú má nyhit nyí chôm nyi é nghut lhê.

### *Troa Wà Má, Utuhku Ga Sû Lhoq Tui Toq Huí É Hkyô*

<sup>7</sup> Rabat é sâng-hi nyí lé, ngamoq gi, muk hpê gàm râ matú lé chôm zup zîng tô é hkûn, Poluq gi, htang nyí ló byuq râ ga hen tô é yanmai, chángzô pé lé gunggàm jé shoq hko kyô nyi ri. <sup>8</sup> Ngamoq zup zîng nyi é haú ahtoq pyâm wap má, myibung myo myo le duq tô ri. <sup>9</sup> Poluq dang nyo hing nyi é u lé, Utuhku gâ é zorâm zo rayuq gi, hkohot hkum yâm má yhup mui zung tô ri. Haú yuq gi, yhupmó myi byuq luî, yhûm sum tsáng mai byit gyó mù, yhang lé bún toq wú le shi byuq bê nghut ri. <sup>10</sup> Haú hkûn, Poluq gi, gyó ló mù, po ngop to luî, "Hkâdân ko, yhang soq bo ashí." ga taí ri. <sup>11</sup> Haú mù, yhang gi, dum tau doq ló luî, muk lé hpé mù, zo luî, maubó shoq yhangmoq eq dang nyo kún mù htoq ló bê nghut ri. <sup>12</sup> Zorâm zo haú lé duì gù shuí ló kômù, nhik tîng é gyai yhang hui bekô nghut ri.

### *Troa Wà Eq Melitu Wà Gyoro Mâ É Hkyowui*

\* 20:6 Múnchi a bo é Muk zo Poi lé, Azuma Poi le gâ lhê.

<sup>13</sup> Poluq gi, myì hkyô lô râ matú hen tô é yanmai, yhang lajang byî é eq rajung za, yhang lé Asu wà má lhaî lhom shuî ji râ matú, ngamoq gi, lhaî ji mù hí lô láng bê nghut lhê. <sup>14</sup> Haû mù, yhang gi, Asu wà má ngamoq eq hui luî, ngamoq gi, yhang lé lhaî má shuî jî chûng mù, Mitulene myuq shut e lô bê. <sup>15</sup> Htang nyi, ngamoq gi, haû mai lhaî ji mù, Kiu zinlóng yâm mai lai lô luî, hau htang nyí gi, Samu zinlóng má lai dap lô luî, htang nyí gi, Melitu wà mó má jé lô bê nghut lhê. <sup>16</sup> Poluq gi, wó dut é nghut jáng, Penteko-ti buinyì lé Yerusalem wà mó má wó jé shoq gâ é yanmai, Asia mau má buinyì a kâm lhoq htum nau mù luî, Ehpesu myuq lé lhaî pyâm to râ matú, myit hpyit to bê nghut ri.

*Ehpesu Hpúng Suwún Wuî Lé, Poluq Shi-kyâm Tô É Dang*

<sup>17</sup> Poluq gi, Melitu wà mó mai Ehpesu shut byù nhang kat luî, hpúng suwún wuî lé ê jî nhang ri. <sup>18</sup> Haû bang jé lé kôjáng, yhang yhangmoq lé taî é gi, "Ngò, Asia mau má sâng-hi jé é buinyì mai, nungmoq eq hkâsu kut nyi nyi é ahkyíng banshoq lé le; <sup>19</sup> Yudaq byu pé jeq hô luî, ngò wuîhke jamjau hui zo kôlhang, haû Yhumsing é muzó lé, ngò myit gyai lhoq nyhûm é eq ngaubyi ngàu nhap é eq wùn waq é hkyô lé le; <sup>20</sup> nungmoq é matú akyû bo é hkyô banshoq lé, a myhit to loshoq taî é hkyô lé le; shiwa byu pé hí eq rayhûm htàng rayhûm má ngò nungmoq lé mhòqshit é hkyô lé le; <sup>21</sup> ngò gi, Yudaq byu pé eq Grik pé lé, myit lhing mù Garai Gasâng chyáng lhing lò ra eq, nga-nhûng é Yhumsing Yesuq lé lumjíng ra hkyô lé, saksé hkâm kyo lugù nghut bê lé le, nungmoq sê nyi akô.

<sup>22</sup> Ahkuî, ngò gi, Woi-nyí má tuî tô é hui bê yanmai, Yerusalem wà mó má e lô lhê; haû má, ngò haî lô dut râ lé kúm gi, a sé nghut ri. <sup>23</sup> Ngò gi, htóng eq wuîhke jamjau hkyô ngo lé láng tô ri ga, wà hkangmó má Chyoiyúng Woi-nyí eq lhoq pûn é hkyô lé za sê nyi lhê. <sup>24</sup> Nghut kôlhang, ngò gi, òn râ hkyô ban òn râ eq, Garai Gasâng jeju eq sêng é gabú danglù lé saksé hkâm râ matú, Yhumsing Yesuq ngo lé byi tô é muzó lé ban wùn waq râ za nghut jáng, ngá asak lé ratsuí le a myit ha lô é nghut lhê.

<sup>25</sup> Garai Gasâng é mingdán hkyô lé hko kyô wún é hkûn, ngò eq huî é nungmoq lhunglhang bang gi, htàng nùng má ngo lé a myàng lo kó râ nghut é lé, ahkuî ngò sê to bê. <sup>26</sup> Haû mù luî, ó yuq nghut kôlhang, yubak mara má shi byuq lô é nghut le, hau yuq é sui chyîn gi, ngò má a dap lô é hkyô lé, hkû-nyí, ngò saksé hkâm tô lhê. <sup>27</sup> Hkâsu mù gâ le, Garai Gasang ô nau é hkyô banshoq nungmoq lé hko kyo râ matú, ngò zaú tô é hkyô a joq wú é yanmai nghut lhê. <sup>28</sup> Nungmoq gi, yhumsing gùng lé le, nungmoq lé Chyoiyúng Woi-nyí eq up zúng nhang é sau hpúng† lhunglhang lé le, zúng nyí keq. Garai Gasang Yhâng suí eq wui tô é noqkuq hpúng lé le, rém zúng nyí keq. <sup>29</sup> Ngò lô byuq é htàng má, sau hpúng lé a shogyô é, ashop é wamhkui gi, nungmoq chyáng jé râ nghut é hkyô lé, ngò sê lhê. <sup>30</sup> Hau htoq agó, chángzô pé lé wó mhoq hpyoq yú shoq ga, shut é òng taî é byu pé lhang nungmoq chyáng mai htoq lô râ nghut lhê. <sup>31</sup> Haû mù luî, nungmoq yuq hkangmó lé, ngò sum zân tup ngaubyi ngau-nhap eq nyí myín a hkying loshoq, lhoq pun lhoq kyîng tô é dang pé lé, nungmoq gi, myit bun mù machya nyi keq.

<sup>32</sup> Ahkuî, ngò gi, nungmoq lé, Garai Gasâng chyáng le, nungmoq lé wó lhoq ging lhoq tíng mù, lhoq chyoiyúng é hui bê bang eq nungmoq lé silí wunlí wó byî é, Yhâng é jeju mungdang má le, ap tô lhê. <sup>33</sup> Ngò gi, ó yuq é hing, ngùn, mebu pé lé le a myoqnoq wú. <sup>34</sup> Ngá é loq shí í loq gi, ngò eq ngá htàng châng é bang ra châ é lé kut byi bê hkyô lé, nungmoq yhang sé gû nghut lhê. <sup>35</sup> Ngò kut é muzó banshoq gi, nungmoq é alik dut bê nghut luî, shí su kut shikut é òng mai, nga-nhúng gi, wum-o nyhóm bang lé htuq bang luî, 'Lhom yu é htoq má byî é gi, je riyhang hkungsô wó nyi ri.' ga luî, Yhumsing Yesuq taî é dang lé bûn nyi sháng." gâ ri.

<sup>36</sup> Poluq gi, haû su ga ban taí jáng, hkyihput htuq mù, yhangmoq lhunglhang bang eq rahá za kyûdûng ri. <sup>37</sup> Yhangmoq lhunglhang bang gi, yhang lé po to luî, bopuq puq mù, chôm ngàu akô. <sup>38</sup> Htàng nùng má, yhang lé dum myàng râ a nghut lo gâ é dang yanmai, yhangmoq gi, je riyhang yón kuq bum akô. Yhang lé, lhaî má jé shoq lé châng dé kat akô nghut ri.

† 20:28 Sau hpúng gâ é gi, lumjíng é bang lé gâ lhê.

## 21

*Yerusalem Wà Mó Shut Doq Lô Nyi É U Lhê Hkyô*

<sup>1</sup> Ngamoq gi, yhangmoq lé kang pyâm to luí, lhaí jî chûng mù, nyâng za Kusa zinlóng má jé é nghut lhê. Hau htang nyí gi, Rode zinlóng má jé mù, haú mai Patara wà má dum jé bê. <sup>2</sup> Haú wâ má Hpinisi mau shut dap ló é lhaí lé, ngamoq myàng luí, haú mai chôm jî chûng bê. <sup>3</sup> Haú hkûn, ngamoq gi, Kupru zinlóng lé myàng jáng, hau é loqyo hkyam đông lai ló luí, Suriq mau shut e ló le, hpugá zê lé hkyó râ matú, Turuq myuq má nô é nghut lhê. <sup>4</sup> Haú wâ má, chángzô pé lé myang hô luí, yhangmoq chyáng nyhit nyí bíng yu é. Chángzo haú bang gi, Chyoiyúng Woi-nyí eq lhoq pûn é đông Poluq lé Yerusalem wà mó shut a ló râ matú, chôm hkûm akô. <sup>5</sup> Nghut kôlhang, nyhit nyí haú lai jáng, ngamoq gi, ngamoq é hkyowuì shut dum xoq sô htoq ló bê. Chángzô pé lhunglhang bang gi, yhangmoq é myi zo wuì eq rahá, ngamoq lé wà shinggan jé shoq châng dé kôluí, ngamoq gi, yhangmoq eq rahá wuiyàm má hkyihput htuq mù, kyû chôm dung bê nghut lhê. <sup>6</sup> Hau htâng, rayuq eq rayuq ban shi-kyâm lhum jáng, ngamoq gi, lhaí má wàng bê; yhangmoq gi, yhûm shut dum tau ló byuq bekô nghut ri.

<sup>7</sup> Ngamoq gi, Turuq myuq mai lhaí jî chûng mù, Toleme wà má jé ló bê. Ngamoq gi, haú wâ má é gumang wuì lé shichyên yù mù, yhangmoq eq rahá ra-nyí chôm nyi kûn é nghut lhê. <sup>8</sup> Htang nyí gi, ngamoq haú wâ mai htoq ló mù, Kesare wà mó má dum jé bê. Haú wâ má, haú htuqluq htuqbang nyhit yuq\* má bò sù, gabú danglù hko taí é Hpilip gá su é yhûm má, ngamoq wang bíng bê nghut lhê. <sup>9</sup> Yhang gi, yhang hku tô é byizo zomyi myiqhtoi myi yuq wó ri.

<sup>10</sup> Ngamoq gi, haú yhûm má rayoq zo nyi é htâng má, Agabu gâ é myiqhtoi rayuq, Yuda mau mai jé lé ri. <sup>11</sup> Yhang gi, ngamoq chyáng jé lé luí, Poluq é hpyihit lé yù mù, yhanggùng yhang loq eq hkyí pé má tui mù luí, taí é gi, "Shí hpyihit yhumsîng lé, Yerusalem wà mó má é Yudaq byu pé mai shí su kut lhom tui luí, tûngbaù pé é loq má ap pyám kó râ nghut lhê; 'ga luí, Chyoiyúng Woi-nyí taí ri." gâ ri.

<sup>12</sup> Dang haú lé wó gyo jáng, haú má é bang eq ngamoq gi, Poluq lé Yerusalem wà mó má a doq ló râ matú, gyai yhang chôm hkúm bê nghut lhê. <sup>13</sup> Nghut kôlhang, Poluq gi, "Nungmoq gi, haí mù luí ngaubyi ngau-nhap kut é eq, ngo lé myit wum gyui râ đông kut nyi akô lhú? Ngò gi, Yhumsîng Yesuq é yanmai, Yerusalem wà mó má, tuí é hui râ za a nghut, shí hkâm râ matú le rì rì nghut lhê." ga tû taí pyâm ri. <sup>14</sup> Yhang lé wó taí hkúm râ su a dut lo jáng, ngamoq gi, "Garai Gasang ô nau é đông nghut sháng gaq." nghu luí, zim za chôm nyi bùm bê.

<sup>15</sup> Hau htâng má, ngamoq gi, zè món chûng mù Yerusalem wà mó shut doq ló bê nghut lhê. <sup>16</sup> Kesare wà mó má é chángzô pé ra-am le, ngamoq eq rabyìn za nghut kôluí, yhangmoq gi, ngamoq lé Kupru byù Manason ga sù, hí hí lhê é chángzo rayuq é yhûm má shuí ló mù, yhang chyáng bíng nhang akô.

*Yerusalem Wà Mó Má, Yakuq Lé Ê Huí É Hkyô*

<sup>17</sup> Yerusalem wà mó má ngamoq jé é hkûn, gumang wuì gi, ngamoq lé gabú tung lhom hkûlum yu akô. <sup>18</sup> Htang nyí, Poluq eq ngamoq gi, Yakuq lé ê huí le, hpúng suwún wuì le zîng nyi to lánng akô. <sup>19</sup> Poluq gi, yhangmoq eq ban shichyên jáng, yhang wùn waq lai lo é hpúng mù đông mai, Garai Gasâng eq tûngbaù pé chyáng kut byi bê hkyô pé lé, jihkúm nuqguq shit kyô ri.

<sup>20</sup> Yhangmoq gi, haú lé wó gyo kôjáng, Garai Gasang lé hkya-ôn akô. Hau htâng, Poluq lé taí kô é gi, "Âmang ê, Yudaq byu pé má lumjîng é bang hkâ-myhó hkyîng mun nghut bê lé, nàng sê lhê. Haú bang lhunglhang gi, jep é tarâ má myit zuq to bê bang chyat nghut bum akô. <sup>21</sup> Nghut kôlhang, yhangmoq lhunglhang bang gi, tûngbaù pé chyáng nyó lúng tô é Yudaq byù banshoq bang lé, nàng, yhumsîng yhangzo yhangshû pé é matú ahpyo-kuq hpyit a ra nghu é eq nga-nhûng é htûng tarâ lé châng nyi a ra nghu luí, Mosheq é tarâ lé tô pyám râ đông mhoqshit ri gâ é dang lé, wó gyô yu bùm bekô nghut ri. <sup>22</sup> Nàng jé bê

\* 21:8 Lagyo 6:1-6



hkyô lé, yhangmoq wó gyo berâ za nghut lhê. Ahkuî, ngamoq hkâsu kut lo râ lhu? <sup>23</sup> Haû mù, ngamoq taí é dông kut aq, ngamoq chyáng danggidiq mó byi bê byù myi yuq nyi lhê. <sup>24</sup> Nàng gi, haú bang lé ji yù mù, yhangmoq eq rahá lhoq san lhoq yúng yù aq, yhangmoq lé u wó wuq yù râ matú, ahpau le htoq byi aq. Haú hkûn sheq, byù lhunglhang bang gi, yhangmoq wó gyô tô é hkyô a têng byuq é eq, nàng yhang lhang, jep é tarâ lé, châng kut nyi sù nghut é hkyô lé, sé kó râ nghut lhê. <sup>25</sup> Lumjínq é tûngbaù pé é matú kúm gi, hparâ lô pé lé tîng byi é zoshuq, sui, lingzing mai myhik sat é dusak sho eq ashop é dông gungsho zùm yap é hkyô pé lé, yhangmoq koi pyám râ matú, ngamoq chôm doqdan luí, kâ hûn kat bê nghut lhê." ga akô.

<sup>26</sup> Haû mù luí, Poluq gi, hau htang nyi haú bang lé ji yù luí, yhangmoq eq rahá, lhoq san lhoq yúng yù mù, noqkuq yhûm má wàng luí, yhangmoq yuq hkanqmó é matú hkungga wó byi shoq ga, yhangmoq é lhoq san lhoq yúng buinyi ngap bê hkyô lé, taí kyô ri.

### *Poluq Chyup Yû Huí É Hkyô*

<sup>27</sup> Buinyi nyhit nyi haú ngap râ yàm má, Asia mau mâ é Yudaq byu pé ra-am gi, noqkuq yhûm má Poluq lé myàng kômù, shiwa byu pé lé shuí gabyong luí, yhang lé chyup yù mù, garû taí kô é dang gi, <sup>28</sup> "Israellaq byu pé ê, garúm yù keq, shí yuq gi, nga-nhûng byuhú lé le, jep é tarâ lé le, jowò shí lé le, shut shai é dông jowò hkanqmó mâ é byù banshoq lé mhoqshit sù nghut ri. Hau htoq agó, noqkuq yhûm má Grik pé lé shuí háng é eq, chyoyúng jowò shí lé achâq achyut kut é sù nghut ri." gâ akô. <sup>29</sup> (Hkâsu mù gâ le, yhangmoq gi, Ehpesu myuq byù Trohpimu ga sù eq Poluq wà hkaû má rahá nghut kô é lé, myàng kômù, haú yuq lé noqkuq yhûm shut shuí háng nhô ngam pyám kô é yanmai nghut ri.)

<sup>30</sup> Rawà gón gabyông lo mù, shiwa byu pé lhinghkyuq mai din lé lô kôluí, Poluq lé chyup zing to uchyang, noqkuq yhûm shinggan shut she hkyut htoq ló akô. Haú hkûn jáng, hkum pé lé myhí pyám akô nghut ri. <sup>31</sup> Poluq lé yhangmoq sat râ dâ nyi kô é hkûn, Yerusalem wà gón gabyông nyi akô gâ é hkyô lé, Romaq dap up zaû é nô má, lò jé ri. <sup>32</sup> Haû mù, yhang gi, radá dâm shô up gyezau ra-am eq gyezô pé lé shuí chûng mù, byù hpúng shut, din yán gyó ló akô. Yhangmoq gi, gyezau eq gyezô pé lé lhom myàng kôjáng, Poluq lé nhuq nyi é mai hkyîng byuq akô nghut ri.

<sup>33</sup> Haú hkûn, dap up zau hpó gi, Poluq chyáng ê jé mù, yhang lé chyup yù luí, toqjâng tui í hkat eq tui to nhang ri; hau htang, yhang ó yuq nghut é hkyô lé le, haí kut shut é hkyô lé le myí wú ri. <sup>34</sup> Shiwa byu pé kúm gi, rayuq rajung ga garû bum akô. Haû mù, gyezau hpó gi, lûm garu kô é yanmai, têng é hkyô lé rago a wó sê yù jáng, Poluq lé gyewap má shuí ló nhang ri. <sup>35</sup> Poluq gi, zumhtâng wang má jé lo é hkûn, byù moq mó lûm htím chyîn chyap lô kô é yanmai, gyezô pé gi, yhang lé waq doq ló akô. <sup>36</sup> Shiwa byu pé gi, "Yhang lé sat pyám keq." ga châng garû nyi akô nghut ri.

### *Poluq, Yhumsing Gùng Mara A Bo É Lé Taí Sân Kyô É Hkyô*

<sup>37</sup> Gyezô pé gi, Poluq lé gyewap má shuí wàng râ za nghut é hkûn, Poluq gi, dap up zau hpó lé, "Ngò nàng lé dang wó nyô râ lhu?" ga myi jáng, dap up zau hpó gi, "Nàng, Grik myíng dat mu lhê lhu?" <sup>38</sup> Nàng gi, hí hkûn gumlau kut mù, byù sat wún bang myi hkyîng lé, yoso shut shuí htoq ló é sù, Egutuq byù a nghut lhu?" ga tau myí ri.

<sup>39</sup> Haú hkûn, Poluq gi, "Ngò gi, Kiliki mau Tarshu myuq mâ é Yudaq byù nghut lhê; ngò nyi é wà gi, wà chyap wà zo za a nghut, jeju mai, byù shí bang lé ngò dang taí râ ahkáng byi laq." ga dúng ri.

<sup>40</sup> Gyedap up zau hpó ahkáng byi jáng, Poluq gi, zumhtâng má yap to mù, shiwa byu pé shut loq he ri. Haú hkûn, yhangmoq lhunglhang bang zim byuq kômù, Poluq, yhangmoq lé Hebre myíng dông taí é gi,

## 22

<sup>1</sup> "Gumang wui eq îwa pé ê, ahkuî, ngò mara a bò nghu taí é dang lé gyô wú shi keq." gâ ri.

<sup>2</sup> Yhangmoq gi, yhang Hebre myíng đông tái é dang lé wó gyô bùm kôjáng, gyai yhang zím byuq bekô. Haû mù, Poluq xoq tái é gi, <sup>3</sup> "Ngò gi, Yudaq byù rayuq nghut lhê. Kiliki mau Tarshu myuq má choq hpyit kôlhang, wà mó shî má nyi kô lò sù nghut lhê. Ngò gi, nga-nhông îchýí îwa pê é jep é tarâ lé, Gamalelaq é loq má jihkúm nuqguq mhoq yû luí, hkû-nyí lhê é nungmoq lhunglhang bang su, Garai Gasang lé gyai myit zing zuq é sù nghut lhê. <sup>4</sup> Ngò gi, shí Hkyô cháng bang lé shi é jé shoq, zing-rî wú é sù eq, myiwe yuqgè ó yuq lé nghut kôlhang, chyup yû mù htóng má lhông pyâm wú bê sù nghut lhê. <sup>5</sup> Hkyangjong mó eq byìn tú wap suwún wuî lhunglhang bang gi, ngá é saksê pé nghut akô. Ngò gi, Damaskuq myuq má nyi é yhangmoq é Yudaq gumang wuî lé byi râ laiká yhangmoq chyáng mai wó yu chông luí, haû mâ é bang lé le Yerusalem wà mó má dam byi râ matú, chyup tuí lô râ nghû, Damaskuq myuq shut e é nghut lhê.

<sup>6</sup> Nyigûng tû zó lé, ngò Damaskuq myuq shut sô chyâng lô nyi é hkûn, maubó gi, ngá é lhinghkyuq má mauhkûng mai byodàn tung duqbó to bê nghut ri. <sup>7</sup> Haû mù, ngò myigùng má lêng gop tô le, wó gyô kat é danghtê gi, 'Sholuq, Sholuq, nàng ngo lé haî mù zing-rî nyi lhê lú?' gâ ri.

<sup>8</sup> Ngò le, 'Yhumsîng ê, nàng ó nghut lhê lú?' nghu myî kat jáng, 'Ngò gi, nàng zing-rî wún é sù, Nazaret wà byù Yesuq nghut lhê.' ga luí, Yhang tû tái kat ri. <sup>9</sup> Ngò eq rahá e lô é bang kúm gi, maubó lé myàng kôlhang, ngo lé tái é danghtê lé a sê gyo kó nghut ri.

<sup>10</sup> Dum, ngò gi, 'Yhumsîng ê, ngò haî kut ra râ lú?' nghu myi jáng, haû Yhumsîng gi, 'Toq mù, Damaskuq myuq má wang lô aq, nàng kut râ matú wò byî tô é hkyô pé lhunglhang, nang lé haû má lhom tái kyo berâ nghut lhê.' ga ngo lé dum tái ri. <sup>11</sup> Haû maubó é shingkâng é yanmai, ngò myoqjit byuq mù, ngá é byinzùm wuî gi, Damaskuq myuq shut ngo lé loq mai she wang lô akô.

<sup>12</sup> Haû hkûn, Anani gâ é yuqgè rayuq ngá chyáng lé huî ri. Yhang gi, jep é tarâ lé gyuq hkunggâ é eq, haû má nyi é Yudaq byù lhunglhang bâng é hí má myoqdong gyai wó é sù nghut ri. <sup>13</sup> Yhang gi, ngá nâm má yap to luí, 'Gumang Sholuq ê, nàng myoq myàng aq hkoi!' ga tái ri. Haû hkûn jáng yhang, yhang lé ngò wó myang kat bê nghut lhê.

<sup>14</sup> Yhang dum xoq tái é gi, 'Nga-nhông îchýí îwa pê é Garai Gasang gi, nang lé, Yhang ô nau é hkyô sé sháng gaq ga luí le; Dingmán Sù lé wó myâng luí, Yhông é nhut mâ é mungdang lé wó gyo sháng gaq ga luí le, hkyin to bê nghut ri. <sup>15</sup> Haû mù, nàng gi, nàng myang é eq wó gyô yu é hkyô pé lé, byù lhunglhang bâng é hí má, Yhông é matú saksé hkám byi râ su dut râ nghut lhê. <sup>16</sup> Ahkuí, nàng haî lé lánng nyi ashî lú? Toq aq, Yhông é myìng lé lang luí wui-myhup hkâm yu é eq, nàng é yubak mara pé lé chí sân pyám aq.' gâ ri.

<sup>17</sup> Hau htâng, ngò gi, Yerusalem wà mó má dum tái jé lô mù, noqkuq yhûm má kyû é dúng nyi le, moq byuq lô mù, <sup>18</sup> 'Nàng, ngá é hkyô lé saksé hkám râ dang lé, yhangmoq a lhom hap yù kó râ nghut é yanmai, Yerusalem wà mó mai hân htoq lô aq.' ga Yhumsîng ngo lé tái nyi é lé, myoqwup shing-rán đông myang ri.

<sup>19</sup> Haû mù, ngò gi, 'Yhumsîng ê, tarajong ralhûm htâng ralhûm má nang lé lumjîng bang lé, htóng má chyup lhông pyâm é eq, hkat bat lhing wún é hkyô lé, yhangmoq sê bum akô. <sup>20</sup> Náng é saksé Stehpan sat hui luí suí shun u lé, ngò nàm má yhang yap to mù, haû hkyô lé myit bo hui luí, yhang lé sat pyám bâng é mebu lé zúng byî é nghut lhê.' nghû tû tái bê.

<sup>21</sup> Haû hkûn, Yhumsîng gi, 'Ê aq, ngò, nang lé, wê gâng é tûngbaù pê chyáng nhang kat râ.' ga, ngo lé tái ri." gâ ri.

#### *Poluq, Romaq Mingdán Byù Nghut É Hkyô*

<sup>22</sup> Shiwa byu pé gi, dang haû hkun jé za gyô yù kômù, "Shî sù é byù gi, myigùng htoq má nyi a gíng, sat pyám keq." ga, htê mó eq garû bum akô.

<sup>23</sup> Yhangmoq gi, haû su garu uchyang, yhumsing buhîng lé hkyut dú pyâm lhê, hpuilhup lé mauhkûng shut kyaq tâng lhê, kut nyî kôjáng, <sup>24</sup> dap up zau hpó gi, Poluq lé gyewap má shuí hâng yù nhâng mù, yhang lé shiwa byu pé haî mù shî su ga garû bùm

kô é hkyô lé wó sé shoq ga, nhuq bat nhâng luî, myî choq nhang ri. <sup>25</sup> Nhuq bat râ matú shokuq tuî eq tui kôjáng, Poluq gi, nàm má yap tô é shô up gyezau lé, "Romaq mingdán byû ru nghut sù lé nhâng, lháng a jéyáng shimá, nungmoq nhuq bat le gi, tarâ wang akô lhú?" ga taî ri.

<sup>26</sup> Rashô up gyezau gi, dang haû lé wó gyo jáng, dap up zaû chyáng ló mù, "Nàng haî kut râ dâ nyi lhê lhú? Shí yuq gi, Romaq mingdán byû sheq ru nghut ri." ga luî, yhang lé ló taî kyô ri.

<sup>27</sup> Haû mù, dap up zau gi, Poluq chyáng ê mù, "Nàng gi, Romaq mingdán byû nghut lhê lhú? Taî kyô wú laq." ga myî ri.

Poluq gi, "Ngò, Romaq mingdán byû nghut lhê." ga tû taî ri.

<sup>28</sup> Haú hkûn, dap up zau hpó gi, "Ngò lháng ahpau myo myo byî pyám luî sheq, Romaq mingdán byû ru wó dut é nghut lhê." ga tû taî jáng, Poluq gi, "Ngò kúm gi, Romaq mingdán byû dut gû hku lé lo é sù nghut lhê." ga taî ri.

<sup>29</sup> Yhang lé myî choq wú râ gâ é bang gi, haú hkûn jáng, yhâng chyáng mai huî zut ló bûm bekô. Gyedap up zau hpó le, Poluq gi, Romaq mingdán byû nghut é lé sé jáng, yhang lé tuî pyám bê nghut é yanmai, gyuq byuq bê nghut ri.

#### *Yudaq Byìn Tú Wapdoq Suwún Wuî Gam Hkoq Byuq É Hkyô*

<sup>30</sup> Htang nyí, dap up zau hpó gi, Yudaq byu pé mai Poluq lé hun é mara haî nghut é hkyô lé hkyak wó sé shoq ga, Poluq lé tuî hpyi pyám byi mù, hkyangjong agyi pé eq Yudaq byìn tú wapdoq suwún wuî lhunglháng lé ji tsîng to luî, yhangmoq é gung gûng má Poluq lé shuí wàng mù, shap to bê nghut ri.

## 23

<sup>1</sup> Haú hkûn, Poluq gi, Yudaq byìn tú wapdoq suwún wuî lé wú tsuq to mù, "Ngá gumang wuî ê, ngò gi, hkû-nyí jé shoq Garai Gasâng é hí má sansêng é i-myt èq asak dui nyi bê nghut lhê." ga taî ri. <sup>2</sup> Haû mù luî, hkyangjong mó Anani gi, Poluq nâm má yap to bang lé, yhâng nhut má bat byi keq gâ ri. <sup>3</sup> Haú hkûn, Poluq gi, yhang lé, "But hpyu tô é xewâm\* nàng ê, nàng lé sheq Garai Gasâng èq bat râ nghut lhê. Nàng gi, tarâ eq rajung za ngo lé jéyáng râ matú shî má zung to luî nhâng, haî mù tarâ eq shut shai é dông ngo lé bat nhang lhê lhú?" ga taî ri.

<sup>4</sup> Poluq nâm má yap tô é bang gi, yhang lé, "Nàng gi, Garai Gasâng é hkyangjong mó lé wám rhoi lhê lhú?" ga luî, chòm taî akô.

<sup>5</sup> Poluq gi, "Gumang wuî ê, yhang gi, hkyangjong mó nghut é lé ngò a sê pyám mù nghut bê. Chyúmdang má le, 'Náng amyû lé up é sù lé wó rhoi râ a nghut.'<sup>☆</sup> ga le kê tô é nghut lhê." ga tû taî ri.

<sup>6</sup> Hau htâng, haû zîng tô é bang mâ é ra-am gi, Saduke pé, góbang gi, Hparishe pé nghut é lé, Poluq gi, sé jáng, Yudaq byìn tú wapdoq suwún wuî lé, "Gumang wuî ê, ngò gi, Hparishe awut ashín mâ é, Hparishe rayuq nghut lhê. Shí bê bang dum dui toq lô râ hkyô lé myit myoqbyù é yanmai, ngò jéyáng é huî nyi ri." ga luî, garû taî kat ri. <sup>7</sup> Yhang haû su ga taî kat jáng, Hparishe pé eq Saduke pé gi, dang jet jet lhûm lò kômù, Yudaq byìn tú wapdoq hpong gi, gam hkoq ló byuq bekô nghut ri. <sup>8</sup> (Hkâsu mù gâ le, Saduke pé gi, dum dui toq hkyô a joq; maumang lagyo pé le, sobyo pé le, a nyi ga taî bum akô. Hparishe pé kúm gi, haú pé joq lhê ga, lumjîng bang nghut akô.)

<sup>9</sup> Haû mù luî, gyai yhang taî garû bum akô. Haú hkûn, Hparishe hpúng mâ é tarâ sará pé ra-am gi, toq mù, "Shí yuq chyáng hai mara le, ngamoq a myàng nghut ri. Sobyô a nghut jáng, maumang lagyo rayuq yuq, yhang lé dang taî bê nghut jáng gi, hkâsu nghu kó râ lhú?" ga luî, zuq zuq taî htîng lhûm akô nghut ri. <sup>10</sup> Haû su kut gyai yhang taî htîng lhûm lò kôjáng, dap up zau hpó gi, Poluq lé llang myha pyám kó râ lé chiq é yanmai, yhangmoq chyáng gyó ê mù, Poluq lé haú bâng é gung gûng mai ê lú shuí lò luî, gyewap má shuí wang ló râ matú, gyezô pé lé nhang kat ri.

\* 23:3 But hpyu tô é xewâm gâ é gi, gegùn labyoq kut bang lé gâ lhê. ☆ 23:5 Htoq Ló 22:28

<sup>11</sup> Haú myîn, Yhumsîng gi, Poluq é nàm má yap to luî, "Hkâgyuq, Yerusalem wà mó má nàng ngá é hkyô lé saksé hkám bê eq rajung za, Romaq myuq má le saksé hkám ra shirâ nghut lhê." ga, yhang lé taî ri.

*Poluq Lé Sat Râ Haq Dâ É Hkyô*

<sup>12</sup> Htâng napkyó, Yudaq byu pé gi, Poluq lé sat râ hpaqchyî chôm da kômù, yhang lé a wó sat sat gi, a zo a shuq râ nghut lhê ga, ó le ó dakam yu akô nghut ri. <sup>13</sup> Hpaqchyî shî lé chôm dâ é bang gi, myi xê yuq chyân nghut bum akô. <sup>14</sup> Yhangmoq gi, hkyangjong agyi pé eq suwún wui chyáng ê kômù, "Poluq lé a wó sat sat gi, ngamoq haî le a zo nghû, chôm dakam yu to bê nghut lhê. <sup>15</sup> Hau é yanmai, ahkuî nungmoq gi, Yudaq byîn tú wapdoq suwún wuî eq rahá kut luî, Poluq é hkyô lé rago za myî gon wú râ nghu mhaû é đông, yhang lé nungmoq chyáng wut yù râ matú, dap up zaû chyáng dúng kat keq. Haú hkûn, ngamoq gi, hkyolat má yhang lé lhom sat pyám râ rì rì kut to râ nghut lhê." ga taî akô.

<sup>16</sup> Nghut kôlhang, haû lhom haq sat kó râ gâ é hkyô lé, Poluq é yhâng nhammó é yhangzo yuqgè zo wó gyô yù luî, yhang gi, gyewap má wang ê mù, Poluq lé ê taî kyô ri.

<sup>17</sup> Haú hkûn, Poluq gi, shô up gyezau rayuq lé ji yù mù, "Zorâm shî lé dap up zaû chyáng shuî ê aq, yhang, yhang lé shit kyo râ hkyô rajung joq lhê ga." ga taî ri. <sup>18</sup> Haû mù luî, shô up gyezau hpó gi, zorâm haû lé dap up zaû chyáng shuî ê mù, "Zorâm shî nang lé shit kyo râ hkyô rajung joq lhê gâ ri ga, yhang lé náng chyáng shuî lé râ matú, htóng byû Poluq gi, ngo lé ji yù mù taî ri." ga, yhang lé taî ri.

<sup>19</sup> Haû jáng, dap up zau hpó gi, jauwò má zorâm haû lé yhâng loq mai she ê mù, "Nàng ngo lé haî jung shit kyô nau ri lú?" ga, yhang lé baú tsik za myî ri.

<sup>20</sup> Haú hkûn, zorâm haû gi, "Yudaq byu pé gi, Poluq lé rago za saî myî wú râ su kut mhaú mù, napmá, Yudaq byîn tú wapdoq má shuî yù râ matú, náng chyáng dung kó râ ga, myit chôm huî to bekô nghut ri. <sup>21</sup> Haû mù luî, yhangmoq ô nau é đông hkâgyo byi, hkâsu mù gâ le, Poluq lé a wó sat sat gi, haî le a zo a shuq râ nghut lhê ga, byû myi xê yuq chyân yhang, ó le ó dakam yù bekô nghut ri. Haú bang gi, yhang lé lhom chyup yù râ matú haq lhom to lánng kó râ nghut lhê. Ahkuî lhang, yhangmoq gi, mù haû kut râ matú rì rì nghut bùm bekô; náng é ahkáng lé za lánng nyi bum akô nghut ri." ga shit kyô ri.

<sup>22</sup> Haú hkûn, dap up zau hpó gi, zorâm haû lé, "Nàng, ngo lé shí hkyô shit kyo bê hkyô lé, ó yuq lé le hkâtaî kyo." ga, sidiq byi mù, taû nhang kat bê nghut ri.

*Mingzau Hpilik Chyáng Poluq Lé Dé Kat É Hkyô*

<sup>23</sup> Hau htâng, yhang gi, shô up gyezau í yuq lé ji yù mù, "Hkû-myîn sum hkyíng† má Kesare wà mó shut ê râ matú, gyezô pé í shô, myang ji bang nyhit xê, lhâm chûng bang í shô kut mù, rì rì hen to keq. <sup>24</sup> Hau htoq agó, Poluq lé mingzau Hpilik chyáng ngón za wó dé kat râ matú, yhang ji râ myang pé le lajang byi keq." ga, yhangnhik lé pying kat ri.

<sup>25</sup> Laiká hun kat é le:

<sup>26</sup> "Aróng wó dik é mauzau Hpilik ê, ngò Klodi Lusi gi, nguingón danglù shit kyô kat lhê.

<sup>27</sup> Shí yuq lé gi, Yudaq byu pé eq chyup yù mù sat pyám râ dâ nyi bekô za nghut lhê. Nghut kôlhang, ngò gi, gyezô pé eq rahá ê wú le, yhang Romaq mingdán byû nghut é lé wó sê yu é yanmai, yhangmoq chyáng mai yhang lé hkyi lo é nghut lhê. <sup>28</sup> Haû su mù, haî mù yhang lé mara hùn kô é hkyô lé sé nau é yanmai, yhangmoq é Yudaq byîn tú wapdoq má yhang lé shuî jé byî wú bê nghut lhê. <sup>29</sup> Haú hkûn, yhangmoq é tarâ hkyô eq séng luî za mara hun bùm kô é lé ngò myang ri. Nghut kôlhang, shî gíng é eq htóng lhung gíng é mara haî le a bò nghut ri. <sup>30</sup> Shí yuq lé sat pyám râ hpaqchyî da kô é hkyô, ngo lé shit kyo kô é hkûn, radá dâm, yhang lé ngò náng chyáng dé nhang kat bê. Yhang lé mara hùn nau é bang lé gi, nang hí má yhang hun lhum keq nghû pying kat bê nghut lhê." gâ ri.

† 23:23 Myín sum hkyíng gi, nga-nhûng é myín gau hkyíng nghut lhê.

<sup>31</sup> Haû mù luí, gyezô pé gi, haû pying kat é dang eq rajung za, myín lé yhang, Antipatri và mó jé shoq Poluq lé dé kat bekô nghut ri. <sup>32</sup> Htang nyí, myang ji bang lé ê châng dé nhâng kômù, yhangmoq gi, gyewap shut dum taû lò bekô nghut ri. <sup>33</sup> Myang jí é gyezô pé gi, Kesare và mó má jé kô é hkûn, mauzau hpó lé laiká byi mù, Poluq lé le jáng ap byi akô nghut ri. <sup>34</sup> Haú hkûn, mauzau hpó gi, laiká haû lé ban nghap jáng, Poluq hká mau mâ é byù nghut é hkyô lé myí wú luí, Kiliki mau mâ é byù nghut é lé sé jáng, <sup>35</sup> "Nang lé mara hûn bang jé jáng sheq, náng mù lé ngò gôn wú rã." ga taí ri. Hau htâng, yhang gi, Poluq lé Herut é hkohkâm-wâng má byam zúng byi keq ga hkunmó hkyô tô ri.

## 24

### *Poluq, Mara Hûn Huí É Hkyô*

<sup>1</sup> Hau htâng, ngo nyí lai jáng, hkyangjong mó Anani gi, suwún wuî ra-am eq tarâ sé sù Tertulu lé shuí gyó ló mù, mauzau hpô hí má Poluq lé mara lé taí hun bum akô. <sup>2</sup> Haú hkûn, Poluq lé hí má ji hâng tô é nghut mù, Tertulu, yhang lé mara hûn dang taí hi é gi, "Aróng wó dik é Hpilik ê, ngamoq gi, nyi-ngón yuqyo é hkyô lé nang é yanmai gyai myáng shoq wó hkam yu bum é nghut lhê. Nang sê up sê hkang é jeju lé, byù myû shí wó hkâm zô nyi é yanmai, <sup>3</sup> ngamoq gi, haû lé hkyô hkat hkangmó eq jowò hkangmó má jeju bûn é myit eq hkam yu nyi bê nghut lhê. <sup>4</sup> Nghut kôlhang, ngò nang lé lhoq hkyik é dông a dut sháng gaq, taí rã dang ratot zo lé, myit hîng hîng to mù gyo byi laq nghû dúng tôngbán lhê ô!

<sup>5</sup> Shí yuq gi, byù lé gunjang sù, mingkan gón mâ é Yudaq byu pé lhunglhang lé shuí gabyong sù eq, haû Nazaret hpúng mâ é hkyô-u shê sù nghut é lé, ngamoq myang ri. <sup>6</sup> Hau htoq agó, yhang gi, noqkuq yhûm lé achay kut rã dà nyi luí, yhang lé ngamoq chyup yû mù, (ngamoq é tarâ dông jéyáng rã hen nyi é hkûn, <sup>7</sup> dap up zau Lusi gi, lé lô mù, ngamoq é loq mai yhang lé lé lú shuí yû luí, yhang lé mara hûn bang lé, náng chyáng jé keq ga hkunmó hkyô tô é nghut lhê.) <sup>8</sup> Haû mù, nàng, yhang lé myí wú jáng, ngamoq yhang lé hun é mara banshoq têng é hkyô lé, nàng wó sé rã nghut lhê." gã ri.

<sup>9</sup> Yudaq byu pé le, haú pé gi, têng lhê ga bo chòm taí akô nghut ri.

### *Poluq, Mara A Bò É Lé Taí Hung É Hkyô*

<sup>10</sup> Mingzau hpó gi, Poluq lé dang taí rã dông loq lik kat jáng, Poluq taí é gi, "Zau ê, shí mau bâng é ahtoq má, nàng zanwut myo myo jéyáng byi nyi é hkyô lé, ngò sê é yanmai, ngò gabú myit èq yhumsing matú, mara a bo é hkyô taí bá. <sup>11</sup> Ngò, Yerusalem và mó má noqkuq rã matú doq e é buinyi raxe í nyí lhang a chyân shi é gi, nàng lui za wó sé rã nghut lhê. <sup>12</sup> Noqkuq yhûm má ngò ó yuq eq taí htîng lhûm é lé lhang, tarajong, a nghut jáng, và hkaû hká jowò má le byu pé lé shuí gabyông é lé lhang, ngo lé mara hun é bang gi, a myàng kó. <sup>13</sup> Ahkuî, ngo lé yhangmoq hun é mara pé lé, náng hí má yhangmoq saksé lhang a wó tûn shit kó nghut ri. <sup>14</sup> Nghut kôlhang, náng hí má ngò yín yû rã hkyô rahkat gi, yhangmoq èq shut shaí hkyô ga myhîng tô é Hkyô lé cháng luí, ngamoq é íchýí îwâ pé é Garai Gasang lé noqkuq nyi lhê. Jep é tarâ eq myiqhtoi laiká pé má kê tô é lhunglhang lé le lumjîng lhê. <sup>15</sup> Ngò gi, dingmán é bang eq a dingmán bâng é dum dui toq lô rã hkyô joq é lé, yhangmoq eq rajung za Garai Gasang má myit myoqbyu nyi é sù nghut lhê. <sup>16</sup> Haû mù luí, Garai Gasang eq byu é hí má, ngò gi, rã é hkyô a bo é za, myit é hkyô san za wó dut nyi shoq, shikut nyi lhê.

<sup>17</sup> Zanwut tsómra laí é htâng má, ngò gi, ngá é byù myû mâ é myùng bang lé chyunghuq byi rã eq alu kat rã matú, Yerusalem và mó shut ló jé bê nghut lhê. <sup>18</sup> Haû su kut nyi é hkûn, ngò eq rahá hai byù moq mó le a nyi, haí jung gabyông é hkyô le a htoq, ngò noqkuq yhûm má lhoq san lhoq yúng yû bê hkyô lé za, yhangmoq myang akô. <sup>19</sup> Nghut kôlhang, Asia mau mâ é Yudaq byù ra-am gi, haú má nyi tô é nghut lhê; yhangmoq mai ngo lé mara hûn rã hkyô joq kô é nghut le gi, shí náng é hí má yhangmoq lé jé kó ra nghut lhê. <sup>20-21</sup> Haû a nghut jáng, shí má nyi tô é bang gi, ngò Yudaq byin tú wapdoq hí má yap to mù, 'Shi byuq bâng é dum dui toq rã hkyô é yanmai, hkû-nyí nungmoq ngo lé jéyáng nyi

akô.' nghû luî, garû é dang hkûn mai lai luî, ngò má gotû mara myàng shi kô é nghut le gi, yhangmoq yhang taî kyo kó sháng gaq." gâ ri.

<sup>22</sup> Hpilik gi, Hkyô haû lé rago sê lhê nghut mù, "Gyedap up zau Lusi jé jáng sheq, ngò, nungmoq é mù lé doqdan byi râ nghut lhê." ga luî, yhangmoq lé ahkyíng htot kat byî ri.

<sup>23</sup> Poluq lé le, zúng za zúng to mù, yhâng é buinùm ji-myi wuî mai yhang ra châ é hkyô lajang byi naû kô é bang nyi le gi, ahkáng byi keq ga luî, shô up gyezau lé hkunmó hkyô kat ri.

<sup>24</sup> Buinyî rayoq zo lai é htâng má, Hpilik gi, Yudaq myiwe myhí nghut é sù yhangmyi Drusila eq jé lé mù, Poluq lé ji lò nhâng luî, yhang, Hkrisduq Yesuq lé lumjínng hkyô taî kyô é le gyô yu ri. <sup>25</sup> Poluq gi, dingmán hkyô, yhumsing gùng lé hkang é hkyô eq, jé lô râ tarâ dara hkyô lé mhòqshit jáng, Hpilik gi, gyô gyuq mù, "Nàng ahkuî wó ló bê, ngò jìn jáng sheq nang lé dum ji yù râ nghut lhê." ga taî ri. <sup>26</sup> Hpilik kúm gi, Poluq eq ngùn haq byi râ lé myit myoqbyù mù, yhang lé anum num ji yù luî, yhang eq nyo lhum lhum kut ri.

<sup>27</sup> Zanwut í zân lai jáng, Hpilik é mauzau ayá má Porku Hpestu lé htaî kat pyâm akô. Nghut kôlhang, Hpilik gi, Yudaq byu pê é hí má myoqdong wó nau é yanmai, Poluq lé htóng má jâng lhûng pyâm to bê nghut ri.

## 25

### *Poluq, Kehtaq Chyáng Jé Râ Matú Dûng È Hkyô*

<sup>1</sup> Hpestu gi, haû mau má jé é sum nyí lai jáng, Kesare wà mó mai Yerusalem wà mó shut doq ló ri. <sup>2</sup> Haû hkûn, hkyangjong agyi pé eq Yudaq byù hkyô-u shê bang gi, yhang lé Poluq é hkyô lé hkyang lhom shit kômù, <sup>3</sup> yhangmoq gi, Poluq lé hkyolat má lhom haq sat pyám râ dâ to kômù luî, jeju ralhûm kut byî é đông Poluq lé Yerusalem wà mó shut dé kat byi râ matú, Hpestu lé lhom dûng akô. <sup>4</sup> Nghut kôlhang, Hpestu gi, "Poluq lé Kesare wà mó má sheq ru lhûng tô lhê, hkâ-myháng a myáng má, ngò yhang le haû má dum taû ló râ nghut lhê. <sup>5</sup> Haû mù, nungmoq mâ é hkyô-u shê bang ra-am, ngò eq rahá gyó ló mù, haû yuq kut shut é hkyô bo é nghut jáng gi, yhang lé mara lé hûn kó sháng gaq." ga tû taî ri.

<sup>6</sup> Hau htâng, yhang gi, shit nyi, raxê nyí kô yhangmoq chyáng nyi yù luî, Kesare wà mó má taû ló mù, htang nyí gi, tarâ tanghkuq má zùng luî, Poluq lé yhâng hí má shuí wang lò râ matú hkunmó hkyô kat ri. <sup>7</sup> Poluq jé jáng, Yerusalem wà mó mai gyó lo é Yudaq byu pé gi, yhâng é lhîngkhyuq má yap to kôluî, saksé a wó tûn shit é mara mó myo myo lé, yhâng é ahtoq má chôm taî hun akô nghut ri.

<sup>8</sup> Haû hkûn, Poluq gi, "Yudaq byu pê é jep é tarâ eq shai é đông le, noqkuq yhûm lé shut é đông le, Kehtaq\* lé shut é đông le, ngò a kut wú." ga luî, mara a bo é hkyô taî ri.

<sup>9</sup> Nghut kôlhang, Hpestu gi, Yudaq byu pê é hí má myoqdong wó naû mù, Poluq lé, "Nàng, Yerusalem wà mó má doq ló luî, shí hkyô pé lé ngò haû má doqdan byi râ matú, nàng dóng lhê lú?" ga myî ri.

<sup>10</sup> Poluq kúm gi, "Ngò gi, doqdan hui râ nghut jáng, shî doqdan é jowò, Kehtaq é tarâ hpyit wap má ahkuî yap to bê nghut lhê. Nàng sê é eq rajung za, ngò gi, Yudaq byu pé lé haî lhang a shut wú sù nghut lhê. <sup>11</sup> Laqma mù, shî gíng é mara lé, ngò kut shut pyâm é nghut le gi, shî hkám râ hkyô lé ngò a he pyám; nghut kôlhang, shî Yudaq byu pé mai ngo lé mara hun é hkyô a teng é nghut jáng gi, ó yuq lhang ngo lé yhangmoq é loq má ap byi râ ahkáng wó râ a nghut, ngò gi, Kehtaq chyáng wang taí râ nghut lhê." ga tû taî ri.

<sup>12</sup> Haû hkûn, Hpestu gi, yhâng é byìn tú wap bang eq ban hpyê lhum jáng, "Nàng Kehtaq chyáng wang taí râ ga bê nghut lhê, Kehtaq chyáng wang ló aq hkoï!" ga taî kat ri.

### *Poluq Lé, Hkòhkâm Agripa Hí Má Shuí Hâng Yu É Hkyô*

<sup>13</sup> Hau htâng, buinyî hkâ-myháng a myáng má, Hkòhkâm Agripa eq yhanggu myiwe zo Bernike gi, Kesare wà mó má jé lé mù, Hpestu lé lé huî nyo akô nghut ri. <sup>14</sup> Haû mù,

\* 25:8 Kehtaq gâ é gi, "hkoséng" gâ é nghut lhê.

yhangnhik tâng gi, buinyì tsómra myáng nyi nyi é htâng má sheq, Hpestu gi, haù Poluq é hkyô lé hkohkâm wa eq taì kyô lhûm é gi, "Hpilik, lhûng to lánng é htóng byû rayuq nyi ri. <sup>15</sup> Ngò Yerusalem wà mó má nyi tô é hkûn, hkyangjong agyi pé eq Yudaq byu pê é suwún wuì gi, haù yuq é hkyô lé taì kyo kôluì, haù yuq lé mara byi râ matú ngo lé chòm dúng akô.

<sup>16</sup> Haù hkûn, ngò gi, mara hun é hui sù, mara hun é bang eq chyung chyôq yoq kut luì, yhangmoq hun é mara lé yhumsing matú mara a bo é hkyô a wó taì shi lé, ó yuq lé ap byi pyám râ le, Romaq htung a joq nghû luì yhangmoq lé taì kyo bê nghut lhê. <sup>17</sup> Yhangmoq ngá htâng châng gyó lô kô é hkûn, ngò gi, a nô yu é za, htang nyí jáng tarâ tanghkuq má zúng luì, haù yuq lé shuì wang lò râ matú hkunmó hkyô kat é. <sup>18</sup> Haù hkûn, haù yuq lé yhangmoq mara chòm hun bùm kôle, ngò myit ngàm tô é su mara rallhum le a hun htoq lô kó nghut ri. <sup>19</sup> Yhangmoq é noqkuq htung hkyô eq, haù dui nyi ri ga Poluq èq taì é, shi byuq bê Yesuq é hkyô lé za dang jet jet lhûm bum akô. <sup>20</sup> Haù mù, ngò gi, haù hkyô lé hká dông gon yù râ le a sé lô é yanmai, haù hkyô lé Yerusalem wà mó má doqdân é lô hkam yù râ matú, yhang dóng a dóng é hkyô lé myí wú le, <sup>21</sup> Poluq yhang sheq, Hkoséng mó chyáng jé râ ga taì é yanmai, Kehtaq chyáng a dé kat shi é u lé, yhang lé zúng nyí shirâ matú, ngò hkunmó hkyô kat é nghut lhê." gâ ri.

<sup>22</sup> Haù hkûn, Agripa gi, "Ngò le haù yuq é dang gyô wú nau ri." ga, Hpestu lé taì jáng, yhang gi, "Napmá, nàng wó myang gyo râ nghut lhê." ga tû taì ri.

<sup>23</sup> Htâng nyí, Agripa eq Bernike nhiktâng gi, shingkang bò bò za lé lô mù, dap up zau wuì eq wà mà é agyi suwún wuì eq rahá, rûng gok mó má wang zung tô bùm kô é hkûn, Hpestu hkunmó hkyô kat jáng, Poluq lé shuì hâng tô akô. <sup>24</sup> Haù hkûn, Hpestu taì é gi, "Hkohkâm Agripa eq ahkuì shí má zup zîng tô é lhunglhâng bang ê, Yerusalem wà mó eq shí wà mà é Yudaq byu pé banshoq bang, ngá chyáng lé taì kôluì, shí yuq lé asak a wó duì nhang to lo ga garû bùm é gi, ahkuì nungmoq myang é shí yuq yhang nghut bê. <sup>25</sup> Nghut kôlhâng, shí yuq zui saì é má shí gíng é mara haì lé lháng ngò a myàng nghut ri. Yhang gi, Hkoséng chyáng wâng râ ga taì é yanmai, yhang lé Romaq myuq shut dé kat râ matú ngò myit hpyit to bê. <sup>26</sup> Dé kat bá nghû jáng le, ngá é yhumsîng Hkoséng chyáng yhang é hkyô jihkúm nuqguq kê hun kat râ haì le a bò nghut ri. Haù mù luì, yhang lé ban myí gôn wú jáng sheq, ká râ hkyô rajung jung hkâlhâng ngò myàng abe nghû, nungmoq banshoq bâng é hí má le, je riyhang nàng Hkohkâm Agripa é hí má le, yhang lé ngò lhoq htoq shit é nghut lhê. <sup>27</sup> Hkâsu mù gâ le, htóng byû rayuq yuq lé dé kat é hkûn, yhang lé hun é mara a wó tûn shit lé gi, a htuk nghû luì, ngò myit lhê." gâ ri.

## 26

### *Poluq É Hí Hpyang Lhê É Nyì Yap Hkyô*

<sup>1</sup> Haù hkûn, Agripa gi, Poluq lé, "Nàng, náng matú dang tai râ ahkáng wó bê." ga taì ri.

Haù mù luì, Poluq loq tû kat mù mara a bo é hkyô taì é gi, <sup>2-3</sup> "Hkohkâm Agripa ê, nàng gi, Yudaq byu pê é htunghking banshoq eq taì htîng lhûm é hkyô hkat hkangmó lé, gyai sê to sù nghut é yanmai, Yudaq byu pé ngo lé hun é mara hkat hkangmó lé, ngò hkû-nyí náng é hí má mara a bò é hkyô myang taì é gi, ngá matú gabú hpo yhang nghut ri nghû myit yu nyi lhê; haù mù luì, ngá dang lé myit hing é èq gyô yù byi laq nghû, dúng tôngbán kat lhê.

<sup>4</sup> Ngò gi, zoshâng hkûn mai, ngá amyû má le, Yerusalem wà mó má le, hkâsu kut nyi kô lo é hkyô lé, Yudaq byu pé lhunglhâng bang gi, sé gû nghut akô. <sup>5</sup> Yhangmoq gi, ngo lé hí hkûn mai sé kô é yanmai, ngò, ngamoq é noqkuq htung mà é tarâ htan dik é hpúng má bo é Hparishe rayuq nghut é hkyô lé, saksé hkâm naù kô é nghut jáng, yhangmoq wó hkâm lhê. <sup>6</sup> Nghut kôlhâng, doqdân é hui zo râ matú, ahkuì ngò shí má yap tô é gi, Garai Gasang èq ngamoq é íchýi îwa pé lé byî tô é danggidiq lé myit myoqbyù nyi é yanmai nghut lhê. <sup>7</sup> Ngamoq é byù myû raxe í hú gi, danggidiq jeju haù lé wó hkam yù shoq ga, Garai Gasang lé nyí myín noqkuq dojaú shikut nyi bum akô; Hkohkâm wa ê, myit myoqbyù hkyô hau é

yanmai, ngo lé Yudaq byu pé mara hun bum akô nghut ri. <sup>8</sup> Garai Gasang gi, shî bê bang lé dum lhoq tui lê gâ é hkyô lé, a wó lûm nghû, haî mù myit yu akô lúú?

<sup>9</sup> Ngò le, Nazaret wà byù Yesuq é mying eq shai lûm é đông myo myo wó kut râ nghut lê nghû, gè gè yhang myit yu wú bê nghut lê. <sup>10</sup> Gè gè haú đông le Yerusalem wà mó má kut wú bê nghut lê; hkyangjong agyi pè chyáng mâ é ahkáng wó yû lûi, ngò gi, sân-yúng bang myo myo lé htóng má kat pyâm é eq, yhangmoq sat hui kôjáng le, ngò myit bo huî wú bê nghut lê. <sup>11</sup> Ngò gi, tarajong banshoq má a lêng lêng yhangmoq lé dam byi lûi, Yesuq lé rhoi dang tái kó shoq shikut wú bê nghut lê; nhik mó góng yo lûi, gó mau mâ é wà pé lhang jé shoq, yhangmoq lé châng zing-rî wú bê nghut lê.

#### *Poluq Hpúng Byù Dut Lo É Hkyô*

<sup>12</sup> Haú hkûn, radâm lé, ngò gi, hkyangjong agyi pè chyáng mai ahko ahkáng eq hkunmó lé yu chûng mù, Damaskuq myuq shut e ló nyi le, <sup>13</sup> Hkôhkâm wa ê, nyigûng tu ló zó lé, bui htoq má je duq é maubó gi, haú hkyô má, ngò eq ngá é luzúm wui é lênghkyuq má, mauhkûng mai duq bó htoq lo é lé myang ri. <sup>14</sup> Haú hkûn, ngamoq banshoq bang myigûng má lêng gop tô bum le, Hebre mying đông, 'Sholuq, Sholuq, nàng, ngo lé haî mù zing-rî nyi lê lúú? Zuchûn lé pik le gi, náng é matú gyai yhang wuî lê.' ga lûi, ngo lé tái é dangtê lé ngò wó gyô kat ri.

<sup>15</sup> Haú mù, ngò gi, 'Yhumsîng ê, nàng gi, ó yuq nghut lê lúú?' nghû lûi, myi jáng, haú Yhumsîng tui tái é gi, 'Nàng zing-rî nyi é Yesuq nghut lê. <sup>16</sup> Ahkuî toq yap aq, hkâsu mù gâ le, ahkuî, nàng, ngo lé myàng bê hkyô eq, ngò, nang lé tân shit shirâ nghut é hkyô pè é matú, ngá é mú wùn râ byù eq saksé dut nhâng râ đông nang lé hkyin to râ nghû, ngò náng chyáng lé htoq shit é nghut lê. <sup>17</sup> Náng é amyû pè é loq mai le, tungbau pè é loq mai le, ngò, nang lé hkyi yù nyi râ nghut lê. <sup>18</sup> Yhangmoq, yubak hkyut pyâm byî é jeju wó yû râ eq, ngo lé lumjîng é yanmai, lhoq sân-yúng huî é bang eq rahá silí wunlí wó hkam yù kó sháng gaq nghû, yhangmoq é myoq lhoq hpóng byi mù, mauchut hkaú mai maubó shut, Tsadán é a-tsam hkaú mai Garai Gasâng shut yhangmoq lhing ló râ matú, ngò, nàng lé yhangmoq chyáng nhang kat râ nghut lê.' gâ ri.

#### *Poluq Kut É Muzó Hkyô*

<sup>19</sup> Haú mù lûi, hkôhkâm Agripa ê, ngò gi, mauhkûng mâ é myoqwup shing-rán haú lé a gyô é a wó é nyi nghut lê. <sup>20</sup> Ngò gi, yhangmoq myit lêng lûi, Garai Gasang shut lhing taú lò mù, myit lêng bê hkyô lé, hkyi zó loq zó đông mai tân shit kó sháng gaq nghû, sân-hi má Damaskuq myuq má nyi é bâng chyáng mai hî lûi, Yerusalem wà mó mâ é bâng chyáng má le, Yuda mau gón mâ é bâng chyáng má le, tungbau pè chyáng má le, hkô kyo bê nghut lê. <sup>21</sup> Hau é yanmai, Yudaq byu pé gi, ngo lé noqkuq yhûm má chyup yû lûi, sat pyâm râ da kô é nghut lê. <sup>22</sup> Nghut kôlhang, ngò gi, hkû-nyi jé shoq Garai Gasâng eq garúm é lé wó yû lûi, ahkuî shî má yap to mù, tiq ko banshoq bang lé saksé wó hkâm kyô é nghut lê. <sup>23</sup> Ngò tái é má, Hkrisduq gi, hpuzo lûi, shî bê bang mai sân-hi dui toq lô mù, Yhâng é amyû eq tungbau amyû pé lé maubó é hkyô lé wó tái kyo râ nghut lê ga lûi, dut lò râ hkyô lé, myiqhtoî pé eq Mosheq tái tô é hkyô mai lai lûi, ngò gotû haî le a tái é nghut lê." gâ ri.

<sup>24</sup> Yhang haú su ga mara a bo é hkyô tái é lé, Hpestu gi, "Poluq ê, nàng na bê! Lûm mhôq myô yu é yanmai na bê nghut ri." ga lûi, htê mó eq dang lat tái hpyit kat ri.

<sup>25</sup> Poluq kúm gi, "Aróng wó dik é Hpestu ê, ngò gi, nâ é a nghut, ngò tái é dang gi, tengmán é dang eq dang gyíng nghut lê. <sup>26</sup> Shí hkyô lé hkôhkâm wa yhang le sê to gù nghut lê mù, yhâng é hí má ngò a gyuq a kyum tái é nghut lê. Hkâsu mù gâ le, shí hkyô gi, nungwò má kut é a nghut é yanmai, hkôhkâm wa yhang a bo sê é gi, haî le a joq ra nghut lê nghû, ngò myit lum nyi lê. <sup>27</sup> Hkôhkâm Agripa ê, nàng gi, myiqhtoî pè é dang lé lumjîng lê lúú? Nàng lumjîng é hkyô lé ngò sê lê." ga tui tái ri.

<sup>28</sup> Haú hkûn, Agripa gi, Poluq lé, "Razup za má, nàng, ngo lé Hkristan rayuq wó dut nhâng nhô ngam ri lúú?" ga tái ri.



<sup>29</sup> Dum Poluq gi, "Razup za má nghut nghut, myáng myáng má nghut nghut, shí shamtoq-tui pé mai lai luí, nàng za a nghut, hkû-nyí ngò taí é dang lé gyô nyi é lhunglhang bang, ngò su dut râ matú, ngò gi, Garai Gasang lé kyúdung nyi lhê." ga tû taí ri.

<sup>30</sup> Haú hkûn, hkohkâm wa gi, ginwáng zau hpó eq Bernike le mù, haú má zùng tô é bang eq rahá toq yap ri. <sup>31</sup> Yhangmoq htoq ló kô é hkûn, "Shí yuq gi, sat gíng é mara eq htóng lhung gíng é mara haí le a kut shut nghut ri." ga, rayuq eq rayuq taí lhum bum akô nghut ri.

<sup>32</sup> Agripa gi, Hpestu lé, "Shí yuq gi, yhang mai Kehtaq chyáng jé râ ga a taí tô é nghut le gi, yhang lé wó nhang pyám berâ nghut lhê." ga taí ri.

## 27

### *Poluq, Romaq Myuq Shut Wuì-sanghpo Mai E Ló É Hkyô*

<sup>1</sup> Ahkuí, ngamoq lé Itali ming shut wuì-sanghpo mai gû dap ló nhâng râ matú myit hpyit to kôluí, yhangmoq gi, Poluq eq htongbyû góbang ra-am lé, Augustuq Hkosêng é gyewap mó mâ é, Yuliu gâ é shô up gyezaú é loq má ap byî kat akô. <sup>2</sup> Haú hkûn, Asia mau mâ é wuimau gin-gau cháng luí wà pé má wang jón ló é, Adramuti myuq mai toq é wuì-sanghpo má ngamoq wang ji bê nghut lhê. Htesaloni wà mó mâ é Aristakuq gâ é Makedoni byù rayuq le ngamoq eq rahá nghut lhê.

<sup>3</sup> Htang nyí, ngamoq gi, Sidun myuq má no bê nghut lhê. Yuliu gi, Poluq lé shogyo mù, yhang chyáng râ é hkyô lé yhang é buinùm wuì mai lhom lajang byi kó sháng gaq ga, yhangmoq eq ê hui râ matú ahkáng byî kat ri. <sup>4</sup> Haú mai dum toq ló é hkûn, lài tau mut é yanmai, Kupru zinlóng lé lai hkaú uchyang jî lài ló mù, <sup>5</sup> Kiliki eq Pamhpuli mau mâ é wuimau đông lài byit ló le, Laiki mau mâ é Mura myuq má jé bê nghut lhê. <sup>6</sup> Haú má, shô up gyezaú hpó gi, Itali ming shut dap e ló é, Alesandru myuq má é wuì-sanghpo lé myang hkyup luí, ngamoq lé haú má ji nhâng bê nghut ri. <sup>7</sup> Haú mai buinyi myo myo yhó yhó lé za jî e ló luí, awui ahke yhang Kidu wà mó eq ang má wó jé ló jáng, lài tau mut é yanmai, hí shut a wó lài ló lo mù, ngamoq gi, lài lé cháng luí, Kreti zinlóng lé lai hkaú mù, Salamone kongzô é tû tap âng é mai lài ló é nghut lhê. <sup>8</sup> Haú mâ é wuiyàm mai awui ahke ji ló lé, Lasea wà eq a wê lhùm é Yuqyo é Guhkan gâ é jowò má jé ri.

<sup>9</sup> Ahkuí, buinyi tsómra lhoq lhai pyám luí, haú Zoshuq gám poí lai bê nghut é yanmai, wuì-sanghpo mai sô wún le gi, gyuq chiq râ nám jé bê nghut ri. Haú mù, yhangmoq lé Poluq taí pun taí kyîng é gi, <sup>10</sup> "Âhkaú pé ê, shí dàm lhê é wuì hkyô gi, wuìhke mó hui luí, wuì-sanghpo eq zè pé sùm pyám râ htoq agó, nga-nhung é asak lhang sum râ dut é hkyô lé, ngò byu myang ri." gâ ri. <sup>11</sup> Nghut kôlhang, shô up gyezaú hpó gi, Poluq é dang lé gyo râ malaí, wuì-sanghpo hkàng sù eq wuì-sanghpo yhumsing é dang lé, je lum ri. <sup>12</sup> Guhkan haú gi, gyoqmyò\* wó lhoq lhai râ su a dut é yanmai, myo hpyang gi, Hponik guhkan má wó jé le jé mù, haú má gyoqmyò ló nyi lhai râ matú chôm myit huí akô. Guhkan haú gi, Kreti zinlóng má maupyî buiwàng hkyam eq mautsung buiwàng hkyam shut hu tô é jowò nghut ri.

### *Wuimau Má, Laidun Mó Htông Huí É Hkyô*

<sup>13</sup> Maupyî shut mâ é lài yhó le hik lô jáng, yhangmoq myit tô é má hkyak nghut bê su ngam pyám kôluí, shamtoq goknghe lé lhoq toq yû kômù, Kreti zinlóng yâm đông jî e ló bê nghut lhê. <sup>14</sup> Nghut kôlhang, hkâ-myháng a myáng má, Buihtoq mautsung lài gâ é laidun mó gi, haú zinlóng mai mut lò luí, <sup>15</sup> wuì-sanghpo lé lo mut htông é yanmai, hí shut a wó ló lo jáng, ngamoq gi, lài mut ló é shut châng yông ló bê nghut lhê. <sup>16</sup> Ngamoq gi, Koda gâ é zinlóng zo lé lai hkaú uchyang yông ló nyi é hkûn, haú sakhkyílhai lé gyai shikut é eq wó llang yù luí, <sup>17</sup> wuì-sanghpo ahtoq má llang toq to bê. Wuì-sanghpo lé gi, a byoq lo shoq tuí eq tuí kîng to bê nghut lhê. Dum, yhangmoq gi, Surti gâ é semuî bùm má ló kê gyâm to râ lé chiq kô é yanmai, wuì-sanghpo mâ é panlong pé lé lhoq nyhum

\* 27:12 Gyoqmyò lé, haú mau má laidun mó lò lò dut mù, yông wún le gyuq chiq nám nghut lhê.

hkyô yù mù, châng yông ló bekô nghut ri. <sup>18</sup> Laidun mó lùm htan é yanmai, htang nyí yhangmoq gi, hpugá zê pé lé hkyom dú hkyó pyám bekô nghut ri. <sup>19</sup> Sum nyí nghu é nyí má, yhangmoq gi, wuì-sanghpo zè pé lé yhumsing é loq èq yhang hkyô pyám bekô. <sup>20</sup> Buinyì myáng myáng, buì lé le, kyí pé lé le a myàng é eq, laidun mó za ru mut nyi é yanmai, wó lut rà nghú myit myoqbyu tô é hkyô lé, ngamoq tô pyám bê nghut lhê.

<sup>21</sup> Yhangmoq zoshuq a zô é, buinyì tsómra myáng lô bê nghut mù luí, Poluq gi, yhangmoq é gung gûng má yap to mù, "Àhkaú pé ê, nungmoq ngá é dang gyo luí, Kreti zinlóng mai a htoq ló é nghut le gi, shí su htên byoq é marop hui zo rà a nghut. <sup>22</sup> Ahkuí nghut kôlhang, ngò taí é dang lé gyô yù mù myit wum yù keq; nungmoq mâ é hká yuq lé asak sum rà a nghut, wuì-sanghpo za sheq htên byoq byuq rà nghut lhê. <sup>23</sup> Hkâsu mù gâ le, ngo lé sing é, ngò dojaú nyi é Garai Gasâng é maumang lagyo rayuq, amàn ngá é nàm má lé yap to mù, ngo lé taí é gi, <sup>24</sup> Poluq ê, hkâgyuq, Kehtaq é hí má nàng wó yap rà nghut lhê. Wuì-sanghpo shí má nàng eq rahá ji tô é lhunglhang bâng é asak lé, Garai Gasang gi, náng é yanmai, láí láí byi rà nghut lhê." gâ ri. <sup>25</sup> Hau é yanmai, àhkaú pé ê, myit wum yù keq, ngo lé taí kyô é eq rajung za dut lò rà nghut lhê nghú luí, Garai Gasang lé ngò lumjîng nyi lhê. <sup>26</sup> Nghut kôlhang, nga-nhúng gi, zinlóng ralhum lhum má ló htung chyap to rà nghut lhê." ga luí, yhangmoq lé i-myt taí tîng ri.

<sup>27</sup> Buinyì raxe myi nyí myín má, gunggàm yoq lé, ngamoq gi, Adria wuimau má yông lhing wún é hkûn, sanghpo hkâng bang gi, dùng yàm eq chyâng lo nyi é su gâ é lé sê gyo kat akô. <sup>28</sup> Haú su mù, wuì nik é lé kê wú lé, loqlam í xê kô nik é lé wó sê akô. Razup zo má dum kê wú le, loqlam raxe ngò kô za nik é lé myàng akô nghut ri. <sup>29</sup> Haú mù luí, luqmó má ló záng htung rà lé chiq kômù, yhangmoq gi, wuì-sanghpo htâng shut mâ é shamtoq goknghe myí lhum lé lhoq hkyô kat luí, mau hân bó sháng gaq ga kyûdûng nyi bum akô nghut ri. <sup>30</sup> Wuì-sanghpo hkâng bang gi, wuì-sanghpo lé tô pyâm to luí hpâng rà dâ é myit eq, wuì sanghpo-u shut mâ é shamtoq goknghe pé lé lhoq hkyó rà su kut mhaú luí, sakhkyílhaí lé wuì má lhoq hkyô nyi bum akô. <sup>31</sup> Haú mù, Poluq gi, shô up gyezau eq gyezô pé lé, "Shí bang wuì-sanghpo má a nyi le gi, nungmoq wó lut rà a nghut." ga taí ri. <sup>32</sup> Haú hkûn, gyezô pé gi, sakhkyílhaí lé tuí tô é tui lé zân hpyit kat kôluí, sakhkyílhaí gi, byit gyó byuq bê nghut ri.

<sup>33</sup> Maubó lô jáng, Poluq gi, yhangmoq banshoq bang lé zang zo rà matú myit wum byí é gi, "Nungmoq gi, myit chiq luí, zoshuq haí le a zô é, hkû-nyí raxe myi nyí myáng lô bê. <sup>34</sup> Haú mù luí, zoshuq rajung jung zo keq! Haú gi, nungmoq wó lut rà matú nghut lhê. Nungmoq chyâng mâ é ó yuq é xâm rahkat lhang byuq rà a nghut." gâ ri. <sup>35</sup> Haú su ga ban taí é eq, yhang gi, muk lé yù luí, yhangmoq banshoq bâng é hí má Garai Gasâng jeju lé hkya-on mù, muk lé hpé luí, zô hí bê nghut ri. <sup>36</sup> Haú hkûn sheq, banshoq bang gi, myit wum wó yù kômù, zoshuq zô bùm bekô nghut ri. <sup>37</sup> Wuì-sanghpo haú mâ é byù lhunglhang gi, í sho nyhit xe hkyuq yuq nghut lhê. <sup>38</sup> Yuq hkangmó bàn zô gyí é htâng má, wuì-sanghpo sóm rà matú, sungso pé lé wuì má dú kat pyâm akô nghut ri.

#### *Wuì-Sanghpo Htên Gyop Byuq É Hkyô*

<sup>39</sup> Myoq san za myàng jáng, yhangmoq gi, jowò haú lé a sé kôlhang, semuí-jàng chyûn ralhum lé byu myàng kôluí, wó dut é nghut jáng, haú má sanghpo lé kôn gyam rà matú chôm doqdân yu akô nghut ri. <sup>40</sup> Haú mù, yhangmoq gi, shamtoq goknghe pé lé wuimau má hkyut hkyô pyâm tô akô. Lhaishap tui lé le hkyut yù luí, wuì-sanghpo ulhum mâ é panlong lé lhoq toq yù mù, laí hkyô cháng luí wuiyàm shut mut ló bê nghut ri. <sup>41</sup> Nghut kôlhang, semuí lo bum tô é jowò ralhum má, wuì-sanghpo ló htung chyap byuq luí, sanghpo u gi, a wó duí lo mù, sanghpo htâng lé gi, wuìlheng èq lò bat hkyop myha pyám bê nghut ri.

<sup>42</sup> Haú hkûn, gyezô pé gi, htongbyû pé wuili lí hpang byuq kó rà lé gyuq kô é yanmai, yhangmoq lé sat pyám rà chôm dâ akô. <sup>43</sup> Nghut kôlhang, shô up gyezau hpó gi, Poluq lé hkyi yù nàu luí, yhangmoq dâ é hkyô lé hkûm pyám mù, wuili dat lí bang gi, wuì má byam gyó luí wuiyàm shut hí lí dap ló kó sháng ga luí le, <sup>44</sup> góbang gi, siklong eq wuì-sanghpo

mâ é gotû zè pé má zui mù, gu dap ló sháng ga le, hkunmó hkyô kat ri. Haû đông mai lhunglhang bang gi, wuiyàm shut rago wó jé dap ló bekô nghut ri.

## 28

### *Malata Zinlóng Má Jé Nyi Tô É U Lhê Hkyô*

<sup>1</sup> Ngamoq wó lut dap ló jáng sheq, zinlóng haû gi, Malata gâ é lé sê ri. <sup>2</sup> Zinlóng byu pé gi, ngamoq lé shogyo myit gyai lhom tân shit akô. Mau ru jâng wo nyi luí gyoq é yanmai, yhangmoq gi, myi mut byi mù, ngamoq banshoq bang lé hkûlum yu akô. <sup>3</sup> Haû hkûn, Poluq gi, htang rawaq guq tsîng yù mù, myihkyóm má kat kat é hkûn, myi soq htan lò jáng, duq htân lhangmui radu gi, htoq ló mù, yhâng é loq má htê zing tô ri. <sup>4</sup> Zinlóng byu pé gi, Poluq é loq má lhangmui haû htê lhang tô é lé myàng kôjáng, "Shí yuq gi, gè gè yhang byù sat é sù teng râ dut ri; wui mai wó lut ló kôlhang, yhang asak dui nyi râ matú, Tengmán tarâ gi, a dóng lo nhung!" ga luí, rayuq eq rayuq taí lhum bum akô nghut ri. <sup>5</sup> Poluq kúm gi, lhangmui haû lé myihkyóm má ko hkyô kat luí, haí le a dut é za nyi tô ri. <sup>6</sup> Yhangmoq gi, yhanggùng wâm lò berâ, haû a nghut jáng, byodàn ratung shi hkyaq lêng ló berâ, ga myit lánng nyi bum akô. Nghut kôlhang, myáng myáng lánng wú nyi bum le, yhang má haí le a dut lo é lé myàng kôjáng, yhangmoq é i-myit dum htaí pyám kôluí, shí yuq gi, hparà rayuq sheq nghut ri ga dum taí bum akô nghut ri.

<sup>7</sup> Hau é nàm má, zinlóng agyì hpó Popli sing é maumyî pé joq tô ri. Haú yuq gi, ngamoq lé lhom te yù mù, yhâng yhâm má sum nyi yhang lalúm la-nye lhom hkûlum yu ri. <sup>8</sup> Haú u lé, Popli é yhângwa gi, ali nyé no nyi é eq wuiwam shun leq tô ri. Poluq gi, haú yuq chyáng wàng mù, kyúdung byi luí, yhâng é ahtoq má loq ke byi mù, yhang lé lhoq gè byi ri. <sup>9</sup> Haû su dut é yanmai, zinlóng mâ é nò byù góbang banshoq le, lé luí lhoq gè byi é hui bekô nghut ri. <sup>10</sup> Yhangmoq gi, ngamoq lé a hkyô hkyô đông hkungga kôluí, ngamoq wui-sanghpo ji mù, dum toq ló râ hkûn, ngamoq râ é gû lé châng byi kat akô nghut ri.

### *Romaq Myuq Má, Poluq Jé É Hkyô*

<sup>11</sup> Lhamó sum hkyap lai jáng, Alesandru myuq mâ é, "Hparà zozûm nhiktâng" gâ é alhô dap é wui-sanghpo má, ngamoq wang jî htoq ló bê nghut lhê. Wui-sanghpo haû gi, gyoqmyò lé zinlóng haú má joq lai é nghut ri. <sup>12</sup> Surakusa wà mó má jé jáng, haú má ngamoq sum nyi nô yu é nghut lhê. <sup>13</sup> Haû mai jî xoq lhing ló le, ngamoq gi, Regi wà mó má jé ri. Htang nyí gi, maupyî lai hik lô mù luí, í nyí nyí má nghut jáng, Potioli wà mó má jé lô bê nghut lhê. <sup>14</sup> Haû mâ é gumang wui ra-am eq hui luí, ngamoq lé nyhit nyi no râ matú lùng kômù, ngamoq gi, nô yù bê; hau htâng, Romaq myuq má jé ló bê nghut lhê. <sup>15</sup> Haû mâ é gumang wui gi, ngamoq jé lo nyi é hkyô lé wó gyo kôjáng, te yù râ ga, Api Gai gâ é wà eq Bîng Yhâm Sûm Lhum gâ é wà jé shoq lé akô. Poluq gi, haú bang lé lhom myàng jáng, Garai Gasang lé hkyá-on kungtôn mù, myit wum wó yù bê nghut ri. <sup>16</sup> Ngamoq, Romaq myuq má jé wang ló é hkûn, Poluq gi, yhang lé zúng râ gyezo rayuq eq gotû san nyi râ matú, ahkáng wó ri.

### *Poluq, Romaq Myuq Má, Mungdang Hko Kyô É Hkyô*

<sup>17</sup> Buinyi sum nyi lai é htâng má, Poluq gi, haú mâ é Yudaq suwún wui lé ji yu ri. Yhangmoq jé lé bûm kôjáng, yhang gi, "Gumang wui ê, ngò gi, nga-nhông é amyû lé le, íchýi îwa pê é htunghking lé le, shut shai é đông haí le a kut wú; nghut kôlhang, ngò gi, Yerusalem wà mó má chyup yu é hui mù, Romaq byu pê é loq má ap byi kat é hui bê nghut lhê. <sup>18</sup> Romaq zau wui kúm gi, ngo lé ban jep gôn wú jáng, ngá chyáng shî gíng é mara lé a myàng kô é yanmai, ngo lé nhang kat nau akô nghut ri. <sup>19</sup> Nghut kôlhang, haû lé Yudaq byu pé a dóng kô é yanmai, ngò hkâsu a dat kut lo mù, Kehtaq chyáng jé râ matú dúng é nghut lhê. Haû nghut kôle, ngá amyû lé mara hûn râ jowò joq é yanmai gi, a nghut. <sup>20</sup> Haû mù luí, Israelaq amyû é myit myoqbyù hkyô\* é yanmai, shî shamtoq-tui

\* 28:20 Israelaq amyû é myit myoqbyù hkyô gi, Mesaia gâ é hkyi yù sù lé myoqbyù nyi é nghut lhê.

èq tuí é ngò hui zô é hkyô eq séng luí, nungmoq eq nyo kún râ matú, ngò, nungmoq lé ji kat é nghut lhê." ga luí, yhangmoq lé taí ri.

<sup>21</sup> Haú hkûn, yhangmoq gi, "Náng é hkyô eq séng luí Yuda mau mâ é laiká ngamoq a wó yû nghut ri. Haú mai lé é gumang wui ó yuq le, nàng eq sêng é a ge é luhkyang lé shit kyô é a bò kó nghut ri. <sup>22</sup> Nghut kôlhang, shí nàng lom é hpúng gi, jowò hkangmó má taí he pyâm é huí é hkyô lé, ngamoq sê é yanmai, nàng byu myang é hkyô lé ngamoq gyô wú nau ri." ga tù taí akô.

<sup>23</sup> Yhangmoq gi, yhang eq huí kún râ buinyì ding to kôluí, yhang bíng é yhûm má byù myo myo lé zîng bum akô. Haú hkûn, yhang gi, napkyó mai myín htâng jé shoq, Garai Gasâng é mingdán hkyô lé saksé hkâm kyô é eq, Mosheq é tarâ eq myiqhtoí pê é dang má cháng mù, yhangmoq lé shikut luí, Yesuq é hkyô taí pun taí kyîng ri. <sup>24</sup> Yhang taí é hkyô lé, ra-am gi, lumjîng bum akô; ra-am kúm gi, a lumjîng kó nghut ri. <sup>25</sup> Yhangmoq rayuq eq rayuq haú su myit a huí lhûm bùm kô é yanmai, Poluq gi, yhangmoq lé, "Chyoiyúng Woi-nyí, Myiqhtoi Esai-aq é nhut mai nungmoq é îchyí îwâ pé lé taí é dang gi, gyai yhang têng ri. Dang haú gi,

<sup>26</sup> 'Byù haú hú chyáng ê mù,

"Nungmoq gyô tsuq to kôlhang, sê gyo kó râ a nghut;  
wú tsuq to kôlhang, wú sé kó râ a nghut.", nghû ê taí aq.

<sup>27</sup> Hkâsu mù gâ le, amyû shi é i-myit gi, htan byuq luí,  
yhangmoq é nohkyap gi, htu byuq bê nghut ri;  
yhangmoq é myoq gi, chûm byuq bê nghut ri;  
haú a nghut le gi, yhangmoq é myoq èq myàng mù,  
yhangmoq é nohkyap èq wó gyo luí,  
yhangmoq é i-myit má sê hkyâng kômù,

ngá chyáng lhing lò kôluí, ngò yhangmoq lé lhoq gê byi berâ nghut lhê. <sup>☆</sup>  
gâ ri.

<sup>28</sup> Haú mù luí, shí Garai Gasâng é hkyi yù hkyô lé, tûngbaù pê chyáng byí kat bê nghut luí, yhangmoq lhom gyô yù berâ hkyô lé, nungmoq yhang sê nyi keq ô!" ga luí, danghkun haú taí kat é htâng má, yhangmoq gi, htoq ló byuq bùm bekô nghut ri. <sup>29</sup> (Poluq haú su ga taí é htâng má, Yudaq byu pé gi, yhangmoq yhangchang dang jet jet lhum uchyang ló byuq bekô nghut ri.)

<sup>30</sup> Poluq gi, yhang nghô lúng é yhûm má í zân tup nyi é u lé, yhâng chyáng lé má lé é bang lé lhom hkûlum yu ri. <sup>31</sup> Haú mù, a gyuq a kyum é za, Garai Gasâng é mingdán hkyô lé hko taí kyô é eq, Yhumsîng Yesuq Hkrisduq eq sêng é hkyô lé mhòqshit byí ri; yhang lé, ó le a hkûm zing to kó nghut ri.

## ROMAQ Pê Chyáng Hun Kat é Laiká (Romans)

<sup>1</sup> Hkrisduq Yesuq é dui-nhâng zoshâng eq lagyo dut râ matú, Garai Gasâng eq ji yu é hui luí, chyoiyúng Chyúmdang pé má, <sup>2</sup> Garai Gasang gi, hí hí mai Yhâng é myiqhtoí pé dông danggidiq byí to bê nghut é, Yhâng é Yuqzô é hkyô nghut é, Garai Gasâng é gabú danglu é matú hkyin to huí é sù, ngò Poluq gi, Romaq myuq má nyi é, Garai Gasâng eq chyitdap é hui luí, sân-yúng bang dut râ matú jì yu é bang banshoq lé, dang kyô kat lhê. <sup>3</sup> Yhâng é Yuqzo haú gi, byù hkyam dông ga jáng, Dawiq é awut ashín nghut ri; <sup>4</sup> Yhang gi, shi é mai dum dui toq é dông, Garai Gasâng é Yhangzo nghut é hkyô lé, chyoiyúng hkyo é Woi-nyí dông mai, hpungwup a-tsâm eq sé nhâng bê nghut ri. Yhang gi, nga-nhúng é Yhumsîng Yesuq Hkrisduq nghut ri. <sup>5</sup> Yhang dông mai le, Yhâng myîng é matú le, ngamoq gi, byù myû chângjup mai byù ji yù mù, lumjîng hkyô lé châng nyi nhâng râ matú, jeju eq lagyo ayá lé wó hkam yù bê nghut lhê. <sup>6</sup> Nungmoq le, Yesuq Hkrisduq eq séng râ matú ji yù huí é bang má lòm bekô nghut ri.

<sup>7</sup> Nga-nhúng é Îwa Garai Gasang eq Yhumsîng Yesuq Hkrisduq chyáng mâ é jeju eq nguingón hkyô gi, nungmoq chyáng ru joq nyi sháng gaq ô!

### *Poluq, Romaq Myuq Má Ló Kum Nau É Hkyô*

<sup>8</sup> Nungmoq é lumjîng hkyô lé, mingkan gón má tai pyo ló bê nghut é yanmai, sân-hi má, ngò gi, Yesuq Hkrisduq é myîng mai, nungmoq banshoq bâng é matú, ngá é Garai Gasang lé, jeju hkya-on lhê. <sup>9</sup> Ngá é kyûdung dang pé má, ngò, nungmoq lé hkâ-nhám le bûn nyi é hkyô lé, Yhâng é Yuqzô é hkyô gabú danglù lé hko kyô nyi é má, ngá é myit nhiklum banshoq eq dojaú é Garai Gasang gi, ngá é saksé nghut lhê; <sup>10</sup> Garai Gasang ô nau é nghut jáng, hkâ-í a myáng má, ngò, nungmoq chyáng wó jé lé râ hkyô htong byi râ matú, ahkuí, ngò kyûdung lhê.

<sup>11</sup> Ngò gi, nungmoq lé, woi-nyí hkyô eq séng é chyunghuq wó gâm byi mù, nungmoq lé wum-o wó lhoq kíng byi râ matú, nungmoq lé gyai yhang myàng nau nyi ri. <sup>12</sup> Haú su nghu é gi, nga-nhúng rayuq eq rayuq é lumjîng hkyô dông mai, nungmoq eq ngò, myit wum byí é hui râ matú nghut lhê. <sup>13</sup> Gumang wui ê, ngò gi, haú tungbaù pê chyáng mai ashi wó yu é eq rajung za, nungmoq chyáng mai le ashi wó yù râ matú, nungmoq chyáng lé jé râ nghu adam dâm dâ wú é nghut kôlhang, ahkuí jé shoq hkûm tang pyám huí é hkyô lé, nungmoq lé sé nhâng nau ri.

<sup>14</sup> Ngò gi, Grik pé lé le, Grik a nghut bang lé le, hpaqchyí bò bang lé le, hpaqchyí a bò bang lé le, chyîn dap to sù nghut lhê. <sup>15</sup> Haú nghut é yanmai, ngò gi, Romaq myuq mâ é bang nungmoq lé le, haú gabú danglù gyai yhang hko kyo nau nyi é nghut lhê.

<sup>16</sup> Haú gabú danglù hkyô má, ngò gi, a hoq é nghut lhê; hkâsu mù gâ le, haú gi, sân-hi má Yudaq byu pé, hau htâng tungbaù pé má, lumjîng é sù yuq hkangmó lé hkyi yu é wó hui nhâng râ nghut é, Garai Gasâng é hpungwup a-tsâm nghut lhê. <sup>17</sup> Hkâsu mù gâ le, lumjîng myit mai wó yù luí, lumjîng myit má gîng nyi é, Garai Gasâng chyáng mâ é dîngmán hkyô lé gi, gabú danglù haú má hpông shit bê nghut ri. Haú gi, "Haú dîngmán sù gi, lumjîng myit mai asak duì râ nghut lhê." <sup>✠</sup> ga kê tô é eq rajung za nghut ri.

### *Xângzo Byu Pê Htoq Má Garai Nhkmo-yô É Hkyô*

<sup>18</sup> Haú tengmán hkyô lé, yhumsîng é agè ashop hkyo eq zik hkûm pyâm é byu pê é agè ashop hkyô eq garai a bo é hkyô pé banshoq htoq má, mauhkûng mai Garai Gasâng é nhikmo-yo hkyô lé hpông shit bê nghut ri. <sup>19</sup> Haú mù gâ le, Garai Gasang gi, Yhang eq séng é hkyô, yhangmoq lé san za tûn shit bê nghut é yanmai, Garai Gasang lé sé âng é hkyô gi, yhangmoq chyáng san za dut bê nghut ri. <sup>20</sup> Hkâsu mù gâ le, mau htoq xâng

✠ 1:17 Hbk 2:4

hkun mai, hpan tô é zè pé lé wú jáng, Yhâng é a byu-myang é isâm nghut é, ahtum abyuq é hpungwup a-tsam eq Garaî é myit sâmlai lé gi, san za wó myâng, wó sê gyô é nghut lhê. Haû mù luí, byu pé gi, mara mai wó he lut râ hkyô a joq lo nghut ri.

<sup>21</sup> Haû mù gâ le, yhangmoq gi, Garai Gasang lé sê to kôlhang, Yhang lé Garai dông a shigyaú kô é eq, jeju a hkya-on kó nghut ri; yhangmoq myit é hkyô pé gi, akôm dut byuq é eq, nhik a gyîng é yhangmoq é myit nhiklhum gi, chut byuq bê nghut ri. <sup>22</sup> Yhangmoq gi, hpaqchyî bò bang nghut lhê ga kôlhang, a-ngok é bang dut byuq bekô nghut ri. <sup>23</sup> Haû mù, htên byoq a sê é Garai Gasâng é hpungwup shinggang lé, htên byoq sê é byù zòng, nghoq lhô, dusak lhô eq yê jung dusak lhô pê eq, htaî lhik pyám bekô nghut ri.

<sup>24</sup> Hau é yanmai, Garai Gasang gi, yhangmoq é gungdu lé rayuq eq rayuq hpau a tap lhum kó râ matú, a sansêng é gungsho zùm-yap hkyô kut râ nghut é, yhangmoq é yut yut ô nau é i-myt má, yhangmoq lé ap pyám bê nghut ri. <sup>25</sup> Yhangmoq gi, haû Garai Gasâng é tengmán hkyô lé, mhaû é hkyo èq htaî lhik pyám kômù, hpân Sû lé noqkuq dojaú râ malaî, mhaû hkyô nghut é hpan tô é zè pé lé noqkuq mù, dojaú akô nghut ri. Hpân Sû haû gi, ahtum abyuq hkya-on hui sù nghut ri. Amen.

<sup>26</sup> Haû nghut é yanmai, Garai Gasang gi, yhangmoq lé, ahoq ahî é yut yut ô nau hkyô má ap pyám bê nghut ri. Yhangmoq é myiwe wuì lhang gi, htûng akying lé tô pyám kômù, haû eq shai é dông htaî lhik pyám nyi akô nghut ri. <sup>27</sup> Haû eq rajung za, yuqgè wuì le, myiwe wuì eq zum é htûng akying lé tô pyám kômù, rayuq eq rayuq, myi su nyé shoq yut yut ô nau lhum kômù, yuqgè yhangchang rayuq eq rayuq agot a-û hkyô kut shut lhum kôluí, yhangmoq kut shut é eq gingdán é yubak dam lé, yhumsing gùng yhumsîng hkam yù nyi bekô nghut ri.

<sup>28</sup> Hau htoq agó, haû Garai Gasang lé sê é hkyô gi, akyû bo é a nghut ga yhangmoq myit yù kô é yanmai, a kut âng é hkyô kut nhâng râ matú, Garai Gasang gi, yhangmoq lé, htên byoq sê é myit má ap pyám é nghut lhê. <sup>29</sup> Yhangmoq gi, agè agau hkyô ajung jung, agè ashop hkyô, myoqnoq hkyô eq a jú lhûm é hkyô pé byíng jup tô é bang dut bekô nghut ri; manon é, byù sat é, mabyoq jishûm htoq é, mhaû zô é eq myit goí bo é pé le byíng bum ri. <sup>30</sup> Yhangmoq gi, lumu é bang, gansang é bang, Garai lé a jú é bang, byù rhoi é bang, nghutbûn é bang, gyáng é bang, agè ashop kut râ hkyô lhoq htoq é bang, mó wui é jîno a gyô é bang nghut akô. <sup>31</sup> Yhangmoq gi, a gyîng a hâng é bang, gidiq a zung é bang, chyit myit a bo é bang, shogyo nhikmyin a sê é bang nghut akô. <sup>32</sup> Haú pé lé kut é bang gi, shî gíng lhê gâ é, Garai Gasâng é dingmán tarâ joq é lé, yhangmoq sê to kôlhang, haú pé lé, yhangmoq xoq kut nyi kô é htoq agó, haú hkyô lé kut é bang lé le, hkya-on waq toq akô nghut ri.

## 2

### *Garai Gasang Tarâ Jéyáng É Hkyô*

<sup>1</sup> Haû mù luí, góyuq lé tarâ jéyáng é sù nàng ê, nàng gi, mara mai wó he lut râ hkyô a joq lo; hkâsu mù gâ le, nàng yhang jéyáng nyi luí, mù haú pé lé, nàng kut nyi é yanmai, byù góbang lé jéyáng é hkûn, náng gûng nàng mara byî nyi bê nghut ri. <sup>2</sup> Haú dông kut nyi é bang lé, Garai Gasang gi, tengmán é dông tarâ jéyáng é lé, nga-nhúng sê nyi lhê. <sup>3</sup> Haû mù, byù za nghut to luí, góbang lé gi, jéyáng mù, yhumsîng gi, haú dông roq châng kut nyi é sù nàng ê, nàng gi, Garai Gasâng é tarâ jéyáng hkyô mai wó hpang lut râ su ngam nyi lhê lú? <sup>4</sup> Haû a nghut jáng, nàng gi, Garai Gasâng é ge é hkyo èq nang lé myit wó shuí lhing nhang é lé a sê é za, Yhâng é agùn agó é ge é hkyô lé le, myit hing é hkyô eq jân shirang é hkyô lé le, wú tiq pyám nyi lhê lú?

<sup>5</sup> Nghut kôlhang, náng é myit htân hkyô eq myit a lhing é nhiklhûm é yanmai, haû Garai Gasang dingmán é dông tarâ jéyáng shit râ nghut é, Yhâng é nhikmo-yô é buinyi má hkâm zo râ nhikmo-yo hkyô lé, yhumsing gùng yhang hkong tô nyi bê nghut ri. <sup>6</sup> Garai Gasang gi, yuq hkgangmó lé, ó le ó kut é má cháng luí, hkâm zo nhâng râ nghut lhê. <sup>7</sup> Jân shirâng mù, ge é hkyô kut nyi é dông, hpungwup shinggang lé le, aróng eq htên byoq a sê é hkyô lé le, ho é bang lé, Yhang gi, ahtum abyuq é asak byi râ nghut lhê. <sup>8</sup> Nghut

kôlhang, haû yhumsing wuízat hkyô za hô luí, tengmán hkyô lé he-ngik pyám mù, agè ashop hkyô lé cháng bâng é matú gi, nhikmo-yo hkyô eq nhikjum yo hkyô jé râ nghut lhê. <sup>9</sup> Wuíhke hkyô eq iyon yon hkyô gi, agè ashop kut é xângzo byù yuq hkanmó chyáng jé râ nghut lhê; sâng-hi má Yudaq byu pè chyáng jé mù, tûngbaù pè chyáng le jé râ nghut lhê. <sup>10</sup> Nghut kôlhang, hpungwup shingkan, aróng eq nguingón hkyô gi, haû ge é hkyô kut é bang yuq hkanmó chyáng jé râ nghut lhê: sâng-hi má Yudaq byu pè chyáng jé mù, tûngbaù pè chyáng le jé râ nghut lhê. <sup>11</sup> Hkâsu mù gâ le, Garai Gasang gi, myoqdong a hkyin é Sû nghut lhê.

<sup>12</sup> Haû jep é tarâ lé a sê é mara kut shut é bang lhunglhang gi, jep é tarâ dông a nghut é za htên byoq kó râ nghut lhê. Haû jep é tarâ hkaû má mara kut shut é bang lhunglhang gi, jep é tarâ dông jéyáng é hui zo kó râ nghut lhê.\* <sup>13</sup> Hkâsu mù gâ le, haû jep é tarâ lé wó gyô é bang lé, Garai Gasâng é hí má dingmán bang gâ é a nghut é za, jep é tarâ lé châng kut é bang za sheq, dingmán bang gâ é hui râ nghut lhê. <sup>14</sup> Haû jep é tarâ lé a wó é tûngbaù pé gi, jep é tarâ hkyô lé, yhang baú yhang châng nyi kô é hkûn, jep é tarâ lé a wó kôlhang, yhumsing gùng yhumsing é matú tarâ dut bekô nghut ri. <sup>15</sup> Yhangmoq gi, haû jep é tarâ hkyô pé lé, yhangmoq é i-myyit unghkaû má kâ to bê nghut é lé, tûn shit bekô nghut mù, yhangmoq é myit má hkâm zô é hkyô le, haû lé saksé hkâm byi nyi é eq, yhangmoq myit é hkyô gi, ahkuí mara hun kat, ahkuí mara hkyut kat kut nyi ri. <sup>16</sup> Haû hkyô gi, ngò taí pyo é gabú danglù eq rajung za, byu pè é zaú nghop tô é hkyô pé lé, Hkrisduq Yesuq dông mai Garai Gasâng eq tarâ jéyáng é buinyi má dut râ nghut lhê.

#### *Yudaq Byu Pé Eq Jep É Tarâ*

<sup>17</sup> Nghut kôlhang, nàng gi, nàng gûng nàng Yudaq byù rayuq nghut lhê ga mù, haû jep é tarâ lé lumhkau nyi é eq Garai Gasang lé xoq é hkyô má nghutbùn nyi é sù; <sup>18</sup> Yhâng ô nau é hkyô lé sê é eq haû jep é tarâ mhoqshit é hkyô wó yû bê nghut é yanmai, je ahkyak é hkyô lé sê gàm hkoq é sù; <sup>19</sup> haû jep é tarâ má, hpaqchyí eq tengmán hkyo é alik wó sù nghut é yanmai, haû myoqjit bâng é matú hkyô-u shê sù eq mauchut hkaû mâ é bâng é matú maubó nghut sù; <sup>20</sup> byù ngok pé lé mhoqshit sù eq zoshâng wui é sará nghut sù nghut é lé, sê gyô to sù nghut é nghut le gi, <sup>21</sup> nàng, góbang lé mhoq byi sù nhîng, yhumsing gùng yhumsîng a mhoq yû lú? A wó hkau ga hko taí luí nhîng, nàng gi, hkaû lhê a nghut lú? <sup>22</sup> Su-myi sulàng lú hkyô a wó kut ga byu pé lé taí luí nhîng, nàng gi, su-myi sulàng lú hkyô kut lhê a nghut lú? Hparà lhô lé a jú dik sù nàng gi, noqkuq yhûm lé hpýoq zo hpýoq shuq nyi lhê a nghut lú? <sup>23</sup> Jep é tarâ eq séng luí nghutbun sù nàng gi, haû jep é tarâ lé lu laí é dông, Garai Gasang lé a hkungga kut lhê a nghut lú? <sup>24</sup> Haû gi, "Garai Gasâng é myîng gi, nungmoq é yanmai, tûngbaù pè chyáng lhoq hpoí pyâm é huí ri."✠ ga kâ tô é eq rajung za nghut ri.

<sup>25</sup> Haû jep é tarâ lé nàng châng é nghut jáng, ahpyo-kuq hpyit hkyô gi, akyû bò bê nghut ri. Nghut kôlhang, nàng, jep é tarâ lé lu laí é nghut jáng, a hpyit é eq rajung za dut bê nghut ri. <sup>26</sup> Ahpyo-kuq a hpyit kôlhang, jep é tarâ hkyô pé lé châng é bang lé gi, ahpyo-kuq hpyit bê bang dông ge són byi lhê a nghut kó lú? <sup>27</sup> Kâ tô é tarâ lé wó mù, ahpyo-kuq hpyit hkam to gù nghut é, tarâ lu laí é sù nàng lé, gungsho má ahpyo-kuq a hpyit kôlhang, jep é tarâ lé châng é sù gi, mara hûn râ nghut lhê.

<sup>28</sup> Hkâsu mù gâ le, shinggan má za Yudaq byù nghut é sù gi, Yudaq byù kyîng a nghut; gungsho má za ahpyo-kuq hpyit é gi, ahpyo-kuq hpyit kyîng a nghut. <sup>29</sup> Ahte myit hkaû má Yudaq byù nghut sù za, Yudaq byù kyîng nghut lhê. Kâ tô é tarâ dông a nghut é za, Woi-nyí eq myit má ahpyo-kuq hpyit é gi, ahpyo-kuq hpyit kyîng nghut bê. Haû yuq é hkya-on kungtôn hkyô gi, byù mai lo é a nghut, Garai mai lo é ru nghut lhê.

### 3

#### *Garaí É Lhumzui Hkyô*

\* 2:12 Haû jep é tarâ lé a sê bang gâ é gi, tûngbaù pé lé gâ é nghut luí, haû jep é tarâ hkaû má é bang gâ é gi, Yudaq byu pé lé gâ é nghut lhê. ✠ 2:24 Esai 52:5

<sup>1</sup> Haú dông ga jang, Yudaq byù rayuq dut nyi é gi, hai akyû hkâm zo râ lú? Ahpyo-kuq hpyit hkyô gi, hai akyû bò râ lú? <sup>2</sup> Hkyô hkangmó má gyai akyû bò lhê! Je hí má gi, haú Garai Gasâng é mungdang lé yhang, yhangmoq lé ap byi bê nghut ri.

<sup>3</sup> Yhangmoq mâ é ra-am lumjín myit a bo é nghut le gi, hkâsu kó lú? Yhangmoq lumjín myit a bo é yanmai, Garai Gasâng é lhumzui hkyô lé akyû a bò nhâng wó dut râ lú? <sup>4</sup> Hká dông le a wó dut!

"Haú mù, nàng dang taí é hkûn, dingmán é hkyô wó lhoq htoq râ eq,

nàng jéyáng huí é hkûn, ûng râ nghut lhê."☆

ga kê tô é eq rajung za, byù yuq hkangmó gi, byù-mhaú dut kôlhang, Garai Gasang gi, tengmán nyí sháng gaq.

<sup>5</sup> Nghut kôlhang, nga-nhúng é a dingmán hkyô gi, Garai Gasâng é dingmán hkyô lé san za je lhoq htoq shit é nghut lhê; haú nghut jáng, nga-nhúng hkâsu nghû taí râ lú? Nga-nhúng lé Garai Gasang nhikmo-yô é hkyô gi, Yhang a tarâ mù nghut lhê lú? (Ngò gi, byù hkyam dông taí htíng é nghut lhê.) <sup>6</sup> Ratsuí lháng a nghut! Haú su ru nghut le gi, haú mingkan lé, Garai Gasang hkâsu wó jéyáng râ lú? <sup>7</sup> Rayuq yuq, "Ngò mhaú é hkyô gi, Garai Gasang tengmán é hkyô lé lhoq ko jat mù, Yhâng é hpungwup shingkang lé je wó lhoq hu nhang é nghut le nhing, haú mù luí, ngò, yubak byù rayuq dông mara byí é hui zô nyi ra shirâ lú?" ga taí dang-rháng râ nghut lhê. <sup>8</sup> "Ge é hkyô htoq sháng gaq, nga-nhúng, agè ashop hkyô kut sháng." nghû haú mù a taí kê é lú? Dang haú lé ngamoq taí é nghut lhê ga luí, ngamoq lé lumù gansang é dông byù ra-am taí akô. Haú bang gi, mara dam byí é hui zo gíng bang nghut akô.

#### *Dingmán Byù A Nyi*

<sup>9</sup> Haú jáng, hkâsu nghû lo râ lú? Nga-nhúng gi, je gè bang nghut lhê lú? Ratsuí lháng a nghut. Yudaq byù nghut nghut, tûngbaù pé nghut nghut, yubak mara hkaú mâ é bang chyat nghut lhê nghû, ngamoq taí san kyô wú bê nghut lhê. <sup>10</sup> Chyúmdang má kê tô é le,

"Dingmán é byù a nyi, rayuq lháng a nyi nghut ri;

<sup>11</sup> Sê gyô é byù rayuq le a nyi, Garai Gasang lé ho é byù le a nyi nghut ri;

<sup>12</sup> Lhunglháng bang gi, lhing ló byuq bekô; yhangmoq gi, hpau a dap bang chyat dut byuq bekô nghut ri.

Ge é kut sù ó a nyi, rayuq lháng a nyi nghut ri."☆

gâ ri.

<sup>13</sup> "Yhangmoq é hkyung gi, hpông tô é lup pé nghut akô; yhangmoq é shô gi, mhaú akô."☆

"Yhangmoq é nhutwuí pé má gi, shíduq bò lhangmuí é duq dap bum ri."☆

gâ tô ri.

<sup>14</sup> "Yhangmoq é nhut pé gi, nhing myíng nhing htê eq myit nò danghko baú byíng zan tô ri."☆

gâ tô ri.

<sup>15</sup> "Yhangmoq é hkyî pé gi, byù sat sui lhoq htoq râ matú, lawán nau akô;

<sup>16</sup> Yhangmoq sô nyi é hkyô pé gi, htên byoq é eq wúíhkê é ahkô tông tô é nghut mù,

<sup>17</sup> nguingón é hkyô lé gi, yhangmoq a sé kó nghut ri."☆

gâ tô ri.

<sup>18</sup> "Yhangmoq é myoq hí má Garai Gasang lé gyuq hkunggâ é hkyô, a bò kó nghut ri."☆

gâ tô ri.

<sup>19</sup> Byù yuq hkangmó é nhut gi, tû taí jang a joq dut byuq mù, mingkan gón gi, Garai Gasâng é hí má mara bo é bang dut nyi sháng gaq ga, haú jep é tarâ má taí é lhunglháng gi, jep é tarâ ô má nyi é bang lé taí é nghut é hkyô lé, nga-nhúng sê lhê. <sup>20</sup> Haú mù luí, jep é tarâ lé châng é dông mai, ó yuq le, Yhâng é hí má dingmán sù gâ é wó hui râ a nghut; jep é tarâ dông gi, yubak mara bo é hkyô lé wó sê yu é za nghut lhê.

☆ 3:4 Hkya-on 51:4 ☆ 3:12 Hkya-on 14:1-3 ☆ 3:13 Hkya-on 5:9 ☆ 3:13 Hkya-on 140:3 ☆ 3:14 Hkya-on 10:7 ☆ 3:17 Esai 59:7-8 ☆ 3:18 Hkya-on 36:1



*Lumjínng Jáng, Dingmán Sû Wó Dut É Hkyô*

<sup>21</sup> Ahkuí kúm gi, jep é tarâ dông a nghut é za, haú jep é tarâ eq myiqhtoi laiká pé mai saksé hkâm tô é Garai Gasâng chyáng mâ é dingmán hkyô lé, sé nhâng bê nghut ri. <sup>22</sup> Garai Gasâng chyáng mâ é dingmán hkyô haú gi, Yesuq Hkrisduq lé lumjínng é dông mai nghut mù, lumjínng bang banshoq htoq má jé é nghut lhê. Gamhkuí é hkyô a joq. <sup>23</sup> Hkâsu mù gâ le, lhunglhâng bang gi, yubak mara kut shut bê bang chyat nghut mù, Garai Gasâng é hpungwup shingkang lé a hkyit hkap byuq lo kó nghut ri. <sup>24</sup> Ahkuí kúm gi, Hkrisduq Yesuq mai lo é hkyi yù hkyô dông, Garai Gasâng é jejú eq, mara hkyut san byí é láí láí wó hui bê nghut ri. <sup>25</sup> Garai Gasang gi, Yesuq é sui lé lumjínng bâng matú, shíhtái gunglik hkungga ralhúm dông, Yesuq lé byí pyám bê nghut ri. Haú gi, láí lò bê yubak mara lé lhut pyám byi shoq, Garai Gasang myit híng byi bê nghut é yanmai, Yhâng é tengmán hkyô lé tûn shit é nghut ri. <sup>26</sup> Garai Gasang haú su kut é gi, Yhânggùng yhang dingmán Sû nghut é eq, Yesuq lé lumjínng é sù lé mara hkyut san byí é Sû nghut râ matú, ahkuí lhê ipyat má, Yhâng é tengmán hkyô lé shit byí é nghut lhê.

<sup>27</sup> Haú su nghut jáng, nghutbun jowò joq ri lú? A joq. Hai tarâ mai a joq dut byuq é lú? Haú jep é tarâ châng é yanmai nghut lhê lú? A nghut, lumjínng hkyô é yanmai sheq a joq dut byuq é nghut lhê. <sup>28</sup> Hkâsu mù gâ le, byù gi, haú jep é tarâ châng é dông a nghut é za, lumjínng luí, mara hkyut san byi huí é hkyô lé, ngamoq lum nyi lhê. <sup>29</sup> Garai Gasang gi, Yudaq byu pé é Garai Gasang za nghut lhê lú? Tûngbaù pé é Garai Gasang le a nghut lú? Nghut lhê, tûngbaù pé é Garai Gasang le nghut lhê. <sup>30</sup> Hkâsu mù gâ le, Garai Gasang gi, rayuq za nghut é yanmai, rajung za lumjínng luí, ahpyo-kuq hpyit hkam é bang lé le, ahpyo-kuq a hpyit é bang lé le, Yhang, mara hkyut san byi râ nghut lhê. <sup>31</sup> Haú nghut jáng, nga-nhúng gi, lumjínng myit hau eq, jep é tarâ lé lhoq hpoí pyám râ lú? Ratsuí lháng a nghut! Nga-nhúng gi, jep é tarâ haú lé lhoq ging tîng é bang ru nghut lhê.

## 4

*Abraham, Mara Hkyut San Huí É Hkyô*

<sup>1</sup> Haú su nghut jáng, nga-nhúng é íchýí îwa Abraham gi, haú hkyô mai haí wó sê yu ri nghú, taí râ lú? <sup>2</sup> Abraham gi, zui saí é dông mai, mara hkyut san byi huí é ru nghut le gi, yhang nghutbun jang joq râ nghut lhê; nghut kôlhâng, Garai Gasâng é hí má gi, yhang haú dông a nghut. <sup>3</sup> Chyúmdang má hkâsu gâ tô ri lú gâ le, "Abraham gi, Garai Gasang lé lumjínng bê nghut mù, yhang lé, dingmán sù ga són byi bê nghut ri."✠ gâ ri.

<sup>4</sup> Zui saí é sù gi, yhâng é zuihpau lé, chyunghuq dông wó yu é a nghut é za, wó yù gíng luí, wó yu é ru nghut lhê. <sup>5</sup> Nghut kôlhâng, zui saí é hkyô dông a nghut é za, haú agè ashop hkyô lé mara hkyut san byí é Garai Gasang lé lumhkau é sù gi, yhâng é lumjínng myit é yanmai, dingmán sù ga són byi huí é nghut lhê. <sup>6</sup> Haú eq rajung za, yhang zui saí é hkyô dông a nghut é za, Garai Gasâng eq dingmán sù ga són byi huí é, Garai Gasâng chyáng mâ é shimân jeju wó é sù eq séng luí, Dawiq taí é gi,

<sup>7</sup> "Tarâ lu láí é lé mara hkyut pyám byi huí é eq yubak mara lé nghop pyám byi huí é bang gi, hkungsô wó nyi ri.

<sup>8</sup> Bo tô é mara lé, Yhumsing eq mara a són byí é hui sù gi, hkungsô wó nyi ri."✠ gâ ri.

<sup>9</sup> Haú sù é jeju gi, ahpyo-kuq hpyit hkâm bâng é matú za nghut lhê lú? Ahpyo-kuq a hpyit bâng é matú le nghut lhê lú? Hkâsu mù gâ le, Abraham é lumjínng myit lé, dingmán sù ga són byi bê nghut lhê nghú, ngamoq taí nyi bê nghut lhê. <sup>10</sup> Haú su són byí é gi, hkâ-nhám nghut lhê lú? Ahpyo-kuq hpyit hkâm é htâng má lú? A nghut jáng, hí má lú? Haú gi, ahpyo-kuq hpyit hkâm é htâng má a nghut é za, hí má ru nghut lhê. <sup>11</sup> Hau htoq agó, Abraham gi, yhang, ahpyo-kuq hpyit a hkam yù shí é hkûn mai, lumjínng luí wó é dingmán hkyô gâ é dizik nghut é, ahpyo-kuq hpyit masat lé myang hkam yù bê nghut ri. Haú mù, yhang gi, haú ahpyo-kuq hpyit a hkam yù kôlhâng, lumjínng é lhunglhâng

bang lé dingmán bang ga són byî é wó hui râ matú, haú bâng é îwa dut bê nghut ri. <sup>12</sup> Haú ahpyo-kuq hpyit hkâm é za a nghut, nga-nhông é îwa Abraham, ahpyo-kuq hpyit a hkam yù shi má wó é lumjúng hkyô é hkyî-kám lé cháng luí ahpyo-kuq hpyit bâng é îwa le, yhang nghut ri.

<sup>13</sup> Míngkân é amyû hkúng xoq pé dut râ ga, Abraham eq yhâng é awut ashín pé lé byi tô é danggidiq gi, jep é tara é yanmai a nghut é za, lumjúng hkyô mai lo é dingmán hkyô dông ru nghut lhê. <sup>14</sup> Hkâsu mù gâ le, jep é tarâ dông nyi yap é bang gi, amyû hkúng xoq pé nghut é nghut jáng, lumjúng hkyô gi, akyû a bo é eq, danggidiq gi, hpau a dap é dut byuq lhê. <sup>15</sup> Haú jep é tarâ gi, nhikmo-yo hkyô lhoq htoq é nghut lhê; nghut kôlhang, jep é tarâ a joq jáng gi, tarâ lu lai hkyô le joq râ a nghut.

<sup>16</sup> Haú mù luí, danggidiq gi, Abraham é awut ashín lhunglhang bâng chyáng, jeju mai za lo é eq gingtítng nyi é dut sháng gaq ga, lumjúng hkyô mai lo é nghut lhê. Haú gi, jep é tarâ má lòm bâng é matú baú za a nghut, Abraham é lumjúng hkyô má lòm bâng é matú le nghut lhê. Abraham gi, nga-nhông lhunglhang bâng é îwa nghut ri. <sup>17</sup> "Ngò gi, nang lé, byù myû myo myô é îwa dut nhâng bê." <sup>✠</sup> ga kê tô é eq rajung za, haú shi byuq bê bang lé wó lhoq dui é eq a joq wú é zè lé joq shoq wó kut é, yhang lumjúng é sù Garai Gasâng hí má, Abraham gi, nga-nhông é îwa nghut lhê.

<sup>18</sup> "Náng é awut ashín pé le, haú eq rajung za myô lò râ nghut lhê." <sup>✠</sup> ga yhang lé taí kyô to bê eq rajung za, yhang gi, myit myoqbyù jowò haí a joq kôlhang, lumjúng luí myoqbyu nyi é nghut mù, byù myû myo myô é îwa dut bê nghut ri. <sup>19</sup> Yhang gi, rashô zàn kê jé byuq bê nghut mù, yhanggùng gi, shi é gyá dut é hui zô é eq Sarah é zoyhûm shibò le shum byuq kôlhang, yhang gi, lumjúng myit a yom byuq nghut ri. <sup>20</sup> Hau htoq agó, Garai Gasâng é danggidiq eq séng luí, a lumjúng a dut é eq hê myit mhô myit a dut é za, yhâng é lumjúng myit lé saí lhoq ging títng mù, Garai Gasang lé hkya-on kungtôn luí, <sup>21</sup> Garai Gasang gi, Yhang byî tô é danggidiq eq rajung za wó kut râ a-tsam bò sù nghut é lé, yhang myit zing nyi ri. <sup>22</sup> Hau é yanmai, "Yhang lé, dingmán sù ga són byi bê nghut ri." <sup>✠</sup> gâ tô é nghut lhê. <sup>23</sup> "Yhang lé, són byi bê." ga, kê tô é dang gi, yhang é matú za a nghut, <sup>24</sup> nga-nhông é Yhumsîng Yesuq lé, shi é mai lhoq dui toq yû sù Garai Gasang lé lumjúng luí, Yhang eq dingmán bang ga són byi râ nghut é, nga-nhông é matú le nghut lhê. <sup>25</sup> Yhumsîng Yesuq gi, nga-nhông é yubak marâ é matú, shî hkám byi râ dông ap pyâm é hui luí, nga-nhông, mara hkyut san byî é hui râ matú, lhoq dui toq é hui bê nghut ri.

## 5

### *Nguingón Hkyô Eq Gabú Hkyô*

<sup>1</sup> Haú mù luí, nga-nhông gi, lumjúng é dông mai mara hkyut san byî é hui bê nghut é yanmai, nga-nhông é Yhumsîng Yesuq Hkrisduq dông, Garai Gasang eq buinùm wó xoq yû bê nghut lhê. <sup>2</sup> Yesuq é yanmai, nga-nhông gi, ahkuí wó yu to bê jeju shî má, lumjúng luí wó wâng bê nghut mù, Garai Gasâng é hpungwup shingkang lé myoqbyù luí gabú gumrong nyi lhê. <sup>3</sup> Haú za a nghut, nga-nhông gi, wuîhke jamjau hkyô pé má le gabú gumrong nyi lhê. Hkâsu mù gâ le, wuîhke jamjau hkyô gi, hkam jan hkyô lhoq htoq ri; <sup>4</sup> hkam jan hkyô gi, myit a-tsam lhoq htoq lhê; myit a-tsam gi, myoqbyu to hkyô lhoq htoq é lé, nga-nhông sê lhê. <sup>5</sup> Myoqbyu to hkyô haú gi, nga-nhông lé myit wum gyui nhang é a nghut; hkâsu mù gâ le, Garai Gasang gi, Yhâng é chyitdap myit lé, Yhang mai, nga-nhông lé byî tô é Chyoiyúng Woi-nyí dông, nga-nhông é i-myit unghkaú má hut kat byi bê nghut ri.

<sup>6</sup> Hkâsu mù gâ le, nga-nhông gi, a-tsam a bò dut tô ashî u lé, ahkyíng hkyak má yhang, Hkrisduq gi, yubak dap bang nghut é nga-nhông é matú shî hkám byi bê nghut ri. <sup>7</sup> Gè gè ga jáng, dingmán su é matú shî hkám byi râ byù gi, shau râ nghut lhê; nghut kôlhang, byù gè rayuq é matú kúm gi, wám shî hkâm é byù nyi sê lhê. <sup>8</sup> Nghut kôlhang, nga-nhông

gi, yubak dap bang nghut nyi ashî hkûn, nga-nhông é matú Hkrisduq shî hkám byî é má, Garai Gasang gi, Yhâng é chyitdap myit, nga-nhúng lé shit byi bê nghut ri.

<sup>9</sup> Nga-nhúng gi, ahkuí, Yhâng é sui mai mara hkyut san byî é hui bê nghut mù, Yhâng é yanmai, Garai Gasâng é nhikmo-yo hkyô mai, hkyi yu é je riyhang hui râ nghut lhê. <sup>10</sup> Hkâsu mù gâ le, nga-nhúng gi, Garai Gasâng é gyè pé nghut nyi ashî u le, Yhâng Zo shî hkám byî é đông, Garai Gasang eq buinùm wó xoq yu é hui bê nghut lhê. Wó xoq yu to bê nghut jáng, nga-nhúng gi, Yhâng é asak đông mai, gè gè yhang hkyi yu é hui râ nghut lhê. <sup>11</sup> Haû su za a nghut, nga-nhúng gi, nga-nhông é Yhumsîng Yesuq Hkrisduq đông mai, buinùm wó xoq yu é jeju lé, ahkuí wó yu to bê nghut mù, Yhâng é yanmai, Garai Gasang má le, gabú gumrong nyi lhê.

*Shi É Gi, Adam É Yanmai, Dui É Asak Gi, Hkrisduq É Yanmai*

<sup>12</sup> Byù rayuq đông mai, yubak mara gi, mingkan má jé wâng bê nghut luí, shî-nò hkyô gi, yubak marâ é yanmai châng jé bê nghut ri; haú đông mai, byù lhunglhang bang gi, yubak dap bang chyat nghut byuq mù, shî-nò hkyô gi, byù lhunglhang bâng chyáng jé bê nghut ri. <sup>13</sup> Hkâsu mù gâ le, haû jep é tarâ lé a byi shimá, yubak mara gi, mingkan má joq to bê nghut lhê. Nghut kôlhang, jep é tarâ a joq shî é hkûn gi, yubak mara lé mara su a ngàm shî é nghut lhê. <sup>14</sup> Haû su ga kôlhang, Adam su hkunmó lé lu lai é đông mara a kut shut bâng é ahtoq má lhang, shî-nò hkyô gi, Adâm é ipyat mai Mosheq é ipyat jé shoq up nyi bê nghut ri. Adam gi, jé lé lò râ su é azông nghut ri.

<sup>15</sup> Nghut kôlhang, jeju chyunghuq gi, haû mara kut shut é hkyô su a nghut; hkâsu mù gâ le, mara kut shut é byù rayuq é yanmai, byù myo myo shi pyâm é nghut le gi, Garai Gasâng jeju eq Yesuq Hkrisduq gâ é byù rayuq é jeju mai lo é chyunghuq gi, byù myo myô é htoq má hkâ-í yhang byíng mui nyi ri-nhung! <sup>16</sup> Garai Gasâng jeju chyunghuq gi, byù rayuq kut é yubak mara su a nghut; hkâsu mù gâ le, tarâ jéyáng é hkyô gi, byù rayuq é mara má cháng mù, mara dam byî é hkyô lhoq htoq é nghut lhê; nghut kôlhang, jeju chyunghuq gi, tarâ lu lai bang myo myo má cháng mù, mara hkyut san byi hkyô lhoq htoq é nghut lhê. <sup>17</sup> Hau htoq agó, byù rayuq tarâ lu lai luí, haû rayuq é yanmai, shî-nò hkyô up nyi bê nghut lhê, ahkuí kúm, haû Garai Gasâng é agùn agó shimân jeju eq dingmán hkyo é chyunghuq lé hap yu é bang gi, Yesuq Hkrisduq gâ é byù rayuq đông mai, je riyhang asak duì hkyô má uphkanng nyi kó râ nghut lhê.

<sup>18</sup> Haû mù luí, tarâ lu lai é hkyô ralhôm é yanmai, byù lhunglhang bang gi, mara dam byî é hui zo kô é su, dingmán hkyo é muzó ralhôm é yanmai, byù lhunglhang bang gi, asak duì hkyô eq sêng é mara hkyut san byi hkyô lé wó bê nghut ri. <sup>19</sup> Hkâsu mù gâ le, byù rayuq jîno a gyô é yanmai, myo myo gi, yubak dap bang dut byuq é su, byù rayuq jîno gyô é yanmai, myo myo gi, dingmán bang gâ é hui kó râ nghut lhê.

<sup>20</sup> Haû jep é tarâ jat é gi, tarâ lu lai hkyô je myo râ matú nghut lhê. Nghut kôlhang, yubak mara myô jat é hkûn, jeju gi, je riyhang myô jat lo é nghut lhê. <sup>21</sup> Haû mù, yubak mara gi, shî-nò hkyô đông uphkanng bê su, jeju gi, nga-nhông é Yhumsîng Yesuq Hkrisduq é yanmai, ahtum abyuq é asak wó byî é dingmán hkyô đông up râ nghut lhê.

6

*Hkrisduq Eq Rading Ralhum*

<sup>1</sup> Haû nghut jáng, nga-nhúng gi, hkâsu nghû taí râ lú? Jeju myô jat lò sháng gaq nghû, nga-nhúng, yubak mara kut xoq nyi râ lú? <sup>2</sup> Haû su a nghut sháng gaq! Nga-nhúng gi, yubak mara eq shi gang bê bang nghut lhê; hkâsu mù haú má wó dui nyi lo râ lú? <sup>3</sup> Hkrisduq Yesuq eq rading ralhum za dut râ matú, wui-myhup hkâm yù bê bang nga-nhúng banshoq gi, Yhâng é shî hkám hkyô má le rading ralhum za dut râ matú, wui-myhup hkâm yù bê nghut é lé, nungmoq a sé kó lú? <sup>4</sup> Haû mù luí, Hkrisduq gi, Îwâ é hpungwup shingkâng èq, shî bê mai lhoq dui toq huí é su, nga-nhúng le, asak asik đông wó dui nyi sháng gaq nghû, nga-nhúng gi, wui-myhup hkâm é đông, Yhang eq rahá, shî hkâm é eq myhup yhum é hui bê nghut lhê.

<sup>5</sup> Nga-nhúng gi, Yhang shî hkám é hkyô má, Yhang eq rading ralhú za dut bê nghut jáng, Yhâng é dum dui toq hkyô má le, Yhang eq rading ralhú za hkyak dut râ nghut lhê. <sup>6-7</sup> Hkâsu mù gâ le, shî bê sù gi, yubak mara mai lhoq lhut é hui bê nghut é yanmai, nga-nhúng gi, yubak marâ é jùn dut nó a ra lo mù luí, yubak mara gùng gi, lhoq htên pyâm é hui râ matú, nga-nhúng é byù xau gi, Yhang eq rahá jén sat pyâm é hui bê nghut é hkyô lé, nga-nhúng sê lhê.

<sup>8</sup> Haù mù, nga-nhúng gi, Yhang eq rahá shî hkám bê nghut jáng, Yhang eq rahá dui nyi râ nghut lhê nghû, lumjínghê. <sup>9</sup> Hkâsu mù gâ le, Hkrisduq gi, shî bê mai lhoq dui toq é hui bê nghut mù, Yhang gi, dum wó shi lo râ a nghut é lé, nga-nhúng sê lhê; shî-nò hkyô gi, Yhang lé hkâ-nhám le wó sing to râ a nghut lo. <sup>10</sup> Yhang shî hkám é shî-nò hkyô gi, banshoq bâng é matú, yubak mara eq séng luí radàm za shî hkám byi bê nghut ri; nghut kôlhang, Yhang dui nyi é asak gi, Garai Gasâng hí má dui nyi é nghut lhê.

<sup>11</sup> Haù eq rajung za, nungmoq gi, yubak mara eq shi gang luí, Hkrisduq Yesuq dông Garai Gasâng é matú asak dui nyi lhê nghû, sôn yù keq. <sup>12</sup> Haù mù luí, nungmoq é htên byoq sê é gungdu má, yubak mara lé hkâ-uphkàng nhâng, uphkàng nhâng kô é nghut jáng, gungdu yut yut ô nau é agè ashop hkyô lé, nungmoq châng é nghut bê. <sup>13</sup> Nungmoq é gungdu showui showang pé lé, agè ashop hkyô é chùng zè pé dông yubak mara má hkâ-ap byi pyám kó, shî bê mai lhoq dui toq yù huí é bang su, yhumsing gùng yhumsing, Garai Gasâng chyáng kúm ap byi keq; nungmoq é gungdu showui showang pé lé, dingmán hkyô é chùng zè pé dông, Garai Gasâng chyáng ap byi keq. <sup>14</sup> Hkâsu mù gâ le, nungmoq gi, jep é tarâ hkaù má a nghut lô é za, jeju hkaù má nghut nyi bekô yanmai, yubak mara gi, nungmoq lé sîng sù wó dut râ a nghut lo.

#### *Dingmán Hkyô É Jùn Pé*

<sup>15</sup> Haù jáng gi, hkâsu kó lú? Nga-nhúng gi, jep é tarâ hkaù má a nghut lo é za, jeju hkaù má nghut nyi bekô yanmai, mara wó kut shut kó râ lú? Haù su a wó kut! <sup>16</sup> Nungmoq gi, rayuq yuq é jino gyo râ matú, yhumsing gùng lé jùn pé dông ap pyâm é hkûn, shî-nò hui râ nghut é yubak marâ é jùn dông nghut kôlhang, dingmán hkyô wó râ nghut é jino gyo hkyô nghut kôlhang, nungmoq châng nyi é nghut le gi, nungmoq, haù é jùn dut bê lé, a sé kó lú? <sup>17</sup> Nungmoq gi, yubak marâ é jùn dut wú bê bang nghut kôlhang, nungmoq hkam yu to bê mhoqshit hkyô lé, nungmoq é myit nhiklhú banshoq eq cháng bekô nghut é yanmai, Garai Gasâng lé jeju hkyá-on sháng. <sup>18</sup> Nungmoq gi, yubak mara mai lhoq lhut é hui bang nghut kômù, dingmán hkyô é jùn dut bekô nghut ri.

<sup>19</sup> Nungmoq gi, sê gyô é nyan má wum nyhôm é bang nghut kô é yanmai, byu pé sê gyo râ dông ngò tái râ ga jáng: nungmoq gi, nungmoq é gungdu showui showang pé lé, a sansêng é hkyô eq agè ashop hkyô myô jat nhang é má jùn dông lhang ap byi wú bekô nghut é su, ahkuí gi, chyoiyúng hkyô wó yù râ matú, haù pé lé, dingmán hkyô má jùn dông ap byi keq. <sup>20</sup> Nungmoq gi, yubak marâ é jùn dut nyi kô é hkûn, dingmán hkyô eq uphkang é mai lut nyi kô é nghut lhê. <sup>21</sup> Ahkuí, nungmoq hoqjung nghû wú htoq é pé gi, haù u lé, hai akyú wó yù kô é lú? Hau pé gi, shi byuq é má htúm é chyat nghut ri. <sup>22</sup> Nghut kôlhang, ahkuí gi, nungmoq, yubak mara mai lhoq lhut é hui bekô nghut mù, Garai Gasâng é jùn dut bekô nghut ri; hau é akyú gi, chyoiyúng hkyô wó yu é nghut mù, ahtum abyuq é asak wó râ nghut lhê. <sup>23</sup> Hkâsu mù gâ le, yubak marâ é ahpau gi, shi é hkyô nghut ri; nghut kôlhang, Garai Gasâng é chyunghuq gi, nga-nhúng é Yhumsing Hkrisduq Yesuq é yanmai, ahtum abyuq é asak nghut ri.

## 7

#### *Tarâ Mai Lut É Hkyô*

<sup>1</sup> Gumang wui ê, ngò gi, tarâ lé sê é bang nungmoq lé tái nyi lhê: haù tarâ gi, byù rayuq lé, yhang, asak dui nyi é u lé za wó uphkang é lé, nungmoq a sé kó lú? <sup>2</sup> Dangké, ikun wàng bê myiwe myhí rayuq gi, yhâng é yhumsing hpó asak dui nyi é ahkyíng má, tarâ eq up zing tô é hui ri; nghut kôlhang, yhâng é yhumsing hpó shi byuq é nghut jáng gi, haù

ikun wàng tarâ mai, yhang wó lut bê nghut ri. <sup>3</sup> Haû nghut é yanmai, yhang é yhumsîng hpó asak dui nyi ashî u lé, yuqgè góyuq eq hâng lhûm é nghut jáng gi, yhang lé, sulàng lú sù ga kó râ nghut lhê. Nghut kôlhang, yhang é yhumsîng hpó shi byuq é nghut jáng gi, yhang, tarâ haû mai lut bê nghut luí, yuqgè góyuq eq hâng lhum kôlhang, sulàng lú sù a nghut lo.

<sup>4</sup> Haû mù luí, ngá é gumang wuê ê, nungmoq le, haû shi byuq é mai lhoq dui toq yù hui bê sù Yuqgè chyáng wó xoq mù, nga-nhúng gi, Garai Gasang lé ashi wó zui byi sháng gaq ga, Hkrisduq é gungdu dông mai, jep é tarâ eq shi gang bê nghut lhê. <sup>5</sup> Hkâsu mù gâ le, nga-nhúng, yubak gungsho má nghut nyi é hkûn, nga-nhúng gi, shî-nò hkyo é ashi zui sháng gaq ga, jep é tarâ é yanmai htoq lo é yubak yut yut ô nau é hkyô gi, nga-nhúng é gungdu pé má mù zui nyi é nghut lhê. <sup>6</sup> Nghut kôlhang, ahkuí gi, nga-nhúng lé up zing tô é jep é tarâ eq shi gang bê nghut mù, jep é tarâ mai lut bê nghut é yanmai, kê tô é hkyô xau dông a nghut é za, Woi-nyí é hkyô sik dông nga-nhúng dojaú nyi é nghut lhê.

### *Jep É Tarâ Eq Yubak Mara*

<sup>7</sup> Haû jáng, nga-nhúng hkâsu taí râ lú? Jep é tarâ gi, yubak mara nghut lhê lú? Ratsuí lhang a nghut! Gè gè ga jáng, haû jep é tarâ dông mai za a nghut le, yubak mara lé, ngò wó sê é a nghut. Hkâsu mù gâ le, "myoqnoq myit hkâbô"<sup>☆</sup> ga jep é tarâ má a taí tô é nghut jáng, myoqnoq é hkyô lé, ngò sé râ a nghut. <sup>8</sup> Nghut kôlhang, yubak mara gi, hkunmó é ahkáng lé chûng mù, ngò má myoqnoq hkyô jung hkangmó lhoq htoq byî ri; hkâsu mù gâ le, jep é tarâ hkaû má a nghut jáng, yubak mara gi, shi é za nghut lhê. <sup>9</sup> Ngò gi, tarâ hkaû má a nghut é za asak dui wú bê nghut lhê; nghut kôlhang, haû hkunmó htoq lô jáng, yubak mara gi, dui lò mù, ngò gi, shî bê nghut lhê. <sup>10</sup> Haû mù luí, asak dui nhâng râ matú nghut é hkunmó haû gi, shî-nò hkyô dut byuq é lé, ngò wó sê é nghut lhê. <sup>11</sup> Hkâsu mù gâ le, yubak mara gi, hkunmó é ahkáng lé chûng mù, ngo lé mhaû yù luí, hau eq ngo lé shî nhang ri. <sup>12</sup> Hau pé lé wú jáng, jep é tarâ gi, chyoiyúng ri; haû hkunmó gi, chyoiyúng, dingmán é eq ge é nghut ri.

<sup>13</sup> Haû nghut jáng, ge é hkyô haû gi, ngá é matú shî-nò hkyô dut byuq bê lú? Haû dông a nghut! Nghut kôlhang, yubak mara lé gi, yubak mara dông hkyak wó lhoq htoq shit râ matú, haû ge é hkyô dông mai, yubak mara gi, ngò má shî-nò hkyô lhoq htoq bê nghut luí, yubak mara gi, gè gè yhang agè ashop dut é lé, hkunmó dông mai tân shit é nghut lhê.

<sup>14</sup> Hau htoq agó, jep é tarâ gi, woi-nyí eq sêng é hkyô nghut é lé, nga-nhúng sê lhê; nghut kôlhang, ngò má gi, gungsho eq sêng é hkyô za bo é nghut luí, yubak mara má jùn dông ung zô é hui bê nghut lhê. <sup>15</sup> Ngò haí kut nyi é hkyô lé, ngò a sé. Hkâsu mù gâ le, ngò kut nau é hkyô lé gi, a kut é za, ngò a jú é hkyô lé kut é yanmai nghut lhê. <sup>16</sup> Ngò a kut nau é lé kut é nghut jáng gi, haû jep é tarâ ge é lé, ngò myit huí é nghut lhê. <sup>17</sup> Ahkuí gi, haû lé ngò yhang kut nyi é a nghut lo, ngò má lúng tô é haû yubak sheq kut é ru nghut lhê. <sup>18</sup> Ngò má, nghut bê, ngá é yubak gungsho má ge é hkyô haí le a bo é lé, ngò sê lhê. Hkâsu mù gâ le, ge é hkyô lé kut nau é myit ngò má bò kôlhang, haû lé a wó kut htoq nghut ri. <sup>19</sup> Hau é yanmai, ngò kut nau é ge é hkyô lé gi, a kut é za, ngò a kut nau é agè ashop hkyô lé gi, ngò xoq kut nyi ri. <sup>20</sup> Ahkuí, a kut nau é hkyô lé ngò kut nyi é nghut jáng, haû lé ngò yhang kut nyi é a nghut lo é za, ngò má lúng tô é haû yubak sheq haû lé kut nyi é ru nghut lhê.

<sup>21</sup> Haû mù, ge é hkyô lé ngò kut nau é hkûn, ngò má agè ashop hkyô htoq lô lô mù é tarâ lé, ngò myang ri. <sup>22</sup> Hkâsu mù gâ le, ngò gi, Garai Gasang é tarâ lé, ngá é i-myt unghkaû má myit nguì gabú nyi lhê. <sup>23</sup> Nghut kôlhang, ngá é gungdu showui showang pé má bo é gotû tarâ gi, ngá é i-myt tarâ eq majan zân lhûm é nghut luí, ngá é gungdu showui showang hkaû má mù zui nyi é yubak é tarâ má, ngo lé shúmbyû dut nhang é lé, ngò myang ri. <sup>24</sup> Ngò gi, shogyo rayhup dut sù nghut ri-nhung! Shî nhang é gungdu shî

☆ 7:7 Htoq Ló 20:17

mai, ó yuq wá, ngo lé wó hkyi yù râ l hú? <sup>25</sup> Nga-nhúng é Yhumsîng Yesuq Hkrisduq dông mai wó lut bê nghut mù, Garai Gasang lé jeju hkyâ-ôn nyi lhê!

Haû mù luí, ngò yhang, myit é dông gi, Garai Gasâng é tarâ lé châng lhê, nghut kôlhang, yubak gungsho dông gi, yubak é tarâ lé châng lhê.

## 8

*Haû Woi-nyí Mai Asak Dui É Hkyô*

<sup>1</sup> Haû mù luí, ahkuí, Hkrisduq Yesuq má nghut nyi bâng é matú gi, mara byí é hkyô a joq lô é nghut lhê. <sup>2</sup> Hkâsu mù gâ le, asak dui hkyô eq sêng é Woi-nyí é tarâ gi, Hkrisduq Yesuq dông, yubak mara eq shî-nò hkyo é tarâ mai, ngo lé lhoq lhut yû bê nghut lhê. <sup>3</sup> Haû jep é tarâ gi, yubak gungshô é yanmai, wum nyhóm luí a wó kut é hkyô lé, Garai Gasang gi, yubak mara hkungga dut nhâng râ matú, yubak byu é gungghyâng dông, Yhang Zo sîng lé nhang kat é dông kut pyám bê nghut ri. <sup>4</sup> Haû mù, Garai Gasang gi, yubak gungsho dông asak a dui é za Woi-nyí dông asak dui bang nghut é nga-nhúng má, haû jep é tarâ má bo é hkyô pé lé, wó lhoq dik râ matú, gungsho ralhum má, mara lé doqdân pyám bê nghut ri.

<sup>5</sup> Haû yubak gungsho dông asak dui é bang gi, gungsho yut yut ô nau é hkyô pé lé myit zuq nyi akô; haû Woi-nyí dông asak dui é bang kúm gi, Woi-nyí ô nau é hkyô pé lé myit zuq nyi akô nghut ri. <sup>6</sup> Haû yubak byu é myit gi, shi é hkyô nghut ri; haû Woi-nyí eq hking to huí su é myit kúm gi, asak eq nguingón hkyô nghut ri. <sup>7</sup> Haû yubak myit gi, Garaí é tarâ ô má a nyi é htoq agó, haû lé a wó cháng kut é yanmai, Garaí é gyè nghut ri. <sup>8</sup> Haû yubak gungshô eq hking tô é hui bang gi, Garai Gasang lé a wó gabú nhâng kó nghut ri.

<sup>9</sup> Nghut kôle, Garai Gasâng é Woi-nyí gi, nungmoq chyáng lúng nyi bê nghut jáng, nungmoq gi, haû yubak gungshô eq hking to huí é bang a nghut lô é za, Woi-nyí eq hking to huí é bang nghut akô. Rayuq yuq gi, Hkrisduq é Woi-nyí lé a wó é nghut jáng, Hkrisduq eq a sêng é sù nghut lhê. <sup>10</sup> Nghut kôlhang, nàng má Hkrisduq nyi nyi é nghut jáng, náng é gungdu gi, yubak marâ é yanmai shî kôlhang, náng é woi-nyí gi, dingmán hkyo é yanmai dui nyi ri. <sup>11</sup> Hau htoq agó, Yesuq lé shi é mai lhoq dui toq yû Su é Woi-nyí gi, nungmoq má nyi nyi é nghut jáng, Hkrisduq Yesuq lé shi é mai lhoq dui toq yû Sû gi, nungmoq má nyi nyi é, Yhâng é Woi-nyí dông mai, nungmoq é, shî sê é gungdu pé lé le, asak dui nhâng râ nghut lhê.

<sup>12</sup> Haû mù luí, Gumang wuê ê, nga-nhúng gi, yubak gungsho dông asak dui râ matú, wò wó é bang a nghut. <sup>13</sup> Hkâsu mù gâ le, haû yubak gungsho dông asak dui kô é nghut jáng, nungmoq gi, shî râ nghut lhê; nghut kôlhang, haû gungshô é shut shaí hkyô lé, Woi-nyí eq sat pyám kô é nghut jáng, nungmoq gi, asak dui râ nghut lhê. <sup>14</sup> Garaí Gasâng é Woi-nyí eq shuî u é hui bang gi, Garaí Gasâng é yhangzô pé nghut lhê. <sup>15</sup> Hkâsu mù gâ le, nungmoq gi, gyuq râ matú, nungmoq lé jùn dum taû dut nhang é woi-nyí lé, a hap yu é za, nga-nhúng lé zo yín yu é Woi-nyí lé hap yu tô é bang ru nghut lhê; haû mù, nga-nhúng gi, Yhang é yanmai, "Aba,\* Âwa ê" nghû wut é nghut lhê. <sup>16</sup> Nga-nhúng gi, Garaí Gasâng é yhangzô pé nghut é lé, Woi-nyí haû gi, nga-nhúng é woi-nyí eq rahá saksé hkâm nyi ri. <sup>17</sup> Ahkuí, nga-nhúng gi, zo wuî nghut bê yanmai, Hkrisduq eq rahá, Garaí Gasâng é amyû hkûngxoq pé wó dut é nghut lhê. Nga-nhúng gi, Hkrisduq é wuîhke jamjau pé lé, gè gè yhang bo hui zô é nghut jáng, Yhâng é hpungwup shinggang lé le, bo myang hkam yù râ nghut lhê.

*Htângnùng Lhê É Hpungwup Shinggang*

<sup>18</sup> Nga-nhúng é ahkuí lhê é wuîhke jamjau hkyô pé gi, nga-nhúng lé shit râ nghut é hpungwup shinggang eq whuí râ a gingdân nghû, ngò wó myit ri. <sup>19</sup> Haû hpan to huí é lhunglhang gi, Garaí Gasâng é yhangzô pé lé lhoq htoq shit byi râ lé, gyai yhang myit lánng nyi akô nghut ri. <sup>20</sup> Hkâsu mù gâ le, haû hpan to huí é lhunglhang gi, akyû a bo é

\* 8:15 Aba gâ é gi, Aramaik dang dông "âwa" gâ é lichyúm nghut lhê.

chyat dut byuq bê nghut ri. Haû gi, yhumsîng hkyin yu é dông a nghut é za, haû su dut nhâng Sû ô nau é dông kut é nghut ri. <sup>21</sup> Haû hpan to huí é lhunglhang gi, htên byoq byuq râ matú shúm dut é mai lhoq lhut é hui luí, Garai Gasâng é yhangzo pé é hpungwup bo é luthkyô má wó wâng râ matú, myoqbyu tô é nghut lhê.

<sup>22</sup> Haû hpan to huí é lhunglhang gi, ahkuí hkyíng jé shoq, zohkû-nò no é su nò-kying kyíng nyí kô é lé, nga-nhúng sê lhê. <sup>23</sup> Haû pé za a nghut, Woi-nyí é sâng-hi ashi† lé wó yû bê bang nga-nhúng le, zo pé dông yín yu é jeju lé láng uchyang, i-myt unghkaû má nò-kying kyíng é nghut lhê. Zo pé dông yín yu é jeju haû gi, nga-nhúng é gungdu hkyi xe yû hkyô nghut lhê. <sup>24</sup> Hkâsu mù gâ le, nga-nhúng gi, myit myoqbyu hkyô haû mai hkyi yu é hui bê nghut lhê. Nghut kôlhang, byu-myang é lé myit myoqbyu é gi, myit myoqbyu é hkyô ratsuí le a nghut. Yhumsîng myang to bê é lé, ó yuq wá myit myoqbyu shirâ lhú? <sup>25</sup> Nghut kôlhang, nga-nhúng gi, a wó shí é lé myit myoqbyu é nghut jáng, myit hîng hîng kut láng é nghut lhê.

<sup>26</sup> Haû eq rajung za, Woi-nyí gi, nga-nhúng wum nyhôm é hkyô má garúm byí ri. Nga-nhúng gi, haí dung râ é lé a sé kôlhang, haû Woi-nyí yhang gi, dang mai a wó taí htoq é nò-kying htê dông, nga-nhúng é matú bo dúng xoq byí ri. <sup>27</sup> Nga-nhúng é i-myt unghkaû lé gôn wú é Sû gi, haû Woi-nyí myit é hkyô lé sê lhê, hkâsu mù gâ le, haû Woi-nyí gi, Garai Gasang ô nau é dông, sân-yúng bâng é matú bo dúng xoq byí ri.

#### *Banshoq Lé Je Wó Ung Pyám Râ Hkyô*

<sup>28</sup> Garai Gasang gi, Yhang myit sôn tô é eq rajung za, ji yû luí, Yhang lé chyitdap bâng é matú, lhunglhang lé ge é dông chyat kut é hkyô lé, nga-nhúng sê lhê. <sup>29</sup> Hkâsu mù gâ le, Yhang Zo gi, gumang wui myo myo má zomún dut sháng gaq ga, Garai Gasang gi, hí te sê tô é bang lé, Yhang Zô é sâmlai eq wó pûng nhâng râ matú, hí mai masat to bê nghut ri. <sup>30</sup> Hau htoq agó, Yhang, hí mai masat to bê bang lé gi, ji yu ri; ji yû bê bang lé gi, mara hkyut san byí ri; mara hkyut san byí é hui bang lé gi, hpungwup shingkang bò nhang ri.

<sup>31</sup> Haû jáng gi, shí hkyô eq séng luí, nga-nhúng haí taí shirâ lhú? Garai Gasang gi, nga-nhúng hkyam shut nghut jáng, nga-nhúng lé, ó yuq wá gye wám kut râ lhú? <sup>32</sup> Yhumsîng é Yhangzo lé lhang a ha bûn é za, nga-nhúng banshoq bâng é matú ap byí pyâm é Sû gi, Yhang lé le, lhunglhang lé le, rahá láí láí byí râ a nghut lhú? <sup>33</sup> Garai Gasâng eq hkyin yu to bê bang lé, ó yuq wá mara wó hûn râ lhú? Garai Gasang gi, mara hkyut san byí Sû nghut ri. <sup>34</sup> Hkrisduq Yesuq gi, shí hkám luí, shí hkâm é htoq agó, shi é mai lhoq dui toq yu é hui mù, Garai Gasâng é loqyo hkyam má nghut nyí luí, nga-nhúng é matú bo dúng xoq byí nyí bê nghut é yanmai, ó yuq wá mara wó byí râ lhú? <sup>35</sup> Hkrisduq é chyitdap myit mai, nga-nhúng lé, hai eq wá wó lhoq kang râ lhú? Gunjang huí é hkyo eq luq? Wuíhke huí é hkyo eq luq? Zing-ri huí é hkyo eq luq? Mutmó huí é hkyo eq luq? Gùng chîn dut huí é hkyo eq luq? Gyuq jung eq luq? Sham eq luq? <sup>36</sup> Haû gi, "Náng é yanmai, ngamoq, nyí wuí sat pyâm é huí nyi ri;

sat râ matú nyhi tô é sau pé lé su, ngamoq lé myit pyâm akô."☆  
ga kê tô é eq rajung za nghut ri. <sup>37</sup> A wó lhoq kang; nga-nhúng lé chyitdap Su é yanmai, nga-nhúng gi, haû pé banshoq lé je wó ung pyâm é nghut lhê. <sup>38</sup> Hkâsu mù gâ le, shí kôlhang, byùn kôlhang, maumang lagyô pé nghut kôlhang, agè ashop é nat pé nghut kôlhang, shí ipyat nghut kôlhang, htang pyat nghut kôlhang, haí jung a-tsam pé nghut kôlhang, <sup>39</sup> htoq tsáng mâ é nghut kôlhang, a-ô tsáng mâ é nghut kôlhang, hpan tô é gotú haí nghut kôlhang, nga-nhúng é Yhumsîng Hkrisduq Yesuq má bo é Garai Gasâng é chyitdap myit mai, nga-nhúng lé wó lhoq kang pyám râ a nghut nghû, ngò gi, hkyak wó sê yu ri.

## 9

### *Garai Gasang Hkyin Yu É Israelaq Byu Pé*

† 8:23 Woi-nyí é sâng-hi ashi gâ é gi, Woi-nyí gi, Garai Gasang byí é chyunghuq pé mâ é sâng-hi lhum nghut lhê.

☆ 8:36 Hkya-on 44:22

<sup>1</sup> Ahkuî, ngò gi, Hkrisduq má tengmán é dang tái rã; ngò a mhaû é lé, haû Chyoyúng Woi-nyí gi, ngá é unghkaû myit má hkyak saksé hkâm nyi ri. <sup>2</sup> Ngò gi, ngá é myit nhiklhuma má, gyai yhang yón kuq nyi é eq ayang hpuzô nyi lhê. <sup>3</sup> Hkâsu mù gâ le, ngò gi, ngá é byuhú, ngá é gumang wui é matú, nhîng é hui luî Hkrisduq eq gang le lhang gè rã su gâ ri. <sup>4</sup> Haû bang gi, Israelaq byu pé nghut lhê. Zo yín yû huí é hkyô le, hpungwup shingkang le, dangshikaq pé le, tarâ lé myang hap yu é hkyô le, noqkuq yhûm má noqkuq é hkyô le, danggidiq pé lé le, yhangmoq wó yu akô nghut ri. <sup>5</sup> Haû myîng hû é îchyí îwâ pé gi, yhangmoq é îchyí îwâ pé nghut luî, byu é hkyam dông gon jáng, Hkrisduq gi, yhangmoq amyû mâ é nghut ri. Yhang gi, lhunglhang lé up é, ahtum abyuq hkya-on huí é Garai Gasang nghut ri! Amen.

<sup>6</sup> Haû gi, Garai Gasâng é danggidiq akôm dut byuq bê nghû nau é a nghut. Hkâsu mù gâ le, Israelaq byu pé banshoq bang gi, Israelaq byù akyîng chyat a nghut kó nghut ri. <sup>7</sup> Abraham é awut ashín banshoq bang gi, yhang é zo wuî akyîng chyat nghû a wó tái é nghut lhê. Hau é malaî, "Isak dông mai lo é lé, náng é awut ashín nghû són byi rã nghut lhê."✠ gâ tô ri. <sup>8</sup> Radông tái sháng ga jáng, gungsho mai hku é zo wuî gi, Garai Gasâng é zo wuî akyîng a nghut kó, danggidiq eq sêng é zo wuî za sheq, Abraham é awut ashín pé dông són byí é nghut lhê. <sup>9</sup> Hkâsu mù gâ le, "Masat tô é ahkyîng má, ngò dum taû lé mù, Sarah gi, yuqzo hkû rã nghut lhê."✠ ga tái tô é danggidiq é yanmai nghut lhê.

<sup>10</sup> Haû za a nghut, Rebeka é yhangzô nhiktang é îwa gi, nga-nhúng é îwa nghut su Isak rayuq za nghut lhê. <sup>11-12</sup> Nghut kôlhang, Garai Gasang myit hpyit to mù hkyin yu é hkyô gi, muzó mai a nghut é za, hkyin ji yù Su é yanmai nghut é lé, wó gîng nyi sháng ga ga, haû zozûm nhik a hku lé shî é htoq agó, ge é eq a ge é muzó haî lhang a kut shimá, "Haû ko sù yuq gi, tiq sù yuq lé dojaû rã nghut lhê."✠ ga, Rebeka lé tái kyô tô é nghut lhê. <sup>13</sup> Haû gi, "Yakup lé, ngò chyitdap lhê, nghut kôlhang, Eso lé gi, a ngui é nghut lhê."✠ ga kã tô é eq rajung za nghut ri.

<sup>14</sup> Haû nghut é yanmai, nga-nhúng hkâsu nghû tái rã? Garai Gasang gi, a tarâ é sù nghut lhê lhu? Ratsuí lhang a nghut! <sup>15</sup> Hkâsu mù gâ le, "Ngò, shogyo nhikmyin nàu sù lé, shogyo nhikmyin rã nghut lhê;

Ngò, jeju byi nàu sù lé, jeju byi rã nghut lhê."✠  
ga, Mosheq lé Yhang tái ri. <sup>16</sup> Haû mù luî, haû hkyin yu é hkyô gi, byù yut yut ô nau é yanmai le a nghut, shikut é yanmai le a nghut, Garai Gasâng é shogyo nhikmyin é yanmai za nghut lhê. <sup>17</sup> Hkâsu mù gâ le, Chyúmdang má, "Náng chyáng Ngá é a-tsam wó tân shit rã eq mingkan gón má Ngá é myîng lhoq pyo é hui rã matú sheq, Ngò, nang lé lhoq toq kat é nghut lhê."✠ ga, Hpara-uq lé tái ri. <sup>18</sup> Haû mù luî, Garai Gasang gi, shogyo nhikmyin nàu sù lé, shogyo nhikmyin mù, myit lhoq htân byi nàu sù lé, myit lhoq htân byi ri.

<sup>19</sup> Nungmoq mâ é rayuq yuq, "Haû jáng, Garai Gasang gi, ngamoq lé haî mù mara hun nyi ashî lhu? Yhang ô nau é hkyô lé, ó yuq wá wó hkûm pyâm lhê lhu?" ga, ngo lé tái kó rã nghut lhê. <sup>20</sup> Nghut kôlhang, Garai Gasang lé dang tu sù byù nàng gi, ó yuq wá nghut lhê lhu? Saî to huí bê é zè pé gi, "Nàng, haî mù ngo lé shî su kut saî tô lhê lhu?" nghû saî é Sù lé wó tái rã lhu? <sup>21</sup> Tso-au saî sù gi, tsohtung ralhuma mai za, hkik é tso-au pé eq a hkik é tso-au pé saî rã ahkáng wó lhê a nghut kô lhu?

<sup>22</sup> Garai Gasang gi, Yhang é nhikmo-yo hkyô tân shit luî, Yhang é a-tsam lé sé nhâng nàu kôlhang, htên byoq rã matú hen tô é, nhikmo-yo gîng é tso-au pé lé, myit hîng hîng shirang pyâm nyi é hkyô lé, tái rã jang haî joq ashî lhu? <sup>23</sup> Hpungwup shingkang é matú noq mai hen to bang nghut é, Yhang shogyo nhikmyin huí é bang lé, Yhang é agùn agó é hpungwup shingkang lé sé nhâng nàu mù, Yhang haû su kut é nghut jáng, tái rã haî joq ashî lhu? <sup>24</sup> Haû bang gi, Yudaq byu pé mai za a nghut, tungbaù pé mai le ji yù huí é bang nga-nhúng nghut lhê. <sup>25</sup> Haû eq rajung za, Hosea laiká má Yhang tái tô é gi, "Ngá é byù myû a nghut é bang lé, 'Ngá é byù myû' nghû;

✠ 9:7 Apûn 21:12 ✠ 9:9 Apûn 18:10,14 ✠ 9:11-12 Apûn 25:32 ✠ 9:13 Mal 1:2-3 ✠ 9:15 Htoq Ló 33:19

✠ 9:17 Htoq Ló 9:16



Ngò a chyit é byizo lé 'Ngò chyit sù' nghû wut râ nghut lhê."<sup>✠</sup>  
gâ ri. <sup>26</sup> Haû mù,

"Nungmoq gi, ngá é byù myû pé a nghut.' nghû yhangmoq lé taí é jowò má yhang,  
yhangmoq gi, 'Rû dui nyi é Garai Gasâng yhangzô pé' ga wut é hui kó râ nghut lhê."<sup>✠</sup>  
gâ ri.

<sup>27</sup> Esai-aq le, Israelaq byu pé eq séng luí garu taí é gi,  
"Israelaq yhangzo yhangshû pé gi, wuìshuq lung-aû yàm mâ é semuì su myo kôlhang,  
myit gyó tô é bang za sheq hkyi yu é hui kó râ nghut lhê.  
<sup>28</sup> Hkâsu mù gâ le, haû Yhumsîng gi, myidàm htoq má Yhâng é tarâ jéyáng hkyô lé hân  
hân lhoq dik lhoq htûm pyám râ nghut lhê."<sup>✠</sup>  
gâ ri.

<sup>29</sup> Haû eq rajung za, hí lé Esai-aq taí tô é gi,  
"A-tsam dik shoq bò sù haû Yhumsîng za, nga-nhúng lé, awut ashín a myhit to byî é  
nghut jáng,  
nga-nhúng gi, Sodom wà su dut byuq luí, Gomoraq myuq eq pung byuq râ nghut  
lhê."<sup>✠</sup>  
gâ ri.

#### *Israelaq Byu Pé A Lumjîng Kô É Hkyô*

<sup>30</sup> Haû mù, nga-nhúng hkâsu nghû taí râ lhú? Dingmán hkyô lé a châng hkat é tûngbaù  
pé gi, haû lé wó yù bekô; haû gi, lumjîng hkyô é yanmai wó yu é dingmán hkyô nghut  
ri. <sup>31</sup> Nghut kôlhang, tarâ eq séng é dingmán hkyô lé châng hkat é Israelaq byu pé gi,  
haû lé a wó yù kó nghut ri. <sup>32</sup> Haû mù a wó yù kô é lhú? Yhangmoq gi, lumjîng myit eq  
châng hkat kô é a nghut é za, muzó pé eq châng hkat kô é yanmai, a wó yù kô é nghut ri.  
Yhangmoq gi, "htung htê râ luqgok" má htûng leng bekô nghut ri. <sup>33</sup> Haû,  
"Wú keq, htûng leng râ luqgok eq myit leqbat nhâng râ luqmó cham lé, Ngò, Zi-un bùm  
má lheq to luí,  
Yhang lé lumhkaû sù gi, hkâ-nhám le hoq hpu é hui râ a nghut."<sup>✠</sup>  
ga kê tô é eq rajung za nghut ri.

## 10

<sup>1</sup> Gumang wuì ê, ngò gi, haû Israelaq byu pé hkyi yu é hui kó sháng gaq nghû, gyai  
yhang myit shirông luí, Garai Gasâng chyáng yhangmoq é matú kyûdung byí nyi lhê.  
<sup>2</sup> Hkâsu mù gâ le, yhangmoq gi, Garai Gasâng é hkyô lé gyai yhang myit zuq é bang nghut  
é lé, ngò saksé hkâm lhê; nghut kôlhang, yhangmoq myit zuq é hkyô gi, hpaqchyî bo é  
dông a nghut kó. <sup>3</sup> Yhangmoq gi, Garai Gasâng chyáng mai jé lé é dingmán hkyô lé a  
sé kômù, yhumsîng dingmán bûn é hkyô lé za ho shikut nyi kô é yanmai, Garai Gasâng  
é dingmán hkyô hkaû má a nyi kó nghut ri. <sup>4</sup> Hkrisduq gi, lumjîng bang yuq hkanqmó,  
dingmán é má wó jé kó sháng gaq ga, jep é tarâ lô htûm jang dut bê nghut ri.

<sup>5</sup> Mosheq gi, "Haû pé dông châng é sù gi, haû pé mai asak duì râ nghut lhê."<sup>✠</sup> ga, jep é  
tarâ eq séng é dingmán hkyô lé kê sân kyô tô é nghut lhê. <sup>6</sup> Nghut kôlhang, lumjîng hkyô  
eq séng é dingmán hkyô gi, "Náng é myit nhiklhûm má, 'Mauhkûng má, ó yuq doq lô râ  
lhú?'<sup>✠</sup> (Haû gi, Hkrisduq lé shuì gyó lò râ gá nau é nghut lhê), <sup>7</sup> haû a nghut jáng, 'Nik é  
jang má, ó yuq gyó wâng râ lhú?'<sup>✠</sup> (Haû gi, Hkrisduq lé, shi é mai dui toq nhâng râ gá nau  
é nghut lhê.), nghû hkâtaí kó." gâ tô ri. <sup>8</sup> Haû jáng, hkâsu gâ tô ri lhú? "Haû mungdang gi,  
nàng eq chyâng nyi ri; náng é nhut má le, náng é myit nhiklhûm má lé nghut nyi ri."<sup>✠</sup> gâ  
tô ri. Haû gi, ngamoq hko taí é lumjîng hkyô eq séng é mungdang nghut lhê. <sup>9</sup> Haû mù,  
"Yesuq gi, Yhumsîng nghut ri." nghû náng é nhut eq yín yû mù, Garai Gasang gi, Yhang  
lé, shi é mai dui toq nhâng bê nghut lhê nghû, náng é myit nhiklhûm má lumjîng é nghut  
jáng, nàng gi, hkyi yu é hui râ nghut lhê. <sup>10</sup> Hkâsu mù gâ le, byù gi, myit nhiklhûm má

<sup>✠</sup> 9:25 Hos 2:23   <sup>✠</sup> 9:26 Hos 1:10   <sup>✠</sup> 9:28 Esai 10:22-23   <sup>✠</sup> 9:29 Esai 1:9   <sup>✠</sup> 9:33 Esai 8:14; 28:16   <sup>✠</sup> 10:5  
Nhong 18:5   <sup>✠</sup> 10:6 Tarâ Pun 30:12   <sup>✠</sup> 10:7 Tarâ Pun 30:13   <sup>✠</sup> 10:8 Tarâ Pun 30:14

lumjínq jáng, mara hkyut san byî é hui mù, nhut mai yín yû jáng, hkyi yù huí é nghut lhê. <sup>11</sup> Haû Chyúmdang taí é gi, "Yhang lé lumhkau é sù ó yuq le, hkâ-nhám lháng hoq hpû é hui râ a nghut."☆ gâ ri. <sup>12</sup> Hkâsu mù gâ le, Yudaq byù eq tûngbaù pé é gyoro má gam hkoq é hkyô haí le a joq é za, haû Yhumsîng gi, banshoq bâng é Yhumsîng nghut lhê mù, Yhang lé wut dung bang lhunglháng lé, agùn agó shimân byî ri. <sup>13</sup> Hkâsu mù gâ le, "Haû Yhumsîng é myìng lé lâng é bang yuq hkangmó gi, hkyi yu é hui râ nghut lhê."☆ gâ tô ri.

<sup>14</sup> Haû nghut lé gi, yhangmoq a lumjínq é sù lé nhîng, hkâsu wó wut dung kó râ lúhú? Yhangmoq a wó gyô wú é sù lé nhîng, hkâsu wó lumjínq kó râ lúhú? Hko kyô é sù a nyi le nhîng, hkâsu wó gyo kó râ lúhú? <sup>15</sup> Nhang kat é a hui le gi, yhangmoq hkâsu kut wó hko kyo kó râ lúhú? Haû eq rajung za, "Gabú danglù pé hko kyo bâng é hkyî-kám pé gi, hkâ-í yhang yúng ri myhi-nhung!"☆ ga kê tô ri.

<sup>16</sup> Nghut kôlhang, Israelaq byu pé banshoq bang gi, gabú danglù lé hap yù kô é a nghut. Hkâsu mù gâ le, Esai-aq gi, "Yhumsîng ê, ngamoq é danglù lé ó yuq wá lumjínq é lúhú?"☆ ga taí ri. <sup>17</sup> Haû nghut mù luí, lumjínq myit gi, danglù lé wó gyô é mai lò mù, danglù gyô yu é gi, Hkrisduq é mungdang mai lo é nghut lhê. <sup>18</sup> Nghut kôlhang, ngò myi kó lé: yhangmoq gi, a wó gyô wú kô é nghut lhê lúhú? Yhangmoq gi, wó gyo gù za nghut lhê, haû eq rajung za,

"Yhangmoq é htê gi, myidàm htoq banshoq má jàm bê nghut ri;

yhangmoq é mungdang pé gi, mingkan htungchyûn hkangmó má jé bê nghut ri."☆ gâ tô ri. <sup>19</sup> Ngò dum myi kó lé: Israelaq byu pé gi, a sê gyo kô é nghut lhê lúhú? Mosheq sâng-hi má taí é gi,

"Byù rahú lháng a nghut bang èq, Ngò, nungmoq lé manôn nhâng râ;

sê gyo nyan a bo é amyù èq, Ngò, nungmoq lé wú nhik-yo nhâng râ nghut lhê."☆ gâ ri. <sup>20</sup> Hau htoq agó, Esai-aq a gyuq a wàm taí é gi,

"Ngo lé a ho é bang gi, Ngo lé myang hô bekô nghut ri;

Ngá hkyô lé a myî é bang lé, Ngò htoq shit bê nghut lhê."☆ gâ ri. <sup>21</sup> Nghut kôlhang, Israelaq byu pé eq séng luí, Yhang taí é gi,

"Ngò gi, jino a gyô é eq ngegáng-htu é byù myù lé, nyí wuî Ngá loq lham mù ji nyi lhê."☆ gâ ri.

## 11

### *Israelaq Byu Pé Lé A He-ngik Pyám*

<sup>1</sup> Haû mù luí, ngò myi kó lé, Garai Gasang gi, Yhâng é byu pé lé he-ngik pyám bê nghut lhê lúhú? Ratsuí lháng a nghut! Ngò yhang le, Israelaq byù myù nghut luí, Abraham é awut ashín eq Ben-yamyin hú mâ é sù nghut lhê. <sup>2</sup> Garai Gasang gi, Yhang te sê to gú nghut é, Yhâng é byu pé lé a he-ngik pyám é nghut lhê. Eliyaq eq séng é hkyô Chyúmdang má bo tô é lé, nungmoq a sé kó lúhú? Garai Gasâng é hí má, yhang, Israelaq byu pé lé mara hûn é gi, <sup>3</sup> "Yhumsîng ê, yhangmoq gi, Náng é myiqhtoí pé lé sat pyám kô é eq Náng é hkungga gyap pé lé tu lhêng pyám akô nghut ri; ngò rayuq za myit gyó tô é nghut luí, ngo lé sat râ matú le yhangmoq ho nyi akô nghut ri."☆ gâ ri. <sup>4</sup> Garai Gasang gi, yhang lé, hkâsu ga tû taí é nghut lhê lúhú? Haû gi, "Balaq hpara é hí má hkyihput a htuq shî é byù nyhit hkyíng lé, Ngá é matú myhit to lhê."☆ gâ é nghut lhê. <sup>5</sup> Haû eq rajung za, ahkuí gi, jeju yanmai hkyin yù huí é bang za myit gyó tô é nghut lhê. <sup>6</sup> Jeju yanmai nghut é nghut le gi, muzó é yanmai a nghut lo; muzó dông ru nghut le gi, jeju gi, jeju a nghut lo.

<sup>7</sup> Haû nghut jáng, hkâsu lúhú? Israelaq byu pé gyai ho shikut kôlhang, a wó kô é lé, hkyin htoq yù huí é bang kúm gi, wó bekô nghut ri. Góbang gi, myit lhoq htân byî é hui akô nghut ri; <sup>8</sup> haû gi,

☆ 10:11 Esai 28:16 ☆ 10:13 Yol 2:32 ☆ 10:15 Esai 52:7 ☆ 10:16 Esai 53:1 ☆ 10:18 Hkya-on 19:4 ☆ 10:19 Tarâ Pun 32:21 ☆ 10:20 Esai 65:1 ☆ 10:21 Esai 65:2 ☆ 11:3 1 Hko 19:10,14 ☆ 11:4 1 Hko 19:18

"Garai Gasang gi, hkû-nyí jé shoq, yhangmoq lé nhikshi jit é woi-nyí lé le, a wó myang é myoqjí lé le, a wó gyô é nohkyap lé le, byí to bê nghut ri."<sup>☆</sup>

ga kê tô é eq rajung za nghut ri. <sup>9</sup> Dawiq taí é le,

"Yhangmoq é zangbó gi, yhangmoq é matú, dumzo eq lhaí, myit leqbat jowò eq lató hpuq hkyô dut sháng gaq;

<sup>10</sup> Yhangmoq myoq a wó myâng shoq, myoqjí lhoq chut pyám byí é hui sháng gaq; yhangmoq é nunghkûng gi, ayang wòlai wun goí nhang é hui sháng gaq."<sup>☆</sup> gâ ri.

### *Tûngbaù Pé Lé Hkyi Yu É Hkyô*

<sup>11</sup> Ngò dum myi kó lé: Israelaq byu pé gi, a wó dum gè râ í leqbat byuq bekô lhú? Ratsuí lháng a nghut! Yhangmoq é tarâ lu lai hkyo é yanmai, yhangmoq lé manôn nhâng râ matú, hkyi yù hkyô gi, tûngbaù pê chyáng jé byuq é nghut lhê. <sup>12</sup> Nghut kôlhang, yhangmoq é tarâ lu lai hkyô gi, mingkân é matú wó sùt hkyô eq, yhangmoq sum pyâm é hkyô gi, tûngbaù pê é matú wó sùt hkyô dut é nghut jáng, yhangmoq é byíng jup hkyô gi, je riyhang kô é wó sùt hkyô dut râ nghut ri-nhung!

<sup>13</sup> Nungmoq tûngbaù pé lé ngò taí nyi lhê: ngò gi, tûngbaù pê é lagyo nghut nyi é u má, ngá é hpungmù lé hpautap nyi lhê. <sup>14</sup> Haù gi, ngá é amyû pé lé manôn myit wó bô nhâng mù, yhangmoq ra-am lé wó hkyi yù râ lé myit myoqbyu é hkyô nghut lhê. <sup>15</sup> Hkâsu mù gâ le, yhangmoq lé he-ngik pyâm é hkyô gi, mingkân é matú Garai eq buinùm xoq hkyô dut bê nghut jáng, yhangmoq lé dum hap yu é hkyô gi, shi é mai dui toq é dông dut bê a nghut lhi? <sup>16</sup> Hau htoq agó, sâng-hî ashi dông nhông byí é mún ra-am gi, chyoiyúng é nghut jáng, muk htung gón gi, chyoiyúng é nghut lhê; haù amyit gi, chyoiyúng é nghut jáng, akoq pé le chyoiyúng é nghut lhê.

<sup>17</sup> Haù tsanlun akoq pé\* ra-am gi, lhoq hkyui pyâm é hui luí, yosô tsanlun a-nyuq† nghut sù nàng gi, haù pé má xoq é hui mù, haù tsanlun amyit é xù lé bo shuq lom é nghut jáng, <sup>18</sup> akoq haù pé lé hkâwú tiq pyám kó. Nungmoq haù su kut é nghut jáng, nungmoq gi, haù amyit lé htuq é a nghut é za, amyit haù sheq nungmoq lé htuq é hkyô lé, nungmoq myit sé keq. <sup>19</sup> Nungmoq kúm gi, "Ngò, haù má xoq é hui râ matú sheq, akoq haù pé gi, lhoq hkyui pyâm é huí é ru nghut lhê." ga taí râ nghut lhê. <sup>20</sup> Haù su gi, nghut lhê. Nghut kôlhang, yhangmoq gi, a lumjíng é yanmai, lhoq hkyui pyâm é hui kômù, nungmoq kúm gi, lumjíng é yanmai, wó ging títng nyi é nghut lhê. Hká gumrong nyi, gyuq kyum nyi keq. <sup>21</sup> Hkâsu mù gâ le, Garai Gasang gi, akoq akying pé lé a ha bún é nghut le gi, nungmoq lé le ha bun râ a nghut.

<sup>22</sup> Haù mù luí, Garai Gasâng é shogyo nhikmyin hkyô eq htân htân kut pyâm é hkyô lé, myit wú keq: leqbat é bang lé htân htân kut pyám kôlhang, nungmoq gi, Yhâng é shogyo nhikmyin hkyô má xoq nyi nyi é myháng, nungmoq lé gi, shogyo nhikmyin nyi râ nghut lhê. Haù a nghut jáng, nungmoq le, zân hpyit pyâm é hui râ nghut lhê. <sup>23</sup> Yhangmoq gi, a lumjíng hkyô lé tô pyám kô é nghut jáng, dum xoq yu é hui kó râ nghut lhê; hkâsu mù gâ le, Garai Gasang gi, yhangmoq lé dum wó xoq yu é Sù nghut lhê. <sup>24</sup> Haù mù gâ le, yosô tsanlun gàm akoq nghut gù nungmoq lé hpyit yù mù, htûng a nghut é dông, hô é tsanlun agàm má xoq é nghut le gi, haù akoq akying pé nghut é yhangmoq gi, ó le ó é tsanlun-ngut akying má xoq yu é lé je riyhang hui râ nghut lhê ô!

### *Israelaq Byu Pé Hkyi Yu É Hui Râ Hkyô*

<sup>25</sup> Haù mù, gumang wuì ê, nungmoq a nghutbun kó sháng gaq nghû, zau tô é hkyô shí lé, nungmoq a sé dut râ lé, ngò a ô nau é nghut lhê: haù gi, tûngbaù pé wang lo é laké byíng é hkûn jé shoq, Israelaq byu pé ra-am gi, myit lhoq htan é huí é hkyô nghut lhê.

<sup>26</sup> Hau htâng sheq, Israelaq amyû banshoq bang hkyi yu é hui râ nghut lhê. Haù gi, "Hkyi yù Sù gi, Zi-un bùm mai htoq lô râ nghut lhê;

☆ 11:8 Tarâ Pun 29:4 ☆ 11:10 Hkya-on 69:22-23 \* 11:17 Tsanlun akoq pé gi, Israelaq byu pé lé taí nau é nghut lhê. † 11:17 Yosô tsanlun a-nyuq gi, tûngbaù pé lé taí nau é nghut lhê.

Yhang gi, Garai lé nunghtáng tô pyâm é hkyô lé, Yakup é awut ashín mai huí sêng pyám byi râ nghut lhê.

<sup>27</sup> Ngò, yhangmoq é yubak mara lé huí sêng pyám byi jáng,

haû gi, yhangmoq lé Ngò byî tô é Ngá é dangshikaq nghut lhê."☆

ga kê tô é eq rajung za nghut ri.

<sup>28</sup> Haû gabú danglù eq séng luí ga jang, yhangmoq gi, nungmoq é matú gyè nghut akô; nghut kôlhang, hkyin htoq yû hkyô eq séng luí ga jang, yhangmoq gi, myìng hû é îchyí íwa pê é yanmai, chyitdap é huí akô nghut ri; <sup>29</sup> hkâsu mù gà le, Garai Gasâng é chyunghuq pé eq Yhang ji yu é hkyô lé gi, wó htaî lhik pyâm é a nghut. <sup>30</sup> Nungmoq gi, Garai Gasâng é jîno a gyô é bang radàm dut wú kô é nghut kôlhang, yhangmoq jîno a gyô é yanmai, ahkuî kúm, shogyo nhikmyin hkyô wó hkam yù bekô nghut é su, <sup>31</sup> ahkuî, yhangmoq gi, nungmoq wó hkam yu é Garai Gasâng é shogyo nhikmyin hkyô é yanmai, shogyo nhikmyin hkyô lé wó hkam yù kó sháng gaq ga, yhangmoq le, ahkuî, jîno a gyo bang dut bekô nghut ri. <sup>32</sup> Hkâsu mù gà le, Garai Gasang gi, byù lhunghâng bang lé, shogyo nhikmyin hkyô wó tân shit shoq ga, lhunghâng bang lé, jîno a gyo hkyô é shúm dut nhang to bê nghut ri.

### *Hkya-on Kungtôn Dang*

<sup>33</sup> Ô! Garai Gasâng é agùn agó é sùt nghut é, hpaqchyî byéng-yá eq nyan hpaqchyî gi, hkâ-í yhang nik ri-nhung!

Yhâng é tarâ jéyáng hkyô gi, ung sê jung a nghut nhung!

Yhang kut é hkyô pé gi, hkâ-í yhang ho htoq wú jung nghut ri-nhung!

<sup>34</sup> "Haû Yhumsing é myit lé, ó yuq wá ung sê lhê lhú? Yhâng é hpaqchyî byi sù gi, ó yuq wá dut wú é lhú?"☆

gâ ri.

<sup>35</sup> "Garai Gasâng eq jeju dum tau byi râ dut shoq, ó yuq wá, Garai Gasang lé byî wú é lhú?"☆

gâ ri.

<sup>36</sup> Hkâsu mù gà le, joq mijog gi, Yhâng chyáng mai nghut mù, Yhang dông mai nghut luí, Yhâng é matú chyat nghut ri. Haû hpungwup shingkang gi, Yhâng chyáng ahtum abyuq ru joq nyî sháng gaq ô! Amen.

## 12

### *Dui É Hkungga Pé Dut Râ Hkyô*

<sup>1</sup> Haû mù luí, gumang wuê ê, nungmoq é gungdu pé lé, Garai Gasang myit nguì ô nau é eq chyoyíung é, dui é hkungga dông nhông byi keq nghû, Garai Gasâng é shogyo nhikmyin hkyô mai, ngò, nungmoq lé wum byî kat lhê. Haû gi, woi-nyí hkyô dông nungmoq noqkuq dojaú é hkyô nghut lhê. <sup>2</sup> Míngkan shí lhùm é sâmlai dông a cháng lo é za, myit sik wó yû râ dông nungmoq é a-kyang lé htaî pyám byi nhâng keq. Haû hkûn sheq, Garai Gasâng é ge é, myit nguì é eq gumjup é ô nau hkyô lé, nungmoq wó chyâm, wó sê gàm hkoq yû kó râ nghut lhê.

<sup>3</sup> Hkâsu mù gà le, ngo lé byî tô é jeju yanmai, nungmoq yuq hkanmó lé ngò taí kôlé: nungmoq gi, yhumsing gùng lé lai shoq a nghutbûn é za, ó le ó lé, Garai Gasâng eq lumjíng myit tsing gàm byî to bê eq rajung za, myit yù gíng é í za myit yù keq. <sup>4</sup> Nga-nhúng yuq hkanmó é gungdu rallhum má gi, gungdu showui showang pé myo myo bo é nghut luí, gungdu showui showang haû pé banshoq gi, jai chûng jang a pung é nghut lhê. <sup>5</sup> Haû eq rajung za, myo myo nghut é nga-nhúng le, Hkrisduq má gungdu rallhum za dut luí, yuq hkanmó gi, rayuq eq rayuq gungsho sêng lhùm é bang chyat nghut lhê. <sup>6</sup> Nga-nhúng lé byî tô é jeju yanmai, nga-nhúng wó é chyunghuq gi, gotú tû nghut lhê. Byù rayuq é chyunghuq gi, myiqhtoi htoî é nghut jáng, yhâng é lumjíng hkyô eq rajung za htoi sháng gaq; <sup>7</sup> dojaú é nghut jáng, dojaú sháng gaq; mhoq kyô é nghut jáng, mhoq kyo sháng gaq;

<sup>8</sup> myit wum byî é nghut jáng, myit wum byi sháng gaq; ra châ é bang lé garúm byî é nghut jáng, a ha bûn é za byi sháng gaq; shuî u é nghut jáng, lumluq tung shuî u sháng gaq; shogyo nhikmyin hkyô shit é nghut jáng, gabú myit èq kut sháng gaq.

### *Chyitdap Myit*

<sup>9</sup> Chyitdap myit má gegùn labyoq a ge bò. Agè ashop dut é lé, nhik noq pyám keq; ge é lé, myit tuî nyî keq. <sup>10</sup> Rayuq eq rayuq, gumang chyitdap myit mai lhumzuî lhum keq. Rayuq eq rayuq, yhumsing gùng htoq je hpautap lhum keq. <sup>11</sup> Myit zuq hkyô má, hkâ-nhám le wum a lhoq shôm é za, nungmoq é woi-nyî hkyô má myit toq nyî mù, haû Yhumsîng lé dojaú nyî keq. <sup>12</sup> Myit myoqbyù hkyô má gabú keq; wuîhke hkyô má hkam jan keq; kyûdung hkyô má lhumzui keq. <sup>13</sup> Ra châ tô é Garai Gasâng é byu pé lé gàm byi keq. Bíng hkulum é lé rago kut keq.

<sup>14</sup> Nungmoq lé zing-rî é bang lé shimân byi keq; shimân byi keq, hkâ-nhing kó. <sup>15</sup> Gabú é bang eq rahá bo gabú keq; yón é bang eq rahá bo yón keq. <sup>16</sup> Rayuq eq rayuq byîn hpyé gohut huî nyî keq. A nghutbûn é za, nyî yap hkyô nyhûm bang eq zùm yap keq. Hpaqchyî bo é sù su hkâ-myit ngàm kó.

<sup>17</sup> Ó yuq lé le, agè ashop é yanmai, agè ashop é dông lató hkâhpuq kó. Yuq hkangmó é myoq hí má ge é lé kut râ rago myit keq. <sup>18</sup> Wó dut é nghut jáng, nungmoq wó dut é í, yuq hkangmó eq nguingón shoq nyî keq. <sup>19</sup> Ngá é buinùm wuî ê, lató a hpuq é za, Garai Gasâng é nhikmo-yo hkyô lé sheq lánng nyî keq. Hkâsu mù gâ le, "Ngò sheq lató hpuq râ sù nghut lhê; ngò lató hpuq râ." <sup>20</sup> Haû mù, "Nungmoq lé gyè kut sù zòmút é nghut le gi, byi tso keq; yhang wuîshit é nghut le gi, rajung jung byi huq keq.

Haû dông kut jáng, nàng, yhâng é ulhum htoq má gyúng é myigye bum to byî é nghut lhê." <sup>21</sup> Agè ashop é gi, nungmoq lé a ung pyám sháng gaq, ge é hkyo èq agè ashop é lé ung pyám keq.

## 13

### *Ahkáng Ayá Wó Bàng Ô Má Nyî Râ É Hkyô*

<sup>1</sup> Yuq hkangmó gi, up é ahkáng ayá wó bàng é a-ô má nyî ra râ nghut lhê; hkâsu mù gâ le, Garai Gasâng chyáng mai za a nghut le gi, up é ahkáng ayá joq é a nghut. Joq tô é ahkáng ayá pé gi, Garai Gasâng èq byî tô é chyat nghut lhê. <sup>2</sup> Hau é yanmai, up é ahkáng ayá lé gumlau toq é sù gi, Garai Gasâng byî tô é up é ahkáng ayá lé gumlau toq é sù nghut ri; haû su kut é bang gi, tarâ jéyáng é hui zo râ hkyô lé ho yù nyi é bang nghut akô. <sup>3</sup> Hkâsu mù gâ le, uphkan é bang gi, ge é hkyô kut bàng é matú gyuq nán hpo a dut é za, shut shaî hkyô kut bàng é matú sheq dut é ru nghut lhê. Up é ahkáng wó sù lé gyuq é mai lut nau lhê a nghut lí? Haû jáng, ge é hkyô kut aq, haû hkûn, yhang, nang lé hkya-on râ nghut lhê. <sup>4</sup> Hkâsu mù gâ le, yhang gi, náng é matú ge é akyû kut byi râ nghut é, Garai Gasâng é dui-nhâng zoshâng nghut lhê. Nghut kôlhang, nàng, shut shaî hkyô kut é nghut le gi, gyuq nán nyî aq; haî mù gâ le, yhang gi, sâm lé ajè wun tô é a nghut. Yhang gi, Garai Gasâng é dui-nhâng zoshâng nghut mù, shut shaî hkyô kut sù lé dam byi râ matú nhikmo-yo Su é gunglik nghut lhê. <sup>5</sup> Haû mù luî, dam byi râ lé chiq é yanmai za a nghut, yhumsîng nhik bô râ é yanmai le, haû up é ahkáng ayá wó bàng é a-ô má nyî râ dut lhê.

<sup>6</sup> Nungmoq hkansê kat râ é gi, hau é yanmai le nghut lhê; hkâsu mù gâ le, haû up é ahkáng ayá wó bang gi, Garai Gasâng é dui-nhâng zoshâng wuî nghut lhê mù, uphkan é mù lé, ahkýing byíng shoq wùn waq nyi akô nghut ri. <sup>7</sup> Yuq hkangmó lé byi âng é eq rajung za byi keq; hkansê kat byi ang sù lé gi, hkansê kat byi keq; kang kat byi ang sù lé gi, kang kat byi keq; gyuq kyum ang sù lé gi, gyuq kyum keq; hkungga ang sù lé gi, hkungga keq.

☆ 12:19 Tarâ Pun 32:35 ☆ 12:20 Sângkyang 25:21-22

*Rayuq Eq Rayuq Chyitdap Lhum Râ Hkyô*

<sup>8</sup> Rayuq eq rayuq chyitdap lhûm é chyîn mai lai luî, hai chyîn le hkâdap lhum kó; hkâsu mù gâ le, góyuq lé chyitdap é sù gi, haû jep é tarâ lé lhoq dik bê sù nghut ri. <sup>9</sup> "Su-myi sulàng lú hkyô hkâkut," "Byù hkâsat," "Hkâhkau," "Hkâ-myoqnoq,"<sup>✠</sup> gâ tô é hkunmó pé eq gotû hkunmó haî nghut nghut, "Náng gûng lé nàng chyitdap é su, náng é chyangnâm mâ é bang lé le chyitdap aq."<sup>✠</sup> gâ é tarâ má lo jup to bê nghut lhê. <sup>10</sup> Chyitdap myit gi, chyangnâm mâ é byù lé a ge é haî le a kut é nghut lhê. Haû mù luî, chyitdap myit gi, haû jep é tarâ lé lhoq dik é hkyô nghut ri.

<sup>11</sup> Haû mù, ahkuî lhê é ahkyíng yàm-yoq lé sê gyo luî, haû hkyô lé kut keq. Nungmoq yhup mui é mai bûn gying râ ahkyíng jé bê; haî mù gâ le, nga-nhûng é hkyi yù hkyô gi, lumjín hi é hkun lhê htoq má ahkuî je chyáng bê nghut ri. <sup>12</sup> Haû myín ahkyíng gi, lai byuq ló râ za nghut bê; nyí ahkyíng gi, jé lô berâ nghut lhê. Haû mù luî, mauchut é muzó lé tô pyám mù, maubó é gyehking lé wut to sháng. <sup>13</sup> Ye lhaî é eq shuq wut é, ashop é đông gungsho zùm yap é eq shut é đông nyi zô lhum nau é myit bo é, mabyoq jishûm htoq é eq manon é pé a kut é za, nyí-káng lhê su, ge é a-kyang đông nyi yap sháng. <sup>14</sup> Hau htoq agó, Yhumsîng Yesuq Hkrisduq lé, mebu su wut to keq; yubak gungsho ô nau é đông lhoq dik râ matú hkâ-myit kó.

## 14

*Gumang Wuî Lé A Jéyáng Râ Hkyô*

<sup>1</sup> Lumjín myit má wum nyhóm sù lé, myíng myo nhô zâ é hkyô pé lé a jéyáng byí é za hap yù keq. <sup>2</sup> Byù rayuq é lumjín myit gi, jung hkangmó zô ri; nghut kôlhang, lumjín myit nyhóm sù gotû rayuq gi, mhan-haq hpoqnoq za zô ri. <sup>3</sup> Jung hkangmó zo sù gi, a zo sù lé a ge wú tiq pyám; jung hkang jung mó a zo sù gi, zo sù lé mara a ge byi; hkâsu mù gâ le, Garai Gasang gi, yhang lé hap yu to bê nghut ri. <sup>4</sup> Nàng gi, ó yuq wá nghut mù, góyuq é dui-nhâng zoshâng lé jéyáng lhê lú? Yhang, yap ging kôlhang, leqbat kôlhang, yhâng é yhumsîng myit za nghut lhê. Yhang gi, wó yap ging râ nghut lhê; hkâsu mù gâ le, haû Yhumsîng gi, yhang lé wó yap ging nhâng Sù nghut lhê.

<sup>5</sup> Rayuq myit é gi, buinyi ra-nyí gi, gó nyí htoq je ge lhê gâ ri; dum rayuq myit é gi, nyí wuî rajung za nghut lhê gâ ri. Yuq hkangmó gi, yhumsîng myit yu é lé a úng-âng nyi sháng gaq. <sup>6</sup> Buinyi ra-nyí lé, ahkyak lhê ga myit yù sù gi, haû Yhumsîng é matú kut é nghut ri. Zô é sù gi, Garai Gasang lé jeju hkya-ôn é yanmai, haû Yhumsîng lé bun luî zô nyi ri; a zo sù le, haû Yhumsîng lé bun luî Garai Gasang lé jeju hkya-ôn nyi ri. <sup>7</sup> Hkâsu mù gâ le, nga-nhúng ó yuq nghut kôle, yhumsîng matú za asak dui é a nghut; ó yuq nghut kôle, yhumsîng matú za shi é a nghut. <sup>8</sup> Nga-nhúng asak dui nyi le gi, haû Yhumsîng é matú dui é ru nghut lhê; nga-nhúng shi byuq le gi, haû Yhumsîng é matú shi é ru nghut lhê. Haû mù, asak dui nyi kôlhang, shi byuq kôlhang, nga-nhúng gi, haû Yhumsîng eq sêng é bang nghut lhê.

<sup>9</sup> Haû su mù, Hkrisduq gi, shi byuq bang eq asak dui bâng é Yhumsîng dut sháng gaq ga, shî hkám mù dum dui toq é nghut lhê. <sup>10</sup> Haû mù, nàng gi, haî mù náng é gumang hpó lé jéyáng nyi lhê lú? Haî mù náng é gumang hpó lé wú tiq nyi lhê lú? Nga-nhúng lhunglhâng bang gi, Garai Gasang é tarâ jéyáng tanghkuq hí má yap râ bang chyat nghut lhê. <sup>11</sup> Hkâsu mù gâ le,

"Haû Yhumsîng gi, 'Ngò rû dui nyi é eq rajung za, Ngá é hí má hkyihput hkangmó htuq râ nghut lhê;

Garai Gasang lé, shô hkangmó èq yín yû kó râ nghut lhê.' ga taî ri."<sup>✠</sup> ga kâ tô ri. <sup>12</sup> Haû mù luî, nga-nhúng yuq hkangmó gi, yhumsîng kut laî lo é hkyô lé, Garai Gasang chyáng shit ra râ nghut lhê.

<sup>13</sup> Haû nghut mù, nga-nhúng gi, rayuq eq rayuq tarâ jéyáng lhûm é hkyô lé tô pyám sháng. Ó yuq nghut kôlhang, yhumsîng é gumâng é hkyowuî má, myit leqbat jowò eq

✠ 13:9 Htoq Ló 20:13-15 ✠ 13:9 Nhong 19:18 ✠ 14:11 Esai 45:23

htung htê jowò a to byi râ matú, myit sidiq keq. <sup>14</sup> Haû Yhumsîng Yesuq má nghut nyi é sù ngò gi, haí jung zoshuq nghut kôlhang, yhang baú yhang a sansêng a dut é hkyô lé, hkyak wó sé luí, jing nyi lhê. Nghut kôlhang, ó yuq le, rajung jung lé a sansêng ga myit yu é nghut jáng, yhang é matú, zè haû gi, a sansêng é nghut lhê. <sup>15</sup> Nàng zô é zoshuq yanmai, náng é gumang hpó myit a ngón é nghut le gi, nàng, chyitdap myit mai sô nyi é sù a nghut lo. Hkrisduq shí hkám byi bê sù nghut é, náng é gumang hpó lé, nàng zoshuq é đông mai hkâlhoq hten pyám. <sup>16</sup> Nàng, ge ri nghû myit yu é hkyô lé, agè ashop é đông hkâtaí pyám nhâng. <sup>17</sup> Hkâsu mù gâ le, Garai Gasâng é mingdán gi, zo zo shuq shuq hkyô a nghut é za, dingmán hkyô, nguینگón hkyô eq Chyoiyúng Woi-nyí má gabú é hkyô ru nghut lhê. <sup>18</sup> Haí mù gâ le, shí hkyô đông mai Hkrisduq lé dojaú é sù gi, Garai Gasang ô nau é sù eq byu pè èq hkya-ôn é hui sù nghut ri.

<sup>19</sup> Haû mù luí, nguینگón hkyô má nyi râ eq, rayuq eq rayuq wum byi lhum râ hkyô lé, shikut nyi keq. <sup>20</sup> Zoshuq é yanmai, Garai Gasâng é muzó lé hkâlhoq hten pyám. Zoshuq lunglhang gi, sansêng é chyat nghut lhê; nghut kôlhang, góyuq lé myit leqbat nhang é jung lé zô é sù gi, shut é nghut lhê. <sup>21</sup> Tsibiyiq wing shuq é eq sho zô é hkyô má nghut kôlhang, gotû haí jung kut é nghut kôlhang, náng é gumang hpó lé myit leqbat nhang é nghut le gi, a kut le je ge lhê.

<sup>22</sup> Haû mù, haú pé eq séng luí, nàng lumjínng é haí nghut kôle, nàng eq Garai Gasâng gyoro má za joq nyi sháng gaq. Yhumsîng ge lhê gâ é èq, yhumsing gùng yhumsing mara byi jang a joq é sù gi, hkungsô wó nyi ri. <sup>23</sup> Nghut kôlhang, úng-âng é myit èq zô é nghut le gi, mara byi é hui ri, haí mù gâ le, yhang zô é gi, lumjínng myit mai a nghut; lumjínng myit mai a kut é haí nghut kôlhang, mara nghut ri.

## 15

### *Góyuq Lé Myit Ngón Nhâng Râ Hkyô*

<sup>1</sup> Lumjínng hkyô má wum-o bo é nga-nhúng gi, yhumsîng myit ngón râ hkyô lé a ho é za, wum-o a bò bâng é wum nyhóm hkyô lé, hkam jan byi nyi râ dut lhê. <sup>2</sup> Nga-nhúng yuq hkangmó gi, yhumsing é chyangnâm má é su é ge é hkyô dut râ matú, yhang wó kô myhang lò shoq, yhang lé lhoq ngón byi nyi sháng. <sup>3</sup> Hkâsu mù gâ le, Hkrisduq lhang gi, Yhânggùng yhang lhoq ngón é a nghut; haû gi, "Nang lé rhoí bâng é dang gi, Ngá chyáng gyó ke bê nghut ri."✠ ga, kê tô é eq rajung za nghut ri. <sup>4</sup> Hkâsu mù gâ le, lai lò bê hkûn kê tô é lunglhang gi, nga-nhúng lé mhoq byi râ matú chyat kê tô é nghut lhê; haû gi, Chyúmdang má é hkam jan hkyô eq myit wum byi hkyô đông mai, nga-nhúng myit myoqbyù hkyô wó râ matú nghut lhê.

<sup>5</sup> Haû hkam jan hkyô eq myit wum byi hkyô lé byi é Garai Gasang gi, nungmoq, Hkrisduq Yesuq é htâng châng nyi é u lé, nungmoq yhangchang rading ralhum za dut é woi-nyí byi sháng gaq; <sup>6</sup> haû jáng sheq, nungmoq gi, i-myit rahkat eq nhut htê ralhum èq za, nga-nhúng é Yhumsîng Yesuq Hkrisduq é Yhângwa nghut Sù, Garai Gasang lé, wó hkya-on kungtôn kó râ nghut lhê.

<sup>7</sup> Haû mù luí, Hkrisduq gi, nungmoq lé hap yù bê é eq rajung za, Garai Gasâng é hpungwup shing kang lé lhoq htoq shit râ matú, nungmoq le, rayuq eq rayuq hap yu lhum keq. <sup>8</sup> Hkâsu mù gâ le, ngò, nungmoq lé tái kôlé, haû mying hû é íchýí íwâ pé lé byi tô é danggidíq pé lé lhoq gíng râ matú, Hkrisduq gi, Garai Gasâng é tengmán hkyo é malaí, Yudaq byu pè é dui-nhâng zoshâng dut bê nghut ri. <sup>9</sup> Haû mù, Garai Gasâng é shogyo nhikmyin hkyo é yanmai, haû tûngbaù pé, Garai Gasang lé wó hkya-on kungtôn kó râ nghut lhê. Haú hkyô gi,

"Haû mù luí, tûngbaù pé chyáng má, Nang lé, ngò hkya-on râ nghut lhê;

Náng é mying lé, ngò hkya-on mahkôn râ nghut lhê."✠  
ga kê tô é eq rajung za nghut ri. <sup>10</sup> Dum,

"Tûngbaù pé ê, Yhâng é byu pé eq rahá gabú nyi keq."✠

gâ tô ri. <sup>11</sup> Dum,

"Nungmoq tûngbaù pé lhunglhâng bang ê, haù Yhumsîng lé hkya-on keq, byù myû lhunglhâng bang ê, Yhang lé hkya-on mahkôn hkôn keq."✠

gâ tô ashî nghut ri. <sup>12</sup> Hau htoq agó, Esai-aq taí é gi,

"Yese é Amyit gi, yuq htoq lô luí, Yhang gi, byù myû chângjup é ahtoq má up râ sù nghut lhê;

tûngbaù pé gi, Yhang má myit myoqbyù kó râ nghut lhê."✠

gâ ri.

<sup>13</sup> Haù myit myoqbyù hkyô byí é Garai Gasang gi, Yhang lé lumhkau nyi é bang nungmoq lé, gabú hkyô banshoq eq nguínón hkyô lhoq pyíng byi sháng gaq; haù jáng sheq, nungmoq gi, Chyoiyúng Woi-nyí é wum-o a-tsâm èq, myit myoqbyù hkyô wó byíng mui nyi kó râ nghut lhê.

#### *A Gyuq A Wam É Za, Poluq Laiká Kâ É Hkyô*

<sup>14</sup> Ngá é gumang wui ê, nungmoq gi, ge é hkyô byíng jup é bang, hpaqchyí má gumjup é bang, rayuq eq rayuq mhoqshit lhûm é má kûng é bang nghut é lé, ngá gûng ngò yhang hkyak lumjîng lhê. <sup>15</sup> Ngò gi, nungmoq lé dum lhoq pûn é dông, ahkyak é pé ra-am lé a gyuq a wàm kâ kat bê nghut lhê. <sup>16</sup> Hkâsu mù gâ le, tûngbaù pé gi, Chyoiyúng Woi-nyí dông mai lhoq sân-yúng é hui luí, Garai Gasâng èq hap yù gíng é hkungga wó dut kó sháng gaq ga, Garai Gasâng é gabú danglù lé hkô râ hkyangjong é wò dông, tûngbaù pé chyáng, Hkrisduq Yesuq é hpungmû wùn sù dut râ matú, Garai Gasang, ngo lé jeju byí é yanmai nghut lhê.

<sup>17</sup> Haù mù luí, ngò gi, Garai Gasang lé dojaú é hkyô eq séng luí, Hkrisduq Yesuq má nghutbûn nyi lhê. <sup>18</sup> Ngò gi, ngò taí é eq zui saí é muzó dông le, haù Woi-nyí é a-tsâm chûng mù, kumlhá pé eq laklaí kumlhá pé dông le, tûngbaù pé lé, Garai Gasâng é jîno gyo shoq shuí ú é má, ngo lé Hkrisduq nhang é muzó hkyô lé taí é mai lai luí, gotú haí lé le wám taí é a nghut. <sup>19</sup> Haù mù luí, ngò gi, Yerusalem wà mó mai Ilurikhkam mau jé shoq é hkyô awui ayàm jàm shoq, Hkrisduq é gabú danglù lé hko kyo bê nghut lhê. <sup>20</sup> Ngò hkâ-nhám le myit tuí nyi é hkyô gi, góyuq hi tô é apûn awang má dum a puq saí pyâm é za, Hkrisduq lé a sé shi é jowò má gabú danglù hko kyo râ hkyô nghut lhê. <sup>21</sup> Haù gi, "Yhâng é hkyô lé, taí kyô é a hui shí é bang, myàng kó râ nghut luí,

a wó gyô wú é bang, sê gyo kó râ nghut lhê."✠

ga kâ tô é eq rajung za nghut ri. <sup>22</sup> Haù mù luí, ngò, nungmoq chyáng lé jé râ lé, anum num hkyikyô luqlhum dut nyi é gi, muzó hau é yanmai nghut lhê.

#### *Romaq Myuq Lé Lô Kum Râ Sôn É Hkyô*

<sup>23</sup> Nghut kôlhang, ahkuí gi, shí mau pé má ngò zui saí râ jowò a joq lo é nghut mù, nungmoq lé myàng nau nyi é zanwut myo myo nghut bê eq rajung za, <sup>24</sup> ngò, Sipin ming shut ló é hkûn, nungmoq chyáng wàng râ sôn tô lhê. Ngò gi, lai ló é hkûn, nungmoq lé lò sô kum mù, nungmoq eq rayoq zo zùm yap ngón é htâng má sheq, ngá é hkyowui matú, nungmoq haù mai htuqbang kat râ lé, ngò myoqbyu tô lhê. <sup>25</sup> Ahkuí, ngò kúm gi, Yerusalem wà mó mâ é sân-yúng bang lé dojaú râ matú, haù wâ shut e ló é hkyolat má nghut nyi lhê. <sup>26</sup> Hkâsu mù gâ le, Makedoni eq Ahkaia mau mâ é bang gi, Yerusalem wà mó mâ é sân-yúng bâng chyáng mâ é myùng bâng é matú, garúm chyunghuq hkyui tsing nau bùm bekô nghut ri. <sup>27</sup> Yhangmoq gi, haù su kut nau bùm bekô nghut ri, gè gè ga jáng, haù gi, yhangmoq chyín dap tô é dông ru nghut lhê. Hkâsu mù gâ le, haù Yudaq byu pé é woi-nyí eq sêng é shimân jeju lé, tûngbaù pé bo hkam yù bê nghut le gi, yhangmoq é sutzè shimân jeju lé, Yudaq byu pé eq chôm chûng râ chyín dap tô é dông nghut lhê. <sup>28</sup> Haù mù luí, ngò gi, muzó shí lhum ban kut mù, garúm chyunghuq shí lé, yhangmoq wó hap yù bê lé hkyak sê é htâng má, Sipin ming shut ló râ nghut mù, lai ló uchyang, nungmoq chyáng lé sô kum râ nghut lhê. <sup>29</sup> Ngò gi, nungmoq chyáng lé jé é



hkûn, nungmoq é matú Hkrisduq é shimân jeju byíng jup é èq jé lé râ nghut é lé, ngò sê lhê.

<sup>30</sup> Gumang wuê ê, ngá é matú Garai Gasâng chyáng kyûdung byí é dông, ngò wum kat yhang shikut é hkyô má nungmoq bo wàng lòm râ matú, nga-nhông é Yhumsîng Yesuq Hkrisduq eq Woi-nyí é chytđap myit é yanmai, ngò, nungmoq lé wum taí tsuq kat lhê.

<sup>31</sup> Yuda mau má é a lumjîng bâng chyáng mai, ngò hkyi yu é wó hui luí, Yerusalem wà mó má ngò wùn waq é muzó lé, haú má é sân-yúng bang hap yù gíng é wó dut râ matú kyû bo dung byi keq. <sup>32</sup> Haú jáng sheq, ngò gi, Garai Gasang ô nau é dông mai, gabú myit èq nungmoq chyáng wó jé lé mù, nungmoq eq rahá wum-o wó yû râ nghut lhê. <sup>33</sup> Haú nguîngón hkyo é Garai Gasang gi, nungmoq banshoq bang eq rahá rû nyi nyi sháng gaq ô. Amen.

## 16

### *Shi-kyám Dang*

<sup>1</sup> Ngò gi, Kenhkrea noqkuq hpúng má é hpungtê, nga-nhông é gu-nhá Hpobe lé, nungmoq chyáng shichyen byí kat lhê. <sup>2</sup> Nungmoq gi, sân-yúng bang kut gíng é eq rajung za, haú Yhumsîng má yhang lé hap yù luí, yhang râ tô é hkyô haí nghut kôle, yhang lé htuqbang keq. Hkâsu mù gâ le, yhang gi, byù myo myo lé le, ngo lé le, gyai yhang garúm lai bê sù nghut lhê.

<sup>3</sup> Hkrisduq Yesuq má ngò eq mô wùn luzúm nhik nghut é, Priskila eq Akula lé bo shi-kyám byi keq. <sup>4</sup> Yhangnhik gi, ngá é asak é matú, yhangnhik é asak sum râ í yhang dut wú kô é nghut mù, ngò za a nghut, tûngbaù pé é noqkuq hpúng pé banshoq le, yhangnhik lé jeju bûn lhê.

<sup>5</sup> Yhangnhik é yhûm má chôm huí zup é noqkuq hpúng lé le, bo shi-kyám byi keq. Asia mau má, Hkrisduq lé sâng-hi lumjîng wang lo é, ngò chytđap é Epanetu lé bo shi-kyám byi keq.

<sup>6</sup> Nungmoq é matú gyai yhang shikut wú bê sù nghut é Mariq lé bo shi-kyám byi keq.

<sup>7</sup> Ngò eq rahá htóng lúng wú bê nghut é, ngá é buinûm, Androniku eq Yunia nhik lé bo shi-kyám byi keq. Yhangnhik gi, lagyô pé má myoqdong wó su nhik nghut é htoq agó, ngá é hí má, Hkrisduq má ngò a nyi shi le nyi bê sù nhik nghut akô.

<sup>8</sup> Haú Yhumsîng má, ngò chytđap é sù, Ampliatu lé bo shi-kyám byi keq.

<sup>9</sup> Hkrisduq má, ngamoq é mô zui luzúm nghut é Orban eq ngá é chytđap luzúm Staku lé, bo shi-kyám byi keq.

<sup>10</sup> Hkrisduq má chyam é hui mù, wó lûm bê sù, Apele lé bo shi-kyám byi keq.

Aristobulu eq sêng é yhumbyù wuê lé bo shi-kyám byi keq.

<sup>11</sup> Ngá é buinûm Herudion lé bo shi-kyám byi keq.

Haú Yhumsîng má nghut nyí bê bang, Narkiso é yhumbyù wuê lé bo shi-kyám byi keq.

<sup>12</sup> Haú Yhumsîng má mô zui shikut é myiwê nhik, Truhpena eq Truhposa lé bo shi-kyám byi keq.

Haú Yhumsîng má mô zui gyai yhang shikut é myiwe góyuq, ngá é chytđap luzúm Persi lé bo shi-kyám byi keq.

<sup>13</sup> Haú Yhumsîng má hkyin yu é hui bê sù, Ruhpu lé le, ngá nu dông nghut wú bê nghut é Ruhpû é yhangnu lé le, bo shi-kyám byi keq.

<sup>14</sup> Asunkritu, Hpelegon, Herme, Patroba, Herma eq yhangmoq eq rahá nyi é gumang wuê lé, bo shi-kyám byi keq.

<sup>15</sup> Hpilologu, Yulia, Nerea eq yhang é nhammó eq, Olumpa, yhangmoq eq rahá nyi é sân-yúng bang banshoq lé, bo shi-kyám byi keq.

<sup>16</sup> Rayuq eq rayuq, chyoiyúng bopuq é èq shi-kyám lhum keq.

Hkrisduq é noqkuq hpúng pé banshoq gi, nungmoq lé shi-kyám dang sang kat akô nghut ri.

<sup>17</sup> Gumang wuê ê, nungmoq é lumjîng hkyô má, nungmoq mhoq hkam yù bê nghut é mhoqshit hkyô eq shai lhûm é, gam hkoq hkyô pé eq myit leqbat hkyô pé lhoq htoq é

bang lé sidiq keq nghû, wum taî tsuq kat lhê. Yhangmoq lé koi pyám keq. <sup>18</sup> Hkâsu mù gâ le, haû sù é bang gi, nga-nhông é Yhumsîng Hkrisduq lé dojaú é bang a nghut é za, yhumsing é wamdaú matú dojaú é bang nghut akô. Yhangmoq gi, myit nú-nhâm é bang lé, dang ngón dang nguî dông mhaú zô akô nghut ri. <sup>19</sup> Nungmoq, jino gyo kô é hkyô lé, yuq hkangmó wó gyo bê nghut ri; haû mù, ngò gi, nungmoq é matú gyai yhang gabú nyi lhê; nghut kôlhang, ge é hkyô eq séng luî gi, nungmoq hpaqchyî bò mù, agè ashop hkyô eq séng luî gi, nungmoq a bo lòm râ lé, ngò ô nau ri.

<sup>20</sup> Nguingón hkyo é Garai Gasang gi, a myáng má, nungmoq é hkyiwa ô má Tsadán lé nang pyeq pyám râ nghut lhê.

Nga-nhông é Yhumsîng Yesuq é jeju gi, nungmoq eq rahá nghut nyi sháng gaq ô.

<sup>21</sup> Ngá é mú zui luzúm Timohti gi, nungmoq lé shi-kyám dang sang kat ri; haû eq rajung za, ngá é buinùm wuî Luki, Yason eq Sosipata pé le, shi-kyám dang sang kat akô nghut ri.

<sup>22</sup> Laiká shî lé bo ká sù ngò Tertiu gi, haû Yhumsîng má nungmoq lé shi-kyám kat lhê.

<sup>23</sup> Ngo lé le, noqkuq hpúng gón lé le, bíng hkulum é sù Ge-u gi, nungmoq lé shi-kyám dang sang kat ri.

Haû wa mâ é ngùnzui sù Erastu eq nga-nhông é gumang hpó Kuartu gi, nungmoq lé shi-kyám dang sang kat akô. <sup>24</sup> Nga-nhông é Yhumsîng Yesuq Hkrisduq é jeju gi, nungmoq lhunglhang bang eq rahá nghut nyi sháng gaq. Amen.\*

<sup>25</sup> Byù myû chângjup bang lumjîng luî, Yhang é jino gyo sháng gaq ga, a-nham pyat mai haq tô é hui kôlhang, <sup>26</sup> ahkuî, ahtum abyuq é Garai Gasâng é hkunmó é yanmai, myiqhtoi laiká pé dông hpông shit é eq sé nhâng bê nghut é, sê gyo wuî é hkyo é shing-rán má cháng luî, ngá é gabú danglù eq Yesuq Hkrisduq é hkyô taî pyo é dông, nungmoq lé wó lhoq ging tîng byî é, <sup>27</sup> rayuq za é hpaqchyî bo sù Garai Gasâng chyáng, Yesuq Hkrisduq dông mai, hpungwup shingkang gi, ahtum abyuq ru joq nyi sháng gaq ô! Amen.

\* 16:24 Chyúmding ra-am má chyúmbun 24 shî a bo é nghut lhê.

## KORINHTUQ Pê Chyáng Hî Dàm Hun Kat é Laiká (1 Corinthians)

<sup>1</sup> Garai Gasang ô nau é eq rajung za, Hkrisduq Yesuq é lagyo dut râ matú ji yù huí é sù ngò Poluq eq, ngamoq é gumang hpó Sositeni gi, <sup>2</sup> jowò hkangmó má nga-nhông é Yhumsîng Yesuq Hkrisduq é myìng lé lêng é bang eq rahá, chyoyúng bang dut râ matú ji yù huí é eq Hkrisduq Yesuq má lhoq sân-yúng é huí é bang nghut é, Korinhtuq myuq mâ é, Garai Gasâng é noqkuq hpúng lé, dang kyô kat lhê; Hkrisduq gi, ngamoq é eq yhangmoq é Yhumsîng nghut lhê.

<sup>3</sup> Nga-nhông é Îwa Garai Gasang eq Yhumsîng Yesuq Hkrisduq chyáng mâ é jeju eq nguingón hkyô gi, nungmoq chyáng ru joq nyî sháng gaq ô.

### *Hkrisduq É Yanmai Wó É Jeju*

<sup>4</sup> Garai Gasâng jeju lé Hkrisduq Yesuq đông mai nungmoq lé byi bê nghut mù luí, ngò gi, nungmoq é matú Garai Gasang lé ayang jeju hkya-ôn nyi lhê. <sup>5</sup> Hkâsu mù gâ le, nungmoq gi, Hkrisduq đông mai, nungmoq dang taí é hkyô banshoq eq nungmoq é sumsé hpaqchyî banshoq má je lhoq gumjup é hui bekô nghut ri. <sup>6</sup> Haú gi, Hkrisduq Yesuq eq séng luí, ngamoq saksé hkâm é hkyô têng é lé, nungmoq chyáng shit nyi é nghut lhê. <sup>7</sup> Haú mù, nga-nhông é Yhumsîng Yesuq Hkrisduq dum htoq shit râ lé, nungmoq gyai myoqbyu láng nyi é u má, nungmoq gi, woi-nyí hkyô eq sêng é chyunghuq haí lé le langhpyut kó râ a nghut. <sup>8</sup> Nga-nhông é Yhumsîng Yesuq Hkrisduq é buinyì má, nungmoq lé mara hùn râ hkyô a bò shoq, Hkrisduq gi, nungmoq lé, htáng shoq gíngtíng nhang nyi râ nghut lhê. <sup>9</sup> Nga-nhông é Yhumsîng nghut é Yhang Zo Yesuq Hkrisduq eq rahá zùm yap râ matú, nungmoq lé ji yù bê sù Garai Gasang gi, lhumzui Sù nghut ri.

### *Noqkuq Hpúng Má Gam Hkoq Lhâm É Hkyô*

<sup>10</sup> Gumang wui ê, nungmoq hkaú má gam hkoq lhâm é hkyô pé a joq é za, nungmoq é myit eq myit sôn wú é hkyô má gumjup shoq rading ralhú za dut nyi sháng gaq, nungmoq lhunglhang bang rayuq eq rayuq byìn hpyé gohut huí nyi keq nghú, ngò, nungmoq lé, nga-nhông é Yhumsîng Yesuq Hkrisduq é myìng mai dúng tôngbán kat lhê. <sup>11</sup> Ngá é gumang wui ê, Hkloe é yhâm byù wui gi, nungmoq hkaú má mabyoq htoq hkyô joq é lé, ngo lé hkyáng lo shit akô. <sup>12</sup> Ngò haú su nghú taí é gi, nungmoq mâ é rayuq yuq gi, "Ngò gi, Poluq htâng châng lhê." ga, góyuq gi, "Ngò gi, Apolo htâng châng lhê." ga, dum rayuq gi, "Ngò gi, Kehpa htâng châng lhê." ga, dum góyuq gi, "Ngò gi, Hkrisduq htâng châng lhê." ga, taí bùm kô é yanmai nghut lhê.

<sup>13</sup> Hkrisduq gi, gam hkoq é hui bê lhú? Ngò Poluq gi, nungmoq é matú tapzîng má jén sat é hui bê lhú? Nungmoq gi, ngá é myìng mai wui-myhup hkâm yù kô é lhú? <sup>14</sup> Ngò gi, Krispu eq Ge-u nhik mai lai luí, nungmoq ó yuq lé le wui-myhup a hkám byî wú é yanmai, <sup>15</sup> nungmoq ó yuq le, ngá é myìng mai wui-myhup hkâm yù bê nghú a wó taí é nghut mù, ngò, Garai lé jeju hkya-ôn lhê. <sup>16</sup> (Stehpana é yhumbyù wui lé le, ngò wui-myhup hkám byî é nghut lhê, haú mai lai luí gotú ó lé hkám byî záng ashî laq, ngò a myit bun lo nghut ri.) <sup>17</sup> Hkâsu mù gâ le, Hkrisduq, ngo lé nhang kat é gi, wui-myhup hkám byi râ matú a nghut, gabú danglù hko kyo râ matú sheq nhang kat é ru nghut lhê; nghut kôlhang, waxâng zô wui é hpaqchyî byéng-yá dang đông hko kyô é a nghut mù, Hkrisduq é tapzîng é a-tsam gi, akôm a dut byuq é nghut lhê.

### *Garaí É A-tsam Eq Hpaqchyî Byéng-yá Gi, Hkrisduq*

<sup>18</sup> Hkâsu mù gâ le, tapzîng má Yesuq shî hkâm é hkyô eq sêng é danglù gi, htên byoq hui râ bâng é matú, danggang dut byuq ri; nghut kôlhang, hkyi yu é huí nyì bang nga-nhông é matú gi, Garai Gasâng é a-tsam nghut ri. <sup>19</sup> Hkâsu mù gâ le, Chyúmdang má kâ tô é gi,

"Hpaqchyî bò bâng é hpaqchyî byéng-yá lé, Ngò lhoq htên pyám râ nghut lhê; nyan bò bâng é nyan lé, Ngò, ajè dut pyám nhâng râ nghut lhê."<sup>☆</sup>

ga ri. <sup>20</sup> Hpaqchyî byéng-yá bò bang gi, hkâmá lhú? Hpaqchyî laiká kung bang gi, hkâmá lhú? Ipyat shi é dang taí kung bang gi, hkâmá lhú? Garai Gasang gi, mingkân é hpaqchyî byéng-yá lé lhoq ngok pyám bê a nghut lhú? <sup>21</sup> Hkâsu mù gâ le, Garai Gasâng é hpaqchyî byéng-yá mai ga jang, mingkan zo wuí gi, yhumsing é hpaqchyî byéng-yá đông mai Garai Gasang lé a wó sé kô é yanmai, danggang gâ pyám byi kô é mungdang lé hko kyô é đông lumjínng bang lé hkyi yù râ matú, Garai Gasang myit hpyit é nghut lhê. <sup>22</sup> Yudaq byu pé gi, limik kumlhá pé lé dúng akô; Grik byu pé gi, hpaqchyî byéng-yá lé ho akô nghut ri. <sup>23</sup> Nghut kôlhang, ngamoq gi, tapzîng má jén sat huí é Hkrisduq é hkyô lé hko kyô lhê. Haú gi, Yudaq byu pé é matú myit leqbat jowò eq tûngbàu pé é matú danggang dut byuq ri. <sup>24</sup> Nghut kôlhang, Garai Gasâng èq ji yù huí é Yudaq byu pé eq Grik byu pé é matú, Hkrisduq gi, Garai Gasâng é a-tsam eq Garai Gasâng é hpaqchyî byéng-yá nghut ri. <sup>25</sup> Hkâsu mù gâ le, Garai Gasâng é ngok hkyô gâ é lháng gi, byu é hpaqchyî byéng-yá htoq má je gyaú ri; Garai Gasâng é wum nyhóm hkyô gâ é lháng gi, byu é wum-o htoq má je gyaú ri.

<sup>26</sup> Gumang wuì ê, Garai Gasang, nungmoq lé ji yu é hkûn, nungmoq hkâsu dut nyi é hkyô lé myit wú keq. Waxâng zô wui é nyì yap a-tsáng đông hpaqchyî byéng-yá bo é bang, ahkáng ayá wó é bang, zaugun suwún amyú mâ é bang a myô é nghut lhê. <sup>27</sup> Nghut kôlhang, Garai Gasang gi, hpaqchyî byéng-yá bò bang lé hoq lhoq hpu râ matú, mingkan mâ é ngok bang gâ é lé hkyin yu é nghut lhê; Garai Gasang gi, wum bò bang lé hoq lhoq hpu râ matú, mingkan mâ é wum nyhóm bang gâ é lé hkyin yu é nghut lhê. <sup>28</sup> Yhang gi, mingkân èq ahkyak tô é lé lhoq htên pyám râ matú, haí a nghut é lé le, mingkan mâ é aróng a bo é eq wú tiq pyám huí é lé le, hkyin yu é nghut lhê. <sup>29</sup> Haú gi, ó yuq le, Yhâng é hí má a ge nghutbun râ matú nghut ri. <sup>30</sup> Garai Gasâng é yanmai, nungmoq gi, Hkrisduq Yesuq má nghut nyì bekô nghut ri; Hkrisduq gi, nga-nhông é matú, Garai Gasâng chyáng mâ é hpaqchyî byéng-yá dut bê nghut ri. Haú gi, nga-nhông é dingmán hkyô, chyoiyúng hkyô eq hkyi yù hkyô nghut ri. <sup>31</sup> Haú mù luí, "Gumrong é sù gi, haú Yhumsing má gumrông sháng gaq."<sup>☆</sup> ga kâ tô é eq rajung za nghut ri.

## 2

### *Woi-nyí Mai Lo É Garai Gasâng É Hpaqchyî Byéng-yá*

<sup>1</sup> Gumang wuì ê, ngò gi, Garai Gasang eq sêng é saksé hkyô lé nungmoq chyáng taí pyô râ matú jé lé é hkûn, dang taí kûng é eq hpaqchyî byéng-yá mó bo é đông lé é a nghut.

<sup>2</sup> Hkâsu mù gâ le, ngò, nungmoq eq rahá nyi é u lé, Yesuq Hkrisduq eq Yhang tapzîng má jén sat huí é hkyô mai lai luí, jung hkanngó lé tô-myhî pyám râ nghú myit hpyit yù bê nghut lhê. <sup>3</sup> Ngò gi, nungmoq chyáng jé lé é hkûn, wum nyhóm é eq gyai yhang gyuq nán é nghut lhê. <sup>4</sup> Ngá é danglù eq ngò hko kyô é hkyô gi, hpaqchyî bo é eq mhuí yu é dang pé đông a nghut é za, Woi-nyí é a-tsâm èq nungmoq lé shit é đông ru nghut mù, <sup>5</sup> nungmoq é lumjínng myit gi, byù é hpaqchyî byéng-yá má a nghut é za, Garai Gasâng é hpungwup a-tsam má nghut nyi lhê.

<sup>6</sup> Nghut kôlhang, ngamoq gi, myit dîng bê bang lé hpaqchyî byéng-yá đông nyo lhê; shí pyat lhê é hpaqchyî byéng-yá eq htên byoq nyi huí é shí pyat mâ é záu wui é hpaqchyî byéng-yá đông kúm a nghut. <sup>7</sup> Ngamoq taí é gi, haq tô é eq, ahkýing nghu é lháng a joq shi mai nga-nhông é hpungwup shingkâng é matú Garai Gasang tô to byí é hpaqchyî byéng-yá nghut é, Garai Gasâng é záu tô é hpaqchyî byéng-yá lé taí é ru nghut lhê. <sup>8</sup> Shí pyat lhê

☆ 1:19 Esai 29:14 ☆ 1:31 Yer 9:24

é zau wuî gi, hpaqchyî byéng-yá haû lé rayuq lháng a sê gyo kó nghut ri; yhangmoq sê gyo kô é ru nghut le gi, hpungwup shingkang bo é Yhumsîng lé tapzîng má jén sat pyám kó râ a nghut. <sup>9</sup> Nghut kôlháng, Chyúmdang má,

"Ó yuq èq le a myang wú, ó yuq èq le a wó gyô wú, ó yuq èq le a bûn myit wú é hkyô lé, Garai Gasang gi, Yhang lé chyitdap bâng é matú lajang to byi bê nghut ri." <sup>☆</sup>

ga kê tô é eq rajung za nghut ri. <sup>10</sup> Nghut kôlháng, Garai Gasang gi, haû hkyô lé, Yhâng é Woi-nyí dông nga-nhúng lé hpông shit bê nghut ri.

Woi-nyí haû gi, jung hkangmó lé ho gôn wú é nghut luî, Garai Gasâng é zaú tô é hkyô lé lháng ho gôn wú é sũ nghut ri. <sup>11</sup> Byù má lúng é woi-nyí za a nghut jáng gi, byù rayuq myit é hkyô pé lé, ó yuq wá wó sê lhê lhú? Haû eq rajung za, Garai Gasâng é Woi-nyí za a nghut jáng, Garai Gasang myit é hkyô lé, ó yuq le wó sê é a nghut. <sup>12</sup> Nga-nhúng gi, mingkân é woi-nyí lé hap yu tô é a nghut é za, Garai Gasâng èq nga-nhúng lé byî to bê jeju lé, ngamoq wó sê gyo râ matú, Garai Gasâng chyáng mâ é Woi-nyí lé sheq hap yu tô é ru nghut lhê. <sup>13</sup> Haû mù luî, ngamoq gi, waxâng zô wui é hpaqchyî byéng-yá èq mhoq byî é dang dông taî é a nghut, Garaî é Woi-nyí èq mhoq byî é dang dông taî é sheq ru nghut mù, woi-nyí eq sêng é tengmán hkyô lé woi-nyí eq sêng é dang dông taî sân kyô é nghut lhê. <sup>14</sup> Haû Woi-nyí lé a wó é sũ gi, Garai Gasâng é Woi-nyí mai lo é hkyô pé lé a hap yu é nghut lhê; haî mù gâ le, haû pé gi, yhâng é matú ngok é hkyô nghut luî, woi-nyí hkyô dông mai haû hkyô lé a wú é yanmai, yhang gi, haû pé lé a wó sê gyo nghut ri. <sup>15</sup> Woi-nyí eq sêng é byù gi, lhunglháng lé wó jéyáng lhê, nghut kôlháng, yhang lé kúm gi, ó yuq èq le wó jéyáng é a nghut. <sup>16</sup> Chyúmdang má,

"Hkâsu mù gâ le, ó yuq wá, haû Yhumsing é myit lé sé mù, Yhang lé wó mhoqshit wú é lhú?" <sup>☆</sup>

ga kê tô ri. Nghut kôlháng, nga-nhúng gi, Hkrisduq é myit lé wó é bang nghut lhê.

### 3

#### *Noqkuq Hpúng Má Gam Hkoq Lhûm É Hkyô*

<sup>1</sup> Gumang wuî ê, hí hkûn, ngò gi, nungmoq lé, Woi-nyí eq sêng é bang lé dông wó taî é a nghut; mingkan eq sêng é bang dông nghut kômù, Hkrisduq má zonú su dut bang lé dông sheq taî wú é nghut lhê. <sup>2</sup> Nungmoq gi, zoshuq apat lé a wó zo shi kó nghut é yanmai, ngò gi, nungmoq lé naú byi huq é nghut lhê.\* Ahkuî lháng, nungmoq gi, zoshuq apat lé a wó zo shi kó nghut ri. <sup>3</sup> Nungmoq gi, mingkan eq sêng é bang ru nghut nyi ashî kó nghut ri. Hkâsu mù gâ le, manôn hkyô eq byoq lhum hkyô gi, nungmoq chyáng joq nyi é yanmai, nungmoq gi, mingkan eq sêng é bang nghut lhê a nghut kó luq? Mingkan zo wuî su nyi yap bum lhê a nghut kó luq? <sup>4</sup> Rayuq gi, "Ngò gi, Poluq htâng châng lhê." ga, góyuq gi, "Ngò gi, Apolo htâng châng lhê." ga taî nyi bùm kô é nghut jáng, nungmoq gi, mingkan zo wuî nghut nyi bum lhê a nghut kó luq?

<sup>5</sup> Apolo gi, ó wá nghut lhê? Poluq gi, ó wá nghut lhê? Nga-nhik gi, Garaî é dui-nhâng zoshâng za nghut luî, ó le ó lé, haû Yhumsing èq hun tô é muzó eq rajung za wùn waq é nghut luî, nungmoq gi, ngá-nhik dông mai wó lumjîng kô é ru nghut lhê. <sup>6</sup> Ngò gi, gabú danglù amyui lé hô kat, Apolo gi, wuî hpyun byi, nghut kôlháng, yuq kô lò nhang é gi, Garai Gasang za ru nghut lhê. <sup>7</sup> Haû mù, amyui hô kat sũ eq wuî hpyun byi sũ gi, ahkyak mó a nghut, yuq kô lò nhang é Garai Gasang za sheq ahkyak ru nghut lhê. <sup>8</sup> Amyui hô kat sũ eq wuî hpyun byi su nhik myoqbyu tô é hkyô gi, rajung za nghut ri; nghut kôlháng, yhumsîng shikut é eq rajung za, ó le ô é shigyaú chyunghuq wó yû kó râ nghut lhê. <sup>9</sup> Hkâsu mù gâ le, ngamoq gi, Garai Gasâng é mù zui luzúm wuî nghut lhê; nungmoq gi, Garai Gasâng é yò, Garai Gasâng é yhûm nghut nyi akô.

<sup>10</sup> Garai Gasang, ngo lé byî to bê jeju eq rajung za, yhûm saí kung sũ rayuq dông, ngò gi, yhûm apûn awang hi to bê nghut lhê; gotû byù gi, hau é ahtoq má saí toq jat nyi é nghut lhê. Nghut kôlháng, yuq hkangmó gi, yhumsîng saí é má rago sidiq râ lhê. <sup>11</sup> Hkâsu mù

☆ 2:9 Esai 64:4    ☆ 2:16 Esai 40:13    \* 3:2 Nungmoq lé naú byi huq é, gâ é gi, lui é hkyô pé lé hí mhoq byî é lé ga lhê.

gâ le, hi to gù nghut é, Yesuq Hkrisduq nghu é yhûm apûn awang mai lai luî, ó yuq le, gotû yhûm apûn awang lé wó saî é a nghut. <sup>12</sup> Yhûm apûn awang hau é ahtoq má, hîng, ngùn, hpaudap luqgok pé, sik, mhan, hkowá pé lé chûng mù saî jat kô é nghut jáng, <sup>13</sup> yuq hkangmó é muzó hkâsu nghut é hkyô lé lhoq htoq shit é hui râ nghut lhê. Haî mù luî gâ le, haû Yesuq é Buinyî gi, haû lé byu-myàng nhâng mù, haû buinyî lé gi, myî eq lhoq htoq shit râ nghut lhê. Haû myi gi, yuq hkangmó saî é muzó hkasû é nghut é lé chyâm râ nghut lhê. <sup>14</sup> Rayuq yuq saî é yhûm gi, ru gîng nyi é nghut jáng, haû yuq gi, yhang é shigyaú chyunghuq wó yû râ nghut lhê. <sup>15</sup> Nghut kôlhang, yhûm haû nyé gyó byuq é nghut jáng, yhang gi, yhûm sûm byuq é hui zo râ nghut lhê; yhang gi, asak lut kôlhang, myishâm mai wó lut é byu su dut râ nghut lhê.

<sup>16</sup> Nungmoq gi, Garai Gasâng é noqkuq yhûm nghut luî, Garai Gasâng é Woi-nyí gi, nungmoq má lúng nyî bê hkyô lé a sé kó lú? <sup>17</sup> Rayuq yuq, Garai Gasâng é noqkuq yhûm lé lhoq htên é nghut jáng, Garai Gasang gi, haû yuq lé lhoq htên pyám râ nghut lhê. Hkâsu mù gâ le, Garai Gasâng é noqkuq yhûm gi, chyoiyúng lhê; nungmoq gi, noqkuq yhûm haû nghut akô.

<sup>18</sup> Nungmoq gi, yhumsing gùng yhumsîng hkâlhoq nghoq kó. Nungmoq mâ é rayuq yuq, shí ipyat mâ é byù nyi a-tsáng dông hpaqchyî byéng-yá bò sù ga myit é nghut jáng, hpaqchyî byéng-yá akying bò sù wó dut sháng gaq, yhang gi, a-ngok sù dut râ lhê. <sup>19</sup> Hkâsu mù gâ le, mingkan shî mâ é hpaqchyî byéng-yá gi, Garai Gasâng é hí má ngok é hkyô nghut ri. Haû gi, "Garai Gasang gi, hpaqchyî byéng-yá bò bang lé, yhangmoq é hpaqchyî má yhang myí to nhang ri." ✠ ga kâ tô é eq rajung za nghut ri. <sup>20</sup> Hau htoq agó, "Haû Yhumsîng gi, hpaqchyî byéng-yá bò bang myit é hkyô pé akôm nghut é lé sê lhê." ✠ ga le kâ tô ri. <sup>21</sup> Haû mù luî, ó yuq le, byù eq sêng é hkyô má gyáng é dang a taí kó sháng gaq! Lhunglhang gi, nungmoq é chyat nghut lhê. <sup>22</sup> Poluq le, Apolo le, Kehpa le, mingkan le, dui nyi é hkyô le, shi é hkyô le, ahkuí lhê hkyô eq htàngnùng mâ é hkyô le, banshoq gi, nungmoq é chyat nghut ri. <sup>23</sup> Nungmoq gi, Hkrisduq é nghut akô; Hkrisduq gi, Garai Gasâng é nghut ri.

#### 4

##### *Hkrisduq É Lagyô Pé*

<sup>1</sup> Haû mù luî, byu pé gi, ngamoq lé, Hkrisduq é dui-nhâng zoshâng wui dông eq Garai Gasâng é zaú tô é hkyô pé lé taí pyô râ matú ap byî tô é hui bang dông sôn yù râ lhê. <sup>2</sup> Haû dông nghut jáng, ap byî tô é hui bang gi, yhumsîng lhumzui hkyô lé saksé shit râ dut lhê. <sup>3</sup> Nungmoq eq nghut nghut, waxâng zô wui é tarâ rûng mai nghut nghut, ngo lé jéyáng kô le, ngá é matú atiq azo za nghut lhê; gè gè ga jáng, ngá gûng ngò lhang a jéyáng é nghut lhê. <sup>4</sup> Haî mù gâ le, ngá gûng ngò mara a bò bûn é nghut kôlhang, haû gi, ngo lé wó lhoq sân-yúng byî é a nghut. Ngo lé jéyáng é sù gi, haû Yhumsîng nghut lhê. <sup>5</sup> Haû mù, masat tô é ahkyíng a jé shimá haî lé le a jéyáng é za, haû Yhumsîng jé lé shoq, lánng nyî keq. Yhang gi, mauchut hkaû má haq tô é pé lé byu-myàng nhâng mù, byu pé é myit nhiklhum má lúng é hkyô lé lhoq htoq shit râ nghut lhê. Haû hkûn, yuq hkangmó gi, ó le ó wó gíng é hkyô-ôn hkyô lé, Garai Gasâng chyáng mai wó yù râ nghut lhê.

<sup>6</sup> Gumang wui ê, ngò gi, "Kâ tô é gû mai hkâlai." gâ é sanghkyâng é lichyúm lé, ngamoq chyáng mai nungmoq wó mhoq yû sháng gaq nghû, nungmoq é akyu é matú, ngò eq Apolo má haû pé lé yù mù dangtú kut é nghut lhê. Haû hkûn, nungmoq gi, nghutbûn é dông, rayuq lé gi, wú ko, góyuq lé gi, wú shóm, a kut kó râ nghut lhê. <sup>7</sup> Ó yuq wá, nang lé, góyuq eq shaî shoq kut lhê lú? Nang hap yu é a nghut le gi, wó râ lú? Nang, hap yu é nghut le gi, a hap yu é dông haî mù nghutbûn nyi lhê lú?

<sup>8</sup> Nungmoq gi, râ é lhunglhang gumjup bang nghut bekô nhung! Nungmoq gi, wó bang dut gù nghut bekô nhung! Ngamoq a lom é za, nungmoq gi, hkohkam pé dut bekô nhung! Ngamoq le, nungmoq eq rahá hkohkam pé wó dut sháng gaq, nungmoq gi, gè gè yhang

hkohkam pé dut to bekô râ lé, ngò hkâ-í yhang ô nau nyi lhê ô! <sup>9</sup> Nghut kôlhang, sat râ matú doqdan huí é shúm byû pé lé su, Garai Gasang gi, lagyô pé nghut é ngamoq lé de de kut htoq shit bê nghû, ngò wó myit ri. Ngamoq gi, nyi mi-nyì, joq mijoq, maumang lagyô pé eq waxâng zô wui é hí má, wú kûn jung đông dut nhang é huí nyi gù bê nghut lhê. <sup>10</sup> Ngamoq gi, Hkrisduq é yanmai ngok é bang đông sôn yu é hui kôlhang, nungmoq kúm gi, Hkrisduq má hpaqchyî gyaí bo é bang đông dut bekô nhung! Ngamoq gi, wum nyhôm é bang đông sôn yu é hui kôlhang, nungmoq kúm gi, wúm bo é bang đông dut bekô nhung! Nungmoq gi, hkunggâ é huí akô; ngamoq kúm gi, hkunggâ é a hui nhung! <sup>11</sup> Shí hkyíng shí u jé shoq, ngamoq gi, zòmut wuishit huí é, mebu ajeq amyhâ dut huí é, nhuq bat huí é, yhumsing é nyi jowò a wó é bang nghut nyi lhê. <sup>12</sup> Ngamoq gi, yhumsing loq èq yhang mù zui wum kat nyi lhê. Ngamoq gi, nhing pyâm é hui jáng, shimân byi, zing-rî é hui jáng, jân pyám kut lhê. <sup>13</sup> Ngamoq gi, lumù gansang é hui jáng, dang ngón dang nguî tû nyo lhê. Ngamoq gi, ahkuî jé shoq, myidàm htoq mâ é hpoqkyuq hpoqpyâng eq mingkân é buzaq pé đông sôn yu é huí nyi lhê.

<sup>14</sup> Ngò gi, nungmoq lé hoq lhoq hpu râ matú háu pé lé kê é a nghut, ngá é chyitdap zo wuî lé đông lhoq pûn kying râ matú ru nghut lhê. <sup>15</sup> Nungmoq gi, Hkrisduq má mhoqshit bang ra mun wó kê é nghut kôlhang, îwâ pé myo shoq wó kê é a nghut; hkâsu mù gâ lé, ngò gi, haû gabú danglù đông mai, Hkrisduq Yesuq má nungmoq é îwa dut é nghut lhê. <sup>16</sup> Haû mù luî, ngò kut é su cháng keq nghû, ngò, nungmoq lé lung kat lhê. <sup>17</sup> Hau é yanmai, ngò gi, haû Yhumsîng má lhumzui sù nghut é, ngò chyitdap é ngá zo đông nghut sù Timohti lé, nungmoq chyáng nhang kat é nghut lhê. Yhang gi, Hkrisduq Yesuq mâ é ngá é asak duì hkyô lé, jowò hkangmó mâ é noqkuq hpúng hkangmó lé ngò mhoq byí é eq rajung za, nungmoq lé lhoq pun byi râ nghut lhê.

<sup>18</sup> Nungmoq mâ é ra-am gi, nungmoq chyáng ngò a dum jé lé râ su ngam pyám kômù, nghutbûn byuq bekô nghut ri. <sup>19</sup> Nghut kôlhang, haû Yhumsîng gyô é nghut jáng, ngò gi, nungmoq chyáng hân za jé lé râ nghut lhê; haû hkûn, ngò gi, nghutbûn é byù háu bang haî taí é hkyô lé za a nghut, yhangmoq hai a-tsam wó é hkyô lé le gôn htoq râ nghut lhê. <sup>20</sup> Hkâsu mù gâ le, Garai Gasâng é mingdán gi, taí é dang má bo é a nghut, a-tsam má sheq ru nghut lhê. <sup>21</sup> Nungmoq hká đông ô nau akô lú? Ngò gi, nungmoq chyáng, nuichûm hkat èq, a nghut jáng, chyitdap é eq nú-nhâm é myit mai lé lô ra râ lú?

## 5

### *Ashop É Đông Gungsho Zùm Yap É Hkyô Kut É Sù Lé Lhoq Htoq Pyám Râ Hkyô*

<sup>1</sup> Nungmoq chyáng, ashop é đông gungsho zùm yap é hkyô joq é lé, hkyak taí hù lò bekô; haû gi, a lumjîng bâng chyáng lhang a dut wú é hkyô nghut é, yuqgè rayuq gi, yhangwâ é myiwe eq nyi zô lhûm nyi é hkyô nghut ri. <sup>2</sup> Nghut kôle, nungmoq gi, nghutbûn nyi bum akô nhung! Haû đông a nghut é za, nungmoq gi, yón é myit tûn shit mù, haû su kut é byù lé, nungmoq é hpúng mai lhoq htoq pyâm le, a gè kó lú? <sup>3</sup> Ngò gi, ngá gungdu, nungmoq eq rahá a nyi to kôlhang, ngá é i-myt gi, nungmoq eq rahá nghut nyi luî, gungdu jé nyi tô é đông mai, haû hkyô kut é sù lé jéyáng doqdan gù nghut lhê. <sup>4</sup> Nungmoq gi, nga-nhûng é Yhumsîng Yesuq é myîng mai zup zing mù, ngá é i-myt gi, nungmoq eq rahá nghut nyi luî, nga-nhûng é Yhumsîng Yesuq é a-tsam le, nungmoq eq rahá nghut nyi é hkûn, <sup>5</sup> byù háu yuq lé, Tsadán é loq má ap byi pyám keq.\* Haû jáng, Yhumsîng é buinyi má, yhang é woi-nyí gi, hkyi yu é hui râ matú, yhang é yubak gungsho gi, lhoq htên pyâm é hui râ nghut lhê.

<sup>6</sup> Nungmoq é nghutbun hkyô gi, ge é a nghut. Mún† ra tsuí zo gi, muk long gón lé wó lhoq daú nhang é lé, nungmoq a sé kó lú? <sup>7</sup> Nungmoq gi, múnchi a bo é bang nghut nyi kê é eq rajung za, múnchi a bo é muk htung asik su wó dut kê sháng gaq, múnchi axau lé

\* 5:5 Tsadán é loq má ap byi pyám keq gâ é gi, hpúng byù wui eq a zùm yap nhâng lo râ lé taí é nghut lhê. † 5:6 Mún gâ é gi, yubak mara lé taí nau é nghut lhê. Lhoqlhai Pôí jé jáng, Israelaq byu pé gi, yhangmoq wó é múnchi banshoq lé lúhú pyám mù, múnchi a bo é muk saí kê é nghut lhê.

lhuí pyám keq. Hkâsu mù gâ le, nga-nhùng é Lhoqlhai Poí sauzo, Hkrisduq gi, hkungga nhong é hui bê nghut lhê. <sup>8</sup> Haû mù luí, nga-nhúng gi, agè agáu hkyô eq hpuzo nhâng hkyô nghut é múnchi axau bo é đông a nghut é za, lhumzui hkyô eq tengmán hkyô é muk nghut é, múnchi a bo é muk èq, Poí haû lé kut nyí sháng.

<sup>9</sup> Ashop é đông gungsho zùm yap é bang eq hkâzùm kó nghû, ngò, nungmoq lé, ngá é laiká má kâ kat byi bê nghut lhê. <sup>10</sup> Nghut kôlhang, mingkan shî eq sêng é, ashop é đông gungsho zùm yap é bang, myoqnoq é bang, mhaú zô é bang eq hparà noq é bang lé hkâzùm yap kó nghû é gi, a nghut. Haû su ru nghut le gi, mingkan htoq shî mai nungmoq htoq ló byuq ra kô râ nghut lhê. <sup>11</sup> Nghut kôlhang, yhânggùng yhang gi, gumang ga kôle, ashop é đông gungsho zùm yap é, myoqnoq é, hparà noq é, lumù gansang é, î shuq wut é, mhaú zô é sù ó yuq eq le a ge zùm yap kô râ nghut lhê nghû, ahkuí, ngò, nungmoq lé kâ kat nau é nghut lhê. Haû sù é byù eq gi, rahá lhang hkâzo kó.

<sup>12</sup> Haû noqkuq hpúng shinggan mâ é bang lé jéyáng râ gi, ngò eq haí sêng lhê lhuí? Nghut kôlhang, hpúng ahkaû mâ é bang lé nungmoq jéyáng râ dut lhê. <sup>13</sup> Hpúng shinggan mâ é bang lé gi, Garai Gasang jéyáng râ nghut lhê. Nghut kôlhang, "Haû agè agáu é sù lé, nungmoq chyáng mai lhoq htoq pyám keq."☆ gâ tô ri.

## 6

### *Lumjínng Bàng Hkaû Má Jéyáng Lhùm É Hkyô*

<sup>1</sup> Nungmoq mâ é rayuq yuq gi, gumang góyuq eq dang-rhâng lhùm tô é nghut jáng, haû hkyô lé jéyáng nhâng râ matú, haû sân-yúng bàng é hí má taí râ malaí, Garai a wó bàng é hí má wám taí râ lhuí? <sup>2</sup> Haû sân-yúng bang gi, mingkan lé jéyáng râ nghut é hkyô lé, nungmoq a sé kó lhuí? Nungmoq gi, mingkan lé jéyáng râ bang nghut kôle nhing, tiq é mù pé lé wó jéyáng é bang a nghut kó lhuí? <sup>3</sup> Nga-nhúng gi, maumâng pé lé jéyáng râ nghut é hkyô lé, nungmoq a sé kô lhuí? Haû mù, shí pyat mâ é hkyô pé lé, gè gè yhang wó jéyáng kô râ nghut lhê ô! <sup>4</sup> Haû mù luí, nungmoq gi, dang-rhâng lhùm é mù pé joq é nghut jáng, noqkuq hpúng má ahkyak a nghut é bang lé tarâ agyì kut nhâng kô râ lhuí? <sup>5</sup> Ngò, haû su nghû taí é gi, nungmoq lé hoq hpu nhâng râ matú nghut lhê. Lumjínng bàng chyáng dang-rhâng lhùm é hkyô lé wó jéyáng râ hpaqchyí luq shoq bo é byù, nungmoq chyáng rayuq lhang a nyì dut kô râ lhuí? <sup>6</sup> Nghut kôlhang, nungmoq gi, gumang yhangchang rayuq eq rayuq, a lumjínng bàng é hí má lhang rùng shok lhum akô nhung!

<sup>7</sup> Nungmoq hkaû má mù jéyáng lhùm é hkyô joq é nghut jáng, nungmoq gi, sum lugù nghut bê. Góyuq èq shut le lhang rû ge lhê a nghut kô lhuí? Mhaú zô é huí le lhang rû gè lhê a nghut kô lhuí? <sup>8</sup> Nghut kôle, nungmoq yhang gi, mhaú zo kô é eq shut kô é nghut luí, haû gi, nungmoq é gumang wuì lé kut é nghut lhê.

<sup>9</sup> Agè agáu é bang gi, Garai Gasâng é mingdán mâ é shimân jeju a myang hkam yù kó râ nghut é hkyô lé, nungmoq a sé kó lhuí? Hkâ-nâ nyì kó. Ashop é đông gungsho zùm yap é bang le, hparà noq é bang le, su-myi sulàng lú é bang le, shiwa hpó kut é bang le, yuqgè yhangchang nyì zô lhùm é mara kut shut é bang le, <sup>10</sup> hkau bang le, myoqnoq bang le, î shuq wut bang le, lumù gansang é bang le, mhaú zô é bang le, Garai Gasâng é mingdán mâ é shimân jeju lé myang hkam yù kô râ a nghut. <sup>11</sup> Nungmoq mâ é ra-am gi, haû su kut kô é bang nghut akô. Nghut kôlhang, nungmoq gi, nga-nhùng é Garai Gasâng é Woi-nyí eq Yhumsîng Yesuq Hkrisduq é mying mai, mara hkyut san byí é, lhoq sân-yúng é eq chí sân pyám byí é hui bekô nghut ri.

### *Ashop É Đông Gungsho Zùm Yap É Hkyô*

<sup>12</sup> "Jung hkanmó kut râ ahkáng ngò wó lhê." Nghut kôlhang, jung hkanmó gi, akyú byí é a nghut. "Jung hkanmó kut râ ahkáng ngò wó lhê." Nghut kôlhang, haí jùng èq le ngo lé wó sing pyám râ a nghut. <sup>13</sup> "Zoshuq gi, wamdaû é matú nghut mù, wamdau gi, zoshuq é matú nghut ri." ga nungmoq ra-am taí kó râ nghut lhê. Nghut kôlhang, Garai Gasang gi, haû í jùng é lé lhoq htên pyám râ nghut lhê. Gungdu gi, ashop é đông gungsho



zùm yap hkyo é matú a nghut é za, haû Yhumsing é matú nghut mù, haû Yhumsing gi, gungdû é matú nghut ri. <sup>14</sup> Garai Gasang gi, Yhâng é a-tsâm eq, haû Yhumsing lé, shi é mai lhoq dui toq yû bê nghut mù, nga-nhúng lé le lhoq dui toq yû râ nghut lhê. <sup>15</sup> Nungmoq é gungdu pé gi, Hkrisduq é gungsho showui showang pé yhang nghut é lé, nungmoq a sé kô l hú? Haû nghut le nhing, Hkrisduq é gungsho showui showang pé lé yù mù, shiwa myhî pé eq rading ralhum za kut pyám nhâng kô râ l hú? Hkâ-nhám le a ge dut nhâng! <sup>16</sup> Shiwa myhî eq gungsho zum é sù gi, yhang eq gungsho ralhum za dut bê hkyô lé, nungmoq a sé kô l hú? Hkâsu mù gâ le, "Yhangnhik gi, gungsho ralhum za dut kô râ nghut lhê." <sup>17</sup> Nghut kôlhang, haû Yhumsing eq rading ralhum za dut é sù gi, woi-nyí má Yhang eq ralhum za dut bekô nghut ri.

<sup>18</sup> Ashop é đông gungsho zùm yap é hkyô lé koi pyám keq. Byù rayuq kut shut é gotû mara pé banshoq gi, yhâng é gungdu shinggan má nghut lhê; nghut kôlhang, ashop é đông gungsho zùm yap é hkyô kut shut é sù gi, yhumsing gùng lé mara shut é sù nghut ri. <sup>19</sup> Nungmoq é gungdu gi, Garai Gasang chyáng mai nungmoq wó yû bê nghut é, nungmoq má lúng nyi é Chyoiyúng Woi-nyí é noqkuq yhûm nghut é lé, nungmoq a sé kô l hú? Nungmoq gi, yhumsing gùng lé sing é bang a nghut. <sup>20</sup> Hkâsu mù gâ le, nungmoq gi, ahpau ralhum byi mù wui hpyit tô é hui bê bang nghut akô. Haû mù luí, nungmoq é gungdû eq, Garai Gasang lé, hkunggâ é hkyô shit nyî keq.

## 7

*Myî Yu É Eq Sêng É Hkyô*

<sup>1</sup> Ahkuí, nungmoq kâ kat é hkyô pé eq séng luí ga jang, yuqgè rayuq gi, myi a yu le gè ri. <sup>2</sup> Nghut kôlhang, ashop é đông gungsho zùm yap é hkyô gyai myô é yanmai, yuqgè hkanmó gi, yhumsing é myiwe wó râ lhê; myiwe hkanmó gi, yhumsing é yuqgè wó râ lhê. <sup>3</sup> Haû yhumsing hpó gi, wò joq é eq rajung za, yhâng yhumsing myhî eq zùm sháng gaq; haû đông za, yhumsing myhî le, yhâng yhumsing hpó eq zùm sháng gaq. <sup>4</sup> Haû yhumsing myhî é gungdu gi, yhânggùng yhang za sêng é a nghut, yhâng é yhumsing hpó eq le sêng lhê. Haû eq rajung za, yhumsing hpô é gungdu gi, yhânggùng yhang za sêng é a nghut, yhâng é yhumsing myhî eq le sêng lhê. <sup>5</sup> Nungmoq myit huí lhum luí, kyúdùng é má rago ap nóng râ ahkyíng ayoq za a nghut jáng gi, rayuq eq rayuq hkâhe lhum kó. Nungmoq yhumsing gùng lé a wó hkan é yanmai, Tsadán eq gunglaú é a hui kô sháng gaq, ahkyíng ayoq haû lai jáng, rahá dum zùm keq. <sup>6</sup> Ngò, haû su nghû taí é gi, hkunmó hkyô é đông a nghut, ahkáng byî kat é đông ru nghut lhê. <sup>7</sup> Byù banshoq bang gi, ngò su nyi râ lé ô nau ri. Nghut kôlhang, yuq hkanmó gi, ó le ô é chyunghuq lé Garai Gasang chyáng mai wó bum akô nghut ri; rayuq gi, rajung chyunghuq, góyuq gi, gó jung chyunghuq wó bum akô.

<sup>8</sup> Ahkuí, myiwe a yù lô é bang eq chuimó pé lé ngò taí kôlé, ngò su, haû đông jâng nyi pyám kô é nghut le, yhangmoq é matú ge é hkyô nghut ri. <sup>9</sup> Nghut kôlhang, yhumsing gùng lé a wó hkâng kô é nghut le gi, yhangmoq, myi yû myi ló râ lhê; hkâsu mù gâ le, myi su nyé luí ô nau nyi râ malaí, myi yu myi ló le je ge lhê.

<sup>10</sup> Myi yû bê bang lé, ngò, hkunmó hkyó kôlé, shî gi, ngò đông hkyô é a nghut, Yhumsing chyáng mâ é ru nghut lhê: Yhumsing myhî gi, yhâng é yhumsing hpô chyáng mai a ge gang râ nghut lhê. <sup>11</sup> Nghut kôlhang, yhang gâng é nghut jáng, myi a dum ló é za nyi râ lhê, haû a nghut jáng, yhâng é yhumsing hpó eq dum xoq yû râ lhê. Yhumsing hpó le, yhâng é yhumsing myhî lé a ge kâng pyám râ nghut lhê.

<sup>12</sup> Góbang lé ngò shî su nghû taí kôlé, shî gi, Yhumsing chyáng mâ é a nghut, ngò đông mai taí é ru nghut lhê. Gumang rayuq yuq gi, lumjíng sù a nghut é yhumsing myhî wó é nghut le, myiwe haû, yhang eq rahá nyi nau é nghut jáng, yhang lé a ge kâng pyám râ nghut lhê. <sup>13</sup> Myiwe rayuq gi, lumjíng sù a nghut é yhumsing hpó wó é nghut le, yuqgè haû, yhang eq rahá nyi nau é nghut jáng, yhang eq a ge gang râ nghut lhê. <sup>14</sup> Hkâsu mù gâ le, haû a lumjíng sù yhumsing hpó gi, yhâng yhumsing myhî đông mai lhoq sân-yúng

é hui bê nghut mù, a lumjínq sù yhumsîng myhí le, lumjínq sù nghut é yhâng é yhumsîng hpó dông mai lhoq san lhoq yúng é hui bê nghut ri. Haû a nghut jáng, nungmoq é zo wuî gi, a sanséng dut kê râ nghut lhê; nghut kôlháng, yhangmoq gi, haú dông mai, chyoiyúng bekô nghut ri.

<sup>15</sup> Nghut kôlháng, haû a lumjínq sù gâng ló naû jáng gi, gâng ló sháng gaq. Lumjínq é yuqgè nghut nghut, myiwe nghut nghut, haû sù é hkyô pé má gi, hkûm zing tô é hkyô a joq é nghut lhê. Garai Gasang gi, nga-nhúng lé, nguingón shoq nyì sháng gaq ga ji yù bê nghut lhê. <sup>16</sup> Yhumsîng myhí ê, náng é yhumsîng hpó lé wó hkyi yù râ nghû, hkâsu wó sé râ lúhú? Yhumsîng hpó ê, náng é yhumsîng myhí lé wó hkyi yù râ nghû, hkâsu wó sé râ lúhú?

<sup>17</sup> Hká dông nghut kôlháng, yuq hkanqmó gi, Garai Gasang, yhang lé ji yu tô é hkûn, haû Yhumsîng mai yhang lé nyì nhang tô é dông asak dui nyì râ lhê. Haû gi, noqkuq hpúng pé banshoq má ngò tô to byî é tarâ nghut lhê. <sup>18</sup> Byù rayuq gi, ji yu é huî é hkûn, ahpyo-kuq hpyit hkam yu to gù bê nghut jáng, ahpyo-kuq hpyit a hkâm sù dông a dut byuq sháng gaq. Byù rayuq gi, ji yu é huî é hkûn, ahpyo-kuq hpyit a hkam yu to shí é nghut jáng, ahpyo-kuq hpyit a hkam yù sháng gaq. <sup>19</sup> Ahpyo-kuq hpyit hkâm hkyô gi, haî ahkyak a nghut; ahpyo-kuq hpyit a hkâm hkyô gi, haî ahkyak a nghut. Garai Gasang é hkunmó pé lé châng nyi é za sheq ahkyak nghut lhê. <sup>20</sup> Yuq hkanqmó gi, yhang lé Garai Gasang èq ji yu é hkûn lhê su xoq nyi nyì râ lhê. <sup>21</sup> Nàng gi, ji yù huî é hkûn jùn dut nyi é lúhú? Haú hkyô lé hkâ-myit chiq. Nghut kôlháng, nàng gi, luthkyô wó yu é nghut jáng, haú dông nyì aq. <sup>22</sup> Hkâsu mù gâ le, haû Yhumsîng èq ji yu é huî é hkûn, jùn dut nyi é sù gi, haû Yhumsîng èq lhoq lhut yu é byù nghut bê. Haû eq rajung za, ji yu é huî é hkûn, luthkyô wó é sù gi, Hkrisduq é jùn nghut ri. <sup>23</sup> Nungmoq gi, Garai Gasang èq ahpau byi mù wui hpyit yu é hui bê bang nghut akô. Haû mù, byu pé é jùn hkâdut kó. <sup>24</sup> Gumang wuî ê, yuq hkanqmó gi, yhumsîng lé Garai Gasang èq ji yu é huî to bê dông, Yhâng é hí má xoq nyi nyì râ lhê.

<sup>25</sup> Ahkuî, zomyi zorâm wui é hkyô taí kôlé. Haû Yhumsîng chyáng mâ é hkunmó gi, ngò a wó; nghut kôlháng, Yhumsîng é shogyo nhikmyîn é yanmai, lumjínq sù rayuq nghut nyi é dông, ngò, nungmoq lé hkyô shit râ nghut lhê. <sup>26</sup> Ahkuî hui zô é wuîhke hkyo é yanmai, nungmoq gi, yhumsîng nyi to é su xoq nyi nyi le je ge ri nghû, ngò wó myit ri. <sup>27</sup> Nàng, myiháng bê a nghut lhi? Lhoq kang râ hkâda lo. Nàng, myi a háng shi a nghut lhi? Myi hkâhò lo. <sup>28</sup> Nghut kôlháng, nàng, myiháng é nghut le gi, mara a nghut. Zomyi gi, myi ló é nghut jáng, mara a nghut. Nghut kôlháng, myiháng é bang gi, shí pyat má wuîhke hkyô pé myo myo hui kó râ nghut mù, ngò, nungmoq lé haû mai hkyi yù nau ri.

<sup>29</sup> Gumang wuî ê, ngò taí nau é lichyúm gi, ahkýing tot byuq bê nghut mù, ahkuî mai, myi wó é bang gi, a wó é bang dông nyì kó sháng gaq.\* <sup>30</sup> Yón ngaû huî é bang gi, a huî é bang su; gabú é bang gi, a gabú é bang su; sutzè lé wui yu é bang gi, sutzè a wó é bang su; <sup>31</sup> haû mingkan zè pé lé chung é bang gi, haú pé lé a myit tuí é bang su, nghut kó sháng gaq. Hkâsu mù gâ le, shí mingkân é ahkuî lhê é azòng isâm gi, laí ló nyi é nghut lhê.

<sup>32</sup> Ngò gi, nungmoq lé a myit myo nhâng naû. Myi a yù shí é sù gi, haû Yhumsîng lé hkâsu wó gabú nhâng râ matú, haû Yhumsîng é muzó lé myit chiq nyi ri. <sup>33</sup> Nghut kôlháng, myi yù bê sù gi, yhâng é yhumsîng myhí lé hkâsu wó gabú nhâng râ matú, mingkan shi é muzó eq séng luí myit chiq nyi ri. <sup>34</sup> Haû mù, yhâng shirong é myit gi, byo myín nyi ri. Myi a ló é myiwe nghut nghut, zomyi gyíng nghut nghut gi, yhâng é gungdu eq woi-nyí má haû Yhumsîng lé rago wó ap nóng râ matú, Yhumsîng é muzó pé eq séng luí myit chiq nyi ri. Nghut kôlháng, myi ló bê myiwe gi, yhâng é yhumsîng hpó lé hkâsu wó gabú nhâng râ matú, mingkan shi é muzó eq séng luí myit chiq nyi ri. <sup>35</sup> Ngò, haû su nghû taí é gi, nungmoq é matú ge é hkyô nghut lhê; nungmoq lé tara èq zuî zing é a nghut é za, myit a byò lo shoq Yhumsîng lé wó ap nóng râ matú, jô é dông asak wó dui kô sháng gaq nghu é hkyô ru nghut lhê.

\* 7:29 A wó é bang dông nyì kó sháng gaq gâ é gi, Garaî mù lé je myit zuq nyì sháng gá naû é nghut lhê.

<sup>36</sup> Nghut kôlhang, rayuq yuq gi, yhang dúng tô é zomyi gyíng lé a htuk é dúng kut nyi é su wó myit ngàm jáng, myiwe haû asak kô lo nyi mù, hâng yù râ dut bê nghû myit é nghut le gi, yhang ô nau é dúng kut sháng gaq. Yhang mara kut é a nghut. Yhangnhik gi, hâng lhum râ lê. <sup>37</sup> Nghut kôlhang, yhang gi, haû hkyô lé yhâng é myit mai wó lhoq zím pyâm é nghut mù, yut yut ô nau hkyô é ahkaû má a nghut é za, yhumsíng ô nau é hkyô lé wó hkâm zing pyâm é sù nghut luî, haû zomyi gyíng lé a hâng yù râ matú wó myit hpyit bê sù nghut é nghut jáng, yhang gi, ge é hkyô kut bê nghut ri. <sup>38</sup> Haû mù luî, zomyi gyíng haû lé hâng yu é sù gi, jô é hkyô kut bê nghut ri; nghut kôlhang, zomyi gyíng haû lé a hâng yu é sù gi, je ge é hkyô kut bê nghut ri.

<sup>39</sup> Myiwe rayuq gi, yhâng é yhumsíng hpó rû dui nyi nyi, yhang eq xoq tô ashî nghut lê. Nghut kôlhang, yhâng é yhumsíng hpó shi byuq é nghut jáng, yhang gi, myi ló râ ahkáng dum wó bê nghut lê, nghut kôle, haû yuq gi, Yhumsíng eq sêng é sù dut râ lê. <sup>40</sup> Ngò jéyáng é dúng ga jáng, myi a dum ló é wó nyi le gi, yhâng é matú je gabú hkyô dut râ nghut lê. Ngò le, Garai Gasâng é Woi-nyí wó sù nghû wó myit ri.

## 8

### *Hparà Lhô Lé Tíng Byî É Zoshuq*

<sup>1</sup> Ahkuî, hparà lhô pé lé tíng byî é zoshuq hkyô: nga-nhúng banshoq bang gi, haû hkyô eq séng luî sê lê. Sê é hkyô gi, nghutbun sê lê; nghut kôlhang, chyitdap myit gi, lhoq kô myhang lê. <sup>2</sup> Byû rayuq yuq gi, rajung jung lé sé bûn é nghut le, yhang sé âng é lé lhang a sé shi nghut ri. <sup>3</sup> Nghut kôlhang, Garai Gasang lé chyitdap é sù gi, Garai Gasâng eq sé é sù nghut ri.

<sup>4</sup> Haû mù luî, hparà lhô pé lé tíng byî é zoshuq lé zô é eq séng luî gi: hparà lhô gi, mingkan má haî lhang a nghut é hkyô lé le, Garai Gasang gi, Yhang rayuq mai lai luî gotû a nyi é lé le, nga-nhúng sê lê. <sup>5</sup> Hkâsu mù gâ le, mauhkûng htoq má nghut nghut, myigùng htoq má nghut nghut, byû ra-am mai hparà pé ga bang nyi mù, "hparà pé" myo myo eq "yhumsíng pé" myo myo nyi kôlhang <sup>6</sup> nga-nhúng é matú gi, Îwa nghut é Garai Gasang rayuq za nyi é nghut mù, lhunglhang gi, Yhang mai hpan é nghut luî, nga-nhúng gi, Yhâng é matú asak dui nyi é nghut lê. Yesuq Hkrisduq nghu é Yhumsíng rayuq za nyi é nghut mù, lhunglhang gi, Yhang dúng mai hpan é nghut luî, nga-nhúng gi, Yhang dúng mai asak dui nyi é nghut lê.

<sup>7</sup> Nghut kôlhang, yuq hkangmó gi, haû hkyô lé sê gam hkoq yu é a nghut. Ra-am gi, ahkuî jé shoq hparà lhô pé má mán byuq kô é yanmai, haû sù é zoshuq lé yhangmoq zô é hkâm, hparà lhô lé tíng byî é zoshuq dúng myit sôn yu akô. Yhangmoq myit sôn sê é hkyô wum nyhôm é yanmai, mara wó bûn akô nghut ri. <sup>8</sup> Nghut kôlhang, zoshuq gi, nga-nhúng lé, Garai Gasâng shut shuî chyâng e é a nghut. Nga-nhúng a zô é nghut le gi, je sùm byuq ló é a nghut, zô é nghut le gi, je ge lo é a nghut.

<sup>9</sup> Haû su ga kôlhang, nungmoq a htung a htê zô é hkyô gi, lumjín myit wum nyhóm bâng é matú myit leqbat jowò a dut shoq sidiq keq. <sup>10</sup> Hkâsu mù gâ le, sumsé hpaqchyî wó é bang nungmoq gi, hparà lho é noqkuq yhûm má zô nyi kô é lé, haû myit sôn sê é hkyô má wum nyhôm é sù rayuq yuq myang é nghut jáng, hparà lhô pé lé tíng byî é zoshuq lé, yhang wám zo râ lé wum byî é a dut kó râ lú? <sup>11</sup> Haû mù, Hkrisduq shî hkâm byi bê nghut é, wum nyhôm é gumang hpó haû yuq gi, nungmoq é sumsé hpaqchyî eq lhoq htên pyâm é hui berâ nghut lê. <sup>12</sup> Nungmoq gi, haû hkyô dúng mai, nungmoq é gumang wuî lé mara kut shut é eq, yhangmoq é myit sôn sê é hkyô wum nyhôm é lé nò nhang é hkâm, Hkrisduq lé mara kut shut é nghut bekô. <sup>13</sup> Haû mù luî, ngò zô é gi, ngá é gumang hpó lé mara kut shut nhang é nghut jáng, yhang lé myit a leqbat nhang sháng gaq, ngò, hkâ-nhám le, sho lé a zo lo râ nghut lê.

## 9

### *Lagyo Rayuq É Ahko Ahkáng*

<sup>1</sup> Ngò gi, lut sù a nghut lú? Ngò gi, lagyo rayuq, a nghut lú? Ngò gi, nga-nhông é Yhumsing Yesuq lé myang wú bê sù, a nghut lú? Nungmoq gi, haù Yhumsing má, ngò zui saí é muzó é ashi pé chyat, a nghut kô lú? <sup>2</sup> Ngò gi, góbàng chyáng lagyo a nghut kôlhang, nungmoq chyáng gè gè nghut lè! Hkâsu mù gâ le, nungmoq gi, haù Yhumsing má, ngò lagyo nghut é hkyô saksé dizik nghut bum akô.

<sup>3</sup> Ngá ahtoq má jéyáng bang lé, ngá gûng ngò taí hung kat kôlé. <sup>4</sup> Ngamoq gi, zo râ shuq râ ahko ahkáng a wó é bang nghut lè lú? <sup>5</sup> Gotù lagyo pé eq Yesuq é yhanggu yuqzô pé eq Kehpa kut é su, lumjîng sù nghut é yhumsing myhí shuí chûng râ, ngamoq, ahko ahkáng a wó é nghut lè lú? <sup>6</sup> Ngò eq Barnaba baù za, asak duì hkyo é matú mù zui ra râ lú?

<sup>7</sup> Ó yuq wá, yhumsing zoshuq wùn luí, gyè mù wùn waq râ lú? Ó yuq wá, tsibiyiq hkyâm saí mù, haù mà é tsibiyiq shi a zo kut râ lú? Ó yuq wá, sau rém mù, sau naú a shuq kut râ lú? <sup>8</sup> Ngò gi, shí hkyô pé lé xângzo hkyam dông za taí é nghut lè lú? Haù tarâ má le, rajung za taí tô lè, a nghut lú? <sup>9</sup> Hkâsu mù gâ le, haù Mosheq é tarâ má, "Guq nâng nyi é no lé nhuttsung hkâ-tsûng to byi."☆ ga kâ tô ri. Garai Gasang gi, no eq séng luí za chiq é nghut lè lú? <sup>10</sup> Gè gè yhang, yhang gi, nga-nhông é matú taí é a nghut kô lú? Nghut lè, haù gi, nga-nhông é matú kâ to byí é nghut lè. Haí mù gâ le, yò hpuq sù, yò hpuq é eq, guq bat sù, guq bat é gi, kyô chòm shù yù râ lé myoqbyù luí, kut kô é nghut lè. <sup>11</sup> Ngamoq gi, nungmoq chyáng woi-nyí amyui sân kat bê nghut mù, nungmoq chyáng mà é mingkan zè lé shù yu é nghut jáng, lûm myô é dut byuq bekô lú? <sup>12</sup> Góbàng gi, nungmoq chyáng mai garúm é ahko ahkáng wó kô é nghut jáng, ngamoq gi, haù lé je wó râ lè a nghut kô lú?

Nghut kôlhang, ngamoq gi, ahko ahkáng haù lé a yu é nghut lè. Haù yù râ malaí, Hkrisduq é gabú danglù gi, hkûm zing pyâm é a hui râ matú sheq, jung hkangmó lé ngamoq hkam jân nyi lè. <sup>13</sup> Haù noqkuq yhûm má mù zui é bang gi, yhangmoq é zoshuq lé haù noqkuq yhûm mai wó é hkyô eq, hkungga gyap má dojaú é bang gi, hkungga gyap má nhông byí é ra-am lé myàng zô é hkyô lé, nungmoq a sé kô lú? <sup>14</sup> Haù eq rajung za, gabú danglù hko kyô é bang gi, gabú danglù hkyô mai yhangmoq é asak baù râ lè ga, haù Yhumsing hkunmó hkyô to bê nghut ri.

<sup>15</sup> Nghut kôlhang, ngò gi, ahko ahkáng haù pé haí lé le a yu é nghut lè. Nungmoq, ngo lé haù su lhom kut byi râ lé myoqbyù mù, ngò, shí hkyô lé kâ é a nghut. Hkâsu mù gâ le, ngò haù su gumrong é hkyô lé, rayuq yuq lhoq htên pyâm byi râ htoq má, ngò shi byuq le lhang je ge ri. <sup>16</sup> Nghut kôlhang, gabú danglù lé ngò hko kyô é hkûn, ngò gumrong jang a joq; hkâsu mù gâ le, haù gi, ngò a kut a ge é ngá wô nghut lè. Haù gabú danglù lé ngò a hko kyô é nghut le gi, ngò dingnyé wó râ nghut lè. <sup>17</sup> Yhumsing nau é myit mai ngò hko é nghut jáng, shigyaú chyunghuq wó râ nghut lè; yhumsing nau é myit mai a nghut jáng gi, ngo lé lûm luí ap tô é lé, agon za wùn waq nyi é dut râ nghut lè. <sup>18</sup> Haù mù luí, ngá é shigyaú chyunghuq gi, haí nghut lè lú ga jang, haù gabú danglù lé hko kyô é hkûn, ngò gi, ahpau a yu é za wó ap nóng luí, gabú danglù hko kyo hkyô mà é ngá é ahko ahkáng pé lé ngò a yu é amyat nghut lè.

<sup>19</sup> Ngò gi, ó yuq é a-ô má le a nyi é za, lut sù nghut kôle, byù wó myô é myhó shuí lhing yù râ matú, ngá gûng ngò, yuq hkangmó é jùn kut nyi lè. <sup>20</sup> Ngò gi, Yudaq byu pé lé shuí lhing yù râ matú, Yudaq byu pé chyáng nghut nyi é hkûn, Yudaq byù rayuq dông dut nyi lè. Ngò gi, tarâ hkaù má nyi sù a nghut kôlhang, tarâ hkaù mà é bang lé shuí lhing yù râ matú, tarâ hkaù má nyi bâng chyáng nghut nyi é hkûn, tarâ hkaù mà é byù rayuq dông dut nyi lè. <sup>21</sup> Ngò gi, tarâ a wó bang lé shuí lhing yù râ matú, tarâ a wó bâng chyáng nghut nyi é hkûn, tarâ a wó sù rayuq dông dut nyi lè. Nghut kôlhang, gè gè ga jáng, Garai Gasang é tarâ mai a lut htoq é za, Hkrisduq é tarâ hkaù má nyi sù nghut lè.

<sup>22</sup> Ngò gi, wum nyhóm bang lé shuí lhing yù râ matú, wum nyhóm bâng chyáng nghut nyi é hkûn, wum nyhóm sù rayuq dông dut nyi lè. Ngò gi, wó dut é hkyô dông mai byù ra-am lé wó hkyô sháng gaq nghù, byù lhunglhang bâng chyáng, byù ajà jà dông nyi nyi

☆ 9:9 Tarâ Pun 25:4

lhê. <sup>23</sup> Ngò gi, gabú danglù mai wó é shimân jeju pé lé wó chôm hkam yù sháng gaq nghû, gabú danglù é yanmai haú pé banshoq lé kut é nghut lhê.

<sup>24</sup> Din shingjóng poi má dìn râ bang banshoq dìn kôlhang, rayuq za shigyaú chyunghuq wó é hkyô lé, nungmoq a sé kô lú? Chyunghuq wó râ matú dìn keq. <sup>25</sup> Sup poi má shingjóng lhâm é bang yuq hkangmó gi, yhumsing gùng yhumsing tarâ htan é đông lhoq mhân yù râ lhê. Yhangmoq gi, gîng nyi râ a nghut é janmaú wó râ matú, haú su kut é nghut akô; nghut kôlhang, nga-nhúng gi, ahtum abyuq gîngtîng nyi râ nghut é janmaú wó râ matú shikut é nghut lhê. <sup>26</sup> Haú mù luí, ngò gi, jum dìn dìn é byù rayuq su dìn é sù a nghut. Ngò gi, lai lé bat é byù rayuq su, akôm má bat é sù le a nghut. <sup>27</sup> Ngò gi, góbâng chyáng mungdang hko é htàng má, ngá gûng ngò, shigyaú chyunghuq eq a gîngdân sù a dut sháng gaq nghû, ngá gûng lé gyai yhang lhoq mhân yù mù, ngá gung lé jùn kut yu nyi lhê.

## 10

### *Israellaq Pê É Labaú Mai Sidiq Byí É Hkyô*

<sup>1</sup> Gumang wui ê, ngò gi, dut láif lo é hkyô lé, nungmoq lé a sé a dut nhâng nau é nghut lhê; hí hkûn, nga-nhúng é íchýí îwa pé banshoq bang gi, mhutdûm ô má nyi mù, Nhông Nè mai wó lai byit kô é nghut lhê.\* <sup>2</sup> Yhangmoq banshoq bang gi, mhutdûm eq Nhông Nè má, Mosheq é chángzô pé đông bapisma hkam yu é bang chyat nghut bekô. <sup>3</sup> Yhangmoq banshoq bang gi, rajung zâ é woi-nyí zang zo kô é eq, <sup>4</sup> rajung zâ é woi-nyí wui shuq kô é nghut lhê; hkâsu mù gâ le, yhangmoq eq rahá nghut nyi é woi-nyí eq sêng é luqbum mó mai, yhangmoq shuq kô é nghut lhê; luqbum mó haú gi, Hkrisduq nghut bê. <sup>5</sup> Nghut kôlhang, yhangmoq myo hpyang lé, Garai Gasang a nau é nghut mù, yhangmoq é gùng sôm lé yoso pé má myhîn so san kut pyâm é hui bekô nghut ri.

<sup>6</sup> Haú hkyô pé dut htoq é gi, agè ashop hkyô má yhangmoq myit tuí bùm é su, nga-nhúng a myit tuí nyi râ matú nga-nhúng é azông dut bê nghut ri. <sup>7</sup> "Byu pé gi, zùng mù, zo luí shuq luí, a lumjîng bang kut é đông, toq mù, ye bum akô."☆ ga kê tô é eq rajung za, yhangmoq mâ é ra-am hparà noq é bang dut byuq é su, nungmoq hkâdut kó. <sup>8</sup> Yhangmoq mâ é ra-am gi, ashop é đông gungsho zùm yap é hkyô shut kômù, ra-nyí má za í mûn sum hkyîng yuq shi byuq é su, ashop é đông gungsho zùm yap é hkyô le, nga-nhúng gi, a ge kut shut râ nghut lhê. <sup>9</sup> Yhangmoq mâ é ra-am gi, haú Yhumsing lé chyâm luí, lhangmui pé èq hte sat é huí bùm kô é su, haú Yhumsing lé, nga-nhúng gi, a ge chyâm râ nghut lhê. <sup>10</sup> Yhangmoq mâ é ra-am gi, nhutluq shô-myô kôluí, lhoq htên é maumâng èq sat pyâm é hui kô é su, nungmoq gi, nhutluq shô-myô hkâkut kó.

<sup>11</sup> Yhangmoq chyáng wú yû râ azông đông haú pé dut htoq luí, ló htàng râ ipyat pé má nyi âng to bang nga-nhúng é matú sidiq byi râ đông kê to bê nghut ri. <sup>12</sup> Haú mù luí, nungmoq gi, yap gîng nyi bê su ngàm kô é nghut jáng, a leqbat râ matú sidiq nyi keq! <sup>13</sup> Byu chyáng htoq sê é gunglaú hkyô za nungmoq hui râ nghut lhê. Garai Gasang gi, lhumzui sù nghut lhê mù, nungmoq a wó jân é gunglaú hkyô lé hui nhâng râ a nghut. Nghut kôlhang, nungmoq gunglaú huí é hkûn, Yhang gi, haú lé nungmoq wó jan râ matú, hkyô htong byi râ nghut lhê.

### *Hparà Lhô Noq Hkyô Lé Koi Pyám Râ Hkyô*

<sup>14</sup> Haú mù luí, ngò chyitdap é luzúm wui ê, hparà lâ noq hkyô lé koi pyám keq. <sup>15</sup> Nhik gying bang lé ngò tai lhê; ngò hai tai nyi é hkyô lé nungmoq gùng myit sôn yù keq. <sup>16</sup> Nga-nhúng, jeju bûn nyi é jeju góm lé shuq é hkûn, Hkrisduq é sui má chôm zùm bê a nghut kó lú? Nga-nhúng, myhik hpê é muk lé zô é hkûn, Hkrisduq é gungdu má chôm zùm bê a nghut kô lú? <sup>17</sup> Hai mù gâ le, muk htung ralhum za nghut mù, nga-nhúng gi, myo myo nghut kôle ragùng za nghut nyi lhê. Hkâsu mù gâ le, nga-nhúng banshoq bang gi, haú rahtung zâ é muk lé chôm gâm zô é bang chyat nghut lhê.

\* 10:1 Bun zo ralhum mai raxê lhum gi, Htoq Lô Laiká má bo é Mosheq htàng cháng bâng é hkyô lé kê tô é nghut lhê.

☆ 10:7 Htoq Lô 32:6

<sup>18</sup> Israelaq byu pê é hkyô lé myit wú keq. Haû hkungga lé zô é bang gi, hkungga gyap má chôm lom é bang nghut lhê, a nghut kó lú? <sup>19</sup> Hparà lhô, a nghut jáng, hparà lhô lé tîng byî é hkungga gi, rajung jung nghut lhê nghû, ngò taí é lú? <sup>20</sup> Haû su taí é a nghut, a lumjîng bâng é hkungga gi, Garai Gasang lé nhông byî é a nghut, nat gâng pé lé tîng byî é ru nghut lhê. Ngò gi, nungmoq, nat gâng pé eq chôm zum nyî bang dut râ lé a ô nau é nghut lhê. <sup>21</sup> Nungmoq gi, haû Yhumsing é góm lé le, nat gâng pê é góm lé le, ge shuq râ a nghut; nungmoq gi, haû Yhumsing é zangbó má le, nat gâng pê é zangbó má le, rahá ge bo lòm râ a nghut. <sup>22</sup> Nga-nhúng gi, haû Yhumsing lé manôn nhâng nau é bang dut râ a nghut kó lú? Nga-nhúng gi, Yhâng htoq je wúm bo é bang nghut lhê lú?

### *Lumjîng Su É Luthkyô*

<sup>23</sup> "Jung hkangmó kut râ ahkáng wó lhê." nghut kôlhang, jung hkangmó gi, akyû wó é a nghut. "Jung hkangmó kut râ ahkáng wó lhê." nghut kôlhang, jung hkangmó gi, byû lé wó kô làm nhang é a nghut.† <sup>24</sup> Ó yuq le, yhumsing é gè hkyo matú ho é a nghut é za, góbâng é gè hkyo é matú hô râ dut lhê.

<sup>25</sup> Sho ûng gài má ûng é haí lé lé, úng-âng é myit eq a myî gôn é za zo keq. <sup>26</sup> Hkâsu mù gâ le, "Myidàm htoq eq haú má joq é jung hkangmó gi, Yhumsing é chyat nghut lhê."☆ gâ tô ri.

<sup>27</sup> A lumjîng bang ra-am, nungmoq lé zang zo jì mù, nungmoq ê nau é nghut jáng, úng-âng é myit eq a myî gôn é za, nungmoq hí má to byî é gû lé zo keq. <sup>28</sup> Nghut kôlhang, rayuq yuq, nungmoq lé, "Shî gi, hparà lhô lé tîng byi bê nghut lhê." ga taí kyô é nghut jáng, nungmoq lé taí kyo su é yanmai le, myit úng-âng é yanmai le, haú lé hkâzo kó. <sup>29</sup> Úng-âng é myit haû gi, nungmoq é a nghut, góyuq é úng-âng é myit lé taí nau é ru nghut lhê. Ngá é luthkyô lé, haí mù góyuq é úng-âng é myit eq jéyáng é huí nhang lhê lú? <sup>30</sup> Ngò jeju bûn é myit mai bo zo bo shuq yu é nghut jáng, Garai Gasang lé jeju hkya-on bê nghut é zoshuq hau é yanmai, haí mù lumu pyâm é ngò hui râ lú?

<sup>31</sup> Haû mù luî, nungmoq zo kôlhang, shuq kôlhang, haí kut kôlhang, Garai Gasâng é hpungwup shingkâng é matú chyat kut keq. <sup>32</sup> Ngò gi, yuq hkangmó lé, hkyô hkangmó má shikut luî myit ngón nhang é eq rajung za, nungmoq gi, Yudaq byu pé lé nghut nghut, Grik byu pé lé nghut nghut, Garai Gasâng é noqkuq hpúng mâ é byù lé nghut nghut, ó yuq lé le myit hkâleqbat nhâng kó. <sup>33</sup> Hkâsu mù gâ le, ngò gi, yhangmoq hkyi yu é wó hui kó sháng gaq nghû, ngá é gè hkyô ho é a nghut é za, myo myô é matú gè hkyô ho nyi é ru nghut lhê.

## 11

<sup>1</sup> Ngò gi, Hkrisduq é alik châng é su, nungmoq gi, ngá é alik cháng keq.

### *Noqkuq É Má Htap Htuk Râ Hkyô*

<sup>2</sup> Nungmoq gi, hkyô hkangmó má ngo lé bûn nyî kô é yanmai le, nungmoq lé ngò lhai byi bê mhoqshit hkyô pé lé myhik zing nyî kô é yanmai le, ngò, nungmoq lé hkya-ôn lhê.

<sup>3</sup> Ahkuî, ngò, nungmoq lé sê hkyâng nhâng nau é hkyô gi: yuqgè hkangmó é ulhum gi, Hkrisduq nghut ri; myiwe hkangmó é ulhum gi, yuqgè nghut ri; Hkrisduq é ulhum kúm gi, Garai Gasang nghut ri. <sup>4</sup> Yuqgè hkangmó gi, kyûdûng le nghut nghut, myiqhtoi htoî le nghut nghut, yhâng é ulhum lé nghop tô é nghut jáng, yhâng é ulhûm é aróng lé lhoq hpoî pyâm é nghut bê. <sup>5</sup> Myiwe hkangmó gi, kyûdûng le nghut nghut, myiqhtoi htoî le nghut nghut, yhâng é ulhum lé a nghop tô é nghut jáng, yhâng é ulhûm é aróng lé lhoq hpoî pyâm é nghut bê. Haû gi, yhâng é ulhum lé wuq pyâm é eq rajung za nghut ri. <sup>6</sup> Myiwe rayuq gi, yhâng é ulhum lé a nghop pyâm é nghut jáng, yhâng é xâm lé nyhâm pyâm ra râ nghut lhê. Nghut kôlhang, xâm nyhâm pyâm é nghut nghut, xâm wuq pyâm é nghut nghut, myiwe rayuq é matú aróng hpoî lhê nghut jáng, yhang gi, yhâng é ulhum lé nghop to ra râ nghut lhê. <sup>7</sup> Yuqgè gi, Garai Gasâng é azông isâm eq

† 10:23 Bun zo 23 mâ é dangngho gi, Korinhtuq byu pé lhaq taí é dang nghut lhê. ☆ 10:26 Hkya-on 24:1

hpungwup shingkang nghut é yanmai, yhâng é ulhum lé a nghop râ é nghut lhê. Myiwe kúm gi, yuqge é hpungwup shingkang nghut ri. <sup>8</sup> Hkâsu mù gà le, a-nham sâng-hi má, yuqgè gi, myiwe mai lo é a nghut, myiwe sheq yuqgè mai lo é ru nghut lhê. <sup>9</sup> Hau htoq agó, yuqgè lé gi, myiwê é matú hpan tô é a nghut, myiwe lé sheq, yuqge é matú hpan tô é ru nghut lhê. <sup>10</sup> Haû nghut é yanmai le, maumang lagyo pê é yanmai le, myiwe gi, ahkáng kumlhá đông yhâng é ulhum lé nghop râ dut lhê.

<sup>11</sup> Nghut kôlhang, haû Yhumsing hí má, myiwe gi, yuqgè lé nghehkau é su, yuqgè le, myiwe lé nghehkau é nghut lhê. <sup>12</sup> Hkâsu mù gà le, myiwe gi, yuqgè mai lo é su, yuqgè le, myiwe mai hku lé é nghut lhê. Nghut kôlhang, jung hkangmó gi, Garai Gasang mai lo é nghut lhê. <sup>13</sup> Myiwe rayuq, ulhum a nghop é za Garai Gasang lé kyûdûng é gi, htuk kô râ lhú? Nungmoq, yhumsing gung é matú doqdân yù keq. <sup>14</sup> Yuqgè xâm hîng tô é nghut jáng, yhâng é matú aróng hpoi é hkyô dut é nghut kôle, <sup>15</sup> myiwe xâm hîng tô é nghut jáng, yhâng é matú hpungwup shingkang nghut é hkyô lé, htûnglî eq nungmoq lé mhoqshit lhê, a nghut kô lhú? Hkâsu mù gà le, xâm hîng tô é gi, nghop râ zè đông yhang lé byî tô é nghut lhê. <sup>16</sup> Rayuq yuq, haû hkyô lé taî dang-rháng nau é nghut jáng, ngamoq chyáng le, Garai Gasang é noqkuq hpûng pê chyáng le, gotû htûnglî a joq é nghut lhê.

### *Yhumsing É Myinzang*

<sup>17</sup> Nungmoq é zuphpong pé gi, gè hkyô kut râ htoq má akyû a bo é hkyô je kut kô é yanmai, a-ô má hkyô shit tô é pé má, ngò, nungmoq lé hkya-ôn é a nghut. <sup>18</sup> Sâng-hi má, noqkuq hpúng ralhum đông nungmoq zup zîng é hkûn, nungmoq hkaû má gam hkoq hkyô joq é lé wó gyô é nghut luî, têng é le bò râ nghû, ngò lumjîng lhê. <sup>19</sup> Ô pé gi, Garai Gasang o é hkyam shut nghut é lé wó shit râ matú, nungmoq ahkaû má gam hkoq lhum hkyô joq râ dut lhê. <sup>20</sup> Nungmoq rahá zup zîng kô é hkûn, nungmoq gi, haû Yhumsing é myinzang zô é a nghut kó. <sup>21</sup> Hkâsu mù gà le, nungmoq zô é hkûn, góyuq lé le a lánng é za, ó le ó hí yù zô akô. Haû mù, rayuq gi, zo mut huî nyî, góyuq gi, shuq wut to dut akô nghut ri. <sup>22</sup> Nungmoq gi, zo jang shuq jang yhûm a wó bang nghut akô lhú? Garai Gasang é noqkuq hpúng lé wú tiq pyám kô é eq, a wó bang lé hoq hpu nhâng kô é, nghut akô lhú? Nungmoq lé ngò hkâsu nghû taî kó râ lhú? Haû pê é yanmai, ngò, nungmoq lé hkya-on râ lhú? Ratsuí lhang a wó dut!

<sup>23</sup> Hkâsu mù gà le, haû Yhumsing chyáng mai ngò wó hap yu é gû lé, nungmoq lé lhai byi bê nghut lhê: Haû Yhumsing Yesuq gi, Yhang lé ap pyám huî é myîn má, muk lé yù mù, <sup>24</sup> jeju hkya-ôn é htâng má, haû lé myhik hpé mù, taî é gi, "Shî gi, nungmoq é matú Ngá é gungsho nghut lhê; Ngo lé bûn nyî râ matú, shî su kut nyî keq." gà ri. <sup>25</sup> Haû eq rajung za, myinzang bàn zô é htâng má, Yhang gi, góm lé le yù mù, "Góm shî gi, Ngá é sui mâ é dangshikaq asik nghut lhê; hkâ-nhám le, nungmoq shî shuq é hkûn, Ngo lé bûn nyî râ matú shî su kut keq." gà taî ri. <sup>26</sup> Hkâsu mù gà le, nungmoq gi, muk shî lé zo luî, góm shî lé shuq é hkangmó, haû Yhumsing shî hkâm é hkyô lé, Yhang jé lé shoq, shit kyô nyî râ lhê.

<sup>27</sup> Haû mù luî, ó yuq nghut kôle, a gingdán é đông Yhumsing é muk haû lé zo mù, góm haû lé shuq é nghut jáng, haû Yhumsing é gungdu eq sui lé shut é mara wó bê nghut lhê. <sup>28</sup> Haû mù, ó yuq le, muk zo góm shuq râ hí má, yhumsing gùng yhumsing jep wú ra râ nghut lhê. <sup>29</sup> Hkâsu mù gà le, ó yuq nghut kôle, haû Yhumsing é gungdu eq sêng é hkyô lé a sê gyô é za muk zo góm shuq é nghut jáng, yhanggùng yhang mara zô bò shuq bo yu é nghut lhê. <sup>30</sup> Haû nghut é yanmai, nungmoq mâ é byù myo myo gi, wum nyhôm é, nõhpyo huî é nghut bum akô. Ra-am gi, shi ló byuq bekô nghut ri. <sup>31</sup> Nghut kôlhang, nga-nhúng gi, yhumsing gùng yhumsing hí sôn sê yu é nghut jáng tarâ jéyáng é hui râ a nghut. <sup>32</sup> Nga-nhúng gi, mingkan eq rahá, mara byî é a hui zo sháng gaq ga, nga-nhúng lé haû Yhumsing eq jéyáng é hkûn, nga-nhúng gi, mhoqshit é huî nyî gù bê nghut lhê.

✠ 11:8 Apûn 2:21-23

<sup>33</sup> Haû mù luî, ngá é gumang wuê ê, nungmoq gi, zo râ nghû rahá zup zîng é hkûn, rayuq eq rayuq láng lhum keq. <sup>34</sup> Nungmoq rahá zup zîng é hkûn, jéyáng é a hui zo kó sháng gaq, rayuq yuq zòmút é nghut jáng, yhûm má zô chûng râ lhê.

Gotú myit tô é hkyô pé gi, ngò jé lé é hkûn sheq shit kyo râ nghut lhê.

## 12

### *Woi-nyí Hkyô Eq Sêng É Chyunghuq Pé*

<sup>1</sup> Gumang wuê ê, woi-nyí hkyô eq sêng é chyunghuq pé lé, nungmoq a sê gyo râ lé ngò a ô nau é nghut lhê. <sup>2</sup> Nungmoq gi, a lumjîng bang nghut nyí kô é hkûn lé, dang a nyo é hparà lhô noq râ matú hkyô shuí nghoq é hui kô é hkyô lé, nungmoq sê lhê. <sup>3</sup> Haû mù luî, "Yesuq gi, nhîng pyâm é hui sháng gaq." ga, Garai Gasâng é Woi-nyí mai taí é byù ó yuq le a nyi é eq, haû Chyoiyúng Woi-nyí mai za a nghut jáng, "Yesuq gi, Yhumsîng nghut lhê." ga, ó yuq le a wó taí é nghut lhê nghû, ngò, nungmoq lé taí kyô é nghut lhê.

<sup>4</sup> Woi-nyí hkyô eq sêng é chyunghuq ajung jung joq lhê; nghut kôlháng, Chyoiyúng Woi-nyí mai chyat nghut lhê. <sup>5</sup> Dojaú é hkyô ajung jung joq lhê; nghut kôlháng, Yhumsîng rayuq lé za dojaú é nghut lhê. <sup>6</sup> Zui saí é hkyô ajung jung joq lhê, nghut kôlháng, Garai Gasang yhang za, byù lhunglhang bang má, haû pé banshoq lé kut é nghut lhê.

<sup>7</sup> Woi-nyí é hpông shit hkyô gi, byù pé é gè hkyô matú, yuq hkangmó lé byi bê nghut ri. <sup>8</sup> Rayuq lé gi, Woi-nyí haû mai, hpaqchyî byéng-yá byíng é danglù byî é nghut ri; góyuq lé gi, Woi-nyí hau èq za, sumsé hpaqchyî byíng é danglù byî é nghut ri; <sup>9</sup> góyuq lé gi, Woi-nyí hau èq, lumjîng myit byî é nghut ri; dum góyuq lé gi, Woi-nyí hau èq, nò lhoq ge é chyunghuq byî é nghut ri; <sup>10</sup> dum, góyuq lé gi, hpungwup a-tsam pé; dum, góyuq lé gi, myiqhtoi htoí é ahkáng; dum, góyuq le gi, woi-nyí pé lé sê gam hkoq é ahkáng; dum, góyuq lé gi, laklaí dang ahú hú ge taí é ahkáng; dum, góyuq lé gi, dang haú pé é lichyúm taí sân kyô é ahkáng, byî é nghut ri. <sup>11</sup> Chyunghuq haú pé banshoq gi, Woi-nyí hau èq za kut é loqmú chyat nghut mù, Yhang myit hpyit é đông yuq hkangmó lé haú pé tsing gàm byî é nghut ri.

### *Gungbun Myo Kôlháng, Ra Gùng Za*

<sup>12</sup> Gungdu gi, gungsho showui showang pé myo myo lé pong tô é nghut kôlháng, ragùng za nghut ri; gungsho showui showang pé banshoq myo myo nghut kôlháng, gungdu ra gùng za dut tô é nghut ri. Haû eq rajung za, Hkrisduq eq le haú đông nghut ri. <sup>13</sup> Hkâsu mù gâ le, nga-nhúng banshoq bang gi, Yudaq byù nghut nghut, Grik byù nghut nghut, jùn nghut nghut, lut bang nghut nghut, gungdu ra lhum za dut râ matú, Woi-nyí rayuq mai za wui-myhup hkâm yù bê nghut luî, Woi-nyí rayuq lé za chôm shuq yù bê bang nghut lhê.

<sup>14</sup> Haû gungdu gi, gungsho showui showang ra bun lé za kut tô é a nghut é za, myo myo lé pong tô é nghut lhê. <sup>15</sup> Haû hkyî gi, "Ngò, loq a nghut é yanmai, gungdu eq a sêng é nghut lhê." gâ é nghut jáng, hau é yanmai, gungdu eq a séng wó dut é a nghut. <sup>16</sup> Dum, haû nohkyap gi, "Ngò, myoqjí a nghut é yanmai, gungdu eq a sêng é nghut lhê." gâ é nghut jáng, hau é yanmai, gungdu eq a séng wó dut é a nghut. <sup>17</sup> Ragùng dû é gi, myoqjí za nghut é nghut jáng, gyô é hkyô gi, hkâmá nghut râ lú? Ragùng du é gi, nohkyap za nghut é nghut jáng, shôm nam é hkyô gi, hkâmá nghut râ lú? <sup>18</sup> Nghut kôlháng, Garai Gasang gi, gungsho showui showang hkangmó lé, Yhang dut nhâng nau é eq rajung za, gungdu má kut to bê nghut ri. <sup>19</sup> Gungsho showui showang gi, ra bun za nghut é nghut jáng, gungdu gi, hkâmá nghut râ lú? <sup>20</sup> Hkyak ga jang, gungsho showui showang pé myo kôlháng, gungdu gi, ragùng za nghut ri.

<sup>21</sup> Haû myoqjí gi, loq lé, "Ngò, nang lé a ra!" nghû a ge taí. Haû ulhum gi, hkyî lé, "Ngò, nang lé a ra!" nghû a ge taí. <sup>22</sup> Haû za a nghut, gungdu mâ é gungsho showui showang pé má wum je nyhôm é su dut é pé le, a bò a ge é chyat nghut lhê. <sup>23</sup> Hau htoq agó, hpau a lûm tap râ su myit ngam é gungsho showui showang pé lé, nga-nhúng je hpautap



râ lhê. Haû a shit é jung gungsho pé lé, nga-nhúng hpautap é dông rago nghop râ lhê. <sup>24</sup> Nga-nhúng é wó shit é gungsho pé kúm gi, haû hkyô a ra nghut ri. Nghut kôlhang, Garai Gasang gi, gungdû é gungsho showui showang pé lé pong to mù, aróng nyhum é lé, je riyhang aróng byi bê nghut ri. <sup>25</sup> Haû mù, gungdu má gamhkuî lhùm é hkyô a bo é za, gungsho showui showang pé ralhum eq ralhum, rajung za kut wó myit tê byî lhum kó râ nghut lhê. <sup>26</sup> Haû gungsho showui showang ralhum jamjau huî é nghut jáng, lhum hkangmó bo jamjau râ nghut lhê. Ralhum hpautap huî é nghut jáng, lhum hkangmó bo gabú é nghut lhê.

<sup>27</sup> Ahkuî, nungmoq gi, Hkrisduq é gungdu nghut kôluî, nungmoq yuq hkangmó gi, haû é gungsho showui showang pé nghut akô. <sup>28</sup> Garai Gasang gi, noqkuq hpúng má, sâng-hi lé, lagyô pé, í lhum nghû râ má, myiqhtoî pé, sùm lhum nghû râ má, mhoqshit bang, hau htâng má, laklaí kumlhá pé kut râ bang, nò wó lhoq gê râ chyunghuq wó é bang lé le, góbang lé wó garúm é bang, shuí-u râ chyunghuq wó é bang, laklaí dang ahú hú ge taí é bang lé, masat to bê nghut ri. <sup>29</sup> Banshoq bang gi, lagyô pé nghut lhê lhú? Banshoq bang gi, myiqhtoî pé nghut lhê lhú? Banshoq bang gi, mhoqshit bang nghut lhê lhú? Banshoq bang gi, laklaí kumlhá kut akô lhú? <sup>30</sup> Banshoq bang gi, nò lhoq ge é chyunghuq wó é nghut lhê lhú? Banshoq bang gi, laklaí dang ahú hú ge taí lhê lhú? Banshoq bang gi, dang haû pê é lichyúm ge taí sân kyô lhê lhú? <sup>31</sup> Nghut kôlhang, nungmoq gi, je gyaú é chyunghuq lé gyai yhang ô nau nyî keq.

### *Chyitdap Myit*

Hau htoq agó, ahkuî, ngò, nungmoq lé, je gyaú dik é hkyô ralhum shit kôlé.

## 13

<sup>1</sup> Ngò gi, byu pé é eq maumang lagyô pé é myíng pé lé sê taí é nghut kôlhang, chyitdap myit a bo é nghut jáng, mying hung htê bo é ut eq mying tui htê bo é chapchéng su za dut byuq râ nghut lhê. <sup>2</sup> Ngò gi, myiqhtoî htoî é chyunghuq, zaú tô é hkyô pé banshoq lé sê gyô é nyan, sumsé hpaqchyî banshoq lé wó é eq, bùm pé lé wó htot nhang é lumjíng myit bo é nghut kôlhang, chyitdap myit a bo é nghut jáng, ngò haî a nghut sù dut berâ nghut lhê. <sup>3</sup> Ngò gi, wó é sutzè banshoq myùng bang lé byî pyâm é eq, ngá é gungdu lé nyhê pyám râ matú ap pyâm é nghut kôlhang, chyitdap myit a bo é nghut le gi, hai akyû a bò nghut ri.

<sup>4</sup> Chyitdap myit gi, myit hing lhê, nú-nhâm lhê. Chyitdap myit gi, a manôn, gyáng dang a taí, a nghutbùn é nghut lhê. <sup>5</sup> Chyitdap myit gi, hpau a dap é hkyô a kut, yhumsing é akyû baú za a hô, luì za nhikjum a yo, shut é mara a matsîng é nghut lhê. <sup>6</sup> Chyitdap myit gi, agè ashop é má a gabú é za, haû tengmán hkyô má gabú nyi ri. <sup>7</sup> Chyitdap myit gi, hkâ-nhám le wú magum ri, hkâ-nhám le lumhkau ri, hkâ-nhám le myit myoqbyu ri, hkâ-nhám le hkam jân ri.

<sup>8</sup> Chyitdap myit gi, hkâ-nhám le htâm byuq é a nghut. Myiqhtoî htoî é hkyô pé gi, byuq byuq râ nghut lhê; laklaí dang ahú hú ge taí é hkyô gi, zim byuq râ nghut lhê; sumsé hpaqchyî hkyô gi, laí ló byuq râ nghut lhê. <sup>9</sup> Hkâsu mù gâ le, nga-nhúng sê é gi, ra-am rahtâng ru nghut lhê. Nga-nhúng myiqhtoî htoî é gi, ra-am rahtâng ru nghut lhê. <sup>10</sup> Nghut kôlhang, gumjup hkyô jé lé é hkûn, a gumjup hkyô gi, byuq byuq râ nghut lhê. <sup>11</sup> Ngò, zoshâng nghut ashî hkûn gi, zoshâng dông dang taí, zoshâng dông myit, zoshâng dông myit sôn wú é nghut lhê. Ngò, suwún nghut jáng gi, zoshâng nyî yap hkyô pé lé tô pyám bê nghut lhê. <sup>12</sup> Ahkuî, nga-nhúng gi, myoqjàm hkaû mâ é rago a sân é wupzo lé za myàng é nghut lhê; nghut kôlhang, htâng má, myoqdong hkyûm wó myàng râ nghut lhê. Ahkuî, ngò gi, ra-am rahtâng za sê é ru nghut lhê; nghut kôlhang, Garai Gasang gi, ngo lé gumjup shoq sê é su, ngò le, htâng má, gumjup shoq sé râ nghut lhê.

<sup>13</sup> Ahkuî, lumjíng myit, myit myoqbyù hkyô, chyitdap myit shi sùm lhum myit tô ri. Nghut kôlhang, haû pé mâ é kô dik é gi, chyitdap myit nghut ri.

## 14

*Myiqhtoi Htoi É Chyunghuq Pé Eq Laklaí Dang Nyo É Chyunghuq Pé*

<sup>1</sup> Chyitdap hkyô má le cháng mù, woi-nyí hkyô eq sêng é chyunghuq lé le gyai yhang myit o nyí keq. Myiqhtoi htoi é chyunghuq lé je riyhang myit o nyí keq. <sup>2</sup> Hkâsu mù gâ le, laklaí dang ahú hú nyo é sù ó yuq le, byù lé nyo é a nghut é za Garai Gasang lé nyo é ru nghut lhê. Yhang lé ó yuq eq le a sê gyo byi, zaú tô é hkyô pé lé haú Woi-nyí èq nyo htoq é nghut ri. <sup>3</sup> Nghut kôlhang, myiqhtoi htoi é sù yuq hkangmó gi, byu pé lé wum byi dang eq nhik títng dang taí ri. <sup>4</sup> Laklaí dang rahû nyo é sù gi, yhumsing gùng lé htuqbang byí ri, nghut kôlhang, myiqhtoi htoi é sù gi, noqkuq hpúng lé htuqbang byí ri. <sup>5</sup> Ngò gi, nungmoq yuq hkangmó laklaí dang ahú hú pé nyò râ lé ô nau ri, nghut kôlhang, nungmoq myiqhtoi htoi râ lé je ô nau é nghut lhê. Hkâsu mù gâ le, laklaí dang ahú hú nyo é sù gi, haú noqkuq hpúng lé wó htuqbang râ matú, lichyúm lé taí sân kyô é za a nghut jáng, myiqhtoi htoi sù gi, yhang htoq je gyaú é nghut lhê.

<sup>6</sup> Ahkuí, gumang wuì ê, ngò gi, nungmoq chyáng lé je mù, laklaí dang pé nyo é nghut kôle, shing-rán nghut nghut, sumsé hpaqchyí nghut nghut, myiqhtoi dang nghut nghut, mhoqshit dang nghut nghut, nungmoq lé a taí kyô é nghut le gi, nungmoq é matú ngò hai akyû htoq râ lhú? <sup>7</sup> Htê lhoq htoq é asak a bo jung zè pé má lhang gi, sampyí nghut nghut, títng nghut nghut, gam hkoq tô é htê a joq é nghut jáng, mut myhíng bat myhíng é htê haí nghut é lé, hkâsu wó sé râ lhú? <sup>8</sup> Dum, tut htê le gam hkoq é đông a mut kyô é nghut jáng, majan htoq râ rì rì ó yuq wá hên râ lhú? <sup>9</sup> Nungmoq chyáng le haú đông nghut lhê. Nang, laklaí dang ahú hú nyo le, sê gyô é danghkun mai nyo é za a nghut jáng, nang haí taí nyi é lé ó yuq wá hkâsu wó sé râ lhú? Nungmoq gi, maulat má za taí hâng pyâm nyí kó rá nghut lhê. <sup>10</sup> Mingkan má dang ahú hú yhang joq é nghut lhê, nghut kôle, dang lichyúm a htoq é dang gi, a joq é nghut lhê. <sup>11</sup> Haú mù luí, rayuq yuq haí taí nyi é lichyúm lé ngò a dat chyup é nghut jáng, ngò gi, haú dang taí su é matú maigan byù dut mù, yhang gi, ngá é matú maigan byù dut é nghut lhê. <sup>12</sup> Nungmoq chyáng le haú đông nghut lhê. Nungmoq gi, woi-nyí hkyô eq sêng é chyunghuq pé lé gyai yhang ô nau nyí bekô nghut mù, haú noqkuq hpúng lé kô myhâng nhang é chyunghuq pé lé je ho shikut nyí keq.

<sup>13</sup> Haú nghut é yanmai, laklaí dang ahú hú taí é sù ó yuq le, yhang haú taí é lichyúm wó taí sân kyo sháng gaq, kyûdung râ dut lhê. <sup>14</sup> Hkâsu mù gâ le, laklaí dang ahú hú đông ngò kyûdung é nghut jáng, ngá é woi-nyí mai dúng é nghut lhê; nghut kôlhang, ngá é myitnyân é matú, hai akyû a wó nghut ri. <sup>15</sup> Haú mù, ngò hkâsu kut râ lhú? Ngò gi, ngá é woi-nyí mai le kyûdung râ, ngá é myitnyan mai le kyûdung râ nghut lhê; ngò gi, ngá é woi-nyí mai le mahkôn hkôn râ, ngá é myitnyan mai le mahkôn râ nghut lhê. <sup>16</sup> Nungmoq gi, nungmoq é woi-nyí mai za Garai Gasang lé hkya-on kô é nghut jáng, a sê gyô é bang mâ é rayuq gi, nungmoq haí taí é lé a sê é nghut mù, nungmoq jeju hkya-ôn é hkôn, "Amen" ga hkâsu wó taí râ lhú? <sup>17</sup> Nungmoq gi, ge dik shoq jeju hkya-on kô é abe, nghut kôlhang, góbang gi, htuqbang é a hui kó nghut ri.

<sup>18</sup> Ngò gi, nungmoq banshoq bâng htoq má laklaí dang ahú hú je wó taí é yanmai, Garai Gasang lé jeju bân ri. <sup>19</sup> Nghut kôlhang, noqkuq hpúng má, laklaí dang rahû đông danghkun ramun ngò taí râ htoq má, góbang lé mhoqshit râ akyû bo é dang ngo hkun taí râ lé ngò je ô nau ri.

<sup>20</sup> Gumang wuì ê, zoshâng wuì su myit nyi é lé nô pyám keq. Agè ashop hkyô eq sêng é má gi, nyheqnú đông kut mù, nungmoq myit é hkyô má gi, ko bang đông kut keq. <sup>21</sup> Haú jep é tarâ má kâ tô é gi,

"A wó gyô wú é dang đông mai le, góming byu pê é nhutwuí đông mai le, byù shí bang lé ngò taí râ nghut lhê;

nghut kôlhang, yhangmoq gi, ngá dang gyo kó râ a nghut.'

ga Yhumsing taí ri."☆

gâ ri.

<sup>22</sup> Haû mù, laklaí dang ahú hú nyo é hkyô gi, lumjínng bâng matú kumlhá a nghut é za, a lumjínng bâng matú sheq ru nghut lhê. Myiqhtoi dang kúm gi, a lumjínng bâng matú a nghut é za, lumjínng bâng matú sheq ru nghut lhê. <sup>23</sup> Haû nghut mù, noqkuq hpúng gón chôm zing mù, yuq hkanngmó laklaí dang ahú hú nyò kô é nghut jáng, a sê gyô é bang nghut nghut, a lumjínng é bang nghut nghut, wang lé kô é hkûn, yhangmoq gi, nungmoq nâ bùm bekô ga a taí kó râ nghut lhê lú? <sup>24</sup> Nghut kôlháng, yuq hkanngmó, myiqhtoi dang taí nyi é u má, a lumjínng sù nghut nghut, a sê gyô é sù nghut nghut, wang lé é nghut jáng, yhang gi, yubak dap sù rayuq nghut é lé, banshoq èq lhoq pûn kyíng é hui râ eq, banshoq èq jéyáng é hui râ nghut é htoq agó, <sup>25</sup> yhâng é i-myt má zaú tô é hkyô pé lé de de lhoq htoq shit é hui râ nghut lhê. Haû mù, yhang gi, ngóm gop luí, Garai Gasang lé noqkuq mù, "Garai Gasang gi, gè gè yhang, nungmoq chyáng rahá nghut nyi ri!" ga taí pyo htoq kat râ nghut lhê.

#### *Shuq Shuq Tap Tap Za Noqkuq Râ Hkyô*

<sup>26</sup> Haû jáng, gumang wui ê, nga-nhúng haí taí râ lú? Nungmoq rahá lé chôm zîng é hkûn, yuq hkanngmó gi, Garai hkya-on mahkôn nghut nghut, mhoqshit é dang nghut nghut, shing-rán nghut nghut, laklaí dang ahú hú nyo é hkyô nghut nghut, taí sân kyô é nghut nghut pé lé, wó le ge ri. Haû pé banshoq gi, noqkuq hpúng lé wum-o byi râ matú chyat kut é dut râ lhê. <sup>27</sup> Rayuq yuq, laklaí dang ahú hú nyo é nghut jáng, í yuq eq myô htum sum yuq mai a laí é za, rayuq htâng rayuq nyò râ dut é htoq agó, rayuq yuq haû lé taí sân kyo ra râ dut lhê. <sup>28</sup> Taí san kyô é sù a nyi é nghut jáng, laklaí dang ahú hú nyo é sù gi, noqkuq hpúng má zim za nyi râ dut mù, yhânggùng yhang eq Garai Gasang lé za nyo râ dut lhê.

<sup>29</sup> Myiqhtoi í yuq nghut nghut, sum yuq nghut nghut taí kyo râ dut lhê; góbang gi, haí taí é lé rago gyô chyam wú râ dut lhê. <sup>30</sup> Nghut kôlháng, zung tô é sù rayuq yuq chyáng shing-rán jé é nghut jáng, hí taí nyi é sù gi, nô byuq râ dut lhê. <sup>31</sup> Hkâsu mù gâ le, yuq hkanngmó gi, mhoqshit é eq myit wum byi é wó hui kó sháng gaq, nungmoq banshoq bang gi, rayuq htâng rayuq myiqhtoi wó htoí é nghut lhê. <sup>32</sup> Haû myiqhtoi pé é woi-nyí pé gi, myiqhtoi pé uphkanng é a-ô má nghut nyi ri. <sup>33</sup> Hkâsu mù gâ le, Garai Gasang gi, atau ahú dut é Garai Gasang a nghut é za, nguínngón hkyô é Garai Gasang ru nghut lhê.

Sân-yúng bâng zing tô é hpúng banshoq mâ é eq rajung za, <sup>34</sup> myiwe wui gi, noqkuq hpúng pé má zim za nyi râ dut lhê. Yhangmoq gi, dang taí ahkáng a wó é nghut mù, haû jep é tarâ má bo é eq rajung za a-ô má nyi kó sháng gaq. <sup>35</sup> Yhangmoq gi, rajung jung sé naû kô é nghut jáng, yhûm má yhangmoq é yhumsîng hpô pé chyáng myi kó sháng gaq; hkâsu mù gâ le, myiwe rayuq noqkuq hpúng má dang taí é gi, ahoq ahí hkyô nghut ri.

<sup>36</sup> Haû Garai Gasang é mungdang gi, nungmoq chyáng mai htoq lo é nghut lhê lú? Haû gi, nungmoq chyáng za lé jé bê nghut lhê lú? <sup>37</sup> Rayuq yuq, yhang gi, myiqhtoi, a nghut jáng, woi-nyí chyunghuq byi é hui sù nghut lhê ga myit é nghut jáng, ngò, nungmoq lé ká byi é pé gi, haû Yhumsîng é hkunngmó nghut é lé, yhang sê yù sháng gaq. <sup>38</sup> Yhang gi, haû lé haí su a ngàm kut é nghut jáng, yhânggùng le, haí su a ngàm kut é hui zo râ nghut lhê.

<sup>39</sup> Haû mù luí, ngá é gumang wui ê, myiqhtoi htoi râ lé ô nau nyi mù, laklaí dang ahú hú nyo é lé hkâhkûm pyám kó. <sup>40</sup> Nghut kôlháng, jung hkanngmó gi, htuk é dông eq shuq shuq tap tap zâ é hkyô dông kut é dut râ lhê.

## 15

#### *Hkrisduq É Dui Toq Hkyô*

<sup>1</sup> Gumang wui ê, ngò, nungmoq lé hko kyo bê nghut mù, nungmoq le hap yù luí, nungmoq yap gîng tô é jowò nghut é gabú danglù hkyô lé, ahkuí, ngò, nungmoq lé lhoq pûn kat nau ri. <sup>2</sup> Ngò, nungmoq lé hko kyo bê é mungdang lé, nungmoq gîng gîng myhik

zing nyì kô é nghut jáng, nungmoq gi, gabú danglù hau é yanmai hkyi yù huí é nghut akô. Haù a nghut jáng, nungmoq lumjínq é gi, akôm dut bê nghut lhê.

<sup>3</sup> Ngò hap yu tô é pé lé, sâng-hi ahkyak é dông, ngò, nungmoq lé hai byi bê nghut lhê. Haù pé gi: Chyúmdang eq rajung za, Hkrisduq gi, nga-nhúng é yubak marâ é matú shí hkám byi bê gâ é nghut ri; <sup>4</sup> Yhang gi, myhup yhúm é hui luí, Chyúmdang eq rajung za sum nyí nghu é nyí má lhoq dui toq é hui bê nghut mù, <sup>5</sup> Petruq lé htoq shit luí, haù lagyo raxe í yuq lé le htoq shit ri. <sup>6</sup> Hau htâng má, Yhang gi, ra-u má za, gumang wuì ngo shô yuq chyân lé htoq shit ri. Haù bang mâ é myo hpyang gi, ahkuí jé shoq asak dui nyi bum akô; ra-am kúm gi, shi ló byuq bekô nghut ri. <sup>7</sup> Hau htâng, Yhang gi, Yakuq lé htoq shit mù lagyô pé banshoq bang lé htoq shit ri. <sup>8</sup> Ló htâng má, Yhang gi, hkú buinyi a jé shí é má hku é dông nghut sù ngo lé le htoq shit bê nghut ri.

<sup>9</sup> Hkâsu mù gâ le, ngò gi, lagyô pé mâ é tiq dik sù nghut lhê. Haù Garai Gasâng é noqkuq hpúng lé zing-ri sù nghut é yanmai, ngò gi, lagyo rayuq nghú râ lhang a gingdán é sù nghut lhê. <sup>10</sup> Nghut kôlhang, ngò ahkuí îsu wó nghut nyi é gi, Garai Gasâng jeju mai nghut lhê. Yhâng é jeju gi, ngá chyáng akôm a dut é za, ngò gi, yhangmoq banshoq bâng htoq má je riyhang mù wùn waq shikut lhê. Haù gi, ngò kut é a nghut, ngò eq rahá nghut nyi é Garai Gasâng jeju sheq ru nghut lhê. <sup>11</sup> Haù mù luí, ngò nghut nghut, yhangmoq nghut nghut, ngamoq hko kyô é gi, haù hkyô chyat nghut lui, nungmoq lumjínq é le, haù hkyô nghut ri.

#### *Shi Byuq Bâng É Dui Toq Hkyô*

<sup>12</sup> Nghut kôlhang, haù Hkrisduq shi é mai lhoq dui toq é hui bê hkyô lé hko kyô nyi bê nghut mù, nungmoq mâ é ra-am gi, shi byuq bâng é dui toq hkyô a joq nghú, hkâsu wó táí kó râ lhu? <sup>13</sup> Shi byuq bâng é dui toq hkyô a joq é ru nghut le gi, Hkrisduq le lhoq dui toq é hui berâ a nghut. <sup>14</sup> Hau htoq agó, Hkrisduq gi, lhoq dui toq é a huí é ru nghut le gi, ngamoq hko kyô é hkyô eq, nungmoq é lumjínq hkyô gi, akôm dut byuq râ nghut lhê. <sup>15</sup> Hau htoq agó, Garai Gasang gi, haù Hkrisduq lé shi é mai lhoq dui toq bê hkyô lé, ngamoq saksé hkám bê nghut é yanmai, ngamoq gi, Garai Gasâng é hkyô má saksé apyoq pé dut byuq râ za nghut lhê. Nghut kôlhang, shi byuq bang lhoq dui toq huí é hkyak a joq é ru nghut le gi, Garai Gasang, Yhang lé lhoq dui toq kat râ a nghut. <sup>16</sup> Hkâsu mù gâ le, haù shi byuq bang lhoq dui toq é a huí é nghut jáng, Hkrisduq le, lhoq dui toq é hui berâ a nghut. <sup>17</sup> Hkrisduq gi, lhoq dui toq é a huí é nghut jáng, nungmoq é lumjínq hkyô gi, akôm dut luí, nungmoq gi, nungmoq é yubak mara hkaù má ru nyi nyi shi kó râ nghut lhê. <sup>18</sup> Haù nghut jáng, Hkrisduq má shi ló byuq bê bang le, htên byoq byuq râ za nghut lhê. <sup>19</sup> Nga-nhúng gi, shí ipyat lhê é matú za, Hkrisduq má myit myoqbyù hkyô wó é nghut jáng, byù banshoq bâng htoq má shogyo rayhup dut é je hui zo bang dut kó râ nghut lhê.

<sup>20</sup> Nghut kôlhang, Hkrisduq gi, gè gè yhang shi é mai lhoq dui toq é hui bê nghut mù, shi ló byuq bâng é sâng-hi ashi dut bê nghut ri. <sup>21</sup> Hkâsu mù gâ le, shí-nò hkyô gi, byù rayuq dông mai lò bê nghut é eq rajung za, shi byuq bâng é dui toq hkyô le, byù rayuq dông mai lo é nghut lhê. <sup>22</sup> Hkâsu mù gâ le, lunglhang bang gi, Adam é yanmai shi byuq é su, lunglhang bang gi, Hkrisduq eq rading ralhú za nghut é yanmai lhoq dui toq é hui râ nghut lhê. <sup>23</sup> Nghut kôlhang, yuq hkangmó gi, ó le ó âng é hkûn lhoq dui toq é hui râ nghut lhê: Hkrisduq gi, sâng-hi lhoq dui toq huí é sù nghut lhê. Hau htâng má, Yhang jé lé é hkûn, Yhang eq sêng é bang lhoq dui toq é hui râ nghut lhê. <sup>24</sup> Hau htâng, jithúm jé râ nghut lhê; haù hkûn, Yhang gi, up é bang banshoq, ahkáng ayá eq a-tsam pé lé ban lhoq htên pyâm é htâng, haù Îwa nghut sù Garai Gasang lé mingdán ap byi râ nghut lhê. <sup>25</sup> Hkâsu mù gâ le, Yhang gi, Yhâng é gye pé banshoq lé, Yhâng é hkyî wang ô má tô pyâm é hkûn jé shoq up nyi ra râ nghut lhê. <sup>26</sup> Haù lhoq htên pyâm é hui râ nghut é ló htâng é gye gi, shí-nò hkyô nghut ri. <sup>27</sup> Hkâsu mù gâ le, "Garai Gasang gi, jung hkangmó lé, Yhâng é hkyî wang ô má tô pyâm bê nghut ri." <sup>✠</sup> gâ Chyúmdang má kê tô ri. "Jung hkangmó lé"

Yhâng é a-ô má tô pyám bê ga taí é hkûn, jung hkanmó lé Hkrisduq é a-ô má tô pyám bê sù Garai Gasang yhang kúm a lom é hkyô, san za nghut nyi ri. <sup>28</sup> Yhang gi, haú hkyô ban kut é htâng má, haú Zo yhang le, jung hkanmó lé Yhâng é a-ô má to byi bê sù Garai Gasang é a-ô má nyi sù dut nhang é hui rã nghut mù, Garai Gasang gi, lhunghâng htoq má gyaú sù nghut luí, lhungháng lé sîng sù nghut rã nghut lhê.

<sup>29</sup> Dui toq hkyô a joq é ru nghut le gi, shi byuq bê bâng é matú wui-myhup hkám byí bùm kô é gi, hai akyû bò kó rã lú? Haú shi byuq bang lhoq dui toq é a hui kô é ru nghut le gi, yhangmoq matú haí mù byu pé wui-myhup hkâm yù kó rã lú? <sup>30</sup> Ngamoq gi, ngamoq é matú, hkyíng hkanmó haí mù chiq rã jowò má nyi rã lhê lú? <sup>31</sup> Gumang wui ê, ngò gi, nyí wui aluq shoí shoí shi é hui zô é nghut lhê. Haú su nghû é gi, nga-nhung é Yhumsîng Hkrisduq Yesuq má, nungmoq é hkyô lé ngò hkyak wó gumrong é yanmai nghut lhê. <sup>32</sup> Ngò gi, xângzo hkyam dông mai za, Ehpesu myuq má tân jung dusak pé lé majan zân nyi é nghut jáng, ngá é matú hai akyû bò rã lú? Shi byuq bang lhoq dui toq é a huí é ru nghut le gi,

"Nga-nhung gi, napmá shi rã nghut é yanmai,

zo sháng, shuq sháng."✠

ngû rã za nghut lhê. \* <sup>33</sup> "A ge é zùm yap luzúm wui gi, ge é nyi yap sâmlai lé hten nhang é nghut lhê." gâ é sanghkyang eq rajung za, hkyô shuí nghoq é hkâhui zo kó! <sup>34</sup> Nungmoq gi, tau bûn gyíng lò mù, mara hkâkut shut lo kó; hkâsu mù gâ le, Garai Gasang lé a sê é byù ra-am nyi akô. Ngò haú su nghû taí é gi, nungmoq hoq bun rã matú nghut lhê.

#### Dui Toq É Gungdu

<sup>35</sup> Nghut kôlhâng, rayuq yuq gi, "Haú shi byuq bê bang, hkâsu kut lhoq dui toq é hui kó rã lú? Yhangmoq gi, hkasù é gungdu nghut kó rã lú?" ga myi rã nghut lhê. <sup>36</sup> Haú-í nghâ sù ê! Nàng hô hkyô kat é pé gi, shi byuq é za a nghut jáng, yuq htoq lô rã a nghut mhaí. <sup>37</sup> Nàng, kyô hkyô é hkûn, yuq lò rã nghut é agàm lé hô hkat e a nghut é za, sungso amyui nghut nghut, gotû amyui rajung jung nghut nghut lé za hô kat é ru nghut lhê.

<sup>38</sup> Nghut kôlhâng, Garai Gasang gi, Yhang myit hpyit to bê eq rajung za haú lé gungdu ralhum byi mù, kyôshi myui hkanmó lé, ó le ô é gungdu byí ri. <sup>39</sup> Gungsho lhunghâng gi, rajung za a nghut. Byù pé é gungsho gi, rajung, dusak pé é gi, gó jung, nghoq pé é gi, gó jung, ngozo pé é gi, gó jung ru nghut lhê. <sup>40</sup> Mauhkûng gùng pé le joq é nghut luí, myidam gùng pé le joq ri; nghut kôlhâng, mauhkûng gùng pé é shingkan gi, rajung, myidam gùng pé é shingkan gi, gó jung ru nghut lhê. <sup>41</sup> Haú bùi má bo é shingkan gi, rajung, lhamó mâ é gi, gó jung, kyí pé mâ é gi, gó jung ru nghut lhê; kyí racham eq rachâm é shingkan le gotû tû shai lhâm lhê.

<sup>42</sup> Haú mù, shi byuq bê bâng é dui toq hkyô le, haú eq rajung za nghut ri. Haú hô hkyô kat é gungdu gi, htên byoq sê é nghut luí, lhoq dui toq huí é gungdu kúm gi, htên byoq a sê é nghut lhê. <sup>43</sup> Hô hkyô kat é hkûn gi, aróng a bò, lhoq dui toq huí é hkûn gi, hpungwup shingkan bo ri. Hô hkyô kat é hkûn gi, wum nyhóm mù, lhoq dui toq huí é hkûn gi, a-tsam bo ri. <sup>44</sup> Gungsho gungdu gi, hô hkyô é hui mù, woi-nyí gungdu gi, lhoq dui toq é huí ri.

Gungsho gungdu joq é nghut le gi, woi-nyí gungdu le joq é nghut lhê. <sup>45</sup> Haú nghut mù, "Haú sâng-hi yuq byù Adam gi, asak dui é xângzo dut bê nghut ri."✠ ga kê tô ri. Haú ló htâng é Adam kúm gi, asak byí é woi-nyí nghut ri.† <sup>46</sup> Haú woi-nyí eq sêng é hí lé joq é a nghut é za, gungsho eq sêng é hí lé joq é htâng má sheq, woi-nyí eq sêng é lé joq é ru nghut lhê. <sup>47</sup> Haú sâng-hi yuq byù gi, myidâm mâ é tseyûn lé saí é nghut mù, htang lhê yuq byù gi, mauhkûng htoq mâ é nghut ri. <sup>48</sup> Haú myidâm byù nghut sù su, myidâm eq sêng é bang le nghut nyi akô; haú mauhkûng htoq mâ é byù nghut sù su, mauhkûng eq sêng é bang le nghut nyi akô. <sup>49</sup> Nga-nhung gi, myidâm byù é gunghkyâng isâm lé hkam

✠ 15:32 Esai 22:13 \* 15:32 Dang ngho shí gi, a lumjîng bang taí é dang nghut lhê. ✠ 15:45 Apùn 2:7 † 15:45 Ló htâng é Adam gi, Yesuq lé taí nau é nghut lhê.

yù bê nghut é su, mauhkûng htoq mâ é byu é gunghkyâng isâm lé le myang hkam yù râ nghut lhê.

<sup>50</sup> Gumang wuì ê, ngò, nungmoq lé shit kyo kôlé, gungsho eq sui gi, Garai Gasâng é mingdán é silí wunlí lé wó yù râ a nghut, htên byoq sê é le, htên byoq a sê é silí wunlí lé wó yù râ a nghut. <sup>51</sup> Gyo to keq, zaú tô é hkyô lé, ngò, nungmoq lé taí kyo kôlé: Nga-nhúng banshoq bang gi, shi byuq râ a nghut é za, htaí lhik é hui râ ru nghut lhê. <sup>52</sup> Haú gi, ló htâng é tut htê mying é hkûn, ralháp za, myoqkuq raláp má dut râ nghut lhê. Hkâsu mù gâ le, tut htê mying râ nghut lhê, haú hkûn, shi byuq bê bang gi, htên byoq a sê é shut lhoq dui toq yu é hui râ nghut mù, nga-nhúng gi, htaí lhik é hui râ nghut lhê. <sup>53</sup> Hkâsu mù gâ le, htên byoq sê é gi, htên byoq a sê é lé htaí wut yù mù, shi byuq sê é gi, shi byuq a sê é lé htaí wut yù râ dut é nghut lhê. <sup>54</sup> Haú htên byoq sê é gi, htên byoq a sê é lé htaí wut yù mù, shi byuq sê é gi, shi byuq a sê é lé htaí wut yu é hkûn sheq, "Shî-nò hkyô gi, ûng budâng èq myui pyâm é hui bê nghut ri."✠ ga kâ tô é eq,

<sup>55</sup> "Shî-nò hkyô ê, náng é ûng budang gi, hkâmá lhú? Shî-nò hkyô ê, náng é nyin gi, hkâmá lhú?"✠

gâ tô é sanghkyang gi, dik râ nghut lhê. <sup>56</sup> Haú shî-nò hkyô é nyin gi, yubak mara nghut ri; yubak marâ é a-tsam gi, jep é tarâ nghut ri. <sup>57</sup> Nghut kôlhang, Garai Gasang lé jeju hkya-ôn lhê! Yhang gi, nga-nhúng é Yhumsîng Yesuq Hkrisduq đông mai, nga-nhúng lé ûng budang byî é nghut ri.

<sup>58</sup> Haú mù luì, ngá é chyitdap gumang wuì ê, yap gingtîng nyi keq. Hai èq le, nungmoq lé hkâlhoq dui nún nhâng kó. Nungmoq gi, haú Yhumsîng má nungmoq wùn waq é muzó akôm a nghut é lé sé kô é nghut lhê yanmai, haú Yhumsing é muzó lé ayang wùn waq shikut nyi keq.

## 16

### *Yerusalem Wà Mó Mâ É Lumjîng Bâng É Matú Alu Hkyuì Râ Hkyô*

<sup>1</sup> Ahkuì, Garai Gasâng é byu pê é matú alu hkyuì râ hkyô eq séng luì gi, haú Galatiq mau mâ é noqkuq hpûng pé lé ngò kut nhang é su kut keq. <sup>2</sup> Ngò jé lé é hkûn, alu hkyuì râ hkyô a kut ra râ đông, bat hkangmó mâ é sâng-hi nyí má, yuq hkangmó gi, yhumsîng wó ho é má cháng mù, gam tô to lánq keq. <sup>3</sup> Ngò jé lé é hkûn, ngò gi, nungmoq hkyin tô é byu pé lé, shit kyô é laiká pé byi mù, nungmoq é chyunghuq lé, Yerusalem wà mó má é dé nhâng râ nghut lhê. <sup>4</sup> Ngò le ê ang râ dut é nghut jáng, yhangmoq gi, ngá é byinzùm kut râ nghut lhê.

### *Poluq Lum Kat É Hkyô Pé*

<sup>5</sup> Ngò gi, Makedoni mau laí byit é htâng, nungmoq chyáng jé lé râ nghut lhê. Hkâsu mù gâ le, ngò gi, Makedoni mau laí byit râ za nghut lhê. <sup>6</sup> Ngò hkâmá é kôlhang, ngá é hkyowuì má nungmoq wó garúm kat kó râ matú, ngò gi, rayoq zo nghut nghut, gyoqmyò lháng lai shoq nghut nghut, nungmoq eq rahá nyi abe. <sup>7</sup> Ngò gi, laí ló uchyang za nungmoq lé lé kum râ nghut mù, ahkuì wó myâng râ lé a nau é nghut lhê; ngò gi, haú Yhumsîng dóng é nghut jáng, nungmoq eq rahá rayoq nyi râ lé myit myoqbyu lhê. <sup>8</sup> Nghut kôlhang, ngò gi, Penteko-ti poí buinyì jé shoq Ehpesu myuq má nyi râ nghut lhê. <sup>9</sup> Haí mù gâ le, ngo lé htuq htîng é bang myo myo nyi é nghut kôlhang, akyû htoq é muzó é matú hkum mó ngo lé hpông to byî é yanmai nghut lhê.

<sup>10</sup> Timohti jé lé jáng, yhang, nungmoq eq rahá nyi é u má, gyuq é hkyô haí le a joq râ matú wú byi keq; hkâsu mù gâ le, yhang gi, haú Yhumsing é muzó lé, ngò su wùn waq wún é sũ nghut lhê. <sup>11</sup> Haú mù, ó yuq le, yhang lé hkâwú shóm kó. Yhang gi, ngá chyáng wó dum taú jé sháng gaq, yhâng é hkyowuì má nguingón é đông nhang kat keq. Haú gumang wuì eq rahá lò kó râ lé, ngò myit lánq nyi lhê.

<sup>12</sup> Ahkuì, nga-nhúng é gumang Apolo é hkyô eq séng luì ga jang: yhang gi, haú gumang wuì eq rahá nungmoq chyáng lé râ lé, ngò, gyai yhang wum taí tsuq lhê. Yhang kúm gi,

ahkuî lé nau é myit a dê bò shi, nghut kôlhang, yuqyo é ahkyíng wó jáng, yhang lé lô râ nghut lhê.

<sup>13</sup> Machya nyî keq; lumjíng hkyô má ging ging tíng tíng yap nyî keq; gyuq kyum myit hkâbô kó; wum bo nyî keq. <sup>14</sup> Jung hkanmó lé, chytidap myit eq zui saí keq.

<sup>15</sup> Stehpana eq yhâng é yhumbyù wui gi, Ahkaia ming má sâng-hi hpúng wâng bang nghut luî, yhangmoq gi, yhumsîng gùng lé, haû sâng-yúng bâng é dojaú hkyô má ap nóng bekô lé, nungmoq sê akô nghut ri. Gumang wui ê, ngò, nungmoq lé wum taí tsuq kat kôlé, <sup>16</sup> haû sù é bâng é a-ô má le, haû muzó má bo wang lòm mù, mù zui shikut bang yuq hkanmó é a-ô má le, nyî keq. <sup>17</sup> Ngò gi, Stehpana, Hportunatu eq Ahkaiku pé jé lo é hkûn, gyai gabú é nghut lhê, haí mù gâ le, yhangmoq gi, nungmoq a kut byî é hkyô lé, lhoq pyíng byi bekô nghut ri. <sup>18</sup> Hkâsu mù gâ le, yhangmoq gi, ngá é woi-nyí eq nungmoq é woi-nyí lé lhoq ngón byi bekô nghut ri. Haû sù é bang lé, hpautap nyî keq.

### *Ló Htâng É Shi-kyám Dang*

<sup>19</sup> Asia mau mâ é noqkuq hpúng pé gi, nungmoq lé shi-kyâm kat akô. Akula eq Priskila nhik le, yhangnhik é yhûm má chòm huí é noqkuq hpúng lé, haû Yhumsîng má nungmoq lé gyai yhang shi-kyâm kat akô. <sup>20</sup> Shí má nyi é gumang wui banshoq bang gi, nungmoq lé shi-kyâm kat akô. Rayuq eq rayuq chyoiyúng é chytipuq èq shi-kyâm lhum keq.

<sup>21</sup> Ngò, Poluq gi, shi-kyám dang shí lé, ngá é loq èq yhang ká é nghut lhê.

<sup>22</sup> Rayuq yuq, haû Yhumsîng lé a chytidap é nghut jáng, haú yuq gi, nhîng pyâm é hui sháng gaq. Yhumsîng ê, jé lé aq hkoi!

<sup>23</sup> Haû Yhumsîng Yesuq é jeju gi, nungmoq eq rahá nghut nyî sháng gaq.

<sup>24</sup> Ngá é chytidap myit gi, Hkrisduq Yesuq má nungmoq banshoq bâng chyáng joq nyî sháng gaq. Amen.

## KORINHTUQ Pê Chyáng Htang Dàm Hun Kat é Laiká (2 Corinthians)

<sup>1</sup> Garai Gasang ô nau é eq rajung za, Hkrisduq Yesuq é lagyo rayuq dut sù ngò Poluq gi, nga-nhông é gumang Timohti le kut, Korinhtuq myuq mâ é, Garai Gasâng é noqkuq hpúng lé le, Ahkaia mau gón mâ é sâ-n-yúng bang banshoq chyáng le, dang kyô kat lhê:  
<sup>2</sup> Nga-nhông é Îwa nghut é Garai Gasang eq haû Yhumsîng Yesuq Hkrisduq chyáng mâ é jeju eq nguóngón hkyô gi, nungmoq chyáng ru joq nyî sháng gaq.

### *Nhik tíng hkyô banshoq é Garai Gasang*

<sup>3</sup> Nga-nhông é Yhumsîng Yesuq Hkrisduq é Yhângwa eq Garai Gasang, shogyo nhikmyin hkyo é Îwa eq nhik tíng hkyô banshoq é Garai Gasang gi, hkya-on kungton é huí nyî sháng gaq. <sup>4</sup> Garai Gasâng chyáng mai ngamoq wó yû bê nghut é nhik tíng hkyo èq, hkasû é wuîhke hkyô hui bang lé le nga-nhông wó nhik tíng byi sháng gaq ga, Yhang gi, ngamoq é wuîhke hkyô banshoq má nhik tíng byî ri. <sup>5</sup> Hkâsu mù gâ le, Hkrisduq hui zô é jamjau hkyô myo myo lé ngamoq bo hui zô é su, Hkrisduq dông mai, ngamoq é nhik tíng hkyô le byíng mui nyi é nghut lhê. <sup>6</sup> Ngamoq, myit myo uhkyî é huí é nghut jáng, nungmoq é nhik tíng hkyô eq hkyi yù hkyo é matú nghut nyi ri; ngamoq, nhik tíng é huí é nghut jáng, nungmoq é nhik tíng hkyo é matú nghut luí, haû gi, ngamoq jamjaû é eq rajung za nghut é jamjau hkyô lé, myit hing é dông mai wó jân pyám râ a-tsam, nungmoq chyáng lhoq htoq byî é nghut lhê. <sup>7</sup> Haû mù, ngamoq é jamjau hkyô pé má nungmoq bo lòm bekô nghut é su, ngamoq é nhik tíng hkyô má le nungmoq bo lòm bekô nghut é hkyô lé, ngamoq sê é yanmai, nungmoq lé ngamoq myit myoqbyu kat é hkyô gi, hkyak wó lum to bê nghut lhê.

<sup>8</sup> Gumang wuî ê, Asia mau má, wuîhke jamjaû é ngamoq gyai yhang hui zô é hkyô lé, ngamoq gi, nungmoq lé kyô kat nau ri. Ngamoq wó jân é a-tsam lhang htum shoq hpuzô é nghut luí, ngamoq gi, asak duì lo râ lhang a myit myoqbyù lô é nghut lhê. <sup>9</sup> Gè gè yhang, ngamoq gi, sat hui berâ nghû, ngamoq é i-myt má lumjínng pyâm é nghut lhê. Nghut kôlhang, haû gi, ngamoq gùng ngamoq a lumhkau é za, shî bê bang lé lhoq dui toq sù Garai Gasang lé lumhkaû râ matú dut é nghut lhê. <sup>10</sup> Garai Gasang gi, haû sù é shî râ hkyô mai hkyi yù bê nghut mù, ngamoq lé hkyi yù râ za nghut lhê. Yhang gi, ngamoq é matú nungmoq kyûdung byî nyi é u má, xoq luí ngamoq lé hkyi yù râ za nghut lhê nghû, ngamoq gi, Yhang lé myit myoqbyu to bê nghut luí, <sup>11</sup> myo myo kyûdung byî é lé gyo byî é má ngamoq shimân jeju wó mù, byù myo myo gi, ngamoq wó é shimân jejû é yanmai Garai Gasang lé jeju hkya-on kó râ nghut lhê.

### *Poluq, Hen Tô É Muzó Htaî Pyâm É Lé Taî Hung É Hkyô*

<sup>12</sup> Ngamoq nghutbùn é gi, Garai Gasâng chyáng mâ é chyoiyúng hkyô eq lhumzui hkyô má, mingkan zo wuî eq ngamoq asak duì bê hkyô lé le, je luí nungmoq eq zùm yap é hkyô lé le, ngamoq é myit sôn sê é hkyo èq, saksé hkám byî é hkyô nghut lhê. Ngamoq haû su kut é gi, mingkan hpaqchyî byéng-yá dông mai kut é a nghut é za, Garai Gasâng é jeju dông mai kut é ru nghut lhê. <sup>13</sup> Hkâsu mù gâ le, ngamoq gi, nungmoq a dat nghap é eq a sê gyô é haî le a ká byî kat é nghut lhê. Ngò, myit myoqbyu kat é gi, <sup>14</sup> nungmoq gi, ngamoq é hkyô ra-am lé wó sê gyô yù bê eq rajung za, haû Yhumsîng Yesuq é buinyî má nungmoq é hkyô lé ngamoq nghutbun râ nghut é su, ngamoq é hkyô lé nungmoq wó nghutbun râ matú, nungmoq, banshoq lé sê gyo kó râ nghut lhê.

<sup>15</sup> Haû hkyô lé, ngò hkyak myit lum to bê nghut é yanmai, nungmoq gi, akyû í dam wó hkam yù kó sháng gaq nghû, ngò gi, nungmoq chyáng hí lé kum râ matú hen to bê nghut lhê. <sup>16</sup> Ngò gi, Makedoni mau shut e ló é hkyowuî má nungmoq lé hí lé kum mù, Makedoni mau mai nungmoq chyáng dum taû lò luí, Yuda mau shut e é hkyowuî má,



nungmoq, ngo lé garúm kat kó râ lé myit lum to bê nghut lhê. <sup>17</sup> Ngò gi, haú hkyô hen é hkûn, agon za hen hkyut é nghut lhê lú? Haú a nghut jáng, ngò hen é pé gi, ra-u má za, "Nghut lhê, nghut lhê." nghû é eq, "A nghut, a nghut." nghu é wó taí râ matú, mingkan myit đông hen é nghut lhê lú?

<sup>18</sup> Gè gè yhang, Garai Gasang gi, lhumzui sù yhang nghut é eq rajung za, ngamoq é danglù gi, nungmoq chyáng "Nghut lhê" lé, "A nghut" nghu é a nghut. <sup>19</sup> Hkâsu mù gà le, ngo èq le, Sila èq le, Timohti èq le, nungmoq chyáng hko kyo bê nghut é sù, Garai Gasang é Yhangzo Yesuq Hkrisduq gi, "Nghut lhê" nghu é eq "A nghut" nghu é sù a nghut é za, Yhang má gi, hkâ-nhám le "Nghut lhê" nghu é za joq lhê. <sup>20</sup> Hkâsu mù gà le, Garai Gasang gi, danggidiq hkâ-myhó to kôle, haú pé gi, Hkrisduq má "Nghut lhê" chyat nghut lhê. Haú mù, Garai Gasang é hpungwup shingkang é matú, Yhâng đông mai, nga-nhúng gi, "Amen" nghû taí é nghut lhê. <sup>21</sup> Ngamoq eq nungmoq lé Hkrisduq má yap gingtíng nhang é sù gi, Garai Gasang nghut ri. Yhang gi, nga-nhúng lé masat é xù but byi mù, <sup>22</sup> Yhang sing lhê gà é dizik, nga-nhúng lé htông tap byi lú, jé lô râ hkyô pé hkyak joq lhê nghu é masat zè đông, Yhâng é Woi-nyí lé nga-nhúng é i-myit unghkaú má kat byi bê nghut ri.

<sup>23</sup> Ngò gi, nungmoq hkyamsa râ matú, Korinhtuq myuq má a dum taú lé é hkyô têng é lé, ngá é saksé dut râ đông Garai Gasang lé wut dúng lhê. <sup>24</sup> Haú gi, nungmoq é lumjíng hkyô lé ngamoq sing pyám byí é a nghut é za, nungmoq é gabú hkyo é matú, nungmoq eq rahá chôm zui saí é ru nghut lhê; haú mù gà le, lumjíng myit mai za nungmoq wó yap gíng nyi bùm kô é ru nghut lhê.

## 2

<sup>1</sup> Haú mù lú, ngò gi, nungmoq lé myit nò nhâng é dut râ đông, lé dum kûm é a kut râ nghû, myit hpyit to bê nghut lhê. <sup>2</sup> Hkâsu mù gà le, nungmoq lé ngò yón kuq nhang é nghut le gi, ngò yón kuq nhâng bê bang nungmoq mai lai lú, ó yuq wá ngo lé wó gabú nhâng râ lú? <sup>3</sup> Ngò jé lé é hkûn, ngo lé gabú nhâng râ âng é băng èq, ngo lé myit nò nhang é a hui sháng gaq nghû, ngò gi, ngò kut é eq rajung za laiká kâ kat bê nghut lhê. Ngá é gabú hkyô lé nungmoq banshoq bang wó bo gabú kó râ nghut lhê nghû, nungmoq banshoq bang lé ngò hkyak myit lum tô lhê. <sup>4</sup> Hkâsu mù gà le, ngò gi, nungmoq lé laiká kâ é hkûn, myit myo uhkyí mó èq le, myit má yón kuq é èq le, ngaubyi ngau-nhap é èq le, kâ kat bê nghut lhê. Haú gi, nungmoq lé yón kuq é hui nhâng râ matú a nghut é za, nungmoq lé ngò hkâ-í chyitdap é hkyô lé sé nhâng râ matú ru nghut lhê.

### *Mara Hkyut Byí Lhum Râ Hkyô*

<sup>5</sup> Yón kuq hkyô lhoq htoq é sù gi, yhang, nungmoq banshoq bang lé ahkyô hkyô pé má yón kuq nhang é su, ngo lé gyai wá yón kuq nhang é a nghut. Haú hkyô eq séng lú, ngò gyai wá yhang zuq zuq a taí nau é nghut lhê. <sup>6</sup> Nungmoq myo hpyâng èq yhang lé mara dam byí é hkyô gi, yhâng é matú gé bê nghut ri. <sup>7</sup> Nghut kôlhang, ahkuí, nungmoq gi, yhang a wó jan loshoq myit yón é a hui zo râ matú, yhang lé mara hkyut pyám byi mù, nhik tíng byi keq. <sup>8</sup> Haú mù lú, nungmoq é chyitdap myit gi, yhang é ahtoq má dum lhoq gíng shit nyí keq nghû, nungmoq lé ngò wum taí tsuq kat lhê. <sup>9</sup> Ngò, nungmoq lé haú mù laiká ká byí kat é hkyô gi, nungmoq chyam wú huí é hkyô lé wó jân é hkyô eq jung hkangmó má jìno gyo hkyô bò a bo é lé, wó sé râ matú le nghut lhê. <sup>10</sup> Nungmoq, rayuq yuq lé mara hkyut byí é nghut le gi, ngò le, haú yuq lé mara hkyut byí lhê. Mara hkyut râ rajung jung joq é nghut jáng, ngò mara hkyut é gi, Tsadán èq nga-nhúng lé a wó ùng râ matú, nungmoq é yanmai, Hkrisduq é myoq hí má ngò mara hkyut byi bê nghut lhê. <sup>11</sup> Hkâsu mù gà le, Tsadán hen é hkyô pé lé nga-nhúng a sê é a nghut.

### *Dangshikaq Asik Mâ É Hpungmû Wùn Bang*

<sup>12</sup> Ngò gi, Hkrisduq é gabú danglù hko kyo râ matú, Troa myuq má ê jé é hkûn, haú Yhumsing gi, ngo lé hkum hpóng byí é lé, ngò myang ri. <sup>13</sup> Nghut kôlhang, ngò gi, ngá é

gumang Tituq lé háu má a myang ho é yanmai, myit myo mù, yhangmoq lé shi-kyâm to luî, Makedoni mau shut xoq e ló é nghut lhê.

<sup>14</sup> Nghut kôlhang, Hkrisduq má, ngamoq lé hkâ-nhám le ûng budang hkyô shut shuî-û yù mù, Hkrisduq lé sê é sumsé hpaqchyi é nam ngón shôm lé, ngamoq đông mai jowò hkangmó má taî pyo é sủ, Garai Gasang gi, jeju hkya-ôn é huî nyì sháng gaq. <sup>15</sup> Hkâsu mù gâ le, ngamoq gi, hkyi yu é huî nyì băng chyáng le, htên byoq ló é huî nyì băng chyáng le, Garai Gasâng é matú Hkrisduq é nam ngón shôm nghut nyi lhê. <sup>16</sup> Ngamoq gi, htên byoq nyì băng é matú shî-nò hkyo é shôm dut mù, hkyi yù huî nyì băng é matú nghut jáng, asak hkyo é nam ngón shôm dut é nghut lhê. Haù mù, ó yuq wá muzó shî eq htuk râ lúhú? <sup>17</sup> Ngamoq gi, amyat wó râ matú Garai Gasâng é mungdang lé hkat ung zô é byù myo myo su a nghut é za, Garai Gasâng chyáng mai nhang é byu pé su, Garai Gasâng é hí má, Hkrisduq é byu pé đông lhumzui myit mai taî é nghut lhê.

### 3

<sup>1</sup> Ngamoq gi, yhumsing gùng yhumsîng dum owaq hi ló é nghut lhê lúhú? Byù ra-am kut é su, nungmoq chyáng, ngamoq é matú htuqluq htuqbáng laiká ká byi kô é ngamoq ra râ luq, nungmoq yuq ngamoq é matú ká byi ra kó râ luq? <sup>2</sup> Nungmoq gùng yhang gi, ngamoq é myit nhiklhum má kâ tô é, yuq hkangmó èq nghap luî sê yu é laiká gùng pé nghut akô. <sup>3</sup> Nungmoq gi, nungmoq chyáng ngamoq hpungmû wùn waq é yanmai, Hkrisduq chyáng mâ é laiká nghut kô é hkyô lé shit nyi akô. Haù gi, kâ jung chî èq kâ tô é đông a nghut é za, rû dui nyi é Garai Gasâng é Woi-nyí èq kâ tô é nghut é htoq agó, luqlong pé má kâ tô é đông a nghut é za, xângzo byu é myit nhiklhum long pé má kâ tô é ru nghut lhê.

<sup>4</sup> Haù su nghû hkyak wó myit lum é hkyô gi, Garai Gasâng é hí má, Hkrisduq đông mai ngamoq wó yu é nghut lhê. <sup>5</sup> Ngamoq gi, yhumsing gùng haì lé le wó kut lhê nghu é a nghut, ngamoq é a-tsam gi, Garai Gasâng chyáng mai lo é nghut lhê. <sup>6</sup> Yhang gi, ngamoq lé, dangshikaq asik lé wó wùn waq râ a-tsam byi bê nghut ri. Dangshikaq asik haù gi, tarâ laiká mai lo é a nghut é za, Woi-nyí mai lo é ru nghut lhê. Hkâsu mù gâ le, laiká gi, shî dàm byi lhê, Woi-nyí kúm gi, asak byî é nghut lhê.

#### *Dangshikaq Asik É Hpungwup Shingkang*

<sup>7</sup> Ahkúì, haù Mosheq é myoqdong mâ é hpungwup shingkâng é yanmai, haù Israelaq byu pé gi, yhâng é myoqdong lé a wó wú tsuq to kó nghut ri. Hpungwup shingkang haù shùm lo byuq sê é nghut kôlhang, luqlong má dok kâ tô é, shî-nò hkyô lhoq htoq é tarâ muzó gi, hpungwup shingkang eq rahá jé lé é nghut lhê. <sup>8</sup> Haù su nghut jáng, haù Woi-nyí é muzó gi, hpungwup shingkang je riyhang dut râ a nghut kó lúhú? <sup>9</sup> Gè gè yhang, haù byù lé mara byî é tarâ muzó lhang, hpungwup shingkang bo é nghut le gi, dingmán nhang é hkyô sik gi, je riyhang hpungwup shingkang bo é nghut lhê ô! <sup>10</sup> Hkâsu mù gâ le, hpungwup shingkang bo é tarâ muzó gi, hpungwup shingkang je bo é dangshikaq asik eq whuí é hkûn, hpungwup shingkang a bò lo dut byuq bê nghut ri. <sup>11</sup> Shum byuq ló é tarâ lhang gi, hpungwup shingkang eq rahá lé jé bê nghut le gi, ru gîng nyi é dangshikaq asik é hpungwup shingkang gi, je riyhang gyaú râ nghut lhê ô!

<sup>12</sup> Haù mù luî, ngamoq gi, haù sủ é myoqbyù hkyô wó é yanmai, gyuq kyum myit a bo é hkyô shit é nghut lhê. <sup>13</sup> Ngamoq gi, Mosheq su a nghut. Yhang gi, duqbang é hkyô shùm byuq ló é hkûn, haù Israelaq byu pé háu lé a wú tsuq râ matú, yhâng é myoqdong lé myoqgo èq nghop pyâm é sủ nghut ri. <sup>14</sup> Nghut kôlhang, yhangmoq é myit gi, lhoq chut byî é hui bekô nghut ri; hkâsu mù gâ le, hkû-nyí jé shoq, dangshikaq axau lé nghap é hkûn, rajung zâ é myoqgò gi, ru nghop to byî ashî nghut ri. Haù gi, huî sêng pyâm é a hui shi, haù mù gâ le, Hkrisduq đông za haù lé wó yu pyâm é nghut lhê. <sup>15</sup> Hkû-nyí jé shoq lhang, Mosheq é laiká lé nghap é hkûn, yhangmoq é myit nhiklhum má myoqgò èq nghop tô é nghut ri. <sup>16</sup> Nghut kôlhang, ó yuq le, Yhumsîng chyáng hká u lhang lò kôlhang, háu hkûn jáng, myoqgò gi, hí pyám byî é hui râ nghut lhê. <sup>17</sup> Yhumsîng gi, haù Woi-nyí nghut mù, Yhumsing é Woi-nyí nyi é jowò má, luthkyô le joq lhê. <sup>18</sup> Haù Yhumsîng é

hpungwup shingkang lé lhoq htoq shit é bang banshoq nghut é myoqdong má myoqgò a nghop é bang nga-nhúng gi, ru myo jat nyi é hpungwup shingkang lhoq htoq byi hkyô nghut é, Yhâng é isâm shut htaî lhik wang é huî nyi bê nghut lhê. Haú hkyô gi, haú Woi-nyí nghut sù Yhumsîng chyáng mai lo é nghut lhê.

## 4

*Tseyam Pé Má Bo É Sutze*

<sup>1</sup> Ngamoq gi, Garai Gasâng jeju mai muzó hkyô haú wó é nghut mù, myit wum a gyuî é nghut lhê. <sup>2</sup> Ngamoq gi, zaú tô é eq hoq htoq é hkyô pé lé tô pyám luí, mhaú zô é hkyô le a kut, Garai Gasâng é mungdang lé le ahpuq alhik a kut é bang nghut lhê. Haú su kut râ malaí, ngamoq gi, haú tengmán hkyô lé san za lhoq htoq shit é dong, Garai Gasâng é hí má yuq hkgangmó é myit sôn sê é hkyô má, yhumsing gùng yhumsîng htuk shoq nyi lhê. <sup>3</sup> Ngamoq é gabú danglù gi, myoqgo eq nghop pyâm é huî é nghut jáng, haú gi, htên byoq nyi bâng chyáng za nghop pyám huî é ru nghut lhê. <sup>4</sup> Haú Garai Gasâng é azòng isâm nghut sù, Hkrisduq é hpungwup shingkang bo é gabú danglu é maubó lé, a lumjîng bang a wó myâng kó sháng gaq ga, ipyat shi é garai\* gi, yhangmoq é myit lé lhoq chit byi bê nghut ri. <sup>5</sup> Haú nghut é yanmai, ngamoq gi, yhumsing gùng eq séng luí hko kyô é a nghut é za, Yesuq Hkrisduq gi, Yhumsîng nghut é hkyô lé le, Yesuq é matú, ngamoq gùng yhang gi, nungmoq é jùn pé nghut é hkyô lé le, hko kyô é ru nghut lhê! <sup>6</sup> Hkâsu mù gâ le, "Mauchut hkaú mai maubó htoq lô sháng gaq."† ga taí é Garai Gasang gi, Yesuq Hkrisduq é myoqdong mâ é Garai Gasâng é hpungwup shingkang é maubó lé sê gyô é nyan lé, nga-nhúng lé byî é dong, Yhâng é maubó lé, nga-nhúng é i-myit unghkaú má duqbo nhâng bê nghut ri.

<sup>7</sup> Nghut kôlhng, ngamoq gi, sutze haú bo é tseyam pé† nghut nyi lhê. Haú gi, gyaú dik é a-tsam mó gi, ngamoq chyáng mâ é a nghut é za Garai Gasâng chyáng mâ é nghut é hkyô lé tûn shit râ matú nghut lhê. <sup>8</sup> Ngamoq gi, wuîhke hkyo eq lîngghkyuq mai gyai yhang nhê zik é hui kôlhng, a gyop byuq é nghut lhê; myit lhoq nhúng pyâm é hui kôlhng, myit a htâm byuq é nghut lhê; <sup>9</sup> zing-rî é hui kôlhng, kâng pyám huî é a nghut; bat lîng pyâm é hui kôlhng, htên byoq huî é a nghut. <sup>10</sup> Haú Yesuq é asak duí hkyô le, ngamoq é gungdu má lhoq htoq shit é hui sháng gaq nghû, ngamoq gi, Yesuq shi é hkyô lé, hkâ-nhám le, ngamoq é gungdu má wùn waq wún é nghut lhê. <sup>11</sup> Hkâsu mù gâ le, Yesuq é asak duí hkyô gi, nga-nhúng é shî sê é gungdu má lhoq htoq shit é hui sháng gaq nghû, asak dui nyi é bang ngamoq gi, Yesuq é matú é yanmai, hkâ-nhám le, shi byuq hkyô shut ap pyâm é huî nyi ri. <sup>12</sup> Haú mù luí, shi byuq hkyô gi, ngamoq má mù zuí nyi ri; asak duí hkyô kúm gi, nungmoq má mù zuí nyi é nghut ri.

<sup>13</sup> "Ngò gi, lumjîng bê nghut lhê, haú mù, ngò taí é nghut lhê."‡ ga kâ tô é eq rajung za, ngamoq le, lumjîng hkyô hau eq yhang, lumjîng bê nghut mù taí é nghut lhê. <sup>14</sup> Haú mù gâ le, haú Yhumsîng Yesuq lé shi é mai lhoq dui toq é Sù gi, ngamoq lé le, Yesuq eq rahá lhoq dui toq mù, nungmoq eq rahá, ngamoq lé Yhâng é hí má shuî jé râ nghut é lé, ngamoq sê lhê. <sup>15</sup> Haú jeju wó é byu pé gi, je riyhang myô jat lò mù, Garai Gasâng é hpungwup shingkang é matú, jeju hkya-ôn é hkyô gi, byíng mui nyi sháng gaq ga, haú pé banshoq gi, nungmoq é akyu é matú nghut nyi ri.

<sup>16</sup> Haú mù luí, ngamoq gi, myit wum a gyuî é nghut lhê. Ngamoq é shinggan gungdu gi, htên byoq ló nyî kôlhng, i-myit unghkaú gi, ra-nyí eq ra-nyí asik dut nhang é huî nyi ri. <sup>17</sup> Hkâsu mù gâ le, ngamoq é tiq é eq razup zâ é wuîhke hkyô pé gi, ngamoq é matú haú pé htoq gyai hkik é ahtum abyuq é hpungwup shingkang lé, wó yû nhang ri. <sup>18</sup> Haú mù, nga-nhúng é myoq gi, byu-myang é lé wú tsuq nyi é a nghut é za, a byu-myang é lé sheq wú tsuq nyi é ru nghut lhê. Hkâsu mù gâ le, byu-myang é gi, razup rahtâng zâ é nghut mù, a byu-myang é kúm gi, ahtum abyuq é nghut lhê.

\* 4:4 Ipyat shi é garai gâ é gi, Tsadán lé gâ é nghut lhê. † 4:6 Apûn 1:3 ‡ 4:7 Tseyam pé gâ é gi, nga-nhúng é wum nyhôm é gungdu lé gâ é nghut lhê. † 4:13 Hkya-on 116:10

## 5

*Mauhkûng Htoq Mã É Yhûm*

<sup>1</sup> Haû myidàm zúm nghut é nga-nhúng lúng nyi é gungdu gi, htên byoq sê é nghut kôlhang, byu loq èq saî é a nghut é za, mauhkûng htoq má joq é ahtum abyuq é yhûm\* nghut é, Garai Gasâng chyáng mã é yhûm lé, nga-nhúng wó é hkyô lé, nga-nhúng sê lhê. <sup>2</sup> Nghut kôlhang, ahkuî, nga-nhúng gi, nga-nhúng é mauhkûng yhûm lé tù hut byî é lé gyai yhang hui naû mù, nò-kying su kyîng nyi lhê. <sup>3</sup> Haî mù gâ le, nga-nhúng gi, hut byî é hui jáng, gungdu a bò bang a dut lo râ nghut lhê. <sup>4</sup> Hkâsu mù gâ le, nga-nhúng gi, zúm shî má lúng nyi é u lé, wòlai wùn mù, nò-kying su kyîng nyi lhê; haû gi, shî byuq sê é lé, asak dui é èq wó htaî lhik pyám sháng gaq nghû, nga-nhúng gi, a hut byî é hui râ lé a ô nau é za, nga-nhúng é mauhkûng yhûm lé tù hut byî é hui râ lé ô nau é yanmai nghut lhê. <sup>5</sup> Ahkuî kúm, jeju haû hkam yù râ matú, nga-nhúng lé lajâng to byî é sù gi, Garai Gasang nghut mù, jé lô râ hkyô gi, hkyak joq lhê nghû é masat zè đông, nga-nhúng lé haû Woi-nyí byi bê nghut ri.

<sup>6</sup> Haû mù luî, ngamoq gi, hkâ-nhám le hkyak lum tô lhê. Gungdu shî má yhûm đông ru lúng nyî nyî gi, haû Yhumsing eq wê gâng nyi ashî nghut é lé ngamoq sê nyi lhê. <sup>7</sup> Ngamoq gi, byu-myang é đông mai a nghut é za, lumjîng myit mai asak dui é ru nghut lhê. <sup>8</sup> Ngamoq gi, hkyak myit lum tô lhê nghû, ngò taí lhê, haû mù, gungdu shî mai wê gang luî, haû Yhumsing eq rahá nyi râ lé ngamoq je riyhang ô nau é nghut lhê. <sup>9</sup> Haû mù, ngamoq gi, gungdu shî má yhûm đông lúng nyi é nghut nghut, haû mai wê gâng é nghut nghut, ngamoq myit myoqbyu tô é jowò gi, Yhang lé gabú nhâng râ matú nghut lhê. <sup>10</sup> Hkâsu mù gâ le, yuq hkanmó gi, gungdu shî má yhûm đông lúng nyi é u lé, ge é nghut nghut, a ge é nghut nghut, kut é eq rajung za hkam yù râ matú, Hkrisduq é tarâ jéyáng tanghkuq hí má, nga-nhúng banshoq bang htoq shit ra râ nghut lhê.

*Nguingón Hkyô Xoq É Muzó*

<sup>11</sup> Haû mù, Yhumsing lé gyuq hkungga râ hkyô haî nghut é lé ngamoq sê é nghut luî, ngamoq gi, byu pé lé taí pùn kyîng shikut lhê. Ngamoq haî nghut é gi, Garai Gasâng chyáng san za nghut nyî mù, nungmoq é myit sôn sê é hkyô má le san za nghut râ lé, ngò myit lum lhê. <sup>12</sup> Haû myit nhikllum má bo é lé gumrông râ malaî, byu-myang é lé gumrong é bang lé, nungmoq wó tù taí kó sháng gaq nghû, ngamoq gi, nungmoq chyáng yhumsing gùng lé dum owaq shikut é a nghut é za, ngamoq é hkyô lé, nungmoq wó gumrông râ ahkáng, nungmoq lé byî é ru nghut lhê. <sup>13</sup> Ngamoq a gyîng é đông nghut le gi, Garai Gasâng é matú a gyîng é nghut lhê; ngamoq gyîng é đông nghut le gi, nungmoq é matú gyîng é nghut lhê. <sup>14</sup> Hkâsu mù gâ le, Hkrisduq é chyitdap myit èq ngamoq lé kut nhang nyi é nghut lhê. Haû gi, banshoq bâng é matú rayuq shî hkám byi bê nghut mù, banshoq bang shi é đông nghut bê nghû, ngamoq hkyak sê gyô é yanmai nghut lhê. <sup>15</sup> Yhang gi, asak dui nyi é bang, yhangmoq yhumsing gung é matú a ùi lô é za, yhangmoq é matú shî hkám byi luî, lhoq dui toq é huí Su é matú ùi kó sháng gaq ga, banshoq bâng é matú shî hkám byi bê nghut ri.

<sup>16</sup> Haû mù, ngamoq gi, ahkuî mai, ó yuq eq séng luî le, mingkan hkyam đông mai a wú lô é nghut lhê. Ngamoq gi, hí hkûn Hkrisduq lé haû đông wú é nghut kôlhang, haû su hkâ-nhám le a kut lô é nghut lhê. <sup>17</sup> Haû nghut mù luî, rayuq yuq gi, Hkrisduq má nghut nyi é nghut jáng, yhang gi, asik hpân hui sù dut bê nghut ri; haû axau gi, byuq byuq mù, lhunglhang asik dut bu-nhung! <sup>18</sup> Haû pé banshoq gi, Garai Gasâng chyáng mã é chyat nghut lhê. Yhang gi, Hkrisduq đông mai nga-nhúng lé Yhânggùng eq nguingón hkyô xoq yû luî, nguingón hkyô xoq é muzó ngamoq lé byi bê nghut ri. <sup>19</sup> Haû gi, Garai Gasang gi, byu pé é mara lé a matsing byî é za, Hkrisduq đông mingkan lé Yhânggùng eq nguingón hkyô xoq yû bê nghut luî, Yhang gi, nguingón hkyô xoq yu é mungdang haû lé, ngamoq lé ap byî to bê nghû nau é nghut lhê. <sup>20</sup> Haû mù luî, ngamoq gi, Hkrisduq é

\* 5:1 Mauhkûng htoq má joq é ahtum abyuq é yhûm gâ é gi, nga-nhúng, mauhkûng mingdán má jé é hkûn wó râ gungdu asik lé gâ é nghut lhê.

gunglik pé nghut lhê mù, Garai Gasang gi, ngamoq đông mai nungmoq lé lhoq pùn kyîng nyi é nghut lhê. Garai Gasang eq nguingón hkyô xoq yû keq nghû, ngamoq gi, Hkrisduq é gunglik đông nungmoq lé dùng tôngbán nyi lhê. <sup>21</sup> Nga-nhúng gi, Hkrisduq đông mai Garai Gasâng é dingmán bang wó dut kó sháng gaq ga, Garai Gasang gi, yubak mara a bò Sû lé, nga-nhúng é matú yubak mara hkungga dut nhâng bê nghut ri.

## 6

<sup>1</sup> Ngamoq gi, Garai Gasâng é mô zui byinzùm wui nghut nyi é eq rajung za, Garai Gasâng jeju lé akyû a bo é đông hkâhap yù kó nghû, nungmoq lé wum taí tsuq kat lhê. <sup>2</sup> Hkâsu mù gâ le,

"Ngò ô nau é ahkyíng má, nang lé ngò gyo byi bê nghut mù, hkyi yù hui râ buinyi má, nang lé ngò garúm bê nghut lhê."<sup>☆</sup>

ga luî, Yhang taí ri. Ngò, nungmoq lé taí kyo kôlé, ahkuî gi, Garai Gasang ô nau é ahkyíng, ahkuî gi, hkyi yu é buinyi nghut ri.

*Poluq É Wuîhke Hkyô Pé*

<sup>3</sup> Ngamoq é hpungmû gi, taí hpoî pyâm é a hui sháng gaq nghû, ngamoq gi, ó yuq é hkyô má le, leqbat jung a to byi é nghut lhê. <sup>4</sup> Haû kut râ malaî, ngamoq gi, Garai Gasâng é dui-nhâng zoshâng wui nghut é hkyô lé, hkyô hkangmó má yhumsing gùng yhumsing shit nyi lhê. Gyai hkam jân é hkyô má le, jamjau hkyô pé má le, wuîhke hkyô pé má le, myit myo uhkyí hkyô pé má le shit nyi lhê. <sup>5</sup> Nhuq bat huî é pé má le, htóng lhúng huî é eq toq gabyông é má htîm é huî é má le, mô zui shikut é má le, a myang yhup é myín pé má le, zòmut huî é má le, shit nyi lhê. <sup>6</sup> Sân-yúng é má le, sê gyô é hkyô má le, myit hing é eq myit ge é má le, Chyoiyúng Woi-nyí eq chyitdap myit akying má le, <sup>7</sup> tengmán é mungdang hko é má le, Garai Gasâng é a-tsam má le, loqyò loqpai má dingmán hkyô nghû é laknak pé đông le, shit nyi lhê. <sup>8</sup> Hpungwup shingkang byi é hui kô é đông eq a hkunggâ é hui kô é đông nghut kôle, a ge é luhkyang eq ge é luhkyang taí kôle, shit nyi lhê. Ngamoq gi, tengmán kôlháng, mhaú zo bang đông sôn yu akô nghut ri. <sup>9</sup> Ngamoq lé sé kôlháng, a sê é đông kut akô nghut ri; shi ló nyí kôlháng, rû dui nyi é bang nghut lhê; nhuq bat é hui kôlháng, sat pyâm é a hui shí é bang nghut lhê. <sup>10</sup> Yón hkyô byíng nhâng kôlháng, hkâ-nhám le gabú nyi lhê; myùng kôlháng, byù myo myo lé wó sùt nhang nyi lhê; haî le a wó kôlháng, jung hkangmó lé sing é đông nghut lhê.

<sup>11</sup> Korinhtuq bang ê, ngamoq gi, nungmoq lé san za taí bê nghut luî, ngamoq é myit nhiklhum lé, nungmoq é matú làm shoq hpông to byi bê nghut lhê. <sup>12</sup> Ngamoq gi, ngamoq é chyitdap myit lé, nungmoq chyáng mai lêng taú yu nyi é a nghut, nungmoq sheq, ngamoq chyáng mai lêng taú yu nyi kô é ru nghut lhê. <sup>13</sup> Nungmoq le, myit nhiklhum lé làm shoq dum taú hpóng keq nghû, ngò gi, ngá zô pé lé đông taí lhê.

*A Lumjîng Bang Eq A Nhunghkut Râ Hkyô*

<sup>14</sup> A lumjîng bang eq rahá kandang hkâwaq kó. Hkâsu mù gâ le, dingmán é hkyô eq agè ashop é hkyô gi, haî sêng lhum lhê lú? Maubó eq mauchut gi, hkâsu wó zùm yap kó râ lú? <sup>15</sup> Hkrisduq eq Beliala\* gi, hkâsu kut myit wó huî lhum kó râ lú? Lumjîng sù rayuq eq a lumjîng sù gi, hkâsu wó pung lhum kó râ lú? <sup>16</sup> Garai Gasâng é noqkuq yhûm eq hparà lhô pé gi, hkâsu wó húm râ lú? Hkâsu mù gâ le, nga-nhúng gi, rû dui nyi é Garai Gasâng é noqkuq yhûm nghut lhê. Haû gi, "Ngò gi, yhangmoq eq rahá nyi mù, yhangmoq chyáng sô nyi râ nghut luî, Ngò gi, yhangmoq é Garai Gasang dut mù, yhangmoq gi, Ngá é byu pé dut kó râ nghut lhê."<sup>☆</sup> ga Garai Gasang taí tô é eq rajung za nghut ri.

<sup>17</sup> "Haû mù luî, yhangmoq chyáng mai htoq lô mù, gotû san za nyi keq. A sansêng é zè lé hkázáng kó, haú hkûn, Ngò, nungmoq lé lhom hap yù râ nghut lhê."<sup>☆</sup> ga haû Yhumsing taí ri.

☆ 6:2 Esai 49:8 \* 6:15 Beliala gâ é gi, Tsadán é myìng rajà nghut lhê. ☆ 6:16 Nhong 26:12; Yer 32:38; Ezk 37:27

☆ 6:17 Esai 52:11; Ezk 20:34,41

<sup>18</sup> "Ngò gi, nungmoq é Îwa dut mù, nungmoq gi, Ngá é byizo yuqzô pé dut kó râ nghut lhê."<sup>☆</sup>

ga haû wum-o a-tsam dik shoq bò Sû Yhumsîng taî ri.

## 7

<sup>1</sup> Chyitdap é luzúm wuê ê, nga-nhúng gi, danggidiq haû pé lé wó tô é bang nghut é yanmai, gungdu eq woi-nyí lé agot a-û dut nhang é jung hkangmó mai, yhumsing gùng yhumsîng lhoq sân-yúng yû luî, Garai Gasang lé gyuq hkunggâ é myit èq chyoiyúng hkyô má lhoq gumjup yu nyi sháng.

*Poluq É Gabú Hkyô*

<sup>2</sup> Nungmoq é i-myt unghkaû má ngamoq lé jowò byi keq. Ngamoq gi, ó yuq lé le a shut wú, ó yuq lé le a lhoq htên wú, ó yuq lé le a mhaû zô wú é nghut lhê. <sup>3</sup> Ngò gi, nungmoq lé mara byi râ matú haû su taî é a nghut. Ngamoq gi, asak duì kôle, shî kôle, nungmoq eq rahá wó dut shoq, nungmoq gi, ngamoq é i-myt unghkaû má lúng nyi é nghut lhê nghû, hí hkûn ngò taî wú bê nghut lhê. <sup>4</sup> Ngò gi, nungmoq lé, hkyak yhang myit lum to bê nghut lhê. Ngò gi, nungmoq é yanmai gyai yhang gumrong nyi lhê. Ngò gi, myit wum byî é gyai yhang huî ri; jamjau hkyô pé myo myo ngamoq hui kôlhang, ngò, gyai yhang gabú nyi lhê.

<sup>5</sup> Hkâsu mù gâ le, ngamoq gi, Makedoni mau má jé é hkûn, ngamoq é gungdu gi, zim za a myang nyi é htoq agó, hkyô hkangmó má ngamoq wuîhke jamjau hui zô é nghut lhê. Shinggan má gi, mabyoq htoq, ahkaû má gi, gyuq kyum nyi é nghut lhê. <sup>6</sup> Nghut kôlhang, nhik ngê bang lé nhik tîng é Garai Gasang gi, Tituq lé jé lé nhang é đông mai, ngamoq lé nhik tîng byi bê nghut ri. <sup>7</sup> Yhang jé lé é đông mai za a nghut, yhang lé nungmoq nhik tîng byî é hkyô đông mai le nghut lhê. Ngá é gabú hkyô gi, gó nám lhê htoq má je myo sháng gaq ga, yhang gi, nungmoq ngo lé myit tuî nyi é hkyô, nungmoq gyai yhang shut bûn é hkyô, ngá é matú nungmoq gyai myit chiq byî é hkyô pé lé, ngamoq lé taî kyo bê nghut ri.

<sup>8</sup> Ngá é laikâ èq, nungmoq lé yón nhang é nghut kôle, ngò gi, nungngham wó é a nghut. Sâng-hi le, ngò nungngham wó é nghut kôlhang, ngá é laiká gi, nungmoq lé rayoq zo za lhoq yón nhang é lé, ngò sê lhê. <sup>9</sup> Nghut kôlhang, ngò gi, ahkuí gabú lhê; haû gi, nungmoq lé yón hui nhang é yanmai a nghut é za, nungmoq é yón hkyô èq, nungmoq lé myit lêng nhang é yanmai ru nghut lhê. Nungmoq gi, Garai Gasang ô nau é đông yón huî é bang dut bekô nghut mù, nungmoq lé, ngamoq èq hai akyû le a lhoq yôm byî é nghut lhê. <sup>10</sup> Hkâsu mù gâ le, Garai o é đông yón kuq huî é hkyô gi, nungngham wó hkyô a bo é za, hkyi yû hkyô wó shoq, myit lêng nhang é nghut ri. Nghut kôlhang, mingkân é yón kuq hkyô gi, shi é hkyô lhoq htoq é nghut ri. <sup>11</sup> Garai o é đông, nungmoq chyáng akyû lhoq htoq byî é yón kuq hkyô lé wú wú keq! Haû gi, gyai yhang myit zuq é hkyô, yhumsing gùng mara a bo é lé tân shit râ lé myit ngui é hkyô, nhikmo-yo é hkyô, gyuq dan é hkyô, myit ô nau nyi é hkyô, myit chiq byî é hkyô, tengmán hkyô kut râ rì rì nghut é hkyô pé nghut lhê. Nungmoq gi, haû hkyô má mara a bo é lé hkat hkangmó má saksé tân shit bekô nghut ri.

<sup>12</sup> Haû mù luî, ngò, nungmoq lé kê kat é nghut kôlhang, kut shut su é yanmai le a nghut, kut shut é hui zo su é yanmai le a nghut é za, ngamoq lé nungmoq hkâ-í ap nóng byî é hkyô lé, Garai Gasâng hí má nungmoq gùng nungmoq wó myâng râ matú kê kat é sheq ru nghut lhê. <sup>13</sup> Haû pé banshoq đông mai, ngamoq gi, myit wum byî é huî ri.

Ngamoq myit wum byi huî é htoq agó, Tituq hkâ-í yhang gabú é lé myàng mù, ngamoq gi, je riyhang myit gabú é nghut lhê. Haû mù yhang gabú é gâ lé, nungmoq banshoq bâng èq yhâng é myit lé lhoq nguìngón byi kê é yanmai nghut ri. <sup>14</sup> Ngò gi, nungmoq eq sêng é hkyô, yhang lé gumrong kyô é nghut kôle, nungmoq é yanmai hoq a hpû é nghut lhê. Nungmoq lé ngamoq taî é lhunglhang gi, têng é eq rajung za, Tituq hí má, nungmoq é hkyô lé ngamoq gumrong é le têng lhê. <sup>15</sup> Nungmoq banshoq bang jîno gyo kômù, gyuq nán é myit mai yhang lé lhom hap yû kê é lé, yhang myitbûn é hkûn, yhang nungmoq lé

<sup>☆</sup> 6:18 2 Sam 7:14

chyitdap é myit gi, je riyhang kô dik nyi ri. <sup>16</sup> Ngò gi, nungmoq lé banshoq wó lum to bê lé sê é yanmai, gabú nyi lhê.

## 8

### *Byî É Hkyô*

<sup>1</sup> Gumang wuî ê, ahkuî, ngamoq gi, Makedoni mau mâ é noqkuq hpûng pé lé Garai Gasang byî é jeju eq sêng é hkyô, nungmoq lé sé nhâng nau ri. <sup>2</sup> Yhangmoq gi, wuîhke jamjau hkyô myo myô eq chyam lik é huî é nghut kôlhang, yhangmoq é a ung taí loshoq gabú é hkyô eq yhangmoq é gyai yhang myung é hkyô gi, agùn agó byí nau é myit bò nhang ri. <sup>3</sup> Hkâsu mù gâ le, yhangmoq gi, yhangmoq wó dut é myhó byi kô é htoq agó, yhangmoq é a-tsam lai shoq lháng byi kô é hkyô lé, ngò saksé hkám lhê. Yhangmoq gi, yhangmoq é myit hkaû mai yhang haû su kut kô é nghut ri. <sup>4</sup> Yhangmoq gi, haû sân-yúng bang lé wó bo dojaú râ matú, ngamoq lé gyai yhang ahkáng dung kô é nghut ri. <sup>5</sup> Yhangmoq gi, ngamoq myit ngam tô é htoq má lháng lai shoq, Garai Gasang ô nau é hkyô lé châng é dông, yhangmoq gùng lé hí haû Yhumsîng lé ap byî pyám kômù, hau htâng sheq ngamoq lé ap kô é nghut ri. <sup>6</sup> Haû mù luî, Tituq yhang hí kut hi nyi bê nghut é yanmai, ngamoq gi, jeju haû lé nungmoq chyáng le shuí lhoq byíng jup byi râ matú, yhang lé wum byi bê nghut lhê. <sup>7</sup> Nungmoq gi, lumjîng myit má, dang nyo é hkyô má le, sumsé hpaqchyî hkyô má le, myit zuq hkyô banshoq eq ngamoq lé nungmoq chyitdap é hkyô má le, jung hkangmó má agùn agó dut bekô eq rajung za, nungmoq gi, byí nau é jeju shí má le agùn agó dut râ lé, bûn nyi keq.

<sup>8</sup> Ngò gi, nungmoq lé hkunmó hkyô é a nghut, nghut kôlhang, góbâng é myit zuq é hkyô eq whuí wú é dông, nungmoq é chyitdap myit jet é hkyô lé chyam wú nau luî sheq ru nghut lhê. <sup>9</sup> Hkâsu mù gâ le, nungmoq gi, nga-nhûng é Yhumsîng Yesuq Hkrisduq é jeju lé sê akô nghut ri. Yhang gi, Yhâng é myùng hkyô dông mai nungmoq wó bang dut kó sháng gaq ga, jung hkangmó wó sù nghut kôlhang, nungmoq é matú é yanmai, myùng sù dut bê nghut ri.

<sup>10</sup> Shí hkyô eq sêng é má, nungmoq é matú ge dik é hkyô ngò hpaqchyî byi kôlé: A-nhik, nungmoq gi, sâng-hi, byî hí kô é za a nghut, haû su kut nau é myit bo é bang le nghut akô. <sup>11</sup> Nungmoq wó dut é eq rajung za, haû lé lhoq pân é dông nungmoq é gyai yhang kâm kut é myit lé wó lhoq dik ko sháng gaq, ahkuî, muzó haû lhoq pân keq. <sup>12</sup> Hkâsu mù gâ le, byí nau é myit bo é nghut jáng, chyunghuq haû gi, yhang a wó é má cháng luî a nghut é za, yhang wó é má cháng luî, hap yù gíng é nghut lhê.

<sup>13</sup> Nungmoq é matú gi, wólai dut, góbang gi, hkyamsâ nyi râ lé, ngamoq ô nau é a nghut, rawuí za wó dut kó râ lé sheq ô nau é ru nghut lhê. <sup>14</sup> Nungmoq haî râ tô é lé, yhangmoq agùn agó wó é mâ é wó dum taû htuqbang byi kó sháng gaq, ahkuî lhê é ahkýng má, yhangmoq haî râ tô é lé, nungmoq agùn agó wó é mâ é htuqbang byi keq. Haû jáng sheq, wuí wuí za wó dut kó râ nghut lhê. <sup>15</sup> Haû gi, "Myo myo tsîng yu é sù gi, lûm myo shoq wó é a nghut, shau za tsîng yu é sù gi, lûm shau shoq wó é a nghut."✠ ga kê tô é eq rajung za nghut ri.

### *Tituq Lé Korinhtuq Myuq Shut Nhang Kat É Hkyô*

<sup>16</sup> Nungmoq é matú ngò myit chiq byî é eq rajung zâ é myit lé, Tituq é i-myt má kat byî é Garai Gasang lé, ngò jeju hkya-ôn lhê. <sup>17</sup> Hkâsu mù gâ le, Tituq gi, ngamoq dúng tôngbán é lé za lhom hap yu é a nghut, gyai yhang myit toq mù, yhânggùng yhang myit hpyit yû luî, nungmoq chyáng lé lô gù za nghut ri. <sup>18</sup> Ngamoq gi, haû gabú danglù lé dojaú é má noqkuq hpûng pé banshoq eq hkya-on huî é gumang hpó haû lé le, yhang eq rahá nhang kat lhê. <sup>19</sup> Hau htoq agó, ngamoq garúm râ myit bo nyi é hkyô lé tân shit mù, haû Yhumsîng lé hkungga râ matú ngamoq wú gôn nyi hkyô nghut é, alu lé ngamoq yu chung é hkûn, ngamoq é byinzùm kut râ matú, noqkuq hpûng pê eq hkyin yu é sù le yhang nghut lhê. <sup>20</sup> Ngamoq gi, myit lòm luî byî é chyunghuq shí lé ngamoq wú gôn nyi

é hkyô má, ó yuq èq le mara hô râ hkyô a htoq shoq sidiq nyi lhê. <sup>21</sup> Hkâsu mù gà le, jô é hkyô kut râ matú ngamoq shikut nyi é gi, haû Yhumsing é myoq hí má za a nghut, byu pê é myoq hí má le nghut lhê.

<sup>22</sup> Hau htoq agó, ngamoq gi, hkyô myo myo má shirong é myit bo é hkyô le anum num ngamoq chyáng saksé shit é sù, ngamoq é gotû gumang hpó lé le yhangnhik eq rahá nhang kat lhê. Yhang gi, ahkuí lháng, nungmoq lé gyai yhang myit lum tô é yanmai, shirông myit je riyhang bo nyi ri. <sup>23</sup> Tituq é hkyô ga jáng, yhang gi, ngá é zùm yap luzúm eq ngò eq rahá nungmoq chyáng mù zui sù nghut ri. Nga-nhông é gumâng nhik é hkyô ga jáng, yhangnhik gi, noqkuq hpông pê é gunglik eq Hkrisduq é aróng nghut akô. <sup>24</sup> Haû mù luí, haû noqkuq hpông pé wó myâng kó sháng gaq, nungmoq má ngamoq haí mù gumrong é hkyô eq nungmoq é chyitdap myit é saksé lé, haú bang lé tân shit keq.

## 9

<sup>1</sup> Ngò gi, haû sân-yúng bang lé htuqbang râ hkyô eq séng luí, nungmoq lé kê kat râ a ra nghut ri. <sup>2</sup> Hkâsu mù gà le, nungmoq gyai garúm nau é myit lé ngò sê lhê, haû mù, ngò gi, Makedoni mau bang lé, haú hkyô eq séng luí gumrong kyo mù, a-nhik mai yhang, Ahkaia mau má nungmoq byi râ rì rì nghut bê hkyô lé, yhangmoq lé taí kyô é nghut lhê. Nungmoq é gyai yhang myit toq é hkyô gi, yhangmoq myo hpyang lé, htuqbang nau é myit nhaû toq byi bê nghut ri. <sup>3</sup> Nghut kôlháng, shí hkyô má nungmoq eq séng luí ngamoq gumrong é gi, hká dông le dangsôm a dut byuq sháng gaq, ngò taí bê eq rajung za nungmoq rì rì wó hen to râ matú, ngò gi, gumang wuì lé nhang kat é nghut lhê. <sup>4</sup> Hkâsu mù gà le, Makedoni mau bang gi, ngò eq rahá lé mù, nungmoq rì rì a hen tô é lé, lé myang ang kô é nghut jáng, nungmoq za hoq hpu râ a nghut, ngamoq le, nungmoq lé lûm yhang lum pyâm é yanmai, hoq bo hpu râ nghut lhê. <sup>5</sup> Haû mù luí, nungmoq danggidiq byî to bê nghut é, chyunghuq lé rago wó lajâng pân to râ matú, gumang wuì lé wum taí tsuq mù, nungmoq lé hí, lé kum nhâng râ gi, ra yhang râ lhê nghû ngò wó myit ri. Haú hkûn sheq, a nau é dông byî é a nghut é za, byí nau é chyunghuq dông hen tô é dut râ nghut lhê.

*Agùn Agó Byî É Hkyô*

<sup>6</sup> Shau za sân hkyô sù gi, shau za shû yù râ nghut mù, agùn agó sân hkyô sù gi, agùn agó shû yù râ nghut lhê gà é dang lé, myitbûn nyi keq. <sup>7</sup> Yuq hkangmó gi, a kâm byî é eq byí nhang é dông a nghut é za, yhumsing myit má byí nau é myhó lé myit hpyit yû mù byî é dông dut râ lhê. Hkâsu mù gà le, Garai Gasang gi, gabú myit èq byi sù lé chyitdap ri. <sup>8</sup> Haû mù, ahkyíng hkangmó jung hkangmó má, nungmoq râ é banshoq wó mù, ge é muzó hkangmó lé nungmoq je myo wó kut kó sháng gaq ga, Garai Gasang gi, jeju lhunglháng lé, nungmoq lé wó byî é sù nghut lhê. <sup>9</sup> Haû gi,

"Yhang gi, a ha bûn é za myùng bang lé yhâng é chyunghuq tsing gàm byi bê nghut ri;

Yhâng é dingmán hkyô gi, ahtum abyuq gîng nyi ri."<sup>☆</sup>

ga kê to eq rajung za nghut ri. <sup>10</sup> Kyô hkyô sù lé kyôshi, zoshuq matú muk byî é Sù gi, nungmoq lé kyôshi byi mù, lhoq myô jat byi râ eq, nungmoq é dingmán hkyô é ashi lé myô lò nhâng râ nghut lhê. <sup>11</sup> Nungmoq gi, ayoq abun hkangmó má agùn agó byî é bang wó dut kó râ matú, hkyô hkangmó má sùt wó é bang dut é hui kó râ nghut lhê. Nungmoq agùn agó byî é hkyô lé, ngamoq lhai byi mù, Garai Gasang lé jeju hkya-ôn é hkyô dut râ nghut lhê.

<sup>12</sup> Nungmoq dojaú é hkyô shî gi, Garai Gasâng é byu pé râ é hkyô lé lajang byî é za a nghut, Garai Gasang lé jeju bûn é dang byíng mui nyi nhang é le nghut lhê. <sup>13</sup> Dojaú hkyô hau é yanmai, nungmoq lhuzui hkyô saksé tân shit bekô nghut mù, byu pé gi, Hkrisduq é gabú danglù lé nungmoq yín yû luí jìno gyo kô é yanmai le, yhangmoq eq yuq hkangmó lé, nungmoq é a ha bûn é myit mai shuí gam chúng kô é yanmai le, Garai Gasang lé hkya-on kó râ nghut lhê. <sup>14</sup> Hau htoq agó, Garai Gasang gi, nungmoq lé jeju lai shoq byî tô é yanmai nungmoq é matú yhangmoq kyûdung byî é u má, yhangmoq é myit

<sup>☆</sup> 9:9 Hkya-on 112:9



nhikllhum gi, nungmoq chyáng htoq jé râ nghut lhê. <sup>15</sup> A ung htoq taî é Garai Gasâng é chyunghuq é yanmai, jeju hkya-on hkyô gi, Yhâng chyáng ru nghut nyî sháng gaq ô!

## 10

### *Poluq, Yhâng É Hpungmû Lé Taî Hung É Hkyô*

<sup>1</sup> Nungmoq eq myoqdong hkyûm nghut é hkûn gi, gyuq kyûm myit bo ri ga, wê gânq é hkûn gi, a gyuq a wàm dut ri ga kô é sù, ngò Poluq gi, Hkrisduq é nûm é hkyô eq nú-nhâm é hkyô dông mai, nungmoq lé pying kat lhê. <sup>2</sup> Shî mingkân é nyî yap a-tsang dông ngamoq asak dui ri ga myit ngam é byù ra-am lé, ngò a gyuq a wam é myit lé shit râ dâ tô lhê. Ngò jé lé é hkûn, nungmoq lé haû sù é myit a shit ra sháng gaq, ngò nungmoq lé dúng tôngbán kat lhê. <sup>3</sup> Hkâsu mù gâ le, ngamoq gi, mingkan shî má asak dui nyî kôlhang mingkan byu pé kut é dông majan zân é a nghut. <sup>4</sup> Ngamoq majan zân é laknak gi, mingkan shi é laknak a nghut é za, shut shai é dông dang-rháng hkyô nghut é, gingtîng é gyedap pé lé lhoq htên pyám râ matú Garaî é a-tsam byíng é laknak ru nghut lhê. <sup>5</sup> Ngamoq gi, dang-rháng rhâng lhûm é hkyô pé eq Garai Gasang lé sê é hkyô lé shut shaí shoq yhumsing gùng yhumsîng lhoq myhang mhaû é hkyô hkanqmó lé lhoq htên pyám mù, Hkrisduq é jîno gyo râ matú, myit sôn é hkyô hkat hkanqmó lé shúm kut yu é nghut lhê. <sup>6</sup> Nungmoq é jîno gyo hkyô gi, gumjup é hkûn, jîno a gyô é hkyô hkanqmó lé ngamoq dam byi râ rì rì dut râ nghut lhê.

<sup>7</sup> Nungmoq gi, ahtoq pyâm lé za wú nyi é bang nghut akô. Rayuq yuq gi, Hkrisduq eq sêng é sù hkyak nghut lhê ga myit lum tô é nghut jáng, ngamoq le, yhang eq rajung za, Hkrisduq eq sêng é bang nghut é lé, yhang dum bûn sê nyî sháng gaq. <sup>8</sup> Hkâsu mù gâ le, nungmoq lé lãng hkyó râ nó gi, nungmoq lé kô myhâng nhâng râ matú, ngamoq lé haû Yhumsîng byî é ahko ahkáng lé gyai gumrong le lhang, ngò gi, hoq hpû é hui râ a nghut. <sup>9</sup> Ngò gi, ngá é laiká pé èq nungmoq lé kyuq é su a dut nhâng nau é nghut lhê. <sup>10</sup> Hkâsu mù gâ le, ra-am gi, "Yhâng é laiká pé gi, gàng bo é eq wum-o bo é nghut ri; nghut kôlhang, yhanggùng gi, byuwup a bo é nghut mù, yhang taî é dang pé gi, haî a nghut." ga taî akô. <sup>11</sup> Ngamoq gi, wê gânq é hkûn, ngamoq é laiká pé má bo é eq rajung za nghut é hkyô eq, rahá nghut nyi é hkûn, ngamoq zui saí râ nghut é hkyô lé, haû sù é bang sê gyo râ dut lhê.

<sup>12</sup> Ngamoq gi, haû yhumsing gùng yhumsîng owaq é bâng é hpúng má bo lom é hkyô nghut nghut, yhangmoq eq whuî é hkyô nghut nghut, a wám kut é nghut lhê. Yhangmoq gi, yhangmoq gùng yhangmoq chîn lhûm wú é eq yhangmoq gùng yhangmoq whuî lhûm wú kô é hkûn, hpaqchyî a bo é bang dut bekô nghut ri. <sup>13</sup> Nghut kôlhang, ngamoq gi, âng é mai lai shoq gumrông râ a nghut é za, ngamoq lé Garai Gasang masat to byî é, nungmoq chyáng lhang hkyit jé shoq nghut é maukyo hkaû má za gumrông râ nghut lhê. <sup>14</sup> Ngamoq gi, nungmoq chyáng a jé lé wú é dông mai, gyai yhang gumrong nyî râ a nghut; hkâsu mù gâ le, ngamoq gi, Hkrisduq é gabú danglù chûng mù, nungmoq chyáng lhang lé jé bê nghut lhê. <sup>15</sup> Dum, ngamoq gi, góbang kut é muzó lé le, âng é mai lai lui gumrong lai é a nghut. Ngamoq myoqbyu é hkyô gi, nungmoq é lumjîng myit kô myhang jat nyî jáng sheq, nungmoq chyáng ngamoq zui saí é jowò gyai wó lhoq lâm râ nghut lhê. <sup>16</sup> Haû gi, nungmoq é mau lhang lai shoq, gabú danglù lé ngamoq wó hko kyo râ matú nghut lhê. Hkâsu mù gâ le, ngamoq gi, góyuq èq zui saí to bê loqzó eq séng lui, gumrông nau é a nghut. <sup>17</sup> Nghut kôlhang, "Gumrong é sù gi, haû Yhumsîng má gumrông sháng gaq."☆ ga kê tô ri. <sup>18</sup> Hkâsu mù gâ le, yhumsing gùng yhumsîng owaq é sù gi, hap yù huî é a nghut é za, haû Yhumsing èq owaq byî é sù sheq, hap yù huî é ru nghut lhê.

## 11

### *Lagyo Apyoq Pé Eq Poluq*

<sup>1</sup> Ngò gi, ngá é ratsuí ngok é dang lé, nungmoq jân pyám byi râ lé myoqbyu é nghut lhê; gè gè yhang, nungmoq gi, haû su kut nyî gù nghut bekô. <sup>2</sup> Haî mù gâ le, ngò gi, Garai

☆ 10:17 Yer 9:24

Gasang mai nungmoq lé magum é myit eq, nungmoq é matú magûm byî lhê. Ngò gi, nungmoq lé, sân-yúng é zomyi gyíng lé su, Hkrisduq chyáng wó shit sháng gaq nghû, Hkrisduq nghut é yhumsîng hpô chyáng za nungmoq lé byi zo râ nghû, danggidîq byî to bê nghut lhê. <sup>3</sup> Nghut kôlhang, Ewaq gi, lhangmuì hpaqchyî dâ é eq mhaú zô é huì é su, nungmoq myit é hkyô pé gi, Hkrisduq chyáng nungmoq é lhumzuì é eq sansêng é i-myit ap nóng é hkyô mai shuì nghoq ló byuq é hui râ lé, ngò myit chiq ri. <sup>4</sup> Hkâsu mù gâ le, rayuq yuq gi, nungmoq chyáng lé jé mù, ngamoq hko kyô é Yesuq é hkyô eq shai é dông hko kyô é nghut nghut, nungmoq hap yu to bê Woi-nyí eq a pung é woi-nyí lé nungmoq hap yu é nghut nghut, nungmoq lhom yu to bê gabú danglù eq a pung é danglù lé lhom yu é nghut nghut, nungmoq gi, haù lé lui lui za lhom hap yu é dut bekô nghut ri. <sup>5</sup> Nghut kôlhang, ngò gi, "Ahkyak-lagyô pé" ga bâng é htoq má ratsuí lhang gyamgyi gyó sù a nghut nghû myit ngam é nghut lhê. <sup>6</sup> Ngò gi, dang taí hpaqchyî kung sù rayuq a nghut kôlhang, sumpsé hpaqchyî bò sù nghut lhê. Ngamoq gi, hkyô hkangmó má, nungmoq lé haù hkyô hkyâng shoq sé nhâng bê nghut lhê.

<sup>7</sup> Ngò, nungmoq lé, Garai Gasâng é gabú danglù lé ahpau a yu é za hko kyô é dông, nungmoq lé waq toq râ matú, ngá gùng ngò lhoq nyhum é gi, ngá é mara dut byuq bê lú? <sup>8</sup> Ngò, nungmoq lé dojaú râ matú, gotû noqkuq hpûng pé mai htuqbang é lé hap yu é gi, haù bâng chyáng mai ngò zik lú yu é dông dut bê nghut lhê. <sup>9</sup> Ngò gi, nungmoq eq rahá nyì mù, rajung jung râ é hkûn, ó yuq lé le wôlai a dut nhang é nghut lhê; hkâsu mù gâ le, Makedoni mau mai lé jé é gumang wuì gi, ngò haì râ é lé htuqbang byi kô é yanmai nghut lhê. Hká dông nghut kôlhang, ngò gi, ngá gûng lé, nungmoq é matú wôlai a dut nhâng shoq kut bê nghut mù, xoq lui le haù dông kut nyì râ nghut lhê. <sup>10</sup> Haù Hkrisduq é tengmán hkyô gi, ngò má hkyak yhang bo é nghut lhê mù, Ahkaia mau mâ é bang ó yuq lhang, ngò haù su gumrong é hkyô lé wó hkûm zìng râ a nghut. <sup>11</sup> Haì mù lú? Ngò, nungmoq lé a chyitdap é yanmai nghut lhê lú? Ngò, nungmoq lé chyitdap é hkyô lé, Garai Gasang sê lhê. <sup>12</sup> Ngò gi, yhangmoq zui saì é lé gumrong é hkyô pé má ngamoq eq rawuí za són byi râ ahko ahkáng ô nau é bang lé ahkáng a byì râ matú, ngò kut nyi é su xoq lui kut shi râ nghut lhê.

<sup>13</sup> Hkâsu mù gâ le, haù sù é bang gi, lagyo apyoq pé, mhaú zô é mù zui bang, Hkrisduq é lagyo pé dông kut mhaù é bang nghut akô. <sup>14</sup> Haù gi, maú ra hkyô a joq, hkâsu mù gâ le, Tsadán lhang gi, maubó é maumang lagyo rayuq dông kut mhaù é sù nghut lhê. <sup>15</sup> Haù mù, Tsadán é dui-nhâng zoshâng wuì gi, dingmán hkyo é dui-nhâng zoshâng wuì dông kut mhaù é nghut jáng, maú dân râ hkyô a joq é nghut lhê. Yhangmoq é ló htàng má gi, yhangmoq kut é eq rajung za hui zo kó râ nghut lhê.

#### *Yhâng É Wuìhke Jamjau Hkyô Eq Séng Luì, Poluq Gumrong É Hkyô*

<sup>16</sup> Ngò puq taí kôlé, ó yuq le, ngo lé byù gò dông a sôn yù kó sháng gaq. Nghut kôlhang, nungmoq sôn yu é nghut jáng, ngò ratsuí wó gumrong sháng gaq, byù gò lé nungmoq hap yu é su, ngo lé hap yù kó laq. <sup>17</sup> Ngò, haù su gumrong é hkyô gi, haù Yhumsîng o é dông ngò taì nyi é a nghut, byù gò rayuq dông taì nyi é ru nghut lhê. <sup>18</sup> Byù myo myo gi, mingkân é hkyô dông gumrong nyi bum lhê nghut mù, ngò le gumrong râ nghut lhê. <sup>19</sup> Nungmoq gi, hpaqchyî lûm bo kô é nghut mù, byù go pé lé gabú myit eq jân nyi akô nhung! <sup>20</sup> Gè gè yhang, nungmoq gi, nungmoq lé jùn kut é sù lé le, nungmoq lé rhoì zô é sù lé le, nungmoq chyáng akyû hô zô yu é sù lé le, yhang gûng yhang owaq é sù lé le, nungmoq lé bo-pyuq pyuq é sù lé le, jân nyi akô nghut ri. <sup>21</sup> Ngamoq gi, nungmoq lé haù hkyô kut râ má wum gyai nyhôm lhê nghû yín yû râ lé, ngò, hoq ri!

Rayuq yuq, haì lé wám gumrong é nghut jáng, ngò le, haù lé wám gumrong lhê nghû, byù gò rayuq dông ngò taì nyi é nghut lhê. <sup>22</sup> Yhangmoq gi, Hebre byu pé nghut akô lú? Ngò le nghut lhê. Yhangmoq gi, Israelaq byu pé nghut akô lú? Ngò le nghut lhê. Yhangmoq gi, Abraham é awut ashîn pé nghut akô lú? Ngò le nghut lhê. <sup>23</sup> Yhangmoq gi, Hkrisduq é dui-nhâng zoshâng wuì nghut akô lú? (Ngò gi, myit a gyîng é sù dông haù su taì é nghut lhê.) Ngò gi, je nghut lhê. Ngò gi, mù zui je shikut bê, htóng anum

num je lúng wú bê, je riyhang bat é huí wú bê, shî râ î é adàm dàm huí wú bê nghut lhê. <sup>24</sup> Ngò gi, Yudaq byu pé nuichum èq bat é myi xê dàm byíng râ radàm ra ra dut é, ngo lêng hui zô wú é nghut lhê. <sup>25</sup> Ngò gi, dumbáng èq nhuq huí é sum dàm, shî sháng gaq ga luqgok èq dú huí é radàm, wuì-sanghpo byoq huí é sum dàm, wuimau má myû byôm é ra-nyí ra-myìn hui zô wú bê nghut lhê. <sup>26</sup> Ngò gi, xoq xoq hkyowuì htoq e ló é hkùn, wuì gû é gyuq chiq jung, damyaq huí é gyuq chiq jung, ngá é amyû wui chyáng mâ é gyuq chiq jung, tûngbaù pê chyáng mâ é gyuq chiq jung, myuq hkaù pé mâ é gyuq chiq jung, yoso pé mâ é gyuq chiq jung, wuimau mâ é gyuq chiq jung eq gumang apyoq pê chyáng mâ é gyuq chiq jung pé hui zô wú bê nghut lhê. <sup>27</sup> Ngò gi, mù lé zuì nguì zuì hkyik mù, anum num a myang yhup shoq dut wú bê nghut lhê. Ngò gi, zòmùt wuì shit huí é eq zoshuq a wó é anum num huí laí lo wú bê nghut lhê. Ngò gi, gyoq hpû é eq gùngchîn dut é huí wú bê nghut lhê. <sup>28</sup> Haù pé lhunglhang htoq má, noqkuq hpûng pé banshoq é matú ngò myit chiq byí é hkyô gi, nyí wuì ngò má wòlai dut nyi ri. <sup>29</sup> Rayuq yuq wum nyhóm le, ngò le wum a nyhóm râ lú? Rayuq yuq mara shuí kut shut é hui le, ngò myit a nyé râ lú?

<sup>30</sup> Ngò gumrông râ dut é nghut le gi, ngò wum nyhóm é hkyô lé tân shit é pé lé gumrông râ nghut lhê. <sup>31</sup> Ngò a mhaù nyi é hkyô lé pyat dedu hkya-on huí é sù, haù Yhumsîng Yesuq é Îwa eq Garai Gasang sê lhê. <sup>32</sup> Damaskuq myuq má, Hkohkâm Areta é a-ô mâ é mauzau gi, ngo lé chyup râ matú, myuq lé zúng nhang é nghut lhê. <sup>33</sup> Nghut kôlhang, ngò gi, manghkoq má lúng mù, myuq xêwâm mâ é hkohot dong mai lhoq hkyô kat é hui lui, yhang é loq mai wó lut é nghut lhê.

## 12

### *Poluq É Myoqwup Shing-rán Pé*

<sup>1</sup> Ngò gi, rû gumrông nyi râ za nghut lhê. Akyû wó râ a nghut kôlhang, haù Yhumsîng chyáng mai lo é myoqwup shing-rán pé eq hpông shit é shing-rán pé lé gumrông râ nghut lhê. <sup>2</sup> Ngò gi, laí lò bê raxe myi zân hkùn, mauhkûng sum tsáng nghu é má shuí toq yu huí é, Hkrisduq mâ é byù rayuq\* é hkyô lé sê lhê. Yhang gi, gungdu eq nghut é luq, a nghut é luq, ngò a sé, nghut kôlhang, Garai Gasang gi, sê lhê. <sup>3</sup> Yhang hparadisu má shuí toq yu huí é gi, ngò sê lhê. Yhang gi, gungdu eq nghut lhê luq, a nghut é luq, ngò a sé, nghut kôlhang, Garai Gasang gi, sê lhê. <sup>4</sup> Yhang gi, byu pé taí kyô htoq râ ahkáng a wó é hkyô pé nghut é, a wó taí sân kyô é hkyô pé lé wó gyô ri. <sup>5</sup> Ngò gi, haù yuq sù é byu é hkyô eq séng lui gumrông râ nghut lhê; nghut kôlhang, ngò gi, ngá é wum nyhóm hkyô eq séng lui, gumrông é mai lai lui, ngá gûng ngò gumrông râ a nghut. <sup>6</sup> Ngò gi, gumrông hkyô lé hkyin yù râ dut é nghut jáng lhang, byù gò dut râ a nghut, haù mù gâ le, ngò gi, tengmán hkyô taí nyi râ nghut lhê. Nghut kôlhang, ó yuq le, ngò kut é eq ngò taí é mai myit lum to kô é htoq má, ngo lé, je a myit lo ko sháng gaq nghu, ngò a gumrông kut pyâm nyi lhê.

<sup>7</sup> Haù laklaí dik é dông ngo lé hpông shit é shing-rán mó pê é yanmai, ngò a nghutbùn byuq sháng gaq ga, ngo lé gunjang râ matú, Tsadán é lagyo nghut é zu lé, ngá é gungsho má kat byí to bê nghut ri. <sup>8</sup> Haù lé ngá chyáng mai yu pyám byi râ matú, ngò, Yhumsîng lé sum dâm dúng tôngbán wú bê nghut lhê. <sup>9</sup> Nghut kôlhang, Yhang gi, "Ngá é jeju gi, náng é matú luqdun é nghut lhê; hkâsu mù gâ le, Ngá é a-tsam gi, wum nyhóm é hkyô má lhoq gumjup é hui ri." ga lui, ngo lé taí ri. Haù mù lui, Hkrisduq é a-tsam gi, ngò má wó joq nyi sháng gaq nghu, ngò gi, ngá é wum nyhóm é hkyô pé eq séng lui, gabú myit mai je riyhang gumrông râ nghut lhê. <sup>10</sup> Haù nghut mù lui, ngò gi, Hkrisduq é yanmai, wum nyhóm é hkyô pé má le, rhoi huí é hkyô pé má le, wuíhke jamjau huí é hkyô pé má le, zing-ri huí é hkyô pé má le, awui ahke dut é hkyô pé má le, gabú nhik dik nyi lhê. Hkâsu mù gâ le, ngò wum nyhóm é hkùn sheq, ngò wúm bo é nghut lhê.

### *Poluq Chiq Byí É Hkyô*

\* 12:2 Hkrisduq má é byù rayuq gâ é gi, Poluq yhanggùng yhang lé taí nyi é nghut lhê.

<sup>11</sup> Ngò gi, ngá gûng ngò byù gò lhoq kut yû bê nghut ri, nghut kôlhang, haû gi, nungmoq kut nhang é nghut lhê. Ngò gi, nungmoq eq owaq é hui ang sù nghut lhê; hkâsu mù gâ le, ngò gi, haî a nghut kôlhang, "Ahkyak lagyô pé" ga bâng é htoq má ratsuí lháng gyamgyi gyó sù a nghut. <sup>12</sup> Lagyo rayuq é masat kumlhá nghut é, kumlhá pé, mauhpo muzó pé eq laklaí kumlhá pé lé, ngò gi, gyai yhang hkam jan mù nungmoq chyáng kut bê nghut lhê. <sup>13</sup> Ngò gi, nungmoq é matú, hkâ-nhám le wòlai a dut é nhîng, nungmoq gi, hkâsu mù, gotû noqkuq hpûng pé htoq má gyamgyi gyó nyi akô lúhú? Ngò, haú hkyô má shut é nghut jáng, mara hkyut pyám byi kó laq!

<sup>14</sup> Ahkuí, ngò gi, nungmoq lé, sum lhîng nghû râ dàm, lé kum râ rì rì nghut bê mù, nungmoq é matú wòlai gi, a dut râ nghut lhê. Haî mù gâ le, ngò gi, nungmoq é sutzè lé ô nau é a nghut, nungmoq lé sheq ru nghut lhê. Hká đông nghut kôle, zo wuî gi, mó wui é matú sutzè hkong to byi râ dut é a nghut, mó wuî sheq, zô wuî é matú hkong to byi râ dut é nghut lhê. <sup>15</sup> Haû mù luî, ngò gi, gyai yhang gabú é myit mai, ngò wó é jung hkangmó lé nungmoq é matú chung jài râ nghut mù, ngá gûng lé lháng chûng jài râ nghut lhê. Ngò, nungmoq lé myô chyitdap é yanmai, nungmoq gi, ngo lé shaû chyitdap kó râ lúhú? <sup>16</sup> Ngò gi, nungmoq chyáng wòlai a dut é hkyô têng lhê. Nghut kôlhang, ngò gi, hpaqchyî haq da sù dut mù, mhaû lhik é đông nungmoq lé chyup yû sù dut byuq bê ga nungmoq ra-am myit akô myhi-nhung! <sup>17</sup> Ngò gi, nungmoq chyáng nhang kat byî é byù đông, nungmoq chyáng amyat kut zô yù bê nghut lhê lúhú? <sup>18</sup> Ngò gi, Tituq lé nungmoq chyáng lé râ matú wum taî tsuq mù, ngamoq é gumang lé, yhang eq rahá nhang kat bê nghut lhê. Tituq gi, nungmoq chyáng amyat kut zô é nghut lhê lúhú? Nga-nhik gi, rajung zâ é myit đông chyat kut mù, rajung zâ é hkyô lé chyat châng é su nhik nghut lhê, a nghut kó lúhú?

<sup>19</sup> Ngamoq gi, nungmoq hí má ngamoq gùng ngamoq taî hung yu nyi ri nghû, ahkuí jé shoq myit nyi akô lúhú? Ngamoq gi, Hkrisduq mâ é byu pé đông, Garai Gasâng hí má taî nyi é nghut lhê. Chyitdap é gumang wuî ê, ngamoq kut é jung hkangmó gi, nungmoq é akyu matú chyat nghut lhê. <sup>20</sup> Hkâsu mù gâ le, ngo lé jé é hkûn, ngò, nungmoq lé dut nhâng nau é su, nungmoq a wó dut kó râ eq, nungmoq, ngo lé dut nhâng nau é su, ngò a wó dut râ lé, ngò myit gyuq ri. Ngò gi, mabyoq jishûm htoq é, manon é, nhik-ûn buq é, byù hpûng gam é, gansang é, lumu é, gyai nghutbûn é eq atau ahû dut é hkyô pé joq râ lé gyuq ri. <sup>21</sup> Ngò dum lé jé é hkûn, ngá é Garai Gasang gi, nungmoq é hí má ngo lé myit nyhûm nhâng mù, yhangmoq ô nau é myit châng é má shut é đông nyi zô lúhú nau é i-myit, gungsho zùm yap é yubak mara eq a sân-yúng é hkyô kut shut é mai myit a lhîng bang myo myô é yanmai, yón kuq é hui zo râ lé, ngò myit chiq ri.

### 13

#### *Ló Htáng Má Sidiq Byî É Dang Pé*

<sup>1</sup> Ahkuí, ngò, nungmoq chyáng lé kum râ gi, sum lhîng nghû râ dàm nghut lhê. Haû gi, "Mara hun é hkyô hkangmó lé, í yuq sum yuq saksé hkâm é eq lhoq teng ra râ nghut lhê." <sup>2</sup> Ngò gi, í lhîng nghû râ dàm nungmoq eq rahá nyi é hkûn, nungmoq lé sidiq byi gû bê nghut lhê. Ahkuí le, nungmoq eq wê gâng tô é u lé, dum taî kôlé, ngò dum jé lé é hkûn, noq mai mara shut tô é bang lé nghut nghut, góbang ó yuq lé nghut nghut, hkyamsa a byi lo râ nghut lhê. <sup>3</sup> Haû gi, ngò đông mai Hkrisduq dang taî nyi é hkyô saksé shit râ lé, nungmoq dúng nyi kômù nghut lhê. Yhang gi, nungmoq é hkyô lé hkâsu kut shuî-û é hkyô má wum nyhôm é a nghut, nungmoq chyáng a-tsam mó shit sù sheq ru nghut ri. <sup>4</sup> Hkâsu mù gâ le, Yhang gi, wum nyhôm é má jén sat é hui bê nghut kôlhang, Garai Gasâng é a-tsâm eq dui nyi é gi, hkyak têng lhê. Haû eq rajung za, ngamoq gi, Yhang su wum nyhóm kôlhang, nungmoq lé dojaú râ matú, Garai Gasâng é a-tsâm eq, Yhang eq rahá dui nyi râ nghut lhê.

<sup>5</sup> Nungmoq gi, lumjîng hkyô má nghut nyi lhê luq, yhumsîng gùng yhumsîng myî wú keq. Yhumsîng gùng yhumsîng chyam wú keq. Nungmoq gi, chyam é má sùm byuq é za a nghut jáng, nungmoq chyáng Hkrisduq Yesuq lúng nyî bê hkyô lé sé kó râ nghut lhê.

<sup>6</sup> Ngamoq gi, chyam é má a sôm é hkyô lé, nungmoq wó sé kó râ nghut lhê nghû, ngò hkyak lum tô lhê. <sup>7</sup> Ahkuû, ngamoq gi, nungmoq shut é hkyô haî a kut kó râ matú, Garai Gasâng chyáng kyûdung byi lhê. Haû gi, ngamoq chyam hui luí wó lut é hkyô lé byu pé myàng kó râ matú a nghut é za, ngamoq sôm é su dut kôlhang, nungmoq ge é hkyô kut kó râ lé myàng râ matú nghut lhê. <sup>8</sup> Hkâsu mù gâ le, ngamoq gi, haû tengmán hkyô eq shaî é đông haî le a ge kut é za, tengmán hkyo é matú za kut râ dut é nghut lhê. <sup>9</sup> Ngamoq wum nyhóm kôlhang, nungmoq wúm bo é hkûn, ngamoq gabú é nghut lhê; ngamoq kyûdung é gi, nungmoq gumjup râ matú nghut lhê. <sup>10</sup> Ngò gi, wê gâng tô é hkûn, haû hkyô pé lé haî mù kê é gâ le, ngò jé lé é hkûn, ahkáng ayá lé ngò chung é má htân htân a kut râ matú nghut lhê. Ahkáng ayá haû gi, nungmoq lé lhoq htên pyám râ matú a nghut, nungmoq lé kô myhang lo nhâng râ matú, haû Yhumsîng ngo lé byî é sheq ru nghut lhê.

*Ló Htâng É Shi-kyám Dang*

<sup>11</sup> Ló htáng má ngò táí nau é gi, gumang wuî ê, nuingón yuqyo nyî keq. Gumjup hkyô shut sô nyî keq, ngò dúng tôngbán é dang lé gyo keq, myit rahkat za dut nyî keq, nuingón shoq asak duì nyî keq. Haû hkûn, chyitdap hkyô eq nuingón hkyo é Garai Gasang gi, nungmoq eq rahá nyî nyî râ nghut lhê.

<sup>12</sup> Chyoiyúng é bopuq puq é èq, rayuq eq rayuq shi-kyâm lhum keq. <sup>13</sup> Sân-yúng bang banshoq gi, nungmoq lé shi-kyâm kat akô.

<sup>14</sup> Haû Yhumsîng Yesuq Hkrisduq é jeju, Garai Gasâng é chyitdap myit eq Chyoiyúng Woi-nyí é zùm yap hkyô gi, nungmoq banshoq bâng chyáng ru joq nyî sháng gaq ô.

## GALATIQ Mau Bâng Chyáng Hun Kat é Laiká (Galatians)

<sup>1</sup> Byu pê chyáng mai le a nghut, ó yuq èq nhang é le a nghut e za, haû Yesuq Hkrisduq lé shî bê mai dum lhoq dui toq yu é sù Íwa Garai Gasang eq Yesuq Hkrisduq chyáng mai nhang kat é lagyo rayuq nghut sù, ngò Poluq gi, <sup>2</sup> ngò eq rahá nyi é gumang wuì banshoq bang le mô, Galatiq mau mô é noqkuq hpûng pê chyáng dang kyô kat lhê.

<sup>3</sup> Nga-nhûng é Íwa Garai Gasang eq Yhumsîng Yesuq Hkrisduq chyáng mô é, jeju eq nguîngón hkyô gi, nungmoq chyáng ru joq nyî sháng gaq ô. <sup>4</sup> Haû Hkrisduq gi, nga-nhûng é Íwa Garai Gasang ô nau é eq rajung za, agè ashop é ipyat shî mai, nga-nhûng lé xe yù râ ga, nga-nhûng é yubak marâ é matú yhânggùng lé Yhang byî pyám bê nghut ri. <sup>5</sup> Haû hpungwup shing kang gi, Garai Gasâng chyáng pyat dedu ahtum abyuq ru joq nyî sháng gaq ô. Amen.

### *Gotû Gabú Danglù A Joq É Hkyô*

<sup>6</sup> Ngò gi, haû Hkrisduq é jeju mai nungmoq lé ji yù Sù lé, nungmoq haû-í han kâng pyâm to kôluî, shaî é gabú danglù shut lhing lô nyî kô é hkyô lé, gyai yhang maú nyi ri. <sup>7</sup> Danglù haû gi, gabú danglù ratsui lháng a nghut. Byù ra-am mai nungmoq lé lhoq shuk byi luî, haû Hkrisduq é gabú danglù lé, shikut luî lhoq shai nhang pyâm nyi kô é hkyô za nghut lhê. <sup>8</sup> Nghut kôlháng, nungmoq lé ngamoq hkô kyo bê gabú danglù mai lai luî, ngamoq nghut nghut, mauhkûng htoq mô é maumang lagyo rayuq nghut nghut, shaî é gabú danglù, nungmoq lé hko kyô é nghut jáng, haû yuq gi, ahtum abyuq dam byî é hui zo sháng gaq ô! <sup>9</sup> Ngamoq taî wú bê eq rajung za, ahkuî le, ngò dum taî kôlé: rayuq yuq mai, nungmoq hap yu to bê é gabú danglù mai lai luî, gotû hko nyi e nghut jáng, haû yuq gi, ahtum abyuq dam byî é hui zo sháng gaq ô!

<sup>10</sup> Haû su nghu taî é gi, ahkuî, ngò, byù é hí má myoqdong wó râ matú shikut nyi é nghut lhê lhú? Haû a nghut jáng, Garai Gasâng é hí má myoqdong wó râ matú shikut nyi é nghut lhê lhú? Byù lé gabú nhâng râ matú, ngò shikut nyi é nghut lhê lhú? Ngò gi, byu pé lé za ru gabú nhâng nau nyi é nghut le gi, Hkrisduq é dui-nhâng zoshâng dut râ a nghut.

### *Poluq Lé, Garai Gasang Ji Yu É Hkyô*

<sup>11</sup> Gumang wuì ê, ngò hko kyô é gabú danglù haû gi, byu èq kut htoq é hkyô a nghut é lé, ngò, nungmoq lé sé nhâng nau ri. <sup>12</sup> Ngò gi, haû lé, byu chyáng mai wó yu é le a nghut, góyuq èq mhoq byî é le a nghut e za, Yesuq Hkrisduq èq shing-rán byî é dông wó hap yu é ru nghut lhê.

<sup>13</sup> Ngò, Yudaq noqkuq htûng má nghut nyi ashî hkûn, Garai Gasâng é noqkuq hpûng lé ladu lai shoq hkâsu kut zing-ri luî, haû lé lhoq htên shikut wún é, ngá é hí hpyang lhê é asak dui hkyô lé, nungmoq wó gyô wú bekô râ nghut lhê. <sup>14</sup> Ngò gi, ngò eq ra-kyam zâ é Yudaq byu pé myo myô é htoq má, Yudaq noqkuq htûng lé je cháng sù nghut é htoq agó, ngá é îchyí íwa pê é htûngli lé ladu lai shoq myit zìng zuq sù nghut lhê. <sup>15</sup> Nghut kôlháng, ngá nû é unghkaû mai yhang hkyin to luî, Yhang é jeju yanmai ngo lé ji yu é Garai Gasang gi, <sup>16</sup> haû Yhang Zô é hkyô gabú danglù lé, ngò mai tûngbaù pê chyáng hko kyo sháng gaq ga, Yhang Zo lé ngá chyáng htoq shit nhâng râ matú myit hpyit yu é hkûn, ngò gi, ó yuq eq le a hpyê yù, <sup>17</sup> Yerusalem wà mó má doq lô luî, ngá hí má lagyo kut é bang lé le a lô huî e za, radá dâm Arabiq mau shut ê luî, Damaskuq myuq má dum taû lô bê nghut lhê.

<sup>18</sup> Sum zân lai é htâng má, ngò gi, Yerusalem wà mó má doq ló mù, Petruq\* lé ló hui luí, yhang eq raxe ngo nyí, ló nyi nyi é nghut lhê. <sup>19</sup> Haú má, Yhumsing é yhanggu Yakuq mai lai luí, lagyo góbang lé ngò a myàng nghut ri. <sup>20</sup> Nungmoq lé ngò ká byí kat é má, mhaú é hkyô a bò nghú luí, Garai Gasâng hí má, hkyak, ngò taí lhê. <sup>21</sup> Hau htâng má, ngò gi, Suriq mau eq Kiliki mau má ê jé é nghut lhê. <sup>22</sup> Haú hkún, haú Hkrisduq má nghut é, Yuda mau má é noqkuq hpúng byú wuì gi, ngo lé myoqno a shú kó nghut ri. <sup>23</sup> Yhangmoq gi, "Hí hkún, nga-nhúng lé zing-ri sù gi, yhang mai lhoq hten râ matú radàm shikut wú é lumjng hkyô haú lé, ahkuí hko nyi ri." gâ é hkyanglù lé wó gyô wú kôluí za, <sup>24</sup> ngá é yanmai, Garai Gasang lé hkya-ôn bum akò nghut ri.

## 2

### *Poluq Lé Lagyô Pé Lhom Hap Yu É Hkyô*

<sup>1</sup> Raxe myi zân lai é htâng má, ngò gi, Barnaba eq rahá Yerusalem wà mó má dum doq ló é hkún, Tituq lé le shuí chung é nghut lhê. <sup>2</sup> Garai Gasang byí é shing-rán eq rajung za doq ló luí, ngò kut wú bê muzó eq ahkuí kut é muzó pé akôm a dut pyám sháng gaq nghú, tưngbaù pé chyáng ngò hko kyô nyi é gabú danglù lé, haú suwún dut bâng é hí má za shap kyô é nghut lhê. <sup>3</sup> Nghut kôlhang, ngò eq rahá nghut é Tituq gi, Grik byù nghut kôle, yhang lé ahpyo-kuq a hpyit nhâng kó nghut ri. <sup>4</sup> Haú hkaú wang lo é mhaú é gumang wuì gi, Hkrisduq Yesuq má ngamoq wó é luthkyô má jowú luí, nga-nhúng lé jùn dut nhâng râ dâ kô é yanmai, haú hkyô gabyông htoq lo é nghut ri.\* <sup>5</sup> Nghut kôlhang, haú gabú danglù é tengmán hkyô gi, nungmoq chyáng joq gîng nyi sháng gaq nghú, razup za lhang, yhangmoq é dang lé ngamoq gyo byí é a nghut.

<sup>6</sup> Ahkyak é byù su dut é bang gi, yhangmoq hái jung kut kôlhang, ngò eq a séng nghut ri; Garai Gasang gi, du lé wú mù jéyáng é sù a nghut; byù haú bang gi, ngá é mungdang má hái le a jat kat e za, <sup>7</sup> Petruq gi, Yudaq byu pé† lé, haú gabú danglù hko kyo râ mù má lum tô é hui bê eq rajung za, ngò gi, tưngbaù pé‡ lé, haú gabú danglù hko kyo râ mù má lum tô é hui bê hkyô lé za, yhangmoq myang akò nghut ri. <sup>8</sup> Hkâsu mù gâ le, Yudaq byu pé é matú Petruq lé lagyo ayá dâng byí é sù Garai Gasang gi, tưngbaù pé matú ngo lé le lagyo ayá dâng byi bê nghut lhê. <sup>9</sup> Haú hkungmó-zîng su ahkyak é, Yakuq, Petruq eq Yohan pé gi, ngo lé byi tô é jeju lé myang sé kôjáng, ngò eq Barnaba lé, zùm yap hkyô gâ é loqyo loq eq shi-kyâm yù kôluí, yhangmoq gi, Yudaq byu pé shut, ngá-nhik lé gi, tưngbaù pé shut é râ lhê ga, myit hui bekò nghut ri. <sup>10</sup> Yhangmoq gi, ngá-nhik mai myùng bang lé ru bûn nyi râ matú za pying kat akò; haú gi, ngò gyai yhang kut nau nyi é hkyô nghut lhê.

### *Petruq Lé Poluq Htuq Htîng É Hkyô*

<sup>11</sup> Antioku wà mó má Petruq jé lé é hkún, yhang lé mara hûn râ hkyô joq é yanmai, ngò gi, byu hí má yhang, yhang lé lhom htuq htîng é nghut lhê. <sup>12</sup> Hkâsu mù gâ le, Yakuq chyáng mai lé é bang a jé shí é u lé, yhang gi, tưngbaù pé eq rahá chôm zo chôm shuq lhaq kut ri. Nghut kôlhang, haú bang jé é hkún, yhang gi, ahpyo-kuq hpyit râ lhê gâ é hpúng má lom é bang lé gyuq é yanmai, tưngbaù pé chyáng mai htoq gang luí, yhang baú nyi tô ri. <sup>13</sup> Yhang, gegùn labyoq kut é hkyô má, gotú Yudaq byu pé le bo châng kut akò nghut mù luí, Barnaba lhang yhangmoq kut é gegùn labyoq hkyô má bo châng nghoq ló bê nghut ri. <sup>14</sup> Haú gabú danglù é tengmán hkyô eq rajung za, yhangmoq a cháng kô é lé myàng jáng, ngò gi, yhangmoq banshoq bâng é hí má, Petruq lé, "Nàng gi, Yudaq byù nghut to mù luí, Yudaq byù rayuq đông a nyi e za, tưngbaù rayuq đông nyi luí nhîng, tưngbaù pé lé Yudaq byu pé é htungli hkâsu kut wó cháng nhâng râ lúh?

<sup>15</sup> Ngamoq gi, yubak dap bang gâ é tưngbaù pé a nghut e za, hkú é buinyi mai yhang, Yudaq byù nghut gû bê nghut lhê. <sup>16</sup> Byù gi, jep é tarâ lé cháng luí mara hkyut san byi huí

\* 1:18 Petruq lé Kehpa le gâ lhê. \* 2:4 Yudaq byu pé ra-am gi, hpúng asik wang é bang lé Yudaq htung tarâ cháng nhâng nau akò nghut ri. † 2:7 Grik má ahpyo-kuq hpyit hkam é bang ga bo tô ri. ‡ 2:7 Grik má ahpyo-kuq hpyit a hkam é bang ga bo tô ri.

é a nghut e za, Yesuq Hkrisduq lé lumj́ng é yanmai sheq mara hkyut san byi huí é hkyô lé, ngamoq sê lhê. Haû mù luí, ngamoq gi, jep é tarâ lé cháng luí a nghut e za, Yesuq Hkrisduq lé lumj́ng é yanmai, mara hkyut sân pyám byî é hui sháng gaq nghû, Yesuq Hkrisduq lé lumj́ng bê nghut lhê; hkâsu mù gâ le, ó yuq le, jep é tarâ lé châng é yanmai, mara hkyut san byî é hui râ a nghut.

<sup>17</sup> Ngamoq gi, Hkrisduq má ngamoq é mara hkyut san byî é hui râ hkyô ho nyi é hkûn, yubak dap é bang ngamoq nghut é lé myang é nghut jáng, mara lé gi, Hkrisduq mai kut nhang é nghut lhê lhú? Ratsuí le a nghut. <sup>18</sup> Ngò gi, ngò hpyoq pyám bê hkyô lé dum saí kut é nghut jáng, tarâ lu laí é byù ngò nghut é lé tún shit ri. <sup>19</sup> Ngò gi, jep é tarâ eq sêng é má, jep é tarâ é yanmai shí jáng sheq, Garai Gasâng é matú wó dui nyi râ nghut lhê. <sup>20</sup> Ngò gi, Hkrisduq eq rahá jén sat é hui bê nghut mù luí, ngá gûng ngò dui nyi é a nghut lo, Hkrisduq sheq ngò má dui nyi é ru nghut lhê. Ahkuí, ngò gungsho má asak dui nyi é gi, ngo lé chyitdap luí, ngá é matú yhanggùng lé Yhang byî pyâm é, haû Garai Gasâng é Yhangzo lé lumj́ng é yanmai ru nghut lhê. <sup>21</sup> Ngò gi, Garai Gasâng é jeju lé tô pyâm é a nghut, hkâsu mù gâ le, dingmán é hkyô lé, jep é tarâ dông wó yu é ru nghut le gi, Hkrisduq shí hkâm é gi, akôm dut byuq râ nghut lhê." nghû taí é nghut lhê.

### 3

#### *Lumj́ng Myit Lhú? Jep É Tarâ Lhú?*

<sup>1</sup> Galatiq mau mâ é byùbâm pé ê! Yesuq Hkrisduq gi, tapzîng má jén sat hui bê hkyô lé, nungmoq é myoq má bò nhang to bê le nhîng, ó yuq eq wá nungmoq lé lãng nghoq yû bekô lhú? <sup>2</sup> Nungmoq gi, haû Woi-nyí lé, jep é tarâ cháng luí wó yû kô é nghut lhê lhú? A nghut jáng, nungmoq wó gyô yu é gabú danglù lé lumj́ng luí wó yû kô é nghut lhê lhú? Haû rahkat lé za, ngò sê yû nau ri. <sup>3</sup> Nungmoq gi, haû-í yhang bâm akô lhú? Haû Woi-nyí lé lumhkaû mù kut hí kôluí nhîng, ahkuí, gungsho wum-o lé lumhkaû mù, yhumsîng myit tô é hkyô lé lhoq pán râ matú shikut nyi akô lhú? <sup>4</sup> Nungmoq, myo myo hpuzô pyâm é gi, akôm nghut akô lhú? Gè gè yhang, haû gi, akôm nghut byuq bekô lhú? <sup>5</sup> Garai Gasang, nungmoq lé Yhâng é Woi-nyí byî é htoq agó, nungmoq chyáng laklaí kumlhá kut é gi, jep é tarâ lé nungmoq châng é yanmai nghut akô lhú? A nghut jáng, nungmoq wó gyô é gabú danglù lé, nungmoq lumj́ng é yanmai nghut akô lhú?

<sup>6</sup> "Abraham gi, Garai Gasang lé lumj́ng luí, yhang lé dingmán sù ga sôn yu é hui bê nghut ri."✠ ga, Abraham eq séng luí taí tô é lé myit wú keq. <sup>7</sup> Haû mù luí, lumj́ng myit bo é bang gi, Abraham é yhangzô pé\* yhang dut bê nghut é hkyô lé sé keq. <sup>8</sup> Lumj́ng myit é yanmai, tungbaù pé lé Garai Gasang mara hkyut san byi râ nghut lhê ga, Chyúmdang mai hí byu-myang to bê nghut mù luí, Abraham lé hí shit kyô tô é gabú danglù gi, "Nang é yanmai, byuhú chângjup gi, shimân jeju wó yû kó râ nghut lhê."✠ ga ri. <sup>9</sup> Haû mù luí, lumj́ng myit bo é bang gi, lumj́ng myit bo é Abraham eq rahá, shimân jeju lé myang hkam yù kó râ nghut lhê.

<sup>10</sup> Jep é tarâ châng é hkyô má nè hkau é lhunglhang bang gi, nhîng pyâm é hui bang chyat nghut lhê. Hkâsu mù gâ le, "Tarâ laiká má kâ tô é lhunglhang lé a xoq kut é sù, ó yuq nghut kôle, nhîng pyâm é hui kó râ nghut lhê."✠ ga luí, kâ tô ri. <sup>11</sup> Hau htoq agó, "Haû dingmán sù gi, lumj́ng myit mai asak dui râ nghut lhê."✠ ga kâ tô é yanmai, ó yuq nghut kôle, Garai Gasâng é hí má jep é tarâ lé cháng luí, mara hkyut san byî é a huí é hkyô gi, san za nghut bê nghut ri. <sup>12</sup> Haû jep é tarâ gi, lumj́ng myit eq haí a sêng é nghut luí, "Haú pé dông châng é sù gi, haú pé mai asak dui râ nghut lhê."✠ ga kâ tô ri. <sup>13</sup> Haû Chyúmdang má, "Sik zîng má jén lhang to huí é sù ó yuq nghut kôle, nhîng pyâm é hui sù nghut ri."✠ ga kâ tô é eq rajung za, Hkrisduq gi, nga-nhûng é matú nhîng pyâm é hui sù dut bê nghut é yanmai, jep é tarâ mâ é nhîng é hkyô mai nga-nhûng lé hkyi yù bê

✠ 3:6 Apùn 15:6 \* 3:7 Abraham é yhangzô pé gâ é gi, Garai Gasâng é yhangzô pé lé gâ é nghut lhê. ✠ 3:8 Apùn 12:3 ✠ 3:10 Tarâ Pun 27:26 ✠ 3:11 Hbk 2:4 ✠ 3:12 Nhong 18:5 ✠ 3:13 Tarâ Pun 21:23



nghut ri. <sup>14</sup> Haû Abraham lé byî tô é shimân jeju gi, Hkrisduq Yesuq é yanmai tungbaù pê chyáng le jé sháng gaq ga, Yhang nga-nhúng lé hkyi yu é nghut ri; haû mù, nga-nhúng gi, danggidiq byî tô é Woi-nyí haû lé, lumjínq myit mai wó yú râ nghut lhê.

#### *Jep E Tarâ Eq Danggidiq*

<sup>15</sup> Gumang wuì ê, nyí wui é asak duì hkyô mâ é lé dangtú yù mù, ngò nungmoq lé taí kôlé, byù mai chòm tô tô é dangshikaq lé, ó yuq èq le wó lhoq hpyoq pyám râ a nghut, ó yuq èq le haú má wó jat kat râ a nghut. <sup>16</sup> Abraham eq yhâng é awut ashín lé byi tô é danggidiq le haû eq rajung za nghut ri. "Awut ashín pé lé" gâ é dang gi, byù myo myo lé gâ lhê; nghut kôlhâng, haû Chyúmdang má, haû lé taí nau é a nghut e za, "náng é awut ashín lé" <sup>✠</sup> ga taí nau é ru nghut lhê, haû é lichyúm gi, byù rayuq lé za taí é nghut lhê, haû gi, Hkrisduq nghut ri; <sup>17</sup> haû mù luí, ngò taí nau é gi, Garai Gasang, dangshikaq tô tô é htâng, myí sho sum xê zàn má lé joq é tarâ gi, dangshikaq haû lé le wó lhoq hpyoq pyám râ a nghut, danggidiq lé le wó lhoq htên pyám râ a nghut. <sup>18</sup> Hkâsu mù gâ le, haû silí wunlí gi, jep é tarâ eq séng lhùm é nghut jáng, danggidiq eq gi, haî le a sêng lhum lo nghut ri; nghut kôlhâng, Garai Gasang gi, Yhâng é jeju yanmai, Abraham lé danggidiq dông silí wunlí haû byî to bê nghut ri.

<sup>19</sup> Haû su nghut jáng, haû jep é tarâ gi, hai akyû bò râ lú? Haû gi, danggidiq dông lhoq âng tô é Awut ashín nghut é sù jé lé é hkûn jé shoq, mara kut shut nyi bùm kô é yanmai, jat kat tô é nghut lhê; jep é tarâ haû gi, maumang lagyô pé mai gyoro sô xoq byi sù† é loq dông byî tô é ru nghut lhê. <sup>20</sup> Gyoro sô xoq byi sù gi, rahkyam shut mâ é bang eq baú sêng é a nghut, nghut kôlhâng, Garai Gasang gi, rayuq za nghut lhê.

<sup>21</sup> Haû mù luí, jep é tarâ gi, Garai Gasâng é danggidiq pé eq htuq htîng lhùm lhê lú? Ratsuí le a nghut. Hkâsu mù gâ le, dui é asak wó byî é jep é tarâ lé byi to bê nghut le gi, gè gè yhang, dingmán hkyô gi, jep é tarâ mai lò râ nghut lhê. <sup>22</sup> Nghut kôlhâng, mingkan gón mâ é bang gi, yubak marâ é htongbyu pé chyat nghut akô ga Chyúmdang má bo tô ri; haû mù luí, haû byî to bê danggidiq lé gi, Yesuq Hkrisduq lé lumjínq é bang lé byi râ nghut lhê.

<sup>23</sup> Lumjínq hkyô haû a jé shimá, nga-nhúng gi, haû jep é tara èq htongbyû dông lhùng tô é hui luí, lumjínq hkyô haû htoq shit é hkûn jé shoq myhí lhùng tô é huí wú bê nghut lhê. <sup>24</sup> Haû mù luí, nga-nhúng gi, lumjínq é yanmai mara hkyut san byî é hui sháng gaq ga, jep é tarâ gi, nga-nhúng lé Hkrisduq chyáng shuê ê râ matú, nga-nhúng é hkyô-u shê sù dut bê nghut ri. <sup>25</sup> Ahkuí kúm gi, haû lumjínq hkyô jé bê nghut é yanmai, nga-nhúng gi, haû jep é tarâ mai hkyô-u shê é loq hkaû má a nghut lo.

#### *Garai Gasâng É Yhangô Pé*

<sup>26</sup> Nungmoq lhunglhâng bang gi, Hkrisduq Yesuq lé lumjínq é yanmai, Garai Gasâng é yhangzô pé nghut bê; <sup>27</sup> Hkrisduq má wui-myhup hkám bê é bang nungmoq banshoq gi, Hkrisduq lé mebu su wut to bekô nghut ri. <sup>28</sup> Nungmoq lhunglhâng bang gi, Hkrisduq Yesuq má rading ralhùm za nghut é yanmai, Yudaq byù nghû é eq Grik nghu é, jùn nghu é eq luthkyô nghu é, yuqgè nghu é eq myiwe nghu é, a gam hkoq lo nghut ri. <sup>29</sup> Nungmoq gi, Hkrisduq eq séng bekô nghut jáng, Abraham é awut ashín pé le, haû danggidiq eq rajung za silí wunlí hkam yù bang le, nghut akô nghut ri.

## 4

<sup>1</sup> Ngò taí nau é lichyúm gi, haû amyû hkûng xoq dut râ sù gi, ikun sutzè banshoq lé sîng ang sù nghut kôlhâng, yhang, zoshâng nghut ashî hkûn gi, jùn hpó eq haî a shaî nghut ri. <sup>2</sup> Yhang gi, yhâng wa masat tô é ahkyínq jé shoq, yhang lé zúng é sù eq yhùm lé up su é a-ô má ru lúng nyi ashî nghut ri. <sup>3</sup> Haû eq rajung za, nga-nhúng le zoshâng\* nghut é hkûn gi, mingkan uphkâng tarâ ô má jùn dut nyi é bang nghut lhê. <sup>4</sup> Nghut kôlhâng, ahkyínq lo ngap jáng, zo dut râ ahkáng lé byínq shoq, nga-nhúng wó yú sháng gaq ga,

✠ 3:16 Apûn 12:7; 13:15; 24:7 † 3:19 Gyoro so xoq byi sù gi, Mosheq nghut ri. \* 4:3 Bun zo shí má, zoshâng gâ é lichyúm gi, Yesuq lé a lumjínq shí é bang lé gâ lhê.

Garai Gasang gi, jep é tarâ hkaû mâ é byu pé lé hkyi yù râ matú, <sup>5</sup> jep é tarâ hkaû má, miwe mai hku kat nhang é Yhang Zo lé, nhang kat byi bê nghut ri. <sup>6</sup> Hkâsu mù gà le, nungmoq le, zo wuî nghut bê yanmai, "Aba, Âwa ê." ga dat wut é, Yhang Zô é Woi-nyí lé, Garai Gasang gi, nga-nhông é i-myt unghkaû má kat byi bê nghut ri. <sup>7</sup> Haû mù luî, nang gi, jùn a nghut lô e za, zo rayuq nghut bê nghut ri; nang gi, zo rayuq nghut é yanmai, Garai Gasang gi, nang lé Yhâng é amyû hkûng xoq dut nhâng bê nghut ri.

#### *Galatiq Mau Bang Lé Poluq Myit Chiq Byî É Hkyô*

<sup>8</sup> Hí hkûn, Garai Gasang lé nungmoq a sé shî é u lé, nungmoq gi, nat hparâ lhâng a nghut bâng é a-ô má jùn dut é bang nghut ri. <sup>9</sup> Ahkuí kúm, Garai Gasang lé nungmoq sé bê nghu é htoq agó, Garai Gasang gi, nungmoq lé sé bê nghut le nhîng, nungmoq gi, hkâsu mù, haû wum nyhôm é eq akyû a byî é, mingkan uphkan é tarâ shut dum lhîng taû ló nyi akô lú? Nungmoq gi, haú pê èq jùn zô é dum hui zó nau akô lú? <sup>10</sup> Nungmoq gi, buinyi wú, lhohkyap wú, ahkyíng yam-yoq wú, zanwut wú é hkyô pé lé, ahkyak kut nyi ashî kó nhung! <sup>11</sup> Nungmoq chyáng ngò wum kat pyâm é hkyô gi, akôm dut bê abe nghû, nungmoq é matú ngò myit chiq nyi ri.

<sup>12</sup> Gumang wuî ê, ngò gi, nungmoq su dut bê nghut é yanmai, nungmoq le ngò su dut keq† nghû, nungmoq lé dúng tôngbán kat lhê. Nungmoq gi, ngo lé haî le a kut shut wú kô é nghut lhê. <sup>13</sup> Sâng-hî dàm ngò nungmoq lé gabú danglù hko kyo é hkyô gi, nungmoq sê é eq rajung za, ngò nõhpyo huî é yanmai nghut lhê. <sup>14</sup> Ngá é nõhpyo gi, nungmoq é matú wuîhke hkyô dut kôlhâng, nungmoq gi, ngo lé a wú tiq pyám kô é htoq agó, a wú chaq pyám kó e za, Garai Gasang é maumang rayuq lé su le, Hkrisduq Yesuq lé su yhang le, ngo lé lhom hap yù kô é nghut lhê. <sup>15</sup> Haû sù é nhîng, nungmoq é gabú hkyô banshoq gi, haî dut byuq bekô lú? Nungmoq gi, ru wó dut é nghut jáng, nungmoq é myoqjí lé choq yù mù, ngo lé wám byî pyám kó râ í dut laî lò bê hkyô lé, ngò saksé wó hkâm lhê. <sup>16</sup> Ahkuí, ngò gi, nungmoq lé haû tengmán hkyô taí kyô é yanmai, nungmoq é gyè dut to bê nghut lhê lú?

<sup>17</sup> Haû byû góbang gi, nungmoq lé gyai shirong é hkyô tûn shit ri; nghut kôlhâng, ge é hkyô haî a bò; yhangmoq ô nau é hkyô gi, yhangmoq lé nungmoq taû shirông kó abe ga, nungmoq lé ngamoq chyáng mai lhoq kâng yù râ matú ru nghut lhê. <sup>18</sup> Ge é hkyô lé shirong é gi, ge lhê; ngò eq rahá nyi é hkûn za a nghut, hkâ-nhám le haû su shirong le ge lhê. <sup>19</sup> Ngò chyitdap é zo wuî ê, Hkrisduq é a-kyang nungmoq má gumjup lo é jé shoq, ngò gi, zo hkû nõ no é su radàm dum hkâm zô nyi luî, <sup>20</sup> nungmoq é hkyô lé myit wuîhke tô é yanmai, ahkuí, nungmoq eq rahá myang nyi mù, ngò taí é danghtê wó htaí râ matú, gyai yhang myoqbyu nyi lhê ô.

#### *Hagara eq Sarah Nhik É Hkyô*

<sup>21</sup> Haû jep é tarâ ô má nyi nau é bang ê, nungmoq gi, jep é tarâ má taí é hkyô lé a sê gyo kô é nghut lhê lú? Ngo lé taí kyô wú kó laq. <sup>22</sup> Hkâsu mù gà le, Abraham gi, yuqzô í yuq wó ri; rayuq gi, jùn myhî é yhangzo, rayuq gi, jùn myhî a nghut su é yhangzo, ga kê tô ri. <sup>23</sup> Haû jùn myhî é yhangzo gi, gungsho đông hku lé é sù nghut kôlhâng, jùn myhî a nghut su é yhangzo kúm gi, danggidiq eq rajung za hku lé é sù ru nghut lhê.

<sup>24</sup> Haú hkyô pé gi, dangtú ru nghut lhê, miwe haû í yuq gi, dangshikaq í lhum eq wuî lhê; dangshikaq ralhum gi, Sinaq Bùm mâ é‡ nghut luî, jùn dut râ nghut é zo wuî lé hku kat é Hagara lé taí nau é nghut ri. <sup>25</sup> Hagara haû gi, Arabiq mau mâ é Sinaq Bùm lé taí nau é nghut luî, ahkuí lhê é Yerusalem eq wuî nyi ri. Hkâsu mù gà le, Yerusalem haû gi, yhang zô pé eq rahá, jep é tara é jùn dut nyi kô é yanmai nghut lhê. <sup>26</sup> Nghut kôlhâng, ahtoq mâ é Yerusalem gi, jùn myhî a nghut sù nghut luî, nga-nhông é înu nghut ri. <sup>27</sup> Hkâsu mù gà le,

† 4:12 Ngò su dut keq gá é lichyúm gi, nungmoq le ngò su jep é tarâ mai lut htoq keq gá nau é nghut lhê. ‡ 4:24 Sinaq Bùm mâ é dangshikaq gi, jep é tarâ eq sêng é dangshikaq nghut lhê.

"Zoshâng a hku é baùdung myhí ê, gabú nyí aq. Zo hkû nò a no wú shí é myiwe gi, gabú luí, gabú garû nyí aq; hkâsu mù gâ le, haû chamchuyiuyi dut é myiwe myhí gi, làng wó é myiwê htoq má zo wú je myô wó bê nghut ri."

ga kâ tô ri. ☆

<sup>28</sup> Gumang wuê ê, ahkuê, nungmoq gi, Isak su, danggidiq byí tô é zo wuê nghut bê nghut ri. <sup>29</sup> Haû hkûn lé, haû gungsho đông hku lé lo é sù gi, Woi-nyí wum-o đông hku lé lo é sù lé zing-rí ri. Haû eq rajung za, ahkuê le dut nyi ri. <sup>30</sup> Nghut kôlhang, Chyúmdang má hkâsu ga kâ tô ri lúh gâ le, "Haû jùn myhí eq yhangzo yuqzo lé hkat htoq pyám aq; hkâsu mù gâ le, haû jùn myhí é yhangzo yuqzo gi, jùn myhí a nghut su é yhangzo yuqzo eq rahá, silí wunlí lé wó chôm hkam yù râ a nghut." ☆ gâ ri. <sup>31</sup> Haû mù luí, gumang wuê ê, nga-nhúng gi, jùn myhí é yhangzô pé a nghut e za, jùn myhí a nghut su é yhangzô pé ru nghut lhê.

## 5

### *Hkrisduq Mã Ê Luthkyô*

<sup>1</sup> Nga-nhúng luthkyô wó râ matú, Hkrisduq gi, nga-nhúng lé lhoq lhut kat bê nghut ri. Haû mù luí, haû má ru gîng nyi mù, yhumsing gùng lé jun é wòlai hkaû má hkâtaû bainaî nyi kó.

<sup>2</sup> Ngá dang lé matsîng yù keq! Ngò Poluq, nungmoq lé taí kyo kôlé, nungmoq ahpyo-kuq hpyit hkam yù kô é nghut jáng, Hkrisduq gi, nungmoq é matú hai akyû le bò kó râ a nghut. <sup>3</sup> Hau htoq agó, ahpyo-kuq hpyit hkam yu é sù ó yuq lé nghut kôle, ahpyo-kuq hpyit é sù gi, jep é tarâ lunglhang lé châng kut râ lhê nghû, ngò kyô kat lhê. <sup>4</sup> Jep é tarâ châng shikut é đông mara hkyut san byí é hui naû bang, nungmoq gi, Hkrisduq eq gâng lhum to bekô nghut luí, haû Garaî jeju mai le byit gyó byuq bekô nghut ri. <sup>5</sup> Ngamoq kúm gi, myit myoqbyu tô é dingmán hkyô lé, haû Woi-nyí é yanmai lumjîng myit eq gyai yhang lánng nyi é bang nghut lhê. <sup>6</sup> Hkâsu mù gâ le, Hkrisduq Yesuq má gi, ahpyo-kuq hpyit é nghut nghut, ahpyo-kuq a hpyit é nghut nghut, hai akyû a bò nghut ri; chyitdap myit mai htoq lo é lumjîng myit za sheq, akyû bo lhê.

<sup>7</sup> Nungmoq gi, rago din wú bekô\* nghut é wá, haû tengmán hkyô lé a cháng sháng gaq ga, nungmoq lé ó yuq eq hkâm zing pyám kô é lúh? <sup>8</sup> Haû su kut mhoq hpyoq yu é hkyô gi, nungmoq lé ji yù Su chyáng mai htoq lo é a nghut. <sup>9</sup> "Mún ratsuí zo gi, muk long gón lé wó lhoq daû lhê." † gâ é dang joq lhê. <sup>10</sup> Nghut kôlhang, nungmoq gi, gotû hkyô đông a lhom yù kó râ nghut lhê nghû, Hkrisduq má hkyak ngò myit lum nyi lhê. Nungmoq lé lhoq byok byí é sù, ó yuq nghut kôle, yhumsing é mara eq rajung za dam byí é hui zo râ nghut lhê. <sup>11</sup> Gumang wuê ê, ahpyo-kuq hpyit é hkyô lé, ngò rû hko nyi ashí nghut le gi, haû mù luí, zing-rí é lé ngò hui zô nyi râ lúh? Haû su kut é nghut jáng, haû tapzîng eq séng luí, manghkáng joq râ a nghut lo. <sup>12</sup> Nungmoq lé lhoq byok nyi é bang gi, hau htoq chyân luí, yhumsing gùng yhumsîng banshoq hpyit pyám kó sháng gaq nghû, ngò wó myit ri.

<sup>13</sup> Gumang wuê ê, nungmoq gi, luthkyô wó râ matú ji yù huí é bang nghut akô; nghut kôlhang, nungmoq é luthkyô ahkáng lé, yubak gungsho má hkâcháng nhâng kó, chyitdap myit mai kúm gi, rayuq eq rayuq dojaú lhum nyi keq. <sup>14</sup> Hkâsu mù gâ le, "Náng gùng lé náng chyitdap é su, náng é chyangnâm mã é bang lé le chyitdap aq." ☆ gâ é hkunmó má za, jep é tarâ banshoq lo bo to bê nghut lhê. <sup>15</sup> Nungmoq, rayuq eq rayuq ngat lhum myui lhum nyi kô é nghut le gi, rayuq eq rayuq lhoq htên pyâm lhum kó râ nghut é lé, sidiq nyi keq.

### *Woi-nyí Êq Asak Duì Râ Hkyô*

☆ 4:27 Esai 54:1    ☆ 4:30 Apùn 21:10    \* 5:7 Rago din wú bekô gâ é gi, woi-nyí hkyô má kô myhang lai lò bê lé tại nau é nghut lhê.    † 5:9 Shut é đông mhoqshít é hkyô ratsuí gi, muk long gón lé mún eq wó lhoq daû é su, nungmoq banshoq lé wó lhoq ngoq yu pyâm lhê.    ☆ 5:14 Nhong 19:18

<sup>16</sup> Nghut kôlhang, ngò táí kôlé, Woi-nyí shuî û é dông asak dui nyi keq; haú hkûn, nungmoq gi, yubak gungsho ô nau é hkyô cháng kó râ a nghut. <sup>17</sup> Hkâsu mù gâ le, yubak gungsho ô nau hkyô gi, Woi-nyí eq shai lhûm nyi; Woi-nyí gi, yubak gungsho ô nau hkyô eq shai lhûm nyi, dut ri. Haú í lhum gi, gyè dut lhûm ri; haú mù, nungmoq gi, yhumsîng ô nau é dông hkâkut kó. <sup>18</sup> Nghut kôlhang, nungmoq lé Woi-nyí eq hkyô hî é nghut jáng, nungmoq gi, jep é tarâ ô má a nghut lo nghut ri.

<sup>19</sup> Yubak gungsho é muzó gi, de de yhang nghut lhê; haú pé gi, ashop é dông gungsho zùm yap é hkyô, a sân-yúng é hkyô, shut é dông nyi zô lhúm nau é myit, <sup>20</sup> hparà noq hkyô, myoqheq mù kut é hkyô, a jú é hkyô, byoq lhûm é hkyô, manon é hkyô, nhiksoq sup é hkyô, yhumsing wuizat é hkyô, gâng lhum sê é hkyô, hpúng gam é hkyô, <sup>21</sup> ningsû é hkyô, î shuq wut é hkyô, zo yê shuq yê mù achayut kut é hkyô pé eq haú pé su kut é gotû hkyô pé nghut ri; haú su kut nyi yap é bang gi, Garai Gasâng mingdán é silí wunlí lé wó hkam yù râ a nghut nghû, ngò, hí hkûn nungmoq lé táí wú bê eq rajung za, ahkuí lé, nungmoq lé ngò sidiq byi nyi lhê.

<sup>22</sup> Nghut kôlhang, Woi-nyí é ashi gi, chyitdap hkyô, gabú hkyô, nguínón hkyô, myit hîng hkyô, nhik-u nû é hkyô, ge é hkyô, lhumzui hkyô, <sup>23</sup> nûm é hkyô, yhumsing gùng lé wó hkang é hkyô pé nghut ri. Haú hkyô pé lé hkûm zing pyám râ tarâ haí le a joq nghut ri. <sup>24</sup> Hkrisduq Yesuq eq séng bê bang kúm gi, yubak gungsho ô nau hkyô lé le, hau é yut yut ô nau myit eq shirong é hkyô pé lé le, tapzîng má jén sat pyám bekô nghut ri. <sup>25</sup> Nga-nhúng gi, Woi-nyí mai asak dui bê nghut mù, haú Woi-nyí htâng châng nyi sháng. <sup>26</sup> Nga-nhúng gi, akôm gyáng dang táí luí, rayuq eq rayuq jeq ho lhûm é eq manon lhûm é bang, a dut nyi sháng gaq.

## 6

### *Lhunglhang Bang Lé, Ge É Hkyô Kut Byi Râ Hkyô*

<sup>1</sup> Gumang wuî ê, rayuq yuq gi, mara záng kut shut é nghut jáng, Woi-nyí wum-o bò bê bang nungmoq gi, nûm é myit eq haú yuq lé lhoq pun lhoq kyîng yù keq. Nghut kôlhang, nàng gi, gunglau é a hui sháng gaq, sidiq nyi aq. <sup>2</sup> Rayuq eq rayuq é wòlai lé tê byi lhûm nyi keq; haú dông mai, nungmoq gi, Hkrisduq é tarâ lé wó lhoq dik kó râ nghut lhê. <sup>3</sup> Rayuq yuq gi, yhumsing gùng haí le a nghut é wá, ahkyak su ngam é nghut jáng, haú yuq gi, yhumsing gùng lé mhaú pyám é sù nghut ri. <sup>4</sup> Yuq hkangmó gi, yhumsîng nyi yap é hkyô lé taú myit wú keq; haú hkûn, yhumsing gùng lé góbang eq whuí nó a râ e za, yhumsing gùng má aróng wó yù râ nghut lhê. <sup>5</sup> Hkâsu mù gâ le, yuq hkangmó gi, ó le ô wò lé wùn waq ra râ dut lhê.

<sup>6</sup> Haú mungdang lé mhoq yu é sù gi, mhoqshit byi sù lé, ge é zè banshoq gàm byi sháng gaq.

<sup>7</sup> Garai Gasang lé gi, wó rhoî râ a nghut, yhumsing gùng yhumsîng mhauzô é hkâhui nhâng kó; byù gi, hô kat é eq rajung za, shû yù râ nghut lhê. <sup>8</sup> Haú yhumsing é yubak gungsho lé lhoq ngón râ matú hô kat é sù gi, myit haú mai htên byoq é hkyô lé myang hkam yù râ nghut lhê; haú Woi-nyí lé lhoq ngón râ matú hô kat é sù kúm gi, Woi-nyí haú mai ahtum abyuq é asak lé myang hkam yù râ nghut lhê. <sup>9</sup> Nga-nhúng gi, ge é hkyô kut é má nú byuq é bang a dut sháng gaq, hkâsu mù gâ le, haú lé nga-nhúng a tô pyám é nghut jáng, ahkyíng yam-yoq jé é hkûn, nga-nhúng gi, akyû myang hkam yù râ nghut lhê. <sup>10</sup> Haú mù luí, nga-nhúng gi, kut râ ahkyíng wó tô é u lé, byù lunglhang bang lé ge é hkyô kut byi sháng, haú lumjîng hkyô eq sêng é ikun byu pé lé, je riyhang kut byi sháng.

### *Ahpyo-kuq Hpyit É Hkyô A Nghut E Za, Byù Sik Hpân Huí É Hkyô*

<sup>11</sup> Ngò, nungmoq lé, ngá é loq eq hkâ-í kô é laiká cham kê kat byi é lé, wú wú keq!

<sup>12</sup> Ahtoq pyám za ge é hkyô lé kut shit nau é bang gi, ahpyo-kuq hpyit kó sháng gaq ga, nungmoq lé zik shikut nyi é bang nghut akô; yhangmoq haú su kut é hkyô gi, Hkrisduq é tapzing é yanmai zing-ri huí é hkyô lé, koi pyám râ matú za nghut ri. <sup>13</sup> Hkâsu mù gâ

le, haû ahpyo-kuq hpyit é bang lhang jep é tarâ lé a cháng kó nghut ri; nghut kôlhang, yhangmoq gi, nungmoq é gungsho eq séng luî wó gumrông kó sháng gaq ga, nungmoq lé ahpyo-kuq hpyit nhâng nau akô nghut ri. <sup>14</sup>Ngò kúm gi, nga-nhông é Yhumsîng Yesuq Hkrisduq é tapzîng eq séng luî gumrông é mai lai luî, haî má le a gumrông sháng gaq; Yhang é yanmai, mingkan gi, ngá é matú jén sat é hui bê; ngò gi, mingkân é matú jén sat é hui bê nghut lhê. <sup>15</sup>Ahpyo-kuq hpyit é hkyô nghut nghut, a hpyit é nghut nghut, hai akyû a bò; byù sik hpân huî é hkyô za sheq, ahkyak é nghut lhê. <sup>16</sup>Tarâ haû lé châng é lhunglhang bâng é ahtoq má le, haû Garai Gasâng é Israelaq byu pé\* é ahtoq má le, nguingón hkyô eq shogyo nhikmyin hkyô gi, ru joq nyî sháng gaq ô.

<sup>17</sup>Ahkuî mai gi, ó yuq le ngo lé jamjau a lhoq htoq byi lo sháng gaq; hkâsu mù gâ le, ngò gi, Hkrisduq é dui-nhâng zoshâng nghut é saksé damhkô lé wun wún lhê.

<sup>18</sup>Gumang wuî ê, nga-nhông é Yhumsîng Yesuq Hkrisduq é jeju gi, nungmoq é woi-nyî eq ru joq nyî sháng gaq. Amen.

---

\* 6:16 Bun zo shí lhum mâ é Israelaq byu pé gâ é gi, hpúng byû wui banshoq lé taí nau é nghut lhê.

## EHPESU Pê Chyáng Hun Kat é Laiká (Ephesians)

<sup>1</sup> Garai Gasang ô nau é eq rajung za, Hkrisduq Yesuq é lagyo nghut sù, ngò Poluq gi, Ehpesu myuq má nyi é, Hkrisduq Yesuq má lhumzui bang nghut é, haû sân-yúng bang chyáng nguóngón dang shit kyô kat lhê.

<sup>2</sup> Nga-nhúng é Îwa Garai Gasang eq Yhumsîng Yesuq Hkrisduq chyáng mâ é, jeju eq nguóngón hkyô gi, nungmoq chyáng ru joq nyî sháng gaq ô!

### *Hkrisduq Mâ É, Woi-nyí Hkyô Shimân Jeju Pé*

<sup>3</sup> Mauhkûng htoq tsáng myhâng má, woi-nyí hkyô eq sêng é shimân jeju jung hkangmó lé, Hkrisduq má nga-nhúng lé shimân byi sù, nga-nhúng é Yhumsîng Yesuq Hkrisduq é Yhângwa, Garai Gasang gi, hkungsô wó nyî sháng gaq. <sup>4</sup> Hkâsu mù gâ le, nga-nhúng gi, Garai Gasâng é hí má, chyoiyúng é bang eq mara a bo é bang dut râ matú, Garai Gasang gi, mingkan lé a hpân shi mai, Hkrisduq Yesuq má nga-nhúng lé hkyin yu to bê nghut ri. <sup>5</sup> Hau htoq agó, Yhang, nga-nhúng lé chyitdap é yanmai, Yhang myit ngui ô nau é eq rajung za, Yesuq Hkrisduq mai yhangzô pé kut yu râ matú, hí mai nga-nhúng lé masat to bê nghut ri. <sup>6</sup> Haû mù, Yhang chyitdap é Sû\* má, nga-nhúng lé láí láí byi bê nghut é, hpungwup shingkang bo é jeju chyunghuq lé, chôm hkya-on sháng. <sup>7</sup> Garai Gasâng é agùn agó é jeju yanmai, nga-nhúng mara hkyut byî é hui luî, Yhang Zô é sui dông mai, nga-nhúng gi, Yhang má hkyi yù hkyô wó yu é nghut lhê. <sup>8</sup> Jeju haû lé gi, hpaqchyî byéng-yá eq sê gyô é nyan banshoq le kut, Yhang, nga-nhúng lé agùn agó byi bê nghut lhê. <sup>9</sup> Garai Gasang gi, Yhang myit ngui é eq rajung za, Hkrisduq dông mai kut râ matú hen to bê nghut é, Yhâng é zaú tô é hkyô lé, nga-nhúng lé shit bê nghut ri. <sup>10</sup> Sê gyo wuî é hkyô haû gi, lhoq dik râ ahkyíng jé jáng, mauhkûng htoq eq myigùng htoq mâ é lhunglhang lé, Hkrisduq má rading rallhum za kut râ nghut é hkyô nghut lhê.

<sup>11</sup> Hkrisduq má sâng-hi myit myoqbyù bang nghut é nga-nhúng gi, Yhâng é hpungwup shingkang lé hkya-on kungtôn sháng gaq ga, <sup>12</sup> Garai Gasang gi, Yhang myit sôn tô é lhunglhang lé ban kut mù, Yhâng ô nau é dông, hí mai myit hpyit doqdân to bê eq rajung za, nga-nhúng lé le, Hkrisduq má hkyin yu to bê nghut ri. <sup>13</sup> Hau htoq agó, nungmoq le, nungmoq é hkyi yù hkyô é gabú danglù gâ é tengmán mungdang lé wó gyo kô é hkûn, Hkrisduq eq sêng é bang dut bekô nghut ri. Nungmoq gi, Hkrisduq lé lumjîng bekô nghut é yanmai, haû gidq byî tô é Chyoiyúng Woi-nyí dizik htûng tap byî é hui bekô nghut ri. <sup>14</sup> Garai Gasâng é hpungwup shingkang lé hkya-on râ matú, Yhang eq sêng é byu pé hkyi xe yù huî é hkyíng jé shoq, Chyoiyúng Woi-nyí haû gi, nga-nhúng é muizè lé hkyak wó yû râ nghu é masat nghut ri.

### *Poluq Kyûdung Byî É Hkyô*

<sup>15</sup> Haû mù luî, Yhumsîng Yesuq lé nungmoq lumjîng é hkyô eq sân-yúng bang lhunglhang lé nungmoq chyitdap é hkyô lé, ngò wó gyô é yanmai, <sup>16</sup> ngò gi, ngá é kyûdung dang má nungmoq lé myit bun uchyang, anum yhang, nungmoq é matú jeju hkya-ôn nyi lhê. <sup>17</sup> Nga-nhúng é Yhumsîng Yesuq Hkrisduq é Garai Gasang nghut é, hpungwup shingkang bò sù haû Îwa gi, Yhang lé nungmoq je sé râ matú, hpaqchyî byéng-yá wó byî é eq san za wó sé nhang é Woi-nyí, nungmoq lé byi sháng gaq nghû, ngò, Yhâng chyáng dúng nyi lhê. <sup>18</sup> Hau htoq agó, Yhang, nungmoq lé ji yu é myit myoqbyù hkyô, hkasû é nghut é lé le, Yhâng é hpungwup shingkang bo é muizè gi, sân-yúng bang chyáng agùn agó joq nyi é hkyô lé le, Yhâng é kô dik é a-tsam mó gi, lumjîng bang nga-nhúng é matú nghut é lé le, <sup>19</sup> nungmoq wó sé râ matú, nungmoq é myit myoqjí lhoq gyeng

\* 1:6 Yhang chyitdap é Sû gâ é gi, Yesuq lé táí nau é nghut lhê.

byî é hui sháng gaq nghû, ngò kyûdung byî nyi lhê. A-tsam mó haû gi, Garai Gasang, Hkrisduq lé shi é mai lhoq dui toq yû mù, <sup>20</sup> mauhkûng htoq tsáng myhâng má, Yhâng é loqyò hkyam shut zùng nhang é hkûn, chung é wum-o a-tsam mó eq rajung za nghut ri. <sup>21</sup> Hkrisduq gi, uphkan é, ahkáng ayá wó é, a-tsam bo é eq up zô é bang banshoq htoq má le, ahkuí pyat eq htang pyat má myhîng é myîng lhunglhâng é htoq má le, je gyaú é sù nghut lhê. <sup>22</sup> Hau htoq agó, Garai Gasang gi, lhunglháng lé Yhâng é hkyiwa ô má tô to luí, haû noqkuq hpûng é matú, Yhang lé, jung hkangmó é ushuq dut râ dông masat to bê nghut ri. <sup>23</sup> Noqkuq hpúng haû gi, Hkrisduq é gungdu nghut luí, hkyô hkangmó má jung hkangmó lhoq byíng jup é Hkrisduq byíng nyi é nghut ri.

## 2

### *Hkrisduq Má Asak Dui É Hkyô*

<sup>1</sup> Laí ló bê hkûn, nungmoq gi, tarâ lu laí é eq mara kut shut é hkyô pê é yanmai, shi tô é bang dut kô é nghut lhê. <sup>2</sup> Haú hkûn, nungmoq gi, mingkan ngón hkyô pé má lhaq châng nyi kô é htoq agó, haû tarâ a cháng bâng é myit má ahkuí mù zûi nyi é sobyô nghut é, maulat lé up sù htâng châng nyi kô é bang nghut lhê. <sup>3</sup> Nga-nhúng banshoq bang le, yhangmoq su kut nyi laí lo é bang chyat nghut mù, yubak mara byíng é suisho ô nau gadaú hkyô má nyi é bang nghut é htoq agó, gungsho ô nau é hkyô pé eq myit é hkyô pé dông za châng wú é bang nghut lhê. Haû mù, góbang eq rajung za, nga-nhúng gi, Garai Gasang é nhikmo-yo hkyô eq gingdán wú é bang chyat nghut lhê. <sup>4</sup> Nghut kôlhâng, shogyo nhikmyin myit gyaí bo é Garai Gasang gi, nga-nhúng, tarâ lu lai luí shi byuq bê bang dut kôlhâng, Yhâng é chyitdap myit mó eq, nga-nhúng lé chyitdap luí, Hkrisduq eq rahá asak dui nhâng bê nghut ri. <sup>5</sup> Haû mù, nungmoq gi, Garaí jêjû eq za hkyi yu é hui bekô nghut ri. <sup>6</sup> Garai Gasang gi, Hkrisduq Yesuq má, nga-nhúng lé, Yhâng é ge é hkyô shit bê nghut mù, a ung taí é Yhâng é jeju lé, htang pyat má wó shit sháng gaq ga, <sup>7</sup> nga-nhúng lé, Hkrisduq eq rahá lhoq dui toq yû mù, mauhkûng htoq tsáng myhâng má, Yhang eq rahá zùng nhang to bê nghut ri. <sup>8</sup> Hkâsu mù gâ le, nungmoq gi, lumjîng é dông mai Garaí jêjû eq za hkyi yu é hui bekô nghut ri. Haû gi, nungmoq chyáng mâ é a nghut, Garai Gasang jeju chyunghuq za ru nghut lhê. <sup>9</sup> Haû gi, yhumsing é muzó mai wó é a nghut é yanmai, ó yuq le nghutbun râ hkyô a joq. <sup>10</sup> Hkâsu mù gâ le, nga-nhúng gi, Garai Gasang é loqmú pé nghut mù, nga-nhúng zui saí râ matú, hí hí mai, Garai Gasang hen lajâng tô é ge é muzó pé lé zui saí râ matú, Hkrisduq Yesuq má hpan to hui bê bang nghut lhê.

### *Hkrisduq Má Rading Ralhum*

<sup>11</sup> Haû mù luí, nungmoq gi, hí hkûn, hku lé lo é mai yhang tûngbaù pé nghut é hkyô lé le, byu loq eq za gungsho má kut é, "ahpyo-kuq hpyit hkâm bang" gâ é bang mai, nungmoq lé, "ahpyo-kuq hpyit a hkâm bang" ga byi kô é hkyô lé le, myitbun keq. <sup>12</sup> Haû u lé, nungmoq gi, Hkrisduq eq gâng lhûm tô é bang; Israelaq mingbyû a nghut é bang; danggidiq eq sêng é dangshikaq pé má gó ming byù nghut é bang; mingkan htoq má, myoqbyù jowò a joq é eq Garai a wó é bang nghut é lé, myitbun keq. <sup>13</sup> Nungmoq gi, hí hkûn wê gâng nyi é bang nghut kôlhâng, ahkuí kúm, Hkrisduq é sui dông mai Hkrisduq Yesuq má shuí chyâng htep é hui bekô nghut ri.

<sup>14</sup> Hkâsu mù gâ le, Yhânggùng yhang gi, nga-nhúng é nguingón hkyô nghut ri. Yhang gi, gyoro má kyo tô é madin nghut é a nau a wom hkyô lé hpyoq hpyi pyám byi luí, haû í myû\* dut nyi é lé, rahú za dut nhâng bê nghut ri. <sup>15</sup> Haû hkunmó pé eq hkang tô é tarâ pé bo é jep é tarâ lé, Yhâng é gungsho má lhoq htûm pyám bê nghut ri. Haû mù, Yhang ô nau é hkyô gi, haû í myû dut tô é lé, Yhânggùng má yhang, byù sik ra-myû za hpan to râ matú nghut ri; haû dông, simsaq hkyô kut byi bê nghut ri. <sup>16</sup> Yhang gi, a nau a wôm lhûm é hkyô lé, haû tapzîng má lhoq htûm pyám byi mù, haû tapzîng dông mai, byù myu í myu é lé ragùng za kut luí, Garai Gasang eq xoq byi bê nghut ri. <sup>17</sup> Yhang gi, wê gâng nyi

\* 2:14 I myû gâ é gi, Israelaq byu pé eq tûngbaù pé lé gâ lhê.

é bang† nungmoq lé le, chyâng htep nyi é bang‡ lé le, simsaq hkyo é danglù lé hko kyo bê nghut ri. <sup>18</sup> Hkâsu mù gà le, nga-nhúng í myû gi, Yhang đông mai, Woi-nyí ralhùm zâ èq, haù Ìwâ chyáng wàng râ hkyô dong bê nghut ri.

<sup>19</sup> Hau é yanmai, nungmoq gi, tungbaù pé eq byù bíng pé a nghut lô é za, Garaí é byu pé eq rahá, mingbyû wuì eq yhumbyû wuì chyat nghut bekô nghut luí, <sup>20</sup> haù lagyô pé eq myiqhtoí pé, hi tô é apûn awang htoq má xuq tô é bang chyat nghut akô; Hkrisduq Yesuq yhang, haù mâ é ahkyak é htungchyûn luqgok dut bê nghut ri. <sup>21</sup> Yhang má, wahpang lhum gón xoq lhùm bùm é nghut mù, haù Yhumsîng má chyoyúng noqkuq yhùm ralhùm dut lò bê nghut ri. <sup>22</sup> Woi-nyí đông mai, Garaí Gasang nyi râ jang dut râ matú, nungmoq le, Yhang má, wahpang su tsuq é chôm huí nyi bùm bekô nghut ri.

### 3

#### *Poluq, Tungbaù Pê É Tarâ Hkô Sará*

<sup>1</sup> Haù su nghut mù, Hkrisduq Yesuq é hkyô lé, nungmoq tungbaù pê chyáng hko kyô é yanmai, htongbyû dut sù, ngò Poluq gi, nungmoq é matú kyûdung byí lhê.

<sup>2</sup> Nungmoq lé dojàu râ é matú, ngo lé byí tô é Garaí Gasâng jeju ayá shí lé, nungmoq gè gè wó gyô wú bekô râ nghut lhê. <sup>3</sup> Haù gi, hí hkûn, ngò, tot é đông kê tô wú bê eq rajung za, haù záu tô é hkyô lé, shing-rán đông ngo lé sé nhang é nghut ri. <sup>4</sup> Haù hkyô lé, nungmoq nghap wú é hkûn, Hkrisduq eq sêng é záu tô é hkyô, ngò rago sê é lé, nungmoq wó sé kó râ nghut lhê. <sup>5</sup> Haù lé, lai lò bê ipyat pé mâ é byu pé lé a sé nhang é nghut kôlhang, ahkuí gi, Garaí Gasâng é chyoyúng é, lagyô pé eq myiqhtoí pé lé, haù Woi-nyí èq hpông shit bê nghut ri. <sup>6</sup> Záu tô é hkyô haù gi, gabú danglù đông mai, Hkrisduq Yesuq má, Israellaq byu pé eq rahá, tungbaù pé le, hkûng xoq bang wó dut luí, gungdu ralhùm é gungsho showui showang pé chyat dut é eq, danggidiq byi tô é lé wó chôm hkam yu é bang dut é hkyô nghut ri.

<sup>7</sup> Yhâng é hpungwup a-tsam mai, ngo lé byí tô é Garaí Gasâng jeju chyunghuq é yanmai, ngò gi, gabú danglù shí tai râ dui-nhâng zoshâng dut é nghut lhê. <sup>8</sup> Ngò gi, haù Garaí Gasâng é byu pé mâ é tiq dik sù htoq má lháng je tiq sù nghut kôlhang, haù Hkrisduq é a ung htoq tai é wó sùt hkyô lé, tungbaù pê chyáng hko kyo râ matú le, <sup>9</sup> haù lunglhang lé hpan é Garaí Gasang má, lai lò bê ipyat pé má záu tô é, záu tô é hkyô haù lé hkâsu kut tô é lé, yuq hkangmó lé tai sân kyo râ matú le, jeju shí, ngo lé byi bê nghut ri. <sup>10</sup> Haù gi, nga-nhúng é Yhumsîng Hkrisduq Yesuq má lhoq pán bê nghut é, Yhang ahtum abyuq myit hpyit tô bê eq rajung za, <sup>11</sup> haù Garaí Gasâng é hpaqchyí mó góng lé, noqkuq hpúng đông mauhkûng htoq tsáng myhâng mâ é uphkâng bang eq ahkáng ayá wó bang lé, ahkuí sé nhâng râ matú nghut lhê. <sup>12</sup> Nga-nhúng gi, nga-nhúng é Yhumsîng Hkrisduq Yesuq eq rading ralhùm za nghut é yanmai le, Yhang lé lumjîng é yanmai le, Garaí Gasang chyáng, wám é myit eq a gyuq a wàm é myit èq wó htep ê é nghut lhê. <sup>13</sup> Haù mù luí, ngò, nungmoq lé dúng tôngbán nau é gi, nungmoq é matú, ngò wuîhke jamjau hui zô é yanmai, nungmoq i-myt hkâgyui kó; haù gi, nungmoq é matú akyû bò râ hkyô nghut lhê.

#### *Ehpesu Myuq Byu Pé Lé Kyûdung Byí É Hkyô*

<sup>14</sup> Haù pê é yanmai, ngò gi, haù Ìwâ é hí má hkyihput htuaq luí kyûdung é nghut lhê. <sup>15</sup> Mauhkûng eq myigùng htoq mâ é Yhâng é ikun byù lunglhang gi, Yhâng chyáng mai myìng wó yu é chyat nghut lhê. <sup>16</sup> Nungmoq é lumjîng myit mai, nungmoq é i-myt unghkaù má Hkrisduq wó nyi nyi sháng gaq nghû, <sup>17</sup> Yhang é hpungwup shingkang bo é agùn agó wó sùt é mai, nungmoq é i-myt unghkaù mâ é sù lé, Yhâng é Woi-nyí đông, hpungwup a-tsâm èq wum-o lhoq kîng byi râ matú, ngò kyûdung byi lhê. Hau htoq agó, nungmoq gi, chyitdap myit má amyit chin to luí, awang hi to mù, <sup>18</sup> sân-yúng bang eq rahá, hau é apyí, a-tsúng, myhâng, nik, hkâ-í nghut é lé, rago wó sé kôluí, <sup>19</sup> Garaí Gasâng

† 2:17 Wê gâng nyi é bang gà é gi, tungbaù pé lé gà lhê. ‡ 2:17 Chyâng htep nyi é bang gà é gi, Israellaq byu pé lé gà lhê.



é gumjup é hkyô lhunglhâng èq wó lhoq gumjup yù kó sháng gaq nghû, sê é nyan htoq má gyaú é Hkrisduq é chyitdap hkyô lé, nungmoq wó sé râ matú, ngò kyûdung byi lhê.

<sup>20</sup> Ahkuí, nga-nhúng é hkaú má mú zúí nyi é, Yhâng é wum-o a-tsâm é yanmai, nga-nhúng dúng é banshoq eq myit é hkyô lhunglhâng htoq je wó kut byí é Su chyáng, <sup>21</sup> haú noqkuq hpúng é yanmai le, Hkrisduq Yesuq é yanmai le, pyat pyat zaí zaí, ahtum abyuq, hpungwup shingkang rû bo nyi sháng gaq ô! Amen.

## 4

*Hkrisduq É Gungdu Má Rading Ralhum Za*

<sup>1</sup> Haú mù luí, nungmoq gi, nungmoq lé wut yù bê nghut mù, wut yu é hkyô eq gingdán é đông asak duí keq nghû, haú Yhumsing é yanmai, htóng lúng sù ngò Poluq gi, nungmoq lé lhoq pun lhoq kyîng kat lhê. <sup>2</sup> Hkyô hkat hkangmó má i-myt lhoq nyhum é eq i-myt nú-nhâm nyi keq; myit hing é eq chyitdap myit mai rayuq eq rayuq hkam jân lhûm nyi keq. <sup>3</sup> Haú Woi-nyí èq byí é myit hui hkyô lé, nguínón hkyô đông mai châng nyi râ matú, wó dut é í shikut nyi keq. <sup>4</sup> Nungmoq gi, wut yù hui kô é hkûn, myit myoqbyù hkyô rashut za wut yù hui bekô nghut é eq rajung za, gungdu ralhum eq Woi-nyí ralhum za nghut nyi ri. <sup>5</sup> Yhumsîng rayuq za, lumjîng hkyô rahkat za, baptisma ralhum za nghut nyi ri. <sup>6</sup> Banshoq bâng é Íwa nghut sù Garai Gasang le, rayuq za nghut nyi ri; Yhang gi, banshoq bâng é ahtoq má nghut luí, lhunglhâng đông mai mú kut é eq lhunglhâng é ahkaú má lúng nyi sù nghut ri.

<sup>7</sup> Nghut kôlhâng, nga-nhúng yuq hkangmó gi, jeju chyunghuq lé, Hkrisduq mai ké byí é đông wó yu é nghut lhê. <sup>8</sup> Hau é yanmai,

"Yhang gi, myhang é jowò shut doq ló é hkûn, shúm zung é bang lé gi, shuî chûng mù, byu pé lé gi, chyunghuq tsing gâm byí ri."✠

ga, Chyúmdang má taí tô é nghut lhê. <sup>9</sup> Haú "doq ló" gâ é lichyúm gi, myigùng é a-o tsáng má le, Yhang gyó jé bê nghut lhê, gá naú é a nghut lhi? <sup>10</sup> Haú gyó lé é Sù gi, jungkhâng jungmó lé lhoq byíng jup râ matú, mauhkûng banshoq é ahtoq má doq ló é Sù yhang nghut lhê. <sup>11</sup> Yhang gi, ra-am lé, lagyô pé, ra-am lé, myiqhtoí pé, ra-am lé, gabú danglù hko kyo râ bang, ra-am lé, hpúng-up pé eq sará pé kut tsing byí to bê nghut ri. <sup>12</sup> Haú bang gi, Garai Gasâng é byu pé lé wùn waq âng é muzó pê é matú, hen lajâng é bang nghut ri. Haú hkûn sheq, Hkrisduq é gungdu gi, <sup>13</sup> haú lumjîng hkyô eq Garai Gasâng é Yhangzo lé sê é hkyô má, nga-nhúng banshoq bang rading ralhum za wó dut mù, kô ðing bang dut luí, Hkrisduq é gumjup é isâm banshoq lé wó yu é hkûn jé shoq, wó kô jat nyi râ nghut lhê.

<sup>14</sup> Haú mù, nga-nhúng gi, wuibaù pé èq hí shut htâng shut bat myhû é su dut é eq, byu pé é agè ashop é eq haq dâ é mhoq hpýoq hpaqchyí pé eq mhoqshit hkyô laidun hkangmó èq, shí shut hé shut mut tâng é su dut é lé hui zô é zoshâng wui su a nghut lô é za, <sup>15</sup> chyitdap myit mai tengmán é dang lé taí nyi jáng, Hkrisduq nghu é ulhum má hkyô hkangmó kô myhang lò râ nghut lhê. <sup>16</sup> Yhang dông mai, gungdu gón gi, ralhum eq ralhum htuqbâng é gungsho showui showang pé lé xoq byí to bê nghut mù, gungsho showui showang haú pé gi, yhumsing é muzó lé zui saí nyi é nghut jáng, gungdu haú gi, chyitdap myit má, yhânggùng yhang kô lò myhang lò râ nghut lhê.

*Byù Sik Đông Asak Duí Râ Hkyô*

<sup>17</sup> Haú mù luí, haú Yhumsing é ahko ahkáng mai ngò nungmoq lé taí nau é hkyô gi, haú tungbaù pé gi, akyû a bo é lé myit mù, asak duí kô é su, nungmoq gi, hkâkut kó.

<sup>18</sup> Yhangmoq gi, sê gyô é nyan chut byuq bekô nghut é eq yhangmoq myit htan nyi kô é nghut mù, haí le a sé kô é yanmai, Garai Gasang byí é asak eq wê gân byuq bekô nghut ri.

<sup>19</sup> Yhangmoq gi, gyuq hoq hkyô a bo byuq lo kô é yanmai, myoqnoq myit dông a sansêng é hkyô jung hkangmó lé je wó kut xoq nyi shoq ga, yhumsing gùng lé, gungsho ô nau gadaú é hkyô má ap pyám bekô nghut ri.

<sup>20</sup> Nungmoq kúm gi, Hkrisduq é hkyô lé haú dông mhoq yû kô é a nghut. <sup>21</sup> Nungmoq gi, Yesuq chyáng mâ é tengmán hkyô dông, Yhâng é hkyô lé wó gyô wú é eq mhoq yu wú bekô nghut lhê. <sup>22</sup> Haú mù, nungmoq gi, hí hpyang lhê é nungmoq é nyi yap sâmlai nghut é, ô naù gadaú luí, yhumsing gùng yhumsing mhaú pyâm é dông htên byoq ló nyi é nungmoq é byù xau lé tô pyám râ matú mhoq yû bê eq rajung za, <sup>23</sup> nungmoq é i-myt lé asik htaí pyám nhâng keq; <sup>24</sup> hau htoq agó, nungmoq gi, tengmán é eq sêng é dingmán hkyô eq chyoyúng hkyô má, Garai Gasang eq dù shoq hpan to hui bê nghut é byù sik lé, yu wut to keq.

<sup>25</sup> Haú mù, nga-nhúng banshoq bang gi, gungdu ralhú é gungsho showui showang pé chyat nghut é yanmai, nungmoq yuq hkanmó gi, mhaú é hkyô lé tô pyám luí, yhumsing é chyangnâm mâ é sù lé, tengmán é dang taí ra râ nghut lhê. <sup>26</sup> "Nungmoq nhikjum yô é hkûn, mara hkâkut kó." <sup>27</sup> Nat Tsadán lé le, jowò hkâbyi kó. <sup>28</sup> Hkau sù gi, a dum hkau lo sháng gaq; râ nyi é bang lé, rajung jung wó gâm byi shoq, yhumsing é loq èq akyû bo é hkyô pé lé kut nyi luí, muzó zuí shikut ra râ nghut lhê.

<sup>29</sup> Nungmoq é nhut mai agè agaú é dang haí le hkâhtoq nhâng kó; wó gyô é bang akyû bò shoq, yhangmoq râ tô é má cháng luí, haú bang kô lam lò râ dang za taí keq. <sup>30</sup> Haú hkyi yù râ buinyi é matú, dizik dông nungmoq lé tap to byi é Garai Gasang é Chyoyúng Woi-nyí lé hkâlhoq yón kó. <sup>31</sup> Haú myit tot é, nhikjum yô é, nhik-yô é, byoq lhum byoq cheq é eq lumù gansang é, agè agaú é hkyô pé banshoq lé, nungmoq tô pyám keq. <sup>32</sup> Nungmoq gi, rayuq eq rayuq, ge é hkyô eq shogyo nhikmyin é hkyô tûn shit lhum luí, Garai Gasang gi, Hkrisduq má, nungmoq lé mara hkyut byi é su, nungmoq yhangchang le mara hkyut byi lhum nyi keq.

## 5

<sup>1</sup> Haú mù, nungmoq gi, chyitdap dik é zoshâng wui nghut é yanmai, Garai Gasang lé alik yu é bang kut keq. <sup>2</sup> Hkrisduq gi, Yhânggùng lé namngón jung hkungga eq shigu hkungga dông, nga-nhúng é matú Garai Gasang chyáng Yhânggùng yhang ap byi pyám shoq, nga-nhúng lé chyitdap é su, nungmoq le chyitdap myit èq asak dui nyi keq.

<sup>3</sup> Hau htoq agó, ashop é dông gungsho zùm yap é hkyô, a sansêng é hkyô hkanmó eq myoqnoq é hkyô pé lé, nungmoq taí lhang hkâtaí kó; hkâsu mù gâ le, nungmoq gi, Garai Gasang é chyoyúng byu pé nghut lhê. <sup>4</sup> Haú eq rajung za, a taí gíng é, ahoq ahî dang, dangsôm eq hkunchok dông gyâ é dang pé lé a taí é za, jeju hkya-on dang za taí nyi keq. <sup>5</sup> Hkâsu mù gâ le, ashop é dông gungsho zùm yap é hkyô kut shut sù, a sansêng é sù eq hparà noq é sù nghut é myoqnoq sù ó yuq nghut kôlhang, Hkrisduq eq Garai Gasang é mingdán má muizè a wó é hkyô lé, nungmoq sê nyi keq. <sup>6</sup> Ó yuq nghut kôle, dangsôm\* dông mai nungmoq lé a wó mhaú kó sháng gaq; hkâsu mù gâ le, haú hkyô pé é yanmai, Garai Gasang é nhikmo-yo hkyô gi, haú jino a gyo bâng é ahtoq má jé râ nghut lhê. <sup>7</sup> Haú mù luí, haú bâng chyáng hkâbo wang lom kó.

<sup>8</sup> Hkâsu mù gâ le, nungmoq gi, hí hpyang mauchut tuq dut é bang nghut lhê; nghut kôlhang, ahkuí gi, haú Yhumsing má maubó pé nghut bekô nghut ri. <sup>9</sup> Haú Yhumsing ô nau é hkyô haí nghut é lé ho htoq yû mù, maubó é yhangzô pé dông asak dui keq. <sup>10</sup> Hkâsu mù gâ le, haú maubó é ashi gi, ge é hkyô banshoq, dingmán é hkyô eq tengmán hkyô chyat nghut ri. <sup>11</sup> Haú ashi a zuí é mauchut tuq muzó má a bo wang lom é za, yhangmoq é mara lé tûn shit keq. <sup>12</sup> Hkâsu mù gâ le, haú jino a gyo bang haq zaú kut é hkyô lé gi, taí htoq le lhang hoq hpo nghut ri. <sup>13</sup> Nghut kôlhang, junghkang jungmó lé, haú maubó èq tûn shit jáng gi, wó byu-myang é chyat dut râ nghut lhê. <sup>14</sup> Hkâsu mù gâ le, junghkang jungmó lé byu-myàng nhang é gi, maubó nghut ri. Hau é yanmai, "Yhup ngón nyi sù ê, toq aq, haú shi é mai dui toq aq hkoi; haú jáng, Hkrisduq gi, nang lé duqbó byi râ nghut lhê."†

☆ 4:26 Hkya-on 4:4 \* 5:6 Dangsôm gâ é gi, Garai Gasang é nhikmo-yo hkyô a jé râ ga taí é dang nghut lhê. † 5:14 Dang ngho shí gi, hí lhê é noqkuq hpung pé taí gyó lo é dang nghut lhê.

ga luî tai tô é nghut lhê.

<sup>15</sup> Haû mù luî, nungmoq hkâsu kut asak dui é hkyô má gyai sidiq nyi keq; hpaqchyî a bò bang su a nghut é za, hpaqchyî bò bang su kut nyi keq. <sup>16</sup> Buinyî ahkyíng shí pé gi, agè ashop é yanmai, wó é ahko ahkáng banshoq lé ge dik é đông chung jai keq. <sup>17</sup> Hau é yanmai, byù ngok pé a dut é za, haû Yhumsíng ô nau é hkyô gi, haî nghut é lé, sê gyô yu nyi keq. <sup>18</sup> Haû achag achyut é yubak hkyô lhoq htoq é î lé hkâshuq wut kó; Woi-nyí lé kúm byíng nhang nyi keq. <sup>19</sup> Nungmoq gi, hkya-on kungtôn dang đông le, hkya-on mahkôn dang đông le, woi-nyí eq sêng é mahkôn đông le, rayuq eq rayuq dáng nyo lhum luî, nungmoq é i-myt unghkaû mai, haû Yhumsíng lé mahkôn hkôn mù, lhoq ngón nyi keq. <sup>20</sup> Nga-nhúng é Yhumsíng Yesuq Hkrisduq é myíng lé lang luî, jung hkangmó é matú, haû Íwa Garai Gasang lé, hkâ-nhám le jeju hkya-ôn nyi keq.

<sup>21</sup> Hkrisduq lé hkungga hpautap é myit èq, rayuq eq rayuq hpautap lhùm nyi keq.

#### *Myi Eq Làng*

<sup>22</sup> Íkun myhî pé ê, haû Yhumsíng uphkan é đông châng é su, nungmoq é ikun hpô pé uphkan é đông châng nyi keq. <sup>23</sup> Hkâsu mù gà le, Hkrisduq gi, haû noqkuq hpúng é ulhum nghut é su, haû ikun hpó gi, ikun myhî é ulhum nghut nyi ri; Hkrisduq gi, haû Yhâng gungdu nghut é noqkuq hpúng lé hkyi yù Sû nghut ri. <sup>24</sup> Haû noqkuq hpúng gi, Hkrisduq uphkan é đông châng é su, ikun myhî pé le, hkyô hkat hkangmó má, yhangmoq é ikun hpô pé uphkan é đông châng nyi râ lhê.

<sup>25</sup> Íkun hpô pé ê, Hkrisduq gi, haû noqkuq hpúng lé chyitdap luî, hau é matú Yhânggùng lé Yhang ap pyâm é su, nungmoq é ikun myhî pé lé chyitdap nyi keq. <sup>26</sup> Yhang haû su kut é gi, haû noqkuq hpúng lé, mungdang đông wuì má chí pyám luî, lhoq sân-yúng yû râ eq, <sup>27</sup> haû noqkuq hpúng gi, agè agáu é eq a-ká akông é hkyô haî le a bo é za, mara hûn râ hkyô a bo é eq chyoiyúng é, hpungwup shingkang bo é noqkuq hpúng đông, Yhânggùng lé wó ap byi râ matú nghut lhê. <sup>28</sup> Haû eq rajung za, ikun hpô pé gi, yhangmoq é ikun myhî pé lé, yhumsing gungdu lé su chyitdap râ dut lhê. Yhumsing é ikun myhí lé chyitdap é sù gi, yhumsing gùng lé le, chyitdap é sù nghut bê. <sup>29</sup> Ó yuq le, yhumsing gùng lé a chyitdap a kut é za, Hkrisduq gi, haû noqkuq hpúng lé kut byi nyi é su, yhumsing gùng lé byi tso byi huq luî, rago wú zúng nyi é nghut lhê. <sup>30</sup> Hkâsu mù gà le, nga-nhúng gi, Yhâng é gungdû é gungsho showui showang pé chyat nghut lhê. <sup>31</sup> Haû mù, "Hau é yanmai, yuqgè gi, înu îwa eq gang luî, yhangmyi eq zùm-yap mù, yhangnhik í yuq gi, gungsho ralthum za dut kó râ nghut lhê." <sup>32</sup> Haû hkyô gi, gyai yhang zaú tô é hkyô nghut ri. Nghut kôlhang, ngò gi, haû Hkrisduq é hkyô eq noqkuq hpúng é hkyô lé tai nyi é nghut lhê. <sup>33</sup> Haû mù, nungmoq yuq hkangmó gi, yhumsing gùng lé chyitdap é su, yhumsing é ikun myhí lé le chyitdap râ dut lhê; haû ikun myhí le, yhâng é ikun hpó lé hkungga râ dut lhê.

## 6

#### *Zo Wuî Eq Mó Wui É Hkyô*

<sup>1</sup> Zoshâng wuì ê, haû Yhumsíng má, nungmoq é mó wui é jìno gyo keq; hkâsu mù gà le, haû gi, kut gíng é hkyô nghut ri. <sup>2</sup> "Náng é înu îwa lé hkungga aq. <sup>3</sup> Haû jáng, náng, nyi ngón yuqyò mù, myidàm htoq má náng é asak chyungxe hing nyi râ nghut lhê." <sup>4</sup> gà é dang gi, danggididq lom é sâng-hî lhum hkunmó nghut ri.

<sup>4</sup> Íwa pé ê, nungmoq é zo wuî lé nhikjum a lhoq yô é za, haû Yhumsing é mhoq kyo hkyô eq mhoqshit lhoq pun hkyô đông yhangmoq lé baú kô nyi keq.

#### *Jùn Pé Eq Jusing Pé É Hkyô*

<sup>5</sup> Jùn pé ê, nungmoq gi, Hkrisduq é jìno gyô é su, gyuq hkunggâ é eq lhumzuî é myit mai, nungmoq é myidàm htoq mâ é jusing pé é jìno gyo keq. <sup>6</sup> Nungmoq gi, yhangmoq é hí má za, myoqdong ho é đông kut é a nghut é za, Hkrisduq é jùn pé su, Garai Gasang

ô nau é hkyô lé, nungmoq é i-myt unghkaû mai châng kut nyi keq. <sup>7</sup> Byù lé za dojaú é dông a nghut é za, haû Yhumsîng lé dojaú nyi é dông le, shirông myit eq dojaú nyî keq. <sup>8</sup> Hkâsu mù gâ le, jùn nghut nghut, luthkyô wó sù nghut nghut, ge é hkyô kut nyi é nghut jáng, haû Yhumsîng gi, yuq hkangmó lé shigyaú râ nghut é lé, nungmoq sê nyi lhê.

<sup>9</sup> Junsîng pé ê, nungmoq le, nungmoq é jùn pé lé haû eq rajung za kut byî nyi keq. Yhangmoq lé hkâkyuq zo kó; nungmoq sê é eq rajung za, yhangmoq eq nungmoq é Yhumsîng hpó gi, mauhkûng htoq má nyi é nghut luî, Yhang gi, myoqdong hkyin é hkyô a bo é sù nghut lhê.

### *Garai Gasâng É Gyè Hking*

<sup>10</sup> Ló htâng má, taí nau é hkyô gi, haû Yhumsîng eq Yhâng é hpungwup a-tsam mó má wum-o bo nyi keq. <sup>11</sup> Haû nat Tsadán wá dâ é hpaqchyî pé lé, nungmoq wó he-ngik pyám kó sháng gaq, haû Garai Gasâng é gyè hking banshoq lé wut to keq. <sup>12</sup> Hkâsu mù gâ le, nga-nhúng gi, gungsho eq sui lé htúq htîng é bang a nghut é za, haû uphkâng bang, ahkáng ayá wó bang, mauchut tuq dut é mingkan shi é a-tsam pé eq mauhkûng htoq tsáng myhâng mâ é agè ashop é byò eq sêng é wum-o pé lé, htúq htîng é bang ru nghut lhê. <sup>13</sup> Haû mù luî, Garai Gasâng é gyè hking banshoq lé wut to keq; haû hkûn sheq, nungmoq gi, agè ashop hkyô jé é buinyî má, yhumsîng jowò má wó yap gîng to mù, hkyô hkat hkangmó lé ban kut jáng, wó yap gîng tîng nyi kó râ nghut lhê. <sup>14</sup> Haû mù, nungmoq é hpyidum má tengmán hkyô hpyihit hit mù, dingmán hkyô wànggò-long lé gò luî, <sup>15</sup> nungmoq é hkyî má gi, haû simsaq hkyô byî é gabú danglù hkô râ rì rì kut to mù, gîng gîng yap nyi keq. <sup>16</sup> Hau htoq agó, haû agè ashop su é myiduoq é myoshi lhunglháng lé wó sat ung pyám râ matú, lumjîng hkyô nghu é golong lé chung to keq. <sup>17</sup> Hkyi yù hkyô shamtoq muq lé tsûng to luî, Garai Gasâng é mungdang nghut é, haû Woi-nyî é shâm lé wun chûng keq. <sup>18</sup> Ahkyíng hkangmó má, kyûdung dang eq dîng tôngbán é dang ajung jûng eq, haû Woi-nyî má kyûdung nyi luî, machya nyi uchyang, sân-yúng bang banshoq é matú, hkâ-nhám le, xoq xoq kyûdung byî nyi keq.

<sup>19</sup> Haû gabú danglù é yanmai, shamtoq-tui hut huî é lagyo rayuq ngò nghut nyi kôlhang, haû gabú danglù nghut é zaú tô é hkyô lé, a gyuq a wàm wó taí kyo luî, <sup>20</sup> ngò taí râ dut é lé, a gyuq a wàm wó taí sân kyo shoq, ngá nhut hpóng hkangmó, ngò taí râ mungdang pé lé byi sháng gaq, ngá é matú le, kyû bo dung byî nyi keq.

### *Shi-kyám Dang*

<sup>21</sup> Haû Yhumsîng má, chyitdap é gumang eq lhumzuî é dui-nhâng zoshâng nghut sù, Tuhkiku gi, nungmoq lé jung hkangmó taí kyo râ nghut luî, ngò hkâsu nghut nyi é hkyô eq haî kut nyi é hkyô lé, nungmoq wó sé kó râ nghut lhê. <sup>22</sup> Ngamoq hkâsu nghut nyi é hkyô lé, nungmoq wó sé râ eq, yhang, nungmoq lé myit wum wó byi râ matú za myit myoqbyù luî, yhang lé, ngò, nungmoq chyáng nhang kat é nghut lhê.

<sup>23</sup> Íwa Garai Gasang eq Yhumsîng Yesuq Hkrisduq chyáng mâ é lumjîng hkyô má bo é chyitdap myit eq nguínón hkyô gi, haû gumang wui chyáng ru joq nyî sháng gaq ô!  
<sup>24</sup> A dat htûm é chyitdap myit mai, nga-nhûng é Yhumsîng Yesuq Hkrisduq lé chyitdap é lhunglhâng bang chyáng, Garaî jeju gi, ru joq nyî sháng gaq ô!

## HPILIPÍ Pê Chyáng Hun Kat é Laiká (Philippians)

<sup>1</sup> Hkrisduq Yesuq é jùn nhik, Poluq eq Timohti gi, Hpilipi wà mó má nyi é, Yesuq Hkrisduq má sân-yúng bang lhungháng eq, hpúng-up, hpungte pé lé, dang kyô kat lhê.

<sup>2</sup> Nga-nhông é Îwa Garai Gasang eq Yhumsîng Yesuq Hkrisduq chyáng mâ é jeju eq nguôngón hkyô gi, nungmoq chyáng ru joq nyî sháng gaq ô.

### *Jeju Hkya-ôn É Hkyô*

<sup>3</sup> Ngò gi, nungmoq lé myit bûn kat hkanqmó, ngá é Garai Gasang lé jeju hkya-ôn nyi lhê. <sup>4</sup> Ngò gi, kyûdung hkanqmó, hkâ-nhám le nungmoq banshoq bâng é matú gabú myit èq dung byî nyi lhê. <sup>5</sup> Hkâsu mù gâ le, nungmoq gi, sânghî nyî mai ahkuî jé shoq, gabú danglù má ngò eq chôm zùm yap nyi é yanmai nghut lhê. <sup>6</sup> Haû nungmoq má ge é muzó kut hi é sù Garai Gasang gi, Yesuq Hkrisduq é buinyî jé shoq muzó haû lé lhoq pán râ nghut lhê nghû, ngò hkyak myit lum tô lhê.

<sup>7</sup> Nungmoq banshoq bang gi, ngá é i-myt má bo to bê bang nghut é yanmai, nungmoq banshoq bang eq séng luî, ngò shí dông myit nyi é gi, gíng lhê; hkâsu mù gâ le, ngò kyum hut huî tô é u lé le, haû gabú danglù hkyô lé taî hûng luî, lhoq gîng é u lé le, nungmoq gi, ngò eq rahá Garai Gasâng jeju chôm hkâm yu é bang nghut lhê. <sup>8</sup> Hkrisduq Yesuq é chyitdap myit dông, nungmoq banshoq bang lé, ngò hkâ-í myit chyit nyi é hkyô lé, Garai Gasang gi, ngá é saksé nghut lhê.

<sup>9</sup> Hau htoq agó, nungmoq gi, je ge é hkyô lé dat gam hkoq mù, Hkrisduq é buinyî má sanséng luî mara a bo é za, <sup>10</sup> Garai Gasâng é hpungwup shingkang eq hkya-on kungtôn hkyo é matú, Yesuq Hkrisduq é yanmai lo é dingmán hkyo é ashi wó byíng nyî sháng gaq nghû le; <sup>11</sup> nungmoq é chyitdap myit gi, tengmán é hpaqchyî eq wó sê é nyan banshoq má je riyhang kô jat lò sháng gaq nghû le, ngò kyûdung nyi lhê.

### *Dui Nyi Le Gi, Hkrisduq É Matú*

<sup>12</sup> Gumang wuî ê, ahkuî ngò nungmoq lé sé nhâng nau é hkyô gi, ngò má haî dut laî lò bê hkyô pé gi, gè gè yhang gabú danglù rîng jat lò râ matú dut lò bê nghut ri. <sup>13</sup> Hau é yanmai, haû hkohkâm-wâng zúng é lhunghâng bang eq gotû banshoq bâng é hí má, Hkrisduq é yanmai ngò kyum hut huî é hkyô, de de dut htoq bê nghut ri. <sup>14</sup> Hau htoq agó, ngò htóng lúng é yanmai, haû Yhumsîng Yesuq má gumang wuî nghut é myo mi-myo gi, myit wum wó yû kômù, Garai Gasâng é mungdang lé, je riyhang a gyuq a kyum wám hko kyo bekô nghut ri.

<sup>15</sup> Gè gè yhang byù ra-am gi, Hkrisduq é hkyô lé manon é myit eq lú lhum bat zik é myit mai hko kyô nyi bum akô. Nghut kôlhang, byù ra-am gi, ge é myit mai hko kyô bum akô nghut ri. <sup>16</sup> Ge é myit mai hko é bang gi, gabú danglù lé hûng râ matú ngo lé hkyin é hkyô lé, yhangmoq sé kômù, chyitdap myit èq hko kyô é bang nghut akô. <sup>17</sup> Haû góbang chyaú gi, sanséng é i-myt eq a nghut é za, ngò kyum wut é hkyô má wuîhke jamjau jat byi râ matú, myit nyi bùm kô é nghut mù luî, Hkrisduq é hkyô lé yhumsîng é wuîzat é dông za, hko taî nyi bum akô nghut ri. <sup>18</sup> Nghut kôlhang, haû gi, haî râ ri lhú? Yhumsîng wuîzat é dông hko é nghut nghut, tengmán é dông hko é nghut nghut, hkyô hkat hkanqmó má Hkrisduq é hkyô lé hko pyo kat é nghut mù luî, ngò gi, hau é yanmai, gabú nyi lhê.

Gè gè yhang, ru gabú nyi shirâ nghut lhê. <sup>19</sup> Hkâsu mù gâ le, nungmoq kyûdung byî é eq Yesuq Hkrisduq é Woi-nyî garúm é yanmai, ngò má dut laî lò bê hkyô gi, ngò wó luthkyô dut râ nghut é lé ngò sê lhê. <sup>20</sup> Ngò myit láng tô é eq myit myoqbyù tô é má, ngò gi, hoq nó haî a râ é za, hí hkun lhê su, ahkuî le, dui nyi kôlhang, shi byuq kôlhang, gyuq kyum myit a bo é hkyô lé wó yû mù luî, Hkrisduq gi, ngá gûng má hkya-on waq toq é hui râ nghut lhê. <sup>21</sup> Hkâsu mù gâ le, ngò, asak dui nyi le gi, Hkrisduq é matú, shî jáng gi, ngá

e amyat nghut ri. <sup>22</sup> Nghut kôlhang, ngò gi, gungsho má rû dui nyi mù, ngò kut é muzó má ashi zuí lo é nghut le gi, hká lhum lé sheq hkyin yu le gè râ lhu? <sup>23</sup> Ngò gi, hkyô í hkat gyoro má hká hpyang le a hkap dut tô ri; shi ló luí Hkrisduq eq rahá nyi râ lé gi, ngò ô nau ri, hkâsu mù gâ le, haû gi, je ge é hkyô nghut ri. <sup>24</sup> Nghut kôlhang, ngò gungsho má dui nyi le gi, nungmoq é matú akyû je bò râ nghut lhê. <sup>25</sup> Haû mù, ngò gi, shí hkyô lé hkyak myit lum to luí, lumjîng hkyô má nungmoq kô jat lo é eq gabú nyi râ matú, nyi gyó luí, nungmoq lhunglhâng bang eq nyi nyi râ hkyô lé, ngò sê lhê. <sup>26</sup> Haû mù luí, ngò nungmoq chyáng dum jé lé é hkûn, ngá é yanmai, Hkrisduq Yesuq má nungmoq é gabú hkyô gi, je riyhang jat lò râ nghut lhê.

<sup>27</sup> Haû wà dut kôlhang, nungmoq gi, Hkrisduq é gabú danglù eq gingdán é dông nyiyap keq. Haû jáng, ngò, nungmoq chyáng jé mù huí lhûm é hkûn nghut nghut, we gang lhum tô é hkûn nghut nghut, nungmoq gi, woi-nyí ralhûm má za yap gîng to mù, haû gabú danglù lé lumjîng hkyô má, i-myt rahkat zâ èq shikut nyi kô é hkyô lé le; <sup>28</sup> nungmoq gi, hká hkyô má nghut kôlhang, gyè pê èq kyuq zô é lé a gyuq lò kô é hkyô lé le, ngò sé râ nghut lhê. Haû gi, yhangmoq é matú htên byoq hui râ kumlhá dut lò bê nghut lhê; nghut kôlhang, nungmoq gi, hkyi yù hui râ nghut lhê. Haû gi, Garai Gasang kut é nghut lhê. <sup>29</sup> Hkâsu mù gâ le, Hkrisduq má wó lumjîng râ é jeju za a nghut, Yhang é matú wuîhke jamjau hui râ jeju le, nungmoq hkam yù bekô nghut ri. <sup>30</sup> Haû gi, hí hpyang nungmoq ngò má myang wú é eq, ahkuí nungmoq ngá é hkyô lé wó gyô wú é, ngò hui zô é jamjau hkyô eq rajung za nghut nyi ri.

## 2

### *Yesuq, Myit Lhoq Nyhum É Hkyô*

<sup>1</sup> Hkrisduq eq rading ralhûm za nghut nyi é yanmai, myit wum byî é hkyô, Yhâng é chyitdap myit mai nhik tîng é hkyô, Woi-nyí eq zùm yap é hkyô, nú-nhâm é myit eq shogyo nhikmyîn é hkyô rajung jung lé, nungmoq wó yu é nghut le gi, <sup>2</sup> nungmoq gi, haû i-myt huí é hkyô rahkat za, chyitdap myit rajung za, myit nhiklhûm eq myit é hkyô má ralhûm za kut nyi é dông, ngá é gabú hkyô lé, byíng jup nhâng keq. <sup>3</sup> Yhumsing é wuizat é dông le, akôm gyáng pyâm é dông le, haí le a kut é za, myit lhoq nyhum nyi mù, góbang gi, nungmoq htoq má je gyaú lhê nghû myit yu nyi keq. <sup>4</sup> Nungmoq yuq hkgangmó gi, yhumsîng eq sêng é lé za a nghut, góbang eq sêng é lé le, myit byi râ lhê.

<sup>5</sup> Hkrisduq Yesuq má bo é myit yhang, nungmoq chyáng bò râ dut lhê.

<sup>6</sup> Yhang gi, Garai Gasang su roq za nghut nyi kôlhang, Garai Gasang eq rawuí za nghut é hkyô lé lú zing nyi râ matú a myit é za,

<sup>7</sup> Yhânggùng lé lhoq gôm pyám luí, dui-nhâng zôshang é gunghkyâng lé yu chûng mù, xângzo byù gùng roq lé dut bê nghut ri.

<sup>8</sup> Xângzo byù rayuq dông nghut nyi é hkûn, Yhânggùng lé Yhang lhoq nyhum pyám luí, haû tapzîng htoq má lháng tap sat pyâm é hui shoq jîno gyô ri.

<sup>9</sup> Haû mù luí, Garai Gasang gi, Yesuq é myîng lé mauhkûng htoq mâ é hkyihput, myidàm htoq mâ é hkyihput eq momîng mâ é hkyihput hkgangmó htoq pái luí,

<sup>10</sup> haû Îwa Garai Gasâng é hpungwup shîngkâng é matú, Yesuq Hkrisduq gi, Yhumsîng nghut lhê nghû,

nhut shô hkgangmó yín yû sháng gaq ga,

<sup>11</sup> myhang htâng é jowò má Yhang lé lhoq toq tô é eq, myîng lhunglhâng é htoq má gyaú é myîng haû,

Yhang lé byî to bê nghut ri.

### *Kyî Pé Su Duqbó Nyî Râ Hkyô*

<sup>12</sup> Haû mù luí, ngò chyitdap é luzúm wuî ê, nungmoq gi, hkâ-nhâm le jîno gyô nyi é eq rajung za, ngò, nungmoq eq rahá nyi é u lé su za a nghut, ngò eq wê gâng tô é hkûn le, nungmoq hkyi yù hui bê hkyô lé, gyai gyuq hkgunggâ é myit eq je riyhang lhoq htoq nyi

keq. <sup>13</sup> Hkâsu mù gâ le, Garai Gasang gi, Yhang ô nau é hkyô lé, kut naû râ myit èq wó kut râ hkyô lé nungmoq má lhoq htoq byî nyi é sù nghut lhê.

<sup>14</sup> Haî kut kôlhang, taí put lhûm é dông, haû a nghut jáng, dang jet jet lhûm é dông hkâkut kó. <sup>15</sup> Haû jáng sheq, myit goí é, agè ashop é pyat hkaû má, nungmoq gi, mara a bo é, sân-yúng é, shut hkyô a bo é, Garai Gasâng é yhangzô pé dut kó râ nghut lhê. <sup>16</sup> Hau htoq agó, nungmoq gi, asak mungdang lé chung htoq uchyang, mauhkûng mâ é kyî pé su, yhangmoq chyáng wó duqbó nyî kó râ nghut lhê. Haû hkûn, ngò gi, ajè a din pyâm é, a nghut jáng, muzó lé akôm a zui pyâm é yanmai, Hkrisduq é buinyi má gumrông jowò wó berâ nghut lhê. <sup>17</sup> Nghut kôlhang, ngò gi, shuq jung hkungga\* ralhûm su, nungmoq é lumjîng myit mai nhongjaú byî é shigu hkungga ahtoq má hut gyûn pyâm é hui le lháng, gabú luî, nungmoq banshoq bang eq rahá chôm gabú nyi lhê. <sup>18</sup> Haû eq rajung za, nungmoq le gabú luî, ngò eq rahá chôm gabú nyi râ dut lhê.

#### *Timohti Eq Epahprodi Njik Lé Nhang Kat Râ Gâ É Hkyô*

<sup>19</sup> Ngò gi, nungmoq chyáng Timohti lé hân za wó nhang kat râ lé, haû Yhumsîng Yesuq má myit myoqbyu nyi lhê; haû hkûn sheq, nungmoq eq sêng é ludang lé ngò wó sé jáng, ngò myit ngón râ nghut lhê. <sup>20</sup> Nungmoq é hkyô lé, yhang su hkyak za ge myit chiq byî é byû gotû rayuq le ngò a wó. <sup>21</sup> Hkâsu mù gâ le, yuq du jup gi, Yesuq Hkrisduq eq sêng é hkyô lé a nghut é za, ó le ó eq sêng é hkyô lé za ho nyi bum akô nghut ri. <sup>22</sup> Yhang kúm gi, zo rayuq mai îwa lé hturbâng é su, haû gabú danglù hkyô má ngò eq rahá dojaú é yanmai, yhang lumluq é hkyô tûn shit é lé, nungmoq sê nyi lhê. <sup>23</sup> Haû mù luî, ngò gi, ngò má hkâsu dut râ lé sê é hkûn yhang, yhang lé nhang kat râ matú ngò myit myoqbyu nyi lhê. <sup>24</sup> Hau htoq agó, hkâ-myháng a myáng má, ngò yhang le nungmoq chyáng wó jé nhâng râ nghut lhê nghû, haû Yhumsîng má hkyak lum nyi lhê.

<sup>25</sup> Nghut kôlhang, ngò gi, ngá é gumang hpó le nghut mù, mù zui luzúm eq sarhé luzúm nghut é, ngò râ é hkyô má wú gon byi râ matú nungmoq nhang kat é, nungmoq é gunglik le nghut é sù, Epahprodi lé nungmoq chyáng dum nhang taû kat byi râ lhê nghû, ngò myit hpyit to bê nghut lhê. <sup>26</sup> Hkâsu mù gâ le, yhang gi, nungmoq lhunglhang bang lé myàng nau nyi é za a nghut, yhang no é hkyô lé nungmoq wó gyo bekô nghut é yanmai, gyai yhang myit myo myit chiq nyi ri. <sup>27</sup> Gè gè yhang, yhang gi, aluq shoî shî shoq no pyâm é nghut lhê. Nghut kôlhang, Garai Gasang gi, yhang lé shogyo nhikmyîn yu ri; yhang lé baú a nghut, ngò yón htoq yón a dut nyi râ matú, ngo lé le shogyo nhikmyîn yu ri. <sup>28</sup> Haû mù luî, yhang lé nungmoq lhom dum myàng jáng, nungmoq myang gabú râ matú le, ngò yón é hkyô yom ló byuq râ matú le, yhang lé ngò hân hân nhang kat byí nau ri. <sup>29</sup> Nungmoq gi, gyai yhang gabú é myit èq, haû Yhumsîng má yhang lé lhom hkûlum yû mù, yhang su dut é bang lé hkungga keq. <sup>30</sup> Hkâsu mù gâ le, yhang gi, ngo lé nungmoq a wó garúm é hkyô lé garúm râ matú, yhang é asak lé lháng a ha loshoq kut mù, haû Hkrisduq é muzó é yanmai, aluq shoî shoî shi é hui zô ri.

### 3

#### *Gungsho Má Lumhkaû Râ Hkyô A Joq*

<sup>1</sup> Hau htoq agó, ngá é gumang wuî è, haû Yhumsîng má gabú nyî keq! Rajung zâ é hkyô lé, nungmoq é matú dum puq ká byi râ gi, ngò má wuî é hkyô haî a joq, nungmoq é matú akyû dut râ matú sheq ru nghut lhê.

<sup>2</sup> Haû, hkuî pé lé le; agè ashop é muzó jizó kut é bang lé le; gungsho yâm é bang lé le; sidiq nyî keq.\* <sup>3</sup> Hkâsu mù gâ le, Garai Gasâng é Woi-nyí èq noqkuq é bang, Hkrisduq Yesuq má gabú gumrong nyi é bang, gungsho má a lumhkaû é bang, nga-nhúng gi,

\* 2:17 Shuq jung hkungga gâ é gi, tsibiyiq wing ragóm lé myî htoq má hut pyâm é dông Garai lé gyuq hkunggâ é hkyô lé tûn shit é nghut lhê. Bun zo shî má shî hkâm é hkyô lé taí nau é nghut lhê. \* 3:2 Bun zo shi lhûm gi, ahpyo-kuq hpyit hkyô má noqzuq nyi é bang lé taí nau é nghut lhê.

ahpyo-kuq hpyit hkam yu é bang akying† nghut lhê. <sup>4</sup>Ngò kúm gi, gungsho má lumhkaû râ hkyô wó ang sù nghut lhê.

Góbang rayuq yuq, haû gungsho má lumhkaû râ hkyô wó âng lhê ga myit é nghut le gi, ngò gi, je riyhang wó sù nghut lhê. <sup>5</sup>Ngò gi, hkû lé é htâng shit nyí nghû râ nyí má ahpyo-kuq hpyit bê sù; Israelaq amyû mâ é, Ben-yamyin é awut ashín nghut sù, Hebre byù mâ é Hebre rayuq nghut lhê; jep é tarâ dông ga jang, ngò gi, Hparishe rayuq nghut lhê; <sup>6</sup>shirong é hkyô eq séng luí ga jang, ngò gi, haû noqkuq hpúng lé zing-rî wú bê nghut lhê; jep é tarâ mâ é dingmán hkyô eq séng luí ga jang, ngò gi, shut é hkyô a bo wú sù nghut lhê.

<sup>7</sup>Nghut kôlhang, ngá é amyat nghu é pé lhunglhang gi, ahkuí, Hkrisduq é yanmai sùm byuq é chyat nghut bê nghû myit yù bê nghut lhê. <sup>8</sup>Hau htoq agó, ngò gi, ngá é Yhumsîng Hkrisduq Yesuq lé wó sê é ko dik é jeju lé sôn kat jáng, jung hkanmó lé buzaq dông myit yù bê. Hkâsu mù gâ le, lhunglhang lé ngò tô pyâm é gi, Yhang é yanmai nghut lhê. <sup>9</sup>Ngò gi, Hkrisduq lé wó yû râ eq, Yhang eq rahá wó nghut nyî râ matú, haû jung hkanmó lé buzaq nghû myit yu pyám bê. Garai Gasâng chyáng mai lo é dingmán hkyô lé ngò jep é tarâ dông wó ho yu é a nghut, Hkrisduq lé lumjîng é yanmai za wó yu é ru nghut lhê; haû gi, lumjîng myit mai wó é nghut lhê. <sup>10</sup>Ngò gi, Hkrisduq lé le, Yhang dui toq hkyô é hpungwup a-tsam lé le, Yhang hpuzô é hkyô má wó zùm yap râ lé le, Yhang shî hkâm é hkyô lé wó cháng râ lé le, sé nau ri. <sup>11</sup>Haû jáng gi, ngò le, shi byuq bê mai dum dui toq é hkyô lé wó myoqbyù râ nghut lhê.

#### *Myit Myoqbyu Tô É Jowò Shut Din Nyî Râ Hkyô*

<sup>12</sup>Ngò gi, haû pé banshoq lé wó gû bê le a nghû naù, ngò gumjup gù bê le a nghû naù. Nghut kôlhang, Hkrisduq Yesuq gi, ngo lé lhom yù bê eq rajung za, ngò gi, haû lé wó lhom yù sháng gaq nghû, châng hkat nyi lhê. <sup>13</sup>Gumang wuì ê, ngò yhang ngò gi, haû lé wó hap yù bê nghû a myit; nghut kôlhang, ngò kut é muzó ralhum gi, nunghtáng mâ é lé tô-myhî pyám mù, myoq hí mâ é lé wó yû shoq nghû shikut luí, <sup>14</sup>Hkrisduq Yesuq má Garai Gasâng eq ngo lé ahtoq shut ji yu é chyunghuq lé wó yû râ matú, myoqbyu tô é jowò shut châng hkat din nyi lhê.

<sup>15</sup>Gumjup bê bang nga-nhúng lhunglhang gi, haû sù é myit bò râ lhê. Rajung jung má nungmoq myit é hkyô shai nyî kô é nghut le gi, haû lé le, Garai Gasang gi, nungmoq lé san za tân shit râ nghut lhê. <sup>16</sup>Hká dông nghut kôlhang, nga-nhúng gi, ahkuí jé shoq châng nyi bê hkyô eq rajung za châng kut nyî sháng.

<sup>17</sup>Gumang wuì ê, nungmoq gi, ngò kut é dông chôm kut nyî keq, ngamoq mai nungmoq lé kut shit é alik eq rajung za châng é bang lé wú yû keq. <sup>18</sup>Hkâsu mù gâ le, hí hkûn ngò, nungmoq lé anum num taí kyô wú luí, ahkuí lhang, ngaù byî eq dum taí kyô é eq rajung za, Hkrisduq é tapzîng lé gyè kut é bang myo myo nyi bum akô nghut ri. <sup>19</sup>Yhangmoq é jhítum gi, htên byoq hkyô nghut ri; yhangmoq é garai gi, yhangmoq é wamdau nghut ri; yhangmoq é aróng gi, yhangmoq hoq hpu hkyô nghut ri. Yhangmoq é i-myit gi, mingkan zè htoq má za nghut ri. <sup>20</sup>Nghut kôlhang, nga-nhúng é yhummau gi, mauhkûng mingdán má nghut lhê. Nga-nhúng gi, haû mâ é Yhumsîng Yesuq Hkrisduq gâ é hkyi yù Sù lé, myoqbyu lánng nyi é bang nghut lhê. <sup>21</sup>Yhang gi, jung hkanmó lé, Yhang uphkan é a-ô má wó kut tô é Yhâng é a-tsâm eq nga-nhúng é htên byoq sê é gungdu lé htaí lhik pyám byi luí, Yhâng é hpungwup bo é gungdu su dut nhâng râ nghut lhê.

#### 4

<sup>1</sup>Haû mù luí, chyitdap é luzúm wuì le nghut mù, ngò chyitdap bûn nghâm nyi é, ngá é gabú jowò eq janmaú nghut nyi é, ngá é gumang wuì ê, haû gi, Yhumsîng má nungmoq hkâsu kut yap gîng nyi râ hkyô nghut lhê.

#### *Lhoq Pun Lhoq Kyîng É Hkyô*

† 3:3 Ahpyo-kuq hpyit hkam yu é bang akying gâ é gi, Garai Gasâng é yhangzo hkyak nghut bê bang lé gâ lhê.



<sup>2</sup> Ngò gi, Uodia eq Suntuiki nhik lé, haù Yhumsîng má rayuq eq rayuq myit huì lhâm nyi râ matú, gyai yhang pying kat lhê. <sup>3</sup> Ngá é mù wùn luzúm kyîng ê, ngò gi, myiwe shí nhik lé garúm yû laq nghû, nang lé le dúng tôngbán kat lhê; yhangnhik gi, Klemen eq le, asak jihpán laiká buk má mying bo é, ngá é mù wùn luzúm wuì góbang eq le, haù gabú danglù hkyô má ngò eq rahá gyai shikut wú bê sù nhik nghut lhê.

<sup>4</sup> Haù Yhumsîng má hkâ-nhám le gabú nyi keq! Ngò dum taì lhê, gabú nyi keq! <sup>5</sup> Nungmoq nú-nhâm é hkyô, byù banshoq bang lé sé nhâng keq. Haù Yhumsîng gi, chyáng bê nghut ri. <sup>6</sup> Haì eq séng luì le, myit hkâ-myò hkâchiq kó; hkyô hkangmó má jeju hkya-on uchyang, kyûdúng é eq dúng tôngbán é dông, nungmoq dúng é hkyô pé lé, Garai Gasâng chyáng shit kyô nyi keq. <sup>7</sup> Haù hkûn, sé gyô é nyan banshoq htoq má gyaú é, Garai Gasâng é ngingón hkyô gi, nungmoq é myit nhiklum eq nungmoq myit é hkyô lé, Hkrisduq Yesuq má upzúng byi nyi râ nghut lhê.

<sup>8</sup> Jiltûm má, gumang wuì ê, tengmán é, hpautap gíng é, dingmán é, sansêng é, wó chytidap é, hkungga gíng é, haì má nghut kôlhâng, aróng wó dik é hkyô rajung jung, a nghut jáng, hkya-on gíng é hkyô rajung jung bo é nghut le gi, haù sù é hkyô pé lé myit nyi keq. <sup>9</sup> Nungmoq gi, ngá chyáng mai wó mhoq hkam yù bê hkyô pé, wó gyo wó myang yù bê hkyô pé, haì lé le châng kut nyi keq. Haù hkûn, ngingón hkyô byi é Garai Gasang gi, nungmoq eq rahá nyi nyi râ nghut lhê.

#### *Jeju Bùn É Hkyô*

<sup>10</sup> Ahkuì kúm gi, ngá é hkyô lé nungmoq dum myit chiq byi kô é yanmai, ngò gi, haù Yhumsîng má gyai yhang gabú nyi lhê; gè gè yhang, nungmoq myit chiq byi nyi kôlhâng, haù lé tún shit râ ahkáng a wó kó nghut ri. <sup>11</sup> Ngò ísu nghû taì nyi é gi, ngò má râ é hkyô bo tô é yanmai taì é a nghut, hkâsu mù gâ le, ngò gi, ngò hui mihui má, nhik dik nyi râ matú mhoq yû bê nghut lhê. <sup>12</sup> Ra châ tô u lé, hkâsu kut râ ngò sê lhê; agùn agó wó u lé, hkâsu kut râ ngò sê lhê; hkyô hkangmó eq dut tô é ahkyo lhum jup má, wam gyi kôlhâng, zòmut kôlhâng, agùn agó wó tô nyi kôlhâng, ra châ to kôlhâng, myit dik nyi râ hpaqchyì lé ngò wó mhoq yû bê nghut lhê. <sup>13</sup> Ngò gi, ngo lé wum-o a-tsam byi sù Hkrisduq é yanmai, hkyô hkat hkangmó wó kut lhê.

<sup>14</sup> Nghut kôlhâng, ngò wuìhke jamjau huì nyi é hkûn, nungmoq garúm yû kô é gi, ge é hkyô kut bekô nghut ri. <sup>15</sup> Hau htoq agó, Hpilipi byu pé nungmoq sê é eq rajung za, haù gabú danglù lé, ngò hkô mù nungmoq wó gyô yu hi é buinyi pé má, ngò Makedoni mau mai htoq ló râ hkûn, haù byi é hkyô eq lhom yu é hkyô má, nungmoq mai lai luì, noqkuq hpúng gotû ralhum lháng, ngo lé garúm kat é hkyô a bo é nghut lhê. <sup>16</sup> Ngò Htesaloni wà mó má nyi tô é hkûn lé lháng, nungmoq gi, ngò ra châ é hkyô lé adàm dàm hûn byi bekô nghut ri. <sup>17</sup> Ngò gi, chyunghuq chyunghâng lé ho nyi é a nghut, nungmoq mai ashi je myo zuì jat râ matú lé za sheq ho nyi é nghut lhê. <sup>18</sup> Ngò gi, haì le gúm shoq myang yu é htoq agó, chyân shoq lháng nghut bê. Ahkuì, haù nungmoq hun kat é chyunghuq lé, Epahprodi chyáng mai ngò lhom myang yù luì, ngò má agùn agó nghut nyi bê. Haù pé gi, namngón jung hkungga su, Garai Gasang lé gabú nhang é, hap yù gíng é hkungga ralhum nghut ri. <sup>19</sup> Ngá é Garai Gasang gi, Yhang agùn agó wó sùt nyi é eq rajung za, nungmoq râ é hkyô banshoq lé, Hkrisduq Yesuq má lhoq gúm lhoq jup byi râ nghut lhê.

<sup>20</sup> Hpungwup shinggang gi, nga-nhûng é Îwa Garai Gasâng chyáng pyat dedu ahtum abyuq ru joq nyi sháng gaq ô! Amen.

#### *Shi-kyám Dang*

<sup>21</sup> Hkrisduq Yesuq má sân-yúng bê bang banshoq lé bo shi-kyám byi keq. Ngò eq rahá nyi é gumang wuì gi, nungmoq lé shi-kyâm kat akô nghut ri. <sup>22</sup> Sân-yúng bang banshoq gi, nungmoq lé shi-kyâm kat akô; Kehtaq é yhûm mâ é sân-yúng bang gi, je riyhang shi-kyâm kat akô nghut ri.

<sup>23</sup> Yhumsîng Yesuq Hkrisduq é jeju gi, nungmoq banshoq bang eq rahá ru joq nyi sháng gaq ô!

## KOLOSE Pê Chyáng Hun Kat é Laiká (Colossians)

<sup>1</sup> Garai Gasâng eq hkyin yù mù, Hkrisduq Yesuq é lagyo dut sù, ngò Poluq eq nga-nhùng é gumang Timohti gi, <sup>2</sup> Kolose wà mó má nyì bang nghut é, Hkrisduq má chyoiyúng bang nghut é, lhumzuí é gumang wui chyáng dang kyô kat lhê. Nga-nhùng é Îwa Garai Gasâng chyáng mà é jeju eq nguingón hkyô gi, nungmoq chyáng ru joq nyí sháng gaq.

### *Jeju Hkya-ôn É Eq Kyûdung É Dang*

<sup>3</sup> Ngamoq gi, nungmoq é matú kyûdung byí é hkûn, nga-nhùng é Yhumsîng Yesuq Hkrisduq é Îwa nghut é Garai Gasang lé ayang jeju hkya-ôn lhê. <sup>4</sup> Haí mù gà le, Hkrisduq Yesuq má nungmoq lumjîng hkyô eq Yhâng é sân-yúng bang banshoq lé nungmoq chyitdap é hkyô lé, ngamoq wó gyô é yanmai nghut lhê. <sup>5</sup> Lumjîng myit eq chyitdap myit haú gi, nungmoq é matú mauhkûng htoq má hkong to byí é myit myoqbyù hkyô\* mai lo é nghut lhê. Myit myoqbyù hkyô haú lé gi, nungmoq chyáng jé to bê gabú danglù nghut é tengmán mungdang mai, nungmoq wó gyô to gû nghut lhê. <sup>6</sup> Nungmoq gi, gabú danglù haú lé wó gyo luí, Garai Gasâng jeju eq sêng é tengmán hkyô lé sê hkyang é buinyì mai, nungmoq chyáng ashi zuí é eq kô myhang nyì bê nghut é eq rajung za, gabú danglù haú gi, mingkan gón má ge é ashi zuí nyi é eq kô myhang nyì bê nghut ri. <sup>7</sup> Nungmoq gi, haú hkyô lé, ngamoq é chyitdap byinzùm Epahpra chyáng mai mhoq yu é nghut lhê. Yhang gi, ngamoq é gunglik dông, Hkrisduq é lhumzuí é hpúng mù wùn sù nghut lhê. <sup>8</sup> Yhang gi, haú Woi-nyí eq nungmoq lé byí tô é chyitdap hkyô lé, ngamoq lé taí kyo sù le nghut ri.

<sup>9</sup> Haú nghut é yanmai, ngamoq gi, nungmoq eq sêng é hkyô lé wó gyô é nyí mai, nungmoq é matú ayang kyûdung byí nyi lhê. Garai Gasang ô nau é hkyô lé sé râ hpaqchyí lé, woi-nyí eq sêng é hpaqchyí byéng-yá eq sê gyô é nyan banshoq dông mai nungmoq chyáng lhoq pyíng byi sháng gaq nghû, Yhâng chyáng kyûdung byí nyi lhê. <sup>10</sup> Haú su kut kyûdung byí é gi, haú Yhumsîng ô nau é hkyô eq gingdán é dông nungmoq asak wó duí luí, hkyô hkangmó má Yhang lé wó gabú nhâng rà matú nghut lhê. Hau dông mai, nungmoq gi, ge é muzó hkangmó má ashi zuí nyì luí, Garai Gasang lé sê é hpaqchyí má kô myhang nyì kó râ nghut lhê. <sup>11</sup> Hau htoq agó, nungmoq gi, Yhâng é hpungwup a-tsam dông mai a-tsam banshoq eq wum-o lhoq kîng byí é huí nyì kó râ nghut lhê. Haú mù, nungmoq gi, gyai hkam jân é hkyô eq myit hing é hkyô lé, gabú myit mai wó yù kó râ nghut lhê. <sup>12</sup> Maubó é mingdán má, sân-yúng bang eq sêng é muizé lé wó bo hkam yù râ matú, nungmoq lé gingdán nhang é sù haú Îwa lé le, jeju wó hkya-on kó râ nghut lhê. <sup>13</sup> Hkâsu mù gà le, Îwa haú gi, nga-nhúng lé, mauchut eq up é hkaú mai hkyi htoq yù luí, Yhang chyitdap é Yhang Zô é mingdán má shuî hâng é Sù nghut lhê. <sup>14</sup> Nga-nhúng gi, haú Yhang Zo dông mai, hkyi xe yu é hui mù, yubak mara hkyut pyám byí é hui bê nghut lhê.

### *Jung Hkangmó É Ushuq, Hkrisduq*

<sup>15</sup> Hkrisduq gi, myoq eq a byu-myàng é Garai Gasâng é gunghkyâng isâm nghut luí, zomún dông hpan tô é lhunglhâng htoq má gyaú é sù nghut ri. <sup>16</sup> Hkâsu mù gà le, mauhkûng eq myigùng htoq má joq é azîng zê pé, myoq eq byu-myang é eq a byu-myang é pé nghut kôle, hkohkâm ayá pé, a-tsam pé, uphkâng bang, ahkáng ayá wó bang nghut kôle, lhunglháng gi, Yhâng eq hpan to huí é chyat nghut lhê. Lhunglháng gi, Yhâng é matú, Yhâng eq hpan to huí é chyat nghut ri. <sup>17</sup> Yhang gi, lhunglhâng é hí mà é nghut mù, lhunglháng gi, Yhâng é yanmai joq gîng bum é chyat nghut lhê. <sup>18</sup> Yhang gi, noqkuq

\* 1:5 Bun zo shí má bo é myit myoqbyù hkyô gi, Yesuq lé taí é nghut lhê.

hpúng nghu é gungdû é ulhum nghut ri; Yhang gi, jung hkanmó má gyaú dik é ushuq dut sháng gaq ga, sân-hi awang nghut sù eq shi é bang mà é hí dui toq é zomún dut sù nghut ri. <sup>19</sup> Hkâsu mù gâ le, Garai Gasang gi, Yhâng é byíng jup hkyô banshoq, Yhang Zo má joq nyi râ lé myit nguì ô nau é nghut mù, <sup>20</sup> haù tapzîng má htoq byí é Yhang Zô é sui dông mai nuingón hkyô kut byí é èq, myigùng htoq mà é azíng zê nghut nghut, mauhkúng mà é azíng zê nghut nghut, lhunglhang lé, Yhang Zo dông mai, Yhang eq nuingón simsaq hkyô xoq yû bê nghut ri.

<sup>21</sup> Nungmoq gi, Garai Gasang eq wê gân é bang dut wú kôluí, nungmoq é agè ashop nyi yap sâm lai é yanmai, nungmoq i-myit má, Yhâng é gyè dut wú bekô nghut lhê. <sup>22</sup> Nghut kôlhang, ahkuí, Garai Gasang gi, nungmoq lé, râ é hkyô a bo é eq mara hún râ hkyô a bo é za, chyoiyúng é dông Yhâng é hí má shit râ matú, Hkrisduq é gungsho gungdu shí hkâm é dông, nungmoq eq nuingón simsaq hkyô xoq yû bê nghut ri. <sup>23</sup> Haù gi, gabú danglù mai wó yu tô é myoqbyù hkyô mai a htot byuq é za, kô myhang nyi é eq gíngtîng nyi mù, nungmoq é lumjîng hkyô má xoq nyi nyi é nghut jáng sheq dut râ nghut lhê. Gabú danglù shí gi, nungmoq wó gyô wú bê nghut é htoq agó, mauhkúng ô má hpan tô é jung hkanmó lé hko kyô nyi bê nghut lhê. Ngò, Poluq le, gabú danglù hau é dui-nhâng zoshâng dut é nghut lhê.

#### *Noqkuq Hpúng É Matú Poluq Wùn Waq É Hkyô*

<sup>24</sup> Ahkuí, ngò gi, nungmoq é matú jamjau huí é má gabú lhê; hau htoq agó, Hkrisduq é gungdu nghut é, noqkuq hpúng é matú, râ tô ashí nghut é, Yhang hpuzô é hkyô lé, ngá é gùng má ngò lhoq gumjup yu nyi lhê. <sup>25</sup> Ngò gi, Garai Gasâng é mungdang lé, nungmoq chyáng gumjup shoq hko kyo râ matú, Garai Gasang, ngo lé hun tô é wò mai, noqkuq hpúng hau é mù wùn sù dut é nghut lhê. <sup>26</sup> Mungdang haù gi, gohkùn mai apyat pyat haq tô gyó lo é zaú tô é hkyô nghut kôlhang, ahkuí gi, haù sân-yúng bang lé hpông shit bê nghut ri. <sup>27</sup> Garai Gasang, haù su kut é gi, zaú tô é hkyô hau é agùn agó hpungwup shingkang, tîngbau pè chyáng hkâsu nghut é hkyô, yhangmoq lé sé nhâng râ matú nghut lhê. Zaú tô é hkyô haù gi, hpungwup shingkang lé myoqbyù é hkyô nghut é, nungmoq má Hkrisduq dui nyi bê hkyô lé gâ é nghut lhê.

<sup>28</sup> Hkrisduq má gumjup é dông, byù yuq hkanmó lé wó shuí jé sháng gaq nghú, ngamoq gi, Hkrisduq é hkyô lé taí pyô luí, yuq hkanmó lé, hpaqchyí byéng-yá banshoq èq taí pun taí kyíng é eq mhoqshit nyi é nghut lhê. <sup>29</sup> Ngò, haù-í yhang wó wùn waq shikut é gi, ngò má wum-o a-tsam byíng byíng mù zuí nyi Su é wum-o banshoq èq wùn waq shikut nyi é ru nghut lhê.

## 2

<sup>1</sup> Ngò gi, nungmoq é matú le, Ladoki wà mó bâng é matú le, ngò eq myoqdong hkyôm a huí wú shí é bang banshoq é matú le, hkâ-í yhang awui ahke shikut nyi é hkyô lé, nungmoq lé sé nhâng nau ri. <sup>2</sup> Haù su awui ahke shikut é hkyô gi, yhangmoq, myit má wum-o byí é hui râ eq chyitdap myit má rading ralhum za wó dut râ matú nghut lhê. Haù hkùn, yhangmoq gi, Garai Gasâng é zaú tô é hkyô nghut é, Hkrisduq lé wó sé râ matú, sê gyô é nyan lhunglhang é isut byíng shoq lé wó yû kó râ nghut lhê. <sup>3</sup> Haù Hkrisduq má kúm gi, hpaqchyí byéng-yá eq sumsé hpaqchyí gâ é sutzè lhunglhang lé tsîng tô ri. <sup>4</sup> Nungmoq lé ngò haù hkyô taí kyô é gi, ó yuq le, dang ngón dang nguì èq mhoq hpyoq é dông, nungmoq lé a wó mhaù zo râ matú nghut lhê. <sup>5</sup> Hkâsu mù gâ le, ngá gungdu nungmoq eq rahá a nyi kôlhang, ngá é myit gi, nungmoq eq rahá nghut nyi luí, nungmoq shuq shuq tap tap za nghut nyi kô é eq Hkrisduq lé lumjîng é má hkâ-í gíngtîng nyi kô é lé myàng mù, ngò gabú nyi lhê.

#### *Hkrisduq Dông Mai Wó É Gumjup É Asak Duí Hkyô*

<sup>6</sup> Haù mù luí, nungmoq gi, Hkrisduq Yesuq lé Yhumsîng nghú hap yù bekô nghut é eq rajung za, Yhang má asak xoq dui nyi keq. <sup>7</sup> Yhang má apùn amyit chin gîng nyi mù, kô

myhang lò luí, nungmoq mhoq yù bê eq rajung za, lumjín g hkyô má wum-o lhoq kóng mù, jeju hkyá-ôn é hkyô byín g zan nyí keq.

<sup>8</sup> Hkrisduq chyáng mà é a nghut é za, mingkan shí mà é uphkàng tarâ pé eq xângzo wui é htúngli cháng luí, mhaú zô é myit són hpaqchyí eq akyû a bo é dang đông, ó yuq èq le, nungmoq lé a wó shuí nghoq yû kó sháng gaq, sidiq nyí keq.

<sup>9</sup> Hkâsu mù gâ le, Garai Gasâng é gumjup hkyô banshoq gi, Hkrisduq é gungdu hkyangmân má lúng nyí mù, <sup>10</sup> nungmoq gi, a-tsam bo é banshoq eq ahkáng ayá wó é banshoq é ushuq nghut é Hkrisduq eq sêng é bang nghut kômù, gumjup é bang dut bekô nghut ri. <sup>11</sup> Yhang má, nungmoq gi, byu loq èq kut é ahpyo-kuq hpyit hkyô đông a nghut é za, ahpyo-kuq hpyit é su, Hkrisduq èq yubak gungsho mara lé hkyut sêng pyâm é hkyô lé hkam yù bekô nghut ri. <sup>12</sup> Nungmoq gi, wui-myhup hkâm é hkûn Hkrisduq eq rahá myhup yhûm é hui bekô nghut mù, Yhang lé shi é mai lhoq dui toq yu é, Garai Gasâng é a-tsam lé nungmoq lumjín g kô é yanmai, Yhang eq rahá lhoq dui toq yu é hui bekô nghut ri.

<sup>13</sup> Nungmoq é yubak mara pê é yanmai le, nungmoq é yubak gungsho mara lé hui sêng pyâm é a hkam yu é yanmai le, nungmoq shi tô é hkûn, Garai Gasang gi, nungmoq lé, Hkrisduq eq rahá asak duì nhâng bê nghut ri. Yhang gi, nga-nhûng é yubak mara lhunglhang lé hkyut pyám byi luí, <sup>14</sup> nga-nhúng eq shai lhum mù, nga-nhúng lé htuq htîng é, tarâ pé bo é jéyáng râ jihpán lé huí sêng pyám byi bê nghut ri. Yhang gi, haú lé tapzîng htoq má dok tap pyâm é đông yu pyám byi bê nghut lhê.\* <sup>15</sup> Haú đông mai, a-tsam bò bang eq ahkáng ayá wó bâng a-tsam lé lang hkyut hkyô pyám mù, Yhang gi, tapzîng èq yhangmoq lé ung pyâm é đông, byù pê é hí má yhangmoq lé de de kut to bê nghut ri.

<sup>16</sup> Haú mù luí, nàng haí zo haí shuq é yanmai le, noqkuq htûng eq sêng é poí buinyì, Lhoxan Lhosik poí, Bánno buinyì eq séng luí le, nungmoq lé, ó yuq èq le a wó jéyáng kó sháng gaq. <sup>17</sup> Haú pé gi, dut lò râ hkyô pê é wupzo chyat nghut lhê; haú gùng gyíng gi, Hkrisduq yhang nghut nyi ri. <sup>18</sup> Myit lhoq nyhum mhaú é eq maumang lagyô pé lé noqkuq é lé myit nguí é sù ó yuq èq le, nungmoq lé, chyunghuq eq a gingdán râ đông hkâkut nhâng kó. Haú su é yuq gi, yhumsîng byu-myang é lé† za taí shikut mù, yhumsîng é gungsho myit mai, akôm yhang nghut é lé gyáng dang taí é sù nghut ri. <sup>19</sup> Yhang gi, Garai Gasang kô myhâng nhang é su, gungdu gón é gungsho showui showang pé eq shogyi pé lé htuqbang byi mù rahá lâng tsing tô é haú ullhum nghut é Hkrisduq eq xoq é hkyô lé byoq ló nhâng bê nghut ri.

<sup>20-21</sup> Nungmoq gi, Hkrisduq eq rahá, mingkan shí mà é tarâ pé eq shi gang bekô nghut le nhîng, haí mù, haú eq sêng lhum nyi ashí kó lhú? "Hkâzui, hkâchyâm, hkâzàng." gâ é tarâ ô má nyi nyi ashí kó lhú? <sup>22</sup> Haú pé gi, waxâng zô wui é hkunmó pé eq mhoqshit hkyô pé nghut é yanmai, jai chung é hkûn, htên byuq râ chyat nghut lhê. <sup>23</sup> Haú sù é tarâ pé gi, yhumsîng yhang noqkuq shikut é, myit lhoq nyhum mhaú é eq gungdu lé gunjâng é pé nghut luí, hpaqchyí byéng-yá bo é su dut kôlhang, gungshô é agè ashop yut yut ô nàu hkyô lé wó hkûm zing pyám râ má, hai akyû a bò nghut ri.

### 3

#### *Chyoiyúng É Đông Asak Duì Râ Hkyô*

<sup>1</sup> Haú mù luí, nungmoq gi, Hkrisduq eq rahá lhoq dui toq é hui bekô nghut jáng, Garai Gasâng é loqyo hkyam\* má zung tô é Hkrisduq é jowò má joq é, ahtoq mà é azíng zê pé lé myit ô nau nyí keq. <sup>2</sup> Nungmoq gi, myidàm htoq mà é azíng zê lé myit tuí é a nghut é za, ahtoq mà é azíng zê lé myit tuí nyí keq. <sup>3</sup> Hkâsu mù gâ le, nungmoq gi, shí bekô nghut luí,

\* 2:14 Yhang gi, haú lé tapzîng htoq má dok tap pyâm é đông yu pyám byi bê nghut lhê gâ é gi, Hkrisduq tapzîng má shí hkám byí é hkûn, nga-nhûng é yubak mara banshoq lé, Garai Gasâng èq hkyut pyám byí é lé taí nau é nghut lhê.

† 2:18 Byu-myang é lé gâ é gi, yhang myit htoq é shing-rán lé gâ lhê. \* 3:1 Loqyo hkyam nghú é gi, ahko ahkáng wó é jowò lé gâ é nghut lhê.

ahkuî, nungmoq é asak gi, Hkrisduq eq rahá, Garai Gasang má haq tô é hui bekô nghut ri. <sup>4</sup> Nungmoq é asak nghut sù, Hkrisduq htoq shit é hkûn, nungmoq le, Yhang eq rahá, hpungwup shing kang hkaû má htoq shit kó râ nghut lhê.

<sup>5</sup> Haû mù luî, nungmoq é mingkan hkyô eq sêng é, ashop é đông gungsho zùm yap é hkyô, agot a-û nyì zô lhùm é hkyô, ye lhaí nau é hkyô, agè ashop yut ò nau é hkyô eq, hparà noq hkyô nghut é myoqnoq hkyô pé hái lé le sat pyám keq. <sup>6</sup> Haú hkyô pê é yanmai, Garai Gasâng é nhikmo-yo hkyô gi, jìno a gyo bâng é ahtoq má† jé râ za nghut lhê. <sup>7</sup> Laî lò bê hkûn, nungmoq le, haú hkyô pé đông sô wú kô é nghut lhê. <sup>8</sup> Nghut kôlhâng, ahkuî, nungmoq gi, nhikjum yô é, nhikmo-yô é, agè ashop é đông nò shoq kut é, lumù gansang é eq, nungmoq é nhutwuî mai hkunchòq taí é hkyô shí pé banshoq lé, yhumsing gùng yhumsing tô pyám râ dut lhê. <sup>9</sup> Rayuq eq rayuq hkâ-mhaû lhum kó; hkâsu mù gâ le, nungmoq gi, nungmoq é byù xau eq byù xaû é nyì yap hkyô lé hkyut pyám mù, <sup>10</sup> byù sik lé tû wut yû kô é nghut lhê; byù sik haû gi, sumpsé hpaqchyî đông mai, yhang lé hpân Su é gungdu isâm má asik jat lò nhang é huî nyi ri. <sup>11</sup> Byù sik má gi, Grik eq Yudaq byù nghu é, ahpyo-kuq hpyit hkâm bang eq a hkâm bang nghu é, byù bíng eq byù jum nghu é, jùn eq jùn a nghut sù nghu é a nyì lô é za, Hkrisduq gi, banshoq nghut mù, banshoq má nyi nyi ri.

<sup>12</sup> Haû mù luî, Garai Gasâng eq hkyin yù huî é bang, Yhâng eq gyai yhang chyitdap é huî é chyoiyúng bang đông, shogyo myit, gè hkyô shit é myit, lhoq nyhum é myit, nú nhâm é myit eq myit hing é hkyô pé lé, yhumsing gùng yhumsing mebu su wut to keq. <sup>13</sup> Nungmoq yhangchang mara kut shut é hkyô joq é nghut jáng, hkam jan byî lhum luî, rayuq eq rayuq mara hkyut byî lhum keq. Haû Yhumsing gi, nungmoq é mara hkyut pyám byî é su, nungmoq le mara hkyut byi keq. <sup>14</sup> Haû ge é sâmlai banshoq wó é htoq agó, gumjup é rading ralhùm za dut é hkyô má, banshoq lé rahá wó tuî zing tô é chyitdap myit lé puq wut to keq.

<sup>15</sup> Nungmoq gi, nguingón hkyô wó râ matú ji yu é hui bekô nghut mù, gungdu ralhùm mâ é bang chyat nghut bekô yanmai, Hkrisduq é nguingón hkyô lé, nungmoq é myit má up nhang nyì keq. Haû mù, jeju hkya-ôn nyì keq. <sup>16</sup> Nungmoq, rayuq eq rayuq, hpaqchyî byéng-yá banshoq eq mhoqshit é eq lhoq pun lhoq kyîng lhùm é hkûn le, Garai Gasang lé nungmoq jeju bûn é myit mai, jihkyang dang, hkya-on mahkôn, woi-nyí eq sêng é mahkôn pé hkon é hkûn le, haû Hkrisduq é mungdang lé, nungmoq é myit nhiklhùm má agùn agó bò nhang nyì keq. <sup>17</sup> Nungmoq haî wá kut kut, dang đông nghut nghut, zui saí é đông nghut nghut, banshoq lé Yhumsing Yesuq é myiêng mai kut é hkûn, haû Îwa nghut é Garai Gasang lé Yhang đông mai jeju hkya-on keq.

#### *Hkristan Ikun Byu Pé Nyì Yap Râ Hkyô*

<sup>18</sup> Ikun myhî pé ê, ikun hpô pé uphkang é ahkaû má nyì keq. Haû gi, Yhumsing é hí má kut gíng é hkyô nghut lhê.

<sup>19</sup> Ikun hpô pé ê, ikun myhî pé lé chyitdap nyì keq. Yhangmoq lé dang htân hkâ-nyô kó.

<sup>20</sup> Zo wuî ê, jung hkangmó má nungmoq é mó wui é jìno gyo keq; hkâsu mù gâ le, haû gi, Yhumsing ô nau é hkyô nghut lhê.

<sup>21</sup> Îwâ pé ê, nungmoq é zo wuî lé myit hkâ-nô nhâng kó, nò nhâng jáng gi, yhangmoq, myit wum gyuî byuq kó râ nghut lhê.

<sup>22</sup> Jùn pé ê, hkyô hkangmó má nungmoq é myidàm htoq mâ é jùn sîng bang uphkang é ahkaû má nyì nyì keq; yhangmoq é myoq hí má za zui saí luî, myoqdong ho é đông a nghut é za, haû Yhumsing lé gyuq hkunggâ é eq lhumsuz é myit mai zui saí nyì keq.

<sup>23</sup> Nungmoq haî wá kut kôle, byu é matú kut é a nghut, haû Yhumsing é matú kut nyi é đông, nungmoq é myit nhiklhùm banshoq eq zui saí nyì keq. <sup>24</sup> Haî mù gâ le, nungmoq gi, haû Yhumsing chyáng mai, muizé lé chyunghuq đông wó yû kó râ nghut é lé, sé kô é yanmai nghut lhê. Nungmoq dojaú nyi é sù gi, Yhumsing Hkrisduq ru nghut lhê. <sup>25</sup> Kut

† 3:6 Jìno a gyo bâng é ahtoq má, gâ é dang, chyúmding ra-am má a bò nghut lhê.

shut sù gi, yhang kut shut é marâ matú dam byî é hui zo râ nghut lhê, haî mù gà le, Garai Gasang gi, myoqdong hkyin é hkyô a joq.

## 4

<sup>1</sup>Jùn sîng bang ê, nungmoq é jùn pé lé, tengmán é eq gíng âng é dông lajang byî nyi keq; haî mù gà le, nungmoq le, mauhkûng htoq má Yhumsîng rayuq wó é lé sé kô é yanmai nghut lhê.

*Xoq Lui Pying Kat É Hkyô*

<sup>2</sup>Nungmoq gi, kyûdûng é má myit zîng zuq nyi mù, machyâ luí, jeju hkya-ôn nyi keq. <sup>3</sup>Ngò, shamtoq-tui hut huí nyi shoq dut é, Hkrisduq é zaú tô é hkyô lé ngamoq wó taí pyô sháng gaq, Garai Gasang gi, mungdang lé ngamoq taí râ hkyô hkum hpóng byi râ matú kyû bo dung byi kó laq. <sup>4</sup>Haû Hkrisduq é zaú tô é hkyô lé, ngò taí âng é dông san za wó taí pyô sháng gaq, kyû bo dung byi kó laq. <sup>5</sup>Nungmoq gi, a lumjîng bang eq zùm yap é hkûn hpaqchyî bo nyi keq; wó yu é ahkyíng hkanmó lé rago yhang chung jài keq. <sup>6</sup>Nungmoq gi, yuq hkanmó lé hkâsu tû taí râ hkyô wó sé kó shoq, dáng nyo é má, xô èq nghám nhang é su, hkâ-nhám le jeju byíng é dang bo nyi sháng gaq.

*Ló Htâng É Shi-kyâm Dang*

<sup>7</sup>Tuhkiku gi, ngá hkyô eq sêng é danglù banshoq, nungmoq lé taí kyo râ nghut lhê. Yhang gi, ngá é chyitdap gumang, haû Yhumsîng má, lhumzui é hpúng mù wùn sù eq byinzùm nghut lhê. <sup>8</sup>Ngò, yhang lé nungmoq chyáng nhang kat é hkyô gi, ngamoq chyáng dut nyi é hkyô lé nungmoq wó sé râ eq, nungmoq lé myit wum wó byi râ matú nghut lhê. <sup>9</sup>Yhang gi, nungmoq chyáng mâ é nghut é, ngamoq é lhumzui chyitdap é gumang Onesimu eq rahá lé lo é nghut lhê. Yhangnhik gi, shî má dut nyi é hkyô jung hkanmó lé taí kyo kó râ nghut lhê.

<sup>10</sup>Ngò eq rahá htóng lúng sù Aristakuq gi, nungmoq lé shi-kyâm kat ri. Barnaba é yhâng za-aû Markuq le, nungmoq lé shi-kyâm kat ri. (Markuq eq séng luí pying kat é hkyô lé nungmoq wó yù to bê nghut mù, nungmoq chyáng, yhang jé lé é nghut jáng, lhom hkûlum yù keq.) <sup>11</sup>Yustu le gà é Yesuq le, nungmoq lé shi-kyâm kat ri. Garai Gasâng é mingdán matú ngá é byinzùm mù zui bang má, haû bang za Yudaq byu pé nghut kômù, yhangmoq gi, ngo lé nhik tíng byî é bang nghut akô. <sup>12</sup>Nungmoq chyáng mâ é byù nghut sù eq Hkrisduq Yesuq é mù wùn sù, Epahpra gi, nungmoq lé shi-kyâm kat ri. Nungmoq gi, Garai Gasang ô nau é hkyô lunglhang má hkyak lùm to mù, gumjup luí wó gíngtîng nyi sháng gaq ga, Yhang gi, ayang nungmoq é matú kyûdung shikut byî nyi ri. <sup>13</sup>Nungmoq é matú le, Ladoki wà mó eq Herapoli wà mó bâng é matú le, yhang gi, gyai yhang mù zui shikut byî é hkyô lé, yhang é matú ngò saksé hkâm lhê. <sup>14</sup>Ngamoq é chyitdap chí sará Lukaq eq Demaq gi, nungmoq lé shi-kyâm kat akô nghut ri. <sup>15</sup>Ladoki wà mó mâ é gumang wui lé le, Numhpa eq yhâng yhûm mâ é noqkuq hpúng lé le, bo shi-kyâm byi keq.

<sup>16</sup>Laiká shî lé, nungmoq lé nghap kyô é htâng má, Ladoki byu pé é noqkuq hpúng má le nghap nhâng mù, Ladoki wà bâng chyáng hûn kat é laiká lé le, nungmoq nghap wú keq.

<sup>17</sup>"Haû Yhumsîng chyáng mai nàng hap yù to bê é muzó lé rago za lhoq pán pyám aq." nghû, Arhkipò lé taí kyo keq.

<sup>18</sup>Ngò, Poluq gi, ngá é loq èq yhang shi-kyâm dang shî lé kê kat é nghut lhê. Ngò, shamtoq-tui wut tô é lé bûn nyi keq. Jeju gi, nungmoq chyáng ru joq nyî sháng gaq ô.

## HTESALONI Pê Chyáng Hî Dàm Hun Kat é Laiká (1 Thessalonians)

<sup>1</sup> Ngò Poluq, Sila\* eq Timohti pé gi, Íwa Garai Gasang eq Yhumsîng Yesuq Hkrisduq má nghut nyî bê bang, haû Htesaloni wà mó byu pê é noqkuq hpúng lé dang kyô kat lhê. Garaî jeju eq nguingón hkyô gi, nungmoq chyáng ru joq nyî sháng gaq.

### *Jeju Hkya-ôn É Hkyô*

<sup>2</sup> Ngamoq gi, hkâ-nhám le, nungmoq banshoq bâng é matú, Garaî Gasang lé jeju hkya-on luí, ngamoq é kyûdung dang má nungmoq lé bo dúng lhôm nyi lhê. <sup>3</sup> Nungmoq é lumjîng myit mai zui saî é nungmoq é muzó lé le; chyitdap myit é yanmai, nungmoq shikut é hkyô lé le; nga-nhûng é Yhumsîng Yesuq Hkrisduq má myit myoqbyu tô é yanmai, nungmoq hkam jân é hkyô lé le, nga-nhûng é Íwa Garaî Gasâng é hí má, ngamoq ru bûn nyi lhê.

<sup>4</sup> Garaî Gasang chyitdap é gumang wuî ê, Yhang nungmoq lé hkyin yù bê lé, ngamoq sê lhê. <sup>5</sup> Hkâsu mù gâ le, ngamoq é gabú danglù gi, nhutdang đông za nungmoq chyáng jé é a nghut, wum-o a-tsam đông le, Chyoiyúng Woi-nyí đông le, tengmán hkyô byíng jup é đông le, jé bê nghut é yanmai nghut lhê. Ngamoq, nungmoq eq rahá nyi é hkûn, nungmoq é matú hkâsu kut lai lo é hkyô lé, nungmoq sé gù nghut lhê. <sup>6</sup> Nungmoq gi, wuîhke jamjau myo myo hui zo kôlhang, Chyoiyúng Woi-nyí byí é gabú myit mai, danglù haû lé lhom yù kôluí, ngamoq lé le, haû Yhumsîng lé le, alik kut yu é bang dut bekô nghut ri. <sup>7</sup> Haû mù, Makedoni mau eq Ahkaia mau mâ é lumjîng bang banshoq é alik, nungmoq dut bekô nghut ri. <sup>8</sup> Nungmoq chyáng mai, Makedoni mau eq Ahkaia mau má, haû Yhumsîng é mungdang hû htoq ló e za a nghut, Garaî Gasang má nungmoq lumjîng hkyô gi, jowò hkangmó jàm ló bê nghut luí, ngamoq gi, haî le taí nó a ra lo nghut ri. <sup>9</sup> Hkâsu mù gâ le, ngamoq lé nungmoq hká đông lhom hkulum yu é hkyô lé, yhangmoq yhang, ngamoq lé shit kyo akô. Nungmoq gi, hparà lhô pé lé tô pyám luí, Garaî Gasang shut hkâsu kut lhing lò mù, rû dui nyi é eq tengmán é Garaî Gasang lé dojaú nyi é hkyô lé le; <sup>10</sup> mauhkûng mâ é haû Yhang Zo lé lánng nyi é hkyô lé le, yhangmoq taí kyô akô. Yhangzo haû gi, Yhang èq shi é mai lhoq dui toq yu é hui luí, jé lô râ nhikmó yo hkyô mai nga-nhúng lé hkyi yù sù, Yesuq nghut ri.

## 2

### *Poluq, Htesaloni Wà Mó Má Garaî Mû Wùn Waq É Hkyô*

<sup>1</sup> Gumang wuî ê, nungmoq chyáng ngamoq lé kûm é hkyô gi, akôm a nghut é lé, nungmoq yhang sê lhê. <sup>2</sup> Nungmoq sê é eq rajung za, ngamoq gi, hí hkûn, Hpilipi wà mó má wuîhke jamjau eq rhoi é huî wú bê nghut lhê; nghut kôlhang, nga-nhûng é Garaî Gasang garúm é yanmai, gyaí lhom htuoq htîng é hui kôle, Garaî Gasâng é gabú danglù lé, a gyuq a kyum nungmoq lé wám taí kyô é nghut lhê. <sup>3</sup> Hkâsu mù gâ le, ngamoq lhoq pun lhoq kyîng é hkyô gi, shut é, a nghut jáng, a sansêng é i-myt đông eq nungmoq lé mhaú zô é đông a nghut e za, <sup>4</sup> haû gabú danglù lé chûng gíng é bang ga, Garaî Gasâng chyáng mai ahkáng wó é đông za, ngamoq taí é nghut lhê. Ngamoq gi, byu pé lé gabú nhâng râ matú a nghut, ngamoq é myit lé chyam wú nyi é Garaî Gasang lé, gabú nhâng râ matú shikut é ru nghut lhê. <sup>5</sup> Hkâsu mù gâ le, nungmoq sê é eq rajung za, ngamoq gi, lhoq ngón mhaû é dang le hkâ-nhám a chûng wú, nghop tô é myoqnoq myit le hkâ-nhám a bò, Garaî Gasang gi, ngamoq é saksé nghut lhê. <sup>6</sup> Ngamoq gi, byu pé mai le, nungmoq mai le, gotû ó yuq mai le hkya-on râ lé ho nyi é a nghut, Hkrisduq é lagyô pé nghut é eq rajung za, nungmoq lé wòlai hûn naù jáng wó hun lhê; nghut kôlhang, <sup>7</sup> înu rayuq, yhang

\* 1:1 Sila lé gi, Salwanu le gâ lhê.

é zoshâng zô pé lé hku baú é su, nungmoq chyáng nú-nhâm é dông nyi laí lò bê nghut lhê. <sup>8</sup> Ngamoq gi, nungmoq lé gyai yhang chyttdap luí, Garai Gasâng é gabú danglù za a nghut, ngamoq é asak pé nungmoq lé byi pyâm le lháng nhik dik lhê; hkâsu mù gâ le, nungmoq gi, ngamoq chyttdap dik é bang dut bekô nghut é yanmai nghut lhê. <sup>9</sup> Gumang wui ê, nungmoq gi, ngamoq gyai yhang mù zui shikut é hkyô lé, gè gè bun kó râ nghut lhê; Garai Gasâng é gabú danglù lé, nungmoq chyáng ngamoq hko kyô é u lé, ó yuq lé le, ngamoq mai wòlai a byi sháng gaq nghû, ngamoq gi, nyí lé, myín lé, mù zuí é nghut lhê.

<sup>10</sup> Ngamoq gi, lumjínng bê bang nungmoq é hí má, hkâsu chyoiyúng é eq dingmán é, mara hún râ a bo é bang dut laí lo é hkyô lé, nungmoq le, Garai Gasang le, saksé nghut lhê. <sup>11</sup> Hkâsu mù gâ le, ngamoq gi, îwa rayuq mai yhumsing yhangzô pé lé kut byi é su, nungmoq yuq hkgámó lé, myit wum byi nyi é hkyô lé le, nhik taí tng nyi é hkyô lé le, <sup>12</sup> Yhang é mingdán eq hpungwup shingkang má, nungmoq lé wut yu é Garai Gasang eq gingdán é dông, nungmoq asak wó dui nyi sháng gaq nghû, nungmoq lé wum byi nyi é hkyô lé le, nungmoq yhang sê nyi lhê.

<sup>13</sup> Ngamoq gi, ngamoq chyáng mai nungmoq wó gyô yu é Garai Gasâng é mungdang lé, nungmoq lhom yu é hkûn, byu é dang lé lhom yu é dông a nghut e za, lumjínng é bang nungmoq má mù zuí nyi é, haú Garai Gasâng é mungdang lé yhang, lhom yù kô é yanmai, Garai Gasang lé xoq xoq jeju hkya-ôn nyi lhê. <sup>14</sup> Gumang wui ê, nungmoq gi, Hkrisduq Yesuq má nghut nyi é, Yuda mau má joq é Garai Gasâng é noqkuq hpúng pé lé, alik kut yu é bang dut bekô nghut ri. Noqkuq hpúng haú pé gi, Yudaq byu pé zing-rí é lé hui zô é su, nungmoq le, yhumsing mau mâ é byu pé zing-rí é lé hui zô akô nghut ri. <sup>15</sup> Yudaq byu pé gi, haú Yhumsing Yesuq eq myiqhtoí pé lé sat pyám kôluí, ngamoq lé le hkat htoq akô. Yhangmoq gi, Garai Gasang a ô nau é hkyô kut é bang, byù lhunglháng eq gyè dut é bang nghut akô. <sup>16</sup> Tungbaù pé hkyi yù hui râ matú, ngamoq hko kyô é hkyô lé, yhangmoq hkûm akô; yhangmoq gi, hkâ-nhám le, yhumsing é mara lé dik shoq haú dông lhoq jat myô yù akô nghut ri. Haú mù, Garai Gasâng é nhikmo-yô é hkyô gi, yhangmoq ahtoq má jé bê nghut ri.

#### *Htesaloni Byu Pé Lé Poluq Huí Nau Nyi É Hkyô*

<sup>17</sup> Gumang wui ê, ngamoq gi, rayoq zo nungmoq eq myoqdong byam gâng to kôle, myit gi, a gâng é nghut lhê; nungmoq lé gyai bun-nghâm nyi luí, wó myang hui shoq nghû, ngamoq gyai yhang shikut nyi lhê. <sup>18</sup> Nungmoq chyáng ngamoq jé lé nau mù luí, ngò Poluq yhang, adám dâm shikut wú bê; nghut kôlhang, Tsadán gi, ngamoq lé hkûm tang pyâm ri. <sup>19</sup> Hkâsu mù gâ le, nga-nhúng é Yhumsing Yesuq Hkrisduq é hí má, Yhang jé lé é hkûn, ngamoq é myit myoqbyù hkyô, gabú hkyô eq gumrông râ janmaú gi, haí jung wá nghut lhê gâ le, nungmoq yhang nghut nyi lhê a nghut kó lú? <sup>20</sup> Gè gè yhang, nungmoq gi, ngamoq é gumrông jowò eq gabú hkyô nghut nyi ri.

### 3

<sup>1</sup> Haú mù luí, ngamoq gi, haú lé a wó jân nyi lo jáng, Ahten myuq má ngamoq baú nyi gyó le je gè râ nghut lhê nghû, myit hpyit yù mù, <sup>2</sup> wuihke jamjau shí pé é yanmai, ó yuq le, myit a hten kó sháng gaq nghû, nungmoq é lumjínng hkyô má, nungmoq lé wum-o byi râ eq myit wum byi râ matú, <sup>3</sup> Hkrisduq é gabú danglù lé hko kyô é hkyô má, ngamoq é gumang eq Garai Gasâng é mù wùn luzúm nghut é Timohti lé, nhang kat é nghut lhê. Nga-nhúng gi, wuihke jamjau pé hui zo râ matú, hkyin to huí é bang nghut é lé, nungmoq yhang rago sê nyi lhê. <sup>4</sup> Nga-nhúng gi, zing-ri hui zo râ nghut lhê nghû, ngamoq, nungmoq eq rahá nghut nyi é hkûn, noq mai nungmoq lé ngamoq taí kyô nyi gù nghut bê. Nungmoq rago sê é eq rajung za, haú dông dut bê nghut ri. <sup>5</sup> Hau é yanmai, ngò a wó jân nyi lo jáng, haú gunglaú sù mai nungmoq lé gunglaú yù luí, ngamoq wùn waq bê muzó gi, akôm dut byuq râ lé, myit chiq mù, nungmoq é lumjínng hkyô lé wó sê râ matú, yhang lé ngò nhang kat é nghut lhê. Gunglaú sù gi, nat Tsadán nghut lhê.

#### *Timohti Lo Shit Kyô É Wum Byi Dang*



<sup>6</sup> Ahkuî kúm, Timohti gi, nungmoq é lumjínng hkyô eq chyttdap myit eq sêng é gabú danglù pé lé, nungmoq chyáng mai ngamoq chyáng wun jé lô byi bê nghut ri. Nungmoq, hkâ-nhám le, ngamoq lé rago bûn nyi é hkyô lé le; ngamoq, nungmoq lé myàng nau nyi é eq rajung za, nungmoq, ngamoq lé myàng nau nyi é hkyô lé le, yhang lo taî kyo bê nghut ri. <sup>7</sup> Haû mù luî, gumang wuî ê, ngamoq myit myo uhkyî é hkyô eq zing-ri huî é hkyô pé banshoq má, nungmoq é lumjínng hkyo é yanmai, nungmoq eq séng luî myit wum byî é hkyô lé ngamoq wó yû bê nghut lhê. <sup>8</sup> Ahkuî, ngamoq gi, haû Yhumsîng má nungmoq yap gîng nyî kô é yanmai, gè gè nyî ngón bê nghut lhê. <sup>9</sup> Nga-nhûng é Garai Gasâng hí má, nungmoq é yanmai, ngamoq myang hkam yu é gabú hkyô banshoq lé myit kat wú jáng, ngamoq gi, nungmoq é matú Garai Gasang lé hkâsu kut jeju ûng hkya-on râ lhú? <sup>10</sup> Ngamoq gi, nungmoq lé dum myàng râ matú eq, nungmoq é lumjínng myit má langhpyut é hkyô lé wó lhoq hkúm byi râ matú, nyí, myín, gyai yhang lhumzui luî kyûdûng nyi lhê.

<sup>11</sup> Nungmoq chyáng ngamoq lé râ matú, nga-nhûng é Yhumsîng Yesuq eq nga-nhûng é Îwa Garai Gasang yhang ngamoq lé hkyô hpóng byi sháng gaq. <sup>12</sup> Nungmoq lé ngamoq chyttdap nyi é su, haû Yhumsîng gi, nungmoq é chyttdap myit lé, rayuq eq rayuq é ahtoq má le, yuq hkangmó é ahtoq má le, lhoq kô jat, lhoq pyíng byi sháng gaq. <sup>13</sup> Nga-nhûng é Yhumsîng Yesuq gi, Yhâng é chyoyúng bang banshoq eq rahá lé é hkûn, nga-nhûng é Îwa Garai Gasâng é hí má, nungmoq gi, mara hûn jowò a joq é eq chyoyúng é bang dut râ matú, nungmoq é myit nhiklhum má, haû Yhumsîng mai wum-o lhoq kíng byî nyî sháng gaq. Yhâng é chyoyúng bang gâ é gi, byù lé, a nghut jáng, maumang lagyô pé lé, taî záng lhê.

#### 4

##### *Garai Gasang Ô Nau É Đông Asak Dui Râ Hkyô*

<sup>1</sup> Xoq luî taî nau é gi, gumang wuî ê, ngamoq gi, ahkuî nungmoq cháng nyi é eq rajung za, nungmoq hká đông nyî yap luî, Garai Gasang lé gabú nhâng râ hkyô nungmoq lé mhoqshit byi bê nghut lhê. Ahkuî le, ngamoq gi, shí hkyô lé nungmoq hau htoq je wó châng jat râ matú, Yhumsîng Yesuq má nungmoq lé dúng tôngbán luî, myit wum byi kat lhê. <sup>2</sup> Hkâsu mù gâ le, nungmoq gi, haû Yhumsîng Yesuq é ahko ahkáng đông, ngamoq mai, nungmoq lé mhoqshit to byî é hkyô pé lé, sê akô nghut ri.

<sup>3</sup> Garai Gasang ô nau é hkyô gi, haû nungmoq sân-yúng é hui râ matú le, ashop é đông gungsho zùm yap é hkyô lé koi pyám râ matú le; <sup>4</sup> nungmoq yuq hkangmó gi, haû Garai Gasang lé a sê é, a lumjínng bang kut é su, gungsho yut yut ô nau é hkyô a châng e za, <sup>5</sup> haû chyoyúng é eq hkungga gíng é sù wó dut shoq, yhumsîng gùng lé wó hkang é hkyô mhoq yû râ matú le; <sup>6</sup> shí hkyô eq séng luî, ó yuq le, yhumsîng é gumang lé, a ge shut, a ge lhungzo râ matú le nghut lhê. Ngamoq, nungmoq lé taî kyo mù, lhoq pun lhoq kying gù nghut bê eq rajung za, haû Yhumsîng gi, haû hkyô shut é banshoq lé, dam byi râ nghut lhê. <sup>7</sup> Hkâsu mù gâ le, Garai Gasang gi, nga-nhûng lé a sân-yúng é bang dut râ matú wut yu é a nghut, chyoyúng é đông asak dui nyî râ matú sheq wut yu é ru nghut lhê. <sup>8</sup> Haû mù luî, mhoqshit hkyô shí lé he-ngik pyâm é sù gi, byù lé he-ngik é a nghut, haû nungmoq lé, Yhâng é Chyoyúng Woi-nyí byî tô é sù, Garai Gasang lé he-ngik pyâm é sheq ru nghut lhê.

<sup>9</sup> Rayuq eq rayuq chyttdap lhum râ matú, nungmoq yhang, Garai Gasâng eq mhoqshit é hui bekô nghut é yanmai, gumang yhangchang chyttdap lhûm é hkyô eq séng luî, ngamoq gi, nungmoq chyáng kê kat byi a ra lo nghut ri. <sup>10</sup> Haû eq rajung za, nungmoq gi, Makedoni mau gón mâ é gumang wuî banshoq lé chyttdap nyi akô nghut ri. Nghut kôlhang, gumang wuî ê, haû su je myo kut râ matú nungmoq lé ngamoq wum byî lhê.

<sup>11-12</sup> Nungmoq é nyí wui lhê é asak dui hkyô má, gotû byu pê eq hkunggâ é wó yû luî, ó yuq lé le, lumhkaû a ra wó dut sháng gaq, hí hkûn nungmoq lé ngamoq taî kyô tô é eq rajung za, num num byù zè râ hkyô lé le, yhumsîng eq a sêng é hkyô a kut wún râ lé le, yhumsîng loq eq zui saí mù nyî râ lé le, nungmoq é myit myoqbyù jowò kut yû keq.

*Haù Yhumsîng Gyó Lé Râ Hkyô*

<sup>13</sup> Gumang wuì ê, myit myoqbyù hkyô a wó é byù góbang su, nungmoq, iyon ningtsáng a dut kó sháng gaq, haù yhup ngón byuq é bang eq séng luí, nungmoq a sé râ lé, ngamoq a ô nau é nghut lhê. Yhup ngón byuq é bang gâ é gi, lumjínng luí shi ló byuq é bang lé gâ é nghut lhê. <sup>14</sup> Hkâsu mù gâ le, Yesuq shî luí, dum dui toq bê hkyô lé nga-nhúng lumjínng é yanmai, Garai Gasang gi, Yesuq má yhup ngón byuq é bang lé, Yesuq eq rahá shuí lé râ nghut lhê nghû, nga-nhúng lumjínng é nghut lhê. <sup>15</sup> Haù Yhumsîng taí é dang eq rajung za, nungmoq lé ngamoq taí kyo kôlé, haù Yhumsîng dum lé é hkûn, asak dui nyi é eq myit gyo tô é bang nga-nhúng gi, yhup ngón byuq bê bâng htoq ratsuí le wó hí râ a nghut. <sup>16</sup> Hkâsu mù gâ le, haù Yhumsîng yhang gi, htê mó hkunmó èq le, maumang lagyo mó é hte èq le, Garai Gasâng é tutmó mut hte èq le, mauhkúng mai gyó lé lô luí, haù Hkrisduq má shi ló bê bang hí dui toq râ nghut lhê. <sup>17</sup> Hau htâng, asak dui nyi é eq myit gyo tô é bang nga-nhúng gi, yhangmoq eq rahá mhut htoq má shuí toq yu é hui luí, maulat má haù Yhumsîng eq hui râ nghut lhê. Haù hkûn, nga-nhúng gi, haù Yhumsîng eq ahtum abyuq nyi nyi berâ nghut lhê. <sup>18</sup> Haù mù luí, nungmoq gi, dang shí pé mai rayuq eq rayuq myit wum byî lhûm nyi keq.

## 5

<sup>1</sup> Nghut kôlhang, gumang wuì ê, ahkyíng buinyi eq séng luí, nungmoq lé ngamoq kê hûn byi a ra lo nghut ri. <sup>2</sup> Hkâsu mù gâ le, haù Yhumsîng é buinyi gi, myín lé hkau sù wang é su jé lé râ nghut é hkyô lé, nungmoq rago za sê akô nghut ri. Yhumsîng é buinyi gi, Yesuq dum jé lé râ buinyi lé taí nau é nghut lhê. <sup>3</sup> Byu pé gi, 'Ngingón yuqyo ri.' ga taí nyi bùm kô é u lé, gùng laí é myiwe rayuq zohkû-nò no lo é su, htên byoq hkyô gi, byodàn tung yhangmoq chyáng jé luí, hká dông lé yhangmoq wó hpang lut kó râ a nghut.

<sup>4</sup> Nghut kôlhang, gumang wuì ê, nungmoq gi, mauchut hkaù má nyi é bang a nghut é yanmai, buinyi haù gi, hkau sù lé é su, nungmoq é matú byodàn tung dut râ a nghut. <sup>5</sup> Nungmoq lhunglhang bang gi, maubó é yhangzô pé eq nyi é yhangzô pé nghut lhê. Nga-nhúng gi, myín eq mauchut hkaù eq sêng é bang a nghut. <sup>6</sup> Haù mù luí, nga-nhúng gi, byù góbang su a yhup nyi e za, machyâ luí, gying gying kut nyi sháng. <sup>7</sup> Hkâsu mù gâ le, yhup é bang gi, myín lé yhup akô; î shuq wut é bang le, myín lé shuq wut akô. <sup>8</sup> Nghut kôlhang, nga-nhúng gi, nyi eq sêng lhê nghut é yanmai, gying gying kut nyi luí, lumjínng myit eq chyitdap myit lé gi, wànggò-long lé su gò to, hkyi yù hui râ lé myit myoqbyù tô é hkyô lé gi, shamtoq-muq lé su tsung to, kut sháng. <sup>9</sup> Hkâsu mù gâ le, Garai Gasang gi, Yhâng nhikmo-yô é hkyô lé hkâm zo râ matú, nga-nhúng lé hkyin tô é a nghut e za, nga-nhúng é Yhumsîng Yesuq Hkrisduq mai, hkyi yù hkyô lé nga-nhúng wó yù râ matú hkyin to bê nghut lhê. <sup>10</sup> Yesuq gi, nga-nhúng yhup bûn nyi kôlhang, yhup ngón to kôlhang, Yhang eq rahá wó nyi nyi sháng gaq, nga-nhúng é matú shî hkám byi bê nghut ri. <sup>11</sup> Haù mù luí, nungmoq gi, ahkuí, nungmoq kut nyi é eq rajung za, rayuq eq rayuq myit wum byî lhûm mù, htuqluq htuqbáng kut lhûm nyi keq.

*Ló Htâng Lhê É Mhoqshit Hkyô*

<sup>12</sup> Gumang wuì ê, nungmoq mâ é muzó shikut luí, haù Yhumsîng má nungmoq lé up nyi é eq lhoq pun lhoq kyíng nyi é bang lé, nungmoq hkungga râ matú le; <sup>13</sup> yhangmoq zui saí é muzó jizó é yanmai, yhangmoq lé chyitdap myit dông gyai yhang hkungga râ matú le, nungmoq lé ngamoq sang kat lhê. Nungmoq le, rayuq eq rayuq nguínngón lhûm nyi keq. <sup>14</sup> Gumang wuì ê, nungmoq lé ngamoq wum byî kat nau é gi, lagôn é bang lé lhoq pun lhoq kyíng keq; nhiknge é bang lé myit wum byi keq; wum nyhôm é bang lé htuqluq htuqbáng kut keq; yuq hkanngmó lé, i-myit hîng byi nyi keq; <sup>15</sup> ó yuq lé nghut kôlhang, a ge é hkyo é yanmai, a ge é dông a taù kut râ lé lhoq pun lhoq kyíng nyi keq; nungmoq rayuq eq rayuq le, góbang banshoq eq le, shikut luí, hkâ-nhám le, ge é hkyô kut byî lhûm nyi keq.

<sup>16</sup> Hkâ-nhám le, ru gabú nyî keq; <sup>17</sup> abyit alan kyûdûng nyî keq; <sup>18</sup> hkyô hkat hkangmó má jeju hkya-ôn nyî keq, hkâsu mù gâ le, haú pé gi, Hkrisduq Yesuq má, nungmoq é matú Garai Gasang ô nau é hkyô pé nghut lhê.

<sup>19</sup> Haú Woi-nyí lé hkâlhoq jôm pyám kó; <sup>20</sup> myiqhtoi htoî é lé, haî su a ngàm hkâkut kó. <sup>21</sup> Jung hkangmó lé, chyam wú luî, ge é hkyô lé zuî zing nyî mù, <sup>22</sup> agè ashop é hkyô hkangmó lé, koi pyám keq.

<sup>23</sup> Nguingón hkyo é apûn awang nghut é Garai Gasang yhang, nungmoq lé, lhunglhang lhoq sân-yúng pyám byi sháng gaq; nga-nhûng é Yhumsîng Yesuq Hkrisduq dum lé é hkûn, nungmoq é woi-nyí, myit nhiklhum, gungdu gi, mara hûn râ hkyô a bò sháng gaq. <sup>24</sup> Nungmoq lé ji yu é Sû gi, lhumzuî é Sû nghut lhê mù, Yhang, shí hkyô lé kut râ nghut lhê.

<sup>25</sup> Gumang wuî ê, ngamoq é matú kyû bo dung byi kó laq. <sup>26</sup> Gumang wuî banshoq bang lé, chyoiyúng é chyitpuq puq é dông bo shi-kyám byi kó laq. <sup>27</sup> Gumang wuî banshoq bang lé, hun kat é laiká shî nghap kyo râ matú, haú Yhumsing é myîng mai, ngò, nungmoq lé pying kat lhê.

<sup>28</sup> Nga-nhûng é Yhumsîng Yesuq Hkrisduq é jeju gi, nungmoq chyáng ru joq nyî sháng gaq ô!

## HTESALONI

### Pê Chyáng Htang Dàm Hun Kat é Laiká

(2 Thessalonians)

<sup>1</sup> Ngò Poluq eq Sila, Timohti pé gi, nga-nhông é Îwa Garai Gasang eq Yhumsîng Yesuq Hkrisduq má nghut nyî bê bang, haû Htesaloni wà mó byu pê é noqkuq hpúng lé dang kyô kat lhê.

<sup>2</sup> Haû Îwa Garai Gasang eq Yhumsîng Yesuq Hkrisduq chyáng mâ é jeju eq ngingón hkyô gi, nungmoq chyáng ru joq nyî sháng gaq ô!

#### *Jeju Hkya-on É Eq Kyûdông É Hkyô*

<sup>3</sup> Gumang wuê ê, ngamoq gi, hkâ-nhám le, nungmoq é matú Garai Gasang lé jeju hkya-on râ dut ri; haû gi, gíng lhê; hkâsu mù gâ le, nungmoq é lumjîng myit gi, je je kô jat lo nyî luî, nungmoq yuq hkanmó é chytidap myit le, rayuq eq rayuq é ahtoq má je myô jat lo nyi é yanmai nghut lhê. <sup>4</sup> Haû mù luî, ngamoq gi, nungmoq zing-ri huî é hkyô pé eq wuîhke jamjau huî é hkyô pé banshoq lé, nungmoq wó jân nyi kô é yanmai, nungmoq é hkam jan hkyô eq lumjîng hkyô lé, Garai Gasang é noqkuq hpúng pê é hí má gumrong nyi lhê.

<sup>5</sup> Shí hkyô banshoq gi, haû Garai Gasang dingmán é dông jéyáng é hkyô lé saksé tûn shit é nghut lhê; haû mù luî, nungmoq gi, Garai Gasang é mingdán é matú wuîhke jamjau hui zo bekô nghut é yanmai, mingdán haû eq gingdán é bang gâ é hui kó râ nghut lhê; <sup>6</sup> Garai Gasang gi, tengmán Sû nghut lhê; haû mù, nungmoq lé jamjau byî é bang lé, Yhang mai jamjau byi rá eq, <sup>7</sup> jamjau huî nyi é bang nungmoq lé le, ngamoq lé le lhoq lhut byi râ nghut lhê. Shí hkyô gi, haû Garai Gasang lé a sê é bang eq nga-nhông é Yhumsîng Yesuq eq sêng é gabú danglù lé a gyo a châng é bang lé, jéyáng râ matú, <sup>8</sup> haû Yhumsîng Yesuq, wum-o a-tsam byíng é Yhâng é maumang lagyô pé eq rahá, myishâm eq mauhkûng mai htoq shit é hkûn, dut râ nghut lhê. <sup>9</sup> Yesuq jé lé lô mù, Yhâng é chyoiyúng bang má hpungwup shingkang wó yu é eq lumjîng bang banshoq mai mauhong é huî é buinyi má, yhangmoq gi, htên byoq hkyô lé ahtum abyuq jéyáng é hui zo kó râ nghut lhê. <sup>10</sup> Hau htoq agó, haû Yhumsing é hí mai le, Yhâng é a-tsam kô làm é mai le, lhoq kâng pyâm é hui kó râ nghut lhê. Ngamoq é saksé dang lé nungmoq lumjîng bekô nghut é yanmai, haû lumjîng bang má nungmoq le lòm bekô nghut lhê.

<sup>11</sup> Haû mù luî, nga-nhông é Garai Gasang gi, nungmoq lé, Yhang ji yu é hkyô eq gingdán ri ga râ le, haû Yhang é wum-o a-tsam mai, nungmoq myit tô é ge é hkyô hkanmó eq nungmoq é lumjîng myit eq sêng é muzó lhumjup lé, lhoq dik byi sháng gaq nghû le, nungmoq é matú, hkâ-nhám le, ngamoq kyûdung byî nyi lhê. <sup>12</sup> Ngamoq haû su dung byî nyi é hkyô gi, nga-nhông é Garai Gasang eq Yhumsîng Yesuq Hkrisduq é jeju yanmai, haû nga-nhông é Yhumsîng Yesuq é myîng gi, nungmoq má hkya-on waq toq é wó hui mù, nungmoq gi, Yhang má hkya-on waq toq é wó hui kó râ matú nghut lhê.

## 2

#### *A Tara É Sû*

<sup>1</sup> Gumang wuê ê, haû nga-nhông é Yhumsîng Yesuq Hkrisduq dum lé râ hkyô, Yhang eq nga-nhông rahá zup nyi to râ hkyô eq séng luî, nungmoq lé ngamoq pying kat nau é gi, <sup>2</sup> haû Yhumsing é buinyi gi, jé to gù nghut bê gâ é myiqhtoi dang, luhkyang, laiká pé rajung jung, ngamoq chyáng mâ é nghut lhê ga nungmoq chyáng jé é nghut jáng, nungmoq é myit lui za hkâduî kó, hkâgyuq dân kó. <sup>3</sup> Hkâsu mù gâ le, haû htên byoq é yhangzo nghut é a tarâ Sû htoq shit luî, haû gumlau toq é hkyô hí a htoq htoq gi, buinyi haû jé râ a nghut, haû mù luî, nungmoq lé, ó yuq eq, hká dông mai mhaû kôlhang hkâjîng kó. <sup>4</sup> Haû yuq gi, Garai ga noqkuq huî é zè lhunglhang lé htuq htíng luî, haû pé banshoq é

htoq má yhanggùng yhang lhoq gyaú yû râ nghut lhê; haû mù luí, Garai Gasâng é noqkuq yhûm má zung to luí, yhanggùng yhang Garai Gasang nghut lhê ga taí râ nghut lhê.

<sup>5</sup> Ngò gi, nungmoq eq rahá nyi tô é hkûn, shí hkyô pé lé lhaq taí kyo kyo kut é hkyô lé, nungmoq a bun lo kó lhú? <sup>6</sup> Haú yuq gi, ahkyíng yam-yoq jé jáng sheq htoq shit sháng gaq ga, ahkuí, yhang lé hai èq hkûm zing tô é hkyô lé, nungmoq sê lhê. <sup>7</sup> Haû a tara é hkyô é haq dâ é a-tsam gi, mù zui nyi gù nghut bê; nghut kôlhang, haû lé hkûm zing nyi sù gi, hui htot pyám huí é hkûn jé shoq, haû lé hkûm zing nyi shirâ nghut lhê. <sup>8</sup> Haû hui htot pyám huí é hkûn, a tarâ Sû htoq shit râ nghut lhê; haû Yhumsîng Yesuq kúm gi, Yhang nhut mâ é soq èq yhang lé sat pyám râ eq, Yhang gyó lo u lhê é hpungwup mó èq, yhang lé lhoq htên pyám râ nghut lhê. <sup>9</sup> Haû a tarâ Sû lé lo é gi, Tsadán a-tsam đông laklá kumlhá pé, kumlhá pé, mauhpo muzó pé ajung jung kut mhaû é eq, <sup>10</sup> htên byoq huí nyi é bang lé mhaú zo râ agè ashop é hkyô jung hkyô mó lé tân shit râ nghut lhê. Yhangmoq htên byoq é gi, haû tengmán hkyô lé chyitdap luí hkyi yù hui râ nghut é hkyô lé he-ngik pyám kô é yanmai nghut ri. <sup>11</sup> Hau é yanmai, Garai Gasang gi, haû tengmán hkyô lé a lumjíng e za agè ashop hkyô má ô nau é lhunglhang bang mara byí é hui kó sháng gaq ga, <sup>12</sup> mhaû é dang lé jíng kó râ matú, a-tsam mó bo é lum shut râ hkyô lé, yhangmoq chyáng nhâng byi bê nghut ri.

#### *Mhoqshit é hkyô má gîng nyi râ hkyô*

<sup>13</sup> Nghut kôlhang, haû Yhumsîng chyitdap é gumang wuì ê, ngamoq gi, hkâ-nhám le, nungmoq é matú Garai Gasang lé jeju hkyá-on râ dut ri. Hkâsu mù gâ le, haû Woi-nyí èq lhoq sân-yúng nyi é muzó đông le, tengmán hkyô lé lumjíng é đông le, hkyi yù hui râ matú, Garai Gasang gi, nungmoq lé, sân-hi mai hkyin yù bê nghut ri. <sup>14</sup> Yhang gi, nga-nhûng é Yhumsîng Yesuq Hkrisduq é hpungwup shingkang má, nungmoq wó bo lòm shoq ga, ngamoq é gabú danglù đông nungmoq lé shí hkyô má ji yù bê nghut lhê. <sup>15</sup> Haû mù luí, gumang wuì ê, nhutdang đông nghut nghut, laiká đông nghut nghut, nungmoq lé ngamoq lhai byí é mhoqshit hkyô lé zui gîng nyi luí, gîng gîng yap nyi keq.

<sup>16</sup> Yhâng é jeju yanmai, nga-nhúng lé, ahtum abyuq é myit wum byi hkyô eq ge é myit myoqbyù hkyô lé byí é, nga-nhúng lé chyitdap é, nga-nhúng é Íwa Garai Gasang eq nga-nhúng é Yhumsîng Yesuq Hkrisduq gi, <sup>17</sup> nungmoq é i-myt má wum byi luí, ge é muzó eq ge é nhutdang lhumjup má, nungmoq lé wum-o lhoq kíng byi sháng gaq ô!

### 3

#### *Kyû Dung Byi Râ Matú Lung Kat É Hkyô*

<sup>1</sup> Gumang wuì ê, je htâng má pying kat nau é hkyô gi, nungmoq chyáng dut wú bê eq rajung za, haû Yhumsîng é mungdang gi, hân hân byo myín ló mù, lhoq gyaú é hui sháng gaq, ngamoq é matú kyû bo dung byi kó laq. <sup>2</sup> Yuq hkyô mó gi, lumjíng myit bo é a nghut é yanmai, haû achayut agè ashop é byu pê chyáng mai ngamoq wó lut râ matú le, kyû bo dung byi kó laq. <sup>3</sup> Nghut kôlhang, haû Yhumsîng gi, lhumzui é sù nghut é yanmai, Yhang nungmoq lé wum-o lhoq kíng byi mù, haû agè ashop su chyáng mai nungmoq lé hung yù râ nghut lhê. <sup>4</sup> Nungmoq gi, ngamoq pying tô é dang pé lé kut nyí mù, xoq luí le kut nyí râ nghut lhê nghû, haû Yhumsîng má ngamoq hkyak myit lum tô lhê. <sup>5</sup> Haû Yhumsîng gi, nungmoq lé Garai Gasâng é chyitdap hkyô eq Hkrisduq é hkam jân é hkyô má, shuí wàng sháng gaq ô!

#### *Mû Zui Shikut Râ É Hkyô*

<sup>6</sup> Gumang wuì ê, ngamoq gi, ngamoq chyáng mai nungmoq hap yù bê ngamoq mhoqshit é hkyô đông a nyi yap é eq lagôn é gumang ó yuq eq le, we we nyi keq nghû, haû Yhumsîng Yesuq Hkrisduq é myíng mai nungmoq lé hkunmó hkyô kat lhê. <sup>7</sup> Hkâsu mù gâ le, ngamoq kut é alik lé hká đông cháng râ dut é gi, nungmoq yhang sê lhê. Ngamoq gi, nungmoq eq rahá nyi tô é hkûn, lagôn é hkyô a bo wú é htoq agó, <sup>8</sup> ó yuq é zoshuq lé le, ngùn a byí é a zo wú é nghut lhê. Nungmoq má ó yuq lé le wôlai a byi sháng gaq nghû, ngamoq gi, muzó shikut hkyô eq wuìhke hkyô má, nyí lé, myín lé, zui saí é nghut

lhê. <sup>9</sup> Ngamoq gi, nungmoq lé garúm nhâng râ ahkáng a wó é a nghut, yhumsing gùng lé nungmoq cháng râ matú alik dut sháng gaq nghû sheq, haû su kut é ru nghut lhê.

<sup>10</sup> Hkâsu mù gâ le, ngamoq, nungmoq eq rahá nyi é hkûn, "Mû a kâm zui sù gi, a zo sháng gaq." nghû, nungmoq lé ngamoq mai sang to bê nghut lhê.

<sup>11</sup> Hkâsu mù gâ le, nungmoq chyáng mã é byù ra-am lagon luî, haî mù le a zuî e za, mù châng lhoq gyô byî wún akô gâ é hkyô lé, ngamoq wó gyô é yanmai nghut lhê. <sup>12</sup> Ngamoq gi, haû su kut é bang lé, zim za nyi mù zui saí luî, yhumsing é zoshuq ho nyi kó sháng gaq nghû, haû Yhumsîng Yesuq Hkrisduq é myìng lé lang luî, hkunmó hkyô kat mù, wum byî kat lhê. <sup>13</sup> Gumang wuî ê, nungmoq kúm gi, ge é muzó kut é hkyô má, hkâ-nhám le, hkâ-ngú byuq bùm kó.

<sup>14</sup> Byù rayuq yuq gi, laiká shî má ngamoq mhoqshit é hkyô lé, a châng é nghut jáng, haú yuq lé rago chôm matsîng yù mù, yhang hoq bun sháng gaq, yhang eq hkâzûm yap kó. <sup>15</sup> Nghut kôlhang, yhang lé gyè rayuq dông a sôn e za, gumang rayuq dông lhoq pun lhoq kyîng nyi keq.

*Ló Htâng Lhê É Shi-kyám Dang*

<sup>16</sup> Haû nguìngón hkyô é Yhumsîng yhang gi, ahkyíng hkangmó eq hkyô hkat hkangmó má, nungmoq lé nguìngón hkyô byî nyi sháng gaq. Haû Yhumsîng gi, nungmoq banshoq bang eq ru nyi nyi sháng gaq.

<sup>17</sup> Ngò, Poluq gi, ngá é loq mai yhang shi-kyám dang shî lé kê kat lhê; shî gi, ngò kê é laiká banshoq má kumlhá nghut lhê. Ngò kê é gi, shí dông chyat nghut lhê.

<sup>18</sup> Nga-nhûng é Yhumsîng Yesuq Hkrisduq é jeju gi, nungmoq banshoq bâng chyáng ru joq nyi sháng gaq ô!

## TIMOHTI Chyáng Hî Dàm Hun Kat é Laiká (1 Timothy)

<sup>1</sup> Nga-nhông é hkyi yù Sû Garai Gasang eq nga-nhông é myit myoqbyù jang nghut é Hkrisduq Yesuq é hkunmó eq rajung za, Hkrisduq Yesuq é lagyo nghut sù, ngò Poluq gi, <sup>2</sup> haù lumjínq hkyô má ngá zo sîng nghut sù, Timohti lé dang kyô kat lhê; haù Îwa Garai Gasang eq nga-nhông é Yhumsîng Hkrisduq Yesuq chyáng mâ é, jeju eq shogyo nhikmyin hkyô, nguingón hkyô gi, náng chyáng ru joq nyî sháng gaq ô.

### *Sará Pyoq Pé Lé Sidiq Râ Hkyô*

<sup>3</sup> Ngò, Makedoni mau má jé wang ló é hkûn, pying to hkô é eq rajung za, Ehpesu myuq má nyi to shi aq; haù hkûn sheq, náng gi, shut shai é mhoqshit hkyô lé mhoqshit é bang a mhoq xoq lo râ matú le, <sup>4</sup> myit htoq mhô-myi dang eq a dat htúm é byù xik labaù má yhangmoq a ap nóng râ matú le, haù bang lé hkunmó wó hkyó râ nghut lhê. Haù hkyô pé gi, lumjínq myit mai kut htoq é Garai Gasâng é muzó lé lhoq htoq râ malaî, mabyoq jishûm za sheq lhoq htoq nyi é nghut lhê. <sup>5</sup> Haù hkunmó hkyó luî myit myoqbyu tô é hkyô gi, chyitdap myit yhang nghut ri; chyitdap myit haù gi, sansêng é i-myit, mara a bò bûn é myit eq lumjínq myit akying mai lo é nghut lhê. <sup>6</sup> Byù ra-am gi, haù hkyô pé mai htoq ló kôluî, dangsôm taî é hkyô shut lhing ló byuq bekô nghut ri. <sup>7</sup> Haù bang gi, jep é tarâ sará pé dut naù kôlhang, yhangmoq haî taî nyi é hkyô lé le, hkyak, haî lé mhoqshit é hkyô lé le, a sé kó nghut ri.

<sup>8</sup> Rayuq yuq, jep é tarâ lé rago chung é nghut jáng, jep é tarâ gi, ge é hkyô nghut é lé, nga-nhông sê lhê. <sup>9</sup> Haù jep é tarâ gi, dingmán bâng é matú tô tô é a nghut e za, tarâ lu laî é bang eq gumlau toq bâng é matú, tarâ a hkunggâ é bang eq mara kut bâng é matú, a chyoiyúng é bang eq lumjínq hkyô a cháng bâng é matú, yhangmoq é yhângwa lé nghut nghut, yhângnu lé nghut nghut, sat pyám bâng é matú, byù sat bâng é matú, <sup>10</sup> ashop é dông gungsho zùm yap é bang eq yuqgê yhangchang nyi zo lhum bâng é matú, jùn dông byù ung zo bang, mhaù é bang eq dakam mhaù bâng é matú, tengmán mhoqshit hkyô eq shai lhûm é lhunglhang bâng é matú sheq, jep é tarâ tô tô é nghut é lé, nga-nhông sê lhê. <sup>11</sup> Tengmán mhoqshit hkyô haù gi, hkungsô wó é Garai Gasâng eq ngo lé ap byi bê nghut é, Yhâng é hpungwup bo é gabú danglù eq rajung za nghut ri.

### *Poluq Chyáng Yhumsing É Jeju Joq Nyi É Hkyô*

<sup>12</sup> Ngò gi, ngo lé wum-o byî é, nga-nhông é Yhumsîng Hkrisduq Yesuq lé jeju hkya-ôn lhê; hkâsu mù gâ le, Yhang gi, ngo lé lhumzui sù rayuq dông sôn yù luî, Yhâng é muzó jizó má hkyin kat yu é yanmai nghut lhê. <sup>13</sup> Hí hkûn, ngò gi, Garai Gasang lé taî hpoi sù, zing-ri sù eq byù rhoî sù nghut wú kôlhang, a sé shi mù lumjínq myit a bo e za kut é yanmai, shogyo nhikmyin yu é hkyô lé ngò wó yu é nghut lhê. <sup>14</sup> Nga-nhông é Yhumsîng é jeju lé le, Hkrisduq Yesuq eq sêng é lumjínq myit eq chyitdap myit lé le, ngá chyáng agùn agó hut hkyô kat byi bê nghut ri.

<sup>15</sup> Yubak dap bang lé hkyi yù râ matú, Hkrisduq Yesuq gi, mingkan má jé lé bê gâ é dang gi, lumjínq é mungdang nghut luî, gè gè yhang lhom yù gíng é dang nghut lhê. Haù yubak dap bang má, ngò gi, yubak je ko sù nghut é nghut lhê. <sup>16</sup> Nghut kôlhang, Hkrisduq Yesuq gi, Yhang lé lumjínq luî ahtum abyuq é asak lé wó yù râ bâng é alik dut râ matú, yubak dap bang má yubak je ko sù nghut é, ngá é ahtoq má, Yhâng é hkam jan hkyô lhunglhang wó tûn shit sháng gaq ga, Garai Gasang gi, ngo lé shogyo nhikmyin yu ri. <sup>17</sup> Haù mù, haù aróng eq hpungwup shingkang gi, ahtum abyuq é, a dat htên byoq é, myoq eq a byu-myang é Hkohkâm nghut sù, rayuq zâ é Garai Gasâng chyáng pyat dedu ahtum abyuq ru joq nyî sháng gaq ô! Amen.

<sup>18</sup> Ngá zo Timohti ê, nàng eq séng luí myiqhtoi dang joq wú é eq rajung za, ngò gi, nang lé haú dông mhoqshit kat lhê; haú mù, nàng gi, haú pé lé chung nyì luí, ge é majan zan mù, <sup>19</sup> lumjín myit eq mara a bò bôn é myit bo nyì sháng gaq. Byù ra-am gi, haú hkyô pé lé he-ngik pyám kô é nghut luí, yhangmoq é lumjín myit gi, wuì-sanghpo htên byoq ló é su htên byoq byuq bekô nghut ri. <sup>20</sup> Haú bang má, Humenu eq Alesander le bò kômù, Garai Gasang lé taí hpoì é dang a taí râ matú mhoq yù kó sháng gaq nghû, ngò, yhangnhik lé Tsadán é loq má ap pyám bê nghut lhê.

## 2

### *Noqkuq Hkyô Eq Séng Luí Mhoqshit Byí É Hkyô*

<sup>1</sup> Haú mù luí, ngò, hí pying kat nau é gi, tarâ hkunggâ é eq hkungga gín é hkyô banshoq má, nga-nhúng wó nguingón yuqyo nyì sháng gaq, hkohkâm pé eq ahkáng ayá wó bang banshoq é matú le, <sup>2</sup> yuq hkangmó é matú le, dúng tôngbán byi, kyúdung byi, dúng xoq byi, jeju hkyá-on byi, kut aq nghû nau ri. <sup>3</sup> Haú gi, ge é hkyô nghut mù, nga-nhúng é hkyi yù Sû Garai Gasang ô nau é hkyô nghut ri. <sup>4</sup> Yhang gi, byù lhunglhang bang hkyi yu é hui mù, tengmán é mungdang lé sê gyo râ lé, ô nau nyi ri. <sup>5</sup> Hkâsu mù gâ le, Garai Gasang gi, rayuq za nghut luí, Garai Gasang eq byu é gyoro má sô xoq byi sù le rayuq za nghut lhê; haú yuq gi, xângzo byù nghut é Hkrisduq Yesuq nghut ri. <sup>6</sup> Yhang gi, byù lhunglhang bâng é matú shíhtaí gunglik hkungga dông Yhânggùng lé byí pyám bê nghut ri; haú gi, ahkýng yam-yoq jé é hkûn, saksé htoq shit bê nghut lhê. <sup>7</sup> Ngò gi, tûngbaù pé lé, tengmán é lumjín hkyô mhoqshit râ matú, hkô kyo sù rayuq eq lagyo rayuq dông hkyin tô é hui sù nghut lhê. Ngò, haú su taí é gi, mhaú taí é a nghut, têng é hkyô lé za taí nyi é ru nghut lhê.

<sup>8</sup> Yuqgè wuì gi, nhikjum yô é hkyô eq dang htíng htíng lhûm é hkyô a bo e za, jowò hkangmó má chyoyúng é loq tû mù kyúdung râ lé, ngò ô nau ri.

<sup>9</sup> Myiwe wuì gi, xâm nik nik é, hîng zè, palhé, hpaù jung mebû èq a mhôn chung e za, siri bo é mebu wut chûng mù, tap tap za, shuq shuq za kut luí, <sup>10</sup> Garai Gasang lé noqkuq é myiwe wuì eq gín shoq, ge é muzó èq yhumsing gùng lé mhôn nyi râ lé le, ngò ô nau ri.

<sup>11</sup> Myiwe gi, uphkang tô é dông châng nyi mù, zim za mhoq yù kó sháng gaq. <sup>12</sup> Myiwe gi, yuqgè lé mhoqshit râ hkyô lé le, yuqgè lé uphkang râ hkyô lé le, ngò ahkáng a byi; myiwe gi, zim za kut nyi ra râ nghut lhê. <sup>13</sup> Hkâsu mù gâ le, Adam lé hí hpan to mù, Ewaq lé hpan é ru nghut lhê. <sup>14</sup> Hau htoq agó, Adam gi, mhaú é hui zo sù a nghut; haú myiwe sheq mhaú é hui zo luí, mara kut shut é ru nghut lhê. <sup>15</sup> Nghut kôlhang, myiwe wuì gi, lumjín myit, chyitdap myit eq chyoyúng hkyô má, shuq shuq za kut mù, yhangmoq xoq châng nyi kô é nghut jáng, zoshâng hku é dông mai hkyi yu é hui kó râ nghut lhê.✠

## 3

### *Hpúng-up Eq Hpungtê Kut Râ Bâng É Hkyô*

<sup>1</sup> Rayuq yuq, hpúng-up ayá lé ô nau nyi é nghut jáng, haú yuq gi, aróng wó é muzó lé ô nau nyi ri gâ é dang gi, lumgín é dang nghut nyi ri. <sup>2</sup> Haú mù luí, hpúng-up rayuq gi, mara hûn râ hkyô a bo é sù, myiwe rayuq za wó é sù, dat sidiq é sù, yhumsing gùng lé wó hkang é sù, hkungga gín é sù, byù bíng lé dat hkulum é sù, dat mhoqshit é sù, <sup>3</sup> îhpê é jùn a dut é sù, byoq lhum byoq cheq a kut e za nûm é sù, mabyoq jishûm a lhoq htoq é sù, ngunzè lé a chyitdap é sù, nghut râ lhê. <sup>4</sup> Yhang gi, yhâng é ikun lé rago dat uphkang luí, yhang zô pé mai hkungga myit bo é èq yhâng dang lé gyo byí é sù le, nghut râ lhê. <sup>5</sup> Rayuq yuq, yhumsing é ikun lé lháng a dat uphkang é nghut le gi, Garai Gasang é noqkuq hpúng lé gi, hkâsu kut wó wú gon râ lú? <sup>6</sup> Chángzo dut é a myáng shi é sù gi, hpúng-up wó kut râ a nghut, kut é nghut jáng, yhang gi, nghutbôn lò luí, jéyáng é hkyô lé nat Tsadán hui zô é su hui zo abe. <sup>7</sup> Hpúng-up rayuq gi, tûngbaù pê hí má ge é myìng

✠ 2:15 Apûn 3:16



wó é sù le dut râ lhê; haû jáng, yhang gi, taî hpoî pyâm é lé le a hui, nat Tsadán é tuihkyó má le a myí, dut râ nghut lhê.

<sup>8</sup> Haû eq rajung za, hpungtê pé gi, hkungga gíng é bang, shô-kó a xân é bang, îhpê é jùn a dut é bang, a tengmán é amyat lé a ho é bang, nghut râ lhê. <sup>9</sup> Yhangmoq gi, lumjínng hkyô mâ é nik é mauhpo tengmán hkyô pé lé, sansêng é i-myt eq châng nyi ra râ nghut lhê. <sup>10</sup> Yhangmoq gi, chyam é lé hí huî wú kó sháng gaq, hau htâng, yhangmoq lé mara hûn râ hkyô haî a bò lo jáng, hpungtê mù lé wùn kó sháng gaq.

<sup>11</sup> Haû eq rajung za, yhangmoq é yhumsîng myhî pé le, myit no nhang é dang a taî e za, dat sidiq é eq hkyô hkangmó má lumgínng luî, hkungga gíng é myiwe wuî, nghut ra râ dut lhê.

<sup>12</sup> Hpungtê rayuq gi, myiwe rayuq za wó é sù, yhangzô pé eq yhâng ikun lé rago za dat wùn waq é sù, dut ra râ nghut lhê. <sup>13</sup> Hpungtê mù lé rago za wùn waq bê bang gi, yhumsîng é matú aróng lé le, Hkrisduq Yesuq lé yhangmoq lumjínng hkyô má, gyuq kyum é hkyô a bo é myit mó lé le, hkyak wó yu akô nghut ri.

<sup>14</sup> Ngò gi, hkâ-myháng a myáng má náng chyáng lé jé râ matú, myit myoqbyu to kôlhang, ahkyínng du myáng pyâm le, <sup>15</sup> Garai Gasâng é ikun hkaû má, byu pé hká dông nyi yap râ é hkyô lé, nàng sé sháng gaq nghû, pying kat é dang shi pé lé ká byî kat lhê; ikun haû gi, rû dui nyi é Garai Gasâng é noqkuq hpúng nghut luî, tengmán hkyo é hkungmó-zîng eq apûn awang nghut ri. <sup>16</sup> Tarâ hkungga hkyo é zaú tô é hkyô gi, ko dik é nghut é lé, ó yuq le wó he-ngik pyâm é a nghut;

haû gi, Yhang, byù gungsho má htoq shit mù, haû Woi-nyí mai Yhang lé saksé hkám byi luî, maumang lagyô pé gi, Yhang lé myàng bê nghut ri; byuhú ahú hú má Yhâng é hkyô lé hko kyo mù, Yhang lé mingkan byu pé lumjínng luî, hpungwup shingkang eq Yhang lé mauhkûng shut shuí toq yû bê nghut ri.

#### 4

##### *Timohti Lé Mhoqshit É Hkyô*

<sup>1</sup> Jihtûm buinyi pé má, byù ra-am gi, lumjínng hkyô mai htak htoq ló luî, mhaú zô é woi-nyí pé htâng cháng kó râ eq nat gang mai lo é mhoqshit hkyô pé lé gyo byi kó râ nghut lhê ga, haû Woi-nyí gi, san za taî ri. <sup>2</sup> Haû sù é mhoqshit hkyô pé gi, gegùn labyoq kut é byù-mhaû pé chyáng mai lo é nghut lhê; haû bâng é myit nhiklhum gi, nyhê nhe tô é shamtoq eq nyhê man tô é su dut byuq bê nghut ri. <sup>3</sup> Haú bang gi, hâng lhûm é hkyô lé hkûm tang é hkyô lé le, haû lumjínng luî tengmán hkyô lé sê é bang mai jeju hkya-on mù hap yù ge é, Garai Gasang hpan to byî é zoshuq lé koi pyám nhang é le, kut akô nghut ri. <sup>4</sup> Garai Gasang hpan tô é lhunglhang gi, ge é chyat nghut ri; Garai Gasâng é mungdang eq kyûdûng é dang dông haú pé lé lhoq sân-yúng nyi é nghut é yanmai, <sup>5</sup> jeju hkya-on luî hap yu é nghut le gi, haî jung lé lhang he-ngik pyám râ hkyô a bò nghut ri.

<sup>6</sup> Haû gumang wuî lé, nàng haú hkyô pé lhoq pun lhoq kyîng é nghut le gi, nàng gi, haû nàng cháng bê ge é mhoqshit hkyô eq lumjínng hkyô mâ é tengmán hkyô má, kô myhâng sù nàng nghut râ htoq agó, Hkrisduq Yesuq é ge é hpungmù wùn sù le dut râ nghut lhê.

<sup>7</sup> Garai a bo é myit htoq mhô-myi dang eq hpô-myhî mâng pé é mhô-myi dangsôm lé koi pyám luî, tarâ hkunggâ é hkyô má yhumsîng gùng lé lhoq kûng yù aq. <sup>8</sup> Hkâsu mù gâ le, gungsho lé lhoq kûng é hkyô gi, akyû shau za htoq é nghut lhê; nghut kôlhang, tarâ hkunggâ é hkyô kúm gi, jung hkangmó é matú akyû bo lhê nghut mù luî, shí ipyat má le, htang pyat má le, akyû bo nyi ri.

<sup>9</sup> Haû gi, banshoq hap yù gíng é, lumgínng é mungdang nghut lhê. <sup>10</sup> Haû mù luî, xângzo byù banshoq bâng é hkyi yù Sù nghut é, je riyhang, lumjínng bâng é hkyi yù Sù nghut é, rû dui nyi é Garai Gasang má, nga-nhúng, myit myoqbyu to bê nghut é yanmai, nga-nhúng gi, gyai yhang shikut nyi lhê.

<sup>11</sup> Haú pé lé, hkunmó hkyó luî mhoqshit byî nyi aq. <sup>12</sup> Náng é zorâm pyat lé, ó yuq eq le a wú tiq pyám sháng gaq, dang taî é má le, nyi yap é hkyô má le, chyitdap é hkyô má le, lumjínng hkyô má le, sansêng é hkyô má le, lumjínng bâng é matú alik kut shit nyi

aq. <sup>13</sup> Náng chyáng ngò jé lé é buinyì jé shoq, nàng gi, Chyúmdang nghap kyô é má le, hko kyô é má le, mhoqshit é má le, ap nóng nyi aq. <sup>14</sup> Náng gi, hpúng suwún wui náng é ahtoq má loq ke byi é hkûn, myiqhtoi dang đông nang lé Garai Gasang byi to bê nghut é, woi-nyí hkyô eq sêng é chyunghuq lé, haí su a ngàm hkâkut pyám.

<sup>15</sup> Haú hkyô pé lé, myit zing zuq luí zui saí nyi aq; nàng kô myhang lo é hkyô lé, yuq hkangmó byu-myàng kó sháng gaq, náng gûng banshoq haú pé má ap nóng nyi aq. <sup>16</sup> Náng é asak duì hkyô má le, nàng mhoqshit é hkyô má le, rago sidiq nyi aq. Haú pé má ru gîng nyi aq, hkâsu mù gâ le, nàng haú su kut é nghut jáng, náng é asak lé le, náng chyáng mai gyô yu é bang lé le, nàng wó hkyi yu râ nghut lhê.

## 5

*Suwún Wui, Chuimó Pé, Jùn Pé Eq Séng Luí Hpaqchyí Byí É Hkyô*

<sup>1</sup> Asak ko sù lé dang htân a tân e za, yhumsing é îwa lé su, yhang lé lhoq pun lhoq kying aq. Zorâm wui lé gi, gumang wui lé su, <sup>2</sup> asak kô é myiwe wui lé gi, înu pé lé su zùm yap luí, zomyi wui lé gi, nhammó wui lé su sansêng é i-myt banshoq èq zùm yap nyi aq.

<sup>3</sup> Gè gè yhang garúm râ dut é chuimó myhí pé lé, hkunggâ nyi keq. <sup>4</sup> Nghut kôlhang, chuimó myhí rayuq yuq gi, zoshâng nghut nghut, gashu nghut nghut, wó é nghut jáng, haú bang gi, yhumsing é ikun lé wú gon luí, înu îwa eq îchyí îwhoí pé lé jeju taú é đông, yhangmoq é lumjîng hkyô lé, zui saí é má lhoq mhán nhâng râ lé hí mhoq yû ra râ nghut lhê; hkâsu mù gâ le, haú gi, Garai Gasang ô nau é hkyô nghut ri. <sup>5</sup> Haú lum râ ó yuq le a wó mù, gè gè yhang râ tô é chuimó myhí gi, Garai Gasâng chyáng myit myoqbyu nyi luí, nyí, myín xoq xoq kyûdung mù, Garai Gasang garúm râ hkyô lé dîng nyi ri. <sup>6</sup> Nghut kôlhang, ngón hkyô za cháng luí asak dui é chuimó myhí gi, asak dui nyi kôlhang, shí gù nghut bê nghut ri. <sup>7</sup> Yhangmoq lé, ó yuq èq le mara a hûn kó sháng gaq, haú hkyô pé lé le mhoqshit byi nyi aq. <sup>8</sup> Rayuq yuq, yhâng é buinùm ji-myi wui lé a baú é htoq agó, je luí yhumsing é ikun byù lé a baú é nghut le gi, haú lumjîng hkyô lé he-ngik pyám bê nghut luí, a lumjîng su htoq má je ashop é sù dut bê nghut ri.

<sup>9</sup> Hkyuq xê zàn byíng bê é chuimó myhí za a nghut jáng, chuimó jihpán má wó kat râ a nghut; hau htoq agó, yhang gi, yuqgè rayuq za wó wú é sù; <sup>10</sup> zoshâng wui lé hku baú é sù, bíng lé rago dat hkulum é sù, sân-yúng bê bang é hkyí lé chi byí é sù, wuîhke huí tô é bang lé garúm luí, ge é muzó junghkang jungmó má yhumsing gûng yhang ap nóng nyi ri ga, yhang kut é ge é muzó má myìng hû é sù le, nghut râ lhê.

<sup>11</sup> Asak tiq é chuimó myhí pé lé, jihpán haú má hkâkat. Hkâsu mù gâ le, gungsho ô nau é hkyo èq Hkrisduq chyáng yhangmoq ap nóng tô é hkyô lé ung pyám é hkûn, yhangmoq gi, myi ló naú kó râ nghut lhê. <sup>12</sup> Haú mù, yhangmoq gi, sâng-hi lé yhangmoq tô tô é danggidiq lé lhoq hpyoq pyám kô é yanmai, tarâ darâ é hui zo kó râ nghut lhê. <sup>13</sup> Hau htoq agó, yhangmoq gi, rayhûm htâng rayhûm châng wang wún kômù, lagôn mán byuq kó râ nghut lhê. Lagôn é bang za dut kó râ a nghut, lumù gansang é bang eq yhangmoq taí a ge é pé lé taí kômù, yhumsîng eq a sêng é mù má châng wang nyo wún é bang le, dut kó râ nghut lhê. <sup>14</sup> Haú mù luí, gyè pé mai lumù gansâng dang a wó taí pyám kó sháng gaq, asak tiq é chuimó myhí pé gi, myi ló mù, zoshâng hkû luí, yhangmoq é ikun lé gôn lajang râ matú, ngò, yhangmoq lé hpaqchyí byí kat lhê. <sup>15</sup> Hkâsu mù gâ le, ra-am gi, lhing taú ló kôluí, Tsadán é htâng châng nyi lugù nghut bekô nghut ri.

<sup>16</sup> Lumjîng é myiwe rayuq yuq gi, yhâng é ikun má chuimó myhí wó é nghut le, haú yuq é matú noqkuq hpúng lé wòlai a hun e za, yhang mai garúm yû ra râ nghut lhê; haú hkûn sheq, noqkuq hpúng gi, gè gè yhang râ tô é chuimó myhí pé lé wó garúm râ nghut lhê.

<sup>17</sup> Haú noqkuq hpúng lé rago za shuí û é hpúng suwún wui gi, akyû í tú hkam yù gíng lhê; haú mungdang hko é hkyô eq mhoqshit é hkyô má shikut é suwún wui gi, je riyhang hkam yù gíng lhê. <sup>18</sup> Hkâsu mù gâ le, "Guq nâng nyi é no lé, nhuttsung hkâ-tsûng to byi."✠ ga le, "Mù zui sù gi, yhâng é zuihpau wó yû gíng lhê."✠ ga le, Chyúmdang má taí

tô ri. <sup>19</sup> Hpúng suwún rayuq lé mara hun é hkyô lé, í yuq sum yuq mai saksé hkâm e za a nghut le gi, hkâlhóm yù. <sup>20</sup> Nghut kôlhang, lhoq pun lhoq kyîng é hkyô lé gôbang wó yù kô sháng gaq, mara kut shut é bang lé, shiwa byu pê hí má tân mhoqshit aq.

<sup>21</sup> Pyîng kat é dang shi pé lé, gamhkui myit a bo e za châng nyî râ eq, myoqdong hkyîn luî haî le a kut râ matú, Garai Gasang eq Hkrisduq Yesuq é hí má le, hkyin yù huî é maumang lagyô pê é hí má le, ngò, nang lé pyîng kat lhê.

<sup>22</sup> Ó yuq é ahtoq má le loq ke\* byi râ lé hkâhân; gôbang é mara hkaû má le hkâbo lòm. Yhumsîng yhang yhumsîng sân-yúng shoq kut nyî aq.

<sup>23</sup> Náng é wamdau ra luî, anum num no lò lò dut é yanmai, nàng gi, wuî za shuq é hkyô lé nô pyám luî, tsibiyiq wing le ratsuí tsuí shuq byi aq.

<sup>24</sup> Byù ra-âm é mara pé gi, de de dut é nghut mù luî, tarâ jéyáng é jang má hí ló jé ri; ra-âm é mara kúm gi, hau é htâng má châng byông htoq lo ri. <sup>25</sup> Haû eq rajung za, ge é muzó pé gi, de de nghut nyî luî, haû su de de a nghut é pé lé le, wó zaú to râ a nghut.

## 6

<sup>1</sup> Jùn dut é wòlai hkaû má nyi é lhunglhang bang gi, yhangmoq é yhumsîng wuî lé gyai yhang hkungga gíng lhê nghû, myit yù râ dut lhê; haû hkûn sheq, Garai Gasâng é myîng eq nga-nhûng é mhoqshit hkyô gi, lumù gansang é a hui râ nghut lhê. <sup>2</sup> Lumjîng é yhumsîng wuî é jùn gi, gumang wuî nghut é yanmai, yhangmoq lé a wú myuq é za, yhangmoq dojaú luî akyû myang hkâm zô é bang gi, lumjîng bang eq chyitdap gíng é bang nghut é yanmai, yhangmoq lé je ge é dông dojaú râ lhê. Shí hkyô pé lé, nàng gi, yhangmoq lé mhoq byî nyi é eq lhoq pun lhoq kyîng byî nyi aq.

### *Ngùn Lé Chyitdap É Hkyô*

<sup>3</sup> Rayuq yuq gi, shut é lumjîng hkyô lé mhoqshit luî, nga-nhûng é Yhumsîng Yesuq Hkrisduq é tengmán mhoqshit hkyô eq tarâ hkunggâ é mhoqshit hkyô lé a myit huî é nghut jáng, <sup>4</sup> haû yuq gi, nghutbûn é sù eq haî lé le a sê gyô é sù nghut ri. Yhang gi, htuq htîng lhûm é hkyô pé lé ô nau é, a ge é myit bò luî, dang eq séng mù mabyoq lhoq htoq ri; haû mai, manon é hkyô, byoq lhum byoq cheq é hkyô, lumù gansang é hkyô, agè ashop é dông myit ngam pyâm é hkyô eq, <sup>5</sup> haû tengmán hkyô lé lhoq hpyuq pyám mù, tarâ hkungga hkyô gi, ngùn zè wó hkyô za nghut ri ga myit yu é, i-myit lhoq htên pyám bê bâng é gyoro má, byîn a huî é hkyô pé lé, lhoq htoq kat ri.

<sup>6</sup> Nghut kôlhang, tarâ hkunggâ hkyô má nhik dik é hkyô bo é nghut le gi, amyat mó nghut nyi ri. <sup>7</sup> Hkâsu mù gâ le, nga-nhúng gi, mingkan htoq má haî jung le a yu wang lé, haû mai le haî wó yu htoq ló râ a nghut. <sup>8</sup> Haû mù luî, nga-nhúng gi, wutbu wutmè eq zoshuq wó é nghut jáng, hau èq nhik dik nyî sháng. <sup>9</sup> Wó naû sùt nau é byu pé gi, gunglaú hkyô eq tuihkyó má le, haû byoq yeq hkyô eq htên byoq hkyô má, byu pé lé myup shî nhang é, nga é hkyô myo myo eq myit nò nhâng nau é hkyô má le, byit gyó wâng kó râ nghut lhê. <sup>10</sup> Hkâsu mù gâ le, ngùn lé chyitdap é hkyô gi, agè ashop hkyô ajung jûng é apûn awang nghut nyi ri. Byù ra-am gi, ngùn lé ô nau luî, haû lumjîng hkyô mai sô nghoq ló mù, yhumsîng gùng lé yhumsîng, haû yón kuq hkyo èq htaû rot pyám bekô nghut ri.

### *Timohti Lé Pyîng Kat É Dang*

<sup>11</sup> Nghut kôlhang, Garai Gasâng é byù nàng gi, haû pé banshoq lé koi pyám luî, dingmán hkyô, tarâ hkungga hkyô, lumjîng hkyô, chyitdap hkyô, hkam jan hkyô eq nú-nhâm é hkyô pé lé châng hkat nyî aq. <sup>12</sup> Lumjîng hkyô eq sêng é ge é majan le zân nyî aq. Hap yù lumjîng bê ga, saksé myo myô pê é hí má, ge é dông nàng yín yu é hkûn, wut yu é hui luî wó é ahtum abyuq é asak lé, zuî zing nyî aq. <sup>13</sup> Haû lhunglhang lé asak byî é Garai Gasâng é hí má le, Pontu Pilat chyáng saksé hkâm nyi é hkûn, ge é dông yín yu é Hkrisduq Yesuq é hí má le, ngò, nang lé pyîng kat lhê: <sup>14</sup> Yhâng é ahkyíng yam-yoq jé jáng, Garai Gasang htoq shit nhâng râ nghut é sù, nga-nhûng é Yhumsîng Yesuq Hkrisduq htoq shit é buinyi

\* 5:22 Haû hkun lhê bang gi, hpúng suwún kut râ matú hkyin to bê bang lé, loq ke kyûdung byî é nghut lhê.

jé shoq, <sup>15</sup> nàng gi, agot a-u é hkyô eq mara hùn râ hkyô a bo e za, hkunmó shî lé châng nyì aq. Garai Gasang gi, hkungsô wó sù, Yhang za up sù, hkohkam pê é Hkohkâm, yhumsing pê é Yhumsîng, <sup>16</sup> Yhang za ahtum abyuq dui nyì sù, a ge chyâng htep e é maubó má dui nyì sù, ó yuq èq le a myang wú é, a wó myang é sù nghut nyi ri. Aróng eq hpungwup a-tsam gi, Yhâng chyáng ahtum abyuq ru joq nyì sháng gaq ô! Amen.

<sup>17</sup> Shí ipyat má wó sùt é bang gi, a gumrông râ eq a gîng é sutzè má yhangmoq é myit myoqbyù hkyô a tô e za, nga-nhúng nguingón yuqyo nyì râ matú junghkang jungmó lé agùn agó byî é sù, Garai Gasâng chyáng za, yhangmoq myit myoqbyu nyì râ matú, hkunmó hkyó aq. <sup>18</sup> Ge é hkyô kut lui, ge é muzó má wó sùt nyì mù, a chum e za, gam chûng nau é myit bò râ matú, yhangmoq lé hkunmó hkyó aq. <sup>19</sup> Haú dông mai, yhangmoq gi, jé lô râ ipyat é matú gîng é apûn awang dông, yhangmoq é matú sutzè wó tsîng to kó râ nghut lhê; haú hkûn sheq, yhangmoq gi, asak kyîng nghut é asak haû le wó zuî zing to kó râ nghut lhê.

<sup>20</sup> Timohti ê, nang lé ap to bê hkyô lé, zúng nyî aq. Tarâ a hkunggâ é po-ming ming bâng èq hpaqchyî nghut lhê ga myhîng shut é htuaq htîng lhum lhum kut é hkyô lé, koi pyám aq. <sup>21</sup> Byù ra-am gi, haû lé hpaqchyî nghut lhê ga yín yû kôluî, haû lumjîng hkyô mai so nghoq htoq ló byuq bekô nghut ri.

Jeju gi, nungmoq chyáng ru joq nyì sháng gaq ô.

## TIMOHTI

### Chyáng Htang Dàm Hun Kat é Laiká

(2 Timothy)

<sup>1</sup> Hkrisduq Yesuq chyáng mâ é asak byi râ gâ é danggidiq eq rajung za, Garai Gasang ô nau é dông, Hkrisduq Yesuq é lagyo nghut sù, ngò, Poluq gi, ngò chyitdap é ngá zo Timohti lé, dang kyô kat lhê.

<sup>2</sup> Haû Íwa Garai Gasang eq nga-nhông é Yhumsîng Hkrisduq Yesuq chyáng mâ é jeju eq shogyo nhikmyin hkyô, nguôngón hkyô gi, ru joq nyî sháng gaq ô!

#### *Lumluq Râ Matú Myit Wum Byî É Hkyô*

<sup>3</sup> Ngò gi, ngá é kyûdung dang má, nyí, myín, abyit alan nang lé bûn nyî uchyang, sân-yúng é i-myt mai, ngá é îchyí îwâ pé dojaú é su, ngò dojaú nyi é Garai Gasang lé, jeju hkya-ôn nyi lhê. <sup>4</sup> Ngò gi, ngò má gabú hkyô byíng jup sháng gaq nghû, náng é ngaubyi lé myit bûn nyi mù, nang lé gyai yhang myàng nau nyi ri. <sup>5</sup> Ngò gi, nang é gyíng é lumjín myit lé lhoq pûn yù mù, náng whoí Lu-i eq náng nu U-ni nhik chyáng má hí bo é lumjín myit, ahkuí, náng chyáng le bo ri nghû, hkyak myit lum nyi lhê. <sup>6</sup> Hau é yanmai, ngò loq ke byî é dông, náng má bo tô é Garai Gasang é chyunghuq lé, gyúng nhang nyi râ matú, nang lé ngò lhoq pûn kat lhê. <sup>7</sup> Hkâsu mù gâ le, Garai Gasang gi, gyuq sê é myit nga-nhông lé a kat byî e za, a-tsam bo é myit, chyitdap sê é myit, yhumsing gùng lé dat hkan é myit sheq kat byî tô é ru nghut lhê.

<sup>8</sup> Haû mù luí, náng gi, nga-nhông é Yhumsîng eq séng luí saksé hkâm é hkyô má le, Yhâng é yanmai htóng byû dut to sù ngá é hkyô má le, hoq myit a bo é za, Garai Gasang é wum-o mai, haû gabú danglu é matú, ngò eq rahá wuîhke jamjau chòm hui goq. <sup>9</sup> Garai Gasang gi, nga-nhông zui saí é muzó dông a nghut e za, Yhânggùng yhang myit sôn tô é hkyô eq Yhâng é jeju yanmai za, nga-nhông lé, hkyi yù luí chyoyúng é asak duí hkyô má ji yù bê nghut ri. Ahkýng nghu é lháng a joq shi mai yhang, jeju haû gi, Hkrisduq Yesuq má nga-nhông lé byi to gù nghut bê. <sup>10</sup> Nghut kôlháng, nga-nhông é hkyi yù Sù, Hkrisduq Yesuq pô htoq é dông, ahkuí, haû lé lhoq htoq shit bê nghut ri. Yhang gi, shî-nò hkyô lé lhoq htên pyám luí, haû gabú danglù dông mai, asak lé le, a dat htên byoq é hkyô lé le, lhoq htoq shit bê nghut ri. <sup>11</sup> Ngò gi, gabú danglu é matú hko kyo sù, lagyo eq mhoqshit sù dông, hkyin tô é hui sù nghut lhê. <sup>12</sup> Hau é yanmai, ngò gi, wuîhke jamjau shî lé huí nyi é nghut lhê. Nghut kôlháng, ngò gi, ó yuq lé lumjín bê nghut é hkyô lé, sê é htoq agó, Yhang lé ngò ap tô é pé lé, haû buinyi jé shoq, Yhang wó zúng râ nghut lhê nghû hkyak myit lum tô é yanmai, ngò a hoq.

<sup>13</sup> Náng gi, ngá chyáng mai wó gyô yu é tengmán dang pé lé, Hkrisduq Yesuq má, lumjín myit eq chyitdap myit mai alik kut yu nyi aq. <sup>14</sup> Náng lé ap byî to bê, haû ge é mungdang lé, nga-nhông chyáng bo tô é Chyoyúng Woi-nyí é wum-o mai zúng nyî aq.

<sup>15</sup> Asia mau mâ é bang yuq hkan gmó gi, ngo lé pyâm to kô é hkyô lé, náng sê lhê; haû bang má, Hpugelu eq Heramoge nhik le bo akô nghut ri.

<sup>16</sup> Haû Yhumsîng gi, Onesihpurû é yhumbyù lé shogyo nhikmyin é hkyô tûn shit sháng gaq; hkâsu mù gâ le, yhang gi, ngo lé anum num myit lhoq ngón é htoq agó, ngò wut é shamtoq-tuí é yanmai, a hoq e za, <sup>17</sup> yhang, Romaq myuq má jé nyi é hkûn, ngo lé myang hui shoq, ho shikut é sù nghut ri. <sup>18</sup> Haû Yhumsîng gi, haû buinyi má, yhang lé haû Yhumsing é shogyo nhikmyin hkyô byi sháng gaq! Ehpesu myuq má, yhang ngo lé hkâm-myhó garúm bê nghut é gi, náng rago yhang sê lhê.

## 2

<sup>1</sup> Haû mù, ngá zo ê, náng gi, Hkrisduq Yesuq mâ é jeju hkaû má, wúm bo nyi aq. <sup>2</sup> Náng gi, saksé myo myô é hí má ngá chyáng mai wó gyô yù bê hkyô pé lé, góbang lé dat mhoqshit é, wó lum é bang lé ap byi aq. <sup>3</sup> Hkrisduq Yesuq é ge é gyezo rayuq su, wuîhke

hkyô lé chôm jan nyi sháng. <sup>4</sup> Gyezo rayuq dông gyè mù wùn waq nyi é sù, ó yuq nghut kôle, gotû muzó má a bo lom é za, yang lé hkunmó hkyô nyi é gyezau lé, gabú nhâng nau é chyat nghut lhê. <sup>5</sup> Haû eq rajung za, shingjông é sù rayuq le, shingjông lhum poi wang é hkûn, tô tô é tarâ dông a châng e nghut le gi, ung é aróng chyunghuq lé wó yû râ a nghut. <sup>6</sup> Yo-mû zuí shikut é sù gi, kyôshi lé sân-hi myang hkam yû râ sù nghut lhê. <sup>7</sup> Haû Yhumsîng gi, shí pé banshoq lé wó sê é nyan nang lé byi râ nghut é yanmai, ngò taí é hkyô pé lé myit wú aq;

<sup>8</sup> Haû Dawiq é awut ashín nghut sù, Yesuq Hkrisduq gi, shi é mai dum dui toq bê hkyô lé myit bun aq; haû gi, ngá é gabú danglù nghut lhê. <sup>9</sup> Gabú danglù hau é yanmai, mara bò sú rayuq lé su, ngò gi, kyum hut é hui luí, hpuzô nyi é nghut lhê. Nghut kôlhang, Garai Gasâng é mungdang gi, kyum hut huí é a nghut. <sup>10</sup> Haû mù luí, ngò gi, Hkrisduq Yesuq chyáng mâ é hkyi yû hkyô eq ahtum abyuq é hpungwup shingkanng lé wó yû kó sháng gaq nghû, haû hkyin yû hui bâng é matú, jung hkangmó lé hkam jân nyi lhê.

<sup>11</sup> A-ô mâ é dang gi, lumgíng é dang nghut lhê:

Nga-nhúng gi, Yang eq rahá shí bê nghut jáng, Yang eq rahá dui râ nghut lhê.

<sup>12</sup> Nga-nhúng gi, hkam jân é nghut jáng, Yang eq rahá up râ nghut lhê.

Nga-nhúng gi, Yang lé he-ngik pyâm é nghut jáng, Yang le, nga-nhúng lé he-ngik pyâm râ nghut lhê.

<sup>13</sup> Nga-nhúng gi, lhumzui myit a bò kôlhang, Yang gi, lhumzui nyi râ nghut lhê. Hkâsu mù gâ le, Yang gi, yhanggùng yang wó he-ngik pyâm é a nghut.

#### *Garai Gasâng Hí Má Myoqdong Wó É Mû Zui Sù*

<sup>14</sup> Nàng gi, yangmoq lé, shí hkyô pé xoq luí lhoq pùn nyi aq. Dang pé eq séng luí, a byoq lhùm nyi kó sháng gaq, Garai Gasâng hí má yangmoq lé sidiq byi aq. Haû gi, akyû a bo é htoq agó, wó gyô é bang lé htên byoq nhang é hkyô za nghut lhê. <sup>15</sup> Nàng gi, haû tengmán é mungdang lé jo shoq chung jai é eq, hoq nó a râ é mù zui sù rayuq dông Garai Gasâng hí má myoqdong wó shoq, wó dut é myhó shikut aq. <sup>16</sup> Tarâ a hkunggâ é po-ming ming bang lé koi pyám aq. Hkâsu mù gâ le, haû su kut é bang gi, tarâ a hkunggâ é hkyô má je riyhang wang nân ló byuq é bang dut kó râ nghut lhê. <sup>17</sup> Yangmoq é mhoqshit hkyô gi, mong ana su byo myín ló râ nghut lhê; haû bang má Humenu eq Hpilitu nhik le bò kôluí, <sup>18</sup> haû tengmán hkyô mai sô nghoq ló byuq akô. Yangnhik gi, haû dum dui toq hkyô dut lai bê ga taí kômù, ra-âm é lumjíng hkyô lé lhoq htên pyám byi akô nghut ri. <sup>19</sup> Nghut kôlhang, "Haû Yhumsîng gi, Yang eq séng é bang lé sê lhê."✠ ga luí le, "Haû Yhumsing é myíng lé yín yu é bang yuq hkangmó gi, agè ashop hkyô mai lhing tau ra kó râ nghut lhê." ga luí le, dizik haû htung tap tô é, Garai Gasâng é gíng tîng é apùn awang gi, gíng nyi ri.

<sup>20</sup> Yhùm mó ralhum má gi, hîng auhkoq zè, ngùn auhkoq zè baú za joq é a nghut, sik auhkoq zè, tse auhkoq zè le joq lhê; ra-am gi, aróng hkyo é matú, ra-am gi, aróng hkyo é matú a nghut. <sup>21</sup> Haû mù luí, haû pé mai yhumsing gùng lé lhoq sansêng pyâm é sù gi, chyoyúng luí, haû Yhumsîng chung jai gíng é sù, ge é muzó hkangmó kut râ hen tô é sù nghut é yanmai, aróng hkyo é matú chungzè dut râ nghut lhê.

<sup>22</sup> Zoram é agè ashop é ô nau hkyô lé koi pyám mù, haû sân-yúng é myit mai, Yhumsîng lé wut dúng é bang eq rahá, dîngmán hkyô, lhumzui hkyô, chyitdap hkyô, nguínón hkyô pé lé, châng hkat nyi aq. <sup>23</sup> Go é eq ngok é dông dang jet jet lhùm é hkyô gi, mabyoq lhoq htoq é hkyô nghut é lé, nàng sê lhê nghut é yanmai, haû hkyô lé koi pyám aq. <sup>24</sup> Haû Yhumsing é dui-nhâng zoshâng gi, mabyoq a lhoq htoq é za, yuq hkangmó lé dat myit tê byi é, wó mhoqshit é, a dat nhik-yô é su dut ra râ nghut lhê. <sup>25</sup> Yang gi, yang lé htuq htîng é bang lé, nú-nhâm é dông mhoqshit byi ra râ nghut lhê; haû hkûn, Garai Gasang gi, yangmoq lé myit lîng hkyô byi mù, tengmán hkyô lé sê gyo nhâng luí, <sup>26</sup> yangmoq gi, bûn gyîng lò mù, nat Tsadán ô nau é hkyô lé kut byi râ matú, chyup yû huí é, nat Tsadán é tuihkyô mai wó hpang lut ló kó abe nghû, myit lum kat lhê.

✠ 2:19 Gyung So 16:5

## 3

*Jihtûm Buinyì Pé Má Dut Lò Râ Hkyô*

<sup>1</sup> Jihtûm buinyì pé má, wuîhkê é ahkyíng pé joq lò râ nghut é lé, nàng matsîng to aq. <sup>2</sup> Hkâsu mù gâ le, haú u lé, byu pé gi, yhumsing gùng lé za chyitdap é bang, ngùn lé myoqnoq é bang, gumrong é bang, nghutbûn é bang, góbang lé taî hpoî é bang, înu îwa nyo é lé a gyô é bang, jeju a dat bûn é bang, a chyoiyúng é bang, <sup>3</sup> chyitdap myit a bo é bang, mara hkyut byi a sê é bang, lumù gansang é bang, yhumsing gùng lé hkâng a sê é bang, byuwuî pé, ge é hkyô lé a ngui é bang, <sup>4</sup> haq gumlaû é bang, a bun a so dut wún é bang, yhumsing gùng lé za hkik bûn é bang, Garai Gasang lé chyitdap é bang dut râ malaî ngón kún hkyô lé za chyitdap é bang, dut bùm kó râ nghut lhê. <sup>5</sup> Yhangmoq gi, tarâ hkunggâ é bang su dut kôlhang, haú pê é a-tsam lé he-ngik pyâm akô nghut ri; haú sù é bang lé, nàng koi pyâm nyì aq.

<sup>6</sup> Yhangmoq gi, hpaqchyî da mù yhûm pé má wàng kôluî, mara wòlai lé wun é, agè ashop é ô naù hkyô ajung jung má sô nghoq ló byuq é, <sup>7</sup> hkâ-nhám le mhoq yu nyì kôlhang, haú tengmán hkyô lé a sê gyô é, myit nyhôm é myiwe wuì lé wó lîng nghoq yu é bang nghut akô. <sup>8</sup> Yanne eq Yambre nhik gi, Mosheq lé htuq htîng é su, haú bang le, haú tengmán hkyô lé htuq htîng akô nghut ri; yhangmoq gi, myit é hkyô htên byuq kôluî, haú lumjîng hkyô má lhum a zuî é bang nghut akô. <sup>9</sup> Nghut kôlhang, haú nhik é hkyô byông htoq lo é su, yuq hkangmó é hí má, yhangmoq ngok é hkyô byông htoq lô râ nghut mù, haú mai lai luî yhangmoq wó kut jat kó râ a nghut.

*Timohti Lé Pying Kat É Dang*

<sup>10</sup> Nàng kúm gi, ngá é mhoqshit hkyô, ngá é nyiyap hkyô, ngò myit myoqbyu tô é hkyô, ngá é lumjîng hkyô, myit hîng hkyô, chyitdap hkyô, hkam jan hkyô, <sup>11</sup> zing-ri huî é hkyô eq wuîhke jamjau hkyô pé lé le, Antioku wà mó, Ikoni wà mó eq Lustra wà mó pé má ngò hui zô é, zing-ri hkyô pé lé, ngò hkam jan bê hkyô lé le, nàng rago sê lhê. Nghut kôle, haú Yhumsîng gi, haú pé banshoq mai ngo lé xe yù bê nghut ri. <sup>12</sup> Gè gè yhang, agè ashop é byu pé eq mhaû kut é bang gi, mhaû zô nyi bum é eq mhaû zô é huî nyi bùm kôluî, a ge é hkyô shut je riyhang myô jat lò kô é hkûn, <sup>13</sup> Hkrisduq Yesuq má tarâ hkunggâ é asak dông nyiyap nau é bang yuq hkangmó gi, zing-rî é hui kó râ nghut lhê. <sup>14</sup> Nghut kôlhang, nàng gi, ô pê chyáng mai nàng mhoq yû bê hkyô lé le, Hkrisduq Yesuq lé lumjîng jáng hkyi yu é hui shoq, <sup>15</sup> nang lé hpaqchyî byéng-yá wó byî é chyoiyúng Chyúmdang pé lé, zoshâng hkûn mai nàng sê to bê hkyô lé le, nàng sê é yanmai, nàng mhoq yu to bê hkyô eq hkyak lumjîng to bê hkyô má, xoq kut nyî aq. <sup>16</sup> Chyúmdang hkangmó gi, Garai Gasâng é soq hâng tô é pé chyat nghut é yanmai, mhoqshit é hkyô, tân mhoq é hkyô, lhoq jo byî é hkyô eq dingmán hkyô lé tân shit byî é hkyô pê é matú, akyû bo ri; <sup>17</sup> haú mù luî, haú Garai Gasâng é byù gi, ge é muzó jizó hkangmó lé kut râ matú, wó gumjup râ nghut lhê.

## 4

<sup>1</sup> Garai Gasâng é hí má le, dui nyì bang eq shi byuq bang lé tarâ dara râ sù Hkrisduq Yesuq é hí má le, Yhang htoq shit râ hkyô eq Yhâng mingdán é yanmai, ngò, nang lé pying kat é gi, <sup>2</sup> haú mungdang lé hko kyo aq; ahkyíng yam-yoq ang kôlhang, a ang kôlhang, rì rì hen to aq; myit gyai hing é eq rago za mhoqshit é dông, lhoq jo byi, tân mhoqshit é eq myit wum byi kut nyî aq. <sup>3</sup> Hkâsu mù gâ le, byu pé gi, tengmán mhoqshit hkyô lé a kâm gyô é ahkyíng jé mù, yhangmoq ô naù yut yut é hkyô cháng luî, yhangmoq é no yo bui nau é nohkyap gyô nau é hkyô taî nhâng râ matú, sará pé rajùm rayò lé lhîngkyuq má lhoq tsing to kó râ nghut lhê. <sup>4</sup> Yhangmoq gi, haú tengmán hkyô mai yhangmoq é nohkyap lé lhîng pyám mù, myit htoq mhô-myi dang shut lhîng ló kó râ nghut lhê. <sup>5</sup> Nghut kôlhang, nàng gi, dut tô é hkyô banshoq má rago sidiq nyì aq; wuîhke jamjau hkyô lé hkam jân nyì aq; gabú danglù hko kyô é muzó kut nyî aq; nàng é hpungmû banshoq lé wùn waq nyì aq.

<sup>6</sup> Hkâsu mù gâ le, ngò gi, shuq jung hkungga ralhum dông hut pyâm é huî nyi gù nghut mù luî, mingkan mai ngò htoq ló râ ahkyíng jé bê nghut ri. <sup>7</sup> Ngò gi, haû ge é majan le zan bê; din shingjóng lhûm é hkyô le bàn bê; haû lumjóng hkyô le chang bê nghut lhê. <sup>8</sup> Ahkuî, haû tengmán é tarâ Agyi nghut sù, Yhumsîng gi, haû buinyi má ngo lé ap byi râ nghut é, haû dingmán hkyô é janmaú lé, ngá matú tô to byi bê nghut lhê. Haû gi, ngá é matú za a nghut, Yhang htoq shit râ hkyô lé myit láng nyi é bang banshoq é matú le nghut lhê.

#### *Timohti Lé Jì Kat É Hkyô*

<sup>9</sup> Nàng gi, ngá chyáng wó dut é í hân hân lé lô aq. <sup>10</sup> Hkâsu mù gâ le, Demaq gi, mingkan shî lé chyitdap é yanmai, ngo lé pyám to luî, Htesaloni wà mó shut; Krezen gi, Galatiq mau shut; Tituq gi, Dalamati mau shut, e ló byuq bekô nghut é yanmai nghut lhê. <sup>11</sup> Lukaq za ngò eq rahá nghut nyi lhê. Markuq lé, nàng eq rahá shuî lé lò aq; yhang gi, ngá é hpungmû má wó htuqbáng râ sù nghut lhê. <sup>12</sup> Ngò gi, Tuhkiku lé Ehpesu myuq shut nhang kat bê nghut lhê. <sup>13</sup> Nàng gi, lé lo é hkûn, Troa myuq má, Karpu chyáng ngò tô tô é buhîng haû lé le, ngá é chyúmding lé le, je luî eq haû shokuq chyúmding pé lé le, yù lé lô byi aq.

<sup>14</sup> Haû ningdup hpó Alesander gi, ngo lé a ge é myo myo kut bê nghut ri; haû Yhumsîng gi, yhang kut é eq rajung za, yhang lé dam byi râ nghut lhê. <sup>15</sup> Yhang gi, ngamoq é danglù lé wum kat htuq htíng bê sù nghut é yanmai, nàng le, yhang lé sidiq ra râ nghut lhê.

<sup>16</sup> Sâng-hî dàm, ngá gûng lé ngò tái hung é hkûn, yuq hkangmó gi, ngá é hkyam shut a bo lom e za, ngo lé pyâm tô akô. Nghut kôlháng, haû gi, yhangmoq ahtoq má mara a dut sháng gaq. <sup>17</sup> Nghut kôlháng, ngò dông mai danglù haû lé rago wó hko pyo kat luî, tûngbaù pé banshoq bang wó gyo kó sháng gaq ga, haû Yhumsîng gi, ngá hkyam shut yap to mù, ngo lé wum-o byi é nghut lhê. Hau htoq agó, ngò gi, hkanghkyi é nhut mai le hkyi yù hui bê nghut lhê.\* <sup>18</sup> Haû Yhumsîng gi, ngo lé agè ashop é hkyô hkangmó mai hkyi yù luî, Yhang é mauhkûng mingdán má ngón za shuî jé râ nghut lhê. Hpungwup shíngkang gi, Yhâng chyáng ahtum abyuq ru joq nyi sháng gaq ô. Amen.

#### *Shi-kyám Dang*

<sup>19</sup> Priskila eq Akula nhik lé le, Onesihpuru yhumbyù wuî lé le, bo shi-kyám byi laq. <sup>20</sup> Erastu gi, Korinhtuq myuq má nyi gyó to bê; Trohpimu lé gi, nò luî, Melitu wà mó má ngò nyhi pyâm to bê nghut lhê. <sup>21</sup> Nàng gi, wó dut é í, gyoqmyò a wàng shi lé, shî má jé lé lò aq. Ubulu gi, nàng lé shi-kyâm kat ri; haû eq rajung za, Pudén, Linu, Klodia eq gumang wuî banshoq bang gi, nàng lé shi-kyâm kat akô nghut ri.

<sup>22</sup> Haû Yhumsîng gi, náng é woi-nyí eq rahá nghut nyi sháng gaq. Jeju gi, nungmoq chyáng ru joq nyi sháng gaq ô.

\* 4:17 Haû hkûn lé, Romaq byu pé, byù sat lé gi, hkanghkyi lé tsô pyâm lhê.



## TITUQ

### Chyáng Hun Kat é Laiká (Titus)

<sup>1</sup> Garai Gasâng é dui-nhâng zoshâng eq Yesuq Hkrisduq é lagyo nghut é sù, ngò Poluq gi, haù ahtum abyuq é asak lé chòm myit myoqbyu é yanmai, Garai Gasang hkyin yu to bâng é lumjínq hkyô jat râ eq, tengmán hkyô lé wó sé mù, tarâ hkungga sé nhâng râ matú, hkyin yù huí é sù nghut lhê. <sup>2</sup> Haù ahtum abyuq é asak hkyô lé, mhaù a sê é Garai Gasang gi, ahkyíng nghu é lháng a joq shi mai danggidiq byi to mù, Yhang masat tô é ahkyíng yam-yoq má sheq mungdang hko kyô é đông lhoq htoq shit luí, <sup>3</sup> nga-nhúng é hkyi yù Sù, Garai Gasang hkunmó hkyô tô é eq rajung za, haù mungdang hko é hkyô lé ngá é loq má ap byi bê nghut ri.

<sup>4</sup> Nga-nhúng chòm lumjínq é hkyô đông mai, ngá zo sîng nghut é Tituq lé laiká kê kat lhê. Íwa Garai Gasang eq nga-nhúng é hkyi yù Sù Hkrisduq Yesuq chyáng mâ é jeju eq nguóngón hkyô gi, náng chyáng ru joq nyí sháng gaq ô.

#### *Kreti Zinlóng Má, Tituq Wùn Waq Râ Muzó*

<sup>5</sup> Ngò, nang lé Kreti zinlóng má nyhi hkyô tô é gi, ngò, nang lé pying tô é eq rajung za, ngò a ban zui saí é loqzó pé lé lhoq pán râ matú eq, wà hkangmó má hpúng suwún ayá dâng to byi râ matú nghut lhê. <sup>6</sup> Haù hpúng suwún kut râ sù gi, mara hùn râ hkyô a bo é sù; yhangmyi rayuq za wó é sù; yhang zô pé le, agè ashop é eq jìno a gyô é ga, mara hùn râ jowò a joq é lumjínq bang nghut é sù, nghut râ lhê. <sup>7</sup> Hkâsu mù gâ le, hpúng-up rayuq gi, Garai Gasâng é sùt zum sù rayuq đông nghut lhê mù, mara hùn râ hkyô a bo é sù nghut râ lhê; yhang gi, yhumsing myit a cháng; i-myit a lùm tot; îhpê é jùn a dut; mabyoq jishum a kut; a sansêng é ngùn hîng lé a myit ô nau é sù nghut râ lhê. <sup>8</sup> Yhang gi, byù bíng lé dat hkulùm sù; ge é hkyô lé chyitdap sù; nùm é sù, dingmán sù; chyoyúng sù; yhumsing gùng lé wó hkang é sù; <sup>9</sup> mhoq yu to bê hkyô eq rajung za, lumjínq é mungdang lé gíng gíng zuí zing nyi é sù nghut râ lhê. Haù hkùn sheq, yhang gi, góbang lé tengmán é mhoqshit hkyô đông myit wum wó byí é eq, haù eq shai lhum é bang lé, shut é hkyô wó tûn shit râ nghut lhê.

<sup>10</sup> Hkâsu mù gâ le, gumlau kut é bang, dangsôm taí é bang eq mhaù zô é bang myo myo nyi ri. Ahpyo-kuq hpyit é hpúng bang je riyhang myo akô. <sup>11</sup> Haù bâng é nhut shô lé gi, xaù pyám byi râ lhê. Hkâsu mù gâ le, yhangmoq gi, a tengmán é đông sutzè lé wó yù shoq ga luí, mhoqshit a gíng é hkyô pé lé mhoqshit mù, rayhum bang bang lé lhoq hpyoq lhoq htên nyi akô nghut ri. <sup>12</sup> Kreti byù mâ é myiqhtoi rayuq lháng gi, "Kreti byu pé gi, ayang mhaù é bang, tân jung yosô dusak pé, lagôn é zo myoqnoq bang nghut akô." ga taí wú ri. <sup>13</sup> Saksé shí gi, têng ri. Haù mù luí, yhangmoq gi, Yudaq byu pê é myit htoq mhô-myi dang lé le; tengmán hkyô lé he-ngik pyâm é bang pying tô é dang pé lé le, a gyo kô é za, <sup>14</sup> haù lumjínq hkyô má gíng tîng nyi kó sháng gaq, yhangmoq lé htân htân tân mhoqshit byí nyi aq. <sup>15</sup> Sân-yúng bâng é matú gi, azíng zê lhunglháng sân-yúng ri; a sân-yúng bang eq a lumjínq bâng é matú kúm gi, haí le a sân-yúng é chyat nghut nyi ri; hkâsu mù gâ le, yhangmoq é myit nhiklhum eq myit sôn sê é hkyô pé gi, gè gè yhang, a sân-yúng dut byuq bekô nghut ri. <sup>16</sup> Yhangmoq gi, Garai Gasang lé sê lhê ga kôlháng, yhumsing zui saí é loq zó đông, Yhang lé he-ngik pyâm é bang nghut akô. Yhangmoq gi, achaq achyut é bang, jìno a gyô é bang eq, ge é mù joq mijoq eq a htuk é bang nghut akô nghut ri.

<sup>1</sup> Nàng kúm gi, tengmán é mhoqshit hkyô eq wuí é dông mhoqshit nyî râ dut lhê. <sup>2</sup> Hpô-mâng pé lé gi, i-myt shirâm sé râ hkyô; hkungga gíng é byù dut râ hkyô; yhumsing gùng lé wó hkàng râ hkyô eq, lumjíng myit gíng râ, chyitdap myit gíng râ, hkam jan hkyô gíng nyî râ hkyô pé lé, mhoqshit byî nyî aq.

<sup>3</sup> Haù eq rajung za, hpô-myhí mâng pé lé gi, hkungga gíng é a-kyang bo nyî râ hkyô; lumù gansâng dang a taí râ hkyô; ìhpê é jùn a dut râ hkyô eq ge é hkyô lé za dat mhoqshit é bang wó dut râ matú mhoqshit byi aq. <sup>4</sup> Haù hkùn, Garai Gasâng é mungdang gi, lumu pyâm é a hui sháng gaq, yhangmoq gi, hpô-myhí zô pé lé, yhumsing yhanglâng eq, yhangzô pé lé chyitdap é, <sup>5</sup> yhumsing gùng lé wó hkàng é, siri bo é, ikun lé dat wùn waq é, ge é myit wó tân shit é, yhumsing é yhanglâng uphkàng é dông dat châng é bang dut râ matú, ge mhoqshit é hpô-myhí mâng pé dut râ nghut lhê.

<sup>6</sup> Haù eq rajung za, zorâm wuí lé le, yhumsing gùng lé wó hkàng nyî kó sháng gaq, lhoq pun lhoq kyíng nyî aq. <sup>7</sup> Hkyô hkat hkangmó má, yhangmoq lé nàng yhang ge é muzó alik tân shit nyî aq. <sup>8</sup> Nàng lé lhom htuq htíng é bang gi, nga-nhûng é hkyô má mara a wó hùn kômù hoq hpû nyî kó sháng gaq, nàng mhoqshit é hkyô má, taí pyám râ hkyô a bò shoq, têng é, siri bo é, eq sansêng é dang taí nyî aq.

<sup>9-10</sup> Nga-nhûng é hkyi yù Sû Garai Gasang eq sêng é mhoqshit é hkyô pé hkat hkangmó yúng nyî sháng gaq, hkyô hkat hkangmó má, jun pé lé, yhangmoq é yhumsing wui pé é a-ô má nyî mù, yhumsing wui é i-myt ngón shoq dang a tu râ; a hkau râ; wó lum tô é bang dut râ hkyô pé lé, mhoqshit byi aq.

<sup>11</sup> Hkâsu mù gâ le, hkungsô wó é myit myoqbyù hkyô ga é, nga-nhûng é kô myhang é Garai Gasang eq hkyi yù Sû, Yesuq Hkrisduq gi, hpungwup shíngkang eq htoq shit râ hkyô lé lánng nyî é hkùn, <sup>12</sup> tarâ a hkunggâ é myit eq mingkan myit ô nau é hkyô koi pyám luí, shí ipyat má yhumsing gùng lé wó hkàng râ, dingmán râ eq, tarâ hkunggâ é hkyô wó cháng shoq, <sup>13</sup> nga-nhúng lé mhoqshit byi râ matú, Garai Gasâng jeju chyunghuq gi, htoq shit bê nghut mù luí, byù lhunglâng bang lé hkyi yù hkyô hpóng byi bê nghut ri. <sup>14</sup> Haù Yesuq Hkrisduq gi, agè ashop é hkyô banshoq mai nga-nhúng lé hkyi yù mù, ge é muzó hkangmó lé châng kut nau é, Yhânggùng yhang sing é byuhú rahú dut râ matú wó lhoq sân-yúng yù shoq ga, nga-nhûng é matú Yhânggùng lé ap byî pyám bê nghut ri.

<sup>15</sup> Nang lé ó yuq èq le, a wú shôm pyám kó sháng gaq; nàng gi, ahko ahkáng banshoq eq, yhangmoq lé shí hkyô pé mhoqshit nyî aq; myit wum byî é eq, tân mhoqshit é hkyô lé le kut nyî aq.

### 3

#### *Ge É Muzo Zui Saí Râ Hkyô*

<sup>1</sup> Nàng gi, lumjíng bang lé, zau wuí eq ahko ahkáng wó bâng é a-ô má nyî mù, jìno gyô nyî râ eq, hkâ-nhám le ge é muzó hkangmó zui saí râ lé hen nyî uchyang, <sup>2</sup> ó yuq lé le lù a mù râ; nuingón hkyô hô râ; myit tê byî é hkyô tân shit râ eq; byù banshoq lé nûm é i-myt tân shit nyî kó sháng gaq, lhoq pun lhoq kyíng nyî aq.

<sup>3</sup> Hkâsu mù gâ le, nga-nhúng le, hí hpyang gi, byù ngok pé, jìno a gyô é bang, mhaú zo huí é bang eq, gungsho ô nau é hkyô eq mingkan ngón hkyô ajung jûng èq jùn kut é hui bang, dut mù luí, agè ashop é eq manon lhûm é hkyô kut nyî mù, rayuq eq rayuq a jú lhûm é dông nyi lai lò bê nghut lhê. <sup>4</sup> Nghut kôlhang, nga-nhûng é hkyi yù Sû Garai Gasâng jeju eq chyitdap myit htoq shit é hkùn, <sup>5</sup> nga-nhúng yhang kut é dingmán é muzó èq a nghut é za, Yhâng é shogyo nhikmyîn é jeju yanmai sheq, Garai Gasang gi, nga-nhúng lé hkyi yù bê nghut ri. <sup>6</sup> Yhang gi, nga-nhúng é hkyi yù Sû Yesuq Hkrisduq é yanmai, nga-nhúng é ahtoq má agùn agó hut hkyó byî é Chyoiyúng Woi-nyí èq nga-nhúng lé chí san chí sêng pyám byi mù, woi-nyí má dum hku é hui nhâng luí, myit sik htaí byî é hkyô dông nga-nhúng lé hkyi yù bê nghut ri. <sup>7</sup> Haù mù luí, Yhâng é jeju mai mara hkyut san byî é hui bê nghut é yanmai, ahtum abyuq é asak lé myit myoqbyu nyi é eq rajung za, nga-nhúng gi, silí wunlí wó hkam yu é bang dut lò râ nghut lhê. <sup>8</sup> Dang shí pé gi, lumjíng é dang nghut lhê mù luí, Garai Gasang lé lumjíng é bang gi, ge é muzó lé myit lòm luí rago

zui saî nyi kó sháng gaq, haú hkyô pé lé nàng wum zuq tung mhoqshit byi râ lé, ngò ô nau nyi lhê. Shí pé gi, byù lhunglhâng bâng é matú ge é eq, akyû bo é hkyô nghut lhê.

<sup>9</sup> Nghut kôhang, ana apâ ga luî taî htîng lhûm é hkyô lé le; byùxik labaû gôn é hkyô lé le; nyo byoq lhûm é hkyô lé le; jep é tarâ eq séng mù byoq lhûm é hkyô pé lé le koi pyâm nyi aq, hkâsu mù gâ le, haú pé gi, akyû a bo é hkyô eq chûng a ge é hkyô pé nghut ri.

<sup>10</sup> Gam hkuî é myit bò sù lé gi, í dâm mhoqshit wú mù, a wó jáng, yhang lé baú tô pyám aq. <sup>11</sup> Haû su kut sù gi, yhang kut é muzó má mara wó to bê nghut mù, yhumsing gùng lé yhumsîng mara hun é sù nghut é lé, nàng sê to lo aq.

*Je Htâng Má Pying É Dang*

<sup>12</sup> Ngò gi, Nikopoli wà má gyoqmyò lhoq lhai râ đông myit hpyit tô é yanmai, Artima lé, a nghut jáng Tuhkiku lé, náng chyáng nhang kat byi râ, jé eq yhang, nàng gi, shikut luî, haû wà shut ngá chyáng lé lô aq. <sup>13</sup> Nàng gi, tarâ sê é sù Zena eq Apolo nhik lé, yhangnhik é hkyowuî má râ é hkyô banshoq, shikut luî garúm kat aq. <sup>14</sup> Nga-nhûng é byu pé gi, nyí wuî râ é hkyô lé wó htúq é eq ashi zuî é bang dut kó sháng gaq, ge é muzó lé myit lòm mù zui saî nyi râ hkyô lé mhoq yû râ lhê.

<sup>15</sup> Ngò eq rahá nyi é bang yuq hkangmó gi, nang lé shi-kyâm kat akô. Lumjîng hkyô má ngamoq lé chyitdap é bang lé, bo shi-kyám byi aq.

Garaî é jeju gi, nungmoq eq rahá joq nyi sháng gaq ô!

## HPILEMON

### Chyáng Hun Kat é Laiká (Philemon)

<sup>1</sup> Hpilemon ê, Hkrisduq Yesuq é yanmai htóng lúng nyî sù, ngò Poluq eq nga-nhông é gumang Timohti nhik gi, ngá-nhik chyitdap é mù wùn luzúm nghut é sù nang lé le, <sup>2</sup> ngá-nhik é gu-nhá Ahpiaq lé le, ngá-nhik é sarhé luzúm Arhkipò lé le, náng é yhùm má huí lhum lhum kut é noqkuq hpúng lé le, dang kyô kat lhê.

<sup>3</sup> Nga-nhông é Îwa Garai Gasang eq Yhumsîng Yesuq Hkrisduq chyáng mâ é, jeju eq ngingón hkyô gi, nungmoq chyáng ru joq nyî sháng gaq ô!

#### *Jeju Hkya-ôn É Hkyô Eq Kyûdung Dang*

<sup>4-5</sup> Ngò gi, Yhumsîng Yesuq lé nàng lumjîng é hkyô lé le, sân-yúng bang banshoq lé nàng chyitdap é hkyô lé le, wó gyô é yanmai, ngò kyûdung é hkùn, nang lé myit bûn nyî luí, hkâ-nhám le ngá é Garai Gasang lé jeju hkya-ôn nyi lhê. <sup>6</sup> Ngò gi, Hkrisduq é matú nga-nhông chyáng bo tô é ge é mù lhumjup lé sê gyô é hkyô lé, nàng wó yù sháng gaq nghû, náng é lumjîng hkyô lé, nàng saksé hkâm é má akyû htoq râ matú, kyûdung byî nyi lhê. <sup>7</sup> Náng é chyitdap myit gi, ngo lé gyai gabú nhang é eq wum-o wó yù nhang ri; hkâsu mù gâ le, gumang hpó ê, náng é yanmai, sân-yúng bâng é i-myt má ngingón yuqyo é hkyô wó yù bekô nghut ri.

#### *Onesimu É Matú Tôngbán Byî É Hkyô*

<sup>8</sup> Haû su mù, nàng kut gîng é muzó hkyô, ngò, nang lé pying kat lhê. Hkrisduq má, ngò gi, a gyuq a kyum é za nang lé haû wó kut nhang lhê nghut kôlhang, chyitdap myit đông za nang lé pying kat lhê. <sup>9</sup> Ngò, Poluq gi, mang bê htoq agó, ahkuí Hkrisduq Yesuq é yanmai htóng lúng sù le nghut luí, <sup>10</sup> ngò kyum hut huí nyi é u lé ngá zo dut lo é Onesimu é matú nang lé ngò dúng tôngbán kat lhê. <sup>11</sup> Yhang gi, hí hpyang náng é matú akyû a bo é nghut kôlhang, ahkuí gi, náng é matú le, ngá é matú le, akyû bò bê nghut ri.

<sup>12</sup> Ngò nhik htông é Onesimu lé náng chyáng dum taû nhang kat lhê. <sup>13</sup> Haû gabú danglu é yanmai, ngò htóng lúng nyi é má náng é malaî ngo lé garúm râ matú, yhang lé ngò shuí nyi to naû kôlhang, <sup>14</sup> ngò gi, nàng myit a huí le haî le a kâm kut. Hau é yanmai, ngò, nang lé kut nhang é đông a nghut e za, nàng ô nau é đông kut é san za nghut sháng gaq. <sup>15</sup> Hkâsu mù gâ le, náng chyáng mai yhang rayoq rabun zo gâng nyi é gi, yhang dum taû lò mù hkâ-nhám le nàng eq rahá dum wó nyi nyi râ matú nghut lhê abe. <sup>16</sup> Yhang gi, htâng hpyang, jùn rayuq đông a nghut e za, jùn htoq má je ge é chyitdap gumang hpó dut râ nghut bê; ngá matú, yhang gi, ngò chyitdap dik é sù nghut lhê; náng matú kúm gi, byù rayuq đông le, Yhumsîng Yesuq má gumang hpó rayuq đông le, je riyhang chyitdap râ sù dut bê nghut ri.

<sup>17</sup> Haû mù luí, nàng, ngo lé luzúm rayuq sù ngam é nghut le gi, ngo lé hap yu é su, Onesimu lé le lom hap yù aq. <sup>18</sup> Yhang, nang lé rajung jung shut pyâm é nghut le le, chyîn dap tô é nghut le le, haû gi, ngá chyáng dap é chyîn nghû sôn yù aq. <sup>19</sup> Ngò, Poluq gi, chyîn haû xap râ nghû luí, ngá loq eq yhang kê kat kôlhang, nàng yhang lhang, ngo lé asak chyîn xap râ sù nghut é lé bûn nham aq. <sup>20</sup> Nghut bê, gumang hpó ê, nang é yanmai, haû Yhumsîng má ngò gabú é hkyô wó yu nyi sháng gaq, Hkrisduq má ngá é i-myt lé lhoq ngui lhoq ngón byî é đông, shí, ngò pying kat é dang lé gyo byi laq. <sup>21</sup> Nàng gi, ngò taí kat é htoq má je lhom kut râ nghut é lé, hkyak za sé luí, ngò kê kat é nghut lhê.

<sup>22</sup> Hau htoq agó, ngá é matú nyi râ gok lajang láng aq. Hkâsu mù gâ le, nungmoq kyûdung byî é yanmai, ngò gi, nungmoq chyáng dum wó jé râ lé myit myoqbyu nyi lhê.

<sup>23</sup> Hkrisduq Yesuq é yanmai, ngá é htóng lúng luzúm nghut é sù Epahpra gi, nang lé shi-kyâm kat ri. <sup>24</sup> Ngá é htuq luq htuq bang nghut é Markuq, Aristakuq, Demaq, Lukaq pé le, nàng lé shi-kyâm kat akô.

<sup>25</sup> Yhumsîng Yesuq Hkrisduq é jeju gi, nungmoq é woi-nyí eq rahá za ru joq nyî sháng gaq ô!

HEBRE  
Pê Chyang Hun Kat é Laiká  
(Hebrews)

*Garai Yhangzo Gi, Maumang Lagyô Pê Htoq Je Gyaú É Hkyô*

<sup>1</sup> Laí ló bê ipyat pé má, Garai Gasang gi, nga-nhông é íchyí iwâ pé lé myiqhtoí pé dông alhông lhing eq adông dông mai dáng nyo wú bê nghut lhê. <sup>2</sup> Nghut kôlhang, ló htâng é buinyì shí pé má, Yhang gi, Yhâng Zo dông mai nga-nhúng lé dang nyô bê nghut ri; Yhang gi, lhunglhang lé sîng sù dut râ matú haú Zo lé masat to mù, Zo dông mai, nyì mi-nyì, joq mijoq lé hpan to bê nghut ri. <sup>3</sup> Haú Zo gi, Garai Gasâng é hpungwup shingkanq duqbó é hkyô eq Yhâng é gunghkyâng isâm roq nghut nyi mù, lhunglhang lé Yhâng é a-tsam byíng é dâng eq zuí zing tô ri. Yhang gi, yubak mara lé lhoq sân-yúng é hkyô lé ban kut é htâng, mauhkông htoq má Hkikhkam dik Sù Garai Gasâng é loqyo hkyam má zung to bê nghut ri. <sup>4</sup> Haú mù luí, Yhang gi, maumang lagyô pê é myíng htoq gyaú é myíng lé wó sing yù bê nghut é eq rajung za, yhangmoq htoq je riyhang gyaú sù dut bê nghut ri.

<sup>5</sup> Hkâsu mù gâ le, Garai Gasang gi,

"Nàng gi, Ngá Zo nghut ri. Hkû-nyí, Ngò gi, Náng Wa dut bê nghut lhê."✠  
ga le, dum,

"Ngò gi, Yhâng Wa dut râ nghut mù, Yhang gi, Ngá Zo dut râ nghut lhê."✠  
ga le, maumang lagyo hká yuq lé hkâ-nhám wá taí wú é nghut lhê lú? <sup>6</sup> Dum, Garai Gasang gi, Yhâng é zomún lé mingkan shut nhang hâng kat é hkûn,

"Ngá é maumang lagyô pé banshoq gi, Yhang lé noqkuq kó sháng gaq."✠  
ga taí ri. <sup>7</sup> Maumang pé eq séng luí Garai Gasang taí é má,

"Yhang gi, Yhâng é maumang lagyô pé lé laí su dut nhang mù, Yhâng é dui-nhâng zoshâng wui lé, myishâm pé su dut nhang é nghut ri."✠

gâ ri. <sup>8</sup> Nghut kôlhang, haú Zo eq séng luí, Yhang gi,

"Garai Gasang ê, Náng é hkohkâm-tanghkuq gi, pyat dedu ahtum abyuq gîng nyì mù, Náng é dingmán hkyô gi, Náng é mingdán lé uphkang é hkyô dut râ nghut lhê.

<sup>9</sup> Nàng gi, dingmán hkyô lé chytidap bê nghut mù, agè ashop é hkyô lé a ngui byuq lô é nghut lhê.

Haú mù luí, Garai Gasang, náng é Garai Gasang gi, Nang lé, gabú nhang é xù but byí é dông, Náng é luzúm wui htoq je lhoq gyaú to bê nghut ri."✠

ga taí ri. <sup>10</sup> Hau htoq agó, Yhang gi,

"Yhumsîng ê, Nàng gi, a-nham sâng-hi má myidàm é apûn awang lé hi tô é nghut mù, mauhkông pé gi, Náng é loqmú chyat nghut ri.

<sup>11</sup> Haú pé gi, htên byoq byuq râ nghut lhê; nghut kôlhang, nàng gi, ru gîng nyì râ nghut lhê; haú pé banshoq gi, mebu su xau byuq râ nghut lhê.

<sup>12</sup> Nàng gi, haú pé lé, bumó lé su dîng yup râ nghut lhê; Nàng gi, haú pé lé, mebu su htaí pyám râ nghut lhê.

Nghut kôlhang, Nàng gi, rajung za ru gîng nyì râ nghut mù, Náng é zanwut pé gi, hkâ-nhám le htâm râ a nghut."✠

ga le taí ri. <sup>13</sup> Garai Gasang gi,

"Ngò, náng é gye pé lé, náng é hkyî nang tanghkuq kut pyám byí é hkyíng jé shoq, Ngá é loqyo hkyam shut zung nyì shi aq."✠

✠ 1:5 Hkya-on 2:7 ✠ 1:5 2 Sam 7:14 ✠ 1:6 Tarâ Pun 32:43 ✠ 1:7 Hkya-on 104:4 ✠ 1:9 Hkya-on 45:6-7  
✠ 1:12 Hkya-on 102:25-27 ✠ 1:13 Hkya-on 110:1

ga maumang lagyo hká yuq lé hkâ-nhám wá taí wú é lhú? <sup>14</sup> Maumâng pé banshoq gi, hkyi yù hkyô lé hkam yù râ nghut é bang lé dojaú râ matú, nhang kat huí é mù wùn woi-nyí pé chyat za nghut akô, a nghut kó lhú?

## 2

*Sadiq Byî É Hkyô*

<sup>1</sup> Haú mù luí, nga-nhúng gi, châng nghoq ló byuq é a hui zo sháng gaq, haú nga-nhúng wó gyô yu to bê hkyô lé je riyhang rago châng nyì râ dut lhê. <sup>2</sup> Hkâsu mù gâ le, maumang lagyo pê eq taí bê mungdang gi, gíng nyì mù, shut shaí lu láí é hkyô eq jìno a gyô é hkyô hkangmó kut é sù gi, yhumsîng eq gíng é mara dam byî é hui zo kô é nghut le gi, <sup>3</sup> nga-nhúng gi, haú-í yhang gyaú é hkyi yù hkyô lé haí su a ngàm kut é nghut jáng, nga-nhúng hkâsu wó hpang lut râ lhú? Hkyi yù hkyô haú gi, haú Yhumsing eq hí taí pyo htoq é nghut mù, Yhâng chyáng mai wó gyô yu é bang gi, haú hkyô têng é lé, ngamoq chyáng saksé shit bekô nghut ri. <sup>4</sup> Garai Gasang le, kumlhá pé, mauhpo muzó pé, laklaí kumlhá myo myo eq, Yhang ô nau é eq rajung za Chyoiyúng Woi-nyí chyunghuq pé lé gàm byî é dông mai, haú hkyô lé saksé shit bê nghut ri.

*Hkyi Yù Hkyô Hpóng Byi Sù*

<sup>5</sup> Garai Gasang gi, maumang lagyo pé lé, ngamoq taí nyi é jé lô râ mingkan lé, uphkâng nhâng râ a nghut. <sup>6</sup> Rayuq yuq mai, rawò má saksé hkâm tô é gi, "Byù gi, haí wá nghut mù, Nàng, yhang lé bìn nyi lhê lhú?

Byu Yhangzo gi, haí wá nghut mù, Nàng, yhang lé wú gôn nyi lhê lhú?

<sup>7</sup> Nàng gi, yhang lé, maumang lagyo pê htoq ratsuí lhoq nyhum to bê nghut ri.

Nàng gi, yhang lé, hpungwup shingkang eq aróng bò nhâng mù,

<sup>8</sup> jung hkangmó lé, yhâng é hkyiwa ô má tô to bê nghut ri."✠

gâ ri. Jung hkangmó lé yhâng é a-ô má tô to bê gâ é gi, Garai Gasang, haí lháng a myhit to loshoq yhang uphkâng é a-ô má tô to bê nghut é lé gâ lhê. Nghut kôlhang, yhang é a-ô má tô tô é jung hkangmó lé, ahkuí, nga-nhúng a myàng shí é za nghut lhê. <sup>9</sup> Nghut kôlhang, nga-nhúng gi, maumang lagyo pê htoq ratsuí zo lhoq nyhùm huí é sù Yesuq lé myang é nghut lhê. Yhang gi, Garai Gasang jeju mai, yuq hkangmó é matú shí hkám byî é hui zo sháng gaq ga, shí-nò jamjau hkyô lé hkâm zo bê nghut é yanmai, ahkuí, Yhang lé hpungwup shingkang eq aróng bò nhâng bê nghut ri.

<sup>10</sup> Zo wuí myo myo lé hpungwup shingkang wó hkam yù nhâng sháng gaq ga, jung hkangmó lé Yhang é matú chyat eq Yhang dông mai chyat joq nyì nhang é Garai Gasang gi, wuíhke jamjau hui nhang é dông, yhangmoq é hkyi yù Sù lé lhoq gumjup byi râ matú htuk âng nyi ri. <sup>11</sup> Haú byu pé lé chyoiyúng nhang é Sù eq lhoq chyoiyúng huí é bang gi, ikun ralhum za mâ é bang chyat nghut lhê. Haú mù, Yesuq gi, yhangmoq lé, gumang wuì nghu râ lé a hoq é nghut lhê.

<sup>12</sup> "Ngò gi, Náng myîng lé, Ngá gumang wui chyáng taí pyô râ nghut lhê;

Ngò gi, shiwa hpông é myoq hí má, Nang lé hkya-on mahkôn hkôn râ nghut lhê."✠ ga, Yhang taí ri. <sup>13</sup> Yhang gi,

"Ngò gi, Yhang lé lumhkau nyì râ nghut lhê."✠

ga le dum taí ri. Hau htoq agó,

"Ngò gi, Garai Gasang ngo lé byî é zoshâng wuì eq shí má nyì nyi lhê."✠

ga, Yhang dum taí ri.

<sup>14</sup> Haú zoshâng wuì gi, sui sho eq nghut é yanmai, Yhang le, yhangmoq é xângzo gùng bo hkam yù bê nghut ri. Hau é yanmai, Yhang gi, Yhâng é shí-nò hkyô dông mai, shí-nò hkyô é a-tsam lé zuí zìng é sù nghut é nat Tsadán lé wó lhoq htên pyám râ eq, <sup>15</sup> yhangmoq é shí-nò hkyô lé gyuq é eq, yhangmoq é asak gón lé jùn dông zuí zìng to huí é bang lé, wó lhoq lhut râ nghut lhê. <sup>16</sup> Gè gè yhang, Yhang gi, maumang lagyo pé

lé garúm é a nghut é za, Abraham é awut ashín pé lé garúm é sheq ru nghut lhê. <sup>17</sup> Haû nghut é yanmai, Yhang gi, Garai Gasang lé dojaú é má shogyo nhikmyîn é eq lhumzui é hkyangjong mó wó dut râ eq, byu pê é yubak marâ é matú shîhtaí gunglik hkungga wó kut râ matú, hkyô hkangmó má Yhâng é gumang wui eq dù shoq kut é hui râ dut é nghut lhê. <sup>18</sup> Yhang gi, gunglaú huí é hkûn, Yhânggùng yhang jamjau hui zo bê nghut é yanmai, gunglaú huí nyi é bang lé wó garúm yu é nghut lhê.

## 3

*Yesuq Gi, Mosheq Htoq Gyaú É Hkyô*

<sup>1</sup> Haû mù luí, mauhkúng mai wut yù huí é, chyoyúng é gumang wui ê, lagyo eq hkyangjong mó nghû nga-nhúng yín yu é Yesuq é hkyô lé rago myit wú keq. <sup>2</sup> Mosheq, Garai Gasang é yhûm gón má lhumzui é su, Yesuq le, Yhang lé masat yù sù Garai Gasang chyáng lhumzui sù dut bê nghut ri.\* <sup>3</sup> Yhûm kut sù gi, yhûm htoq je gyaú é aróng lé wó é su, Mosheq htoq, Yesuq gi, je gyaú é aróng lé wó gíng é lé myàng ri. <sup>4</sup> Hkâsu mù gâ le, yhûm hkangmó gi, rayuq yuq èq saí é chyat nghut ri. Nghut kôlhang, Garai Gasang gi, jung hkangmó lé saí é sù nghut lhê. <sup>5</sup> Mosheq gi, Garai Gasang é yhûm gón má dui-nhâng zoshâng rayuq dông lhumzui mù, Garai Gasang taí râ nghut é lé saksé hkám bê nghut ri. <sup>6</sup> Nghut kôlhang, Hkrisduq gi, lhumzui é zo rayuq dông Garai Gasang é yhûm lé up ri. Nga-nhúng kúm gi, nga-nhúng lé wám é myit bò nhang é hkyô eq nga-nhúng gumrong nyi é myoqbyù hkyô lé myhik zing nyi é nghut jáng, Yhâng é yhûm nghut nyi bê.

*A Lumjínq Bang Lé Sidiq Byî É Hkyô*

<sup>7</sup> Haû mù luí, haû Chyoyúng Woi-nyí taí é eq rajung za, "Hkû-nyí, nungmoq gi, Yhâng é danghtê lé wó gyo kô é nghut jáng, <sup>8</sup> yoso má Yhang lé chyâm kô é u lé, gumlau toq é hkûn nungmoq é îchyí îwâ pé kut kô é su, nungmoq é i-myt lé hkâlhoq htan to kó. <sup>9</sup> Nungmoq é îchyí îwâ pé gi, myi xê zàn yhang Ngò kut é muzó lé myàng kôle, yoso haú má Ngo lé chyam lik bekô nghut ri. <sup>10</sup> Haû nghut é yanmai, Ngò gi, ipyat haû lé nhikjum yo mù, 'Yhangmoq é myit nhiklum gi, hkâ-nhám le hkyô nghoq byuq akô; yhangmoq gi, ngá é hkyô pé lé a sé kômù nghut ri.' nghû taí é nghut lhê. <sup>11</sup> Haû mù, 'Ngá é bánno jowò má yhangmoq hkâ-nhám le wó wâng kó râ a nghut.' nghû, Ngò, nhikjum yô é eq dakâm dang taí bê nghut lhê."☆

gâ ri. <sup>12</sup> Gumang wui ê, nungmoq mâ é ó yuq le, haû rû dui nyi é Garai Gasang chyáng mai, lhing taû ló byuq sê é, yubak mara byíng é, a lumjínq é i-myt a bò sháng gaq, sidiq nyi keq. <sup>13</sup> Nungmoq gi, ó yuq le, yubak marâ é mhaú zô é hkyo èq i-myt lhoq htan pyâm é a hui kó sháng gaq, "hkû-nyí" nghû ru wó taí nyi nyi gi, nyi wui, rayuq eq rayuq myit wum byî lhûm nyi keq. <sup>14</sup> Nga-nhúng gi, sâng-hi mai wó to bê myit lùm hkyô lé, ló htáng shoq zui gíng nyi é nghut jáng, Hkrisduq eq chôm zùm yap nyi é bang dut bê nghut ri.

<sup>15</sup> Haû gi, "Hkû-nyí, nungmoq, Yhâng é danghtê lé wó gyô é nghut jáng, gumlau toq é hkûn, nungmoq é îchyí îwâ pé kut kô é su, nungmoq é i-myt lé hkâlhoq htan to kó."☆ ga taí é eq rajung za nghut ri.

<sup>16</sup> Wó gyô yù mù, gumlau toq é bang gi, ô pé nghut akô lhú? Haú bang banshoq gi, Egutuq ming mai Mosheq èq shuí htoq lo é bang nghut bum lhê, a nghut kó lhú? <sup>17</sup> Myi xê zàn yhang Garai Gasang lé nhikjum yó nhang é bang gi, ô pé nghut akô lhú? Haú bang gi, mara kut shut mù, yoso má shi leq byuq é bang nghut bum lhê, a nghut kó lhú? <sup>18</sup> Jìno a gyô bùm kô é nghut jáng, Yhâng é bánno jowò má yhangmoq hkâ-nhám le wó

\* 3:2 Bun zo shí eq bun zo 5, 6 lhum mâ é Garai Gasang é yhûm gâ é gi, Garai Gasang é byu pé lé gâ é nghut lhê.

☆ 3:11 Hkya-on 95:7-11 ☆ 3:15 Hkya-on 95:7-8



wàng kó râ a nghut ga, Garai Gasâng eq dakam é bang gi, ô pé nghut akò lhu? <sup>19</sup> Haù mù, yhangmoq a lumjìng kô é yanmai, a wó wàng kô é lé, nga-nhúng myang é nghut lhê.

## 4

*Garai Gasâng É Byu Pê É Matú Bánno Buinyì Đông Nghut É Bánno Jowò*

<sup>1</sup> Haù nghut mù luí, Garai Gasâng é bánno jowò má wàng râ danggidìq ru gîng nyì ashì nghut é yanmai, nungmoq mâ é ó yuq le, haù má a hkyit hkap é a dut râ matú, nga-nhúng sidiq nyì sháng. <sup>2</sup> Hkâsu mù gâ le, yhangmoq lé gabú danglù haù hko kyo bê su, ngamoq lé le hko kyo bê nghut lhê; nghut kôlhang, yhangmoq wó gyô é mungdang gi, yhangmoq é matú akyù a bò, haù mù gâ le, haù wó gyô é bang gi, lumjìng myit mai a lhom hap yù kô é yanmai nghut ri. <sup>3</sup> Nga-nhúng lumjìng bê bang za, bánno jowò haù má wó wang é nghut lhê. Haù hkyô gi,

"Haù mù, 'Ngá é bánno jowò má yhangmoq hkâ-nhám le wó wàng ko râ a nghut.' nghù, Ngò, nhikjum yô é eq dakâm dang taí bê nghut lhê."✠

ga Garai Gasang taí bê eq rajung za dut é nghut ri. Nghut kôlhang, Yhâng é muzó gi, mau htoq xâng hkun mai ban kut to bê nghut lhê. <sup>4</sup> Hkâsu mù gâ le, "Garai Gasang gi, nyhit nyí nghù râ buinyì má Yhâng é muzó banshoq mai bánno bê nghut ri."✠ gâ é dang pé má, haù nyhit nyí nghù râ buinyì eq sêng é hkyô lé rawò má Yhang taí tô ri. <sup>5</sup> Bánno jowò joq é eq séng luí, Yhang dum taí tô é gi, "Ngá é bánno jowò má yhangmoq hkâ-nhám le wó wàng kó râ a nghut."✠ gâ ri.

<sup>6</sup> Bánno jowò haù má wàng râ bang ra-am nyi é danggidìq joq tô ashì nghut ri; hí hkùn, gabú danglù haù wó gyô wú bê bang kúm gi, yhangmoq jìno a gyo kô é yanmai, a wàng kô é nghut lhê. <sup>7</sup> Haù mù luí,

"Hkù-nyí, nungmoq, Yhâng é danghtê lé wó gyo kô é nghut jáng, nungmoq é i-myt lé hkâlhoq htân kó."✠

gâ é lé, ngò hí lé taí bê eq rajung za, Garai Gasang gi, gyai myáng é htâng má Dawiq đông mai taí é hkùn, "Hkù-nyí" gâ é buinyì ra-nyí dum masat to bê nghut ri. <sup>8</sup> Hkâsu mù gâ le, yhangmoq lé, Yohuq eq bánno jowò byi bê ru nghut le gi, Garai Gasang gi, htâng má, gotú buinyì eq séng luí taí râ a nghut lo. <sup>9</sup> Haù mù luí, Garai Gasâng é byu pê é matú gi, Bánno buinyì đông nghut é bánno jowò ru joq tô ashì nghut lhê. <sup>10</sup> Hkâsu mù gâ le, Garai Gasang gi, Yhâng é muzó mai bannô é su, Garai Gasâng é bánno jowò má wàng é sù gi, yhumsing é muzó mai bánno râ nghut lhê. <sup>11</sup> Haù nghut mù, yhangmoq é jìno a gyo hkyô é alik lé cháng mù leqbat é, ó yuq le a bò sháng gaq, nga-nhúng gi, bánno jowò haù má wó wàng shoq, a-tsam bo é í shikut sháng.

<sup>12</sup> Hkâsu mù gâ le, Garai Gasâng é mungdang gi, rû dui nyi é eq a-tsam bo é nghut lhê. Haù gi, shamsó íshut dap é sham htoq má je htoq é nghut mù, myit nhiklum eq woi-nyí lé le, wuimyoq pé eq wui-nyún lé le, wó gam hkoq hkyang rot é nghut lhê; haù gi, nga-nhúng myit é hkyô pé eq myit sôn é hkyô pé lé wó jéyáng é nghut lhê. <sup>13</sup> Hpan tô é lhunglhang gi, Garai Gasâng é hí mai wó haq pyâm é haì le a joq é nghut lhê. Jung hkanmó gi, nga-nhúng, jihpán shit ra râ Su é myoq hí má a wó nghop tô é hkyô, de de dut é nghut lhê.

*Je Gyaú É Hkyangjong Mó Yesuq*

<sup>14</sup> Haù mù luí, nga-nhúng gi, Garai Gasâng é Yhangzo Yesuq nghut sù, mauhkung pé shut hkyang doq ló bê nghut é gyaú é hkyangjong mó lé wó é nghut é yanmai, nga-nhúng yín yu to bê lumjìng hkyô lé ging ging myhik zing nyì sháng. <sup>15</sup> Hkâsu mù gâ le, nga-nhúng gi, nga-nhúng wum nyhôm é hkyô pé lé a sê gyo byí é hkyangjong mó wó é a nghut é za, nga-nhúng su hkyô hkanmó má gungláu é huì wú kôlhang mara a bo é sù hkyangjong mó lé sheq wó é ru nghut lhê. <sup>16</sup> Haù mù luí, nga-nhúng gi, shogyo nhikmyin

é hkyô wó yû râ eq, nga-nhúng ra châ é u má nga-nhúng le wó garúm râ jeju lé myang hô sháng gaq, hkyak lum é myit mai Garaî jeju tanghkuq shut chyâng htep ê sháng.

## 5

<sup>1</sup> Hkyangjong mó yuq hkgámó gi, byu pê chyáng mai hkyin htoq yû huí é nghut mù, mara pê é matú, chyunghuq pé eq hkungga pé nhông byi hkyô nghut é, Garai Gasang eq sêng é muzó pé má, yhangmoq é gunglik đông, hkyin masat to huí é bang nghut akô. <sup>2</sup> Yhânggùng yhang gi, wum nyhóm hkyo é a-ô má nghut nyi é yanmai, yhang gi, bun a bóng é eq hkyô nghoq ló é bang lé nú-nhâm é đông wó shuí-û é nghut lhê. <sup>3</sup> Wum nyhóm é yanmai, yhang gi, byu pê é marâ é matú le, yhânggùng yhâng é marâ é matú le, hkungga nhông byi râ dut é nghut lhê.

<sup>4</sup> Ó yuq le, yhumsing gùng yhumsing aróng haû lé wó yu é a nghut; Arun lé su, Garai Gasâng eq wut yu é hui jáng sheq wó é nghut lhê. <sup>5</sup> Haû eq rajung za, Hkrisduq le, hkyangjong mó dut lo é hpungwup shinggang lé, Yhânggùng yhang kut yu é a nghut. Garai Gasang sheq, Yhang lé,

"Nàng gi, Ngá Zo nghut ri; Ngò, hkû-nyí Náng Wa dut bê nghut lhê."✠

ga taí é nghut lhê. <sup>6</sup> Hau htoq agó,

"Nàng gi, Melahkizedek wó é hkyangjong ayá hkyô đông mai ahtum abyuq hkyangjong rayuq nghut nyi ri."✠

ga, gó wô má le, Yhang taí to ashî nghut ri.

<sup>7</sup> Yesuq gi, myidàm htoq má asak dui nyi é buinyi pé má, Yhang lé, shi é mai wó hkyi yù Su chyáng, ngaubyi ngau-nhap eq wut garû é eq, kyûdung é eq dung tôngbán bê nghut mù, Yhâng é hkungga gíng é ap nóng hkyo é yanmai, gyo byî é hui bê nghut ri. <sup>8</sup> Yhang gi, Zo rayuq nghut to kôle, Yhang hui zô é wuíhke jamjau hkyô mai jìno gyo hkyô wó mhoq yû bê nghut ri. <sup>9</sup> Yhang gi, lhoq gumjup huí é hkûn, Yhang é jìno gyo bang banshoq é matú, ahtum abyuq é hkyi yù hkyo é awang dut byuq bê nghut é eq, <sup>10</sup> Melahkizedek wó é hkyangjong ayá hkyô đông mai hkyangjong mó dut râ matú, Garai Gasâng eq hkyin masat é hui bê sù nghut ri.

### *Woi-nyí Má Wáng Ra Bê Hkyô*

<sup>11</sup> Ngamoq gi, shí hkyô eq séng luí taí râ gyai joq lhê; nghut kôlhang, nungmoq gi, ra luí za a sê gyô é bang nghut kô é yanmai, taí sân kyo wuí ri. <sup>12</sup> Gè gè ga jáng, ahkui lhê ahkýing má, nungmoq gi, sará dut gíng bê bang nghut lhê; nghut kôlhang, Garai Gasâng é mungdang mâ é tengmán hkyo é awang lé, rayuq yuq eq nungmoq lé dum taû mhoq byi râ ru dut nyi akô nghut ri. Nungmoq gi, htan é zoshuq râ é bang a nghut, naú wing râ é bang ru nghut nyi ashî kó myhi-nhung! <sup>13</sup> Naú wing shuq râ é sù ó yuq le, zonú nghut nyi ashî mù, dingmán é hkyô lé mhoqshit é má a mán shi nghut ri. <sup>14</sup> Nghut kôlhang, htan é zoshuq gi, ge é hkyô eq agè ashop é hkyô lé wó sê gam hkoq yû shoq, hkâ-nhám le yhumsing gùng yhumsing lhoq mhân yu nyi é, kô dîng bê bâng é matú ru nghut lhê.

## 6

<sup>1</sup> Haû mù luí, nga-nhúng gi, Hkrisduq eq séng é mhoqshit hkyô awang lé tô to mù, myit kô dîng é hkyô shut xoq sô ê sháng. Nga-nhúng gi, shî-nò hkyô shut shuí jé é muzó mai myit lhîng hkyo é, Garai Gasang lé lumjîng hkyo é, <sup>2</sup> baptisma pé, loq ke byi hkyô, shi é mai dum dui toq hkyô eq ahtum abyuq jéyáng hkyô eq séng é mhoqshit hkyo é, apûn awang dum hî nó a ra lô é nghut lhê. <sup>3</sup> Garai Gasang gyô é nghut jáng, nga-nhúng gi, myit kô dîng hkyô shut xoq so râ nghut lhê.

<sup>4</sup> Myoq lhoq bóng é radàm hui bê bang, mauhkûng chyunghuq lé myang hap yù bê bang, haû Chyoiyúng Woi-nyí lé chôm hkam yù bê bang, <sup>5</sup> Garai Gasâng é mungdâng é gè hkyô eq jé lo nyi é ipyat é a-tsam pé lé myang chyam wú bê bang, <sup>6</sup> yhangmoq hpuq lhik ló byuq é nghut le gi, hká đông lé myit lhîng dum ge wó râ a nghut lo, haí mù gâ

le, yhangmoq gi, Garai Gasâng é Yhangzo lé dum jén sat pyâm é dut mù, Yhang lé de de rhoi pyám kô é nghut lhê.

<sup>7</sup> Yhâng ahtoq má wo gyûn é mau wuî lé shuq yû mù, yò mù saí bâng é matú akyû bo é hôwa nuqhyí lhoq htoq byî é maumyî gi, Garai Gasâng é shimân jeju myang hap yu é nghut ri. <sup>8</sup> Nghut kôlhang, zu gâm eq myoq gâm yuq htoq nhang é maumyî gi, akyû a bò mù, nhîng pyâm é hui zo râ lé chiq râ ri. Haû gi, lô htáng má nyhê hkyô pyâm é hui râ nghut lhê.

<sup>9</sup> Nghut kôlhang, chyitdap é gumang wuî ê, ngamoq gi, haû su nghû taî é nghut kôlhang, nungmoq é hkyi yù hkyô eq sêng é je ge é jung pé, nungmoq wó bekô râ nghû hkyak myit lum tô lhê. <sup>10</sup> Garai Gasang gi, a tara é sù a nghut. Yhang gi, nungmoq é muzó lé le, Yhâng é byu pé lé nungmoq garúm bê eq xoq luî garúm nyi é dông, Yhang lé nungmoq chyitdap é myit shit kô é hkyô lé le, a tô-myhí râ nghut lhê. <sup>11</sup> Ngamoq gi, nungmoq é i-myt myoqbyù hkyô wó byîng jup râ matú, nungmoq yuq hkangmó ipyat htum shoq xoq shikut nyi kó râ lé gyai ô nau ri. <sup>12</sup> Ngamoq gi, nungmoq lagon bang dut byuq râ lé a ô nau é za, Garaî danggidiq byî to bê é lé, lumjîng myit eq myit hîng hkyô dông mai hkam yu é bang su châng kut kó râ lé ô nau é ru nghut lhê.

#### *Garai Gasâng É Danggidiq Gîng Nyi É Hkyô*

<sup>13</sup> Garai Gasang gi, Abraham lé danggidiq tô é hkûn, Yhâng htoq gyaú é dakâm myîng lang râ rayuq lháng a nyi é nghut mù, Yhânggûng lé Yhang lang luî dakam é gi, <sup>14</sup> "Ngò gi, nang lé teng yhang shimân byi mù, nang lé awut ashín myo myo byi râ nghut lhê."✠ gâ ri. <sup>15</sup> Haû mù, Abraham gi, myit hîng hîng láng yu é htâng má, byî tô é danggidiq lé wó yû bê nghut ri.

<sup>16</sup> Byu pé gi, yhangmoq htoq gyaú su é myîng lé lang luî, dakâm kô é eq, yhangmoq dakam é dang lé saksé kut mù, dang-rháng é hkyô pé banshoq lé lhoq pân pyâm akô nghut ri. <sup>17</sup> Garai Gasang gi, Yhang myit hpyit tô é hkâ-nhám le a htaî lhik é hkyô lé, danggidiq byî tô é lé hkam yù râ bâng chyáng san za shit nau ri; haû mù luî, dakâm dang eq lhoq gîng to bê nghut ri. <sup>18</sup> Garai Gasang gi, mhaú a ge é yanmai, hkâ-nhám le a htaî lhik é hkyô í hkat nghut é danggidiq eq dakâm dang joq é nghut mù, Yhang haû su kut é gi, nga-nhûng hí má tô to byî é myit myoqbyù hkyô lé myhik zîng râ matú gaû é jowò shut hpanq wàng bê bang nga-nhûng lé wum mó byî é dut râ matú nghut lhê. <sup>19</sup> Nga-nhûng gi, myit nhiklhûm é shamtoq goknghe dông myit myoqbyù hkyô haû lé wó é nghut mù, haû gi, gîngtîng é eq gaû é hkyô nghut ri. Myit myoqbyù hkyô haû gi, mauhkûng noqkuq yhûm mâ é pân-gyang ahkaû mâ é sân-yúng gok má jé wang é nghut ri. <sup>20</sup> Jowò haû gi, nga-nhûng é akyu é matú, nga-nhûng é hí má wàng byî é sù Yesuq wang jé é jowò nghut ri. Yhang gi, Melahkizedek wó é hkyangjong ayá hkyô dông mai, ahtum abyuq é hkyangjong mó dut bê nghut ri.

## 7

#### *Hkyangjong Melahkizedek É Hkyô*

<sup>1</sup> Melahkizedek gi, Salem myuq é hkohkâm eq Myhang Htâng é Garai Gasâng é hkyangjong nghut ri. Yhang gi, hkohkâm pé lé sat ûng pyám luî dum taû lo é Abraham lé hui mù, shimân byi bê nghut ri. <sup>2</sup> Haû mù, Abraham gi, wó lo é jung hkangmó mâ é, xê gambùm mâ é ragambùm, yhang lé byi bê nghut ri. Sâng-hi lhê é Melahkizedek é myîng lichyúm gi, "dingmán hkyo é hkohkâm" gâ é nghut mù, htâng lhê é "Salem é hkohkâm" gâ é gi, "nuingón hkyo é hkohkâm" gâ é nghut lhê. <sup>3</sup> Yhâng é înu îwa é hkyô eq byùxik labaû le, hí é buinyi eq asak htâm é hkyô le a kê to nghut ri. Yhang gi, Garai Gasâng é Yhangzo su, ahtum abyuq hkyangjong ru nghut nyi ri.

<sup>4</sup> Yhang hkâ-í hkik lhê nghû é lé, myit wú keq. Haû îchyí îwa Abraham lháng gi, wó lo é mâ é xê gambùm mâ é ragambùm, yhang lé byi ri-nhung! <sup>5</sup> Hkyangjong dut bang Lewiq é awut ashîn pé gi, yhangmoq é gumang wuî, Abraham mai nyi gyó lo é bang

✠ 6:14 Apûn 22:17

nghut kôle, tarâ má bo é eq rajung za, haú bâng chyáng mai xê gambùm mâ é ragambùm lé hkyui yù râ dut é bang nghut akô. <sup>6</sup> Nghut kôlhang, Melahkizedek gi, Lewiq mai gyó lo é amyû a nghut kôle, danggidiq pé wó to sù nghut é Abraham chyáng mai xê gambùm mâ é ragambùm hap yù mù, shimân byî ri. <sup>7</sup> Shimân byi sù gi, shimân byî é lé hkam yù sù htoq je gyaú sù nghut é lé, ó yuq le úng-áng râ hkyô a joq é nghut lhê. <sup>8</sup> Hkyangjông pé eq séng luí ga jang, shi byuq sê é byu eq, xê gambùm mâ é ragambùm lé hkyui yu é nghut lhê; nghut kôlhang, Melahkizedek eq séng luí nghut jáng, asak dui nyi é ga taí pyô byî é huí su eq hkyui yu é nghut lhê. <sup>9</sup> Xê gambùm mâ é ragambùm hkyui yù sù, Lewiq lhang gi, Abraham dông mai xê gambùm mâ é ragambùm byi bê nghû wó taí ri. <sup>10</sup> Haí mù gâ le, Melahkizedek gi, Abraham lé huí é hkûn, Lewiq gi, yhang é îchyí íké é gungdu hkaú má ru bo tô ashí nghut ri.

*Melahkizedek Eq Dù É Yesuq*

<sup>11</sup> Haú Lewiq hkyangjong amyû pê é ipyat má, byu pé gi, jep é tarâ lé wó yu bùm kô é nghut mù, hkyangjong ayá haú mai gumjup hkyô wó yù kô é nghut le gi, haí mù luí, Arun wó é hkyangjong ayá hkyo dông a nghut é za, Melahkizedek wó é hkyangjong ayá hkyo dông lo é sù gotú hkyangjong rayuq ra shirâ lúh? <sup>12</sup> Hkâsu mù gâ le, hkyangjong amyû htaí é hkûn gi, tarâ le htaí yhang htaí râ dut é nghut lhê. <sup>13</sup> Haú su nghû taí é hkyô pé eq séng é Sù gi, gotú byuhú mâ é sù nghut mù, byuhú haú mai gi, ó yuq le hkungga gyap má dojaú wú é a nghut. <sup>14</sup> Hkâsu mù gâ le, nga-nhung é Yhumsîng gi, Yudaq byuhú mai gyó lo é awut ashín nghut é hkyô, san za nghut nyi ri. Mosheq kúm gi, byuhú haú eq séng é hkyô má, hkyangjong pé eq séng luí haí lé a taí é nghut lhê. <sup>15</sup> Melahkizedek eq dù é gotú hkyangjong rayuq pô htoq bê nghû, ngamoq taí bê hkyô gi, je riyhang san za dut bê nghut ri. <sup>16</sup> Yhang gi, îwa rayuq é awut ashín pé nghut râ lhê gâ é tarâ dông hkyangjong rayuq lé dut é a nghut é za, a wó lhoq htên é asak é a-tsam eq rajung za lé dut é ru nghut lhê. <sup>17</sup> Hkâsu mù gâ le,  
"Nàng gi, Melahkizedek wó é hkyangjong ayá hkyô dông mai, ahtum abyuq hkyangjong rayuq nghut nyi ri."☆

ga Yhang eq séng luí taí pyo tô é nghut lhê.

<sup>18</sup> Haú hí lhê é cháng râ tarâ gi, wum nyhôm é eq akyû a bo é yanmai, tô pyám bê nghut lhê. <sup>19</sup> Hkâsu mù gâ le, haú jep é tarâ gi, gumjup hkyô haí a wó kut byî é nghut lhê. Haú mù, je ge é myit myoqbyù hkyô lajang byî é nghut luí, nga-nhung gi, myit myoqbyù hkyô haú mai Garai Gasâng chyáng wó chyâng htep ê é nghut lhê.

<sup>20</sup> Myit myoqbyù hkyô haú gi, dakâm hkyô a bo é a nghut myhi-nhung! Góbang gi, dakâm hkyô a bo é za hkyangjông pé wó dut bekô nghut ri. <sup>21</sup> Nghut kôlhang, Yesuq kúm gi,  
"Nàng gi, ahtum abyuq hkyangjong rayuq nghut lhê."

ga haú Yhumsîng dakâm bê nghut mù, Yhang myit é hkyô htaí râ a nghut."☆

ga, Yhang eq séng luí Garai Gasang taí é hkûn, dakâm dang haú mai hkyangjong rayuq dut bê nghut ri. <sup>22</sup> Dakâm dang hau é yanmai, Yesuq gi, je ge é dangshikaq é pahkám wò yù sù dut bê nghut ri.

<sup>23</sup> Hkyangjông pé myo myo nyi râ dut é gi, yhangmoq é muzó a wó xoq zui shoq shi byuq hkyô eq hkûm zing pyám kô é yanmai nghut ri. <sup>24</sup> Nghut kôlhang, Yesuq gi, ahtum abyuq dui nyi sù nghut é yanmai, Yhang gi, hkyangjong mù ayang ru zúí nyí râ nghut lhê. <sup>25</sup> Haú mù luí, Yhang gi, Yhang dông mai Garai Gasâng chyáng lé jé é bang lé, hkâ-nhám le wó hkyi yu é nghut lhê; haí mù gâ le, Yhang gi, yhangmoq é matú dúng tóngbán byi nyi râ matú, rû dui nyi é sù nghut lhê.

<sup>26</sup> Yesuq gi, chyoiyúng é sù, mara hûn râ hkyô a bo é sù, sân-yúng é sù, yubak dap bang eq rahá a nghut shoq gotú san kut huí é sù, mauhkûng pê ahtoq má lhoq toq lhoq gyaú yu huí é sù nghut ri. Haú sù é hkyangjong mó gi, nga-nhung râ é lé lajang byi râ htuk ang ri. <sup>27</sup> Nyí nyí bui bui, yhumsing é marâ é matú hí hkungga nhông byi mù, byu pê é

mara matú le hkungga nhông byî é gotû hkyangjong mó pé su, Yhang gi, a kut râ é sù nghut lhê. Yhang gi, Yhânggùng lé Yhang nhông byî é hkûn, yangmoq é yubak marâ é matú banshoq radàm za hkungga nhông byi pyám bê nghut ri. <sup>28</sup> Hkâsu mù gà le, haû jep é tarâ gi, wum nyhôm é byu pé lé hkyangjong mó pé dông masat é nghut ri. Nghut kôlhang, Garai Gasang gi, haû jep é tarâ é htâng má lé jé é dakâm dâng èq, Yhâng é Yuqzo lé masat to bê nghut mù, Yhang gi, ahtum abyuq lhoq gumjup hui bê nghut ri.

## 8

*Dangshikaq Asik É Hkyangjong Mó Yesuq*

<sup>1</sup> Ngamoq taî nyi é dangkâng gi, shí dông nghut lhê: Nga-nhúng gi, haû sù é hkyangjong mó lé wó é bang nghut lhê. Yhang gi, mauhkûng htoq má, Hkikhkam dik Sû Garaî é hkohkâm-tanghkuq é loqyò hkyam shut zùng to mù, <sup>2</sup> byu èq saî é a nghut é za, haû Yhumsing èq saî é saksé zúm akying hkaû mâ é, sân-yúng dik gok má dojaú é sù nghut ri.

<sup>3</sup> Hkyangjong mó hkangmó gi, chyunghuq pé eq hkungga pé lé nhông byi râ matú wò hun to huî é chyat nghut lhê. Haû mù luî, hkyangjong mó shí yuq le, rajung jung nhông byi ra râ nghut lhê. <sup>4</sup> Yhang gi, mingkan htoq má nyi tô é ru nghut le gi, hkyangjong dut râ a nghut; hkâsu mù gà le, jep é tarâ dông ga jang, chyunghuq nhông jaú é byu pé nyi to gù bê nghut lhê. <sup>5</sup> Yangmoq, sân-yúng dik gok má dojaú é hkyô gi, mauhkûng htoq má joq é azòng eq wupzo dông nghut ri. Haû nghut é yanmai, Mosheq gi, saksé zúm saî râ nghut é hkûn, "Nang lé, bùm má tûn shit é azòng eq rajung za jung hkangmó wó saî shoq kut aq." <sup>6</sup> Nghut kôlhang, Yesuq, gyoro sô xoq byî é dangshikaq gi, axaû lhûm htoq má je gyaú é eq rajung za Yhang hap yu tô é dojaú hkyô gi, yangmoq é dojaú hkyô htoq má je gyaú é nghut lhê. Haû mù, dangshikaq haû gi, je ge é danggidiq pê htoq má awang hi tô é nghut lhê.

<sup>7</sup> Hkâsu mù gà le, sângh-hi lhê é dangshikaq má râ é hkyô haî a bo é ru nghut le gi, gotû ra râ a nghut lo. <sup>8</sup> Nghut kôlhang, Garai Gasang gi, byu pê chyáng mara bo é myàng mù, taî é gi,

"Haû Israelaq é yhumbyù wuì eq le, Yudaq é yhumbyù wuì eq le, Ngò, dangshikaq asik to râ ahkyíng jé lo nyi ri ga haû Yhumsîng taî pyo ri.

<sup>9</sup> Haû gi, Ngò, yangmoq é îchyí iwâ pé lé loq èq zui mù, Egutuq ming mai shuí htoq lo é hkûn,

yangmoq eq tô tô é dangshikaq su dut râ a nghut.

Haî mù gà le, yangmoq gi, Ngá é dangshikaq lé a xoq cháng kô é nghut mù,

Ngò gi, yangmoq chyáng mai lhing ló byuq é nghut lhê ga haû Yhumsing taî pyo ri.

<sup>10</sup> Shî gi, ahkyíng haû laî é htâng má, Israelaq é yhumbyù wuì eq Ngò to râ nghut é dangshikaq nghut lhê ga haû Yhumsîng taî pyo ri.

Ngò gi, Ngá é tarâ pé lé, yangmoq é i-myt má kat byi mù, yangmoq é myit nhiklhum má kê to byi râ nghut lhê.

Ngò gi, yangmoq é Garai Gasang nghut mù, yangmoq gi, Ngá é byu pé dut kó râ nghut lhê.

<sup>11</sup> 'Haû Yhumsîng lé sé keq.' ga, yhâng é gumang hpó lé nghut nghut,

yhâng é chyangnâm mâ é sù lé nghut nghut, mhoqshit é byù nyi râ a nghut lo,

haî mù gà lé, yangmoq lhunglhâng bang gi, tiq htâng sù mai kô htâng sù jé shoq Ngo lé sé kó râ nghut lhê.

<sup>12</sup> Hkâsu mù gà le, Ngò gi, yangmoq é agè ashop hkyô lé mara hkyut pyám byi mù, yangmoq é mara pé lé dum a bun byi lo râ nghut lhê." <sup>13</sup>

gâ ri.

<sup>13</sup> Dangshikaq haû lé, Yhang "asik" gà é gi, sângh-hi lhûm lé, axau kut pyâm é nghut ri; xau ló byuq é haî le, hkâ-myhâng a myáng má byuq ló byuq râ nghut lhê.

## 9

*Myidàm Saksé Zúm Má Noqkuq É Hkyô*

<sup>1</sup> Sâng-hi lhê é dangshikaq gi, noqkuq râ htungtarâ pé eq noqkuq râ myidàm sân-yúng dik gok bo é nghut ri. <sup>2</sup> Saî tô é saksé zúm é sâng-hi gok má gi, haû myibung tsúng jang, siboî eq haû nhông byî é muk joq mù, haû gok lé gi, Chyoiyúng Jowò ga myhông ri. <sup>3</sup> Í dang nghû râ gok pán-gyang é ahkaû mâ é gok lé gi, Chyoiyúng Htâng é Jowò gâ é nghut lhê. <sup>4</sup> Gok haû má gi, namngón jung nyhê é hîng hkungga gyap eq hîng shup dangshikaq sidek joq ri. Dangshikaq sidek haû má gi, mannaq muk bo é hîng yam, ahaq nyún tô é, Arun é dumbáng eq, dangshikaq luqlong pé bo tô ri. <sup>5</sup> Dangshikaq sidek é ahtoq má gi, shîhtaí gunglik hkungga byi jang htoq má wup tô é, Hpungwup shingkang bò Sû é hkerubim\* pé joq tô ri. Nghut kôlhang, ngamoq gi, ahkuî haû pé lé jihkúm nuqguq a wó taí san kyo é nghut lhê.

<sup>6</sup> Haû đông jung hkangmó ban lajang tô é hkûn, hkyangjông pé gi, ayang sâng-hi gok má wàng mù, yhangmoq é dojaú muzó lé wùn waq bekô nghut ri. <sup>7</sup> Nghut kôlhang, ahkaû gok má gi, hkyangjong mó za, yhânggùng é matú le, a sê é za byu pé kut shut é marâ é matú le, nhông byi râ sui chûng mù, razàn má radàm za wang é nghut lhê. <sup>8</sup> Haû Chyoiyúng Woi-nyí gi, haû pé đông mai, sâng-hi é saksé zúm ru joq nyi nyi, haû Chyoiyúng Htâng é Jowò wàng hkyô a hpông shit shi é lé, tân shit nyi ri. <sup>9</sup> Haû gi, ipyat shi é matú tân shit é azông nghut mù, nhông byî é chyunghuq pé eq shigu hkungga pé gi, dojaú sù é i-myt lé a wó lhoq sân-yúng byî é hkyô lé taí nau é nghut lhê. <sup>10</sup> Haû pé gi, zojung, shuqjung eq chî san chî séng hking ahú hú eq za sêng é nghut mù, htungli asik, lé joq é ahkýing jé shoq za tô tô é gungsho eq sêng é tarâ pé nghut ri.

*Hkrisduq É Sui*

<sup>11</sup> Hkrisduq gi, shî má joq to gù nghut é gè hkyô pé é hkyangjong mó đông lé jé é hkûn, hpan tô é má a lom nghû nau é, byu eq saî é a nghut é, je kô é eq je gumjup é saksé zúm mai wang lai bê nghut lhê. <sup>12</sup> Yhang gi, Chyoiyúng Htâng é Jowò má wang é hkûn, bainám eq nojúng zo pé é sui lé chûng mù wang é a nghut é za, Yhâng é suî eq yhang banshoq é matú radàm za ahtum abyuq é hkyi yù hkyô wó yù bê nghut ri. <sup>13</sup> Htungli đông agot a-û dut é bang lé lhoq sân-yúng râ matú, bainám eq nohtó zo pé é sui eq no-pyâ é myi-mhop lé, yhangmoq é ahtoq má hpyun gyun é hkûn, yhangmoq gi, ahtoq gungsho pyâm wó lhoq sansêng é hui kô é nghut lhê. <sup>14</sup> Haû nghut jáng, Garai Gasâng é hí má ra a bo é Yhânggùng lé, ahtum abyuq é Woi-nyí đông mai nhông byî é Hkrisduq é sui gi, rû dui nyi é Garai Gasang lé nga-nhúng wó dojaú sháng gaq ga, shi é hkyô shut shuî jé é nyi yap sâmlai mai nga-nhúng é myit sôn sê é hkyô lé, je riyhang wó lhoq sanséng yu ri-nhung mhaí!

<sup>15</sup> Haû nghut é yanmai, Hkrisduq gi, danggidiq byi tô é ahtum abyuq é muizè lé, ji yù huí é bang wó hap yù kó sháng gaq ga, dangshikaq asik é gyoro sô xoq byi sù nghut nyi ri. Haû su wó kut é gi, sâng-hi lhê é dangshikaq ahkaû má mara kut shut é bang lé lhoq lhut yù râ matú, yubak chyîn xap zê ralhùm đông, Yhang shî hkám byi yanmai nghut ri.

<sup>16</sup> Madat dang eq séng luî ga jang, madat dang taí sù haû shî bê hkyô saksé shit râ lhê. <sup>17</sup> Haî mù gâ le, madat dang gi, rayuq yuq shî jáng za sheq lichyúm htoq é nghut lhê. Madat dang taí sù rû dui nyi nyi, haû gi, hkâ-nhám le lichyúm htoq râ a nghut. <sup>18</sup> Haû nghut é yanmai, sâng-hi lhê é dangshikaq lháng gi, sui a bo lòm jáng lichyúm a htoq é nghut lhê. <sup>19</sup> Mosheq gi, haû jep é tarâ má bo é hkunmó hkangmó lé, shiwa byù banshoq bang lé ban taí pyo é hkûn, zam zam ne é saumaú eq jàm kyâng lé yù mù, nojúng zô é sui eq bainám sui eq wuî nyhò tô é lé, chyúmding má le, shiwa byù banshoq bang lé le, hpyun gyûn é nghut ri. <sup>20</sup> Yhang gi, "Sui shî gi, nungmoq cháng râ matú, Garai Gasang, hkunmó hkyô to bê nghut é, dangshikaq tô tô é sui nghut lhê."☆ ga taí ri. <sup>21</sup> Yhang gi, saksé zúm eq dojaú é má chung é zè pé má le, haû eq rajung za sui haû hpyûn gyûn ri.

\* 9:5 Hkerubim gâ é gi, byù su su, dusak su su dut é, dùng dap é maumang lagyo rahú nghut lhê. ☆ 9:20 Htoq Ló 24:8

<sup>22</sup> Gè gè gi, haù jep é tarâ má bo é đông ga jang, azíng zê aluq banshoq gi, suí eq lhoq sân-yúng é hui râ dut é nghut mù, sui htoq hkyô a joq jáng, mara hkyut byi hkyô le joq é a nghut.

<sup>23</sup> Haù mù, mauhkúng zè pè é azòng pé gi, hkungga haù pè eq lhoq sân-yúng é hui râ é nghut lhê. Nghut kôlhang, mauhkúng zè pé yhang gi, haù pè htoq je ge é hkungga pè eq lhoq sân-yúng é hui râ dut é nghut lhê. <sup>24</sup> Hkâsu mù gâ le, akying lhùm é azòng za nghut é, byu eq saí é chyoyúng dik é jowò má Hkrisduq wang é a nghut é za, Yhang gi, mauhkúng má yhang wang é nghut mù, ahkuí gi, nga-nhùng é matú Garai Gasâng é hí má bo yap byí nyi é nghut lhê. <sup>25</sup> Yhang gi, haù hkyangjong mó mai yhumsîng é sui a nghut é sui lé chùng mù, Chyoyúng Htâng é Jowò má zàn wui wàng luí kut é su, yhanggùng lé dum nhông byi byi kut râ matú mauhkúng má wang é le a nghut. <sup>26</sup> Haù đông ru nghut le gi, Hkrisduq gi, mau htoq xâng hkùn mai shí hkâm é adàm myo myo nghut berâ nghut lhê. Nghut kôlhang, ahkuí, Yhang gi, yubak mara huí sêng pyám byi râ matú, yhanggùng lé hkungga nhông byi râ ga ipyat pé ló htâng ló nyi é má, banshoq é matú radàm za htoq shit bê nghut ri. <sup>27</sup> Byù gi, radá za shí râ nghut mù, hau htâng má tarâ jéyáng é hui râ nghut é eq rajung za, <sup>28</sup> Hkrisduq gi, byù myo myô é yubak mara lé yu pyám byi râ matú, radá za hkungga nhông é hui bê nghut ri. Haù mù, Yhang gi, yubak mara wun pyám byi râ a nghut lo é za, Yhang lé láng nyi é bang lé hkyi yù hkyô yu lé byi râ matú, htâng má í dâm nghu râ dàm htoq shit râ nghut lhê.

## 10

### *Hkrisduq É Gùng Lé, Banshoq É Matú Radàm Za Nhông Byí É Hkyô*

<sup>1</sup> Haù jep é tarâ gi, jé lô râ nghut é gè hkyô pè é akyîng a nghut é za, wupzo za nghut ri. Haù nghut é yanmai, jep é tarâ gi, zàn wui ru nhông byi byi kut nyi é eq rajung zâ é shigu hkungga pé đông mai, noqkuq râ matú chyâng lé é bang lé hkâ-nhám lé wó lhoq gumjup é a nghut. <sup>2</sup> Tarâ haù wó lhoq gumjup byí é ru nghut le gi, yhangmoq nhông byí é hkyô nô pyám kó râ a nghut lhi? Hkâsu mù gâ le, haù noqkuq é bang gi, banshoq é matú radàm za lhoq sanséng huí é nghut jáng, yhangmoq é yubak mará é matú, hkâ-nhám le mara a bò bun lo kó râ nghut lhê. <sup>3</sup> Nghut kôlhang, shigu hkungga haù pé gi, zàn wui yubak mara pé lé lhoq pun byí é zè nghut ri. <sup>4</sup> Haù mù gâ le, nohtó pé eq bainám pè é sui gi, yubak mara lé huí sêng pyâm é hkyô wó dut é a nghut.

<sup>5</sup> Haù mù luí, Hkrisduq, mingkan má lé jé é hkùn, Yhang taí é gi, "Shigu hkungga eq hkungga lé Nàng a o é nghut mù,

Nàng kúm gi, Ngá é matú gungdu hen to byi bê nghut ri.

<sup>6</sup> Myi nyhé hkungga pé eq mara hkyut hkungga pé gi, Nang lé gabú nhang é a nghut.

<sup>7</sup> Hau htâng, Ngò gi, 'Garai Gasang ê, Ngò eq séng luí chyúmding má kê tô é eq rajung za,

Nàng ô nau é hkyô kut râ matú, Ngò, shí má nyi lhê.' nghu taí é."<sup>☆</sup>

gâ ri. <sup>8</sup> Sâng-hi má, Yhang gi, "Shigu hkungga eq hkungga pé, myi nyhé hkungga eq mara hkyut hkungga pé lé, Nàng a o é htoq agó, haù pé lé Nàng a gabú é nghut lhê." ga taí ri. Haù jep é tarâ đông haù pé lé kut râ dut kôlhang taí é nghut ri. <sup>9</sup> Hau htâng má, Yhang gi, "Nàng ô nau é hkyô kut râ matú, Ngò, shí má nyi lhê." ga taí ri. Haù gi, Yhang, htang lhum dangshikaq lé htaí masat to râ matú, sâng-hi lhum lé tô pyâm é nghut ri. <sup>10</sup> Myit ô nau hkyô hau é yanmai, Yesuq Hkrisduq, Yhâng é gungdu lé hkungga đông banshoq é matú radàm za nhông byí é đông mai, nga-nhúng gi, lhoq chyoyúng é hui bê nghut ri.

<sup>11</sup> Hkyangjong hkanmó gi, nyí nyí bui bui, yap mù, yhâng é hkyangjong muzó lé zui saí é nghut lhê. Yhang gi, yubak mara lé hkâ-nhám lhang a wó huí séng pyám byí é, rajung zâ é shigu hkungga lé, dum nhông byi byi kut é nghut lhê. <sup>12</sup> Nghut kôlhang, hkyangjong mó nghut é Hkrisduq gi, yubak mara hkyut byi râ hkungga rallhum lé za, ahkyíng banshoq é matú ban nhông byí é hkùn jáng, Garai Gasâng é loqyo hkyam shut zung to bê nghut ri. <sup>13</sup> Haù hkùn mai, Yhang gi, Yhâng é gyè pé lé, Yhâng é hkyi nang jang kut byi râ lé

☆ 10:7 Hkya-on 40:6-8

láng nyi é nghut ri. <sup>14</sup> Haî mù gà le, Yhang gi, lhoq chyoiyúng é huî nyi bang lé, hkungga ralhumm eq za, pyat dedû é matú lhoq gumjup byi bê nghut ri.

<sup>15</sup> Haû Chyoiyúng Woi-nyí le, haú hkyô eq séng luí nga-nhúng lé saksé hkâm kyô ri. Sâng-hi má, Yhang taí é gi,

<sup>16</sup> "Haû Yhumsîng taí ri, shî gi, ahkyíng haû laî htâng má, Ngò, yhangmoq eq to râ dangshikaq nghut lhê.

Ngò gi, Ngá é tarâ pé lé, yhangmoq é myit nhiklhumm hkaû má kat byi mù, yhangmoq é i-myit má kê to byi râ nghut lhê."✠

gâ ri. <sup>17</sup> Hau htâng, Yhang taí jat é gi,

"Ngò gi, yhangmoq é yubak mara pé eq tarâ a chung é muzó pé lé, bûn lô râ a nghut."✠

gâ ri. <sup>18</sup> Haû mù, mara haú pé lé hkyut pyám byi bê nghut jáng, yubak marâ é matú hai hkungga le a ra lo nghut ri.

### *Hkam Jan Râ Hkyô*

<sup>19</sup> Haû mù luí, gumang wui ê, nga-nhúng gi, Yesuq é suí eq, haû Chyoiyúng Htâng é Jowò má wàng râ matú hkyak wó lum to bê nghut lhê. <sup>20</sup> Haû gi, Yesuq é gungdu nghut é pán-gyang dông mai, nga-nhúng é matú hpóng byi bê nghut é asik eq rû dui nyi é hkyô nghut lhê. <sup>21</sup> Haû nghut é yanmai le, Garai Gasâng é yhûm lé up é gyaú é hkyangjong lé nga-nhúng wó é yanmai le, <sup>22</sup> nga-nhúng gi, gingtîng é lumjîng hkyô mai sansêng é i-myit eq, Garai Gasâng chyáng ê mù, mara bò bûn é myit sôn sê é hkyô mai, nga-nhúng lé lhoq sansêng râ matú nga-nhúng é i-myit lé hpyun gyûn é hui nhâng luí, nga-nhúng é gungdu gi, sân-yúng wui eq chi byí é hui yù sháng. <sup>23</sup> Nga-nhúng gi, nga-nhúng yín yu é myit myoqbyù hkyô lé zúi gingtîng nyi sháng; hkâsu mù gà le, danggidiq byí to bê Sû gi, lhummzi Sû nghut lhê. <sup>24</sup> Chyitdap hkyô eq ge é muzó pé má, nga-nhúng gi, rayuq eq rayuq hkâsu kut myit nhaû toq byí lhumm râ hkyô lé, dat myit nyi sháng. <sup>25</sup> Chôm huí zup lhûm nyi é hkyô lé, ra-am lhaq tô pyâm nyi kê é su, nga-nhúng gi, a tô pyâm é za, haû Buinyi chyâng lò bê nghut é lé nungmoq sê é eq rajung za, rayuq eq rayuq je riyhang myit wum byí lhûm nyi sháng.

<sup>26</sup> Nga-nhúng gi, tengmán hkyô lé sê yu é htâng má, shi-ngé ngé mara dum kut shut shut kut é nghut jáng, mara hkyut byi râ hkungga a joq lo. <sup>27</sup> Tarâ jéyáng hkyô eq Garai Gasâng é gyè pé lé nyhê hkyô pyám râ nghut é nhikmo-yô é myi lé za, gyuq chiq myit mai láng nyi râ dut bê nghut lhê. <sup>28</sup> Mosheq é tarâ lé he-ngik é sù ó yuq le, saksé í sum yuq é dâng é yanmai, shogyo nhikmyin a huí é za sat pyâm é hui bê nghut lhê. <sup>29</sup> Haû jáng, Garai Gasâng é Yhangzo lé hkyiwa ô má nâng pyeq bê sù, yhumsîng lé lhoq sân-yúng byi bê nghut é dangshikaq é sui lé a chyoiyúng é zè dông kut pyám bê sù eq, jeju byí é Woi-nyí lé rhoi é sù gi, hkâ-í yhang gyaú é mara dam byí é hui gíng râ nghut lhê ngû, nungmoq wó myit akò lhú? <sup>30</sup> Hkâsu mù gà le, "Lató hpuq râ gi, Ngò ru nghut lhê; Ngò lató hpuq râ."✠ ga le, "Haû Yhumsîng gi, Yhâng é byu pé lé tarâ jéyáng râ nghut lhê."✠ ga le, taí é Sû lé, nga-nhúng sê lhê. <sup>31</sup> Haû rû dui nyi sù Garai Gasâng é loq hkaû má byit gyó wang é gi, gyuq chiq jung yhang nghut ri.

<sup>32</sup> Nungmoq, haû maubó lé hap yu é\* htâng, wuîhke jamjau huí é má gyai yhang shikut kôluí wó jân pyám bê nghut é, hí lhê buinyi pé lé myit bun keq. <sup>33</sup> Ra-u u má, nungmoq gi, byu pé hí má de de rhoi shit é eq zing-rî é hui zo bekô nghut ri; ra-u u má, nungmoq gi, haû su hui zo bang eq rahá bo hui zo bekô nghut ri. <sup>34</sup> Nungmoq yhang, je ge é eq ru gîng nyi é zè pé wó é lé sé kê é yanmai, nungmoq gi, htóng lúng bang lé shogyo nhikmyin bekô eq, nungmoq é sutzè pé lé sing yu pyám byí é bang lé, gabú myit eq jân pyám bekô nghut ri.

<sup>35</sup> Haû mù luí, nungmoq é hkyak myit lum tô é hkyô lé hkâdú pyám kó; agùn agó chyunghuq shigyaú é hui kó râ nghut lhê. <sup>36</sup> Nungmoq gi, Garai Gasâng é ô nàu hkyô lé

✠ 10:16 Yer 31:33 ✠ 10:17 Yer 31:34 ✠ 10:30 Tarâ Pun 32:35 ✠ 10:30 Tarâ Pun 32:36 \* 10:32 Haû maubó lé hap yu é gâ é gi, gabú danglù lé sâng-hi wó hap yu é lé gâ lhê.



kut é hkûn, Yhâng danggidiq byî tô é lé wó hap yù râ matú, nungmoq hkam jan râ dut é nghut lhê. <sup>37</sup> Hkâsu mù gâ le, razup zo nghut jáng,

"Haû lé lô râ Sû gi, jé lé râ nghut mù, ahkyíng lhoq myáng râ a nghut.

<sup>38</sup> Nghut kôlhang, Ngá é dingmán sù gi, lumjínq myit mai asak duì râ nghut lhê.

Yhang nungzut zut é nghut le gi, Ngò, Yhang lé myit nguì râ a nghut."<sup>☆</sup>

ga tô ri. <sup>39</sup> Nghut kôlhang, nga-nhúng gi, nungzut zut mù htên byoq huí é bang a nghut é za, lumjínq mù hkyi yù huí é bang ru nghut lhê.

## 11

### *Lumjínq Myit Mai*

<sup>1</sup> Lumjínq myit nghu é gi, nga-nhúng myit myoqbyu tô é lé hkyak wó râ nghu é eq nga-nhúng a myàng shî é lé joq lhê nghu hkyak sê é hkyô nghut lhê. <sup>2</sup> A-nham lhê bang gi, lumjínq myit haû mai Garaí èq owaq é hui kô é nghut lhê.

<sup>3</sup> Lumjínq myit mai, nga-nhúng gi, nyi mi-nyì, joq mijoq lunglhang lé Garaí Gasâng é hkunmó èq hpan tô é hkyô sê gyô é nghut lhê. Haû mù, myoq èq wó myang é pé gi, byu-myang é pé mai saí htoq tô é a nghut.

<sup>4</sup> Lumjínq myit mai, Abelaq gi, Ka-in kut é htoq je ge é hkungga, Garaí Gasang lé nhông byî é nghut ri. Lumjínq myit mai, yhang gi, yhâng é hkungga eq séng luí Garaí Gasang hkya-ôn é hkûn, dingmán sù rayuq dông owaq é hui bê nghut ri. Haû mù, lumjínq myit mai, yhang gi, shi byuq bê nghut kôlhang, dang rû nyo nyi ashî nghut lhê.

<sup>5</sup> Lumjínq myit mai, Enuq gi, shi é a hui zo shoq, asak shî mai mauhkûng shut shuí yu é hui bê. Yhang lé, Garaí Gasang shuí ló byuq bê nghut é yanmai, yhang lé a wó myàng lo nghut ri. Hkâsu mù gâ le, yhang gi, shuí yu é a hui shî é hí má, Garaí Gasang lé nguì nhâng sù rayuq dông owaq é hui sù nghut ri. <sup>6</sup> Lumjínq myit a bo é nghut le gi, Garaí Gasang lé a wó nguì nhang é nghut lhê. Haû mù gâ le, Yhâng chyáng shikut luí lé jé é sù gi, Yhang nyi é hkyô lé le, lhumzui myit mai Yhang lé hô bang lé, Yhâng èq shigyaú é lé le, lumjínq râ dut é nghut lhê.

<sup>7</sup> Lumjínq myit mai, Noaq gi, a myang wú shî é hkyô pé eq séng luí sidiq byi huí é hkûn, yhâng é yhumbyù wuì lé hkyî râ matú, gyuq hkunggâ é dông mai wuì-sanghpo saí bê nghut ri. Yhâng é lumjínq myit mai, mingkan lé mara byî é nghut mù, lumjínq myit mai lo é dingmán hkyo é jeju lé hkam yù sù dut bê nghut ri.

<sup>8</sup> Lumjínq myit mai, Abraham gi, yhâng é muizè dông, htâng má yhang hap yù râ nghut é, Garaí Gasang byî é jowò shut e ló râ matú ji yu é huí é hkûn, jìno gyo mù, yhang hká shut e ló é a sé kôlhang, ê bê nghut ri. <sup>9</sup> Lumjínq myit mai, yhang gi, gó ming má nyi é byù bíng rayuq su, danggidiq byî tô é mau má nyi bê nghut ri. Yhang gi, zúm pé má lúng é nghut mù, rajung zâ é danggidiq é muizè lé hkam yu é Isak eq Yakup le, zúm pé má lúng bekô nghut ri. <sup>10</sup> Hkâsu mù gâ le, Abraham gi, Garaí Gasâng èq azông hên mù saí tô é, gîng é apùn awang pé eq mu é myuq lé myit myoqbyu nyi é nghut ri.

<sup>11</sup> Lumjínq myit mai, Abraham gi, yhâng é asak ipyat laí ló byuq é eq, Sarah le baùdung nghut to kôlhang, haû danggidiq byi Sû, lhumzui sù nghut lhê ga myit sôn yu é yanmai, îwa rayuq wó dut é hui bê nghut ri. <sup>12</sup> Haû mù luí, yhang gi, shî gùng dông nghut kôle, yhang rayuq mai lo é awut ashín pé gi, mauhkûng mâ é kyî pé eq wuimau yàm mâ é a ung nghap é semuì myhó myô lò bê nghut ri.

<sup>13</sup> Byù haû bang banshoq gi, yhangmoq shi é hkûn jé shoq lumjínq myit mai asak dui nyi kô é nghut lhê. Yhangmoq gi, danggidiq byi tô é pé lé a hap yù kó nghut ri; nghut kôlhang, haû pé lé myàng za myàng kômù, we mai te yu akô. Yhangmoq gi, myidàm htoq má gó ming byu pé eq byù bíng pé nghut é lé yín yù bekô nghut ri. <sup>14</sup> Haû su yín yu é byu pé gi, yhangmoq yhumsing é ming lé ho nyi é bang nghut é lé tûn shit é nghut akô. <sup>15</sup> Yhangmoq htoq lo é ming lé, yhangmoq myit tui nyi kô é ru nghut le gi, dum tau ló râ ahkáng wó kó râ nghut lhê. <sup>16</sup> Ahkuí kúm, yhangmoq gi, je ge é ming nghut é, mauhkûng mingdán lé myit tui nyi akô nghut ri. Haû mù luí, Garaí Gasang gi, yhangmoq

<sup>☆</sup> 10:38 Hbk 2:3-4

é Garai Gasang nghu é hui râ lé a hoq é nghut lhê. Hkâsu mù gâ le, Yhang gi, yhangmoq é matú myuq ralhüm lajâng to byi bê yanmai nghut ri.

<sup>17</sup> Lumjínj myit mai, Abraham gi, Garai Gasâng eq yhang lé chyam é hkûn, Isak lé hkungga ralhüm dông nhông byi bê nghut ri. Haû gi, danggidiq pé lé hap yu to bê sù gi, yhâng é yuqzo zote lé nhông byi râ dâ é nghut lhê. <sup>18</sup> Garai Gasang gi, "Isak dông mai lo é lé, náng é awut ashín nghu són byi râ nghut lhê." <sup>\*</sup> ga yhang lé danggidiq byi to bê nghut kôle, yhang haû su kut é nghut ri. <sup>19</sup> Abraham gi, shi é mai Garai Gasang wó lhoq dui toq lhê ga myit yu ri. Taí sháng ga jáng, Isak lé, shi byuq bê mai, yhang dum wó hap yu é nghut ri.

<sup>20</sup> Lumjínj myit mai, Isak gi, Yakup eq Eso nhik é htângnùng lhê é matú, shimân byi bê nghut ri.

<sup>21</sup> Lumjínj myit mai, Yakup gi, yhang shi ló râ u má, Yosep é yhangzô nhik lé shimân byi mù, yhâng é dumbáng-u má nè luí, noqkuq bê nghut ri.

<sup>22</sup> Lumjínj myit mai, Yosep gi, yhâng asak htâm ló râ u lé, Israelaq byu pé Egotuq ming mai htoq lò râ eq séng luí taí mù, yhâng é showui pé eq séng luí hkâsu kut râ hkyô lé pying to bê nghut ri.

<sup>23</sup> Lumjínj myit mai, Mosheq é yhângnu eq yhângwâ nhik gi, yhang hku lé é htâng má, yhang lé lhamó sum hkyap haq to bekô nghut ri. Haî mù gâ le, yhangnhik gi, zoshâng haû yúng é myàng kômù, hkohkam é mungdang lé a gyuq kó nghut ri.\*

<sup>24</sup> Lumjínj myit mai, Mosheq gi, yhang kô lo é hkûn, Hpara-uq é byizô é yhangzo ga râ lé he-ngik pyâm ri. <sup>25</sup> Yhang gi, yubak marâ é ngón hkyô má rayoq zo ngón kún râ malaî Garai Gasâng é byu pé eq rahá hpuzô é hui râ lé sheq hkyin yù bê nghut ri. <sup>26</sup> Yhang gi, haû Hkrisduq é matú rhoî huí é lé, Egotuq ming mâ é sutzè htoq má je riyhang hpaudap lhê ga myit sôn yu ri. Haî mù gâ le, yhang gi, yhâng é shigyaú chyunghuq lé myit myoqbyu nyí sù nghut ri. <sup>27</sup> Lumjínj myit mai, yhang gi, hkohkâm hpó nhikjum yô é lé a gyuq é za, Egotuq ming mai htoq ló byuq bê nghut ri. Yhang gi, myoq eq a wó myang é sù Garai lé wó myang é sù dông, hkam jân é nghut ri. <sup>28</sup> Lumjínj myit mai, yhang gi, haû zomún lé sat é maumang lagyô eq Israelaq byu pé é zomún lé a wó záng sháng gaq ga, Lhoqlhai Poî eq sui hpyûn é hkyô le kut hí bê nghut ri.

<sup>29</sup> Lumjínj myit mai, haû shiwa byu pé gi, Nhông Nè lé kyuq huí é myigùng htoq mai su laî byit bekô nghut ri; nghut kôlhang, Egotuq byu pé le, haû dông laî shikut wú kô é hkûn, yhangmoq gi, myup shi byuq bekô nghut ri.

<sup>30</sup> Lumjínj myit mai, shiwa byu pé, Yeriuko myuq xêwâm lé nyhit nyí sô lhing é htâng má, xêwâm haû leq gyop byuq bê nghut ri.

<sup>31</sup> Lumjínj myit mai, shiwa myhí Rahap gi, haû Israelaq jó wú bang lé nguingón é eq lhom hkulum yu é yanmai, jìno a gyo bang eq rahá sat pyâm é a huí é nghut lhê.

<sup>32</sup> Haû htoq lai luí, ngò haî taí jat ra shirâ lhú? Gidon, Barak, Samson, Yephta, Dawiq, Samuelaq pé eq myiqhtoî pé é hkyô lé taí râ ahkyíng ngò a wó. <sup>33</sup> Haû bang gi, lumjínj myit mai mingdán pé lé wó zân ung yù bekô, tengmán hkyô lé chung jài bekô, danggidiq byi to bê lé wó hap yù bekô, hkanghkyi pé é nhut lé wó myhî pyám bekô, <sup>34</sup> myidug myishâm lé wó sat pyám bekô, shamsó mai le wó hpang lut bekô nghut ri. Yhangmoq é wum nyhóm hkyô gi, wum taû bo byuq é dut bekô nghut ri. Yhangmoq gi, majan má a-tsam mó bò bang dut mù, maigan gyè pé lé wó ung pyám kô é nghut lhê. <sup>35</sup> Myiwe wuî gi, yhangmoq eq sêng é shi byuq bê bang asak dum lhoq tuí huí é lé, wó yù bekô nghut ri. Góbang gi, je ge é dui toq hkyô wó yù kó sháng gaq ga, lhoq lhut é hui râ lé he-ngik pyám kômù, zing-rî é gyai yhang hui zo bekô nghut ri. <sup>36</sup> Ra-am gi, wuizuî kut pyám byi é eq nhuq bat é hui bekô, góbang gi, shamtoq kyum hut huí é eq htóng lhúng é hui bekô nghut ri. <sup>37</sup> Yhangmoq gi, luqgok eq dú sat é, í túm dut shoq yik hpyit é, sham eq sat pyâm é hui bekô nghut ri. Yhangmoq gi, sau-kuq eq bainám-kuq wut mù, htot lhing wún luí, myung kyuq é, zing-rî é eq rhoi pyâm é hui bekô nghut ri. <sup>38</sup> Yhangmoq

<sup>\*</sup> 11:18 Apûn 21:12 \* 11:23 Haû-u lé, hkohkâm hpó gi, Israelaq pé é yuqzo zonú wuî lé sat pyám râ hkunmó hkyô tô é nghut lhê.

lhumzuî nyî kô é yanmai, mingkan gi, yhangmoq eq a gingdán nghut ri. Yhangmoq gi, yoso pé má, bùm pé má, luqhkyûng pé eq myìdong pé má nyi lhing wún bekô nghut ri.

<sup>39</sup> Haû bang banshoq gi, yhangmoq é lumjín myit é yanmai, owaq é hui bê nghut kôle, yhangmoq ó yuq le, danggidiq byî tô é lé a myang hkam yù kó nghut ri. <sup>40</sup> Haî mù gâ le, nga-nhúng eq rahá za nghut jáng sheq, yhangmoq lhoq gumjup é wó hui kó sháng gaq ga, Garai Gasang gi, nga-nhúng é matú je ge é hkyô lajâng to byi bê nghut ri.

## 12

### *Garai Gasang, Zo Wuî Lé Mhoqshit É Hkyô*

<sup>1</sup> Haû mù luî, nga-nhúng gi, haû myhò é saksé pé mhutdûm su nga-nhúng é lhinghkyuq má joq to bê nghut é yanmai, nga-nhúng lé hkûm tang é hkyô pé jung hkanmó eq, luî za lhoq nhúng byî é yubak mara lé dú pyám mù, nga-nhúng òn râ matú tô tô é hkyô lé, hkam jan luî òn e ló sháng. <sup>2</sup> Nga-nhúng gi, nga-nhúng é lumjín hkyô é apûn awang lé hî sù eq lhoq gumjup byi sù nghut é Yesuq lé wú tsuq nyî sháng. Yhang gi, Yhâng é hí má joq tô é gabú hkyô é yanmai, hoq hpû é hkyô lé haî su a ngam é za, tapzîng má shî hkâm é hkyô lé jân pyám luî, Garai Gasâng é hkohkâm-tanghkuq é loqyo hkyam shut zung to bê nghut ri. <sup>3</sup> Nungmoq gi, a ngu byuq râ eq myit wum a gyuî byuq kó sháng gaq, yubak dap bâng chyáng mai haû su htuq htîng é hkyô lé jân pyám é Yesuq chyáng mai myit wum yù keq.

<sup>4</sup> Nungmoq gi, yubak mara lé htuq htîng shikut é hkyô má, nungmoq é sui shun pyám shoq yhang a kut shi kó nghut ri. <sup>5</sup> Hau htoq agó, nungmoq gi, zo wuî lé òng Garai Gasang nungmoq lé wum byî é dang lé tô-myhî pyám bekô lhú? Wum byi dang haû gi, "Ngá zo ê, haû Yhumsîng mhoqshit é hkyô lé agya alhá hkâkut pyám,

Yhang, nang lé tân é hkûn, myit wum hkâgyui,

<sup>6</sup> haî mù gâ le, haû Yhumsîng gi, Yhang chyitdap é bang lé mhoqshit mù, zo rayuq lé òng,

Yhang hap yu é bang yuq hkanmó lé dam byî é nghut lhê."☆  
gâ é nghut ri.

<sup>7</sup> Mhoqshit huî é hkyô má, wuîhkê é lé hkam jan keq. Garai Gasang gi, nungmoq lé, zo wuî lé òng kut é ru nghut lhê. Hkâsu mù gâ le, yhumsîng é yhângwâ èq a mhoq é zo gi, ó wá nyi lhê lhú? <sup>8</sup> Nungmoq gi, yuq hkanmó huî lai é mhoqshit hkyô lé, a hui kô é nghut jáng, dezô pé òng nghut byuq mù, zo sîng wui a nghut lo kó. <sup>9</sup> Nga-nhúng banshoq bang gi, nga-nhúng lé mhoqshit é xângzo îwâ pé wó é bang chyat nghut mù, yhangmoq lé hkunggâ é nghut lhê. Haû nghut jáng, je riyhang, nga-nhúng é woi-nyí eq sêng é îwâ é a-ô má nyi mù, asak òn râ dut ri myhi-nhung! <sup>10</sup> Nga-nhúng é xângzo îwâ pé gi, yhangmoq je ge dik bûn é lé, nga-nhúng lé rayoq zo mhoqshit é nghut ri. Nghut kôlhang, Garai Gasang gi, Yhâng é chyoiyúng hkyô má nga-nhúng wó bo lòm shoq, nga-nhúng é gè hkyô é matú, nga-nhúng lé mhoqshit ri. <sup>11</sup> Mhoqshit é hkyô hkanmó gi, mhoqshit u lé ngón hkyô a nghut é za, nò hkâm hkyô nghut nyi ri. Nghut kôle, mhoqshit hkyô haû lé hkam yù bê bâng é matú gi, htâng má, nguínón hkyô eq òngmán hkyô é ashi lhoq htoq byî ri.

<sup>12</sup> Haû mù luî, myûng byuq é nungmoq é loq pé eq wum nyhôm byuq é nungmoq é hkyihput pé lé wum-o lhoq kíng keq. <sup>13</sup> Hkyî hten bang a wó sô é a dut shoq, lhoq gè byî é wó hui kó sháng gaq, nungmoq so râ matú, hkyô lhoq nyhang nyi keq.

### *Garai Lé He-ngik Bang Dàm Byi Hui Râ Hkyô*

<sup>14</sup> Byù banshoq bang eq nguínón shoq nyi râ eq chyoiyúng râ matú wó dut é í shikut keq. Hkâsu mù gâ le, ó yuq le, chyoiyúng hkyô a bo é gi, haû Yhumsîng lé myàng râ a nghut. <sup>15</sup> Ó yuq le, Garai Gasâng jeju lé a tô pyám râ matú, sidiq keq. Haû, yuq htoq lô mù, wuîhke hkyô lhoq htoq é eq byù myo myo lé agot a-û dut nhang é nuî hko su, ó yuq lé le hkâdut nhâng kó. <sup>16</sup> Ó yuq le, ashop é òng gungsho zùm yap é hkyô nghut nghut,

☆ 12:6 Sângkyang 3:11-12

zang radún é matú, yhang wó tô é yuqzo zomún muizè ahko ahkáng lé ung zô pyâm é, Garai a lom é Eso su nghut nghut, a kut râ matú sidiq keq. <sup>17</sup> Nungmoq sê é eq rajung za, Eso gi, htâng má, shimân jeju haû lé hkam yù nau é hkûn, he-ngik pyâm é hui bê. Yhang gi, shimân jeju haû lé ngaubyi ngau-nhap èq hô kôlhang, yhang kut é hkyô lé a wó htaí byi lo nghut ri.

<sup>18</sup> Nungmoq gi, wó záng é eq myi duq nyi é Sinaq Bùm má le, mauchut tuq é, noq-singkyî dut é eq laidun lo é má le, <sup>19</sup> tut htê mying é eq, dang taí htê mying é má le, a jé ê kó nghut ri. Dang htê haû lé wó gyô é bang gi, yhangmoq lé, dang a taí jat lo râ matú dung tôngbán akô nghut ri. <sup>20</sup> Haû mù gà le, yhangmoq gi, "Bùm haû má dusak pé záng jáng lhang, luqgok èq dú sat râ dut lhê."☆ ga Garai Gasang hkyô tô é hkunmó lé a wó hkâm kô é yanmai nghut ri. <sup>21</sup> Haû byu-myàng hkyô gi, lùm wú gyuq hpo dut é yanmai, Mosheq lhang gi, "Ngò, gyuq nán ri."☆ ga taí é nghut ri.

<sup>22</sup> Nghut kôlhang, nungmoq gi, Zi-un Bùm eq rû dui nyi é Garai Gasâng é myuq nghut é mauhkûng Yerusalem má, maumang lagyô pé ajùm ayò gabú ratung zup zing é jang eq, <sup>23</sup> mauhkûng htoq má mying kâ to huí é, zomún pé é noqkuq hpúng joq jang má, jé lé bekô nghut ri. Haû mù, nungmoq gi, byù banshoq é tarâ agyì nghut sù Garai Gasâng chyáng le, lhoq gumjup huí é dingmán bâng é woi-nyí pé chyáng le, <sup>24</sup> dangshikaq asik é gyoro so sù Yesuq chyáng le, Abelaq é sui htoq má je ge é danglù taí é, hpyùn gyûn é sui má le, jé lé é nghut bekô.\*

<sup>25</sup> Nungmoq gi, dang nyô Sû lé a gyo a kut râ matú, sidiq keq. Myidàm htoq má sidiq byî é sù lé he-ngik pyâm é bang, a lut kô é nghut lhê. Haû mù, mauhkûng mai nga-nhúng lé sidiq byî é Su chyáng mai, nga-nhúng lhing ló byuq é ru nghut le gi, je riyhang nga-nhúng a wó lut râ a nghut kó líhí? <sup>26</sup> Haû Garaí dang taí é u má, Yhâng é htê gi, mingkan lé lhoq nhún kat ri, ahkuí kúm gi, "Ngò, mingkan lé za a nghut, mauhkûng pé lé le radàm dum lhoq nhún râ nghut lhê."☆ ga Yhang danggidiq byî to bê nghut ri. <sup>27</sup> "Radàm dum" gà é dang gi, haû a wó lhoq nhún é pé wó myit to sháng gaq ga, hpan to huí é zè pé nghut é, wó lhoq nhún é pé lé huí sêng pyám râ lé gà é nghut lhê.

<sup>28</sup> Haû mù luí, nga-nhúng gi, a wó lhoq nhún é mingdán lé hap yu to bê nghut mù, jeju bun luí, hpautap é eq gyuq hkunggâ é myit mai Garai Gasang hap yù gíng é đông noqkuq sháng. <sup>29</sup> Hkâsu mù gà le, nga-nhúng é "Garai Gasang gi, nyhê jôm é myi nghut ri".☆

## 13

### Ló Htáng Má Lhoq Pun Kyîng É Hkyô

<sup>1</sup> Rayuq eq rayuq, gumang yhangchang đông chyitdap lhùm nyi keq. <sup>2</sup> Byù bíng pé lé hkulùm râ hkâtô-myhí kó, hkâsu mù gà le, ra-am gi, haû su kut nyi kô é yanmai, a sê é za maumang lagyô pé lé hkulum záng bekô nghut ri. <sup>3</sup> Nungmoq gi, htóng lúng bang eq rahá htóng lúng luzúm wuî đông, htóng lúng bang lé le, nungmoq yhang jamjau hui zô nyi é đông, hpuzô é bang lé le, myit bun keq.

<sup>4</sup> Myiháng hkyô gi, lhunglhang bâng èq hpautap é hui râ dut é nghut mù, myiháng yhuphpú gi, sân-yúng râ dut lhê. Hkâsu mù gà le, Garai Gasang gi, su-myi sulàng lú é bang eq ashop é đông gungsho zùm yap é bang banshoq lé jéyáng râ nghut lhê. <sup>5</sup> Nungmoq é asak duí hkyô má, ngùn lé chyitdap é myit tô pyám mù, nungmoq wó é lé nhik dik nyi keq, haû mù gà le, Garai Gasang gi,

"Hkâ-nhám le, Ngò, nang eq a gang râ; hkâ-nhám le, Ngò, nang lé a tô pyám râ."☆ ga taí é nghut lhê. <sup>6</sup> Haû mù, nga-nhúng gi, hkyak lum é myit mai,

"Haû Yhumsîng gi, ngo lé garúm sù nghut lhê yanmai, ngò, gyuq râ a nghut. Ó yuq wá, ngo lé haí wó kut râ lhú?"☆

☆ 12:20 Htoq Ló 19:12-13 ☆ 12:21 Tarâ Pun 9:19 \* 12:24 Abelaq lé gi, yhangmang Ka-in èq sat é nghut luí, yhâng é sui gi, lató-hpuq râ matú nghut ri; nghut kôlhang, Hkrisduq é sui kúm gi, hkyi yù hkyô lajang byi ri. ☆ 12:26 Hagi 2:6 ☆ 12:29 Tarâ Pun 4:24 ☆ 13:5 Tarâ Pun 31:6 ☆ 13:6 Hkya-on 118:6-7

ngghu taí é nghut lhê.

<sup>7</sup> Nungmoq lé Garai Gasâng é mungdang taí kyô é, nungmoq é hkyô-u shê bang lé, myit bun keq. Yhangmoq asak htum shoq nyi lai lo é sâmlai lé myit wú mù, yhangmoq é lumjín myit lé alik kut yù keq. <sup>8</sup> Yesuq Hkrisduq gi, a-nyí nap, hkû-nyí, htângnùng pyat dedu rajung za nghut nyi ri.

<sup>9</sup> Maú nhô zâ é mhoqshit hkyô ajung jung maí eq shuí nghoq huí é bang hkâdut kó. Zo bang lé hai akyû a byí é, htungli zoshuq eq a nghut é za, Garaí jejû eq nga-nhùng é myit nhiklhú lé wum-o lhoq kîng yu é gi, gè hkyô nghut lhê. <sup>10</sup> Nga-nhúng gi, saksé zúm má dojaú é hkyangjong pé zo râ ahkáng a wó é hkungga gyap ralhum wó é nghut lhê.

<sup>11</sup> Haú hkyangjong mó gi, dusak pê é sui lé, yubak mara hkungga đông Chyoiyúng Htâng é Jowò má yu wang ri; nghut kôlhang, gungsho pé lé gi, byù nyí jowò shinggan má nyhê hkyô pyâm ri. <sup>12</sup> Haú eq rajung za, Yesuq le, Yhâng é sui đông mai byu pé lé wó lhoq chyoiyúng râ matú, myuq hkum shinggan má jamjau hpuzo mù shí hkám bê nghut ri. <sup>13</sup> Haú mù luí, nga-nhúng gi, byù nyí jowò shinggan má Yhâng chyáng ê mù, Yhang hui zô é rhoí hkyô lé ê bo hui zo sháng. <sup>14</sup> Hkâsu mù gâ le, nga-nhúng gi, mingkan shí má ru gîng nyi é myuq wó bang a nghut é za, jé lé lô râ myuq lé ho nyi é bang ru nghut lhê.

<sup>15</sup> Haú mù luí, nga-nhúng gi, Garaí Gasâng é myìng lé yín yu é nhutwui é ashí nghut é, hkya-on hkungga lé, Yesuq đông mai, Garaí Gasâng chyáng xoq xoq nhông byí nyí sháng. <sup>16</sup> Ge é hkyô kut râ eq góbang lé shuí gam chùng râ hkyô lé, hkâtô-myhí kó; hkâsu mù gâ le, Garaí Gasang gi, haú sù é hkungga pé lé ô ngui nyi ri.

<sup>17</sup> Nungmoq é hkyô-u shê bâng é jîno gyo mù, yhangmoq é ahko ahkáng ô má nyí keq. Yhangmoq gi, jihpán shit râ dut é bang đông mai nungmoq lé upzúng nyi é nghut lhê. Yhangmoq é muzó pé gi, nungmoq é matú akyû a bo é wólai a dut é za, gabú hkyô ralhum wó dut sháng gaq, yhangmoq é jîno gyô nyí keq.

<sup>18</sup> Ngamoq é matú kyûdung byi kó laq. Ngamoq gi, sân-yúng é myit sôn sê é hkyô wó mù, hkyô hkangmó má ge é đông asak duí râ lé ô nau lhê ngghu, hkyak wó myit ri. <sup>19</sup> Ngò gi, nungmoq chyáng hân za wó dum jé sháng gaq, hau é matú je riyhang kyûdung byi keq ngghu wum taí tsuq kat lhê.

<sup>20</sup> Sau hpúng pê é sau zúng Sû mó nghut é, nga-nhùng é Yhumsîng Yesuq lé, haú ahtum abyuq é dangshikaq é sui đông, shí bê mai dum lhoq dui toq é sù, nguínón hkyô é Garaí Gasang gi, <sup>21</sup> Yhang ô nau é hkyô kut râ matú ge é hkyô jung hkangmó nungmoq lé lhoq gumjup byi mù, Yesuq Hkrisduq đông mai Yhang lé gabú nhang é hkyô lé, nga-nhùng chyáng kut nyí sháng gaq. Hpungwup shingkan gi, Yesuq Hkrisduq chyáng pyat dedu ahtum abyuq ru joq nyí sháng gaq. Amen.

<sup>22</sup> Gumang wui ê, ngò lhoq pún kyîng é dang lé nungmoq wó hkam jan kó sháng gaq ngghu, wum taí tsuq kat lhê; hkâsu mù gâ le, ngò gi, nungmoq lé, laiká ratot za kê kat é nghut lhê.

<sup>23</sup> Ngò gi, nga-nhùng é gumang Timohti lhoq lhut kat é hui bê hkyô lé, nungmoq lé sé nhâng nau ri. Yhang shí má myap jé lé é nghut le gi, ngò, yhang eq rahá nungmoq lé, lé hui râ nghut lhê.

<sup>24</sup> Nungmoq lé shuí-u bang banshoq eq Garaí Gasâng é byu pé banshoq lé bo shi-kyám byi keq. Itali ming mâ é gumang wui gi, nungmoq lé shi-kyâm kat akô nghut ri.

<sup>25</sup> Jeju gi, nungmoq banshoq bâng chyáng ru joq nyí sháng gaq ô.

## YAKUQ Hun Kat é Laiká (James)

<sup>1</sup> Garai Gasang eq Yhumsîng Yesuq Hkrisduq é jùn, ngò Yakuq gi, byo myín tô é Israelaq raxe í myû lé, ngingón dang shit kyô kat lhê.

### *Lumjîng Myit Lé Chyam É Hkyô Eq Hpaqchyî Byéng-yá*

<sup>2</sup> Ngá gumang wuì ê, nungmoq é lumjîng myit lé chyam wú é hui jáng, shikut shirâng sê é myit jat nyi é lé, nungmoq sê nyi lhê nghut mù, <sup>3</sup> wuìhke jamjau ajung jung lé htûng huí é hkûn, gaù jowò mó nghut nyi lhê nghû luí myit yù keq. <sup>4</sup> Hau htoq agó, nungmoq banshoq gúm gumjup jup dut mù luí, haí le a langhpyut shoq, shikut shirang é myit gi, yhumsîng kut nyi é muzó lé wó lhoq gumjup nyi sháng gaq. <sup>5</sup> Nungmoq má rayuq yuq hpaqchyî byéng-yá langhpyut tô é nghut le gi, haù banshoq bang lé, mara a hun é za, agùn agó byî nyi é Garai Gasâng chyáng dúng nyi sháng gaq, haù jáng, Garai gi, yhang lé byi râ nghut lhê. <sup>6</sup> Nghut kôlhang, lum shut é myit a bo é za, lumjîng é myit èq dúng nyi sháng gaq, hkâsu mù gâ le, lum shut é sù gi, laidûn èq hik luí toq lo é nhông mâ é wuìlhêng eq wuì nyi ri. <sup>7</sup> Haù yuq gi, Yhumsîng Garaí chyáng mâ é haí le wó yû râ su a ngam nyi sháng gaq. <sup>8</sup> Yhang gi, myit-kó xan sù nghut luí, yhâng é hkyô hkat hkangmó má, mù htâng a nyang é sù nghut nyi ri.

### *Myùng Sû Eq Wó Sû*

<sup>9</sup> Myung é gumang hpó gi, waq toq huí é má, wó sù gi, lhoq nyhûm huí é má, gabú gumrong nyi sháng gaq. <sup>10</sup> Hkâsu mù gâ le, wó sù gi, wàhu banbó su woí byuq ló râ nghut lhê. <sup>11</sup> Buì gi, nyé é lai èq toq lô jáng, haù wàhu nyhuí byuq ló mù, abó le yoq gyó byuq é eq, hau é yúng sâm pé gi, htên byuq é su; wó sù le haù eq rajung za, yhang kut nyi é muzó má woí byuq ló râ nghut lhê.

### *Gunglaú É Hkyô*

<sup>12</sup> Wuìhke jamjau huí le, wó shikut shirang nyi sù gi, hkungsô wó nyî ri; hkâsu mù gâ le, chyam wú é ban hui jáng, yhang gi, Garai Gasang lé chyitdap é bang lé, byî tô é danggididq asak janmaù lé, wó yû râ nghut lhê.

<sup>13</sup> Gunglaú huí é sù ó yuq nghut kôlhang, gunglaú huí é hkûn lé, "Garai Gasang, ngo lé gunglaú nyi ri." nghû luí, a taí sháng gaq, hkâsu mù gâ le, agè ashop é hkyô gi, Garai Gasang lé wó gunglaú é a nghut, ó yuq lé le Garai Gasang gunglaú râ a nghut. <sup>14</sup> Nghut kôlhang, ó yuq nghut le le, yhumsîng é gungsho ô nau é dông, shuì lêng nghoq ló é nghut le gi, agúng alaú hui bê. <sup>15</sup> Gungsho ô nau é hkyô kúm gi, zogûng dut jáng, mara lé hku htoq lo ri. Mara kô dîng jáng, shi é má jé râ nghut lhê.

<sup>16</sup> Ngò chyitdap é gumang wuì ê, i-myt hkyô nghoq hkâ-nghoq nyî kó. <sup>17</sup> Gè réng é eq byíng jup é chyunghuq lhunglhang gi, ahtoq shut mâ é nghut mù luí, maubó gung pé\* é Yhângwa Garaí chyáng mai gyó lo é nghut ri. Yhang gi, ahpuq alik atau ahû dut é buishûm su dut râ a nghut. <sup>18</sup> Yhang hpan tô é amyû pé má, nga-nhúng gi, sâng-hi myhîng é ashi pé dut lo sháng gaq ga, Yhang gi, Yhang ô nau é hkyô cháng luí, haù tengmán é mungdang mai, nga-nhúng lé hkû to bê nghut ri.

### *Gyo Yu É Eq Cháng Kut É Hkyô*

<sup>19</sup> Ngò chyitdap é gumang wuì ê, shí hkyô lé nungmoq sê nyi akô. Byù ó yuq nghut kôlhang, gyô yù râ lé han nyi sháng; dang taí râ lé a hân sháng gaq; nhik-yo râ lé le hkâhân kó. <sup>20</sup> Hkâsu mù gâ le, byù nhik-yô é hkyô gi, Garai Gasang ô nau é dingmán é dông asak dui hkyô wó lhoq htoq râ a nghut. <sup>21</sup> Haù mù luí, achau achyut é banshoq eq ladu laí agè ashop é pé lé lhoq san lhoq sêng pyám luí, nungmoq é i-myt lé wó hkyi yù râ

\* 1:17 Maubó gung pé gâ é gi, buì, kyî, lhamó lé gâ lhê.

matú, i-myyit unghkaû má Garai Gasang hô tô é mungdang lé, nú-nhâm é myit èq hkam yu nyì keq.

<sup>22</sup> Nungmoq gi, yhumsing gùng lé a mhaû pyám sháng gaq, haû mungdang lé wó gyô yu é bang za a nghut, haû dông châng kut é bang le nghut nyí sháng gaq. <sup>23</sup> Mungdang haû lé wó gyô yù mù, a châng kut é sù ó yuq le, yhumsing é gungdu lé myoqjàm má wú sù eq wuí ri. <sup>24</sup> Yhang gi, yhâng é gungdu lé wú yù mù, myoqdong lhik é eq, yhumsing gungdu hkâsu dut é lé tô-myhî pyâm ri. <sup>25</sup> Nga-nhúng lé wó lhoq lhut yu é gumjup é tarâ má, rago za wú tsuq nyí sù kúm gi, wó gyô yù mù tô-myhî pyâm é sù a nghut, muzó èq tân shit é sù nghut é yanmai, haû yuq gi, yhang châng kut é muzó má shimân jeju wó râ nghut lhê.

<sup>26</sup> Byù rayuq yuq, "Ngò gi, noqkuq htông lé lhoq dik sù nghut lhê." ga luí, myit to kôlhang, yhumsing nhut shô lé a wó hkâng mù, yhumsing myit lé mhaû pyâm é nghut le gi, haû yuq é noqkuq htông gi, akôm za nghut nyi ri. <sup>27</sup> Îwa Garai Gasâng é hí má sansêng é eq, râ é hkyô a bo é noqkuq htông gi, wuîhke jamjau huí é chuimó chuizô pé lé, châng wú garúm é hkyô eq, mingkan htoq mâ é achau achyut é hkyô lé koi pyâm é hkyô nghut ri.

## 2

### *Myoqdong A Wó Hkyin Lhum*

<sup>1</sup> Ngá é gumang wuí ê, hpungwup shingkang bo é nga-nhông é Yhumsing Yesuq Hkrisduq lé lumjínng hkyô má, byu é myoqdong lé hkâhkyin lhum kó. <sup>2</sup> Dangké, hîng loqchyop chyop luí, réng é mebu wut é sù rayuq eq ajeq amyha é mebu wut é asho awuí é sù rayuq gi, nungmoq é tarajong má wang lò kô é nghut le, <sup>3</sup> haû réng é mebu wut é sù lé, nungmoq lhom wú mù je hkunggâ é èq, "Shî aróng wó é jowò má zùng aq." dum, haû asho awuí é sù lé nghut jáng gi, "Mhó má yap to aq." haû su a nghut jáng, "Ngá é hkyî htông má zùng aq." ga taí kô é nghut le gi. <sup>4</sup> nungmoq rayuq eq rayuq gamhkuí lhum luí, a ge é i-myyit èq doqdân é bang dut lò bekô a nghut kó lú?

<sup>5</sup> Ngò chyitdap é gumang wuí ê, gyô yù keq, lumjínng hkyô má wó sùt nyì luí, gidíq tô tô é mingdán é silí wunlí lé, Yhang lé chyitdap bang wó hkam yù sháng gaq ga, Garai Gasang gi, myigùng htoq mâ é asho awuí é bang lé hkyin yù bê a nghut kó lú? <sup>6</sup> Nungmoq kúm gi, asho awuí é sù lé a hpau a yùm kut pyám bekô nhung; wó bang sùt bang kúm gi, nungmoq lé zik zo mù luí, yhumsing é loq èq yhang, tarâ tingnyâng shut she hkyut ló bekô, a nghut kó lú? <sup>7</sup> Nungmoq eq sêng é kô dik é myìng lé lhang, yhangmoq yhang rhoí dang taí bum akô, a nghut kó lú?

<sup>8</sup> Haû mù luí, Chyúmdang má, "Náng gùng lé nàng chyitdap é su, náng é chyangnâm mâ é bang lé le chyitdap aq." ✠ ga luí, taí tô é hkohkam tarâ lé, nungmoq tsuq za châng é nghut le gi, nungmoq ge é hkyô lé kut nyí bê. <sup>9</sup> Nghut kôlhang, byu é myoqdong lé nungmoq hkyin nyì kô é nghut le gi, nungmoq mara kut nyí gú nghut bê yanmai, haû tarâ lé shut é bang lé su tarâ jéyáng é huí nyì bekô râ nghut lhê. <sup>10</sup> Byù ó yuq nghut le le tarâ banshoq lé châng kôlhang, haû mâ é ralhum lhum lé shut pyám jáng gi, tarâ banshoq lé shut pyám sù dut byuq râ nghut lhê. <sup>11</sup> Hkâsu mù gâ le, "Su-myi sulàng hkâlú." ✠ ga luí, hkanng tô é sù gi, "Byù lé hkâsat." ✠ ga luí le, taí tô ashí. Nàng su-myi sulàng a lú kôlhang, byù sat é sù nghut le gi, tarâ lé shut é sù nghut bê.

<sup>12</sup> Haû su mù luí, nungmoq lé lhoq lhut kat é tarâ dông jéyáng doqdân é hui râ bang su, ru taí nyì keq; ru châng kut nyí keq. <sup>13</sup> Hkâsu mù gâ le, shogyo myit a bò sù gi, a shogyô é dông jéyáng doqdân é hui râ nghut lhê. Shogyo nhikmyîn é hkyô kúm gi, jéyáng doqdân é hkyô lé wó ông lut râ nghut lhê.

### *Lumjínng Myit Eq Zui Saí É Hkyô*

<sup>14</sup> Ngá gumang wuí ê, byù rayuq yuq, "Ngò gi, lumjínng myit bo lhê." ga taí nyì kôlhang, muzó a bo lom é nghut le gi, haí akyû bò râ lú? Lumjínng myit haû gi, yhang lé wó hkyi

yù râ l hú? <sup>15</sup> Gumang, gu-nhá rayuq yuq a chîn dut nyi é eq, nyí wui é zoshuq langhpyut tô é nghut le, <sup>16</sup> nungmoq chyáng mâ é rayuq yuq gi, yhangmoq é gungsho má râ é hkyô haí le a byí é za, yhangmoq lé, "Nungmoq wut é gùng lúm sháng gaq, zô é ùng gyi sháng gaq, ngui ngui ngón ngón ló keq." ga taí é nghut le gi, hai akyû bò kó râ l hú? <sup>17</sup> Haû eq rajung za, lumjínng myit má muzó a bo é nghut le gi, shi é eq rajung za nghut nyi ri.

<sup>18</sup> Dum rahkyô gi, "Nàng gi, lumjínng myit bo ri, ngò gi, muzo bo lhê. Muzó a bo é náng é lumjínng myit ngo lé tûn shit wú aq, haú hkûn, ngá muzó èq ngá lumjínng myit lé, nang lé ngò tûn shit râ nghut lhê." ga luí, rayuq yuq taí râ nghut lhê. <sup>19</sup> Garai Gasang rayuq za nghut é lé nàng lumjínng ri-nhung! Nghut bê, haû gi, jô é hkyô nghut nyi ri, nat gâng pé le haû su yhang lumjínng mù gyuq nán nyi akô nghut ri.

<sup>20</sup> Kyoq a bo é byù bam ê, lumjínng myit má muzó a bo le akôm za nghut é hkyô lé, nàng sé nau lhê a nghut l hú? <sup>21</sup> Nga-nhûng é Îwa Abraham gi, hkungga gyap htoq má yhangzo Isak lé shigu hkungga kut é hkûn lé, zui saí é muzó mai dingmán é sù gâ é lé wó yû bê a nghut l hú? <sup>22</sup> Haû mù luí, yhâng é lumjínng myit gi, yhâng é muzó eq rahá za e ló é yanmai, lumjínng myit gi, jup byínng lo é lé, nàng wó myâng bê nghut ri. <sup>23</sup> Haû su mù, "Abraham gi, Garai Gasang lé lumjínng é nghut mù luí, yhang lé dingmán sù ga són byi bê."☆ ga luí, kâ tô é Chyúmdang gi, dik to bê. Dum, yhang lé Garai Gasâng é buinùm hpó ga luí le myhínng byi bê. <sup>24</sup> Haû mù luí, byù gi, lumjínng é myit èq baú za a nghut, zui saí é muzó èq mara hkyut san byi huí é lé, nungmoq bûn sê nyi akô.

<sup>25</sup> Haû eq rajung za, Rahap gâ é shiwa myhí gi, jowú su nhik lé lhom te yù mù luí, hkyô gó hkat dông nhang kat pyâm é hkûn le, yhang zui saí é muzó mai dingmán é sù gâ é wó yû bê a nghut l hú? <sup>26</sup> Haû su mù, gungdu má woi-nyí a bo le gi, shi é eq rajung za, haû lumjínng myit má muzó jizó a bo le gi, shî gû nghut bê nghut ri.

### 3

#### *Mhé Wuí É Shô*

<sup>1</sup> Ngá é gumang wuì ê, byù myo myo sará hkâkut naû kó. Hkâsu mù gâ le, ngamoq sê é eq rajung za, sará pé gi, je riyhang htan é dông jéyáng doqdân é hui zo râ nghut lhê. <sup>2</sup> Nga-nhúng banshoq bang gi, hkyô myo myo má myit lingbat é bang chyat nghut ri. Byù rayuq yuq dâng èq a lingbat é nghut le gi, yhang gi, jup byínng sù eq yhumsing é gùng lé wó hkang é sù nghut ri.

<sup>3</sup> Nga-nhúng myang lé nhutkyáng kyáng byi jáng, myang hau é gungdu gón lé, nga-nhúng ô nau é dông wó cháng nhang lhê. <sup>4</sup> Haû mai gotû, wuì-sanghpo pé lé wú wú keq, haû-í kô é sanghpo lé htan é laidûn èq mut é hui kôlhang, sanghpo hkâng sù gi, gyai tiq é sanghpo shap èq za, yhâng ô nau é dông, haú pé lé wó hkang yu ri. <sup>5</sup> Haû eq rajung za, shô gi, tiq é gungsho za nghut kôlhang, gyai gumrông nghutbûn nyi ri; wú keq, tiq dik é myizik zo gi, yoso mhanpúng mó lé wó nyé gyó nhang ri-nhung. <sup>6</sup> Shô haû gi, myi eq wuí nyi ri. Nga-nhúng é gungsho má, shô haû gi, agè ashop é mingkan dut lò mù, nga-nhúng é gungsho asak lé achâq achyut dut nhâng luí, gungsho asak lé nyhê tuq kat ri. Haû gi, ngaraî myí èq nyhê tuq kat é nghut bê.

<sup>7</sup> Dusak ajung jung, nghoq ahú hú, myí má yê é jung eq wuì hkaû má nyi jung banshoq gi, wó mhê yu é jung chyat nghut mù, byu pé gi, haú pé lé mhê yu nyi akô. <sup>8</sup> Nghut kôlhang, shô lé kúm gi, byù ó le a wó mhê yù kó nghut ri. Haû gi, apyí abat, agè ashop, uphkâng a wó é eq, shi é jung duq èq byínng tô é jung nghut nyi ri.

<sup>9</sup> Nga-nhúng gi, shô hau èq nga-nhúng é Yhumsîng eq Îwa Garai lé hkya-on nyi lhê; hau èq za, Garai Gasâng é gunglhô dông hpan tô é waxâng zo wuì lé le nhîng pyâm nyi ri.

<sup>10</sup> Nhut rallhum za mai, hkya-ôn é dang eq nhîng é dang htoq lo ri. Ngá é gumang wuì ê, haû su kut é gi, a gè. <sup>11</sup> Wuìbúm radong za mai, chuî nghâm é wuì eq hkô é wuì wó htoq râ l hú? <sup>12</sup> Ngá gumang wuì ê, maihpáng gâm mai tsanlun shi, tsibyiq nuí mai maihpáng shi, wó zui râ l hú? Haû eq rajung za, xô ngam é wuì gi, chuî nghâm é wuì lé wó lhoq htoq byi râ a nghut.

☆ 2:23 Apûn 15:6



*Ahtoq Mai Lo É Hpaqchyî*

<sup>13</sup> Nungmoq má, hpaqchyî byéng-yá bo é sù eq sê é dat é sù, ó nghut lhê lú? Haú yuq gi, yhang hpaqchyî bo é hkyô lé, hpaqchyî mai wó yu é, myit lhoq nyhum é hkyo èq, yhumsîng zui saí é ge é muzó dông tân shit nyî sháng gaq. <sup>14</sup> Nghut kôlhang, nungmoq é myit má ladu laí é manon é i-myt eq, lú lhum bat zik é i-myt bo é nghut le gi, hkâ-nghutbun kó, haú tengmán hkyô lé le hkâ-mhaú pyám kó. <sup>15</sup> Haú sù é hpaqchyî byéng-yá kúm gi, mauhkûng htoq mai gyó lo é hpaqchyî byéng-yá a nghut, haú gi, myigùng htoq mâ é, gungsho ô nau é eq, nat é hpaqchyî byéng-yá chyat nghut nyi ri. <sup>16</sup> Hkâsu mù gâ le, manon é eq lú lhum bat zik é dut nyi le gi, ruk ruk rak rak é hkyô eq agè ashop é mù ajung jung jup hkûm nyi ri.

<sup>17</sup> Mauhkûng htoq mâ é hpaqchyî byéng-yá kúm gi, sâng-hi awang má sansêng nyi ri; hau htâng má gi, nguingón hkyô lé ô nau é, myit nûm é, jîno gyô é, shogyo nhikmyin sê é eq ge é ashi zûi nyi mù luí, gamhkui a bò, ahpuq alik a dut é eq, kut mhaú a sê é hpaqchyî byéng-yá nghut nyi ri. <sup>18</sup> Hau htoq agó, nguingón é hkyô dat sô xoq é bang gi, nguingón é shijí lé sân kat é bang nghut mù, ge é ashi wó yû kó râ nghut lhê.

## 4

*Yhumsing Gùng Lé, Garai Gasâng Chyáng Ap To Râ Hkyô*

<sup>1</sup> Nungmoq má gyè dut lhûm é eq mabyoq jishûm gi, hkâmai htoq lo é lú? Nungmoq ahkaú má gungsho ô nau é hkyô pé ngón hkyô hô mù, majan zân lhûm é yanmai, dut htoq lo é a nghut kó lú? <sup>2</sup> Nungmoq yut yut myit ô nau nyi kôlhang, haí le a wó yû kó. Nungmoq sat nyi é eq manon nyi kôlhang, a wó yû kó. Nungmoq byoq lhûm nyi é eq majan htoq lhûm nyi kôlhang, haí le a wó yû kó; hkâsu mù gâ le, nungmoq, Garai Gasang lé a dung kô é yanmai nghut ri. <sup>3</sup> Nungmoq dung kôlhang, a myang yû kó nghut ri; hkâsu mù gâ le, nungmoq é ngón kún hkyô má jai chûng langsâ pyám râ matú, shut é dông dúng nyi kô é yanmai nghut ri.

<sup>4</sup> Su-myi sulàng lú é bang su gidíq a gîng é bang ê, mingkan ô nau é hkyô lé buinùm du é myit gi, Garai lé a ngui é myit nghut é hkyô lé, nungmoq a sé kó lú? Haú mù luí, mingkan ô nau é hkyô eq buinùm dù nau sù ó nghut kôlhang, Garai Gasâng é gyè nghut nyi ri. <sup>5</sup> Dum rallhum, nga-nhúng má Garai Gasang kat lhûng tô é woi-nyí gi, manon é myit lúng nyi ri ga luí, Chyúmdang má taí é gi, akôm nghut ri nghû, nungmoq myit ngam nyi akô lú? <sup>6</sup> Nghut kôlhang, Yhang gi, je kô é jeju ru byí nyi lhê. Haú eq rajung za, Chyúmdang má, "Garai Gasang gi, nghutbûn é bang lé hkûm zing pyám kôlhang, myit lhoq nyhum é bang lé jeju byí ri."✧  
ga taí tô ri.

<sup>7</sup> Haú mù, Garai uphkan é a-ô má ru nyi nyi keq; Nat Tsadán lé hkûm tang pyám keq; haú hkûn, yhang nungmoq chyáng mai hpang byuq râ nghut lhê. <sup>8</sup> Garai Gasâng chyáng huí ê keq, haú hkûn, Yhang, nungmoq chyáng huí lé lô râ nghut lhê. Yubak kut é bang ê, nungmoq é loq pé lé chí san chí sêng pyám keq. Myit koq xân é bang ê, nungmoq é myit nhiklhum lé lhoq chyoi lhoq yúng to keq. Yudaq htûng dông loq lé chí san chí sêng pyám keq gâ é lichyúm gi, i-myt, gungdu lé lhoq san lhoq sêng pyâm é lé gâ lhê. <sup>9</sup> Nungmoq gi, myit yón é, iyon yôn é eq ngaubyi ngau-nhap é kut nyí keq. Nungmoq é wuihâ é hkyô lé gi, iyon dông, nungmoq é gabú é hkyô lé gi, yón kuq é dông htaí pyám keq. <sup>10</sup> Haú Yhumsîng Garaí é hí má i-myt lhoq nyhum nyi keq, haú hkûn, Yhang gi, nungmoq lé lhoq toq râ nghut lhê.

<sup>11</sup> Gumang wui ê, nungmoq yhangchang a ge é dông hkâtaí hpoí lhum kó. Yhumsing é yhanggu yhangmang lé a ge é dông taí hpoí nyi é sù, haú a nghut jáng, jéyáng é sù gi, haú tarâ lé a ge é dông taí hpoí nyi mù luí, jéyáng é sù nghut nyi ri. Haú tarâ lé nàng jéyáng nyi é nghut le gi, tarâ lé châng é sù a nghut é za, tarâ jéyáng sù nàng dut nyi ri. <sup>12</sup> Garai

Gasang za tarâ byî tô é eq tarâ dara sù, wó hkyi yu é sù eq, wó lhoq htên é sù nghut nyi lhê. Hau é yanmai, náng é yhumkyo hpó lé jéyáng é sù nàng gi, ó yuq wa nghut lhê lhú?

### *Gyáng Dang A Tai Râ Hkyô*

<sup>13</sup> "Ngamoq, hkû-nyî napmá ra-nyî nyî, wà rawà wà shut ê mù, haû má razàn kô é nyî luî, hpugá wuiloq gá mù amyat wó myang yù râ." ga tai nyi é bang ê, gyô wú keq. <sup>14</sup> Napmá haî dut lô râ lé lháng, nungmoq gi, a sé ko. Nungmoq é asak gi, haî nghut nyi lhê lhú? Haû gi, razup rahtâng za htoq shit luî dum byuq byuq ló mù é, nghansoq eq rajung za nghut nyi ri. <sup>15</sup> Haû mù luî, nungmoq haû su ga tai nyi râ malaî gi, "Yhumsîng Garai dông é nghut le gi, ngamoq le ru wó dui nyi mù, shî le, mhô le, wó kut râ nghut lhê." nghû luî, wó tai râ nghut lhê. <sup>16</sup> Ahkuî kúm gi, nungmoq é gyáng é dang dông gumrong nyi akô; haû su gumrong é hkyô banshoq gi, agè ashop é jung chyat nghut nyi ri. <sup>17</sup> Haû mù luî, ge é mù sê kut to luî, a kut é sù gi, mara kut sù dut bê nghut ri.

## 5

### *Sùt Wó Bang Lé Sidiq Byî É Dang*

<sup>1</sup> Sùt wó é bang ê, gyo keq, nungmoq chyáng jé lé lô râ é wuîhke jamjau hkyo é yanmai, ngau garû nyi keq. <sup>2</sup> Nungmoq é sutzè gi, htên bup byuq bê nghut ri; nungmoq é wutbu wutmè le manot eq zô pyám bê nghut ri. <sup>3</sup> Nungmoq é hîng eq ngùn má lháng, jogyik zuî byuq mù luî, haû jogyik gi, nungmoq é mara hkyam shut saksé dut byî é eq, nungmoq é gungsho lé myi su zô pyám râ nghut lhê. Nungmoq gi, jihtûm buinyî shí pé má, sutzè lé za hkong to bekô nhung! <sup>4</sup> Wú keq, nungmoq é yohtung dùng yò yam nhâng mù luî, ahpau a byî é za, nungmoq mhaû zô tô é ahpau pé garû nyi é htê pé eq, mù zui bang garû é htê pé lé gi, haû a-tsam dik shoq bo é Garai wó gyo byi bê nghut ri. <sup>5</sup> Nungmoq gi, myigùng htoq má hkik hkik hkâm hkâm wó nyi é eq, i-myt ô nau é dông ngón hkyô chyat châng nyi bum akô. Nungmoq gi, sat râ buinyi matú yhumsîng é gùng lé tsô myum to bekô nghut ri. <sup>6</sup> Haû dingmán é sù\* lé, nungmoq mara hùn mù, sat pyám bekô. Yhang kúm gi, nungmoq lé a lhom hkûm zìng nghut ri.

### *Myit Hîng Hîng Hkam Jan Ra Râ Hkyô*

<sup>7</sup> Haû mù luî, gumang wuî ê, haû Yhumsîng dum jé lé é buinyi jé shoq myit hing é eq láng nyî keq ô! Hkyâm saí sù lé wú wú keq, yhang gi, myìhpún mai ahpau dán é ashi lé wó yû shoq ga mau mún eq wò htáng htáng é mau wo gyûn é jé shoq myit hîng hîng láng nyi ri. <sup>8</sup> Haû eq rajung za, nungmoq le, Yhumsîng Yesuq dum jé lé râ gi, chyâng lo nyi bê nghut é yanmai, myit hing é eq, i-myt lé lhoq ging lhoq tîng to keq. <sup>9</sup> Gumang wuî ê, nungmoq jéyáng a hui sháng gaq, nungmoq yhangchang hkâ-nyung nyâng lhûm nyi ko. Wú keq, Tarâ agyî gi, hkúmdong má jé nyi to bê nghut ri.

<sup>10</sup> Gumang wuî ê, haû Yhumsîng Garaî é myîng eq hko kyô é myiqhtoî pé wuîhke jamjau huî é hkûn, jân pyâm é myit lé, nungmoq gi, ge é alik agàn kut yû keq. <sup>11</sup> Wú keq, shikut shirang é bang lé, nga-nhúng gi, hkungsô wó é bang nghu é nghut lhê. Yobaq hkâm jân é yanmai, Yhumsîng Garaî gi, yhang lé htâng má myo myo dum shimân byî é hkyô lé, nungmoq wó gyô wú bê nghut lhê. Haî mù gâ le, haû Yhumsîng Garaî gi, gyai shogyo nhikmyîn é sù nghut nyi ri.

<sup>12</sup> Ngá é gumang wuî ê, banshoq má ahkyak dik é gi, haî le le hkâdakâm kó. Mauhkûng lé a nghut jáng, myigùng lé lang luî le hkâdakâm kó. Dakam é dang gotû lé le hkâtaî nyi kó. Nungmoq doqdân é a hui sháng gaq, nungmoq gi, nghut é le gi, "nghut lhê", a nghut é le gi, "a nghut", nghû za, tai keq.

### *Lumjîng Myit Eq Kyûdung Râ Hkyô*

<sup>13</sup> Nungmoq má rayuq yuq wuîhke jamjau huî é nghut le gi, kyûdung nyi sháng gaq; rayuq yuq myit ngón nyi é nghut le gi, hkyâ-on mahkôn hkon nyi sháng gaq. <sup>14</sup> Nungmoq má rayuq yuq nõhpyo huî é nghut le gi, noqkuq hpúng mâ é nhik bô suwún wuî lé ji yù

\* 5:6 Dingmán é sù gâ é danghkun lé, Chyúmlaika ra-am má gi, dingmán é bang gâ ri.

mù, haú bang gi, Yhumsîng Yesuq é myìng mai yhang lé xû but byi luí, kyûdung byi kó sháng gaq. <sup>15</sup> Haú su mù, lumjìng myit èq kyûdung é dang gi, haú nò sù lé lhoq gê luí, Yhumsîng Garai gi, haú yuq lé lhoq toq yù rá nghut lhê. Yhang gi, yubak mara kut shut é nghut kôhang, hkyut pyám byí é hui rá nghut lhê. <sup>16</sup> Haú mù luí, nungmoq lhoq ge é hui kó sháng gaq, nungmoq é yubak mara lé rayuq eq rayuq yín lhum mù, kyûdung byí lhûm nyì keq. Dingmán su é kyûdung dang gi, wó dut nhâng rá a-tsam wum-o myo myo bo nyi ri.

<sup>17</sup> Eliyaq gi, nga-nhúng su i-myt unghkaú bo é xângzo byù za nghut lhê. Nghut kôhang, yhang gi, mau a wò sháng gaq ga, wum kat o kat kyûdung jáng, sùm zan eq lhamó hkyuq hkyap tup myigùng htoq má mau a wò shoq dut byuq é nghut lhê. <sup>18</sup> Kyû dum dúng kat jáng, mauhkúng gi, máu wo hkyô kat byi mù, myigùng gi, yhâng é kyô shi mui shi lé lhoq htoq byí wú bê nghut lhê.

<sup>19</sup> Ngá é gumang wuì ê, nungmoq chyáng mâ é rayuq yuq, haú tengmán hkyô mai nghoq ló byuq é hkûn, rayuq yuq gi, yhang lé tengmán hkyô shut dum wó shuí taú lo é nghut le kúm gi, <sup>20</sup> haú shuí taú yù sù gi, yubak mara kut é sù lé, shut shai é hkyô mai tengmán hkyô shut shuí taú yù mù, myit woi-nyí lé shi é mai hkyi yù bê nghut é yanmai, yubak mara myo myo lé shuí nghop pyám byí é sù dut berâ lé, bûn nyì keq ô!

## PETRUQ Hî Dàm Hun Kat é Laiká (1 Peter)

<sup>1</sup> Yesuq Hkrisduq é lagyo nghut sù, ngò Petruq gi, Pontuq, Galatiq, Kapadokia, Asia eq Bihtuni mau pé má byo myín tô bum é, Yesuq Hkrisduq é jìno gyo râ matú le, Yhâng é suí èq hpyùn gyùn é hui\* râ matú le, haû Woi-nyí é lhoq sân-yúng nyi é muzó đông mai, Îwa Garai Gasâng é hî te sê tô é hpaqchyî má cháng luî, hkyin yù huí é bang nghut é, <sup>2</sup> Garai Gasâng èq hkyin htoq yù luî, mingkân é byùbìng dut bâng chyáng dang kyô kat lhê. Jeju eq nguóngón hkyô gi, nungmoq chyáng agùn agó joq nyi sháng gaq.

### Dui Nyi É Myit Myoqbyù Hkyô

<sup>3</sup> Hkya-on kungtôn hkyô gi, nga-nhông é Yhumsing Yesuq Hkrisduq é Yhângwa nghut sù Garai Gasang chyáng nghut nyi sháng gaq! Yhang gi, Yesuq Hkrisduq, shi é mai dum dui toq é hkyô đông, Yhâng é gyai shogyo nhikmyin é yanmai, nga-nhông lé, asik hku é dum hui nhâng mù, rù dui nyi é myit myoqbyù hkyô lé wó nhang é htoq agó, <sup>4</sup> nungmoq é matú mauhkung htoq má tô to byi bê nghut é, hkâ-nhám le, a hten a byoq é, agot a-û a dut é, a hpoí byuq é mùi lé le wó nhang é nghut lhê. <sup>5</sup> Nungmoq gi, lumjìng kô é yanmai, ló htâng é ahkying má lhoq htoq shit râ rì rì nghut é hkyi yù hkyô jé shoq, Garaí é hpungwup a-tsâm èq upzúng é hui bang nghut akô. <sup>6</sup> Haû mù, nungmoq gi, ahkuí razup zo, wuîhke hkyô jungkhak jungmó má yón hpuzô é hui kó râ nghut kôlhak, gyai yhang gabú nyi keq. <sup>7</sup> Wuîhke hkyô haú pé mai, nungmoq é lumjìng myit gi, jet é hkyô lé wó chyam htoq mù, myi mai jên yù kôlhak htên byoq sê é hîng htoq je gyaú luî, Yesuq Hkrisduq htoq shit é hkûn, hkya-on kungtôn hkyô, hpungwup shingkhak eq aróng sitang lé, nungmoq wó kó râ nghut lhê. <sup>8</sup> Nungmoq gi, Yesuq lé a myang wú kôlhak, Yhang lé chyitdap bum akô; Ahkuí, nungmoq, Yhang lé a myàng kôlhak, Yhang lé lumjìng kô é nghut mù, a ung htoq taí é eq hpungwup bo é gabú hkyô gi, nungmoq chyáng bying jup nyi ri. <sup>9</sup> Hkâsu mù gâ le, nungmoq gi, nungmoq é asak woi-nyí lé hkyi yù hkyô nghu é, nungmoq é lumjìng myit é akyù lé wó yu nyi kô é nghut ri.

<sup>10</sup> Hkyi yù hkyô haû eq séng luí, nungmoq chyáng jé bê nghut é jeju hkyô lé taí é myiqhtoí pé gi, gyai yhang sidiq myit èq jí jí chyun chyun ho gon wú bekô nghut ri. <sup>11</sup> Yhangmoq gi, Hkrisduq wuîhke jamjau hui luí, hpungwup shingkhak wó râ nghut é hkyô lé, yhangmoq má lúng nyi é, Hkrisduq é Woi-nyí mai te taí é hkûn, hkâ-nhám nghut râ eq hkasú é u má nghut râ hkyô lé ho gôn wú bekô nghut ri. <sup>12</sup> Mauhkung mai nhang kat é Chyoiyúng Woi-nyí èq, nungmoq lé gabú danglù hko kyo bê bang mai, ahkuí nungmoq lé taí kyo bê nghut é hkyô pé lé, yhangmoq taí kô é gi, yhumsing matú dojaú é a nghut é za, nungmoq matú nghut é hkyô lé, yhangmoq gi, htoq shit sé nhang é hui bekô nghut ri. Maumang lagyo pé lháng gi, haú hkyô pé lé gyai wú nau bum akô nghut ri.

### Chyoiyúng Nyi Râ Hkyô

<sup>13</sup> Haû mù luí, zui saí râ matú nungmoq é i-myt lé hen to keq; yhumsing gùng yhumsing hkang nyi keq; Yesuq Hkrisduq htoq shit é hkûn, nungmoq lé byi râ nghut é jeju lé, hkyak za myit myoqbyu nyi keq. <sup>14</sup> Jìno gyô é zoshâng wuì su, myoq a bóng shî é pyat má nungmoq nyi tô é hkûn, nungmoq é agé ashop ô nàu hkyô lé a châng kut é za, <sup>15</sup> haû nungmoq lé ji yu é Sù gi, chyoiyúng é su, nungmoq zui saí é hkyô banshoq má chyoiyúng nyi keq. <sup>16</sup> Hkâsu mù gâ le, "Ngò gi, chyoiyúng Sù nghut é yanmai, nungmoq le chyoiyúng nyi keq."✠ ga kâ tô ri.

<sup>17</sup> Byù yuq hkanmó é muzó lé, myoqdong a hkyin é za tarâ jéyang é sù Îwa lé, nungmoq wut dung kô é yanmai, byùbìng đông shî má nyi é u lé, Garai lé gyuq hkunggâ

\* 1:1 Yhâng é suí èq hpyùn gyùn é hui gâ é gi, Yhâng é suí èq mara chí sân pyám byí é lé gâ lhê. ✠ 1:16 Nhung 11:44-45; 19:2; 20:7

é myit mai asak duì keq. <sup>18</sup> Hkâsu mù gâ le, nungmoq gi, nungmoq é îchýí îwâ pê chyáng mai bo gyó lo é hpau a dap é asak duì hkyô mai, htên byoq sê é ngùn, hing èq hkyi yù huí é a nghut é za, <sup>19</sup> gumjup é eq mara a bo é sauzo nghut sù, Hkrisduq é hpaù dik é suí èq sheq hkyi yù huí é ru nghut é lé, nungmoq sê lhê. <sup>20</sup> Yhang gi, mau htoq xâng hkun mai hkyin yu é hui bê nghut kôlhang, jìhtùm ahkýing shí pé má sheq, nungmoq é matú htoq shit nhang é hui bê nghut ri. <sup>21</sup> Yhang lé, shi é mai lhoq dui toq yù mù, hpungwup shingkang bò nhang é Garai Gasang lé, nungmoq gi, Hkrisduq dông mai lumjìng kô é nghut luí, nungmoq é lumjìng myit eq myit myoqbyù hkyô gi, Garai Gasang chyáng nghut nyí bekô nghut ri.

<sup>22</sup> Ahkuí kúm, nungmoq gi, haù tengmán hkyô lé châng é dông mai, yhumsing gùng yhumsing lhoq sân-yúng yù bekô nghut mù, nungmoq é gumang wui lé, lhumzuí é dông chyitdap bekô nghut luí, myit nhiklhum mai, rayuq eq rayuq gyai yhang chyitdap lhum keq. <sup>23</sup> Hkâsu mù gâ le, nungmoq gi, htên byoq sê é amyui mai dum hkù huí é a nghut é za, Garai Gasang é, rù dui nyi é eq ru gíng nyi é mungdang dông, htên byoq a sê é amyui mai dum hku é hui bang ru nghut lhê. <sup>24</sup> Hkâsu mù gâ le,

"Byù lhunglhang bang gi, wàhu mhan eq pung ri, yhangmoq banshoq bâng é hpungwup shingkang gi, yò mâ é banbó pé eq pung ri;

wàhu mhan gi, nyhuí kyuq byuq luí, banbó pé gi, yoq gyó byuq lhê;

<sup>25</sup> nghut kôlhang, haù Yhumsing é mungdang gi, ahtum abyuq gíng nyi lhê."✠  
gâ tô ri. Haù gi, nungmoq lé hko kyo bê mungdang nghut lhê.

## 2

<sup>1</sup> Haù mù luí, i-myt dù é hkyô banshoq eq mhaù zô é hkyô banshoq, gegùn labyoq kut é hkyô, manon é hkyô eq lumù gansang é hkyô jung hkangmó pé lé tô pyám keq. <sup>2</sup> Asik hku é zonú pé naú lé ô naù gadaú é su, woi-nyí eq sêng é jet é naú\* lé ô naù gadaú nyí keq, haù jáng, nungmoq gi, hau é yanmai, nungmoq é hkyi yù hkyô má wó kô myhâng kó râ nghut lhê. <sup>3</sup> Hkâsu mù gâ le, haù Yhumsing gi, gè sù nghut é lé, nungmoq chyam wú bekô nghut ri.

### *Rù Dui Nyi É Luqgok Eq Hkyin Yù Huí É Byù Myù*

<sup>4</sup> Byu pé mai hkyin htoq pyám kôlhang, Garai Gasang é matú hpaudap luí, Yhang èq hkyin yù huí é, rù dui nyi é Luqgok nghut sù, haù Yhumsing chyáng nungmoq jé lé é hkùn, <sup>5</sup> nungmoq le, rù dui nyi é luqgok pé su, woi-nyí eq sêng é yhùm† saí nyi é hui luí, Yesuq Hkrisduq dông mai, Garaí èq hap yù gíng é, woi-nyí eq sêng é hkungga nhông byi râ matú, chyoiyúng é hkyangjong amyù dut bekô nghut ri. <sup>6</sup> Hkâsu mù gâ le, Chyúmdang má,

"Wú keq, hkyin yù huí é eq hpaudap é htungchyùn luqgok racham lé, Zi-un bùm má ngò lheq tô é nghut lhê;

Yhang lé lumhkau é sù gi, hkâ-nhám le hoq hpù é hui râ a nghut."✠

ga taí tô ri. <sup>7</sup> Haù mù, lumjìng bang nungmoq é matú gi, luqgok haù hpaudap é nghut lhê. Nghut kôlhang, a lumjìng bâng é matú gi,

"Haù yhùm saí bang hkyin htoq pyám é luqgok gi, htungchyùn mâ é ahkyak dik é luqgok‡ dut bê nghut ri."✠

ga le,

<sup>8</sup> "Byu pé lé, htùng leng râ luqgok eq myit leqbat nhâng râ luq mó cham dut bê nghut ri."✠

ga le, taí tô ri. Yhangmoq gi, mungdang lé a cháng kô é yanmai, myit leqbat kô é nghut lhê. Haù dut râ lé, yhangmoq é matú masat to gù nghut bê nghut ri.

✠ 1:25 Esai 40:6-8 \* 2:2 Woi-nyí eq sêng é jet é naù gâ é gi, Garai Gasang é mungdang lé taí é nghut lhê. † 2:5 Woi-nyí eq sêng é yhùm gâ é gi, noqkuq hpúng lé taí nau é nghut lhê. ✠ 2:6 Esai 28:16 ‡ 2:7 Ahkyak é luqgok gâ é gi, Hkrisduq lé taí é nghut lhê. ✠ 2:7 Hkya-on 118:22 ✠ 2:8 Esai 8:14

<sup>9</sup> Nghut kôlhang, nungmoq gi, mauchut hkaû mai Yhâng é mauhpo maubó shut nungmoq lé wut htoq yû Su é mauhpo muzó lé wó taí pyô kó sháng gaq ga, hkyin yû huí é byuhú, hkohkâm hkyangjong amyû, chyoiyúng é byù myû, Garai Gasang eq sêng é byu pé nghut akô nghut ri. <sup>10</sup> Nungmoq gi, hí lé byù ra-myû a nghut wú kôlhang, ahkuí gi, Garai Gasâng é byù myû nghut bekô nghut ri; nungmoq gi, hí lé shogyo nhikmyin hkyô lé a wó yu wú kôlhang, ahkuí gi, shogyo nhikmyin hkyô lé wó yû bekô nghut ri.

<sup>11</sup> Chyitdap é luzúm wuî ê, nungmoq é asak woi-nyí lé majan zân nyi é, yubak mara byíng Jup é ô nau gadaú hkyô lé koi pyám keq nghû, gó ming byu pé eq byùbing pé dông mingkan htoq má nyi é bang nungmoq lé, ngò, wum taí tsuq kat lhê. <sup>12</sup> Haû a lumjúng shí é byu pé gi, nungmoq shut nyi ri ga, nungmoq lé mara hun bùm kôle, nungmoq é ge é muzó lé myàng kômù, nga-nhúng lé Garai Gasâng èq lé kùm é buinyi má Garai lé shigyaú kó sháng gaq, a lumjúng shí é byu pé é ahkaû má haû su ge é asak ùi hkyô dông nyi yap keq.

### *Uphkâng Bang Eq Yhumsing Wui É A-ô Má Nyi Râ Hkyô*

<sup>13</sup> Haû Yhumsing é yanmai, byu pé mâ é ahko ahkáng wó bang banshoq é a-ô má nyi keq; kô dik é ahkáng ayá wó é hkosêng é a-ô má nghut kôle, <sup>14</sup> shut é hkyô kut bang lé ðam byi râ matú eq jô é hkyô kut bang lé shigyaú râ matú, hkosêng èq nhang tô é mauzaú pé é a-ô má nghut kôle, nyi nyi keq. <sup>15</sup> Hkâsu mù gà le, ge é hkyô kut é dông, byù nâ pé é a sé a dat é dang lé nungmoq lhoq zím pyâm é gi, Garai Gasang ô nau é hkyô nghut lhê. <sup>16</sup> Lut bê bang dông nyi keq, nghut kôlhang, agè ashop é hkyô lé nghop pyám râ matú nungmoq é luthkyô lé hkâchúng kó; Garai Gasâng é ðui-nhâng zoshâng wuî dông nyi keq. <sup>17</sup> Yuq hkangmó lé rago za hkunggâ é hkyô shit keq; lumjúng é gumang wuî lé chyitdap keq; Garai Gasang lé gyuq hkunggâ nyi keq; hkoséng lé hkungga keq.

<sup>18</sup> ðui-nhâng zoshâng wuî ê, hkungga myit banshoq èq, nungmoq é yhumsing wuî é a-ô má nyi keq; ge é eq nú-nhám bâng é a-ô má za a nghut, byuwuî pé é a-ô má le nyi keq. <sup>19</sup> Hkâsu mù gà le, byù rayuq gi, Garai Gasang lé bûn nyi sù nghut é yanmai, mara dông a nghut kôlhang, wuîhke jamjau huí é hkyô lé hpuzô é lé, jân pyâm é nghut le gi, hkya-on gíng é sù nghut lhê. <sup>20</sup> Nghut kôlhang, nungmoq gi, mara kut shut é yanmai, nhuq bat é hkâm zo luí, haû lé jân nyi é nghut le gi, hai aróng wó kó râ lú? Nghut kôlhang, nungmoq gi, ge é hkyô kut luí, wuîhke hui zô é lé jân pyâm é nghut jáng, haû gi, Garai Gasâng hí má hkya-on gíng é hkyô nghut lhê. <sup>21</sup> Nungmoq gi, haú hkyo é matú ji yù huí é nghut lhê; haí mù gà le, Hkrisduq gi, nungmoq é matú wuîhke hkyô huí é má, nungmoq lé alik dông tô to byi bê nghut mù, nungmoq gi, Yhâng é hkyî-kám pé lé cháng râ dut lhê.

<sup>22</sup> "Yhang gi, hai mara le a kut shut, Yhâng é nhut mai mhaû é lé a myàng."☆

<sup>23</sup> Yhang gi, rhoi é huí é hkûn, yhangmoq lé a dum taû rhoi; wuîhke hkyô huí é hkûn, kyuq é dang a taí. Haû kut râ malaí, tengmán é dông jéyáng é Su chyáng, Yhânggùng lé ap pyâm ri. <sup>24</sup> Nga-nhúng gi, yubak mara eq wó shi gang mù, ðingmán hkyo é matú asak wó ðui kó sháng gaq ga, Yhang gi, sik zíng má, Yhânggùng èq yhang, nga-nhúng é yubak mara lé Yhânggùng má wun pyám byi bê nghut ri; Yhâng é ðam pé é yanmai, nungmoq gi, lhoq gê byí é hui bekô nghut ri. <sup>25</sup> Hkâsu mù gà le, nungmoq gi, hkyô nghoq byuq é sau pé su dut wú kôlhang, ahkuí, nungmoq gi, haû sau zúng Sû eq nungmoq é asak woi-nyí lé upzúng Su chyáng lhing taû lò bekô nghut ri.

## 3

### *Ikun Myhî Pé Eq Ikun Hpô Pé*

<sup>1</sup> Ikun myhî pé ê, haû eq rajung za, yhumsing é ikun hpó uphkang é a-ô má nyi keq; haú hkûn, yhangmoq mâ é rayuq yuq, haû mungdang lé a lumjúng kôlhang, <sup>2</sup> yhumsing é asak ùi hkyô mâ é sansêng é hkyô eq hkunggâ é hkyô lé myàng kôjáng, dang dông a nghut é za, yhâng é yhumsing myhî é nyi yap é sâmlai dông mai yhang lé wó lhoq lhik

yû râ nghut lhê. <sup>3</sup> Nungmoq yúng é hkyô gi, ahtoq pyâm za nghut é, xâmban nik é đông, hîng zè mhôn chung é eq réng é mebu wut é đông mai lo é a ge nghut. <sup>4</sup> Hau é malaî, haû gi, Garai Gasâng é hí má gù bo é, nú-nhâm é eq zim za dut é woi-nyí é, a dat hpoî é yúng hkyô nghut é nungmoq é i-myt unghkaû mâ é su é yúng hkyô sheq dut râ lhê. <sup>5</sup> Hkâsu mù gâ le, gó hkûn, Garai Gasâng chyáng myit myoqbyù bang nghut é, chyoiyúng é myiwe wuî gi, yhangmoq gùng lé haû đông mhôn yù yù kut kô é nghut lhê. <sup>6</sup> Sarah gi, Abraham é jîno gyo luî, yhang lé yhâng é yhumsîng ga wut é su, yhangmoq gi, ó le ô é yhumsîng é ikun hpó uphkang é a-ô má nyi akô nghut ri. Nungmoq gi, jô é hkyô lé kut mù, gyuq é hkyô a bo é nghut jáng, Sarah é byizô pé nghut bê.

<sup>7</sup> Ikun hpô pé ê, haû eq rajung za, yhumsîng é ikun myhí eq rahá nyi yap e ló é hkûn, sê gyo byi mù, nungmoq htoq wum nyhôm é bang eq, nungmoq eq rahá asak jeju chyunghuq wunlî wó é bang đông, yhangmoq lé hkungga keq. Haû hkûn, nungmoq é kyûdung dang lé a he-ngik pyám byi râ nghut lhê.

### *Ge É Kut Luî, Jamjau Hkam É Hkyô*

<sup>8</sup> Dang htâng sat é má, nungmoq banshoq bang gi, rayuq eq rayuq myit huî lhûm nyi keq; myit wú nô mù, gumang nhiktâng wuî su chyitdap lhûm nyi keq; shogyo nhikmyin myit bò luî, i-myt nyhum nyi keq. <sup>9</sup> Agè ashop é lé, agè ashop é đông lató a hpuq é eq rhoi é lé rhoi é đông lató a hpuq é za, shimân byi keq; haû mù gâ le, nungmoq gi, haû pê é matú, shimân jeju muì wó hkam yù kó sháng gaq ga, ji yu é hui kô é ru nghut lhê.

<sup>10</sup> Hkâsu mù gâ le,

"Asak duì râ lé chyitdap é eq ge é buinyi pé lé myàng nau é sù ó yuq le, yhâng é shô lé, agè ashop é mai, yhâng é nhutwuî lé, mhaû dang taî é mai, lhoq kâng pyám ra râ nghut lhê.

<sup>11</sup> Yhang gi, agè ashop hkyô mai lhing tau mù, ge é kut ra râ nghut lhê; yhang gi, nguingón simsaq hkyô lé hô mù, châng hkat nyi ra râ nghut lhê.

<sup>12</sup> Hkâsu mù gâ le, haû Yhumsîng é myoqjí gi, dingmán bang lé wú nyi é nghut luî, yhangmoq é kyûdung dang lé, Yhâng é nohkyap èq gyo byi ri; nghut kôlhang, haû Yhumsîng é myoqdong gi, agè ashop hkyô kut bang lé gyè đông myang pyâm ri."<sup>☆</sup>

gâ tô ri.

<sup>13</sup> Ge é hkyô lé, nungmoq gyai yhang kut nau nyi é nghut le gi, ó yuq wá nungmoq lé wó gunjang râ lhu? <sup>14</sup> Nghut kôlhang, dingmán hkyô é matú, nungmoq wuîhke jamjau huî le lhang, nungmoq gi, hkungsô wó nyi ri. "Yhangmoq gyuq é hkyô lé hkâgyuq kó; hkâgyuq dàn kó."<sup>☆</sup> <sup>15</sup> Nungmoq kúm gi, myit nhiklhum má, Hkrisduq lé, Yhumsîng đông jowò byi keq. Nang wó é myit myoqbyù hkyô lé myi é sù yuq hkangmó lé, haû mù wó é hkyô tô taî kyo râ matú, ayang hen to aq. Nghut kôlhang, nú-nhâm é eq hkunggâ é đông haû lé kut nyi aq; <sup>16</sup> nungmoq é unghkaû myit san za dut nyi keq, haû hkûn, Hkrisduq đông mai nungmoq wó é ge é a-kyang lé rhoi dang taî é bang gi, yhangmoq lumù gansang é yanmai hoq hpû é hui kó râ nghut lhê. <sup>17</sup> Garai Gasang ô nau é nghut le gi, agè ashop kut luî jamjau hkâm râ htoq má, ge é kut luî jamjau hkam le gi, je ge é nghut lhê. <sup>18</sup> Hkâsu mù gâ le, nungmoq lé Garai Gasâng chyáng shuî jé shoq, Hkrisduq gi, byu pê é yubak marâ é yanmai, radâm za shî hkâm pyâm bê nghut ri; haû gi, dingmán Sû, a dingmán bâng é matú shî hkâm byi é nghut lhê. Yhang gi, gungdu shî bê nghut kôlhang, haû Woi-nyí má lhoq dui é hui bê nghut ri. <sup>19</sup> Yhang gi, Woi-nyí đông, htóng lúng tô é woi-nyí pé lé ê hko kyô ri. <sup>20</sup> Woi-nyí haû pé gi, a-nham lé, Noaq é ipyat má wuî-sanghpo lé Noaq tsuq nyi é hkûn Garai Gasang myit hîng hîng lánng nyi é u lé, jîno a gyô é bang nghut akô. Wuî-sanghpo má wàng mù, wuî mai hkyi yù huî é byù shau luî, shit yuq za nghut akô. <sup>21</sup> Wuî haû gi, ahkuî nungmoq lé le hkyi yu é nghut é baptisma é azông nghut ri; haû gi, gungdu mâ é agot a-û lé huî sêng pyám byi é a nghut é za, sansêng é unghkaû myit mai Garai Gasâng é hí má gidíq tô é ru nghut lhê. Yesuq Hkrisduq é dum dui toq hkyô đông,

nungmoq gi, baptisma hkâm yù luî, hkyi yu é hui kê é nghut lhê. <sup>22</sup> Yesuq Hkrisduq gi, mauhkûng má doq lô luî, Garai Gasâng é loqyò hkyam má nyi tô é nghut mù, maumang lagyô pé, ahkáng ayá pé eq a-tsam pé gi, Yhâng uphkanq é a-ô má nghut nyi bum akô.

## 4

*Garai Gasâng É Matú Asak Duì Râ Hkyô*

<sup>1</sup> Haù mù luî, Hkrisduq gi, Yhâng é gungdu má hpuzo bê nghut é yanmai, nungmoq le, Yhang i-myt sâmlai hau èq yhumsing gùng má gyehting đông wut to keq, haì mù gà le, yhâng é gungdu má hpuzo bê sù gi, mara eq gang bê nghut ri. <sup>2</sup> Haù nghut é yanmai, yhang gi, yhang nyi tùm tô é mingkan asak duì hkyô má, agè ashop é xângzo byù ô nau é đông a nghut é za, Garai Gasang ô nau é đông asak duì é ru nghut lhê. <sup>3</sup> Hkâsu mù gà le, nungmoq gi, láì lò bê ahkyíng má, a lumjíng shí é byu pé hkyin kut nau é hkyô nghut é, shut é đông nyi zò lhum nau é i-myt, agè ashop é yut yut ô nau é hkyô, î shuq wut é hkyô, zo yê shuq yê mù achayut kut é hkyô, ye lhai râ wut jung zoshuq lé yut yut ô nau é hkyô, achayut é hparà noq hkyô pé má, ahkyíng luq shoq nyi láì lò bê bang nghut akô. <sup>4</sup> Nungmoq gi, ladu lai shoq achayut kut é hkyô má, yhangmoq eq rahá a bo châng kut wún lo kê é nghut mù, yhangmoq gi, maú byuq luî, nungmoq lé lumù gansang pyâm akô nghut ri. <sup>5</sup> Nghut kôlhang, yhangmoq gi, duì nyi é bang eq shí bê bang lé tarâ jéyáng râ rì rì nghut tô Sù lé jihpán shit kyo ra kó râ nghut lhê. <sup>6</sup> Hau é yanmai, ahkuí shi byuq bê bang lé lhang gabú danglù hko kyô é hui bekô nghut lhê; haù gi, gungdu eq séng luî ga jang, yhangmoq gi, byù đông mai tarâ jéyáng é hui râ eq, woi-nyí eq séng luî ga jang, Garai Gasang đông mai asak wó duì râ matú nghut lhê.

<sup>7</sup> Lhunglhang htum râ ahkyíng gi, chyáng bê nghut ri. Haù mù luî, nungmoq kyû wó dung kó sháng gaq, bûn gyíng luî, yhumsing gùng yhumsíng hkanq nyi keq. <sup>8</sup> Banshoq htoq má ahkyak é gi, rayuq eq rayuq gyai yhang chyitdap lhum é hkyô nghut lhê, haì mù gà le, chyitdap myit gi, yubak mara myo myo lé wó nghop pyâm é nghut lhê. <sup>9</sup> Rayuq eq rayuq, taí nyung nyâng é hkyô a bo é za, rago hkulum lhum keq. <sup>10</sup> Yuq hkanqmó gi, yhumsíng wó hkam yù bê chyunghuq eq rajung za, góbang lé dojaú râ lhê; Garai Gasâng jeju chyunghuq ajung jung lé, lhumzui é èq rago chung jài râ lhê. <sup>11</sup> Rayuq yuq taí é nghut jáng, Garai Gasâng é mungdang haù eq yhang rajung za taí ra râ nghut lhê. Garai Gasang gi, lhunglhang má Yesuq Hkrisduq é yanmai hkya-ôn é hui sháng gaq, rayuq yuq dojaú é nghut jáng, Garai Gasang byí é wum-ô èq dojaú ra râ nghut lhê. Haù hpungwup shingkanq eq a-tsam gi, Yesuq Hkrisduq chyáng pyat dedu ahtum abyuq joq nyi sháng gaq ô. Amen.

*Hkristan Dut É Yanmai Jamjau Huì É Hkyô*

<sup>12</sup> Chyitdap é luzúm wuî ê, wuîhke hkyô đông chyam é lé nungmoq hkâm zò nyi é hkûn, nungmoq chyáng maú nhô zâ é hkyô dut htoq bê đông, hkâgyuq dàn kó. <sup>13</sup> Hkrisduq é jamjau hkyô pé lé bo hui zò é yanmai kúm gi, nungmoq gabú keq, haù hkûn sheq, Yhang é hpungwup shingkanq eq rahá Yhang htoq shit é hkûn, nungmoq gi, gabú dik é hui kó râ nghut lhê. <sup>14</sup> Hkrisduq é myíng yanmai, nungmoq gi, rhoi é hui zò é nghut jáng, hkungsô wó nyi ri; hkâsu mù gà le, hpungwup shingkanq bo é Woi-nyí nghu é, Garai Gasâng é Woi-nyí gi, nungmoq chyáng nyi nyi ri. <sup>15</sup> Nungmoq mâ é rayuq yuq jamjau huì é nghut le gi, byù sat sù, hkau sù, gotú agè ashop kut sù, góbang é mù má cháng gunjang sù đông jamjau huì é a dut sháng gaq. <sup>16</sup> Nghut kôlhang, Hkristan rayuq đông nungmoq jamjau huì é nghut le gi, hkâhoq nyí kó, Garai Gasang lé kúm gi, myíng hau é yanmai hkya-ôn nyi keq. <sup>17</sup> Hkâsu mù gà le, tarâ jéyáng râ ahkyíng gi, jé bê nghut luî, Garai Gasâng é ikun byu pé mai hí râ nghut lhê; haù gi, nga-nhúng mai hí é nghut jáng, Garai Gasâng é gabú danglù lé a châng é bang gi, hkâsu wá dut lò râ nghut lhê lú?

<sup>18</sup> "Haù dínghán sù, hkyi yù hui râ wuî é nghut le gi, tarâ a hkunggâ é eq yubak dap é sù gi, hkâsu wá dut râ nghut lhê lú?"<sup>✠</sup>



gâ tô ri.

<sup>19</sup> Haû nghut mù luî, Garai Gasang ô nau é dông jamjau huî é bang gi, yhumsing gùng lé, lhumzuí é Hpân Su chyáng ap byi mù, ge é lé xoq kut nyi ra râ nghut lhê.

## 5

### *Suwún Wuî Êq Zorâm Wuî*

<sup>1</sup> Nungmoq mâ é hpúng suwún wuî lé, ngò, nungmoq é byinzùm suwún, Hkrisduq é jamjau hkyô pê é saksé nghut sù eq lhoq htoq shit râ nghut é Yhâng é hpungwup shing kang lé bo hkâm râ nghut sù dông mai sang kat kôlé: <sup>2</sup> Nungmoq lé ap to bê nghut é Garai Gasâng é sau hpúng\* lé zúng rém bang dut mù, shuí u bang dông dojaú nyî keq; zúng rém é hkûn, a kut a ge luî kut é a nghut é za, Garai Gasang, nungmoq lé dut nhâng nau é su, yhumsing kâm é myit mai kut é nghut râ lhê; ngunzè lé a myoqnoq é za, shirông myit mai dojaú râ lhê. <sup>3</sup> Nungmoq é loq má ap byi to bê bang lé a up zô é za, yhangmoq é hí má alik dut nyi keq. <sup>4</sup> Haû jáng, Sau zúng Agyì mó† htoq shit é hkûn, nungmoq gi, hpungwup shing kang bo é, hkâ-nhám le a shum a byuq é janmaú lé myang hap yù kó râ nghut lhê.

<sup>5</sup> Zorâm wuî ê, nungmoq le, nungmoq htoq ipyat ko bâng é a-ô má nyi keq. Nungmoq lhunglhâng bang gi, myit lhoq nyhum é hkyô lé mebu su wut to mù, rayuq eq rayuq dojaú nyî keq, hkâsu mù gâ le,

"Garai Gasang gi, nghutbûn é bang lé hkûm zing pyám kôlhâng, myit lhoq nyhum é bang lé jeju byî ri."✠

ga tô ri. <sup>6</sup> Haû mù luî, ahkyíng jé jáng Garai Gasang nungmoq lé waq toq sháng gaq, nungmoq gi, Yhâng é hpungwup a-tsam mó bo é loq hkaû má, yhumsing myit lé yhumsing lhoq nyhum nyi keq. <sup>7</sup> Nungmoq é myit chiq hkyô banshoq lé, Yhâng htoq má dú kê pyâm to keq, haî mù gâ le, Yhang gi, nungmoq é matú chiq byi nyi sù nghut lhê.

<sup>8</sup> Yhumsing gùng lé yhumsing hkâng mù, machya nyi keq. Nungmoq é gyè nghut é nat Tsadán hpó gi, rayuq yuq lé wó zô myui pyám shoq ga, mying wún é hkanghkyi su hkat gadaú jón wún ri. <sup>9</sup> Yhang lé htúq htíng pyám mù, lumjíng myit má gíngtíng nyi keq, haî mù gâ le, mingkan gón mâ é nungmoq é gumang wuî le, rajung zâ é jamjau hkyô pé hui zô nyi kô é lé, nungmoq sê lhê.

<sup>10</sup> Haû mù, jeju banshoq é Garai Gasang gi, Hkrisduq má ahtum abyuq joq nyi é Yhâng é hpungwup shing kâng matú nungmoq lé ji yù bê nghut luî, nungmoq razup zo jamjau huî é htâng má, Yhang yhang nungmoq lé gumjup nhâng mù, wum bô nhâng luí, gíng gíng tíng tíng dut nhâng râ nghut lhê. <sup>11</sup> Haû hpungwup a-tsam banshoq gi, Yhâng chyáng pyat dedu ahtum abyuq rû joq nyi sháng gaq. Amen.

### *Ló Htâng É Shi-kyâm Dang*

<sup>12</sup> Lhumzuí é gumang nghû ngò sôn yu é Sila èq garúm luî, ngò gi, nungmoq lé myit wum byi dang eq, myit wum byi dang haú pé gi, Garai Gasâng é tengmán é jeju nghut é lé saksé hkâm é dang pé lé, tot za kê kat é nghut lhê. Tengmán é jeju haú má yap gíng nyi keq.

<sup>13</sup> Babelon má nyi é, nungmoq eq rahá hkyin yù huî é Hpúng gi, nungmoq lé shi-kyâm kat ri; ngá zo dông nghut sù Markuq le, nungmoq lé shi-kyâm kat ri. <sup>14</sup> Rayuq eq rayuq, chyitdap bopuq puq é èq shi-kyâm lhum keq.

Nguingón hkyô gi, Hkrisduq má nghut nyi é nungmoq banshoq bâng chyáng ru joq nyi sháng gaq ô.

\* 5:2 Sau hpúng gâ é gi, lumjíng bang lé gâ lhê. † 5:4 Sau zúng Agyì mó gâ é gi, Hkrisduq lé gâ é nghut lhê.

✠ 5:5 Sângkyang 3:34

## PETRUQ Htang Dàm Hun Kat é Laiká (2 Peter)

<sup>1</sup> Yesuq Hkrisduq é dui-nhâng zoshâng eq lagyo nghut sù, ngò Simun Petruq gi, nga-nhông é Garai Gasang eq hkyi yù Sù nghut é Yesuq Hkrisduq é dingmán hkyô dông, ngamoq su, hpaû dik é lumjínq hkyô lé hap yù bê bâng chyáng dang kyô kat lhê.

<sup>2</sup> Garai Gasang eq nga-nhông é Yhumsîng Yesuq lé, nungmoq sê jat nyi é hkyô má, jeju eq nguóngón hkyô gi, nungmoq chyáng agùn agó ru joq nyi sháng gaq.

### *Ji Yu É Eq Hkyin Yu É Hkyô Lé Lhoq Ging Lhoq Tíng Râ Hkyô*

<sup>3</sup> Yhâng é hpungwup shing kang eq ge é hkyô dông nga-nhông lé ji yù Sù lé nga-nhông sê é dông mai, Garai Gasâng é hpungwup a-tsam gi, asak duì hkyô eq tarâ hkungga hkyô é matú nga-nhông râ é jung hkangmó lé byi bê nghut ri. <sup>4</sup> Haú pé dông mai, Yhang gi, Yhâng é kô dik, hpaû dik é danggidiq pé nga-nhông lé byi bê nghut ri; haú hkûn, nungmoq gi, haú danggidiq pé dông mai, Garaí é myit sâmlai lé wó bo hkam yù râ eq agè ashop hkyô lé yut yut ô nau é yanmai htoq lo é, mingkan má joq é htên byoq hkyô mai wó lut kô râ nghut lhê.

<sup>5</sup> Hau é yanmai yhang, nungmoq gyai yhang shikut luí, nungmoq é lumjínq hkyô má ge é hkyô lé jat yù keq; ge é hkyô má sumsé hpaqchyí lé, <sup>6</sup> sumsé hpaqchyí má yhumsing gùng yhumsîng hkang é hkyô lé, yhumsing gùng yhumsîng hkang é hkyô má jân shirang é hkyô lé, jân shirang é hkyô má tarâ hkunggâ é hkyô lé, <sup>7</sup> tarâ hkunggâ é hkyô má gumang chyitkâng myit lé, gumang chyitkâng myit má chyitdap myit lé, jat yù keq. <sup>8</sup> Hkâsu mù gâ le, hau pé lé nungmoq wó sing myô jat lo é nghut jáng, hau pé gi, nga-nhông é Yhumsîng Yesuq Hkrisduq lé nungmoq sê é hkyô má, nungmoq lé akôm a dut nhang é htoq agó, ashi a zui le dut nhâng râ a nghut. <sup>9</sup> Nghut kôlhang, rayuq yuq gi, hau pé lé a wó é nghut jáng, chyâng é lé za myang é eq myoqjit é sù nghut luí, laí lò bê yhâng é yubak mara pé mai lhoq sanséng byi é hui bê hkyô lé, tô-myhî pyám bê sù nghut ri.

<sup>10</sup> Haú mù luí, ngá é gumang wuì ê, nungmoq lé ji yu é hkyô eq hkyin yu é hkyô lé, je riyhang lhoq gingtíng nyi keq. Hkâsu mù gâ le, hau hkyô pé lé nungmoq kut nyi é nghut jáng, hkâ-nhám le nungmoq myit leqbat kó râ a nghut; <sup>11</sup> hau htoq agó, nga-nhông é Yhumsîng eq hkyi yù Sù nghut é Yesuq Hkrisduq é ahtum abyuq é mingdán má agùn agó lhom pang yu é lé, nungmoq myang hap yù kó râ nghut lhê.

### *Chyúmdang Mã É Myihtoí Dang*

<sup>12</sup> Haú mù luí, nungmoq gi, hau pé lé sé kô é htoq agó, nungmoq wó tô é tengmán hkyô má gingtíng nyi kô é nghut kôlhang, ngò, nungmoq lé hkâ-nhám le hau pé lé ru lhoq pùn nyi râ nghut lhê. <sup>13</sup> Shí gungdu má ngò rú dui nyi nyi gi, nungmoq lé lhoq pùn kying byi le ge ri nghû, ngò wó myit ri; <sup>14</sup> haí mù gâ le, nga-nhông é Yhumsîng Yesuq Hkrisduq gi, ngo lé san za sé nhâng bê eq rajung za, hkâ-myháng a myáng má, ngò gi, gungdu shi lé tô pyâm to râ nghut é lé sê lhê. <sup>15</sup> Ngò htoq ló byuq é htâng má, nungmoq, hkâ-nhám le haú pé lé ru wó bûn nyi râ lé myàng nau mù, ngò, wó dut é í shikut nyi râ nghut lhê.

<sup>16</sup> Nga-nhông é Yhumsîng Yesuq Hkrisduq é a-tsam eq lé lo é hkyô eq séng luí, nungmoq lé ngamoq taí kyô wú é hkûn, ngamoq gi, kut htoq yu é labyoq mhô-myi lé a châng é za, Yhâng é kô làm hkikhkâm hkyô lé myoq eq myang é saksé pé nghut lhê.

<sup>17</sup> Hkâsu mù gâ le, haú Kô Làm Hkikhkâm Hkyo é Hpungwup Shing kang mai, "Shí yuq gi, Ngò chyitdap é Ngá zo nghut lhê; Yhang má Ngò nhik dik nyi lhê."✠ ga taí é htê, Yhâng chyáng jé é hkûn, haú Íwa Garai Gasâng chyáng mã é aróng eq hpungwup shing kang lé Yhang wó hap yù bê nghut ri. <sup>18</sup> Ngamoq yhang, chyoiyúng bùm má Yhang eq rahá nyi tô é hkûn, htê haú mauhkûng mai htoq lo é lé wó gyô é nghut lhê.

✠ 1:17 Mht 17:5; Mrk 9:7; Luk 9:35

<sup>19</sup> Haû mù luî, myiqhtoî pê dang lé je lhoq ging bê hkyô, ngamoq wó é nghut lhê; haû mù, maubó lô luî, nungmoq é myit má bó-myhû htoq lo é hkûn jé shoq, mauchut tuq dut é jowò má duq nyi é myibung lé su, myiqhtoi dang haú lé, nungmoq gyo mù rago châng kut râ dut lhê. <sup>20</sup> Banshoq htoq má, Chyúmdang mâ é myiqhtoi dang gi, haû myiqhtoî pé mai ó le ó lichyúm lhoq htoq yu é đông a nghut é lé, nungmoq sê to râ dut lhê. <sup>21</sup> Hkâsu mù gâ le, myiqhtoi dang gi, byù ô nau é đông hkâ-nhám lé a htoq wú é za, haû Chyoiyúng Woi-nyí eq shuî u huî é bang mai, Garai Gasâng chyáng mâ é dang taí é ru nghut lhê.

## 2

### *Sará Apyoq Pê É Hkyô*

<sup>1</sup> Nghut kôlhang, myiqhtoi pyoq pé gi, Israelaq byù haú bang é ahkaû má nyi wú bê nghut lhê, haû eq rajung za, nungmoq é ahkaû má le sará apyoq pé nyi râ za nghut lhê. Yhangmoq gi, htên byoq hkyô nghut é byoq gang râ mhoqshit hkyô pé lé, haq lhoq pyo é htoq agó, yhangmoq lé wui yu é, Yhumsing lé lhang he-ngik pyám kó râ nghut lhê. Haû mù, yhangmoq gi, yhumsing gùng yhumsing byòdàn tung htên byoq hkyô jé nhâng bekô râ nghut lhê. <sup>2</sup> Byù myo myo gi, haú bang é ahoq ahî hkyô má cháng kó râ eq, tengmán hkyô lé taí hpoî pyám nhâng kó râ nghut lhê. <sup>3</sup> Sará apyoq haú bang gi, yhangmoq myoqnoq é hkyô má, yhangmoq kut htoq tô é mhô-myi đông nungmoq lé mhaú zo kó râ nghut lhê. Yhangmoq lé mara dam byi hkyô gi, gohkûn mai yhangmoq ahtoq má lhang to gù bê nghut é htoq agó, yhangmoq é htên byoq hkyô gi, yhup myhî tô nyi é a nghut.

<sup>4</sup> Hkâsu mù gâ le, Garai Gasang gi, mara kut shut é maumâng pé lé lhang a ha bûn é za, ngaraî ming má hkyô pyám luî, tarâ jéyáng é hui râ hkûn jé shoq, yhangmoq lé tuq tuq chut é dong hkaû má kat tô é nghut lhê. <sup>5</sup> Yhang gi, tarâ a hkunggâ é byu pé lé dowuî tîng é hkûn, gohkun lhê é mingkan lé a ha bun nghut ri, nghut kôlhang, dingmán é hkyô lé hko kyô é sù Noaq eq gotû nyhit yuq lé hung yu é nghut ri; <sup>6</sup> Yhang gi, Sodom eq Gomoraq myuq lé, myi-mhop dut shoq nyhê hkyô pyám é đông mara dam byi luî, tarâ a hkungga bang chyáng dut lò râ hkyô é azòng kut tô é nghut ri; <sup>7</sup> nghut kôlhang, tarâ a chûng bang é achâq achyut asak duì hkyo é yanmai myit wui myit hke huî é, haû dingmán sù Lot lé hkyi htoq yu é nghut ri; <sup>8</sup> (hkâsu mù gâ le, dingmán sù haû gi, nyí hkanmó yhangmoq ahkaû má nyi nyi é nghut luî, tarâ a chûng é muzó hkyô lé, yhang wó myâng wó gyô é yanmai, yhang é dingmán myit má gunjâng é hui sù nghut ri.) <sup>9</sup> Haû su nghut é nghut jáng, Yhumsing gi, tarâ hkunggâ é byu pé lé, wuîhke hkyô mai hkâsu kut hkyi htoq yu râ eq, a dingmán é bang lé, tarâ jéyáng é buinyi jé shoq, dam byi é hkyô lé xoq kut nyi é u má hkâsu kut zuî zing to râ lé sê lhê. <sup>10</sup> Haû yubak gungshô é htên byoq sê é yut yut ô nau hkyô châng é eq ahko ahkáng lé wú tiq bang chyáng, haú hkyô hkyak dut râ nghut lhê.

Byù haú bang gi, ngegáng-htu é eq nghutbûn é bang nghut kôluî, mauhkûng bang lé lumù gansâng râ lé a gyuq kó nghut ri; <sup>11</sup> nghut kôlhang, maumang lagyô pé lhang gi, wum je bo é eq a-tsam je bo é nghut kôle, haû Yhumsing é hí má, haû mauhkûng bang lé mara hun é đông lumù gansâng hkyô a wám kut kó nghut ri. <sup>12</sup> Nghut kôlhang, haû sará apyoq pé gi, yhumsing a sê gyô é hkyô pé lé rhoî dang taí akô. Yhangmoq gi, haû chyup yu é hui luî, lhoq htên pyám é hui râ matú za hku lé lo é, nhik a bo é tân jung dusak đông nghut akô; dusak haú pé su, yhangmoq le, htên byoq byuq kó râ nghut lhê.

<sup>13</sup> Yhangmoq gi, nò shoq kut bekô nghut é yanmai, nò shoq kut é hui zo kó râ nghut lhê. Yhangmoq é ngón kún nau é myit gi, nyí mó káng lé lhang gungsho yut yut ô nau hkyô lhoq dik râ matú nghut ri. Yhangmoq gi, nungmoq eq rahá zoshuq poî kut kô é hkûn, mhaú é lé yhangmoq é ngón hkyô kut kômù, agè agau é eq achâq achyut é bang nghut akô. <sup>14</sup> Yhangmoq é myoqjí pé má gi, su-myi sulàng lú hkyô byíng zan to kômù, mara kut é hkyô lé hkâ-nhám le a hkying kó nghut ri; yhangmoq gi, a gingtîng é bang lé mhoq hpyoq yu akô; yhangmoq gi, myoqnoq é hkyô má kûng é bang nghut kômù, nhing pyám é hui bang nghut akô. <sup>15</sup> Yhangmoq gi, haû dîng é hkyô lé tô pyám to kômù, Beora

é yhangzo nghut é, agè ashop hkyo é ahpau lé chytidap sù Balam é hkyô má châng yông wún bekô nghut ri. <sup>16</sup> Nghut kôlhang, Balam gi, yhang kut shut é hkyo é yanmai, logúng eq tân mhoqshit é hui ri; dang a dat nyo é logúng haú gi, byu é htê đông dang taí lò mù, myiqhtoi hpó a gyíng é hkyô lé hkùm tang pyâm ri.

<sup>17</sup> Byù hau bang gi, wuì a bo é wuìtung eq, laidùn eq mut tâng ló é nghansoq eq pûng kômù, yhangmoq é matú gi, tuq tuq chut é mauchut hkaú lé lajang to bê nghut ri. <sup>18</sup> Hkâsu mù gâ le, yhangmoq gi, asôm gyáng dang lé taí mù, yubak gungshô é yut yut ô nau é hkyô đông mai, haú shut shai é hkyô má asak dui nyi é mai asik za hfang htoq lo é bang lé, mhoq hpyoq yù akô nghut ri. <sup>19</sup> Yhangmoq gi, haú bang lé luthkyô byi râ gidiq byi kô é nghut kôle, yhangmoq gùng gi, htên byoq hkyô lhoq htoq é gungsho yut yut ô nau hkyo é jùn dut nyi akô; haí mù gâ le, byù rayuq gi, yhumsíng lé hai eq up síng le, hai é jùn nghut lhê. <sup>20</sup> Byu pé gi, nga-nhùng é Yhumsíng eq hkyi yù Sù nghut é Yesuq Hkrisduq lé sê é đông mai, mingkân é agè ashop hkyô mai wó hfang lut htoq bê nghut kôle, yhangmoq lé hau eq tuí yup tô é dum hui luí, ung pyâm é hui kô é nghut jáng, yhangmoq é matú, hí lhê htoq má je wuì byuq kó râ nghut lhê. <sup>21</sup> Haú dingmán é hkyô lé yhangmoq sé luí, yhangmoq lé ap byi to bê nghut é chyoyúng hkunmó lé tô pyâm to mù lhing taú ló byuq kô é htoq má, haú hkyô lé a sê é gi, yhangmoq é matú je gè kó râ nghut lhê. <sup>22</sup> "Hkui gi, yhang hpat tô é lé dum taú zô lhê." gâ é eq, "Waq gi, chí pyám byi é htâng, yhâng é galhu htum má dum taú lhú lhê." <sup>☆</sup> gâ é sanghkyang gi, yhangmoq chyáng dik bê nghut ri.

### 3

#### *Haú Yhumsíng Jé Lé Râ Buinyì*

<sup>1</sup> Chytidap é luzúm wuì ê, shí gi, nungmoq lé ngò í dá nghu râ dàm ká byi kat é laiká nghut lhê. Laiká shí í lhum má, nungmoq é sansêng é i-myt lé lhoq toq râ matú taí pùn kat é laiká nghut lhê. <sup>2</sup> Haú gi, chyoyúng myiqhtoi pé mai lai lò bê hkùn taí tô é dang pé eq, nga-nhùng é Yhumsíng eq hkyi yù Sù mai, nungmoq é lagyô pé đông byi to bê nghut é hkunmó lé, ngò, nungmoq lé bun nhâng nau luí nghut lhê.

<sup>3</sup> Sâng-hi má, ló htâng é buinyì pé má yhumsing é agè ashop ô nau hkyô má cháng luí taí hpoi bang htoq lô râ nghut é lé, nungmoq sê gyô to ra râ nghut lhê. <sup>4</sup> Haú bang gi, "'Dum jé lé râ' ga Yhang gidiq byi é gi, hkâmá lhú? Nga-nhùng é îchyí îwâ pé gi, shi byuq ló bekô nghut mù, junghkang jungmó gi, mau htoq xâng hkun mai dut é su roq dut nyi ri." ga taí kó râ nghut lhê. <sup>5</sup> Nghut kôlhang, yhangmoq gi, a-nham lé, Garai Gasâng é hkunmó mai, mauhkúng pé joq é eq, myigùng gi, wuì mai dut htoq nhâng mù, wuì đông hpan tô é hkyô lé, a sé gùn kut pyâm akô nghut ri. <sup>6</sup> Wuì hau eq sheq, haú hkun lhê é mingkan lé dowuì tít mù, lhoq htên pyâm é nghut lhê. <sup>7</sup> Ahkui lhê é mauhkúng pé eq myigùng lé gi, tarâ a hkungga bang htên byoq hui râ nghut é, tarâ jéyáng é buinyì jé shoq, myi má nyhé râ matú, hkunmó hau eq Yhang hkong to bê nghut ri.

<sup>8</sup> Nghut kôlhang, chytidap é luzúm wuì ê, haú Yhumsing é hí má, ra-nyí gi, zanwut rahkyíng đông, zanwut rahkyíng gi, ra-nyí đông nghut é hkyô shí lé, hkâtô-myhí kó. <sup>9</sup> Haú Yhumsing gi, Yhâng é danggidiq lé hân a lhoq dik ga byù ra-am myit ngam pyâm é su, nyhâm é Sù a nghut. Yhang gi, ó yuq le htên byoq byuq râ lé a ô nau é yanmai, yuq hkangmó myit lhing râ lé za ô nau mù, nungmoq lé myit hîng byi nyi é nghut lhê.

<sup>10</sup> Nghut kôlhang, haú Yhumsing é buinyì gi, hkau sù su a bûn nùng má jé râ nghut lhê. Haú buinyì má, mauhkúng pé gi, mying hum htê eq byuq byuq râ nghut lhê; duqbó-gùng pé gi, myí eq lhoq htên pyâm é hui luí, myigùng eq haú mâ é joq mijoq gi, nyé gyó byuq râ nghut lhê.

<sup>11-12</sup> Joq mijoq gi, haú hkyô đông lhoq htên pyâm é hui râ nghut é yanmai, nungmoq gi, hkasù é byu pé dut ra râ lhú? Nungmoq gi, haú Garai Gasâng é buinyì lé ho nyi é eq buinyì haú hân za jé râ lé ô nau nyi é hkùn, chyoyúng é eq tarâ hkunggâ é asak duì hkyô đông nyi ra râ nghut lhê. Buinyì haú gi, mauhkúng pé lé, myí eq lhoq htên pyám

<sup>☆</sup> 2:22 Sânghkyang 26:11

luî, duqbó-gûng pé le, lûm nyé luî, nyé yui pyâm é buinyì dut râ nghut lhê. <sup>13</sup> Nghut kôlhang, nga-nhúng gi, Garaî é danggidiq nghut é, dingmán hkyô é yhûm, mauhkûng asik eq myigùng asik lé, myoqbyu nyi é bang nghut lhê.

<sup>14</sup> Haû nghut mù luî, chyitdap é luzúm wuî ê, nungmoq gi, haû hkyô lé myoqbyu é bang nghut kô é yanmai, Yhang é hí má achâq achyut a dut é eq mara hûn râ hkyô a bo é za, Yhang eq nguingón nyî râ hkyô lé gyai yhang shikut nyî keq. <sup>15</sup> Nga-nhûng é chyitdap gumang Poluq gi, yhang lé, Garaî Gasang byî tô é hpaqchyî byéng-yá èq, nungmoq chyáng ká byi bê eq rajung za, nga-nhûng é Yhumsing é myit hîng hkyô gi, hkyi yù hkyô nghut é lé matsîng to keq. <sup>16</sup> Poluq gi, yhang kê é laiká pé banshoq má, haû hkyô pé eq séng luî rajung za kê shit tô ri. Yhang é laiká hkaû pé má, ra-am gi, sê gyo wuî é hkyô pé bo é yanmai, a mhoq wú é bang eq a gingtîng é bang gi, gotû Chyúmdang pé lé lichyúm htaî lhik pyám kê é su, yhangmoq lichyúm htaî lhik pyám kômù, yhumsîng htên byoq hkyô kut yu nyi akô nghut ri.

<sup>17</sup> Haû mù luî, chyitdap é luzúm wuî ê, nungmoq gi, shí hkyô lé sê to gù nghut é yanmai, tarâ a chûng bâng é shut shaî hkyo èq nungmoq lé a wó shuî nghoq yû râ eq, nungmoq é gaû é jowò mai a wó byit gyó byuq sháng gaq, yhumsing gùng yhumsîng upzúng nyî keq. <sup>18</sup> Nga-nhûng é Yhumsîng eq hkyi yù Sû nghut é Yesuq Hkrisduq é jeju eq hpaqchyî hkyô má, nungmoq kê myhang lò kó sháng gaq. Hpungwup shing kang gi, Yesuq Hkrisduq chyáng, ahkuî le, ahtum abyuq le, ru joq nyî sháng gaq ô! Amen.

## YOHAN Hî Dàm Hun Kat é Laiká (1 John)

### *Asak Mungdang*

<sup>1</sup> Ngò gi, haù sâng-hi mai joq nyi mù, ngamoq wó gyô wú bê é, ngamoq é myoq èq myang wú bê é, ngamoq rago za wú wú bê é, ngamoq é loq eq záng wú bê é, asak mungdang eq sêng é hkyô lé, nungmoq lé taí kyô kat lhê. <sup>2</sup> Asak haù gi, htoq shit bê nghut mù, ngamoq gi, haù lé myang wú luí, saksé hkám bê; haù Íwa eq rahá nyi wú é, ngamoq chyáng htoq shit bê nghut é ahtum abyuq é asak haù lé nungmoq lé taí kyô lhê. <sup>3</sup> Ngamoq eq zùm yap é hkyô lé, nungmoq le wó sháng gaq nghû, ngamoq gi, myang wú bê eq wó gyô wú bê hkyô lé, nungmoq lé taí kyô lhê. Ngamoq gi, haù Íwa eq le, Yhâng zo Yesuq Hkrisduq eq le, zùm yap nyi é bang nghut lhê. <sup>4</sup> Ngamoq é gabú hkyô byíng jup sháng gaq nghû, ngamoq gi, nungmoq lé shí hkyô ká byî kat lhê.

### *Maubó Hkaù Má Sô Nyi Râ Hkyô*

<sup>5</sup> Garai Gasang gi, maubó nghut lhê; Yhâng chyáng mauchut ratsuí lháng a bò nghut ri. Shí hkyô gi, Yhangzô chyáng mai ngamoq wó gyô yù luí, nungmoq lé taí kyô é danglù nghut lhê. <sup>6</sup> Nga-nhúng gi, Yhang eq zùm yap nyi lhê nghû taí kôlhang, mauchut hkaù má ru sô nyi bum é nghut jáng, nga-nhúng gi, mhaù é bang dut mù, haù tengmán hkyô dông asak a dui é bang nghut ri. <sup>7</sup> Nghut kôlhang, Yhang gi, maubó má nghut nyi é eq rajung za, nga-nhúng le haù maubó má sô nyi é nghut le gi, nga-nhúng rayuq eq rayuq zùm yap nyi bê nghut luí, Yhang zo Yesuq é sui gi, nga-nhúng é mara banshoq lé lhoq sân-yúng pyám byi râ nghut lhê.

<sup>8</sup> Mara a bò nghû nga-nhúng taí é nghut le gi, yhumsing gùng yhumsing mhaù pyám luí, haù tengmán hkyô gi, nga-nhúng chyáng a bò nghut ri. <sup>9</sup> Nghut kôlhang, nga-nhúng gi, yhumsing é mara lé yín yu é nghut jáng, Yhang gi, wó lum é sù eq tengmán é sù nghut é yanmai, nga-nhúng é mara lé hkyut pyám byi luí, a dítng a mán é hkyô banshoq mai le, nga-nhúng lé lhoq sân-yúng byi râ nghut lhê. <sup>10</sup> Nga-nhúng gi, mara a kut shut nghû taí é nghut jáng, nga-nhúng mai Yhang lé mhaù sù nghû chyo pyâm é nghut luí, Yhâng é mungdang gi, nga-nhúng má a bò nghut ri.

## 2

### *Hkrisduq Gi, Nga-nhúng Lé Garúm Sù*

<sup>1</sup> Ngò chyitdap é zo wuê ê, ngò gi, nungmoq mara a kut shut kó sháng gaq nghû, nungmoq lé shí hkyô ká byî kat lhê. Nghut kôlhang, rayuq yuq mara kut shut é nghut le gi, nga-nhúng é matú haù Íwa chyáng bo taí xoq byî é, Yesuq Hkrisduq gâ é Dingmán Sù lé, nga-nhúng wó lhê. <sup>2</sup> Yhang gi, nga-nhúng é yubak marâ é matú, shíhtaí gunglik hkungga nghut nyi ri. Nga-nhúng é yubak marâ é matú baú za a nghut, mingkan gón mâ é byu pê é yubak marâ é matú le nghut nyi ri.

<sup>3</sup> Nga-nhúng gi, Yhang hkyô tô é hkunmó pé lé châng kut é nghut jáng, Yhang lé nga-nhúng rago sé bê nghut é hkyô lé, wó sé bê nghut ri. <sup>4</sup> Byù rayuq yuq mai, "Ngò gi, Yhang lé rago sê lhê." ga taí kôlhang, Yhang hkyô tô é hkunmó lé a châng kut é nghut jáng, haù yuq gi, byù mhaù nghut luí, tengmán hkyô gi, yhang má a bò nghut ri. <sup>5</sup> Ó yuq nghut kôlhang, Garai Gasang é mungdang lé châng kut nyi é nghut jáng, Yhang lé chyitdap é myit gi, haù yuq má gè gè byíng jup bê nghut ri. <sup>6</sup> Yhang má asak dui nyi lhê ga taí é sù ó yuq nghut kôlhang, Yesuq kut bê eq rajung za, châng kut râ lhê. Haù hkùn sheq, nga-nhúng gi, Yhang má nghut nyi bê hkyô lé, wó sê lhê.

### *Hkunmó Asik*

<sup>7</sup> Chyitdap é luzúm wuê ê, ngò gi, nungmoq lé hkunmó asik ká byî kat é a nghut é za, haû sâng-hi mai nungmoq wó to bê hkunmó axau sheq ru nghut lhê. Hkunmó axau shî gi, nungmoq wó gyô wú bê mungdang nghut nyi ri. <sup>8</sup> Nghut kôlhang, ngò gi, nungmoq lé hkunmó asik ká byî kat lhê; hau é tengmán hkyô lé, Yhang má le, nungmoq má le, byu myàng ri; hkâsu mù gâ le, haû mauchut gi, laî ló byuq luî, haû tengmán é maubó gi, ðuq nyi gù bê nghut ri.

<sup>9</sup> Ngò gi, maubó hkaû má nghut nyi lhê ga luî, yhumsing é gumang lé a jú é sù ó yuq nghut kôlhang, haû mauchut hkaû má ru nghut nyi ashî. <sup>10</sup> Yhumsing é gumang lé chyitdap é sù ó yuq nghut kôlhang, haû maubó má asak dui nyi é nghut mù luî, yhang má myit leqbat nhâng râ hkyô haî le a bò nghut ri. <sup>11</sup> Nghut kôlhang, yhumsing é gumang lé a jú é sù kúm gi, haû mauchut hkaû má nghut nyi luî, haû má sô lhing jón wún ri; haû mauchut gi, yhang lé myoq lhoq chit to byî é yanmai, yhang gi, hká shut e ló nyi é hkyô lé a sé nghut ri.

<sup>12</sup> Chyitdap é zo wuê ê, Yhâng mying é yanmai, nungmoq é mara pé hkyut pyám byi hui bekô nghut luî, nungmoq lé ngò kâ kat é nghut lhê.

<sup>13</sup> Îwâ pé ê, nungmoq gi, haû sâng-hi mai nyi é Sù lé sé bekô nghut é yanmai, nungmoq lé ngò kâ kat é nghut lhê.

Zorâm wuê ê, nungmoq gi, haû agè ashop sù lé ùng pyám bekô nghut é yanmai, nungmoq lé ngò kâ kat é nghut lhê.

Chyitdap é zo wuê ê, nungmoq gi, haû Îwa lé sé bekô nghut é yanmai, nungmoq lé ngò kâ kat é nghut lhê.

<sup>14</sup> Îwâ pé ê, nungmoq gi, haû sâng-hi mai nyi é sù lé sé bekô nghut é yanmai, nungmoq lé ngò kâ kat é nghut lhê.

Zorâm wuê ê, nungmoq gi, wum-o bo é eq, haû Garai Gasâng é mungdang nungmoq chyáng dui nyi é nghut mù, haû agè ashop sù lé ung pyám bekô nghut é yanmai, nungmoq lé ngò kâ kat é nghut lhê.

#### *Mingkan Lé A Chyitdap Râ Hkyô*

<sup>15</sup> Mingkan eq mingkan htoq mâ é haî le lé, hkâchyitdap kó. Byù rayuq yuq, mingkan lé chyitdap é nghut le gi, haû Îwa lé chyitdap é myit, yhâng chyáng a bò nghut ri. <sup>16</sup> Hkâsu mù gâ le, mingkan htoq má joq é lhunglhang gi, gungsho ô nau é hkyô, myoqjí yut yut ô nau é hkyô, yhumsing wó é eq kut é hkyô lé gumrong é pé chyat nghut ri. Haû gi, Îwâ chyáng mai htoq lo é a nghut, haû mingkan mai htoq lo é ru nghut lhê. <sup>17</sup> Mingkan eq mingkan ô nau hkyô pé gi, laî ló byuq râ nghut lhê; nghut kôlhang, haû Garai Gasang ô nau é hkyô lé kut é sù gi, ahtum abyuq dui nyi râ nghut lhê.

#### *Hkrisduq É Gye Pé*

<sup>18</sup> Chyitdap é zo wuê ê, shî gi, ló htâng é ahkyíng nghut bê; haû anti-hkrisduq\* gi, lé lo nyi ri gâ é lé, nungmoq wó gyô wú bê eq rajung za, ahkuî lhang, anti-hkrisduq myo myo gi, jé lé bekô nghut ri. Hau é yanmai, nga-nhúng gi, ló htâng é ahkyíng nghut bê hkyô lé wó sé bê nghut ri. <sup>19</sup> Yhangmoq gi, nga-nhúng é hpúng mai htoq ló byuq bê bang nghut kôle, gè gè ga jang, nga-nhúng eq a sêng é bang nghut akô. Hkâsu mù gâ le, nga-nhúng eq sêng é nghut jáng, yhangmoq gi, nga-nhúng eq nyi to râ nghut lhê, nghut kôlhang, yhangmoq htoq ló byuq bekô nghut é yanmai, yhangmoq rayuq lhang nga-nhúng eq a sêng é hkyô lé tân shit bê nghut ri.

<sup>20</sup> Nghut kôlhang, nungmoq gi, haû Chyoiyúng Sù mai xû but byî é hui† bekô nghut mù luî, nungmoq banshoq bang haû tengmán hkyô lé sê akô nghut ri. <sup>21</sup> Haû tengmán hkyô lé nungmoq a sé kôluî, nungmoq lé ngò kâ kat é a nghut; haû hkyô lé nungmoq sé gù nghut luî le, haû mhaú é hkyô gi, tengmán hkyô mai lo é a nghut é lé nungmoq sé gù nghut luî le, nungmoq lé ngò kâ kat é nghut lhê. <sup>22</sup> Mhaû é sù gi, ó yuq nghut lhê lhu?

\* 2:18 Anti-hkrisduq nghû é lichyúm gi, Hkrisduq lé gye kut é sù lé gâ lhê † 2:20 Xû but byî é hui gâ é lichyúm gi, Hkrisduq chyáng mai, Chyoiyúng Woi-nyí lé myang hap yu é lé gâ lhê.

Haû Yesuq gi, Hkrisduq a nghut ga he pyâm é sù nghut ri. Haû Îwa eq Yhangzo lé he-ngik é sù gi, anti-hkrisduq yhang nghut nyi ri. <sup>23</sup> Haû Yhangzo lé he-ngik sù ó yuq nghut kôle, haû Îwa lé sé sù a nghut. Haû Yhangzo lé hap yu é sù kúm gi, haû Îwa lé le sé bê sù nghut lhê.

<sup>24</sup> Haû sâng-hi mai nungmoq wó gyô wú bê é hkyô pé lé, nungmoq i-myt má ru bo nyi keq. Haû nghut jáng, nungmoq gi, haû Yhangzo eq Îwâ chyáng nyi nyi râ nghut lhê.

<sup>25</sup> Haû gi, nga-nhúng lé Yhang byi tô é ahtum abyuq é asak wó yû râ gâ é danggidiq nghut ri.

<sup>26</sup> Ngò gi, nungmoq lé hkyô shuî nghoq shikut nyi bâng é hkyô eq séng luî, nungmoq lé shí gû kâ kat é nghut lhê. <sup>27</sup> Nungmoq chyáng kúm gi, Yhâng chyáng mai xû but jeju lé nungmoq wó yù bekô nghut mù luî, mhoqshit râ góyuq a ra lo nghut ri. Nghut kôlhang, haû Yhâng é xû but jeju gi, hkyô hkangmó má nungmoq lé mhoqshit byi mù, haû gi, tengmán nyi é nghut luî, mhaû é hkyô haî le a bo é za, nungmoq lé mhoqshit byi nyi é eq rajung za, Yhâng chyáng nungmoq nyi nyi keq.

<sup>28</sup> Chyitdap é zo wuî ê, nga-nhúng gi, Yhang jé lé mù htoq shit é hkûn, Yhâng é hí má a gyuq a kyum é, hoq a hpu é, wó dut râ matú Yhâng chyáng ru nyi nyi keq.

<sup>29</sup> Yhang gi, dingmán sù nghut é lé, nungmoq sé bê yanmai, dingmán hkyô lé kut é sù ó yuq nghut kôle, Garai Gasang mai hkû kat é sù nghut é hkyô lé, nungmoq sê akô nghut ri.

### 3

#### *Garai Gasâng É Yhangzô Pé*

<sup>1</sup> Nga-nhúng gi, haû Garai Gasâng é yhangzô pé ga wut râ hui bê nghut é yanmai, haû Îwâ é chyitdap myit gi, nga-nhúng ahtoq má hkâ-í yhang ko nyi ri myhi-nhung! Nga-nhúng gi, yhangzô pé yhang nghut bu-nhung! Mingkan gi, Yhang lé a sê é yanmai, nga-nhúng lé le a sé nghut ri. <sup>2</sup> Chyitdap é luzúm wuî ê, ahkuî, nga-nhúng gi, Garai Gasâng é yhangzô pé nghut nyi to kôlhang, nga-nhúng hkâsu dut râ hkyô lé, a tûn shit shi nghut ri. Nghut kôlhang, Hkrisduq htoq shit é hkûn, nga-nhúng gi, Yhang su dut râ nghut é hkyô lé, nga-nhúng sê lhê; hkâsu mù gâ le, Yhang hkâsu nghut é hkyô lé roq yhang, nga-nhúng myàng râ nghut lhê. <sup>3</sup> Myit myoqbyù hkyô shi lé, Yhâng chyáng má wó tô é bang ó yuq nghut kôle, Yhang sân-yúng é eq rajung za, yhumsing gùng lé lhoq san lhoq yúng nyi ri.

<sup>4</sup> Mara kut é sù ó yuq nghut kôle, tarâ lu laî é sù nghut ri; gè gè ga jang, mara gi, tarâ lu laî é hkyô nghut nyi ri. <sup>5</sup> Nghut kôlhang, Yhang gi, nga-nhúng é yubak mara lé hkyut pyám byi râ matú, pô htoq bê hkyô lé nungmoq sé akô; Yhâng chyáng mara a bò nghut ri. <sup>6</sup> Yhang má dui nyi é sù ó yuq nghut kôle, mara a xoq kut nyi nghut ri; mara xoq kut nyi sù ó yuq nghut kôle, Yhang lé a myàng, a sé shi nghut ri.

<sup>7</sup> Chyitdap é zo wuî ê, nungmoq lé ó yuq eq le hkyô a shuî nghoq kó sháng gaq; Yhang gi, dingmán é eq rajung za, dingmán é hkyô lé kut é sù ó yuq nghut kôle, dingmán nyi ri.

<sup>8</sup> Mara kut nyi é sù gi, nat Tsadán chyáng mâ é nghut nyi ri; hkâsu mù gâ le, Tsadán haû gi, sâng-hi mai yhang mara kut nyi bê nghut ri. Haû Garai Gasâng é Yhangzo gi, Tsadán é muzó lé lhoq hpyoq lhoq hten râ matú pô htoq le é nghut lhê. <sup>9</sup> Garai Gasâng chyáng mai hku kat é sù ó yuq nghut kôle, Yhâng é amyui bo to é nghut é yanmai, mara a xoq kut lo nghut ri; haû yuq gi, Garai Gasang chyáng mai hku kat é hui bê nghut é yanmai, mara wó xoq kut lo râ a nghut. <sup>10</sup> Ó yuq nghut kôle, dingmán é hkyô a kut é eq, yhâng gumang lé a chyitdap é sù gi, Garai Gasâng yhangzo a nghut. Hau é yanmai, ó pé gi, Garai Gasâng é yhangzô pé nghut é, ó pé gi, nat Tsadán é yhangzô pé nghut é hkyô lé, san za nga-nhúng wó sê yu ri.

#### *Rayuq Eq Rayuq Chyitdap Lhum Râ Hkyô*

<sup>11</sup> Nga-nhúng rayuq eq rayuq chyitdap lhum râ lhê gâ é hkyô haû gi, sâng-hi mai nungmoq wó gyô yù bê danglù nghut ri. <sup>12</sup> Haû agè ashop sù eq le sêng é, yhanggu lé sat pyâm é Ka-in su a ge kut. Yhang gi, haî mù luî yhanggu lé sat pyâm lhê lhu ga le, yhâng



é muzó pé gi, agè ashop hkyô, yhanggû é muzó pé gi, dingmán é hkyô nghut é yanmai nghut ri. <sup>✠</sup> 13 Ngá é gumang wui ê, nungmoq lé mingkân èq a ngui a jú kut kôlhang, hkâmaú kó. 14 Nga-nhúng gi, nga-nhúng é gumang wui lé chyitdap é yanmai, shi byuq é mai wó lut luí asak dui é hkyô lé, wó sê é nghut lhê. Chyitdap myit a bò sù gi, shi é hkyô má lúng tô ashî nghut ri. 15 Yhâng é gumang lé a ngui a jú é sù gi, byù sat sù dut râ nghut lhê; byù sat sù ó yuq chyáng nghut kôle, ahtum abyuq é asak a bo é hkyô lé, nungmoq sê nyi akô.

16 Yesuq Hkrisduq gi, nga-nhúng é matú Yhâng é asak byî pyám bê lé wú jáng, chyitdap myit hkasû é nghut é hkyô lé, nga-nhúng wó sê ri. Nga-nhúng le, gumang wui é matú, nga-nhúng é asak lé byî pyám gíng ri. 17 Ó yuq nghut kôlhang, mingkan sutzè wó to luí, yhâng gumang hpó asho awui dut nyi é lé myàng kôlhang, a shogyô yu é nghut jáng, haú Garai Gasâng é chyitdap myit gi, yhâng chyáng hkâsu wó bò râ lúh? 18 Chyitdap é zo wui ê, nga-nhúng gi, dang nhut shô mai za a nghut, muzó eq tengmán é đông le chyitdap nyi sháng. 19 Haú hkûn, nga-nhúng gi, tengmán hkyô eq séng bê bang nghut é lé wó sê é eq, nga-nhúng é i-myt mai nga-nhúng lé mara hun lò hkanmó, Garai Gasâng é hí má nga-nhúng i-myt wó ngón nyí bê nghut ri. 20 Hkâsu mù gâ le, Garai Gasang gi, nga-nhúng myit é htoq má je kô é sù nghut mù, jung hkanmó lé sê nyi ri.

21 Chyitdap é luzúm wui ê, nga-nhúng é i-myt mai nga-nhúng lé mara a hun é nghut le gi, Garai Gasâng hí má nga-nhúng gyuq kyûm râ hkyô a joq lo nghut ri. 22 Nga-nhúng gi, Yhang hkyô tô é hkanmó pé lé châng kut é eq Yhang lé gabú nhang é hkyô hái lé le kut é yanmai, nga-nhúng dúng é hkyô lhunglhang lé, Yhâng chyáng mai wó yû râ nghut lhê. 23 Yhang hkanmó hkyô tô é eq rajung za, Yhâng zo Yesuq Hkrisduq é mying má lumjíng é eq, rayuq eq rayuq chyitdap lhûm é hkyô gi, Yhang hkyô tô é hkanmó yhang nghut bê. 24 Yhang hkyô tô é hkanmó pé lé, châng kut é bang gi, Yhang má dui nyi bê nghut mù, Yhang le haú bâng chyáng dui nyi bê nghut ri. Yhang nga-nhúng chyáng dui nyi bê hkyô lé, nga-nhúng lé Yhang byî tô é Woi-nyí đông nga-nhúng wó sê yu é nghut lhê.

#### 4

##### *Woi-nyí Pé Lé Gôn Wú Râ Hkyô*

1 Chyitdap é luzúm wui ê, woi-nyí hkanmó lé hkâlumjíng ko, woi-nyí haú pé gi, Garai Gasâng chyáng mâ é nghut é, a nghut e lé gôn wú keq; hkâsu mù gâ le, myiqhtoi pyoq pé myo myo gi, mingkan htoq má jón wún bekô nghut ri. 2 Garai Gasâng é Woi-nyí lé nungmoq wó sê yù râ hkyô gi, shí đông nghut lhê: haú Yesuq Hkrisduq gi, gungsho đông jé lé bê ga, yín yu é woi-nyí hkanmó gi, Garai Gasâng chyáng mâ é nghut lhê. 3 Nghut kôlhang, Yesuq Hkrisduq lé a yín yu é woi-nyí hkanmó gi, Garai Gasâng chyáng mâ é a nghut. Woi-nyí haú gi, lé lo nyi ri ga nungmoq wó gyô wú bê; ahkuí lhang mingkan htoq má nyi to gù nghut é anti-hkrisduq é woi-nyí nghut ri.

4 Chyitdap é zo wui ê, nungmoq gi, Garai Gasâng chyáng mâ é nghut mù luí, yhangmoq lé ung pyám bekô nghut ri. Hkâsu mù gâ le, nungmoq má lúng to Sù gi, mingkan má nyi to su htoq je kô ri. 5 Yhangmoq gi, mingkan eq séng é bang nghut lhê mù luí, mingkan hkyam đông tái bum akô; mingkan zo wui le yhangmoq é dang lé gyo byî akô nghut ri. 6 Nga-nhúng gi, Garai Gasang eq séng é bang nghut lhê; Garai Gasang lé sê é sù ó yuq nghut kôle, nga-nhúng é dang lé gyô ri; nghut kôlhang, Garai Gasang eq a séng é sù gi, ngamoq é dang lé a gyo nghut ri. Shí hkyô lé wú jáng, tengmán hkyo é Woi-nyí eq hkyô shuí nghoq é woi-nyí lé, nga-nhúng sê gam hkoq yû bê nghut ri.

##### *Garai Gasang Gi, Chyitdap Myit*

7 Chyitdap é luzúm wui ê, nga-nhúng gi, rayuq eq rayuq chyitdap lhûm nyi sháng; hkâsu mù gâ le, chyitdap myit gi, Garai Gasâng chyáng mâ é nghut ri. Chyitdap myit bò sù ó yuq nghut kôle, Garai Gasâng chyáng mai hku kat é hui bê sù nghut luí, Garai Gasang lé sé sù nghut ri. 8 Chyitdap myit a bo é sù ó yuq nghut kôle, Garai Gasang lé a sé

sû nghut ri; hkâsu mù gâ le, Garai Gasang gi, chyitdap myit nghut lhê. <sup>9</sup> Garai Gasang gi, Yhang Zô é yanmai nga-nhúng asak wó duî sháng gaq ga, Yhang Zo zote lé mingkan htoq má nhang kat byi bê nghut ri. Haû gi, Garai Gasang mai nga-nhúng lé, Yhâng é chyitdap myit tân shit é hkyô nghut ri. <sup>10</sup> Nga-nhúng gi, Garai Gasang lé chyitdap é a nghut, Garai Gasang sheq nga-nhúng lé chyitdap luî, nga-nhúng é yubak marâ é matú, shîhtaí gunglik hkungga dut sháng gaq ga, Yhang Zo lé nhang kat byî é nghut ri; haû gi, chyitdap myit yhang nghut bê. <sup>11</sup> Chyitdap é luzúm wuî ê, Garai Gasang gi, nga-nhúng lé haû-í yhang chyitdap é nghut jáng, nga-nhúng le rayuq eq rayuq chyitdap lhum râ dut lhê. <sup>12</sup> Garai Gasang lé ó yuq eq le, hkâ-nhám lháng myang wú é a nghut; nghut kôlhang, nga-nhúng rayuq eq rayuq chyitdap lhum nyi é nghut jáng, Garai Gasang gi, nga-nhúng má nyi nyi bê nghut luî, Yhâng é chyitdap myit gi, nga-nhúng má gumjup râ nghut lhê.

<sup>13</sup> Garai Gasang gi, nga-nhúng lé, Yhâng é Woi-nyí byî to bê nghut é yanmai, Yhâng chyáng nga-nhúng dui nyi bê hkyô lé le, Yhang nga-nhúng má nyi nyi bê hkyô lé le, nga-nhúng sé bê nghut ri. <sup>14</sup> Haû îwa gi, Yhang Zo lé mingkân é hkyi yù Sû dut sháng gaq ga nhang kat é hkyô lé, ngamoq myàng luî, saksé hkâm lhê. <sup>15</sup> Ó yuq nghut kôlhang, Yesuq gi, Garai Gasâng é Yhangzo nghut ri ga yín yu é nghut le gi, yhang má Garai Gasang nyi nyi bê nghut luî, yhang le Garai Gasâng chyáng dui nyi bê nghut ri. <sup>16</sup> Nga-nhúng gi, Garai Gasâng eq nga-nhúng lé chyitdap é hkyô lé, sé luî lumjínng nyi lhê; Garai Gasang gi, chyitdap myit nghut lhê; chyitdap myit má nyi nyi é sù ó yuq nghut kôle, Garai Gasâng chyáng dui nyi bê nghut luî, Garai Gasang le haú yuq má nyi nyi bê nghut ri. <sup>17</sup> Haû dông mai, chyitdap myit gi, nga-nhúng chyáng gumjup bê nghut luî, nga-nhúng gi, tarâ jéyáng é buinyi má a gyuq a kyum é myit wó yû râ nghut lhê; hkâsu mù gâ le, nga-nhúng gi, mingkan shî má Yhang su dut nyi bê nghut ri. <sup>18</sup> Chyitdap myit má gyuq é hkyô a bò nghut ri; gyuq é hkyô gi, mara dam byî é hkyô eq sêng é nghut mù luî, gumjup é chyitdap myit gi, gyuq é hkyô lé hkat htoq pyâm ri. Haû gyuq é myit bò sù gi, chyitdap myit má gumjup sù a nghut.

<sup>19</sup> Yhang hí nga-nhúng lé chyitdap bê nghut é yanmai, nga-nhúng le chyitdap nyi lhê. <sup>20</sup> Byù rayuq yuq gi, "Ngò, Garai Gasang lé chyitdap lhê." ga taí kôlhang, yhâng é gumang lé a jú é nghut jáng, haú yuq gi, byù mhaú rayuq nghut ri; hkâsu mù gâ le, yhumsîng byu-myang é gumang lé lháng a chyitdap é sù gi, a byu-myang é Garai Gasang lé wó chyitdap râ a nghut. <sup>21</sup> Garai Gasang lé chyitdap é sù ó yuq le, yhumsîng gumang lé le chyitdap râ lhê gâ é dang haû gi, nga-nhúng é matú, Yhang mai hkyô tô é hkunmó nghut lhê.

## 5

### *Garai Gasâng É Yhangzo Lé Lumjínng Hkyô*

<sup>1</sup> Yesuq gi, haû Hkrisduq nghut ri ga lumjínng é sù ó yuq nghut kôle, Garai Gasâng chyáng mai hku kat bê sù nghut ri; îwa lé chyitdap é sù ó yuq nghut kôle, yhang zo lé le chyitdap é nghut bê. <sup>2</sup> Garai Gasang lé chyitdap nyi mù, Yhang hkyô tô é hkunmó pé lé châng kut nyi é nghut le gi, Garai Gasâng é yhangzô pé lé le, chyitdap nyi é hkyô lé, nga-nhúng wó sê yu é yanmai, <sup>3</sup> Garai Gasang hkyô tô é hkunmó pé lé châng kut é gi, Yhang lé chyitdap é hkyô nghut ri. Yhang hkyô tô é hkunmó pé gi, wòlai mó a nghut. <sup>4</sup> Hkâsu mù gâ le, Garai Gasâng chyáng mai hku kat bê sù ó yuq nghut kôle, mingkan lé ung pyám bê nghut ri. Nga-nhúng é lumjínng myit gi, mingkan lé nga-nhúng ung pyâm é ongdang hkyô nghut ri. <sup>5</sup> Yesuq gi, Garai Gasâng é Yhangzo nghut é lé lumjínng é sù mai lai luî, mingkan lé wó ung pyâm é sù gi, ó yuq wá nghut lhê lú?

<sup>6</sup> Haú yuq gi, wuî eq sui\* mai lé é sù, Yesuq Hkrisduq yhang nghut nyi ri. Yhang gi, wuî mai za lé é a nghut, wuî mai le, sui mai le, lé é sù nghut lhê. Woi-nyí gi, tengmán hkyô nghut é yanmai, shí hkyô lé saksé hkâm byî ri. <sup>7</sup> Hkâsu mù gâ le, Woi-nyí le, wuî le, sui le, haû sîm lhum é saksé hkâm akô nghut ri; <sup>8</sup> haû sîm lhum gi, rajung za nghut akô. <sup>9</sup> Nga-nhúng gi, byu é saksé lé lhom yu lhê; nghut kôlhang, Garai Gasâng é saksé gi,

\* 5:6 Wuî eq sui nghu é gi, Yesuq baptisma hkam yu é hkyô eq shî hkâm é hkyô lé taí nau é nghut ri.

haû htoq je kô nyi ri. Hkâsu mù gâ le, Garai Gasang gi, Yhang Zo eq sêng é hkyô lé saksé byî é yanmai nghut ri. <sup>10</sup> Garai Gasâng é Yhangzo lé lumjínj é sù gi, saksé haû lé yhang é i-myit má wó bê nghut ri; Garai Gasang lé a lumjínj é sù kúm gi, Yhang lé byù mhaû rayuq ga chyo pyám bê nghut ri; hkâsu mù gâ le, Garai Gasang mai Yhang Zo eq sêng é hkyô saksé hkâm é lé, yhang a lumjínj é yanmai nghut ri. <sup>11</sup> Nga-nhúng lé, Garai Gasang byî é ahtum abyuq é asak gi, saksé haû nghut nyi ri. Asak haû gi, Yhang Zô chyáng bo ri. <sup>12</sup> Garai Gasâng é Yhangzo lé wó sù gi, asak haû lé wó bê; Yhang Zo lé a wó sù gi, asak haû lé le a wó nghut ri.

#### *Ahtum Abyuq Asak*

<sup>13</sup> Garai Gasang é Yhangzô é mying lé lumjínj é bang nungmoq gi, ahtum abyuq é asak wó bê hkyô lé, nungmoq sé kó sháng gaq nghû, shí hkyô pé lé ngò ká byî kat é nghut lhê.

<sup>14</sup> Nga-nhúng haî dúng le le, Garai Gasang ô nau é dông nghut jáng gi, Yhang gyo byi râ nghut lhê; haû gi, Yhâng é hí má nga-nhúng a gyuq a kyum wó wâng râ matú nghut ri.

<sup>15</sup> Haû mù, nga-nhúng haî dung kôlhang, Yhang gyo byî é lé nga-nhúng sê é nghut le gi, Yhâng chyáng nga-nhúng dúng é hkyô lé, nga-nhúng wó yu é lé, nga-nhúng sê lhê.

<sup>16</sup> Ó yuq nghut kôle, yhumsing é gumang hpó mai shî a gíng é mara kut shut é lé, myang é nghut le gi, haû yuq é matú kyûdung byi râ lhê. Haû hkûn, Garai Gasang gi, haû yuq lé asak byi râ nghut lhê. Haû gi, shî a gíng é mara wó bâng é matú taî é nghut lhê. Shî gíng é mara le joq lhê; nghut kôlhang, hau é matú dung râ lhê nghû, ngò taî nyi é a nghut.

<sup>17</sup> A dingmán é hkyô lunglhang gi, mara nghut lhê; nghut kôlhang, shî a gíng é mara le joq lhê.

<sup>18</sup> Garai Gasâng chyáng mai hku kat bê sù ó yuq nghut kôle, mara a xoq kut lô é hkyô lé nga-nhúng sê lhê; hkâsu mù gâ le, haû Garai Gasâng é Yhangzo gi, haû yuq lé wú zúng nyi é nghut mù luî, haû agè ashop sù gi, haû yuq lé wó záng htung râ a nghut. <sup>19</sup> Nga-nhúng gi, Garai Gasâng é yhangzô pé nghut é lé le, mingkan gón lé haû agè ashop su èq up tô é hkyô lé le, sê lhê. <sup>20</sup> Hau htoq agó, Garai Gasâng é Yhangzo jé lé luî, haû tengmán Sù lé sé sháng gaq ga, nga-nhúng lé sê gyô é nyan byi bê hkyô lé le, nga-nhúng sê lhê. Nga-nhúng gi, Yhang Zo Yesuq Hkrisduq má nghut nyî bê eq rajung za, haû tengmán Sù má le nyi nyi bê nghut lhê. Yhang gi, haû tengmán é Garai Gasang eq ahtum abyuq é asak nghut nyi lhê.

<sup>21</sup> Chyitdap é zo wuî ê, hparà lhó pé lé koi pyâm nyi keq.

YOHAN  
Htang Dàm Hun Kat é Laiká  
(2 John)

<sup>1</sup> Ngò suwún hpó gi, tengmán hkyô má ngò chyitdap é, hkyin yù huí é nàng hpô-myhí eq nung zô pé lé, dang kyô kat lhê; ngò baú za a nghut, haù nga-nhùng chyáng lúng to luí, <sup>2</sup> nga-nhúng eq ahtum abyuq ru joq nyí rã nghut é tengmán hkyô é yanmai, haù tengmán hkyô lé sê é lhunghâng bang le, nungmoq lé chyitdap nyi lhê.

<sup>3</sup> Haù Îwa Garai Gasang eq Îwã é Yhangzo Yesuq Hkrisduq chyáng mã é jeju, shogyo nhikmyin hkyô eq nguínghón hkyô gi, haù tengmán hkyô eq chyitdap hkyô mã, nga-nhúng eq rahá joq nyi sháng gaq.

<sup>4</sup> Haù Îwa mai nga-nhúng lé hkunmó hkyô tô é eq rajung za, nung zô pé ra-am gi, haù tengmán hkyô mã châng nyi é hkyô lé, ngò wó sê é yanmai, gyai yhang gabú nyi lhê. <sup>5</sup> Chyitdap é hpô-myhí ê, nga-nhúng rayuq eq rayuq chyitdap lhum sháng nghú, ahkuí, ngò, nang lé dúng kat lhê; shí gi, sâng-hi mai nga-nhúng wó gyô yù bê hkunmó lé sheq, nang lé ngò ká byí kat é nghut lhê; hkunmó sik ralhum a nghut. <sup>6</sup> Yhang hkyô tô é hkunmó eq rajung za, nga-nhúng cháng kut é nghut jáng gi, chyitdap é hkyô nghut bê. Sâng-hi mai nungmoq wó gyô yù bê eq rajung za, Yhang hkyô tô é hkunmó gi, nungmoq chyitdap myit bo nyi rã matú nghut lhê.

<sup>7</sup> Hkâsu mù gã le, Yesuq Hkrisduq gi, gungsho đông jé lé é hkyô lé a yín yu é, mhaú zô é byù myo myo gi, mingkan htoq mã jón wún bekô nghut ri; haù sù é byù gi, haù mhaú zo sù eq anti-hkrisduq dut rã nghut lhê. <sup>8</sup> Nungmoq zui saí bê muzó é akyú lé a lhoq hpyuq é za, gumjup é shigyau chyunghuq lé, nungmoq wó hkam yù kó sháng gaq, yhumsing gùng sidiq nyi keq. <sup>9</sup> Hkrisduq mhoqshit é dang lé a châng é za, laí chyan é sù ó yuq nghut kôle, Garai Gasang lé a wó é sù nghut ri; haù mhoqshit é dang lé ru châng nyi é sù kúm gi, haù Îwa lé le, Yhangzo lé le, wó bê sù nghut ri. <sup>10</sup> Mhoqshit é dang haù lé a wun é byù rayuq yuq, nungmoq chyáng jé lé é nghut le gi, haù yuq lé nungmoq é yhúmhaú mã hkâwâng nhâng kó; yhang lé hkálhom xoq yù kó. <sup>11</sup> Hkâsu mù gã le, haù yuq lé lhom xoq yu é sù gi, yhâng é agè ashop é muzó mã lòm bê sù nghut ri.

<sup>12</sup> Ngò gi, nungmoq lé ká byí kat rã hkyô myo myo joq kôlhang, laiká hkyap eq kajung-chi lé a kãm chùng naù. Nga-nhúng é gabú hkyô wó gumjup sháng gaq, ngò, nungmoq chyáng tsuq za lé jé mù, nungmoq eq myoqdong hkyûm kut nyo lhum rã lé myit myoqbyu nyi lhê.

<sup>13</sup> Hkyin yù huí é náng nhã é yhangzô pé gi, nang lé shi-kyâm kat akô nghut ri.

## YOHAN Súm Dam Dàm Hun Kat é Laiká (3 John)

<sup>1</sup> Ngò suwún hpó gi, haù tengmán hkyô má ngò chyitdap é, ngá é chyitdap luzúm Ge-u lé dang kyô kat lhê.

<sup>2</sup> Chyitdap é luzúm hpó ê, ngò gi, haù náng é asak woi-nyí nyì-ngón yuqyo nyi é eq rajung za, nàng nguingón wángzán rà eq hkyô hkat hkangmó má, nyì-ngón yuqyo nyi sháng gaq nghû, kyûdung byí kat lhê. <sup>3</sup> Hkâsu mù gâ le, ngò gi, gumang wui ra-am, ngá chyáng lé jé mù, haù tengmán hkyô má nàng lhumzui é hkyô lé le, haù tengmán hkyô má nàng hkâsu kut xoq châng nyi é hkyô lé le, lé taí kyo kô é hkûn, gyai yhang gabú é yanmai nghut lhê. <sup>4</sup> Haù tengmán hkyô má, ngá zô pé châng nyi é hkyô lé, ngò wó gyô é hkûn gabú é í, gotû gabú hkyô a wó lo nghut ri.

<sup>5</sup> Chyitdap é luzúm hpó ê, haù gumang wui gi, mau we bíng pé nghut to kôlhang, nàng yhangmoq lé lhom garúm yu é hkyô má, nàng gi, lhumzui nyi ri. <sup>6</sup> Yhangmoq gi, haù noqkuq hpúng mâ é bang lé, náng é chyitdap myit eq séng luí taí kyo bekô nghut ri. Nàng gi, Garai Gasâng hí má gingdán é dông, yhangmoq é hkyowui matú garúm luí, dé kat é nghut jáng, ge é muzó jizó kut é nghut bê. <sup>7</sup> Hkâsu mù gâ le, yhangmoq gi, Hkrisduq é myìng hau é matú htoq ló kôluí, a lumjìng bâng chyáng mai haí lháng a hap yù kó nghut ri. <sup>8</sup> Haù mù luí, nga-nhúng gi, haù tengmán hkyô é matú rahá za wó chòm zui saí sháng gaq, haù sù é byu pé lé lhom hkûlum yù rà lhê.

<sup>9</sup> Ngò gi, haù noqkuq hpúng lé laiká ká byí kat bê nghut lhê; nghut kôlhang, haù ushuq kut nau é sù Diotrehpi gi, ngamoq lé a lhom hap yù nghut ri. <sup>10</sup> Haù mù luí, ngò lé jé jáng gi, ngamoq lé a jo a âng é dang taí é eq lumù gansang é, yhang kut é muzó lé, taí hpyí kyo rà nghut lhê; yhang gi, haù hkyô lé myit a dik shí é nghut mù luí, yhang yhang le gumang wui lé a lhom hkûlum yù, lhom hkûlum yù naù bang lé le, yhang mai hkûm zing pyám luí, yhangmoq lé haù noqkuq hpúng mai hkat htoq pyám ri.

<sup>11</sup> Chyitdap é luzúm hpó ê, agè ashop hkyô lé alik a yu é za, ge é hkyô lé yù aq; ge é hkyô kut é sù gi, Garai Gasâng chyáng mâ é nghut bê; agè ashop é hkyô kut é sù gi, Garai Gasang lé a myàng shí é sù nghut ri. <sup>12</sup> Demetri ge é hkyô lé, yuq hkangmó mai le, haù tengmán hkyô èq le, saksé hkám byí akô nghut ri; ngamoq le, yhang ge é hkyô lé saksé hkám byí lhê; haù ngamoq hkâm é saksé gi, têng é hkyô nghut é lé, nàng sê lhê.

<sup>13</sup> Ngò gi, nang lé kê kat ra hkyô myo myo joq kôlhang, kâjung eq kâjung-chi dông a kê kat naù lo. <sup>14</sup> Ngò gi, a myáng má, nàng eq myang huí lhum rà lé myit myoqbyu tô lhê. Haù hkûn sheq, ngá-nhik myoqdong hkyûm myang nyo lhum rà nghut lhê.

<sup>15</sup> Nàng nguingón yuqyo nyi sháng gaq; shí mâ é luzúm wui gi, nang lé shi-kyâm kat akô nghut ri. Nàng le, haù mâ é luzúm wui lé, myìng du htau luí bo shi-kyám byi laq.

## YUDE Hun Kat é Laiká (Jude)

<sup>1</sup> Yesuq Hkrisduq é dui-nhâng zoshâng nghut sù eq Yakuq é yhanggu, ngò Yude gi, haû Îwa Garai Gasâng èq ji yù mù, chyitdap é hui luí, Yesuq Hkrisduq èq upzúng é hui bâng chyáng dang kyô kat lhê.

<sup>2</sup> Shogyo nhikmyin hkyô, ngingón hkyô eq chyitdap hkyô gi, nungmoq chyáng agùn agó joq nyì sháng gaq ô!

### *Garai A Wó Bâng É Yubak Mara*

<sup>3</sup> Chyitdap é luzúm wuî ê, ngò gi, nga-nhúng chôm wó é hkyi yù hkyô haû eq séng luí, nungmoq lé gyai yhang kê kat byí nau é nghut lhê wá, haû sân-yúng bang lé, radá dâm jâng ap byí to bê nghut é lumjíng hkyo é matú nungmoq htuq htíng rã dut é lé, myit wum byi rã hkyô ká rã dut é lé, ngò byu-myang ri. <sup>4</sup> Hkâsu mù gâ le, haû mara dam byí é hui zo rã hkyô lé, a-nham pyat mai kê matsíng tô é hui bê bang ra-am gi, nungmoq chyáng hkaû wang lò bekô nghut ri. Yhangmoq gi, Garai a wó é bang nghut luí, haû nga-nhúng é Garai Gasâng jeju lé, mingkan ngón hkyo èq htaí lhik pyám kê é htoq agó, Yhang za nga-nhúng é Yhumsíng nghut sù eq Ahko ahkáng lhunglhang wó sù, Yesuq Hkrisduq lé he-ngik pyám akô nghut ri.

<sup>5</sup> Nungmoq kúm gi, shí pé banshoq lé sê to gù nghut kôlhang, ngò mai nungmoq lé taí pún nau é hkyô gi, a-ô mâ é pé nghut lhê: Haû gi, Yhumsíng Garai mai, Yhâng é byu pé lé, Egutuq ming mai hkyi htoq yù kôlhang, a lumjíng é bang lé gi, htâng má dum lhoq htên pyám é nghut lhê. <sup>6</sup> Hau htoq agó, haû yhumsíng é ayá lé tô pyám luí, yhumsíng é nyì jowò lé pyám tô é maumâng pé lé, Yhang gi, haû tarâ jéyáng é hui rã Buinyì mó jé shoq, ahtum abyuq é toqjâng tuí èq tui luí, mauchut hkaû má lhung tô é nghut lhê. <sup>7</sup> Haû eq rajung za, Sodom eq Gomoraq myuq eq hau é awui ayám mâ é wà pé mâ é bang gi, ashop é dông gungsho zùm yap é hkyô shut é eq myiwe yhangchang yuqgè yhangchang nyì zô lhúm é hkyô kut kê é nghut mù, yhangmoq gi, ahtum abyuq é myi má dam byí é hpuzo bâng é alik dut bekô nghut ri.

<sup>8</sup> Haû eq rajung za yhang, yhupmoq moq é byù shí bang gi, yhumsíng é gungsho lé agot a-û kut kômù, ahkáng ayá wó sù lé he-ngik pyám kôluí, mauhkúng bang lé lumù gansang akô nghut ri. <sup>9</sup> Nghut kôlhang, haû maumang lagyo agyì Mihkaelaq lhang gi, Mosheq é gùng eq séng luí, haû nat zau eq dang rhâng lhúm é hkún, yhang lé rhoi é dông mara hùn dang a wám taí é za, "Nang lé, haû Yhumsíng nhik-yo sháng gaq!" ga za taí ri. <sup>10</sup> Nghut kôlhang, byù haú bang gi, yhangmoq a sê gyô é hkyô pé lé rhoi dang taí pyám akô nghut ri; yhangmoq gi, haû myit woi-nyí a bo é dusak pé su, yhumsíng myit mai sê gyô é hkyô pé má lhang, yhumsíng gùng lé lhoq htên yu akô nghut ri.

<sup>11</sup> Yhangmoq gi, dingnyé wó rã! Hkâsu mù gâ le, yhangmoq gi, Ka-in\* kut é agè ashop é hkyô dông cháng kê é yanmai le, akyû wó rã matú, Balam† shut é dông bo shut kê é yanmai le, Kora‡ é gumlau toq hkyô kut kômù, yhang su htên byoq byuq é hui kê é yanmai le nghut ri.

<sup>12</sup> Yhangmoq gi, nungmoq é chyitdap zoshuq poí má nungmoq lé agot a-û wó dut nhang é bang nghut mù, gyuq hoq a bo é za, nungmoq eq rahá chôm zoshuq kê é hkún, yhumsíng gùng lé za yhumsíng lhoq gyí yu é sau zúng bang nghut akô; yhangmoq gi, lai èq mut tâng wún é, mau a bo é mhut pé su nghut é htoq agó, ashi a zui mù, amyit eq roq hpùn pyám luí, í dâm shi é, xung nám lhê é sigâm pé su nghut akô. <sup>13</sup> Yhangmoq gi,

\* 1:11 Ka-in gi, yhanggu lé sat sù nghut lhê. Apùn 4:1-8 † 1:11 Balam gi, myiqhtoi nghut lhê, nghut kôlhang, ngunzè lé myoqnoq mù, Garai lé shut sù nghut lhê. Gyung So 22:1-35 ‡ 1:11 Kora gi, Garaí byù nghut é hkyô-u shê sù Mosheq lé gumlau toq é hkyangjong nghut lhê. Gyung So 16:1-33

yhumsing é hoq jung lé, tsû-myup su htoq nhang é, haû wuimau mâ é kô é wuilhêng pé eq, tuq tuq chut é mauchut hkaû má tarâ jéyáng hui râ matú, ahtum abyuq tô to huí é, yông wún é kyî pé su nghut akô.

<sup>14</sup> Byù haû bang eq séng luî, Adam mai byùxik nyhit xik má nyi é Eruk, myiqhtoi htoi tô é gi, "Wú keq, haû Yhumsing gi, Yhâng é chyoiyúng bang mun mun sen sen eq rahá gyó lé lo nyi bê nghut ri. <sup>15</sup> Yhang gyó lé lo é gi, yuq hkgangmó lé tarâ jéyáng râ matú eq, haû tarâ a hkunggâ é lhunglhâng bang, tarâ a hkunggâ é dông kut é muzó pé banshoq lé le, tarâ a hkunggâ é yubak byu pé, Yhang lé taî shut é dang htân pé banshoq lé le, mara byi râ matú nghut lhê." gâ ri. <sup>16</sup> Byù haû bang gi, put dang taî é bang eq mara hûn dang taî é bang nghut akô; yhangmoq gi, yhumsing ô nau é agè ashop hkyô cháng kô é htoq agó, yhumsing gùng yhumsing nghutbûn é dang taî é eq yhumsing maiwáng zat é dông, góbang lé owaq é bang nghut akô.

#### *Hkam Jân Râ Hkyô*

<sup>17</sup> Nghut kôlhâng, ngò chyitdap é luzúm wuî ê, nungmoq gi, haû nga-nhûng é Yhumsing Yesuq Hkrisduq é lagyô pé mai te taî tô é dang lé, bûn nyi keq. <sup>18</sup> Hkâsu mù gâ le, yhangmoq gi, "Haû lô htâng é ahkyíng pé má, tarâ a hkunggâ é yhumsing ô nau é hkyô dông châng é, rhoijap-dap dang taî é byu pé nyi to râ nghut lhê." ga, nungmoq lé taî wú kô é nghut lhê. <sup>19</sup> Byù haû bang gi, nungmoq lé gam hkoq é bang, mingkan hkyô lé baú za châng é bang, haû Woi-nyí a bo é bang nghut akô.

<sup>20</sup> Nghut kôlhâng, ngò chyitdap é luzúm wuî ê, nungmoq gi, haû Chyoiyúng Woi-nyí má kyûdûng é dông, nungmoq é chyoiyúng é lumjínng hkyô má, yhumsing gùng yhumsing lhoq kô yu nyi keq. <sup>21</sup> Ahtum abyuq é asak lé wó yû râ matú, haû nga-nhûng é Yhumsing Yesuq Hkrisduq é shogyo nhikmyin hkyô lé láng uchyang, nungmoq gi, Garai Gasâng é chyitdap myit má, yhumsing gùng yhumsing nyi nyi keq.

<sup>22</sup> Lumjínng hkyô má úng-âng é bang lé, shogyo nhikmyin nyi keq; <sup>23</sup> góbang lé gi, myi mai she htoq yû mù, hkyi yû keq; dum, góbang lé gi, sidiq myit èq shogyo nhikmyin hkyô tân shit mù, haû gungshô é achaq achyut dap é yhangmoq é mebu lé chaq nyi keq.

#### *Hkya-on Kungtôn Dang*

<sup>24-25</sup> Nungmoq lé, a lingbat shoq wó upzúng luî, nungmoq lé, mara hûn râ hkyô a bo é za, gabú dik é dông mai Yhang é hpungwup shingkang bo é myoq hí má wó shuí shit é, nga-nhûng é hkyi yû Sû, rayuq za nghut é Garai Gasâng chyáng, hpungwup shingkang, hkikhkam hkyô, hpungwup a-tsam eq ahkáng ayá gi, nga-nhûng é Yhumsing Yesuq Hkrisduq dông mai, láì lò bê ipyat pé má le, ahkuí pyat má le, pyat dedu ahtum abyuq má le, rujoq nyi sháng gaq ô! Amen.

## YOHAN É SHING-RÁN Laiká (Revelation)

### *Dang-hi Hpóng*

<sup>1</sup> Yesuq Hkrisduq é shing-rán shî gi, adê myáng má dut lò râ hkyô pé lé, Yhâng é dui-nhâng zoshâng wui lé tân shit nhâng râ matú, Garai Gasâng eq Yesuq Hkrisduq Yhang lé byî tô é nghut lhê. Yhang gi, Yhâng é maumang lagyo lé nhang kat luî, Yhâng é dui-nhâng zoshâng Yohan lé, shing-rán haû sé nhang ri. <sup>2</sup> Yohan gi, Garai Gasâng é mungdang eq Yesuq Hkrisduq é saksé lé, yhang myang é gû banshoq eq rajung za saksé hkâm kyô é nghut ri. <sup>3</sup> Haû ahkyíng gi, chyâng lò bê nghut é yanmai, myiqhtoi dang shí pé lé, nghap kyô é sù eq, gyô yù luî, haû má kê tô é gû lé châng kut é bang gi, hkungsô wó nyi akò.

### *Noqkuq Hpúng Nyhit Lhum Lé Dang Kyô Kat É Hkyô*

<sup>4</sup> Ngò Yohan gi, Asia mau mâ é noqkuq hpúng nyhit lhum lé dang kyô kat lhê. Ahkui pyat le, a-nham pyat le, htang pyat má le rû nyi nyi é Su chyáng mai le, Yhâng é hkohkâm-tanghkuq hí mâ é nyhit woi-nyí chyáng mai le, <sup>5</sup> lhumzuí é saksé nghut sù, shi byuq é mai sâng-hi dui toq é zomún dut sù, myidàm htoq mâ é hkohkam pé lé up sù, Yesuq Hkrisduq chyáng mai le, jeju eq nguingón hkyô gi, nungmoq chyáng joq nyí sháng gaq.

Nga-nhúng lé chyitdap luî, Yhâng é suí eq, nga-nhúng lé, nga-nhúng é mara pé mai lhoq lhut byí é eq, <sup>6</sup> Yhâng é Garai Gasang eq Iwa lé dojaú râ matú, nga-nhúng lé, mingdán byu pé eq hkyangjông pé\* dut nhang é Su chyáng, duqwup shingkanq eq hpungwup a-tsam gi, pyat dedu ahtum abyuq ru joq nyí sháng gaq ô! Amen.

<sup>7</sup> Wú keq, Yhang gi, mhut mai lé lo nyi é nghut luî, myoqjí hkangmó gi, Yhang lé myàng kó râ nghut lhê;

haû Yhang lé htaû rot bang† lháng, myàng kó râ nghut lhê;

haû myidàm htoq mâ é byù lhunglhâng bang gi, Yhâng é yanmai, yón ngau é hui zo kó râ nghut lhê.

Haû đông nghut sháng gaq! Amen.

<sup>8</sup> "Ngò gi, Alhpa eq Omega‡ nghut lhê. Ahkui pyat le, a-nham pyat le, htang pyat má le rû nyi nyi é, wum-o a-tsam dik shoq bò Sù nghut lhê." ga, haû Yhumsîng Garai Gasang tâi ri.

### *Byu Yhangzo Su Dut Su É Hkyô*

<sup>9</sup> Yesuq é, wuîhke jamjau hkyô má le, mingdán má le, jân shirang é hkyô má le, nungmoq é byinzùm nghut sù, ngò nungmoq é gumang hpó, Yohan gi, Garai Gasâng é mungdang eq Yesuq é saksê é yanmai, Patmo zinlóng má nyi nyi é nghut lhê. <sup>10</sup> Haû Yhumsîng é Buinyì§ má, ngò gi, Woi-nyí eq shuî moq byuq ló é nghut mù, "Nàng myang é eq rajung za, chyúmding ralhumm má ká luî, Ehpesu, Samurna, Pergamu, Htuatira, Sardi, Hpiladehpi eq Ladoki wà pé má joq é, <sup>11</sup> noqkuq hpúng nyhit lhûm chyáng hun kat aq." ga, tut htê su gâ é htê mó, ngá é nunghtáng má mying é lé, ngò wó gyô ri.

<sup>12</sup> Haû ngo lé nyo nyi é htê yhumsîng lé wú râ matú, ngò, gùng lhing kat é nghut lhê. Ngò gi, gùng lhing kat é hkûn, hîng myi-kok tsungjang nyhit lhum lé le, <sup>13</sup> myi-kok tsungjang haû pê é agùng má, byu yhangzo su dut é Sù rayuq nyi tô é lé le, myang kat ri; haû yuq gi, hkyigoq htoq jé é buhîng wut to luî, wànggàng má hîng wànggò le wut tô ri. <sup>14</sup> Yhâng é ulhum eq xâm gi, sau hpyû maú eq gyo su hpyu zan tô ri; Yhâng é myoqjí gi, myishâm su duq nyi ri. <sup>15</sup> Yhâng é hkyî gi, myi bungghkyûng má jên yu é jet é gyi su

\* 1:6 Htoq Lô 19:6 † 1:7 Htau rot bang gâ é gi, Yesuq tapzîng má jén to huí é hkûn, Yhâng é namcham má lham eq htaû é bang lé gâ lhê. ‡ 1:8 Alhpa eq Omega gi, Grik laiká myhí mâ é sâng-hî cham eq ló htâng cham nghut lhê; haû táí nau é gi, rû dui nyi sù gâ é nghut lhê. § 1:10 Yhumsîng é Buinyì gâ é gi, yuban nyi lé gâ lhê.



dut ri; Yhâng é htê gi, wuì myo myo mying hûm é htê su gâ ri. <sup>16</sup> Yhâng é loqyo loq má gi, kyî nyhit cham chung tô ri; Yhâng é nhut mai gi, shamsó í shut dap é shâm htoq lo ri. Yhâng é myoqdong gi, htan dik é nyí gûng buì su tso nyi ri.

<sup>17</sup> Yhang lé myang é hkûn, ngò gi, shî gùng su, Yhâng é hkyî wang má lêng leq tô é nghut lhê. Haú hkûn, Yhang gi, Yhâng é loqyo loq ngá ahtoq má ke byi mù, taí é gi, "Hkâgyuq, Ngò gi, Sâng-hi eq Jihtûm nghut lhê. <sup>18</sup> Ngò gi, dui nyi Sû le nghut lhê; Ngò gi, shî bê nghut kôle, wú keq, pyat dedu ahtum abyuq dui nyi é nghut lhê! Hau htoq agó, Ngò gi, shî hkyô eq momîng é zoqshi pé lé chûng Su nghut lhê.

<sup>19</sup> Haú mù, nàng myang é lé le, ahkui dut é hkyô eq htàngnùng le dut lò râ hkyô lé le, kê to aq. <sup>20</sup> Nàng myang é, Ngá é loqyo loq mâ é kyî nyhit cham eq hîng myi-kok tsungjang nyhit lhûm é záu tô é hkyo é lichyúm gi, isu nghut lhê. Kyî nyhit cham gi, noqkuq hpúng nyhit lhûm é maumang lagyo nyhit yuq nghut ri; myi-kok tsungjang nyhit lhûm gi, noqkuq hpúng nyhit lhûm nghut ri.

## 2

### *Ehpesu Myuq Mâ É Noqkuq Hpúng Lé Kâ Kat É Laiká*

<sup>1</sup> Ehpesu myuq mâ é noqkuq hpúng é maumang lagyo lé isu nghû kê kat aq:

Haú yhâng é loqyo loq má kyî nyhit cham chûng luí, hîng myi-kok tsungjang nyhit lhûm é gyoro má sô nyi Su é dang gi, <sup>2</sup> 'Ngò gi, náng é a-kyang, nàng shikut é hkyô, nàng hkam jân é hkyô pé lé, sê lhê. Agè ashop é byu pé lé, nàng a jân pyâm é hkyô lé le, haú lagyo a nghut kôlhang, lagyo pé nghut lhê gâ é bang lé, nàng chyam wú mù, yhangmoq lagyo apyoq pé nghut é lé wó sê yù kê é hkyô lé le, Ngò sê lhê. <sup>3</sup> Nàng gi, shikut shirâng bê nghut é htoq agó, Ngá mying é yanmai, wuîhke hkyô lé hkam jan bê nghut kôle, ngú byuq é hkyô a bò nghut ri.

<sup>4</sup> Nghut kôlhang, nàng gi, náng é sâng-hi lhê é chyitdap myit lé tô pyâm é yanmai, ngò, nang lé mara hûn râ hkyô joq ri. <sup>5</sup> Nàng hká mai byit gyó é lé, myit bun aq! Myit lîng luí, sâng-hi nàng kut é muzó pé lé, kut aq. Nàng myit a lîng é nghut jáng, ngò, náng chyáng lé jé mù, náng é myi-kok tsungjang lé, hau é jowò mai huí pyám byi râ nghut lhê. <sup>6</sup> Nghut kôlhang, Ngò a jú é, Nikola é chángzô pé kut é hkyô lé, nàng le a jú kut é yanmai, náng chyáng ge é hkyô ralhûm bo ashî nghut ri.

<sup>7</sup> Gyo râ nohkyap dap sù gi, haú Woi-nyí mai noqkuq hpúng pé lé taí é hkyô lé, gyó yù sháng gaq. Wó ung é sù lé gi, haú Garai Gasâng é hparadisu má joq é asak sigâm mâ é ashi zo râ ahkáng, Ngò byi râ nghut lhê.' gâ ri.

### *Samurna Myuq Mâ É Noqkuq Hpúng Lé Kâ Kat É Laiká*

<sup>8</sup> Samurna myuq mâ é noqkuq hpúng é maumang lagyo lé isu nghû kê kat aq:

Haú Sâng-hi eq Jihtûm nghut é eq, shi byuq luí, asak dum dui Su é dang gi, <sup>9</sup> 'Nàng hui zô é wuîhke jamjau hkyô eq nàng myung é hkyô lé, Ngò sê lhê; nghut kôlhang, nàng gi, wó sù nghut ri! Tsadán é tarajong bang nghut to luí, Yudaq byu pé a nghut kôlhang, Yudaq byù nghut lhê gâ é bang taí hpoí é hkyô lé le, Ngò sê lhê. <sup>10</sup> Nàng hui zo râ nghut é wuîhke hkyô lé, hkâgyuq. Ngò, nungmoq lé taí kyo kôlé, haú nat Tsadán gi, nungmoq lé chyam wú é dông, nungmoq chyáng mâ é ra-am lé, htóng má hkyô pyám râ nghut lhê; hau htàng, nungmoq gi, raxé nyí tup zing-rí é hui zo kó râ nghut lhê. Shî shoq lhûmzúí nyi aq, haú hkûn, Ngò, nang lé, asak janmaú byi râ nghut lhê.

<sup>11</sup> Gyo râ nohkyap dap sù gi, haú Woi-nyí mai noqkuq hpúng pé lé taí é hkyô lé, gyó yù sháng gaq. Í dâm nghû râ shi é hkyô\* gi, wó ung é sù lé, wó záng htung râ a nghut.' gâ ri.

### *Pergamu Myuq Mâ É Noqkuq Hpúng Lé Kâ Kat É Laiká*

<sup>12</sup> Pergamu myuq mâ é noqkuq hpúng é maumang lagyo lé isu nghû kê kat aq:

\* 2:11 Í dâm nghû râ shi é hkyô gâ é gi, ngaraí ming wang é lé gâ lhê.

Haû shamsó í shut dap é sâm wó Su é dang gi, <sup>13</sup> 'Nàng nyi é jowò lé, Ngò sê lhê; haû gi, Tsadán é hkohkâm-tanghkuq joq é jang nghut ri. Nghut kôlhang, nàng gi, Ngá myîng má lumhkau nyi é nghut luî, Tsadán nyi é jang nghut é nungmoq é myuq má, Ngá é lhumzuî é saksé hpó Antipa sat huî é hkûn lhang, nàng Ngo lé lumjîng é hkyô lé, a he-ngik pyám nghut ri.

<sup>14</sup> Nghut kôlhang, Ngò, nang lé mara hûn râ hkyô ratsuí joq ashî; hkâsu mù gâ le, hparà lhô pé lé tîng byî é zoshuq zô é eq, ashop é đông gungsho zùm yap é mara kut shut râ matú, Israelaq byu pé lé mhoq hpyoq râ hpaqchyî, Balak lé mhoq byî é Balam é mhoqshit hkyô lé myhik zing é byu pé, náng chyáng nyi ri. <sup>15</sup> Haû eq rajung za, haû Nikola é chángzô pé mhoqshit é hkyô lé myhik zing é byu pé le, náng chyáng nyi ri. <sup>16</sup> Haû mù luî, myit lîng aq! Haû a nghut jáng, Ngò gi, náng chyáng hân jé lé mù, haû Ngá nhut mai htoq é sham èq yhangmoq lé zan râ nghut lhê.

<sup>17</sup> Gyo râ nohkyap dap sù gi, haû Woi-nyí mai noqkuq hpûng pé lé taí é hkyô lé, gyô yù sháng gaq. Wó ung é sù lé gi, haq tô é mannaq muk lé le, myîng asik kê tô é luqgok hpyû racham lé le, Ngò byi râ nghut lhê, lhom hap yu é sù za sheq, myîng haû lé sé râ nghut lhê.' gâ ri.

#### *Htuatira Myuq Mã É Noqkuq Hpûng Lé Kâ Kat É Laiká*

<sup>18</sup> Htuatira myuq mã é noqkuq hpûng é maumang lagyo lé isu nghû kê kat aq:

Haû myishâm su duq nyi é myoqjí eq jet é gyi su dut é hkyô dap é Sû, Garai Gasâng é Yhangzô é dang gi, <sup>19</sup> 'Náng é a-kyang, chyitdap myit, lumjîng myit, dojaú é hkyô, hkam jân é hkyô pé lé le, nàng gi, hí lhê htoq má ahkuî je myô zui saí é hkyô lé le, Ngò sê lhê.

<sup>20</sup> Nghut kôlhang, yhumsing gùng yhumsîng myiqhtoi myhí nghut lhê gâ é myiwe Yezebulaq lé, nàng nyi nhang tô é yanmai, Ngò, nang lé mara hûn râ hkyô joq ri. Yhang gi, Ngá é dui-nhâng zoshâng wuî lé, ashop é đông gungsho zùm yap râ eq hparà lhô pé lé tîng byî é zoshuq zo râ hkyô lé mhoqshit luî, yhangmoq lé hkyô shuî nghoq ri.

<sup>21</sup> Ngò gi, yhang lé, ashop é đông gungsho zùm yap é hkyô mai myit lîng râ ahkyîng byi kôlhang, yhang gi, a myit lîng nàu nghut ri. <sup>22</sup> Haû mù, Ngò gi, yhang lé, jamjau hui râ yhupchong má dú lheq pyám râ nghut é htoq agó, yhang eq su-myi sulàng lú hkyô kut é bang, yhangmoq kut é hkyô lé myit lîng kê é za a nghut jáng, wuîhke jamjau mó hui zo nhâng râ nghut lhê. <sup>23</sup> Ngò gi, yhang zô pé lé sat pyám râ nghut lhê; haû hkûn, Ngò gi, myit nhiklhum eq myit é hkyô lé sé Sû nghut é lé le, nungmoq kut é muzó eq rajung za, nungmoq yuq hkanmó lé, Ngò tau byi râ nghut é lé le, haû noqkuq hpûng pé banshoq wó sé kó râ nghut lhê. <sup>24</sup> Mhoqshit hkyô haû lé a châng é eq Tsadán é nik é hkyô lhaq gâ é lé a mhoq yu é, Htuatira myuq má myit gyô tô é bang nungmoq lé, Ngò taí kôlé, nungmoq lé gotû wòlai Ngò jat byi râ a nghut. <sup>25</sup> Ngò jé lé é jé shoq, nungmoq wó tô é lé za myhik zing nyi keq.

<sup>26-27</sup> Wó ung é eq Ngò ô nau é hkyô lé jîhtûm jé shoq châng é sù lé gi,

"Yhang gi, yhangmoq lé, shamtoq dumbáng èq up† râ nghut lhê;

Yhang gi, tso-au hkoq pé lé su, yhangmoq lé bat hkyop pyám râ nghut lhê."☆

gâ tô é eq rajung za, Ngò, Ngá Wâ chyáng mai ahko ahkáng wó yu é su, mingdán pé lé up râ ahko ahkáng, Ngò byi râ nghut lhê. <sup>28</sup> Ngò gi, yhang lé, haû bó-myhû byi râ nghut lhê. <sup>29</sup> Gyo râ nohkyap dap sù gi, haû Woi-nyí mai noqkuq hpûng pé lé taí é hkyô lé, gyô yù sháng gaq.' gâ ri.

### 3

#### *Sardi Myuq Mã É Noqkuq Hpûng Lé Kâ Kat É Laiká*

<sup>1</sup> Sardi myuq mã é noqkuq hpûng é maumang lagyo lé isu nghû kê kat aq:

† 2:26-27 Shamtoq dumbáng èq up gâ é gi, ahko ahkáng banshoq wó luî, up é lé gâ lhê. ☆ 2:26-27 Hkyá-on 2:9

Haù Garai Gasâng é woi-nyí nyhit woi-nyí eq kyî nyhit cham lé chûng Su é dang gi, 'Ngò gi, náng é a-kyang lé sê lhê; nàng gi, asak dui nyí sù ga kôlhang, shi byuq sù nghut ri. <sup>2</sup> Gyîng lò aq! Myit gyó tô é, shi byuq râ za nghut é pé lé, wum-o lhoq kîng yù aq; hkâsu mù gà le, Ngá é Garai Gasâng é hí má, náng é a-kyang a gumjup é hkyô lé, Ngò myang ri. <sup>3</sup> Haù mù, nàng hkâsu kut wó hap yu é eq wó gyô yu é hkyô lé, myit bun aq; haù dông cháng luí, myit lhîng aq. Nàng a bûn gyîng é nghut le gi, Ngò hkau sù su lé râ nghut luí, nàng gi, Ngò hká u lé râ lé, sé râ a nghut.

<sup>4</sup> Nghut kôlhang, Sardi myuq má, yhumsing é mebu lé agot a-û a kut é byù ra-am nyi akô. Haù bang gi, hpyu é mebu wut luí, Ngò eq rahá sô wún kó râ nghut lhê; hkâsu mù gà le, yhangmoq gi, gîngdán é bang nghut akô. <sup>5</sup> Wó ung é sù gi, haù bang su, hpyu é mebu myang wut râ nghut lhê. Ngò gi, haù yuq é myîng lé, hkâ-nhám le, asak jihpán laiká buk mai yu pyám râ a nghut; hau htoq agó, Ngá Wâ é hí má le, Yhâng é maumang lagyô pê é hí má le, haù yuq é myîng lé, Ngò yín yû râ nghut lhê. <sup>6</sup> Gyo râ nohkyap dap sù gi, haù Woi-nyí mai noqkuq hpûng pé lé taí é hkyô lé, gyô yù sháng gaq.' gâ ri.

#### *Hpiladehpi Myuq Mã É Noqkuq Hpûng Lé Kâ Kat É Laiká*

<sup>7</sup> Hpiladehpi myuq mã é noqkuq hpûng é maumang lagyo lé isu nghû kâ kat aq:

Haù chyoyúng é eq tengmán é, Dawiq hkohkam é zoqshi chung é, ó yuq le a wó myhi loshoq hpông é eq, ó yuq le a wó hpóng loshoq myhî é Su é dang gi, <sup>8</sup> 'Nàng kut é muzó pé lé, Ngò sê lhê. Wú aq, ó yuq le a wó myhî é hkum rallum, Ngò náng hí má hpông to byí lhê. Nàng gi, wum-o ratsuí za bò kôlhang, Ngá é dang gyo luí, Ngá é myîng lé a he-ngik pyâm é hkyô lé, Ngò sê lhê. <sup>9</sup> Haù tarajong má noqkuq kôlhang, Tsadán lé dojaú bang nghut é, Yudaq byù a nghut kôlhang, nghut lhê gà é byù mhaù pé lé, Ngò, náng é hkyî wang má, lé paí gop nhâng luí, Ngò, nàng lé chyitdap é hkyô, yhangmoq lé sé nhâng râ nghut lhê. <sup>10</sup> Nàng gi, myit hîng hîng hkam jan râ é Ngá é hkunmó lé châng nyi bê nghut é yanmai, myidàm htoq má nyi é bang lé chyam lik wú râ matú, mingkan gón má jé râ nghut é wuîhke jamjau ahkyíng mai, Ngò, nang lé lhoq lhut yû râ nghut lhê.

<sup>11</sup> Ngò gi, a myáng má jé lé lô râ nghut lhê. Náng é janmaú lé, ó yuq eq le a wó yu pyám byi sháng gaq, nàng wó tô é pé lé myhik zing nyi aq. <sup>12</sup> Wó ung é sù lé gi, Ngá é Garai Gasâng é noqkuq yhûm mã é hkungzing mó dut nhâng râ nghut lhê. Haù yuq gi, hkâ-nhám le haù mai dum htoq lô râ a nghut. Ngò gi, Ngá é Garai Gasâng é myîng lé le, Ngá é Garai Gasâng chyáng mai htoq luí, mauhkûng mai gyó lé lo é, Yerusalem wà mó Asik ga é, Ngá é Garai Gasâng é myuq myîng lé le, Ngá é myîng sik lé le, yhâng chyáng kê tap byi râ nghut lhê. <sup>13</sup> Gyo râ nohkyap dap sù gi, haù Woi-nyí mai noqkuq hpûng pé lé taí é hkyô lé, gyô yù sháng gaq.' gâ ri.

#### *Ladoki Myuq Mã É Noqkuq Hpûng Lé Kâ Kat É Laiká*

<sup>14</sup> Ladoki wà mó mã é noqkuq hpûng é maumang lagyo lé isu nghû kâ kat aq:

Haù lhumzui é eq tengmán é saksé nghut é, Garai Gasang hpan tô é lé up é, Amen gá Su é dang gi, <sup>15</sup> 'Ngò gi, nàng kut é muzó lé sê lhê; nàng gi, gú le a nghut, nye le a nghut dut ri. Nàng gi, gú jáng jâng gú, nye jáng jâng nye dut râ lé, Ngò ô nau ri. <sup>16</sup> Nghut kôlhang, nàng gi, gú le a nghut, nye lé a nghut, lumnye nghut é yanmai, Ngò gi, nang lé, Ngá é nhut mai byé htoq pyám râ za nghut bê. <sup>17</sup> "Ngò gi, wó sù nghut lhê; ngò gi, sutzê gyai wó bê nghut luí, haí lháng a ra lo." ga nàng taí ri. Nghut kôlhang, nàng gi, wuîhke jamjau hui sù, asho awui dut sù, myûng sù, myoqjit sù eq achîn dut sù nghut é lé, nàng a sé myhi-nhung. <sup>18</sup> Haù mù luí, nàng gi, wó sù sùt sù wó dut sháng gaq, myi má jên yu é hîng lé le, nàng achîn dut é hoq hpu hkyô lé, wó nghop pyám sháng gaq, wut râ matú, mebu hpyû lé le, nàng myoq wó myâng sháng gaq, náng é myoqjí má kat râ matú, myoq chi lé le, nàng, Ngá chyáng mai wui yù râ matú, Ngò, nang lé hpaqchyî byí lhê.

<sup>19</sup> Ngò chyitdap é bang lé gi, tan luí, mhoqshit lhê. Haù mù, nàng gi, hân bûn gying luí, myit lhîng aq. <sup>20</sup> Wú aq! Ngò gi, hkum yâm má yap to luí, hkum lé kok nyi lhê.

Rayuq yuq, Ngá é htê lé wó gyo luí, hkum hpóng byí é nghut jáng, Ngò gi, wàng mù, haú yuq eq rahá zo shuq râ nghut lhê; haú yuq le, Ngò eq rahá zo shuq râ nghut lhê.

<sup>21</sup> Ngò gi, ùng luí, Ngá Wa eq rahá Yhâng é hkohkâm-tanghkuq má zung é eq rajung za, wó ung é sù lé gi, Ngò eq rahá Ngá é hkohkâm-tanghkuq má zùng râ ahkáng, Ngò byi râ nghut lhê. <sup>22</sup> Gyo râ nohkyap dap é sù gi, haú Woi-nyí mai noqkuq hpúng pé lé taí é hkyô lé, gyô yù sháng gaq.' gâ é nghut ri." gâ ri.

## 4

*Mauhkûng Htoq Má Hkohkâm-tanghkuq Joq É Hkyô*

<sup>1</sup> Hau htâng má, ngò wú kat le, mauhkûng má hkum ralhum bóng tô é lé myang ri. Ngò sâng-hî dàm wó gyô é tut htê su gâ é danghtê ngo lé taí é gi, "Shî má doq lò aq, htângnùng má dut lò râ hkyô pé lé, Ngò, nang lé tân shit bá." gâ ri. <sup>2</sup> Haú hkûn jáng yhang, ngò gi, Woi-nyí má moq byuq ló luí, mauhkûng htoq má hkohkâm-tanghkuq ralhum joq é lé myàng ri; tanghkuq haú má, byù rayuq zung tô ri. <sup>3</sup> Haú má zung to Su é isâm gi, huhpé eq ne yúng lungsêng su dut ri. Huí nyuì lungsêng su dut é woqgan síng-yang gi, haú hkohkâm-tanghkuq má hkông lhîng tô ri. <sup>4</sup> Hkohkâm-tanghkuq hau é lhînghkyuq má, hkohkâm-tanghkuq gotû í xe myí lhum le joq to luí, hpyu é mebu wut mù, ulhum má hîng janmaú tsûng tô é suwún í xe myi yuq gi, haú má zung tô bum akô. <sup>5</sup> Haú hkohkâm-tanghkuq mai, lhap hpyat é, mying hûm é eq maugum gûm é pé dut htoq lo ri. Haú hkohkâm-tanghkuq hí má, myi-kok nyhit lhum le duq tô ri; haú pé gi, Garai Gasâng é woi-nyí nyhit woi-nyí nghut ri. <sup>6</sup> Hau htoq agó, san zâ é myoqjàm su dut mâ é wuì-nhông le, haú hkohkâm-tanghkuq hí má dîng tô ri.

Haú hkohkâm-tanghkuq agùng má le, lhînghkyuq má le, hî-u nunghtáng lhînghkyuq myoqjí dap é dui é dusak myí du nyi tô ri. <sup>7</sup> Dui é dusak sâng-hî du gi, hkanghkyi su dut ri; í du nghû râ du gi, nohtó su dut ri; sûm du nghû râ dû é myoqdong gi, byu myoqdong su dut ri; myí du nghû râ du gi, dâng wún é zunbung su dut ri. <sup>8</sup> Dui é dusak myí du haú gi, du hkangmó dùng hkyuq lhum dap é htoq agó, lhînghkyuq má myoqjí kôm dap luí, dùng hkaú má lhang dap ri. Yhangmoq, nyí myín hkâ-nhám a no loshoq taí nyi kô é gi,

"A-nham pyat le, ahkuí pyat le, htang pyat má le, rû nyi nyi é, haú wum-o a-tsam dik shoq bò Sû Yhumsîng Garai Gasang gi, chyoiyúng, chyoiyúng, chyoiyúng nyi ri."

gâ akô. <sup>9</sup> Haú dui é dusak myí du gi, hkohkâm-tanghkuq má zung é, pyat dedu ahtum abyuq dui nyi Su chyáng, hpungwup shingkang, aróng eq jeju bun hkyô byí é hkangmó, <sup>10</sup> haú suwún í xe myi yuq gi, hkohkâm-tanghkuq má zung é, pyat dedu ahtum abyuq dui nyi Su é hí má, ngóm gop luí, Yhang lé noqkuq akô. Yhangmoq gi, yhangmoq é hkohkâm-janmaú lé, haú hkohkâm-tanghkuq hí má hkyut to mù, taí kô é gi,

<sup>11</sup> "Ngamoq é Yhumsîng eq Garai Gasang ê, nyi mi-nyì, joq mijoq lé, Nàng hpan to bê nghut luí,

haú pé gi, Nàng ô nau é dông hpan tô é hui bê nghut mù, nyi to joq tô bùm bê nghut é yanmai,

Nàng gi, hpungwup shingkang, aróng eq hpungwup a-tsam lé, hap yù gíng Sû nghut ri." gâ akô.

## 5

*Chyúmding Eq Sauzo*

<sup>1</sup> Hau htâng, ngò gi, hkohkâm-tanghkuq má zung to Su é loqyo loq má, í shut é laiká kâ to é, dizik nyhit lhum tap tô é chyúmding le myang ri. <sup>2</sup> Hau htoq agó, a-tsam mó bo é maumang lagyo rayuq gi, "Haú dizik pé lé hî pyám râ eq chyúmding lé hpóng râ gi, ó yuq wá gingdán lhê lhú?" ga luí, htê mó èq wut taí nyi é lé le, ngò myang ri. <sup>3</sup> Nghut kôlhang, mauhkûng htoq má le, myigùng htoq má le, myigùng ô má le, haú chyúmding lé wó hpóng râ eq ahkaú má wó wú râ byù rayuq lhang a nyi nghut ri. <sup>4</sup> Haú chyúmding

lé hpóng mù, ahkaû má wú râ gingdán é byù rayuq hkâlháng a nyi é yanmai, ngò gyai yhang ngau pyâm é nghut lhê. <sup>5</sup> Haû hkûn, haû suwún wuî mâ é rayuq, ngo lé taî é gi, "Hkâ-ngaû! Wú aq, haû Yudaq byuhú mâ é Hkanghkyi nghu é, haû Dawiq é Amyit nghut Sû gi, ûng bê nghut luî, haû chyúmding eq haú mâ é dizik nyhit lhum lé wó hpông lhê." gâ ri.

<sup>6</sup> Hau htâng, haû dui é dusak myî du eq suwún wui é agùng mâ é, hkohkâm-tanghkuq agùng má, sat hui bê su dut é Sauzo radu yap tô é lé, ngò myang ri. Sauzo haû gi, hkyuî nyhit lhum eq myoqjí nyhit lhum dap ri. Myoqjí haû nyhit lhum gi, myidàm htoq gón má nhang htoq kat é, Garai Gasâng é woi-nyí nyhit woi-nyí nghut ri. <sup>7</sup> Haû Sauzo gi, lé mù, hkohkâm-tanghkuq má zung to Su é loqyò mâ é chyúmding lé yu ri. <sup>8</sup> Haû chyúmding lé yu é hkûn jáng, haû dui é dusak myî du eq suwún í xe myi yuq gi, Sauzô é hí má ngóm gop akô. Yhangmoq yuq hkangmó gi, tíng eq sân-yúng bâng é kyúdung dang gâ é namngón jung byíng mui tô é hîng góm pé le chung bum akô nghut ri. <sup>9</sup> Yhangmoq gi, "Nàng gi, haû chyúmding lé yù râ eq hau é dizik pé lé hpóng râ gingdán Sû nghut ri. Haî mù gâ le, Nàng gi, sat hui bê nghut luî, byuhú hkangmó mai le, myíng hkangmó mai

le,  
byù myû hkangmó mai le, mingdán hkangmó mai le, Garai Gasâng é matú,

Náng é suî eq byù pé lé wui hpyit yû bê nghut ri.

<sup>10</sup> Nga-nhúng é Garai Gasang lé dojaú râ matú, Nàng gi, yhangmoq lé, mingdán byu pé eq hkyangiông pé dut nhâng bê nghut luî, yhangmoq gi, myidàm htoq má up kó râ nghut lhê." ga luî, mahkôn sik ralhum hkon akô nghut ri.

<sup>11</sup> Haú hkûn, ngò wú kat le, haû hkohkâm-tanghkuq lhîngghyuy má le, dui é dusak pé eq suwún wui é lhîngghyuy má le, nyi tô bum é maumang lagyo ajùm ayò mun mun sen sên é htê lé wó gyô ri. <sup>12</sup> Yhangmoq gi, "Haû sat hui bê Sauzo gi, hpungwup a-tsam, sutzè, hpaqchyî byéng-yá, wum-o, aróng sitang,

hpungwup shingkang eq hkyá-on kungtôn hkyô lé, hap yù gíng ri." ga luî, htê mó eq ton bum akô nghut ri.

<sup>13</sup> Hau htoq agó, mauhkûng htoq má nyi é, myigùng htoq má nyi é, myigùng ô má nyi é, wuiming má nyi é, hpan to huî é lhunglháng gi, "Hkyá-on kungtôn hkyô, aróng sitang, hpungwup shingkang eq hpungwup a-tsam gi, haû hkohkâm-tanghkuq má zung tô é Sû eq Sauzô chyáng, pyat dedu ahtum abyuy ru joq nyî sháng gaq ô!" ga luî, ton nyi bùm kô é lé, ngò wó gyô ri. <sup>14</sup> Haû dui é dusak myî du gi, "Amen" ga tai jang, haû suwún wuî gi, ngóm gop luî noqkuq akô nghut ri.

## 6

### *Dizik Nyhit Lhâm É Hkyô*

<sup>1</sup> Haû Sauzo gi, dizik nyhit lhum mâ é sânghí lhum lé hpông kat é hkûn, ngò myang é nghut lhê. Hau htâng, haû dui é dusak myî du mâ é radu gi, maugum su gâ é htê mó eq, "Lé aq." gâ é lé, ngò wó gyô ri. <sup>2</sup> Ngò wú kat é hkûn, ngá é myoq hí má myang hpyû radu nyi tô é lé myang ri! Haú má jî to sù gi, lai rahpu chung tô é htoq agó, yhang lé, janmaú ralhum tsûng to byî luî, ûng budang wó râ matú ûng sù rayuq đông htoq ló ri.

<sup>3</sup> Haû Sauzo gi, í lhum nghû râ dizik lé hpông kat é hkûn, haû í du nghû râ dui é dusak gi, "Lé aq." ga taî é lé, ngò wó gyô ri. <sup>4</sup> Hau htâng, myang nè radu htoq lo ri; haú má jî tô é sù gi, myidàm htoq mâ é nguínghón simsaq hkyô lé wup yù râ eq, byù yhangchang rayuq eq rayuq sat lhum nhâng râ a-tsam byî é hui sù nghut luî, yhang lé shâm mó rahkyam le byî to bê nghut ri.

<sup>5</sup> Haû Sauzo gi, sùm lhum nghû râ dizik lé hpông kat é hkûn, haû sùm du nghû râ dui é dusak gi, "Lé aq." ga taî é lé, ngò wó gyô ri. Ngò wú kat le, myang noq radu ngá myoq hí má nyi tô é lé myang ri! Haú má jî tô é sù gi, yhâng é loq má jàng rahpu chung to ri.

<sup>6</sup> Haú hkûn, "Ra-nyí é zuihpau gi, sungsô rabyé, ra-nyí é zuihpau gi, muk-yo guq sum byé nghut lhê; haú tsanlun xû eq tsibiyiq wing lé kúm gi, hkâlhoq hten kó." gâ é htê, haú dui é dusak myí du hkaú mai htoq ló é su gâ é lé, ngò wó gyô ri.

<sup>7</sup> Haú Sauzo gi, myí lhum nghû râ dizik lé hpông kat é hkûn, haú myí du nghû râ dui é dusak gi, "Lé aq." ga taí é lé, ngò wó gyô ri. <sup>8</sup> Ngò wú kat é hkûn, ngá é myoq hí má, myang muí radu nyi tô é lé myang ri! Haú má jî to su é myìng gi, Shí hkyô gâ ri; Moming le, yhâng é htâng má châng tô ri; yhangnhik gi, sham èq, mutmó gyó é èq, wúm gyó é èq, tân é yosô-ze èq, myidàm htoq myi tú mâ é ratú má nyi é bang lé sat pyám râ ahkáng wó yu to bekô nghut ri.

<sup>9</sup> Sauzo gi, ngo lhum nghû râ dizik lé hpông kat é hkûn, Garai Gasâng é mungdâng é yanmai le, yhumsîng hkâm é saksê é yanmai le, sat hui bâng é sobyô pé gi, hkungga gyap a-ô má nyi tô bùm kô é lé, ngò myang ri. <sup>10</sup> Yhangmoq gi, "Chyoiyúng é eq tengmán é, ahko ahkáng lhunglháng wó é Yhumsîng ê, myidàm htoq má nyi é byu pé lé, ngamoq é sui manglat dam a byí é eq tarâ a jéyáng é za, hkâ-myháng jé shoq nyi nyi râ lú?" ga, htê mó èq garu bum akô. <sup>11</sup> Haú hkûn, yhangmoq yuq hkanmó gi, bu hpyû hîng radung dung hut é hui luí, yhangmoq su sat hui râ bang, yhangmoq é byinzùm dui-nhâng zoshâng wuì nghut é gumang wuì sat huí ngap é hkûn jé shoq, razup zim za nyi shi keq ga taí é lé wó gyô akô nghut ri.

<sup>12</sup> Hkyuq lhum nghû râ dizik lé, Yhang hpông kat é hkûn, ngò myang ri; haú u lé, layàng mó le nún lo ri; haú bui gi, saumaú noq èq woq é pán su noq byuq ri; haú lhamó lhum gón gi, sui su ne byuq ri; <sup>13</sup> maihpáng gâm lé, lài mó èq lo mut nhùn kat é hkûn, a myhîng shí é maihpáng-shi yoq gyó é su, mauhkûng mâ é kyí pé gi, myidàm htoq má byit gyó lo bum ri. <sup>14</sup> Haú mauhkûng gi, laiká lé dîng lhûm é su htot pyâm é hui luí, bùm hkan bùm mó eq zinlóng lhumjup pé gi, yhâng é jowò mai huí pyâm é huí ri.

<sup>15</sup> Haú hkûn, haú myidàm htoq mâ é hkohkam pé, uphkâng bang, gyezaú pé, sut wó bang, wum-o a-tsam bò bang, jun pé eq luthkyô wó é lhunglhâng bang gi, bùm dong pé eq bùm pé mâ é luqgok gyoro pé má haq tô bùm uchyang, <sup>16</sup> haú bùm pé eq luqgok pé lé, "Ngamoq é gùng htoq má gyó ke kó laq! Haú hkohkâm-tanghkuq má zung to Su é myoq hí mai le, haú Sauzô é nhikmo-yô é hkyô mai le, ngamoq lé haq pyám kó laq. <sup>17</sup> Hkâsu mù gâ le, haú Yhangnhik nhikmo-yô é buinyi mó gi, jé bê nghut ri; ó yuq wá wó jân yap nyi râ lú?" ga garú taí bum akô nghut ri.

## 7

### *144,000 Yuq Masat Lhô Tap Hui Kô É Hkyô*

<sup>1</sup> Hau htâng má, maumang lagyo myi yuq gi, maumyí myi chyûn má yap to mù, myigùng htoq má le, wuì ming htoq má le, siggâm pé má le, lài a hik sháng gaq ga, myi shut mâ é lài lé zû zing to kô é lé, ngò myang ri. <sup>2</sup> Haú hkûn, haú dui nyi é Garai Gasâng é masat lhô chung é maumang lagyo gotû rayuq gi, buihotoq hkyam mai htoq lé lo é lé, ngò dum myang ri. Yhang gi, haú myigùng eq wuì ming lé lhoq hten râ ahkáng wó tô é maumang lagyo myi yuq haú lé, <sup>3</sup> "Nga-nhûng é Garai Gasâng dui-nhâng zoshâng wui é ngelang má, ngamoq mai masat lhô a tap byi byi gi, haú myigùng, wui ming eq siggâm pé lé hkâlhoq hten shi kó." ga htê mó èq wut taí kat ri. <sup>4</sup> Haú hkûn, masat lhô tap huí é bang byù hkâ-myhó yuq nghut é lé, ngò wó gyô ri. Israelaq byuhú banshoq mâ é 144,000 yuq nghut ri.

<sup>5</sup> Masat lhô tap huí yu é,  
Yudaq up mâ é bang gi, 12,000 yuq,  
Rubin up mâ é bang gi, 12,000 yuq,  
Gat up mâ é bang gi, 12,000 yuq,

<sup>6</sup> Ashe up mâ é bang gi, 12,000 yuq,  
Nahtali up mâ é bang gi, 12,000 yuq,  
Manase up mâ é bang gi, 12,000 yuq,

<sup>7</sup> Simeon up mâ é bang gi, 12,000 yuq,

Lewiq up mâ é bang gi, 12,000 yuq,  
 Yishahka up mâ é bang gi, 12,000 yuq,  
<sup>8</sup> Zebulun up mâ é bang gi, 12,000 yuq,  
 Yosep up mâ é bang gi, 12,000 yuq,  
 Ben-yamyin up mâ é bang gi, 12,000 yuq,  
 nghut bum akô.

*Bu Hpyû Hîng Wut Bâng É Hkyô*

<sup>9</sup> Hau htâng, ngò wú kat é hkûn, mingdán hkangmó mai le, byuhú hkangmó mai le, byù myû hkangmó mai le, myíng chângjup mai le, lé é bang, ó yuq lháng a ung nghap é byù moq mó gi, haû hkohkâm-tanghkuq é hí má le, Sauzô é hí má le, yap nyi bùm kô é lé myang ri; yhangmoq gi, bu hpyû hîng wut luî, yhangmoq é loq má byùm-haq chung tô bùm kômù,

<sup>10</sup> "Hkyi yù hkyô gi, haû hkohkâm-tanghkuq má zung tô é nga-nhûng é Garai Gasang eq Sauzo chyáng mâ é nghut ri ô!"

ga luî, htê mó eq garû bum akô nghut ri. <sup>11</sup> Haû maumang lagyo lhunglhâng bang gi, haû hkohkâm-tanghkuq é lhînghkyuq má le, suwún wuî eq dui é dusak myî du é lhînghkyuq má le, yap tô akô nghut ri. Yhangmoq gi, hkohkâm-tanghkuq hí má myoqdong ngóm gop mù, Garai Gasang lé noqkuq uchyang,

<sup>12</sup> "Amen! Hkya-on kungton hkyô eq hpungwup shingkaang,

hpaqchyî byéng-yá eq jeju bun hkyô,

aróng, hpungwup a-tsam eq wum-o gi,

nga-nhûng é Garai Gasâng chyáng pyat dedu ahtum abyuq ru joq nyî sháng gaq ô!

Amen!"

ga taî bum akô.

<sup>13</sup> Haû hkûn, suwún wuî mâ é rayuq gi, "Shî bu hpyû hîng wut é bang gi, ô pé lhú? Yhangmoq gi, hkâmai lé é bang nghut akô lhú?" ga ngo lé myî ri.

<sup>14</sup> Ngò gi, "Suwún hpó ê, nàng sê lhê." nghû tú taî jáng, yhang gi, "Shí bang gi, haû wuîhke jamjau mó mai wó lut htoq lô luî, yhangmoq é bu hîng lé, haû Sauzô é sui má chí hpyû yù bê bang nghut akô. <sup>15</sup> Haû mù, yhangmoq gi, Garai Gasâng é hkohkâm-tanghkuq hí má nyi mù, Yhâng é noqkuq yhûm má, nyí, myín Yhang lé dojaú nyî kô é nghut lhê; haû hkohkâm-tanghkuq má zùng Sû gi, Yhâng é jonghpang lé, yhangmoq é ahtoq má nghop byi râ\* nghut lhê. <sup>16</sup> Yhangmoq gi, hkâ-nhám le, zòmüt wuîshit hui râ a nghut lo; buî lhap é le, hkyíng hkyíng nyé é le, yhangmoq lé wó záng râ a nghut. <sup>17</sup> Hkâsu mù gâ le, haû hkohkâm-tanghkuq agùng mâ é Sauzo gi, yhangmoq é sau-rém sù dut râ nghut luî, Yhang gi, yhangmoq lé, asak wuîbúm jé shoq shuî ê râ nghut lhê. Hau htoq agó, Garai Gasang gi, yhangmoq é ngaubyi sháng shoq sut pyám byi râ nghut lhê." ga taî ri.

8

*Nyhit Lhum Nghû Râ Dizik Eq Namngón Jung Nyhê É Hîng Góm*

<sup>1</sup> Haû Sauzo gi, nyhit lhum nghû râ dizik lé hpông kat é hkûn, mauhkûng htoq má hkyíng hkum rawuí kô zîm byuq ri.

<sup>2</sup> Haû hkûn, Garai Gasâng é hí má yap tô é maumang lagyo nyhit yuq lé, ngò myang ri; yhangmoq lé, tut nyhit lhum byî tô ri.

<sup>3</sup> Namngón jung nyhê é hîng góm chung é maumang lagyo gotû rayuq gi, haû hkungga gyap yàm má lé yap tô ri. Haû hkohkâm-tanghkuq hí mâ é hîng hkungga gyap má, sân-yúng bang banshoq é kyûdung dang eq rahá nhông byi râ matú, namngón jung gyai myo shoq, yhang lé byî tô ri. <sup>4</sup> Haû namngón jûng é myihkau gi, sân-yúng bâng é kyûdung danghtê eq rahá, maumang lagyo haû yuq é loq mai Garai Gasâng chyáng hkyang rot lô bê nghut ri. <sup>5</sup> Hau htâng, maumang lagyo haû yuq gi, góm lé yù mù, hkungga gyap mâ é

\* 7:15 Yhâng é jonghpang lé, yhangmoq é ahtoq má nghop byi râ, gâ é gi, yhangmoq eq rahá nyi mù, yhangmoq lé upzúng nyî râ gâ é nghut lhê.

myi lhoq pyîng yù luî, myidàm htoq má dú hkyô kat é hkûn, maugum mó gûm é, mying hûm é, lhaphpyat é eq layàng nún é pé dut htoq lo ri.

### *Tut Mut É Hkyô*

<sup>6</sup> Hau htâng, tut nyhit lhum wó é maumang lagyo nyhit yuq gi, tut mut râ hen akô nghut ri.

<sup>7</sup> Sâng-hî yuq nghû râ maumang lagyo gi, yhâng é tut lé mut kat ri; haú hkûn, sui nyó é likwò eq myi htoq lô mù, haú lé myidàm htoq má lhoq hkyô kat jáng, maumyî sum tú mâ é ratú eq sîkgâm sum tú mâ é ratú nyé gyó byuq é htoq agó, wàhu mhanzo banshoq le nyé gyó byuq bê nghut ri.

<sup>8</sup> Í yuq nghû râ maumang lagyo gi, yhâng é tut lé mut kat ri; haú hkûn, myi dap tô é bùm mó su é lé, wuîshuq lung-aû má dú hkyô kat ri. Wuîshuq lung-aû sum tú mâ é ratú gi, sui dut byuq bê nghut ri; <sup>9</sup> wuîshuq lung-aû mâ é dui jung sum tú mâ é ratú gi, shi byuq luî, wuî-sanghpo pé sum tú mâ é ratú gi, htên byuq bê nghut ri.

<sup>10</sup> Sum yuq nghû râ maumang lagyo gi, yhâng é tut lé mut kat ri; haú hkûn, myihu dùm su duq é kyî mó racham gi, mauhkûng mai byit gyó lô mù, wuîlàng sum tú mâ é ratú eq wuîbúm pé htoq má lo gyó záng ri. <sup>11</sup> Kyî hau é myîng gi, Kyî Kyî Hko gâ é nghut ri. Wuîlàng sum tú mâ é ratú hkô byuq luî, wuî haú hkô byuq é yanmai byù myo myo shi byuq bekô nghut ri.

<sup>12</sup> Myi yuq nghû râ maumang lagyo gi, yhâng é tut lé mut kat ri; haú hkûn, bui sum tú ratú, lhamó sum tú ratú, kyî sum tú ratú gi, hten luî, haú pé é sum tú ratú gi, mauchut byuq bê nghut ri. Hau htoq agó, nyí sum tú mâ é ratú le, myín sum tú mâ é ratú le, maubó a joq dut byuq ri.

<sup>13</sup> Ngò wú nyi le, zunbung radu gi, maulat má dâng wún mù, "Gotû maumang lagyo sum yuq eq mut râ nghut é, tut hte é yanmai, myidàm htoq má nyi bâng é matú, dingnyé, dingnyé, dingnyé nghut ri." ga luî, htê mó èq garû taî ri.

## 9

<sup>1</sup> Ngo yuq nghû râ maumang lagyo gi, yhâng é tut mut kat é hkûn, mauhkûng mai myidàm htoq má byit gyó tô é kyî racham lé, ngò myang ri. Haú nik dik htûm é Lasang-dông é zoqshi gi, kyî haú lé byî tô ri. <sup>2</sup> Kyî haú gi, nik dik htûm é Lasang-dong lé hpông kat é hkûn, myi bungghkyûng mó mai htoq lo é myihkau dùm sù é myihkau gi, dong haú mai htoq lo ri. Nik dik htûm é Lasang-dong haú mâ é myihkau dum é yanmai, bui eq maulat gi, mauchut byuq bê nghut ri. <sup>3</sup> Myihkau dùm haú mai dinggám pé htoq lô mù, myidàm htoq má gyó lé akô; myidàm htoq mâ é gogok é a-tsam sù é a-tsam le, yhangmoq lé byî to bê nghut ri. <sup>4</sup> Myidàm htoq mâ é wàhu pé lé le, mhan-haq hpoqnoq pé lé le, sîkgâm pé lé le a lhoq htên é za, yhumsing é ngelang má Garai Gasâng é masat lhô a dap é byu pé lé baú zing-ri râ matú, yhangmoq lé taî tô ri. <sup>5</sup> Nghut kôlhang, haú bang lé sat pyám râ ahkáng kúm gi, yhangmoq a wó e za, lhamó ngo hkyap tup haú bang lé zing-ri râ ahkáng za ru wó akô nghut ri. Haú bang hui zô é shî-nò jamjau gi, gogok èq pat hkûn no hpû é su yhang nghut ri. <sup>6</sup> Haú buinyi pé má, byu pé gi, shî hkyô hô kôlhang, myàng kó râ a nghut; shî nau dik kôlhang, haú shî hkyô gi, yhangmoq chyáng mai hphang byuq râ nghut lhê.

<sup>7</sup> Dinggám haú pé gi, majan zan râ matú bui tô é myang pé su dut akô. Yhangmoq é ulhum má gi, hîng janmaú sù é tsûng tô é htoq agó, yhangmoq é myoqdong gi, byu myoqdong su dut bum akô nghut ri. <sup>8</sup> Yhangmoq é xâm gi, myiwe wui é xâm su dut luî, yhangmoq é zuì gi, hkanghkyi zuì su dut ri. <sup>9</sup> Yhangmoq é wànggò-long gi, joqtoq wànggò-long su dut ri; yhangmoq é dùng mying é htê gi, majan pá shut din yán wang ló é myang jûm eq myanglhêng pé mying hûm é htê su gâ ri. <sup>10</sup> Yhangmoq é sho-myi gi, nyin dap é gogok é sho-myi su dut ri; yhangmoq é sho-myi má, lhamó ngo hkyap tup byu pé lé zing-ri râ a-tsam bo ri. <sup>11</sup> Yhangmoq é hkohkâm gi, nik dik htûm é Lasang-dong mâ



é maumang nghut ri; haû é mying gi, Hebre myíng dong Abadon ga, Grik myíng đông Apolion\* gâ ri.

<sup>12</sup> Sâng-hî lhum dingnyé gi, lái ló byuq bê nghut ri; nghut kôlhang, dingnyé í lhum jé lô shirâ nghut lhê.

<sup>13</sup> Haû hkyuq yuq nghû râ maumang lagyo gi, yhâng é tut mut kat ri. Haû hkûn, Garai Gasâng é hí má joq é hîng hkungga gyap é hkyuî myî lhum mai htê htoq lo é gi, <sup>14</sup> "Uhprat wuî mó llang má tuî lhûng tô é maumang myi yuq lé, nhang pyám aq." ga tut chung tô é hkyuq yuq nghû râ maumang lagyo lé taí é lé, ngò wó gyô ri. <sup>15</sup> Haû hkûn, xângzo byù sum tú mâ é ratú lé sat pyám râ matú, ahkyíng, buinyî, lhôhkyap, zanwut lé, rì rì hen to bê nghut é haû maumang myi yuq lé nhang kat bê nghut ri. <sup>16</sup> Myang ji jî é gyè jum gi, byù du sen í hkyîng bo é hkyô lé, ngò wó gyô ri.

<sup>17</sup> Ngò, shing-rán myang é má, myang jûm eq haû pé má ji bâng é wànggò-long pé gi, myi su ne é, shing shing nyui é eq hang su hui é nghut ri. Myáng jum é ulhum gi, hkanghkyî pê é ulhum su dut luî, yhangmoq é nhut mai, myi, myihkau eq hang pé htoq lo ri. <sup>18</sup> Haû yhangmoq é nhut mai htoq lo é myi, myihkau eq hang gâ é wúm ihkyup sùm jûng é yanmai, xângzo byù sum tú ratú gi, sat hui bekô nghut ri. <sup>19</sup> Myang haû jum é sho-myi gi, lhangmuî su dut luî, ulhum dap mù, hte sê é yanmai, yhangmoq é a-tsam gi, nhut eq sho-myi pé má nghut ri.

<sup>20</sup> Wúm ihkyup haû sùm jung mai wó lut luî, myit gyó tô é xângzo byu pé gi, yhangmoq é loq pê èq zui saí é muzó mai, myit a lhîng shi kô é htoq agó, nat gâng pé lé le, a wó myâng, a wó gyo, a wó sô é, hîng, ngùn, gyi, luqgok, sik pê é alhô lé le, noqkuq é hkyô lé a tô pyám shi kó nghut ri. <sup>21</sup> Hau htoq agó, yhangmoq gi, byù sat é mù mai le, myoqheq hpaqchyî mù mai le, ashop é đông gungsho zùm yap é hkyô mai le, hkaû é mai le, myit a lhîng shi kó nghut ri.

## 10

### *Maumang Eq Laiká Ding É Hkyô*

<sup>1</sup> Hau htâng, ngò gi, wum-o bo é maumang lagyo gotû rayuq, mauhkûng mai gyó lé lo é lé myang é nghut lhê. Yhang lé gi, mhut èq htup yup to luî, yhâng é u htoq má woqgan síng-yang gyân tô ri; yhâng é myoqdong gi, bui su dut luî, yhâng é hkyî gi, myi zîng su dut ri. <sup>2</sup> Yhâng é loq má gi, hpông tô é laiká ding zo ralhûm chung tô ri; yhâng é loqyo hkyî gi, wuîshuq lung-aû má nang, yhâng é loqpaî hkyî gi, myigùng htoq má nâng to luî, <sup>3</sup> hkanghkyi myíng é htê su ga, htê mó èq garû kat ri. Yhang garu kat jáng, maugum htê nyhit lhum tú gûm kat ri. <sup>4</sup> Haû maugum htê nyhit lhum tú gûm kat é hkûn, ngò ká râ da jáng, "Haû maugum htê nyhit lhum tú gûm é hkyô lé zaú pyám aq; haû pé lé hkâkâ to." ga, mauhkûng mai danghtê htoq lo é lé ngò wó gyô kat ri.

<sup>5</sup> Haû hkûn, wuîshuq lung-aû eq myigùng htoq má nâng yap tô é lé, ngò myang é maumang lagyo haû gi, yhâng é loqyo loq lé mauhkûng shut tu toq kat ri. <sup>6</sup> Haû mù, yhang gi, mauhkûng eq haû má nyi é lhunglhang lé le, myidàm htoq eq haû má nyi é lhunglhang lé le, wuîshuq lung-aû eq haû má nyi é lhunglhang lé le, hpan tô é, pyat dedu ahtum abyuq dui nyi Su é myìng lé lang luî, dakam é gi, "Ahkyíng ratsuí le, lhoq myáng nyî lo râ a nghut!" <sup>7</sup> Nghut kôlhang, Garai Gasang mai Yhâng é dui-nhâng zoshâng wuî nghut é myiqhtoî pé lé taí to bê é danglù eq rajung za, Yhâng é zaú tô é hkyô gi, nyhit yuq nghû râ maumang lagyo èq yhâng é tut lé mut myhîng é buinyî pé má, shit râ nghut lhê." gâ ri.

<sup>8</sup> Hau htoq agó, ngò wó gyô wú bê mauhkûng mâ é htê, ngo lé dum taí é gi, "Haû wuîshuq lung-aû eq myidàm htoq má nâng yap tô é maumang lagyo loq má hpông tô é laiká ding lé, ê yù aq." gâ ri.

<sup>9</sup> Haû mù, ngò gi, ê luî, laiká ding zo haû, ngo lé byi râ matú maumang lagyo haû lé ê dung le, yhang gi, "Shî lé yù mù, zo kat aq. Náng é wam má hko râ nghut lhê; nghut kôle,

\* 9:11 Apolion gâ é lichyúm gi, lhoq hten lhoq hpyoq sù gâ é nghut ri.

náng é nhut má gi, byo-î su yhang chui râ nghut lhê." gâ ri. <sup>10</sup> Haû mù, ngò gi, laiká ding zo haû lé, maumang lagyo é loq mai yù mù, zô é nghut lhê; haû hkûn, ngá é nhut má gi, byo-î su yhang chui nghâm ri; nghut kôle, bàn zô kat é hkûn, ngá é wam hkaû má hkô bê nghut ri. <sup>11</sup> Haû hkûn, "Nàng gi, byù myû myo myo eq séng luí le, mingdán myo myo eq séng luí le, myíng ahú hú eq séng luí le, hkohkam pé myo myo eq séng luí le, myiqhtoi dum htoi ra râ nghut lhê." ga, ngo lé taí kyô ri.

## 11

*Saksé Í Yuq É Hkyô*

<sup>1</sup> Ké râ jung dumbáng su dut é jàm-yang rahkat ngo lé byi luí, ngo lé taí é gi, "Ê mù, haû Garai Gasâng é noqkuq yhûm lé le, hkungga gyap lé le, kê wú luí, haû má noqkuq é bang lé nghap wú aq. <sup>2</sup> Nghut kôlhang, shinggan mâ é wâng lé gi, a kê é za lhaî pyâm to aq; hkâsu mù gâ le, haû gi, tûngbaù pé lé byî to bê nghut lhê. Yhangmoq gi, haû chyoiyung myuq lé, lhamó myixe í hkyap tup chôm nang kó râ nghut lhê. <sup>3</sup> Hau htoq agó, ngò gi, ngá é saksé í yuq lé a-tsam byi râ nghut luí, yhangnhik gi, ji mebu wut\* mù, buinyì 1260 nyí tup myiqhtoi htoi kó râ nghut lhê." gâ ri. <sup>4</sup> Yhangnhik gi, haû myidàm Yhumsing é hí má yuq tô é tsanlun gàm í gâm eq myibung tsungjang í lhum nghut ri. <sup>5</sup> Byù rayuq yuq, yhangnhik lé zing-ri nau é nghut jáng, yhangnhik é nhut mai myi htoq lô mù, yhangnhik é gyè pé lé nyhê hkyô pyám râ nghut lhê. Yhangnhik lé kâm zing-ri é sù gi, haû su kut sat pyâm é hui zo râ nghut lhê. <sup>6</sup> Yhangnhik gi, yhangnhik myiqhtoi htoi nyi é buinyì pé má mau a wò râ matú, mauhkûng lé myhî pyám râ a-tsam wó akô; hau htoq agó, wui pé lé sui dut nhâng râ eq, nau é hkûn, wúm ajung jûng èq myidàm htoq lé ihkyup hkyô byi râ a-tsam le, wó akô nghut ri.

<sup>7</sup> Yhangnhik gi, saksé ban hkâm é hkûn, haû nik dik htûm é Lasang-dong mai htoq lo é tân jung dusak gi, yhangnhik lé htim mù, ûng luí, sat pyám râ nghut lhê. <sup>8</sup> Yhangnhik é mâng lé gi, danglîng dông Sodom eq Egutuq gâ é, yhangnhik é Yhumsing lé le, tapzîng má jén sat pyâm é myuq mó é hkyô gùng má, leq to râ nghut lhê. <sup>9</sup> Haû hkûn, byù myû hkangmó mâ é bang, byuhú hkangmó mâ é bang, myíng hkangmó mâ é bang, mingdán hkangmó mâ é bang gi, yhangnhik é mâng lé myhup pyám râ matú a gyo kô é za, sum nyí èq rahkyuí tup chôm wú nyí kó râ nghut lhê. <sup>10</sup> Myidàm htoq má nyi é bang gi, yhangnhik shi byuq é yanmai gabú nguingón luí, rayuq eq rayuq chyunghuq byî lhum é dông ngón poî kut kó râ nghut lhê. Hkâsu mù gâ le, myiqhtoi haû nhik gi, myidàm htoq má nyi nyi é bang lé, wuîhke jamjau byî lai bê su nhik nghut akô.

<sup>11</sup> Nghut kôlhang, sum nyí èq rahkyuí tup lai é htâng má, Garai Gasâng chyáng mâ é asak soq gi, yhangnhik chyáng wàng mù, yhangnhik gi, toq yap tô kô é nghut luí, yhangnhik lé myang é bang gi, gyai yhang gyuq nán bûm bekô nghut ri. <sup>12</sup> Haû hkûn, "Shî má doq lò keq." ga, mauhkûng mai yhangnhik lé wut é htê mó lé wó gyo kômù, yhangnhik é gye pé wú tô é u lé, mhut ji mù mauhkûng shut doq lô bekô nghut ri.

<sup>13</sup> Haû u lé yhang, layàng mó nún lô luí, myuq hkaû raxê tú mâ é ratú gi, htên gyop byuq bê nghut ri. Hau htoq agó, byù nyhit hkyîng yuq shi byuq bê nghut luí, myit gyó tô é bang gi, gyai yhang gyuq nán bûm kômù, mauhkûng mâ é Garai Gasang lé hkya-on shigyaú bum akô nghut ri.

<sup>14</sup> Í lhum nghû râ dingnyé gi, lai byuq bê nghut ri; sùm lhum nghû râ dingnyé gi, jé râ za nghut bê.

*Nyhit Lhum Nghû Râ Tut Mut É Hkyô*

<sup>15</sup> Nyhit yuq nghû râ maumang lagyo gi, yhang é tut mut kat ri; haû hkûn, mauhkûng htoq má htê mó pé htoq lo é gi, "Míngkan htoq mâ é mingdán gi, nga-nhûng é Yhumsing eq Yhâng é Hkrisduq é mingdán dut bê nghut luí,

Yhang gi, pyat dedu ahtum abyuq up nyi râ nghut lhê."

\* 11:3 Ji mebu wut gâ é gi, iyon yôn é lé gâ lhê.

gâ ri. <sup>16</sup> Haú hkûn, yhumsing é hkohkâm-tanghkuq má zùng mù, Garai Gasâng é hí má nyi tô é suwún í xe myi yuq gi, yhangmoq é myoqdong ngóm gop mù, Garai Gasang lé noqkuq uchyang taí kô é gi,

<sup>17</sup> "Ahkuí pyat, a-nham pyat rû dui nyi é, wum-o a-tsam dik shoq bò Sû Yhumsing Garai Gasang ê!

Nàng gi, hpungwup a-tsam mó chùng mù, up nyi bê nghut é yanmai, ngamoq, Nang lé jeju hkya-on lhê.

<sup>18</sup> Byù myû pé gi, nhikjum yo bùm kôluí, Náng é nhikmo-yo hkyô gi, jé bê nghut ri.

Shí bê bang lé, tarâ jéyáng râ eq, Náng é dui-nhâng zoshâng myiqhtoí pé lé le,

Náng é sân-yúng bang lé le, Náng é myìng lé gyuq hkunggâ é tiq ko lé le,

shigyaú chyunghuq byi râ eq, myidàm htoq lé lhoq hten bang lé lhoq hten râ, ahkyíng gi, jé bê nghut ri."

gâ akô.

<sup>19</sup> Haú hkûn, mauhkûng htoq má, Garai Gasâng é noqkuq yhûm hpông to luí, Yhâng é noqkuq yhúmhaú má, Yhâng é dangshikaq eq sêng é saksé sidek lé byu-myang ri. Haú hkûn jáng, lhap hpyat é, myìng hûm é, maugum gûm é, layàng nún é, likwò mó gyó é pé dut htoq lo ri.

## 12

### *Myiwe Myhí Eq Manjung É Hkyô*

<sup>1</sup> Hau htoq agó, mauhkûng má limik kumlhá mó htoq shit é gi: myiwe myhí rayuq gi, buí lé wut chùng mù, lhamó má hkyí ke luí, kyí raxe í cham dap é janmaú lé, yhâng é ulhum má tsûng tô ri. <sup>2</sup> Yhang gi, zogûng dut tô é nghut luí, zo hkû râ matú, zohkû-nò no nyi é yanmai, gyai yhang ngau garû nyi ri. <sup>3</sup> Hau htâng, mauhkûng má gotû kumlhá dum htoq shit é gi: gyai kô é manjung nè mó\* radu gi, ulhum nyhit lhum eq hkyuî raxê lhum dap luí, yhâng é ulhum hkangmó má janmaú tsûng tô ri. <sup>4</sup> Yhâng é sho-myi gi, mauhkûng mâ é kyí sum tú mâ é ratú lé shûm tsîng yù mù, myidàm htoq má he hpyit hkyô kat ri. Manjung haú gi, zoshâng hku htoq kat eq wó myui hâng kat shoq ga, haú myiwe myhí é hí má lánng yap tô ri. <sup>5</sup> Myiwe myhí haú gi, mingdán banshoq lé shamtoq dumbáng èq up râ nghut é yuqzo rayuq lé hkû bê nghut ri; yhâng é zoshâng lé gi, Garai Gasâng é hí má le, Yhâng é hkohkâm-tanghkuq hí má le bún toq yû bê nghut ri. <sup>6</sup> Myiwe myhí haú gi, yhâng é matú Garai Gasang lajâng to byí é yoso hkaú má hpang wang ê bê nghut ri; haú jowò má, yhang gi, 1260 nyí tup lhom baú é hui râ nghut lhê.

<sup>7</sup> Mauhkûng htoq má majan htoq bê nghut ri. Mihkaelaq eq yhâng é maumang lagyô pé gi, manjung lé majan ê zan kôluí, haú manjung eq yhâng é maumâng pé le, tau zân akô. <sup>8</sup> Nghut kôlhang, yhangmoq gi, a ûng kômù, mauhkûng mâ é yhangmoq nyi jowò lhoq hpyuq pyám bekô nghut ri. <sup>9</sup> Haú mingkan gón lé hkyô shuí nghoq é, natzau eq Tsadán ga é, a-nham lhê é lhangmuì nghut é manjung mó haú gi, yhâng é maumang pé eq rahá myidàm htoq má dú hkyô pyâm é hui bê nghut ri.

<sup>10</sup> Haú hkûn, mauhkûng htoq má htê mó đông taí é lé, ngò wó gyô é gi, "Ahkuí gi, nga-nhûng é Garai Gasâng é hkyi yù hkyô, hpungwup a-tsam eq mingdán le, Yhâng é Hkrisduq é ahko ahkáng le, jé bê nghut ri.

Hkâsu mù gâ le, nga-nhûng é Garai Gasâng é hí má, nga-nhûng é gumang wuì lé, nyí, myín mara hun nyi é sù gi, dú hkyô pyâm é hui bê nghut ri.

<sup>11</sup> Yhangmoq gi, haú Sauzô é suí é yanmai le, yhangmoq saksé hkâm é mungdâng é yanmai le,

yhang lé ung pyám bekô nghut luí, shi byuq é jé shoq yhumsing asak lé a ha kó nghut ri.

<sup>12</sup> Haú mù luí, mauhkûng eq haú má nyi é bang ê, gabú nyí keq!

Nghut kôlhang, myidàm htoq eq wuìshuq lung-aú gi, dingnyé wó ri;

\* 12:3 Manjung nè mó gâ é gi, Tsadán lé taí nau é nghut lhê.

hkâsu mù gâ le, haû natzau gi, yhang é ahkyíng yàm-yoq tot za ru joq alô nghut é lé sê é yanmai,  
 nhikmo-yô é eq, nungnhik chyáng gyó lé lô bê nghut ri."  
 gâ ri.

<sup>13</sup> Haû manjung gi, myidàm htoq má dú hkyô kat huí é lé myàng luí, haû yuqzo hku é myiwe myhí lé zing-rí ri. <sup>14</sup> Myiwe myhí haû gi, lhangmuì chyáng mai wó lut luí, yhang é matú lajâng tô é yoso má wó dang jé mù, ahkyíng ralhú, ahkyíng í lhum, ahkyíng rawuí hkup† lhom baú nyi é hui sháng gaq ga, zùn mó é dùng í lhum byí é huí ri. <sup>15</sup> Haû hkûn, haû lhangmuì gi, myiwe myhí haû lé wó lhoq myhú pyám shoq ga, myiwe myhí é nunghtáng má, yhang é nhut mai wuì mó llang í é wuì lhoq htoq kat ri. <sup>16</sup> Nghut kôlhang, manjung nhut mai lhoq htoq kat é wuì mó llang haû lé, myigùng gi, yhang é nhut há mù myui pyám byí é đông, myiwe myhí haû lé garúm yu ri. <sup>17</sup> Haû mù, manjung haû gi, myiwe myhí hau é yanmai, gyai yhang nhikmo-yo luí, Garai Gasâng é jep é tarâ lé châng é bang eq Yesuq é saksé lé myhik zing nyi é bang nghut é, myit gyó tô é, myiwe myhí é awut ashín pé lé, majan zan râ matú htoq e ri. <sup>18</sup> Manjung haû gi, wuìshuq lung-aû yàm má yap tô ri.

## 13

### *Tân Jung Dusak Radu Wuìshuq Lung-aû Mai Htoq Lo É Hkyô*

<sup>1</sup> Haû hkûn, haû wuìshuq lung-aû mai tân jung dusak radu htoq lo é lé, ngò myàng ri. Dusak haû má, hkyuí raxê lhum eq ulhum nyhit lhum dap to luí, yhang é hkyuí pé má gi, janmaú raxê lhum tsúng to mù, ulhum hkangmó má gi, Garaí aróng lhoq hpoi é myìng dap tô bum ri. <sup>2</sup> Ngò myang é tân jung dusak haû gi, bauze-lo su dut ri; nghut kôlhang, hkyí gi, wàm hkyí su dut luí, nhut gi, hkanghkyí nhut su dut ri. Haû manjung gi, yhang é a-tsam eq yhang é hkohkâm-tanghkuq lé le, ahko ahkáng mó lé le, tân jung dusak haû lé ap byí ri. <sup>3</sup> Tân jung dusak hau é ulhum ralhú gi, shí râ í é dàm dap huí é su dut kôlhang, damhkô haû gi, yâ ge pyám bê nghut luí, mingkan gón gi, mauhong byuq kômù, yhang htâng châng bùm bekô nghut ri. <sup>4</sup> Manjung gi, tân jung dusak lé ahko ahkáng ap byí é yanmai, byu pé gi, manjung haû lé noqkuq é htoq agó, tân jung dusak haû lé le, noqkuq kômù, "Ó yuq wá, tân jung dusak shí du su dut ri lhu? Ó yuq wá, yhang lé wó zan ùng râ lhu?" ga bum akô.

<sup>5</sup> Gyáng dang taí râ eq Garaí aróng lhoq hpoi dang taí râ nhut gi, tân jung dusak haû lé byi to bê nghut é htoq agó, lhamó myí xe í hkyap tup, yhang é ahko ahkáng lé chùng râ ahkáng wó bê nghut ri. <sup>6</sup> Yhang gi, yhang nhut hpóng mù, Garaí Gasâng aróng lé lhoq hpoi dang taí é htoq agó, Garaí Gasâng é myìng eq nyi jowò lé le, mauhkúng htoq má nyi é bang lé le, lumù gansang é sù nghut ri. <sup>7</sup> Haû sân-yúng bang lé majan zân ung yù râ a-tsam, yhang lé byi bê nghut ri. Hau htoq agó, byuhú hkangmó lé le, byù myû hkangmó lé le, myíng hkangmó lé le, mingdán hkangmó lé le, up râ ahkáng, yhang lé byi bê nghut ri. <sup>8</sup> Haû sat hui bê Sauzo eq sêng é asak jihpán laiká buk má, mau htoq xâng hkun mai, myìng a kê lhôm é, myidàm htoq má nyi é lhunglhang bang gi, haû tân jung dusak lé noqkuq kó râ nghut lhê.

<sup>9</sup> Gyo râ nohkyap dap sù gi, gyô yù sháng gaq.

<sup>10</sup> Shúm zung é hui râ sù gi, shúm zung é hui râ za nghut lhê.

Sham eq sat é hui râ sù gi, sham eq sat é hui râ za nghut lhê.\*

Haû mù, sân-yúng bang gi, hkam jân é hkyô eq lhúmzui hkyô bò kó râ nghut lhê.

### *Tân Jung Dusak Radu Myigùng Mai Htoq Lo É Hkyô*

† 12:14 Ahkyíng ralhú, ahkyíng í lhum, ahkyíng rawuí hkup gâ é gi, "razàn, í zân, lhamó hkyuq hkyap" lé gâ é nghut lhê; haû gi, 1260 nyí nghut ri. \* 13:10 Chyúmding ra-am má gi, Byù rayuq yuq lé, shúm kut é sù gi, shúm zung é hui râ nghut lhê. Sham eq byù sat é sù gi, sham eq sat é hui râ nghut lhê, ga bo tô ri.

<sup>11</sup> Hau htâng, ngò gi, tân jung dusak gotû radu† myigùng mai htoq lo é lé myang ri. Yhang gi, sauzô é hkyuî su dut é hkyuî í lhum yuq ri; nghut kôlhang, yhang gi, manjung su ga dang nyo ri. <sup>12</sup> Yhang gi, tân jung dusak hí lhê dû é ahko ahkáng lhunglhang lé, haú du é hí má chùng mù, shí rã í é damhkô ge byuq é tân jung dusak haú lé, haú mingkan eq mingkan htoq má nyi é bang lé noqkuq nhang ri. <sup>13</sup> Hau htoq agó, yhang gi, byu pê é myoq hí má, mauhkùng mai myigùng shut myi lé lhang wó lhoq hkyô é, limik kumlhá mó kut shit ri. <sup>14</sup> Yhang gi, tân jung dusak hí lhê dû é hí má, kumlhá haú pé kut rã ahkáng wó é yanmai, myidàm htoq má nyi é bang lé mhoq hpyoq yû luî, haú shâm damhkô dap kôlhang, dui nyi é tân jung dusak haú lé, hkunggâ é dông, yhangmoq lé, yhâng é alhô saí nhang ri. <sup>15</sup> Yhang gi, haú tân jung dusak hí lhê dû é alhô lé, soq wó mut kat byî é a-tsam lé wó yû sù nghut ri; haú mù, alhô haú gi, dang wó taí luî, yhang lé a noqkuq é bang lé, sat hui nhang ri. <sup>16</sup> Hau htoq agó, yhang gi, byù mó byù zo, wó sù myùng sù, luthkyô wó bang eq jùn pé, yuq hkangmó lé, yhumsing é loqyo loq má nghut nghut, ngelang má nghut nghut, masat lhô zik tap yû nhang ri. <sup>17</sup> Haú hkûn, haú tân jung dusak é myìng, a nghut jáng, yhâng myìng é masat námbat dap sù mai lai luî, ûng é, wui é hkyô, ó yuq le wó kut rã a nghut.

<sup>18</sup> Hpaqchyî byéng-yá gi, shí má bo rã ri. Hpaqchyî bò sù gi, haú tân jung dusak é námbat lé sôn wú sháng gaq; hkâsu mù gâ le, haú gi, byù rayuq é námbat nghut lhê. Yhâng é námbat gi, 666 nghut ri.

## 14

### *Sauzo Eq 144,000 Yuq É Hkyô*

<sup>1</sup> Hau htâng, ngò wú kat le, haú Sauzo gi, Zi-un bùm má yap tô é lé myang ri; Yhâng myìng eq Yhâng Wâ é myìng lé, yhumsing é ngelang má kê tap tô é byù 144,000 yuq le, Yhang eq rahá yap tô bùm ri. <sup>2</sup> Haú hkûn, ngò gi, wui pé myìng hùm é htê eq maugum mó gùm é htê su gâ é htê, mauhkùng mai htoq lo é lé wó gyô ri. Ngò wó gyô é htê haú gi, tíng bat bang, yhangmoq é tíng lé bat myhîng é htê su gâ ri. <sup>3</sup> Yhangmoq gi, haú hkohkâm-tanghkuq é hí má le, dui é dusak myî du eq suwún wui pê hí má le, mahkôn sik lé hkon akô nghut ri. Haú myidàm htoq mai hkyi yû huî é byù 144,000 yuq mai lai luî, ó yuq le, mahkôn haú lé a wó mhoq sê yù kó nghut ri. <sup>4</sup> Haú bang gi, myiwe wui eq gungsho a zum é bang nghut luî, yhangmoq gi, zorâm jet pé nghut bum akô. Yhangmoq gi, haú Sauzo hká shut é le hká shut châng é bang nghut akô. Yhangmoq gi, byu pê chyáng mai wui yu é hui luî, sâng-hi myhîng é ashi lé su, haú Garai Gasang eq Sauzo lé ap byî é hui akô nghut ri. <sup>5</sup> Yhangmoq é nhut má, mhaú é hkyô haí le a taí kó; yhangmoq chyáng mara hùn rã hkyô le a bò kó nghut ri.

### *Maumang Sum Yuq É Hkyô*

<sup>6</sup> Hau htâng, maumang lagyo gotû rayuq gi, maulat má dâng wún é lé ngò myang ri; yhang gi, haú mingkan htoq má nyi é, mingdán hkangmó mâ é bang, byuhú hkangmó mâ é bang, myíng hkangmó mâ é bang, byù myû hkangmó mâ é bang lé, hko kyo rã ahtum abyuq é gabú danglù wó ri. <sup>7</sup> Yhang gi, "Garai Gasang, tarâ jéyáng rã ahkýng jé bê nghut é yanmai, Yhang lé gyuq hkungga luî, Yhâng é hpungwup a-tsam lé shigyaú keq. Haú mauhkùng eq myigùng, wuîshuq lung-aû eq wuîbúm pé hpan tô é Sû lé, noqkuq keq." ga luî, htê mó èq taí ri.

<sup>8</sup> Í yuq nghû rã maumang lagyo gi, htâng má châng lé mù, "Haú mingdán pé\* lhunglhang lé, yhang kut shut é ashop é dông gungsho zùm yap é hkyô, nhik lhoq yô é tsibyiq wing shuq nhang é, Babelon myuq mó gi, lêng gyop bê! Lêng gyop bê!" ga taí ri.

<sup>9</sup> Sum yuq nghû rã maumang lagyo gi, yhangnhik é htâng má châng lé mù, "Haú tân jung dusak eq yhâng é alhô lé, noqkuq luî, yhumsing é ngelang má nghut nghut, loq

† 13:11 Tân jung dusak gotû radu gâ é shí gi, myiqhtoi pyoq lé gá nau é nghut lhê. \* 14:8 Mingdán pé gâ é gi, a lumjîng bang lé gâ é nghut lhê.

má nghut nghut, yhâng é masat lhô lé tap yu é sù, ó yuq nghut kôle, <sup>10</sup> Garai Gasâng é nhikmo-yo ngu é góm má hut kat tô é, nhik-yô é tsibyiq wing jet lé shuq râ nghut lhê. Hau htoq agó, haû chyoiyúng maumang lagyo pê hí má le, Sauzô é hí má le, yhang gi, duq nyi é myi eq hang èq zing-rí é hui zo râ nghut lhê. <sup>11</sup> Yhangmoq zing-ri huí é myihkau gi, pyat dedu ahtum abyuq htoq nyi râ nghut lhê. Haû tân jung dusak eq yhâng é alhô lé, noqkuq é bang eq yhâng mying é masat lhô tap yu sù é matú gi, nyí, myín, no râ ahkýing wó râ a nghut." ga luí, htê mó èq taí ri. <sup>12</sup> Garai Gasâng é jep é tarâ cháng luí, Yesuq lé lhumzuí nyi é bang nghut é, sân-yúng bang gi, hkam shirang é hkyô bò râ lhê.

<sup>13</sup> Hau htâng, "Ahkuí mai gi, haû Yhumsîng má shí é sù, hkungsô wó nyi ri nghu kê to aq." gâ é htê, mauhkúng mai htoq lo é lé, ngò wó gyô ri.

Haú hkún, haû Woi-nyí gi, "Nghut rô, yhangmoq kut é muzó é akyû gi, yhangmoq htâng cháng râ nghut é yanmai, yhangmoq gi, yhumsîng zuí ngu é muzó mai myang hkying bekô râ nghut lhê." ga taí ri.

#### *Myidàm Htoq Mã É Kyôshi Shû É Hkyô*

<sup>14</sup> Ngò dum wú kat le, mhut hpyû rahtui ngá hí má joq tô é lé myang ri; mhut hpyû htoq haú má Byu Yhangzo su dut é byù rayuq zung tô ri; Yhâng é ulhum má gi, hîng janmaú tsúng to luí, Yhâng é loq má gi, htoq é zaiyik ralhum chung tô ri. <sup>15</sup> Haú hkún, gotû maumang lagyo gi, noqkuq yhûm mai htoq lô mù, "Haû myidàm htoq mã é kyôshi gi, myhîng zan to bê nghut luí, kyôshu yoq jé bê nghut é yanmai, náng é zaiyik chûng mù, yik shû yù aq." ga, haû mhut htoq mã zung tô é Sù lé, htê mó èq taí garû kat ri. <sup>16</sup> Haû mù, mhut htoq mã zung tô é Sù gi, Yhâng é zaiyik lé, myigùng htoq mã dú hkyô kat luí, myidàm htoq mã é kyôshi lé, ban shû yù bê nghut ri.

<sup>17</sup> Maumang lagyo gotû rayuq gi, mauhkúng htoq mã é noqkuq yhûm mai htoq lo ri; haú yuq le, htoq é zaiyik ralhum chung tô ri. <sup>18</sup> Haû, myi lé up é maumang lagyo gotû rayuq gi, hkungga gyap mai htoq lô mù, htoq é zaiyik chûng sù lé, "Myidàm htoq mã é tsibyiq shi gi, myhîng bê nghut é yanmai, náng é htoq é zaiyik yù mù, tsibyiq shipaú haú pé lé, yâm tsîng yù aq." ga, htê mó èq taí garû kat ri. <sup>19</sup> Maumang lagyo haû gi, yhâng é zaiyik lé, myidàm htoq mã dú hkyô kat mù, haú mã é tsibyiq shi pé lé yâm tsîng yù luí, Garai Gasang nhikmo-yô é tsibyiq wing pyik jang mó má hut kat bê nghut ri. <sup>20</sup> Myuq shinggan mã é tsibyiq wing pyik jang haú má, tsibyiq shi haú pé lé nâng nyhoq luí, tsibyiq wing pyik jang haú mai suí yui htoq lo é gi, myang lunghtúng myháng jé shoq jé lô mù, 180 déng† kô we shoq yui ló bê nghut ri.

## 15

#### *Ló Htâng É Wúm Nyhit Lhum Chung É Maumang Lagyo Nyhit Yuq É Hkyô*

<sup>1</sup> Ngò gi, mauhkúng má gotû limik kumlhá joq é lé, dum byu-myang ri; haû gi, wúm nyhit lhum chung é maumang lagyo nyhit yuq nghut ri; wúm haú pé gi, ló htâng é wúm pé nghut ri; hkâsu mù gâ le, Garai Gasang nhikmo-yô é hkyô gi, haû gû mai bàn râ nghut lhê. <sup>2</sup> Hau htoq agó, myi eq nyhò tô é myoqjàm wui-nhông su dut é lé le, ngò myang ri; haû tân jung dusak eq yhâng é alhô lé le, yhâng mying é námbat lé le, wó ung pyám bê bang gi, wui-nhông yâm haú má yap tô bum akô; yhangmoq gi, Garai Gasang byí é tîng pé lé chung to kôluí, <sup>3</sup> Garai Gasâng é dui-nhâng zoshâng Mosheq é mahkôn eq haû Sauzô é mahkôn lé hkôn kô é gi,

"Wum-o a-tsam dik shoq bò Sù Yhumsîng Garai Gasang ê, Nàng kut é muzó gi, hkik é eq mauhpo yhang nghut ri.

Pyat pyat zaí zaí é Hkohkâm ê, Náng é hkyô gi, dingmán é eq tengmán é nghut ri.

<sup>4</sup> Yhumsîng ê, Nàng lé a gyuq a hkungga râ eq Náng myîng lé a lhoq gyaú râ gi, ó yuq wá nyi râ lú?

Hkâsu mù gâ le, Nàng za chyoiyúng é Sù nghut ri.

Nàng kut é dingmán hkyô gi, tân shit bê nghut é yanmai,

† 14:20 180 déng gi, Griek pê é stadia 1600 kô bo ri.

byù myû lhunglhang gi, Náng hí má lé noqkuq kó râ nghut lhê."  
gâ akô nghut ri.

<sup>5</sup> Hau htâng, ngò wú kat le, mauhkûng má, saksé zúm joq é noqkuq yhûm bóng tô é lé, myang ri. <sup>6</sup> Haú wúm nyhit jung chung é maumang lagyo nyhit yuq gi, noqkuq yhûm haú mai htoq lo ri; yhangmoq gi, sân-yúng duqbó é nú nhám mebu wut luî, yhangmoq é wànggàng má hîng hpyihit baíyup tô akô nghut ri. <sup>7</sup> Haú hkûn, haú dui é dusak myî du mâ é radu gi, pyat dedu ahtum abyuq dui nyi é Garai Gasâng é nhikmo-yo hkyô byíng tô é hîng góm nyhit lhum, haú maumang lagyo nyhit yuq lé byî ri. <sup>8</sup> Garai Gasâng é hpungwup shingkang eq hpungwup a-tsâm é yanmai, haú noqkuq yhûm gi, myihkau byíng zan to bê nghut luî, haú maumang lagyo nyhit yuq é wúm nyhit jung za a bàn bàn gi, noqkuq yhûm haú má ó yuq le a wó wàng kó nghut ri.

## 16

### *Garai Gasâng É Nhkmo-yo Hkyô Bo É Góm Nyhit Lhum*

<sup>1</sup> Hau htâng, maumang lagyo nyhit yuq lé, "Htoq ê mù, haú Garai Gasâng é nhikmo-yo hkyô bo é góm nyhit lhum lé, myigùng htoq má hut hkyô kat keq." ga, noqkuq yhûm mai htê mó èq taí é lé, ngò wó gyô ri.

<sup>2</sup> Haú hkûn, sângh-hî yuq nghû râ maumang lagyo gi, htoq ê mù, yhâng é góm lé, myigùng htoq má hut hkyô kat jáng, haú tân jung dusak é masat lhô dap é eq yhâng é alhô lé noqkuq é bâng chyáng, achay achyut é eq hkê-nho dik é, yapjeq ana dap tô bùm bê nghut ri.

<sup>3</sup> Í yuq nghû râ maumang lagyo gi, yhâng é góm lé, wuîshuq lung-aú má hut hkyô kat ri; haú gi, shî bê byù rayuq é sui su dut byuq é htoq agó, haú má lúng é dui jung lhunglhang gi, shi byuq bê nghut ri.

<sup>4</sup> Sum yuq nghû râ maumang lagyo gi, yhâng é góm lé, wuìlàng pé eq wuìbúm pé má hut hkyô kat jáng, haú pé gi, sui dut byuq bê nghut ri. <sup>5</sup> Haú hkûn, haú wuì lé upzúng é maumang lagyo taí é lé, ngò wó gyô é gi,

"A-nham pyat le, ahkui pyat le, rû nyi nyi é Chyoiyúng Sû ê,

Nàng haú su kut jéyáng bê nghut é yanmai, Nàng gi, tengmán Sû nghut ri;

<sup>6</sup> hkâsu mù gâ le, yhangmoq gi, Náng é sân-yúng bang eq myiqhtoí pê é sui lé, lhoq htoq pyám bekô nghut luî,

Nàng gi, yhangmoq lé sui shuq nhang é nghut ri; haú gi, yhangmoq hui zo gíng é hkyô nghut ri."

gâ ri. <sup>7</sup> Haú hkûn, haú hkungga gyap mai,

"Nghut rô! Wum-o a-tsam dik shoq bò Sû Yhumsîng Garai Gasang ê, Nàng jéyáng é hkyô pé gi, tengmán é eq dingmán é nghut ri."

ga le, taí kat é htê lé, ngò dum wó gyô ri.

<sup>8</sup> Myi yuq nghû râ maumang lagyo gi, yhâng é góm lé, bui é ahtôq má hut hkyô kat é hkûn, bui gi, byu pé lé myî èq nyhê kyuq râ ahkáng wó bê nghut ri. <sup>9</sup> Haú mù, yhangmoq gi, nyé dik é èq nyhê kyuq é hui zo luî, wúm shí pé lé up nyi é Garai Gasâng é myìng lé nhîng akô; haú-í yhang hpuzo kôlhang, yhangmoq gi, myit le a lhîng kó, Garai Gasang lé le a shigyaú kó nghut ri.

<sup>10</sup> Ngo yuq nghû râ maumang lagyo gi, yhâng é góm lé, tân jung dusak é hkohkâm-tanghkuq htoq má hut hkyô kat jáng, yhâng é mingdán gi, mauchut tuq dut byuq bê nghut ri. Mingbyû wuì gi, yhumsîng é shô lé lhang, ngat tân bùm shoq shî-nò jamjau hui zo kôluî, <sup>11</sup> yhangmoq no hpû é eq jeq é ana dap é yanmai, mauhkûng mâ é Garai Gasang lé nhîng akô; haú-í yhang hpuzo kôlhang, yhangmoq gi, yhangmoq kut é hkyô mai myit a lhîng shi kó nghut ri.

<sup>12</sup> Hkyuq yuq nghû râ maumang lagyo gi, yhâng é góm lé, Uhprat wuì mó llang má hut hkyô kat jáng, wuìlàng haú gi, kân byuq luî, haú buihôq hkyam mâ é hkohkam pé, lé lô râ hkyô dong bê nghut ri. <sup>13</sup> Haú hkûn, po su dut é, agè ashop é byò sum woi-nyí lé, ngò myang ri; haú pé gi, manjung, tân jung dusak, myiqhtoí pyoq pê é nhut mai htoq lô kô

é bang nghut akô. <sup>14</sup> Woi-nyí haú pé gi, nat gâng pê é woi-nyí nghut luí, limik kumlhá pé kut shit kômù, haú wum-o a-tsam dik shoq bò Sû Garai Gasâng é buinyi mó má majan zan râ matú, mingkan gón mâ é hkohkam pé lé lhoq tsing yù râ ga, htoq e ló akô nghut ri.

<sup>15</sup> "Wú keq, Ngò gi, hkau sù su jé lé é nghut lhê! Su hí má gungchîn a so râ eq hoq hpu hkyô a lhoq htoq shit sháng gaq ga, yhumsing é wutbu wutmè lé, zúng nyí luí, gying gying kut nyi é sù gi, hkungsô wó nyi ri."\*

<sup>16</sup> Haú mù, nat haú bang gi, hkohkam pé lé, Hebre myíng đông Armagedon gâ é jowò má, rahá ji tsing tô akô nghut ri.

<sup>17</sup> Nyhit yuq nghu râ maumang lagyo gi, yhâng é góm lé, maulat má hut hkyô kat ri; haú hkûn, haú noqkuq yhûm mâ é hkohkâm-tanghkuq mai, "Bàn bê!" gâ é htê mó htoq lo ri. <sup>18</sup> Hau htoq agó, lhap hpyat é, mying hûm é, maugum gûm é eq layàng mó nún é pé dut htoq lo ri. Myidàm htoq má, xângzo byù lé nyi é hkûn mai, layàng haú su nún é eq haú-í htan é gi, a joq wú shí é nghut lhê. <sup>19</sup> Haú mù, haú myuq mó gi, sùm hkyam byak goq byuq luí, mingdán pé mâ é myuq pé le, gyop byuq bê nghut ri. Garai Gasang gi, Babelon myuq mó lé le myit bun luí, Yhâng é nhikmo-yô é tsibiyiq wing byíng shoq bo é góm lé shuq nhâng bê nghut ri. <sup>20</sup> Zinlóng hkangmó gi, hpang byuq bê nghut luí, bùm pé le byuq byuq bê nghut ri. <sup>21</sup> Haú hkûn, myi xê jói kô lái é likwò mó gi, mauhkûng mai byu pé htoq má wo gyó gyûn ri; likwò wúm gi, gyai yhang wuîhke jamjaû é wúm nghut é yanmai, byu pé gi, Garai Gasang lé nhîng bum akô nghut ri.

## 17

### *Shiwa Myhí Mó É Hkyô*

<sup>1</sup> Haú góm nyhit lhum chung tô é maumang lagyo nyhit yuq mâ é rayuq gi, lé lô mù, "Lé aq, haú wuì myo myô pê htoq má zung tô é shiwa myhí mó lé dam byi râ hkyô, ngò, nang lé tân shit bá. <sup>2</sup> Myidàm htoq mâ é hkohkam pé gi, yhang eq rahá ashop é đông gungsho zùm yap é hkyô kut shut kôluí, myidàm htoq má nyi é bang gi, yhang kut shut é myiwe yuqgè nyi zô lhum hkyô é tsibiyiq wing lé shuq wut bùm bekô nghut ri." ga luí, ngo lé taí ri.

<sup>3</sup> Haú mù, maumang lagyo haú gi, Woi-nyí má, ngo lé yoso shut shuî wang e ló ri. Haú ulhum nyhit lhum eq hkyuî raxê lhum dap luí, taí hpoí é myìng kôm dap tô é, zam zam ne é tân jung dusak htoq má zung tô é myiwe myhí rayuq lé, ngò myang ri. <sup>4</sup> Myiwe myhí haú gi, me me dut é eq zam zam ne é mebu wut luí, hîng, lungsêng, palhé pê èq mhôn chung ri; yhâng é loq má gi, yhâng é myiwe yuqgè nyi zô lhum hkyô é agot a-û hkyô eq achaq achyut é zè pé byíng tô é hîng góm ralhum chung tô ri.

<sup>5</sup> NIK DIK É HKYÔ, MYIDÀM HTOQ MÂ É ACHAQ ACHYUT HKYÔ PÉ EQ SHIWA MYHÍ PÊ É YHÂNGNU, BABELON MYUQ MÓ. gâ é myìng gi, yhâng é ngelang má kê tap tô ri. <sup>6</sup> Myiwe myhí haú gi, sân-yúng bâng é sui eq Yesuq é saksé hkám bâng é sui shuq wut tô é lé, ngò myang ri.

Haú mù, ngò gi, gyai yhang maú byuq é nghut lhê. <sup>7</sup> Haú hkûn, maumang lagyo haú ngo lé taí é gi, "Nàng, haí mù maú lhê lú? Myiwe myhí haú eq, yhang jî tô é, ulhum nyhit lhum eq hkyuî raxê lhum dap é tân jung dusak é zaú tô é hkyô lé, ngò, nàng lé taí kyo râ nghut lhê. <sup>8</sup> Nàng myàng é tân jung dusak haú gi, hí hkûn nyi wú bê, ahkuí a nyi lo, nghut kôlhang, nik dik htâm é Lasang-dong mai htoq lô mù, htên byoq é hui râ nghut lhê. Mau htoq xâng hkun mai, asak jihpán laiká buk má myìng a kê tô é, myidàm htoq má nyi é bang gi, tân jung dusak haú lé myàng kô é hkûn, maú byuq bùm kó râ nghut lhê. Hkâsu mù gâ le, haú gi, nyi wú bê, ahkuí a nyi lo, nghut kôlhang, dum lé râ nghut é yanmai nghut ri.

<sup>9</sup> Hpaqchyî byéng-yá bo é nyan gi, shí má râ ri. Haú ulhum nyhit lhum gi, myiwe myhí zung é bùm nyhit lhum nghut ri; hau htoq agó, hkohkâm nyhit yuq le nghut ri. <sup>10</sup> Ngo yuq gi, byit gyó byuq bê; rayuq gi, ahkuí nyi to ashî; myit tô é rayuq gi, a jé lé shi nghut

\* 16:15 Dang shí hkun gi, Yesuq taí é dang nghut lhê.



ri; haú yuq jé lé é hkûn, yhang gi, ahkyíng razup zo za wó nyî râ nghut lhê. <sup>11</sup> Hí hkûn nyi wú bê, ahkuí a nyi lo dut é tân jung dusak haú gi, shit yuq nghû râ hkohkâm nghut ri. Yhang gi, haú nyhit yuq eq sêng é yanmai, yhâng é htên byoq hkyô shut e ló râ nghut lhê.

<sup>12</sup> Haú nàng myàng é hkyuí raxê lhum gi, mingdán a myang yù shî é hkohkâm raxê yuq nghut ri; nghut kôlhang, yhangmoq gi, haú tân jung dusak eq rahá za, hkyíng hkum rahkum kô hkohkâm ayá lé wó yú kó râ nghut lhê. <sup>13</sup> Yhangmoq gi, myit myoqbyù hkyô ralhum za nghut kômù, yhangmoq é a-tsam eq ahko ahkáng lé, haú tân jung dusak lé byi kó râ nghut lhê. <sup>14</sup> Yhangmoq gi, haú Sauzo lé majan chôm zan kó râ nghut lhê; nghut kôlhang, Sauzo haú gi, yhumsing pê é Yhumsîng eq hkohkam pê é Hkohkâm nghut é yanmai, yhangmoq lé ung pyám râ nghut lhê. Haú Sauzo eq rahá nghut é bang gi, ji yù huí é bang, hkyin yù huí é bang eq lhumzuí é bang nghut akô." gâ ri.

<sup>15</sup> Hau htâng, maumang lagyo haú ngo lé dum taí é gi, "Nàng myang é, shiwa myhí zung tô é wuì pé gi, byù myû pé, byù ajùm ayò pé, mingdán pé eq myíng lhumjup nghut ri. <sup>16</sup> Haú nàng myang é tân jung dusak eq hkyuí raxê lhum gi, shiwa myhí haú lé a jú kut kó râ nghut luí, yhâng é sutzè banshoq shang yu pyám byi mù, mebu lháng a dap loshoq achîndum kut to kó râ nghut lhê; hau htoq agó, yhâng é sho lé zo luí, myî èq nyhê hkyô pyám kó râ nghut lhê. <sup>17</sup> Hkâsu mù gâ le, Garai Gasang gi, haú bang mai, i-myit rahkat zâ èq, yhumsing é a-tsam, haú tân jung dusak lé byi râ myit, yhangmoq lé kat byi Sû nghut ri. Haú mù, yhangmoq gi, Garai Gasâng é mungdang lhoq dik é hkûn jé shoq, haú su kut kó râ nghut lhê. <sup>18</sup> Nàng myang é myiwe myhí haú gi, myidàm htoq mâ é hkohkam pé lé up zô é myuq mó nghut ri." gâ ri.

## 18

### *Babelon Lêng Gyop É Hkyô*

<sup>1</sup> Hau htâng, maumang lagyo gotû rayuq mauhkûng mai gyó lo é lé, ngò myang ri. Yhang gi, ahko ahkáng mó wó é nghut luí, haú myidàm htoq lé, yhâng é hpungwup èq duqbó to byî ri. <sup>2</sup> Yhang, htê mó o mó èq garû taí kat é gi, "Babelon myuq mó gi, lêng gyop bê, lêng gyop bê!

Myuq haú gi, nat gâng pê é yhûm eq agè ashop é nat hkangmó é hkyûng dut byuq é htoq agó,

a sansêng é eq achaq achyut é nghoq pé nyi é sùt dut byuq bê nghut ri.

<sup>3</sup> Hkâsu mù gâ le, haú byù myû lhunglháng gi, yhang kut shut é ashop é dông gungsho zùm yap é hkyo é nhik lhoq yô é tsibiyiq wing shuq wut bùm bekô nghut ri.

Haú myidàm htoq mâ é hkohkam pé gi, yhang eq myi shut làng shut hkyô kut bekô nghut é htoq agó,

myidàm htoq mâ é hpugá wuiloq gá bang gi, yhâng é ladu lai shoq ngón kûn é hkyo é yanmai, sutzè wó bôm bekô nghut ri."

gâ ri.

<sup>4</sup> Hau htâng, mauhkûng mai htoq lo é htê gotû lé ngò dum wó gyô é gi,

"Ngá é byu pé ê, myuq hau é mara pé má nungmoq a bo lòm râ matú le, yhâng é wúm pé lé nungmoq a hui zo kó râ matú le, haú mai hân hfang htoq lò keq;

<sup>5</sup> hkâsu mù gâ le, yhâng é mara gi, mauhkûng htung shoq bum zang to bê nghut luí, Garai Gasang gi, Yhâng é a dingmán é hkyô lé myit bun bê nghut ri.

<sup>6</sup> Yhang kut byî é eq rajung za, yhang lé tau kut byi keq; Yhang kut bê muzó eq rajung za, yhang lé í tú taú kut keq.

Yhang nyhó byî é góm má, í tú taú nyhó byi keq.

<sup>7</sup> Yhang gi, yhumsing gùng lé yhumsîng lhoq gyaú yû luí, ladu lai shoq ngón kún nhang é í,

wúhke jamjau hkyô eq iyon hkyô myo myo, yhang lé taú byi keq.

Hkâsu mù gâ le, yhang gi, yhâng é myit má,

'Ngò gi, hkohkâm myhí nghut lhê; ngò gi, chuimó a nghut;

hkâ-nhám le iyon hui râ a nghut.' ga gumrong nyi ri.

<sup>8</sup> Haû mù luí, yhang é wúm nghu é shí hkyô, iyon hkyô eq mutmó gyó hkyô gi, ra-nyí bui má za, yhang chyáng jé râ nghut lhê.

Hau htoq agó, yhang gi, myí eq nyhê hkyô pyâm é lé hui râ nghut lhê;

hkâsu mù gà le, yhang lé jéyáng é, haû Yhumsing Garai Gasang gi, wum-o a-tsam bò Sû nghut ri.

<sup>9</sup> Haû yhang eq rahá myiwe yuqgè nyi zô lhum hkyô kut shut é eq yhang é ladu lai shoq ngón kún hkyô má bo lom é, haû myidám htoq mâ é hkohkam pé gi, yhang lé nyhê hkyô é myihkau lé myàng kôjáng, ngaubyi ngau-nhap eq iyon yôn é huí bùm kó râ nghut lhê.

<sup>10</sup> Yhangmoq gi, yhang no jamjaû nyi é lé wú gyuq kôluí, we we má yap to kômù,

'Hkik é myuq mó, a-tsam bo é Babelon gi, dingnyé wó ri-nhung!

Dingnyé wó ri-nhung! Hkyíng hkum ralhú má za, dam byí é hkyô gi, náng chyáng jé bu-nhung!

ga luí, taí garu kó râ nghut lhê.

<sup>11</sup> Myidám htoq mâ é hpugá byu pé gi, yhang é yanmai, ngaubyi ngau-nhap é eq iyon yôn é hui kó râ nghut lhê; hkâsu mù gà le, yhangmoq é gài zè lé, ó yuq le a wui byi lo kô é yanmai nghut ri. <sup>12</sup> Gài zè haú pé gi, hîng, ngùn, lungsêng eq palhé, nú-nhâm é pán, me me dut é pán, láí hkyíng eq zam zam ne é pán; namngón jung sik ajung jung, maguí zuí lé saí é, gùloq hpaû jung sik lé saí é, gyi lé saí é, shamtoq lé saí é, luq hpyû lé saí é jung ajà jà nghut ri. <sup>13</sup> Hau htoq agó, changhpyik gâm, xunmân, namngón jung, mura, loban, tsibiyiq wing, tsanlun xû, mún eq sungso, nojûng eq sau, myang eq myanglhêng pé; byù é gungdu eq asak pé nghut ri.

<sup>14</sup> Yhangmoq gi, 'Nàng myit ô nau nyi é hkyô pé gi, náng chyáng mai gâng ló byuq bê nghut ri. Nàng wó é sùt é hkyô eq hkikhkam é hkyô pé banshoq gi, byuq byuq bê nghut luí, hkâ-nhám le dum wó taú yù râ a nghut.' ga taí kó râ nghut lhê. <sup>15</sup> Gài zè haú pé lé ung luí, yhang chyáng mai sutzè wó yu é byù pé gi, yhang hpuzô é jamjau hkyô lé wú gyuq kô é yanmai, we we má yap to kômù, ngaubyi ngau-nhap eq iyon yon uchyang,

<sup>16</sup> 'Nú-nhâm é pán, me me dut é pán eq zam zam ne é mebu wut luí, hîng, lungsêng eq palhé pé lé

mhôn tô é myuq mó gi, dingnyé wó ri-nhung! Dingnyé wó ri-nhung!

<sup>17</sup> Hkyíng hkum rahkum má za, haû-í yhang wó é sutzè pé htên byoq byuq bu-nhung!

ga taí kó râ nghut lhê.

Wuì-sanghpo agyì yuq hkanmó eq wuì-sanghpo mai jón wún é bang banshoq, wuì-sanghpo hkâng bang eq wuìshuq lung-aû mai wam baú hkyô wó yu é bang banshoq gi, we we má yap to kômù, <sup>18</sup> myuq haû nyé gyó nyi é myihkau lé myàng kôjáng, 'Myuq mó shí eq pûng é myuq gi, hkâmá joq shirâ lhu?' ga taí garu kó râ nghut lhê. <sup>19</sup> Yhangmoq gi, yhumsing é ulhum má hpuilhup kyaq gyun mù, ngaubyi ngau-nhap eq iyon yon uchyang, 'Myuq mó gi, dingnyé wó ri-nhung! Dingnyé wó ri-nhung!

Wuìshuq lung-aû má wuì-sanghpo pé wó é bang gi, yhang é sutzè pé é yanmai, sutzè wó bum akô.

Nghut kôlhang, hkyíng hkum rahkum má za, htên byoq hkyô gi, yhang chyáng jé bu-nhung!

<sup>20</sup> Mauhkûng ê, yhang é yanmai hkye gabú aq! Sân-yúng bang, lagyô pé eq myiqhtoí pé ê, hkye gabú keq!

Hkâsu mù gà le, yhang, nungmoq lé kut é eq rajung za, Garai Gasang gi, yhang lé jéyáng bê nghut ri.'

ga taí kó râ nghut lhê." gà ri.

<sup>21</sup> Hau htâng, wum-o a-tsam mó bo é maumang lagyo rayuq gi, luqluí long mó sù é luqgok racham waq toq yû mù, wuìshuq lung-aû má dú hkyô kat luí, taí é gi,

"Haû Babelon myuq mó gi, haû su kut wum kat dú hkyô pyâm é hui râ nghut luí,

hkâ-nhám le dum myàng râ a nghut lo.

<sup>22</sup> Haû títng bat é bang, dat gó dat ye é bang, sampyí mut é bang eq tut mut é bâng é htê lé,

náng chyáng hkâ-nhám le dum wó gyo lo râ a nghut.

Loq hpaqchyî ajung jung kûng é byù lé, náng chyáng hkâ-nhám le dum myàng lo râ a nghut.

Luqluí luí é htê lé, náng chyáng hkâ-nhám le dum wó gyo lo râ a nghut.

<sup>23</sup> Haû myibung duq é myishâm lé, náng chyáng hkâ-nhám le dum wó duq lo râ a nghut.

Myisik lusik é htê lé, náng chyáng hkâ-nhám le dum wó gyo lo râ a nghut.

Náng é hpugá byû pé gi, mingkân é byù mó pé nghut ri.

Náng é myoqheq hpaqchyî eq mingdán banshoq mâ é bang lé, hkyô shuí nghoq bê nghut ri.

<sup>24</sup> Haû myiqhtoî pê é sui, sân-yúng bâng é sui eq myidàm htoq má sat hui bang banshoq é sui pé gi,

yhâng chyáng chyat byu-myàng bê nghut ri."

gâ ri.

## 19

### *Haleluya!*

<sup>1</sup> Hau htâng, mauhkûng htoq má, byù ajùm ayò garû é htê mó su gâ é lé, ngò wó gyô é gi,

"Haleluya!"

Hkyi yù hkyô eq hpungwup shingkang, a-tsam gi, nga-nhûng é Garai Gasang eq sêng é nghut lhê.

<sup>2</sup> Hkâsu mù gâ le, Yhang tarâ jéyáng é hkyô gi, tengmán é eq dingmán é yanmai nghut ri.

Yhang gi, myidàm htoq mâ é bang lé, haû yhâng é ashop é dông gungsho zùm yap é hkyo eq mara kut shut nhang é shiwa myhí mó lé, mara byi luí,

Yhâng é dui-nhâng zoshâng wuì é sui yuichyîn dam byi bu-nhung ô!"

gâ ri.

<sup>3</sup> Dum radàm, yhangmoq taí garu kô é gi,

"Haleluya!"

Myuq hau é myihkau gi, pyat dedu ahtum abyuq ru ìng doq nyì sháng gaq ô!"

gâ bum akô nghut ri.

<sup>4</sup> Haû suwún í xe myi yuq eq dui é dusak myî du gi, haû hkohkâm-tanghkuq má zung tô é Garai Gasang lé paí gop luí, noqkuq uchyang,

"Amen, Haleluya!"

ga, taí garû bum akô.

<sup>5</sup> Haû hkûn,

"Garai Gasâng é dui-nhâng zoshâng wuì nghut é, yhang lé gyuq hkunggâ é tiq ko banshoq bang ê!"

Nga-nhûng é Garai Gasang lé, hkya-on kungtôn keq ô."

gâ é htê, haû hkohkâm-tanghkuq mai htoq lo ri.

<sup>6</sup> Hau htâng, byù ajùm ayo é htê su ga, wuì myo myo mying hûm é htê su ga, maugum mó é htê su ga, taí garû é htê lé ngò wó gyô é gi,

"Haleluya!"

Hkâsu mù gâ le, wum-o a-tsam dik shoq bò Sû nga-nhûng é Yhumsîng Garai Gasang gi, up nyi ri.

<sup>7</sup> Nga-nhûng gi, ngón gabú luí, Yhâng é hpungwup shingkang lé lhoq gyaú sháng ô!"

Hkâsu mù gâ le, haû Sauzo myiháng poí gi, jé bê nghut luí, Yhâng é myisik gi, rì rì nhôn to bê nghut ri.

<sup>8</sup> Sân-yúng duq wik nú-nhâm é mebu le, wut râ matú, Yhang lé byî to bê nghut ri."

\* 19:1 Haleluya gâ é gi, Hebre myíng dông, "Yhumsîng Garai Gasang lé hkya-on kungton lhê" gâ é dang nghut ri.

gâ ri. (Nú-nhâm é mebu haû gi, sân-yúng bang kut é dingmán é muzó nghut ri.)

<sup>9</sup> Hau htâng, maumang lagyo gi, ngo lé, "'Haû Sauzô é myiháng zoshuq poî má ji yu é hui bang gi, hkungsô wó nyi ri.' nghû ká aq." ga taí luí, "Dang shí pé gi, Garai Gasâng é tengmán mungdang yhang nghut lhê." ga xoq taí ri.

<sup>10</sup> Haú hkûn, ngò gi, yhang lé noqkuq râ nghû, yhâng é hkyî wang má paí gop kat é nghut lhê. Nghut kôlhang, yhang gi, "Haû su hkâkut! Ngò gi, nàng eq haû Yesuq é saksé lé hkâm é náng gumang wui eq rahá, byinzùm dui-nhâng zoshâng ru nghut lhê. Garai Gasang lé noqkuq aq! Hkâsu mù gâ le, Yesuq é hkyô lé saksé hkâm é gi, myiqhtoi htoí é Woi-nyí é myit đông nghut ri." ga, ngo lé taí hkûm ri.

### *Myang Hpyû Jî To Su É Hkyô*

<sup>11</sup> Hau htâng, ngò gi, mauhkûng bóng tô é lé le, ngá é myoq hí má myang hpyû radu nyi tô é lé le, myang ri. Myang hpyû haú má jî tô é gi, Lhumzui eq Tengmán gâ é Sû nghut ri. Yhang gi, tengmán é đông tarâ jéyáng luí, majan zan Sû nghut ri. <sup>12</sup> Yhâng é myoqjí gi, myishâm su dut mù, Yhâng é ulhum má gi, janmaú myo myo tsung tô ri. Yhang mai lai luí, ó yuq le a bo sê é myìng, Yhâng chyáng kê tap tô ri. <sup>13</sup> Yhang gi, sui má jum yù bê nghut é buhîng radung wut to luí, Yhâng é myìng gi, Garai Gasâng é mungdang gâ ri.

<sup>14</sup> Haú mauhkûng gyè pé gi, hpyu é eq sanséng nú-nhâm é mebu wut mù, myang hpyû jî kôluí, Yhâng htâng má châng bum akô nghut ri. <sup>15</sup> Byù myû haú pé lé zan râ matú, htoq é sâm gi, Yhâng é nhut mai htoq lo ri. Yhang gi, yhangmoq lé, shamtoq dumbáng eq up râ nghut lhê. Yhang gi, wum-o a-tsam dik shoq bò Sû Garai Gasâng é nhikmo-yô é tsibiyiq shi pyik jang má, yhangmoq lé pyik râ nghut lhê. <sup>16</sup> Hkohkam pê é Hkohkâm eq yhumsing pê é Yhumsîng gâ é myìng gi, Yhâng é buhîng eq Yhâng é tangbaú má kê tap tô ri.

<sup>17</sup> Dum, maumang lagyo rayuq gi, buí má yap tô é lé ngò myang ri; yhang gi, maulat mâ é nghoqzô pé banshoq lé, "Lé keq, Garai Gasâng é zoshuq poî mó matú, lé zup zing keq; <sup>18</sup> haú hkûn, nungmoq gi, hkohkam pê é, gyezaú pê é, wum-o a-tsam mó bò bâng é, myang jûm eq ji bâng é gungsho, luthkyô wó bang eq jùn pê é, byù mó byù zo pé lhunglhang é gungsho pé lé, myàng zo kó râ nghut lhê." ga, htê mó eq wut garú taí ri.

<sup>19</sup> Hau htâng, haû tân jung dusak eq myidàm htoq mâ é hkohkâm eq yhangmoq é gyezô pé gi, haû myang htoq má jî to Sû eq Yhâng é gyezô pé lé, majan zan râ matú chôm zîng bùm kô é lé, ngò myang ri. <sup>20</sup> Nghut kôlhang, haû tân jung dusak gi, chyup yu é hui bekô nghut ri; hau htoq agó, haû tân jung dusak é masat lhô lé hkam yù luí, yhâng é alhô lé noqkuq é bang lé, mhaú zo râ matú, tân jung dusak hau é gunglik đông limik kumlhá pé kut shit é myiqhtoi pyoq le, chyup yu é hui bê nghut ri. Yhangnhik gi, hang myi duq nyi é myi nhông má duí gù dú hkyô kat é hui bekô nghut ri. <sup>21</sup> Haû myit gyó tô é bang gi, myang gûng má jî to Su é nhut mai htoq lo é sham eq sat pyâm é hui bekô nghut luí, nghoq pé lhunglhang gi, haú bâng é gungsho lé, gyi gyi dau dau myàng zô bùm bekô nghut ri.

## 20

### *Rahkyîng Zàn*

<sup>1</sup> Dum, maumang lagyo rayuq gi, nik dik htûm é Lasang-dông é zoqshi eq joqtoq tui mó lé, yhâng é loq má chûng mù, mauhkûng mai gyó lé lo é lé, ngò myang ri. <sup>2</sup> Yhang gi, natzau eq Tsadán nghut é, a-nham lhê é lhangmuí gâ é manjung lé, zanwut rahkyîng lhung to râ matú, chyup tuí yù bê nghut ri. <sup>3</sup> Haú mù, maumang lagyo haû gi, rahkyîng zàn a byíng shí é gyoro má, manjung haú, byù myû pé lé a wó mhaú zo sháng gaq ga, nik dik htûm é Lasang-dong má yhang lé dú hkyô hâng kat luí, zoq myhî to mù, hau é ahtoq má dizik htûng tô ri. Haú rahkyîng zàn lai eq, yhang lé, ra yoq zo hpông htoq kat ra râ nghut lhê.

<sup>4</sup> Ngò gi, haú tarâ jéyáng râ ahko ahkáng wó é bang zung tô bum é hkohkâm-tanghkuq pé lé, dum myang ri. Hau htoq agó, haû Yesuq é hkyô lé saksé hkâm é yanmai le, Garai

Gasâng é mungdâng é yanmai le, ulhum hpyit hui bâng é sobyô pé lé, ngò myang ri. Haú bang gi, haú tân jung dusak eq yhâng é alhô lé a noqkuq é htoq agó, yhumsing é ngelang eq loq má hau é masat lhô lé a htûng tap yû bâng é sobyo pé nghut ri. Yhangmoq gi, dum dui toq mù, zanwut rahkyîng tup Hkrisduq eq rahá up nyi bekô nghut ri. <sup>5</sup> Haú gi, sâng-hî dâm dum dui toq é hkyô nghut ri. (Shi byuq bê myit gyó tô bang gi, rahkyîng zàn haú a byíng byíng wó dum dui toq kó râ a nghut.) <sup>6</sup> Sâng-hî dâm dum dui toq é hkyô má lom é bang gi, hkungsô wó bang eq chyoyúng bang nghut ri. Í dâm nghû râ shi é hkyô gi, haú bang lé up râ ahkáng wó é a nghut; haú bang gi, Garai Gasang eq Hkrisduq é hkyangjông pé dut râ nghut é htoq agó, Hkrisduq eq rahá zanwut rahkyîng tup up kó râ nghut lhê.

#### *Tsadán Htên Byoq Huí É Hkyô*

<sup>7</sup> Rahkyîng zàn haú lai jáng, Tsadán gi, htóng mai nhang htoq kat é hui luí, <sup>8</sup> majan zan râ matú, myidàm htoq myi chyûn má nyi é, Goga eq Magoga gâ é byù myû pé lé mhaú shuí tsîng yù râ ga, htoq ê râ nghut lhê. Byù haú bang gi, wuîshuq lung-aú yàm mâ é semuí myhó myo kó râ nghut lhê. <sup>9</sup> Yhangmoq gi, maumyí htunghtáng hkap shoq chôm yán doq lò kômù, haú Garai Gasâng é byu pé nyi é dap nghut é, Garai Gasang chyitdap é myuq lhîngkyuq má, lé lóm tô bùm bekô. Nghut kôlhang, mauhkûng mai myi gyó lô luí, yhangmoq lé nyhê hkyô pyám bê nghut ri. <sup>10</sup> Haú tân jung dusak eq myiqhtoi pyoq pé lé dú hkyô kat jang nghut é, hang myi duq nyi é nhông má, yhangmoq lé mhoq hpyoq yu é natzau haú le dú hkyô pyâm é hui bê nghut ri. Yhangmoq gi, nyí, myín, pyat dedu ahtum abyuq wuîhke jamjau hui zô nyi kó râ nghut lhê.

#### *Ló Htâng É Tarâ Doqdan Hkyô*

<sup>11</sup> Hau htâng, hkohkâm-tanghkuq hpyû mó ralhú eq haú má zung tô é Sû lé, ngò myang ri. Haú mauhkûng eq myigùng gi, Yhâng é hí mai hpanq lô bê nghut mù, yhangnhik é matú jowò a joq lo nghut ri. <sup>12</sup> Hau htoq agó, shi byuq bê nghut é, tiq é kô é bang gi, hkohkâm-tanghkuq hí má yap tô bum é eq laiká buk pé hpông é lé, ngò myang ri. Asak jihpán laiká buk gâ é gotû laiká buk le, hpông tô ri. Haú shi byuq bê bang gi, yhumsîng kut é eq rajung za, laiká buk pé má kê tô é dông, tarâ doqdan é huí bùm bekô nghut ri. <sup>13</sup> Haú hkûn, wuîshuq lung-aú gi, yhang má lúng tô é, shi byuq bê bang lé ap byi luí, haú shi é hkyô eq Moming le, yhangnhik chyáng lúng tô é, shi byuq bê bang lé ap byi akô nghut ri; yuq hkangmó gi, yhumsîng kut é eq rajung za tarâ doqdan é huí bekô nghut ri. <sup>14</sup> Hau htâng, shi é hkyô eq Moming gi, myi nhông má dú hkyô kat é huí bekô nghut ri. Myi nhông haú gi, î dâm nghû râ shi é hkyô nghut lhê. <sup>15</sup> Asak jihpán laiká buk má, myìng a bo é sù ó yuq nghut kôle, myi nhông haú má dú hkyô kat é huí bekô nghut ri.

## 21

#### *Yerusalem Asik*

<sup>1</sup> Hau htâng, mauhkûng asik eq myigùng asik lé, ngò myang ri; hkâsu mù gâ le, hí lhê é mauhkûng eq myigùng gi, lai lô byuq bê nghut luí, wuîshuq lung-aú le, dum joq râ a nghut lo. <sup>2</sup> Haú hkûn, Chyoyúng Myuq gâ é Yerusalem asik gi, lusik é matú mhôn yúng tô é myisik su, hen lajâng yù luí, Garai Gasâng chyáng mâ é nghut mù, mauhkûng mai gyó lé lo é lé, ngò myang ri. <sup>3</sup> Hau htoq agó, hkohkâm-tanghkuq mai htoq lo é danghtê mó lé, ngò wó gyô é gi, "Ahkuí, Garai Gasâng é nyi jowò gi, xângzo byu pé eq rahá nghut luí, Yhang gi, yhangmoq eq rahá nyi nyi râ nghut lhê. Yhangmoq gi, Yhâng é byu pé dut râ nghut luí, Garai Gasang yhang, yhangmoq eq rahá nyi mù, yhangmoq é Garai Gasang dut râ nghut lhê. <sup>4</sup> Garai Gasang gi, yhangmoq é myoq mâ é ngaubyi lhunglhang lé, sut pyám byi râ nghut lhê. Htângnùng má gi, shî-nò hkyô, iyon hkyô, ngaubyi ngau-nhap hkyô eq no hpu hkyô nghû é joq râ a nghut lo; hkâsu mù gâ le, hí lhê é hkyô pé gi, lai lô byuq bê nghut ri." gâ ri.

<sup>5</sup> Haû hkohkâm-tanghkuq má zung to Sû gi, "Wú aq, jung hkgangmó lé, Ngò asik kut nyî bê nghut lhê." ga taí luí, "Shî lé kê to aq, hkâsu mù gâ le, dang shí pé gi, lungíng é dang eq tengmán é dang nghut lhê." ga taí ri.

<sup>6</sup> Hau htoq agó, Yhang gi, "Haú pé gi, ban kut bê. Ngò gi, Alhpa eq Omega nghut lhê; Sâng-hi Awang eq Ló Htáng Sû le nghut lhê. Wuí shit sù lé gi, ahpau a dúng é za, asak wuíbúm mâ é uchyam lé, Ngò byi huq râ nghut lhê. <sup>7</sup> Wó ung é sù ó yuq nghut kôle, Garaí é silí wunlí haú pé banshoq lé sîng râ nghut mù, Ngò gi, yhâng é Garaí Gasang dut luí, yhang gi, Ngá zo dut râ nghut lhê. <sup>8</sup> Nghut kôlhâng, gyuq myit bò bang, a lumjîng bang, achâq achyut dut bang, byù sat bang, ashop é dông gungsho zùm yap é hkyô shut é bang, myoqheq hpaqchyí kut é bang, hparà noq é bang eq mhaú bang lhunglhâng é jowò gi, haû hang myi duq nyi é nhông nghut râ nghut lhê. Haû gi, í dâm nghû râ shi é hkyô nghut ri." ga ngo lé taí ri.

<sup>9</sup> Ló htâng é wúm nyhit jung byíng tô é góm nyhit lhum chung tô é maumang lagyo nyhit yuq mâ é rayuq gi, lé mù, "Lé aq, haû Sauzô é yhangmyi gâ é myisik lé, ngò tân shit râ nghut lhê." ga ngo lé taí ri. <sup>10</sup> Hau htâng, yhang gi, ngo lé Woi-nyí mai bùm myhâng mó ralhum má shuí jé luí, Garaí Gasâng chyáng mâ é nghut mù, mauhkûng mai gyó lé lo é, haû Chyoiyúng Myuq gâ é Yerusalem lé tân shit ri. <sup>11</sup> Myuq haû gi, Garaí Gasâng é hpungwup shing kang hû é htoq agó, haû maubó gi, hpaû dik é huhpé lungsêng su dut luí, myoqjâm su sân-yúng ri. <sup>12</sup> Myuq xêwâm gi, kô myhang é htoq agó, hkum raxe í lhum hpông tô ri; hkum haú pé má, maumang lagyo raxe í yuq zúng tô ri. Hau htoq agó, Israelaq byù myû raxe í hu é myìng lé, hkum haú pé má kê tap to bum ri. <sup>13</sup> Hkum haú pé gi, buihtoq hkyam shut sùm lhum, buiwàng hkyam shut sùm lhum, maupyí shut sùm lhum, mautsung shut sùm lhum kut hpông tô ri. <sup>14</sup> Myuq xêwâm haû gi, awang raxe í lhum èq hi tô é nghut luí, awang haú pé má, Sauzô é lagyo raxe í yuq é myìng dap tô bum ri.

<sup>15</sup> Haû ngo lé nyo é maumang lagyo gi, myuq lé le, hau é hkum pé lé le, xêwâm pé lé le, ké râ matú, kê é jung hîng jâm-yang ralhum chung tô ri. <sup>16</sup> Myuq haû gi, myi chyûn dut mâ é nghut luí, hîng hpyang làm hpyang rawuí wuí za dut mâ é nghut ri. Maumang haû gi, myuq lé jâm-yang hau èq kê wú é hkûn, hîng hpyang, làm hpyang, myhâng hpyang banshoq 1400 déng\* kô bo ri; <sup>17</sup> yhang gi, haû byù kê é jung eq wuí é maumang lagyo é kê jung lé chûng mù, myuq xêwâm lé kê wú é hkûn, rasho myí xê myi dúng bo ri. <sup>18</sup> Myuq xêwâm haû gi, huhpé lungsêng èq saí é nghut ri; myuq gi, hîng gyíng èq saí é nghut mù, myoqjâm su yhang sân-yúng ri. <sup>19</sup> Myuq xêwâm haû é awang pé gi, hpau jung lungsêng ajung jûng èq mhôn tô é nghut ri. Sâng-hî lhum gi, huhpé lungsêng èq, í lhum nghû râ gi, nila (mauhkûng nyuì su dut jung) lungsêng èq, sùm lhum nghû râ gi, mahuya (noq é isâm myo jung) lungsêng èq, myí lhum nghû râ gi, myaq (huí nyuì nyuì é jung) lungsêng èq, <sup>20</sup> ngo lhum nghû râ gi, nyhaú myoqjí su dut jung lungsêng èq, hkyuq lhum nghû râ gi, pate-mya (nè é jung) lungsêng èq, nyhit lhum nghû râ gi, huí muí muí é su dut jung lungsêng èq, shit lhum nghû râ gi, myek-yoi (wuimau nyuì su dut jung) lungsêng èq, gaû lhum nghû râ gi, utohpaya (bó huí hui é jung) lungsêng èq, raxê lhum nghû râ gi, mahuya nyuì lungsêng èq, raxe ralhum nghû râ gi, wakintu (mhan-haq nyuì eq mauhkûng nyuì nyhò tô é su dut é jung) lungsêng èq, raxe í lhum nghû râ gi, (me me dut é jung) htihtunila lungsêng èq mhôn tô ri. <sup>21</sup> Haû myuq hkum raxe í lhum gi, palhé raxe í cham nghut ri; hkum ralhum gi, palhé rachâm èq saí é nghut ri. Haû myuq é hkyô mó gi, hîng jet èq saí é nghut luí, myoqjâm su duq san é hkyô nghut ri.

<sup>22</sup> Ngò gi, myuq haú má noqkuq yhûm joq é lé a myàng, hkâsu mù gâ le, haû wum-o a-tsam dik shoq bò Sû Yhumsîng Garaí Gasang eq Sauzo gi, myuq hau é noqkuq yhûm nghut nyi é yanmai nghut ri. <sup>23</sup> Haû Garaí Gasâng é hpungwup shing kang gi, myuq haú má duqbó byí é htoq agó, Sauzo gi, myuq hau é myibung nghut é yanmai, myuq haú má gi, buì eq lhamó tsô byi a ra nghut ri. <sup>24</sup> Haû byù myû pé gi, myuq haû duqbó é hkaû má hkyô wó so kó râ nghut lhê; haû myidâm htoq mâ é hkohkam pé gi, yhangmoq é

\* 21:16 1400 déng gi, Grik pé é stadia 12000 kô nghut ri.

hkikhkâm hkyô lé, myuq haú má yù lé kó râ nghut lhê. <sup>25</sup> Myuq haú má gi, myín nghû é a joq é yanmai, myuq hkum myhî é le joq râ a nghut lo. <sup>26</sup> Haú byù myû pê é hpungwup shingkang eq aróng lé, myuq haú má yu lé kó râ nghut lhê. <sup>27</sup> Myuq haú má, a sansêng é hkyô haí le wó wàng râ a nghut é htoq agó, hoq hpu hkyô eq mhaú zô é hkyô kut é sù ó yuq le wó wàng râ a nghut; haú Sauzô é asak jihpán laiká buk má mying bo é bang za wó wàng râ nghut lhê.

## 22

*Asak Wuì Mó Lâng*

<sup>1</sup> Hau htâng, Garai Gasang eq Sauzô é hkohkâm-tanghkuq mai yui htoq lô luí, myuq hkaú mâ é hkyô mó gúng dông yui ló é, myoqjâm su sân-yúng é asak wuì mó lâng lé, maumang lagyo haú, ngo lé tân shit ri. <sup>2</sup> Wuilàng í hpoq é má, ashi raxe í myû zuí é asak shigâm yuq tô é nghut luí, lhohkyap hkangmó ashi zuí ri. Hau htoq agó, shigâm haú pé mâ é ahaq pé gi, byù myû pé lé yâ gè râ matú nghut ri. <sup>3</sup> Nhîng é haí le a joq lo râ nghut lhê. Garai Gasang eq Sauzô é hkohkâm-tanghkuq gi, myuq hkaú haú má joq nyí râ nghut mù, Yhâng é dui-nhâng zoshâng wuì gi, Yhang lé noqkuq dojaú kó râ nghut lhê. <sup>4</sup> Yhangmoq gi, Yhâng é myoqdong lé myàng kó râ nghut é htoq agó, yhangmoq é ngelang má, Yhâng é mying kê tap é hui kó râ nghut lhê. <sup>5</sup> Myín nghû é le joq râ a nghut lo. Myibung duqbó byî é le, bui tsô byî é le, yhangmoq ra kó râ a nghut lo, hkâsu mù gâ le, haú Yhumsîng Garai Gasang gi, yhangmoq lé duqbó byî nyí râ nghut lhê. Hau htoq agó, yhangmoq gi, pyat dedu ahtum abyuq up nyí kó râ nghut lhê.

<sup>6</sup> Maumang haú gi, ngo lé, "Dang shí pé gi, lungíng é dang eq tengmán é dang nghut lhê. Myiqhtoí pê é woi-nyí lé up é Yhumsîng Garai Gasang gi, adê myáng má dut lò râ hkyô pé lé, Yhâng é dui-nhâng zoshâng wuì lé tân shit râ matú, Yhâng é maumang lagyo lé nhang kat é nghut ri." ga taí ri.

*Yesuq Jé Lé Lô Râ Hkyô*

<sup>7</sup> "Wú keq, Ngò gi, a myáng má jé lé lô râ nghut lhê! Laiká shí má bo é myiqhtoi dang pé lé châng kut é sù gi, hkungsô wó nyi ri."\* gâ é lé, ngò wó gyô ri.

<sup>8</sup> Haú hkyô pé lé wó myâng wó gyô é sù gi, ngò Yohan nghut lhê. Ngò gi, haú hkyô pé lé wó myâng wó gyô é hkûn, ngo lé, shí hkyô pé tân shit é maumang lagyo é hkyî wang má noqkuq râ matú paí gop é nghut lhê. <sup>9</sup> Nghut kôlhang, yhang gi, ngo lé, "Haú su hkâkut! Ngò gi, nàng eq le, náng é gumang myiqhtoí pé eq le, laiká shí mâ é mungdang pé lé châng kut é lhunglhang bang eq le rahá, byinzùm dui-nhâng zoshâng ru nghut lhê. Garai Gasang lé noqkuq aq!" ga taí ri.

<sup>10</sup> Hau htâng, yhang gi, "Laiká shí má bo é myiqhtoi dang pé lé, hkâzaú to lo, hkâsu mù gâ le, haú ahkýng gi, chyâng lò bê nghut ri. <sup>11</sup> A dingmán é sù gi, a dingmán é dông xoq kut nyí sháng gaq; a sansêng é sù gi, a sansêng é dông xoq dut nyí sháng gaq; dingmán é sù gi, dingmán é dông xoq kut nyí sháng gaq; chyoiyúng é sù gi, xoq chyoiyúng nyí sháng gaq." ga ngo lé taí kyô ri.

<sup>12</sup> "Wú keq, ngò gi, a myáng má jé lé lô râ nghut lhê! Ngò gi, yuq hkangmó lé, yhumsîng kut é eq rajung za byi râ shigyaú chyunghuq chung tô lhê. <sup>13</sup> Ngò gi, Alhpa eq Omega nghut lhê, Sâng-hi eq Jihâm nghut lhê, Sâng-hi Awang eq Lô Htáng Sù le nghut lhê.

<sup>14</sup> Asak shigâm má jé râ eq myuq hkaú shut hkúmdong mai wó wang jé râ ahkáng wó yû shoq, yhumsîng é buhîng lé chí sân é bang gi, hkungsô wó nyi ri. <sup>15</sup> Shinggan má gi, hkui dông nyi é bang, myoqheq hpaqchyî kut é bang, ashop é dông gungsho zùm yap é hkyô shut é bang, byù sat é bang, hparà noq é bang eq mhaú é hkyô lé ô nàu luí châng kut é bang lhunglhang nyi bum akô nghut ri.

<sup>16</sup> Ngò, Yesuq gi, haú noqkuq hpûng pé lé, shí hkyô pé saksé hkâm shit sháng gaq nghû, Ngá é maumang lagyo lé, nungmoq chyáng nhang kat bê nghut lhê. Ngò gi, Dawiq é Amyit eq Awut Ashín le, haú duqbó é Bó-myhû le nghut lhê."† gâ é lé, ngò wó gyô ri.

\* 22:7 Dang shí hkun gi, Yesuq taí é nghut lhê. † 22:16 Dang shí hkun gi, Yesuq taí é nghut lhê.

<sup>17</sup> Haû Woi-nyí eq myisik gi, "Lé aq!" gâ akô. Haû wó gyô é sù gi, "Lé aq!" ga sháng gaq. Wui shit sù ó yuq nghut kôle, lé sháng gaq; shuq nau é sù ó yuq nghut kôle, ahpaui byi a ra é asak wui lé, shuq sháng gaq.

<sup>18</sup> Laiká shî má bo é myiqhtoi dang pé lé wó gyô é bang yuq hkangmó lé, ngò sidiq byi é gi: dang haú pé má, rajung jung kat jat é sù ó yuq chyáng nghut kôle, Garai Gasang gi, laiká shî má kâ tô é wúm pé lé jé nhâng râ nghut lhê. <sup>19</sup> Myiqhtoi laiká shî má bo é dang pé lé, yu pyâm é sù ó yuq lé nghut kôle, Garai Gasang gi, laiká shî má kâ tô é asak shigâm eq chyoiyúng myuq mâ é yhang eq sêng é gû lé, yu pyâm byi râ nghut lhê.

<sup>20</sup> Shí hkyô pé lé saksé hkám byi é Sù gi, "Nghut bê, Ngò gi, a myáng má jé lé lô râ nghut lhê." ga taî ri.

Amen. Yhumsîng Yesuq ê, lé lô aq ô!

<sup>21</sup> Haû Yhumsîng Yesuq é jeju gi, Garai Gasâng é byu pê chyáng joq nyî sháng gaq ô! Amen.